




Tte Pa'alī Me' Skököl tö  
Se' a

Bribri Bible



## Contents

Íyi ulitane e' wì tkënewami	1
Jonás dör Jehovahá ttéköl e' pakè	61
Jesús Tté Buaë Kit Mateo tö	64
Jesús Tté Buaë Kit Marcos tö	113
Jesús Tté Buaë Kit Lucas tö	143
Jesús Tté Buaë Kit Juan tö	195
Ì o' Jesús ttekölpa tsá e'pa tö e' pakè	232
Yëkkuö kit Pablo tö Roma wakpa a	277
Yëkkuö tsá kit Pablo tö Corinto wakpa a	298
Yëkkuö skà kit Pablo tö Corinto wakpa a, i' ta ide böt	318
Yëkkuö kit Pablo tö Galacia wakpa a	331
Yëkkuö kit Pablo tö Éfeso wakpa a	340
Yëkkuö kit Pablo tö Filipos wakpa a	347
Yëkkuö kit Pablo tö Colosas wakpa a	352
Yëkkuö Tsá Kit Pablo tö Tesalónica wakpa a	357
Yëkkuö Skà Kit Pablo tö Tesalónica wakpa a, i' ta ide böt	361
Yëkkuö tsá kit Pablo tö Timoteo a	364
Yëkkuö skà kit Pablo tö Timoteo a, i' ta ide böt	370
Yëkkuö kit Pablo tö Tito a	375
Yëkkuö kit Pablo tö Filemón a	378
Yëkkuö kitule hebreowak a	380
Yëkkuö kit Santiago tö	398
Yëkkuö tsá kit Pedro tö	404
Yëkkuö skà kit Pedro tö, i' ta ide böt	411
Yëkkuö tsá kit Juan tö	415
Yëkkuö skà kit Juan tö i' ta ide böt	420
Yëkkuö skà kit Juan tö i' ta ide mañat	421
Yëkkuö kit Judas tö	422
Ì kkayë' Jesucristo tö Juan a, e' tté pakè	424



## **Tte Pa'alì Me' Skèköl tò Se' a**

### **New Testament Old Testament Portions in Bribri (CS:bzd:Bribri)**

Language: Bribri

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit [www.dbs.org](http://www.dbs.org) (USA), [www.bibleleague.ca](http://www.bibleleague.ca) (Canada), and [www.opendoors.org](http://www.opendoors.org) (Europe).

### **Copyright and Permission to Copy**

Copyright © 2010 Wycliffe Bible Translators, Inc.

Copyright © 2010 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society ([www.dbs.org](http://www.dbs.org)).

---

PDF generated on 2017-08-24 from source files dated 2017-08-24.

f5c2f292-a074-5258-9696-cb1bd0689f5c

ISBN: 978-1-5313-0116-3

## Íyi ulitane e' wì tkënewami

### Génesis

Si'kuaie yëkkuò i' kiè *Génesis*, e' wà kiane chë, *íyi ulitane e' wì tkënewami*. Yëkkuò i' blatëule bôt tsíní. Et tsíní e' dör capítulo et dō capítulo dabom eyök kí et (1–11). Iët tsíní e' dör capítulo dabom eyök kí bôt dō capítulo dabom skeyök (12–50). Et tsíní e' tō se' a íyi kōs e' wì pakè. Ká jai ena ká i' e' yöne kewe. Nies ñiwe, nañewe, diwö, si'wö ena bëkwö e' yöne tsawe. Es ñies dayë, ká sí, iyiwak, se' wëpa ena alakölpa, e' kōs yö' Skëköl tō, e' pakè yëkkuò et tsíní tō. Nies wes s'ditsö tsá e'pa tō ì sulu wamblë' ena ì o' Skëköl tō ie'pa tsatkoie inuì yöki, e' tso' kitule yëkkuò et tsíní kí. Nies wes s'ditsö pone'mi ká wa'ñe senuk ditséwö wa ditséwö wa ena ì kuekì s'ttò tso' taijè kuá'kì kuá'kì, e' kōs pakè yëkkuò et tsíní tō.

Yëkkuò iët tsíní tō ikkachë se' a tō wes Israel aleripa e'pa dë'bitü wëm eköl kiè Abraham e' wa. Israel aleripa wa Skëköl tō ibikeitsétke ká ulitane wakpa tsatök inuì yöki. As e' wà tkò, e' kuekì Skëköl tō Abraham klöo' iwák a. Abraham erblë' Skëköl mik buaë, e' kuekì Skëköl tō ittè me' ie' a. E' tso' kitule yëkkuò iët tsíní kí.

Ttè me' Skëköl tō Abraham a, e' è me'itō Abraham alà Isaac ena Isaac alà Jacob e'pa a. Jacob ñe' è kiè nies Israel. E' kuekì ie' aleripa kièsö Israel aleripa. Yëkkuò iët tsíní è kí itso' kitule tō wes Skëköl tō Abraham, Isaac ena Jacob, e'pa tsatkë'bitü ibolökpa kōs yöki as ttè me'itō ie'pa a e' wà tkò wake'.

### Skëköl tō íyi ulitane yö'

**1** Tsawe ta ká jai ena ká i', e' yö'at Skëköl tō. <sup>2</sup>Mik ie' tō íyi ulitane tsá yö'mi, eta ká wa'ñe kè kí ì ku' yës. Ká sí kè ta'. Di' è me'r iskië. Ká dör ttsetseë. Erë Skëköl Wiköl shkôar di' tsaka.

<sup>3</sup>Eta Skëköl tō iché: “¡Ká ñinú!”

Eta ká ñine. <sup>4</sup>Ie' tō isué tō ká ñiwe e' dör buaë, e' méatitō ñiweie. Ká ttsetse, e' méatitō nañeweie. <sup>5</sup>Ñiwe, e' kiéitō ñiwe. Ká ttsetseë, e' kiéitō nañewe. Ekkë kanewéitō ká tsawe a.

<sup>6</sup>E' bule es ta ie' tō iché: “¡Iyönú wes skátke kkò dapee es di' shuá iblatoie as kè iwöierwane ñi a!”

<sup>7</sup>Eta es iyuéitō di' blatoie. Es di' ate ká jaishet ena ká i' kí. <sup>8</sup>I' yuéitō, e' kiéitō kakölttō. Ekkë kanewéitō eta ká de bôt.

<sup>9</sup>E' bule es ta ie' iché: “¡Di' ate ká i' kí, e' e' dapa'úka ek tsíní ème as íyök poppo doka!”

Eta es iyöne. <sup>10</sup>Wé íyök poppo deka, e' kiéitō íyök. Wé di' dapaneka, e' kiéitō dayë.

Ie' isué tō e' kōs dör buaë. <sup>11</sup>E' ukuökì ta ie' tō iché: “¡Íyök kí íyi kuá ulitane tskinú! Kákò wör ta' ese, ñies kal ulitane wör ta' ese kōs tskinú iwakmik iwakmik.”

Eta es ekkëpa tskine. <sup>12</sup>Es íyök kí íyi kuá ulitane tskine kakò wör ta' iwakmik iwakmik, ñies kal wör ta' iwakmik iwakmik. Ie' tō isué tō ekkëpa kōs, e' dör buaë. <sup>13</sup>Ekkë kanewéitō eta ká de mañat.

<sup>14</sup>E' bule es ta ie' iché: “¡Ì dalöburta' yönú ká jai a! Ekkëpa dör buaë ká blatoie ñiwe nañewe, ñies ikkachoie mik ta diwö de kawö tköwoie, ñies ká shta'woie ena duas tköke e' jchenoie. <sup>15</sup>Ekkëpa kōs dalöburke taijè ká i' kí.”

Eta es iyöne. <sup>16</sup>Es ie' tō ì dalöburta' taijè ese yuéat bök. Ikibiie dör ká ñiwoie ñiweie. Wëne dalöbur diöshet e' dör olo'bunoie nañeweie. <sup>17</sup>Ekkëpa méatitō ká jai a dalöbunoie ká i' kí <sup>18</sup>ñie nañeë, ñies ká ñiwe ká nañewe e' blatoie. Ie' tō isué tō ekkëpa dör buaë. <sup>19</sup>Ekkë kanewéitō eta ká de tkël.

<sup>20</sup>E' bule es ta ie' tō iché: “¡Iyiwak serke di' a dayë a, e' kōs yönú taijè! ¡Ñies dù ulitane yönú as iur kashuk a!”

<sup>21</sup> Etā es iyiwak blubluë serke dayë a, ekkëpa yuëitō. Ñies iyiwak kōs serke di' a ena dayë a ekkëpa yuëitō iwakmik iwakmik. E' sū dù ulitane yuëitō, iwakmik iwakmik.

Ie' isuë të ekkëpa kōs dör buaë. <sup>22</sup> Etā iyiwak yuëitō e'pa a ie' er buaë ché ttè i' wa: "a' alönú taië, di' kōs, dayë kōs, e' wà iōka taië. Ñies as dù alör taië ká wa'ñe."

<sup>23</sup> Ekkëpa kanewëitō etā ká de skël.

<sup>24</sup> E' bule es tã ie' tō iché: "¡Iyiwak serke ká sí kī, e' ulitane yönú iwakmik iwakmik! ¡Iyiwak uru, iyiwak kañiru, iyiwak e' kuke įski, ekkë kōs yönú iwakmik iwakmik!"

<sup>25</sup> Etā es ie' tō iyiwak ulitane yuë ká sí kī iwakmik iwakmik. Ie' tō isuë të ekkëpa kōs dör buaë.

<sup>26</sup> E' ukuōkī tã ie' tō iché: "Ditsō yuësō wes se' es as ie'pa tkōkasō ká i' kōs wōkirie. Nima, dù, iyiwak uru, iyiwak kañiru, iyiwak e' kuke įski, ekkë kōs tso' ká i' kī, e' atdaë ie'pa ulà a."

<sup>27</sup> Mik Skëköl tō s'ditsō tsá yō', etā iyuëitō wes ie' es; Ie'pa yuëitō wëm eköl ena alaköl eköl.

<sup>28</sup> Ie' er buaë ché ie'pa a i' es:

"A' ala'r kōka taië,

a' alönú taië ká ulitane kī.

Ká i' kōs e' kané ú a' tō.

Nima, dù, ena iyiwak ulitane ekkëpa kōs wōkir a' dör, e' wà ú."

<sup>29</sup> E' ukuōkī tã Skëköl tō iché ie'pa a: "Ye' ttō ttsó. Íyi kuá kōs wōrta' ñarta', ese méatyō a' a ñë. Ñies kalwō ulitane katarta' ku'yarta' ese kōs méatyō a' a katè ku'yë. <sup>30</sup> Erë iyiwak kañiru, iyiwak uru ena dù, ekkëpa kōs a kākō méatyō katè." Etā es iate. <sup>31</sup> Ie' isuë të ekkë kōs dör buaë shūte. Ekkë kanewëitō etā ká de teröl.

**2** Es ká jai ena ká i', ñies íyi ulitane tso' iki, e' yōne one se. <sup>2</sup> Ká de kul etā i' kōs yō'bituítō e' yōne one, e' kuekī diwō e' wa ie' kè kanëblëne. <sup>3</sup> E' diwō wa kè ie' kanëblëneia ká i' yuök e' kuekī ie' iché tō

diwō e' dör buaë. Ñies ie' iché tō semana bit e' diwō bata e' dör batse'r se' a.

### Skëköl Jehová tō s'ditsō tsá yuë

<sup>4</sup> I' dör ká jai ena ká i' tsá yōneat, e' pakè.

Mik Skëköl Jehová tō ká jai ena ká i' e' yō', <sup>5</sup> e' kéwō ska' tã kam ie' tō kalī patkō ká i' kī, ñies kè yi ku' ká kanëuk. E' kuekī kam kal kuá tskir ena kam kākō tskir. <sup>6</sup> Erë di' tskirke íyök a, e' tō íyök kōs nuweke. <sup>7</sup> Etā Skëköl Jehová tō íyök yuë s'ditsōie eköl wák dör wëm. Etā ie' tō iwōiké iyik a tã iyōne se'ie tts'ëka.

<sup>8</sup> E' ukuōkī tã ie' tō ká buaala yuë ekwōki diwō tskirke e' ëka, ká kiè Edén ee. Etā wëm yō'itō, e' méatitō ká buaala e' a senuk. <sup>9</sup> Eë ie' tō kal ulitane wër bua'buä, ñies iwō dör buaë katano ese tské. Ká buaala e' shūsha, ie' tō kal tské bōlka. Kal elka dör sene michoë e' kéli. Kal iëlka e' dör íyi buaë ena íyi suluë ese jchenoie e' kéli.

<sup>10</sup> Edén ká shūa di' tskirke etō, e' tō ká buaala nuweke. Wë ká e' kkō dōwa eë di' e' ulà jcherke dōka tkëtō. <sup>11</sup> Di' ulà etō kiè Pisón. E' tkökemi ká kiè Havilá, e' kōs a. Ká e' kī oro tso'. <sup>12</sup> Oro e' dör oro bua'buä. Ñies kiō masmas bua'buä, ese tso' ena ák bua'buä kiè ónice ese tso'. <sup>13</sup> Di' ulà ëtō tkökemi ká kiè Cus, e' kōs a. E' kiè Guihón. <sup>14</sup> Iulà ëtō skà mir ká kiè Asiria diwō tskirke, e' ëka. E' kiè Tigris. Etā di' ulà bataie, e' kiè Éufrates.

<sup>15</sup> Mik Skëköl Jehová tō wëm tsémi méat ká buaala atë Edén e' shūa as ikaneütō, as ikkō'nütō, <sup>16</sup> etā ie' tō ttè dalöiëno i' mé iã: "Ká buaala e' kéliwō ulitane katëmibō. <sup>17</sup> Erë íyi buaë ena íyi suluë ese jchenoie e' kéliwō kè katar. Mik kal e' wō katébō, etā be' duōwaraë. E' kuekī kè ikatar."

<sup>18</sup> E' ukuōkī tã ie' tō iché: "Kè idör bua' wëm a senuk ekōrla. Súyō ie' a wapie yuë eköl ikimuk buaë." <sup>19</sup> Etā iyiwak yō'itō íyök wa ekkë kōs debitu iwa wëm a suë

tò ima ie' tò ikiè mekàmi. Tà wes wëm tò ikiè méka es iatë. <sup>20</sup>Es wëm tò iyiwak uru ena iyiwak kañiru, ñies dù, ekkè kòs kiè méka. Erë kè ie' kìmuk kune buaè ie' wapieie.

<sup>21</sup>Età Skèkòl Jehová tò wëm kapòwéwa taië, e' dalewa ie' tò ichane yéttsa etò, e' chkà wöiéwaneitò. <sup>22</sup>Ichane e' yueitò alakölie tà idebitu iwa wëm a. <sup>23</sup>Mik wëm tò isué, età ichéitò:

“¡I' je' dör ye' wák dichéwö ena ye' wák chkà! Alaköl dë'ka wëm wa, e' kuëki ikir-daë alaköl.”\*

<sup>24</sup>E' kuëki wëpa kè serpaia iyé ena imi e'pa dapömik, iserdawa alaköl tà. Ie'pa böl serdaë ñita, tà imía wes wák eköl è es.

<sup>25</sup>E' këska' tà wëm ena alaköl iëter sume, erë ie'pa kè wà jaë jcher.

### S'ditsö tò Skèkòl ttò dalösewéwa

**3** Tkabè tso' etò, e' erbikò taië s'ki'tò'woie iyiwak kañiru yö' Skèkòl Jehová tò, ekkè kòs tsata. Ká et tà ie' tò alaköl a ichaké:

—¿Mokí Skèkòl tò iyë'at a' a' tò ká buaè shua kal ulitane tso', e' wö kè katar yës?

<sup>2</sup>Alaköl tò iüté:

—Au, e' kè dör es. Ie' tò sa' a' iché tò kal ulitane wö katarmi. <sup>3</sup>Erë kal àr ká i' shushaë, e' wö kè katanuk, kè e' kanuk sa' a. E' wamblé sa' tò, età sa' duóralur.

<sup>4</sup>Età tkabè tò iché alaköl a:

—Au, e' dör kache. A' kè duópawa. <sup>5</sup>Ie' wà ijcher buaè tò mik kalwö e' katéwa a' tò, età ì dör buaè, ì dör sulué e' jcherdaë a' wà wes ie' wák wà ijcher es.

<sup>6</sup>Età alaköl isué tò kalwö e' wër buaè katè. Ie' éna ikatak íyi jchenoie buaè. E' kuëki ie' tò kalwö batsée, katéwaitò. E' ukuökí tà ie' tò imé iwëm a, età iwëm ikatéwa ñies. <sup>7</sup>E' bet tà ì dör sulu, ì

dör buaè ese ane ie'pa éna, età ie'pa wà ijchenewa tò ie'pa iëter sume. Età ie'pa tò kal kiè higuera, e' köyök yué banoie e' wa ie'pa e' patréwa.

<sup>8</sup>Siwa' bitsírke tsáli, età wëm ena ilaköl tò Skèkòl Jehová shkòkedur ká buaè shua, e' ttsé. E' yöki ie'pa e' blélur kal tso' taië ese shua.

<sup>9</sup>Erë Skèkòl Jehová tò wëm kié tà ichaké:

—¿Wé be' tso'?

<sup>10</sup>Wëm tò iüté:

—Ye' tò ittsé tò be' shkòkedur ká buaala shua. Ye' dur sume, e' kuëki ye' suane be' yöki. E' kuëki ye' e' bléwa be' yöki.

<sup>11</sup>Età Skèkòl tò ie' a' iché:

—¿Yi be' a' iché tò be' dur sume? Ichó ña tò kalwö yë'yö be' a' tò kè ikatar ¿e' katébö?

<sup>12</sup>Ie' tò iüté:

—Be' tò ye' a' alaköl me', ye' wapieie, e' tò ye' a' kalwö mé katè. E' katéwayö.

<sup>13</sup>Età Skèkòl Jehová tò alaköl a' ichaké:

—¿Íók bö iwamblé?

Ie' tò iüté:

—Tkabè tò ye' kitéka, e' kuëki ye' tò kalwö e' katéwa.

<sup>14</sup>Età Skèkòl Jehová tò tkabè a' iché:

—Í wamblé be' tò, e' kuëki ye' tò be' a' iché tò iyiwak kòs shua be' è weirdaë michoë. Këkraë be' shkóraë e' kuule be' batsí' kí tà be' kkò a' ká po mirawa. <sup>15</sup>Be' ena alaköl meraatyö ñi bolökíe. Be' aleripa kòs ena alaköl aleripa kòs, e'pa atë ñi bolökíe ñies. Alaköl aleri eköl tò be' wökir shka'weraë ena be' tò ie' klò kaniñak shka'weraë.

<sup>16</sup>E' ukuökí tà ie' tò iché alaköl a:

—Mik be' alà kirketke età be' weirdaë siarë, idalë'r taië e' ttersaëbö. Erë be'

\*2:23 Hebreoie ttè kiane yënuK wëm e' dör ish ena ttè kiane yënuK alaköl e' dör isha.

k<sub>i</sub> be' wëm kiardaë ena ie' dōraë be' wōkirie.<sup>†</sup>

<sup>17</sup>E' ukuōk<sub>i</sub> t<sub>a</sub> ie' tō iché wëm a:

—Be' tō be' alakōl ttō iūté, kalwō yè'yō be' a tō kè ikatar, e' wà katébō. E' kuek<sub>i</sub> be' weirdaë ñies. Be' kuek<sub>i</sub> íyōk sulu'wera<sub>w</sub>yō. Be' kaneblōraë darērēë be' chkè yuloie. <sup>18</sup>Íyōk k<sub>i</sub> dika'chka ena kākō sulusi, alōrdaë. Ñies kalwō kañiru katerabō. <sup>19</sup>Be' kawōt<sub>a</sub> kaneblōk darērēë chkoie dō mik be' duowa, mīane íyōkie wes be' dōr kuaë es et<sub>a</sub>. Be' yöne íyōk wa, e' kuek<sub>i</sub> be' dōrane íyōkie.

<sup>20</sup>Wëm tsá yöne, e' kiè Adán. Ilakōl dōr se' m<sub>i</sub> tsá. E' kuek<sub>i</sub> Adán tō ikiè méka Eva.<sup>‡</sup>

<sup>21</sup>Et<sub>a</sub> Skékōl tō datsi' yué ie'pa a iyi-wak kkuōlit wa, t<sub>a</sub> ie'pa paiéitō. <sup>22</sup>Et<sub>a</sub> ie' tō iché: “Íñe ì dōr buaë ena ì dōr suluë, e' jcher ditsō w<sub>a</sub> wes se' w<sub>a</sub> ijcher es. E' kuek<sub>i</sub> dō' ie'pa mi', sene michoë e' kéli wōbatsōk katè t<sub>a</sub> iser michorak.”

<sup>23</sup>E' kuek<sub>i</sub> ie' tō wëm ena ilakōl yétts<sub>a</sub> k<sub>a</sub> buaala tso' Edén e' a, t<sub>a</sub> ipatkémiitō íyōk wakanéuk. Íyōk wa wëm yöne e' k<sub>i</sub> ipatkémi kaneblōk. <sup>24</sup>Ie' tō itrè'wëshka, e' ukuōk<sub>i</sub> t<sub>a</sub> ì ttsé'ka pik t<sub>a</sub> tso' k<sub>a</sub> jai a kiè kërub, e'pa tuléw<sub>a</sub>itō k<sub>a</sub> buaala e' ñalé ska' diwō tskirke e' èk<sub>a</sub> ikkō'nuk. Ñies tabè wōnarke dalölöë ratkear siw<sub>a</sub> k<sub>i</sub>, e' méatitō as kè yi dōw<sub>a</sub>ia sene michoë kéli ska'.

#### Caín tō iël kiè Abel, e' ttéw<sub>a</sub>

**4** Et<sub>a</sub> Adán sené Eva t<sub>a</sub>. Eva dunek<sub>a</sub> t<sub>a</sub> ilà kune wëm. Ikiè mék<sub>a</sub>itō Caín.<sup>†</sup> Mik alà kune, et<sub>a</sub> Eva tō iché: “Jehová tō ye' kimé, e' kuek<sub>i</sub> ye' alà kune ekōl wëm.” <sup>2</sup>E' ukuōk<sub>i</sub> t<sub>a</sub> ilà skà kune ek, e' kiè Abel, Caín èl tsirla. Abel tō obeja alōwēke. Caín tō dalì kuatkeke.

<sup>3</sup>K<sub>a</sub> et t<sub>a</sub>, Caín w<sub>a</sub> idali wōne, ese kak mí mè Jehová a idalōioie. <sup>4</sup>Et<sub>a</sub> Abel w<sub>a</sub> ie' icha mí ñies. Ie' obeja tsá bua'bu<sub>a</sub>, ese kak mí ie' w<sub>a</sub> mè Jehová a. Abel ena ì méitō e' wër buaë Jehová wa. <sup>5</sup>Erè ie' kè w<sub>a</sub> Caín ena ì méitō e' sune es, e' kuek<sub>i</sub> Caín ulunek<sub>a</sub> taië, iwō yée suluë. <sup>6</sup>E' kuek<sub>i</sub> Jehová tō Caín a ichaké: “¿Ílōk be' ulune wō yée sulu? <sup>7</sup>Be' tō ì bua' úpa, e' ma be' jañuwe tsuleë. Erè ì sulu wamblébō, e' kuek<sub>i</sub> ì sulu e' métèr bër be' panuk namuie e' alok<sub>a</sub> be' k<sub>i</sub>. Erè be' kè e' alōk<sub>a</sub> iki.”

<sup>8</sup>K<sub>a</sub> et t<sub>a</sub>, Caín tō iël Abel kiémi kañika. Mik ie'pa demi kañika, et<sub>a</sub> eë Caín ñippék<sub>a</sub> iël t<sub>a</sub> et<sub>a</sub> iël ttéw<sub>a</sub>itō. <sup>9</sup>E' ukuōk<sub>i</sub> t<sub>a</sub> bet, Jehová tō Caín a ichaké:

—¿Wé be' èl Abel?

Caín tō iūté:

—Ye' kè w<sub>a</sub> ijcher. Ye' kè dōr ie' kkō'nukwak.

<sup>10</sup>Skékōl tō ie' a iché:

—¿Ílōk bö iwamblé es? Be' èl ttéw<sub>a</sub>bō, e' pé tene taië íyōk k<sub>i</sub>, e' nuí tso' be' k<sub>i</sub>. E' k<sub>i</sub> ye' kawōt<sub>a</sub> be' we'ikōk. <sup>11</sup>E' kuek<sub>i</sub> be' weirdaë íyōk k<sub>i</sub> wé be' tō be' èl pé tkō'wé, e' k<sub>i</sub> be' yerattsayō. <sup>12</sup>Be' kaneblōmi taië, erè kè wà wōrpa buaë. Be' kawōt<sub>a</sub> shkōk k<sub>a</sub> wañe, kè a eno t<sub>a</sub> yès.

<sup>13</sup>Et<sub>a</sub> ie' tō Jehová iūté:

—E' darērè ye' a. Kè ye' a idalè'ttsénuk.

<sup>14</sup>Íñe be' tō ye' uyétts<sub>a</sub> k<sub>a</sub> i' k<sub>i</sub>, e' ukuōk<sub>i</sub> t<sub>a</sub> ye' kawōt<sub>a</sub> shkōk k<sub>a</sub> wañe kamie, kè a eno t<sub>a</sub>. Be' kè ku'ia ye' t<sub>a</sub>, e' kuek<sub>i</sub> yi ye' kuéw<sub>a</sub>, ese tō ye' tteraw<sub>a</sub>.

<sup>15</sup>Erè Jehová tō iūté:

—Yi be' ttéw<sub>a</sub>, ese k<sub>i</sub> weirdaë siarè taië iskéie.

Et<sub>a</sub> Skékōl tō iwakyuée iwà kkachōie as yi tō ikuéw<sub>a</sub>, ese kè tō ittōw<sub>a</sub>. <sup>16</sup>Et<sub>a</sub> Caín e' yétts<sub>a</sub> Jehová wōrk<sub>i</sub> t<sub>a</sub> imía k<sub>a</sub>

<sup>†</sup>3:16 Mik be' alà kurketke...ie' dōraë be' wōkirie: Ñies ttè e' mane'wëmisō i' es: Be' éna e' alak<sub>a</sub> be' wëm k<sub>i</sub>, erè ie' e' alōrak<sub>a</sub> be' k<sub>i</sub>.

<sup>‡</sup>3:20 Eva: Hebreoie s'kiè e' wà kiane chè ttsé'ka.

<sup>†</sup>4:1 Caín: Hebreoie s'kiè e' wà kiane chè ye' ulà a ide.

kiè Nod ee, ká e' atē Edén diwö tskirke e' kke.

<sup>17</sup> Etā Caín sené ilaköl tā. Iduneka tā ilà kune wák dör wëm, e' kiè Enoc. E' ukuöki tā Caín tö ká yué et, kiè mékaitö ilà kiè wa Enoc. <sup>18</sup> Enoc dör Irad yé. Irad dör Mehujael yé. Mehujael dör Metusael yé. Metusael dör Lámec yé.

<sup>19</sup> Etā Lámec senéwa alakölpa böl tā. Eköl kiè Adá, eköl kiè Silá. <sup>20</sup> Etā Adá dé' alàè kiè Jabal. E' aleripa dör iyiwak alökwakpa e' serke úla yöule datsi'tak wa ese a. <sup>21</sup> Ie' èl kiè Jubal. E' aleripa dör ma'ma kicha tā' guitarra sù ena ma'ma pulè sù ese bla'ukwakpa. <sup>22</sup> Silá dé' alàè ñies kiè Tubal-Caín. E' aleripa dör tabechka kiè bronze ena hierro ese sté. E' kutà kiè Naamá.

<sup>23</sup> Ká et tā Lámec tö iché ilakölpa a:

“A Adá, a Silá, ye' ttò ttsò:

Wëm eköl duladula tö ye' shkaö,

e' kueki ye' tö ikötwa.

<sup>24</sup> Yi tö Caín ttéwa, e' tö iské tueraë siarë, erë yi tö ye' ttéwa, e' tö iské kí tueraë jaishet shute.”

<sup>25</sup> Adán alà skà kékane ilaköl tā wák wëm. Eva tö iché: “Skéköl tö ye' a alà ské mé eköl, Caín tö Abel kötwa, e' skéie.” E' kueki ie' tö ikiè méka Set.<sup>8</sup>

<sup>26</sup> Ñies Set de alàè wák wëm kiè mékaitö Enós. E' kèwö ska' tā s'ditsö tö Skéköl a iyi tsá ki'mi ena idalöië'mi ikiè Jehová e' wa.

### Adán aleripa

**5**<sup>1-2</sup> Mik Skéköl tö s'ditsö tsá yö', etā iyuéitö wës ie' wák es. Ie'pa yuéitö wëm ena alaköl. Ie' er buaë ché ie'pa a. Ie' tö ie'pa yué, e' diwö shà tā ikiè mékaitö s'ditsö. I' dör Adán aleripa e'pa kiè.

<sup>3</sup> Mik Adán kí duas de cien eyök kí dabom mañayök (130), etā ie' alà kune eköl, e' dör wës ie' wák es, ikiè mékaitö

Set. <sup>4</sup> E' ukuöki tā ie' kí seneia duas cien paryök (800). E' shua ie' ala'r kí kune wëpa ena alakölpa. <sup>5</sup> Es ie' kí duas deka seraā cien suliyök kí dabom mañayök (930) etā ie' blénewa.

<sup>6</sup> Mik Set kí duas de cien eyök kí skel (105), etā ie' alà wëm kiè Enós, e' kune.

<sup>7</sup> E' ukuöki tā ie' kí seneia duas cien kuryök kí kul (807). E' shua ie' ala'r kí kune wëpa ena alakölpa. <sup>8</sup> Es ie' kí duas deka seraā cien suliyök kí dabom eyök kí bök (912) tā iblénewa.

<sup>9</sup> Mik Enós kí duas de dabom suliyök (90), etā ie' alà wëm kiè Cainán, e' kune.

<sup>10</sup> E' ukuöki tā ie' kí seneia duas cien paryök kí dabom eyök kí skel (815). E' shua ie' ala'r kí kune wëpa ena alakölpa.

<sup>11</sup> Es ie' kí duas deka seraā cien suliyök kí skel (905) tā iblénewa.

<sup>12</sup> Mik Cainán kí duas de dabom kuryök (70), etā ie' alà wëm kiè Mahalalel, e' kune.

<sup>13</sup> E' ukuöki tā, ie' kí seneia duas cien paryök kí dabom tkëyök (840). E' shua ie' ala'r kí kune wëpa ena alakölpa. <sup>14</sup> Es ie' kí duas deka seraā cien suliyök kí dabom (910) tā iblénewa.

<sup>15</sup> Mik Mahalalel kí duas de dabom teryök kí skel (65), etā ie' alà wëm kiè Jéred, e' kune.

<sup>16</sup> E' ukuöki tā, ie' kí seneia duas cien paryök kí dabom mañayök (830). E' shua ie' ala'r kí kune wëpa ena alakölpa. <sup>17</sup> Es ie' kí duas deka seraā cien paryök kí dabom suliyök kí skel (895) tā iblénewa.

<sup>18</sup> Mik Jéred kí duas de cien eyök kí dabom teryök kí bök (162), etā ie' alà wëm kiè Enoc, e' kune.

<sup>19</sup> E' ukuöki tā, ie' kí seneia duas cien paryök (800). E' shua ie' ala'r kí kune wëpa ena alakölpa. <sup>20</sup> Es ie' kí duas deka seraā cien suliyök kí dabom teryök kí bök (962) tā iblénewa.

<sup>21</sup> Mik Enoc kí duas de dabom teryök kí skel (65), etā ie' alà wëm kiè Matusalén, e' kune. <sup>22</sup> Ie' tö Skéköl ttò

<sup>8</sup>4:25 **Set:** Hebreoie s'kiè e' wà kiane chè ie' tö imé.



è dalöieke. Musalén kune, etä ie' kí seneia duas cien mañayök (300). E' shua ie' ala'r kí kune wëpa ena alakölpä. <sup>23</sup> Es ie' kí duas deka seraä cien mañayök kí dabom teryök kí skel (365). <sup>24</sup> E' sene' buaë Skëköl ta, e' kuëki ká et ta Skëköl wa ie' mítser ttsë'ka, e' kuëki kè ie' ku'ia.

<sup>25</sup> Mik Matalén kí duas de cien eyök kí dabom paryök kí kul (187), etä ie' alà wëm kiè Lámeç, e' kune. <sup>26</sup> E' ukuökí ta, ie' kí seneia duas cien kuryök kí dabom paryök kí bök (782). E' shua ie' ala'r kí kune wëpa ena alakölpä. <sup>27</sup> Es ie' kí duas deka seraä cien suliyök kí dabom teryök kí sulitu (969) ta iblënewa.

<sup>28</sup> Mik Lámeç kí duas de cien eyök kí dabom paryök kí bök (182), etä ie' alà kune wëm. <sup>29</sup> E' kiè mékaitö Noé.\*\* Mik ie' tö ilà kiè méka, etä ie' tö iché: “Jehová tö íyök suluö'wa. E' kuëki se' kawöta kanëblök darërë ikuatkoie; erë alà i' tö se' keraë enuk.” <sup>30</sup> Noé kune, e' itökí Lámeç kí seneia duas cien skeyök kí dabom suliyök kí skel (595). E' shua ila'r kí kune wëpa alakölpä; <sup>31</sup> Es ie' kí duas deka seraä cien kuryök kí dabom kuryök kí kul (777) ta iblënewa.

<sup>32</sup> Noé kí duas de cien skeyök, e' itökí ila'r kune mañal. Ikibi kiè Sem. Ishu êk kiè Cam. Ibata êk kiè Jafet.

### S'ditsö ì sulu è wambleke këkraë

**6**<sup>1-2</sup> Mik s'ditsö alónëmi taië ká i' kí, etä Skëköl ala'r†† tö isuë tö s'ditsö alà busipa dör bua'buaa. E' kuëki ie'pa tö busipa wa ie'pa wöbatse ese tsélur. <sup>3</sup> Erë Jehová tö iché: “Ditsö dör duöta'wa ese wakpa. Iñe ta ye' kè tö kawö mepaia ditsö a seno ká taië. Es iserdaë duas cien eyök kí dabom böyök (120), ekkë ulat.”

<sup>4</sup> Mik Skëköl ala'r bak senuk s'ditsö alà busipa ta alà koka ie'pa ta, etä e' këska' ta wëpa blubluë, kakkeë, esepa welepa bak ká i' kí. Nies e' ukuökí wëpa esepa bakia. E'pa dör pé' darërë kkeauleka taië ia'chki ta ese.

<sup>5</sup> Jehová tö isuë tö s'ditsö tö ì sulu è wambleke taië shute. Ì suluë è bibeitseke ie'pa tö këkraë. <sup>6</sup> E' kuëki Skëköl er a idalënëne taië. E' tö ibikeitsé: “Kè yö ditsö yuópa.” <sup>7</sup> Etä ie' iché: “Ditsö yö' ye' tö ká i' kí, súyö e'pa ewëwa. Nies iyiwak kos serke ká sí kí, e' ewerawayö. ¿Iie ye' tö ie'pa yö'?” <sup>8</sup> Erë wëm tso' eköl kiè Noé, e' sueke Jehová tö er bua' wa.

### Noé tö kanò bërie yué

<sup>9</sup> Ttë ikkë dör Noé pakë.

Noé dör wëm yësyësë Skëköl wörki. Këkraë ie' tö Skëköl ttö dalöieke buaë. E' eköl è serke wës Skëköl kí ikiane es. <sup>10</sup> E' ala'r dör mañal wëpa kiè Sem, Cam, ena Jafet.

<sup>11</sup> Skëköl wörki s'ditsö tso' e' wamblök sulu ème, ñippök taië shute. <sup>12</sup> E' tö isuë tö taië iyi suluë è tso' íyök kí. <sup>13</sup> E' kuëki ie' tö Noé a iché: “Ye' tö ibikeitsétke tö ditsö kos tso' ká i' kí e' ewerawayö se. Ie'pa ñippöke taië shute ká i' kí. E' kuëki ye' tö ditsö kos tso' ká i' kí e' ewerawa seraä di' taië wa. <sup>14</sup> E' kuëki kanò yuó etö bërie kal bua'buaa ese wa, e' shu blató. Kanò wöar tso' ipamik, e' wötó kiöchka dalolo bötsböts ese wa u'rki ena ishua as di' kè tköwaia. <sup>15</sup> Kanò yuó batsí metro döka cien eyök kí dabom mañayök kí skel (135 metros) ekkë. Nies isholó yuó metro döka dabom böyök kí böt kí shaböts (22,5 metros) ekkë. E' sù ispé yuó metro döka dabom eyök kí mañat kí shaböts (13,5 metros) ekkë.

\*\*5:29 Noé: Hebreoie s'kiè e' wà kiane chè enuk.

††6:1-2 Skëköl ala'r: Kè s'wa ijcher mokí tö yi chéitö es. Welepa tö ibikeitsé tö e' dör Skëköl biyöchökwakpaie ö aknamaie erë Jesús tö iché tö esepa kè a senukwa s'ditsö ta (Marcos 12.25). Welepa skà tö ibikeitsé tö e' dör s'ditsö wésele ser suluë. Ì wamblekerakitö ese kè wër buaë Skëköl wa, e' è jcher se' wa.

<sup>16</sup> Kanò k<sub>i</sub> u yuók<sub>a</sub>, erè kanò kkò k<sub>i</sub> iu-  
lat múat metro shábòts. Kanò sh<sub>u</sub> blató  
mañat kuò. Nies iwékkò yuó et kanò spé  
mik shkowaie kanò a. <sup>17</sup> Di' patkerayó iyi  
tso' ttsé'ka ká i' k<sub>i</sub> e' kos ewowa. Ekké  
duórawa seraá ká wa'ñe. <sup>18</sup> Erè ye' ttè  
meraè be' a tò be' tsatkerayó kanò a  
di' yöki. Be' alar' ena be' alaköl ena be'  
yakpa, e'pa tsúmi e' ta kanò a. <sup>19</sup> E' sù  
iyiwak kuá'k<sub>i</sub> kuá'k<sub>i</sub> tso' ká sí k<sub>i</sub>, e' iómi  
kanò a etò wé'ñe etó alaki as itsatkér wes  
be' es. <sup>20</sup> Iyiwak kos ió kanò a. Iyiwak  
kuá'k<sub>i</sub> kuá'k<sub>i</sub> urta', iyiwak uru, dò iyiwak  
e' kúke iski, e' kos iómi kanò a, etò wé'ñe  
etó alaki, as kè iduölur. <sup>21</sup> Nies chkè uli-  
tane dapa'ú bló be' a ena iyiwak a katè."

<sup>22</sup> Eta ekké kos wakanewé Noé tò se  
wes Skéköl tò iché ia es.

### Di' bak taiè ká i' k<sub>i</sub>

**7** <sup>1-4</sup> E' ukuók<sub>i</sub> ta Jehovahá tò Noé a iché:  
"Iñe kuiki ta ye' tò kal<sub>i</sub> patkeraè ká i'  
k<sub>i</sub> doka ká dabom tkéyök (40) ñiè nañeè.  
iE' wa iyi ulitane yö' ye' tò tso' ttsé'ka ká  
sí k<sub>i</sub>, e' kos ewerawayó yés! Erè ye' tò  
isué tò ditsó ulitane shua be' è serke buaè  
yésyèsè wes ye' k<sub>i</sub> ikiane es. E' kueki  
be' e' iók<sub>a</sub> kanò a be' yamipa kos ta.  
Nies iyiwak batse'r<sup>††</sup> kos ese tsúmi doka  
kuktó wé'ñe kuktó alaki. Erè iyiwak kè  
dör batse'r, ese tsúmi etò wé'ñe etó alaki.  
E' sù nies dù kuá'k<sub>i</sub> kuá'k<sub>i</sub> tsúmi doka  
kul wé'ñe kul alaki as kè ierwa. Kos ttè  
chéyö be' a, e' wakaneú es." <sup>5</sup> Eta e' kos  
wakanewé Noé tò yésyèsè wes Jehovahá tò  
ie' a iché es.

<sup>6</sup> Mik di' bak taiè ká i' k<sub>i</sub>, eta Noé k<sub>i</sub>  
duas tso' cien teryök (600). <sup>7</sup> Ie' e' iéka  
kanò a ila'r ena ilaköl ena iyakpa e'pa kos  
ta e' tsatkök di' alörke taiè e' yöki. <sup>8-9</sup> Iyi-  
wak batse'r, e' sù iyiwak kè dör batse'r,  
iyiwak e' kúke ibatsi' k<sub>i</sub> nies dù, ekké

kos dewa kanò a Noé ta bölka bölka wes  
Skéköl tò iché ia es.

<sup>10</sup> Ká de kul, eta di' tò ká katémitke.  
<sup>11</sup> Noé k<sub>i</sub> duas de cien teryök (600), k<sub>i</sub> si'  
et k<sub>i</sub> ká dabom eyök k<sub>i</sub> kul (17). E' diwó  
shà ta iyök tskiolone ta di' tso' idikia  
e' deka taiè ká wa'ñe. Nies ká jaishet  
kköburo lone ta di' biteshka taiè kal<sub>i</sub>e  
ká i' k<sub>i</sub>. <sup>12</sup> Eta kal<sub>i</sub> yéne darèrèè doka  
ká dabom tkéyök (40) ñiè nañeè. <sup>13</sup> Kal<sub>i</sub>  
yénemi, e' diwó shà ta Noé e' iéka kanò a  
ila'r ta. Ila'r kiè Sem, Cam ena Jafet. E' sù  
ilaköl, iyakpa mañal, e'pa e' iéka nies ie'  
ta kanò a. <sup>14</sup> Ie'pa ta iyiwak ulitane dewa  
kanò a, iyiwak uru, iyiwak kañiru, iyi-  
wak e' kúke iski k<sub>i</sub> ena dù ulitane. Ekké  
kos dewa kanò a ie'pa ta. <sup>15</sup> Iyiwak kos  
ekké dewa kanò a bölka bölka. <sup>16</sup> E' shua  
imí wé'ñe etó alaki etó, wes Skéköl tò  
iché ia es. E' one yés ta, Skéköl tò kanò  
wékkò wótéwa.

<sup>17</sup> Eta kal<sub>i</sub> yénemiie doka ká dabom  
tkéyök (40). Wes di' alör mirka es kanò  
batsemirkaitó. <sup>18</sup> Es di' k<sub>i</sub> alónemi taiè  
ta kanò batsemirkaitó buaè. <sup>19-20</sup> Es di'  
alóneka taiè kabata kos blublue, e' tsa-  
ta jaishet dò metro kul ekké. <sup>21</sup> Es kos  
iyi tso' ttsé'ka ká sí k<sub>i</sub>, ekképa duolur  
di' a se. Dù kos, iyiwak uru kos, iyiwak  
kañiru kos, iyiwak e' kúke iski kos, nies  
s'ditsó ekképa kos duolur yés. <sup>22</sup> I kos tso'  
ká sí k<sub>i</sub> ttsé'ka, e' enewa se. <sup>23</sup> Erè Noé  
ena i' tso' ie' ta kanò a, e'pa è tsatkéne.  
Eta imalepa kos e' enewa. Es nies iyiwak  
ulitane ewéwa di' tò. Dù ulitane, iyiwak  
uru, iyiwak kañiru dò iyiwak e' kúke iski,  
ekké kos enewa seraá. <sup>24</sup> Es di' até iyök  
k<sub>i</sub> ká doka cien eyök k<sub>i</sub> dabom skeyök  
(150) ekké.

### Di' sinewane

**8** Erè Skéköl kè éna Noé ché'wa. Nies  
iyiwak ulitane tso' Noé ta kanò a e'

††7:1-4 **Iyiwak batse'r**: E' wà kiane ché iyiwak kè dör ná ie'pa a. Se' welepa tò iché  
iyiwak skítane.

kè ch'è'wa ie' éna. Ie' tò siwà' patké as itò di' siùwane ká wa'ñe. Età di' pasinemine énaéna. <sup>2</sup>Íyök tskirólone e' wöténene. Nies ká jaishet kköburołone e' wötërułunene. Età kalì wöklönewà kè yërku'ia. <sup>3</sup>Di' tso'ia e' pasirmirne énaéna. Ká de cien eyök kì dabom skeyök (150), età di' sirmir éme. <sup>4</sup>E' kì si' de teröl (6) diwö de dabom eyök kì kul (17), età erpa kanò sinekà kabata kiè Ararat e' kì. <sup>5</sup>Età di' pasinemiie. Si' de dabop (10), e' tsá diwö, età kabata kákkè ese wënemitke.

<sup>6</sup>E' kì ká de dabom tkëyök (40), età Noé tò kanò wékkò tsitsir kköppée. <sup>7</sup>Ie' tò dù öłó sù, e' émi et. Erè dù e' kè dë'iane kanò a ie' urke wishwish dò mik di' sine età. <sup>8</sup>E' ukuöki tà ie' tò nuböl émi et isuöie tò ká sinene. <sup>9</sup>Erè di' tso'ia íyök kì, kam isirwà, e' kuëki nuböl dene kanò a. Kè ie' wà ká ulat poppo kune e' tkowà. Noé tò nuböl klö'wéwà ulà wa tà itséwaneitò kanò a.

<sup>10</sup>Ie' tò iskà pané döka ká kul, età ie' tò nuböl skà émine. <sup>11</sup>Ká tuinemitke tà nuböl dene, e' wà kal ulatska debitù ikà kì. Es Noé éna iane tò íyök kì sirmir. <sup>12</sup>Ie' tò iskà pané döka ká kul, età ie' tò nuböl skà émine. Nuböl e' kè dë'iane.

<sup>13</sup>Mik Noé kì duas tso' cien teryök kì et (601), età íyök pasinene. Età si' kewe, e' tsá diwö, ie' tò kanò kì u tso' e' kléttsa. Età ie' isué tò íyök pasinene. <sup>14</sup>Kawö de si' et kì diwö dabom böyök kì kul (27), età ie' isué tò íyök pasinene seraa. <sup>15</sup>Età Skëköl tò ie' a iché: <sup>16</sup>“Be' e' yóttsa kanò a, be' alaköl tà, be' ala'r tà, be' yakpa tà ñies. <sup>17</sup>Es iyiwak ulitane yółurbö se. Dù ena iyiwak uru ena iyiwak e' kuke iski e' kos yółurbö kanò a, as imi' ká wa'ñe alönuk taië ká wà iökne.”

<sup>18</sup>Es Noé alaköl ena ila'r ena iyakpa, e'pa e' yélur kanò a. <sup>19</sup>Es ñies iyiwak ulitane, uru ena kañiru ena iyiwak e' kuke iski, ñies dù e' kos e' yéttsa kanò

a se. <sup>20</sup>E' ukuöki tà ie' tò ák kataté ka'ie<sup>¶</sup> et Jehovah a. E' bata kì ie' tò iyiwak bats'e'r ese jché ña'wéitò etò etò Jehovah dalöioie. Nies dù bats'e'r jchéitò ña'wéitò Jehovah a etk etk. <sup>21</sup>Mik ishklé alar buaë, e' demi Jehovah ska' tà ittseítò tà ibikeitséitò: “Eré ditsö ià duladula döka këchke, età ì sulu è bikeitsekitò. Erè kè yö ká sulu'wepawaia ie'pa kuëki. Es ñies kè yö ì kos tso' ttsé'ka e' ewëwawaia wes yö iewéwa es.

<sup>22</sup>“Ká i' tso'ia, età dali kuatkërmi, iwà wörmì; kaba tso', kase tso' ñies; kalì tso', duas tso' ñies; ká ñiwe tso', ká nañewe tso' ñies.”

### Skëköl Jehovah tò ittè mé Noé a

**9** Età Skëköl er buaë ché Noé a ñies ila'r a tà ichéitò ie'pa a: “A' alönú taië. Ká wa'ñe wà ióné a' ala'r wa. <sup>2</sup>Ditsö yöki iyiwak ulitane suardaë. Iyiwak ulitane urke kashuk a ena iyiwak serke ká sí kì ena iyiwak serke dayé a, e' kos ate a' dikia. <sup>3</sup>Iyiwak ulitane ena kalwö ena kakö e' katëmi a' tò wé kiane a' kì ese. E' kos méatyö a' a katanoie. <sup>4</sup>Chkè ulitane katëmi a' tò, erè kè ikatar ipé ta, se' serke s'pé mik e' kuëki. <sup>5</sup>Se' serke s'pé mik, e' kuëki kè se' meneat ñi ttökwa, e' nuí tà. Yi tò eköl ttéwa, ese kichatërdaë. E' sù iyiwak wé tò s'ttéwa, ese kawöta ttéwa ñies. A' wé tò s'ttéwa, ese nuí patueraëitò ye' a.

<sup>6</sup>“Skëköl tò s'ditsö yö' wes ie' es, e' kuëki yi tò se' ttéwa, ese wák kawöta' ttéwa wake'.

<sup>7</sup>Erè a' alönú taië, ká wa'ñe wà ió ala'r wa.”

<sup>8</sup>Ñies Skëköl tò iché Noé a ena ila'r a: <sup>9-10</sup>“Íñe ye' ttè mukeat a' a ena iyiwak e' yéttsa kanò a a' tà, e' kos a. <sup>11</sup>Mok-ië ye' tò a' a iché tò ye' kè tò ditsö ena iyiwak tso' ká wa'ñe, e' kos ewëwawaia

<sup>¶</sup>8:20 Ák kataté ka'ie: E' wà kiane ché si'kuaie altar.

di' wa. Di' kè döpaia ká wa'ne sulu'ukwa wes itka es." <sup>12-13</sup>Ye' tó shkaba' tkekear mò shua iwà kkachoie a' a ena ditsö ulitane a tó ye' tte méatyö a' a ena iyiwak kos a kekraë. <sup>14</sup>Mik ye' tó mò patké ta e' shua shkaba' tkéne e' wërmi, <sup>15</sup>eta ye' éna iane tó ye' tte me'atbak a' a ena iyiwak kos a tó kè ye' tó ditsö ena iyiwak ulitane ewepawaia di' wa. <sup>16</sup>Es mik shkaba' tkéne mò shua e' suéyö, eta bet ye' éna idaa tó ye' tte me'at ditsö a ena iyiwak kos a michoë kekraë. <sup>17</sup>E' dör iwà kkachoie tó ye' tte me'atbak ditsö ulitane a nïes iyiwak tso' ká i' kî e' kos a." Es Skëköl tó Noé a iché.

### Noé alà kiè Cam e' kè wà iyé dalò ta'

<sup>18</sup>Noé ala'r e' yè'lur kanò a, e'pa kiè Sem, Cam ena Jafet. Cam dör Canaán yé. <sup>19</sup>E'pa mañal dör Noé ala'r. Ie'pa aleripa tó ká wà iéne.

<sup>20</sup>Noé dali kuatkémi. E' shua uva kuatkéitö. <sup>21</sup>Ká et ta ie' tó uva diò shkòshkö e' yé ta e' tó ie' ttéka taië. Ie' datsi' yéttsa ta ianewa iskî sume iu a. <sup>22</sup>Cam dör Canaán yé, mik e' tó iyé sué sume, eta ie' mía ibiyó chök ielpa böl e'pa a. <sup>23</sup>Erë Sem ena Jafet e'pa kè éna iyé tēr sume e' suak. E' kueki ie'pa tó datsi' klò'wéwa, imékarakitö e' o' bataki ta ie'pa shkémi tsikka iwötrélur bánet dò wé iyé tēr ee ta ipabakéwa datsi' e' wa.

<sup>24</sup>Noé tté taië blo' tó e' tî'neka. Mik ie' wà ijchenewa ilà tsirla ék kè wà ie' dalöiéne', <sup>25</sup>eta ichéitö:

“iAs Canaán kawö tkò suluë!  
iIe' weirdaë siarë shute klöulewa ielpa böl e'pa kanè mésoie!”

<sup>26</sup>E' ukuökî ta ikî chéitö:

“iJehová dör Sem Këköl as e' kikarka!  
As Canaán aleripa kanèblò Sem aleripa a ikanè mésopaie.

<sup>27</sup>As Skëköl kawö buaë mù Jafet a as ie' alör michoë.

As Jafet ditséwopa ser Sem yamipa ska'.

As Canaán aleripa kanèblò ie' a klöulewa ikanè mésopaie.”

<sup>28</sup>Di' bak taië ká i' kî, e' ukuökî ta Noé sene'ia duas cien mañayök kî dabom skeyök (350). <sup>29</sup>Mik ie' blénewa, eta ie' kî duas tso' cien suliyök kî dabom skeyök (950).

### I' dör Noé aleripa kiè

**10** Noé ala'r kiè Sem, Cam ena Jafet. Di' bak taië e' ukuökî ta ie'pa wák ala'r kune. Ikképa dör Noé aleripa kiè.

<sup>2</sup>Jafet ala'r wépa dör Gómer, Magog, Madai, Javán, Tubal, Mésec, ena Tírás. <sup>3</sup>Gómer, e' ala'r wépa dör Asquenaz, Rifat, ena Togarmá. <sup>4</sup>Javán e' ala'r wépa dör Elisá, Tarsis, Quitim ena Rodanim. <sup>5</sup>E'pa kos dör Jafet aleripa. Ie'pa nî blatérak ulawa ulawa. Es iká yuérakitö tsee iwakpa a dayë kkömik. Ittò kuakî kuakî iwakpamik.

<sup>6</sup>Cam ala'r wépa dör Cus, Misraim, Fut, ena Canaán. <sup>7</sup>Cus ala'r wépa dör Sebá, Havilá, Sabtá, Raamá ena Sabteca. Raamá ala'r wépa dör Sebá ena Dedán. <sup>8</sup>Cus dör wëm kiè Nimrod, e' yé. Nimrod de keweie blu' darërëe ká i' kî. <sup>9</sup>Jehová ttò wa Nimrod dör yéria poë. E' kueki tte i' meneat se' a: “Be' dör yéria poë Skëköl ttò wa wes Nimrod es.” <sup>10</sup>Mik Nimrod bak ká kiè Sinar, e' wökirie eta ká e' shua ká tso' tkël kiè Babel, Érec, Acad, ena Calné. E' kos dör ká bua'ie ese. <sup>11</sup>Wëm e' yéttsa Sinar a eköl kiè Asur. E' mía ká bánet. Eta ee ie' ká yué tkël kiè Nínive, Rehobot-ir, Quélah ena Resen. <sup>12</sup>Resen dör ká bérie. E' ate Nínive ena Quélah, e' shusha.

<sup>13</sup>Eta Misraim aleripa mía ie'pa ikké wakpaie: ludeowak, anameowak, lehabiwak, naftuhiwak, <sup>14</sup>patruseowak, casluhítawak, ena caftoritawak. Filisteowak datse caftoritawak wa.

<sup>15</sup>Canaán dör Sidón yé. Sidón dör ie' alà tsá. Ie' alà skà kiè Het. <sup>16</sup>Canaán aleripa mía ie'pa ikké

wakpaie: jebuseowak, amorreowak, gergeseowak, <sup>17</sup>heveowak, araceowak, sineowak, <sup>18</sup>arvadeowak, semareowak ena hamateowak. Ká taië tã e' wakpa kos ñi blabatsérak ponemi ká kuã'ki kuã'ki. <sup>19</sup>Canaánwak ká atë ká kië Sidón dōwã ká kië Gaza. Gaza atë ká kië Guerar e' kke. Ñies ie'pa ká atë dōwã ká kië Lesa diwō tskirke e' kke. Lesa atë ká tkël kië Sodoma, Gomorra, Admá ena Seboím e' kke. <sup>20</sup>E' wakpa kos dör Cam aleripa. Ie'pa ñi blabatsérak ulawa ulawa. Es iká yuëitörak tseë iwakpa a. Ittò kuã'ki kuã'ki iwakpamik.

<sup>21</sup>Ñies Sem de' aläë, e' dör Jafet ël kibi ék. Heber ala'r kos dör Sem aleripa. <sup>22</sup>Sem ala'r dör Elam, Asur, Arfaxad, Lud ena Aram. <sup>23</sup>Aram ala'r dör Uz, Hul, Guéter ena Mas. <sup>24</sup>Arfaxad dör Sélah yé. Sélah dör Heber yé. <sup>25</sup>E' ukuöki tã Heber alà de böl. Eköl kië Péleg.<sup>§§</sup> E' kéwō ska' tã sulitane ñi blabatsérak, e' kuëki ikië mékãitö es. Iëköl kië Joc-tán. <sup>26</sup>Joctán ala'r dör Almodad, Sélef, Hasar-mávet, Jérah, <sup>27</sup>Hadoram, Uzal, Diclá, <sup>28</sup>Obal, Abimael, Sebá, <sup>29</sup>Ofir, Havilá, ena Jobab. E'pa kos dör Joc-tán ala'r. <sup>30</sup>Ie'pa serke ká micho ká kië Mesá tkörö ká kië Sefar e' shuulat a. Sefar atë kãbata a, wé diwō tskirke, e' kke. <sup>31</sup>E' wakpa kos dör Sem aleripa. Ie'pa ñi blabatsérak ulawa ulawa. Es iká yuérakitö tseë iwakpa a. Ittò kuã'ki kuã'ki iwakpamik.

<sup>32</sup>Pë' kos ekkëpa dör Noé aleripa kië kitule wes iditséwō kuã'ki kuã'ki ena wé iserke ká kuã'ki kuã'ki es. Di' bak taië, e' ukuöki tã se' alönene taië e' ñi blabatsérak ká wa'ne.

**Skëköl tō s'ditsö ké ttök kuã'ki kuã'ki**

**11** Kuaë tã sulitane ttöke ttè etö-kicha è wa. <sup>2</sup>Mik ie'pa míyal-

dak diwō tskirke, e' ëkã, demirak kãkkue kië Sinar ee, etã ee ie'pa e' tséat senuk. <sup>3</sup>Ká et tã ie'pa iché ñi a: “Mishkarak skauchka yuök blok sũ, e' kukuësö bö' a as imi'a darërëë u yuoie.” Es iwakanewérakitö ák skéie. Ñies kiöchka dalolo bötsböts ese wa ibatsérakitö ì tso' shutuule ese skéie. <sup>4</sup>E' ukuöki tã iskã chénerakitö ñi a: “Mishkarak ká blublu yuök. E' shua u yuösö kãkkeë dōkã ká jai a. Es se' e' chõmi buaë këkëpa taië ena kè se' kawõtã ñi blabatsök ká wa'ne.”

<sup>5</sup>Erë Jehová e' éwa isaukrak tō ie'pa ká blublu yueke ena u kãkkeë yuekerakitö. <sup>6</sup>Etã ie' tō ibikeitsé: “Ie'pa dör ká etkè wak ena ittörak etkè ñies, e' kuëki ie'pa tō kanè i' kékãmi. E' ukuöki tã kè ì a ie'pa wöklönuk. Ie'pa sermi wes ie'pa kã ikiane es. <sup>7</sup>E' kuëki sũyö ie'pa kè ttök kuã'ki kuã'ki as kè iñi ttò ania.”

<sup>8</sup>Es Jehová tō iblabatsérak ká wa'ne. Eë ie'pa ká yué e' kané wöpanere. <sup>9</sup>Ká e' kã Jehová tō ie'pa ké ttök kuã'ki kuã'ki ena iblabatsérakitö ká wa'ne. E' kuëki ká e' kinewã Babel.\*

### Sem aleripa

<sup>10</sup>I' dör Sem aleripa kië. Di' bak taië, e' ukuöki duas bök, e' kéwō ska' tã Sem kã duas tso' cien eyök (100). Etã ie' alà kune wëm kië Arfaxad. <sup>11</sup>Arfaxad kune, e' ukuöki Sem kã seneiã duas deká cien skëyök (500), etã ie' ala'r skã kune wëpa ena alakölpã.

<sup>12</sup>Mik Arfaxad kã duas tso' dabom mañayök kã skel (35) etã ie' alà kune wëm, e' kië Sélah. <sup>13</sup>Sélah kune, e' ukuöki tã Arfaxad kã seneiã duas cien tkëyök kã mañal (403), etã ie' ala'r skã kune wëpa ena alakölpã.

<sup>14</sup>Mik Sélah kã duas tso' dabom mañayök (30), etã ilà kune, e' kië Heber. <sup>15</sup>Heber kune, e' ukuöki tã Sélah kã

§§10:25 Péleg: Hebreoie s'kië e' wã kiane chë ñi blabatsë.

\*11:9 Babel: Hebreoie s'kië e' wã kiane chë chilineka.

seneia duas cien tkëyök kî mañal (403), etä ie' ala'r skà kune wëpa ena alakölpa.

<sup>16</sup>Mik Heber kî duas tso' dabom mañayök kî tkël (34), etä ilà kune, e' kiè Péleg. <sup>17</sup>Péleg kune, e' ukuökî tã Heber kî seneia duas cien tkëyök kî dabom mañayök (430), etä ie' ala'r skà kune wëpa ena alakölpa.

<sup>18</sup>Mik Péleg kî duas tso' dabom mañayök (30), etä ilà kune, e' kiè Reú. <sup>19</sup>Reú kune, e' ukuökî tã Péleg kî seneia duas cien böyök kî sulitu (209), etä ie' ala'r skà kune wëpa ena alakölpa.

<sup>20</sup>Mik Reú kî duas tso' dabom mañayök kî bök (32), etä ilà kune, e' kiè Serug. <sup>21</sup>Serug kune, e' ukuökî tã Reú kî seneia duas cien böyök kî kul (207), etä ie' ala'r skà kune wëpa ena alakölpa.

<sup>22</sup>Mik Serug kî duas tso' dabom mañayök (30), etä ilà kune, e' kiè Nahor. <sup>23</sup>Nahor kune, e' ukuökî tã Serug kî seneia duas cien böyök (200), etä ie' ala'r skà kune wëpa ena alakölpa.

<sup>24</sup>Mik Nahor kî duas tso' dabom böyök kî sulitu (29), etä ilà kune, e' kiè Téräh.

<sup>25</sup>Téräh kune, e' ukuökî tã Nahor kî seneia duas cien eyök kî dabom eyök kî sulitu (119), etä ie' ala'r skà kune wëpa ena alakölpa.

<sup>26</sup>Mik Téräh kî duas tso' dabom kuryök (70), e' ukuökî tã ie' ala'r kune mañal. Ala'r e'pa kiè Abram, Nahor ena Harán.

### Téräh ala'r

<sup>27</sup>E'pa dör Téräh ala'r. Téräh dör Abram, Nahor ena Harán, e'pa yé. Harán, e' dör Lot yé. <sup>28</sup>Harán blënewa kewe iyé Téräh e' yöki ká kiè Ur ee. Ká e' atë Caldea. Ie' blënewa wé ie' kune ee.

<sup>29</sup>Abram senéwa alaköl kiè Sarai, e' tã. Nahor senéwa alaköl kiè Milcá, e' tã. Milcá dör Harán alà busi ena Iscá kutà. <sup>30</sup>Sarai kè dötã alàè.

<sup>31</sup>Téräh e' yëttsa Ur, dör caldeawak ká e' a. Ie' alà Abram ena itala kiè Lot dör

Harán alà ena iyäk kiè Sarai e'pa mía ie' tã. Warma ie'pa mîrö döká ká kiè Canaán ee, eré ie'pa demi ká kiè Harán, etä ee ie'pa e' tséat senuk. <sup>32</sup>Eë Téräh blënewa. Ie' kî duas tso' cien böyök kî skel (205).

### Jehová tté Abram tã

**12** Mik Abram bak senuk ká kiè Ur ee, etä Jehová tó ie' a iyé: "Be' ká ena be' ditséwöpa ena be' yé yamipa, e' múat tã be' yúshka senuk, ká kkachekeyö be' a ee. <sup>2</sup>Ká e' kî ye' tó be' aleripa alöweraë tajë. Ie'pa döraë ká tajë wakpaie. Ye' er buaë chöraë be' a. Ye' tó pë tajë keraë be' kkeökka tajë. Nies be' er buaë chöraë pë tajë a. <sup>3</sup>Wépa er buaë ché be' a, esepa a ye' er bua' chöraë. Wépa tó alibché be' kî, esepa we'ikerayö. Be' batamik ye' er buaë chöraë ká ulitane wakpa a."

<sup>4</sup>Etä Abram e' yëttsa ká kiè Harán wes Jehová tó ie' a iyé es. E' këska' tã ie' kî duas tso' dabom kuryök kî skel (75). Ie' mía Canaán. <sup>5</sup>Etä ie' wã iyamipa mítser seraa. Ilaköl kiè Sarai ena ilayök kiè Lot ena íyi ulitane tso'rak iwã, ekkë kos mítserak iwã. Nies Harán wakpa welepa tso' ie' wã kanè mésoie, e' mítser ie' wã. Mik ie' demi Canaán, <sup>6</sup>etä ie' tkami ká kos ekkë dömi ká kiè Siquem atë Canaán ee. Eë ká atë kiè Moré. Eë kós klò àr elka. Canaánwakpa a ká e' dör ká dalöier-tã ese. (E' këwö ska' tã Canaánwakpa serkeia ee.) <sup>7</sup>Etä ee Jehová e' kkaché Abram a tã ichéitö ia: "Ká i' meraëyö be' ditséwö a."

Etä Abram tó ák kataté kã'ie et iyi-wak jchoie Jehová dalöioie ee Jehová e' kkayé' ie' a e' kueki. <sup>8</sup>E' ukuökî tã imía ká dör kabataie atë Betel diwö tskirke e' ëka. Etä ee ie' sené ekuölö. Ká e' atë Betel ena ká kiè Ai e' shuulat a. Eë ie' tó ák skà kataténe et. Eë ie' tó Jehová dalöie. <sup>9</sup>E' ukuökî tã Abram mía enaena Négueb kke.

### Abram mía Egipto

<sup>10</sup> E' k'éwö ska' ta ketba tkënewa poë ká e' kî. Kè ì ta' katè wé Abram serke eë. E' kuëki ie' mía Egipto senuk ekuölö. <sup>11</sup> Abram dökemitke Egipto eta ilaköl Sarai, e' a ichéitö: "Ye' ttò ttsó. Ye' wa ijcher buaë tö be' dör buaala. <sup>12</sup> Mik Egipto wakpa tö be' sué tö be' dör buaala, eta ie'pa tö ichèmi: 'Wî dör wëm wí alaköl.' Eta ye' tterawa ie'pa tö be' kuëki erë ie'pa be' meraat senukwa ie'pa ta. <sup>13</sup> E' kuëki, be' we'ikèyö, ichó ie'pa a tö ye' dör be' aké as kè itö ye' ttòwa be' kuëki as ye' kawö tkò buaë."

<sup>14</sup> Mik Abram demi Egipto, eta Egipto wakpa isué tö Sarai dör alaköl buaala. <sup>15</sup> Ká e' blú kuëblupa tö isué nies tö Sarai dör alaköl buaala. E' kuëki ie'pa mía ichök blu' a tö alaköl e' dör buaala. Eta imítserak iwá blu' wé a.

<sup>16</sup> Eta Egipto blú tö Abram kk'óné buaë Sarai dalërmik. Taië ie' tö Abram a iyiwak uru kakmé. Obeja, baka, burro ena kameio e' kakméitö ie' a. Se' nies kakméitö ie' a kanè mésoie wëpa ena alakölpa. <sup>17</sup> Erë Sarai kuëki Jehová tö Egipto blú ena iyamipa we'iké taië. Duè méka taië ie'pa kî. Kawö darërëë mékaitö ie'pa kî. <sup>18</sup> E' kuëki Egipto blú tö Abram tsuk patké ta ichéitö ia: "¿Iók bö iwamblé ye' ta es? ¿I kuëki be' kè wa ye' a iyëne tö alaköl i' dör be' alaköl? <sup>19</sup> Be' tö ye' a iyë' tö ie' dör be' kutà. E' kuëki tsir eta ye' senéwa ie' ta. I' be' alaköl, it-súmine ta be' yúshka." <sup>20</sup> Eta Egipto blú tö ishkékîpa patké Abram yöktsa ká e' kî ilaköl ta ena ì kos tso' ie' wa ekképa ta.

### Abram ena Lot ñi blabatsélor

**13** E' ukuöki ta Abram ena ilaköl e' yélur Egipto míane Néguëb. Ie' íyi kos mítserak iwá seraa. Ie' alayök Lot e' mía ie'pa ta nies. <sup>2</sup> Abram dör íyi blu' taië. Ie' wa oro tso'. Ie' wa inuköl tso' taië. Nies ie' wa iyiwak tso' taië. <sup>3</sup> Néguëb eë

ta ie' míane énaena dò Betel. Betel eë ta ie' míane tkörö wé ie' bak senuk kéwe eë. Ká e' atë Betel ena Ai e' ulat shusha. <sup>4</sup> Ká e' a ie' wa ák katatëulebak ka'ie, eë ie' tö Jehová dalöiéne.

<sup>5</sup> Lot dör nies íyi blú taië wës iyëla Abram es. Iyiwak tso' taië ie' wa obeja ena baka. Se' tso' ie' wa nies kanè mé-sopaie. <sup>6</sup> Erë wé ie'pa serke ká e' kî kákö kè ku'ia ie'pa iyiwak kos a katè. Ie'pa kè chë'kaia ñi o'mik. <sup>7</sup> Abram ena Lot e'pa iyiwak kk'ónukwakpa ñippöke, ñi wõnatköke. Nies pë' tso'tke kenet ká e' kî. E' wakpa dör canaánwak ena ferese-owak. <sup>8</sup> Ká et ta Abram tö iché Lot a: "Se' dör ñi yami. Kè imène buaë tö se' ñippö. Nies se' iyiwak kk'ónukwakpa ñippöke ème e' kè dör buaë. <sup>9</sup> Ká saú wî ká bua' tso'. Be' ishustó wéne wa be' wöbatse, e' a be' yúshka. Be' mí wî ëka, e' ta ye' mí dià ëka. Eta be' mí dià ëka, e' ta ye' mí wî ëka."

<sup>10</sup> Eta Lot ká kî sué kamië, eta kos di' kiè Jordán, e' kkömik ká buaë tso', e' kî sué ie' tö. Eta ie' tö isué tö ká e' dör buaë dò ká kiè Sóar eë. Buaë di' tso' wës ká buaë yö' Jehová tö es ena wës Egipto es. (E' k'éwö ska' ta kam Jehová tö ká kiè Sodoma ena ká kiè Gomorra, e' böt eüwa.) <sup>11</sup> Eta kakkue tso' Jordán di' kkömik e' shusté Lot tö, eta e' wa ie' mía. Es ie'pa ñi blabatsélor. <sup>12</sup> Abram e' tséat senuk Canaán. Lot mía senuk Jordán kakkue kî, eë ká tso' tseë. Ie' sené tsinet ká kiè Sodoma e' o'mik. <sup>13</sup> Sodoma wakpa, serke suluë. Ie'pa ì sulu è wambleke kekraë Jehová wöa.

<sup>14</sup> Lot mía e' ukuöki ta, Jehová tö iché Abram a: "Wé be' tso' eë ká kî saú bua'ie shkit wöwí wöia dià ëka jai ëka ká wa'ne tö ¿is idör? <sup>15</sup> Ká kos kî suëbö, e' meraëyö be' a ena be' aleripa a kekraë. <sup>16</sup> Ye' tö be' aleripa alöweraë taië wës íyök po taië es. Wës íyök po kè shtarpa es be' aleripa alördaë kè ishtarpa yi a. <sup>17</sup> Ká i' kos meraëyö be' a. E' kuëki be' yú iweblök seraa."

<sup>18</sup> Etā Abram e' yéttsa tā imía senuk kós klò wökir àr taië dör wëm kiè Mamré e' icha ee. E' atē tsinet ká kiè Hebrón ee. Eē Abram tò ák skà kataté ka'ie Jehová dalöioie.

### Abram tò ilayök Lot, e' tsatké

**14** E' kèwö ska' tā blu'pa tso' tkël. Eköl kiè Amrafel, e' dör ká kiè Sinar, e' blú. Iëköl kiè Arioc, e' dör ká kiè Elasar, e' blú. Iëköl skà kiè Quedorlaómer, e' dör ká kiè Elam, e' blú. Etā ibata ék kiè Tidal, e' dör ká kiè Goím, e' blú. <sup>2</sup> Blu'pa skà tso' dökā skel e' eköl kiè Bera, e' dör ká kiè Sodoma, e' blú. Iëköl kiè Birsá, e' dör ká kiè Gomorra, e' blú. Iëköl kiè Sinab, e' dör ká kiè Admá, e' blú. Skà kiè Seméber, e' dör ká kiè Seboím, e' blú. Ibata ekké e' dör ká kiè Bela, e' blú. Ká e' kiè Sóar ñies. E' kèwö ska' tā blu'pa dökā tkël ñe' e' kékā ñippök blu'pa skà dökā skel ñe' tā. <sup>3</sup> Blu'pa skel e'pa tò ñippök wakpa dapa'wé ek tsíní ñippök blu'pa tkël e'pa tā kakkue kiè Sidim ee. Eē dayë wölö me'r bérie kiè Mar Muerto.

<sup>4</sup> Blu'pa dökā skel e'pa bak senuk iwakpa tā dökā duas dabom eyök kī bök (12), blu' kiè Quedorlaómer, e' dikia. Mik e' kī duas de dabom eyök kī mañal (13) etā ie'pa kè éna Quedorlaómer ttè dalöiakia. Ie'pa e' kakkā ñippök ie' tā. <sup>5</sup> E' kī duas de ek etā Quedorlaómer e' yéttsa mía ñippök ibolökpa tā. Blu'pa dökā mañal dör ie' klépa, e' míyal ie' tā ñippök. Ie'pa mía ká kiè Astarot Carnaim tā ee ie'pa e' aléka refaitawak kī. E' ukuökī tā ie'pa e' aléka zuzitawak kī, ká kiè Ham ee. E' ukuökī tā ie'pa e' aléka emiwak kī, e' wakpa ká kiè Savé-quiriataim. <sup>6</sup> E' ukuökī ie'pa e' aléka horeowak kī kabata kiè Seír ee. Etā itötiémi ie'pa tò dò tkörö ká kiè El-parán ee. Ká e' atē ká sir poë, e' kkömik. <sup>7</sup> Etā ee ie'pa bitene itò wane dò ká kiè En-mispat. Ká e' kiè Cadés ñies. Ie'pa e' aléka Amalec aleripa kī tā iká klò'wéwarakitö. Ñies ie'pa e'

aléka amorreowak kī. E' wakpa ká kiè Hasesón-tamar. E' ukuökī tā ie'pa mi'ke ñippök blu'pa skel tā. E' kuekī blu'pa skel e' dapa'wéka Sidim kékkué kī blu'pa tkël kīnuk ñippoie.

<sup>8-9</sup> Etā Sodoma blú ena Gomorra blú ena Admá blú ena Seboím blú ena Bela blú (Bela kiè Sóar ñies), blu'pa skel ekképa ñi dapa'wéka Sidim kékkué kī ñippoie, Quedorlaómer, e' dör Elam blu', e' tā ena blu'pa tso' ie' tā e'pa tā ñies. Blu'pa e'pa dör Tidal, e' dör Gófm blu'. Iëköl dör Amrafel, e' dör Sinar blu'. Bata ék dör Arioc, e' dör Elasar blu'. Es blu'pa tkël míyal ñippök blu'pa skel tā. <sup>10</sup> E' kèwö ska' tā Sidim kékkué kī kiöchka dalolo bötsböts ese dapé tso' taië. Mik Sodoma wakpa ena Gomorra wakpa tkayal ñippè yöki etā ie'pa shaböts anemi kiöchka dapé tso' taië ese a. Imalepa tkayalmi kabata shua.

<sup>11</sup> Es blu'pa dökā tkël e'pa e' aléka blu'pa skel kī. Etā ie'pa tò chkewö ena íyi bua'buwa tso' Sodoma ena Gomorra e' kos klò'wéwarakitö tā iponemirak. <sup>12</sup> E' kèwö ska' tā Abram alayök Lot serke Sodoma. E' mítserak iwā, es ie' dalí kos e' mítserak iwā ñies.

<sup>13</sup> Etā ñippè shua wëm tkashkar eköl, e' wā ibiyó mí Abram a. Abram e' dör hebreowak. Ie' serke tsinet wëm kiè Mamré dör amorreowak e' kós klò wökir àr ee. Mamré dör Escol ena Aner èl. Ie'pa wa Abram wër buaë.

<sup>14</sup> Mik Abram tò ibiyó ttsé, etā ie' kané mésopa kune ie' u a, e'pa dapa'wéitö dökā cien mañayök kī dabom eyök kī pāköl (318) ilayök tsatkoie. Etā ie'pa míyal blu'pa tkël itökī dökā ká kiè Dan ee. <sup>15</sup> Etā nañewe ie'pa demi me'ie ñippémiie blu'pa tā. Etā ie'pa tò blu'pa töiémi tkörö ká kiè Hobá ee. Hobá atē ká kiè Damasco e' wöwí. <sup>16</sup> Etā ì kos minetser blu'pa wā, e' kos yélur ie'pa tò blu'pa ulà a. Es Abram tò ilayök Lot e' tsatkée. Ñies ì tso' ilayök wā e' kos dene iulà a.



Ñies alakölpa ena pè' malepa tso' klöule-wa e'pa kòs tsatkée ie' tò.

### Melquisedec er buaë ché Abram a

<sup>17</sup> Mik Abram e' aléka Quedorlaómer k<sub>i</sub>, e' sù blu'pa mañal shkòke ie' ta, e'pa k<sub>i</sub>. E' ukuök<sub>i</sub> ta ie' bitene de Savé kékkué k<sub>i</sub>. Kákkue e' kiè ñies Blu' Kékkué. Eta eë Sodoma blú de ie' ñaletsuk ie' shké'uk. <sup>18</sup> Ñies ká kiè Salem, e' blú kiè Melquisedec, e' dör Skéköl dör íyi ulitane tsata e' sacerdote. Ie' tò pan ena vino yéttsa. <sup>19</sup> Eta ie' er buaë ché Abram a ttè i' wa:

“Skéköl dör íyi ulitane tsata, e' tò ká jai ena ká i' yò'.

Ie' tò be' k<sub>i</sub>mè as be' k<sub>w</sub>wö tkò buaë kekraë.

<sup>20</sup> Ie' dör íyi ulitane tsata, e' k<sub>i</sub>kòkasö.

Ie' tò be' k<sub>i</sub>mè e' alókka be' bolökpa k<sub>i</sub>, e' kuék<sub>i</sub> ik<sub>i</sub>kòkasö.”

Eta íyi kòs de Abram ulà a ñippè shua, e' mú blatèsö döká dabop ta e' tsá eyök yéttsaitö méitö Melquisedec a Skéköl dalöioie. <sup>21</sup> E' ukuök<sub>i</sub> ta Sodoma blu' tò iché Abram a:

—Sa' yamipa tsatkée be' tò, e'pa múne ye' a. Erè dali kòs e' tsúmi be' tò be' a.

<sup>22</sup> Erè Abram tò iüté:

—Au. Jehová dör Skéköl íyi ulitane tsata, e' tò ká jai ena ká i' yò', ie' a ye' kablétke <sup>23</sup> tò ì kòs dör be' icha, e' kè tsepaatyö yès. Dò be' datsitakla ö be' klökkuö kicha kè tsepaatyö etkla wè'ia as kè be' ichò tò be' íyi wa ye' blune. <sup>24</sup> Kè ì kiane ye' k<sub>i</sub> ye' wák a. Chkò kòs ñétke ye' kanè mésopa tò, e' è dör wè' ye' a. Erè wépa dare ye' ta ñippök bulu'pa ta kiè Aner ena Escol ena Mamré, as ie'pa wá dali kakmi' kòs ikawötá tsukmi eköl ekkè.

### Jehová tò ittè mé Abram a

**15** E' ukuök<sub>i</sub> ta Jehová tté Abram ta kabsueie, eta ichéitö ia:

—A Abram, kè be' suanuk. Ye' dör be' tsatkök<sub>w</sub>ak. Íyi buaë merayö be' a taië shute.

<sup>2-3</sup> Erè Abram tò iüté:

—A Skéköl, ye' wák alà kè ta', e' kuék<sub>i</sub> ì kòs memibö ye' a e' kè dör iie bua' ye' a. Ye' íyi kòs atdaë ye' kanè méso kiè Eliézer dör Damasco wak e' ulà a. Erè ie' dör o'ka.

<sup>4</sup> Eta Jehová tò iüté:

—Be' wák alà kurdaë, e' kè dör o'ka.

<sup>5</sup> Eta Jehová wá Abram mítser ur'k<sub>i</sub>, ta ichéitö ia:

—Ká saú buaë siwa' k<sub>i</sub>. Bèkwö saú ta ishta'ú. ¿Be' a ishtar<sub>m</sub>i? E'ma bua', es be' aleripa alórdaë taië.

<sup>6</sup> Eta Abram erblé Jehová mik, e' kuék<sub>i</sub> iklö'wéitö wes pè' buaë yesyèsè es.

<sup>7</sup> Eta ichéitö ia:

—Ye' dör Jehová. Ye' tò be' yé'ttsa caldeawak ká kiè Ur e' a ká i' moie be' a ena be' aleripa kòs a.

<sup>8</sup> Eta Abram ie' a ichaké:

—A Skéköl, ¿wes e' jcher<sub>m</sub>i ye' wa yesyèsè tò ká i' dòmi ye' ulà a?

<sup>9</sup> Jehová tò iüté:

—Baka ena chibo ena obeja e' kòs k<sub>i</sub> duas tso' mañal, ese tsúbitu ña etö etö. Ñies nuböl et ena ipupula et, e' tsúbitu ña.

<sup>10</sup> Eta Abram wá iyiwak kòs ekkè deb<sub>i</sub>tu Jehová a. Eta ie' tò iyiwak e' ttélur télor shushaë. Shaböts méwaitö w<sub>i</sub> wa shaböts méwaitö i' wa. Es iate ñi wöshaë. Erè dù kè ténane ie' wá es. <sup>11</sup> Eta ölö dettsa iyiwak chkà dalèrmik, erè Abram tò ibukueke chkè k<sub>i</sub>. <sup>12</sup> Ká tuinemitke, eta Abram kapowá taië. E' bet Abram pamik ká mía ttsetseë shute se' suawé ekkè.

<sup>13</sup> Eta Jehová tò iché ia:

—Be' wá ijchenú buaë tò be' aleripa serdaë ká kuá'k<sub>i</sub> k<sub>i</sub> wes ká kuá'k<sub>i</sub> wakpa es. Eë ie'pa klördawá kanè mésopaie kè patueta'. Ie'pa weirdaë döká duas cien tkéyök (400), ekkè ulatök. <sup>14</sup> Erè ká wé

wakpa tö ie'pa we'ikera, e' wakpa ské we'ikerayö siarë. E' ukuöki ta be' aleripa yërdattsa ká e' a. Ie'pa wa iyi bua'buwa tuë darërëë ese miraë tajë iwákpa a. <sup>15</sup> Etá mik be' kënewa etá be' duöwami buaë, kè weir ta'. Es be' michoë be' dëütöpa itöki. <sup>16</sup> Etá mik be' aleripa tso' ká kuá'ki ñe' a e'pa de döka tkëtökicha, etá ie'pa dörane ká i' ki. Ká i' wakpa, kië amorreowak, kam e'pa tö i sulu wamblo dö wé ishuloie. E' kueki be' aleripa kè döpane ká i' ki bet.

<sup>17</sup> Katuine de kamië, etá i dettsa tabechka ukuöie, e' shua shkle batróke tajë. Nies kuatak sí wönarke tajë ese dettsa ta itkami iyiwak chkà blatëule tkëter ee, e' shusha. <sup>18</sup> Etá Jehová tö tte mé Abram a i' es:

—Ká i' meraëyo be' aleripa a. Di' kië Egipto dí' eemi döka di' kibi kië Éufrates, ká ekkë kos meraëyo be' aleripa a. <sup>19</sup> Iñe ta ká e' dör quenitawak, quenizitawak, cadmoneowak, <sup>20</sup> hititawak, fereseowak, refaitawak, <sup>21</sup> amorreowak, canaánwak, gergeseowak ena jebuseowak e'pa kos wakpa ká.

#### Abram alà kune kië Ismael

**16** Abram alaköl Sarai, e' kè döta' aläë. Ie' wa alaköl tkër eköl kanè mésoie kië Agar. E' dör egiptowak. <sup>2</sup> Etá Sarai tö iché Abram a:

—Isaú tö Jehová kè wa ye' a alà mène. E' kueki be' senú ye' kanè méso Agar ta. Etá isalema ie' batamik alà dömi ye' ulá a.

Etá Abram tö Sarai ttö iuté. <sup>3</sup> Etá Sarai tö egiptowak tso' ie' wa kanè mésoie, e' tsébitu, mé iwëm a alakölie. E' kéwö ska' ta ie'pa sené Canaán e' ki duas de dabop. <sup>4</sup> Etá Abram senéwa Agar ta, etá Agar duneka. Mik ie' isuë tö ie' duneka, etá ie'

tö iwökir Sarai suëmi suluë. <sup>5</sup> Etá Sarai tö iché Abram a:

—iBe' iane iwiie tö Agar tö ye' sueke suluë! Ye' wák tö be' a Agar me' alakölie i' ta idurtke e' wà kurdaë, etá ie' e' ttsöke jaishet ye' tsata. ¡As Jehová tö se' a ichö tö yi iane iwiie, ye' ö be'!

<sup>6</sup> Etá Abram tö iuté:

—Ye' ttö ttsó, be' kanè méso tso' be' ulá a. Be' iú wes be' éna iwak es.

E' ukuöki ta Sarai tö ikanè méso we'ikémi tajë. E' kueki Agar tkashkar. <sup>7</sup> Etá Jehová biyöchökwak bua'ie, e' tö ikué di' tum o'mik ká wé kè yi ku' ese ska'. Di' tum e' tso' ñalá micho ká kië Sur e' kkömik. <sup>8</sup> Etá Jehová biyöchökwak bua'ie tö ie' a ichaké:

—A Agar, Sarai kanè méso, ¿Wé be' bite? ¿Wé be' micho?

Ie' iuté:

—Ye' tkashkar ye' wökir Sarai yöki.

<sup>9</sup> Etá ie' iché ia:

—Be' dakóne be' wökir ska' ta idalöió bèrë.

<sup>10</sup> Ie' tö ikí ché ia:

“Ye' be' aleripa alöweraë tajë. Kè yi a ish-tanuk ekkë.

<sup>11</sup> Be' eriarke, e' ttsé Jehová tö, e' kueki se be' dur, e' wà kune, ta ikië múkabö Ismael.‡

<sup>12</sup> Be' alà döraë wes burro pupula kè urutërta' es.

Ie' ñippöraë darërë sultane ta. Nies sultane ñippöraë ie' ta.”

Ie' serdaë kekraë ñippök iëlpa ta.

<sup>13</sup> Jehová tté Agar ta, e' ukuöki ta Agar tö iché: “Skököl ye' suë, e' wák suëwayö.” E' kueki ie' tö Skököl kié i' es: “Skököl tö ye' suë e'.” <sup>14</sup> E' kueki nies di' tum e' kië mékaitö: “Skököl tso' e' ye' sueke”. Di' tum e' tso' Cadés ena Béred e' shushaë.

†15:18 *Egipto dí*: E' kè dör di' bërie tso' Egipto kië Nilo e'. E' dör di' tsitsirla tso' Egipto ena Canaán e' shusha.

‡16:11 *Ismael*: Hebreoie s'kië e' wà kiane chë *Skököl tö ittse*.

<sup>15</sup> E' ukuökj̄ t̄a Abram alà kék̄a Agar t̄a e' wà kune wák wēm. Abram tō ikiè mèk̄a Ismael. <sup>16</sup> Ismael kune, e' k̄ewō ska' t̄a Abram k̄i duas tso' dabom paryök k̄i teröl (86).

**Jehová tō ittè mé Abraham a, e'  
wà kkacho méatitō**

**17** Mik Abram k̄i duas tso' dabom suliyök k̄i sulitu (99), et̄a Jehová e' kkaché ie' a t̄a iché ia:

—Ye' dör Skököl Diché T̄a' İyi Ulitane Tsata e'. Be' senü yēsēsē ye' wörk̄i kekraē, <sup>2</sup> e' t̄a ye' ttè meraē be' a tō be' aleripa alördaē taijē be' itöki.

<sup>3</sup> Et̄a ie' e' tēw̄a iski iwötsa mēw̄a iyök k̄i. E' dalewa Skököl tso' ttök ie' t̄a, t̄a ichéitō ia:

<sup>4</sup> —Ye' ttè meke be' a e' dör i' es: Be' dōraē k̄a taijē wakpa yēie. <sup>5</sup> E' kueki i'ñe t̄a be' k̄è kiēia Abram. Ye' tō be' tkék̄a k̄a taijē wakpa yēie, e' kueki be' kiè mékayō Abraham. <sup>6</sup> Ye' tō be' aleripa alōweraē taijē. Ie'pa dōraē blu'paie ena k̄a taijē wakpaie. <sup>7</sup> Kekraē ye' dör be' Kököl ñies be' aleripa Kököl. Kawō e' mekeyō be' a. <sup>8</sup> İñe t̄a be' serke Canaán, k̄a e' k̄os meraēyō be' a ena be' aleripa a. E' atē ie'pa ulā a kekraē. Ye' dör ie'pa Kököl.

<sup>9</sup> Skököl tō iskà chéne Abraham a:

—Erē be' ena be' aleripa k̄os e' kawō-t̄a ttè muk ye' a ñies. <sup>10</sup> E' dör i' es: A' wēpa k̄os kawōt̄a itōttola kkuölitla tōk tsir. <sup>11</sup> E' kueki a' wēpa k̄os e' wakyuó es. E' tō ikkacheraē tō se' ttè me' ñi a. <sup>12</sup> Kekraē k̄os a' ala'r k̄urke wēpa, ñies a' kanè mēsopa ala'r wēpa, mik e' k̄i k̄a de pāköl, et̄a a' kawōt̄a iwakyuök es. <sup>13</sup> A' kawōt̄a iuk kröröē ala'r k̄os k̄urke a' u a ekkēpa t̄a. Es ttè me'tkeyō a' a, e' atē wakyöule a' chk̄a k̄i kekraē. <sup>14</sup> Wēm k̄è

wakyöule, ese k̄è w̄a ye' ttò dalöiēne, e' kueki k̄è ikawō t̄a'ia senuk a' shua.

<sup>15</sup> Ñies Skököl tō iché Abraham a:

—Be' alaköl k̄è kiēia Sarai. İñe t̄a ikir-daē Sara. <sup>16</sup> Ye' er buaē chōraē ie' a as ie' alà kōk̄a be' a. Moki ye' er buaē chōraē ie' a. Ie' dōraē k̄a taijē wakpa miie. Ñies ie' aleripa shu dōraē blu'paie.

<sup>17</sup> Abraham sk̄a e' tēw̄ane iski iwötsa mēwaitō iyök k̄i. E' dalewa ijanēka t̄a ibikeitséitō: “¿Ye' k̄i duas tso' cien eyök (100), wes e' dōmi yēie? ¿Sara k̄i duas tso' dabom suliyök (90), et̄a wes ie' dōmi aläe?”

<sup>18</sup> Erē ie' tō iché Skököl a:

—İBe' mú er buaē chō Ismael a!

<sup>19</sup> Erē Skököl tō iutē:

—Au, e' k̄è dör es. Be' alaköl Sara, e' dōraē aläe t̄a ikiè múkabō Isaac. Ttè me'yō be' a e' è meraneyō ie' a ena ie' aleripa a kekraē. <sup>20</sup> K̄è ye' éna Ismael chē'wa. Ye' tō ie' k̄imeraē ñies. Ye' tō ie' ala'r alōweraē taijē as ileripa dō taijē k̄a i' k̄i. Ismael dōraē s'blu'pa dōka dabom eyök k̄i bōl e'pa yēie. Ie' aleripa alördaē taijē. <sup>21</sup> Erē ttè me'tkeyō be' a e' atdaē be' alà kurdaē kiē Isaac e' a. Be' alà e' keraka Sara tō duas iek wa kawō ikkē t̄a.

<sup>22</sup> Mik Skököl ttē one Abraham t̄a, t̄a imia. <sup>23</sup> E' wōshaē Abraham tō ilā Ismael e' tottola kkuölitla tēe tsir. Ñies ie' w̄a kanè mēsopa tso' kune ie' u a ena wēpa t̄oule ese, e'pa k̄os tottola kkuölitla tēitō tsir wes Skököl tō iyē'ia es. <sup>24-25</sup> Mik Abraham k̄i duas tso' dabom suliyök k̄i sulitu (99) ena ilā k̄i itsō' dabom eyök k̄i mañal (13) et̄a ie'pa tottola kkuölitla tēne tsir.

<sup>26-27</sup> Es e' diwō è wa Abraham ena ilā tottola kkuölitla tēne tsir. Ñies wēpa dör ie' kanè mēsopa, e'pa k̄os tottola kkuölitla tēne tsir.

<sup>17:5</sup> **Abraham:** Hebreoie s'kiè e' wà kiane chē k̄a wakpa taijē, e' yē.

<sup>17:15</sup> **Sarai:** Erē s'kiè e' ena Sara ttsēr bēre kuak̄i, erē iwà dör ñies. Iwà kiane chē blu' alā busi ö alaköl dalöiērt̄a taijē ese. Skököl tō ie' kiè mane'wē es iwà kkachōie tō ttè mēne Abraham a e' wà dōraē ie' k̄i ñies.

**Jehová tò iché Abraham a  
tò alà meraëyö be' a**

**18** Ká et dibata a ta Abraham tkër ie' ukkò a. Ie' u tso' wé wëm kiè Mamré e' kós klò wòkir àr eë. Ie' tkër eë età Jehová e' kkaché ie' a. <sup>2</sup>E' wà pakè i' es: Abraham wòkéka ta ie' isué tò wëpa de iëter ie' wòrkì mañal. E' sué ie' tò ta bet ie' e' kéka, mía ie'pa ñaletsuk ta ie' e' téwa iski ta iwòtsa méwa íyök ki ie'pa shké'woie. <sup>3</sup>Ie' tò iché:

—A kékëpa, be' we'ikèyö, kè be' minuk bet. <sup>4</sup>Ye' mi' di' tsuk a' klò skuoie, e' ukuöki ta a' enú bèrè kal i' dikia. <sup>5</sup>A' de-tke ye' ska', età ilè mekeyö a' a ñè as a' diché iërne shkoie.

Età ie'pa tò ie' iüté:

—E'ma iú wes be' tò iché es.

<sup>6</sup>Abraham tkawá iu a, ta ichéitö Sara a:

—Bet, harina bua'buá yuló kilo doka dabom böyök (20) ekkè, e' wa pan yuó.

<sup>7</sup>E' ukuöki ta bet ie' wák tunemi baka pupula shushtök wé bua'buá ese klò'wéwaitö. E' mítser ie' wá méitö ikanè méso eköl a. Bet ta ikanè méso tò ikanewé ie' a katè. <sup>8</sup>Abraham tò baka chkà ena baka tsu'diö wösi ena baka tsu'diö pa'alí e' mé ie'pa a. Ie'pa tulur chkök kal àr ukkò a e' dikia. E' dalewa Abraham dur ie'pa tiök eë.

<sup>9</sup>E' dalewa ie'pa tò ichaké Abraham a:

—¿Wé be' alaköl kiè Sara e'?

Ie' iüté:

—Ie' tkër weshke.

<sup>10</sup>Età ie'pa eköl tò iché ia:

—Dua's iëk e' wa ye' döne be' pakök. E' kéwö ta be' alaköl Sara alà ta'tke.

E' dalewa Sara tkër Abraham tsikka u wékkò a. Ie' tso' ie'pa ttöke, e' ttsök. <sup>11</sup>Abraham ena ilaköl, e' dewatke kékëpala. Bànet Sara kè tò alakölpa duè sueta'ia. <sup>12</sup>E' kuëki Sara kè a jañè wöklönuk ta ibikeitsé: “¿Wes ye' tò ttè i' klò'wëmi

tò sa' kërulunetke e' dõmi alàè?” <sup>13</sup>Jehová tò iché Abraham a:

—¿Ì kuëki Sara jañéka? ¿Ì kuëki ie' tò iché: “¿Wes ye' kënewatke e' dõmi alàè?” <sup>14</sup>Kè ì ta ye' a darèrè. Dua's iëk ye' döne, età ie' alà ta'tke.

<sup>15</sup>Sara suane e' kuëki ichéitö: “Kè ye' jañine'.”

Erè Jehová tò iché ia:

—E' kè dör es. Mokì be' jañéka.

**Abraham kköché Jehová a  
Sodoma wakpa tsatkö**

<sup>16</sup>E' ukuöki ta ipakökwakpa e' duékarak ta imíyal dò wé Sodoma kí wëne eë. Abraham tò ñalé mére e' choat ie'pa a. <sup>17-19</sup>Età Jehová tò ibikeitsé: “Abraham aleripa alördaë taië diché ta' taië. Ye' tò iyë'at ie' a tò ie' batamik ye' er buaë chöraë ká ulitane wakpa a. Ye' tò ie' shukit as ie' tò ila'r ena ileripa a ichò tò ye' ttè dalóió ñies tò ì qos buaë yësyësè e' ú. Es ì qos yë'yö ie' a e' weraëyö. E' kuëki ye' kawöta ichökia tò iók ye' mí Sodoma.” <sup>20</sup>E' kuëki ie' tò iché Abraham a:

—Sodoma wakpa ena Gomorra wakpa e' wamblökerak suluë taië shute, e' ché sulitane tò. <sup>21</sup>E' kuëki ye' mía eë isaük tò yëne ie'pa e' wamblöke suluë ichök wes ye' a ikkatène es.

<sup>22</sup>Età Abraham pakökwakpa bøl e' yéttsa mía Sodoma. Erè Abraham atë dur Jehová ta. <sup>23</sup>Ie' e' skéwa tsinet Jehová ska' ta ichakéitö ia:

—¿S'ser mokié esepa ewëwamibö se' sulusipa ta? <sup>24</sup>Isalema s'ser mokié esepa tso' Sodoma doka dabom skeyök (50), età ¿ká e' wakpa ewëwamibö sera? ¿Kè be' tò ilo'yepa ie'pa ki s'ser mokié tso' doka dabom skeyök (50), e'pa kuëki? <sup>25</sup>¡Mokì be' kè tò s'ser yësyësè esepa ewepawa se' sulusipa ta ñita! Kè bö iwamlepa es. ¡E' kè wamblërpa! Be' dör sulitane shulökwak e' kuëki ¿wes e' kè tò se' shulepa yësyësè?

<sup>26</sup> Jehovahá tō iūtē:

—S'ser mokiē esepa kuéyō dōka dabom skeyōk (50) e' t̄a e'pa dalērmik kē ye' tō imalepa ewepawa.

<sup>27</sup> Et̄a Abraham tō iskà chéne iā:

—Be' dōr Skēkōl. T̄a ye' dōr wēs ká po ena muluchka es be' wōa. E' tō be' chakè taiē kē suane. Isalema s'ser mokiē esepa kianeia skel (5) as idōka dabom skeyōk (50). <sup>28</sup> Skel e' kianeia, e' t̄a e'pa è kueki ĵká e' wakpa ewewamibō?

Jehová tō iūtē:

—S'ser mokiē esepa kuéyō dōka dabom tkēyōk kī skel (45), e' t̄a kē ye' tō ká e' wakpa ewepawa.

<sup>29</sup> Abraham tō iskà chaké:

—Dō' dabom tkēyōk (40) è tso', e' t̄a ĵbe' tō ká e' wakpa ewewami?

Jehová iūtē:

—Au, kē yō ká e' wakpa ewepawa dabom tkēyōk (40) e' dalērmik.

<sup>30</sup> Et̄a Abraham tō ikī ché iā:

—Taiē be' tsiriwéyō, e' kueki kē be' ulunuk ye' kī. Dō' s'ser yēsyesē tso'ia dabom mañayōk (30) è.

Jehová tō iūtēne:

—Au, dabom mañayōk (30), e'pa dalērmik kē yō iewepawa.

<sup>31</sup> Abraham tō ikī chaké ème:

—A ye' Kēkōl, taiē yō be' dalōsewéwa be' chakōk i' es, erē ká kī s'ser mokiē tso' dabom böyōk (20) è, e' t̄a e'pa kueki, ĵká e' wakpa ewewamibō?

Jehová tō iūtē:

—Au, ie'pa dabom böyōk (20), e' è dalērmik kē ye' tō ká e' wakpa ewepawa.

<sup>32</sup> Abraham tō ikī chaké t̄a ichéitō iā:

—Kē be' ulunuk ye' kī. I' è chakekeyō be' a. S'ser mokiē esepa tso' dōka dabom eyōk (10) è, e' t̄a ĵwēs bö iwēmi? ĵká e' wakpa ewewamibō?

Jehová tō iūtē:

—Dabom eyōk è dalērmik kē ye' tō ká e' wakpa ewepawa.

<sup>33</sup> Mik ie'pa tté one ñita et̄a Jehovahá miāne. Abraham biteane ie' u a.

### Skēkōl tō Sodoma ena Gomorra wakpa ewéwa

**19** Ká tuinemitke t̄a Skēkōl biyōchōkwakpa bōl e'pa demi ká kiē Sodoma ee. Abraham alayōk kiē Lot, e' tkēr ká e' kkōiēulewa e' wēkkō a.\*\* Mik ie' tō Skēkōl biyōchōkwakpa sué, et̄a ie' e' kēka ie'pa shke'uk. Ie' e' tēwa ĵskī iwōtsa méwaitō íyōk kī. <sup>2</sup> Ie' tō iché ie'pa a:

—A kēkēpa, ye' kkōchō a' a tō a' kapóro ye' ska'. Ee a' klò skuòmi et̄a bule bla'mi a' mi'mine.

Ie'pa iūtē:

—Au. Kē be' tkinuk. Sa' kapōmi u'rkī.

<sup>3</sup> Erē Lot kkōché taiē ie'pa a. Bata ekkē t̄a ie'pa míyal ie' u a. Mik ie'pa de-wa weshke, et̄a ie' tō ie'pa a chké yulé buaē. Pan kē wōtuule iwōlōwōka wa ese yuéitō ie'pa a. Ie'pa chké.

<sup>4</sup> Kam ie'pa kapōlur e' yōkī Sodoma wakpa wēpa debitū taiē. E'pa tō Lot u kkōiēwa shkit. Ie'pa ulitane, duladulapa dō kēkēpaē, e'pa kulēmi Lot wōa. <sup>5</sup> Ie'pa tō ichaké aneule:

—I'ñe wēpa bōl debitū be' u a ĵwé e'pa? ;Ie'pa yōlur íe sa' a u'rkī as sa' serka ie'pa t̄a kēsik wa!

<sup>6</sup> Lot e' yéttsa ttōk ie'pa t̄a. Ukkō wōtéwaitō buaē itsikka. <sup>7</sup> Ie' tō ie'pa a iché:

—A yamipa, ye' kkōchō a' a tō ì sulu e' kē wamblar ie'pa t̄a. <sup>8</sup> Ye' alà busipa tulur bōl kam ser wēpa t̄a, e'pa yekeluryō a' a as a' tō iwamblō ie'pa t̄a wēs a' kī ikiane es. Erē kē ì wamblar sulu ye' pakōk-wakpa dewa ye' ska', e'pa t̄a.

<sup>9</sup> Erē ie'pa iūtē:

\*\* 19:1 ká e' kkōiēulewa e' wēkkō a: E' kēwō skà t̄a ká ulitane dōr kkōiēule ese kē wēkkō tso'.

—¡Be' e' skóu b́anet! Be' kè dór ká i' wak. Be' kè a ì yènuK sa' a. ¡E' kuèki be' we'ikeraè sa' tò ie'pa se tsata!

E' ukuöki ta iwe'ikémi ie'pa tò ta idemirak u wékkö batsökök. <sup>10</sup> Etá Lot pakökwakpa ulà tiéwa u'rki ukkó a Lot tséwa weshke. Etá ie'pa tò ukkó wötéwa. <sup>11</sup> Pè' sulusi kos wöbla sulu'wélur ie'pa tò, kè wawéneia. Duladulapa dô kéképaè e'pa kos wöbla sulurulune. E' kuèki ie'pa shtrinewa ukkó yulök. Kè ie'pa wa ikune. <sup>12-13</sup> Lot pakökwakpa tò iché ia:

—Tajè ká i' wakpa kkatène e' tté demi Jehová wö ki. E' kuèki sa' patkéitö ie'pa eukwa. Ie'pa ewekewa sa' tò yès. E' kuèki be' yamipa ekka kí tso' ká i' ki, e' ta e'pa yóluur. Be' alà duladulapa ta' ö be' alà busipa ta' ö be' nuákupa ta', ö be' yamipa skà tso' ká i' ki, e' ta iyóluur bet tsúmi kamiè!

<sup>14</sup> Etá Lot míá wépa tté meule senukwa ila'r busipa ta' e'pa weblök ta' iché iarak:

—¡A' e' kóka! ¡A' yúshka! Jehová tò ká i' ewekewa.

Erè ie'pa tò ibikeitsé tò ie' kalöke ie'pa ta. <sup>15</sup> Ká nirketke, e' ulatök ta' Skéköl biyöchökwakpa tò iché Lot a:

—Sa' tò ká i' ewekewa. Kè be' duakwa, e' ta ¡bet, be' e' kóka! ¡Be' alaköl ena be' ala'r busipa tsúmi!

<sup>16</sup> Erè ie' e' ukeia enaè. Erè Jehová er buaè ché ie' a, e' kuèki Skéköl biyöchökwakpa tò iklö'wéwa iulà a yèttsa. E' sù nìes ilaköl ena ilà busipa yélur ie'pa tò Sodoma a itsatkoie. <sup>17</sup> Mik ie'pa tò iyéttarak b́anet etá Skéköl biyöchökwakpa tò iché ie'pa a:

—¡A' tunú as a' tsatkèr! ¡Kè a' ká i' saukia tsikkane yès! ¡E' sù kè a' e' wöklö'uk kakkue i' ki! ¡A' éna e' tsattak, e' ta a' yúshka etkème kabata a!

<sup>18</sup> Erè Lot tò iché ia:

—¡A kéképa, au, a' we'ikèyö! <sup>19</sup> A' tò ye' kimé taiè. A' tò ye' tsatké duöwa ulà

a, erè kè ye' shkak kabata a. Ye' ibikeitsé tò ì sulu datse ká i' eukwa, e' tò ye' kuèmi ñala ki etá ye' duöwami. <sup>20</sup> Ká tsitsir tso' íe tsinet, ee ye' tköshkarmi. Kawö mú ña shkowa ee e' tsatkoie. Moki e' dór ká tsir.

<sup>21</sup> Etá ie'pa eköl tò iüté:

—Ye' be' ttö ttsé, e' kuèki yö iweke wes be' tò ye' a ikié es. Ká chébö ye' a e' kè eweku'wayö. <sup>22</sup> Erè be' yú etkème ee. Kè ye' a ì wamblènuK kam be' dòmi e' dalewa.

E' kuèki ká e' kiè Sóar.††

<sup>23</sup> Mik ká ñine etá Lot demi Sóar. <sup>24</sup> Etá azufre wönarke bö'ie e' patkébitu Jehová tò taiè Sodoma ena Gomorra ki. <sup>25</sup> Ká e' wakpa ewéwa bö' tò yès. Nìes dalikua kos tskirke ká e' ki e' ñanewa sera. <sup>26</sup> Erè Lot alaköl dami itöki. E' tò ká sué itsikka. Bet ie' yönane dayè wösiie shkè'ka.

<sup>27</sup> Bule es bla'mi ta' Abraham míane wé ikapaké Jehová ta' ee. <sup>28</sup> Sodoma ena Gomorra kí suéitö ta' ishklé batróke taiè wes tè blublu ña'wèsö es. <sup>29</sup> Es Skéköl tò ká e' wakpa ewéwa. Erè ì ki' Abraham tò ie' a, e' ska' ie' er de, e' kuèki ie' tò Lot tsatkée.

### Lot alà busipa alà kéká ie' ta

<sup>30</sup> Sodoma ena Gomorra ewéwa Skéköl tò, e' ukuöki ta' Lot suane senukia Sóar. E' kuèki imía senuk kabata a ila'r busipa böl ta. Ee ie'pa mañal sené ákuk a.

<sup>31</sup> Ká et ta' ilà busi kibi tò iché itsirla a:

—Se' yé kënewatke etá kè wé wépa ta' senuk se' ta wes alakölpa malepa wépa ta' es. <sup>32</sup> E' kuèki se' yé ttökasö blo' wa etá se' ser ie' ta, etá es se' ulà a alà dòmi.

<sup>33</sup> E' nañewe ta' ie'pa tò iyé ttéká blo' wa taiè, etá ilà busi kibi ék sené ie' ta. Erè ie' tteke blo' tò taiè, e' kuèki kè ie' éna ì aneia. <sup>34</sup> Bule es ta' ilà busi kibi tò iché itsirla a:

††19:22 Sóar: Hebreoie ká kiè e' wà kiane chè ká tsir.

—Bö ittsó, ye' sené se' yé ta. Iñe nañewe iskà ttókašo blo' wa. Eta be' senú ie' ta. Eta es se' böl ulà a alà dòmi.

<sup>35</sup>E' nañewe ta ie'pa tò iyé skà ttéka blo' wa. Eta ilà busi tsirla sené ie' ta. Eré ie' tteke blo' tò taië, e' kueki kè ie' éna ì aneia. <sup>36</sup>Es ilà busipa böl e' bukluwéka iyé wa. <sup>37</sup>Eta ikibi ék alà kune kiè mékaitö Moab. Iñe ta Moab aleripa datse e' batamik. <sup>38</sup>Ñies itsirla de alàë, kiè mékaitö Ben-amí. Iñe ta amonwak datse e' batamik.

### Abraham ena Abimélec

**20** Abraham e' yéttsa Mamré a, mía tkörö ká kiè Néguéb ee. Eta ie' e' tséat senuk ká kiè Guerar ee. Guerar ate Cadés ena Sur e' shushäë. <sup>2</sup>Ie' tò ká e' wakpa a iché tò Sara dör ie' kutà. Ká e' blú kiè Abimélec, e' tò Sara tsuk patké alakölie e' a. <sup>3</sup>Eré nañewe ta ie' kapowa e' dalewa, Skéköl tté ie' ta kabsuè a ta iché ia:

—Alaköl tsuk patkébö e' wëm ta, e' kueki be' duowami.

<sup>4</sup>Eré kam ie' ser Abraham alaköl ta, e' kueki ie' iüté:

—A kéképa, ye' kè ki e' nuí ku' ¿wes e' ttewamibö? <sup>5</sup>E'ma Abraham wák tò ye' a iché tò alaköl e' dör ie' kutà. Ñies ilaköl tò ye' a iché tò Abraham dör ie' akè. E' kueki ye' tò ì kos wé er bua' wa. Kè ye' wa iwamblène er sulu wa.

<sup>6</sup>Skéköl tò iskà iüténe kabsuè a ta ichéitö ia:

—Ye' éna iane buaè tò be' tò iwé er bua' wa. E' kueki kè ye' wa be' kàne ie' kökwá as be' kè tò ì sulu wamblò ye' ki. <sup>7</sup>Abraham dör ye' tteköl, e' kueki bet be' yú ilaköl mukne ia. Ie' tò ye' a ikieraë as be' seriá ttsé'ka. Eré be' kè dè'ne imukne, e' ta be' ena be' yamipa kos duoralur.

<sup>8</sup>Bule es bla'mi ta Abimélec shkene ikanè mésopa kiéitö ta ì suéitö kabsuè a e' kos pakéitö ie'pa a. Mik e' ttsé ie'pa tò eta taië ie'pa suanéka iyöki.

<sup>9</sup>Eta Abimélec tò Abraham kié ta iché ia:

—¿Íók be' tò iwamblé sa' ta es? Be' kueki Skéköl tò sa' pañé ewèwa, eré Skéköl tò sa' pañé es, eta ¿ì sulu wambléyö be' ta? Ýyi ese kè kawö ta' wamblénuk. <sup>10</sup>Be' tò ì sulu wamblé ye' ta, eta ¿ì dör iwà?

<sup>11</sup>Abraham tò iüté:

—Ye' tò ibikeitsé tò ká i' ki kè yi tò Skéköl dalöieta'. Ye' suane dö' a' ye' ttèwa ye' alaköl yottsá ye' ulà a. <sup>12</sup>Eré iyène tò ie' dör ye' kutà. Ie' yé dör ye' yé, eré ie' mì kè dör ye' mì. Ñies ie' dör ye' tayé. <sup>13</sup>Mik Skéköl tò ye' a iyé' tò be' e' yóttsa be' yé ká a, eta yö iché ye' alaköl a: “Ká wañe wé se' demi, eta ichó tò ye' dör be' akè.”

<sup>14</sup>Eta Abimélec tò Sara méne iwëm Abraham a. Ñies iyiwak kakméitö Abraham a obeja ena baka. Ñies kanè mésopa kakméitö ie' a wépa ena alakölpa. <sup>15</sup>Eta ie' iché Abraham a:

—Ye' ká saú seraá wé wa be' wöbatse e' ki be' yú senuk.

<sup>16</sup>Eta Sara a ichéitö:

—Ye' tò inuköl wömulé kakmé be' akè a döka mil ekké. E' dör ì sulu wambléyö be' ta be' wakpa ulitane wöa e' patuoie. Es be' kè jaëneia.

<sup>17</sup>Eta Abraham tò Skéköl a ikié tò Abimélec ena ilaköl duöke, e' bua'üne. Eta Skéköl tò ie'pa bua'wéne. <sup>18</sup>Alakölpa kos tso' Abimélec u a, e'pa shü mo'wa Jehovahá tò as kè idöjarak alàë Sara kueki. Ie'pa kos shü wötséene Jehovahá tò.

### Sara alà kéká Abraham a

**21** Ì ye' Jehovahá tò Sara a tò be' alà kóraka, e' wà tka wes iyène bak es. <sup>2</sup>Eré Sara ena iwëm dör kéképalatke, eré ie' duneka e' wà kune. Alà e' kune mik Skéköl tò ikéwö yé' ie' a eta. <sup>3</sup>Sara alà kune wëm e' kiè méka Abraham tò Isaac. <sup>4</sup>Mik Isaac ki ká de pàköl, eta Abraham tò itóttola kkuölitla téé tsir wes Skéköl tò

ie' a iyë' es. <sup>5</sup>E' kəwō ska' t̄a Abraham ki duas tso' cien eyök (100). <sup>6</sup>Et̄a Sara tō ibikeitsé: “Skéköl tō ye' jañawéka. Mik sulitane w̄a ijchenew̄a tō ye' de alàè et̄a tajë ie'pa jañumi ye' t̄a. <sup>7</sup>Kam ye' alà kōka et̄a k̄è yi a iyënuκ tō ye' dōmi alàè. Erë i' t̄a ye' alà kék̄a Abraham a, ie' kënëwatke et̄a.”

### Agar ena Ismael uyétts̄a b̄anet

<sup>8</sup>Et̄a Abraham alà Isaac de b̄erie t̄a itsu'batsée e' kəwō tkō'wé Abraham tō tajë. <sup>9</sup>Et̄a Sara tō isué tō Abraham alà kune egiptowak kiè Agar e' t̄a kiè Ismael, e' tō Isaac wayueke suluë. <sup>10</sup>E' kueki Sara m̄ia ichök Abraham a: “Ì kos tso' be' w̄a mè se' alà Isaac a, e' k̄è kawō t̄a' blatè se' kanè méso e' alà a. E' kueki iyuóshkar alàè.”

<sup>11</sup>Ismael dör Abraham alà ñies e' kueki ì ché Sara tō e' tō ie' eriwé tajë. <sup>12</sup>Erë Skéköl tō iché ia: “Be' aleripa chök̄le e'pa dōraè Isaac wa. E' kueki k̄è be' tkinuk be' alà kibi ék̄ ki ena imi ki. Ì kos ché Sara tō e' ú. <sup>13</sup>Be' alà kune a' kanè méso t̄a, ñies e' aleripa alōweraëyö tajë, ie' dör be' alà e' kueki.”

<sup>14</sup>Et̄a bule es bla'mi t̄a Abraham tō Agar a chkè mé. Ñies di' méitō ia iyiwak kkuölit yöule di' tsoje ese a. E' tiék̄a ie' tō serāa itsi ki t̄a iyuéshkar ilà Ismael e' t̄a. Agar m̄ia shk̄emi éanas wé k̄è yi serku' ese ska' k̄a kiè Beerseba e' éka. <sup>15</sup>Mik idi' enewa, et̄a ilà tkés̄eritō kal dik̄ia. <sup>16</sup>Ie' k̄è ki ilà kiane suè duökwa, e' kueki im̄ia e' tkés̄er kukuie. Mik ie' e' tkés̄er iski et̄a ilà iémi.

<sup>17</sup>Ilà iuke e' t̄tsé Skéköl tō t̄a bet Jehová biyöchökwak bua'ie e' tō Agar a ichaké k̄a jaì a: “¿A Agar wés be' de? K̄è be' suanuk. Be' alà tk̄er iuk e' t̄tsé Skéköl tō. <sup>18</sup>Be' yú be' alà yulök. Ikók̄a ulà a k̄è arwa. Ye' tō ie' aleripa alōweraè tajë.”

<sup>19</sup>Et̄a Skéköl tō Agar a di' tum kkaché et. Ie' m̄ia di' e' tsuk, iyiwak kkuölit a e' méitō Ismael a yè. <sup>20</sup>Skéköl tō Ismael kkōné buaè. Ie' talane sené k̄a wé ki k̄è yi ku' kiè Parán eē. Ie' de suléname buaè. <sup>21</sup>Ie' kibine t̄a imi tō iulabatséw̄a alaköl dör egiptowak ese t̄a.

### Abraham ena Abimélec tō kawō mé ñi a

<sup>22</sup>E' kəwō ska' t̄a blu' kiè Abimélec m̄ia ttök Abraham t̄a. Ie' ñippökwakpa wökir, kiè Ficol, e' mí ie' wapie. Et̄a Abimélec tō iché Abraham a:

—Sa' w̄a ijcher tō Skéköl be' kimeke tajë ì kos wekebö e' wa. <sup>23</sup>E' kueki be' ttè mú ye' a íe Skéköl wö wa tō be' k̄è tō ì sulu wamblepa ye' ki ñies ye' ala'r ki ena ye' aleripa kos e'pa ki. Be' ttè mú ye' a tō be' er bua' chōraè ye' a wés ye' er buaè ché be' a es. Ñies be' ttè mú ye' a tō be' er buaè chōraè k̄a i' wé be' serke e' wakpa a.

<sup>24</sup>Abraham tō iiuté:

—Tó. Es ye' ttè mé be' a.

<sup>25</sup>Erë Abimélec wakpa tō di' tum biule yé'tts̄a et Abraham wakpa ulà a. E' chaké Abraham tō ie' a. <sup>26</sup>Ie' tō iiuté:

—Erpa be' ye' tkiwéw̄a ttè e' wa. K̄è bō ichópa ye' a, e'ma k̄è ye' w̄a ijcher. Brör ¿yi tō e' wamblé be' ki?

<sup>27</sup>Abraham tō baka ena obeja kakm̄e Abimélec a et̄a ie'pa bōl kawō mé ñi a. <sup>28</sup>E' ukuök̄i t̄a Abraham tō iobeja alakipa pupula e' dapa'wé dōka kuktō ek tsiní. <sup>29</sup>Mik e' sué Abimélec tō et̄a ie' tō Abraham a ichaké:

—¿Ì kueki be' iyiwak kuktō dapa'wé ek tsiní?

<sup>30</sup>Abraham tō iiuté:

—Iyiwak kuktō, e' meke ye' tō be' a iwà kkachoie tō mok̄i ye' tō di' tum e' bi'.



<sup>31</sup> Ie'pa bȫl kawö mé ñi a ee' e' kueki ká e' kinewá Beerseba. <sup>32</sup>

<sup>32</sup> Ie'pa kawö mé ñi a, e' ukuöki ta Abimélec ena Ficol e'pa biteyal filisteowak ká a. <sup>33</sup> Eta Abraham tö kal kuá kiè tamarisco ese kuatké elka Beerseba. Ee ie' tö Jehová dör Skököl yöbié e' dalöié. <sup>34</sup> Ee ie' sené ká taié filisteowak ká a.

### Skököl tö Abraham ma'wé ilà wa

**22** E' ukuöki ta Skököl tö Abraham ma'wé tö moki ie' tö idalöieta'. Ie' chakéito:

—A Abraham.

Abraham tö iüté:

—¿Ì?

<sup>2</sup> Eta Skököl tö iché ia:

—Be' alà eköl è kiè Isaac e' dalèr be' éna taié, e' tsúmi Moria. Mik be' demi ee, eta ye' tö be' a kabata kkacheke, e' ki be' alà ttówa ta iná'úwa ye' a ye' dalöioie.

<sup>3</sup> Bule es bla'mi ta Abraham e' kéka ta burro payuéitö. Bö' jchéitö tsémi. Eta ie' míá wé Skököl tö ie' a iyé ee ilà ena ikanè mésopa bȫl e'pa ta. <sup>4</sup> E' böiki es ta Abraham tö ká yéne ie' a e' kí sué kamié. <sup>5</sup> Eta ie' tö iché ikanè mésopa a:

—Íe a' e' tsúat burro i' ta. Ye' ena ye' alà, sa' micho kabata jai a Skököl dalöiök, e' wa sa' döne.

<sup>6</sup> Eta Abraham wa bö' mí e' ppékaitö Isaac kuli' ki. Tabela ena bö'ka bö' batsoie e' mí Abraham wa. Eta imíyal ñita. <sup>7</sup> Eta Isaac tö iché iyé a:

—A, yéwö.

Abraham tö iüté:

—A alà, ¿ì kiane be' ki?

Isaac tö iché ia:

—A Yéwö, bö' tso' se' wa, ñies bö'ka, eré ¿wé obeja pupula ttekewá Skököl a e'?

<sup>8</sup> Iyé tö iüté:

—A alà, Skököl wák tö e' meraé se' a.

Ie'pa mir ñita. <sup>9</sup> Mik ie'pa demi wé Skököl tö iyé Abraham a ee, eta Abraham tö ák kataté et ka'ie. E' ukuöki ta ibö' dapa'wéka ka' e' ki ta ilà klö'wéwaitö payuéwa mékaitö bö' bata ki. <sup>10-11</sup> Ie' tabela klö'wéwa ilà ttówa ña'wé Jehová a. E' wöshá ta Jehová biyöchökwak bua'ie e' tö Abraham chaké siwa' ki:

—¡A Abraham, a Abraham!

Ie' tö iüté bet:

—¿Ì?

<sup>12</sup> Jehová biyöchökwak bua'ie e' tö iché ia:

—¡Be' alà kè shka'war, kè ittarwa! Be' wák alà eköl ème e' kè kkéone be' wa ye' yöki. E' wa ye' wa ijcher tö moki be' tö ye' dalöieta' taié.

<sup>13</sup> E' wöshá Abraham tö isué tö obeja wé'ne e' malítséwa idula' a kal tsitsir chale a. Ie' tö iyiwak e' klö'wéwa jché ña'wéwa ilà skéie Jehová dalöioie. <sup>14</sup> Ie' tö ká e' kié méka i' es: “Í kiane se' ki e' mera Jehová tö.” E' kueki i'ne ta se' tö ichekeia: “Í kiane se' ki, e' merdaé se' a Jehová kébata a.”

<sup>15-16</sup> Jehová biyöchökwak bua'ie e' tö Abraham ská kié ká jai a ta ichéitö ia:

—Jehová tö iché: ‘Buaé be' tö ye' dalöieke, be' alà eköl è, e' méttšabö ye' a. <sup>17</sup> E' kueki ye' er buaé chöraé be' a taié. Be' aleripa alöweraéyö taié wes bëkwö tso' taié ká jai a es, wes tša'wö tso' taié dayé kkömik es. Ñies ie'pa e' alöraka ibolökpa ki kékraé. <sup>18</sup> Be' tö ye' ttö dalöié, e' kueki be' aleripa batamik ye' er buaé chöraé ká ulitane wakpa a.’

<sup>19</sup> Eta Abraham biteane wé ikanè mésopa atéat ee ta imíyal seraá ñita dómine Beerseba wé ie' serke ee.

### Nahor ala'

<sup>20-23</sup> E' ukuöki ta biyö debitu Abraham ki tö ie' èl kiè Nahor, e' alaköl kiè Milcá,

††21:31 *Beerseba*: Hebreoie ká kiè e' wa kiane chè ttè mène ñi a e' di' tum biule ö Obeja kuktö e' di' tum biule.

e' ala'r de pàköl (8). E' alà ko'k kiè Uz. Imalepa kiè dör Buz, Quemuel, e' dör Aram yé, Quésed, Hazó, Pildás, Idlaf ena Betuel e' dör Rebeca yé.

<sup>24</sup> Nahor alaköl skà tso' kiè Reumá, e' ta ie' ala'r kéka tkél. E'pa kiè dör Teba, Gáham, Tahas, ena Maacá.

### Sara blénewa

**23** Mik Sara ki duas tso' cien eyök kí dabom böyök kí kul (127), <sup>2</sup> eta ie' blénewa ká kiè Quiriart-arbá ate Canaán eé. Nies ká e' kiè Hebrón. Abraham schöne e' iétséitö siarè. <sup>3</sup> Ie' tkèr idéütö nu o'mik e' e' kéka ta imía ttök hititawakpa ta, ta ichéitö ie'pa a:

<sup>4</sup> —Eré ye' dör ká kuak'i wak serke a' shua e' è, erè ká wataú ña pöie ye' déütö blowa.

<sup>5</sup> Ie'pa tö iüté:

<sup>6</sup> —A kéképa, be' we'ikè sa' tö, sa' ttö tssó. Sa' a ta be' dör kéképa taiè e' serke sa' shua. E' kueki be' déütö nu bló sa' pö bua'ie ese a. Sa' ulitane kè tö ichepa be' a tö kè iblar sa' pö a.

<sup>7</sup> Ie' e' duéka ie'pa wörki ta ie' e' tkéwa kuchè ki ie'pa dalöiök <sup>8</sup> ta ichéitö ie'pa a:

—Moki a' ki ikiane tö ye' déütö nu blèwayö ié a' ká a, e' ta wém kiè Efrón dör Sóhar alà, e' a ichó <sup>9</sup> tö ákuk tso' ie' ká kkó a kiè Macpelá e' wataútsa ye' a ye' yamipa pöie. Ye' tö ipatuèmi ie' a kos ituè ekkè. Es ákuk e' ate ye' ulà a a' shua.

<sup>10</sup> Eta Efrón dör hititawak e' tkèrñak ie'pa shua, e' tö Abraham iüté darèrè as iyamipa ena kos daparke ká e' wékkö a e'pa tö ittò tssò. Ie' tö iché Abraham a:

<sup>11</sup> —A kéképa, kè ye' tö ákuk watepa be' a. Ká e' nies ákuk tso' ia, e' kakmekeyö be' a é. Ye' yamipa kos tso' ié e'pa tö ye' ttò tssé tö ká e' kakméyö be' a. Be' déütö nu bló eé.

<sup>12</sup> Eré Abraham e' tkéwane kuchè ki ká e' wakpa wörki <sup>13</sup> ta ichéitö ie' a sulitane wörki:

—Ye' ttò tssó. Be' pablèyö tö ká e' ské kló'ú ye' ulà a. E' ukuöki ye' déütö nu blekewayö.

<sup>14</sup> Ie' tö iüté:

<sup>15</sup> —A kéképa, ye' ttò tssó. Ká e' ské dör inuköl wömule doka cien tkéyök (400), erè inuköl ekkè è, kè e' ki se' tkinuk. Be' déütö nu bló eé.

<sup>16</sup> Eta kos ie' tö ká ské ché imalepa wörki e' mène buaè Abraham a, ekkè patuéttsaitö.<sup>¶¶</sup> <sup>17-18</sup> Es Efrón ká tso' Macpelá ate Mamré diwö tskirke e' éka e' de Abraham ulà a iákuk ta ena kal tso' kos iki e' ta. Hititawak ena sulitane dami ká e' wékkö a e'pa kos dör ká tone e' ttekölpa.

<sup>19</sup> E' ukuöki ta, Abraham tö idéütö nu bléwa ákuk tuéitö Macpelá eé. Ká e' ate Mamré ate Canaán e' o'mik tsinet (Mamré kiè nies Hebrón). <sup>20</sup> Ká e' watuéttsa ie' a hititawak tö. Es ká e' ena ákuk e' de Abraham ulà a iyamipa pöie.

### Abraham tö alaköl yulök patk Isaac a

**24** Abraham dewa kéképalaié. Ie' a Jehová er buaè ché iyi ulitane wa. <sup>2</sup> Ká et ta ie' tö ikanè méso kibi kié. E' dör ie' iyi kos e' kueblu. Ie' tö iché ia:

—Be' ulà múwa ye' tu' dikia iwà kkachoie tö moki i kiekeyö be' a e' waweraébö. <sup>3</sup> Jehová dör ká jai ena ká i' e' Kéköl e' wörki be' ttè mú ye' a mok-iè tö ye' alà kè kar senukwa Canaán ié se' serke e' alékölpa ta. <sup>4</sup> Be' yú ká wé ye' manét eé, eta eé alaköl yuló eköl ye' yamipa shua senukwa ye' alà ta.

<sup>5</sup> Ie' tö iüté:

<sup>¶¶</sup> 23:16 Es ie'pa wöblar iyi watauk ñi a. Eré Efrón tö iché tö ká e' kakméitö Abraham a erè e' kè yéne. Nies e' ane Abraham éna, e' kueki ie' tö Efrón patué bèrè kos Efrón ie' a iché ekkè.

—Dö' alaköl kè bitu ye' ta, e' ta çwes ye' iwèmi? ÇBuaë idir be' a tö be' alà mi' ye' wa dò wé be' manét ee?

<sup>6</sup>Ie' iüté:

—Au, kè ye' alà tsarmi ee! <sup>7</sup>Jehová dör ká jaì Kèköl, e' tö ye' ye'ttsa ye' yé u a ena ye' yamipa ká a. Ie' tö ittè me' ye' a tö ká i' meraëitö ye' aleripa a. Ie' tö ibiyöchökwak patkeraë be' kímuk alaköl tsukbitu ye' yàkie. <sup>8</sup>Alaköl kè shkak be' ta, e' ta kè be' tkinuk. Kè be' kàne iskà yulök. Erè kè ye' alà tsarmi ee.

<sup>9</sup>Età ikanè méso ulà mewá ie' tu dikia ta ittè mé ia tö iweraë wes iuk patkéitö es. <sup>10</sup>E' ukuökü ta ie' tö iwökir íyi kos bua'buá, ese shtë tsèmi kakmè. Ekkè kos payuéitö iyiwak kiè kameio e' ki döká dabop. Etá ie' míá iyiwak wèttse tkörö Nahor atë Mesopotamia ee. <sup>11</sup>Mik ie' demi tsinet Nahor, etá ká tuirketke. Diwö ekkè ta ká e' alékölpa mi'ke di' tsuk. E' wöshá ta ie' de di' tum biule e' kkömik ta ikameio kéitö e' tulökser enuk ee. <sup>12</sup>Etá ie' tö iché Skèköl a: “A Jehová, be' dör ye' wökir Abraham e' Kèköl. Ye' kímú i'ne nïes er buaë chó ye' wökir a. <sup>13</sup>Ié di' tum biule o'mik ye' e' tsukeat bër-bër è ká i' busipa tso' di' tsuk e' dalewa. <sup>14</sup>Kawö mú ña tö wéne ék a ye' iché: ‘Be' kakö' ówa ye' a di' kakmú yè', as e' tö ye' iütö: ‘Be' di' yó nïes be' kameio a ikak-mekeyö.’ Es ye' éna iane tö e' ék shushtë be' tö Isaac a alakölie. Es ye' wa ijchermi tö be' er bua' ché ye' wökir a.”

<sup>15</sup>Etá kam ì chekeitö e' or, etá ie' isué alaköl datse eköl kakö' bune kuli' ki' di' tsoie. E' dör Rebeca, ie' dör wëm kiè Betuel e' alà busi. Betuel mì dör Milcá ena iyé dör Nahor. Nahor dör Abraham èl. <sup>16</sup>Rebeca dör busi buaala kam iser wëm ta. Ie' míá döttsa di' tum biule e' a ikakö' wà iök. <sup>17</sup>Mik imítke etá Abraham kanè méso tunemi itökü ta iché ia:

—Be' we'ikèyö, di' dami be' wa e' kakmú ña yè.

<sup>18</sup>Ie' tö iüté,

—A kèkèpa, be' di' yó.

E' bet ie' kakö' éwa klö'wéwa ulà a ta di' méitö ia yè. <sup>19</sup>Mik ie' di'yé one ta Rebeca tö iché ia:

—Ye' mí di' tsuk nïes mè be' kameio a.

<sup>20</sup>Bet ikakö' wà ka'wéitö wé iyiwak di'yöke e' a ta imí di' kú tsuk iyiwak a. Es iwéitö kameio ulitane a. <sup>21</sup>E' dalewa Abraham kanè méso tso' isauk bèrè, wà dör tö ie' ki' ikiane jchenowa yësyèsè tö Jehová tö ie' kímé ì dalèrmik ie' shkò e' wa as idöttsa buaë ö au. <sup>22</sup>Mik kameio di'yé one, etá ie' tö ula'tsio sù es dör gramo teröl ese tkéwa busi yik a. Nïes ulaio méitö böt, e' es dör cien gramos tsa-ta. <sup>23</sup>Etá ie' tö iché ia:

—Be' we'ikèyö, ichó ña çYi alà busi be' dör? ÇYe' chòmi i'ne nañewe be' yé u a kapökrö ye' kanè mésopa ta?

<sup>24</sup>Ie' iüté:

—Ye' dör Betuel alà busi, e' dör Milcá ena Nahor alà wëm. <sup>25</sup>Sa' u a a' chòmi. Nïes a' kameio a chkè tso'.

<sup>26</sup>Etá Abraham kanè méso e' tkéwa kuchè ki' Jehová dalöiök <sup>27</sup>ta ichéitö: “Jehová dör ye' wökir Abraham e' Kèköl. E' kikökka ye' tso'. Kèkraë ie' tö ye' wökir Abraham kimeke buaë. Kèkraë ie' er buaë chöke ye' wökir a. Ie' wa ye' debitu buaë ñala ki' dö íe ye' wökir yamipa u a. E' kueki' ikikèkayö.”

<sup>28</sup>Rebeca tunemi shkalaläë imi u a ì kos tka ie' ta e' pakök. <sup>29-30</sup>Ie' akè kiè Labán, e' tö ula'tsio sué ena ulaio sué ikutà ulà a. Nïes ì ché Abraham kanè méso tö e' ttè tseitö. E' kueki' ie' bitea iñaletsuk di' tum biule a. Ie' de Abraham kanè méso ska' e' tso'ia ikameio ta di' tum biule ska'. <sup>31</sup>Etá Labán tö iché ia:

—Jehová tso' be' ta buaë. iMishka ye' ska! ÇWes be' e' tsukeat u'rkü? Ye' u kanewétke be' a nïes kameio a.

<sup>32</sup>Es Abraham kanè méso bitea ie' ta. Ee ie' tö dali tso' kameio ki' e' éwa ta itiéitö. E' ukuökü ta ie' wa di' debitu Abra-

ham kanè méso a ena iwapiepa a klò skuoie.

<sup>33</sup> Mik ie'pa tò itié, etā Abraham kanè méso tò iché:

—Kè ye' chkòpa kam ye' tò iók ye' debitu ie' wà pakò a' a etā.

Labán tò iiuté:

—E'ma ichó. ¿Ì dör iwà?

<sup>34</sup> Ie' tò iché:

—Ye' dör Abraham kanè méso. <sup>35</sup> Jehová tò ikimé taië. Ie' tò iblu'wé taië. Obeja, baka, orochka, inukólchka, kanè mésopa wépa ena alakólpa, kameio ena burro, e' kos méitö ia taië. <sup>36</sup> Nies ilaköl Sara e' tò alà mé ia eköl wák wëm ikënewatke etā. Ì kos tso' ye' wökir wā e' méitö ilà a. <sup>37</sup> Ie' tò ye' ké ttè muk ie' a. Ye' a ichéitö: 'Ye' alà kè kar senukwā Canaán wé ye' serke e' alékölpa tā. <sup>38</sup> Be' yú wé ye' yépa tso' ee tā alaköl yuló eköl ye' yàkie ye' ditséwō shūā.' <sup>39</sup> Ye' tò iiuté: 'A ye' wökir Abraham, ¿dö' alaköl kè bitu ye' tā?' <sup>40</sup> Ie' tò ye' iuté: 'Këkraë ye' serke buaë Jehová wōā, e' kueki ie' tò ibiyöchökwak patkeraë be' tā as be' kawō tkò buaë ñalā ki, ñies as alaköl kübö ye' yàkie ye' yamipa ye' yé wa e'pa shūā. <sup>41</sup> Erë ye' yamipa kè éna ilà busi patkak be' tā, e' tā kè be' tkinuk. Kè ì tté tā'ia be' ki.'

<sup>42-44</sup> "E' kueki ye' debitu i'ñe di' tum biule ska'. Ee ye' tò ikié Jehová dör ye' wökir Abraham e' Këköl e' a: 'tö mokī be' ye' kimeke alaköl yulök ye' wökir Abraham yàkie, e' tā as e' bitu ye' ska' íe di' tum biule ska'. Mik ye' tò ie' a di' kak kié, etā as imütö ye' a ena ichöitö: Nies ye' tò be' kameio a ikakmeke. Es ye' isuëmi tò alaköl e' shushtë be' tò ye' wökir yàkie.'

<sup>45</sup> Mik e' chekeyö e' erketke, etā ye' isué tò Rebeca datse ikakö' bune ikuli' ki.

<sup>46</sup> Mik ie' di' yinetke etā ye' tò ie' a iché: 'Be' we'ikëyö, di' dami be' wā e' kaktmú ña yè.' E' bet ikakö' éwaitö tā ichéitö: 'Be' di' yó. Nies imekeyö be' kameio a.' Ie' ye' a di' mé ñies ye' kameio a. <sup>47</sup> E'

ukuökī tā ye' tò ie' a ichaké: '¿Yi alà busi be' dör?' Ie' iiuté: 'Ye' dör Betuel alà busi e' dör Nahor ena Milcá alà.' Etā ula'tsio sū e' tkéwayö iyik a ena ulaio tkéwayö böt iulā a. <sup>48</sup> E' ukuökī tā ye' e' tkéwā kuchē ki tā Jehová dalöiéyö. Ie' dör ye' wökir Abraham e' Këköl e' kikékayö. Ie' wā ye' debitu buaë yësyësë busi shukititö ye' wökir yamipa shūā ilā a e' ska'. <sup>49</sup> Es ¿a' er buaë chöke ye' wökir a? ¿A' e' chöke ikimuk er bua' wa? Ichó ña i' tā yësyësë ima a' tò iché, es ye' éna iarmi tò ì wëmiyö."

<sup>50</sup> Etā Labán ena Betuel e'pa tò iiuté:

—E'ma i' kos debitu Jehová ttö wa. E' kueki kè wes sa' a ì onuk. Kè sa' a ì yënuke yës. <sup>51</sup> I' Rebeca. Itsúmi be' wökir a senukwā ilā tā wes Jehová ki ikiane es.

<sup>52</sup> Mik Abraham kanè méso tò ttè e' ttsé, etā ie' e' tkéwā kuchē ki iwöt-sā méwā íyök ki Jehová dalöiök. <sup>53</sup> E' ukuökī tā ie' tò íyi yöule orochka wa ena inukólchka wa ñies datsi' bua' bua' e' taië yélur méitö Rebeca a. Nies ie' tò ikakmé Rebeca aké a ena imi a. <sup>54</sup> E' ukuökī tā ie' ena iwapiepa chké di'yé tā ikapere ee. Bule es tā iti'nerak tā Abraham kanè méso tò iché:

—Ye' míane ye' wökir ska'.

<sup>55</sup> Erë Rebeca aké ena imi e'pa tò iché ia:

—Rebeca kè tsarmi bet. Kawō mú ie' a as ie' e' tsüt sa' tā ká dabop, e' wa wë' be' wā imi'mi.

<sup>56</sup> Erë ie' tò iché ie'pa a:

—Kè ye' wöklö'ukia a' tò. Jehová tò ye' kime as ì kos döttsā buaë ye' a. E' kueki ye' ómi ye' wökir u a.

<sup>57</sup> Ie'pa tò iiuté:

—Sa' mí Rebeca kiök chaké ¿ima ichëmiitö?

<sup>58</sup> Etā Rebeca kiérakitö tā ichakérakitö ia:

—A Rebeca ¿be' shkak wëm i' tā?

Ie' tò iiuté:

—Tó.

<sup>59</sup> Es ie'pa tō Rebeca ena alakōl tso' ie' kkō'nuk kēkraē e'pa a kawō mé as imi'rak. Nies Abraham kanè méso ena iwapiēpa kōs e'pa a kawō mérakitō as imi'rak. <sup>60</sup> Ie'pa mitke tā Rebeca yamipa er buaē ché ie' a ttē i' wa:

“A sa' yami,

As be' alōr tajē shūteē.

As be' aleripa e' alōka ibolōkpa kōs ki.”

<sup>61</sup> Etā Rebeca ena ikanè méso e' tulékā ie'pa kameio kī tā imiyal Abraham kanè méso itōkī.

<sup>62</sup> E' kēwō ska' tā Isaac serke Négueb wé di' tum biule tso' kiè “Skēkōl tso' e' tō ye' sueke” ee, e' dene iyé ska'. <sup>63</sup> Tsālī tā Isaac e' yéttsā shkōk kabikeitsōrami. E' wōshā tā ie' isué tō kameio datse tseē.

<sup>64</sup> E' wōshā Rebeca tō ie' sué nies tā ie' e' éwa kameio kī. <sup>65</sup> Rebeca tō ichaké Abraham kanè méso a:

—¿Wēm doā wī se' kke, e' dōr yi?

Ie' iūté:

—E' dōr ye' wōkir Isaac.

Etā Rebeca wō pabakéwā datsi'tak wa.

<sup>66</sup> Abraham kanè méso tō i kōs tka ie' tā e' paké Isaac a. <sup>67</sup> E' ukuōkī tā Rebeca mítser Isaac wā imi Sara blēnewā e' u a. Es Isaac senéwā ie' tā. Isaac éna Rebeca dalēr tajē, es ie' er pabléne imi blēnewā e' kuekī.

### Abraham ena Queturá e'pa aleripa

**25** Abraham alakōl ské tséwā kiè Queturá. <sup>2</sup> Ie' ala'r kéka Abraham tā wēpa dōka terōl. E'pa kiè dōr Zimrán, Jocsán, Medán, Madián, Isbac ena Súah. <sup>3</sup> Jocsán dōr Sebá ena Dedán, e'pa yé. Dedán aleripa e' ditsewō dōka mañal kiè asurwak, letuswak ena leumwak. <sup>4</sup> Madián ala'r wēpa kiè Efá, Éfer, Hanoc, Abidá ena Eldaá. E'pa kōs dōr Queturá aleripa.

<sup>5-6</sup> I kōs tso' Abraham wā e' atē Isaac ulā a. Erē kam Abraham duōwā, e' yōkī ie' tō iyi kakmé ilakōlpa malepa ala'r a. Ie'pa patkēmiitō senuk ká bánet atē diwō

tskirke e' ēka kamiē as kē ikū'rak Isaac ska' tsinet.

### Abraham blēnewā

<sup>7</sup> Abraham sene' duas cien eyōk kī dabom kulyōk kī skel (175) serā <sup>8</sup> etā iblēnewā buaē ikēnewatke kē weine siarē. Es ie' michoē idēūtōpa itōkī. <sup>9-10</sup> Ila'r Isaac ena Ismael e'pa tō inú blé ilakōl Sara pō e' o'mik ákuk kiè Macpelá ee. Ákuk e' atē Mamré diwō tskirke e' wa. Ká e' bak hititawak kiè Efrón dōr Sóhar alā e' ulā a. Ká e' wato'ttsā hititawak tō Abraham a. <sup>11</sup> Abraham blēnewā, e' ukuōkī tā Skēkōl er buaē ché Isaac a. Ie' e' tséat senuk tsinet di' tum biule kiè “Skēkōl tso', e' ye' sueke” ee.

### Ismael ala'r

<sup>12</sup> Ismael dōr Abraham alā Agar tā. Agar dōr Abraham alakōl Sara, e' kanè méso e' dōr egiptowak. Ikkē dōr Ismael ala'r e'pa kiè <sup>13</sup> wēs ikūnerak es: Nebaiot, e' dōr ilā tsá. E' itōkī Quedar, Adbeel, Mibsam, <sup>14</sup> Mismá, Dumá, Masá, <sup>15</sup> Hadar, Temá, Jetur, Nafis ena ibata kiè Quedmá. <sup>16</sup> E'pa kōs dōr Ismael ala'r dōka dabom eyōk kī bōl (12). Ie'pa ká kiérak iwákpa kiè wa. Ie'pa kōs dōr iwakpa ká wōkirpa.

<sup>17</sup> Ismael kī duas de cien eyōk kī dabom mañayōk kī kul (137) tā iblēnewā. Es ie' michoē idēūtōpa itōkī. <sup>18</sup> Ie' aleripa mīa senuk Havilá ena Sur e' shushā. Ká e' atē Egipto wōshaē Asiria ñalé kke. Ie'pa serke ee bánet Abraham aleripa malepa yōkī.

### Jacob ena Esaú kune

<sup>19</sup> Ttē i' dōr Isaac dōr Abraham alā, e' pakē. <sup>20</sup> Isaac kī duas de dabom tkēyōk (40) tā isenéwā Rebeca tā. Rebeca dōr Betuel e' alā busi ena Labán kutà. Ie'pa dōr arameowak serke ká kiè Padán-aram ee. <sup>21</sup> Rebeca kē dō alàè. E' kuekī Isaac tō Jehová a ikié as Rebeca dō alàè. Je-

hová tò ittò ttsé tã Rebeca dunekã e' wakpa dör klò. <sup>22</sup> Erë klöpa ñippöke tajë ie' shua. E' kueki ie' ibikeitsé: “Ye' weirke i' es, e'ma çíók ye' sermiia?” E' kueki ie' mía iwà chakök Jehová a. <sup>23</sup> E' tò ie' a iché:

“Be' shua ala'r tso' böl.

Mik ie'pa de këchke, etã ikibi ék döraë itsirla kanè mésoie.

Ie'pa aleripa döraë kã böt ñi bolökpa ese wakpa.

Itsirla aleripa döraë diché kibiie ikibi aleripa tsata.

E' kueki ie'pa ñippémitke kam ikur e' yöki.”

<sup>24</sup> Rebeca kéwö de, etã klöpa kune wëpa. <sup>25</sup> Ikewe ék kune e' tsà dör mash-mash ipäkö shamamaë. Ie' kiè mékãitö Esaú.<sup>§§</sup> <sup>26</sup> Alà tsá kune e' klöulewã iël tsirla wã iklö kaniñak a iulà et wa. E' kueki ikiè mékãitö Jacob.\* Mik Rebeca klöpa kune etã Isaac kã duas tso' dabom teryök (60).

### Iyé wã ì tso' mekeat Esaú a e' kéwö watuéttsaitö

<sup>27</sup> Klöpa kibinetke. Esaú dör yëria poë. Ie' wöbatsö sulu yëble wa. Erë iël Jacob, e' kè dör es. Ie' serke bërë. Ie' wöbatsö senuk u a è. <sup>28</sup> Iyiwak kañiru tteke Esaú tò e' chkà wa Isaac wöbatsö suluë. E' kueki Isaac kã Esaú kiar kibiie Jacob tsata. Erë Rebeca kã Jacob kiar kibiie Esaú tsata.

<sup>29</sup> Kã et tã Jacob tso' ulök. E' dalewa Esaú debitu shtrinewã tajë datse kañika.

<sup>30</sup> Ie' iché Jacob a:

—Be' we'ikèyö, ì alé be' tò mat se kakmú ye' a ñë. Sulu ye' dué bli wã. E' kueki Esaú kiè Edom† ñies.

<sup>31</sup> Jacob tò iüté:

—Këweie ì mekeat se' yé tò be' a be' dör ilà kibi e' kueki, e' kéwö múttsã ye' a chkò i' skéie.

<sup>32</sup> Esaú tò iché:

—Ye' tteke bli tò dö' e' tò ye' ttèwã, e' tã ì mekeat se' yé tò ye' a çíie bua' e' dör ye' a?

<sup>33</sup> Jacob tò ikí ché ia:

—I' tã be' ttè mú ye' a tò mokí be' tò ye' a imeke.

Etã Esaú tò ittè mé Jacob a yësyësë Skëköl wöã. Es ì mekeat iyé tò ie' a, e' kéwö métttsaitö Jacob a. <sup>34</sup> Jacob tò chkò mé ia pan tã. Mik Esaú chké one di' yé one, tã ie' e' kékã tã imía. Ie' dör ilà kibi e' ulà a íyi bua' kéwö tso', e' kè kã ie' tkine yës.

### Isaac mía Guerar

**26** E' kéwö ska' tã ketba ane tajë kã e' kos kã wës ibak Abraham kéwö ska' tã es. E' kueki Isaac mía Guerar wé filisteowak blú serke kiè Abimélec ee. <sup>2</sup> Eë Jehová e' kkaché ie' a tã ichéitö ia: “Kè be' minuk Egipto. Be' e' tsúat wé ye' be' a iché ee. <sup>3</sup> Be' senúia kã i' kã. Ye' tso' be' tã. Ye' er buaë chöraë be' a. Kã i' kos meraëyö be' a ñies be' aleripa a. Es ye' ttè muke be' a wës kewe ime'yö be' yé Abraham a es. <sup>4</sup> Be' aleripa alöweraëyö tajë wës bëkwö tso' tajë es. Kã i' kos merayö be' aleripa a. Ñies ie'pa batamik ye' er buaë chöraë kã ulitane wakpa a. <sup>5</sup> Abraham tò ye' ttè kos e' iütë buaë. Ttè mé ye' tò ie' a e' kos blë buaë ie' tò e' kueki ye' tò ttè buaë e' meke be' a ñies.”

<sup>6</sup> Isaac e' tséat senuk Guerar. <sup>7</sup> Kã e' wakpa tò Isaac a ichaké: “çRebeca dör be' yaie?” Erë ie' suane ichök: “Ie' dör ye' alaköl.” E' kueki ie' iché: “Ie' dör ye' kutà.” Ie' tò ibikeitsé tò kã e' wëpa tò ie' ttèwã ilaköl buaala kueki.

§§25:25 **Esaú:** Esaú kiè ñies Seír. Hebreoie Seír wà kiane chë pakò. Génesis 36.8 saú.

\*25:26 **Jacob:** Hebreoie s'kiè e' wà kiane chë s'klò kaniñak.

†25:30 **Edom:** Hebreoie s'kiè e' wà kiane chë mat.

<sup>8</sup> Isaac k<sub>i</sub> ká de tajë eë. Ká et ta, ká e' blú kiè Abimélec, e' tò isué ukkò tsitsir a tò Isaac tso' ilaköl Rebeca peñuk. <sup>9</sup> Bet itsuk patkëmiitò ta ichéitò ia:

—¿Mok<sub>i</sub> tò alaköl se dör be' alaköl? ¿Ì kuek<sub>i</sub> be' tò iyé kuaë tò ie' dör be' kutà?

Isaac tò iüté:

—Ye' ibikeitsé tò isalema a' ye' ttèwami ie' kuek<sub>i</sub>.

<sup>10</sup> Erè Abimélec tò iché ia:

—¿Ì kuek<sub>i</sub> i' wamblébò sa' ta? Tsir eta wëm wele senéwa ie' ta, e' ta iekkè ta be' tò sa' ké ì sulu wamblök Skëköl wöa.

<sup>11</sup> Abimélec tò iché sulitane a:

—A' isie tò Isaac tsiriwé ö ilaköl tsiriwé, e' ta e' tterawa.

<sup>12</sup> Dwas e' wa Isaac tò dali kuatké, wà wöne buaë, Jehovah er buaë ché ie' a e' kuek<sub>i</sub>. <sup>13</sup> Ie' de íyi blú taië. Taië íyi tso' ie' wa. <sup>14</sup> Ie' wa obeja ena baka tso' taië. Nies kanè mésopa tso' taië ie' wa. E' kuek<sub>i</sub> filisteowak er ttsèr suluë ie' k<sub>i</sub>. <sup>15</sup> E' kuek<sub>i</sub> ie'pa tò di' tum bi' iyé Abraham e' kanè mésopa tò, e' kos wötéwa íyök wa. <sup>16</sup> Bata ekkè ta Abimélec tò iché Isaac a:

—Be' yöne íyi blu' taië sa' tsata, e' kuek<sub>i</sub> jbe' yúshka!

<sup>17</sup> Eta Isaac mía senuk Guerar kakkue k<sub>i</sub>. <sup>18</sup> Eë di' tum bi' iyé tò, e' wötéwa filisteowak tò iyé blénewa ukuök<sub>i</sub> ta, e' kos biéneitò ta ikiè mékãitò wes iyé tò ime'ka es. <sup>19</sup> Ká et ta ie' kanè mésopa tso' di' tum biök ká e' k<sub>i</sub>, eta ie'pa tò di' tum a di' tuökeka taië ese kué et. <sup>20</sup> Erè ká e' obeja kkö'nukwakpa debitu ñippök Isaac obeja kkö'nukwakpa ta. Ie'pa tò iché tò di' tum e' dör ie'pa icha. E' kuek<sub>i</sub> Isaac tò di' tum biule e' kiè méka “Ñippök.” <sup>21</sup> E' ukuök<sub>i</sub> ta Isaac kanè mésopa di' tum skà bié et, e' k<sub>i</sub> iskà ñippéрак. E' kuek<sub>i</sub> di' tum biule e' kiè mékãitò “Se' ñi bolök.”

<sup>22</sup> Ie' mía kamië ká e' k<sub>i</sub>, eë di' tum skà biéitò et. E' kè k<sub>i</sub> ñi bunerak. Ie' iché:

“Íñe ta Jehovah tò ká bua' mé se' a wè ta se' serdaë buaë.” E' kuek<sub>i</sub> ká e' kiè mékãitò “Ká tso' taië se' a.”

<sup>23</sup> E' ukuök<sub>i</sub> ta ie' mía Beerseba. <sup>24</sup> E' nañewe Jehovah de ie' ska' ta ichéitò ia:

“Ye' dör be' yé Abraham e' Këköl.

Ye' tso' be' ta, e' kuek<sub>i</sub> kè be' suanuk.

Abraham dör ye' kanè méso e' dalërmik ye' er buaë chöraë be' a, ñies be' aleripa alöweraëyò taië.”

<sup>25</sup> Eë Isaac tò ák kataté et ka'ie iyiwak jchoie Jehovah dalöioie. Eë ie' sené ta ikanè mésopa tò di' tum bié et eë.

### Isaac ena Abimélec kawö mé ñi a

<sup>26</sup> Ká et ta, Abimélec datse Guerar debitu ttök Isaac ta. Iyamipa debitu böl ie' ta. Eköl kiè Ahuzat. Iëköl kiè Ficol. E' dör Abimélec ñippökwakpa wökir. <sup>27</sup> Isaac tò iché ia:

—A' éna ye' ar suluë. A' ye' yöshkar a' ká k<sub>i</sub>. Eta ¿iók a' do ye' ska'?

<sup>28</sup> Ie'pa tò iüté:

—Sa' isué tò Jehovah tso' be' ta. E' kuek<sub>i</sub> sa' bitea be' a ichök tò kawö müwasö ñi ta. <sup>29</sup> Sa' kè wa be' tsirioule ì wa. Këkraë sa' tò be' kimé. Mik be' manetwa, eta sa' kè wa ì tté ku' a' k<sub>i</sub>. Íñe ta iwénewa tò be' a Jehovah er buaë chöke taië. E' kuek<sub>i</sub> be' ttè mú sa' a tò be' kè tò ì sulu wamblepa sa' k<sub>i</sub>.

<sup>30</sup> Eta Isaac tò kawö buaë tkö'wé ie'pa ta, chké wa di'yè wa. <sup>31</sup> Bule es bla'mi ta ie'pa tò ikawö mé ñi a tò kè ñippöiarak. E' ukuök<sub>i</sub> ta ie'pa e' chéat ñi a er bua' wa.

<sup>32</sup> E' diwö shà ta Isaac kanè mésopa tso' di' biök, e'pa wa ibiyó de tò sa' di' kué. <sup>33</sup> Ie' tò di' e' kiè méka Sebá. <sup>3</sup> E' kuek<sub>i</sub> íñe ta ká e' kiëia Beerseba.

<sup>34</sup> Mik Esaú k<sub>i</sub> duas de dabom tkëyök (40), eta ie' senéwa alakölpa böl ta. Eköl kiè Judit e' yé kiè Beerí, e' dör hititawak. Iëköl kiè Basemat e' yé kiè Elón, e' dör hi-

<sup>3</sup>26:33 Sebá: Hebreoie di' biule kiè e' wà kiane ché ttè mène ñi a.

titawak ñies. <sup>35</sup> Alakölpa böi e'pa tö Isaac ena Rebeca eriawéka tsiriwéka taië.

### Isaac er buaë ché Jacob ena Esaú a

**27** Isaac dewa kéképalatke. Ie' kè wöbla wawëria. Ká et ta ilà kibi Esaú e' kiéitö ta ichéitö ia:

—¡A alà!

Esaú tö iüté:

—A yéwö, ¿ì?

<sup>2</sup> Età Isaac iché ia:

—Be' tö isué tö ye' kénéwatke dö wekké alè ta ye' duòwa. <sup>3</sup> E' kuëki ye' ki ikiane tö be' kuaböt klö'ú ta be' yú ye' a yëblök. <sup>4</sup> Età iwakaneú ña buaë wes ye' wöbatsö iwa es, ta itsúbitu ña katè. E' wa ye' er buaë chöke be' a kam ye' duòwa e' yöki.

<sup>5</sup> Erë Isaac ttöke Esaú ta e' tse Rebeca tö. E' kuëki mik Esaú mía yëblök kañika <sup>6</sup> età bet ie' tö iché Jacob a:

—A alà, ye' ttò ttsó. Ye' tö be' yé tse ttök be' ël Esaú ta, ta iché ia: <sup>7</sup> “Be' yú yëblök, e' wakaneú ña buaë ta itsúbitu ña katè. E' ukuöki ta ye' tö be' a íyi kos bua' e' kèwö mekeyö be' a Jehová wörki kam ye' duòwa e' yöki.” <sup>8</sup> E' kuëki ye' ttò ttsó buaë. <sup>9</sup> Be' yú chibo pupula bua' bua ese tsúbitu ña bötö ta ikanewékeyö buaë wes be' yé wöbatsö iwa es. <sup>10</sup> E' ukuöki ta be' tö chkè tsúmi be' yé a as inuitö. Es íyi kos e' kèwö atmi be' a be' ël skéie.

<sup>11</sup> Erë Jacob tö iché imi a:

—Ye' ël pa shamamaë. Ye' kè döer es. <sup>12</sup> Ye' yé tö ye' kèmi, e' ta ittsewami tö ye' idir, età ie' ichèmi tö ye' tso' ie' dalöseukwa. Ie' kè er buaë chepa ye' a. E' skéie ie' er sulu chörae ye' ki.

<sup>13</sup> Erë imi tö iüté:

—A alà, as ie' er sulu chò ye' ki. Ye' ttò iütö. Be' yú chibola chéyö be' a e' tsuk.

<sup>14</sup> Età Jacob mía chibola tsuk e' debitu iwa imi a. E' kanewé imi tö buaë wes Isaac wöbatsö iwa es. <sup>15</sup> Ilà kibi Esaú datsi' tso' bléule u a e' bua' bua yéttsa iékaitö ilà tsirla ki. <sup>16</sup> E' ukuöki ta chi-

bola kkuölit wa Jacob ulà ena ikuli' patrèwaitö. <sup>17</sup> Chkò bua' ena pan yuétkeitö, e' méitö Jacob a tsèmi iyé a.

<sup>18</sup> Jacob dewa iyé ska' ta ichéitö ia:

—A yéwö.

Isaac tö iüté:

—A alà, ¿be' döer ye' alà wéne ék?

<sup>19</sup> Ie' iüté:

—Ye' döer Esaú, be' alà kibi ék. Ì chébö ña, e' kanewétkéyö. Be' e' tkóser iyiwak ttéyö e' katök. E' ukuöki ta be' íyi buaë e' kèwö mekebö ye' a, e' mú ye' a.

<sup>20</sup> Erë Isaac tö ichaké ia:

—A alà, ¿wes be' ulà de iyiwak e' ska' bet?

Ie' iüté:

—Jehová döer be' Kéköl e' tö ye' kimé e' wa ikuéwayö bet.

<sup>21</sup> Isaac tö iché ia:

—Be' e' skówa ye' o'mik pattsèyö tö mokië be' döer ye' alà Esaú.

<sup>22</sup> Ie' e' skéwa iyé o'mik as ipattsòitö. Isaac tö iché:

—Be' ttò e' döer Jacob ttò. Erë be' ulà e' döer Esaú ulà.

<sup>23</sup> Jacob ulà kò shamamaë wes iël kibi ulà es, e' kuëki Isaac kè éna iane buaë tö e' döer Jacob. Mik ie' er buaë chökette ilà a, <sup>24</sup> età iskà chakéneitö:

—¿Moki be' döer ye' alà Esaú?

Ie' iüté:

—Tó, ye' döer Esaú.

<sup>25</sup> Iyé tö iché ia:

—A alà, iyiwak ttébö kanewébö e' mú ña katè as ye' er buaë chò be' a.

Ie' tö iyé tié ñies vino mé ia yè. Isaac chké, vino yé. <sup>26</sup> E' ukuöki ta ichéitö ia:

—A alà, be' e' skówa ye' o'mik ye' wöalattsó.

<sup>27</sup> Mik Jacob e' skéwa iyé wöalattsök, età iyé tö idatsi' alattsé ta ier buaë ché ilà a ttè ikkè wa:

“Tó, ipaalar wes ye' alà paalar es.

Ie' paalar buaë wes kañika kkò'nè Jehová tö e' alar è.



<sup>28</sup> As Skëköl tō be' a mò wōli mē kēkraë  
be' dalikua kī.

As ie' tō be' dalikua kōs e' wōū buaë  
as be' wā trigowō t̄a' tajë ena vino t̄a' tajë.

<sup>29</sup> Ká kuā kī wakpa tajë as e' dō be' kanë  
mésopaie.

As ie'pa e' tulōwarak kuchë kī be' wōrkī  
be' dalöiök.

As be' mú dō be' ëlpa wōkirie.

As ie'pa e' tulōwā kuchë kī be' wōrkī be'  
dalöiök.

Wépa er sulu ché be' kī, esepa kī Skëköl  
er sulu ské chōraë.

Ñies wépa er buaë ché be' a, esepa a  
Skëköl er buaë ské chōraë.”

<sup>30</sup> Isaac er buaë chétke Jacob a t̄a Ja-  
cob míatke. E' bet t̄a Esau tso' yëblök e'  
dene. <sup>31</sup> Ñies ie' tō chkë alé buaë, e' mí  
iwā iyé a t̄a ichéitō ia:

—A yéwō, dúla ttéyō e' alí kató. E'  
ukuökī t̄a be' er buaë chōke ye' a e' chó  
ña.

<sup>32</sup> Isaac tō ichaké:

—¿Yi dör be'?

Ilà tō iiuté:

—Ye' dör Esau be' alà kibi.

<sup>33</sup> Isaac tkinewā painëkā tajë t̄a  
ichéitō:

—E'ma ¿yi dare yëblök, e' wā chkë  
debitu ña? E' katéwayō seraa kam be' dō  
e' yöki. E' a ye' er buaë chétke. Es ie' a ye'  
er buaë chë e' atetke.

<sup>34</sup> Mik Esau tō ì ché iyé tō e' ttsé, et̄a  
ie' erianekā anekā tajë t̄a ichéitō:

—¡A yéwō, ye' a er buaë chó ñies!

<sup>35</sup> Erë Isaac tō iiuté:

—Be' ël datke ye' kītō'uk e' a ye' er  
buaë chétke be' skéie.

<sup>36</sup> Esau tō iiuté:

—Wëe' ie' kië Jacob. I' t̄a bötökicha  
iwambléitō ye' t̄a i' es. Be' íyi kēwō  
mekebō ye' a ye' dör be' alà kibi e' kuëki,  
e' kēwō yë'ttsa ye' ulà a ie' tō kuaë. I'ñe  
t̄a be' er buaë chōke ye' a e' yé'ttsaitō ye'  
yöki. ¿Warma be' er buaë chōke ye' a e'  
kë t̄a'ia?

<sup>37</sup> Isaac tō iiuté:

—Ittsó. Ye' tō ie' mékatke be' wōkirie.  
Ye' tō be' aleripa kōs e' métkë ie' kanë  
mésopaie. Ñies ye' tō ichétke as chkewō  
ena vino dō ie' ulà a tajë. A alà, ¿ì memiia  
ye' tō be' a i' t̄a?

<sup>38</sup> Erë Esau tō ikí ché iyé a:

—A yéwō ¿be' er buaë chōke sa' a e'  
dör etkë? ¡Ye' a er buaë chó ñies! Et̄a  
Esau íëkā tajë.

<sup>39</sup> Isaac tō iché ia:

“Be' serdaë wé mò wōli kè t̄a' tajë ese  
ska'.

Eë be' dalikua kè wōrpa buaë.

<sup>40</sup> Be' ñippōraë tabë wa o'ka t̄a íiyi kuëki,  
e' mik be' serdaë.

Be' dōraë be' ël kanë mésoie.

Erë mik be' ñippémi ie' t̄a,  
et̄a be' e' yōrattsa ie' ulà a.”

### Jacob tkashkar Esau yöki

<sup>41</sup> Isaac er buaë ché Jacob a Esau skéie.  
E' kuëki Esau éna suluë Jacob arke. Ie'  
ibikeitsé: “Ye' yé duökewatke. Mik id-  
uowā e' kēwō tka, et̄a ye' ël tterawayō.”

<sup>42</sup> Mik Rebeca wā ijchēnewā tō Esau  
tō iël bikeitsé ttēwā, et̄a Jacob tsuk  
patkéitō t̄a iché ia:

—A alà, ittsó. Be' ël Esau e' pablōke  
tō ie' be' tterawā. <sup>43</sup> E' kuëki ye' ttō ttsó.  
Be' tkóshkar bet ye' akë kië Labán serke  
Harán e' u a. <sup>44-45</sup> Be' e' tsúat ie' ska' ká  
tajë dō mik be' ël er buanene be' kī ena ì  
sulu wamblébō e' chowane ie' éna et̄a. E'  
ukuökī t̄a ye' tō be' tsuk patkeraë, e' wa  
be' dōne. ¡Ye' kè kī ikiane tō ye' ala'r bōl  
e' duōwā diwō etkë a!

<sup>46</sup> E' ukuökī t̄a Rebeca tō iché Isaac a:

—Esau alakōlpa dör hititawak e'pa tō  
ye' shtriwétke tajë. Jacob senēwā alakōl  
ese t̄a, e' t̄a ye' mú duōwā.

**28** Et̄a Isaac tō Jacob kië t̄a  
ishkë'wéitō t̄a ichéitō ia:

—Kè be' senukwā canaánwak t̄a. <sup>2</sup> Be'  
yú be' duöchke kië Betuel serke Padán-  
aram e' ska'. Eë be' senúwā be' nau Labán

alà busipa e' eköl ta. <sup>3</sup>Skëköl Diché Ta' Íyi Ulitane Tsata as e' er buaë chò be' a. Nies as ie' tò be' aleripa alòu taië ká wa'ne. <sup>4</sup>Ie' tò iyè'atbak Abraham a tò ká i' meraëitò ie' a. E' kī se' serke shkal. As ie' er buaë chò be' a ena be' aleripa a wes ie' er buaë yè' Abraham a es as ká i' dò a ulà a.

<sup>5</sup>Es Isaac tò Jacob patkëmi Padán-aram. Jacob demi inaü Labán ska'. Labán dör arameowak kiè Betuel, e' alà. Ie' dör Rebeca akë. Rebeca dör Jacob ena Esau e'pa mì.

### Esau senéwa Mahalat ta

<sup>6</sup>Esau wa ijchenewa tò Isaac er buaë ché Jacob a nies tò ipatkëmiitò ká kiè Padán-aram senukwa eë. Nies ie' wa ijchenewa tò mik iyé er bua' ché Jacob a eta ichéitò ia:

—Kè be' senukwa canaánwak ta.

<sup>7</sup>Nies ie' wa ijchenewa tò Jacob mía ká kiè Padán-aram wes iyé ena imì tò iché ia es. <sup>8</sup>Es ie' éna iane tò iyé kè kī ikiane tò ie'pa serwa canaánwakpa ta. <sup>9</sup>E' kuekī ie' mía alaköl skà yulök Ismael dör Abraham alà e' ska'. Eë ie' senéwa Ismael alà busi kiè Mahalat e' ta, e' dör Nebaiot kutà. Es alaköl kī tséwaitò eköl e' kè dör canaánwak wes imalepa es.

### Jacob kabsué Betel

<sup>10</sup>Eta Jacob e' yéttsa Beerseba michoë Harán. <sup>11</sup>Ie' michoë wé katuine iki ta eë ikapere. Ák méwaitò wökir kataie, e' kī ie' kapöwa. <sup>12</sup>Eë ie' kabsué. Ie' isué tò klökata batsië tkër iski ibata döká ká jai a. E' kī ie' isué tò Skëköl biyöchök-wakpa shköke wo'k wa'k. <sup>13</sup>Nies ie' isué tò Jehová dur ie' o'mik ta ichéitò ia: “Ye' dör Jehová. Ye' dör be' talà, Abraham, ena be' yé, Isaac, e'pa Këköl. Ká i' wé be' tär, e' meraëyö be' a ena be' aleripa a. <sup>14</sup>Ie'pa alördaë taië wes ká po

es. Ie'pa michoë senuk ká wa'ne. Ye' er buaë chóraë ká ulitane wakpa a be' ena be' aleripa e'pa batamik. <sup>15</sup>Ye' tso' be' ta. Ye' tò be' kkö'neraë ká wa'ne wé be' mir eë. Be' dörane ye' wa ká i' kī. Kè yö be' weikepa. Ttè kos méyö be' a, e' waweraëyö es.”

<sup>16</sup>Mik Jacob ti'neka, eta ie' ibikeitsé: “Mokī Jehová tso' ká i' kī, e' kè jcher ye' wa.” <sup>17</sup>Taië ie' suane ta ibikeitséitò: “Ká i' dör batse'r taië. ¡Íe dör Skëköl wé! ¡Íe dör ká jai wékköl!”

<sup>18</sup>Bule es ta Jacob e' kéká bla'mi. Ák méwaitò iwökir kataie, e' kékaitò duékaatitò iwà kkachoie tò ká e' dör batse'r. Kiò téitò ák bata kī iwà kkachoie tò ká e' tso' Skëköl dalöioie. <sup>19</sup>Ká e' kiè mane'wéttsane ie' tò Betel<sup>f</sup> Kewe ta ká e' kiè Luz.

<sup>20</sup>Eë ie' tò ittè mé Jehová a i' es: “Be' tso' ye' ta ena ye' kkö'né be' tò i' ye' mir eta, ena be' tò chkè ena datsi' mé ye' a, <sup>21</sup>nies ye' dene buaë ye' yé ska', e' kos wébö ye' a, e' ta be' klö'weraëyö ye' Këkölíe. <sup>22</sup>Ák duékayö i', e' dör iwà kka-choie tò íe be' dalöiërdaë. A Skëköl, i' kos mekebö ye' a, e' mú blatèsò döká dabop ta e' tsá eyök meraneyö be' a.”

### Jacob demi Labán ska'

**29** E' ukuökī ta, Jacob mía pè' serke diwö tskirke e' ëka. <sup>2</sup>Eë ie' tò di' tum biule sué et kañika. E' pamik obeja daparke mañayök enuk eë di' e' yekerakitò e' kuekī. Di' tum biule kkò kī ákkue bérie me'r et. <sup>3</sup>Iyiwak kkö'nukwakpa wöblanewatke tò as iyiwak ulitane darparka eë, e' ukuökī ta ákkue skeuke di' tum biule kkò kī as iyiwak di'yò. Iyiwak di'yane one ta ie'pa tò ikkò pabakéwane ákkue wa. <sup>4</sup>Jacob tò iyiwak kkö'nukwakpa a ichaké:

—A yamipa, çká wé wakpa a' dör? Ie'pa tò iüté:

<sup>f</sup>28:19 *Betel*: Hebreoie kiè e' wà kiane chè *Skëköl wé*.

—Sa' dör Harán wakpa.

<sup>5</sup>Ie' tō iskà chakéne:

—¿A' wā wēm kiè Labán dör Nahor alà, e' sūule?

Ie'pa tō iūté:

—Tó, e' sūule sa' wā.

<sup>6</sup>Ie' tō ichaké:

—¿Is ie' tso'?

Ie'pa tō iūté:

—Ie' tso' bua'. Isáú. Wī busi datse e' dör ie' alà kiè Raquel e'. Ie' datse iyé iyiwak wéttse.

<sup>7</sup>Ie' tō iché:

—Ká tso'ia nīwe. Diwō tso'ia kakké iyiwak dapa'wōwā ek tsíní. Ì kuekí a' kè tō di' mè iā tā ièmírak chkök.

<sup>8</sup>Erè ie'pa tō iūté:

—Kè sa' a e' wamblénuk. Sa' kawōta ipanuk. Mik obeja de seraa, etā sa' tō di' tum kkò ppekeka tā di' meke sa' tō iyiwak a.

<sup>9</sup>Ie' ttòke ie'pa tā, e' dalewa Raquel debitu iyé iyiwak wéttse, ie' dör iyé iyiwak kkò'nukwak e' kuekí. <sup>10</sup>Jacob tō Raquel sué inau iyiwak wéttse, e' bet ie' tunemi di' kkò kékā tā iyiwak a di' méitō.

<sup>11</sup>E' ukuökí tā Raquel shké'wéitō wōalat-séitō tā ie' íékaie ttsé'ne buaë kuekí. <sup>12</sup>Ie' tō iché iā: “Ye' dör Rebeca alà ena Labán nauyō.” E' bet tā Raquel tunemi ichök iyé a.

<sup>13</sup>Mik Labán tō inauyök tté ttsé, etā bet itunemi inaletsuk. Ipaklō'wéwāitō tā iwōalatséitō tā imtser iwā iu a. Ì kos tka Jacob tā e' pakéitō inau a. <sup>14-17</sup>Tā Labán tō iché iā: “Mokië be' dör ye' yami ekka.”

### Jacob senéwā Lía ena Raquel tā

Labán alà busi bōl, ikibi ék kiè Lía, itsirla ék kiè Raquel. Lía wōbla e' kè dör buaala<sup>§</sup> erè Raquel dör buaala wa'ñe.

Jacob sené Labán ska' dò si' et. E' ukuökí tā Labán tō iché iā:

—Be' dör ye' yami, erè be' kè kawō-tā kaneblök ye' a éme. Ichó ña ¿kos be' tō ye' ña'wèmi? <sup>18</sup>Jacob wōbatse Raquel wa, e' kuekí ie' tō Labán iūté:

—Be' tō kawō mé ye' a senukwā Raquel tā, e' tā e' skéie ye' kaneblöke be' a dōka duas kul.

<sup>19</sup>Labán tō iūté:

—Ye' a tā e' dör buaë. Be' je' a ye' tō imèmi buaë. Ye' kè éna imak o'ka a. Be' e' tsúat ye' ska'.

<sup>20</sup>Es Jacob kaneblè' dōka duas kul Raquel dalèrmik. Erè ie' kī Raquel kiane taijè, e' kuekí kawō ekkè e' ttséitō ká bër-bër è. <sup>21</sup>Mik duas kul tka, etā Jacob tō iché Labán a:

—Kawō yè'yō be' a, e' detke. Kawō mú ye' a senukwā be' alà busi Raquel tā.

<sup>22</sup>Etā Labán tō sulitane a ishkeñé tō a shkó ulabatsè e' kèwō tkō'uk. <sup>23</sup>Erè katu-ine, e' shuā Lía mí ie' wā Jacob a Raquel skéie tā Jacob kapé ie' tā. <sup>24</sup>Labán tō ikanè méso eka kiè Zilpá, e' me'tke Lía a ikanè mésoie. <sup>25</sup>Bule es bla'mi tā Jacob tō isuéwā tō e' dör Lía. Ie' mía Labán ska' tā ichéitō iā:

—¿Ì wamblé be' tō ye' tā? Ye' kaneblé be' a Raquel dalèrmik. ¿Iók be' tō ye' kītō'wé es?

<sup>26</sup>Labán tō iūté:

—Íe sa' wōblar tō alà busi kibi ese serkewā keweie, e' itökí itsirla ék. <sup>27</sup>Se' kawōta Lía ulabatsöke e' kèwō tkō'uk dōka ká kul. Mik kèwō e' tka, etā ye' tō be' a Raquel meke ñies. Erè be' kawō-tā skà kaneblökne ye' a duas kul Raquel dalèrmik.

<sup>28</sup>E' dör buaë Jacob a. Mik Lía ulabatsè kèwō e' diwō tka, etā Labán tō Raquel mé Jacob a alakölie ñies. <sup>29</sup>Ñies ie' tō ikanè méso eka kiè Bilhá e' mé Raquel a ikanè mésoie. <sup>30</sup>Es Jacob senéwā Raquel tā ñies. Eré ie' kawōtā

§29:14-17 *Lía wōbla e' kè dör buaala*: Hebreoie ttè e' wà kè jcher se' wā bua'iewā. Isalema e' wà kiane chè *Lía wōbla dör buaala*.

kaneblökne skà Labán a dōka duas kul, erè ie' éna idalër kibiie Lía tsata.

### Jacob ala'r

<sup>31</sup> Jehovah tö isuë tö Jacob kè kī Lía kiane bua'ie. E' kueki Lía a alà méitō. Erè Raquel kè dōta' alàë. <sup>32</sup> Lía duneka alà kune ta ie' tö iché: “Ye' eriarke taië e' suë Jehovah tö, e' kueki i'ne ta ye' dalërdaë ye' wëm éna.” E' kueki ikiè mékaitō Rubén.\*\*

<sup>33</sup> E' ukuöki ta ie' alà skà kune eköl ta ichéitō: “Ye' wëm kè tkine ye' kī e' suë Jehovah tö e' kueki alà skà méitō ye' a.” E' kueki ikiè mékaitō Simeón.††

<sup>34</sup> Ie' alà skà kēka ta ichéitō: “Ire' ye' ala'r deka mañal e' kueki ye' wëm éna ye' dalërmi kibiie.” E' kueki ikiè mékaitō Leví.‡‡

<sup>35</sup> E' ukuöki ta ie' alà skà kēka ta ichéitō: “I'ne ta ye' tö Jehovah kīkekeka.” E' kueki ikiè mékaitō Judá.¶¶ Eta ekkè è ie' alà dē'.

### Raquel ala'r

**30** Mik Raquel tö isuë tö ie' kè dō alàë, eta' ie' sibineka iël kī. Ie' tö iché iwëm a:

—Be' kè tö ye' a alà mē, e' ta ye' duōrawa.

<sup>2</sup> Jacob uluneka ie' kī ta ichéitō ia:

—Ye' dör Skököl kalī, e'ma ye' a alà mermi be' a. Ie' wák tö be' méat kè dō alàë.

<sup>3</sup> Ie' tö iüté:

—Ittsó, ye' kanè méso kiè Bilhá, e' ta be' senú. Mik ie' alà kēka eta' e' dör wes ye' alà es. Es ye' dōraë alàë ie' batamik.

<sup>4</sup> Es ie' tö ikanè méso Bilhá e' mé iwëm a alakölie, e' ta Jacob sené. <sup>5</sup> Ie' ta Jacob alà kēka. <sup>6</sup> Raquel tö iché: “Skököl tö ye' tsatké buaë. Ie' tö ye' ttō ttsé ta alà méitō ye' a wëm.” E' kueki ie' tö ikiè méka Dan.§§

<sup>7</sup> E' ukuöki ta Bilhá alà skà kune Jacob ta. <sup>8</sup> Raquel tö iché: “Ye' ñippé taië ye' èl ta eta' ye' e' aléka iki.” E' kueki ikiè mékaitō Neftalí.\*

<sup>9</sup> Mik Lía tö isuë tö ie' kè dē'ia alàë, eta' ie' tö ikanè méso kiè Zilpá, e' mé Jacob a alakölie. <sup>10</sup> Zilpá alà kēka Jacob ta. <sup>11</sup> Lía tö iché: “iEdaa i mène ye' a!” E' kueki ilà kiè mékaitō Gad.†

<sup>12</sup> E' ukuöki ta Zilpá alà skà kēka Jacob ta. <sup>13</sup> Lía tö iché: “iYe' ttsēr buaë! Ire' alakölpa kos tö icheraë tö be' ttsēr buaë.” E' kueki ilà kiè mékaitō Aser.‡

<sup>14</sup> Trigo wō alirke e' kēska' ta Rubén mía kañika. Eë ie' tö kalwō kiè mandrágora¶ e' alí kué. E' bite' iwā imi Lía a. Mik Raquel tö kalwō e' suë ta ichéitō Lía a:

—Be' we'ikèyō, kalwō debitu' be' alà wa be' a, e' kaku' na.

<sup>15</sup> Lía tö iüté:

—iBe' kè a wē idir tö be' wa ye' wëm mítser? iKíie ta be' éna kalwō debitu' ye' alà wa ye' a, e' yaktsa ye' ulà a!

Erè Raquel tö iché ia:

—Kalwō e' skéie i'ne nañewe ye' wëm patkekeyō be' ta kapök.

\*\*29:32 *Rubén*: Hebreoie s'kiè e' wà kiane chè ye' eriane e' suëtō.

††29:33 *Simeón*: Hebreoie s'kiè e' wà kiane chè ittsök.

‡‡29:34 *Leví*: Hebreoie s'kiè e' wà kiane chè ñita.

¶¶29:35 *Judá*: Hebreoie s'kiè e' wà kiane chè Skököl kīkēkasö.

§§30:6 *Dan*: Hebreoie s'kiè e' wà kiane chè Skököl tö ts'at'kē buaë.

\*30:8 *Neftalí*: Hebreoie s'kiè e' wà kiane chè ñippök.

†30:11 *Gad*: Hebreoie s'kiè e' wà kiane chè kawō buaë mène.

‡30:13 *Aser*: Hebreoie s'kiè e' wà kiane chè ittsēr buaë.

¶30:14 *mandrágora*: Ká e' kēwōska ta ie'pa tö ibikeitseke tö mandrágora wō katé alakōlpa tö, e' ta e' tö ie'pa kimēmi dōk alàë.

<sup>16</sup> Katurketke ta Jacob tso' kanablök e' debitu ta Lía mía inaletsuk ta ichéitö ia:  
—Ye' tö ye' alà mandrágora e' mé Raquel a, e' skéie be' kawöta kapök ye' ta iñe nañewe.

E' nañewe Jacob kapé ie' ta. <sup>17</sup> Eta Skököl tö Lía ttö tstsé ta iduneka ta ilà skà kune Jacob ta. Es ie' alà deka skel. <sup>18</sup> Lía tö iché: “Ye' tö ye' kanè méso mé ye' wëm a e' skéie Skököl ye' a alà i' mé.” E' kueki ilà kiè mékaitö Isacar.<sup>§</sup>

<sup>19</sup> E' ukuöki ta Lía alà skà kékä Jacob ta, e' ta ideka teröl. <sup>20</sup> Ie' iché: “Skököl tö ye' a i' buaë kakké. Ire' ye' ala'r de teröl. E' kueki ye' wëm éna ye' dalërdaë jaishet.” E' kueki ilà kiè mékaitö Zabolón.<sup>\*\*</sup>

<sup>21</sup> Bata ekké ta ie' alà skà kune alaköl. E' kiè mékaitö Dina. <sup>22</sup> Erë ñies Raquel kímé Skököl tö. Ie' tö ala'r mé ia wes Raquel tö ikié ia es. <sup>23</sup> Ie' duneka ta ilà tsá kune kiè mékaitö José. Ie' tö iché: “Ye' jaène siarë e' yétsa Skököl tö ye' ki. <sup>24</sup> Jehová mú tö ye' a alà kí mè ia eköl.” E' kueki ikiè mékaitö José.<sup>††</sup>

### Jacob iyiwak alöne taië

<sup>25</sup> José kune e' ukuöki ta Jacob tö iché Labán a:

—Ye' ómine ye' kaska'. <sup>26</sup> Ye' alakölpa ena ye' ala'r e'pa mú ye' a as imi'rak ye' ta. Ye' kanablétke be' a ie'pa skéie. Be' wa ijcher buaë tö kos ye' kanéblé be' a.

<sup>27</sup> Erë Labán tö iüté:

—Be' we'ikèyö. Be' e' tsúatia senuk ye' ska'. Ye' tö itótké tö Jehová er buaë ché ye' a be' batamik. <sup>28</sup> Ichó ña kos be' ki inuköl kiane be' kanè skéie, e'ma ekké ye' be' patuèmi.

<sup>29</sup> Ie' tö iüté:

—Be' wa ijcher tö ye' kanéblé buaë be' a. Ñies ye' tö be' iyiwak kk'óné buaë be'

a. <sup>30</sup> Mik ye' dè'bitu be' ska', eta be' kè wa i' ku' taië. Iñe ta be' wa iyi tso' taië. Jehová er buaë ché be' a ye' kueki. Erë i' mik ye' kanéblömi ye' wák a? Ye' wöché yamipaë.

<sup>31</sup> Labán tö iskà ché ia:

—¿Kos be' ki ikiane tö be' patuèyö?

Ie' tö iüté:

—Be' kè tö ye' patauk. Erë i' chekeyö be' a e' iütö, e' ta ye' tö be' iyiwak kk'ónemi. <sup>32</sup> Iñe ye' mi'ke be' iyiwak shushtök. Obeja kos dalolo ena chibo kos wöaule shkitshkit ö ulaula ese klö'wekeyö ye' wák a e' patuëie. <sup>33</sup> Mik be' de ye' iyiwak sauk ta eë be' isuèmi tö obeja dalolo ö chibo wöaule shkitshkit ö ulaula ese è tso', e' ta be' wa ijcherwami tö ye' dör wëm yësyesë. E' kè dör es, e' ta be' wa ijcherdaë tö ye' tö be' iyiwak ekiblë.

<sup>34</sup> Labán tö iüté:

—Tó, buaë idir. Iüsö wes be' iché es.

<sup>35</sup> Erë e' diwö shà ta ie' mía ie' iyiwak shushtök. Ie' chibo kos tso' wöaule skékshkék ö ulaula ese yéluritö. Ñies ie' obeja kos tso' dalolo ese yéluritö ta iméitö ila'r wëpa a kk'óné. <sup>36</sup> E' ukuöki ta iyiwak yélur ie' tö e' wëttsé ie' mía shkë dö ká mañat Jacob yöki. Eta Jacob kawöta Labán iyiwak malepa e' kk'ónuk.

<sup>37</sup> Erë Jacob tö kal kuak'ki kuak'ki dö mañalka e' ulà aki téé. Elka kiè álamo, skà kiè almendro, skà kiè castaño. Kal ulà kkuölit takla jchéloritö as iwër wöaule saruru skékshkék. <sup>38-39</sup> E' ukuöki ta kal ulà e' tuléwaitö wé iyiwak daparke di'yök e' wöshaë. Eë iyiwak wöbatsöke ñi wa. Iyiwak wöbatsöke ñi wa kal ulà ñe' wöshaë e' ala'rla kos tskirke wöaule skékshkék ö shkitshkit ö ulaula. <sup>40</sup> Iyiwak tskirke wöaule e' kos dapa'wéitö bänet ie' wák a. Ese wëñe kos uyéwaitö

§30:18 *Isacar*: Hebreoie s'kiè e' wà kiane ché *ské*.

\*\*30:20 *Zabolón*: Hebreoie s'kiè e' wà kiane ché *kakmeule*.

††30:24 *José*: Hebreoie s'kiè e' wà kiane ché *ilè kímú*.

Labán iyiwak kōs wōaule ö dalolo ese a as itskir wōaule ö dalolo. Es ie' iyiwak alörke tajë bānet, kè ku' Labán icha tā ñita. <sup>41</sup>Mik iyiwak bua'buā ese wōbatsōke ñi wa, eṭa ie' tō kal ulā ñe' tulēwā wé iyiwak di' yōke eē. Es ie'pa tō kal ulā wōaule e' sué mik iwōbatsōke ñi wa e' dalewa. E' ala'rla tskirke kōs e'pa dör wōaule. <sup>42</sup>Erë mik iyiwak sí po ese dat-se, eṭa ie' kè tō kal ñe' tulēwā. E' kueki iyiwak sí po ese ala'rla kōs tskirke e' dör Labán icha. Erë wé bua'buāe ese dör ie' icha. <sup>43</sup>Es ie' de iyi blú tajë. Obeja ena kanè mēsopa wēpa ena alakōlpa ñies kameio ena burro e' kōs tso' ie' wā tajë.

### Jacob tkakshkar Labán yōki

**31** Erë Jacob tō ittse tō Labán ala'r dulakōlpa tō icheke: “Jacob tō se' yé iyi kōs e' klō'wēwā, e' wa ie' e' blu'wé tajë.” <sup>2</sup>Ñies ie' tō isué tō Labán kè tō ie' suēiā buāē wes kenet es. <sup>3</sup>Eṭa Jehová tō ie' a iché: “Be' yúne be' yépa kaska' wé be' yamipa tso' eē. Ye' michoë be' tā be' kkō'nuk.”

<sup>4</sup>Jacob tō Raquel ena Lía tsuk patké dō wé ie' tso' obeja wēttsē eē <sup>5</sup>tā ichéitō iā:

—Ye' wā ijchenewā tō a' yé kè kī ye' kianeia wes kenet es. Erë ye' yé e' Kēkōl tso' ye' tā kekraē ye' kīmik. <sup>6</sup>A' wā ijcher buāē tō ye' kaneblé a' yé a moki. <sup>7</sup>Erë ie' tō ye' kītō'wé kekraē ye' kanè ské wa. Erë Skēkōl kè wā ie' a ikéwō mēne as i sulu wamblōitō ye' kī. <sup>8</sup>Mik ie' tō ye' a iché: “Ye' be' patueke iyiwak wōaule shkitshkit ese wa”, eṭa iyiwak ulitane pane wōaule shkitshkit ème. Mik ie' tō ye' a iché: “Ye' be' patueke iyiwak wōaule shkēkshēk ese wa”, eṭa iyiwak ulitane pane wōaule shkēkshēk ème. <sup>9</sup>Es Skēkōl tō a' yé iyiwak yē'lur mē ye' a.

<sup>10</sup>“Iyiwak wōbatsōke ñi wa e' kēwō ska' tā ye' kabsué tō iyiwak wēñe wōbatsōke iláki wa, e' kōs wák dör wōaule shkēkshēk ena shkitshkit ena ulāulā.

<sup>11</sup>Kabsué e' a, Skēkōl biyōchōkwak ye' chaké ye' kiè wa tā ye' iūtú: ‘¿ì?’ <sup>12</sup>Ie' ye' a iché: ‘Isaú bua'ie tā be' isueraē tō iyiwak wēñe wōbatsōke iláki wa, e' kōs dör wōaule shkēkshēk ena shkitshkit ena ulāulā. Ì sulu kōs wamblé Labán tō be' kī, e' suéyō, e' kueki ye' tō iwé es. <sup>13</sup>Ye' dör Kēkōl dē'bitu' be' wōrki ká kiè Betel eē e'. Eē be' tō ák du'kaat ye' dalōioie. Eē be' tō kawō me' ye' a. Be' e' kōkā bet, be' e' yóttsa ká i' a. Be' yúne wé be' kune eē.”

<sup>14</sup>Eṭa Raquel ena Lía e'pa tō iūtú:

—Kè sa' a sa' yé daliukuō tā'ia. <sup>15</sup>Ñies sa' sué sa' yé tō sulué wes o'ka es. Kíie tā sa' watō'ttsaitō be' a, sa' ské klōg'itō buāē e' ewēwaitō yēs. <sup>16</sup>E'ma kōs Skēkōl tō iyi yē'lur sa' yé ulā a, e' dör sa' icha ena sa' ala'r icha. E' kueki i kōs ché Skēkōl tō be' a e' iūtō.

### Jacob e' yéttsa Padán-aram

<sup>17-18</sup>E' ukuōki tā Jacob tō ila'r ena ilakōlpa e'pa ké e' tkōkka kameio kī. Ie' iyiwak kōs ena ie' iyi kōs dē' ie' ulā a Padán-aram ikanè skéie, e' patkémī-itō keweie ie' yōki. Eṭa ie' e' yéttsa mi-cho iyé Isaac ska' Canaán. <sup>19</sup>Labán mīa ká bānet ioveja köyök tōk, e' dalewa ie' wā iyi diōkōl tso' dalōiè e' kōs bléwami Raquel tō. <sup>20</sup>Jacob kè wā iyēne Labán a tō ie' mī'keā. Es ie' tō ikité buāē. <sup>21</sup>Ie' tkashkar. Íyi tso' ie' wā e' kōs wēttsē. Bet tā ie' tkattsa di' kiè Éufrates, e' wishet. Eē tā ie' micho ká kiè Galaad e' ká köwō kī.

### Labán tō Jacob tōtié

<sup>22</sup>Jacob bakshkar e' kī ká de mañat, eṭa Labán wā ijchenewā tō ie' bakshkar. <sup>23</sup>Eṭa ie' mīa itōki iyamipa tā. Ká de kul tā ie' tō ikué Galaad ká köwō kī. <sup>24</sup>E' nañewe Labán kabsué tō Skēkōl de ie' wōrki tā ichéitō iā: “Ye' ttō ttsó. Kè be' kàne ttōk Jacob tā kēsik wa.”

<sup>25</sup>Ie' de wé Jacob úla tulur Galaad ká köwō kī eē. Eē ie' ena iyamipa, e'pa tō

iúla tulékā kapowaie ñies. <sup>26</sup>Ie' tō iché Jacob a:

—¿Ì wamblé be' tō i' es? ¿Íók be' tō ye' kītō'wé i' es? Be' wā ye' alà busipa bitetser wes ñippökwakpa tō s'tsèmi es. <sup>27</sup>¿Ì kuekī be' ye' kītō'wé? Be' tkashkar akir ye' yökī. Be' e' biyó chópa ye' a, e'ma kawō buaé tkō'wé ye' tō a' wëttsè ttséne buaé wa, ma'ma kicha tā' ese wa ena sabak blar buaé ese wa. <sup>28</sup>Kè be' wā kawō méne ye' a ena ye' ala'r busipa ena ye' duöchkepa e'pa a as sa' e' chòat ñi a. Be' tō iwamblé wes pè' sulué es. <sup>29</sup>Ye' wā diché tso' a' ulitane tsáioie buaé, eré enia nañewe be' yé e' Kèköl tō ye' a' iché: 'Ye' ttò ttsó. Kè be' kàne ttök Jacob tā' kèsik wa.' <sup>30</sup>Be' mitkene be' yé u a wes be' kī ikiane taié es, etā ¿lie be' tō ye' wā íyi diököl tso' dalöie e' ekiblè?

<sup>31</sup>Etā Jacob tō iüté:

—Ye' suane be' yökī. Ye' ibikeits dö' be' ye' yökī be' ala'r busipa yëttsane er sulu wa. <sup>32</sup>Yi wā be' íyi diököl tso' dalöie e' tso', e' tā as e' wák duòwā. Se' yamipa kos tso' íe se' sauk, e'pa wörkī be' yú be' íyi yulök. E' kuébö, e' tā itsúmi.

Eré ie' kè wā ijcher tō Raquel tō iyé íyi diököl e' blè'wabitū.

<sup>33</sup>Etā Labán tkawā Jacob úla a' ie' íyi yulök. E' ukuökī tā' ie' tkawā Lía úla a. Ñies Lía ena Raquel kanè mèsopa böl e'pa úla shuyuléitō. Eré kè ie' wā ikune. Ie' e' yëttsā Lía úla a' mía Raquel úla shuyulök. <sup>34</sup>E' dalewa Raquel tō iyé íyi diököl bléwā kameio tsjkkuö dikia tā' ie' wák e' tkéka' ibata kī. Labán tō ie' úla ulitane shuyulé eré kè iwā ikune yès. <sup>35</sup>Raquel tō iché ia:

—A yéwö, kè be' ulunuk ye' kī. Ye' e' kòkāmī be' wörkī, eré ye' duöke sik dué wa.

Labán tō ie' íyi diököl yulé taié. Eré kè ie' wā ikune. <sup>36</sup>E' kuekī Jacob uluneka taié tā' ichéitō Labán a:

—¿Ì sulu wambléyö be' kī, e' kuekī be' ye' tötíé dò' íe? <sup>37</sup>Be' tō ye' íyi kos e' shuyulé tā' ¿be', ì kuébö? E' tuló íe se' yamipa wörkī as ie'pa tō ichò tō yi ttè dör mokíë, be' ö ye'. <sup>38</sup>Ye' kanèblè' be' a' duas dòka' dabom böyök (20), e' dalewa tā' be' chibo ena be' obeja e' kos tskirke bua'buáë. Be' iyiwak bobokpa kè tkèuletsā yès. Ñies kè ye' wā be' obeja pupula è kataulewa. <sup>39</sup>Namu tō be' iyiwak ttéwā, e' tā' kè ye' wā inú dè'bitū. E' nuí pató' ye' tō be' a. Ñiwe ö nañewe be' iyiwak ekiblélur akblökwakpa tō, e' patauk be' tō ye' ka'. <sup>40</sup>Ñiwe ye' tteke kaba tō. Nañewe tā' ye' tteke kasé tō. Kè ye' kapowā buaé. <sup>41</sup>Ye' kanèblè' be' a' duas dabom böyök (20) etā es ye' bak weinuk kekraë. Ye' kanèblè' duas dabom eyök kī tkél (14) be' alà busipa dalèrmik. E' ukuökī tā' ye' skà kanèblè' duas teröl be' iyiwak kuekī, eré be' bak ye' kītō'uk kekraë ye' kanè ské wa. <sup>42</sup>Abraham ena ye' yé Isaac e'pa Kèköl kè kúpa ye' tā, e'ma be' ye' patké'bitū ulá wöchka. Eré Skèköl tō isué tō ye' siarla, e' kanèblè' taié, e' kuekī ie' tō be' wöuñé enia nañewe.

### Jacob ena Labán e'pa kawō mé ñi a

<sup>43</sup>Etā Labán tō Jacob iüté:

—Be' alakólpa dör ye' alà busipa. Be' ala'r dör ye' duöchkepa. Obeja kos e' dör ye' icha. Ì kos suébö íe, e' dör ye' icha è. ¿Wes ye' a' ye' alà busipa ena ye' duöchkepa e'pa ormi? <sup>44</sup>E' kuekī be' shkó. Mishka kawō muk ñi a. Es se' wā ijcherdaé tō wes se' kawötā ñi dalöiök.

<sup>45</sup>Ee tā' Jacob tō ák duéka ek ie'pa kawō muke ñi a' e' wā kkachöie. <sup>46</sup>Ie' tō iché iyamipa a:

—Ák dapa'ú íe.

Ie'pa ulitane tō ák dapa'wé tā' ichkérak ák dapaule e' o'mik. <sup>47</sup>Etā Labán tō ká e' kiè méka iwák ttò wa “Jegar Sahadutá”.

Ñies Jacob tö ikiè mékã iwák ttò wa “Galaad.”<sup>48</sup> Labán tö iché:

—I'ñe ák ikkè dapa'wéatsö kawö mésö ñi a e' wà kkachoié.

E' kuekí Jacob tö kã e' kiè mékã es.<sup>49</sup> Kã e' kine ñies Mispá, wà dör tö Labán tö iché:

—Mik kè se' ñi suneia, etã as Jehová tö se' saü tö wes se' ñi wamblöke.<sup>50</sup> Be' tö ye' ala'r busipa we'iké ö be' senéwa alakölpa kua'kí ta, e' ta e' sueraë Skéköl tö. Eré kè yi ku' e' saük chène ye' a, eré Skéköl wák tö isueraë.

<sup>51</sup> Etã Labán tö ikí ché Jacob a:

—Ák dur i' ena ák dapaule i' e' dapa'wéyö se' böl shushäe.<sup>52</sup> Ák dur i' ena ák dapaule i' e' dör se' böl a iwà kkachoié tö ie è se' kawöta dökwa. Kè ye' tkòpami be' kker ñippök be' ta. Ñies kè be' tkòpami ye' kker ñippök ye' ta.<sup>53</sup> Abraham dör be' duöchke ena Nahor dör ye' duöchke, e'pa Kéköl eköl è, as e' tö se' shulò.

Etã Jacob tö kawö mé mokië Labán a Skéköl dalöieke iyé Isaac tö e' wörki.<sup>54</sup> E' ukuökí ta ie' tö iyiwak jché ña'wé Skéköl dalöioie ee. Ie' tö iyamipa kié chkök. Ie'pa ulitane chké ta ikaperö ee.

<sup>55</sup> Bule es bla'mi ta Labán tö iduöchkepa ena ila'r busipa e'pa wöalattsé e' choat ie'pa a. Ie' tö iché iarak: a' mú kawö tkò buaë kekraë. E' ukuökí ta imichone ikaska'.

### Jacob tö Esaú ma'wé er bua'wé

**32** E' ukuökí ta Jacob mir è wé imíró ee. Ñalã kí Skéköl biyöchök-wakpa de ie' ska'.<sup>2</sup> Mik e'pa suéitö, etã ichéitö: “T'pa dör Skéköl ñippökwakpa.” E' kuekí ie' tö kã e' kiè mékã Mahanaim.<sup>4</sup>

<sup>3</sup> Etã ie' tö ikanè mésopa patkëmi biyò muk ie' ël Esaú a tö ie' datse. Ie' ël serke

kã kiè Seír atë EDOM ee.<sup>4</sup> Ie' tö ichémi ikanè mésopa a: “A' tö ichó ye' ël a: ‘Be' ël Jacob datse be' wöki be' kanè mésoie. Ie' tö ichébitü be' a: Dwas ikkè kos ye' sené Labán ska’.<sup>5</sup> Ye' wã baka tso' ena obeja tso' ena burro tso' taië. Ñies kanè mésopa tso' ye' wã taië wëpa ena alakölpa. Be' dör ye' kékëpa. Be' a ttè i' patkëmiyö as be' tö ye' kiöwã er bua' wa.’”

<sup>6</sup> Mik ibiyò wakpa dene, etã ie' a ichéitö:

—Sa' dare be' ël ska', e' wák datse bet be' shke'uk. Etã ie' wã wëpa datse e' ta dökã cien tkëyök (400).

<sup>7</sup> Mik e' ttséitö, etã taië ie' suane. Taië ie' kabikeitséka wes ye' e' ùmi. E' kuekí ie' tö iyamipa ena ikanè mésopa ena iobeja ena ibaka ena ikameio e' kos blabatsélor böl tsíní.<sup>8</sup> Ie' ibikeitsé tö isalema ye' ël ñippömi ek tsíní ta, e' dalewa iëk tsíní tköshkarmirak. E' kuekí ie' iblabatsélor es.<sup>9</sup> E' ukuökí ta ie' tö iché Skéköl a: “A Jehová, be' dör ye' talã Abraham ena ye' yé Isaac e'pa Kéköl. Be' ye' a iyé: ‘be' yúne be' yamipa ska', etã ye' tö be' kimeräe as be' kawö tkò buaë.’<sup>10</sup> Be' er bua' ché ye' a. Be' kè wã ye' meätule bër-bër è. Warma e' kè dör ye' siarla e' a. Ye' bakmi di' Jordán wí a kè wã i ta, e' këwö ska' ta ye' wã shko kéli è dami. Eré i'ñe ta ye' wöché taië iyiwakie ena se'ie blabut-sule böl tsíní.<sup>11</sup> Be' we'ikëyö, ye' tsatkö ye' ël Esaú e' ulã a. Ye' suane ie' yöki dö' ie' datse ñippök ye' ta; ñies dö' ye' alakölpa ena ye' ala'rla e'pa kos ewëwa ie' tö.<sup>12</sup> Be' tö ye' a iyé'atbak yësyësë tö be' tö ye' kimeräe as ye' kawö tkò buaë. Ñies be' tö iyé' tö ye' aleripa alördaë taië wes dayë tséwö kè shtarta' es.”

<sup>13</sup> E' nañewe ie' kapére ee. Iyiwak tso' ie' ta ee e' shushté ie' tö kakké ie' ël a.<sup>14</sup> Ikkè shutshaté ie' tö: chibo alaki

<sup>48</sup>31:47 *Galaad*: Kã e' kiè dör böt eré iwà kiane ché ñies. E' dör ák dapaule kawö mène e' wa kkachoié.

<sup>49</sup>32:2 *Mahanaim*: Hebreoie kã kiè e' wà kiane ché ñippökwakpa böltëpa.



dōkà cien böyök (200); chibo wě'ñe dōkà dabom böyök (20); obeja alaki dōkà cien böyök (200); obeja wě'ñe dōkà dabom böyök (20); <sup>15</sup> kameio alaki p̄ane ñikōl ilà t̄a, ese dōkà dabom mañayök (30); baka alaki dōkà dabom tkëyök (40); baka wě'ñe pupula dōkà dabop (10); burro alaki dōkà dabom böyök (20); burro wě'ñe dōkà dabop (10). <sup>16</sup> E' ukuök̄i t̄a iyiwak ekkē k̄os tuléitō ikanè mésopa a iwakmik iwakmik ulawa ulawa t̄a ichéitō iarak:

—A' yú ye' yök̄i k̄ewe. Ká ulat múat iyiwak a ulat ulat as k̄è iwöierw̄a ñita.

<sup>17</sup> Et̄a kanè méso k̄ewe patkém̄iitō e' a ichéitō:

—Mik be' tō ye' òl kué t̄a ie' tō be' chaké: “¿Yi be' wök̄ir? ¿Wé be' micho? ¿Sekkē dör yi iyiwak?” <sup>18</sup> et̄a iüt̄ó: “A k̄ék̄epa, iyiwak i' k̄os e' kak patké be' kanè méso Jacob tō be' a. Ie' wák datse sa' itök̄i.”

<sup>19</sup> E' s̄ü ikanè mésopa malepa patkém̄iitō iyiwak wëttsé, e'pa a ichém̄iitō ñies:

—Mik a' tō Esaú kué, et̄a ichó īa es è.

<sup>20</sup> K̄è a' éna ichökwa ché īa: “A k̄ék̄epa, be' kanè méso Jacob e' datse sa' itök̄i.”

Ie' tō ibikeitsé: “Iyiwak patkém̄iyö k̄eweie ye' òl a e' dör as ie' er buarne ye' k̄i. E' ukuök̄i t̄a ye' wák tō isuèmi. Es ie' tō ye' kièwami er bua' wa.” <sup>21</sup> Es iyiwak kak patkém̄iitō k̄eweie ie' yök̄i. Erè ie' wák e' tséat kapökrö ie' úla a.

### Jacob ñippé kapa wa Skéköl t̄a

<sup>22-23</sup> E' nañewe Jacob e' k̄éka. Ie' tō ilakölpa böl ena e'pa kanè mésopa böl ena ila'r dōkà dabom eyök k̄i eköl e'pa k̄os dapa'wéitō t̄a iyyöks̄a ké di' Jaboc wishet ñies ò k̄os tso' iwa ekkē uyétsaitō. <sup>24</sup> Ie' e' tséat eköl. Ee t̄a wëm de eköl ie' ska' t̄a ie'pa ñippé kapa wa darèrè dō k̄á ñine et̄a. <sup>25</sup> Erè wëm e' tō isué tō k̄è ie' e'

alòpak̄a Jacob k̄i. E' kuék̄i ie' tō itéwa itu' wöierkewa e' k̄i t̄a itu' wöyènettsa. <sup>26</sup> Et̄a wëm ñe' tō iché ie' a:

—Ká ñirkewatke e' kuék̄i ye' ówa.

Ie' tō iüté:

—K̄è be' tō ye' a kawö bua' mè, et̄a k̄è ye' tō be' epamine.

<sup>27</sup> Wëm tō ie' a ichaké:

—¿Ima be' kiè?

Ie' tō iüté:

—Ye' kiè Jacob.

<sup>28</sup> Wëm tō iché īa:

—K̄è be' kièīa Jacob. Be' kirdaë Israel. <sup>28</sup> Be' ñippé Skéköl t̄a ñies s'ditsö t̄a et̄a ò kiane be' k̄i e' de be' ulà a, e' kuék̄i be' kiè mékayö es.

<sup>29</sup> Jacob tō ie' a ichaké:

—Ichó ña, ¿ima be' kiè?

Ie' iüté:

—¿Iók be' k̄i ye' kiè kiane jchenuk?

Ee t̄a wëm ñe' er bua' ché ie' a. <sup>30</sup> Ie' tō k̄á e' kiè mék̄a Penuel.\* Ie' tō iché: “Eré ye' tō Skéköl wák suéwa ye' wöbla wa, erè k̄è ye' du'wa.” E' kuék̄i k̄á e' kiè mékaitö es.

<sup>31</sup> Mik ie' tkökemitke Penuel, et̄a diwö tskine. Erè ie' tu' wöyènettsa, e' kuék̄i ie' shkörami shaotshaot. <sup>32</sup> Ie' ténewa itu'kicha k̄i, e' kuék̄i dō ikk̄é t̄a ie' aleripa k̄os k̄è tō iyiwak tu'kicha kateta'.

### Esaú er buanene Jacob k̄i

**33** Mik Jacob tō isué tō ie' òl datse ena wëpa taijé datse ie' w̄a dōkà cien tkëyök (400), et̄a ie' tō ila'rla bla-batsé. E'pa méitō Lía a ena Raquel a ena e'pa kanè mésopa böl a. <sup>2</sup> Kanè mésopa böl e'pa patkém̄iitō keweie ila'r t̄a. E' ukuök̄i t̄a ie' tō Lía ena ila'r patkém̄i. Bata ekkē Raquel ena ilà José e'pa patkém̄iitō. <sup>3</sup> Et̄a ie' wák tkami k̄ewe ie'pa yök̄i. Ie' mirw̄a ie' òl wörk̄i e' dalewa ie' wöemi dō òl isk̄i es iwöömir dōk̄a kuktök̄i (7

<sup>§§32:28</sup> *Israel*: Hebreoie s'kiè e' wà kiane ché ñippé Skéköl t̄a.

\*<sup>32:30</sup> *Penuel*: Hebreoie k̄á kiè e' wà kiane ché Skéköl wö.

veces). Es ie' demi tsinet iël wörki. <sup>4</sup> Etā Esaú tunebitū ie' wōki, tā ipaklō'wēwaitō ikuli' a tā iwōalattséitō tā iérak ñita. <sup>5</sup> E' ukuōki tā Esaú tō Jacob alakōlpa ena ila'rla e'pa sué tā ichakéitō ia:

—¿Wíkkēpa dör yi?

Jacob tō iüté:

—A kēkēpa, Skēköl tō ala'rla wíkkēpa mé ye' a.

<sup>6</sup> Etā ilakōlpa kanè mésopa e'pa de ila'rlaē tā iwō éwarak dò iski. <sup>7</sup> E' ukuōki tā Lía de ila'rē tā ie'pa wōéwa iski ñies. Bata ekkē tā Raquel de ilà José tā eta ie'pa wōéwa dò iski ñies. <sup>8</sup> E' bet tā Esaú tō ie' a ichaké:

—Iyiwak kuéyo ñala kī ulawa ulawa ¿iie e' dör?

Ie' iüté:

—E' dör as be' er buarne ye' kī.

<sup>9</sup> Esaú tō iüté:

—Au, kē be' tkinuk ye' kī. Ye' wā itso' taiē. E' tsúat be' wák tō.

<sup>10</sup> Erē Jacob tō iskà ché ia:

—Au, kē be' tō ye' ttè watōktsa. Be' er buanene ye' kī e' tā íyi kakmekeyō be' a e' kló'ú. Be' tō ye' kiéwa buaē. Be' suéneyō e' dör buaē ye' a wēs Skēköl wák suéyō es. <sup>11</sup> Taiē Skēköl tō ye' blu'wé. Kē ì kianeia ye' kī. E' kuēki ye' be' pablè tō íyi kakméyō be' a e' tsú ye' ulà a.

Jacob tō iyiwak watké ia taiē, e' kkēpa iël Esaú tō iyiwak tsé iulà a. <sup>12</sup> Esaú tō iché ia:

—E'ma mishka ñita. Ye' mi'ke kewe.

<sup>13</sup> Erē Jacob tō iüté:

—A kēkēpa. Be' wā ijcher bua' tō ye' ala'r ià tsitsirla. Ñies obeja ena baka tso' alàe e' bikeitséyō dō' ishtirwā tā iduölurmi sēkka ká etkēme. <sup>14</sup> Ye' a tā buaē idir tō be' yu'tke kewe, etā wē' ye' do be' itōki enaena wēs ye' iyiwak ena ye' ala'rla shkōmir es. Es ye' mir ie'pa tā dò be' serke Seír eē.

<sup>15</sup> Etā Esaú tō iüté:

—E'ma buaē idir. Kawō mú ña ye' kanè mésopa welepa mukat be' a be' kimoie.

Erē Jacob tō iüté:

—Au, ¿iók be' e' we'ikō ye' wā ekkē chōkle?

<sup>16</sup> E' è diwō tā Esaú míane Seír iyamipa tā. <sup>17</sup> Erē Jacob mía ká kiè Sucot† eē. Eē ie' u yuē iwák a. Ñies iyiwak wē chali'wéitō. E' kuēki ká e' kiè mékaitō Sucot.

<sup>18</sup> Es Jacob manétat Padán-aram dò Canaán. Ie' dettsa buaē. Ie' sené ká kiè Siquem, e' wōsha. <sup>19</sup> Wé ie' tō ká yuē e' tuéttsa ie' tō. E' ské dör inuköl wōmule dōka cien eyök (100). Hamor dör Siquem yé, e' ala'r tō ká watué Jacob a. <sup>20</sup> Ká e' a Jacob tō ák kataté et ka'ie iyiwak jchoie Skēköl dalōioie. E' kiè mékaitō El-elohé-israel.‡

### Dina dalōsēwēwā Siquem tō

**34** Jacob alà busi Lía tā kiè Dina, ká et tā e' mía ká e' wakpa busipa pakök. <sup>2</sup> Etā Hamor e' dör heveowak e' dör ká e' wōkir, e' aladulaköl kiè Siquem e' tō Dina sué. Etā ie' tō iklō'wēwā tā isenēka itā kēsik wa. <sup>3</sup> Erē ie' wōbatse Dina wa taiē tā ipabléitō taiē. <sup>4</sup> Etā ie' tō iché iyé a:

—A yéwō, be' yú kēkēpa Jacob ska' ilà busi kiōktsa ye' a as ye' serwā ie' tā.

<sup>5</sup> Í sulu wamblé Siquem tō Dina tā e' jchēnewā Jacob wā. Erē ie' aladulakōlpa tso' kañika iyiwak kanéuk, e' kuēki ie' kē wā iyēne ie'pa a. <sup>6</sup> E' dalewa Hamor dör Siquem yé e' mía Jacob ska' ttök ie' tā.

<sup>7</sup> Mik Jacob aladulakōlpa dene u a, etā ì wamblēne Dina tā e' jchēnewā ie'pa wā. E' tō ie'pa uluwēka taiē. Siquem senēka Jacob alà busi tā e' dör íyi suluē Israel aleripa a. E' kē kawō tā' wamblè es. <sup>8</sup> Erē Hamor tté ie'pa tā, tā ichéitō ia:

†33:17 *Sucot*: Hebreoie ká kiè e' wā kiane chē u yöle *chalichali*.

‡33:20 *El-elohé-Israel*: Hebreoie kiè e' wā kiane chē *Israel Kēköl diché tā' taiē*.

—Ye' aladulaköl Siquem, e' wöbatse tajë a' kutà wa. A' we'ikèyö k̄awö mú ie' a' senukwà ie' ta. <sup>9</sup>Es a' yörmi sa' yami-paie. Es sa' serwami a' alà busipa ta. Nies a' serwami sa' alà busipa ta. <sup>10</sup>A' e' tsúat senuk sa' shuà. A' senú sa' ká a' wé a' k̄i ikiane eē. A' tò íyi wataú ena íyi taú. A' tò ká taú. Kè yi tò a' wöklö'wepa.

<sup>11</sup>Nies Siquem tté Dina yé ta ena iképa ta, età ichéitö ia:

—Ye' a' pablè tò ye' ttè kló'ú. Ye' tò a' a' íyi kakmeraë kos a' k̄i ikiane ekkè. <sup>12</sup>Kos iské<sup>4</sup> dör e' tsata a' tò ye' a' ikí kié, e' ta ekkè meraëyö a' a. E' kè k̄i ye' tkine. Ye' tò íyi meraë tajë a' a, erè k̄awö mú ye' a' senukwà be' kutà ta.

<sup>13</sup>Erè Siquem tò ie'pa kutà dalösewéwà, e' kuek̄i ie'pa tò ie' ena iyé iüté kachè wa. <sup>14</sup>Ie'pa tò iché ia:

—Kè sa' a' sa' kutà menuk wèpa kè tottola kkuölitla tëule tsir, esepa a. E' dör sulué sa' a' jaë tajë. <sup>15</sup>Es è sa' tò a' iütèmi. A' wèpa kos tottola kkuölit téé tsir wés sa' es, e' ta sa' tò a' ttò iütèmi. <sup>16</sup>Es a' serwami sa' alà busipa ta. Nies sa' serwami a' alà busipa ta. Es sa' sermi a' ta' n̄ita wés ká etkè wakpa es. <sup>17</sup>Erè kè a' wà a' tottola kkuölitla tëne wés sa' tò iché a' a es, e' ta sa' míyalne ká i' k̄i. Sa' kutà mítserne sa' wà.

<sup>18</sup>Età Hamor ena ilà Siquem e'pa a' imène buaë. <sup>19</sup>Tajë duladula e' k̄i Jacob alà busi kiane, e' kuek̄i bet iwéitö wés ie'pa tò iché es. Ie' dalò tajë iyé ska' imalepa tsata. <sup>20</sup>E' kuek̄i ie' mía iyé ta ká kköiëule e' wékkö a. Eē ká e' wakpa n̄i dapa'uke ttè shuloie. Eē Siquem ena iyé mía ttök iká wakpa ta. Ta' ichéitö iarak:

<sup>21</sup>—Pè' debitu íe er buaë se' ta. Ie'pa de senuk se' ta, íyi taúk ena íyi wataúk se' shuà. Ká tso' wè' ie'pa a. Se' serwami ie'pa alà busipa ta. Nies ie'pa serwami se' ichapa ta. <sup>22</sup>Età as se' dō ká etkè wakpaie ie'pa ta' n̄ita, età s'kawōta iuk wés

ie'pa tò iché es. Ie'pa tò iché tò se' wèpa ulitane k̄awōta itóttola kkuölitla tók tsir wés ie'pa wöblane iuk es. <sup>23</sup>Età kos ie'pa wà iyiwak tso', ì tso' e' dōraë se' icha. Sö ichò ie'pa a' tó. Età es ie'pa e' tsukeat senuk se' shuà.

<sup>24</sup>Età wèpa tso' ká e' k̄i kibinetke, e'pa ulitane a' buaë idir. Età ie'pa kos tottola kkuölitla télor tsir.

<sup>25</sup>E' ukuök̄i bökk̄i es ta' mik e' dalërkeia' tajë kè wa ie'pa e' tsatkèr, età Jacob aladulakölpa dör Dina aképa kiè Simeón ena Leví, e'pa míyal Siquem, età ká e' wakpa wèpa télurdakitö seraa tabè wa. <sup>26</sup>Es ie'pa tò Hamor ena ilà Siquem e'pa ttéwà tabè wa. Ie'pa tò ikutà yéttsa Siquem u a' ta imíyal. <sup>27</sup>Ká e' wèpa ttélur seraa. E' ukuök̄i ta' Jacob aladulakölpa malepa debitu ta' íyi kos tso' ká e' k̄i e' tsémirakitö. <sup>28</sup>Es ie'pa wà obeja ena baka ena burro ena íyi kos tso' ká kköiëulewà e' a, nies ì kos tso' kañika e' mítser. <sup>29</sup>Nies íyi tso' kos u a, e' mítser ie'pa wà seraa. Ala'rla kos ena alakölpa kos e'pa klö'wélur ie'pa tò ie'pa kanè mé-sopaie. <sup>30</sup>Età Jacob tò iché Simeón ena Leví a:

—A' tò se' tsaié. A' kuek̄i ká i' wakpa e' dör canaánwak ena fereseowak e'pa ulurdaë se' k̄i tajë. Ie'pa n̄i dapa'uraë n̄ip-pök se' ta. Kè se' wà n̄ippök'wakpa ta' tajë, e' kuek̄i ie'pa e' alörakà se' k̄i. Ye' ena ye' yamipa kos ttelurdaë ie'pa tò.

<sup>31</sup>Erè ie'pa tò iüté:

—¿Ima ie'pa erbikò tò ie'pa wà sa' kutà mi'mítser wés alakölpa sulusi es?

### Skéköl er buaë ché Jacob a Betel

**35** E' ukuök̄i ta' Skéköl tò iché Jacob a: “Be' yú senuk Betel. Eē ák katató ka'ie ye' dör be' Kéköl e' k̄kayè' be' a' mik be' bakshkar Esaú yöki età, e' dalöioie.” <sup>2</sup>Età Jacob tò iché iyamipa a ena kos itso'rak ie' ta, e'pa a' nies:

<sup>4</sup>34:12 *iské*: E' k̄ewö ska' ta' ie'pa wöblar tò ilà busipa watueke inuaki a.

—Íyi diököl tso' a' wá dalöie, ese kos tulóttsa bet. A' kuó tã a' datsi' mane'úlor. <sup>3</sup>Mishkarak bet Betel. Eë ye' tó ák katateke et kã'ie iyiwak jchoie Skëköl dalöioie. Ie' tó ye' kime' mik ye' bak erianuk taië etã. Ie' tó ye' kköna' kos ye' kãka're ekkë.

<sup>4</sup>E' bet tã íyi diököl tso' ie'pa wã dalöie ese tulérakitö Jacob a. Nies ikukuöio kos, e' tulérakitö Jacob a. E' kos wötélurritö kós klò ter tsinet Siquem e' dikia. <sup>5</sup>Etã ie'pa e' yélur. Erë kã tso' tsinet tsinet e' wakpa kos suawéka taië Skëköl tó, e' kuëki e'pa kè wã ie'pa töiëne.

<sup>6</sup>Etã Jacob ena iyamipa kos demi kã kiè Luz atë Canaán. Kã e' kiè nies Betel. <sup>7</sup>Etã eë ák katatëitö et kã'ie iyiwak jchoie Skëköl dalöioie. Eë Skëköl e' kkayë' ie' a' mik ie' bakshkar iël yöki etã. E' kuëki ák katatëitö e' kiè mékaitö El-Betel. <sup>8</sup><sup>8</sup>E' ukuöki tã kã e' a' Rebeca kkö'nukwak bak kiè Débora, e' blënewã tã inú bléwarakitö kós klò ter eë e' dikia. Kal e' ter kã kiè Betel e' o'mik. Jacob tó kã e' kiè méka “Ië kéli”.

<sup>9-10</sup>Mik Jacob biteane Padán-aram dene Canaán, etã Skëköl e' kkachéne etökichane ie' a. Etã Skëköl er buaë ché ie' a' i' es:

“Be' kiè Jacob, erë be' kè kiëia es.

Iñe tã be' kiè mékayö Israel.”

Skëköl tó ie' kiè mane'wëttsa, <sup>11</sup>e' ukuöki tã ichëitö ia:

“Ye' dör Skëköl Diché Tã' Íyi Ulitane Tsa-tã e';

Be' ala'r ena be' aleripa alónú taië.

Be' aleripa alördaë taië,

e'pa döraë kã taië wakpaie.

Nies ie'pa shua blu'pa döraë.

<sup>12</sup>Kã me'bakyö Abraham a ena Isaac a,

e' méyö be' a' nies be' aleripa a.”

<sup>13</sup>Mik Skëköl tté one Jacob tã, tã imía. <sup>14</sup>Eë Jacob ák duéka ek sè sù. Ák e' ki ie' tó kiö ena vino té iwã kkachioie tó e' dör batse'r Skëköl a. <sup>15</sup>Kã e' kiè mékaitö Betel.

### Raquel blënewã

<sup>16</sup>E' ukuöki tã ie'pa e' yélur Betel míyal Efrata. Kam ie'pa dòmi Efrata e' tso'ia elkeë, etã Raquel alã kurketke e' diwö de. E' tó Raquel kiri'wëwã taië erë kè iwã kur yës. <sup>17</sup>Ie' tso'tke suluë ichók etã ikkö'nukwak dur ee, e' tó iché ia: “Kè be' suanuk. Be' alã kune. E' wák dör wëm.”

<sup>18</sup>Etã Raquel wake' duökewatke, isiwa' bata tkökeia, e' shua ilã kiè mékaatitö Ben-oní. <sup>\*\*</sup>Erë ilã yé tó ikië mane'wé Benjamín. <sup>††</sup>

<sup>19</sup>Es Raquel blënewã. Inú wötéwarakitö Efrata ñalé ki. Iñe tã kã e' kiè Belén.

<sup>20</sup>Etã wé Raquel nu bléwaitö e' ki ák duéka ek Jacob tó iwã kkachioie. Iñe tã ák e' tkëria Raquel pö kkachioie.

<sup>21</sup>Etã Israel<sup>‡‡</sup> michoë wé imi'kerö ee. Ie' e' tséat senuk kã kiè Migdal Éder e' wishke. <sup>22</sup>Ie' tó kã yué senoie eë, e' ukuöki tã ilã Rubén senéka ie' alaköl kiè Bilhá e' tã, e' jchenewã ie' wã.

### Jacob aladulakölpa

Jacob aladulakölpa dökã dabom eyök ki böl (12). <sup>23</sup>Ie' ala'r Lía tã e'pa dör Rubén, e' dör ikibi, nies Simeón, Leví, Judá, Isacar ena Zabulón. <sup>24</sup>Ila'r Raquel tã e'pa dör José ena Benjamín. <sup>25</sup>Raquel kanè méso kiè Bilhá, e' tã ila'r dör Dan ena Neftalí. <sup>26</sup>Lía kanè méso kiè Zilpá, e' tã ila'r dör Gad ena Aser. E'pa dör Jacob aladulakölpa kune Padán-aram e'pa.

§35:7 **El-Betel:** Hebreoie kiè e' wã kiane ché Skëköl tso' Betel.

\*\*35:18 **Benoni:** Hebreoie s'kiè e' wã kiane ché ye' eriane e' alé.

††35:18 **Benjamín:** Hebreoie s'kiè e' wã kiane ché ye' ulã bua'kka e' alé.

‡‡35:21 **Israel:** E' dör Jacob kiè pa'alí me'ka Skëköl tó iki e'.

### Isaac blënewa

<sup>27</sup> Jacob minea iyé Isaac sauk ká kiè Mamré ee. Ká e' kiè ñies Arbá ö Hebrón. Ká e' a Abraham ena Isaac bak senuk. <sup>28-29</sup> Isaac kënewatke. Mik ie' ki duas tso' cien eyök ki dabom paryök (180), etá iblënewa mía idëütöpa itöki. Ila'r Esaú ena Jacob e'pa tö inü wötéwa.

### Esaú aleripa

**36** I'pa dör Esaú aleripa. Esaú kiè ñies Edom. <sup>2</sup>Esaú senéwa canaánwak alakölpa mañal ta. Eköl dör Adá, e' dör hititawak kiè Elón, e' alà busi. Iëköl kiè Oholibamá, e' dör Aná alà busi ena heveowak eköl kiè Sibón, e' talá. <sup>3</sup>Bata ék kiè Basemat, e' dör Ismael alà busi ena Nebaiot kutà. <sup>4</sup>Adá alà tsá kune e' kiè Elifaz. Basemat alà kiè Reuel. <sup>5</sup>Oholibamá ala'r kune mañal. E'pa kiè dör Jeús, Jaalam ena Coré. E'pa dör Esaú ala'r kune mik ie' bak senuk Canaán etá e'pa.

<sup>6</sup>Esaú wa ilakölpa ena ila'r wëpa ena ila'r busipa ena imalepa kos serke ie' ska' e'pa kos míyal ie' wa e' ta senuk ká bánet iël Jacob e' yöki. Ñies ie' wa iyiwak kos ena i kos dé' ie' ulá a Canaán, e' mítser seraá. <sup>7</sup>Esaú ena Jacob wa iyi tso' taië. E' kuëki ie'pa kè chë'kaia ñita. Kè i ku'ia wë' ie'pa böl iyiwak a katè. <sup>8</sup>E' kuëki Esaú (e' kiè ñies Edom) e' mía senuk Seír kébata a.

<sup>9</sup>I' dör Esaú aleripa bak senuk Seír ké köwö ki, e'pa kiè edomwak. <sup>10</sup>I'pa dör Esaú ala'r: Elifaz e' dör Esaú alà Adá ta, ena Reuel e' dör Esaú alà Basemat ta.

<sup>11</sup>Elifaz ala'r dör Temán, Omar, Sefó, Gatam ena Quenaz. <sup>12</sup>Elifaz alaköl skà bak eköl kiè Timná, e' ta ilà ta' eköl kiè Amalec. E'pa dör Esaú alaköl kiè Adá e' uyökpa.

<sup>13</sup>Reuel ala'r dör Náhat, Zérah, Samá ena Mizá. E'pa dör Esaú alaköl kiè Basemat e' uyökpa.

<sup>14</sup>Esaú alaköl kiè Oholibamá, e' dör Aná alà busi ena Sibón talá. Ie' ala'r dör Jeús, Jaalam ena Coré.

<sup>15</sup>I'pa dör Esaú aleripa e'pa ditséwöpa wökirpa:

Esaú alà kibi kiè Elifaz e' aleripa dör: Temán, Omar, Sefó, Quenaz, <sup>16</sup>Coré, Gatam ena Amalec. E'pa dör Elifaz aleripa e'pa ditséwöpa wökirpa bak senuk Edom. Ie'pa dör Adá uyökpa.

<sup>17</sup>Esaú alà kiè Reuel e' ala'r dör: Náhat, Zérah, Samá ena Mizá. E'pa dör Reuel ditséwöpa wökirpa bak senuk Edom. Ie'pa dör Basemat uyökpa.

<sup>18</sup>Esaú alaköl kiè Oholibamá e' dör Aná alà busi. Ie' ala'r dör: Jeús, Jaalam ena Coré. E'pa dör Oholibamá ditséwöpa wökirpa.

<sup>19</sup>E'pa kos dör Esaú (kiè ñies Edom) e' aleripa. E'pa dör ie'pa ditséwöpa wökirpa.

<sup>20</sup>I'pa dör wëm dör horeowak eköl kiè Seír, e' ala'r. Ie'pa bak senuk Edom ñies. Ie'pa kiè dör: Lotán, Sobal, Sibón, Aná, <sup>21</sup>Disón, Éser, ena Disán. E'pa dör Seír ala'r wëpa. Ie'pa dör horeowak wökirpa bak senuk Edom. <sup>22</sup>Lotán ala'r dör Horí ena Hemam. Lotán kutà dör Timná. <sup>23</sup>Sobal ala'r dör Alván, Manáhat, Ebal, Sefó ena Onam. <sup>24</sup>Sibón ala'r dör Aiá ena Aná. Ká e' ta Aná tso' iyé kiè Sibón e' burro kkö'nuk e' dalewa ie' tö di' tum kué taië ká sí po e' a. <sup>25</sup>Aná alà wëm kiè Disón. Ie' alà busi kiè Oholibamá. <sup>26</sup>Disón ala'r dör Hemdán, Esbán, Itrán ena Querán. <sup>27</sup>Éser ala'r dör Bilhán, Zaa-ván, ena Acán. <sup>28</sup>Disán ala'r dör Us ena Arán.

<sup>29</sup>Horeowak wökirpa dör Lotán, Sobal, Sibón, Aná, <sup>30</sup>Disón, Éser, ena Disán. E'pa dör horeowak wökirpa iyamipa wa. Ie'pa bak senuk Seír.

<sup>31</sup>I'pa dör Edom blu'pa, kam Israel aleripa blúpa dò e' yöki. <sup>32</sup>Bela, e' dör Beor alà, e' de Edom wakpa blúie. Ie' ká kiè Dinhaba. <sup>33</sup>Bela blënewa e'

skéie Jobab yöne blu'ie. Ie' dör Zérah alà. Ie' datse Bosrá. <sup>34</sup> Jobab blënewa e' skéie Husam datse Temán e' yöne blu'ie. <sup>35</sup> Husam blënewa e' skéie Hadad dör Bedad alà e' yöne blu'ie. Bedad e' ali'ka Madián wakpa kī kà kiè Moab ee. Husam ká kiè Avit. <sup>36</sup> Hadad blënewa, e' skéie Samlá yöne blu'ie. Ie' ká kiè Masrecá. <sup>37</sup> Samlá blënewa, e' skéie Saúl yöne blu'ie. Ie' ká dör Rehobot. Ká e' atē di' kkò a tsinet. <sup>38</sup> Saúl blënewa, e' skéie Baal-hanán yöne blu'ie. Ie' dör Acbor alà. <sup>39</sup> Baal-hanán blënewa, e' skéie Hadad yöne blu'ie. Ie' ká kiè Pau. Ie' alaköl kiè Mehetabel, e' dör Matred alà busi ena Mezaab talà.

<sup>40</sup> Ipa dör Esaú aleripa kiè iyamipa wa ñies iká wa: Timná, Alvá, Jetet, <sup>41</sup> Oholibamá, Elá, Pinón, <sup>42</sup> Quenaz, Temán, Míbsar, <sup>43</sup> Magdiel ena Iram. Esaú kiè ñies Edom. E'pa kos dör Edom ká blu'pa wé isenerak iká kī ee.

**37** Jacob e' tséat senuk Canaán wé iyé bak senuk ee. <sup>2</sup> Ttè i' dör Jacob aleripa e' pakè.

### José ena iëlpa

Jacob alà kiè José, mik e' kī duas tso' dabom eyök kī kul (17) etā ie' tso' iyé obeja kkö'nuk iëlpa tā. Iëlpa dör iyé alakölpa kiè Bilhá ena Zilpá, e'pa ala'r. Etā ì sulu kos wambleke iëlpa tò ie' wöwa, ese kKateke seraa ie' tò iyé a.

<sup>3</sup> Ie' kune mik iyé Jacob kënewatke etā. E' kuëki Jacob kī ie' kiar ila'r malepa tsata. E' kuëki Jacob tò datsi' yué ie' a kītkëule buaë. <sup>4</sup> Erë mik ie' ëlpa wa ijchenewa tò ie'pa yé kī ie' kiar ie'pa ulitane tsata etā ie'pa éna iar suluë, kè ishke'weta'.

<sup>5</sup> Ká et tā ie' kabsué e' pakéitö iëlpa a. E' kuëki ie'pa éna suluë ie' kī ane. <sup>6</sup> Ie' tò ikabsuë paké iëlpa a i' es:

—Ye' ttò ttsó. Ye' kabsué e' pakekeyö a' a. <sup>7</sup> Ye' kabsué tò se' ulitane tso' kaneblök kañika dali shuā. Se' tso' dali wöshök e'

tsatésö ettsak ettsak. Ye' tö isué tò bet ye' icha e' duéka bua' shkë'ka. A' ichapa e' dapa'wé ye' icha pamik shkit tā e'pa tò ye' icha dalöié.

<sup>8</sup> Etā iëlpa tò iüté:

—¿Be' éna iwà chak tò be' doraë sa' blúie? ¿Sa' serdaë be' dikia?

Ie' kabsué ena wes ipakéitö ie'pa a, e' kuëki ie'pa éna suluë ie' kī ane.

<sup>9</sup> E' ukuökī tā ie' skà kabsuëne, e' pakéitö iëlpa a ñies. Ie' tò iché ie'pa a:

—Ye' kabsué tò diwö ena si'wö ñies bëkwö döka dabom eyök kī et (11), e' kos tò ye' dalöieke.

<sup>10</sup> Mik ie' tò ikabsué e' paké iyé a ena iëlpa a, etā iyé tò iüné:

—¿Ì kiane chë be' kī kabsuë e' wa? Ttsësquia be' mi ena be' ëlpa ena ye', sa' kawöta be' dalöiök.

<sup>11</sup> Ie' ëlpa éna iar suluë. Erë iyé tò ibikeitsé taië: ¿ì kébisué José tò es?

### José watuëttsa iëlpa tò

<sup>12</sup> Ká et tā José ëlpa míyal dö Siquem iyé iyiwak wëttsë kākö yulök. <sup>13</sup> Etā Jacob tò iché José a:

—Be' ëlpa tso' tsinet Siquem iyiwak kkö'nuk. Ye' kī ikiane tò be' yú isauk.

Etā José tò iüté:

—E' buaë. Ye' mí isaukrak.

<sup>14</sup> Jacob tò iüté:

—Èkëkë. Be' yú be' ëlpa sauk, is itso'rak, is iyiwak tso' ñies. E' wa be' wa ye' a itté dömine.

Etā Jacob tò ie' patkëmi. Ie' e' yëttsa Hebrón ké kkue kī míā Siquem. <sup>15</sup> Eë ie' shkòdur chò kañika, e' kuëwa wëm eköl tò tā e' tò ie' a ichaké:

—¿Ì yulök be' tso'?

<sup>16</sup> Ie' tò iüté:

—Ye' tso' ye' ëlpa yulök. ¿Be' kè wa ijcher wé ie'pa tso' ye' yé iyiwak kkö'nuk?

<sup>17</sup> Wëm e' tò iüté:

Ie'pa kè ku'ia íe. Ie'pa mineyalbak. Ye' ittò ttsérak tò ie'pa mi'keā Dotán.

Età ie' mîa iëlpa yulök. Età ie'pa kuéitö Dotán. <sup>18</sup>Età iëlpa tö ie' sué kamië tö ie' datse. Kam idò e' dalewa iëlpa kawö mérak ñi a ie' ttowa. <sup>19</sup>Ichérakitö ñi a:

—Kabsaukwak datse. <sup>20</sup>Ittöwasö. Inú batröömistö kauk kè a di' ta' ese a. Età ichòsö tö iyiwak sulusi ie' katéwa. Es ie' kabsuè e' kè wà tköpa yès.

<sup>21</sup>Mik Rubén tö ttè e' ttsé, età ie' éna iël tsatkak. E' kueki ie' tö iché iëlpa a:

—Kè ittarwa. <sup>22</sup>Kè a' tö ie' pé tkó'uk. A' tö iómi kauk i' a. Kè a' ulà mukka iki.

Rubén éna José tsatkak tsèmine iyé a, e' kueki ie' tö iché ie'pa a es. <sup>23</sup>Erè mik José debitu iëlpa ska', età ie'pa tö ie' datsi' kitkèule bua', e' yéttsa. <sup>24</sup>Età ikló'wéwarakitö batréemi, kauk tso' di' blóie, erè kè iwà ta' ese a.

<sup>25</sup>E'ukuöki ta' ie'pa e' tuléwa chkök, e' shua ie'pa isué tö taië Ismael aleripa datse. E'pa datse Galaad michoë Egipto dali dami iwà e' watauk. Kameio ki' ie'pa wa kiò alar buaë e' dami. Nies kiò masmas kiè bálamo ena mirra e' dami iwà. <sup>26</sup>Età Judá tö iché iëlpa a:

—Se' èl ttéwasö ta' e' tté blésö, e' ta' e' wa çì buaë dömi se' ulà a? <sup>27</sup>Ye' ichè buaë idir tö iwatauttsasö Ismael aleripa a. Ie' dör se' èl se' yami ekka, e' kueki kè sö ittöwa.

E' mène buaë iëlpa a. <sup>28</sup>Mik íyi wataukwakpa datse Madián e'pa tkami ee, età ie'pa tö iël yéttsa kauk a watuéttsarakitö Ismael aleripa a inuköl wömulé döka dabom böyök (20) ské ekkè. Es Ismael aleripa wa José minetser Egipto.

<sup>29</sup>Mik Rubén debitu kauk kkò ki, età kè iël ku'ia. E' tö ie' eriawé taië. E' kueki idatsi' jchélor. <sup>30</sup>E' ukuöki ta, ie' mîa iëlpa ska' ta' ichéitö ie'pa a:

—Se' èl tsirla kè ku'. ÇWes ye' e' ùmi?

<sup>31</sup>Età ie'pa tö chibola ttéwa ta' e' pé wa José datsi' patiékarakitö. <sup>32</sup>Età datsi' e' patkémiitö iyé a ta' ichémi ia: “Datsi' i'

kué sa' tö. Ì saú bua'ie. ÇKè idör be' alà datsi'?”

<sup>33</sup>Età Jacob tö iché: “ÇTó, i' dör ye' alà datsi'! Iyiwak sulusi wésele tö ye' alà ttéwa katéwa.” <sup>34</sup>Età Jacob tö idatsi' jchéloyar eriane kueki. Età datsi' tso' iëno mik schönewa ese iékaitö. Età ilà blénewa e' eriaitséitö ká taië. <sup>35</sup>Età ila'r, wépa ena alakölpä, e'pa kos de ie' pablök, erè kè ie' pablér yès. Ikí iuke taië shute ilà dalèrmik. Ie' tö iché: “Ye' schó eriaitséaraè dò mik ye' duowa ekkè, es ye' dóraè ie' ska'.”

<sup>36</sup>Età madiánwakpa demi Egipto. Ee ie'pa tö José watuéttsa wém kiè Potifar e' a. Wém e' kaneblöke Egipto blú a. Potifar dör Egipto blú tsatkökwakpa e' wökir.

### Judá ena Tamar

**38** E' kéwö ska' ta' Judá e' batséttsa iëlpa yöki mîa senuk wém kiè Hirá e' ska'. E' serke ká kiè Adulam. <sup>2</sup>Ee Judá tö alaköl sué eköl. E' dör wém canaánwak kiè Súah e' alà busi, e' ta' ie' senéwa. <sup>3</sup>E' ukuöki ta' idunekä ta' ilà kune wém, e' kiè mékaitö Er. <sup>4</sup>E' ukuöki ilà skà kune wém, e' kiè mékaitö Onán. <sup>5</sup>E' ukuöki ta' ilà skà kune wém, e' kiè mékaitö Selá. E' kune mik ie' serke ká kiè Quezib, ee età.

<sup>6</sup>Judá tö alaköl yulé senowaie ilà kibi kiè Er e' ta. E' kiè Tamar. <sup>7</sup>Età Er serke sulué shute Jehová wöa. E' kueki Jehová tö ittéwa. <sup>8</sup>Età Judá tö iché Onán a:

—Be' kawöta senukwa be' dabököt ta' alà kòka be' èl blénewa e' a wes se' wakpa a imeneatbak es.

<sup>9</sup>Onán éna iane tö ie' alà kurmi kos ischó ta, e' kè dör ie' wák ala'r. E' kueki mik ie' serke ischó ta, età bet ta' ie' e' skéu bänet as kè alà kòka ischó ta. Es ie' kè wa iël a iditséwö meneat. <sup>10</sup>E' dör sulué ichók Jehová a, e' kueki ie' tö Onán ttéwa ñies. <sup>11</sup>Età Judá tö iché iyäk Tamar a:

—Be' yú senuk be' yé u a wes schó es dò mik ye' alà Selá talane età.

Erë Judá tso' Tamar kītō'uk. Ie' ibikeitsé tō Selá duōwami wēs iēlpa duolur es. Es Tamar minea senuk iyé ska'.

<sup>12</sup> Ká de tajē tā Judá alaköl dör Súah alá busi e' blēnewa. Ie' schó kēwō tka tā ie' mīa ká kiē Timnat, wē itso'rak ie' obeja köyök tōk eē. Ie' yami kiē Hirá e' dör adulamwak, e' mí ie' tā ie' wapiōuk. <sup>13-14</sup> Tamar tō isué tō Judá alá kiē Selá, e' detke kēchke erē kē ie' senēwa ie' tā. E' wa ie' wā ijchenewa tō Judá tō ie' kītō'wē Selá wa. E' kueki mik ie' wā ijchenewa tō inuaki mīa Timnat iobeja köyök tōk, eta ie' e' paiōke schóie e' mane'wēttsaneitō. Iwō pabakéwa datsitak wa as kē yi a iwērwa. Eta imīa ká kiē Enaim. Eē ie' e' tkéser Timnat nālē kkō a.

<sup>15</sup> Mik Judá tō Tamar suē tā ie' ibikeitsé tō e' dör alaköl sulusi iwō pabakéwa e' kueki. <sup>16</sup> Eta ie' mīa iwōki. Kē ie' wā ieri ta' tō e' dör ie' yāk. Eta ichéitō ia:

—¿Se' ser nīta?

Eta Tamar tō iché ia:

—¿Ì meke be' tō ye' a iskéie?

<sup>17</sup> Eta Judá tō iūtē:

—Ye' chibo patkōke be' a etō iskéie.

Ie' iūtē:

—Èkēkē. Erē be' íyi tsá múat ye' a dō mik be' tō chibola patké eta.

<sup>18</sup> Judá tō ie' a ichaké:

—¿Ì kiane be' ki tō ye' imēat be' a?

Eta ie' tō iūtē:

—Be' tabechka tso' e' kiē shtoie, e' múat ye' a ikichaē. Nies be' shko kéli múat ye' a.

Judá tō imé ia tā ie' sené ie' tā. Eta alaköl duneka. <sup>19</sup> E' ukuōki tā Tamar mīa iu a eta idatsitak wa iwō pabakéwa e' yēttsaitō. Eta ie' e' paiéne schó es.

<sup>20</sup> E' ukuōki tā Judá tō chibo patkēmi iyami adulamwak e' ulā a as ie' tō imū alaköl a as alaköl e' tō ie' íyi méat alaköl

ulā a e' mùbitūne. Erē ie' yami kē wā alaköl e' kuneia. <sup>21</sup> Eta ie' tō ká e' wakpa a ichaké:

—Alaköl sulusi e' dör enaimwak atēat nāla ska', ¿wé e'?

Eta ie'pa tō iūtē:

—Íe alakōlpa sulusi kē dē'.

<sup>22</sup> Eta ie' biteane Judá wōrki tā ichéitō ia:

—Kē ye' wā alaköl kune. Ye' tō ichaké ká e' wakpa a. Ie'pa tō ye' a iché: 'Íe alakōlpa sulusi kē dē'.'

<sup>23</sup> Judá tō iūtē:

—As ye' íyi tsúatitō es kē yi tō sa' jaēwēpa. Kē ye' iane iwīie. Ye' tō ichibo patkēmi be' ulā a, erē kē be' wā alaköl kune.

<sup>24</sup> Eta si' mañat ulatōk tā Judá ki biyō de tō:

—Be' yāk Tamar e' sene' wēpa kuakī tā. Ie' duneka.

Eta Judá tō iché aneule:

—Íyóttsa tā inā'úwa!

<sup>25</sup> Erē mik ie' yekettsa ie'pa tō ttēwa, e' wōsha ie' ttē mémi inuaki a: "Yi íyi a'tser ye' ulā a i', e' wák tō ye' duéka. Be' isaú. ¿Yi kiē shto tabechka i' ikichaē ena shko kéli i'? ¿e' sūule be' wā?" <sup>26</sup> Mik Judá tō ie' íyi suéwa iyāk ulā a tā ichéitō: "Alaköl i' dör buaē. Kē ye' wā iulabatse ye' alá Selá tā. Ye' e' wamblé sulu ie' ki." Eta kē ie' seneia ie' tā.

<sup>27</sup> Tamar alá kune klō wák dör wēpa.

<sup>28</sup> Itsörke e' wōsha, eta eköl ulā dettsa kewe. Eta ie' kkō'nukwak tō datsi'kicha batsē e' muéwa ilā ulā mik tā ichéitō: "T' ék kune kewe." <sup>29</sup> Erē e' wōshaē bet tā alá ulā tiéwane etōkichane eta iēk kune keweie. Eta ikkō'nukwak tō iché ia: "¿Wes be' kune keweie?" E' kueki ikiē mékaitō Fares. <sup>30</sup> E' ukuōki tā, iulā a datsi'kicha tkēr batsē e' kune, e' kiē mékaitō Zéráh.

<sup>¶</sup>38:29 *Fares*: Hebreoie s'kiē e' wā kiane chē tkabitu keweie.



### José tkashkar Potifar alaköl ulà a

**39** José minetsarak iwà Egipto. Ká e' kī wēm tso' eköl kiè Potifar, e' tò ie' tuéttsa Ismael aleripa a. Wēm e' kanèblöke Egipto blú a. Ie' dör Egipto blú tsatkökwakpa wökir. <sup>2</sup> Erë Jehová tso' José ta, e' kuekī ì kos kanewēkeitō e' dökettsa buaè iwökir egiptowak e' ska'. <sup>3</sup> Iwökir tò isuè tò Jehová tso' José ta, e' kuekī ì kos kanewēkeitō e' dökettsa buaè. <sup>4</sup> E' kuekī iwökir kī ikiarke taiè. Ie' tò iméka ie' wák kīmukwakie. Nies imékaitō ie' íyi kos e' kuebluie. Ie' wà íyi kos tso' e' kk'onekitō. <sup>5</sup> Mik Potifar tò ie' méka íyi kos kuebluie, età Jehová er buaè chémi Potifar a. Ie' íyi kos tso' iu a ena kañika e' kos mir buaè. <sup>6</sup> José tò Potifar íyi ulitane kk'oneke buaè. E' kuekī Potifar kè wöki ì wēneia yēs. Ì ñak ie' éna e' è bikeitsekeitō.

José wák dör bua'bluka. <sup>7</sup> Ká de ikī taiè età iwökir alaköl wöbatseká iwa. Ká et ta ie' iché ia:

—Be' senúka ye' ta.

<sup>8</sup> Erë José kè wà ie' ttè iutène ta ichéitō ia:

—Ye' ttò tso'. Ye' wökir íyi ulitane méat ye' ulà a sunoie. Ye' tso' íe, e' ta kè ie' tkine ie' íyi kos kī. <sup>9</sup> Ye' tso' ie' u kueblu kibiiie. Ye' wökir kè wà ì kk'one ye' kī. Be' è kè meneat iwà ye' a be' dör ie' alaköl e' kuekī. ¿Wes ye' tò ì sulu i' wamblèmi be' ta? ¿Wes ye' tò ì sulu wamblèmi Skéköl kī?

<sup>10</sup> Kekraè alaköl tò ie' a icheke: “Be' senú ye' ta.” Erë ie' kè tò iuteta' yēs. Ie' tò iulawaté kekraè. <sup>11</sup> Ká et ta ie' tkawà weshkè íyi kanéuk età iwökir alaköl e' è tkër. <sup>12</sup> Età iwökir alaköl tò ie' kl'wéwa idatsi' a ta ichéitō ia:

—Be' senú ye' ta.

Erë ie' tkashkar iulà a mía tuneule. Ie' datsi' yēnettsaat alaköl ulà a. <sup>13</sup> Mik iwökir alaköl tò isuè tò José datsi' ate

ie' ulà a <sup>14</sup> età ie' tò ikanè mésopa kié ta ichéitō ie'pa a:

—Isaú, ye' wēm wà hebreowak dē'bitu e' tso' se' wayuök. Ie' dewà ye' ska'. Ie' senakka ye' ta kēsik wa erë ye' anekà taiè. <sup>15</sup> Mik ie' ittse tò ye' anekà taiè ta ie' tkashkar tuneule. Ie' datsi' yēnettsaat e' ate ye' ulà a.

<sup>16</sup> E' ukuökī ta ie' tò José datsi' blé kkayēnoie iwēm a mik idene età. <sup>17</sup> Mik iwēm dene, età ipakéitō ia ta ichéitō ia:

—Be' wà hebreowak dē'bitu kanè mésoie, e' tkawà weshkè ye' ska'. Ie' senakka ye' ta. <sup>18</sup> Erë mik ye' anekà taiè, età ie' tkashkar tuneule ta idatsi' ate tēr íe. <sup>19</sup> Es be' kanè méso tò ye' daloséwéwa.

Mik iwökir tò ttè e' tse età ilunekà taiè. <sup>20-21</sup> José kl'wéwaitō wötökwa patkéitō wé Egipto blú bolökpa tso' wötèule ee. Erë Jehová tso' José kīmuk s'wöto wé a nies. Ie' er bua' chöke ia. Ie' tò s'wöto wé wökir ké er buaè chök ia. <sup>22</sup> S'wöto wé wökir tò iméka s'tso' wötèrulewà malepa kos kuebluie. José tò ì kos weke s'wöto wé a e' k'ewö meke. <sup>23</sup> Jehová tso' José ta. Ie' tò ikimeke as ì kos dötsa buaè ie' a. E' kuekī ì kanewēke José tò e' kè sueku'ia s'wöto wé wökir tò is imir.

### Kabsuè böt e' wà paké José tò

**40** <sup>1-2</sup> E' ukuökī ta wēm dör Egipto blú a vino mukwakpa e'pa kueblu ena wēm dör blu' a pan yuökwakpa e'pa kueblu, e'pa bül tò iblú tsiriwéka. E' kuekī ie' ulunekà ie'pa kī <sup>3</sup> ta ie'pa patkéitō wötèwà ikk'ö'nukwakpa kueblu e' u a s'wöto wé tso' e' a. Ee José tso' wötèule nies. <sup>4</sup> Età Egipto blú kk'ö'nukwakpa e' kueblu tò José ké wèpa bül ñe'pa kk'ö'nuk. Ee ie'pa sené wötèule ká taiè.

<sup>5</sup> Ká et nañewe ta ie'pa bül kabsuè kuakī kuakī. E' wà dör kuakī kuakī. <sup>6</sup> Bule es bla'mi ta José debitu isauk. Ie'

tö isué tö ie'pa eriane. <sup>7</sup>E' kuëki ie' tö ie'pa a ichaké:

—¿Íók i'ne tã a' wö wër siar?

<sup>8</sup>Ie'pa tö iüté:

—Sa' kabsué, erë kè yi ku' sa' a iwà pakók.

Ie' tö iché ie'pa a:

—¿A' kè wã ijcher tö Skëköl tö s'kabsué e' wã chëmi se' a? ¿Ima a' kabsué? E' chó ña.

<sup>9</sup>Etã blu' a vino mukwakpa kueblu e' tö ikabsuë paké ia tã ichéitö:

—Ye' kabsué tö uva kicha me'r ye' wöshã <sup>10</sup>e' ulà tso' mañat. E' dapëneka e' wörkua bune taië tã iwörkua míane iwóliie e' yua' tso' taië. <sup>11</sup>Egipto blú tkã' a'tser ye' ulà a. E' a uwawöli diò tuéeyö. E' ukuöki tã ye' wák tö imé blu' a. Es ye' kabsué.

<sup>12</sup>José tö iché ia:

—Be' kabsuë e' wã kiane yënuK i' es: Be' tö uva kicha ulà kébisué mañat. E' wã kiane yënuK kã mañat. <sup>13</sup>Kã mañat tã blu' tö be' shuleraë. Be' kané meraneitö be' a. Vino meranebö ie' a wes be' tö io' kuaë es. <sup>14</sup>Be' we'ikëyö, mik iwà tka, etã kè be' éna ye' chökwa. Ye' tté chó blu' a as itö ye' yöttsã íe. ¡Be' er buaë chó ye' a! <sup>15</sup>Ye' dör hebreowak e' ekiblë'wabitu ie'pa tö. Ye' kè wã ì sulu wamblëne. Ye' tso' wötëule é.

<sup>16</sup>Mik blu' pan yuökwakpa kueblu e' tö isué tö José tö iyami kabsuë e' wã paké tã idettsã buaë etã ie' tö ie' icha paké ia ñies. Ie' iché:

—Ye' kabsué tö ye' wã kkó dami mañal ye' wökir kã, e' a pan saruru dami. <sup>17</sup>Kkó tkër kákke ék e' a pan dami blu' a daklili. Erë pan dami ye' wã kkó a ye' wökir kã e' ñeke dù tö.

<sup>18</sup>Etã José tö iché ie' a:

—Be' kabsué e' wã kiane yënuK i' es: kkó mañal e' dör kã mañat. <sup>19</sup>E' wã kiane chë tö kã mañat tã blu' tö be' kuli' tökök patkeraë, tã be' nu kichatkerakã kal ulà a. Dù tö be' nu katerawã.

<sup>20</sup>Kã de mañat tã blu' tö iduëswö tkö'wé chkè wa di'yè wa taië ikuëblupa ulitane kanëblöke ie' a e'pa a. E' shua ie' tö ivino mukwakpa kueblu ena ipan yuökwakpa kueblu e'pa böI tsukbitu patké s'wöto wé a ikuëblupa ulitane wörki. <sup>21</sup>Vino mukwakpa kueblu e' a ikané méneitö. Ie' tö blu' a itkã' méne wes kuaë es. <sup>22</sup>Erë pan yuökwakpa kueblu, e' patkémi nu kichatkëka wes José tö iyë' es. <sup>23</sup>Erë vino mukwakpa kueblu e' kè er aneia José ska.

### Egipto blú kabsué bötökicha e' wã paké José tö

**41** Dwas de böK, e' ukuöki tã Egipto blú kabsué tö ie' dur di' kië Nilo e' kkömik. <sup>2</sup>Ie' isué tö baka deyal di' a kuktö. E' dör baka bua'buäe jani'janila. E' iëter chkök kuachka shua. <sup>3</sup>E' itöki baka skà deyal kuktö di' a. Erë e' dör suluë sí sulula. E' míyal di' kkömik baka malë o'mik. <sup>4</sup>Etã baka sí sulula kuktö, e' tö baka bua'buäe kuktö e' katélur.

Eë tã blu' ti'neka. <sup>5</sup>E' ukuöki tã bet ie' kapowane tã ikabsuëne tö ì talarke kuö sù kië trigo e' klö elka è a ila'k deka kul. Ila'k e' dör bua'buäe iwö blubluë. <sup>6</sup>E' itöki iskà tschine e' klö elka è a ila'k deka kul nies, erë sulula idir. Siwã datse diwö tskirke e' kke e' tö isiwëwã ña'wëwa suluë míã wö yabë è. <sup>7</sup>Etã ila'k kul siulewã sulu e' tö ila'k bua'buäe katélur seraa.

Blu' ti'neka tã iëna iane tö ie' kabsauke moki. <sup>8</sup>Erë bule es bla'mi tã ie' kabsué e' tö ie' eriawëka. E' kuëki ie' tö Egipto iyi tötkökwakpa ena iyi jcher taië ese wakpa, kos tsuk patké. Ie' kabsué e' pakéitö ie'pa a. Erë ie'pa ulitane kè a ie' kabsué e' wã ane. <sup>9</sup>Etã vino mukwakpa kueblu e' tö iché blu' a:

—A blu', erpa ye' éna idaã tö sulu ye' e' wamblé. <sup>10</sup>Mik be' uluneka taië be' pan yuökwakpa kueblu kã ena ye' kã, etã be' tö sa' wötökwa patké' be' kkö'nukwakpa kueblu e' wé a. <sup>11</sup>Kã et nañewe tã pan

yuökwakpa kuęblu kabsuë. Ye' kabsuë ñies. Sa' kabsuë e' wà tã ulawa ulawa. <sup>12</sup>Eę wëm dur eköl duladula hebreowak, e' dör s'wöto wé wökir e' kanè méso. Ie' a sa' tó sa' kabsuë e' paké tã ie' tó iwà ché sa' a. <sup>13</sup>¡Iwambléne yësyësë wës ie' tó sa' a iyë' es! Ye' dene ye' kané a tã iëköl nu kichatkéka kal ulà a.

<sup>14</sup>Etã blu' tó José tsuk patké tã iyéttsarakitö bet s'wöto wé a. José tsã téé buaë, e' paie buaë, tã ide ie'pa wã blu' wörki. <sup>15</sup>Blú tó iché ia:

—Ye' kabsuë erë kè yi éna iwà ane. Erë ie'pa tó iché ye' a tó buaë be' tó s'kabsuë e' wà pakè.

<sup>16</sup>Ie' tó iüté:

—A kékëpa e' kè yënuq ye' a. Erë Skëköl tó e' chëmi be' a be' kimoie.

<sup>17</sup>Blu' tó iché ia:

—Ye' kabsuë tó ye' dur di' kiè Nilo e' kkömik. <sup>18</sup>Ye' isuë tó baka deyal di' a kuktö. E' dör baka bua'buäë jani'janila. E' iëter chkök kuachka shua. <sup>19</sup>E' itöki baka skà deyal di' a kuktö. Erë e' dör suluë sí pola. ¡Kè ye' wã baka suule sí poë suluë ká i' a ekkë chök! <sup>20</sup>Etã baka sí sulula kuktö, e' tó baka bua'buäë kuktö e' katélur. <sup>21</sup>Baka sí suluë e' tó baka bua'buäë katélur erë kè iwër tó ikatélur. Itso'ia sí poë wës kenet es.

“Eę tã ye' t'ineka. <sup>22</sup>Etã bet ye' skà kapowane tã ye' skà kabsuëne tó ì talarke kuö sù e' klò elka è a ila'k deka kul. Ila'k e' dör bua'buäë iwö blubluë. <sup>23</sup>E' itöki iskà tskine e' klò elka è a ila'k deka kul ñies. Erë e' ala'k dör sulula. Siwa' datşë diwö tskirke e' kke e' tó isiwéwa ña'wéwa suluë mía wö yabé è. <sup>24</sup>Etã ila'k kul siulewã sulu e' tó ila'k bua'buäë katélur seraa. E' kos pakéyo s'tötkökwakpa a erë ie'pa shua kè yi a iwà ane yës.”

<sup>25</sup>Etã José tó blu' iüté:

—A kékëpa, be' kabsuë bötökicha, e' wà dör etkè. Ì weraë Skëköl tó kukuie e' chök ie' tso' be' a kabsuë a kam iwà tkò e' yöki. <sup>26</sup>Baka bua'buäë ena ala'k

bua'buäë e' wà dör etkè, e' dör duas kul. <sup>27</sup>Baka sulula sí poë deka ibua'buäë itöki ena ala'k suluë siulewã siwa' wã, e' wà dör etkè. E' dör duas kul skà. E' duéswö wa ketba ardaë s'ki dö duas kul e'. <sup>28</sup>Ì weraë Skëköl tó kukuie e' chök ie' tso' be' a wës ye' tó be' a ichétke es. <sup>29</sup>Kewe dali wördaë taië Egipto kos a döka duas kul. <sup>30</sup>E' ukuöki tã duas skà datskene kul e' dör ketba taië duéswö. Bli e' tó Egipto kos sulu'werau. E' kuëki duas kul buaë e' a dali wöne taië e' kè arpaia yi éna. <sup>31</sup>Bli ardaë taië darërë, e' kuëki dali wönebak taië e' peli kè wërpaia yës. <sup>32</sup>A kékëpa, be' kabsuë bötökicha, e' wà kiane chë tó Skëköl tó iweraë mokië. Bli döraë se' ki bet.

<sup>33</sup>A kékëpa, be' kawötã wëm yulök eköl erbikò buaë wã íyi jcher taië ese. E' múka ká kuębluie. <sup>34</sup>Ikaneú i' es: wëpa yuló as ie'pa mi' Egipto kos a daliwö kak blök daliwö tso' taië duas kul e' dalewa. Mik daliwö tso' döka sacco skel etã ikió ia sacco et blënoie ketba yöki. <sup>35</sup>Ie'pa a ichó tó daliwö ñe' kos dapa'ú bänet bänet ká tso' kos Egipto e' a. E' kkö'nuk patkó be' wák tó sulitane tioie. <sup>36</sup>Es daliwö blërdaë a' wakpa ulitane a as ie'pa kè tto ketba tó mik ketba duéswö de s'ki etã.

### José yöne Egipto wökirie

<sup>37</sup>Ì ché José tó ie' a e' mène buaë ie' a ena ikuęblupa kos e'pa a. <sup>38</sup>E' kuëki ie' tó iché ie'pa a:

—Wëm i' a Skëköl Wiköl tso'. Kè se' a wëm skà kurpa wës ie' es.

<sup>39</sup>Etã ie' tó iché José a:

—Skëköl tó íyi ulitane ikkë e' kkaché be' a. E' kuëki be' erbikò buaë, be' wã íyi jcher taië sulitane tsatã. <sup>40</sup>Be' tkekekayö ye' ká kos e' wökirie. Sa' wakpa kos tó be' tó dalöieraë. Ye' eköl è dör kibiie be' tsatã, ye' dör blu' e' kuëki. <sup>41</sup>Ìñe ye' tó iché tó be' dör Egipto wökir kibi. <sup>42</sup>Etã blu' tó iulatsio tso' iwã ikka shtoie, e' yéttsa iéwã José ulatska a. José paiërak-

itö datsi' bua' bua ese wa. Nies bulë dör oro ese iéwaitö José kuli' a et. <sup>43</sup> E' ukuökí tã ie' tó José ké e' tkökkã shkök karreta shköke ie' karreta itökí e' kí. Ie' tó ie'pa welepa patkémi kewe ichök pé' a aneule: “¡A' e' skó! ¡Kawö mú se' wökir kibi datse as e' tkómi!” Es ie' tó José yué Egipto wañe e' wökirie.

<sup>44</sup> Etã blu' tó iché José a:

—Ye' dör Egipto blú erë kè yi a ì onuk ká i' kí, be' kè wã ikéwö mène e' tã.

<sup>45</sup> Ie' tó José kiè méka Safenat-panéah egiptowak ttò wa. Ie' tó tayë kiè Ase-nat e' mé José a senowãie. E' dör wëm kiè Potifera e' alà busi. Potifera dör egiptowak sacerdote<sup>88</sup> eköl. Ie' kaneblöke kã kiè On eë. Es José atë Egipto wañe e' wökirie. <sup>46</sup> Mik ie'pa wã José dë'bitü blu' ska', e' kéwö ska' tã ie' kí duas tso' dabom mañayök (30).

José e' chéat blu' a tã imítke ikaneuk Egipto kos a. <sup>47</sup> Duas kul tsã shuã dali wöne tajë shute. <sup>48</sup> Daliwö e' kos kak dapa'wé José tó tã ibléitö kã wañe. Wé dali e' wöne ese wakpa kã a ibléat u tso' daliwö blóie ese a. Es ibléitö kã ulitane tso' Egipto e' a. <sup>49</sup> Ie' tó daliwö dapa'wé tajë wes dayë tséwö kè ishtar es. E' kueki ie' kè wã ishtaneia.

<sup>50</sup> Ketba kéwö kam döwa e' yökí José alaköl kiè Asenat, e' alà kune böi wëpa. <sup>51</sup> Mik ilà tsã kune, etã José tó iché: “Skököl tó ye' bak erianuk ena ye' yamipa e' kos chówéwa ye' éna.” E' kueki ikiè mékaitö Manasés.\* <sup>52</sup> Mik ilà skã kune, etã ie' iché: “Skököl tó ye' a alà mé kã wé kí ye' bak weinuk tajë eë.” E' kueki ikiè mékaitö Efraín.†

<sup>53</sup> Duas kul dali wöne tajë Egipto e' tka. <sup>54</sup> E' ukuökí tã duas kul skã deb-

itu e' dör ketba poë duéswö wes José tó iyë' es. Ketba de kã wañe erë Egipto kos a chkewö tso'. <sup>55</sup> Mik Egipto wakpa teketke ketba tó, etã ie'pa mía iblú a chkewö kiök. Ie' tó iché iarak: “A' yú José ska' tã ì kos chéitö a' a e' wã iutó.”

<sup>56</sup> Mik ketba de kã wañe, etã José tó dali tso' bléule iwé a e' kos kköppée chkewö watuö Egipto wakpa a. Ketba kí datse tajë shute. <sup>57</sup> Kã ulitane wakpa a kè ì ku'ia katanoie, e' kueki ie'pa de Egipto chkewö tauk José ska'.

### José ëlpa mía Egipto

**42** Mik Jacob wã ijchenewã tó chkewö tso' Egipto watuë, etã ila'r a ichéitö: “¿Íók a' iëter ñi sauk è? <sup>2</sup> Ye' a iyëne tó chkewö tso' Egipto. A' yú eë chkewö tauk as kè se' duòlur ketba wã.”

<sup>3</sup> Etã José ëlpa döka dabop, e'pa míyal Egipto chkewö tauk. <sup>4</sup> Erë Jacob kè wã ilà Benjamín, e' dör José ël táie imi wa, e' patkëneni iëlpa tã ie' ibikeitsé dö' ì tkö itã ñalã kí. <sup>5</sup> Ketba tso' tajë Canaán e' kueki tajë Canaánwakpa míyal chkewö tauk Egipto. Esepa shuã Jacob ala'r mirwarak chkewö tauk ñies.

<sup>6</sup> José dör Egipto kã kueblu. Ie' tó chkewö watueke sulitane datse itauk e'pa a. Mik iëlpa demi iwörki, etã ie'pa wöéwa dò iski ie' dalöiök. <sup>7</sup> Ie' tó ie'pa suéwa bet tó ie'pa dör iëlpa. Erë ie' e' éwa iyökí wes kè ie' wã isuule es. Kè ie' e' kkayënewã ie'pa a tó ie' dör ie'pa ël. Etã ie' tó iëlpa chaké kësik wa:

—¿Wé a' sekkëpa bite?

Ie'pa tó iutö:

—Sa' bite Canaán chkewö tauk be' ska'.

<sup>88</sup>41:45 **sacerdote:** Sacerdote i' kè dör wes i'ñe itso' es. E' skéie ie'pa dör egiptowakpa siwã e' wã kaneukwakpa.

\*41:51 **Manasés:** Hebreoie s'kiè e' wã kiane chë ichówéwa ye' éna.

†41:52 **Efraín:** Hebreoie s'kiè e' wã kiane chë alã kékã ö dali wör.

<sup>8</sup>Ie' tò ie'pa suéwā, erè ie'pa kè wā ie' sunewā. <sup>9</sup>Ie' tò iēlpa kébisu' e' anewā ie' éna. Ie' tò iché ie'pa a:

—A' dör sa' bolökpa datse sa' sauk tö wes a' döwami ñippök sa' ta' e' aloka sa' ki.

<sup>10</sup>Ie'pa iüté:

—A' kékēpa, e' kè dör es. Sa' kè dör a' bolökpa. Sa' debitu chkwö è tauk. <sup>11</sup>Sa' kos i' e' yé dör eköl è. Sa' serke buaë yésyèsè. Kè sa' dör yi bolökpa.

<sup>12</sup>Ie' tò ichéne ie'pa a:

—Au. A' sekkè tso' kachök. A' datse sa' ká sauk tö wes a' döwami ñippök sa' ta' e' aloka sa' ki.

<sup>13</sup>Erè ie'pa tò iüté:

—Sa' tso' be' wörki wes be' kanè mé-sopa es. Sa' döka dabom eyök ki böl (12). Sa' yé dör eköl è. Sa' serke Canaán. Sa' el tsirla ék e' ate sa' yé ta. Iéköl blénawatke.

<sup>14</sup>Erè ie' tò iska chénerakia:

—Ye' ichétke tö a' dör sa' bolökpa. <sup>15</sup>Egipto blú ttò wa yö iché a' a' tò a' kè wā a' el tsirla e' dé' íe, e' ta' a' kè mi'pa ká i' ki. Es ye' isuëmi tò a' ttò mokí. <sup>16</sup>A' eköl yú a' tsirla tsukbitu. A' malepa ate wötéule. Es ye' wā ijchermi tò a' ttòke e' dör mokí. E' kè yène, e' ta' a' dör sa' bolökpa. E' chéyö Egipto blú ttò wa.

<sup>17</sup>Ie' tò ie'pa wotéwā sekkā döka ká mañat. <sup>18</sup>Ká de mañat etā ie' tò iché iarak:

—Ye' tò Skéköl dalötseta'ka. Ì cheke ye' tò a' a' e' ú, e' ta' ye' kè tò a' ttök-wā patkepa. <sup>19</sup>Yène tò a' dör wēpa ttò mokí ese, e' ta' a' eköl múat wötéule. A' malepa yúne, chkwö tsúmi a' yamipa tteke ketba tò e'pa a. <sup>20</sup>E' ukuöki ta' a' el tsirla e' tsúbitu ye' a' suè. Es ye' tò isuëmi tò a' ttòke e' dör mokí. E' kè dör es, etā a' duoralur.

Etā ie'pa tò iché: “E' dör buaë sa' a.”

<sup>21</sup>Etā ichérakitö ñi a:

—Mokié se' e' wamblé' sulué se' el José ta. Mik ie' kköyè' taié se' a' tò ì sulu kè wamblar ie' ki eré se' isu' tò taié ie' eri-

ane, erè kè e' ska' se' tkine. E' nuí ki se' weirke i'ñe.

<sup>22</sup>Etā Rubén tò iüté:

—Ye' tò iyé' a' a: “Kè ì wamblar José ki.” Erè a' kè wā ye' ttò iüténe. E' kuéki i'ñe ta' se' kawöta idu'wā e' nuí patauk.

<sup>23</sup>José ttòke iēlpa ta' egiptowak ttò wa e' pakekene o'ka tò ie'pa a' iwakpa ttò wa. E' kuéki ie'pa kè wā ijcher tò ie'pa ttòke e' ane ie' éna. <sup>24</sup>Mik ie' tò ie'pa ttòke e' ttsé, etā ie' e' skéttsā míā bānet iuk. Mik ie' er dekané ttoie, etā ie' dene ie'pa ska'. Ie' tò Simeón yöktsā patké ta' ipayuéwarakitö iēlpa wörki. <sup>25</sup>E' ukuöki ta' ie' tò ikanè mésopa patké iēlpa sku' wā iök chkwö wa. Ñies ichéitö iarak: “Ie'pa chkwö e' ské iówā iwakpa bil ekké sku' a. Ñies chkè bakómirakia ñè ñala ki.” Etā ie'pa tò iwé wes ie' tò iché iarak es. <sup>26</sup>E' ukuöki ta' ie'pa tò ichkwö méka iburro ki ta' imíyal.

<sup>27</sup>Mik ie'pa demi ñala ki wé ie'pa kapökerö ee' etā ie'pa eköl tò isku' a' burro chkò tso' e' kkò wöttsée iburro tioie ta' isué tò inuköl àr sku' shua. <sup>28</sup>Ie' tò iché iēlpa a:

—¡Isaú! Ye' inuköl mébitune ie'pa tò e' àr sku' a.

Ie'pa ulitane suane taié eriane taié. Ichérakitö ñi a:

—¿Ì wamblök Skéköl tso' se' ta?

<sup>29</sup>Mik ie'pa demine Canaán, etā ì tka ie'pa ta' Egipto e' kos pakérakitö iyé a. Ie'pa tò iché ia:

<sup>30</sup>—Ká e' wökir e' tté sa' ta kèsik wa. Ie' tò iché tò sa' dör ie'pa bolökpa. <sup>31</sup>Sa' tò iché ia: “Sa' serke buaë. Kè sa' dör yi bolökpa. <sup>32</sup>Sa' döka dabom eyök ki böl. Sa' yé dör eköl è. Sa' el eköl blénawatke, iéköl ate sa' yé ta' Canaán.” <sup>33</sup>Etā ie' tò sa' iüté: “A' ttò mokí, e' ta' a' el eköl e' múat íe ye' ska' etā chkwö tsúmi a' yamipa a. <sup>34</sup>Erè a' el tsirla ék e' tsúbitu ña suè. Es ye' wā ijchermi tò a' ttò mokí. A' tò iwé es, e' ta' ye' tò a' el emimine. Ñies a' íyi tuëmi bua' sa' ká i' ki.”

<sup>35</sup> Mik José ělpa tso' isku' wakkaũk, etã ie'pa isué sku' a inuköl deyal parratule-wa. Mik e' sué, etã ie'pa tkirulune iyé ñies. <sup>36</sup> Jacob tō iché iarak:

—A' tso' ye' mukat alà kè tã'. José blènewã se' yökĩ. Simeón ñies, kè ku' se' tã. I' tã Benjamín kiane tsèmi a' kĩ darè wa. Kèkraë ye' weirke.

<sup>37</sup> Rubén tō iché iyé a:

—Bejamín múmi ye' a. Ye' tō ikkō'neraë buaë. Ye' wã idōrane be' a. Ye' kè wã idè'ne, e' tã ye' alà bōl e' ttólur.

<sup>38</sup> Ie' tō iüté:

—Ye' alà kè mìnè a' tã. Ièl José du'wã tã ie' è dawajã. Dō' ì sulu tkò ie' tã ñalã kĩ, e' tã kèkèla i' duómiwã ilã dalèrmik tã a' iane iwiie.

### Benjamín ělpa wã imítser Egipto

**43** Ketba tkèneia darèrè Canaán. <sup>2</sup> Chkewö dè'biturak iwã Egipto, e' enewa. Etã Jacob tō iché ila' r a:

—A' yúne chkewö skà tãuk se' a.

<sup>3</sup> Erè Judá tō iüté:

—Wëm tso' eë e' tō iyé' sa' a yèsyèsè: “A' kè wã a' èl tsirla dè' íe, e' tã a' kè tō ye' suepa.” <sup>4</sup> Be' tō sa' èl tsirla émi sa' tã, e' tã sa' mi'mi chkewö tãuk be' a. <sup>5</sup> Erè be' kè tō ièmi sa' tã, e' tã kè sa' mìnè. Wëm e' tō sa' a iché: “A' kè wã a' èl tsirla dè' íe, e' tã kè a' tō ye' suepa.”

<sup>6</sup> Jacob tō iüté:

—¿Iók a' tō ì sulu wambleke taië ye' kĩ? ¿Iók a' tō iché wëm e' a tō a' èl skà tso'ia eköl?

<sup>7</sup> Ie'pa tō iüté:

—Wëm e' tō sa' chakéwaie darè wa: “¿A' yé tso'ia ttsëka? ¿A' èl skà tso'?” Kè wes sa' a ionukia. Sa' kawõtã iütök yèsyèsè. Sa' kè wã ijcher tō wëm e' tō sa' a ichémi: “A' èl tsúbitu ye' a sué.”

<sup>8</sup> Judá tō iché ie' a:

—Se' senakia, e' tã be' alà ómi ye' tã. Ye' tō ikkō'neraë. Es be' ena sa' ena se' ala'r kōs kè duópalur ketba wã. <sup>9</sup> Ye'

e' chò ie' skéie. Ì de wës ie' tã, e' nuí tuëraëyö. Ye' kè wã ie' dè'ne be' ska', e' tã ye' iane iwiie kèkraë. <sup>10</sup> Kè sō kawö chöuk taië. Warma i' tã sa' daretke bötökicha.

<sup>11</sup> Iyé tō iüté:

—E'ma kè wës ionuk. A' tō iú i' es: A' sku' a íyi bua'buwa tso' se' kã a, ese kak tsúmi wëm e' a. Bálsamo elkela ena bul alí elkela ena kiò masmas ena mirra ena kalwö wödalo katanoie ese kōs kak tsúmi ia elkela. <sup>12</sup> Ñies inuköl tsúmi ia jaishet dōkã bötökicha. Wé a' wã idè'ne e' tsúmine múne ia a' wák ulawa dō' ie' wōã kã chë'wa. <sup>13</sup> A' yúne wëm e' ska'. Alà tsúmi. <sup>14</sup> Skèköl Diché Tã' íyi Ulitane Tsata e' a ikiéyö as wëm ñe' tō a' saù er siarè wa tã imú tō be' èl ena Benjamín óbitune. Ye' atë alà kè tã', erè ¿wes ye' e' ùmiia?

<sup>15</sup> Etã Jacob ala'r tō íyi kak íe, ñies inuköl ie' jaishet dōkã bötökicha. Ñies Benjamín mírak iwã tã imíyal. Mik idemirak José ska' <sup>16</sup> etã ie' isué tō Benjamín debitũ ie'pa wã. Ie' tō iché iu kuëblu a:

—Wëpa wíkkè tsúmi ye' u a. Be' yú baka ttökwa elka e' kaneú se' a. Ie'pa chköke iñe ye' tã dibata a.

<sup>17</sup> Etã iu kuëblu tō iwakanewé wes ichétitō ia es. Imítserak iwã e' tã José u a. <sup>18</sup> Erè taië ie'pa tkinewã imítserak iwã José u a e' kuëkĩ. Ie'pa ttōramirak ñita: Ie'pa tso' se' kitó'uk. Ie'pa tō inuköl iè'mi se' sku' a e' nuí tkène se' mik. E' nuí kuëkĩ ie'pa tō se' klō'werawã kaneblök ie'pa a kanè mésopaie kè patuë tã' ese. Ñies se' iyiwak klō'werawarakitō nuí kĩ.

<sup>19</sup> Mik ie'pa demi u wékkö a, etã ie'pa de tsinet u kuëblu wörkĩ <sup>20</sup> tã ichéraitō ia:

—A kèkèpa, suköt sa' dè' íe chkewö tãuk. <sup>21</sup> Erè sa' dè'mi wé sa' kapökerö eë tã sa' sku' kōs kkò wöttsee tã e' a kōs sa' tō chkewö tō' e' inuköl kuéne sa' tō serea. E' debitune sa' wã mènè. <sup>22</sup> Ñies sa' wã

inuköl skà de chkewö k<sub>1</sub> tuqie. Erë kè sa' wà ijcher yi tò sa' inuköl ië'kane sa' sku' a.

<sup>23</sup> U kueblu tò iüté:

—Kè a' tkinuk. Kè a' suanuk. Ye' tò a' chkewö pato' e' inuköl klöo'. A' Kèköl dör a' yé Kèköl ñies, e' tò inuköl e' ië'wà a' sku' a.

E' ukuöki tã ie' tò Simeón yéttsa tsémi wé iëlpa tso' ee. <sup>24</sup> E' ukuöki tã imítserak iwà seraa José u a. Etã di' méitö iarak klò skuoie. Ñies iburro tiérakitö. <sup>25</sup> Ie'pa wà ijchenewà tò ee ie'pa chköke José tã dibata a. E' kueki ie'pa wà iyi kak de ie' a e' dapa'wérakitö mè ie' a.

<sup>26</sup> Mik ie' dewà weshke, etã ie'pa wà iyi kak de e' mé ia. Ie'pa wöéwaie dò ìski idalöiök. <sup>27</sup> Ie' tò ie'pa shke'wé tã ichakéitö:

—A' yé de kèkèpalatke yé' a' tò ye' a suköt çis e' tso'? çIdobyërkeia?

<sup>28</sup> Ie'pa skà wöéwane dò ìski tã ichéitö:

—A kèkèpa, tó, sa' yé tso' buaë. Ie' dobyërkeia.

<sup>29</sup> Etã José kã sué ipamik shkit, tã Benjamín dör iël ekka imì wa ena iyé wa e' suéitö. Etã ichéitö ie'pa a:

—A' èl tsirla yé' a' tò çe' dör wí?

Ie' tò iché Benjamín a:

—A alà, Skèköl er buaë chò be' a. <sup>30</sup> Ie' tò iël suéwà e' tò ie' ttsé'wé buaë tã ie' iakka. Bet tã ie' e' skéttsa mía wé ikapöke ee iuk. <sup>31</sup> Mik ie' ié one tã ier pablène tã iwö skuée tã imíane iëlpa skà tã ichéitö: “Chkò watió bet.”

<sup>32</sup> José tiérakitö bánet. Iëlpa tiérakitö bánet. Egiptowak chköke José u a e'pa tiérakitö bánet ñies. Hebreowak dör ñã egiptowak a e' kueki ie'pa kè a kawö ta' chkök ie'pa tã ñita. <sup>33</sup> José tò ie'pa tulök-wà patké chkök ñi o'mik wes duas tso' iki es dò ibataë. Ie'pa tò ibikeitsé: “çWes ie'pa wà se' duéswo jcher?” E' kueki ie'pa tkinewà taië tã ini suéka. <sup>34</sup> Ie'pa dène chkè tso' José mesa k<sub>1</sub> e' wa. Es iméitö ulitane a. Erë Benjamín a chkè méitö

kibiie dökã sketökicha iëlpa dène e' tsa-tã. Ie'pa chkè taië blo'yé José tã ttsé'ne buaë.

**José tka' tso' iwà wayé**

**44** E' ukuöki tã iu kueblu kiére José tò tã ichéitö ia:

—Ie'pa sku' kos wà iókã chië chkewö wa. Ñies ie'pa inuköl iókane isku' kos kkò k<sub>1</sub>. <sup>2</sup> Ñies ye' tka' yöule inukölchka wa tso' ye' wà wayé e' iókã ie'pa èl tsirla e' sku' kkò k<sub>1</sub>, inuköl chkewö patuo e' tã ñita.

Etã u kueblu tò iwakanewé wes José tò iché ia es. <sup>3</sup> Bule es bla'mi diwö tsquine tã José tò iëlpa a kawö mé shkökne iu a iburroë. <sup>4</sup> Kam ie'pa dòmi kamie, etã ie' tò iché iu kueblu a:

—Be' yú ie'pa itöki. Mik be' ikué, etã ichó ia: ‘Ye' e' wé buaë a' tã, çIók a' e' wamblé sulu ye' k<sub>1</sub>? çIók a' tò ye' wökir tka' yöule inukölchka wa, <sup>5</sup> e' dör wayé ena iyi tötkoie, e' bléwabitü a' tò? A' e' wamblé suluë.’

<sup>6</sup> Mik ie' ikuérak, etã ichéitö wes iwökir tò iché ia es. <sup>7</sup> Etã ie'pa tò iüté:

—çIók be' tò ttè e' ché sa' a es? Kè ekkè chók sa' e' wamblöpa. <sup>8</sup> Sa' bitë Canaan tkörö ié inuköl mine sa' sku' a e' mukne. çWes be' ibikeitsémi tò sa' tò inukölchka ö orochka e' bléwami be' wökir u a? <sup>9</sup> Sa' sku' shuyuló. Yi icha a ikuébö, as e' wák duöwà. Sa' malepa atë be' kané mésopaie.

<sup>10</sup> Ie' tò iché ie'pa a:

—Iwã tköraë wes a' tò iché es. Erë wé ék sku' a ikunewà e' è döraë ye' kané mésoie. A' malepa kè iane iwiie. A' mi'mine buaë.

<sup>11</sup> E' bet ie'pa ulitane tò isku' éwa ìski tã ikkò wöttéselor. <sup>12</sup> U kueblu tò sku' shuyulérak ikibi ék kewé dò itsirla Benjamín ska'. Etã Benjamín sku' kkò a tka' àr. <sup>13</sup> Ie'pa datsi' jchélor eriane taië kueki. Ie'pa dalí payuéne burro k<sub>1</sub> tã iteyalne José ska'. <sup>14</sup> Mik Judá ena iëlpa

demine José ska', etā José duriā. Ie'pa wöewa iski iwörki. <sup>15</sup>E' dalewa ie' tö iché iarak:

—¿Íók a' e' wamblò es? ¿A' kè wā ijcher tö wëm dör wēs ye' es, e' s'tòtkè buaë?

<sup>16</sup>Judá tö iüté:

—¿Ima sa' tö be' iütèmi? ¿Ì wa sa' tö be' a' ikkachèmi tö sa' kè wā ì sulu wamblène? Ì wamblèule sulu sa' wā e' sué Skèköl tö. I' sa' ièter be' wörki. Sa' kló'ú be' kanè mésoie. Yi sku' a' be' tka' kune e' kló'ú ñies.

<sup>17</sup>Erè ie' tö iüté:

—Kè ye' a' e' wamblènik es. Yi sku' a' ye' tka' kune, e' è atē ye' kanè mésoie. A' malepa mi'mine buaë a' yé ska'. Kè yi tö a' tsiriwepa.

### Judá kköché siarla Benjamín dalèrmik

<sup>18</sup>Etā Judá debitu José wörki tsinet, etā ichéitō ia:

—A kékèpa, be' we'ikèyö, mishka ttök se' böl è. Be' dalò dör wēs Egipto blú dalò es e' kueki kè be' ulunuk ye' ki. <sup>19</sup>Be' tö sa' a' ichaki' tö sa' yé ta', sa' èl skà ta'. <sup>20</sup>Sa' tö be' iüté' tó, sa' yé ta' kékèpalatke, ñies sa' èl ta' eköl ià duladula. E' kune mik sa' yé kènewatke etā. Sa' be' a' iyé' tö sa' yé ki taië ilà tsirla ék kiar. Alà e' è atéat imi a. Ie' èl blènewā. <sup>21</sup>Be' tö sa' a' iyé' tò alà e' tsúbitu suèyö. <sup>22</sup>Sa' tö be' a' iyé' tö kè ie' dōpa. Kè ie' a' iyé' menukat ekōrla. Mik ie' tö iyé' méat eköl, etā iyé' duōwami ie' dalèrmik. <sup>23</sup>Erè be' sa' a' iyé' tö sa' kè wā ie' dè', e' ta' be' kè sa' kiepawā.

<sup>24</sup>“Mik sa' dè'mine sa' yé wörki, etā ì kos ye' be' tö sa' a, e' paké sa' tö ie' a. <sup>25</sup>Ie' tö sa' a' iché: 'A' yúne chkewö taük.' <sup>26</sup>Erè sa' tö iüté: 'Sa' kawōta sa' èl tsirla tsukmi. Sa' kè wā ie' mìnè, e' ta' wëm e' kè tö sa' kiepawā.' <sup>27</sup>Ie' tö sa' iüté: 'A' wā ijcher buaë tö ye' alaköl e' tö ye' a' alà mé böl è. <sup>28</sup>Iaiaë eköl minea ye' yōki, kè ye' wā isuneia. Ye' ikló'wé tö ie' kōtwa

iyiwak sulusi tö. <sup>29</sup>A' wā ye' alà bata i' mýtser ta' ì sulu tka ie' ta' ñalā wa, e' ta' wö'kela i' duōrawā eriar è wā. Itka es, e' ta' a' iane iwiie.'

<sup>30-31</sup>“Sa' yé éna ilà dalèr taië. E' kueki sa' demine ie' ska', erè ie' isué tö ilà tsirla kè dè'ne sa' wā, e' ta' ie' duōrawā eriar è wā. E' wiie sa' iardaë. <sup>32</sup>Ye' tö ye' yé a' iyé': 'Ye' e' chò be' alà tsirla kkö'nuk. Ye' kè wā idè'ne, e' ta' ye' iane iwiie kèkraë.' <sup>33</sup>E' kueki ye' kköchò be' a' tö ye' tsúat be' kanè mésoie, alà tsirla skéie. Ie' ómi as imi' ièlpa ta. <sup>34</sup>Alà tsirla kè minene ye' ta, e' ta' çwēs ye' mi'mine ye' yé ska'? Ye' kè ki ye' yé kiane suè weinuk siarè.”

### José e' chéka ièlpa a

**45** José kè a' iwöklöneia' ikanè mé-sopa ulitane tso' kaneblök eē e'pa wörki. E' kueki ie' tö iché ie'pa a' aneule: “A' kos yúshka bánet. Sa' múat sa' wakpa è.” Es mik José e' chéka ièlpa a, etā ikanè mésopa kè ku' yēs ie' ta.

<sup>2</sup>Etā ie' iéka taië, e' ttsé Egipto wakpa tö. Egipto blú a' ittè demi tö José tso' iük.

<sup>3</sup>José tö iché ièlpa a:

—Ye' dör José. ¿Se' yé tso'ia' ttsé'ka?

Ie'pa tkirulune taië suane José yōki, e' kueki kè ie'pa a' ie' iütènea. <sup>4</sup>José tö iché ie'pa a:

—A' shkōwā tsinet ye' o'mik.

Mik ie'pa e' skéwā tsinet, etā ie' tö iché ie'pa a:

—Ye' dör a' èl José watō'ttsa' a' tö tsèmi Egipto e'. <sup>5</sup>Skèköl tö ye' patkèbitu ié a' yōki kewe s'tsatkoie ketba ulā a. E' kueki kè a' erianuk, kè a' tkinuk ye' watō'ttsa' a' tö e' kueki. <sup>6</sup>Ketba de e' ki' duas de bök. Etā duas skel kianeia. E' shua' iyi kos kuatkèmisö erè kè itskirpa yēs. <sup>7</sup>Erè Skèköl tö ye' patkèbitu ká i' ki' a' yōki kewe as a' aleripa kè erwa as Skèköl tö a' tsatkò ie' diché taië e' wa. <sup>8</sup>Es Skèköl wák tö ye' patkèbitu ié, e' kè dör a' ye' watō'ttsa' e' kueki. Skèköl tö ye' méka Egipto blú pattökwaie. Ye' dör ie' u



kuɛblu ena Egipto wa'ne wökir. <sup>9</sup> A' yüne bet ye' yé ska' ta' ichó ia: 'Be' alà José ttè i' patkébitu be' a: Skèköl tò ye' méka Egipto ká kos, e' wökirie. Be' shkó ye' sauk bet. Kè bö ipanuk taië. <sup>10</sup> Be' serdaë ká kiè Gosen ee be' yamipa kos ta, ñies be' iyywak kos ena i kos tso' be' wa ekkè ta. <sup>11</sup> Ketba duéswö kianeia skel. E' kueki ye' tò chkewö meraë a' ulitane a as a' wa chkewö tso' wè.' <sup>12</sup> Ye' èl Benjamín ena a' ulitane tò ichèmi ye' yé a tò moki ye' wák ttè a' ta. <sup>13</sup> Ipakó ye' yé a tò ye' dör Egipto wökir. Ñies i kos sué a' tò íe, e' pakó ia. ¡Ye' yé tsúbitu bet íe!

<sup>14</sup> Eta José tò ièl Benjamín pakl'owéwa ta iijéka. Es Benjamín tò José pakl'owéwa ta iie ñies. <sup>15</sup> Eta José tò ièlpa kos wöalattsé, ñi pakl'owéwarak ta iierak. Eta erpa ièlpa er deka ttök ie' ta.

<sup>16</sup> Eta Egipto blú u a ttè demi tò José èlpa debitu ie' ska', e' tò Egipto blú ena ikueblupa kos e'pa ttséwé buaë. <sup>17</sup> Eta Egipto blú iché José a:

—Ichó be' èlpa a: 'A' chkewö payuó iyywak ki ta a' yüne Canaán. <sup>18</sup> Eta a' yé ena a' yamipa kos e' tsúbitu ye' a. Ká tso' Egipto e' bua'ie mekeyö a' a. Ñies chkewö tso' Egipto e' bua'ie mekeyö a' a.' <sup>19</sup> Ñies ichó ie'pa a: 'karreta tsúmi taië a' alakölpá ena a' ala'r ena a' yé e'pa kos tsobitu. <sup>20</sup> Egipto íyi tso' bua'buá e' kak-meraëyö a' a. E' kueki kè a' tkinuk i tso' a' wa e' ki.'

<sup>21</sup> Eta Jacob ala'r tò iwé i' es. José tò karreta mé ie'pa a wes Egipto blú tò iché es. Ñies chkò méitö ie'pa a ñè ñala ki. <sup>22</sup> Ñies datsi' pa'ali mé iarak e' mane'woie. Erë Benjamín a datsi' kak-méitö sketökicha iënoie. Ñies inuköl wömule méitö ia döká cien mañalyök (300). <sup>23</sup> Íyi bua'buá tso' Egipto e' kak patkémi iyé a payöule burro ki döká dabop. Ñies trigowö ena pan ena chkewö skà e' payuëitö burro dabop skà ki iyé a ñè ñala ki. <sup>24</sup> Mik José èlpa mitke, eta José tò iché ie'pa a:

—Kè a' mía ñippök ñala ki.

<sup>25</sup> Ie'pa e' yéttsa Egipto a demi Canaán iyé ska'. <sup>26</sup> Eta ie'pa tò iché iyé a: "Be' alà José tso'ia ttsé'ka. Ie' tso' Egipto ká kos e' wökirie." Ttè e' tò Jacob wökráwéwa taië. Kè uteia. Ie' kè wa ttè e' klöone. <sup>27</sup> Erë mik ie'pa tò i kos ye' José tò ie'pa a e' paké iyé a, ñies mik Jacob tò karreta patké José tò ie'pa tsomi e' sué, eta ie' er dekané ttsé'ne buaë. <sup>28</sup> Eta ie' iché: "E' è kata ye' a, ye' alà José tso'ia ttsé'ka. Ye' mi'ke isauk kam ye' blérwa, e' dalewa."

### Jacob mía Egipto

**46** Eta Jacob e' yéttsa iu a. I kos tso' iwa e' mítser seraa. Mik idemirak ká kiè Beerseba ee, eta iyywak ña'wéitö iyé Isaac, e' Kèköl dalöioie. <sup>2</sup> E' nañewe Skèköl ttè ie' ta kabsueje ta ikiëitö ikië wa:

—A Jacob.

Jacob tò iüté:

—¿Ì?

<sup>3</sup> Eta Skèköl iché ia:

—Ye' dör be' Kèköl. Ye' dör be' yé Kèköl. Kè be' suanuk shkökmi Egipto. Ee ye' tò be' aleripa alöweraë taië. <sup>4</sup> Ye' mi'ke be' ta Egipto. Ñies ye' wák tò be' aleripa yerattsané ká e' a. Ñies mik be' duökewatke eta José tso' be' o'mik.

<sup>5</sup> E' ukuöki ta Jacob e' yéttsa Beerseba a. Eta ie' ala'r tò ie' iéka karreta patké Egipto blú tò ie'pa tsomi e' a. Ñies ie'pa ala'r ena ie'pa alakölpá e'pa iékarakitö karreta a. <sup>6</sup> Eta Jacob mía Egipto iyami-paë se. Ie' baka kos ena ie' obeja kos e' mítser ie' wa. Ñies i kos dè' ie' ulá a Canaán e' mítser ie' wa seraa. <sup>7</sup> Ila'r kos ena isibayökpa kos e'pa mía da'a Egipto. <sup>8</sup> Ikképa dör Israel aleripa mineyal Egipto. E'pa dör Jacob ena ila'r.

Rubén, e' dör Jacob alà kibi ék. <sup>9</sup> Eta Rubén ala'r kiè: Hanoc, Falú, Hesrón, ena Carmí.

<sup>10</sup> Simeón ala'r kiè: Jemuel, Jamín, Óhad, Jaquín, Sóhar, ena Saúl. Saúl mi dör canaánwak.

<sup>11</sup> Leví ala'r kiè: Guersón, Quehat ena Merarí.

<sup>12</sup> Judá ala'r kiè: Er, Onán, Selá, Fares ena Zérah. (Er ena Onán, e'pa blênewa Canaán.) Fares ala'r kiè Hesrón ena Hamul.

<sup>13</sup> Isacar ala'r kiè: Tolá, Puvá, Job ena Simrón.

<sup>14</sup> Zabulón ala'r kiè: Séred, Elón ena Jahleel.

<sup>15</sup> E'pa kos dör Jacob ala'r kune Padán-aram Lía ta. Ie'pa kutà kiè Dina, e' kune ee ñies. Jacob aleripa kos wëpa ena alakölpa e' dökà dabom mañayök ki mañal (33).

<sup>16</sup> Gad ala'r kiè: Sefón, Haguí, Esbón, Suní, Erí, Arodí, ena Arelí. <sup>17</sup> Aser ala'r kiè: Imná, Isvá, Isví ena Bería. Ie'pa kutà kiè Sérah. Bería ala'r kiè Heber ena Malquiel. <sup>18</sup> E'pa dör Jacob aleripa Zilpá ta, e' mé Labán tö ilà busi Lía, e' a ikanè mésoie. Ie'pa kos dökà dabom eyök ki teröl (16).

<sup>19</sup> Jacob alaköl kiè Raquel, e' ala'r kiè José ena Benjamín. <sup>20</sup> José ala'r dör ilaköl Asenat ta e'pa kiè Manasés ena Efraín. Ie'pa kune Egipto. Asenat dör wëm kiè Potifera, e' alà busi. Potifera dör egiptowak awá eköl. Ie' kaneblöke ká kiè On ee. <sup>21</sup> Benjamín ala'r kiè Bela, Béquer, Asbel, Guerá, Naamán, Ehi, Ros, Mupim, Hupim ena Ard. <sup>22</sup> E'pa dör Jacob aleripa Raquel ta. Ie'pa kos dökà dabom eyök ki tkël (14).

<sup>23</sup> Dan alà kiè Husim. <sup>24</sup> Neftalí ala'r kiè: Jahseel, Guní, Jezer, ena Silem. <sup>25</sup> E'pa dör Jacob aleripa ilaköl Bilhá ta, e' mé Labán tö ilà busi Raquel a ikanè mésoie. Ie'pa dökà kul (7).

<sup>26</sup> Jacob ta iyamipa ekka mîne Egipto, e' wakpa dökà dabom teryök ki teröl (66). Ie' ala'r e' alakölpa, kè shtane ishua. <sup>27</sup> José ala'r kune Egipto e'pa dör böl. Ja-

cob yamipa dë'mi Egipto dökà dabom kuryök (70) seraa.

<sup>28</sup> Eta Jacob tö ilà Judá patkëmi kewe José a ibiyöchök: “Be' shkó Gosen ye' ñaletsök.” Eta mik ie'pa demi Gosen, <sup>29</sup> eta José tö ikanè mésopa ké ie' karreta yöktsa tsëmi iyé ñaletsoie. Mik idemi iyé ska' eta iyé paklö'wëwaitö eta ie' ié taië. <sup>30</sup> Eta Jacob tö iché José a:

—jre' ye' blërwami buaë! Ye' be' suéne buaë, be' serkeia e' kueki.

<sup>31</sup> Eta José tö iché iyamipa kos a:

—Ye' mía Egipto blú a a' biyöchök tö 'ye' ëlpa ena ye' yé yamipa kos serke Canaán e'pa debitu e' tsukat ye' ska'.

<sup>32</sup> Ie'pa dör iyiwak alöukwakpa. E' kueki ie'pa baka kos ena ie'pa obeja kos ena i kos tso' ie'pa wa e' debitu ie'pa wa.

<sup>33</sup> Mik Egipto blú tö a' chaké: ‘¿I dör a' kanè?’, <sup>34</sup> e' ta ichó ia: ‘Këkraë sa' kanè dör iyiwak alöuk wes sa' tsá bak es.’ Egiptowak kè kàne senuk obeja alöukwakpa ta ñita, e' kueki Egipto blú kawö mëmi a' a' senuk Gosen.

**47** Eta José mía ibiyó muk Egipto blú a ta ichéitö ia: “Ye' yé ena ye' ëlpa serke Canaán, e'pa debitu ie. I' ta ie'pa tso' Gosen. Ie'pa obeja ena baka ena i kos tso' iwa e' debiturak iwa seraa.” <sup>2</sup> José tö iëlpa shushtë dökà skel ta imítser iwa Egipto blú ska' as ie' tö iwakpa saù. <sup>3</sup> Eta Egipto blú tö José ëlpa a ichaké:

—¿I dör a' kanè?

Eta ie'pa tö iüté:

—A kékëpa, sa' dör obeja alöukwakpa wes sa' tsá bak es. <sup>4</sup> Ketba meneka taië sa' kaska'. Sa' iyiwak a kè chkè ta'ia, e' kueki sa' bitea senuk ká i' ki. Be' we'ikè sa' tö, kawö mú sa' a' senuk Gosen.

<sup>5</sup> Eta Egipto blú tö iché José a:

—Be' yé ena be' ëlpa de senuk be' ta. <sup>6</sup> Ká tso' Egipto e' wé kiane be' ki e' mú ie'pa a senioie. Kos ká tso' Egipto e' bua'ie dör Gosen e' mú ie'pa a senioie. Be' yamipa shua wëpa tso' iyiwak

kkò'nè buaë, e' ta esepa múka ye' iyiwak kkò'nuk.

<sup>7</sup> Nies José wa iyé Jacob mí kkachè Egipto blú a. Jacob tò Egipto blú shkè'wé er bua' wa. <sup>8</sup> Età Egipto blú tò ie' a ichaké:

—¿Kos duas tso' be' kî?

<sup>9</sup> Jacob iiuté:

—Ye' kî duas de cien eyök kî dabom mañayök (130) shkök wî a dià a. Kawö e' kè dör tajë. E' tka ye' kî darërë. Erë kam ye' kî duas dò kos ye' yépa kî duas bak ekkë.

<sup>10</sup> E' ukuökî ta Jacob e' chéat Egipto blú a ta imía. <sup>11</sup> Età José tò ká bua' bua tso' Egipto, e' mé iyé ena iëlpa a senoié wes Egipto blú tò iché es. Ká e' ate Ramsés. <sup>12</sup> Nies ie' tò chkewö meke iyamipa a kos ila'rla tso' u a u a ekkë.

### José tò chkewö watué Egipto wakpa a

<sup>13</sup> Ká ulitane kè iyi wöria, e' kuekî ketba kî tkërke poë. Ketba tò s'tteke tajë Canaán ena Egipto. <sup>14</sup> Chkewö tué Egipto wakpa tò ena Canaánwakpa tò, e' ské kos blé José tò Egipto blú u a. <sup>15</sup> Mik Egipto wakpa ena Canaánwakpa inuköl enewa seraá, età Egipto wakpa mía José ska' ta iché ia:

—¡Be' sa' a chkewö mú! Kè sa' inuköl ta'ia. Kè idör bua' tò e' è kuekî be' tò sa' méttsa duökwa ketba a.

<sup>16</sup> Età ie' tò ie'pa iuté:

—A' kè wa inuköl ta'ia, e' ta a' iyiwak tsúbitu ña, e' skéie ye' tò a' a chkewö meke.

<sup>17</sup> Egipto wakpa wa kabaio ena obeja ena baka ena burro e' kos mí ie' a. E' skéie ie' tò chkewö mé ie'pa a dò duas ek.

<sup>18</sup> Duas e' tka età ie'pa míyalne ie' ska' ta iskà ché ia:

—Be' wa ijcher buaë tò kè sa' wa inuköl ta'ia. Nies sa' iyiwak kos, e' dör be' icha. Sa' ká è tso'ia sa' wa ena sa' wakpa, e' è tso'ia sa' wa mè be' a <sup>19</sup> Sa' wákpa taú. Sa' ká taú nies. E' skéie iyiwö mú sa' a. Sa'

kaneblömi sa' wákpa ká a Egipto blú a. Es sa' ate Egipto blú kanè mésopaie. Età chkewö è memibö sa' a as kè sa' duölur ketba wa ena sa' ká kè weir é ichók.

<sup>20</sup> Egipto wakpa tò iká watuétsa José a ketba kuekî. Es Egipto ká kos de Egipto blú ulá a. <sup>21</sup> Nies Egipto wakpa kos ate blu' kanè mésopaie. <sup>22</sup> Ie'pa sacerdotepa ká e' è kè tone José wa. Egipto blú tò chkewö kakmeke ie'pa a, e' kuekî ie'pa kè wa iká watonetsa.

<sup>23</sup> E' ukuökî ta José tò iché Egipto wakpa a:

—A' wákpa kos ena a' ká kos e' to'ttsa ye' tò se' blú a, e' kuekî i'ñe ta a' kos ate ie' ulá a. Iyiwö i' tsúmi a' tò ta ikuatkó.

<sup>24</sup> Mik iwöne ta iyiwö tso' döká sacco skel, età itsá yóttsa sacco et mè Egipto blú a. Iyiwö eyök ate e' dör a' a kuatkè, nies a' yamipa ulitane a ñanoie.

<sup>25</sup> Età ie'pa tò iiuté:

—Be' tò sa' tsatké ketba ulá a. Be' er bua' sa' ta. E' kuekî sa' e' chöke Egipto blú kanè mésopaie.

<sup>26</sup> Es José tò kawö mé Egipto wakpa a tò iyiwö tso' döká sacco skel e' tsá yóttsa sacco et mè Egipto blú a. I'ñe ta e' wekeia ie'pa tò es. Egipto sacerdotepa è kè kawötá iyiwö tsá muk Egipto blú a, ie'pa ká kè de' Egipto blú ulá a e' kuekî.

### Jacob tò ittè bata ché José a

<sup>27</sup> Es Israel aleripa e' tséat senuk Gosen, ká e' ate Egipto. Ká e' kos de ie'pa ulá a. Ee' ie'pa alöne tajë. <sup>28</sup> Jacob sene'ia ká e' a duas döká dabom eyök kî kul (17). Duas de ie' kî cien eyök kî dabom tkëyök kî kul (147).

<sup>29</sup> Mik ie' tò ittse tò iduökewatke, età José tsuk patkéitö ta ichéitö ia:

—Mokî be' er buaë chak ye' a, e' ta be' ulá múwa ye' tu' dikia iwá kkachoié tò mokî i' kiekeyö be' a e' waweraëbö. Ye' nu kè wötarwa Egipto. <sup>30</sup> Mik ye' blénewa mía ye' deutöpa itöki, età ye' nu yóttsa ká i' kî tsúmi wötëwa ie'pa pö a.

Etā José tö iüté:

—Es yö iweraë.

<sup>31</sup> Iyé tö iché ia:

—Ichó ña mokī Skëköl wörki tö be' iweraë es.

Etā José tö ittè mé mokī iyé a. Etā Jacob wóméwa ikā' kī tā Skëköl kīkékaitö.

### Jacob er buaë ché José ala'r a

**48** E' ukuöki tā ie'pa wā biyö debitu José a: “Be' yé duöke tso' suluë.” Etā José mía isauk ila'r böi mí iwa e' tā. <sup>2</sup> Mik ie'pa tö iché Jacob a tö José debitu be' sauk, etā ie' e' tkéka isulú wa ikā' kī. <sup>3</sup> Etā ie' tö iché José a:

—Skëköl Diché Tā' Íyi Ulitane Tsata' e' e' kkayé' ye' a ká kiè Luz ate Canaán ee. Ee ie' er buaë yé' ye' a <sup>4</sup> tā ichéitö ña: “Ye' tö be' aleripa alöweraë taië. Ie'pa döraë ká taië e' wakpaie. Ká i' meraëyö ie'pa a, e' atdaë ie'pa ulā a kekraë michoë.” <sup>5</sup> Be' ala'r böi, Efraín ena Manasés, e'pa kune kam ye' dö Egipto e' yöki. Ie'pa tsétköyö wes ye' wák ala'r es wes ye' ala'r Rubén ena Simeón dö'r ye' ala'r es. <sup>6</sup> E' kuëki ká meraëyö ie'pa a wes ye' wák ala'r a es. Ie'pa itöki be' ala'r skà kurmi, e'pa dö'r be' wák a. Erë ie'pa dö'r Efraín ena Manasés ëlpa, e' kuëki ká ñe' kak döraë ie'pa ulā a ñies. <sup>7</sup> Mik ye' manét Padán-aram e' demi Canaán dökettsatke Efrata, etā ee ñalā kī be' mi blënewā ye' yöki. Ee ye' tö ie' nu blëwaa't Efrata ñalé kī. (I'ñe tā ká e' kiè Belén.)

<sup>8</sup> Mik Jacob tö José ala'r sué etā ichakéitö:

—¿Sepa dö'r yi?

<sup>9</sup> Ie' tö iüté:

—I'pa dö'r ye' ala'r mé Skëköl tö ye' a ká i' kī.

Etā iyé tö iché ia:

—Ie'pa tsúbitu ye' ska' as ye' er bua' chö ie'pa a.

<sup>10</sup> Jacob kënewatke e' kuëki iwöbla kè wawëriā buaë. E' kuëki José tö ila'r patkëmi tsinet iyé o'mik. Etā Jacob tö

italapa paklö'wé wöalattsé. <sup>11</sup> E' ukuöki ichéitö José a:

—Ye' ibikeits tö ye' kè tö be' suepaia, erë Skëköl tö kawö mé ye' a be' ena be' ala'r suöie.

<sup>12</sup> Etā José tö ila'r skéttsā iyé o'mik tā iwöëwa dö iski iyé dalöioie. <sup>13</sup> E' ukuöki tā ila'r böi klö'wëwaitö iulā a. Efraín mí José ulā bua'kka, Manasés mí José ulā bakli'kka. Es itsémiitö iyé ska'. Etā Efraín ate Jacob ulā bakli'kka, Manasés ate Jacob ulā bua'kka. <sup>14</sup> Erë Jacob ulā bua'kka méka Efraín dur ie' ulā bakli'kka e' wökir kī. Eré e' dö'r alā tsirla. Etā iulā bakli'kka mékaitö Manasés dur ie' ulā bua'kka e' wökir kī. Eré e' dö'r alā kibi. Es Jacob ulā tsétkö wi'kè io'kè. <sup>15-16</sup> Etā ier bua' ché José a i' es:

“As Skëköl er buaë chö ala'r böi i' a kekraë.

Ye' yépa bak Abraham ena Isaac, e'pa bak Skëköl e' dalöiök,

e' tö ye' kkö'nami kuaë dö ikkë tā.

Ie' tö ye' tsatké kekraë íyi sulusi ulā a.

As ala'r i' wa kè ye' chöwa sulitane éna kekraë.

Ñies ye' yépa bak Abraham ena Isaac as e'pa kè chöwa sulitane éna kekraë.

As ala'r i' alör taië ká ulitane kī.”

<sup>17</sup> Jacob ulā bua'kka méka Efraín wökir kī, e' kè mène José a buaë. E' kuëki ie' tö iyé ulā bua'kka e' klö'wëwā méka ilā kibi dö'r Manasés e' wökir kī. <sup>18</sup> E' dalewa ichéitö ia:

—Ia yéwö, kè idör es! I' dö'r alā kibi. Be' ulā bua'kka múka i' wökir kī.

<sup>19</sup> Erë iyé kè wā igne es. Ie' tö iché ia:

—Ia alā, e' jcher ye' wā, e' jcher ye' wā! Ie' alördaë taië, ie' döraë këképa taië. Erë itsirla ék e' döraë këképa taië shuté ikibi tsata. Ñies ie' aleripa döraë ká taië e' wakpaie.

<sup>20</sup> Es e' è diwö wa Jacob er buaë skà ché italapa a i' es:

—Mik Israel aleripa er buaë cheke ñi a etā ie'pa tö icheraë ñi a i' es: ‘As Skëköl

er buaë chò be' a wës Efraín ena Manasés e'pa a er buaë yëne es.'

Es Jacob er buaë ché Efraín a, Manasés a imène, e' tsata. <sup>21</sup> E' ukuökì tã José a ichéitò:

—Ye' duökewatke erë Skëköl tó a' kkò'neraë. Ie' wã se' aleripa mirane Canaán wë se' yépa bak senuk ee. <sup>22</sup> Ye' tó kã bua'ie méat be' a ime'bakyö be' ëlpa a e' tsata. Kã e' kiè Siquem. E' yé'ttsa ye' tó amorreowak ulã a ñippè wa.

### Jacob tó ittè bata ché ila'r qos a

**49** Jacob tó ila'r kié e' ska' tã ichéitò ie'pa a: “A' e' skówa ye' o'mik. Ì tköraë a' tã e' wà chekeyö a' a:

<sup>2</sup> “A ala'rla, a' e' skówa tsinet ye' tto' tssök, ye' dör a' yé. Ye' tto' tssó.

<sup>3</sup> “A Rubén, be' dör ye' alã kibi.

Be' dör ye' diché tsá e' alé.

Be' dalöiërta' taië, be' diché ta' taië be' ëlpa tsata.

<sup>4</sup> Erë i'ñe tã kè idör es.

Be' dör wës di' yöliie es kè iwöklör yës.

Be' tó ye' dalöseq'wa. Be' sene'ka ye' alaköl tã.

E' kueki be' kè dalöierpaia wës ko'k es.

<sup>5</sup> “Simeón ena Leví, e'pa dör ñi ëlpa;

ie'pa tabè tso' ñippoie è.

<sup>6</sup> ¡Wé ie'pa e' dapa'uke ee ye' kè shkak!

Ie'pa tó wépa kötulur kësik è kueki.

Baka wë'ne klökicha blublu e' télorakitö éanas.

<sup>7</sup> Ie'pa kësik dör suluë ichökle

e' kueki ie'pa kawö tköraë suluë.

¡Ye' tó ie'pa aleripa powerami senuk iëlpa malepa aleripa shua wì a diã a!

<sup>8</sup> “A Judá, be' ëlpa tó be' kikerakã taië.

Be' bolökpa klöwewaraë be' tó ikuli' a,

es be' e' alörakã ie'pa ki.

Be' ëlpa ekka e' wöörawa iski be' dalöioie.

<sup>9</sup> ¡A Judá, be' dör ye' alã!

Be' dör wës ma'name alã es.

Mik ì ttéitò tã ikaté one,

etã ie' e' wöéwa e' téwa iski wës ma'name këchke es.

¿Yi dömi ie' tsiriuk?

<sup>10</sup> Judá aleripa döraë blu'paie taië kekraë dö mik ibl' chök de etã.

Blu' e' tto' iuteraë sulitane tó.

<sup>11</sup> Ie' tó iburro pupula mueke uva shua.

Ñies idatsi' skuöke uva diö wa.

<sup>12</sup> Ie' wöbla dör daloloë uva diö tsata.

Ie' kã dör saruruë baka tsu'diö tsata.

<sup>13</sup> “Zabulón serdaë dayë kkömik.

Eë taië kanò irirke ese ké tso'.

E' kã kkò dörawã Sidón kkömik.

<sup>14</sup> “Isacar dör wës iyiwak tso' dalì oie diché ta' taië ese e' mùtër enuk iwé a es.

<sup>15</sup> Mik ie' isuë tó kã e' dör buaë senoie ñies enoie,

etã ie' tsiwö ki dalì dekanë kaneblök.

Ie' e' mëttsã kaneblök kanè mésoie, kè tkine e' ki.

<sup>16</sup> “Dan ditséwö shua s'shulirdaë buaë yësyësë wës Israel aleripa e' ditséwö malepa es.

<sup>17</sup> Dan döraë wës tkabè chök tso' ñalã kkò a tó kabaio kuè iklö a tã iwák brutane itsiwökka ese es.

<sup>18</sup> “¡A Jehová, ye' tso' be' panuk tó ye' tsatkó!

<sup>19</sup> “Gad ppök ñippökwakpa döraë taië.

Erë ie' tó ie'pa pperaë, itötieraë.

<sup>20</sup> “Aser kã ki chkè kata' buaë tskirdaë.

Ì wörke qos e' dör buaë shutë mène buaë blu'pa a.

<sup>21</sup> “Neftalí dör wës suli alaki dur áie ala'rla tã' bua'buuala ese es.

<sup>22</sup> “José dör wës burro kañiru suë dur di' tum kkömik es,

wës burro pupula kañiru suë dur kã tukir ki es.<sup>‡</sup>

<sup>‡</sup>49:22 José dör wës burro...kã tukir ki es: Ñies hebreoie ttè e' mane'wëmisö i' es: José dör wës kal tskirke di' kkömik es; tkakã iké kkötëule e' mik buaë, ñies iwördaë taië.

<sup>23</sup> Kuaböt namépa éna sulu iar,  
ie' k<sub>i</sub> kuaböt uyéraitō kēsik wa.

<sup>24</sup> Erē ie' ulà diché darërē;  
e' wa ie' wā ishkame' shuirikar darërēē,  
kè ulà shtrirta'wā yēs.

Skèköl tō ie' a diché e' mé.

Skèköl e' dör Jacob Kèköl e' diché ta' taië.  
Skèköl e' dör Israel aleripa kkō'nukwak.  
Ie' tō Israel aleripa tsatkeke.

<sup>25</sup> A José, be' yé e' Kèköl tō be' kimeke  
kekraë.

E' dör Skèköl Diché Ta' Ýyi Ulitane Tsata,  
Ie' er buaë chöraë be' a.

Kāl<sub>i</sub> buaë patkeraë ie' tō be' daliwō k<sub>i</sub>.  
Ñies be' a di' atdaë buaë íyök k<sub>i</sub> as be'  
dalikua talar buaë.

Be' aleripa alakōlpa ala'r dōraë taië, ñies  
be' iyiwak dōraë taië.

Es Skèköl er buaë chōraë be' a.

<sup>26</sup> Be' yé er buaë yé' be' a,  
e' tkōk<sub>a</sub> ye' yé er buaë yé' ye' a e' tsata.  
Skèköl tō José shukit iēlpa shua  
iwōkirie,

e' a ie' er buaë chō michoë wēs kabata  
yōbië kè ert<sub>a</sub>'wa es.

<sup>27</sup> “Benjamín dör wēs chichi kañiru  
kēsikie ese es;

bla'mi ta' iyiwak ttéwaitō katè,  
tsāl<sub>i</sub> ta' ibata watiéwaitō.”

<sup>28</sup> E'pa dör Israel ditséwōpa daia itōki  
dōk<sub>a</sub> dabom eyök k<sub>i</sub> böt (12), e' yépa tsá.  
Es ie'pa yé tō ie'pa a iché mik ie' tō itte  
bata ché ie'pa a etā.

### Jacob blēnewa

<sup>29</sup> Jacob tō iché ila'r wēpa a: “Ye'  
blèrkewā e' kēwō dōkewatke. Mik ye'  
blēnewa, etā ye' nu blōwā ákuk a ká wé  
ye' yamipa nu blēne ee. Pō e' atē wēm  
kiè Efrón dör hititawak e' ká a. <sup>30</sup> Ká e'  
atē Macpelá Mamré wōshgä. Ká e' atē  
Canaán. Ká e' ena ákuk e' wato'ttsa Efrón  
tō Abraham a as Abraham tō iyamipa nu  
blō ee. <sup>31</sup> Eē Abraham ena ilaköl Sara,  
ñies Isaac ena ilaköl Rebeca, e'pa nu

blēne. Eē ye' tō ye' alaköl Lía, e' nu blē'wā  
ñies. <sup>32</sup> Ká e' ena ákuk e' wato' hititawak  
tō.”

<sup>33</sup> Mik Jacob tō ttè e' kōs ché one etā  
ie' e' téwāne ikā' k<sub>i</sub> ta' iblēnewā mīa  
idēütōpa itōki.

**50** Etā José tō iyé nu paklō'wéwā  
wōalattséitō ta' iīë taië. <sup>2</sup> E'  
ukuōki ta' ie' tō egiptowak dör  
s'nu kanéukwakpa e'pa kié iyé nu  
kapeyōkwā as kè inurwā. Etā es  
ikanewérakitō. <sup>3</sup> Ikanewérakitō dōk<sub>a</sub> ká  
dabom tkéyök (40 días), ekkè kawō  
kiane ikanewoie e' kuēki.

Egiptowak tō ischó eriaitsé kawō dōk<sub>a</sub>  
dabom kuryök (70 días). <sup>4</sup> E' ukuōki  
ta' José tté Egipto blú kuēblupa ta, ta  
ichéitō ie'pa a:

—A' éna er bua' chak ye' a, e' ta' a' yú  
ichök Egipto blú a <sup>5</sup> tō mik ye' yé duōke-  
watke, etā ie' tō ye' ka' ie' a ttè muk  
Skèköl wōrk<sub>i</sub> tō inú blerawayō ákuk ka-  
ne'at ie' wák tō atē Canaán e' a. E' kuēki  
kawō mú ña ie' nu tsomi blēwā ee. Mik  
ye' iblēwā ta' ye' dotkene.

<sup>6</sup> Etā Egipto blú tō iūtē:

—Be' yú be' yé nu blōkwā wēs ie' tō be'  
a iki' es.

<sup>7</sup> Etā José mīa iyé nu blōkwā. Egiptowak  
kuēblupa kōs e'pa mīyal ie' ta.

<sup>8</sup> Jacob yamipa ekka ena José yamipa  
ekka ena iēlpa e'pa kōs mí ñies. Ie'pa  
ala'r ena ie'pa iyiwak e'pa è atēat Gosen.

<sup>9</sup> Ñies pē' mí taië karreta k<sub>i</sub> ena kabaio  
k<sub>i</sub>. Es pē' mí taië José ta. <sup>10</sup> Mik ie'pa  
demi ká kiè Goren-ha-atad atē tsinet di'  
Jordán diwō tskirke e' kker ee, etā ee  
ie'pa ulitane tō Jacob nu wōtèrkewā e'  
kēwō tkō'wé dalò taië wa. Eē José tō iyé  
eriaitsé dōk<sub>a</sub> ká kul.

<sup>11</sup> Mik canaánwak serke ee, e'pa tō Ja-  
cob nu wōtèrkewā kēwō tkō'wé e' sué,  
etā ie'pa tō iché: “Mok<sub>i</sub> egiptowak tō s'nu  
wōtèrkewā e' kēwō tkō'wéke dalò taië  
wa.” E' kuēki ká e' kiè mék<sub>a</sub> ie'pa tō Abel-

Misraim.<sup>¶</sup> Ká e' atē tsinet di' kiè Jordán e' kkömik.

<sup>12</sup> Es Jacob ala'r tö iyé nu kanewé wes ie' tö iyé' ie'pa a es. <sup>13</sup> Ie'pa wa inú mítser Canaán ibléwarakitò ákuk yöule Abraham wa iyamipa pöie e' a. E' atē Macpelá. E' watō'tsa hititawak kiè Efrón tö Abraham a. Ká e' atē Mamré wöshaë. <sup>14</sup> Mik José dëütö nu blëne one, etā ie' biteane Egipto. Ie' ëlpa ena pë' ulitane mîne ie' tã e'pa kos biteyalne ie' tã.

### José ëlpa suanékane ie' yöki

<sup>15</sup> Jacob blënewa e' ukuöki tã José ëlpa tö ibikeitsé: “Isalema José éna sulu se' arke. Ì kos wamblé' se' tö ie' ki e' skéie se' we'ikeraëitö.” <sup>16</sup> E' kuëki ie'pa ttè mémi ie' a: “Kam be' yé blërwa, <sup>17</sup> etā ie' tö sa' a iché tö ichó be' a: ‘Ì kos suluë wamblé' sa' tö be' ki, e' olo'yó sa' ki.’ E' kuëki sa' kköchò be' a tö e' olo'yó sa' ki. Sa' tö be' yé e' Këköl dalöieke e' kuëki.”

Mik biyò e' demi José a, etā ie' ié siarë. <sup>18</sup> Etā iëlpa demi iwöki. Ie'pa wöéwa dò iski idalöioie tã ichérakitö:

—I' sa' de be' wörki. Sa' dör be' kanè mésopa.

<sup>19</sup> Etā ie' tö ie'pa iüté:

—Kè a' suanuk. Ye' kè a' shulinuk Skëköl skéie. <sup>20</sup> A' íyi sulu bikeits wamblè ye' ki, erë e' mane'wëttsane Skëköl tö buaë se' ki. E' wa taië pë' tsatkëne i'ne tã. <sup>21</sup> E' kuëki kè a' suanuk. Chkewö meraëyö a' a ena a' ala'r kos a.

Es ie' tö ie'pa a iché er buaë wa. E' tö ie'pa ttsë'wëne buaë.

### José blënewa

<sup>22</sup> José ena iyé alikpö yamipa e'pa sene'ia Egipto. Ie' sene' döka duas cien eyök ki dabom eyök (110). <sup>23</sup> Ie' tö ilà Efraín talapa e' ala'r suëia. Nies ie' tö ilà Manasés e' alà kiè Maquir e' ala'r suëia.

<sup>24</sup> Ká et tã ie' tö iché iëlpa a: “Ye' duökewa e' këwö kianeia tsir. Erë Skëköl wák tö a' kimeräë. Ie' tö a' yelurdaë ká i' ki. Ká yë'bakitö mè Abraham a ena Isaac a ena Jacob a e' a' tsemiraëitö.” <sup>25</sup> Etā ie' tö iëlpa kié as ie'pa ttè mù ie' a Skëköl wörki. Ie' tö ie'pa a iché: “Skëköl tö a' yerattsá ká i' ki. Mik e' tka, etā ye' sik tso' blëule e' tsúmi e' tã.”

<sup>26</sup> Mik ie' blënewa Egipto, etā ie' ki duas de cien eyök ki dabom eyök (110). Ie' nu kapeyanewa as kè inurwa e' iënewa s'nu kélkuò a.

<sup>¶</sup>50:11 *Abel-mizraim*: Hebreoie ká kiè e' wà kiane chë egiptowak schó eriatsè.

## Jonás dör Jehová ttéköl e' pakè

### Jonás

Yëkkuò i' tò se' a ipakè tò ì bak Israel aleri eköl kiè Jonás e' ta. Ie' kaneblè' Skëköl ttekölie duas cien paryök ena duas cien kuryök kî dabom skeyök (800-750 AC) e' shü ulatök kam Jesucristo kur e' yöki.

Skëköl kè wä ie' patkëne Israel aleripa malepa pattök wes Skëköl ttekölpa malepa patkéitö es. E' skéie ie' tò ie' patkè' ká kiè Nínive, e' wakpa pattök. Nínive dör ká kiè Asiria e' ká kibi. Asiria wakpa dör Israel aleripa bolökpa kibi. Ie'pa serke suluè taiè shütë Skëköl wöa. E' kuëki ie' tò Jonás patké ichök ie'pa a tò ká de dabom tkëyök etä ie'pa erdawa. Jonás wä ijcher tò Skëköl tò s'suè er siarè wa. Ie' ibikeitsé: “Nínive wakpa er mane'wé, e' ta ie'pa nuì olo'yeraè Skëköl tò ie'pa kî.” Erè ie' kî ikiane tò Skëköl tò ie'pa ewëwa, e' kuëki ie' kè shkakmi ie'pa pattök. E' skéie ie' tò ima'wé tkökshkar bänet Skëköl yöki. Erè Skëköl tò ie' wöklö'wé ta ipatkémi Nínive wakpa pattök wake'. Ie'pa er mane'wé, e' kuëki Skëköl kè wä ie'pa ewëwa.

Yëkkuò i' wa se' éna iane tò Skëköl tò ká ulitane wakpa suè er siarè wa. Ì sulu wamblekesö ese nuì olo'yak ie' éna se' kî. Ie' kî ikiane tò se' er mane'ù ie' a as kè ie' tò se' we'ikò.

### Jonás kè éna Jehová ttò iütak

**1** Etökicha ta Jehová tò iché itteköl kiè Jonás dör Amitai alà, e' a: <sup>2</sup>“Be' yú ká kibi kiè Nínive eë, ta ichó ká e' wakpa a wes a' e' wambloè e' dör suluè ye' wöa, e' kuëki ye' tò a' ewërawa.”

<sup>3</sup>Erè ie' kè éna Jehová ttò iütak. E' kuëki ie' tkashkar iyöki. Ie' mía dayè kkömik ká kiè Jope wé kanò irirke eë. Eë ie' tò kanò kué etò mitke ká kiè Tar-

sis e' patuëitö shkomi ta ie' e' iéka iki ta imía.

<sup>4</sup>Erè Jehová tò sèrkè patké ie'pa kî taiè darèrèè. E' tò kanò uyé taiè dò wësua itskirwami. <sup>5</sup>Etä kos ie'pa tso' kanò a, e'pa suane taiè. Ie'pa eköl eköl tò ikieke aneule iwák kéköl a: “¡Sa' tsatkó, sa' tsatkó!” Etä dali kos tulëttsami dayè kî as kè kanò katsirwa.

Erè Jonás e' a'wa kanò shüa dali bló wé a, eë ie' kapötër taiè. <sup>6</sup>Etä kanò ñakök-wak mía dò wé ie' kapötër eë ta iché ia:

—¿Iók be' kapötër? ¡Be' e' kóka! Be' kéköl a ikió as ie' tò se' tsatkò. Isalema ie' se' suèmi er siarè wa ta se' tsatkèmiitö.

<sup>7</sup>E' dalewa kanò wakpa malepa tò iché ñi a:

—Mishka itötkök isuöie yi iane iwiie e' kuëki se' weirke i' es.

Etä iwëne tò Jonás idir. <sup>8</sup>E' kuëki ie'pa iché ie' a:

—Ichó sa' a, ¿ì kuëki ì sulu i' tköke se' ta? ¿Iók be' e' iébitü kanò i' a? ¿Wé be' datse? ¿Yi ditsëwö be' dör?

<sup>9</sup>Ie' iüté:

—Ye' dör hebreowak. Jehová dör Skëköl tso' ká jai a e' dalöiök-wak ye' dör. Ie' tò dayè ena ká i' yö'at.

<sup>10-11</sup>Ie' tò ie'pa a ipakè tò ie' tso' tkökshkar Jehová yöki. Mik e' ttsé ie'pa tò ñies isuérakitö tò dayè kî ulune taiè, etä ie'pa suane taiè shütë. Ie'pa tò ie' a ichaké:

—¿Ì wëmi sa' tò be' ta as sèrkè wöklörwa?

<sup>12</sup>Ie' tò iüté:

—Ye' wä ijcher buaè tò ye' kuëki sèrkè i' bitsineka taiè a' kî. E' kuëki ye' uyómi dayè a etä sèrkè wöklördawa.

<sup>13</sup>Erè kanò wákpa tò kanò iklémi darèrèè as irirka. Erè kè ie'pa diché dë'ka, dayè kî ulune taiè e' kuëki. <sup>14</sup>Etä ie'pa tò Jehová a ikié i' es: “A Jehová, kè sa' maktsa duökwa wëm i' kuëki. I' uk be' tso' sa' ta, e' wekebö wes be' kî ikiane es. E' kuëki wëm i' kè kî ì nuì ta', e' ta sa'



tò ie' uyekemi dayè a e' nuí kè markà sa' kî."

<sup>15</sup>E' ukuòkî ta ie'pa tò Jonás uyémi dayè a, età sèrkè wöklönewà ta dayè míane almiè. <sup>16</sup>Mik kanò wákpa tò e' sué, età ie'pa suane taiè Jehová yökî ta idalöierakitò taiè. E' ukuòkî ta ie'pa tò iyiwak jché ña'wé mè Skèköl a idalöioie, ñies ie'pa tò ttè mé ie' a tò sa' tò be' dalöieraè.

<sup>17</sup>Età Jehová tò nima bërie shùte patké etò Jonás mulukwà. Età nima e' tò imulèwà ta eè nima shuà ie' sené dòka ká mañat ñiè nañeè.

### Jonás tté Jehová ta

**2** Età Jonás tté Jehová dör ie' Kèköl e' ta nima shuà, <sup>2</sup>ta ichéitò ia' i' es: "A Jehová, ye' eriarke siarè, e' shuà ye' tò be' a ikié tò ye' tsatkó, età be' tò ye' iuté.

Ye' tso'tke ká dià kaska' s'duulewà ké a, eè ye' be' a ikié tò ye' kimú, età ye' ttò ttsébö.

<sup>3</sup>Be' ye' uyémi dayè a iskiè dayè dikia, ye' kitéulewà dayè wà.

Dayè urke taiè e' patkébö, e' tka ye' kikke.

<sup>4</sup>Ye' ittse' tò ye' kè ku'ia' be' wörki.

Ye' ibikeitsé tò ye' kè dè'iane be' wé buaè e' a.

<sup>5</sup>Dayè taiè, e' shuà ye' anemi.

Ye' kikke, ye' pamik, ye' dikia, e' dör dayè ème.

Dayè a itökönu tso', e' malijséka ye' wökir mik taiè dayè shuà.

<sup>6</sup>Ye' anemi dayè a dò iskiè,

dò wé kabata bitukeka eè.

Ye' ittse' tò ye' wötènewà da'a ká dià kaska'.

Erè, a Jehová, be' dör ye' Kèköl,

be' dör ye' yéttane s'duòwà ulà a dekanè ttsé'ka.

<sup>7</sup>A Jehová, mik ye' ittse' tò ye' duökewatke,

età ye' be' a ikié tò ye' tsatkó,

età i' kiéyö, e' ttsébö be' wé buaè e' a.

<sup>8</sup>Wépa tò íyi diököl dalöieke be' skéie, e'pa kè tò be' dalöieku'ia.

<sup>9</sup>Erè ye' tò wéstela cheraè be' a kekraè, iyiwak jcheraè ña'weraèyö be' a be' dalöioie.

Ye' ttè mé be' a, e' waweraèyö.

¡A Jehová, be' è a sa' tsatkèrmi!"

<sup>10</sup>E' ukuòkî ta Jehová tò nima patké Jonás tuöktsà ká sí kî, ta ituéttasaitò.

### Jonás tò Jehová ttò iuté

**3** Età Jehová tò iskà chéne Jonás a: <sup>2</sup>"Be' yú ká kibi kiè Nínive eè ta i' chekeyö be' a, e' chó ká e' wakpa a."

<sup>3</sup>Età ie' tò Jehová ttò iuté. Ie' mía Nínive. E' dör ká bërie. Shkotkö ká e' shuà, e' dör ká mañat wa'ne. <sup>4</sup>Jonás shké ká e' shuà ká et wa'ne ta ie' tò icherami ká e' wakpa a aneule: "Ká i' kî ká de dabom tkéyök (40), età a' erdawa." <sup>5</sup>Età Nínive wakpa kos erblé Skèköl mik. E' kuèkî ie'pa kos, èsepala ena dalöièrta', e'pa kos tò iché: "S'kawötà batsök, ñies s'kawötà datsi' ajaè ese iök iwà kkachöie tò se' er mane'wé." Età es ie'pa tò iwé.

<sup>6</sup>Mik ttè e' ttsé Nínive blú tò, età ie' e' kéka' ikulé kî, ta idatsi' bua'buàè iètkèr iwà, e' yéttas skéie datsi' ajaè iékaitò ta ie' e' tkéser iski' muluchka kî. <sup>7-9</sup>Età ie' tò ttè patké ká e' ulitane wakpa a. Ttè e' tò iché i' es: "A' ulitane kè kàne chkök di'yök yès. Ñies kè a' kàne a' baka ena a' obeja tiök. A' ulitane kawötà datsi' ajaè iökka. A' kköchó Skèköl a a' diché kos wa as a' e' wamblò suluè ese kos nuí olo'yòitò a' kî. Ñies a' e' wamblò suluè, ese kos olo'yó. Isalema ie' er mane'umine, età ie' er buarmine se' kî, età ie' kè tò se' ewepawa. Ttè i' dör ye' dör a' blú e' ttè ena a' wökirpa ttè, e' kuèkî a' ulitane kawötà idalöiök."

<sup>10</sup>Età ie'pa tò ttè e' iuté buaè. Ie'pa e' wamblò suluè ese kos olo'yèrakitò. Mik e' sué Skèköl tò, età ie' ibikeitséne kè yö ie'pa we'ikepa wès ye' ibikeits es.

### Jonás ulunekā Skëköl kī

**4** Erë e' kè dör bua' Jonás a tã ie' ulunekā tajë. <sup>2</sup>Ie' iché Jehovahá a:

—A Jehovahá, be' isué. Mik ye' tkëriã ye' kaska', etã ye' iyë' tã be' er buaë chöraë Nínive wakpa a. Ye' wã ijcher tã be' dör es, e' kueki ye' bakshkar Tarsis. Ye' wã ijcher tã be' kè ulurta'ka bet. Be' er tottoë. Be' sa' suë er siarë wa. Mik sa' tã ì sulu wamblé tã sa' er mane'wé, e' tã bet e' nuí olo'yé be' tã sa' kī, kè sa' we'ikè wës be' sa' pauñé es. <sup>3</sup>A Jehovahá, e' kueki ye' be' a ichè ye' ttówa, e' dör bua'ie ye' a.

<sup>4</sup>Erë Jehovahá tã ie' a ichaké:

—¿Ima be' ibikeitsè tã be' wã kawö tã ulunukã sè es?

<sup>5</sup>Etã Jonás e' yéttsã Nínive mía diwö tskirke e' kke tã eë úla yuékaitö e' blóie dība yöki. Eë ie' e' tkésër ì tkömi Nínive wakpa tã e' wã panuk. <sup>6</sup>Etã Skëköl Jehovahá tã kalkua tskéka elka tala'wékaitö Jonás tsakã as ikí ttsë'r buaë. E' tã ie' ttsë'wé buaë. <sup>7</sup>Erë bule es bla'mi kã ñine

etã Skëköl tã í patké kalkua katökwa tã isinewã duowã. <sup>8</sup>Mik diwö deka, etã ie' tã siwã' darërëë ba'baë e' patké diwö tskirke e' kke Jonás kī. Dība ane darërëë Jonás wökir kī, tã ie' tã ittse tã ie' siwã'arkewã. Ibikeitséitö “¿Ye' mú duôwa!” Ie' iché, “Ye' duowã, e' dör bua'ie ye' a.”

<sup>9</sup>Erë Skëköl tã iché ie' a:

—¿Ima be' ibikeitsè tã be' wã kawö tã ulunukã kalkua sinewã e' kueki?

Ie' iijuté:

—Tó, ye' wã kawö tã. ¿Ye' ulune tajë mik ye' duowã etã e' olone!

<sup>10</sup>Etã Jehovahá tã iché ie' a:

—Kal kuá kè tkëne be' wã, kè talane kè kaneone be' wã. E' tskine talane kã et nañewe è, bule es nañewe tã iduowã, e' dalëne be' éna. <sup>11</sup>Etã ¿wës ye' kè éna Nínive wakpa dalënu? Ie'pa dör tajë, ie'pa ala'rla tso' tajë döka 120.000 kè wã ijcher ì dör buaë, ì dör suluë. Ñies ie'pa iyiwak tso' tajë.

## Jesús Tté Buaë Kit Mateo tö

### Mateo

Wëm bak eköl kiè Mateo e' tö yëkkuö i' kit. Nies ie' kiè Leví. Ie' dör Israel aleripa eköl. Jesús tö ie' ki' ittökataie (Mateo 9.9 saú), erë e' yöki ie' bak kaneblök inuköl patueke Roma wökirpa a ese shtök. Erë mik Jesús tö ie' ki' ittökataie, etä ie' mineaie Jesús ta.

Ì o' Jesús tö su' Mateo tö iwák wöbla wa, ese tso' kitule yëkkuö i' ki. Nies ì su' ie' tö ena ì ttsë'itö Jesús tö s'wöbla'weke e' a, ese kit ie' tö.

Ká iaiaë Skëköl tö iyë' tö wëm döraë eköl Israel aleripa tsatkök e' paneke ie'pa tö. S'tsátkökwak e' kiè Mesías hebreoie ena griegoie ikiè Cristo. Se'ie kiè e' mane'wésö wé pairine'bitü idi' wa s'blúie e'. Mateo tö yëkkuö i' kit bua'ie Israel aleripa a ikkachoie tö s'tsátkökwak ñe' dör Jesús.

### Jesucristo yépa bak

(Lucas 3.23-38)

**1** Jesucristo dör se' blú bak kiè David e' aleri, David dör Abraham aleri. Jesucristo yépa bak kos e'pa wépa kiè dör i' es:

<sup>2</sup> Abraham alà dör Isaac, e' alà dör Jacob, e' ala'r dör Judá ena iëlpa. <sup>3</sup> Judá ala'r dör Fares ena Zérah, e'pa mì dör Tamar. Fares alà dör Hesrón, e' alà dör Aram. <sup>4</sup> E' alà dör Aminadab, e' alà dör Nahasón, e' alà dör Salmón. <sup>5</sup> E' alà dör Booz, e' mì dör Rahab. Booz alà dör Obed, e' mì dör Rut. Obed alà dör Jesé, <sup>6</sup> E' alà dör se' blú bak David e'.

Se' blú bak David, e' alà dör Salomón, e' mì bak Urías ta kewe. <sup>7</sup> Salomón alà dör Roboam, e' alà dör Abías, e' alà dör Asá. <sup>8</sup> E' alà dör Josafat, e' alà dör Jo-

ram, e' alà dör Ozías. <sup>9</sup> E' alà dör Jotam, e' alà dör Acáz, e' alà dör Ezequías. <sup>10</sup> E' alà dör Manasés, e' alà dör Amón, e' alà dör Josías. <sup>11</sup> E' ala'r dör Jeconías ena iëlpa. E' kèwö ska' ta Israel aleripa klö'wélur Babilonia wakpa tö ta itsëmi-rakitö Babilonia.

<sup>12</sup> E' alà dör Jeconías aneyalne Babilonia, e' ukuöki ta Jeconías alà kiè Salatiel e' kune. Ie' alà dör Zorobabel, <sup>13</sup> E' alà dör Abihud, e' alà dör Eliaquim, E' alà dör Azor. <sup>14</sup> E' alà dör Sadoc, e' alà dör Aquim, e' alà dör Eliud. <sup>15</sup> E' alà dör Eleazar, e' alà dör Matán, e' alà dör Jacob. <sup>16</sup> E' alà dör José, e' dör María wëm. María dör Jesús mì. Jesús dör wé pairine'bitü idi' wa s'blúie e'.<sup>8</sup>

<sup>17</sup> Es Abraham kèwö ska' dökä David kune', etä Jesús ditséwö alöne dökä dabom eyök kí tkëtökicha (14). Nies David kèwö ska' dökä Israel aleripa minetser Babilonia, etä Jesús ditséwö alöne dökä dabom eyök kí tkëtökicha (14). Nies Israel aleripa minetser dökä wé pairine'bitü idi' wa s'blúie e' de, etä Jesús ditséwö alöne dökä dabom eyök kí tkëtökicha (14).

### Jesucristo kurke e' biyó yëne

(Lucas 2.1-7)

<sup>18</sup> I' dör Jesucristo kune' e' pakè: Ie' mì kiè María. E' bakia busi kam ser wëm ta, erë ittë me'bak senukwä wëm kiè José e' ta. Kam ie'pa serwä ñita, kam ie'pa ñi kòwä, etä María buklunekä Wiköl Batse'r diché wa. <sup>19</sup> José dör wëm buaë yësyësë, e' kueki ie' kè éna María jaëwäkkä sultane wörki. E' kueki ie' tö ibikeitsé: "Súyö imëat bèrë." <sup>20</sup> Ie' tso'ia ibikeitsök ta ikapowä ta ikabsué tö Skëköl biyöchökwak de eköl e' tö ie' a iché: "A José, David aleri, María buklunekä e' dör Wiköl Batse'r diché wa. E' kueki kè be' suanuk senukwä ie' ta. <sup>21</sup> Ie' alà kurdaë

<sup>8</sup>1:16 wé pairine'bitü idi' wa s'blúie: E' dör Mesías si'kuaie.

eköl wák wëm. Ikiè múkəbö Jesús\*\* Ie' tò iwakpa tsatkeräè sene sulu nuí yökí, e' kuəkí ikiè múkə es." Es Skéköl biyöchök-wak tté José tə.

<sup>22</sup> E' kəs tka es əs ì y'ə'atbak Skéköl tò itteköl wa e' wà tkò, e' tò ichè:

<sup>23</sup> "Busi eköl kè wə wëm kaule e' buklurdakə, e' alà kərdaè wák wëm, ikirdaè Emanuel."<sup>††</sup> (s'kiè e' wà kiane chè: "Skéköl tso' se' tə").

<sup>24</sup> Mik José t'nekəne, etə ie' tò iwé wəs Skéköl biyöchök-wak tò ie' ə iché es. Ie' ulabatsəwə Maríə tə. <sup>25</sup> Eré alà kəm kur, e' yökí ie'pa kè ñi kànewə. Mik alà kune, etə José tò ikiè mékə Jesús.

### Wəpa yöule íyi tótkök békwo wa esepa de Jesús sauk

**2** Jesús kune' ká kiè Belén atə Judea eə. E' kəwö ska' tə wëm eköl kiè Herodes e' dör ká e' blú. Etə wəpa wəlepa datse ká kamiè atə diwö tskirke e' kke, e'pa de Jerusalén. Ie'pa dör íyi tótkök békwo wa esepa. <sup>2</sup> Ie'pa tò ichaké:

—¿Wé alala kune judiowak blúie e'? Sa' tò ibékwo su' sa' kaska', e' kuəkí ie'pa de íerö idalöiök.

<sup>3</sup> Mik Herodes tò ttè e' ttsé, etə e' tò ie' ena Jerusalén wakpa kəs tsiriwəkarak tajè. <sup>4</sup> E' kuəkí ie' tò sacerdotepa wókirpa ena s'wöbla'uk ttè dalöièno wa wakpa kiéttsə sərəə tə ichaké ie'pa ə:

—¿Ima a' ichè? Wé pairine'bitü idi' wa s'blúie, ¿wé e' kúrmi?

<sup>5</sup> Ie'pa tò iutérak:

—Ie' kərdaè Belén atə Judea eə. Skéköl tteköl tò ikitət i' es:

<sup>6</sup> Skéköl tò ichè:

Belén atə Judea, e' wakpa ə ye' ichè tò

a' shuə blu' kardakə eköl, e' tò ye' icha dör Israel aleripa e'pa wəttseräè.

E' kuəkí a' ká dör ká bua'ie wəs Judea ká bua'ie malepa tso' es.<sup>‡‡</sup>

<sup>7</sup> Mik Herodes tò ttè e' ttsé, etə ie' tò wəpa tò íyi tótkoke békwo wa ñe'pa kiè akir ijchenowə tò mik ie'pa tò békwo e' su'mi, kəs e' kí ká de. <sup>8</sup> Ie' tò ie'pa ə ichè:

—A' yú Belén. Alala e' yuló bua'ie. Mik a' tò ikué, etə ibiyó chó ye' ə əs ñies ye' mi' idalöiök.

<sup>9-10</sup> Mik blu' tò ttè e' ché one, etə ie'pa míyal. Etə békwo su' ie'pa tò ikaska', e' suéne ie'pa tò ñalə wa. E' tò ie'pa ttsə'wéne buaè shütə. Wé békwo mir-wə e' wa ie'pa mi'ke dò wé békwo e' wóklö'wəwə eə. Békwo e' wóklö'wəwə wé alala e' tso' e' u tsəkə. <sup>11</sup> E' ukuökí tə ie'pa dewə u ə tə ie'pa tò alə ena imi Maríə kué. Ie'pa e' tuləwə kuchə kí tə idalöierakitö. Kalkuöla dérak iwə e' kköyéttsarakitö tə orochka ena ì masmas ña'wé ena mirra, ese mérakitö alə ə. <sup>12</sup> E' ukuökí tə ie'pa ə iyène kabsuə ə tò ie'pa kè minukne Herodes ska'. E' kuəkí ie'pa míyalne iká kí ñalə kuəkí wa.

### José ena Maríə tkashkar míyal Egipto

<sup>13</sup> Wəpa tò íyi tótkoke békwo wa e'pa ponemine, e' ukuökí tə José kabsuə tò Skéköl biyöchök-wak eköl tò ie' ə ichè: "Be' e' kóka, Maríə ena ilə klö'ú tə be' tkóshkar Egipto. Blu' Herodes tò alala sə yuleraè ttəwə, e' kuəkí be' e' tsúat senuk eə dò mik ye' tò be' ə iché etə."

<sup>14</sup> Etə ie' t'nekə e' kəkə tə alə ena Maríə klö'wéitö tə e' nañewe imíyal Egipto. <sup>15</sup> Eə ie'pa sené dò mik Herodes blənewə ekké. E' tka es əs itkò wəs

\*\*1:21 Jesús: S'kiè e' wà kiane chè S'tsatkök-wak.

††1:23 Isaiás 7.14

‡‡2:6 Miqueas 5.2

Skëköl tō iyë' itteköl wa es. Ie' tō iyë':  
 “Ye' alà tso' Egipto, e' kiéne ye' tō.”<sup>¶¶</sup>

### Herodes tō kawö mé ala'rla ttökulur

<sup>16</sup> Mik Herodes wā ijchenewā tō wēpa tō iyi tōtkeke bëkwö wa, e'pa kè wā ie' ttö dalöiéne', etā e' tō ie' uluwéka taië. Belén ena ká tso' ipamik e' a ala'rla wēpa kurke kos, e'pa ttökulur patké ie' tō seraa kam kī duas dò bök e' yöki. Wēpa tō iyi tōtkeke bëkwö wa e'pa tō bëkwö su' kos e' kī ká de, e' yë' ie'pa tō Herodes a. E' wa ie' tō ikéwö yë'ttsā tō duas döketke bök e' kī. E' kueki ie' tō ala'rla wēpa kurke e' kéwö ulatök, esepa kos ttökulur patké.

<sup>17</sup> Es ì yë' Skëköl tteköl kiè Jeremías e' tō, e' wà tka. Ie' tō iyë':

<sup>18</sup> “Ká kiè Ramá eë ittsène tō taië ie'pa iuke aneule kköchöke siarë.

Eë alakölpa dör Raquel aleripa e'pa iuke ila'rla iëitsök.

Ila'rla kos ttélur, e' kueki ie'pa kè er pablërta'.”

### María ena ilà ena José e' yétsā Egipto biteyalne Israel

<sup>19</sup> Blu' Herodes blënewā, e' ukuöki tā José tso' Egipto, e' kabsué tō Skëköl biyöchökwak eköl tō ie' a iché: <sup>20</sup> “Wépa éna alà ttakwa, e'pa blërulunetke. E' kueki be' e' kóka tā María ena ilà klö'ú tā a' yúshkane Israel.”

<sup>21</sup> Etā José e' kéka tā María ena ilà klö'wéitō tā ie'pa biteyalne Israel. <sup>22</sup> Erë mik ie' wā ijchenewā tō Herodes alà kiè Arquelao e' tso'ne Judea blúie iyé skéie, etā ie' suane senuk eë. Etā ie' kabsué tō Skëköl tō ie' a iché: “A' yúshkane Galilea.” E' kueki ie'pa míyalne Galilea. <sup>23</sup> Mik ie'pa de Galilea, etā ie'pa míyal senuk ká kiè Nazaret eë. E' tka es as ì yë' Skëköl ttekölpa tō e' wà tkò wé ichéitō: “Ie' kirdaë Nazaret wak.”

### Juan S'wöskuökwak tō s'patté

(Marcos 1.1-8; Lucas 3.1-9,15-17; Juan 1.19-28)

**3** E' kéwö ska' tā Juan S'wöskuökwak de Skëköl ttè pakök ká sir poë wé kè yi serku' atë Judea eë. <sup>2</sup> Juan tō ie'pa a ichéke: “Ì blúie Skëköl tso' e' kéwö de watke tsinet, e' kueki a' er mane'ú ie' a.”

<sup>3</sup> Skëköl tō Juan yë' itteköl Isafas wa i es:

“Ká sir poë wé kè yi serku' taië, eë yile ttöarë aneule, e' tō icheraë: 'A' er mane'ú Skëköl datse' e' yöki, e' dör wes ñalā yuèsö yësyèsë ie' yöki es.”<sup>§§</sup>

Es Isaías tō iyë'at.

<sup>4</sup> Juan datsi' yöule kameio köyök wa; ikipamo e' dör iyiwak kkuölit. Ie' chké dör ditski ena bulali. <sup>5</sup> Jerusalén wakpa ena ká malëpa tso' Judea e' wakpa de taië ie' ttöke e' ttsök. Ñies ká tso' di' Jordán kkömik, e' wakpa de. <sup>6</sup> Ì sulu kos wambleke ie'pa tō e' chekekarakitō tā Juan tō iwöskueke Jordán a.

<sup>7</sup> Erë mik Juan tō isuë tō fariseowakpa ena saduceowakpa de taië as ie' tō ie'pa wöskuölor etā ie' tō ie'pa a iché: “¡A' dör s'kitö'ukwakpa suluë wes tkabè es! ¿Yi tō a' a iché tō a' tkömishkar Skëköl tō a' we'ikeraë siarë e' ulā a? <sup>8</sup> A' senú yësyèsë, e' wa iwër wami tō moki a' er mane'wétke Skëköl a. <sup>9</sup> Kè a' tō ibikeitsök tō a' dör Abraham aleripa, e' è kueki Skëköl kè tō a' we'ikepa. Ye' tō a' a ichè tō Skëköl kī ikiane, e' tā ie' tō ák ikkè yuèmi Abraham aleripaie. <sup>10</sup> Ie' dör wes kal bikökwak es. Ie' tso'tke kal ulitane kè wörta' ese kos bikökök ña'wëwa bö' a. <sup>11</sup> Moki ye' tō a' wöskueke di' a iwā kkachoie tō a' er mane'wétke Skëköl a. Erë ye' itöki idatse eköl, e' tō a' ierawā Wiköl Batse'r a ena bö' a. Ie' dör këképa taië ye' tsatā, e' kueki

¶¶2:15 Oseas 11.1

§§3:3 Isaías 40.3

ie' klökkuö è tsèmi e' kè dör ye' siarla e' a. <sup>12</sup>Ie' tò s'wöpperaë wës iyiwö wöp-pèsö es. Idua'buwa bleraëitö idichakuö a, erë isulusi uyerawaitö bö' kè wöitta'wa e' a."

### Jesús wösune

(*Marcos 1.9-11; Lucas 3.21-22*)

<sup>13</sup>Jesús e' yéttsa Galilea demi Jordán di'kka wé Juan tso' ee as e' tò iwöskuö. <sup>14</sup>Kewe ta Juan kè éna ie' wöskuak, ie' tò iché ia:

—Warma be' kawöta ye' wöskuök. ¿Wes be' do ye' ska' as ye' be' wöskuö?

<sup>15</sup>Ie' tò iüté:

—Ì dör yësyësë Skëköl wöa, ese kos kawöta wè se' tò es, e' kueki imuatsö es iñe ta.

Etä Juan tò ie' ttò iüté. <sup>16</sup>Jesús wösune e' e' duékane di' a e' wösha ta ká jai kköbunane ta ie' isué tò Skëköl Wiköl bite ie' ki nuböl sù. <sup>17</sup>Etä ttò tsène dat-se ká jai a e' tò iché: “Se dör ye' alà dalër taië ye' éna, e' wër buaë shüte ye' wa.”

### Bé tò Jesús erkiöwé

(*Marcos 1.12-13; Lucas 4.1-13*)

**4** E' ukuöki ta Skëköl Wiköl tò Jesús tsèmi ká sir poë wé kè yi serku' ee as bé tò ie' erkiöü ì sulu wamblök. <sup>2</sup>Eë ie' sené döka ká dabom tkëyök (40), kè chkane yës. Ekkë ta ie' dué bli wa. <sup>3</sup>Bé debitü ie' ska' ta ichéitö ia:

—Be' dör Skëköl Alà, e'ma ichó ak sekkëpa a tò a' yönú chekeie.

<sup>4</sup>Jesús tò iüté:

—Au. Skëköl yëkkuö tò ichè: ‘Kè se' senuk chkè è mik. E' skéie ì kos cheke Skëköl tò e' mik se' serke.’\*

<sup>5</sup>E' ukuöki ta bé wa ie' mítser Jerusalén dör ká batse'r ee ta itsémikaitö

Skëköl wé kakkëe e' bata ki <sup>6</sup>ta ichéitö ia:

—Be' dör Skëköl Alà, e'ma be' e' ba-tróomi döttsa iski. Skëköl yëkkuö tò ichè:

‘Skëköl tò ibiyöchökwakpa patkeraë be' kkönuk.

Ie'pa tò be' klö'weraka iulà a as be' klò kè tërwa ak ki yës.’†

E' kueki be' e' batróomi döttsa iski.

<sup>7</sup>Etä Jesús tò iüté:

—Au. Ñies Skëköl yëkkuö tò ichè: ‘A' kè kawö ta' Skëköl dör a' Këköl e' wötsir-iük.’‡

<sup>8</sup>E' ukuöki ta bé tò ie' tsèmi kabata kakkëe a, ta ee ká kos wes ká tköke ekkë, ñies íyi bua'buae tso' iki, ese kkachéitö ie' a seraa bet. <sup>9</sup>Ie' tò iché ia:

—Be' e' tkëwa kuchëwö ki ye' wörki ye' dalöiök Skëkölíe, e' ta ì kos sué be' tò e' meraëyö be' a.

<sup>10</sup>Erë Jesús tò ie' iüté:

—A Satanás, Skëköl yëkkuö tò ichè: ‘Skëköl dör a' Këköl, e' è dalöiö a' tò Skëkölíe, ie' è a' a' senú.’¶ E' kueki be' yúshka.

<sup>11</sup>Etä bé tò Jesús méat wák mía bänet. Ta Skëköl biyöchökwakpa de Jesús ska' ikimuk.

### Kanè mène Jesús a e' tsá wéitö Galilea

(*Marcos 1.14-15; Lucas 4.14-15*)

<sup>12</sup>Mik Jesús wa ijchenewa tò Juan S'wöskuökwak wötëwarakitö s'wöto wé a, etä ie' dene Nazaret atë Galilea ee. <sup>13</sup>Erë kè ie' atë senuk Nazaret. Ie' mía senuk Cafarnaúm, e' atë batsöri kië Galilea e' kkömik. Cafarnaúm atë zabulónwak ena neftalíwak e'pa kè a. <sup>14</sup>Itka es as ì kit Skëköl tteköl Isafas tò yëkkuö ki e' wà tkò es. Ie' tò iyë':

\*4:4 Deuteronomio 8.3

†4:6 Salmo 91.11-12

‡4:7 Deuteronomio 6.16

¶4:10 Deuteronomio 6.13

<sup>15</sup> “Zabulónwak ena neftalíwak, e'pa serke di' kiè Jordán e' wishet batsöri kkömik.

Ie'pa serke Galilea wé ñies pè' kè dör judiowak esepa serke ee.

<sup>16</sup> Ie'pa serke wes se' serke stui a es e' kè wä Skëköl suule.

Ie'pa dör wes s'duulewä es.

Erè eköl doia, e' tö ie'pa er ñi'weraë Skëköl ttè wa

wes ká olo tö ká ñiwe es.”<sup>§</sup>

Es Isafas tö iyë'at.

<sup>17</sup> E' ukuökj ta Jesús tö s'pattémitke ta ichéitö: “Ì blúie Skëköl tso' e' kèwö de-watke tsinet, e' kuekj a' er mane'ú ie' a.”

### Jesús tö nima klö'ukwakpa dökä tkël e'pa kiè ittökatapaie

(Marcos 1.16-20; Lucas 5.1-11)

<sup>18</sup> Jesús shkörami batsöri kiè Galilea e' kkömik, ee ie' tö wëpa sué böi ñi ëlpa. Eköl kiè Simón, e' kiè ñies Pedro. Iëköl kiè Andrés. Ie'pa kanè dör nima klö'uk. Ie'pa tso' iklä' uyök batsöri a nima klö'woie. <sup>19</sup> Ie' tö ie'pa a' iché:

—A' shkó ye' ta. A' yueraëyö s'ditsö klö'uk ye' a ye' ttökataie.

<sup>20</sup> E' bet ta ie'pa tö iklä' tulëat ta imiyäl ie' ta.

<sup>21</sup> E' wi'kie ie' tö wëpa skà sué böi ñi ëlpa kiè Santiago ena Juan, e'pa dör Zebedeo ala'r. Ie'pa tulur kanè a iyé ta kla' wöyuök, ie'pa kiémi ie' tö e' ta. <sup>22</sup> E' wöshä ta ie'pa tö ikanè ena iyé méat ta imiyäl ie' ta.

### Jesús tö s'wöbla'wé taië

(Lucas 6.17-19)

<sup>23</sup> Jesús shké Galilea kos a s'wöbla'uk judiowak ñi dapa'wo wé kos a. Ì blúie Skëköl tso', e' tté buaë pakekeitö, ñies s'duöke kos, ì dalërke s'mik kos, ese bua'wekeitö. <sup>24</sup> Ie' tté bunekä Siria kos a. E' kuekj pè' wä taië iyamipa duöke

duè daklilië wä ese debity ie' ska'. Wëlepa a aknama tso', wëlepa siwä' arke iröirö, wëlepa kraulewä, esepa kos bua'wéneitö.

<sup>25</sup> Etä pè' datse Galilea, Decápolis, Jerusalén, Judea ena ká atë Jordán wishet, e'pa mi'ke taië ie' ta.

### Jesús tö ittökatapa wöbla'wé kabata a

**5** Mik Jesús tö isué tö pè' dapané taië, etä ie' mía kabata tukir ki ta ee ie' e' tkéser ta ittökatapa de ie' ska'. <sup>2</sup> Ie' tö ie'pa wöbla'wémitke ttè i' wa:

#### Ì wër buaë Skëköl wa

(Lucas 6.20-23)

<sup>3</sup> “Wëpa morke Skëköl è mik, esepa tso' ì blúie ie' tso' e' a, e' kuekj ayëcha buaë esepa.

<sup>4</sup> “Wëpa eriarke siarë, esepa er pablërdaë, e' kuekj ayëcha buaë esepa.

<sup>5</sup> “Wëpa e' wöökewa diöshet, esepa a ká i' merdaë, e' kuekj ayëcha buaë esepa.

<sup>6</sup> “Wëpa tö sene yësyësë ese kos iëitseke chkè ena di'yè tsata, esepa ulä a iwä döraë, e' kuekj ayëcha buaë esepa.

<sup>7</sup> “Wëpa tö s'malepa sueke er siarë wa, esepa sueraë Skëköl tö er siarë wa, e' kuekj ayëcha buaë esepa.

<sup>8</sup> “Wëpa er maneneë, esepa tö Skëköl sueraë, e' kuekj ayëcha buaë esepa.

<sup>9</sup> “Wëpa tö s'er bua'wekene ñi ki, esepa kieraë Skëköl tö ila'r, e' kuekj ayëcha buaë esepa.

<sup>10</sup> “Wëpa weirke iserke yësyësë e' kuekj, esepa tso' ì blúie Skëköl tso' e' a, e' kuekj ayëcha buaë esepa.

<sup>11</sup> “Ayëcha buaë mik pè' tö a' cheke suluë, a' we'ikeke, a' kkateke kachè wa ye' dalërmik. <sup>12</sup> Ká jai a ì buaë merdaë

a' a iskéie, e' kueki mik ese tköke a' ta, eta' a' tts'enu' buaë kaneë. Es ñies Skököl ttekölpa bak a' yöki kewe e'pa weine.

### A' dör wes dayë katanoie es

(Marcos 9.50; Lucas 14.34-35)

<sup>13</sup>“A' dör wes dayë es ká i' wakpa a. Erë dayë kè kke ta'ia, e' ta kè ibuarpaiane. Kè iia' iie bua' ta ikeukemi ñala ki ta pë' dakölor iki.

### A' dör wes bö'wö es

<sup>14</sup>“A' dör wes bö'wö es ká i' wakpa a. U tso' taië kabata ki, e' kè blënu kwa, e' wëne kamië. <sup>15</sup>Kè yi tö bö'wö tskepaka ta ibléwaitö ö ipatkéwaitö kalkuö dikia. E' skéie itkekekaitö kákke sulitane tso' u a esepa wö a ká ñi'woie. <sup>16</sup>Es ñies a' senú buaë yësyësë sulitane wörki as e' saü ie'pa tö ta a' Yé tso' ká jai a e' kikarka.

### Ttë dalöiëno kit

#### Moisés tö e' ché Jesús tö

<sup>17</sup>“Kè a' tö ibikeitsök tö ye' dë'bitu i kit Moisés ena Skököl ttekölpa tö yëkkuö ki, e' wöshökwa. E' skéie ye' dë'bitu as iwà tkö wes itso' kitule es. <sup>18</sup>Moki ye' tö a' a ichè tö ttè e' kè watërpattsa etkla wë'ia kam ká jai ena ká i' erwa e' yöki; ttè e' kos wà tköraë. <sup>19</sup>E' kueki yi tö ttè e' wële dalösewëkewa, eré ttè tsir idir, ena o'ka wöbla'wëkeitö idalöseukwa, ese döraë s'ësela imalepa blúie Skököl tso' esepa dikia. Erë yi tö ttè e' dalöieke ena o'ka wöbla'wëkeitö idalöiök, ese döraë kékë taië imalepa blúie Skököl tso' esepa tsata. <sup>20</sup>E' kueki ye' tö a' a ichè tö a' kè ser yësyësë tköka s'wöbla'uk ttè dalöiëno wa wakpa ena fariseowakpa tsata, e' ta a' kè döpa i blúie Skököl tso' e' a.

### S'ulurke ñi ki ese ché Jesús tö

(Lucas 12.57-59)

<sup>21</sup>“A' wa ittseule tö iyënebak ká iai- aë a' yépa a: 'Kè a' kawö ta' s'ttökwa,'

ñies 'Yi tö s'ttëwa, ese wák kichatërdaë.' <sup>22</sup>Erë ye' tö a' a ichè tö yi uluneka iyami ki, ese kichatërdaë. E' k'fie ta yi tö iyami ché suluë, ese kichatërdaë. Nies yi tö iyami kichatëttsa, ese ki inuí tso' taië tö ipatkerami bö' ké a.

<sup>23</sup>“E' kueki a' wa ilè mí mè ka' tso' iyi moka Skököl a e' ki ta ee a' éna ianewa tö a' yami wële wa ilè tté tso' a' ki, <sup>24</sup>e' ta i mí a' wa mè e' múat ee, kè imar. A' yú a' yami er bua'ukne a' ki. E' ukuöki ta a' yúne i meke a' tö e' mú.

<sup>25</sup>“Yile wa a' mí kkatè s'shulo wé a, e' ta mik a' dami ñala ki ie' ta, eta' ishuló ie' ta as ie' kè tö a' müttsa s'shulökwak ulà a. A' kè tö iwë es, e' ta s'shulökwak tö a' merattsa s'shkëkipa ulà a ta esepa tö a' wöterawa s'wöto wé a. <sup>26</sup>Moki ye' tö a' a ichè tö a' kè döpattsa dö mik a' tö inuí patuëttsa seraä eta.

### S'senewabak dalösewëwa

#### ese ché Jesús tö

<sup>27</sup>“A' wa ittseule tö iyënebak: 'Kè a' kawö ta' s'senewabak dalöseukwa.' <sup>28</sup>Erë ye' tö a' a ichè tö yi tö o'ka alaköl sué ta ikkechéitö, e' ta e' wa isenewabak dalösewëwaitö ier a.

<sup>29</sup>“E' kueki a' wöbla bua'kka tö a' keke i sulu wamblök, e' ta iyóttsa kóumi bánet. A' yese alè kéu a' tö, e' dör bua'ie a' uyëwa bö' ké a wa'ne e' tsata. <sup>30</sup>A' ulà bua'kka tö a' keke i sulu wamblök, e' ta itóo uyómi bánet. A' yese alè kéu a' tö, e' dör bua'ie a' uyëwa bö' ké a wa'ne e' tsata.

### Se' ñi òwa ese ché Jesús tö

(Mateo 19.9; Marcos

10.11-12; Lucas 16.18)

<sup>31</sup>“Ñies iyënebak: 'Wëm tö itayë éwa, ese wák kawötä ñi owa yëkkuö muk ia.' <sup>32</sup>Erë ye' tö a' a ichè tö wëm tö itayë éwa, kè dör itayë trër kueki, e' ta e' wa ese tö itayë wömëttsami isenewabak dalöseuk-



wa \*\* Nies wëm wele senéwa tayë ese ta, e' wa e' tö tayë senewabak dalösewéwa.

**S'ttè mè ñi a Skököl  
wörki ese ché Jesús tö**

<sup>33</sup> “Nies a' wa ittseüle tö iyënebak ká iaiäe a' yépa a: 'A' ttè mé Skököl wörki, eta e' wà uk a' kawöta mokjé.’ <sup>34</sup> Erë ye' tö a' a' ichè tö kè a' kawö ta' ttè muk ñi a Skököl wörki ö ilè skà wa. Kè a' kawö ta' ttè muk ñi a ká jai wa, e' dör wé Skököl tkër s'blúie e' kueki. <sup>35</sup> Kè a' kawö ta' ttè muk ñi a ká i' wa, e' dör Skököl klò tkokaie e' kueki. Kè a' kawö ta' ttè muk ñi a Jerusalén wa, e' dör Skököl dör s'blú, e' ké, e' kueki. <sup>36</sup> Nies a' wakpa kè a' tsà è manenuk saruru ö dalolo, e' kueki a' kè kawö ta' ttè muk ñi a i' es: “Ì chéyö e' kè yëne, e' ta ye' wökir töö.” <sup>37</sup> E' kueki mik a' ttè meke ñi a, ta a' tö icheke, “tó”, eta e' dör tó; mik a' tö icheke, “au”, eta e' dör au. A' tö ì skà chéne bánet, e' ta e' dör sulué.

**Se' e' tsatkò s'sulusipa  
yöki ese ché Jesús tö**

(Lucas 6.29-30)

<sup>38</sup> “A' wa ittseüle tö iyënebak: 'Yi tö o'ka wöbla tskéwa, ese wák kawöta wöbla ské tskéwa. Yi tö o'ka kà péwa, ese wák kawöta kà ské péwa.’ <sup>39</sup> Erë ye' tö a' a' ichè tö kè a' e' tsatkök pè' sulusipa yöki. E' skéie yi tö a' ppé a' aswö bua'kka ki, e' ta a' aswö etta mú ia ppé. <sup>40</sup> Yi tö a' kkaté s'shulökwakpa wörki a' paio kiane iki e' kueki, e' ta a' paio mú ia, nies a' paio kikké mú ia. <sup>41</sup> Yi tö a' ké idali tsukmi kësik wa dò kilómetro et††, e' ta iki tsúmi dò kilómetro böt. <sup>42</sup> Yi tö a' a' ilè kak kié, e' ta imú ia. Nies yi tö a' a' íyi kié peitule, e' ta ipeitó ia.

**S'bolökpa ché Jesús tö**

(Lucas 6.27-28,32-36)

<sup>43</sup> “Nies a' wa ittseüle tö iyënebak: 'S'yamipa daléritsó erë s'bolökpa saú sulu.’ <sup>44</sup> Erë ye' tö a' a' ichè: A' bolökpa daléritsó. Wépa tö a' we'ikeke, esepa ki ikió S'yé a' tö ikimú. <sup>45</sup> A' tö iweke es, e' ta e' wa a' tso' ikkachök tö mokjé a' dör a' Yé tso' ká jai a' e' ala'r. Ie' tö diba patkeke s'ser buaé ena s'ser sulu esepa ki. Nies ie' tö kalí patkeke s'ser yësyësé ena s'ser sulu esepa ki. <sup>46</sup> Wépa tö a' daléritseke esepa è ské daléritseke a' tö, e' ta çwes Skököl tö ì buaé mèmi a' a' iskéie? Nies inuköl shtökwakpa Roma wökirpa a' e'pa tö iweke es. <sup>47</sup> A' tö a' yamipa è shkéweke, e' ta çì buaé weke a' tö s'sulusipa tsata? Nies pè' kè tö Skököl dalöie esepa tö iweke es. <sup>48</sup> A' senú buaé yësyësé wes Skököl dör S'yé tso' ká jai a' e' ser buaé yësyësé es.

**Jesús tö s'wöbla'wé tö wes  
se' kè s'siarépa kímuk**

**6** “iA' e' kkönú! Mik a' tö ì buaé weke s'kimoie, eta kè iwar sulitane wörki as ie'pa tö a' kkeòka. A' tö iwé es, e' ta Skököl dör S'yé tso' ká jai a, e' kè tö ì mepa a' a' iskéie.

<sup>2</sup> “E' kueki mik a' tö s'siarépa kimeke, eta kè e' tté pparka sulitane kukua wes e' ökwakpa es. Ie'pa tö iweke ie'pa ñi dapa'wo wé a' ena ñala wa as sulitane tö ie'pa kkeòka. Mokjé ye' tö a' a' ichè tö pè' tö ie'pa kkeekéka e' è dör ie'pa icha ské. <sup>3</sup> Erë mik a' tö s'siarépa kimeke, eta a' tö iú bèrè, kè ichar yi a. <sup>4</sup> Es Skököl tö ì kos tso' bléule ese sueke, e' tö ì buaé meraé a' a' iskéie.

\*\*5:32 itayë wömèttami...e' dalöseukwa: Ttè i' wà armi se' éna nies i' es: “e' ta ie' tso' itayë sauk wes alaköl trërta' es.

††5:41 E' kéwö skà ta Roma ñippökwakpa wa kawö ta' judiowak kök idali tsukmi dò kilómetro etk.

**Jesús tò s'wöbla'wé tò  
wes se' ké ttök S'yé ta**

(Lucas 11.2-4)

<sup>5</sup>“Mik a' ttöke S'yé ta, etä kè a' ttök sultane wörki wes e' ökwakpa es. Sulu ie'pa wöbatsö e' duöksër ttök S'yé ta ie'pa nî dapa'wo wé a' ena wé pè' daparke taië ká áie ese ska' as ikkearkä. Mokî yö ichè a' a' tò ie'pa icha ské detke iulä a' seraä. <sup>6</sup>Erè mik a' ttöke S'yé ta, etä a' yúwa a' úshu a, ukkö wötówa ee a' ttó Skéköl dör a' Yé e' ta bèrè. A' tò iweke es, e' ta Skéköl tò ì kos tso' blèule ese sueke, e' tò ì buaë meraë a' a' iskieie.

<sup>7</sup>“Ñies mik a' ttöke S'yé ta, etä kè a' ttök wes pè' kè tò ie' dalöiè e'pa ttöke ie'pa kékölpa ta es. Ie'pa ttöke ttè etkè wa taië batsjë kè wà ta'. Ie'pa tò ibikeitseke tò ikékölpa tò ie'pa ttò ttsèmi ie'pa ttè taië e' kuëki. <sup>8</sup>Kè a' tò iuk wes ie'pa es. Ì kiane a' kî e' jcher Skéköl wa kam a' tò ie' a' ikiò e' yöki. <sup>9</sup>A' ttó ie' ta i' es:

'A Sa' Yé tso' ká jai a,  
as be' dalöiò sa' tò ì ulitane tsata.

<sup>10</sup>As be' dò sa' blúie da'äie.

Ì kiane be' kî as e' or ká i' kî  
wes iorke ká jai a es.

<sup>11</sup>Chkè kiane sa' kî i'ñe senoie e' mú sa' a.

<sup>12</sup>Sa' nuì olo'yó sa' kî  
wes sa' tò s'malepa kî inuì olo'yeke es.

<sup>13</sup>Kè sa' martsa tò ì sulu tò sa' erkiòù, e' skéie sa' tsatkó yi dör sulu ichók<sup>††</sup> e' yöki.'

<sup>14</sup>“S'malepa nuì olo'yeke a' tò ie'pa kî, e' ta ñies S'yé tso' ká jai a, e' tò a' nuì olo'yeraë a' kî. <sup>15</sup>Erè a' kè tò s'malepa kî inuì olo'yè, e' ta S'yé kè tò a' nuì olo'yepa a' kî.

**Jesús s'wöbla'wé tò wes se' ké batsök**

<sup>16</sup>“Mik a' batsöke Skéköl a, etä kè a' e' ök siarè wes e' ökwakpa es. Ie'pa e' öke

siarèla as s'malepa tò isaù ta ikkeökarak-itö ibatsökerak e' kuëki. Mokî ye' tò a' a' ichè tò ie'pa icha ské detke ie'pa ulä a. <sup>17</sup>Erè mik a' batsöke, etä a' wöskuóò, a' tsaiklóò, <sup>18</sup>as s'malepa kè tò isaù tò a' tso' batsök. S'yé kè wërta' e' tò íyi ulitane tso' blèule e' sueke. A' batsó ie' è wöä ta ie' tò iské meraë a' a' buaë.

**Íyi bua'buä bló ká jai a**

(Lucas 12.33-34)

<sup>19-21</sup>“Wé a' íyi bua'buä tso' blèule ee a' er me'rie. E' kuëki kè a' tò íyi bua'buä blök ká i' kî. Ká i' kî powak se' íyi sulu'wekewa, ñies akblökwakpa tò iekibleke. E' skéie, a' íyi bua'buä e' bló ká jai a. Ee powak kè döpa íyi sulu'ukwa ñies akblökwakpa kè döpa íyi ekiblök.

**S'wöbla buaë ena s'wöbla suluë**

(Lucas 11.34-36)

<sup>22</sup>“S'wöbla dör wes bö'wö es s'chkà kos a. E' kuëki s'wöbla dör buaë, e' ta se' chkà kos e' a' ká olo ta' buaë. E' dör wes se' er dör buaë es, ì kos dör buaë yësyésé ese kî se' er me'rie. <sup>23</sup>Erè s'wöbla kè dör bua', e' ta s'chkà kos e' tso' stui a. E' dör wes se' er suluë es, ì sulu kos ese kî se' er me'rie. Erè se' er buaë e' míane suluë stuiie, e' ta e' dör suluë ichökle.

**¿Yi dör a' wökir?**

(Lucas 16.13)

<sup>24</sup>“Wé klöulewa kanè mésoie, ese kawötä iwökir è ttò dalöiök. Ie' wökirpa chópa böl, e'ma ie' kawötä eköl è dalöiök ena iëköl watöksa. Es a' kè a' er menukwa Skéköl kî ena inuköl kî ñita.

**Kè a' tkinuk ì kî**

(Lucas 12.22-31)

<sup>25</sup>“E' kuëki ye' tò a' a' ichè: Ì kiane a' kî senoie chkeie, di'ie, datsi'ie ñie, ese kos kè kî a' tkinuk. S'tso' ttsë'ka e' kè dör

<sup>††</sup>6:13 Yi dör sulu ichók: E' dör bé kiè Satanás e'.

chkök ème, ñies s'chkà kè dör datsi' è ioie. <sup>26</sup>Dù saü a' tō. Ie'pa kè tō ì kuantketa' ì wöshteta', ie'pa kè tō chkè bleta', erè Syé tso' ká jaì a e' tō ie'pa tieke. Ie' éna a' dalér taijè dù kos tsata. <sup>27</sup>A' tkirke taijè e' kī, e' kè tō a' a kawō kī mepa sēnoie ekuölō è.

<sup>28</sup>“¿Ì kuekī a' tkirke datsi' kī? Ma'ma wörkua bua'buaala ese saü wes italar, kè kanablōta', kè datsi' yueta'. <sup>29</sup>Erè blu' bak kiè Salomón, e' wā íyi ulitane bua'buaè bak taijè, erè ye' tō a' a ichè tō ie' datsi' bua'bua kè wër buaè wes ma'ma wër es. <sup>30</sup>Kakō suésō ìñe, bule ta ñanewa, erè Skèköl tō ikítkeke buaala iwörkua wa. Ie' tō kakō kítkeke es, je' yita' ie' tō a' kianeia erblök buaè ie' mik, esepa paieraè! <sup>31</sup>E' kuekī kè a' tkinuk. Kè a' e' chakök, ‘¿Ì ñemi sa' tō?’ ö ‘¿Ì yèmi sa' tō?’ ö ‘¿Ì wa sa' e' paiòm?’ <sup>32</sup>Pè' kè tō Skèköl dalöie esepa tkirke taijè íyi kos ekkè kī. Erè ì kos kiane a' kī e' jchertke a' Yé tso' ká jaì a e' wā. <sup>33</sup>E' kuekī ì kos blúie ie' tso' ena ì dör yēsýesè ie' a ese kī a' er múwā kewe. A' tō iweke es, e' ta ñies íyi ñekkè kos dōraè a' ulà a. <sup>34</sup>Diwö bit ekkè íyi tso' kī tkine e' dör wè' se' a. Bulebök se' tkirmi ì tkömi ee e' kī, e' kuekī kè a' tkinuk ikī i' ta.

### Kè a' tō s'kichatök

(Lucas 6.37-38,41-42)

**7**<sup>1-2</sup>“Ttè wa a' tō s'malepa kichaté e' è wa Skèköl tō a' kichateraè. Wes a' tō s'malepa weke e' sù a' weraè Skèköl tō. E' kuekī kè a' s'kichatök as Skèköl kè tō a' kichatò. <sup>3</sup>Kaltak jchela tsir tso' a' yami wöbla a, e' sué a' tō, erè ¿ì kuekī kaltak bërie tso' a' wák wöbla a, e' kè sune a' wā? <sup>4</sup>¿Wes a' tō ichèmi a' yami a: ‘súyö be' wöbla a kaltak jchela tsir tso' e' yèttsa’? Erè kaltak bërie tso' a' wöbla a, ¿e' kè sune a' wā? <sup>5</sup>¡A' e' öke suluè! Kaltak bërie tso' a' wöbla a e' yóttsa

kewe, es a' yami wöbla a kaltak jchela tsir tso' e' wërmi a' a buaè yèttsa.

<sup>6</sup>“¿Ì dör batse'r ese kè tularrtsa chichi a dō' ie'pa bitüne a' jchöklor. Ñies a' íyi bua'bua<sup>¶</sup>, ese kè tularrtsa köchi a, ie'pa tō ñaneraè ikla'tska wa.

### Ì kiane a' kī, ese kió Skèköl a

(Lucas 11.9-13; 6.31)

<sup>7-8</sup>“Wépa tō íyi kieke Skèköl a, esepa a imeraè ie' tō; wépa tō íyi yuleke ie' ska' esepa tō ikuraè; wépa tō ie' chakeke, esepa kierawā ie' tō weshke. E' kuekī ì kiane a' kī e' kió ie' a, eta' ie' tō a' a imeraè; e' yuló ie' ska', eta' a' tō ikuraè; ie' chakó, eta' ie' tō a' kierawā weshke.

<sup>9</sup>“Kè a' wéne tō ák mepa ilà a pan kiéitō e' skéie. <sup>10</sup>Ñies kè a' tō tkabè mepa a' alà a nima kiéitō e' skéie. <sup>11</sup>A' dör pè' suluè erè e' tō íyi buaè meke a' alà a. ¡E' yita' buaè Syé tso' ká jaì a, e' tō íyi buaè meraè yi tō ie' a ikieke ese a!

<sup>12</sup>“A' senú s'malepa ta wes a' kī ikiane tō ie'pa ser a' ta es. Ttè e' a ì kit Moisés ena Skèköl ttekölpa tō yèkkuö kī e' kos wöieulewā. E' kuekī a' senú es.

### Sene michoè wékkö e' dör tsir

(Lucas 13.24)

<sup>13</sup>“Sene michoè e' wékkö dör tsir, e' a a' shkówa. Sweir micho e' ñalé ena iwékkö dör shoè; taijè s'mi'ke ikī. <sup>14</sup>Erè sene michoè e' wékkö dör tsir ena ñalé kī darèrèè shka', wépa tō ikuè esepa kè dör taijè.

### Kal buaè ena kal suluè

(Lucas 6.43-44)

<sup>15</sup>“A' e' kkönú kachökwakpa e' chò tō ie'pa dör Skèköl ttekölpa esepa yöki. Ie'pa e' ö tō ie'pa dör buaè wes obeja urula es, erè ie'pa er suluè wes iyiwak sulusi es. <sup>16</sup>Wes ie'pa e' wamblöke, e' wa a' tō iserawā pè' wése idir. ¿Wé a'

<sup>¶</sup>7:6 íyi bua'bua: E' dör perla si'kuaie.

wā isūule tō uvawō ö higowō e' shte-tā'sō dika' kicha mik? <sup>17</sup> Kal buaē kōs ese wō dōr buaē, erē kal sulusi kōs ese wō dōr suluē. <sup>18</sup> Kal bua'buā kē wōrta' kalwō sulusiie. Nies kal sulusi kē wōrta' kalwō bua'buāie. <sup>19</sup> Kal kōs kē wōr buaē, ese bikeeke tā iña'wekewa bö' a. <sup>20</sup> Es a' tō kachōkwakpa suerawā wes ie'pa e' wamblō e' wa.

**Jesús tō icheraē 'kè ye' wā a' suule'**

(Lucas 13.25-27)

<sup>21</sup> “Wépa tō ye' a' icheke: ‘A Skékēpa, a Skékēpa’, kē esepa dōpawā seraa ì blúie Skéköl tso' e' a. Erē wépa serke wes ye' Yé tso' ká jai a e' kī ikiane es, esepa è dōrawā. <sup>22</sup> Aishkuō tā mik a' wōchakir-ketke a' nuī kī e' kēwō de, etā taiē ie'pa tō ye' a' icheraē i' es: ‘A Skékēpa, be' ttō wa sa' ut Skéköl ttekölíe, be' ttō wa sa' tō aknama uya'lur, be' ttō wa ì kē or yi a' ese o' sa' tō taiē.’ <sup>23</sup> Erē ye' tō ie'pa iuteraē: ‘Kè ye' wā a' suule yēs. A' e' wamblō suluē. ¡A' yúshka bánet ye' yōkí!’

**U yuōkwak böl**

(Marcos 1.22; Lucas 6.47-49)

<sup>24</sup> “E' kuekī yi tō ye' ttō ttsé tā iwā iuteke, ese dōr wes wēm eköl tō u yué es. E' tō u chkí tōbié iskiē ká dōr ák è ese a. <sup>25</sup> Kalí yēne taiē, di' pone taiē, sērke tka taiē, e' kōs tēne u e' mik, erē u kē anerō, ichkí tuluulewā ák a e' kuekī. <sup>26</sup> Erē yi tō ye' ttō ttsé, erē kē iwā iuteku', ese dōr wes wēm eköl kē kabikeitsōta' es. E' tō u yué tsa'wō a tā chkí ate jaléjalé. <sup>27</sup> Kalí yēne taiē, di' pone taiē, sērke tka taiē, e' kōs tēne u e' mik tā ianerō iski tā kē ì tā'ia iwa.”

<sup>28</sup> Mik Jesús tté one tā wes ie' tō s'wōbla'weke e' tō sulitane tkiwéwā. <sup>29</sup> Ie' tō ie'pa wōbla'weke tté mokí, diché tā' taiē, ese wa. E' kē dōr wes s'wōbla'uk

tté dalöiēno wa wakpa s'wōbla'weke es. E' kuekī ie'pa wōkranewā ittšök.

**Wēm eköl kiri'weke lepra tō e' bua'wé Jesús tō**

(Marcos 1.40-45; Lucas 5.12-16)

**8** Mik Jesús biteatkene kabata a, etā taiē pé' dami ie' itōkí; <sup>2</sup> e' shūa wēm debitū eköl ie' ska' kiri'weke lepra<sup>§§</sup> tō. Ie' e' tkéwā kuchē kī Jesús wōrkí tā ichéitō:

—A kékēpa, be' kī ikiane, e' tā be' a ye' buarmine as ye' batse'rne.

<sup>3</sup> Jesús tō ikéwā ulā wa tā ichéitō ia:

—Tó, ye' kī ikiane. Be' dene batse'r.

E' wōshā tā ie' buanene, kē kī lepra ku'ia. <sup>4</sup> Jesús tō iché ie' a:

—Ittsó, kē ichar yi a. Be' yú e' kkachök sacerdote a. Ì muk Moisés tō a' ka' e' batse'woie, e' tsúmi mè Skéköl a iwā kka-choie tō be' buanene.

**Kanè méso eköl bua'wéne Jesús tō**

(Lucas 7.1-10; Juan 4.43-54)

<sup>5</sup> Mik Jesús de Cafarnaúm, etā Roma ñippōkwakpa dōka cien ese wōkir de eköl ie' ska' kköchök, <sup>6</sup> tā ichéitō ia:

—A kékēpa, ye' kanè méso duladula eköl kirinewā taiē. Ie' me'r u a ka' kī pa dalērke taiē kranewā.

<sup>7</sup> Jesús tō iuté:

—Ye' mí ibua'ukne.

<sup>8</sup> Ñippōkwakpa wōkir tō iuté:

—A kékēpa, be' dōwā ye' u a e' kē dōr ye' siarla e' a. Erē ikéwō è mú tā ye' kanè méso buardane. <sup>9</sup> Ye' wōkirpa tā, e'pa ttō iütök ye' kawōtā. Nies ye' dōr ñippōkwakpa taiē e'pa wōkir, ie'pa kawōtā ye' ttō iütök. Mik ye' tō eköl a icheke: ‘Be' yú', tā imí. Eköl a ye' tō icheke: ‘Be' dou', tā ide. Nies ye' tō icheke ye' kanè méso a: ‘Íyi ú' tā iwéitō. Ye' iklō'wé tō be' wā kawō tā' íyi ulitane tsata, e' kuekī ye' wā

§§8:2 **Lepra:** E' dōr dué s'méwoie ese. Judiowak tō iklō'wé tō dué e' tō yi tteke ese dōr ná. Esepa batsekettša bánet kē a kawō tā' senuk pé' malepa shūa. Nies ie'pa kē a kawō tā' shkōkwā Skéköl wé a.

ijcher tö be' tö ikéwö mé, e' tã ye' kanè méso buardane.

<sup>10</sup> Mik Jesús tö e' ttsé tã e' tö ie' tki-wéwã. Ichéitö pè' dami ie' itöki e'pa a:

—Mokì ye' ichè a' a tö Israel aleripa kos shuã kè ye' wã yi kune erblök ye' mik wes wëm i' es. <sup>11</sup> Ye' tö a' a ichè tö mik ì blúie Skéköl tso' e' kèwö de da'äie, etã pè' kè dör judiowak tso' kã wa'ne, esepa dóraë taië e' tkökser chkök se' yépa bak kiè Abraham ena Isaac ena Jacob e'pa tã. <sup>12</sup> Erë warma wépa e' tulökeser ee esepa uyardattsa bánet stui ké a. Eë ie'pa iuraë siarè ikã yilitdawã weine kuëki.

<sup>13</sup> Etã Jesús tö iché ñippökwaipa wökir a:

—Be' yú u a tã itköraë wes be' erblé ye' mik es.

E' wöshã tã ikanè méso buanene.

### Jesús tö Pedro yàk bua'wéne

(*Marcos 1.29-31; Lucas 4.38-39*)

<sup>14</sup> Jesús míã Pedro u a tã ie' isuë tö Pedro yàk me'r kã' kì kiri'weke duè dalölö tö. <sup>15</sup> Ie' tö iké iulã kì tã duè dalölö tö iéwa tã ie' e' kéka tã ilè yuléitö ie' a ñè.

### Jesús tö s'duöke taië esepa bua'wéne

(*Marcos 1.32-34; Lucas 4.40-41*)

<sup>16</sup> Kã tuirketke tã taië ie'pa wã pè' a aknama tso' esepa debitu Jesús ska'. Ittö è wa ie' tö wimblupa ñe' trè'wéyal sèraã. Ñies s'kirirke e'pa bua'wéneitö sèraã. <sup>17</sup> E' tka es as ì yè'at Skéköl tteköl kiè Isaías e' tö, e' wã tkò. Ie' iyè':

“Se' duè kos e' yétsã ie' tö se' kì, Se' weirke kos e' mítser ie' wã se' yöki bánet.”\*

### Wépa böi e' yuak Jesús ttökatapaie

(*Lucas 9.57-62*)

<sup>18</sup> Mik Jesús tö isuë tö pè' dapanekã taië ipamik, etã ie' tö iché ittökatapa a: “Mishka batsöri wışhet.” <sup>19</sup> Etã

s'wöbla'ukwak ttè dalöiëno wa eköl de ie' ska' tã ichéitö ia:

—A S'wöbla'ukwak, ye' shkak be' tã be' ttökataie kã wa'ne wé be' mirö ee.

<sup>20</sup> Jesús tö iüté:

—Bakli' u tã' ñies dúla u tã', erë ye' dör S'ditsö Alà e' kè wã u tã' sènoie.

<sup>21</sup> Etã wëm skã dör ie' klé eköl e' tö ie' a iché:

—A kékëpa, kawö mú ñã, mik ye' yé blënewã tã inú wötökwa, e' ukuöki ye' mi'ke be' tã.

<sup>22</sup> Jesús tö iüté:

—I' tã be' shkó ye' tã. Wépa dör wes s'duulewã es Skéköl wöã, as esepa tö iyamipa nu blö.

### Sèrkè wöklö'wé Jesús tö

(*Marcos 4.35-41; Lucas 8.22-25*)

<sup>23</sup> Etã Jesús e' iéka kanò a ittökatapa tã tã imíyal batsöri kì. <sup>24</sup> Ie'pa mirwãia e' shuã siwa' batsineka taië tö di' uyéka taië tã kanò a di' iënekami. Erë ie' kapöme'r. <sup>25</sup> Etã ittökatapa de ie' ska' tã iti'wéka tã ichéitörak ia:

—¡A Skékëpa, se' tsatkó! ¡Se' duölurmi!

<sup>26</sup> Ie' tö ie'pa iüté:

—¿Ì kuëki a' suane sekké? Wësua a' kè erblöku' ye' mik bua'ie.

Etã ie' e' kéka tã siwa' ena di' yöli unéitö tã iwöklönewã míãne alamië.

<sup>27</sup> Ie'pa tkinewã taië tã iñi chakéka:

—¿Yi dör wëm wí? ¡E' ttö dalöieke siwa' tö ena di' tö!

### Jesús tö wépa böi a aknama tso' e'pa bua'wé

(*Marcos 5.1-20; Lucas 8.26-39*)

<sup>28</sup> Mik Jesús demi batsöri wışhet kã kiè Gadara ee tã wépa böi a aknama tso', e'pa e' yétsã pö ké a de ie' ska'. Ie'pa e' wamblörak suluë e' kuëki kè yi shkötã' ñalã e' wa. <sup>29</sup> Ie'pa tö ichémi aneule:

\*8:17 Isaías 53.4

—Be' dör Skëköl Alà. ¿Iók be' de sa' tsiriük? ¿Be' debitu sa' we'ikök kam sa' kéwö dö e' yöki?

<sup>30</sup>Eë tsinet köchi iëter taië chkök.  
<sup>31</sup>Aknamapa tso' taië e'pa kköché Jesús a:

—Be' tö sa' uyekettsa, e' ta kawö mú sa' a e' tiükwa köchi tso' taië jai a.

<sup>32</sup>Ie' tö iché ie'pa a:

—A' yúshka ee.

Etä aknamapa kos e' yélur wëpa a ta e' tiélur köchi a. E' bet ta köchi kos poneka tunemirak ka spé mik brutolonemi bat-söri a ta ee iduolur.

<sup>33</sup>Köchi kk'önuwakpa tkayalmi. Mik ie'pa de ka kibi ki, etä ie'pa tö i kos tka wëpa a aknamapa bak e'pa ta, e' tté ppéka. <sup>34</sup>Etä ka e' wakpa kos mia Jesús ska'. Mik ie'pa de, etä ie'pa kköché ie' a: “Be' e' yóttsa sa' ka a.”

### Jesús tö wëm eköl kraulewa e' bua'wëne

(Marcos 2.1-12; Lucas 5.17-26)

**9** E' ukuöki ta Jesús e' iéka kanò a ta imiane itò wa demi Cafarnaúm wé ie' serke ee. <sup>2</sup>Etä ee ie'pa wa wëm kraulewa eköl mítser Jesús ska' ka'la ki. Mik Jesús tö isuë tö mokí ie'pa erblé ie' mik, etä ie' tö iché wëm kirirke e' a:

—A yami, be' er kuú, i sulu kos wamblébö, e' nuí olone be' ki.

<sup>3</sup>Etä s'wöbla'ük tté dalöiëno wa wakpa welepa tö ibikeitseke: “I ché ie' tö e' wa ie' tso' Skëköl chök suluë.” <sup>4</sup>Erë i bikeitsök ie'pa tso' e' suéwa Jesús tö bet. E' kueki ie' tö ie'pa a ichaké:

—¿I kueki a' tso' iyi sulu bikeitsök?

<sup>5</sup>Ye' tö wëm i' bua'wëmine as ishköne, e' ta ¿wes a' tö iklö'wëmi tö ye' kè a inu

olonuk iki? <sup>6</sup>Ye' dör S'ditsö Alà, sú e' tö a' a ikkachè tö ye' wa kawö ta' ka i' a nuí olo'yoie.

Etä ie' tö iché wëm kraulewa e' a:

—Be' e' kóka, be' ka'la kóka ta be' yúne be' u a.

<sup>7</sup>Etä ie' e' kéka ta imiane iu a. <sup>8</sup>Mik e' sué pè' tso' ee e'pa tö, etä ie'pa suane taië. Ie'pa tö isuë tö Skëköl tö diché taië mé s'ditsö eköl a, e' kueki ie'pa tö Skëköl kíkéka taië.

### Jesús tö Mateo kié ittökataie

(Marcos 2.13-17; Lucas 5.27-32)

<sup>9</sup>E' ukuöki ta Jesús e' yéttsa ta imía, e' tö wëm sué eköl kié Mateo,<sup>†</sup> e' dör inuköl shtökwak Roma wökirpa a. Ie' tkër ikaneblöke e' wé a. Ta Jesús tö ie' a iché:

—Be' shkó ye' ta ye' ttökataie.

Etä ie' e' kéka ta imía Jesús ta.

<sup>10</sup>E' ukuöki ta Jesús de ittökatapa ta Mateo u a chkök. Ie'pa tulur chkök, e' dalewa inuköl shtökwakpa Roma wökirpa a esepa taië ena pè' sulusipa skà deyalñak e' tulésër chkök Jesús ta. <sup>11</sup>Mik e' sué fariseowakpa tö, etä ie'pa tö Jesús ttökatapa a ichaké:

—¿Iók a' wöbla'ükwak chköke inuköl shtökwakpa ena pè' sulusipa skà ta?

<sup>12</sup>Jesús tö ittésé ta ichéitö iarak:

—Wépa kè kirirku' esepa kè ki s'kapeyökwak kiane. Erë wépa kirirke, esepa ki ikiane. <sup>13</sup>Skëköl tö iyë' iyëkkuó ki: 'Iyiwak jchëule mè ye' a, ese kè kiane ye' ki. Ye' ki ikiane tö a' ñi saü er siarè wa.<sup>‡</sup> A' e' yuó tté e' wa. Ye' kè dë'bitu wépa e' ttsò tö ie'pa ser buaë yësyësë esepa kiök ye' ttökataie; ye' dë'bitu pè' sulusipa kiök ye' ttökataie.

<sup>†</sup>9:9 **Mateo:** E' dör yëkkuó i' shtökwak. Ie'pa wöblane e' chök wes o'ka ché es, e' kueki ie' kè wa iyëne ye'.

<sup>‡</sup>9:13 Oseas 6.6

**Ì kuęki Jesús ttókatapa kè batsöta'***(Marcos 2.18-22; Lucas 5.33-39)*

<sup>14</sup> Juan S'wöskuökwak ttókatapa de Jesús ska' ta ichakerakitö ie' a:

—Sa' ena fariseowakpa batsöke taię. İ kuęki be' ttókatapa kè batsö?

<sup>15</sup> Jesús tó ie'pa iüté:

—Mik s'kiule ulabatsè ese kéwö tkö'uk ta ęwes ie'pa ęriarmi wëm ulabatske e' tso'ia ie'pa ta e' dalewa? Erë ikéwö döraë etä ie' miratser ie'pa yöki. E' je' ta ie'pa batsöraë.

<sup>16</sup> “Kè yi tó datsi' kęchke wöyuepawa datsi'tak pa'alı wa. Datsi'tak pa'alı wöklöneka, e' tó datsi' kęchkela şukueęeke ta ikı jcheeke taię. <sup>17</sup> Nies vino kè terta'ka iyiwak kkuölit yöule ibloie ese kęchke a. Itękasö es, e' ta mik ibacha'nebitu, etä ikkuölit kęchke jchëemiitö. Es vino ena ikkuölit weirwami éme. E' kuęki vino tekeka ikkuölit pa'alı a, es vino ena ikkuölit kè weirpawa.”

**Jesús tó Jairo alà busi şke'wékane nıes alaköl eköl bua'wéneitö***(Marcos 5.21-43; Lucas 8.40-56)*

<sup>18</sup> Jesús tso'ia ttök, e' dalewa judiowak wökir debitu eköl ie' ska' ta ie' e' tkéwa kuchë ki ta ichéitö:

—Niköl ye' alà busi blënewa. Erë be' şkö, be' ulà múka ikı ta ishkerdakane.

<sup>19</sup> Jesús e' kéka ta imıa ittókatapa ta judiowak wökir itökı. <sup>20-21</sup> E' şıa alaköl eköl dewa tsınet Jesús tsı kker. E' du'mi alaköpa duë wa e' ki duas de dabom eyök ki bök (12). Ie' tó ibikeitseke: “Jesús datsi' bata è kéwayö, e' ta ye' buanene.” E' kuęki idatsi' bata kéwaitö. <sup>22</sup> Erë Jesús wötrée ta isuëitö ta ichéitö ia:

—A alà busi, be' er kuı. Be' erblé ye' mik, e' kuęki be' buanene.

E' wöşha ta ie' buanene buaë.

<sup>23</sup> Mik Jesús de Jairo u a, etä ie' tó isuë tó ma'ma bla'ukwakpa detke s'nu blërketke e' kuęki, nies pé' iıke taię. <sup>24</sup> Ie' tó ie'pa a iché:

—A' e' yölor, busila kè du'wa, ikapöme'r è.

Ie'pa tó Jesús jañeitséka taię, <sup>25</sup> erë ie' tó ie'pa ké e' skökmi bánet. E' ukuöki ta ie' dewa weshke ta busila ulà klö'wëwaitö ta busila e' kéka. <sup>26</sup> E' tté buneka ká e' kos a.

**Wëpa böi kè wöbla wawër e'pa bua'wéne Jesús tó**

<sup>27</sup> Jesús e' yéttsa ee ta wëpa böi kè wöbla wawër mirwa ie' itöki, e'pa arke:

—ıA Jesús, s'blú David bak e' aleri, sa' saı er siarë wa!

<sup>28</sup> Mik Jesús de u a, etä ie'pa böi de ie' ska'. Ie' tó ie'pa a ichaké:

—ıA' tó iklö'wé tó ye' a a' buarmine?

Ie'pa tó iıüté:

—A kékëpa, tó, sa' tó iklö'wé.

<sup>29</sup> Etä Jesús tó ie'pa wöbla ké ta ichéitö ie'pa a:

—Wes a' erblöke ye' mik es iwä ordaë.

<sup>30</sup> Etä ie'pa wöbla buanene. Ta Jesús tó iché ie'pa a:

—Kè a' kàne ichök yi a yës.

<sup>31</sup> Erë ie'pa mıyal ta i wé Jesús tó e' paké ie'pa tó ká e' wakpa ulitane a.

**Wëm kè tto eköl e' bua'wé Jesús tó.**

<sup>32</sup> Wëpa böi wöbla buanene e'pa mıyal, e' bet ta pé' welepa wa wëm kè tto, ese debitu eköl Jesús ska', e' a aknama tso'. <sup>33</sup> Mik Jesús tó aknama trë'wëshkar, etä wëm ttékane buaë. Pé' tso' ee e'pa tkirulune ta ichéraitö:

—Kè yi wa iyi wıse şıule Israel aleripa şıa.

<sup>34</sup> Erë fariseowakpa tó iché:

**'9:27 David aleri:** Es ie'pa tó wé pairine'bitu idi' wa s'blúie kitulebak tó idatse e' è kië. E' wà kiane chë si'kuaie *El Mesías*.

—Bé, e' wák diché wa ie' tó ie'pa tré'wéyal.

### Jesús tó pè' sué er siarè wa

<sup>35</sup> Jesús shkóke ká kós tso' Galilea blublu ñies tsitsir e' a. Ie' s'wöbla'weke judiowak ñi dapa'wo wé kós tso' e' a. Ì blúie Skéköl tso' e' tté buaé pakekeitó. Ñies s'kirirke kós, idalérke s'mik kós, e' bua'wekeitó. <sup>36</sup> Ie' tó isué tó ie'pa eriarke siarè, weinetke siarè wes obeja kè kk'ónukwak ta' es, e' kuekí ie'pa suéitó er siarè wa. <sup>37</sup> Ie' tó iché ittókatapa a:

—Mokí, ye' a ta' ie'pa dör wes iyiwó tso'tke wé'iaè shtë es, eré ishtókwakpa kè dör taiè. <sup>38</sup> E' kuekí a' tó ikió kanè wák a tó ishtókwakpa patkó.

### Jesús tó ittekólpa tsá e'pa a kawó mé

(*Marcos 3.13-19; Lucas 6.12-16*)

**10** Jesús tó ittókatapa dabom eyök kí böl (12), e'pa kié e' ska' ta' kawó méitó ie'pa a wimblupa sulusi tré'woyal ñies s'kirirke duè ulitane wá esepa bua'wone.

<sup>2</sup> Ie'pa ekképa dör ñies Jesús ttekólpa tsá, e'pa kiè i' es: kewe dör Simón, e' kiè ñies Pedro ena ie' èl kiè Andrés; Santiago ena ièl kiè Juan, ie'pa dör Zebedeo ala'r; <sup>3</sup> Felipe ena Bartolomé; Tomás ena Mateo dör inukól shtókwak Roma wókirpa a e'; Santiago dör Alfeo alà, ena Tadeo; <sup>4</sup> Simón Celote ena Judas Iscariote tó Jesús wómekettsa aishkuó ta' ibolókpa a e'.

### Jesús tó ittókatapa patkémí s'wöbla'uk

(*Marcos 6.7-13; Lucas 9.1-6*)

<sup>5</sup> Wépa dabom eyök kí böl (12), ñe'pa patkémí Jesús tó ta' ipattéitó i' es: “Kè a' minuk pé' kè dör judiowak esepa ká a. Ñies kè a' minuk Samaria. <sup>6</sup> A' yú Israel aleripa ká a, ie'pa dör wes obeja chöwa es. <sup>7</sup> A' yú ipakök tó ì blúie Skéköl tso' e' kéwö dewatke. <sup>8</sup> S'kirirke bua'úne,

s'duowa shké'úkane, s'kiri'weke lepra tó, esepa bua'úne as ibatse'rne. Ñies aknamapa yóttsa. E' diché mène a' a éme, e' kuekí kè yi ña'war iki.

<sup>9-10</sup> “Kè ì tsarmi. A' kè kawó ta' inukól tsukmi yés. Ñies sku', datsi' skà, klökkuó, shko kéli ese kós kè tsarmi. Kaneblök-wak chkómi ì kanewekeitó e' ské wa, e' kuekí kè ì tsarmi.

<sup>11</sup> “Mik a' demi ká tsitsir ó ká blublu a, eta' yi tó a' kièwami er bua' wa ese yuló. Mik a' ikué, eta' e' è u a' a' kapóro a' tso' ee' e' dalewa. <sup>12</sup> Mik a' dewa u e' a, eta' ie'pa kós serke ee' e'pa shké'ú er bua' wa. <sup>13</sup> Ie'pa tó a' kiéwa er bua' wa, e' ta' Skéköl er buaé chöraè ie'pa a. Eré ie'pa kè wá a' kinewa er bua' wa, e' ta' kè Skéköl er buaé chòpa ie'pa a. <sup>14</sup> U wele wakpa ó ká wele wakpa kè wá a' kinewa buaé ó kè éna a' ttò ttsak, e' ta' a' e' yólur u e' a ó ká e' a ta' kapo tso' a' klóttó mik e' ppóó iwà kkachoe ie'pa a tó ie'pa dör Skéköl bolókpa. <sup>15</sup> Mokí, ye' tó a' a' ichè tó aishkuó ta' mik a' wóchakirketke a' nuí kí, eta' ká e' wakpa wómerdattsá weinuk taiè Sodoma ena Gomorra wakpa bak senuk suluè e'pa tsata.

### Jesús ttókatapa weirdaè ie' kuekí

<sup>16</sup> “¡Ye' ttò ttsó! Ye' tó a' patkekemi pé' shua wes obejala èmi namu tso' taiè, e' shua es. E' kuekí a' senú wósh wa wes tkabè es; eré ñies a' senú bèrè wes nuból es. <sup>17</sup> A' tso' erki. A' miraè ie'pa wá s'shulókwakpa ulà a, ñies a' burdaè siarè judiowak ñi dapa'wo wé a. <sup>18</sup> Ie'pa wá a' miraè duèser s'wókirpa ena s'blúpa wórkí ye' tté kuekí. Es a' tó ye' tté pakeraè ie'pa a, ñies ká ulitane wakpa a. <sup>19</sup> Mik ie'pa tó a' méttsa s'shulókwakpa ulà a, eta' kè a' tkinuk ì chèmi a' tó e' tsatkoie. E' wósha ta' Skéköl tó tté eraè a' er a chè ie'pa a. <sup>20</sup> Es kè a' ttòpa a' wák er wa, e' skéie S'yé Wikól tó tté eraè a' er a chè.



<sup>21</sup> “Mik e' kɛwō de, etā welepa tō iël wōmerattsa ttèwā, iyé tō ilà wōmerattsa, ñies ala'r e' kōrakā iyé ena imì kkatōk as ittōwā. <sup>22</sup> Sulitane tō a' sueraē suluē ye' tté kuekī. Erē a' isie e' tkéwā darērēē dōkā bata ekkē, e' tsatkērdaē. <sup>23</sup> Mik ie'pa tō a' we'ikeke ká wele kī, etā a' tkōshkar iyōkī, a' yú ká kuā'kī a. Moki ye' tō a' a' ichè tō kam ye' dōr S'ditsō Alà e' dōne, e' yōkī a' kè dōpa Israel kē kos a. <sup>24</sup> “Wé wōblarke e' kè dōr iwōbla'ukwak tsata. Ñies kanè méso kè dōr iwōkir tsata. <sup>25</sup> E' dōr wē' wé wōblarke e' a tō idò wēs iwōbla'ukwak es. Ñies e' dōr wē' kanè méso a tō idò wēs iwōkir es. U wōkir kíerakitō Beelzebú<sup>§</sup> je' yitā iyamipa cherarakitō suluè!

### Yi yōkī se' ké suanuk

(Lucas 12.2-7)

<sup>26</sup> “E' kuekī kè a' suanuk ie'pa yōkī. Kè ì ku' blèulewā e' kè kkayërpa aishkuò tā, ese kos jcherdane. <sup>27</sup> Ì chéyō a' a akir bèrè, e' chónè sulitane kukua. Ñies ì kos chéyō bèrè asas a' kukuò a, e' chónè aneule sulitane a. <sup>28</sup> Kè a' suanuk yi tō s'tteta'wā esepa yōkī. Ie'pa tō s'chkà è ttèwami erē ie'pa kè a' s'wikōl duōkwā. E' skéie Skèkōl yōkī a' suanú. Ie' tō s'chkà ñies s'wikōl ewèwami bö' ké a.

<sup>29</sup> “Dúla bōt tuè tottola inukōl etk wōshkila è, erē dúla kè artā'wa iski S'yé kè wā ikéwō mène e' tā. <sup>30</sup> E' yitā a' kkō'neraèitō buaè dō a' tsakō bitō tso' shtaoule ie' wā. <sup>31</sup> Ie' a' tā a' tuè taijè tkòkà dúla tso' taijè ese tsata. E' kuekī kè a' suanuk.

### Wépa kè jaène Jesús kī

(Lucas 12.8-9)

<sup>32</sup> “Yi e' chò sulitane wōrkī tō ie' dōr ye' ttökata, e' tā ñies ese cheraëyō ye' Yé

tso' ká jai a e' wōrkī tō ie' dōr ye' ttökata. <sup>33</sup> Erē yi tō iblé s'malepa wōrkī tō ie' kè dōr ye' ttökata, e' tā ñies ibleraëyō ye' Yé tso' ká jai a e' wōrkī tō ie' dōr ye' ttökata.

### Jesús tté kuekī se' ñi blabatsōlordaē

(Lucas 12.51-53; 14.26-27)

<sup>34</sup> “Kè a' tō ibikeitsök tō ye' dē'bitu as a' ser bèrè ñitā ká i' kī. Ye' kè dē'bitu as a' ser bèrè ñitā, e' skéie ye' dē'bitu a' mukka ñippök. <sup>35</sup> Ye' dē'bitu as ilà wēm ñippò iyé tā, as ilà busi ñippò imì tā ena as iyāk ñippò iyāk tā. <sup>36</sup> Es yamipa ekka dōraē ñi bolōkpaie ye' tté kuekī.

<sup>37</sup> “Yi éna iyé ö imì dalër tkòkà ie' éna ye' dalër e' tsata, ese kè dōpa ye' ttökataie. Ñies yi éna ilà wēm ö ilà busi e' dalër tkòkà ie' éna ye' dalër e' tsata, ese kè dōpa ye' ttökataie. <sup>38</sup> Yi kè e' chò weinuk dō ittèwā krus mik tā iser wēs ye' ttökata es, ese kè dōpa ye' ttökataie. <sup>39</sup> Yi e' tsatkak ittèwā yōkī, ese kè ulā a sene michoë dōpa. Erē yi e' mettsā ttèwā ye' dalèrmik, ese ulā a sene michoë dōraë.

### Wēs Skèkōl tō iské meraë se' a

(Marcos 9.41)

<sup>40</sup> “Yi tō a' kiéwā er bua' wa, e' dōr wēs ye' kiéwaitō er bua' wa es. Ñies yi tō ye' kiéwā er bua' wa, e' dōr wēs yi tō ye' patkè' e' kiéwaitō er bua' wa es. <sup>41</sup> Yi tō Skèkōl ttekōl kiéwā er bua' wa Skèkōl ttekōl idir e' kuekī, e' tā ese a' ì meraë Skèkōl tō ittekōlpa a, ese merdaë ñies. E' sù yi tō s'ser yësyësè ese kiéwā er bua' wa iserke yësyësè e' kuekī, e' tā ese a' ì meraë Skèkōl tō s'ser yësyësè esepa a, ese merdaë ñies. <sup>42</sup> Yi isie tō di' kakla è mé ye' ttökata èsela a' yè, ye' ttökata idir e' kuekī, e' tā moki ye' tō a' a' ichè tō ese a' iské patōrdaë buaë.”

<sup>§</sup>10:25 *Beelzebú*: E' dōr bé, e' è kiè Satanás.

**Juan S'wöskuökwak ttökatapa  
e'pa de ilè chakök Jesús a**

(Lucas 7.18-35)

**11** Mik Jesús tö ittökatapa dabom eyök k<sub>i</sub> bö<sub>l</sub> (12) e'pa wöbla'wé one, etä ie' m<sub>ä</sub> k<sub>ä</sub> tso' tsinet ese a s'wöbla'uk ena Skököl ttè buaë e' pakök.

<sup>2</sup>Juan S'wöskuökwak tso' wötëule s'wöto wé a, eë ie' tö ì weke Cristo tö e' tté ttsé. E' kuek<sub>i</sub> ie' tö ittökatapa welepa patké iska'. <sup>3</sup>Ie'pa tö ichaké ia: “¿Be' dör wé pairine'bitü idi' wa s'blúie yëule idatse e' ö yi skà panèia sa' tö?”

<sup>4</sup>Jesús tö ie'pa iüté: “A' yúne Juan ska' ta ì kos sué a' tö, ì kos ttsé a' tö, e' pakóne ie' a. <sup>5</sup>Ipakó ie' a tö s'wöbla kè wawër, esepa wöbla wawënene; s'kraulewä kè shko, esepa shkéne; wépa kiri'weke lepra tö, esepa buanene batse'nene; s'kukuò kè wattsër, esepa wattsënene; s'duowä shkenekane; ñies Skököl ttè buaë e' pakane s'siarépa a. <sup>6</sup>Yi kè yök<sub>i</sub> ye' s'ulune, ayëcha buaë ese!”

<sup>7</sup>Mik ie'pa míyalne, etä Jesús tö Juan tté pakémitke pè' a, ta iché ie'pa a: “Mik a' dërö k<sub>ä</sub> sir poé wé kè yi serku' eë Juan sauk, etä ¿ima a' erbikò wëm wése suèmi a' tö? A' kè dërö wëm èse, kabikeitsò w<sub>i</sub> a dià a wës kua'kö wöppè siwä' tö es, ese sauk. <sup>8</sup>A' kè dërö wëm ese sauk, e' ta ¿wëm wése sauk a' dërö? A' kè dërö wëm e' paiò datsi' bua'buwa wa ese sauk. A' wä ijcher tö wépa e' paiò es esepa serke blu' u a. <sup>9</sup>Erè ¿wëm wése sauk a' dërö? A' dërö wëm dör Skököl tteköl ese sauk. Ye' tö a' a ichè tö mok<sub>i</sub> Juan dör Skököl tteköl, erè ie' kè dör ese è. Ie' dör Skököl tteköl tsata. <sup>10</sup>Skököl yëkuò k<sub>i</sub> itso' kitule wé Skököl tö ichè wé pairi'bitütö idi' wa s'blúie e' a: ‘Ye' tso'tke ye' ttè pakökwak patkòk be' yök<sub>i</sub> kewe be' ñalé yuök.’\*\*

Skököl ttè pakökwak e' dör Juan. <sup>11</sup>Mok<sub>i</sub>, ye' tö a' a ichè tö s'ditsö ulitane tso'tke dö ikkè ta, e'pa shua kè yi ku' Juan S'wöskuökwak tsata. Erè ì blúie Skököl tso' e' a wé dör èsela shütë e' dör Juan tsata.

<sup>12</sup>“Mik Juan S'wöskuökwak s'tsä pautmi dö ikkè ta, wépa blúie Skököl tso' esepa weirke siarè. Pè' kèsik sulué esepa éna ie'pa ewäkwä. <sup>13</sup>Kam Juan tö s'pattömi e' yök<sub>i</sub> Skököl ttekölpa kos ena Moisés, e'pa tö iyëbak tö Skököl datse se' blúie. <sup>14</sup>A' éna iklö'wak es, e' ta Juan dör Skököl tteköl kiè Elías yëuletke tö idatskene e'. <sup>15</sup>Ja' éna ye' ttè ttsak, e'ma ikukuebló bua'ie!”

<sup>16</sup>“¿Ima a' chëmi ye' tö? ¿Wes a' dör? A' dör wës ttè i' tö ichè es: Ala'rla tso' inuk u itöki. Shäbötspa arke taië ta icheke iyamipa a: <sup>17</sup>'Sa' tö pulé bla'wé, erè a' kè klötène'; sa' tö s'eriar tteittsé, erè a' kè iine.' <sup>18</sup>E' wä dör tö Juan de batsöta', blo' kè yöta', ta a' tö iché tö aknama tso' ie' a. <sup>19</sup>E' ukuök<sub>i</sub> ta ye' dör S'ditsö Alà, e' de kè batsöta', blo' yetä', ta a' ye' cheke tö ye' chkò taië, ye' blo' yè taië ñies tö ye' dör inuköl shtökwakpa ena pè' sulusipa malepa, esepa sini'. A' tö ye' cheke es, erè isuerasö bulebök ta tö wépa serke wës Skököl siwé tö ichè es esepa dör yësyèsè.”

**Kä mañat wakpa weirdaë siarè**

(Lucas 10.13-15)

<sup>20</sup>Etä k<sub>ä</sub> wépa k<sub>i</sub> Jesús tö ì kè or yi a ese o' taië k<sub>ä</sub> malepa tsata, e' wakpa kè er maneone Skököl a. E' kuek<sub>i</sub> ie' tö ie'pa ché ttè i' wa: <sup>21</sup>“A Corazín wakpa, a Betsaida wakpa, iwëstela ina a' ta! Ì kè or yi a ese o' ye' tö taië a' wörki, erè a' kè er maneone. E' úpa ye' tö Tiro ena Sidón wakpa wörki, e'ma k<sub>ä</sub> iaiä ie'pa er maneobak. Ie'pa tö eriane datsi' ajaë ië'kabak, ñies ie'pa e' tkëkabak

\*\*11:10 Malaquías 3.1

muluchka k<sub>i</sub> iwà kkachoië tò ie'pa er mane'wé Skéköl a. <sup>22</sup>E' kuëk<sub>i</sub> ye' tò ichè tò aishkuò tã mik a' wöchakirketke a' nuì k<sub>i</sub>, etã a' wömerdattsa weinuk taië shute Tiro ena Sidón wakpa tsata. <sup>23</sup>A Cafarnaüm wakpa, kè a' tò ibikeitsök tò Skéköl wa a' mi'mitser kã jai a. Ie' tò a' patkerami diöshet wé s'wimblu weirke ee. Ì kè or yi a ese wéyö taië a' wörki, erè a' kè er maneone. E' úpa ye' tò Sodoma wakpa suluë wörki, e'ma ie'pa tso'ia dò ikké ta. <sup>24</sup>E' kuëk<sub>i</sub> ye' tò ichè tò aishkuò tã mik a' wöchakirketke a' nuì k<sub>i</sub>, etã a' wömerdattsa weinuk taië shute Sodoma wakpa tsata.”

### A' kōs erbló Jesús mik

(Lucas 10.21-22)

<sup>25-26</sup>Etã Jesús tò iché: “A ye' Yé, be' dör íyi ulitane tso' kã jai a ena kã i' a e' Kéköl. Ttè buaë blé'wã be' tò pè' wã siwã' jcher iskië ena erbikò taië esepa yöki, erè ikkachébò s'ësepala a. Es be' k<sub>i</sub> ikiane, e' kuëk<sub>i</sub> be' tò iwé es. E' kuëk<sub>i</sub> be' kikékayö.”

<sup>27</sup>Jesús tté iyé ta one ta ichéitò pè' tso' ee e'pa a: “Ye' Yé tò íyi ulitane méat ye' ulà a. Ye' dör Skéköl Alà, kè yi wã ijcher mok<sub>i</sub> tò wes ye' dör, e' jcher ye' Yé è wã. Nies kè yi wã ijcher mok<sub>i</sub> tò wes ye' Yé dör, e' jcher ye' è wã. Nies wépa a ye' éna ikkachak esepa wã ijchermi. <sup>28</sup>A' eriarke taië, weirke siarè íyi ulitane dikia wes dali ekkeë dikia s'shtrirwã es. A' shkó ye' ska', etã a' enuraë ye' batamik. <sup>29-30</sup>Ye' ser bèrè, ye' er buaë, e' kuëk<sub>i</sub> a' e' tiúwã ye' tté dikia. Ttè wa ye' tò a' wöbla'weke, e' kè dör darèrèë, e' kè tò a' we'ikepa wes. E' kuëk<sub>i</sub> a' e' wöbla'ú ye' wa ta a' enuraë buaë.”

### Jesús ttökatapa tò trigo wöikléë eno diwö a

(Marcos 2.23-28; Lucas 6.1-5)

**12** E' kèwö ska' ta, eno diwö a, Jesús dami trigo shua ta ittökatapa dué bli wã. E' kuëk<sub>i</sub> ie'pa tò trigo wöiklérami ta ikatëramirakitö. <sup>2</sup>Mik fariseowakpa tò isué, etã ie'pa tò iché Jesús a:

—Isaú, be' ttökatapa tso' ì kè kèwö ta wé eno diwö a, ese uk.

<sup>3</sup>Ie' tò ie'pa iuté:

—Ì o' David tò kã iaiaë ze' kè aritsule a' wã Skéköl yëkuò k<sub>i</sub>? Etökicha ta ie' ena iklépa dué bli wã. <sup>4</sup>E' kuëk<sub>i</sub> ie' de-wã Skéköl wé a ta pan meule Skéköl a' klö'wéitò ta inéitò. Pan e' kè kèwö ta' nê ie' ena iklépa a, sacerdotepa è a ikéwö ta' nê. Erè a' éna iane tò e' kè dör suluë Skéköl wöa. <sup>5</sup>Nies za' kè wã iaritsule tté dalöiëno kit Moisés tò e' k<sub>i</sub> tò eré sacerdotepa kanëblöke Skéköl wé a eno diwö a, erè e' kè wa ie'pa tò idalösewëku'wã? <sup>6</sup>Ye' tò iché a' a' tò íerö se' dur eköl, e' dör Skéköl wé tsata. <sup>7</sup>Skéköl tò iyé' iyëkuò k<sub>i</sub>: ‘Iyiwak jchëule mè ye' a, e' kè kiane ye' k<sub>i</sub>. Ye' k<sub>i</sub> ikiane tò a' nì saù er siarè wa.’†† Ttè e' wã anúpa a' éna mok<sub>i</sub>ë, e'ma kè s'k<sub>i</sub> ì nuí ta' ese kè kkatëpa a' tò. <sup>8</sup>Ye' dör S'ditsö Alà, e' wã kawö ta' ichök tò ì dör buaë ö ì dör suluë wé eno diwö a.

### Jesús tò wëm eköl ulà siulewã e' bua'wéne

(Marcos 3.1-6; Lucas 6.6-11)

<sup>9</sup>E' ukuök<sub>i</sub> ta Jesús dewã ie'pa nì dapa'wo wé a. <sup>10</sup>Etã ee wëm tkër eköl ulà etk siulewã. Ie'pa éna Jesús kkatãk ilè k<sub>i</sub> e' kuëk<sub>i</sub> ie' a ichakérakitö:

—¿Ima be' tò ibikeitsè? ¿Kawö meule se' a Moisés tté a' s'buawone eno diwö a ö au?

<sup>11</sup>Ie' tò ie'pa iuté:

††12:7 Oseas 6.6

—A' obeja anemi etö kaxa a eno diwö a, e' ta' a' miraë iyöktsa. <sup>12</sup>E' yita se' tueta' taië obeja tsata, e' kueki kawö tso' se' a s'kimoie eno diwö a.

<sup>13</sup>Etä ie' tö iché wëm ulä siulewä e' a:

—Be' ulä shulöö.

Ta' ie' ulä shulée ta' ibuanene buaë wes ulä iët es. <sup>14</sup>Fariseowakpa e' yéttsa ta' iliritsérakitö “¿wes sö Jesús ttëwami?”

### Jesús dör Skëköl kanè méso bua'ie e'

<sup>15</sup>E' jchenewa Jesús wa, e' kueki ie' mía bänet. Taië pë' dami ie' itöki e'pa shua ikirkerak e'pa kos bua'wéne ie' tö. <sup>16</sup>Ie' tö iché ie'pa a:

—Kè ye' tté pparqa. <sup>17</sup>Ie' tö iché ie'pa a es as iwà tkò wes Skëköl tteköl kiè Isaías tö iyë' es, e' tö iyë' i' es:

<sup>18</sup>Skëköl tö iché: “I' dör ye' kanè méso shukit ye' tö, e' dalër taië ye' éna, ie' wër ye' wa buaë shute.

Ye' Wiköl meraëyö ie' a, ta' ie' tö sene yësyësë wà pakeraë ká ulitane wakpa a.

<sup>19</sup>Ie' serdaë bèrë. Kè yi wöñaktkepa ie' tö.

Kè ì chepa ie' tö aneule. Kè yi tö ie' ttö ttsepa ñalä kî.

<sup>20</sup>S'weirke siarë, esepa kè kî we'ikepa ie' tö,

Se' kè diché ta'ia esepa kimeraë ie' tö dð mik ie' e' alörakä ì sulu kos kî sene yësyësë wa eta.

<sup>21</sup>Ká ulitane wakpa tö ie' è paneraë e' tsatkoie.”<sup>††</sup>

### Fariseowakpa tö Jesús kkaté

(Marcos 3.20-30; Lucas 11.14-23; 12.10)

<sup>22</sup>Etä ie'pa wä wëm eköl a aknama tso' ese debitu Jesús ska', e' kè wöbla wawër,

kè tto. Jesús tö ibua'wéne ta' iwöbla wawënene ñies ittékane. <sup>23</sup>Ie'pa kos tkirulune iweblök ta' ñni chakerak: “¿A' iché wí dör s'blú bak David, e' aleri?”

<sup>24</sup>Mik ì ché ie'pa tö, e' ttsé fariseowakpa tö, eta ie'pa tö iché: “Beelzebú dör bé, e' diché wa ie' tö ie'pa trë'wekeyal.”

<sup>25</sup>Erë ì bikeitseke ie'pa tö e' suëwaitö, e' kueki ie' tö iché ie'pa a:

“S'werke ká etkë kî e' ñi blabatsélor ñippök ñita, kè wöklör, e' ta' ie'pa wákpa è ñi eurawa. Ñies ñi yamipa e' kéka ñippök ñita, kè wöklör, e' ta' ie'pa mir wa'k ème.

<sup>26</sup>Es ñies Satanás mú tö iklépa trë'wèyal, e' ta' ie' tso' ñippök iwakpa è ta. ¿Wes ì blúie ie' tso' e' sermiia? <sup>27</sup>Ye' tö aknamapa trë'úpaya Beelzebú diché wa, e' ta' ¿yi diché wa a' klépa tö itrë'wëmiyal? Ie'pa kè a' itrë'nukyal Beelzebú diché wa, e' kueki ¿wes a' tö ye' kkatèmi tö ye' tö itrë'wekeyal Beelzebú diché wa? A' wák klépa tö iwà kkacheraë tö a' tté kè dör moki. <sup>28</sup>Ye' tö aknamapa trë'wéyal Skëköl Wiköl diché wa, e' ta' e' wà kiane ché tö ì blúie Skëköl tso', e' kéwö detke a' a.

<sup>29</sup>“¿Wes yi mi' miwä wëm diché taië<sup>¶¶</sup> ese u a' ie' íyi ekiblök kam ie' tö iwák maüwä e' yöki? Es ème ífyi ekiblërmi.

<sup>30</sup>“Yi kè a' ye' dör bua', ese dör ye' bolök. Yi kè tö ye' kimè imalepa tsukbitu Skëköl ska', ese tö ie'pa po'wekemi.

<sup>31</sup>“E' kueki ye' tö iché tö ì sulu kos wambleke a' tö ñies Skëköl ché sulu kos e' nuí olo'yèmiitö a' kî. Erë yi tö Wiköl Bats'e' ché suluë, e' nuí kè olorpa iki.

<sup>32</sup>Ñies yi tö ye' dör S'ditsö Alä, e' ché suluë, e' nuí olo'yèmi Skëköl tö iki. Erë yi tö Wiköl Bats'e' ché suluë e' nuí kè olorpa iki ì ñne ta' ñies aishkuö ta.

<sup>††</sup>12:21 Isaías 42.1-4

<sup>¶¶</sup>12:29 Wëm diché taië: E' wà kiane ché Satanás. Jesús dör wé dör ie' ífyi ekibleke e'.

### Kal buaë ena kal suluë

(Lucas 6.43-45)

<sup>33</sup> “Kal wërkewā iwō kī. Kal buaë, ese wō dör buaë; kal sulu, ese wō dör sulu. <sup>34</sup> jA' dör suluë wës tkabè chók es! A' er dör suluë, ¿wës a' ttòmi buaë? Ì bikeit-sekesö, e' è chekesö. <sup>35</sup> Wëm dör buaë ese serke buaë, ttò yësyëë ie' er dör buaë e' kuekī. Wëm dör suluë, ese serke suluë, ttò suluë ie' er dör suluë e' kuekī. <sup>36</sup> Ye' tō a' a' ichè tō aishkuö tã mik a' wöchakirketke a' nuì kī e' kèwō de, eta ttè sulu chè a' ulitane tō shabatshabat e' kī a' wöchakirdaë. <sup>37</sup> A' wakpa ttè wa a' shulirdaë. A' tō ttè buaë cheke, e' tã Skëköl tō icheraë tō kè a' kī ì nuì tã'. Erë a' tō ttè sulu cheke, e' tã ie' tō icheraë tō a' kī nuì tso'.”

### Fariseowakpa tō ì kè or yi a' ese kié suë

(Marcos 8.12; Lucas 11.29-32)

<sup>38</sup> Etã fariseowakpa ena s'wöbla'uk ttè dalöiëno wa wakpa welepa tō iché Jesús a':

—Ì kè or yi a' ese ú sa' a' iwā kkachöie tō mokī be' patkë'bitu Skëköl tō.

<sup>39</sup> Ie' tō ie'pa iüté:

—A' dör pë' suluë e' kè tō Skëköl dalöië wës trër wakpa kè tō imaso dalöië es. A' tō ye' a' ikié tō ì kè or yi a' ese uyö iwā kkachöie tō mokī Skëköl tō ye' patkë'bitu. Erë ye' tō ilè weraë etökicha ème iwā kkachöie e' dör wës ibak Jonás dör Skëköl tteköl e' tã es. <sup>40</sup> Ie' sene' nima bérie e' shua döka ká mañat ñië nañeë, es ñies ye' dör S'ditsö Alà, e' serdaë íyök shua ká mañat ñië nañeë. <sup>41</sup> Mik Jonás tō Nínive wakpa paut, etã ie'pa er mane' Skëköl a. Erë ì'ne tã ye' dur íe e' dör ie' tsata, erë a' kè er mane' Skëköl a. E' kuekī aishkuö tã mik a' wöchakirketke a' nuì kī, etã Nínive wakpa e' kōrakā ie' wörkī a' kkatök. <sup>42</sup> Aishkuö tã mik a' wöchakirketke a' nuì kī, etã alaköl datse

ká bánet diwö tskirke e' o'mik, bak iká blúie, e' e' kōrakā ie' wörkī a' kkatök tō a' dör pë' suluë. Ká iaiaë alaköl e' dë'bitu datse kamië se' blú bak Salomón wã íyi jcher taië e' ttò kīttsök. Erë ì'ne tã ye' dur a' shua e' dör Salomón tsata, erë a' kè tō ye' ttò iüté. E' kuekī alaköl e' tō a' kkateraë.

### Wimblu sulusi dene wëm a

(Lucas 11.24-26)

<sup>43</sup> “Mik wimblu sulusi trëshkar yile a, etã imía ká sir poë wé kè yi ku' ese ska'. Ie' tso' ká yulök senoie erë kè ie' wã ikune. E' kuekī ie' ibikeitsè: <sup>44</sup> ‘Ye' míane wé ye' trëshkar ee' senuk.’ Mik ie' demine wëm e' a, etã ie' tō isuë tō wëm dör wës u shuiriule buaë maneneë kè a' yi ku' es. <sup>45</sup> Etã ie' míã iyamipa kī yulök döka kul suluë shute ie' tsata tã ie'pa kos de senuk wëm e' a. Wëm e' míane suluë shute kenet tsata. Es iwamlërdaë a' dör pë' sulusipa e'pa tã.”

### Jesús mì ena iëlpa debitu ie' weblök

(Marcos 3.31-35; Lucas 8.19-21)

<sup>46</sup> Jesús ttökeia pë' tã e' shua ie' mì ena iëlpa ena ikutapa e'pa iëter ur'kī. Ie'pa ttak ie' tã. <sup>47</sup> Yile tō ibiyó ché ie' a':

—Be' mì ena be' ëlpa ena be' kutapa e'pa shkò be' weblök.

<sup>48</sup> Erë Jesús iüté:

—¿Yi dör ye' mì ena ye' ëlpa ena ye' kutapa?

<sup>49</sup> Etã Jesús tō ie' a' ittökatapa kkaché ulà wa tã ichéitö:

—Isaú, ie'pa dör wës ye' mì ena ye' ëlpa ena ye' kutapa es. <sup>50</sup> Yi serke wës ye' Yé tso' ká jaì a' e' kī ikiane es, esepa dör wës ye' ël ena ye' kutà ena ye' mì es.

### Të kuatkökwak tté

(Marcos 4.1-9; Lucas 8.4-8)

**13** E' è diwö wa Jesús e' yéttsa u a' míã batsöri kkömik tã ee' ie' e' tkésér. <sup>2</sup> Pë' debitu taië ie' ska', e' kuekī

ie' e' iéka kanò a ta ee ie' e' tkéser ie'pa wöbla'uk. Ie'pa ulitane ate ká sí kī bat-söri kkömik. <sup>3</sup>Ie' tö ttè tsakië kleé ie'pa a. E' et dör i' es: "Wëm eköl mía të ku-atkòk ppé ululu ème<sup>§§</sup> <sup>4</sup>Mik ie' tso' iwò ppòk, età ditsöwò wele anewa ñala ska' ta dù debitu tò ikatéwa. <sup>5</sup>Ditsöwò wele anewa áklo a wé íyök kè ta' taië ese ska'. Íyök kè ta' taië, e' kueki bet ta' itskineka. <sup>6</sup>Erè kè iwí kicha ta' taië, e' kueki mik diba aneka iki età isinewa. <sup>7</sup>Ditsöwò wele anewa dika'chka shua. Dika'chka ena ditsöwò talane ñita, erè dika'chka e' aléka iki. <sup>8</sup>Erè ditsöwò wele anewa íyök bua'buwa kī, e' tskine talane wöne buaë. Wele wöne dòka cien eyök (100) elka elka, wele dabom teryök (60), wele dabom mañayök (30). <sup>9</sup>¡A' éna ye' ttò ttsak, e'ma ikukuebló bua'ie!"

### Ì kueki Jesús tö s'wöbla'weke kleaule

(*Marcos 4.10-12; Lucas 8.9-10*)

<sup>10</sup>Età Jesús ttókatapa debitu ie' ska' ta' ichakerakitò ia: "¿Ì kueki be' tö ie'pa wöbla'weke kleaule?" <sup>11</sup>Ie' tö ie'pa iuté: "Ì blúie Skéköl tso' e' tté bléulewa e' kéwò meneat a' a wà jchenoie, erè pé' malepa a kè imeneat es. <sup>12</sup>Yi wà tté e' jcher ese a imerdaë as ie' wà ikī jcher bua'ie. Erè yi kè éna ianák, ese wà ì jcher bërèbèrè e' yerattsane iyökī. <sup>13</sup>Ì weke ye' tö e' sueke ie'pa tö, erè ie'pa kè éna iwà ane. Ì cheke ye' tö e' tseke ie'pa tö, erè ie'pa kè tò ittseku' er mokī wa, ie'pa kè éna iwà iütak. E' kueki ye' kapakóke ie'pa ta es. <sup>14-15</sup>Es iwà tkóke ie'pa ta wes Skéköl tteköl kiè Isaías tö iyè' es, e' tò iyè' i' es:

'Ká i' wakpa er mía darèrè, kè ì d'wajia. Ie'pa kukuöña wötéwa darèrè as kè iwattsër, ie'pa tö iwöbla tsimiwéwa as kè iwawër.

Ie'pa tö iwé es as ie'pa kè éna iwà ar, as ie'pa kè er mane'ü ye' ska' ta ye' tö ie'pa bua'wè.

E' kueki ie'pa tö ittseraë je', erè kè ie'pa éna iwà arpa,

ie'pa tö isueraë je', erè kè ie'pa tö iklö'wepa.\*

Es Isaías tö iyè'.

<sup>16</sup>"Erè a' wöbla wawër buaë, a' kukuöña wattsër buaë, e' kueki ayècha buaë a'. <sup>17</sup>Mokī ye' tö a' a ichè tò Skéköl ttekölpa taië ena ká iaiaë s'bak ser yësyesè e'pa tö ì sué a' tö ena ì ttsé a' tö e' kkeyè' siarè suè ena ttsè, erè ie'pa kè wà isune ittse.

### Të kuatkókwak tté e' wà paké Jesús tö

(*Marcos 4.13-20; Lucas 8.11-15*)

<sup>18</sup>"Ittsó, ì kleéyö të kuatkókwak tté wa, e' wà pakekeyö a' a. <sup>19</sup>Pé' welepa ta' itkòmi wes ditsöwò arwa ñala ska' es. Esepa tö ì blúie Skéköl tso' e' tté ttsé, erè ie'pa kè éna iwà ane. Bé de ta' tté buaë yéttsa ie'pa er a. <sup>20</sup>Welepa skà ta' itkòmi wes ditsöwò arwa áklo a es. Esepa tö Skéköl tté ttsé ta' iklö'wérakitò ttsé'ne buaë wa. <sup>21</sup>Erè ie'pa kè wí kicha ta' taië, e' kueki ie'pa tö iklö'wé ekuölö è. Mik ie'pa weinemitke Skéköl tté kueki, età ie'pa anemine bet. <sup>22</sup>Welepa skà ta' itkòmi wes ditsöwò arwa dika'chka shua es. Esepa tö Skéköl tté ttsé, erè ie'pa tö íyi tso' ká i' kī ese bikeitseke kibiie. Ie'pa er me'rie inuköl kī ena ì tso' ká i' kī tò s'ttsè'weke buaë ese kī. E' kos tö Skéköl tté kui'wéwa ie'pa er a ta' kè idé'ttsa buaë wes ikiane es. <sup>23</sup>Erè welepa skà ta' itkòmi wes ditsöwò arwa íyök bua'buwa kī es. Esepa je' tö Skéköl tté ttsé ta' iwà ane buaë ie'pa éna ta' iwà dettsa buaë wes ikiane es. Ie'pa dör wes íyi kuá wör buaë es wele

§§13:3 të kuatkòk ppé ululu: E' kéwò ska' ta' pé' wöblar të kuatkòk wò ppélur të kos e' kī.

\*13:14-15 Isaías 6.9-10

wöne dōkã cien eyök (100), wele dabom teryök (60), wele dabom mañayök (30).”

### **Kakö kuã'ki tkëne trigo şua e' tté**

<sup>24</sup> Jesús tö ttè skà kleéne ie'pa a i' es: “İ blúie Skëköl tso' e' ta itköke weş itka wëm eköl tö trigowö kuatké iká a e' ta itka es. <sup>25</sup> Nañewe ie'pa kapolur e' dalewa ibolök debitü eköl kakö dör trigo suë ese wö kuatké trigo şua ta iwák mía. <sup>26</sup> Mik trigo wöne, eta iwënewa tö nïes kakö kuã'ki tso'. <sup>27</sup> Ikanè mësopa mía ta iché kanè wák a: ‘A këkëpa, be' tö trigowö bua'buwa kuatké be' ká a ta çwes e' a kakö kuã'ki tso?’ <sup>28</sup> Ie' tö ie'pa iüté: ‘Ye' bolök wele tö iwamblé ye' kî.’ Ie'pa tö ie' a ichaké: ‘ÇBe' ki ikiane tö sa' mi' kakö ñe' yökulur?’ <sup>29</sup> Erë ie' tö ie'pa iüté: ‘Au, imúat es. A' tö kakö yéttsã e' ta trigo yërtsami itã nïes. <sup>30</sup> Imúat as italar nita dō mik itërketke eta. E' wa ye' tö itökwakpa patkeke kakö tök kewe muë eyök eyök ña'wëwa bö' a. E' ukuökî ta ye' tö trigowö tök patkeke blè wé ye' iyiwö blöke e' wé a.”

### **Mostaza wö tté**

*(Marcos 4.30-32; Lucas 13.18-19)*

<sup>31</sup> Ttè skà kleéne Jesús tö ie'pa a i' es: “İ blúie Skëköl tso' e' dör weş mostaza wö kuatkësö ká a es. <sup>32</sup> E' wö dör tsirlala iyiwö ulitane dikia. Erë mik italane ta e' dör iyi kuá tsitsir ulitane tsata. E' mía kalie ta dù datse u yuök iulã tsaka.”

### **Pan wölöwoka tté**

*(Lucas 13.20-21)*

<sup>33</sup> Jesús tö ie'pa a ttè skà kleéne i' es: “İ blúie Skëköl tso' e' dör weş pan wölöwoka wötuë tayë tö harinachka mañayök a es. E' tö harinachka e' kos wölöwëka taië.”

### **Jesús tö s'wöbla'weke kleaule**

*(Marcos 4.33-34)*

<sup>34</sup> Ttè e' kos kleé Jesús tö ie'pa a. Mokî ie' kè wa ì pakane ie'pa a kè kleaule. <sup>35</sup> Ie' tö s'wöbla'wé es, e' wa ì yë'bak Skëköl tteköl eköl tö e' wã tka, e' dör i' es: “Ye' tö s'wöbla'weraë kleaule. Ttè tso' blëule kã iaiã kã i' yöne e'tami, ese kkacherayö ie'pa a.”<sup>†</sup> Es Skëköl tteköl tö iyë'.

### **Kakö kuã'ki tté e' wã paké Jesús tö**

<sup>36</sup> Eta Jesús e' chéat pë' a ta imía u a. Ittökatapa de ie' ska' ta iché ie' a: “Kakö kuã'ki wakleëbö, e' wã pakö sa' a.” <sup>37</sup> Ie' tö ie'pa a iché: “Yi tö trigowö kuatké, e' dör ye' dör S'ditsö Alã e'. <sup>38</sup> Të wé kî ikuatkenë e' dör ká i'. Trigowö e' dör wépa blúie Skëköl tso' esepa. Kakö kuã'ki e' dör wépa dör bé icha esepa. <sup>39</sup> Ibolök tö kakö kuã'ki kuatké e' dör bé è. Ilir këwö e' dör ká i' erkewatke e' këwö. Itökwakpa e'pa dör Skëköl biyöchökwakpa. <sup>40</sup> Wes ie'pa tö kakö kuã'ki yéttsã uyéwa bö' a, es itköraë ká i' erkewatke eta. <sup>41</sup> E' këwö ska' ta ye' dör S'ditsö Alã e' döraë iyi ulitane blúie da'ãie. Ye' tö ye' biyöchökwakpa patkeraë wépa tö o'ka keke ì sulu wamblök ena wépa e' wamblö sulu esepa kos shtökka. <sup>42</sup> Ie'pa uyerawarakitö bö' taië a, ee iurarak nïes ikã yilidawarak iweir kuëkî. <sup>43</sup> Erë s'ser yësyësë, esepa dalöburdaë weş diwö es wé S'yé tso' ie'pa blúie ee. ¡A' éna ye' ttò ttsak, e'ma ikukueblö bua'ie!

### **Íyi tuë darërëë blëulewa e' tté**

<sup>44</sup> “İ blúie Skëköl tso' e' dör weş iyi tuë darërëë ese blëulewa yile ká a es. E' kuë wëm eköl tö ta e' tö ie' tse'wé buaë. E' kuëkî ie' tö ibléwane ta imía ta ì kos tso' iwa, e' watuéttsaitö. E' ské wa ie' tö ká e' tuë. Es iyi tuë darërëë e' de ie' ulã a.

<sup>†</sup>13:35 Salmo 78.2

### Ákwöla bua'buwa tuè darërëë e' tté

<sup>45</sup> “Ñies ì blúie Skëköl tso' e' dör wes ákwöla bua'buwa yuleke íyi wataukwak eköl tò tuè es. <sup>46</sup> E' tò ákwöla bua'buwa ichók tuè darërëë shütë ese kuéwá tã imía tã ì kos tso' iwá e' watuéttsaitö. E' ské wa ie' tò ákwöla bua'buwa e' tuéttsá.

### Kla' tté

<sup>47</sup> “Ñies ì blúie Skëköl tso' e' dör wes kla' uyé wëpa wëlepa tò dayë á es. E' tò nima klö'wé taië tsákië buaë ena suluë. <sup>48</sup> Mik ie'pa tò kla' yéttsá ká sí kî tã ie'pa e' tuléser nima shushtök; ibua'buwa iéka kók á tã isulusi uyémi bánet. <sup>49</sup> Es itköraë mik ká i' erkewatke etã. Skëköl biyöchök-wakpa bituraë s'shushtök; s'sulusipa michoë bánet, s'ser yësyësë michoë bánet. <sup>50</sup> S'sulusipa kos uyerawá Skëköl biyöchök-wakpa tò bö' taië e' á, eë ie'pa iuraë siarë, kà yilidawá iweir kuëkî.”

### Íyi pa'ali ena íyi këchke e' tté

<sup>51</sup> Jesús tò ittökatapa á ichaké:

—¿Ttè ekké kos wà ane a' éna?

<sup>52</sup> Ie'pa iiuté:

—Tó.

Ie' tò ie'pa á iché:

—E' kuëkî mik s'wöbla'uk tté dalöiëno wa wakpa ese eköl e' yué buaë ì blúie Skëköl tso' e' tté wa, etã ie' tò s'wöbla'wëmi buaë tté këchke wa ñies tté pa'ali wa. Ie' dör wes u wák wá íyi tso' bléule iblo á es. Ese wá ijcher mik tã ikëchke ö ipa'ali kiane yéttsá s'malepa kimoie.

### Nazaret wakpa tò Jesús watéttsá

<sup>53</sup> Mik Jesús tté kleé one, etã imía <sup>54</sup> demi Nazaret, e' dör ie' wák ká. Eë ie' tò s'wöbla'wëmitke judiowak ñi dapa'wó wé tso' eë e' á. Wes ie' tò ie'pa wöbla'weke e' tò ie'pa tkiwéwa. Ie'pa tò iché ñi á:

—¿Wé ie' e' yué tté taië ekké wa? ¿Wes ì kè or yi á ese wé ie' tò buaë? <sup>55</sup> ¿Ie' wí yé kè dör se' íyi yuök kaltak wa e'? ¿Ie' mì kè dör María? ¿Ie' élpá kè dör Santiago, José, Simón ena Judas? <sup>56</sup> ¿Ñies ie' kutapa kè serku' se' shua? Etã ì kos weke ie' tò ¿wé e' bité ie' wa?

<sup>57</sup> Ie'pa kè éna ie' tté klö'wak. Erë ie' iché ie'pa á:

—Ká wañe Skëköl tteköl dalöiërta', erë iwák ká kî ena iwák u á eë kè idalöiërta'.

<sup>58</sup> Ie'pa kè erblëne ie' mik, e' kuëkî ì kè or yi á ese kè one ie' wá taië eë.

### Juan S'wöskuökwak kötëwá

(Marcos 6.14-29; Lucas 9.7-9)

**14** E' këwö ska' tã Herodes dör Galilea blú, e' tò Jesús tté ttsé, <sup>2</sup> e' kuëkî ie' tò iché ikanè mésopa á: “Wëm ñe' dör Juan S'wöskuökwak shkenekane e'. E' kuëkî ie' wá diché tso' ì kè or yi á ese woie.”

<sup>3</sup> Herodes tò Juan klö'ukwá patkë' wötë'waitö s'wöto wé á, e' kuëkî ie' tò Jesús ché es. Ie' sené Herodías tã, e' dör ie' ël kië Felipe e' alaköl. <sup>4</sup> E' yé' Juan tò ie' á: “Kè be' kawö tã' senuk be' ël alaköl tã.” E' kuëkî Herodes tò Juan wötökwa patkë'.

<sup>5</sup> Herodes éna Juan ttakwá erë ie' suane pë' yökî, ie'pa tò iklö'wé tò Juan dör Skëköl tteköl e' kuëkî. <sup>6</sup> Erë mik Herodes tò iduëswö këwö tkö'weke, etã Herodías alá busi e' klöté s'kiule tso' taië e'pa wörkî. E' wër buaë Herodes wa. <sup>7</sup> E' kuëkî ie' tò iché ie' á yësyësë Skëköl wörkî: “Mokî ye' tò iché, ì kië be' tò ye' á, e' meraëyö be' á.” <sup>8</sup> Etã ie' tò iché Herodes á wes imi tò ie' á iyë' es:

—Juan S'wöskuökwak ttökwa patkó tã iwökir mú ye' á kulé' á iwá kkachöie tò mokî ittëwarakitö.

<sup>9</sup> Etã blu' Herodes erianeká taië, erë ie' tò itté métke s'kiule tso' e'pa kukua, e' kuëkî ie' tò ikëwö mé. <sup>10</sup> Ie' tò Juan kuli'



tökök patké s'woto wé a. <sup>11</sup> E' ukuökí tã ie'pa wã iwökir debitu kulë' a mé busi a tã ie' tö imé imi a.

<sup>12</sup> Juan ttökåtapa de tã inú tsémirakitö wötëwã. E' ukuökí tã ie'pa mĩa tã ibiyó ché Jesús a.

### Pë' döka mil skeyök e' tié Jesús tö

(*Marcos 6.30-44; Lucas 9.10-17; Juan 6.1-14*)

<sup>13</sup> Mik Jesús tö biyö e' ttsé, etã ie' mĩa kanò kí ekörla bánet wë kè yi serku' ese ska'. Mik pë' wã ijchenewã tö ie' mĩa, etã ie'pa míyal itökí batsöri kkömik klò wa. <sup>14</sup> Mik Jesús e' yéttsã kanò a, etã pë' tso' taië ipanuk e' suëitö. Ie'pa suëitö er siarë wa. S'kirike kos demi ie'pa wã e' bua'wëitö. <sup>15</sup> Kã tuirketke, e' kueki itökåtapa de ie' ska' tã ichérakitö ie' a:

—Kã de tsáli, kè yi serku' íe. Ie'pa yuómi as ie'pa mi' pë' serke tsinet ee ilè tauk nè.

<sup>16</sup> Ie' tö ie'pa iüté:

—Ie'pa kè kawöta mi'kyal; ie'pa tió a' tö.

<sup>17</sup> Ie'pa tö iüté:

—Pan skël ena nima bötö e' è tso' sa' wa.

<sup>18</sup> Ie' tö iché:

—Itsúbitu ña.

<sup>19</sup> Etã ie' tö pë' ké e' tulökser iski ta'tsi kí. E' ukuökí tã ie' tö pan skël ena nima bötö e' klö'wé tã iká sué ká jai a tã wéstela chéitö Skököl a. Tã pan blatéitö mé ittökåtapa a as ie'pa tö iwatiö pë' a.

<sup>20</sup> Ie'pa ulitane chké de wë'. Ibata ate e' shtérakitö iëne döka kkóla dabom eyök kí bök. <sup>21</sup> Ie'pa chké e'pa döka mil skeyök (5.000) wëpa è, alakölpã ena ala'rla kè shtãne.

### Jesús shkë di' kí

(*Marcos 6.45-52; Juan 6.16-21*)

<sup>22</sup> E' ukuökí tã Jesús tö iché ittökåtapa a: “A' e' ióka kanò a, a' yúshkatke ye'

yökí kewe batsöri wishet.” Ie' tö iché pë' malepa a: “A' yúne a' u a.” <sup>23</sup> E' ukuökí tã ie' mĩa ekörla kabata a ttök S'yé tã. Mik kã tuine, etã ie' tso'ia kabata a. <sup>24</sup> E' dalewa ittökåtapa mirwã batsöri kí demitke elkeë. Siwã bitsirke taië ie'pa kke wöiá, e' tö di' uyeke taië tërke kanò mik. <sup>25</sup> Kã ñirketke etã Jesús mĩa ie'pa ska' shkörami di' kí. <sup>26</sup> Erë mik ie'pa tö isué tö ie' shkòdatse di' kí, etã e' tö ie'pa tkiwëwã suawé taië tã ianekarak:

—jWimblu datse se' kker!

<sup>27</sup> Erë ie' iché ie'pa a:

—jA' er kuú! Kè a' suanuk, ye' idir.

<sup>28</sup> Etã Pedro tö iché ie' a:

—A Skëkëpa, mokí be' idir, e' tã kawö mú ye' a shkök di' kí dò be' ska'.

<sup>29</sup> Etã Jesús tö iüté:

—Be' shkó ye' ska'.

Etã Pedro e' yéttsã kanò a shkëmi di' kí dò Jesús ska'. <sup>30</sup> Erë mik ie' isué tö siwã bitsirke darërëë, etã ie' suanéka taië tã iwötunewami di' a tã ianeka taië:

—jA Skëkëpa, ye' tsatkó!

<sup>31</sup> E' bet tã Jesús tö iklö'wé iulã a tã iché ia:

—jWësua be' erblöke ye' mik bërëbërë! jÏ kueki be' ibikeitséka bötböt?

<sup>32</sup> Mik ie'pa bül e' iéka kanò a, etã siwã wöklöne. <sup>33</sup> Ie'pa kos tso' kanò a, e'pa e' tulésër kuchë kí Jesús wörki idalöioie tã ichérakitö:

—jMokí be' dör Skököl Alà je'!

### Jesús tö s'kirirkepa bua'wé Genesaret

(*Marcos 6.53-56*)

<sup>34</sup> Itkattsarak batsöri wishet demirak Genesaret. <sup>35</sup> Mik kã e' wakpa tö isué tö Jesús idir, etã ie'pa tö ittë ppéka kã e' kos a. Ie'pa wã s'kirirke mi'ke ie' ska' as ibua'ütö. <sup>36</sup> S'kirirke esepã kköchöke ie' a tö ie'pa a ie' datsi' bata è mú kèwã. Wëpa kos tö iké e'pa buanene.

## Ì tò se' ia'wèmi ñáie

(Marcos 7.1-23)

**15** Fariseowakpa ena s'wöbla'uk ttè dalöiëno wa wakpa serke Jerusalén, e'pa welepa debitu Jesús ska'. Ie'pa tò ie' a ichaké:

<sup>2</sup>—¿Ì kueki be' ttökatapa kè tò se' yépa bak e'pa ser e' dalöiè? Ie'pa chkò ulà kè paköule.

<sup>3</sup>Ie' tò ie'pa iuté:

—¿Ì kueki Skëköl ttè dalöiëno e' dalösewëkewa a' tò a' wakpa ser dalöioie? <sup>4</sup>Skëköl iyë'at: 'A' yé ena a' mi e'pa dalöiö,<sup>‡</sup> ñies ie' tò iyë'at: 'Yi tò iyé ö imi ché suluë ese wák wömerdatsa ttèwa.<sup>¶</sup> <sup>5</sup>Erë a' icheke tò se' a iyërmi s'yé a ö s'mi a i' es: 'Ì kos tso' ye' wá a' kimoie, e' meuletke Skëköl a<sup>§</sup>, e' kueki kè ye' a a' kimenuk i wa'. <sup>6</sup>A' tò icheke tò yi isie e' ché, ese wák kè kawötaia iyé ö imi kimum. Es Skëköl ttè dalöiëno ñe' dalösewëkewa a' tò a' wakpa ser iuté wa. <sup>7</sup>A' e' ò suluë! Buaë Isaiás tò a' ye' mik ie' iyë':

<sup>8</sup>Skëköl tò ichè: 'Pè' ikképa tò ye' dalöieke kkò è wa, erë ie'pa er tso' kamië ye' yöki.

<sup>9</sup>É ichökle ie'pa mi'ke ye' wé a ye' dalöiök.

Ttè wa ie'pa s'wöbla'weke e' dör s'ditsö ttè dalöiëno è.<sup>\*\*</sup>

Es Isaiás tò iyë'at.

<sup>10</sup>E' ukuöki ta ie' tò pè' tso' ee e'pa kié ta ie' iché iarak:

—A' tò ye' ttò tso', iwà anú a' éna. <sup>11</sup>Ì ñeke a' tò ese kè tò a' ia'wëpa ñáie Skëköl wöa. Erë i sulu wambleke a' tò tskirke a' er a ese je' tò a' ia'wëraë ñáie.

<sup>12</sup>Etá ittökatapa de ie' ska' ta ie' a ichaké:

—¿Be' wá ijcher tò i chekebö e' tò fariseowakpa uluwé?

<sup>13</sup>Ie' tò ie'pa iuté:

—Fariseowakpa esepa dör wes íyi kuá kè tkënewa ye' Yé tso' ká jai a e' wa es, e' kueki ie'pa yërdatsa wië. <sup>14</sup>Ie'pa múat es. Ie'pa dör wes s'wöbla kè wawër ese tò o'ka wöbla kè wawër e' ulaië es, e'pa böi tköaraë kauk a.

<sup>15</sup>Etá Pedro tò iché ie' a:

—Ttè waklébö ñe' wà pakó sa' a.

<sup>16</sup>Ie' tò iüüté:

—¿Ñies a' kè éna iwà ane? <sup>17</sup>¿A' kè éna iane tò i ñekesö ese mi'ke s'ñawi a e' ukuöki ta iwekettsasö? <sup>18</sup>Erë i sulu tskirke a' er a ese tò a' ia'wèmi ñáie. <sup>19</sup>Ì sulu bikeitseke a' tò, s'ttèwa, senewabak dalösewëwa, trë, akblë, s'kkatè kachè wa ñies ñi ché sulu ese kos tskirke a' er a. <sup>20</sup>Íyi ese tò a' ia'wëraë ñáie. Erë a' chkò kè ulà paköule e' kè tò a' ia'wëpa ñáie.

## Tayë eköl kè dör judiowak e' erblé Jesús mik

(Marcos 7.24-30)

<sup>21</sup>Etá Jesús ena ittökatapa míyal ká kiè Tiro ena Sidón ee. <sup>22</sup>Etá tayë eköl serke ee dör cananwak, e' ardatse tajë Jesús itöki:

—A kékëpa be' dör David aleri, ye' saú er siarë wa. Ye' alà busi kirirke tajë a aknama tso'.

<sup>23</sup>Erë Jesús kè wá ie' iütëne yës. Etá ittökatapa kköché ie' a:

—Tayë ardatse tajë se' itöki, i kiane ie' ki e' mú ie' a as imi'a.

<sup>24</sup>Ie' tò ie'pa iuté:

<sup>‡</sup>15:4 Éxodo 20.12; Deuteronomio 5.16

<sup>¶</sup>15:4 Éxodo 21.17; Levítico 20.9

<sup>§</sup>15:5 *meuletke Skëköl a*: Ie'pa tò iché es erë ie'pa ulà a itso'ia, e' wakanewëmi ie'pa tò wes ie'pa ki ikiane es.

<sup>\*\*</sup>15:9 Isaiás 29.13

—Skëköl tō ye' patkë' Israel aleripa è kımuk. E'pa dör wes obeja chōwa siarë es.

<sup>25</sup> Etā tayë dewā e' tkëwā kuchë kī Jesús wörkī tã ichéitō iā:

—¡A kékëpa, ye' kımú!

<sup>26</sup> Jesús iıüté:

—Kë idör buaë ala'rla chkë yéttsā më chichi ā.

<sup>27</sup> Tayë tō iché:

—A kékëpa, e' yëne; erë chkë mulë darke iski e' ñeke chichi tō.

<sup>28</sup> Etā Jesús iché ie' ā:

—A tayë, be' erblë mokī ye' mik, e' kuëkī ì kiane be' kī e' de be' ulā ā.

E' wöshā tã ilā busi buanene.

### S'kirirke ese bua'wëne Jesús tō

<sup>29</sup> Etā Jesús ena ittökåtapa biteyalne batsöri kië Galilea e' kkömik. Etā ie' tkakā kabata tukir kī tã eë ie' e' tkësër.

<sup>30</sup> Tã pë' de tajë ie' ska', e'pa wā iduepa de Jesús wörkī. Iduëpa kë shko, kë wöbla wawër, kë tto, ulā ö klò sulu-ulewā ñies s'kirirke duë ulitane wā ese kos bua'wëitō. <sup>31</sup> Pë' ulitane tso' eë isaük e'pa wökrarulune. Ie'pa tō isuë tō kë s'tto esepa ttékane, s'ulā ena s'klò sulu-ulewā esepa buanene, kë s'shko esepa shkëne, ñies kë s'wöbla wawër, esepa wöbla wawëne. E' kuekī ie'pa tso' Israel aleripa Këköl kıkökka tajë.

### Wëpa dökā mil tkëyök e' tié Jesús tō

(*Marcos 8.1-10*)

<sup>32</sup> Etā Jesús tō ittökåtapa kié tã ichéitō ie'pa ā:

—Siarë ye' wa pë' ikkëpa wër. Ie'pa tso' ye' tã e' kī kã de mañatk tã kë ie'pa wā ì ku' ñë. Kë ye' éna ie'pa patkak u ā kë chkaule dö' isiwa'arwarak ñalā kī.

<sup>33</sup> Etā ittökåtapa tō iché iā:

—Erë kã i' ā kë yi serku'. ¿Wes sa' tō pan kuëmi taië pë' ekkëpa tioie'?

<sup>34</sup> Ie' tō ie'pa ā ichakë:

—¿Kos a' wā pan tso'?

Ie'pa iıüté:

—Sa' wā pan tso' kul (7), ñies nima tso' elkela.

<sup>35</sup> Etā ie' tō pë' ké e' tulöksër iski <sup>36</sup> tã pan kul ena nima e' kló'wëitō tã wëstela chéitō Skëköl ā tã iblatéitō mé ittökåtapa ā tã ie'pa tō iwatié pë' ā. <sup>37</sup> Pë' ulitane chkë de wë' tã ibata ate e' iëne dökā kkó kul. <sup>38</sup> Ichkërak e'pa dökā mil tkëyök (4.000) wëpa è, alaköpa ena ala'rla kë shtane. <sup>39</sup> Jesús tō pë' yuëmine tã ie' e' iëkã kanò ā tã imiã kã kië Magdala ee.

### Fariseowakpa tō ì kë or yi ā ese uk ké suë

(*Marcos 8.11-13; Lucas 12.54-56*)

**16** Fariseowakpa ena saduceowakpa wëlepa de Jesús ska'. Ie'pa éna ie' tsaiak, e' kuëkī ie'pa tō ikié ie' ā tō ì kë or yi ā ese úitō iwā kkachoie tō mokī ie' patkë'bitü Skëköl tō.

<sup>2</sup> Erë ie' tō ie'pa iüté: “Tsáli tã a' tō icheke, ‘Kã tanewā mat bule dība ardaë buaë’; <sup>3</sup> bla'mi tã a' icheke, ‘Kã tanewā mat kalī monekã ttsettseë tã kalī yërdaë.’ A' éna iane buaë mik tã dība armi mik tã kalī yërmi, etã ¿wes ì tköke i'ñe tã e' kë wā ar a' éna? <sup>4</sup> A' dör pë' suluë e' kë tō Skëköl dalöië wes trër wakpa kë tō imaso dalöië es. A' ye' ā ikié tō ì kë or yi ā ese uyö iwā kkachoie tō mokī Skëköl tō ye' patkë'bitü. Erë ilë weraëyö etökicha ème iwā kkachoie, e' dör wes Jonás tã ibak es.”

Etā ie' tō ie'pa méat tã imiã bánet.

### Fariseowakpa pan wölöwokā e' pakë

(*Marcos 8.14-21*)

<sup>5</sup> Jesús ena ittökåtapa demi batsöri wishët, erë ittökåtapa éna ilë chowa tsëmi ñë. <sup>6</sup> Ie' iché ie'pa ā:

—Ye' ttò ttsó. A' e' kkönú fariseowakpa ena saduceowakpa pan wölöwokā e' yökī.

<sup>7</sup> Ittökåtapa iché ñi ā:

—¡Kë se' wā ì dë' ñë!

<sup>8</sup> Ì chök ie'pa tso' e' suéwaitö tã ichéitö ie'pa a:

—¿Ì kuëkì a' tso' ichök ñì a tò kè se' wã ì dé' ñè? ¿Kam a' erblò ye' mik mokijè!  
<sup>9</sup> ¿Kam a' éna iwà ar? Pan skel wadé'yö wépa dôka mil skeyök (5.000) ekkè a, ¿e' chowa a' éna? Etã ¿kkó bik ibata kit a' tò? <sup>10</sup> Nies pan kul wadé'yö wépa dôka mil tkéyök (4.000) ekkè a, ¿e' chowa a' éna? E' ukuökì tã ¿kkó bik ibata kit a' tò? <sup>11</sup> ¿Wes a' kè éna iane tò ye' kè ku' ì ñekesö ese chök? A' e' kkönú fariseowakpa ena saduceowakpa pan wölöwoka ese yöki.

<sup>12</sup> Etã ie'pa éna iane tò Jesús kè ku' pan wölöwoka tso' se' wã ese chök. Ie'pa éna iane tò ttè wa fariseowakpa ena saduceowakpa tò s'wöbla'weke e' chök ie' tso'.

**Pedro tò iché tò Jesús dör wé pairine'bitu idi' wa s'blúie e'**

(*Marcos 8.27-30; Lucas 9.18-21*)

<sup>13</sup> Mik ie'pa de ká kiè Cesarea Filipino, etã Jesús tò ittökatapa a ichaké:

—Ye' dör S'ditsö Alà, ¿ima e' cheke pè' tò ye' dör yi?

<sup>14</sup> Ie'pa iüté:

—Welepa tò icheke tò be' dör Juan S'wöskuökwak. Welepa skà tò icheke tò be' dör Skéköl tteköl bak kiè Elías shkenekane e'. Welepa skà tò icheke tò be' dör Skéköl tteköl bak kiè Jeremías ö Skéköl ttekölpa skà bak e' wele.

<sup>15</sup> Ie' tò ie'pa a ichaké:

—Erè ¿ima a' ichè, ye' dör yi?

<sup>16</sup> Simón Pedro tò iüté:

—Be' dör wé pairine'bitu idi' wa sa' blúie e'. Be' dör Skéköl chók Alà e'.

<sup>17</sup> Jesús iché ie' a:

—A Simón, Jonás alà, ayècha buaè be' dör. Ì ché be' tò e' kè mène s'ditsö wã be' a, e' mé ye' Yé tso' ká jai a' e' tò be' a. <sup>18</sup> E' kuëkì ye' be' a ichè tò be' dör Pedro (kiè e' wã kiane ché ák). Be' dör wes ák dör u katabloie es, e' wa ye' ichapa kí döraè tajè. Ì qos tso' dò duèwã diché, e' kè e'

alòpakã ie'pa kí. <sup>19</sup> Ì blúie Skéköl tso' e' wékkö kköppóo kéwö meke ye' tò be' a. Ye' tò kawö meke be' a ye' tté buaè pakök as Skéköl dò s'tso' tajè e' blúie. E' dör wes blu' eköl kanè méso tò blu' wékkö kköp-pèe as s'döwajã es. Ì kè kéwö mène be' wã ká i' a, ese kè kéwö mène Skéköl wã. Nies ì kéwö mé be' tò ká i' a, ese kéwö me'bak Skéköl tò.

<sup>20</sup> E' ukuökì tã Jesús kè wã ittökatapa kàne yi a ichök tò ie' dör wé pairine'bitu idi' wa s'blúie e'.

**Jesús e' biyó ché tò ie' tterawã**

(*Marcos 8.31–9.1; Lucas 9.22–27*)

<sup>21</sup> E' ukuökì tã Jesús tò itsá ché ittökatapa a:

—Ye' kawötã shkökmi Jerusalén, ee judiowak kuëblupa ena sacerdotepa wökirpa ena s'wöbla'uk ttè dalöiëno wa wakpa tò ye' we'ikeraè tajè. Ye' tterawã erè e' kí ká de mañat etã ye' shkerdakane.

<sup>22</sup> Pedro tò ie' kiémi bánet tã iuñémiitö:

—¿A Skékëpa, kè e' char! ¿E' mú kè dör es! ¿Kè e' wamblénuk be' tã!

<sup>23</sup> Erè ie' e' wötrée Pedro kke tã iché:

—¿A Satanás, be' yúshka bánet ye' yöki! Be' tso' ye' wökló'uk. Be' kè tò íyi suè wes Skéköl tò isueke es; be' tò isueke wes s'ditsö tò isueke es.

<sup>24–25</sup> Ie' tò iché ittökatapa a:

—Yi e' tsatkak ittèwã yöki, ese kè ulã a sene michoè dòpa. Erè yi e' mettsã ttèwã ye' dalérmik, ese ulã a idöraè. E' kuëkì yi e' yuak ye' ttökataie, ese kè kàne tkinukia e' kí. E' skéie ikawötã e' chök dò ittèwã wötèulewã krus mik ekkè. Es ie' kawötã shkök ye' itökì. <sup>26–27</sup> Ye' dör S'ditsö Alà, e' döraè Skéköl olo tã tajè e' a, nies Skéköl biyöchökwakpa tã. Ye' tò sulitane patuëraè eköl eköl wes iser es. E' kuëkì íyi ulitane tso' ká i' a e' de a' ulã a, erè sene michoè kè dé' a' ulã a, e' tã e' dör ¿iie bua' a' a? Sene michoè kè patörpa ì wa. <sup>28</sup> Mokì ye' tò a' a ichè tò a' tso' íe,

e'pa welepa tö ye' dör S'ditsö Alà, e' dat-se blu'ie e' sueraë kam iblërulur e' yöki.

### Jesús tö ilo tajë e' kkaché ittökatapa a

(Marcos 9.2-13; Lucas 9.28-30)

**17** E' ki ká de teröl, eta Jesús wa Pedro ena Santiago ena Juan dör Santiago el, e'pa mítser e' ta ká bata kakkë ese ki. <sup>2</sup>Ee ie'pa wö shaë ie' manenetsa mfa kua'ki, iwö olobune wes diwö es, nies idatsi' manenetsa mfa saruruë wönarke dalölöë. <sup>3</sup>E' bet ta ie'pa tö Skëköl ttekölpa bak ká iaiäë kië Moisés ena Elías e'pa suë kapakök ie' ta. <sup>4</sup>Eta Pedro tö iché ie' a:

—A Skëkëpa, buaë se' tso' ie. Be' ki ikiane, e'ma ye' tö úla yuëka mañatkuela; etkue be' a, etkue Moisés a, etkue Elías a.

<sup>5</sup>Ie' ttökeia e' wösha ta mochka wönarke dalölöë ese tö ie'pa kitéwa. Mochka shua ie'pa tö ttö tse tö iché: “Se dör ye' alà dalër tajë ye' éna, e' wër buaë shutë ye' wa. Ie' tö iütó.”

<sup>6</sup>Mik e' tse ittökatapa tö ta ie'pa suanéka tajë, e' kueki ie'pa e' télur wöwakköt. <sup>7</sup>Jesús dewa ie'pa o'mik ta ie' tö ie'pa kéwa ta ichéitö ie'pa a:

—A' e' kóka; kè a' suanuk.

<sup>8</sup>Mik ie'pa tö ká sué, eta ie'pa isué tö kè yi ku'ia, Jesús è dur.

<sup>9</sup>Ie'pa bitëkene wa'k, eta Jesús tö ie'pa a iché:

—Ì sué a' tö e' kè pakar yi a dò mik ye' dör S'ditsö Alà, e' ttéwa shkenekane e' ukuöki.

<sup>10</sup>Ie'pa tö ie' a ichakè:

—¿Ì kueki s'wöbla'uk ttè dalöiëno wa wakpa tö icheke tö Elías kawötä dökne kéwe wé pairine'bitü idi' wa s'blúie e' yöki?

<sup>11</sup>Ie' tö ie'pa iuté:

—E' yëne tö Elías datsekene kéwe. Ie' tö ì kos kanewëketke kéwe wé pairine'bitü idi' wa s'blúie e' yöki. <sup>12</sup>Erë ye' tö a' a iché tö ie' dë'bak, erë ie'pa kè éna iane tö ie' idir. Ie'pa tö iwe'ik siarë wes ie'pa ki ikiane es. Es nies ie'pa tö ye' dör S'ditsö Alà e' we'ikeraë.

<sup>13</sup>Ie'pa éna iane tö ie' tso' Juan S'wöskuökwak e' chök.

### Duladula eköl tteke aknama tö e' bua'wëne Jesús tö

(Marcos 9.14-29; Lucas 9.37-43)

<sup>14</sup>Mik Jesús ena ittökatapa demine wé pë' daparke tajë ie' panuk ee, eta wëm de eköl ie' ska' ta ie' e' tkéwa kuchë ki Jesús wörki ta ichéitö ia:

<sup>15</sup>—A kékëpa, ye' alà saü er siarë wa. Ie' kirirke siarë, wekkë alè ta ilineka, mikle ta ie' anerö bö' a, mikle ta di' a. <sup>16</sup>Kam be' dò eta ye' wa idebitü be' ittökatapa a erë ie'pa kè a ibuarne.

<sup>17</sup>Jesús tö iché:

—A pë' kè erblöta' Skëköl mik, a' kè éna ká ane. ¿Mik ye' sermirö a' ta? ¿Kos ye' tö a' dalë'tsemirö? Kabëla ñe' tsúbitü ña.

<sup>18</sup>Eta ie' tö aknama uñé ta itrë'wëshkar duladula a. E' wösha ta duladula buanene buaë.

<sup>19</sup>E' ukuöki ta ittökatapa tté ie' ta bánet. Ie'pa ie' a ichakè:

—¿Ì kueki sa' kè a aknama e' trëshkar?

<sup>20</sup>Ie' iché ie'pa a:

—A' kè erblöku' Skëköl mik mokië e' kueki. Moki ye' tö a' a iché tö a' erblópa Skëköl mik tsir mostaza wö dör tsirla ekkë, e' ta a' tö ichëmi kabata wä a: 'Be' e' skótsa yúshka bánet', ta imiraä bánet. A' erblöke moki Skëköl mik, e'ma kè ì dör darëre a' a wë. <sup>21</sup>††

††**17:21** Yëkuö këchke wele tö versículo 21 ki kuötkéka. E' tö iché i' es: *Erë aknama ese yëmittsa ikië S'yë a ena batsë e' è wa.*

### Jesús skà e' biyó ché tö itterawa

(Marcos 9.30-32; Lucas 9.43-45)

<sup>22</sup> Mik Jesús ena ittökatapa ñi dapa'wé Galilea, eta i' tö i'pa a ichè:

—Ye' dör S'ditsö Alà, e' wömerdattsa pé' ulà a, <sup>23</sup> ta ye' tterawarakitö, erè e' kī ká de mañat ta ye' shkerdakane.

Ttè e' tö i' ttökatapa eriawé tajè.

### Inuköl shteke Skëköl wé kanéwoie ese patuë Jesús tö

<sup>24</sup> Mik Jesús ena ittökatapa de Cafarnaúm, eta pé' tö inuköl shteke Skëköl wé kanéwoie e'pa de Pedro ska' ta i' a ichaké:

—¿Be' wöbla'ukwak tö inuköl patuëkesö Skëköl wé kanéwoie e' patuëta'?

<sup>25</sup> Pedro tö i' iüté:

—Tó, ipatuëta'.

E' ukuökī ta mik Pedro de weshke, eta Jesús tté i' ta kewe ta ichéitö i' a:

—A Simón, ¿ima be' ibikeitsè? ¿Yi ña'weke ká wökirpa tö, iká wakpa ekkā ö pé' kuakī?

<sup>26</sup> Pedro tö iüté:

—Pè' kuakī.

Jesús tö iché:

—E' yène, e' kuekī ila'r kè kawö-ta ipatauk. <sup>27</sup> Erè ipataüsö as i'pa kè ulurka se' kī. E' kuekī be' yú batsöri kkömik eta biklö' uyómi di' a. Eta nima tsá kli'wé be' tö e' kkò shuppöö, ee be' tö inuköl kuërae et. E' tsúmi i'pa patuoie, e' dör wè' se' böi nuì patuoie.

### Yi dör ibua'ie Skëköl wöa

(Marcos 9.33-37; Lucas 9.46-48)

**18** E' kéwö ska' ta Jesús ttökatapa de i' ska' ta i' a ichakérakitö:

—Ì blúie Skëköl tso' e' shua ¿yi dör ibua'ie imalepa tsata?

<sup>2</sup> Jesús tö alala kié eköl duéser i'pa shushaë <sup>3</sup> ta ichéitö i'pa a:

—Mokī ye' tö a' a ichè tö a' kè er mane'ù as a' dò wes alala i' es, e' ta a'

kè döpawā ì blúie Skëköl tso' e' a. <sup>4</sup> Yi er mane'wé ta i' e' wöewa wes alala i' es, ese döraë ibua'ie ì blúie Skëköl tso' e' a. <sup>5</sup> Yi tö alala i'se kiéwa ye' ttö wa, ese tö ye' wák kiéwa.

### A' tso' wösh wa ì tö s'ké ì sulu wamblök ese yökī

(Marcos 9.42-48; Lucas 17.1-2)

<sup>6</sup> “Yi tö ikkëpala erblöke ye' mik, esepa eköl kè ì sulu wamblök, esepa weirdaë tajè shute tkòka ak wawoie muéwa ikuli' a batrèemi dayè a e' tsata. <sup>7</sup> Ýi tso' tajè s'erkiöwoie ì sulu wamblök, e' kuekī wéstela ina ká i' wakpa ta. Kekraë ì sulu tso' s'erkiöuk, erè yi tö s'ké ì sulu wamblök, wéstela ina esepa ta.

<sup>8</sup> “A' ulà ö a' klö tö a' kè ì sulu wamblök e' ta itöö uyómi bánet. A' döwa sene mi cho a ulà etkè ö klö etkè, e' dör buaë. E' skéie a' uyèwa bö' ñar mi choë e' a ulà bötkè ena klö bötkè e' dör suluë. <sup>9</sup> Nies s'wöbla tö s'ké ì sulu wamblök, e' ta iyóttsa uyómi bánet. A' döwa sene mi cho a wöbla ek è wa, e' dör buaë. E' skéie a' uyèwa bö' ñar mi choë e' a wöbla böké, e' dör suluë.

### Obeja chowa e' pakè

(Lucas 15.3-7)

<sup>10-11</sup> “A' e' kkönú, ikkëpala kè watarttsa. Ye' tö a' a ichè tö Skëköl biyöchökwakpa tso' i'pa kkönuk e'pa tso' kekraë ye' Yé tso' ká jai a e' wörki i'pa tté chök.

<sup>12</sup> “¿Ima a' tö ibikeitsè? Wëm eköl wa obeja tso' döka cien ta e' etö chowa, e' ta ¿ì wèmi i' tö? Obeja döka dabom suliyök kī sulitu (99) e' meraat i' tö kañika ta imía obeja chowa e' yulök. <sup>13</sup> Mokī ye' tö a' a ichè tö mik i' tö ikué, eta i' ttsë'nene buaë tkòka imalepa kè chë'wa e' tö i' ttsë'wè e' tsata. <sup>14</sup> Es Skëköl dör a' Yé tso' ká jai a, e' kè kī ikiane tö ikkëpala chöwa ekla wëia.

## Wes se' ké er buanukne ñi kî

(Lucas 17.3)

<sup>15</sup>“A' yami wele tō ì sulu wamblé a' kî, e' tã a' yú ie' ska' tã ì sulu wambléitō e' chō ie' a, e' shulō a' böl è tō. Ie' tō a' ttō iuté, e' tã a' er buanene ñi kî. <sup>16</sup>Erë ie' kè wã a' ttō iutène, e' tã a' yamipa tsúmi eköl ö böl, ttè kî a' tō ie' kkatè e' ttekölíe as ior wes itso' kitule es. E' tō ichè, “Ttè kos shulékesō etã ittekölpa kiane böl ö mañal ichoie tō mokî idir ö au.” <sup>17</sup>Erë kè ie' wã e'pa ttō ttsène, e' tã ichō ye' icha erule e' kukua. Ñies kè iwã ie'pa ttō iutène, e' tã isaú wes pè kè tō Skéköl dalöie es ö wes inuköl shtökwapka Roma wökirpa a e'pa suè es.

<sup>18</sup>“Mokî ye' tō a' a' ichè tō ì cheke a' tō tō e' dör suluë ká i' a, ese cheraë Skéköl tō tō e' dör suluë. Ñies ì cheke a' tō tō e' dör buaë ká i' a, ese cheraë Skéköl tō tō e' dör buaë.

<sup>19-20</sup>“Ye' tō ì skà chekene a' a: Wé a' böl ö mañal ñi dapa'wé ye' ttō wa, ee ye' tso' a' tã. E' kuekî a' böl er méwã ñikkëë ká i' a ilè kiök ye' Yé tso' ká jai a e' a, e' tã imeraëitō a' a.”

<sup>21</sup>Etã Pedro dewã Jesús ska' tã ichakéitō:

—A Skékëpa, ¿bitökicha ye' yami tō ì sulu wamblé ye' kî, e' olo'yèmiyö ikî? ¿Mokî dò kul ekkè?

<sup>22</sup>Ie' iituté:

—Kè ye' tō be' a' ichè kul è. Ye' ichè tō be' kawötã inuì olo'yök ikî kekraë bitökicha ekkè<sup>††</sup>

### Blu' er buaë ché ikanè méso eköl a

<sup>23</sup>“Ì chéyö a' a e' wã pakekeyö ttè i' wa. Ì blúie Skéköl tso' e' dör wes blu' eköl éna nuì shulak ikanè méso pa tã es. <sup>24</sup>Ie'

tō ie'pa nuì shulémitke etã ikanè méso eköl debitu ie'pa wã ie' wörki, e' wã nuì tso' taië shute<sup>¶¶</sup> <sup>25</sup>Ie' kè a' nuì ekkè pa-torpa, e' kuekî blu' tō ie' ena ilaköl ena ila'r ena ì kos tso' iwã e' watauktã ké inuì ekkè patuöie. <sup>26</sup>Ikanè méso e' tkéwã kuchè kî blu' wörki tã ikköché taië ie' a: 'Be' we'ikèyö, ye' panú béré tsir, e' wa ye' tō be' patuëttsã seraã.' <sup>27</sup>Blu' ie' sué er siarè wa, e' kuekî ñnarke kos e' olo'yéitō ikî seraã tã iémine bèrè.

<sup>28</sup>“Erë mik kanè méso e' mía, etã ie' tō kanè méso ièköl kué ña'weke ie' tō elkela è<sup>§§</sup> Tã iklö'wéwaitö ikuli' a tuéwã darèrèë tã ichéitö ia: '¿Be' ñarke ye' ulà a, e' pataúttã ña!' <sup>29</sup>Tã ièköl e' tkéwã kuchè kî ie' wörki tã ikköché taië: 'Be' we'ikèyö, ye' panú béré tsir, e' wa yö be' patuëttsã seraã.' <sup>30</sup>Erë ie' kè wã ièköl kköché e' iutène. Ie' tō iwötökwa patké s'woto wé a' dò mik inuì patuëttsaitö seraã etã. <sup>31</sup>Mik kanè mé-sopa malepa tō ittsé, etã e' tō ie'pa eriawé taië. E' kuekî ie'pa mía blu' ska' tã ichéka seraã. <sup>32</sup>Etã blu' tō kanè méso e' kiök patké tã ichéitö ia: '¿Be' dör pè' suluë! Ye' tō be' kî be' nuì taië e' olo'ya' seraã be' kköyè' ye' a e' kuekî. <sup>33</sup>¿Ì kuekî be' kè wã be' yami sune er siarè wa wes ye' be' su' es?' <sup>34</sup>Etã blu' ulunekã taië, e' tō ikanè méso wötökwa patké as iwe'ikö ie'pa tō siarè dò mik inuì patonettã seraã etã. <sup>35</sup>Es ñies a' yami tō ì sulu wamblé a' kî e' nuí kè olo'yè a' tō ikî er mokî wa, e' tã ye' Yé tso' ká jai a e' tō a' we'ikeraë siarè.”

### Se' ñi òwa ese ché Jesús tō

(Mateo 5.31-32; Marcos 10.1-12; Lucas 16.18)

**19** Mik Jesús tō ttè ekkè ché one, etã ie' e' yéttã Galilea mía Judea tã

<sup>††</sup>18:22 *kekraë bitökicha ekkè*: Griegoie e' dör dabom kuryök döka kuktökicha (70 × 7).

<sup>¶¶</sup>18:24 *nuì taië shute*: Ttè i' dör inuköl kiè talento e' mil döka dabop. I'ñe tã e' ské dör dólares döka millón döka dabom skeyök (50,000,000)

<sup>§§</sup>18:28 *elkela è*: Ttè i' dör inuköl kiè *denario* ese döka cien.

itkattsa Jordán a wishet. <sup>2</sup>Taië pë' dami ie' itòkì e'pa shuà wépa kirirke esepa kos bua'wéitò.

<sup>3</sup>Età fariseowakpa welepa de ie' ska' ta ie'pa tò ie' a ichaké itsaioie:

—¿Wépa a kawö ta' itayë owa íyi ulitane kuekì?

<sup>4</sup>Ie' tò ie'pa iüté:

—Ì tso' kitule Skèköl yèkkuö kì, ¿e' kè sune a' wa? E' tò ichè tò tsawe ta Skèköl tò se' yò' wëm ena alaköl. <sup>5</sup>Ie' tò iyè': 'E' kuekì wépa kè serpaia iyé ena imì e'pa dapömik, ta iserdawa alaköl ta. Ie'pa böl serdaë nita ta ie'pa mía wes wák eköl è es.\* Es ikiteat <sup>6</sup>e' kuekì ie'pa kè ià böl, ie'pa yöne wes wák eköl è es. E' kuekì wépa batséwa Skèköl tò esepa kè batsökök yi tò.

<sup>7</sup>Età ie'pa tò ie' a ichaké:

—E' dör es, e' ta ¿ì kuekì Moisés tò iyë'at tò wëm tò itayë éwa, ese wák kawöta ñi owa yèkkuö muk ia?

<sup>8</sup>Ie' iüté:

—A' er darèrè, e' kuekì Moisés tò kawö me' a' a' tayë ökwa, erè tsawe ta kè idör es. <sup>9</sup>Ye' tò a' a' ichè tò yi tò itayë éwa, kè dör itayë trèr kuekì, ese tò alaköl skà tséwane, e' ta e' wa isenewabak kewe e' dalösewéwaitò.

<sup>10</sup>Jesús ttókatapa tò iché ie' a:

—E' dör es e' ta bua' idir sa' a' tò kè sa' alaköl tsùwa.

<sup>11</sup>Ie' tò ie'pa iüté:

—Ì ché a' tò e' kè dör sulitane a, e' dör wépa a imène esepa è a. <sup>12</sup>Wépa welepa dör kachir ie'pa wák dè'ka es e' kuekì. Welepa skà yueke s'kapeyökwa kpa tò kachirie. Iskà tso' esepa serke kachirie ì blúie Skèköl tso' e' kané kuekì. Wépa sermi es, esepa senú es.

## Jesús tò ikié S'yé a ala'rla kì

(Marcos 10.13-16; Lucas 18.15-17)

<sup>13</sup>Pë' wa ala'rla debitu Jesús ska' as ie' ulà mùka iki ena ikiò S'yé a iki. Erè ittókatapa tò pë' unélor. <sup>14</sup>Erè ie' tò iché:

—As ala'rla bitu ye' ska'. Wépa dör wes ie'pa es, esepa blúie Skèköl tso', e' kuekì kè iwöklò'waria.

<sup>15</sup>Età ie' ulà méka ie'pa kì, e' ukuökì ta imía bánet.

## Inuköl blú eköl tò Jesús a ichaké

(Marcos 10.17-31; Lucas 18.18-30)

<sup>16</sup>Wëm eköl debitu Jesús ska' ta ie' a ichaké:

—A S'wöbla'ukwak, ¿ì buaë wëmi ye' tò as sene michoë dò ye' ulà a?

<sup>17</sup>Ie' tò iüté:

—¿Ì kuekì be' tò ye' chaké ì dör buaë ese kì? Skèköl eköl è dör buaë. Be' kì sene michoë kiane, e' ta ttè me'atbak ie' tò dalöiëno e' dalöiö.

<sup>18</sup>Ie' tò Jesús a ichaké:

—¿Ttè wéne?

Ie' iüté:

—'Kè a' kawö ta' s'ttökwa, kè a' kawö ta' s'senewabak e' dalöseukwa, kè a' kawö ta' akblök, kè a' kawö ta' s'kkatök kachè wa, <sup>19</sup>a' yé ena a' mì dalöiö, ñies a' malepa dalëritsó wes a' wákpa e' dalër es.†

<sup>20</sup>Duladula tò ie' a iché:

—Ttè e' kos dalöië'bitu ye' tò iaiaë. Età ¿ì skà kianeia?

<sup>21</sup>Ie' iüté:

—Be' éna ì buaë kos wak seraa, e' ta be' yú ta ì tso' be' wa, e' wataúttsa seraa ta iské múttsa s'siarépa a. E' ukuökì ta be' shkó ye' ta ye' ttókataie. Es ta íyi buaë taië döraë be' ulà a ká jaì a.

\*19:5 Génesis 2.24 saú.

†19:19 Éxodo 20.12-16; Deuteronomio 5.16-20; Levítico 19.18



<sup>22</sup>Duladula dör inuköl blú taië, e' kuëki mik ie' tò e' ttsé etä ie' erianeka taië ta imiatke.

<sup>23</sup>Etä Jesús tò iché ittökatapa a:

—Moki ye' tò a' a' ichè tò inuköl blúpa a darërëë idir dökwa ì blúie Skëköl tso' e' a. <sup>24</sup>Iskà chëneyö a' a' tò inuköl blúpa a dökwa ì blúie Skëköl tso' e' a' e' dör darërëë tkòka kameio tkòmi datsi' yuo diké ese wöukla a' e' tsata.

<sup>25</sup>Mik e' ttsé ie'pa tò, etä ie'pa tkinewa taië ta ichéitorak:

—E' dör es e'ma çyi tsatkërmí?

<sup>26</sup>Ie'pa webléitö ta ichéitö:

—E' kè onuk s'ditsö a wes, erë Skëköl a ìyi ulitane ormi.

<sup>27</sup>Etä Pedro tò iché ia:

—Sa' tò ìyi ulitane me'at ta sa' bite be' ta. Çì dòmì sa' ulà a' e' skéie?

<sup>28</sup>Ie' tò ie'pa iüté:

—Moki ye' tò a' a' ichè tò mik ká i' manerketkene buaë aishkuö ta, etä ye' dör S'ditsö Alà e' döraë ká ulitane blúie olo ta' taië. Nies a' dör ye' ttökatapa, e'pa e' tulöraser blu' kulé döká dabom eyök kí böt e' kí, Israel ditséwöpa döká dabom eyök kí bøl e'pa wëttsuk. <sup>29</sup>Wépa kos tò iu ö iëlpa ö ikutapa ö iyé ö imì ö ila'r ö iká ese méat ye' tté kuëki, e' ta e'pa ulà a' iské dörane taië shuteë, nies aishkuö ta sene michoë döraë ie'pa ulà a. <sup>30</sup>Erë i'ñe ta se' taië tso' kewe esepa döraë bataie ena se' tso' bataie i'ñe ta esepa döraë keweie.

### Kanè mésopa patuë e' tté

**20** “Ì blúie Skëköl tso' e' ta itköke wes itka wëm eköl ta es. E' mía bla'mi kanè mésopa yulök ie' uva tso' tkëule e' kanëuk. <sup>2</sup>Ie' tò iché ie'pa a: 'Ye' tò a' patuëke kos s'patorke ká etk ekkë, e' dör denario etk.' E' dör buaë ie'pa a ta ie' tò ie'pa patké kanëblök. <sup>3</sup>Diwö de sulitu (9) etä kanè wák míane kanè mésopa skà

yulök etä eë ie' tò isuë tò wépa tultur ñala ska' kè ku' kanëblök. <sup>4</sup>Ie' tò ie'pa a iché: 'A' yú kanëblök ye' kanè a ta ye' tò a' patuëke kos s'patorke moki ekkë.' Etä ie'pa mía kanëblök. <sup>5</sup>Diwö de bata a ta ie'pa mía kanè mésopa skà yulök etä ie' tò ie'pa patké kanëblök. Nies tsáli diwö de mañat etä ie' mía kanè mésopa skà yulök ta ie'pa patkéitö nies kanëblök. <sup>6</sup>Diwö dökette skel etä ie' mía kanè mésopa skà yulök, eë ie' tò wépa kuë iëter kè ku' kanëblök. Ie' tò ie'pa a ichaké: 'Çìók a' iëter nië ie kè ku' kanëblök?' <sup>7</sup>Ie'pa tò iüté: 'Kè yi wa sa' a kanè mène.' Etä ie' tò ie'pa a iché: 'A' yú kanëblök ye' a.'

<sup>8</sup>“Mik ká tuine, etä kanè wák tò iché ikanè mésopa pataukwak a: 'Kanè mésopa kió etä ie'pa pataú. Wépa debitu bataie, e'pa pataúmi kewe, ta wépa debitu kewe, e'pa pataú bataie.' <sup>9</sup>Etä kanè mésopa debitu kanëblök tsáli diwö skel, e'pa patone kewe. Ie'pa kos patone denario et et. <sup>10</sup>Mik kanè mésopa debitu kanëblök kewe, e'pa patorketke etä ie'pa tò ibikeitsé: 'Sa' patorke aishet sa' malepa tsata.' <sup>11</sup>Erë ie'pa kos patone denario et et è. <sup>12</sup>E' tò ie'pa kabewéka ta iché kanè wák a: 'Wépa ikképa debitu bataie kanëblé bërberla è, e' skéie sa' kanëblé nië, ña'wé diba tò, nies shtrine taië. Etä çwes be' tò ie'pa patuë kos be' tò sa' patuë ekkë?' <sup>13</sup>Erë kanè wák tò ikanè méso eköl iüté: 'A yami, ye' kè ku' ì sulu wamblök be' ta. Se' tté mé ni a tò ye' be' patuëke denario etk. <sup>14</sup>E' kuëki be' inuköl klö'ü ta be' yúshka. Wëm debitu kanëblök ibataie ese a ye' éna inuköl mak kos ye' tò be' a imé ekkë etä çwes ide? <sup>15</sup>Ye' a kawö ta' ì wak ye' éna ye' inuköl wa, ese woie. Ye' tò ilè kakmeke yile a, çe' tò be' ukyëweke ye' ki?'

<sup>16</sup>“Es s'tso' bataie esepa döraë keweie ena s'tso' keweie esepa döraë bataie.”

**Jesús e' biyó chéne tó ie' tterawá pè' tó**  
(*Marcos 10.32-34; Lucas 18.31-34*)

<sup>17</sup> Jesús ena ittókatapa dabom eyók kǐ bōl (12), e'pa mirká Jerusalén tǎ ie' tó ie'pa kié bánet tǎ ichéitō iǎ:

<sup>18</sup> —Se' mirká Jerusalén i', etǎ ee ye' dōr S'ditsō Alà, e' merdattsa sacerdotepa wōkirpa ena s'wōbla'uk ttè dalōiēno wa wakpa ulà a. Ie'pa tó ye' kichateraē. <sup>19</sup> Ye' merattsarakitō pè' kè dōr judiowak esepa ulà a. E'pa tó ye' wayueraē pperaē siarē tǎ ye' tterawarakitō wōtēule krus mik. Erē e' kǐ kǎ de mañat, etǎ ye' shkerdakane.

**Santiago ena Juan e'pa mǐ**  
**tó kawō kié Jesús a**  
(*Marcos 10.35-45*)

<sup>20</sup> Santiago ena Juan dōr Zebedeo ala'r e'pa mǐ de ie'pa tǎ Jesús ska' tǎ ie' tkéwǎ kuchē kǐ iwōrkǐ ilè kioie ie' a. <sup>21</sup> Jesús tó ie' a ichaké:

—ǐ kiane be' kǐ?

Ie' tó iūté:

—Ye' tó be' a kawō kieke tó mik be' tkēnekǎ s'blúie, etǎ ye' alà ekōl tkówǎ be' ulà bua'kka, ekōl be' ulà baklǐ'kka s'wēttsuk be' tǎ.

<sup>22</sup> Ie' iūté:

—ǐ kieke a' tó e' kè wǎ jcher a' wǎ. ǐYe' tkǎ wayarmi a' a? ǐA' e' ché weinuk wes ye' weirdaē es?

Ie'pa tó iūté:

—Tó, sa' dirmi.

<sup>23</sup> Ie' iché:

—Mokǐ ye' tkǎ' wayeraē a' tó, a' weirdaē wes ye' es. Erē e' tkōkser ye' ulà bua'kka ö ye' ulà baklǐ'kka, e' kè kēwō menuk ye' a. E' tso'tke ye' Yé wǎ klōule yi a imekeitō esepa a.

<sup>24</sup> Mik ttè e' ttséwǎ ittókatapa malepa dōkǎ dabom eyók (10) e'pa tó, etǎ ie'pa ulunekǎ ie'pa bōl ñe' kǐ. <sup>25</sup> Erē ie' tó ie'pa ulitane kié tǎ iché iǎ:

—A' wǎ ijcher tó pè' kè tó Skékōl dalōiē, esepa wōkirpa kos e' alōkeka ie'pa kǐ kekraē, ñies iblúpa tó ie'pa patkeke kēsik wa. <sup>26</sup> Erē a' kè kàne e' wamblök es. E' skéie, a' isie e' yuak a' wōkirie, ese kawōtǎ e' wōökwa imalepa dikǎ diōshēt ikanè mésoie. <sup>27</sup> Ñies a' isie e' yuak ibua'ie a' malepa tsatǎ, ese kawōtǎ e' muktsǎ imalepa a kanè mésoie. <sup>28</sup> Ye' dōr S'ditsō Alà, e' kè dē'bitu ǎs yi tó ye' kimù. Ye' dē'bitu ie'pa kimuk ena e' muktsǎ ttèwǎ pè' tso' taiē e' nuì skéie. E' kuēkǐ a' kawōtǎ e' wōökwa a' malepa kanè mésoie.

**Wēpa bōl wōbla kè wawēr**  
**e'pa bua'wé Jesús tó**

(*Marcos 10.46-52; Lucas 18.35-43*)

<sup>29</sup> Jesús ena ittókatapa e' yéttsǎ Jericó, e'pa itōkǐ pè' mirwǎ taiē. <sup>30</sup> Etǎ wēpa bōl wōbla kè wawēr, e'pa tulur ñalǎ ska'. Mik ie'pa tó ittsé tó Jesús dami, etǎ ie'pa tó iché ǎneule:

—ǐA kēkēpa, s'blú David bak e' aleri, sa' saú er siarē wa!

<sup>31</sup> Pè' tó wēpa e' uñeke ǎs ie'pa si-wǎ'blōwǎ, erē ie'pa kǐ ǎnekǎ taiē:

—A kēkēpa, David aleri, sa' saú er siarē wa

<sup>32</sup> Jesús e' duéser tǎ wēpa wōbla kè wawēr e'pa kiéitō tǎ ie'pa a ichakéitō:

—ǐ kiane a' kǐ?

<sup>33</sup> Ie'pa iūté:

—A kēkēpa, sa' wōbla bua'ú.

<sup>34</sup> Ie' tó ie'pa sué er siarē wa tǎ ie'pa wōbla kéitō. E' wō shǎ tǎ ie'pa wōbla buanene tǎ imiyal ie' tǎ.

**Jesús demi Jerusalén**

(*Marcos 11.1-11; Lucas 19.28-40; Juan 12.12-19*)

**21** Mik Jesús ena ittókatapa demi tsǐnet Jerusalén, kǎ kié Betfagē tso' Olivo kēbata a ee, etǎ ie' tó ittókatapa kié bōl <sup>2</sup> tǎ ichéitō iǎrak:

—A' yú wì u wène eruleë ee. Mik a' demi ee, etā bet tā a' tō burro alaki kueraë etō moulewa ena ilala dur iō'mik. E' wōtsōō tā itsūbitu nā. <sup>3</sup>Yile tō a' a' ichaké, e' tā iūtō: 'Skëkëpa kī ikiane, e' wa ie' tō imène.'

<sup>4</sup>Itka es as ì yē'atbak Skëköl tteköl tō e' wà tkò es. Ie' tō iyë':

<sup>5</sup>'Ichó Jerusalén wakpa a:

'Ye' ttò tso', a' blú datse a' ska' e' tkëuleka burro kī.

Ie' dör pē' bèrè kè e' tso'ta'ka.

Ie' datse burro alala kī, e' dör iyiwak tso' dali oie ese.'\*

Es Skëköl tteköl tō iyē'at.

<sup>6</sup>Ittōkatapa míyal tā iwérakitō wes Jesús tō iché ie'pa a es. <sup>7</sup>Ie'pa wā burro alaki ena ilala bitetser Jesús a. Ie'pa tō ipaio kikké méka burro alala kī tā Jesús e' tkékā ikī. <sup>8</sup>Pē' tso' taië e'pa tō ipaio kikké shuélor nāla kī, nīes welepa tō kal kò télor shuélor nāla kī Jesús nālè tsoie. <sup>9</sup>Pē' mirwā keweie Jesús yōkī nīes itōkī, e'pa ulitane arke taië:

—¡Ie' i' dör se' blú bak David e' aleri, e' kikkōkasō! Ayëcha buaë ie' datse Skëköl ttò wa. ¡Skëköl tso' ká jai a e' kikkōkasō!†

<sup>10</sup>Mik ie' dewā Jerusalén, etā e' wakpa aláneka taië tā ichaké:

—¿Yi dör ie'?

<sup>11</sup>Pē' datse taië ie' tā, e'pa tō iuté:

—E' dör Jesús. Ie' dör Skëköl tteköl datse Nazaret ate Galilea e'.

### Jesús tō Skëköl wé batse'wé

(*Marcos 11.15-19; Lucas 19.45-48; Juan 2.13-22*)

<sup>12</sup>Etā Jesús dewā Skëköl wé a. Etā wépa tso' ee íyí taük ena íyí wataük

e'pa kos tré'wéyal ie' tō. Inuköl mane'uk<sup>s</sup> wakpa mesa trélurkaitō. Nīes nuböl wataükwakpa kula' trélurkaitō. <sup>13</sup>Ie' iché ie'pa a:

—Skëköl tō iyē'at iyëkkuō kī: 'Ye' u kirdaë tto ye' tā wé', \*\* erè a' tō iia'wéka akblo wéie.

<sup>14</sup>Etā s'wöbla kè wawër ena kè s'shko bua' esepa debitu Jesús ska' Skëköl wé a tā ie' tō ie'pa bua'wé. <sup>15</sup>Ala'rla tso' ee e'pa tō iché aneule: '¡S'blú bak David, e' aleri kikkōkasō!' Mik sacerdotepa wōkirpa ena s'wöbla'uk ttè dalöiëno wa wakpa tō ì wé Jesús tō e' sué, ena ima ala'rla tō ie' ché e' ttsé, etā ie'pa uluneka taië <sup>16</sup>tā ichéitorak Jesús a:

—Ì chök ala'rla tso', ¿e' ttsé be' tō?

Ie' tō ie'pa iuté:

—Tó, e' ttséyo. Erè ima e' ché Skëköl yëkkuō tō, wësua e' kè suule a' wā. E' tō ichè:

'A Skëköl, ala'rla ena bēbēpala tsu'yōkeia, esepa kébō e' kikkōka.††

<sup>17</sup>Etā ie' tō ie'pa méat tā imía ká kië Betania ee. Ee ie' kapére.

### Higo klò siwéwa Jesús tō

(*Marcos 11.12-14,20-26*)

<sup>18</sup>Bule es bla'mi tā Jesús michone Jerusalén tā ie' mirwā nāla wa tā ie' dué bli wā. <sup>19</sup>Ie' tō higuera klò ter elka sué tā imía iwö yulök katè. Erè kè iwö tā, ikò è arwā taië. E' kuekī ie' tō iché kal e' a:

—¡Kè be' wörpaia yës!

E' wöshā tā higuera klò sinewami. <sup>20</sup>Mik e' sué ittōkatapa tō, etā e' tō ie'pa tkiwéwa taië, e' kuekī ie'pa tō ie' a' ichaké:

—¿Wes higuera klò sinewā bet?

‡21:5 Zacarías 9.9

†21:9 Salmo 118.26

§21:12 *inuköl mane'uk*: Judiowak a inuköl tso' wakanewè Skëköl wé è a, e' tuëkene ie'pa tō inuköl èse wa.

\*\*21:13 Isafas 56.7

††21:16 Salmo 8.3

<sup>21</sup> Ie' tò ie'pa iüté:

—Mokì ye' tò a' a ichè tò a' erblé Skèköl mik mokì, kè ibikeitsule bötböt, e' tã ì wé ye' tò, e' ormi a' a ñies. E' kíie tã a' tò ichèmi kabata wì a: 'Be' e' skóttsa íe anúwa dayè a', e' tã es iwà tköraë. <sup>22</sup> A' erblé Skèköl mik mokì, e' tã ì kos kié a' tò ie' a e' wà döraë a' ulà a.

### ¿Yi tò kawö mé Jesús a?

(*Marcos 11.27-33; Lucas 20.1-8*)

<sup>23</sup> E' ukuöki tã Jesús dewa Skèköl wé a, eë ie' tso' s'wöbla'uk. Eta sacerdotepa wökirpa ena judiowak kuëblupa de ie' ska' tã ichaké ia:

—¿Yi ttò wa be' tò íyi ikké weke? ¿Yi tò e' kéwö mé be' a?

<sup>24</sup> Ie' iüté:

—Ñies ye' tò a' a ilè chakeke, e' iüté a' tò, e' tã ye' tò a' a icheke tò yi tò ikéwö me' ye' a. <sup>25</sup> ¿Yi tò Juan patké' s'wöskuök? ¿Skèköl tso' ká jai a e' ö s'ditsö?

Ie'pa ñi iütémi tã ichéraitö: “Se' tò ichèmi tò Skèköl tò kawö mé Juan a, e' tã ie' tò se' iütémi: 'Eta ¿ì kuëki a' kè wã ie' ttè klöone?’ <sup>26</sup> Pè' ulitane tò ikl'wé tò Juan dör Skèköl tteköl. Se' suane ie'pa yöki, e' kuëki kè se' a iyènuk tò Juan a kawö me' s'ditsö tò.” <sup>27</sup> E' kuëki ie'pa tò iüté:

—Kè sa' wã ijcher.

Ie' tò ie'pa a iché:

—Es ñies ye' kè tò a' a ichepa tò yi tò ye' a kawö mé íyi ikké woie.

### Ala'r böi e' tté

<sup>28</sup> Jesús tò ie'pa a iché:

—Ttè kleekeyö a' a e' tso' a' tò. Wëm eköl alà dör böi wëpa, e' debitü ilà eköl ska' kewe tã ichéitö ia: 'A alà, be' yú kaneblök ñíne ye' uva tso' tkëule e' a.' <sup>29</sup> Ilà tò iüté: 'Kè ye' mine.' Erè e' ukuöki tã ie' tò ibikeitséne kuakì tã imía. <sup>30</sup> E' ukuöki tã iyé mía ilà ièköl ska' tã ichéitö

ia: 'Be' yú kaneblök ye' uva tso' tkëule e' a.' Ilà iüté: 'Èkèkè ye' mi'ke.' Erè ie' kè mine.

Eta Jesús tò ie'pa a ichaké:

<sup>31-32</sup> —¿Ima a' tò ibikeitsè? Ala'r böi, ¿e' wéne tò iyé ttò iüté?

Ie'pa tò ie' iüté:

—Wéne a ichéitö kewe e'.

Ie' iché ie'pa a:

—Juan S'wöskuökwak dë'bitü sene yësyësè ñalé kkachök a' a, erè a' kè wã ie' ttè klöone. Erè inuköl shtökwakpa Roma wökirpa a ena alakölpá sulusipa, esepa tò ie' ttè kl'wé. E' sué a' tò erè kè a' er maneone ie' ttè kl'woie. E' kuëki mokì ye' tò a' a ichè tò ie'pa esepa dörawa a' skéie ì blúie Skèköl tso' e' a.

### Uva kanéukwakpa sulusipa e' tté

(*Marcos 12.1-12; Lucas 20.9-19*)

<sup>33</sup> Iskà kleekeyö a' a, e' tso'. Kanè wák eköl tò uva kuatké taië tã ikköiéwãitö buaë, kaük biéitö uva diò tuoie. Ñies úla yuéitö kakkéë uva kkö'noie. E' ukuöki tã ie' tò ipeitëat wëpa wëlepá a as ie'pa tò ipataü ie' a iwörke e' kak wa. E' ukuöki tã ie' mía ká bánet. <sup>34</sup> Mik uvawö aline tso'tke wë'iaë shtè, eta ie' tò ikanè mésopa wëlepá patkémi ie' icha tsuk. <sup>35</sup> Erè kanéukwakpa tò ikanè mésopa kl'wëwã, eköl ppéraitö siarë, eköl ttéwarakitö, eköl shkáwëraitö taië ák wa. <sup>36</sup> Eta kanè wák tò ikanè mésopa ská patkémine tkòka kuaë ipatké'itö e' tsa-tã. Erè kanéukwakpa tò iwamblé ie'pa tã wës ie'pa tò iwamblé' wëpa dë'rö kuaë e'pa tã es.

<sup>37</sup> “Bata ekkè tã ie' tò iwák alà patkémi tã ie' ibikeitsé: 'Ye' alà idir, e' kuëki ie'pa tò idalöieraë.’ <sup>38</sup> Erè mik ie'pa tò ilà sué, eta ie'pa iché ñi a: 'Ie' wì dör ká i' wak alà, ká i' atdaë ie' ulà a. Ittöwasö eta es se' ulà a ká i' atdaë.’ <sup>39</sup> E' kuëki ie'pa tò ikl'wëwã yéttsa bánet tã ittéwarakitö.”

<sup>40</sup> Eta Jesús tò iché:

—Ye' tò a' a ichakè: ¿Ima a' tò ibikeitsé? Mik kanè wák dene etá ¿i weraë ie' tò kanéukwakpa e'pa ta?

<sup>41</sup>Ie'pa tò iüté:

—Ie' tò pè' sulusipa e'pa tteralur er sulu wa ta uva kanè meraneitò kanéukwakpa kuakipa tò ipatueraë buaë mik ikéwö döke bit ekkè esepa a.

<sup>42</sup>Etá ie' tò iché ie'pa a:

—Ye' tté tso' kitule Skéköl yékkuö ki, ¿e' kè sune a' wa? E' tò ichè: 'Ák waté'tsa u yuökwapka tò e' yönene ák bua'buaié.

E' kaneö' Skéköl tò, ta e' tò s'ttsé'weke buaë, s'tkinewa iwe-blök.<sup>††</sup>

Es Skéköl yékkuö tò iyè'at.

<sup>43</sup>E' kueki yö ichè a' a tò ì blúie Skéköl tso' e' kané mène a' a, erè e' yerattsaitò a' ulà a ta imeraeitò pè' kuakipa tò iwakaneweraë buaë esepa a. <sup>44</sup>Es yi klastkène ák e' mik ese parolordaë ena yi ki ák e' aneká ese yalitdawa idikia.

<sup>45</sup>Mik sacerdotepa wókirpa ena fariseowakpa tò ì kleé Jesús tò ñe' ttsé, etá ie'pa tò isuéwa tò ie' tso' ie'pa chök. <sup>46</sup>E' kueki ie'pa éna ie' kló'wakwa ee. Erè pè' tò ikló'wé tò ie' dör Skéköl tteköl, e' kueki ie'pa suane pè' yöki ta kè ie'pa wa iklónewa.

### Blu' alà ulabatske e' tté

(Lucas 14.15-24)

**22** Etá Jesús tò tté skà kleé ie'pa a i' es: <sup>2</sup>“Ì blúie Skéköl tso' e' ta itkòke wes itka blu' eköl ta es. E' tò ilà ulabatske e' kéwö tkó'weke. <sup>3</sup>Ie' tò ikanè mésopa patké wépa kiule kos e'pa a ichök: 'Blu' alà ulabatske e' diwö de, a' shkó ikéwö tkó'uk.' Erè ie'pa kè shkak. <sup>4</sup>E' ukuöki ta blu' tò ikanè mésopa kuakipa skà patkèmi e'pa a ichéitò: 'Ichó wépa kiule kos a tò ye' iyiwak bua'buaié e' duotke alinetke, katè è kianeia. E' kueki

a' shkó ye' alà ulabatske e' kéwö tkó'uk.' Etá ie'pa míyal e' chök wépa kiule e'pa a. <sup>5</sup>Erè wépa kiule kos e'pa kè wa blu' ttò iütène. Ie'pa eköl míá ikanè ki, eköl míá iyi watauk <sup>6</sup>ta imalepa tò blu' kanè mésopa kló'wéwa ta iwe'ikéraitò siarè, ñies welepa ttéwarakitò. <sup>7</sup>Etá blu' uluneká taië ie'pa ki ta ie' tò iché inip-pökwapka a: 'A' yú ie'pa kos ttökulur, ñies ie'pa u kos ña'úwa.' <sup>8</sup>E' ukuöki ta ie' tò iché ikanè mésopa a: 'Íyi ulitane tso'tke ye' alà ulabatske e' kéwö tkó'woie, erè wépa kiule e'pa dör pè' suluë, e' kueki ye' kè tò kawö mepa ie'pa a ye' alà ulabatske e' kéwö tkó'uk. <sup>9</sup>E' kueki a' yú bet ñala kibi kos ese ki ta pè' kos sué a' tò e'pa a ishkeñú kawö tkó'uk ye' ta.' <sup>10</sup>Etá ikanè mésopa míyal ñala kos ki ta pè' kos kué ie'pa tò, pè' buaë ena pè' suluë, esepa dapa'wéka wé ie'pa tso' ikéwö tkó'uk e' wé a. Es iwé wà iène taië.

<sup>11</sup>“Erè mik blu' de wépa dapane e'pa sauk, etá wém eköl suéitò kè e' paiëule wes ikawöta e' paiök ulabatsé kéwö tkó'wo es. <sup>12</sup>E' kueki blu' tò ie' a iché: 'A yami, ¿wes be' dewa? Be' kè e' paiëule ulabatsé kéwö tkó'wo ese datsi' wa.' Erè wém e' kè wa blu' iütène yés. <sup>13</sup>Etá blu' tò iché ichkò watiökwapka a: 'Wém i' ulà ena ikló moúwa a' tò ta iuyóttsa bánet stui ké a, ee ie' iuraë siarè, ikà blardaë iweir taië e' kueki.' <sup>14</sup>Ttè e' pakéyo a' a e' wà dör i' es. S'tso' taië kiule as Skéköl kló'urakitò iblúie, erè wépa shukitbakitò esepa kè dör taië.”

### S'wókirpa patauk, e' tté

(Marcos 12.13-17; Lucas 20.20-26)

<sup>15</sup>E' ukuöki ta fariseowakpa míyal ta ittérak ñita: “ilè chakösö Jesús a as ie' tò ilè sulu chò ikkatoie.” <sup>16</sup>E' kueki ie'pa tò iklépa welepa ena Herodes klépa welepa patkèmi ie' a ichakök. Ie'pa tò ie' a iché:

—A s'wöbla'ukwak, sa' wä ijcher tö këkraë be' tto mokie. Be' tö sulitane sueke ñikkë. Ima pë' tö be' cheke e' kè kî be' tkine. E' kueki be' tö s'wöbla'weke yësyësë Skëköl ñälé tté wa. <sup>17</sup>E' kueki ichó sa' a, ¿ima be' tö ibikeitsè? Roma wökir kibi patuësö ¿e' dör buaë ö kè idör buaë?

<sup>18</sup>Ie' tö isuëwä tö ie'pa tso' ie' chakök er sulu wa, e' kueki ie' iüté i' es:

—A' e' ò suluë, ¿i' kueki a' tso' ye' ma'uk tsaië? <sup>19</sup>Inuköl tso' a' wä Roma wökir patuoie, e' kkachó ye' a et.

Tä ie'pa wä inuköl wöshki ese debituia et. <sup>20</sup>Etä ie' tö ie'pa a ichaké:

—¿Yi diököl ena yi kië me'rka iki?

<sup>21</sup>Ie'pa iüté:

—Roma wökir kibi.

Etä ie' tö ie'pa a iché:

—E'ma kos Roma wökir kibi icha, ese mú ie' a, tä kos Skëköl icha ese mú ie' a.

<sup>22</sup>Mik ie'pa tö e' ttsé, etä ie'pa tkinewä. Ie'pa tö iméat tä imíyal.

### ¿S'duolur e' shkërmikane ö au?

(*Marcos 12.18-27; Lucas 20.27-40*)

<sup>23</sup>E' è diwö wa, saduceowakpa welepa de Jesús ska'. E' wakpa tö iklö'wé tö s'duowä e'pa kè shkënukkane. Ie'pa tö ie' a ichaké:

<sup>24</sup>—A s'wöbla'ukwak, Moisés tö se' a iyë'at tö wëm blënewä kè alà ate, e' tä ie' ël kawöta ischó tsukwä as ilà kòka iël blënewä, e' a. <sup>25</sup>Etökicha sa' shüwä wëpa bak dökä kul ñi ëlpa. Ikibi alaköl tséwa, erë iblënewä kè alà ate. E' ukuökî tä ie' itökî iël tö ischó tséwa, <sup>26</sup>erë ñies e' blënewä kè alà ate. Es itka iël skä tä ñies imalepa kos e'pa tä. Ie'pa kul blërulune kè alà ate yës. <sup>27</sup>Bata ekkë tä ñies ilaköl blënewä. <sup>28</sup>Wëpa kul e'pa bak alaköl eköl è tä. Mik s'duowä e'pa shkënekane, etä ¿wëne dõmi ie' wëm chókíe?

<sup>29</sup>Ie' tö ie'pa iüté:

—A' kè wä Skëköl yëkkuö suule, ñies ie' diché kè jcher a' wa, e' kueki a' wöa ká chowa. <sup>30</sup>Mik s'duolur e'pa shkënekane, etä wëpa ena alakölpa kè serpawäia ñita. E'pa míyal wes Skëköl biyöchökwakpa tso' ká jai a kè sërta'wä ñita es. <sup>31</sup>¿A' kî kiane jcheno tö mokî s'duowä e'pa shkërdakane? Í yë' Skëköl tö a' a iyëkkuö kî ¿e' kè aritsule a' wä? Ie' tö iyë' Moisés a: <sup>32</sup>'Ye' dör Abraham, Isaac ena Jacob, e'pa Këköl.'<sup>¶¶</sup> Ie' kè dör s'duowä e'pa Këköl. ¿Ie' dör s'ttsëka e'pa Këköl! E' kueki se' wä ijcher tö s'duowä e'pa shkërdakane.

<sup>33</sup>Mik pë' tö tté wa Jesús tö s'wöbla'weke ñe' ttsé, etä ie'pa tkirulune.

### ¿Skëköl tté dalöiëno e' isie dör ikibiie?

(*Marcos 12.28-34*)

<sup>34</sup>Mik fariseowakpa wä ijchenewä tö Jesús tö saduceowakpa siwä blöwëwä tté mokî wa, <sup>35</sup>etä ie'pa eköl dör s'wöbla'ukwak tté dalöiëno wa, e' tö ie' a ilè chaké itsaioie:

<sup>36</sup>—A S'wöbla'ukwak, Skëköl tté dalöiëno ¿e' wëne dör ibua'ie imalepa tsata?

<sup>37</sup>Ie' iüté:

—'Këké dör a' Këköl, e' dalëritsó a' er kos wa, a' wák kos wa ena a' erbiké kos wa.' <sup>38</sup>Tté e' dör ibua'ie tté dalöiëno malepa kos tsata. <sup>39</sup>Erë e' itökî tté skä tso', e' dör wes iët ñe' es, e' tö iché: 'A' malepa dalëritsó wes a' wákpa e' dalër es.' <sup>40</sup>Tté dalöiëno kos kitbak Moisés tö ena Skëköl ttekölpa tö yëkkuö kî, e' wöiënewä tté böt ñe' è a.

<sup>¶¶</sup>22:32 *Ye' dör Abraham, Isaac ena Jacob, e'pa Këköl*: Mik tté e' ché Skëköl tö Moisés a, etä Abraham, Isaac ena Jacob e'pa blërulunebak ká iaiaë. Wes ie' tö iché, e' wä kiane ché tö ie'pa tso' ttsëka Skëköl tä. Exodo 3.6 saü.

**¿Wé pairine'bitu idi  
wa s'blúie e' dör yi aleri?**

(*Marcos 12.35-37; Lucas 20.41-44*)

<sup>41</sup> Fariseowakpa daparkeia, <sup>42</sup> e' dalewa Jesús tò ie'pa a ichaké:

—¿Ima a' tò wé pairine'bitu idi' wa s'blúie e' ché, tò yi aleri idir?

Ie'pa ie' iuté:

—E' dör s'blú bak kiè David e' aleri.

<sup>43</sup> Eta ie' iché ie'pa a:

—E' dör es, e' ta ¿wes David tò iki' ie' Kéköl? David tò iyé' Skéköl Wiköl wa i' es:

<sup>44</sup> 'Skéköl tò iché ye' Kéköl a:

Be' e' tkóser ye' ulà bua'kka dalöiëno tajë, dò mik ye' tò be' bolökpa méro be' klò dikia eta.<sup>§§</sup>

<sup>45</sup> Ie' dör David aleri, e' ta ¿wes e' kiëmi David tò ie' Kéköl?

<sup>46</sup> Kè yi a ie' iütëneia yës. E' ukuöki ta kè yi kësik dë'kaia ie' a ì skà chakök.

**Fariseowakpa ena s'wöbla'uk ttë  
dalöiëno wa wakpa kkaté Jesús tò**

(*Marcos 12.38-40; Lucas 11.37-54; 20.45-47*)

**23** E' ukuöki ta Jesús tò iché ittökata-apa a ena s'tso' tajë e' kukua: <sup>2</sup> S'wöbla'uk ttë dalöiëno wa wakpa ena fariseowakpa a kawö mène ttë dalöiëno me'atbak Moisés tò e' wà pakök se' a. <sup>3</sup> E' kueki ì kos dalöiök a' ké ie'pa tò e' dalöiö. Erë ì dalöiök ie'pa tò a' ké ese kè dalöieta' ie'pa wákpa tò. E' kueki kè ie'pa waköwar a' tò. <sup>4</sup> Ie'pa tò ttë dalöiëno tajë darërëë ese meke s'malepa a wà dalöië. E' dör wes dali ekkeë iè s'ki es, erë ie'pa kè tò iketa'wa iulatska è wa s'kimoie. <sup>5</sup> Ì kos weke ie'pa tò e' dör s'ditsö è wö wa e' oie tò ie'pa dör pë' buaë. Skéköl ttë wele kitule datsi'tak ki, ese mueke ie'pa tò iwötsa ki ena iulà ki e' kitkoie. Nies ie'pa wöbatsö idatsi' kitkök datsi'tak bat-

sibatsi chalala buaala ese wa. <sup>6</sup> Wé ie'pa kawö tkö'uke nies nì dapa'wo wé a ese ska' kula' tso' skékëpa dalöiërta' tajë esepa a, ese ki ie'pa wöbatsö e' tköksër. <sup>7</sup> Nies ie'pa ki iklar tò pë' tò ie'pa shké'wë wes kékëpa dalöiërta' tajë ese shké'wë es wé pë' tso' tajë e'pa wöwa. Ie'pa wöbatsö tò pë' tò ie'pa kiè 's'wöbla'ukwak'.

<sup>8</sup> "Erë a' ulitane dör nies è, e' kueki kè a' nì kiök 's'wöbla'ukwak.' A' wöbla'ukwak e' dör eköl ème e' kueki kè a' nì kiök es. <sup>9</sup> Nies a' ulitane yé dör eköl ème, e' dör Skéköl tso' ká jai a e'. E' kueki kè yi kiar ká i' a 'S'yé.' <sup>10</sup> Nies a' wökir dör eköl ème, e' dör wé pairine'bitu idi' wa s'blúie e'. E' kueki kè a' nì kiök 's'wökir.' <sup>11-12</sup> Yi e' ttséka tajë, esepa wöardawa; erë yi e' wöewa diöshet, esepa kikardaka. E' kueki wé dör ibua'ie a' shua ese kawöta e' wöökwa kanè mésoie imalepa kimuk.

<sup>13-14</sup> "A s'wöbla'uk ttë dalöiëno wa wakpa, a fariseowakpa, wéstela ina a' ta! jA' e' ò sulué! Ì blúie Skéköl tso' e' wékkö wötekewa a' tò s'malepa yöki as kè ie'pa döwa. A' kè mi'wa, nies wépa shkakwa esepa wöklö'weke a' tò.

<sup>15</sup> "A s'wöbla'uk ttë dalöiëno wa wakpa, a fariseowakpa, wéstela ina a' ta! jA' e' ò sulué! A' shköke ká kos ekké ki s'yulök as ie' yuö a' ttökataie. Mik a' ikué, eta iyué a' tò ì sulu wamblök'wak tajë tköka a' wákpa tsata. Es ie' weirdaë siarë bö' ké a wes a' es.

<sup>16</sup> "A' dör wes sulaiök'wakpa wöbla kè wawër es! jWéstela ina a' ta! A' icheke: 'Yi tò ttë mé Skéköl wé wa, ese kè kawöta iütök kröröë. Erë yi tò ttë mé orochka tso' wötëule Skéköl wé mik e' wa, e' ta e' wà kawöta iütë.' <sup>17</sup> jA' kè er ta! jA' dör wes s'wöbla kè wawër es! ¿Ì dör ibua'ie, orochka tso' Skéköl wé mik e' ö Skéköl wé tò orochka batse'wé e'? <sup>18</sup> Nies a' tò icheke: 'Yi tò ttë mé ka' tso' íyi moka

Skëköl a e' wa, e' ta ese kè kawōtä iütök kröröë. Erë yi tö ttè mé íyi me'rka ka' ñe' kī e' wa, e' ta e' wà kawōtä iütè.'<sup>19</sup> ¡A' dör wes s'wöbla kè wawër es! ¿Ì dör ibua'ie, íyi me'rka ka' ñe' kī e' ö ka' tö ibatse'wé e'?<sup>20</sup> Yi tö ttè mé ka' ñe' wa, ese kè ku' ttè muk ka' ñe' è wa, ñies ie' tso' ttè muk kos i' tso' ikī e' wa.<sup>21</sup> Yi tö ttè mé Skëköl wé wa, ese kè ku' ttè muk Skëköl wé è wa. Ñies ie' tso' ttè muk Skëköl serke eë e' wa.<sup>22</sup> Yi tö ttè mé ká jaì wa ese tso' ñies ttè muk Skëköl kulé wa. Ñies itso' ttè muk Skëköl wák tkër ikulé kī e' wa.

<sup>23</sup>“¡A s'wöbla'uk ttè dalöiëno wa wakpa, a fariseowakpa, wëstela ina a' ta! ¡A' e' ö suluë! Kākōla tso' iëno chkè a kiè menta ena anís ena comino ese kos tsá meke a' tö Skëköl a. E' dör buaë erë ttè dalöiëno e' bua'ie kè dalöiè a' tö. E' dör sene yësyësë, ena ñi saü er siarë wa ena erblö Skëköl mik mokī kè ilo'yeta'. Ñies e' kos dalöiök a' kawōtä.<sup>24</sup> ¡A' dör wes sulaiökwakpa wöbla kè wawër es! E' dör wes a' tö schö'wak wöppée tá a, erë kameio maléwa a' tö wa'ne, kè ittsë'ne a' wa.

<sup>25</sup>“¡A s'wöbla'uk ttè dalöiëno wa wakpa, a fariseowakpa, wëstela ina a' ta! ¡A' e' ö suluë! A' dör wes a' tka' kos pa skueke a' tö ikikke è es. A' wër buaë erë a' er suluë. A' dör akblökwakpa. A' kī s'yamipa íyi kos kianettsa a' è a.<sup>26</sup> ¡A fariseowakpa, a' dör wes s'wöbla kè wawër es! Tka' ttò skuóö kewe, es ñies ikikke pa sune.

<sup>27</sup>“¡A s'wöbla'uk ttè dalöiëno wa wakpa, a fariseowakpa, wëstela ina a' ta! ¡A' e' ö suluë! A' dör wes pö pateule saruruë es. Ese wër buaë ikikke, erë ishua s'nu diché tso' taië, e' dör ñá suluë.<sup>28</sup> A' dör wes pö ese es, a' e' ö tö a' dör pë' buaë yësyësë, erë a' er dör suluë. A' dör e' ökwakpa.

<sup>29</sup>“¡A s'wöbla'uk ttè dalöiëno wa wakpa, a fariseowakpa, wëstela ina a' ta! ¡A' e' ö suluë! A' tö Skëköl ttekölpa

bak ká iaiaë e'pa pö yuekene pa'ali. Ñies ì yué a' tö as s'ser yësyësë bak e'pa kè chōwa a' éna, ese kitkeke a' dör buaë.<sup>30</sup> E' dalewa a' icheke: 'Sa' tkópa sa' yépa bak ká iaiaë e'pa kèwö ska' ta, e'ma kè sa' wá ie'pa sinikune Skëköl ttekölpa ttökulur.'<sup>31</sup> Mik e' cheke a' tö, eta' a' e' chökeka tö a' dör wépa tö Skëköl ttekölpa kótulur, e'pa aleripa.<sup>32</sup> Wes a' mir e' wa iwënewa tö ì sulu wamblë'mi a' yépa tö ese kī wambleraë a' tö dō ibataie.

<sup>33</sup>“¡A' dör suluë wes tkabè es, wes tkabè ichók es! ¿Wes a' tkömishkar kè wömerpattsä weinuk bö' ké a? <sup>34</sup>Ittsó, ye' tö Skëköl ttekölpa ena s'pattökwakpa ena s'wöbla'ukwakpa ye' ttè wa, esepa patkeraë a' a. Erë a' tö ie'pa welepa tterawa, welepa skà wöterawa a' tö krus mik ttèwá, welepa skà pperaë siarë a' tö ttsa'bata daloie wa a' ñi dapa'wo wé a. Ie'pa yuleraë a' tö iwe'ikeraë a' tö ká wa'ne.<sup>35</sup> E' kuëki s'ser yësyësë kótulur a' yépa tö mik Abel kötwá Caín tö dōka mik Zacarías dör Berequías alá e' kötwá a' yépa tö ka' tso' íyi moka Skëköl a' e' ena ie' wé e' shusha, e' nuí kos kierane ie' tö a' a.<sup>36</sup> Mokī ye' tö a' a ichè tö s'ser yësyësë kos kótulur a' yépa tö, e' nuí kī a' ena wépa dör wes a' es esepa weirdaë siarë.

### Jesus eriane Jerusalén wakpa dalërmik

(Lucas 13.34-35)

<sup>37</sup> ¡A Jerusalén wakpa, Skëköl ttekölpa kos ttekewa a' tö kekraë! Ñies ittè pakök-wakpa patkeke ie' tö a' a, e'pa ttekewa a' tö ák wa. ¡Wekkë ye' erkiè tö ye' mú a' dapa'wè e' ska' wes dakro mitchke tö ila'rla dapa'wè ipik dikia es, erë kè a' kī ikiane yè! <sup>38</sup> Ye' ttò ttsó, Skëköl kè tö a' ká kkö'nepaiä.<sup>39</sup> Ye' tö a' a ichè tö i'tami a' kè tö ye' suepaiä dō mik ye' dene eta. E' kèwö ska' ta a' tö ye' cheraë: '¡Ayëcha buaë yi datse Skëköl ttò wa e'!



## Jesús tò iché tò Skèköl wé olordawa

(Marcos 13.1-2; Lucas 21.5-6)

**24** Jesús e' yéttsa Skèköl wé a ta imía ta ittòkatapa de ie' ska' ta Skèköl wé ena u bua'bua skà tso' ipamik, e' kkaché ie'pa tò ie' a. <sup>2</sup> Erë ie' iché:

—Mokì ye' tò a' a iché tò u kos tso' bua'buaè sué a' tò íe, e' olordawa seraä, iékwò è kè a'pa ñi bata kì.

### ¿Ì wa sò isuèmi tò ká i' erkewatke?

(Marcos 13.3-23; Lucas 21.7-24; 17.22-24)

<sup>3</sup> E' ukuökì ta ie'pa míyal kabata kiè Olivo ee. Jesús e' tkéser ta ittòkatapa de ie' ska' ta ie' è a ichaké:

—Ichó sa' a çmik íyi ekkè wamblèrmi? ¿Ì wa sò isuèmi tò be' dotkene, ñies tò ká i' erkewatke?

<sup>4-5</sup> Ie' tò ie'pa iüté:

—Tajë pè datse e' chök tò ie'pa dör ye'. Icherarakitò: 'Ye' dör wé pairine'bitü idi' wa s'blúie e', ta pè kiterarakitò tajë. E' kuèkì a' tso' wösh wa as kè yi tò a' kitö'ü. <sup>6</sup> Ká tajë wakpa ñippöke tajë wì a dià a e' biyó tseraè a' tò. E' wake' tköraè erë ká i' erwami e' kianeia. E' kuèkì kè a' tkinuk e' wa. <sup>7</sup> Ká kuà'kì kuà'kì wakpa ñippöraè ñita. Ñies í tò ká wötì'weraè ká wa'ñe. Ñies ká tseè wakpa tteraè bli tò tajë. <sup>8</sup> Erë íyi ekkè kos dör erpa s'tsá weirketke kam ye' döne e' yöki ese. E' dör wes alaköl alà kurketke ta ikirir es.

<sup>9</sup> "A' merdattsa we'ikè. A' ttelurdaè pè' tò. Sulitane tò a' sueraè suluè ye' tté kuèkì. <sup>10</sup> E' kèwö ska' ta wépa erblé ye' mik, esepa tajë tò ye' waterattsa. Ie'pa ñi sauraè suluè, ñies welepa tò ièltépa wömerattsa ibolökpa ulà a. <sup>11</sup> Kachök-wakpa e' chò tò ie'pa dör Skèköl ttekölpa esepa döraè tajë. Ie'pa tò s'kitö'weraè tajë. <sup>12</sup> Ì sulu kì wamblërdaè tajë shüté, e' kuèkì s'kibiie kè tò imalepa dalèritse-

paia. <sup>13</sup> Erë yi e' tkéwa darërèè doka bata ekkè, esepa tsatkërdaè. <sup>14</sup> Ì blúie Skèköl tso' e' tté buaè pakardaè ká wa'ñe as ká ulitane wakpa wa ijcher, e' ukuökì ta ká i' erdawa.

<sup>15</sup> "Skèköl tteköl bak kiè Daniel, e' tò ikit iyèkkuò kì tò ì sulusi tò ì dör batse'r e' ia'wè ñáie, e' dörawa Skèköl wé a iia'ukká ñáie, (yi tso' yèkkuò i' sauk, e' éna iwà anú). Mik e' sué a' tò, <sup>16</sup> etä wépa serke Judea e'pa tkóyalmi kabata a; <sup>17</sup> yi tso' u bata kì e' esepa tkóshkar kè dökwane weshké ífyi tsukmi. <sup>18</sup> Ñies yi tso' kaneblök kañika esepa kè dökwane weshké idatsi' yöktsa. <sup>19</sup> E' kèwö ska' ta alakölpa alà kurketke ena alakölpa tsu' muke ilà a iwèstela ina esepa ta! <sup>20-21</sup> S'ditsö weirdaè tajë shüté. Mik ká i' yöne dò ikké ta kè s'we'ikule ekkè, ñies kè s'weirpa aishkuò ta ekkè. E' kuèkì ik-ió Skèköl a as kè iwamblèr a' ta yuèdiò késka' ö eno diwö a. <sup>22</sup> E' kèwö kè wöó-pawa Skèköl tò, e'ma kè yi isie atukia ttsé'ka. Erë e' kèwö wöerawaitö, wépa shukitbakitö esepa dalèrmik.

<sup>23-24</sup> "Kachökwakpa e' kóraka e' chök tò ie'pa dör wé pairine'bitü idi' wa s'blúie e' ö Skèköl tteköl wele. E'pa tò ì kè or yi a ese weraè s'kitö'woie tò ie'pa tté dör mokjë. Dò wépa shukit Skèköl tò, esepa mú kitèrmi, e'ma ikitërdaè. E' kuèkì yile tò a' a icheke: 'Isaú, wé pairine'bitü idi' wa s'blúie e' dur íe', ö 'Isaú, ie' dur wìe', e' ta kè a' tò ikl'owar. <sup>25</sup> Ittsó, íyi ekkè biyó chétkeyö a' a keweie. <sup>26</sup> E' kuèkì mik ie'pa tò icheke a' a: 'Isaú, wé pairine'bitü idi' wa s'blúie e' tso' ká wé kè yi serku' ee', etä a' kè minuk isauk. Mik ie'pa tò icheke a' a: 'Isaú, ie' tso' íe blèulewa', etä kè a' tò ikl'owar. <sup>27</sup> Ye' dör S'ditsö Alà, mik e' dene, etä sulitane tò isueraè wes alà wöñar tò ká olo ppèe ká wa'ñe e' suèsö es. <sup>28</sup> Sulitane wa ijcher tò wé ölö

\*24:17 u bata kì: E' kèwö ska' ta ie'pa u tsabata dör kkuèie, e' kì ie'pa shkòke.

daparke taië, eë ilè nu tër. Es ñies mik ye' dene, eta sulitane wa ijcherdaë.

### Jesús dōrane olo ta' taië

(Marcos 13.24-37; Lucas 17.26-30,34-36; 21.25-33)

<sup>29</sup>“S'weine e' kēwō tka, e' bet diwō wōtuirdawa, ñies si'wō kē wōñarpaia. Bēkwō darolordaë ena i kos tso' ká jaì a' e' wōtirdaë. <sup>30</sup>Eta sulitane tò íyi sueraë ká jaì a' iwà kkachoe tò ye' dōr S'ditsō Alà, e' datsene bet. Ká ulitane wakpa suardaë taië e' yöki, ie'pa iuraë taië ta' bet ie'pa tò isueraë tò ye' datse kashuk a' mò a' diché ta' taië olo ta' taië. <sup>31</sup>Duk blardaë taië ta' ye' biyöchökwakpa patkeramiyō wépa shukitbakyō, esepa dapa'ukka ek tsiní ème. Ie'pa tò iyuleraë ká wañe dò wé ká i' bata erkerō eë ena wé ká jaì bata erkerō eë.

<sup>32</sup>“A' e' wōbla'ú ttè ikkē wa iwà saú higo klò wa: Mik iulatska tso' ulölöla ena erpa iköyök tskirdoka, eta a' wa ijcher tò duas dewatke tsinet. <sup>33</sup>Es ñies mik a' tò isuë tò íyi ekkē wamblërke, eta a' wa ijchenú tò ye' datskene, e' diwō dewatke tsinet. <sup>34</sup>Mokí ye' tò a' a' ichè tò íyi ekkē wamblërdaë wépa dōr wes a' es esepa kam erwa e' yöki. <sup>35</sup>Kashuk ena ká i' erdawa, erë ye' ttè michoë e' kē erpawa yës.

<sup>36</sup>“Erë e' kēwō e' diwō kē jcher yi wa. Skéköl biyöchökwakpa tso' ká jaì a, e'pa kē wa ijcher, ñies ye' dōr Skéköl Alà e' kē wa ijcher. S'yé è wa ijcher.

<sup>37</sup>“Ye' dōr S'ditsō Alà, mik e' dene eta e' kēwō dōr wes Noé késka' es. <sup>38</sup>E' késka' ta' kam di' taië tkò e' yöki, ie'pa tso' chkök, di'yök, senukwa wes kekraë es dò mik Noé dewa ikanò bérie e' a' eta. <sup>39</sup>Erë ie'pa kē ku' ipanuk yës eta di' dettsa taië ie'pa ki, e' tò ie'pa ulitane ttélur. Es itkōraë mik ye' dōr S'ditsō Alà e' dene eta. <sup>40</sup>E' kēwō ska' ta' wëm bōl tso' kanëblök ese eköl mira iwā ta' iëköl

atdaë. <sup>41</sup>Alakölpa bōl tulur ák wawök, ese eköl mira iwā ta' iëköl atdaë.

<sup>42</sup>“E' kueki a' tso' erki. A' kē wa ijcher tò diwō wekkē a' Kéköl dōrane. <sup>43</sup>A' wa ijcher buaë tò u wák mú wa ijcher tò wekkē akblökwak datse, e'ma kē ikapō-pawā iyöki, kē itō kawō mepa yi a' dōkwa ífyi ekiblök. <sup>44</sup>Es ñies ye' dōr S'ditsō Alà, e' datskene mik a' kē ku' ye' panuk eta, wes akblökwak es. E' kueki a' tso' erki.

### Kanè méso buaë ena kanè méso suluë e' tté

(Lucas 12.41-48)

<sup>45</sup>“Kanè méso yësyesë kabikeitsō buaë, ese meraka iwökir tò imalepa kuebluie ie'pa tiök kekraë mik kē iku' e' dalewa. <sup>46</sup>Iwökir dene ta' ikuëitō iwakanéuk wes iyëneia es, e' ta' ayëcha e' dōr buaë ie' a. <sup>47</sup>Mokí ye' tò a' a' ichè tò kanè méso ese merakaitō ie' wa íyi tso' kos e' kuebluie. <sup>48</sup>Erë kanè méso ñe' dōr suluë tò ibikeitsé tò kē iwökir döpane bet. <sup>49</sup>E' kueki ie' tò imalepa ppémi. Ñies ie' chkémi, blo' yémi bloblopa ta. <sup>50</sup>Erë idiwō ena ikéwō kē wa ie' ku' ipanuk, eta iwökir dōrane <sup>51</sup>ta' iwe'ikeraitō siarë wömerattsā weinuk e' ökwakpa ta. Ie'pa iurarak siarë, ikà blardaë iweir kueki.

### Busipala dōka dabop e' tté

**25** “Ì blúie Skéköl tso' e' ta' itkōraë wes itka ulabatsé a' es. Busipala dōka dabop e' e' yélur ibō'wōla wa wëm ulabatsōke, e' ñaletsuk. <sup>2</sup>Busipa skel e'pa dōr kabikeitsōta' buaë esepa, erë imalepa skel kē dōr es. <sup>3</sup>Wépa kē kabikeitsōta' buaë e'pa wa ibō'wōla è mí, kē wa bö'wō diò kí mìnè. <sup>4</sup>Erë wépa kabikeitsōta', e'pa wa ibō'wōla mí, ñies idiö kí mírak iwā. <sup>5</sup>Erë wëm ulabatsōke, e' kē dē' bet, iwötkënekā e' kueki. E' dalewa busipa shtrine ta' ikapolur. <sup>6</sup>Ká shabōts ta' ie'pa tò ittse tò iarak-erak: '¡Wëm ulabatsōke, e' datse! ¡A' yú

inaletsuk!'<sup>7</sup> Etā busipa kos e' kēka tā ibō'wōla wōtskémirakitō.<sup>8</sup> Etā busipa kē kabikeitsōtā' e'pa tō iché imalepa a: 'A' bō'wō diō kakmú sa' a as sa' bō'wōla kē wōitwā.'<sup>9</sup> Erē ie'pa iūtē: 'Au, sa' tō imé a' a, e' tā kē idōpakā se' ulitane kī. E' kueki a' yú a' icha tāuk wē iwatorke eē.'<sup>10</sup> Etā ie'pa míyal bō'wō diō tāuk. E' dalewa wēm ulabatsōke e' de, etā wēpa wā bō'wō diō kī mí e'pa dewā wēm ulabatsōke e' tā iulabato wé a tā iwékkō wōtēnēwā.<sup>11</sup> E' ukuōki tā busipa malepa debitu tā ichakeke urki: 'A kēkēpa, a kēkēpa, ukkō kkōppōō sa' a!'<sup>12</sup> Erē wēm ulabatsōke e' tō ie'pa iūtē: 'Moki ye' tō a' a iché tō kē ye' wā a' sūle.'

<sup>13</sup> "Ye' tō a' a iché tō a' kē wā ijcher i kēwō, i diwō ye' dōmine e' kueki a' tso' erki.

### Inuköl mēne wakanewē e' tté

(Lucas 19.11-27)

<sup>14</sup> "Nies i blúie Skéköl tso' e' tā itkōraē wes itka wēm eköl mi'keā kamiē ká kuā'kī a ese tā es. Ie' tō ikanē mēsopa kié tā iché ie'pa a: 'Ye' inuköl wakaneú ye' a buaē as ikī klōr.'<sup>15</sup> Ikanē méso eköl a ie' tō inuköl kiē talento<sup>†</sup> ese mé mil skel (5.000). Iēköl a ie' imé mil bōt (2.000). Etā iskā a ie' tō imé mil et è (1.000). Ie' tō ie'pa a imé kos ie'pa a iwakanēor ekkē. E' ukuōki tā ie' míā.<sup>16</sup> Wēne a imēne mil skel, e' tō iwakanewē buaē. Ie' tō ikī klō'wē mil dōka skel.<sup>17</sup> Es nies wēne a imēne mil bōt, e' tō ikī klō'wē mil dōka bōt.<sup>18</sup> Erē wēne a imēne mil et, e' míā tā íyōk biéitō e' a itō iwōkir inuköl wōtēwā.

<sup>19</sup> "Ká de taiē etā ie'pa wōkir dene e' tō ie'pa kié isuōie tō kos ie'pa tō inuköl kī klō'wē.<sup>20</sup> Wēne a imēne mil skel, e' de kewe iwōkir ska'. Ie' wā inuköl kī debitu mil dōka skel. Ie' iché iwōkir a: 'A kēkēpa, be' tō ye' a inuköl me' mil skel,

e' kī klō'wēyō mil dōka skel.'<sup>21</sup> Iwōkir tō iché ie' a: 'E' dōr buaē, be' dōr kanē méso buaē yēsēsē. Inuköl elkela me'yō be' a e' wakanewē be' tō yēsēsē. E' kueki ye' tō íyi skā meraē be' a taiē wakanewē. Be' shkōwā ttsē'nú buaē ye' tā.'<sup>22</sup> E' ukuōki tā wēne a imēne mil bōt e' de tā ichéitō: 'A kēkēpa, be' tō ye' a inuköl me' mil bōt, e' kī klō'wēyō mil dōka bōt.'<sup>23</sup> Iwōkir tō ie' a iché: 'E' dōr buaē, be' dōr kanē méso buaē yēsēsē. Inuköl elkela me'yō be' a e' wakanewē be' tō yēsēsē. E' kueki ye' tō íyi skā meraē be' a taiē wakanewē. Be' shkōwā ttsē'nú buaē ye' tā.'

<sup>24</sup> "Erē kanē méso a imēne mil et, mik e' de, etā ie' tō iché iwōkir a: 'A kēkēpa, ye' wā ijcher tō be' dōr wēm er darērēē ese. Be' tō íyi wōshteke wē kē be' wā ikuatkēne eē. Nies i kē dōr be' icha ese klō'wēkewā be' dōr.<sup>25</sup> E' kueki ye' suane be' yōki dō' ye' tō be' inuköl chōwēwa. E' kueki be' inuköl blé ye' tō íyōk a. I' be' inuköl dene ye' wā be' a.'<sup>26</sup> Etā iwōkir tō iūtē: 'Be' dōr kanē méso suluē, bikēr taiē ese. Be' iché tō ye' tō íyi wōshteke wē kē ye' wā ikuatkēne eē ena i kē dōr ye' icha ese klō'wēkewāyō,<sup>27</sup> e' tā be' tō ye' inuköl blōpa inuköl bló wé a as eē ikī klōr. Be' ikaneúpa es, e'ma ye' dene etā ye' inuköl ena ikī klōne, e' de ye' ulā a.'<sup>28-29</sup> Etā ie' tō iché: 'Wē wā íyi tso' e' a ikī merdaē. Erē wē kē wā i ku', i tso' e' wā elkela e' yerattsā iyōki. E' kueki inuköl me'yō ie' a, e' yōttsā ie' ulā a tā imú wē wā itso' dōka 10.000 e' a.<sup>30</sup> Etā kanē méso suluē i' e' uyōttsā stui ké a, eē pē' suluē iurarak siarē ikā blardaē iweir kueki.'

### Jesús tō ká ulitane wakpa shuleraē

<sup>31</sup> "Ye' dōr S'ditsō Alà, e' dōrane s'blúie olo tā' taiē ye' biyōchōkwakpa kos tā. Mik ye' dene, etā ye' e' tkōrakā blu' kulē

<sup>†</sup>25:15 *talento*: E' dōr ie'pa inuköl kiē denario e' mil terōl (6.000). Denario et e' dōr s'kanēblō ká et e' ské ekkē.

kî kâ ulitane wakpa şulök. <sup>32</sup> Ie'pa darpadaë ye' wörkî ta ye' tö ie'pa blabatseraë wes iyiwak kk'ö'nukwak tö obeja ena chibo blabatsë es. <sup>33</sup> S'ser yësyësë esepa dör wes obeja es, ie'pa merawâ ye' tö ye' ulâ bua'kka. S'ser suluë esepa dör wes chibo es, ie'pa merawâ ye' tö ye' ulâ bakli'kka. <sup>34-36</sup> Eta ye' tö icheraë wêpa tso' ye' ulâ bua'kka e'pa a: 'Ye' dör a' blú. Ye' yé er bua'ché a' a. Mik ye' du' bli wâ, eta a' tö ye' dë'; mik ye' bak ersinuk, eta a' tö ye' a di' me'; a' kè wâ ye' şuule, erë a' tö ye' kiéwâ buaë a' u a. Ye' bak datsi' kè ta', eta a' tö ye' a datsi' kakme'; ye' bak duök siarë, eta a' dë' ye' kîmuk; ye' bak wötëulewâ s'wöto wé a, eta a' dë' ye' şauk. E' kuekî a' shkôwâ ì blúie ye' tso' e' a, e' kos yöulebak a' a kam kâ i' yör e' yöki.' <sup>37</sup> Erë s'ser yësyësë e'pa tö ye' a ichakeraë: 'A Skëkëpa, sa' kè wâ ijcher. ¿Mik sa' tö be' şu' tö be' tteke bli tö, e' dë' sa' tö? ¿Mik sa' tö be' şu' tö be' tteke ersi tö, e' a di' me' sa' tö? <sup>38</sup> ¿Mik be' dë'bitü sa' u a, kè şuule sa' wâ, e' ki'wâ buaë sa' tö? ¿Mik sa' tö be' şu' datsi' kè ta', e' a datsi' kakme' sa' tö? <sup>39</sup> ¿Mik sa' tö be' şu' tö be' duöke ö be' wötëulewâ s'wöto wé a, e' şauk sa' dë'?' <sup>40</sup> Eta ye' tö ie'pa iüteraë: 'Mokî ye' tö a' a ichè tö mik a' tö iyi ekkë buaë o' ye' yamipa siarë ikkëpa a, eta e' dör wes a' tö ye' wâk a iwè es.'

<sup>41-43</sup> "E' ukuökî ta ye' tö icheraë wêpa tso' ye' ulâ bakli'kka e'pa a: 'Ye' du' bli wâ, erë a' kè wâ ye' dëne; ye' bak ersinuk, erë a' kè wâ ye' a di' mène. Ye' dë' a' ska', kè şuule a' wâ, erë a' kè wâ ye' kinewâ a' u a; ye' bak datsi' kè ta', erë a' kè wâ datsi' mène ye' a; ye' bak duök ena wötëulewâ s'wöto wé a, erë a' kè dë' ye' şauk. E' kuekî a' wömeuletsabak weinuk siarë. A' e' sköttsa ye' yöki. A' yúshka bö' ñar michoë yöule bé ena iklépa we'ikoie e' a.' <sup>44</sup> Erë ie'pa tö ye' a ichakeraë: 'A Skëkëpa, e' kè jcher sa' wâ. ¿Mik sa' tö be' şu' tö be' duöke bli wâ? ¿Mik sa' tö be' şu' tö be' ersine? ¿Mik be' dë' sa' u a?

¿Mik sa' tö be' şu' datsi' kè ta'? ¿Mik sa' tö be' şu' duöke ö wötëulewâ s'wöto wé a? ¿Mik sa' kè wâ be' kîmene?' <sup>45</sup> Eta ye' tö ie'pa iüteraë: 'Mokî ye' tö a' a ichè tö mik a' kè wâ iyi ekkë one s'siarëpa ikkëpa a, eta e' dör wes kè a' wâ ye' wâk a iöne es.' <sup>46</sup> S'ser suluë esepa michoë weinuk, erë s'ser yësyësë esepa şer michoë buaë ye' ta'."

### Judiowak wökirpa tö Jesús aleritsé klö'wëwâ

(*Marcos 14.1-2; Lucas 22.1-2; Juan 11.45-53*)

**26** Mik Jesús tö s'wöbla'wé kos e' one, eta ie' tö iché ittökatapa a:

<sup>2</sup>—A' wâ ijcher tö böiki se' tö Se' Yépa Yërulune Egipto e' kèwö tk'öweke. E' kèwö ska' ta, ye' dör S'ditsö Alà, e' wömerdattsa ttëwâ wötëulewâ krus mik.

<sup>3</sup>E' kèwö ska' ta' sacerdotepa wökirpa ena judiowak kueblupa ñi dapa'wé sacerdoté kibi kiè Caifás, e' u a. <sup>4</sup>Eë ie'pa tö Jesús aleritsé kî'tö'wè iklö'wowa ttëwâ. <sup>5</sup>Erë ie'pa iché ñi a:

—Kè sô iwamblè Se' Yépa Yërulune Egipto e' kèwö tk'öwekesö e' a şa pè' kè şutîrka tajë.

### Kiö masmas téka alaköl eköl tö Jesús kî

(*Marcos 14.3-9; Juan 12.1-8*)

<sup>6</sup>Jesús tso' Betania, Simón kiri'uk lepra bak, e' u a. <sup>7</sup>Ie' tkëriâ mesa kî chkök. Eta alaköl eköl de ie' ska', e' wâ kiö masmas tuè darërë ese debitu, e' mí ie' wâ iukkuö yöule ák bua'buwa wa ese a. Eta kiö e' tékaitö Jesús wökir kî. <sup>8</sup>Erë mik e' sué ittökatapa tö, eta ie'pa ulunekâ ta' iché:

—¿Iók kiö şe we'ikéwa ie' tö éanas? <sup>9</sup>Iwatormittsa inuköl tajë skéie s'siarëpa kîmoie.

<sup>10</sup>E' ttsé Jesús tö ta' ie' tö iché ie'pa a: —¿Iók a' tso' alaköl i' tsiriuk? İyi buaë wéitö ye' a. <sup>11</sup>S'siarëpa tso' kekraë a'

shuā, erë ye' kè kṽ' kēkraë a' ta. <sup>12</sup>Kiò tékaītō ye' kṽ' ye' kanéwoie kām ye' nu wötörwā e' yöki. <sup>13</sup>Moki ye' a' a ichè tò ká wañe wé Skéköl ttè buaë pakarke, ee ipakardaë ñies tò ie' tò ì buaë o' ye' a. Es e' kè chōpawa yi éna.

### Judas tò Jesús watké

(*Marcos 14.10-11; Lucas 22.3-6*)

<sup>14</sup>Jesús ttōkatapa dabom eyök kṽ' bōl, e'pa eköl dör Judas Iscariote, e' mīā sacerdotepa wōkirpa ska' <sup>15</sup>ta ie' tò iché ie'pa a:

—¿Kos a' tò ye' patuēmi Jesús wōmottsā a' a?

Etā ie'pa tò inukölchka wōshki mé ie' a dōka dabom mañayök (30). <sup>16</sup>E'tami ie' tò kawō yulēmi bua'iewā Jesús wōmottsā.

### Jesús tò Judiowak Yépa Yërulune Egipto e' kēwō bata tkō'wé

(*Marcos 14.12-25; Lucas 22.7-23; Juan 13.21-30; 1 Corintios 11.23-26*)

<sup>17</sup>Kawō kiè Pan Kè Yöule Iwölöwoka Wa<sup>‡</sup> e' kēwō tsā diwō dewatke. Etā Jesús ttōkatapa de ie' ska' ta ie' a ichaké:

—¿Wé be' kṽ' ikiane tò sa' tò Se' Yépa Yërulune Egipto kēwō tkō'wekesō e' chké kanewè?

<sup>18</sup>Ie' tò ie'pa iüté:

—A' yú Jerusalén, wēm yè' ye' tò a' a e' u a ta ichó ie' a: 'S'wōbla'ukwak be' a ichök ké: Ie' kēwō dōkewatke. Ie' datse be' u a kawō tkō'wekesō e' tkō'uk sa' ta.'

<sup>19</sup>Ie'pa tò iwé wes ie' tò ie'pa a iché es ta ee ie'pa tò ichké kanewé.

<sup>20</sup>Mik katuinetke, etā ie' tkër mesa ki chkök ittōkatapa dabom eyök kṽ' bōl e'pa ta. <sup>21</sup>Ie'pa chköke, e' dalewa ie' tò iché ie'pa a:

—Moki ye' tò a' a ichè tò a' eköl tò ye' wömerattsā.

<sup>22</sup>Ie'pa erianekā taië ta ichakémi ie' a eköl eköl:

—A Skékëpa, ¿ye' alè idir?

<sup>23</sup>Ie' tò ie'pa iüté:

—A' tso' ye' ta pan nuuk tka' etkè a ñè, e' eköl ye' wömerattsā. <sup>24</sup>Ye' dör S'ditsō Alà, e' ta itkōraë wes itso' kitule Skéköl yëkkuō kṽ' es. Erë wéstela ina yi ye' wömekettsā, e' ta. Buaë idir wēm e' a tò kè ikunúpa.

<sup>25</sup>Etā Judas tò iwömekettsā, e' tò ie' a ichaké:

—A S'wōbla'ukwak, ¿ye' alè idir?

Ie' iüté:

—Be' wák e' chéka.

<sup>26</sup>Ie'pa tso'ia' chkök, e' shuā pan klō'wéitō ta e' kṽ' wéstela chéitō Skéköl a ta iblatéitō ta iwā tié ie'pa a ta ichéitō:

—Pan se dör ye' chkà, e' ñú a' tò.

<sup>27-28</sup>E' ukuökṽ' ta tka' a vino tso', e' klō'wéitō ta e' kṽ' wéstela chéitō Skéköl a ta iméitō ie'pa a ta ichéitō:

—Vino se dör ye' pé. Ye' tterawā e' pé tërdaë, e' wa ttè pa'alṽ' me' Skéköl tò e' wà de. Ye' ttèwā, e' wa s'tso' taië e'pa nuì olo'yarmi. E' kuekṽ' a' ulitane tò ikak yö. <sup>29</sup>Ye' tò a' a ichè tò vino kè yepaiayō dō mik ì blúie ye' Yé tso' e' kēwō de da'äie, etā iskà yeraneyō a' ta.

### Pedro tò icheraë tò ie' kè wā Jesús sūle

(*Marcos 14.26-31; Lucas 22.31-34; Juan 13.36-38*)

<sup>30</sup>Etā ie'pa tò Skéköl ttseitssé, e' ukuökṽ' ta ie'pa mīyal Olivo kēbata a.

<sup>31</sup>Jesús tò iché ie'pa a:

—I' nañewe a' ulitane tköyaldaë. A' ye' meraat ekōrla. E' dör wes itso' kitule Skéköl yëkkuō kṽ' es, e' tò ichè: 'Obeja kkō'nukwak ttewaraëyō ta obeja

<sup>‡</sup>26:17 Kawō kiè Pan Kè Yöule Iwölöwoka Wa: Kawō e' tkō'weke Israel aleripa dō ká kul, e' diwō tsā kiërakitō Se' Yépa Yërulune Egipto e' kēwō.

pordami wì a dià a.<sup>¶</sup> 32 Erë mik ye' ttéwā shkenekane, e' ukuöki tā ye' mirāē Galilea a' yöki kewe.

33 Pedro tö ie' a iché:

—Erë ie'pa ulitane be' memiat ekörla, erë ye' kè tö be' mepaat.

34 Ie' tö iüté:

—Moki ye' iché be' a tö i' nañewe, kam dakro ar, e' yöki be' icheraē mañatökicha tö be' kè wā ye' suule.

35 Pedro tö ie' a iché:

—Erë ye' ttèmiwarakitö be' ta, erë kè ye' ichepa tö kè ye' wā be' suule.

Etā ie'pa ulitane ttöke es ème.

### Jesús tté S'yé tā Getsemaní

(*Marcos 14.32-42; Lucas 22.39-46*)

36 E' ukuöki tā Jesús míā ittökātapa tā ká kiè Getsemaní eē. Ie' tö iché ie'pa a:

—A' atē tulur íe, e' dalewa ye' míā wishke ttök S'yé tā.

37 Etā ie' wā Pedro ena Zebedeo ala'r böl, e'pa mítser e' tā. Etā ie' erianemi chkenewami taië. 38 Ie' tö iché ie'pa a:

—Ye' eriane taië ttseskua ye' ttèwami-itö ekké. A' e' tsúat íe ye' ta, kè a' kapökwa.

39 Ie' míā wishke tā ie' e' kéutër wöwakköt iski tā ikiéitö Skéköl a i' es: “A yéwö, ì tköraē ye' tā e' dör wes íyi bacha'bachaē yèwasö es. E' mú ulà a ye' yermittsa, e'ma ye' yóttsa iulà a. Erë kè iwar wes ye' ki ikiane es, iú wes be' ki ikiane es.”

40 E' ukuöki tā ie' dene wé ittökātapa tulur eē tā ie'pa kuéitö kapötulur tā ichéitö Pedro a:

—¿A' kè wā kapèwā wöklöne dò hora ek è ye' ta? 41 Kè a' kapökwa. A' ikió Skéköl a as ì sulu tö a' erkiöweke ese kè e' alòka a' ki. Moki a' éna ì buaē wak, erë a' diché kè dè'ka iwā uk, e' kuéki a' a darerëé idir.

42 Etā ie' skà míane wishke ttökne S'yé tā tā ichéitö: “A yéwö, ì tköraē ye' tā e' mú ulà a ye' yermittsa, e'ma ye' yóttsa iulà a. Erë iú wes be' ki ikiane es.”

43 Mik ie' dene, etā ie'pa kuéneitö kapötulur; ie'pa wöbla surirkewa kapè wā e' kueki. 44 Ie' skà míane wishke ttök S'yé tā, i' tā idare mañatökicha. Etā iténe wes itté kuaē es. 45 E' ukuöki tā ie' dene wé ie' tö ittökātapa mañal méat eē tā ie' tö iché ie'pa a:

—¿A' kapötuluriā enukeia? Ye' dör S'ditsö Alà, e' diwö dekatke mèttsa pè' sulusipa ulà a. 46 A' e' kóka, yi tö ye' wömekettsa, e' dotke i' tā. Mishka ie' panuk.

### Jesús klö'wéwā ibolökpa tö

(*Marcos 14.43-50; Lucas*

*22.47-53; Juan 18.2-11*)

47 Jesús tso'ia ttök, e' dalewa ittökātapa dabom eyök ki böl (12), e'pa eköl kiè Judas, e' debitü pè' tā taië. E' wakpa debitü tabè ki ena kal wölö ki. Ie'pa patkè'mi sacerdotepa wökirpa ena judiowak kueblupa tö. 48 Judas dör iwöméttsa e' tö ie'pa a iyè'bak: “Wé shke'wekeyö wöalattsè wa, e' dör ie', iklö'úwā a' tö.” 49 Etā ie' de Jesús ska' tā iché ia:

—¿A S'wöbla'ukwak!

Tā iwöalattséwaitö. 50 Jesús tö iché ie' a:

—A yami, ì uk be' de, e' í.

Etā pè' datse Judas tā e'pa de Jesús ska' tā iklö'wéwarakitö.

51 Etā ie'pa iëter eē Jesús tā e'pa eköl tö itabè yéttsa ta e' wa sacerdoté kibi e' kanè méso kukuöña téttsa. 52 Jesús tö iché ie' a:

—Wépa ñippöke tabè wa, esepa döraka tabè kkò a. E' kuéki be' tabè blówane ikkuölit a. 53 ¿Be' kè wā ijcher tö ye' ki ikiane, e'ma ye' tö ikiëmi ye'

Yé a ta ie' tö ibiyöchökwakpa tajë döka 70.000 e' patkëmi ye' tsatkök? <sup>54</sup> Erë ye' tö ikié es, e' ta ¿wes Skëköl yëkkuö kî itso' kitule e' wà tkömi? E' tö ichè tö ì suluè tköke ye' ta e' kawöta tkök es.

<sup>55</sup> Eta ie' tö ichaké pë' ekkëpa a:

—¿Ì kuekî a' bitë ye' klö'ukwä tabè kî kal wölo kî wes akblökwakpa klö'wëwä es? Kekraë ye' bak e' tkökser Skëköl wé a s'wöbla'uk, erë a' kè wä ye' klöönewä. <sup>56</sup> Erë ì tköke i' e' dör as iwà tkò wes Skëköl ttekölpä tö ikitatbak Skëköl yëkkuö kî es.

E' wöshä ta ie' ttökäta kôs tkayalmi tö iméat ekörla.

### Jesús demi ie'pa wä Caifás wörkî

(*Marcos 14.53-65; Lucas 22.54-55,63-71; Juan 18.12-14,19-24*)

<sup>57</sup> Eta pë' tö Jesús klö'wëwä e'pa tö ie' tsémi sacerdote kibi kiè Caifás e' u a. Eë s'wöbla'uk ttè dalöiëno wa wakpa ena judiowak kuëblupa kôs daparke. <sup>58</sup> Erë Pedro datse ie'pa itökî kamië döttsa sacerdote kibi e' u pamik, eë ie' e' tséat tkër Skëköl wé shkëkîpa ta isaük tö ì tkömi.

<sup>59</sup> Eta sacerdotëpa wökîrpa ena judiowak wökîrpa malepa tö ttè yuleke Jesús kkatoie as ie'pa tö iwömüttsa ttëwä. <sup>60</sup> Tajë pë' de ie' kkatök kachè wa, erë kè yi wä ie' kkatëne wë' ie' wömottsä ttëwä. Bata ekkè ta idebitü böi ikkatök kachè wa, <sup>61</sup> e'pa tö iché:

—Wëm së tö iyë' tö ie' a Skëköl wé olorwami, e' yuëkamineitö ká mañat shua.

<sup>62</sup> Sacerdote kibi e' kéka ta ichaké Jesús a:

—¿Kè be' ie'pa iuteku' yës? ¿Ñe' ie'pa be' kkatëke, e' dör ì?

<sup>63</sup> Erë Jesús siwä'blëwä ie'pa yökî. Eta sacerdote kibi tö ichaké ie' a:

—Ichó sa' a yësyësë Skëköl chök e' wörkî tö ¿be' dör ie' Alà? ¿Be' dör wé pairine'bitü idi' wa sa' blúie e'?

<sup>64</sup> Ie' iüté:

—Wës be' iché es idir. Ye' tö ichè a' a tö ye' dör S'ditsö Alà, e' sueraë a' tö tkërka Skëköl diché ta' tajë iyi ulitane tsata e' ulä bua'kka dalöiërta' tajë. Nies ye' datskene kashuk a mö a e' sueraë a' tö.

<sup>65</sup> Eta sacerdote kibi e' datsi' jchéé ikkachoie tö ilunëka ta ichéitö:

—Ì ché ie' tö, e' wa ie' tso' Skëköl chök suluë. ¿Iie se' kî ikkatökwakpa kî kiarmi-ia? Ttè suluë chéitö, e' ttsétkesö. <sup>66</sup> ¿Iima a' tö ibikeitsè?

Ie'pa tö iüté:

—Ie' wák iane iwiie, e' kuekî ikawöta ttëwä.

<sup>67</sup> Eta ie'pa wirituöke Jesús wö kî ta itekerakitö tajë. Welepa tö ippé iwö kî <sup>68</sup> ta ichéraitö:

—Be' dör wé pairine'bitü idi' wa s'blúie e', e'ma sa' a ichóka ¿yi tö be' ppé?

### Pedro tö iblé tö kè ie' wä Jesús süle

(*Marcos 14.66-72; Lucas 22.56-62; Juan 18.15-18,25-27*)

<sup>69</sup> Pedro tkëriä sacerdote kibi e' u pamik ta alaköl kanëblöke u e' a, ese de eköl ie' ska' ta ichéitö ia:

—Be' nies dör Jesús Galilea wak e' klé eköl.

<sup>70</sup> Erë ie' tö iblé sulitane tso' e'pa kukua. Ie' tö iché:

—Ye' kè éna iane tö ì chök be' tso'.

<sup>71</sup> Ie' mía ukkó tkër kañika eë ta alaköl skà tö isuë e' tö iché imalepa a:

—Ie' i' dör Jesús Nazaret wak e' klé eköl.

<sup>72</sup> Etökichane Pedro tö iskà ché:

—¿Ye' iché Skëköl wörkî tö ye' kè wä wëm e' süle!

<sup>73</sup> E' kuölö ta wëpa tso' eë e'pa debitü ie' ska' ta ichéitö:

—Mokî be' dör ie'pa ëltë wak, be' ttò ie'pa ttò ttsëë.

<sup>74</sup> Eta ie' iché:

—Skëköl wörki yö ichè tö iwëm e' kè suule ye' wä! Kè idör es, e'ma as ye' kichatër.

E' wöshäë dakro ane, <sup>75</sup>tä ì yë' Jesús tö ie' a e' anewä ie' éna, e' dör i': 'Kam dakro ar, e' yöki be' tö icheraë mañatökicha tö be' kè wä ye' suule.' Etä ie' e' yéttsa mía kanika tä eë ie' ié taië siarë.

### Jesús mítser Pilato wörki

(*Marcos 15.1; Lucas 23.1-2; Juan 18.28-32*)

**27** Mik ká ñine, etä sacerdotepa wökirpa ena judiowak kuëblupa kos ñi dapa'wéka ileritsök tö “¿wes sö Jesús ttèwami?” <sup>2</sup>Ie'pa wä imítser moulewä mé Pilato a. Pilato tkë'ka Roma wökir kibi tö Israel aleripa ké wökirie.

### Judas e' ttéwä

<sup>3</sup>Judas tö Jesús wato'ttsabak, mik e' wä ijchenewä tö mokí Jesús wömenettsä ttèwä, etä e' tö ie' eriawéne taië. E' kuëki ie' mía sacerdotepa wökirpa ena judiowak kuëblupa ska' tä inuköl mène ie' a mañayök (30), e' méneitö ie'pa a. <sup>4</sup>Ie' iché ie'pa a:

—Ì sulu wambléyö. Wëm kè kî ì sulu nuí ta', ese wöméttsayö ttèwä.

Erë ie'pa tö ie' iüté:

—¡E' kè kî sa' tkine! ¡E' wërke be' wöki!

<sup>5</sup>Etä ie' inuköl e' uyémine Skëköl wé shua tä imía e' kuli' skéka tä, es ie' e' ttéwä.

<sup>6</sup>Etä sacerdotepa wökirpa tö inuköl e' shtéka tä ichéakitö:

—Inuköl i' dör s'kötulewä ské, e' kuëki ñá idir. Kè iienukwä inuköl tso' Skëköl a iyi kanéwoie ese a.

<sup>7</sup>E' kuëki ie'pa ttè mé ñi a tö ká taüttsasö iwa yuè pöie pé' datse ká bánet blénewä íe, esepa nu blóie. Etä ká kiè Skauchka Yuökwak Ké e' tué ie'pa tö.

<sup>8</sup>Ie'pa tö ká e' tué s'kötulewä ese ské wa, e' kuëki dò ikkè tä ká e' kiè Ká Tone S'kötulewä Ské Wa. <sup>9</sup>Íyi ekkè kos tka wes Skëköl tteköl kiè Jeremías tö iyë'atbak es. Ie' tö iyë': “Israel aleripa tö iské méka inukölchka wöshki doka dabom mañayök (30), ekkè kló'wé ie'pa tö, <sup>10</sup>tä e' wa ie'pa tö ká kiè Skauchka Yuökwak Ké e' tué wes Skëköl tö ye' a iyë' es.”<sup>8</sup>

Es Jeremías tö iyë'at.

### Pilato tö Jesús a ichaké

(*Marcos 15.2-5; Lucas 23.3-5; Juan 18.33-38*)

<sup>11</sup>Jesús mítser ie'pa wä Pilato dör ká e' wökir e' ska' tä e' tö ie' a ichaké:

—¿Be' dör judiowak blú?

Ie' iüté:

—Tó, wes be' iché, e'ma es idir.

<sup>12</sup>Sacerdotepa wökirpa ena judiowak kuëblupa tö ie' kcateke Pilato a, erë Jesús kè wä ie'pa iütène yës. <sup>13</sup>E' kuëki Pilato tö ie' a ichaké:

—Ie'pa tö be' kcateke taië ¿e' kè ttsène be' wä?

<sup>14</sup>Erë ie' kè wä iütène yës, e' tö Pilato tkiwéwä darërë.

### Jesús méttsa ttèwä Pilato tö

(*Marcos 15.6-20; Lucas 23.13-25; Juan 18.38–19.16*)

<sup>15</sup>Judiowak Yépa Yërulune Egipto, e' kéwö wa Pilato wöblar s'wötëulewä s'wöto wé a ese yöktsä eköl émine wé kiane pé' kî e'. <sup>16</sup>E' kéwö ska' tä wëm tso' wötëule eköl kiè Barrabás kkekaulekä taië judiowak shua. <sup>17</sup>E' kuëki mik ie'pa e' dapa'wé taië, etä Pilato tö ie'pa a ichaké:

—¿S'wötëulewä wéne kiane a' kî tö ye' tö iyéttsane a' a: Barrabás ö Jesús kiek-erakitö wé pairine'bitü idi' wa s'blúie e'?



<sup>18</sup> Ie' tō isuwəwə tō ukyēne wa sacerdotepa wōkirpa tō Jesús me'ttsə i'ə ulà a. E' kueki i'ə tō i'əpa a ichaké es.

<sup>19</sup> Ie' tkērkaia s'shulo kulé ki, etə ilaköl tō ichök patké i'ə a: “Nañewe ye' tō Jesús kébisué, e' tō ye' tsiriwétka taië, e' kueki be' kè e' tiuk wēm ser yēsēsē e' ta.”

<sup>20</sup> Erë sacerdotepa wōkirpa ena judiowak kueblupa tō pē' ulitane dakinë tə ichérakitō: “Ikió Pilato a tō Barrabás ómine erë Jesús ttówa.”

<sup>21</sup> Pilato tō i'əpa a iskà chakéne:

—¿Wəpa bōl i', wé kiane a' ki tō ye' tō ièmine?

Ie'pa iüté:

—¡Barrabás ómine!

<sup>22</sup> Ie' tō i'əpa a ichaké:

—Etə ¿wes Jesús kiekerakitō wé pairinebitu idi' wa s'blúie e' wèmiyö?

Ie'pa iüté:

—¡Ittówə wötèulewə krus mik!

<sup>23</sup> Ie' tō ichaké i'əpa a:

—¿I' kueki? ¿I' sulu wambléitō?

Erë i'əpa kī arke:

—¡Iwötówə krus mik!

<sup>24</sup> Ie' tō isué tō i'ə kè a Jesús tsatkénuk wēs, pē' kī arkeka taië, e' kueki i'ə tō di' tsuk patké tə iulà skué i'əpa ulitane wōrki iwà kkachöie tō i'ə kè iane iwiie. Ie' iché:

—Wēm i' patkeraëyö ttèwə erë e' nuí kè ku' ye' ki. E' nuí ardaè a' ulitane ki.

<sup>25</sup> Etə i'əpa ulitane iüté:

—Sa' ena sa' ala'r kos as e' ki i' nuí ar.

<sup>26</sup> Etə Barrabás émi i'ə tō. E' ukuökj tə i'ə tō Jesús ppök patké tsa' bata daloie wa, tə iméttstaitō inippökwakpa ulà a wötèwə krus mik.

<sup>27</sup> Etə Pilato nippökwakpa wə Jesús mıtser s'wōkirpa wé kiè Pretorio e' pamik tə eē i'əpa tō nippökwakpa malepa kos kiéttstə dapa'wé ek tsiní Jesús pamik. <sup>28</sup> Ie'pa tō Jesús datsi' yéttstə tə datsi' mat daloshdalosh ese wa ipaiérakitō blu'ie. <sup>29</sup> Nies dika'kicha yué wōshkiie, e' tkékarakitō iwōkir ki

blu'ie. Kuaköl wölö mérakitō i'ə a iulà bua'kka wēs blu' es. E' ukuökj tə i'əpa e' tkéwə kuchè ki i'ə wōrki iwayuoie tə ichérakitō:

—¡Be' dör judiowak blú! ¡Be' kikökka sa' tso'!

<sup>30</sup> Nies i'əpa wiritué iki taië, tə kuaköl wölö atser iulà a, e' yéttsarakitō, e' wa ippérakitō taië iwōkir ki. <sup>31</sup> Mik iwayué one, etə datsi' mat daloshdalosh, e' yéttsarakitō tə iwák datsi' iékanerakitō iki tə imıtserak iwə wötèwə krus mik.

### Jesús wötène krus mik

(*Marcos 15.21-32; Lucas*

*23.26-43; Juan 19.17-27*)

<sup>32</sup> Mik nippökwakpa wə Jesús dami e'pa e' yélur ee, etə wēm eköl kué i'əpa tō ñalə ki kiè Simón, e' dör Cirene wak. Ie' ké i'əpa tō Jesús krus tsukmi.

<sup>33</sup> Mik i'əpa de ká kiè Gólgota eē (Gólgota wə kiane ché s'wōkirdiche), <sup>34</sup> etə i'əpa tō vino shutuule kapöli bacha'bachaè wa, ese mé Jesús a yè. Erë mik i'ə tō ipattsé, etə i'ə kè wə iyanewa.

<sup>35</sup> Mik i'əpa tō iwöté krus mik one, e' ukuökj tə i'əpa iné ñi ma'woie sué tō wēs i'əpa tō i'ə datsi' blatemi ñi a. <sup>36</sup> E' ukuökj tə i'əpa e' tuluésér ikkō'nuk as kè yi it-satkō. <sup>37</sup> Kaltak ki itso' kitule tō iché: “I' dör Jesús dör judiowak blú e'”, e' bat-séwarakitō i'ə wōkir tsaka. E' kit i'əpa tō iwà kkachöie tō i'ə nuí ki i'ə wötènewə krus mik.

<sup>38</sup> Etə ñies wəpa bōl akblökwakpa wötèwarakitō krus mik, eköl iulà bua'kka, eköl iulà bakli'kka. <sup>39</sup> Pē' tköke eē e'pa tō icheke sulu, iwōkir wōtiukerak iwōə, es ichekerakitō:

<sup>40</sup> —¡Be' sē tō Skéköl wé tkekettsə, tə ká mañatk è tə be' tō iyuékane! Moki be' dör Skéköl Alà, e'ma be' e' tsatkó, be' e' ówa krus sē mik.

<sup>41</sup> Es ñies sacerdotepa wōkirpa ena s'wöbla'uk ttè dalöièno wa wakpa ena ju-

diowak kuɛblupa, e'pa tō ie' wayueke. Ie'pa ñi a ichōke:

<sup>42</sup>—O'kapa tsatkéitō erē ie' wák kè a e' tsatkér. Moki ie' dör Israel aleripa blú, e'ma as ie' e' òwa krus wí mik, e' iarma tã sa' erblōmi ie' mik. <sup>43</sup>¿Ie' kè wã sa' a iyène tō ie' dör Skëköl Alà? ¿Ie' erblōke Skëköl mik e' kī ikiane, e'ma as e' tō itsatkò!

<sup>44</sup>Dò ñies akblōkwakpa bōl wötëule-wã krus mik ie' o'mik, e'pa tō ie' cheke sulu.

### Jesús duowa

(*Marcos 15.33-41; Lucas 23.44-49; Juan 19.28-30*)

<sup>45</sup>Mik diwö de bata a, etã kã míã ttsettseë kã wa'ñe, dò tsálí diwö de mañat ekkë. <sup>46</sup>E' wöshã tã Jesús anekã taië tã ichè: “Elí, Elí, ¿lemã sabactani?” (e' wã kiane chè: A ye' Këköl, a ye' Këköl, ¿jók be' ye' we'ikéttsa?)

<sup>47</sup>Mik welepa tso' ee, e'pa tō ttè e' ttsé tã ichérakitō:

—Wëm wí tso' Skëköl tteköl bak kiè Elías, e' kiök.

<sup>48</sup>Etã ie'pa eköl tunemi tō suiyök nuwéka vino shkōshkō wa, e' tkéka kuaköl bata kī tã itkewã ie' kkò mik as ikuyöitō. <sup>49</sup>Erè imalepa tō iché ie' a:

—Imúat bër, ipanusö suè tō Elías datse itsatkök.

<sup>50</sup>Etã ie' skà anene taië tã iwiköl émitō. Es iduowa. <sup>51</sup>E' wöshã tã Skëköl wé a ie'pa wã datsi' buririë ese shukuar u blatoie e' jchënane kãkke dötsã iski. Ñies kã wötí'neka tã ák blublu tskirólone. <sup>52</sup>Etã pö kköburolone tã s'batse'rupa blërulune, esepa taië shkenekane <sup>53</sup>e' yélur ipö a. Ie' du'wã shkenekane, e' ukuöki tã ie'pa de Jerusalén dör kã batse'r ee, tã taië pè tō ie'pa sué.

<sup>54</sup>Roma ñippökwa eköl dör capitán ena imalepa tso' ie' tã Jesús kk'ö'nuk, mik e'pa tō kã wötí'ne ena ì kōs tka ee e' sué, etã ie'pa tkirilune tã iché ñi a:

—Moki wëm wí dör Skëköl Alà je'.

<sup>55</sup>Ñies alakölpa manetwã Galilea Jesús tã ikimuk, e'pa tso'ñak taië ie' kī sauk kamië. <sup>56</sup>E'pa eköl dör María Magdala wak, iëköl dör María dör Santiago ena José e'pa mi, iëköl dör Zebedeo ala'r, e'pa mi.

### Jesús nu wötëne pö a

(*Marcos 15.42-47; Lucas 23.50-56; Juan 19.38-42*)

<sup>57</sup>Wëm eköl tso' kiè José Arimatea wak, e' dör inuköl blú, ñies ie' dör Jesús klé eköl. Mik kã tuirketke, <sup>58</sup>etã ie' míã Pilato ska' Jesús nu kiök. Pilato tō imuk ké ie' a. <sup>59</sup>Ie' wã imítser patrëwã datsi' ukuö bua'buwa saruru maneneë ese wa. <sup>60</sup>E' ukuöki tã ie' tō ibléwã ákuk bine pa'alí iwák nu blóie e' a. Ie' tō ák bérie trémi dò pö kkò mik, e' wa iwötëwã. E' ukuöki tã imía. <sup>61</sup>Erè María Magdala wak ena María skà, e'pa atë tulur pö kkò wöshã.

### Jesús nu blëne e' kk'ö'ne Shkëkipa tō

<sup>62</sup>E' bule es e' dör eno diwö, etã sacerdotepa wökirpa ena fariseowakpa míyal ñitã ttök Pilato tã. <sup>63</sup>Ie'pa iché ia:

—A këképa, sa' éna ianewã tō mik kachökwa e' bak ttsë'ka, etã ie' tō iyé' tō ie' duowa e' kī kã de mañat etã ishkerdakane. <sup>64</sup>E' kuëki sa' tō be' a ikié tō pö kk'ö'nuk patkó dökã kã mañat dö' it-tókatapa dò inú ekiblökwa tã i' ukuöki tã ichënerakitō sulitane a tō ishkenekane. E' wërakitō es, e' tã e' dör kachè taië shütë tkòkã ikache kewe e' tsata.

<sup>65</sup>Pilato tō iché ie'pa a:

—Se a' wã ñippökwa tso', a' yú ikk'ö'nuk bua'iewã kōs a' a ikk'ö'narmi ekkë.

<sup>66</sup>Etã ie'pa míã pö a tã íyi batsëwarakitō pö kkò mik as kè yi mi'waiã ee. Ie'pa tō ñippökwa pö méat pö kk'ö'nuk, etã iwákpa míyal.

### Jesús shkenekane

(Marcos 16.1-8; Lucas 24.1-12; Juan 20.1-10)

**28** Eno diwö tka, e' bule es e' dör domingo e' ñirketke tã María Magdala wak ena María skà, e'pa míyal Jesús pö sauk. <sup>2</sup>E' wöshã tã Skëköl biyöchökwak eköl tso' kã jai a e' de, etã í tka darërëë. Ie' mĩa pö a tã ák bastkër e' trëuitö bänet tã ie' e' tkéser iki. <sup>3</sup>Ie' wönarke dalölöë wes alá wönar es, idatsi' damiwa saruruë wes suiyök es. <sup>4</sup>Mik ñippökwakpa tö e' sué, etã ie'pa tkirulune painëkarak siwa' arulune suane è wã, atë wes s'duowa' es. <sup>5</sup>Etã Skëköl biyöchökwak tö iché alakölpa a:

—Kè a' suanuk. Ye' wã ijcher tö a' tso' Jesús kötëwã krus mik, e' nu yulök. <sup>6-7</sup>Erë ye' de a' a' ichök tö kè ikü' íe, ishkenekane wes ie' tö iyë'atbak es. A' shkó wé ie'pa tö inú me'wã e' tò weblök. E' ukuökí tã a' yú bet ibiyó chök ittökatapa a: 'Ie' shkenekane, e' mir a' yöki kewe Galilea, eë a' tö sueraë.'

### Jesús e' kkaché alakölpa a

<sup>8</sup>Etã alakölpa míyal shkalalã. Ie'pa suane erë ñies ie'pa ttsë'ne buaë. Ie'pa tunemirak ibiyó muk Jesús ttökatapa a. <sup>9</sup>E' wöshã tã Jesús de dur ie'pa wörki tã ie'pa shkë'wëitö. Ie'pa dewã ie' ska' tã ie'pa e' tulëwã kuchë ki tã iklö paklö'wëwarakitö tã idalöierakitö. <sup>10</sup>Ie' tö iché ie'pa a:

—Kè a' suanuk. A' yú ichök ye' ttökatapa a tö a' yú Galilea tã eë a' tö ye' sueraë.

### Ñippökwakpa patoule kachök

<sup>11</sup>Alakölpa míyal, e' dalewa ñippökwakpa tso' pö kkö'nuk e'pa welepa míyal

Jerusalén tã ì kos tka e' pakërakitö seraã sacerdotepa wökirpa a. <sup>12</sup>Sacerdotepa wökirpa míyal ttök judiowak kuëblupa tã. Ie'pa ttë mé ñi a: "Sú sö ñippökwakpa patuë inuköl taië wa as ie'pa ichö wes se' ki ikiane es." <sup>13</sup>Ie'pa tö iché ñippökwakpa a:

—A' ichö tö nañewe a' kapolur e' dalewa Jesús ttökatapa debitu' e' wã inú mítser. <sup>14</sup>A' wökir kibi wã ijchenewa, e' tã sa' ttöraë ie' tã a' tsatkoie. Es kè ì tköpa a' tã.

<sup>15</sup>Etã inippökwakpa tö inuköl e' klö'wé tã ichërakitö wes ie'pa ké ichök es. Dö ñne tã kachë e' pakekeia judiowak tö.

### Jesús tö ittökatapa patké ie' ttë pakök kã ulitane wakpa a

(Marcos 16.14-18; Lucas 24.36-49; Juan 20.19-23)

<sup>16</sup>Etã Jesús ttökatapa dabom eyök kí eköl (11), e'pa míyal Galilea kabata a wé ie' tö ie'pa a' iyë' ee. <sup>17</sup>Mik ie'pa tö isué, etã ie'pa tö idalöié, erë ie'pa welepa tö ibikeitséka bötböt. <sup>18</sup>Ie' de ie'pa ska' tã ichéitö:

—Skëköl tö ye' tkë'ka iyi ulitane wökirie kã jai a' ena kã i' a. <sup>19</sup>E' kuëki a' yú kã ulitane a' s'yuök ye' ttökatapaie. Ie'pa wöskuó S'yé ena ye' dör ilã ena Wiköl Batse'r e' ttö wa. <sup>20</sup>Ñies ttë kos wã dalöiök a' ka' ye' tö, e' wa ie'pa wöbla'ú as ñies ie'pa tö iwã dalöiö. Ye' ser michoë a' tã kekraë. Erë kã i' enewatke, erë ye' kè tö a' mepaat a' wakpa è.

## Jesús Tté Buaë Kit San Marcos tò

### Marcos

Yi tò yëkkuö i' kit e' kiè Marcos. Ñies ie' kiè Juan Marcos. Ie' kè dör Jesús ttekölpa tsá dabom eyök kí bōl e'pa eköl. Erë wele tò ibikeitsè tò ie' dör Pedro klé. E' kueki pē' taijè tò ibikeitsè tò Pedro tò ie' kime' yëkkuö i' shtök. Ñies ie'pa ibikeitsè tò Marcos bak senuk Jerusalén, e' kueki i' o' Jesús tò ena i' yē'itō e' ane buaë ie' éna.

Jesús dör Skéköl alá e' dē'bitu ká i' kī e' tò íyi buaë o' taijè sulitane a' ie'pa wörki. E' kit Marcos tò yëkkuö i' kī. Ie' kī ikiane tò sulitane wá ijcherwá. Ñies wes Jesús weine taijè ena iwötēnewá krus mik e' paké ie' tò taijè. Jesús weine taijè ena idu'wá, e' ukuöki ishkenekane, e' kueki idiché ta' taijè tkòka se' bolök Satanás tsá-tá. Iñe tá kēkraé ie' tso' se' kimoie, e' kiane Marcos kī tò se' wá ijcher. E' kueki ie' tò yëkkuö i' kit.

Marcos i' tté tso' kitule Hechos 12.12,25; 13.5,13; 15.36-39 ena 2 Timoteo 4.11 e' kī. Eré kè s'wá ijcher yësyèsè tò mik ie' tò yëkkuö i' kit, erë se' taijè tò ibikeitsè tò ikititō Jesús kune' e' kī duas de dabom skeyök (50) ena dabom kuryök (70) e' shū ulat.

### Juan s'wöskuök tò s'patté

(Mateo 3.1-12; Lucas 3.1-9,15-17; Juan 1.19-28)

**1** Jesucristo dör Skéköl Alá, e' tté buaë dör i' es.

<sup>2</sup> Ká iaiaë Skéköl tteköl kiè Isaías e' tò ikitat yëkkuö kī, e' ichè i' es:

Skéköl tò ichè: “Ye' tso'tke ye' tté pakök-wak patkök be' yökí kewe, be' ñalé yuök.”\*\*

<sup>3</sup> Ká sir poë wé kè yi serku' ee' ie' ttöraë aneule:

‘A' er mane'ú Skéköl datse e' yökí, e' dör wes ñalá yuèsö yësyèsè ie' yökí es.’††

Es Isaías tò iyē'at.

<sup>4</sup> Es Juan S'wöskuök wak tso' ká sir poë wé kè yi serku' ee', e' tò s'pattémi i' es: “A' er mane'ú Skéköl a' as a' nuì olo'yòitō a' kī tá a' e' wöskuólor iwá kkachoeie.”

<sup>5</sup> Jerusalén wakpa ena ká malepa tso' Judea e' wakpa kos döke ie' ttöke e' ttsök. Ie'pa e' wamblò sulu kos e' chekekarakitō tá Juan tò iwöskuekelor di' kiè Jordán e' a.

<sup>6</sup> Juan datsi' yöule kameio köyök wa; ikipamo yöule iyiwak kkuölit wa. Ie' chkè dör ditski ena bulali. <sup>7</sup> Tté pakeke ie' tò ie'pa a' i' es: “Ye' itökí idatse eköl, e' dör kékēpa taijè ye' tsata, e' kueki ie' klökkuö kicha è kè wötsēnanuk ye' siarla e' a. <sup>8</sup> Ye' tò a' wöskueke di' a, erë ie' tò a' ierawá Wiköl Batse'r a.”

### Juan tò Jesús wöskué

(Mateo 3.13-17; Lucas 3.21-22)

<sup>9</sup> E' kéwō ska' tá Jesús e' yéttsá Nazaret atē Galilea ee', e' de Jordán tá ee' Juan tò ie' wöskué. <sup>10</sup> Mik ie' wösune e' e' duékane di' a, e' wöshá tá ie' isué tò ká jaì kköbunane tá Skéköl Wiköl bitē ie' kī nuböl sù. <sup>11</sup> Eta' ttò ttséne datse ká jaì a, e' tò ichè: “Be' dör ye' alá dalēr taijè ye' éna, e' wër ye' wa buaë shute.”

### Satanás tò Jesús erkiöwé i' sulu wamblök

(Mateo 4.1-11; Lucas 4.1-13)

<sup>12</sup> E' ukuöki tá Skéköl Wiköl tò Jesús ké shkökmi ká sir poë wé kè yi serku' ee'.

<sup>13</sup> Ee' iyiwak sulusi tso' taijè. Ee' ie' sené ká dabom tkéyök (40), e' dalewa Satanás

\*\* 1:2 Malaquías 3.1

†† 1:3 Isaías 40.3

tö ie' erkiöwé ì sulu wamblök. Skëköl biyöchökwakpa tö ie' kimé.

**Jesús tö ie' kanè wawémítke Galilea**

(Mateo 3.1-12; Lucas 3.1-9,15-17; Juan 1.19-28)

14 Juan klö'wéwarakitö wötéwá s'wöto wé á, e' ukuökí tã Jesús míá Galilea Skëköl ttè buaè e' pakök. 15 Ie' s'patteke i' es: "Í blúie Skëköl tso' e' kéwö dewátke tsinet. E' kuekí a' er mane'ú ie' á tã ie' ttè buaè e' klö'ú."

**Jesús tö nima klö'ukwakpa dökã tkël e'pa kié**

(Mateo 4.18-22; Lucas 5.1-11)

16 Mik Jesús shkörãmi batsöri kié Galilea e' kkömik, etã wépa böi suéitö. E'pa dör Simón ena iël Andrés. Ie'pa dör nima klö'ukwakpa. Ie'pa tso' ikla' uyök batsöri á nima klö'woie.

17 Jesús tö ie'pa á iché:

—A' shkó ye' tã. A' yueraëyö s'ditsö klö'uk ye' á ye' ttökataie.

18 E' bet tã ie'pa tö ikla' tuléat tã míyal ie' tã.

19 E' wí'kie Jesús tö Santiago ena iël kié Juan e'pa sué. Ie'pa dör Zebedeo ala'r. Ie'pa tulur kanò á ikla' wöyuök. 20 E' wöshã tã Jesús tö ikiémirak e' tã. Etã ie'pa tö iyé méat ikanè mésopa tã kanò shuã tã imíyal Jesús tã.

**Jesús tö aknama tré'wëshkar wëm eköl á**

(Lucas 4.31-37)

21 Ie'pa demi kã kié Cafarnaúm ee. Eno diwö á Jesús tkawã judiowak ñi dapa'wo wé á tã ie' tö s'wöbla'wémítke. 22 Ie' tö s'wöbla'weke ttè mokí diché tã taié ese wa. E' kè dör wës s'wöbla'uk ttè dalöiëno

wa wakpa tö s'wöbla'weke es. E' kuekí e' tö wépa tso' ittök e'pa tkiwéwã. 23 Etã ee wëm eköl tso' e' á wimblu sulusi tso' e' tö iché aneule:

24 —A Jesús Nazaret wak, ¿ie be' tso' sa' tsiriuk? ¿Be' debítu sa' eukwa? Ye' wã be' suule. Ye' wã ijcher tö be' dör yi dör batse'r patkë'bitu Skëköl tö e'.

25 Jesús tö wimblu e' uné:

—¿Be' siwã'blówã, be' e' yóttã wëm se á!

26 Wimblu sulusi tö wëm siwã' éwa tã iãnekã taié tã ie' yéttã ia. 27 Sulitane tkinewã iweblök tã ñi chakérak:

—¿Wí dör i? ¿Ie' s'wöbla'weke ttè pa'ali wa ena diché wa dò wimblupa sulusi kéitö e' yöktsã tã ittö iutérakitö ekké!

28 E' bet tã ie' ttè bunekã Galilea kos á.

**Jesús tö Simón yäk bua'wéne**

(Mateo 8.14-15; Lucas 4.38-39)

29 Mik ie'pa e' yélur ñi dapa'wo wé á tã Jesús míá Simón ena Andrés e'pa u á. Santiago ena Juan mí ie' tã. 30 Ee Simón yäk me'r kã kí kiri'weke duè dalölö tö, e' ché ie'pa tö Jesús á. 31 Etã ie' e' skéwã tã iklö'wéitö iulã á tã ikimé e' tkökser. E' bet tã duè dalölö ie' éwa tã ie' e' kékã ilè yulök ie'pa á ñè.

**Jesús tö taié s'kirirke esepa bua'wéne**

(Mateo 8.16-17; Lucas 4.40-41)

32 Kã tuine diwö míwatke tã s'kirirke ena wépa á aknama tso' esepa kos deb-iturak iwã Jesús ska'. 33 Kã e' wakpa kos e' dapa'wékã ukkö á. 34 Etã ie' tö duè ulitane bua'wéne pë' tso' taié e'pa á. Ñies aknamapa taié tré'wéalitö. Eré aknamapa wã ijcher yi dör ie', e' kuekí ie' kè wã kawö mène ie'pa á ttök.

††1:32 Diwö e' dör eno diwö, e' kuekí s'kirirke kos kè dè' ie'pa wã Jesús ska' ñiwe. Ie'pa kè á kawö tã' kaneblök eno diwö á. Ie'pa á tã íyi ö yile tsëmi e' dör kanè. E' kuekí ie'pa tö s'kirirke tsëmi Jesús ska' diwö míwatke e' ukuökí, ekké eno diwö erkerö e' kuekí.

**Jesús tō Skëköl ttè paké  
judiowak ñi dapa'wo wé a**

(Lucas 4.42-44)

<sup>35</sup> Ká ñirketke ià ttsetseë, ta Jesús e' kéka mía bānet wé kè yi ku' ese ska' ttök S'yé ta. <sup>36</sup> Etā Simón ena iwapiëpa míyal ie' yulök. <sup>37</sup> Mik ikuéwarakitō, etā ie'pa ie' a iché:

—Sulitane tso' be' yulök.

<sup>38</sup> Erë ie' tō ie'pa iüté:

—Mishka ká tso' tsinet tsinet ese a. Ñies eë ye' ké Skëköl ttè pakök, eseie ye' dë'bitu.

<sup>39</sup> Es Jesús shké ká tso' Galilea e' qos a ttè pakök judiowak ñi dapa'wo wé qos a, ñies aknama trë'ukyal.

**Wëm eköl kiri'weke lepra tō  
e' bua'wëne Jesús tō**

(Mateo 8.1-4; Lucas 5.12-16)

<sup>40</sup> Wëm eköl kiri'weke lepra tō, e' e' skéwa Jesús o'mik ta ie' e' tkéwa kuchë kī ta iché iā:

—Be' kī ikiane, e' ta be' a ye' buarmine as ye' batse'rne.

<sup>41</sup> Jesús tō ie' sué er siarë wa ta ikéwaitō ulā wa ta iché:

—Tō, ye' kī ikiane. Be' dene batse'r.

<sup>42</sup> E' wōsha ta wëm buanene batse'nene. <sup>43-44</sup> E' ukuökī Jesús tō ie' a iché:

—Ye' ttō ttsó, ì tka be' ta e' kè char yi a. Be' yú e' kkachök sacerdote a. Ì muk Moisés tō a' ka' e' batse'woie e' tsúmi mē Skëköl a iwā kkachöie.

<sup>45</sup> Erë wëm mía ta ie' e' kéka ì tka ita e' pakök sulitane a. E' kuekī Jesús kè a e' k kayënuwé wé pë' tso' taië ese ska'. Ie' kawōta e' tsukat kañika wé kè pë' ku' ese ska', erë ká wa'ñe wakpa datse' ie' ska'.

**Wëm eköl kraulewa  
e' bua'wëne Jesús tō**

(Mateo 9.1-8; Lucas 5.17-26)

**2** Ká wëkkë alë kuökī ta Jesús dene Ca-farnaúm. Mik pë' wa ijchenewa tō ie' tkër u a, <sup>2</sup> etā taië ie'pa e' dapa'wé ie' ska' kè chë'kaia weshke, kè chë'kaia ukkō a ekkë. Ie' tso' Skëköl ttè pakök ie'pa a. <sup>3</sup> E' dalewa wëpa dōka tkël wa wëm kraulewa kè karka debitu eköl ka'la kī. <sup>4</sup> Erë taië s'tso', e' kuekī kè wes ie'pa tkòmi weshke Jesús ska'. E' kuekī ie' tsaka u tsabata jchéé<sup>f</sup> ie'pa tō ta iduë émirakitō enaë e' a dōtsa iski. <sup>5</sup> Mik Jesús tō isuë tō mokī ie'pa erblé ie' mik, etā ie' iché ikirirke e' a:

—A alà, ì sulu qos wamblëbö, e' nuí olone be' kī.

<sup>6</sup> Erë s'wöbla'uk ttè dalöiëno wa wakpa wëlepa tulur eë, e'pa ibikeitse: <sup>7</sup> “¿Ì kuekī wëm wí ttò es? Skëköl è a se' nuí olo'yarmi. Ì ché ie' tō e' wa ie' tso' Skëköl chök suluë.” <sup>8</sup> Erë ì bikeitsök ie'pa tso' e' suéwa Jesús tō bet. E' kuekī ie' tō ie'pa a ichaké:

—¿Ì kuekī a' tō ibikeitseke es? <sup>9</sup> Ye' tō s'kraulewa díó bua'wëmine as ishkōne, e' ta ¿wes a' tō iklō'wëmi tō ye' kè a inuí olonuk ikī? <sup>10</sup> Ye' dör S'ditsö Alà, sú e' tō a' a ikkachè tō ye' wa kawō ta' ká i' a nuí olo'yoie.

Etā ie' tō iché wëm kraulewa e' a:

<sup>11</sup> —Be' e' kōka, be' ka'la kōka ta be' yúne u a.

<sup>12</sup> Bet ta ie' e' kéka, ika'la kéka, ta imía sulitane wörkī. E' tō ie'pa qos tkiwéwa ta ie'pa tō Skëköl kikéka taië ta ichéraitō:

—Kè se' wa íyi wíse suule yës.

**Jesús tō Leví kié ittökataie**

(Mateo 9.9-13; Lucas 5.27-32)

<sup>13</sup> E' ukuökī ta Jesús míane batsöri kkömik ta pë' e' dapa'wéka ie' ska' ta ie'

<sup>f</sup>2:4 u tsabata jchéé: Ie'pa u tsabata dör kkuëie, e' kī ie'pa shkōke.

tö ie'pa wöbla'weke. <sup>14</sup>Ie' domitkö ta ie' tö inuköl shtökwak Roma wökirpa a e' sué eköl tkër ikaneblöke e' wé a. E' dör Leví dör Alfeo aladulaköl. Ie' tö iché ia:

—Be' shkó ye' ta ye' ttökataie.

Eta ie' e' kéka ta imía Jesús ta.

<sup>15</sup>E' ukuöki Jesús tso' chkök Leví u a. Pé' shköke tsakjé Jesús ta, e' kueki inuköl shtökwakpa ena pé' sulusipa skà tulinak chkök ie' ena ittökatapa ta.

<sup>16</sup>S'wöbla'uk ttè dalöiëno wa wakpa welepa dör fariseowakpa. Mik e'pa wele tö Jesús sué tö ichköke pé' esepa ta, eta ie'pa tö ichaké ittökatapa a:

—¿Iök a' wöbla'ukwak chköke inuköl shtökwakpa ta ena pé' sulusipa skà ta?

<sup>17</sup>Jesús tö ittse ta ichéitö iarak:

—Wépa kè kirirku' esepa kè ki s'kapeyökwak kiane, erë wépa kirirke esepa ki ikiane. Ye' kè dë'bitu wépa e' ttsò tö ie'pa serke yësyësë esepa kiök. Ye' dë'bitu pé' sulusipa kiök.

**Ì kueki Jesús ttökatapa kè batsöta'**

(Mateo 9.14-17; Lucas 5.33-39)

<sup>18</sup>Etökicha ta Juan S'wöskuökwak ttökatapa ena fariseowakpa tso' batsök, eta pé' welepa de Jesús ska' ta ichakéarak-itö ie' a:

—Juan S'wöskuökwak ttökatapa ena fariseowakpa klépa batsöke. ¿Ì kueki be' ttökatapa kè batsò?

<sup>19</sup>Jesús tö ie'pa iuté:

—Mik s'kiule ulabatsè kéwö tkö'uk, eta ¿wes ie'pa batsömi wëm ulabatske e' tso'ia ie'pa ta e' dalewa? Ie' tso'ia ie'pa ta, e' dalewa ie'pa kè batsöpa. <sup>20</sup>Erë ikéwö döraë eta ie' mi'datser ie'pa yöki. E' je' ta ie'pa batsöraë.

<sup>21</sup>“Kè yi tö datsi' këchke wöyuepawa datsi'tak pa'alí wa, datsi'tak pa'alí wöklöneka, e' tö datsi' këchkela shukuëë ta ikí jchèe taië. <sup>22</sup>Nies kè yi tö vino pa'alí tepaka iyiwak kkuölit yöule ibloie ese këchke a. Itékasö es, e' ta mik ibacha'nebitu, eta ikkuölit jchèemiitö.

Es vino ena ikkuölit weirwami éme. E' kueki vino pa'alí tekeka ikkuölit pa'alí a.”

**Jesús ttökatapa tö trigowö butsé eno diwö a**

(Mateo 12.1-8; Lucas 6.1-5)

<sup>23</sup>Etökicha ta eno diwö a, Jesús dami trigo shua ta ittökatapa tö trigowö butsémi ishkörami e' dalewa katè. <sup>24</sup>Fariseowakpa tö ie' a ichaké:

—Sa' ttò ttsó, ¿i kueki be' ttökatapa tso' i kè kéwö ta' wè eno diwö a ese uk?

<sup>25</sup>Erë ie' iuté:

—Etökicha ká iaiaë mik David ena iklépa du' bli wa ta kè ie'pa wa i dami në, eta i o' ie' tö ¿e' kè aritsule a' wa Skëköl yëkkuö ki? <sup>26</sup>Mik Abiatar dör sacerdote kibi, e' kéwö ska' ta David dewa Skëköl wé a ta pan meule Skëköl a e' nëitö ta nies iméitö iklépa a në. Sacerdotepa è a pan ese kéwö ta' në. Erë a' éna iane tö i o' David tö e' kè dör suluë Skëköl wöa.

<sup>27</sup>Ie' tö ikí ché:

—Eno diwö meneat s'ditsö kimoie, erë s'ditsö kè yöne eno diwö è batseitsök.

<sup>28</sup>E' kueki ye' dör S'ditsö Alà, e' wa kawö ta' ichoie tö i dör buaë ö i dör suluë wè eno diwö a.

**Wëm ulà siulewa e' pakè**

(Mateo 12.9-14; Lucas 6.6-11)

**3** Jesús skà dewane judiowak në dapa'wo wé a, ta ee wëm tkër eköl ulà etk siulewa. <sup>2</sup>Ie'pa éna ie' kkatat ilè ki, e' kueki ie'pa tso' ie' weblök tö wëm në' bua'wëmine ie' tö eno diwö a. <sup>3</sup>Ie' tö iché wëm ulà siulewa e' a:

—Be' e' kóka ta be' e' duóser íe sultane wöshäë.

<sup>4</sup>Ie' tö ie'pa a iché:

—¿Ì kéwö ta' se' a wè eno diwö a: i buaë ö i suluë? ¿S'tsatkök ö s'ttökwä?

Erë ie'pa siwa'bléwa ie' yöki. <sup>5</sup>Ie' tö ie'pa weblé késik wa. Ie'pa er darërë e' tö ie' eriwé. Ie' iché wëm a:

—Be' ulà shulöö.

Tà ie' ulà shuléé tã ibuanene. <sup>6</sup>Etã fariseowakpa ponemi, e' bet tã ie'pa ñi dapa'wékã Herodes klépa tã ileritsök Jesús ttowaie.

### Taië pë' tso' batsöri kkömik

<sup>7</sup>Etã Jesús míã ittökåtapa tã batsöri kkömik tã taië Galilea wakpa míyal ie' tã. <sup>8</sup>Ñies pë' tso' taië eë datse Jerusalén ena Judea kã malepa a. Ñies ie'pa datse Idumea ena Jordán wishet ena kã wé Tiro ena Sidón atë eë. Ie'pa tã ì kos weke Jesús tã e' tté tse' e' kueki ie'pa de iweblök. <sup>9-10</sup>S'kirike taië bua'wétke Jesús tã, e' kueki imalepa taië e' uyökeka ie' ki ikökwa. E' kueki ie' tã iché ittökåtapa a tã kanò tsúbitu tértke dö' ie'pa tã ye' tuèwã darërë.

<sup>11</sup>Mik wépa a wimblupa sulusi tso' esepa tã ie' sué, etã ie'pa e' tulélur kuché ki ie' wöã tã iarkerak:

—;Be' döer Skököl Alà!

<sup>12</sup>Erë ie' tã ie'pa a iché kësik wa:

—;Kë ye' tté pparã!

### Jesús tã ittekölpa tsã dabom eyök kã böi e'pa shushtë

(Mateo 10.1-4; Lucas 6.12-16)

<sup>13</sup>E' ukuöki tã Jesús míã kabata a. Etã wépa kiane ie' ki kiè, e'pa kiéitö tã ibiterak ie' ska'. <sup>14</sup>Ie' tã ie'pa shushtë dabom eyök kã böi shkök ie' tã ena patkëmi ie' tté pakök. E'pa kiè mékaitö ittekölpa tsã. <sup>15</sup>Ie'pa a diché méitö aknama trë'ukyal. <sup>16</sup>Ie'pa kiè i' es: Simón, e' kiè mékaitö Pedro; <sup>17</sup>Santiago ena iël Juan, e'pa döer Zebedeo aladulakölpa, e'pa kiè skà mékaitö Boanerges (kiè e' wã kiane chë “wépa döer wes alá es”); <sup>18</sup>Andrés, Felipe, Bartolomé, Mateo, Tomás ena Santiago döer Alfeo alà; ena Tadeo, Simón Celote, <sup>19</sup>ena Judas Iscariote tã Jesús wömekettsã aishkuö tã ibolökpa a e'.

### Jesús ena Beelzebú

(Mateo 12.22-32; Lucas 11.14-23; 12.10)

<sup>20</sup>E' ukuöki tã Jesús dewã u a ittökåtapa tã. Etã taië pë' ñi dapa'wékane kè wa ie'pa chko ekkë. <sup>21</sup>Mik Jesús yamipa ekka wã ijchenewã tã wes ie' tso', etã ie'pa de itsukmi iyërke tã ie' alínekã e' kueki.

<sup>22</sup>Ñies s'wöbla'uk tté dalöiëno wa wakpa datse Jerusalén e'pa tã Jesús ché i' es: “Beelzebú döer bé e' tã wëm wí éna kã chöwéwa, e' diché wa ie' tã aknama trë'wekeyal.”

<sup>23</sup>Etã Jesús ikiéttsarak tã ikleéitö iarak i' es: “;Wes Satanás e' trë'ushkarmi? <sup>24</sup>S'erke kã etkè ki e' ñi blabatsélor ñippök ñita, kè wöklör, e' tã ie'pa wákpa mir wa'k ème. <sup>25</sup>Ñies ñi yamipa e' kékã ñippök ñita, kè wöklör, e' tã ie'pa mir wa'k ème. <sup>26</sup>Es ñies Satanás klépa mú ñi blabatsélor ñippök ñita, e' tã idiché wöarwami tã ierdawarak.

<sup>27</sup>“Kè yi mi'pawã wëm diché taië ese u a ie' íyi ekiblök kam ie' tã iwák maüwa e' yöki. Es ème ífyi ekiblërmi.

<sup>28</sup>“Moki ye' tã a a iché tã ì sulu kos wambleke a' tã, ñies Skököl cheke a' tã sulu kos e' nuí olo'yèmiitö a' ki. <sup>29</sup>Erë yi isie tã Wiköl Batse'r ché sulué, ese kè ki inuí olorpa, itso' iki kékraë.”

<sup>30</sup>Ie'pa iyë' tã wimblu sulusi tã ie' éna kã chöwéwa e' kueki Jesús tã e' ché ie'pa a.

### Jesús mi' ena iëlpa de iweblök

(Mateo 12.46-50; Lucas 8.19-21)

<sup>31</sup>E' ukuöki tã Jesús mi' ena iëlpa ena ikutapa e'pa debitu ie' yulök, erë ie'pa kè dë'wã weshke. Ie'pa tã ikiök patké. <sup>32</sup>Pë' tular ie' pamik e'pa tã iché ia:

—Be' mi' ena be' ëlpa ena be' kutapa e'pa shkò be' weblök.

<sup>33</sup>Ie' iüté:



—ǂYi dör ye' mi ena ye' ělpa ena ye' kutapa?

<sup>34-35</sup> Wépa tular ie' pamik e' suéitō ěk ta ichéitō:

—Yi isie tō ì kiane Skéköl kĭ ese wé, ese dör wés ye' ěl ena ye' kutà ena ye' mi es. E' kuękĭ ie'pa ikkěpa dör wés ye' mi ena ye' ělpa ena ye' kutapa es.

**Tĕ kuatkökwaĕ ttĕ**

(Mateo 13.1-9; Lucas 8.4-8)

**4** Etökicha ta Jesús s'wöbla'wémítke batsöri kkömik. Pĕ' dapane taię ipamik, e' kuękĭ ie' e' ięka kanò tkĕrkĭ tsĭnet ese etō a. Eę ie' e' tkĕser ie'pa wöbla'uk. Ie'pa ęos aęę batsöri kkömik ie' ttò tšök. <sup>2</sup>Eę ie' tō ttĕ tsakię kleę ie'pa a iwöbla'woie, e' et dör i' es: <sup>3</sup>“A' tō ittšó. Etökicha ta wĕm eköl mĭa tĕ kuatkök ppĕ ululu ěme<sup>88</sup> <sup>4</sup>Mik ie' tso' iwö ppök, etā ditsöwö wele anewa ñala ska' ta dū debitū tō ikatĕwa. <sup>5</sup>Ditsöwö wele anewa áklo a wé íyök kĕ ta' taię ese ska'. Íyök kĕ ta' taię, e' kuękĭ bet ta' itskine. <sup>6</sup>Erĕ kĕ iwí kicha ta' taię, e' kuękĭ mik dĭba aneka iki, etā isinewa. <sup>7</sup>Ditsöwö wele anewa dika'chka šuę. Dika'chka ena ditsöwö talane ñita, erĕ dika'chka e' aléka iki, kĕ wöne. <sup>8</sup>Erĕ ditsöwö wele ane íyök bua'buā kĭ ese tskine talane wöne buā. Wele wöne dōka dabom mañayök (30) elka elka, wele dabom teryök (60), wele cien eyök (100).”

<sup>9</sup>Etā ie' tō ie'pa a iché: “ǂA' ěna ye' ttò tšak, e'ma ikukuebló bua'ie!”

**Ĭ kuękĭ Jesús tō s'wöbla'weke kleaule**

(Mateo 13.10-17; Lucas 8.9-10)

<sup>10</sup>Mik Jesús aęę dur ekörĭa, etā ittökatapa dabom eyök kĭ bōl ena iklépa welepa skà de ie' ska' ta ichakĕrakitō ia:

—Ttĕ wà kleébō, ǂima e' wà dör?

<sup>11</sup>Ie' ie'pa iutĕ:

—“Ĭ blúie Skéköl tso' e' ttĕ blĕulewa, e' kĕwō meneat a' a iwà jchenoie. Erĕ pĕ' tso' taię kĕ ěna ye' ttĕ klō'wak, esepa a ye' ikleeke <sup>12</sup>as ie'pa tō iwebló je', erĕ kĕ ie'pa a iwà wĕr, ñies as ie'pa tō ittšò je', erĕ kĕ ie'pa a iwà ar as kĕ ie'pa er mane'ũ ta inuĭ kĕ olor ie'pa kĭ.”\*

**Tĕ kuatkökwaĕ ttĕ e' wà paké Jesús tō**

(Mateo 13.18-23; Lucas 8.11-15)

<sup>13</sup>Etā ie' tō ie'pa a iché: “Ttĕ kleęyō ñe' wà kĕ ane a' ěna, e' ta ǂwes a' ěna imalepa wà armi? <sup>14</sup>Wé tō ditsöwö kuatkĕ, e' dör wé tō Skéköl ttĕ pakeke ese. <sup>15</sup>Pĕ' welepa tso' e'pa ta itkōmi wés ditsöwö arwa ñala kĭ es. Esepa tō Skéköl ttĕ tšé erĕ bet Satanás de iska' ta Skéköl ttĕ yĕtšā ier a. <sup>16</sup>Welepa skà ta itkōmi wés ditsöwö arwa áklo a es. Esepa tō Skéköl ttĕ tšé ta iklō'wĕrakitō tšĕ'ne buāē wa. <sup>17</sup>Erĕ ie'pa kĕ wĭ kicha ta' taię, e' kuękĭ ie'pa tō iklō'wĕ ekuöló ě. Mik ie'pa weinemitke Skéköl ttĕ kuękĭ, etā ie'pa anemine bet. <sup>18</sup>Welepa skà ta itkōmi wés ditsöwö arwa dika'chka šuę es. Esepa tō Skéköl ttĕ tšé, <sup>19</sup>erĕ ie'pa tō íyi tso' ká i' kĭ ese bikeitseke kĭbiie. Ie'pa er me'rie inuköl kĭ ena ì skà tso' ká iki tō s'tšĕ'weke buāē ese kĭ. Ese ęos tō Skéköl ttĕ kui'wĕwā ie'pa er a ta kĕ idĕ'tšā buāē wés ikiane es. <sup>20</sup>Erĕ welepa skà ta itkōmi wés ditsöwö arwa íyök bua'buā kĭ es. Esepa tō Skéköl ttĕ tšé ta iklō'wĕ ta iwà detšā buāē wés ikiane es. Ie'pa dör wés íyi kuá wör buāē es. Wele wöne dōka cien eyök (100), wele dabom teryök (60), wele dabom mañayök (30).”

**Bō'wō ttĕ**

(Lucas 8.16-18)

<sup>21</sup>Etā ie' tō iché ięarak: “Kĕ yi tō bō'wō tskepaka ta ibléwaitō kalkuō dikĭa ó ka' dikĭa. E' skĕie itkekekaitō kákke ká

<sup>88</sup>4:3 tĕ kuatkök ppĕ ululu: Ie'pa wöblar tĕ kuatkök wö ppĕlur tĕ ęos e' kĭ.

\* 4:12 Isaías 6.9-10

ñi'woje. <sup>22</sup> Es ñies kè ì kù' bléulewà kè jchenukwà aishkuò tã. Ese kòs kkayèr-daè. <sup>23</sup> ¡Yi éna ye' ttò ttsak, e'ma ikukuebló bua'ie!"

<sup>24-25</sup> Ñies ichéitò: "Yi e' yuak buaè ye' ttè wa, ese a ikí meraëyö as iéna iwà ar buaè. Erè yi kè e' yuak ye' ttè wa, ese yöki ì bikeitséitò tò ane ie' éna, ese kòs yèrdattsane. E' kuèki ì cheke ye' tò a' a' e' kukuebló. A' tò iwé es, e' tã a' éna iarimi buaè, ñies Skèköl tò a' kimeræ as ikí ar a' éna."

**Íyi kuatkè tté**

<sup>26</sup> Ñies Jesús tò iché: "Ì blúie Skèköl tso' e' tã itkòke wés itkò iyiwò kuatké wém eköl tò ese tã es. Ie' tò ikuatké tē kī <sup>27</sup> tã iméat bèrè. Ká bit ekkè ie' kapòke-wà nañewe, ñiwe tã ie' tì'rke tã íyi kuatkéitò e' tskine, talane erè ie' kè éna iane tò wés itskine wés italane. <sup>28</sup> Íyök è tò itskeke. Kewe ikua tskine, e' ukuökī tã iwörkuane, e' ukuökī tã iwöne. <sup>29</sup> Mik ikéwö de shtë, etã wém míã ishtëkka."

**Mostaza wö tté**

*(Mateo 13.31-32; Lucas 13.18-19)*

<sup>30</sup> Ñies Jesús tò iché: "Ì blúie Skèköl tso' ¿wes e' dör? ¿Ttè wé wa ye' tò ik-leèmi? <sup>31</sup> E' dör wés mostaza wö tkèsö es. E' wö dör tsirlala iyiwò ulitane dikīã. <sup>32</sup> Erè mik ikuatkènewà, etã italar íyi kuá tsitsir ulitane tsata. E' ulà dōka wī'wīë, e' tsakã dù u yöke."

<sup>33</sup> Es Jesús tò ie'pa a ikleé taië wés ttè i' es dò wé ie'pa éna iane ekkè. <sup>34</sup> Ie' kè wà ì pakane ie'pa a kè kleaule. Erè iwà kòs pakekeneitò ittòkatapa a bánet kè kleaule.

**Siwà' taië e' wöklö'wé Jesús tò**

*(Mateo 8.23-27; Lucas 8.22-25)*

<sup>35</sup> E' tsáli mik ká tuine, etã Jesús tò iché ittòkatapa a:

—Mishka batsöri wishet.

<sup>36</sup> Pè' tso' taië e'pa méarakitò tã ie' iékarak kanò a Jesús tso' e' a tã imíyal. Kanò skà mirwà ie'pa tã tseë. <sup>37</sup> E' bet tã siwà' bitsineka taië tò di' uyéka taië e' tò kanò wà iekeka.

<sup>38</sup> Erè ie' kapòme'r kanò ñak a wökir kata kī, eë ittòkatapa ie' tī'wéka tã iché iã:

—¡A s'wöbla'ukwak! ¿Se' duökelur e' kè kī be' tkine?

<sup>39</sup> Etã ie' e' kéka tò siwà' uñé tã iché di' a:

—¡Be' e' shtëwà bèr!

Etã siwà' wöklöne di' wöklöne míane alamië. <sup>40</sup> Etã ie' tò ittòkatapa a iché:

—¿Ì kuèki a' suane sekkè? ¿Kam a' er-blò ye' mik?

<sup>41</sup> Ie'pa kī tkinewà taië tã ñi chakéka: —¿Yi dör wém wī? ¡E' ttò dalöieke si-wà' tò di' tó!

**Wimblu sulusi trè'wéyal Jesús tò**

*(Mateo 8.28-34; Lucas 8.26-29)*

**5** Ie'pa demi batsöri wishet ká kiè Gerasa<sup>†</sup> eë. <sup>2</sup> Mik Jesús e' yéttsã kanò a, etã wém eköl a wimblu sulusi tso' e' yéttsã de Jesús ska'. <sup>3</sup> Wém e' serke pö ké a. Kè imonukwà tabechka kichaie wa ì wa. <sup>4</sup> Tseë imonere iulà a ena iklö a tabechka kichaie wa erè ibatséloritò. Kè yi diché tã' wè' iwöklö'woje. <sup>5</sup> Ñië nañéé ie' shkòke pö a ena kabata a arke taië, ñies ie' e' shka'uke ák wa. <sup>6</sup> Erè mik ie' tò Jesús sué kãmíë, etã ie' tunebitu e' tkéser kuchè kī Jesús wö shaë <sup>7</sup> tã ichéitò iã aneule:

—¡A Jesús, be' dör Skèköl dör íyi ulitane tsata e' Alà! ¿Íók be' de ye' tsiriuk? ¡Ye' kköchöke be' a Skèköl wörkī tò kè ye' we'ikar!

<sup>8</sup> Jesús tò ie' a ichétke: "¡A wimblu sulusi, wém se ówa!" E' kuèki ie' tò iché Jesús a es.

<sup>†</sup>5:1 **Gerasa:** Yèkkuò kèchke wele tò ká e' kiè Gadara ö Gergasa. Mateo 8.28 saú.

<sup>9</sup> Etā Jesús tō ie' a ichaké:

—¿Ima be' kiè?

Je' iüté:

—Ye' kiè Taië Wakpa, sa' dör taië e' kueki.

<sup>10</sup> Etā ikköchöke taië Jesús a: “Kè sa' patkar kamië.” <sup>11</sup> Eë tsinet kabata kuli' a taië köchi iëter chkök. <sup>12</sup> Etā aknamapa kköché ie' a:

—Sa' patkómi köchi a. Kawō mú sa' a e' tiukwā ie'pa a.

<sup>13</sup> Etā ie' tō kawō mé iarak tā wimblupa sulusi e' yélur wëm e' a tā ie' tiéwarak köchi a. Köchi ekkëpa dōka mil böyök ulatök (2.000). Etā köchi poneka tunemirak ká spé mik brutolonemi batsöri a tā eë iduolur.

<sup>14</sup> Köchi kkönukwakpa tkayalmi tā itté ppëkarakitō ká e' wañe a. Taië pë' de iweblök. <sup>15</sup> Mik ie'pa de Jesús ska' tā wëm a aknama bak e' suérakitō. E' tkër datsi' iéne éna ká anene buaë, e' tō ie'pa suawé. <sup>16</sup> Wépa tō ì tka wëm a aknamapa bak e' tā ena köchi tā e' sué, e'pa tō ipakéne imalepa a. <sup>17</sup> Etā ie'pa kköché Jesús a: “Be' e' yóttsa ká i' a, be' yú bánet.”

<sup>18</sup> Mik Jesús dene kanò a tā wëm a aknama bak, e' kköché ie' a: “Ye' shkakmi be' tā.” <sup>19</sup> Erë Jesús kè wā ikéwō mène ie' a. Je' iché ia:

—Be' yúne be' u a be' yamipa ska'. Ì buaë wé Skëköl tō be' a ena wës ie' tō be' sué er siarë wa, e' kos pakó ie'pa a.

<sup>20</sup> Etā wëm míā tā ì wé Jesús tō ie' a e' pakéitō ká tso' Decápolis e' wakpa a. Je'pa kos tkinewā ittök.

### **Jesús tō Jairo alà busi shké'wékane ñies alaköl bua'wéneitō eköl**

(Mateo 9.18-26; Lucas 8.40-56)

<sup>21</sup> Mik Jesús dene kanò kī batsöri ioshet, etā batsöri kkömik taië pë' e' dapa'wékā ie' ska'. <sup>22</sup> E' dalewa wëm debitu eköl kiè Jairo. E' dör judiowak ñi dapa'wō wé e' wökir eköl. Mik ie' tō

Jesús sué, etā ie' e' téwā wöwakköt Jesús wörki <sup>23</sup> tā ikköché taië ie' a:

—Ye' alà busi duökewatke. Be' shkó ulà mukka ikī as ibuarne tā iserne.

<sup>24</sup> Etā Jesús míā ie' tā. Taië pë' dami Jesús tā e' tërdami ie' mik. <sup>25</sup> E' shūā alaköl dami e' du'mi alaköpa dué wā e' kī duas de dabom eyök kī bök (12). <sup>26</sup> Taië ie' weine s'kapeyökwakpa ulà a ena ì kos tso' ie' wā e' ewéwaitō yës ie'pa kī, erë kè ibuanene, e' skéie imir wa'k ème. <sup>27-28</sup> Je' wā Jesús tté ttsëule e' kueki ie' ibikeitsé: “Jesús datsi' bata è kéwayō e' tā ye' buanene.” E' kueki ie' e' skéwā Jesús tsī kker pë' shūā tā idatsi' kéwaitō. <sup>29</sup> E' bet tā ipé wöklone tā ie' ittse e' kī tō ibuanene. <sup>30</sup> E' bet Jesús ittse tō ilè tka ie' diché wā, e' kueki ie' tō pë' tso' ipamik e' kos sué èk tā ichakéitō ia:

—¿Yi tō ye' datsi' ké?

<sup>31</sup> Ittökatapa tō ie' a iché:

—¿Kè be' wā isune tō taië ie'pa tërdami be' mik? Tā wës be' tō ichaké: “¿Yi tō ye' ké?”

<sup>32</sup> Erë ie' tō wépa tso' ipamik e'pa kī weblé ia isuöie tō yi ie' ké. <sup>33</sup> Alaköl buanene e' painékā taië suane wa. Ì tka ie' tā e' ane ie' éna, e' kueki ie' debitu e' tkéwā kuchë kī Jesús wörki. Ì kos tka ie' tā e' chékaia yësyësë. <sup>34</sup> Etā Jesús ie' a iché:

—A alà busi, be' erblé ye' mik, e' tō be' bua'wéne. Be' yúne bèrë. Be' buanene.

<sup>35</sup> Je' ttökeia alaköl tā e' dalewa wélepa bitë Jairo u a e'pa wā ibiyó de Jairo a tā ichéitörak:

—Be' alà busila blënewatke. ¿Íók s'wöbla'ukwak tsiriwëiabö?

<sup>36</sup> Erë ì cheke ie'pa tō e' kè kī Jesús tkine. Je' tō Jairo a iché:

—Kè be' tkinuk. Be' erbló ye' mik è.

<sup>37</sup> E' ukuöki tā ie' míā Jairo u a. Pedro ena Santiago ena Santiago ël kiè Juan e'pa è mí ie' wā, kè ie' wā yi skà mène e' tā. <sup>38</sup> Mik ie'pa demi Jairo u a, etā taië pë'

dapanekā e' trōke iūke taiē siarē. <sup>39</sup> Jesús dewā wēshkē tā ichéitō ie'pa ā:

—¿Ì tso' a' aláuk? ¿Ì kueki a' iūke? Busila kē du'wa, ikapōme'r è.

<sup>40</sup> Etā ie'pa tō ie' wayué ena ijañeitsé, erē ie' tō ie'pa ké e' yökulur. Etā alà yé ena imi ena wépa de ie' tā, e'pa è mí ie' wā e' tā úshu ā wé alà nu me'rka eē. <sup>41</sup> Ie' tō iulā klō'wéwā tā ichéitō iā:

—Talíta kum. (ttè e' wà kiane chè: “A tayēla, ye' be' ā ichè, be' e' kōka.”)

<sup>42</sup> E' bet tā busila e' e' duéka shkē'ka tā ishkémi. E' tō ie'pa tkiwéwā taiē. (Tayē e' kī duas tso' dabom eyök kī bök.) <sup>43</sup> Erē Jesús tō ie'pa ā iché: “Ì tka i' e' kè char yi ā.” E' ukuōki tā ie' iché: “Alà se tió.”

### Jesús dene Nazaret

(Mateo 13.53-58; Lucas 4.16-30)

**6** E' ukuōki tā Jesús e' yétsā kā e' a míā ittōkatapa tā iwák kā ā. <sup>2</sup> Mik eno diwō de, etā ie' tō s'wōbla'wémitke judiowak ñi dapa'wō wé ā. Taiē pē' darpake eē. Mik ie'pa tō ie' ttō ttsé, etā itkirilune tā ñni chakérak:

—¿Wé ie' e' yué ttè taiē wa? ¿Wēs ie' ulā de ttè buaè iskiē ese ska? ¿Wēs ì kè or yi ā ese wéitō? <sup>3</sup> ¿Ie' kè dör kaltak kanéukwak bak kaneblök íerō e'? ¿Ie' kè dör María alà? ¿Ie' kè dör Santiago, José, Judas ena Simón e'pa ēl? ¿Ñies ie' kutapa kè serku' se' shuā?

E' kueki kè ie'pa erblène ie' mik. <sup>4</sup> Erē ie' tō iché iarak:

—Kā wa'ñe Skéköl tteköl dalöiërta', erē iwák kā kī ena iyamipa shuā ena iwák u ā eē kè idalöiërta'.

<sup>5</sup> Eē iekkē tā ì kè or yi ā ese kè one ie' wā. Ie' ulā mékā welepa kirirke esepa kī tā ibuanerak, erē e' kè dör taiē. <sup>6</sup> Kā e' wakpa kibiiepa kè erblène ie' mik, e' tō ie' tkiwéwā.

### Jesús tō ittōkatapa patkēmi s'wōbla'uk

(Mateo 10.5; Lucas 9.1-6)

E' ukuōki tā Jesús míā kā tsitsirpa tso' tsinet ese ā s'wōbla'uk. <sup>7</sup> Ie' ttōkatapa dabom eyök kī bōl e'pa kiéitō tā ipatkémirak bōl bōl. Ie' kawō mé iarak wimblupa sulusi trē'woyal. <sup>8</sup> Ie' tō iché iarak:

—Kè ì tsarmi, shko kéli e' è tsúmi. Sku' kè tsarmi, chkò kè tsarmi, inuköl kè tsarmi. <sup>9</sup> Klökkuö ena datsi' iómi, e' è mik a' mi'mi, erē datsi' kī kè tsarmi.

<sup>10</sup> Ñies ie' iché iā:

—Mik a' dewā u wele ā, etā a' e' tsúat eē dò mik a' míyal kā bánet ekkē. <sup>11</sup> Kā wele wakpa kè wa a' kinewā buaè ö kè kī a' kapaköke e' kiane ttsé, e' tā a' e' yólur eē tā kapo tso' a' klöttō mik e' ppöo. E' tō ie'pa ā ikkacheraè tō ie'pa dör Skéköl bolökpa.

<sup>12</sup> Etā ittōkatapa míyal s'pattök i' es: “A' er mane'ú Skéköl ā.” <sup>13</sup> Ñies ie'pa tō aknama trē'wéyal taiē. Ñies taiē s'kirirke esepa kī ie'pa tō kiö té tā ibuanenerak.

### Juan S'wōskuōkwak kōtēwā

(Mateo 14.1-12; Lucas 9.7-9)

<sup>14</sup> Etā Jesús tté bunekā kā wa'ñe, e' kueki itté ttsé ñies blu' kiè Herodes e' tō. Welepa tō icheke:

—Jesús dör Juan S'wōskuōkwak shkēnekane e', e' kueki ie' wā diché tso' ì kè or yi ā ese wōje.

<sup>15</sup> Welepa skà tō icheke:

—Ie' dör Skéköl tteköl bak kiè Elías e' shkēnekane.

Welepa skà tō icheke:

—Skéköl tteköl idir wēs Skéköl ttekölpa iā'chki es.

<sup>16</sup> Erē tté ekkē ttsé Herodes tō tā ichéitō:

—Ie' dör Juan kuli' tōkōk patkē' ye' tō e' shkēnekane.

<sup>17</sup> Herodes tō iché es ie' tō Juan S'wöskuökwak klö'ukwā patkē' wötēwā s'wōto wé a Herodías kuēki. Herodías dör Herodes ël kiè Felipe e' alaköl, erë Herodes sene'wā ie' tã. <sup>18</sup> Erë Juan tō iyë' Herodes a: “Kè be' kawö tã' senuk be' ël alaköl tã. E' wa be' tso' ttè dalöiëno dalöseukwā.”

<sup>19-20</sup> E' kuēki Herodías uluneka Juan ki tã ie' ki ikiane ttēwā. Erë Herodes wā ijcher tō Juan dör wëm yësyësë ena batse'r ese, e' dalöiekeitö taië, e' kuēki ikkö'nekeitö. Ie' tō Juan kapaköke e' tseke er bua' wa, erë kè iëna iane i wëmiitö. Ie' tō Juan dalöieke es, e' kuēki Herodías kè a wes Juan or. <sup>21</sup> Erë mik Herodes tō iduéswo kēwö tkö'weke, etã Herodías isuë wes iulã dõmi Juan ska'. Herodes tō ikueblupa ena inip-pökwakpa wökirpa ena wépa dalöiërta' taië serke Galilea esepa kiëttsã ikéwö tkö'uk. <sup>22</sup> Mik ie'pa tso' ikéwö tkö'uk, etã Herodías alã busi dewã tã iklöté ie'pa wörki. E' wër buaë Herodes ena imalepa tso' chkök ie' tã, e'pa wa, tã ie' iché tayë busi a:

—Ï kiane be' ki e' kió ye' a tã ye' tō be' a imeraë.

<sup>23</sup> Etã ie' tō iché iã ttè mokì wa Skëköl wörki sulitane kukua:

—Ï kos kiëbö ña, e' mekeyö be' a. Kã kos wökirie ye' tso', e' kió ña tã e' merayö be' a shushäë.

<sup>24</sup> Etã tayë busi mía, tã imi chakéitö:

—¿Ï kiëyö?

Tã imi iüté:

—Juan S'wöskuökwak wökir kió iã.

<sup>25</sup> Ie' mía ne bet blu' tkër ee tã iché iã:

—Ye' ki ikiane tō írö Juan S'wöskuökwak wökir tsübitü ña kulé' a iwã kkachöie tō mokì ittëwarakitö.

<sup>26</sup> Etã blu' erianekã taië, erë ie' tō ittè métkë s'kiule tso' e'pa kukua, e' kuēki kè ie' a ionuk wes. <sup>27</sup> E' kuēki bet ie' tō ñip-pökwak patkëmi eköl Juan wökir tsuk. Etã ñippökwak mía s'wōto wé a tã Juan

kuli' téë, <sup>28</sup> tã iwökir tsëbitü kulé' a méitö tayë busi a, tã tayë busi tō imé imi a.

<sup>29</sup> Mik Juan ttökåtapa wã ijchenewã tã ie'pa debitü inü kökkã tsëmi wötēwā.

**Pë' dökã mil skeyök e'pa tié Jesús tō**

(Mateo 14.13-21; Lucas 9.10-17; Juan 6.1-14)

<sup>30</sup> Mik Jesús ttekölpa tsã e'pa dene ie' ska', etã i kos wé ie'pa tō ena i kos wa ie'pa s'wöbla'wé e' pakérakitö ie' a. <sup>31</sup> Pë' datse taië míyal iské datsene kè wa ie'pa chkoia ekkë, e' kuēki ie' iché ittökåtapa a:

—Mishka enuk bánet wé kè yi ku' ese ska'. <sup>32</sup> Etã ie'pa míyal bánet kanö ki wé kè yi serku' ese ska'. <sup>33</sup> Erë ie'pa míyal e' sué pë' tō taië ñies pë' tō isuëwã tō ie'pa e' idir. Etã pë' kos serke ee e'pa míyal tñeule ipanuk wé ie'pa irirke ee demi kewe. <sup>34</sup> Mik Jesús e' yëttsã kanö a, etã pë' tso' taië ipanuk e' suéitö. Ie'pa wër ie' wa wes obeja kè kkö'nukwak tã' es, e' kuēki ie'pa suéitö er siarë wa. Etã ie' e' kékã ie'pa wöbla'uk ttè kuã'ki kuã'ki taië wa. <sup>35</sup> Kã detke tsáli tã, ittökåtapa de ie' ska' tã ichérakitö ie' a:

—Kã de tsáli, kè yi serku' ië. <sup>36</sup> Ie'pa yuómi as ie'pa mi' pë' serke tsinet ena kã tso' tsinet ese ska' ilè tãuk ñë.

<sup>37</sup> Erë ie' tō ie'pa iüté:

—Ie'pa tió a' tō.

Ie'pa iüté:

—¿Be' ki kiane tō sa' mi' chkè tãuk ie'pa tioie? Chkè ekkë tuöie inuköl kiane s'kaneblömi dò kã cien böyök e' ské ekkë.

<sup>38</sup> Ie' tō ie'pa a ichaké:

—¿Kos a' wã pan tso'? A' yú iweblök.

Ie'pa dare iweblök tã ichéitö iã:

—Pan tso' skël ena nima bötö.

<sup>39</sup> Etã ie' tō iché ie'pa a:

—Pë' kos kó e' tulöksër ta'tsi ki erule erule.

<sup>40</sup> Etã pë' e' tulésër cien eyök, welepa e' tulésër dabom skeyök. <sup>41</sup> E' ukuökì tã ie' tō pan skël ena nima bötö e' klö'wé

ta iká sué ká jai a ta wéstela chéitö Skököl a. E' ukuöki ta ie' tö pan ena nima blaté ta iméitö ittökatapa a as ie'pa tö iwatiö pé' kos a. <sup>42</sup>Ie'pa ulitane chké de wé'. <sup>43</sup>Pan ena nima bata até e' shtérakitö iène döka kkóla dabom eyök ki bök. <sup>44</sup>Wépa kéchkepa chké esepa döka mil skeyök (5.000).

**Jesús shké di' ki**

(Mateo 14.22-27; Juan 6.16-21)

<sup>45</sup>E' ukuöki ta Jesús tö iché ittökatapa a: "A' e' ióka kanò a, a' yúshkatke ye' yöki kéwe batsöri wishet Betsaida kker." Ie' tö iché pé' malepa a: "A' yú a' u a." <sup>46</sup>E' ukuöki ta ie' mía kabata a ttök S'yé ta. <sup>47</sup>Ká tuine ta kanò demi batsöri shushaë. Ie' e' tséat ekörla ká sí ki. <sup>48</sup>Ie' tö isué tö ie'pa kaneblöke daréré kanò patkoie siwa' bitsirke ie'pa kke woiá e' kueki. Ká nirketke ta ie' mía ie'pa ska' shkörami di' ki. Ie' tkökemitke tsinet ie'pa o'mik. <sup>49-50</sup>Eré mik ie'pa isué tö ie' shkòdatse di' ki, etá ie'pa ibikeitsé tö wimblu idir, e' tö ie'pa tkiwéwa taié ta ianekararak. Eré bet ta ie' iché ie'pa a:

—¡A' er kuú! ¡Kè a' suanuk! Ye' idir.

<sup>51</sup>Etá ie' e' iéka kanò a ta siwa' wöklöne. Ie'pa tkirulune taié iweblök.

<sup>52</sup>Ie'pa er dör daloie, e' kueki Jesús tö pé' taié dè' pan skel è wa, e' wà kè dè'wa ie'pa er a. E' kueki ie'pa tkirulune taié ekkè.

**Jesús tö s'kirirke bua'wé Genesaret**

(Mateo 14.34-36)

<sup>53</sup>Itkattsarak batsöri wishet demirak Genesaret ta ee kanò muéwarakitö. <sup>54</sup>Ie'pa e' yélur kanò a ta e' wösha ta pé' tö Jesús suéwa tö ie' idir. <sup>55</sup>Etá itunerak ká e' wañe ibiyó chök. Mik pé' tö ittse, etá ie'pa tö s'kirirke tsémi wé ittserakitö tö Jesús tso' ee. <sup>56</sup>Ká wañe wé ie' mir, wé

s'tso' taié ö bérébéré, etá pé' tö s'kirirkepa tulekeser ñala shaë ta ikköchökerak ie' a tö ie'pa a idatsi' bata è mú kèwa. S'kirirke kos tö iké, esepa buanene.

**Ì tö se' ia'wèmi ñáie**

(Mateo 15.1-20)

**7** Fariseowakpa ena s'wöbla'uk ttè dalöiëno wa wakpa welepa datse Jerusalén e'pa debitu Jesús ska'. <sup>2</sup>Mik ie'pa tö isué tö Jesús ttökatapa welepa chköke ulà kè paköule, etá e' ki ie'pa tö icheke suluë. <sup>3</sup>(Fariseowakpa ena judiowak malepa kos tö ie'pa yépa bak e' ser klöwé daréré. E' kueki kè ichkötat'arak kè ulà paköule wes ie'pa a ime-neat es. <sup>4</sup>Mik ie'pa dare chkewö ta'uk, etá kè ichkötawa kam iulà pakör e' yöki. Es ie'pa wa íyi ese skà tso' taié dalöiëno. Ñies tka', kulé', ü, ka' ekképa kos pakueke ie'pa tö.) <sup>5</sup>E' kueki fariseowakpa ena s'wöbla'uk ttè dalöiëno wa wakpa tö Jesús a ichaké:

—¿Ì kueki be' ttökatapa kè tö se' yépa bak e' ser e' ttè dalöiè? ¿Íók ichkörak ñá ulé wa?

<sup>6</sup>Ie' tö ie'pa iuté:

—Buaë Isaiás tö a' e' ö sulu e'pa ye' mik ie' tö iyè:

'Skököl tö ichè: Pé' ikképa tö ye' dalöie kkò è wa,

eré ie'pa er tso' kamié ye' yöki.

<sup>7</sup>É ichökle ie'pa mi'ke ye' wé a ye' dalöiök.

Ttè wa ie'pa s'wöbla'weke e' dör s'ditsö ttè dalöiëno è.<sup>†</sup>

Es Isaiás tö iyè'at.

<sup>8</sup>A' tö Skököl ttè watéttsa s'ditsö ser e' ttè dalöioie.

<sup>9</sup>Ñies ie' iché iarak:

—Skököl ttè dalöiëno e' méat a' tö bánet a' wákpa ser e' ttè dalöioie.

<sup>10</sup>Moisés tö iyè: 'A' yé ena a' mi e'pa

<sup>†</sup>7:7 Isaiás 29.13

dalöiö.<sup>¶</sup> Nies ie' tö iyë'at: 'Yi tö iyé ö imì ché suluë ese wák wömerdattsä ttëwä.<sup>¶§</sup>  
<sup>11</sup> Erë a' icheke tö se' a iyërmi s'yé a ö s'mì a i' es: 'Í kos tso' ye' wä, e' dör corbán' (e' wä kiane chè tö imeulettsä Skëköl a<sup>\*\*</sup>). E' kueki kè ye' a a' kimenuk ì wa. <sup>12</sup> Nies a' tö icheke tö yi isie e' ché, ese kè kawö-taiä iyé ö imì kìmuk. <sup>13</sup> Es a' wákpa ser e' ttè wa a' tö s'yueke, e' iütè wa a' tö Skëköl ttè dalöiëno e' dalösewëkewä. Ì sulu ese skà wambleke a' tö tajë.

<sup>14</sup> E' ukuöki ta ie' tö pë' tso' ee e'pa kié ta ie' iché iarak:

—A' ulitane tö ye' ttò tso', iwà anú a' éna. <sup>15-16</sup> Ì ñeke a' tö e' kè tö a' ia'wëpa ñáie Skëköl wöä. Erë ì sulu wambleke a' tö tskirke a' er a' ese je' tö a' ia'weraë ñáie.<sup>††</sup>

<sup>17</sup> Mik ie' tö pë' méat dewä weshkë, eta ittökatapa tö ì kleé ie' tö e' wä chaké ie' a. <sup>18</sup> Ie' tö ie'pa iüté:

—¿Nies a' kè éna iwà ane? ¿A' kè éna iane tö ì kos ñekewasö e' kè tö s'ia'wëpa ñáie? <sup>19</sup> Ì kos ñekewasö e' kè mi'ku'wä s'er a, e' mi'kewä s'ñawi a e' ukuöki ta iwekettsasö. E' kueki e' kè tö s'ia'wëpa ñáie.

(Ttè e' wa ie' ki ikiane chè tö chkè ulitane dör batse'r.) <sup>20</sup> Nies ichéitö:

—Ì sulu wambleke a' tö tskirke a' er a' ese je' tö a' ia'weraë ñáie. <sup>21</sup> Ì sulu bikeitseke a' tö, trë, akblè, s'ttëwä, <sup>22</sup> senewabak dalösewëwä, o'ka fyí kkechè, ì kos sulu wablè, s'malëpa wöyüè, s'malëpa wörieikè, ukyëne, ñi chè suluë, e' ttsëka, ì kos dör yësyësè ese watëttsä, <sup>23</sup> fyí ese kos tskirke a' er a' e' tö a' ia'weraë ñáie.

**Tayë eköl kè dör judiowak e' erblé Jesús mik**

(Mateo 15.21-28)

<sup>24</sup> E' ukuöki ta Jesús miä ká kiè Tiro e' kker. Eë ie' e' tséat yile ska'. Ie' kè ki ikiane tö yi wä ijcherwä tö ie' tso' ee; erë kè ie' a e' blène. <sup>25</sup> E' bet busila eköl a wimblu sulusi tso', e' mi wä ijchenewä ta imiä ta ie' tkéwä kuchë ki ie' wörki. <sup>26</sup> Alaköl e' kè dör judiowak, e' dör ká kiè Sirofenicia e' wak. Eta ikköché ie' wöä:

—Aknama tso' ye' alà busi a e' trë'úshkar.  
<sup>27</sup> Erë ie' tö iché ia:

—Kè idör buaë ala'rla chkè yëttsä më chichi a. E' kueki as ye' ala'r chkò kewe.

<sup>28</sup> Erë tayë tö ie' iüté:

—A kékëpa, e' yëne; erë s'ala'r chköke e' kamulë darke iski ese ñeke chichi tö.

<sup>29</sup> Jesús tö ie' a iché:

—Buaë be' iüté, e' kueki be' yüne bèrë. Aknama trëneskarkarte be' alà busila a.

<sup>30</sup> Mik alaköl e' demine u a, eta ilà busila kuéitö ká' ki. Aknama kè ku'ia' ie' a.

**Wëm eköl kukuò kè wattsër e' bua'wé Jesús tö**

<sup>31</sup> Jesús e' yëttsä Tiro tkami Sidón demi Galilea batsöri Decápolis kker. <sup>32</sup> Eë pë' wä wëm debitü eköl ie' ska' e' kè kukuò wattsër ena kè tto buaë. Ie'pa tö ikié Jesús a: "be' ulà múka iki as ibuarne." <sup>33</sup> Jesús wä imítser bánet wé kè yi ku' ee, ta iulatska tiëwä wëm kirirke e' kukuök bök a ta iwiri wa iku' kéwa. <sup>34</sup> E' ukuöki ta ká suéitö ká jai a, isiwa' tkéka ta ichéitö wëm a:

¶7:10 Éxodo 21.17

§7:10 Levítico 20.9

\*\*7:11 *meuletke Skëköl a*: Ie'pa tö iché es, erë ie'pa ulà a itso'ia e' wakanewëmi ie'pa tö wes ie'pa ki ikiane es.

††7:15-16 Yëkkuò këchke wele versículo 16 ki kuötkéka, e' tö ichè: ¡A' éna ye' ttò tsak, g'ma ikukueblö bua'ie!

“¡Efatá!” (e' wà kiane chè ie'pa ttò wa: “¡Kukuò shubunú!”)

<sup>35</sup> E' bet ta wëm kukuò ena ittò buanene ta ittéka buaë. <sup>36</sup> Jesús tò iché iarak tò kè ichar yi a. Erë kos e' ché ie' tò ie'pa a, e' tsata ie'pa tò ikí chekeia. <sup>37</sup> Ie'pa tkirulune tajë iweblök, ta ichérakitö, “¡Ì kos weke ie' tò buaë dò s'kukuò kè wattsër ese bua'wëitö ta iwattsëne buaë, nies s'me' bua'wëitö ta ittékanë buaë!”

**Pë' doka mil tkëyök e'pa tié Jesús tò**

(Mateo 15.32-39)

**8** Etökicha ta pë' e' dapa'wéne tajë Jesús ska', e'pa kè wà ì ku' nê. Ta ie' tò ittökataka kié ta ichéitö ie'pa a:

<sup>2</sup>—Siarë ye' wa pë' ikkëpa wër. Ie'pa tso' ye' ta e' ki ká de mañatk ta kè ie'pa wà ì ku' nê. <sup>3</sup> Welepa datse kamië. E' kuëki dö' ye' tò ipatkéminerak u a kè chkaule ta isiwa'arwamirak ñala ki.

<sup>4</sup> Etä ittökataka ie' iüté:

—Erë çì wa se' tò ie'pa tiëmi ká i'se a wé kè yi serku' eë?

<sup>5</sup> Ie' tò ie'pa a ichaké:

—ÇKos a' wà pan tso'?

Ie'pa iüté,

—Kul (7).

<sup>6</sup> Etä ie' tò pë' ké e' tulökser iskí ta pan kul klö'wëitö ta wëstela chéitö Skëköl a ta iblatéitö mé ittökataka a watië pë' a, etä es ie'pa tò iwé. <sup>7</sup> Nies nima tsitsirla tso'arak iwà elkela e' ki wëstela chéitö Skëköl a ta ittökataka patkéitö iwatiök. <sup>8</sup> Pë' ulitane chké de wë' ta chké bata aṭe e' shtérakitö iëne doka kkó kul. <sup>9</sup> Ichkérak e'pa doka mil tkëyök (4.000) ulatök. E' ukuöki ta Jesús tò ie'pa yuëmine <sup>10</sup> ta ie' e' iéka kanò a ittökataka ta míyal ká kië Dalmanuta eë.

**Fariseowakpa tò ì kè or yi a ese uk ké suè**

(Mateo 16.1-4; Lucas 12.54-56)

<sup>11</sup> Fariseowakpa debitu Jesús ska' ta ittémirak ie' ta kësik wa. Ie'pa éna ie' tsaiak, e' kuëki ie'pa tò ie' a ikié tò ì kè or yi a ese wëitö iwà kkachoië tò mokí ie' patkë'bitu Skëköl tò. <sup>12</sup> Jesús siwa' tkéka iskië ta ichéitö:

—ÇÌ kuëki ì kè or yi a ese kieke a' tò iwà kkachoië tò yi dör ye'? Mokí yò a' a ichè tò ese kè kkayërpa a' a.

<sup>13</sup> Etä ie' tò ie'pa méat ta ie' e' iékanë kanò a ta imía batsöri wishet.

**Fariseowakpa pan wölöwoka e' pakè**

(Mateo 16.5-12)

<sup>14</sup> Etä Jesús ttökataka éna ilè chowa tsëmi nê. Pan etkè mírak iwà e' ta kanò a. <sup>15</sup> Jesús iché iarak:

—¡A' tso' wösh wa! A' e' kkö'nú fariseowakpa pan wölöwoka e' yöki. Nies a' e' kkö'nú Herodes pan wölöwoka e' yöki.

<sup>16</sup> Ittökataka iché ñi a:

—ÇKè se' wà ì ta' nê! <sup>17</sup> Jesús wà ijchenewa, ta ie' iché iarak:

—ÇÌ kuëki a' tso' ichök ñi a tò a' kè wà ì ta' nê? ÇKam a' éna iwà ar? ÇKam a' wà iwà jcherwà? ÇA' er darërè dò ekkè? <sup>18</sup> A' wöbla ta' çe' kè wawër? A' kukuöña ta' çe' kè wattsër? ÇA' kè éna ianeia? <sup>19</sup> Mik ye' tò pan skel wadë' wëpa doka mil skeyök (5.000) ekkè a, etä çkkó bik ibata kit a' tò?

Ie'pa iüté:

—Dabom eyök ki bök (12).

<sup>20</sup>—Nies mik ye' tò pan kul (7) wadë' wëpa doka mil tkëyök (4.000) ekkè a, etä çkkó bik wà ië' a' tò ibata wa?

Ie'pa iüté:

—Kul (7).

<sup>21</sup> Etä ie' iché iarak:

—ÇKam a' éna iwà ar?



**S'wöbla kè wawër eköl  
e' bua'wëne Jesús tō**

<sup>22</sup> E' ukuökī tā idemirak Betsaida tā wëm wöbla kè wawër ese debitū eköl pë' wā Jesús a tā ikköchökerak ie' a tō ikó ulà wa as ibuarne. <sup>23</sup> Etā ie' tō iklö'wéwā iulà a tā iyéttsaitō bánet. Ee ie' tō iwöbla bök nuwékā wiri wa tā iulà mékā ikī tā ichakéitō, “¿Be' wöbla wawëne?” <sup>24</sup> Etā wëm tō ká weblé tā iché:

—Pë' suekeyö erë ye' wa iwër wësua kal shköke suë.

<sup>25</sup> Etā Jesús ulà mékane iwöbla kī tā wëm tō ká sué krereë tā iwöbla wawënene buaë. Íyi ulitane suëitō buaë.

<sup>26</sup> Etā Jesús tō ipatkémine iu a tā iché ia:

—Kè be' mi'ktkō pë' shuā.

**Pedro tō iché tō Jesús dör wé  
pairine'bitū idi' wa s'blúie e'**

(Mateo 16.13-20; Lucas 9.18-21)

<sup>27</sup> E' ukuökī tā Jesús ena ittökatapa míyal ká tso' tseé atē Cesarea Filipino e' a. Nāla kī Jesús tō ie'pa a ichaké:

—¿Ima pë' tō iché, ye' dör yi?

<sup>28</sup> Ie'pa iüté:

—Welepa tō icheke tō be' dör Juan S'wöskuökwak. Welepa skà tō icheke tō be' dör Skéköl tteköl bak kiè Elías shkenekane e'. Welepa skà tō icheke tō be' dör Skéköl ttekölpa skà bak e' wele.

<sup>29</sup> Ie' tō ie'pa a ichaké:

—Erë ¿ima a' iché, ye' dör yi?

Pedro tō iüté:

—Be' dör wé pairine'bitū idi' wa sa' blúie e'.

<sup>30</sup> Erë Jesús kè wā ie'pa kàne yi dör ie', e' chök yi a.

**Jesús e' biyó ché tō itterawa**

(Mateo 16.21-28; Lucas 9.22-27)

<sup>31</sup> Jesús tō ie'pa a itsá ché:

—Ye' dör S'ditsö Alà, e' weirdaë taië. Judiowak kueblupa ena sacerdotepa wökirpa nies s'wöbla'uk ttè dalöiëno wa

wakpa tō ye' waterattsā. Ye' tterawa, erë e' kī ká de mañat etā ye' shkerdakane.

<sup>32</sup> Ttè e' chéitō ie'pa a wöshak. Erë Pedro tō ie' kiémi bánet tā iuñémiitō. <sup>33</sup> Erë Jesús e' wötrée tā ittökatapa weblé krereë tā Pedro uñéitō i' es:

—¡A Satanás, be' yúshka bánet ye' yöki! Be' kè tō íyi suë wes Skéköl tō isueke es; be' tō isueke wes s'ditsö tō isueke es.

<sup>34-35</sup> E' ukuökī tā ie' tō ittökatapa ena pë' malepa kié e' ska' tā ichéitō:

—Yi e' tsatkak ittèwā yöki, ese kè ulà a sene michoë dòpa. Erë yi e' mettsā ttèwā ye' dalèrmik ena ye' ttè buaë e' dalèrmik, ese ulà a idöraë. E' kueki yi e' yuak ye' ttökataie, ese kè kàne tkinukia e' kī. E' skéie ie' kawötā e' chök dò ittèwā wötèulewā krus mik ekkè. Es ie' kawötā shkök ye' itökī. <sup>36</sup> Íyi ulitane tso' ká i' a, e' de a' ulà a, erë sene michoë e' kè dè a' ulà a, e' tā e' dör ¿iie bua' a' a?

<sup>37</sup> Sene michoë kè patorpa i wa. <sup>38</sup> Mik ye' dör S'ditsö Alà, e' dene ye' Yé olo tā', nies ibiyöchökwakpa batse'r e'pa tā, etā wépa jaëne ye' kī pë' sulusipa kè tō Skéköl dalöië wes trër wakpa kè tō imaso dalöië es esepa wörki, esepa kī ye' jaërdaë nies.

**9** Nies ie' tō iché ie'pa a:

—Moki ye' tō a' a iché tō a' tso' íe, e' welepa tō i blúie Skéköl tso' e' kèwö de diché tā', e' sueraë kam iblèrulur e' yöki.

**Jesús tō ilo taië e' kkaché ittökatapa a**

(Mateo 17.1-13; Lucas 9.28-36)

<sup>2</sup> Ká teröl ukuökī tā Jesús míā ká bata kakkeë e' kī. Pedro, Santiago ena Juan e'pa mítser iwā e' tā. Etā ee ie'pa wö shäë ie' manenettsā míā kuā'kī. <sup>3</sup> Ie' datsi' manenettsā míā dalölöë saruruë, kè yi a ká wa'ñe datsi' sunuk as idötsā saruruë es. <sup>4</sup> Etā ie'pa tō Skéköl ttekölpa bak ká iaiäë kiè Elías ena Moisés e'pa sué kapakök Jesús tā. <sup>5-6</sup> Ie'pa tkinewā taië. Pe-

dro kè éna ì aneia ché, e' kuëki ichéitò Jesús a:

—¡A S'wöbla'ukwak, buaë se' tso' íe! Sú sa' tò úla yuèka mañatkuela, etkue be' a, etkue Moisés a, etkue Elías a. <sup>7</sup> Età mochka tò ie'pa kitéwa ta e' shua ie'pa tò ttò tssé tò ichè: “Se döer ye' alà dalër taië ye' éna, e' ttò tssó.” <sup>8</sup> E' bet ta ie'pa ká sué ipamik ta ie'pa isué tò kè yi ku'ia, Jesús è dur ie'pa ta.

<sup>9</sup> Ie'pa datskene wöwa'k ta Jesús tò ie'pa a ichè:

—Ì sué a' tò e' kè pakar yi a dò mik ye' döer S'ditsö Alà, e' ttéwa shkenekane e' ukuöki.

<sup>10</sup> E' kuëki ie'pa tté iwakpa è ñi ta. Erë ie'pa ñi chaköke: “Ie' ttéwa shkenekane çima e' wà döer?” <sup>11</sup> Ie'pa tò Jesús a ichaké:

—Çì kuëki s'wöbla'uk tté dalöiëno wa wakpa tò icheke tò Elías kawötä dökné kewe wé pairine'bitu idi' wa s'blúie e' yöki?

<sup>12</sup> Ie' iiütérak:

—E' yéne tò Elías datse kewe. Ie' tò ì kos kaneweketke kewe wé pairine'bitu idi' wa s'blúie e' yöki. Erë çì kuëki Skéköl yëkkuö tò ichè tò S'ditsö Alà, e' weirdaë ena iwatërdatssa? <sup>13</sup> Ye' tò a' a ichè tò Elías dë'bak, etä ie'pa tò iwe'ik siarë wes ie'pa ki ikiane es. E' bak wes ie' tté tso' kitule Skéköl yëkkuö ki es.

### Kabëla eköl a aknama tso' e' bua'wéne Jesús tò

(Mateo 17.14-21; Lucas 9.37-43)

<sup>14</sup> Mik idenerak wé ittökåtapa malepa tso' ee, etä ie'pa isué tò taië pè' tso' ipamik. Ñies isuëitörak tò s'wöbla'uk tté dalöiëno wa wakpa welepa ñi iütöke ie'pa ta. <sup>15</sup> Mik pè' tò Jesús sué, etä iwö krarulune ta itunemirak ishke'uk. <sup>16</sup> Ie' tò ichaké ittökåtapa a:

—Çì ki a' ñi iütöke?

<sup>17</sup> Wëm eköl tò iché ie' a:

—A s'wöbla'ukwak, íe ye' wä ye' aladulaköl debitu be' a. Wimblu sulusi tso' ia e' kuëki kè itto. <sup>18</sup> Ká wa'ñe wé ie' tso' ee wimblu tò ie' éna ká chöwékewa ta ikéure iski ta shuya deka ikkö a, ikä blarke ñi mik ena ikranewa. Be' ttökåtapa a ikiéyö tò wimblu e' trë'úshkar erë kè ie'pa a ione.

<sup>19</sup> Jesús tò iiüté:

—¡A pè' kè erblöta' Skéköl mik! ÇMik ye' sermirö a' ta? ÇKos ye' tò a dalë'tsemirö? Kabëla ñe' tsúbitu ña.

<sup>20</sup> Etä ie'pa wä kabëla mítser Jesús ska'. Erë mik wimblu sulusi ñe' tò Jesús sué ta kabëla painuwékaitö taië anerö iski e' tréka burup burup ta ikkö a shuya deka. <sup>21</sup> Jesús tò kabëla yé a ichaké:

—ÇMik i' wamblënemi ie' ta?

Iyé tò iüté:

—Mik ie' iä tsirlala e'tami. <sup>22</sup> Taië wimblu tò ie' ma'wé ttéwa. Mikle ta iuyéwaitö bö a ö di' a ittowaie. Sa' saú er siarë wa. Ilè ormi be' a, e'ma sa' kimú.

<sup>23</sup> Jesús tò iiüté:

—ÇWes bö ibikeitsëmi tò ye' kè a ionuk? Yi erblöke Skéköl mik, jese a ì kos ormi!

<sup>24</sup> Etä kabëla yé tò iché aneule:

—Ye' erblöke Skéköl mik. ¡Ye' kimú ki erblök imik!

<sup>25</sup> Mik Jesús tò isué tò taië pè' daparke, etä wimblu sulusi unéitö i' es:

—A wimblu, kabëla i' tteke be' tò kukuò kè wattsër, kè tto. Ye' tò be' ké e' yóttsa kabëla i' a. Kè be' e' tiükwane ie' a.

<sup>26</sup> Wimblu aneka ta kabëla skà éna ká chöwéwaneitö. E' ukuöki ie' e' yéttsa ta kabëla atë wes s'duowa es. E' kuëki pè' taië tò ichè tò mokí iduowa. <sup>27</sup> Erë Jesús tò iklö'wéwa iulà a ta ikimé e' kökka ta ie' e' kéka.

<sup>28</sup> E' ukuöki ta Jesús dewa weshke ta ittökåtapa tò ie' a ichaké bänet.

—Çì kuëki sa' kè a wimblu e' trëneshtar?

<sup>29</sup> Ie' tò ie'pa iuté:

—Wimblu sulusi ese trëoshkarmi ikiè S'yé a e' è wa<sup>‡‡</sup>

**Jesús skà e' biyó ché tò itterawa**

(Mateo 17.22-23; Lucas 9.43-45)

<sup>30-31</sup> Jesús ena ittökatapa e' yéttsa ee tkami Galilea. Ie' tso' ie'pa wöbla'uk, e' kuëkì ie' kè kì ikiane tò wé ie'pa tso' e' jcherwa yi wa. Ie' tò iché ie'pa a:

—Ye' dör S'ditsö Alà, e' wömerdattsa pè' ulà a ta ye' tterawarakitö. Erë e' kì ká de mañat ta ye' shkerdakane.

<sup>32</sup> Erë ì ché ie' tò, e' wà kè ane ie'pa éna, ñies ie'pa suanerak ichakök.

**Yi dör ibua'ie Skëköl wöa**

(Mateo 18.1-5; Lucas 9.46-48)

<sup>33</sup> E' ukuökì ie'pa demi Cafarnaúm. Mik ie'pa dewa wëshke, eta Jesús tò ie'pa a ichaké:

—¿Ì kì a' ñì iutöro ñala kì?

<sup>34</sup> Erë ñala kì ie'pa ñì iutöro tò wé dör ibua'ie imalepa tsata, e' kuëkì ie'pa si-wa'bléwa. <sup>35</sup> Eta Jesús e' tkéser ta ie'pa dabom eyök kì bül e'pa kiéitö ta ichéitö ia:

—Yi kì ikiane tò idö ibua'ie imalepa tsata, e' ta ese kawötä e' wöökwa imalepa dikia ikané mésoie ikimoie.

<sup>36</sup> E' ukuökì ta alala duéseritö eköl ie'pa shushaë ta ikékaitö ulà a ta ichéitö iarak:

<sup>37</sup> —Yi tò alala i'se kiéwa ye' ttö wa, ese tò ye' wák kiéwa. Es ñies yi tò ye' kiéwa, ese kè wa ye' è kinewa, yi tò ye' patkë'bitu, e' kiéwaitö ñies.

**Yi kè ku' ñippök se' ta ese tso' buaë se' ta**

(Mateo 10.42; Lucas 9.49-50)

<sup>38</sup> Juan tò iché Jesús a:

—A s'wöbla'ukwak, wëm sué sa' tò eköl, e' tò aknama trë'wéyal be' ttö wa.

Erë ie' kè ku' se' ta, e' kuëkì sa' tò iché ia tò kè iwaria.

<sup>39-40</sup> Ie' tò ie'pa iuté:

—Yi tò ì kè or yi a ese wé ye' ttö wa, ese kè a ye' yënuK suluë. Yi kè ku' ñippök se' ta, ese tso' se' ta. E' kuëkì kè iwöklö'war. <sup>41</sup> Yi isie tò di' kakla è mé a' a yè, ye' dör Cristo e' icha a' dör e' kuëkì, mokì ye' tò a' a ichè tò ese a iské patordaë buaë.

**A' tso' wösh wa ì tò s'ké ì sulu wamblök ese yökì**

(Mateo 18.6-9; Lucas 17.1-2)

<sup>42</sup> “Yi tò ikkëpala erblöke ye' mik, ese eköl ké ì sulu wamblök, esepa weirdaë taië shute tköka ak wawoie muéwa ikuli' a batrèemi dayë a e' tsata. <sup>43-44</sup> A' ulà tò a' ké ì sulu wamblök, e' ta itöö. A' döwa sene micho a ulà etkè, e' dör buaë. E' skéie a' döwa bö' ké a ulà bötké e' dör suluë. Eë bö' kè wöitta'wa. <sup>45-46</sup> A' klö tò a' ké ì sulu wamblök, e' ta itöö. A' döwa sene micho a klö etkè, e' dör buaë. E' skéie a' uyëwa bö' ké a klö bötké e' dör suluë. <sup>47</sup> A' wöbla tò a' ké ì sulu wamblök, e' ta iyótsa. A' döwa ì blúie Skëköl tso' e' a wöbla ek è, e' dör buaë. E' skéie a' uyëwa bö' ké a wöbla böké e' dör suluë. <sup>48</sup> E' ké a öña tò s'kateke kekraë kè duöta'wa, ñies bö' wönarke kè wöitta'wa.

<sup>49</sup> “S'weir e' dör s'paiklè wës iyiwak jchè ña'wè mè Skëköl a ese paiklè dayë wa es. <sup>50</sup> Dayë dör buaë, erë kè ikke ta'ia, e' ta kè ibuarpaiane. Kè a' tò dayë kke chöukwa a' er a. A' senú bèrè ñita.”

**Se' ñì öwa ese ché Jesús tò**

(Mateo 19.1-12; Lucas 16.18)

**10** Jesús e' yéttsa Cafarnaúm mia Judea ta itkattsa Jordán a wíshet. Eë pè' e' dapa'wéne ie' ska' ta ie' tò ie'pa wöbla'wémitke wës ie' wöblar es. <sup>2</sup> Eta fariseowakpa wëlepa de ie' ska' ta ie'pa tò ie' a ichaké itsaioie:

<sup>‡‡</sup>9:29 ikiè S'yé a e' è wa: Yëkkuö këchke wele tò ikì kuötékéa ì es: ena batsè wa.

—¿Wépa a kawö ta' itayë owa ö au?

<sup>3</sup> Ie' tö ie'pa iüté:

—¿Ì uk Moisés tö a' ka' ttè dalöiëno kî?

<sup>4</sup> Ie'pa tö ie' iüté:

—Moisés tö ikéwö me' se' a ñi owa yëkkuö muk s'tayë a ta' itrë'ukshkar.

<sup>5</sup> Ie' tö ie'pa a' iché:

—A' er darërë, e' kueki Moisés tö ttè e' me'at a' a es. <sup>6</sup> Erë mik ká i' yöne, etä kè idir es. Itso' kitule i' es: 'Skëköl tö se' yö' wëm ena alaköl. <sup>7</sup> E' kueki wëpa kè serpaia iyé ena imi e'pa dapömik ta' iserdawa alaköl ta. <sup>8</sup> Ie'pa bøl serdaë ñita ta' ie'pa mia wës wák eköl è es.<sup>¶</sup> Es ikiteat, e' kueki ie'pa kè ià bøl, ie'pa yöne wës wák eköl è es. <sup>9</sup> E' kueki wëpa batséwa Skëköl tö esepa kè batsökök yi tö.

<sup>10</sup> Mik ie'pa dene weshke, etä ittökatapa tö ie' ichaké ttè e' kî. <sup>11</sup> Ie' tö ie'pa iüté:

—Wëm tö itayë éwa, ese tö alaköl ské tséwane, e' ta' e' wa ie' tö isenewabak kewe e' dalösewëwa. <sup>12</sup> Ñies tayë tö iwëm éwa, ese tö wëm ské tséwane, e' ta' e' wa ie' tö isenewabak kewe e' dalösewëwa.

### Jesús tö ikié S'yé a ala'rla kî

(Mateo 19.13-15; Lucas 18.15-17)

<sup>13</sup> Etä pë' wä ala'rla debitu as Jesús ulà mùka iki. Erë ittökatapa tö pë' e'pa unélor. <sup>14</sup> Mik e' suéitö ta' iluneka ta' ichéitö ie'pa a:

—As ala'rla bitu ye' ska'. Wëpa dör wës ie'pa es, esepa blúie Skëköl tso', e' kueki kè iwöklö'waria. <sup>15</sup> Mokî ye' tö ichè tö yi kè e' wöowa wës alala es i' blúie Skëköl tso' e' kiowa, ese kè döpawa.

<sup>16</sup> Etä ie' tö ala'rla paklö'wëwa ta' iulà mèka iki ta' ier buaë ché ia.

### Inuköl blu' eköl e' tö Jesús a ichaké

(Mateo 19.16-30; Lucas 18.18-30)

<sup>17</sup> Mik Jesús shkëmitke, etä wëm debitu eköl tuneule, e' tkërö kuchë kî ie' wörki, ta' ie' a' ichakéitö:

—A s'wöbla'ukwak, be' dör buaë, ¿i wëmi ye' tö as sene michoë dò ye' ulà a?

<sup>18</sup> Ie' tö iüté:

—¿Ì kueki be' tö ye' kié buaë? Skëköl eköl è dör buaë. <sup>19</sup> Ie' ttè dalöiëno e' jcher be' wa: 'Kè a' kawö ta' s'ttökwa, kè a' kawö ta' s'senewabak dalöseukwa, kè a' kawö ta' akblök, kè a' kawö ta' s'kkatök kachë wa, kè a' kawö ta' s'kitö'uk, a' ye' ena a' mi e'pa dalöiö.'<sup>§§</sup>

<sup>20</sup> Wëm ie' iüté:

—A s'wöbla'ukwak, ttè e' kos dalöië'bitu ye' tö ye' ià duladula e'tami.

<sup>21</sup> Jesús ie' sué er bua' wa ta' ichéitö:

—Íyi etkë kianeia be' a wè, e' dör i': Be' yú ta' i' tso' be' wa, e' wataútsa sera a ta' iské mútsa s'siarëpa a. E' ukuökî ta' be' shkó ye' ta' ye' ttökataie. Es ta' íyi buaë taië döraë be' ulà a ká jaì a.

<sup>22</sup> Ie' dör inuköl blu' taië, e' kueki mik e' ttséitö, etä iwö éwa iski ta' imía eriane taië.

<sup>23</sup> Jesús tö ká sué ipamik ta' ichéitö ittökatapa a:

—¡Inuköl blúpa a darërëë idir dökwa i' blúie Skëköl tso' e' a!

<sup>24</sup> Ttè e' tö ittökatapa tkiwëwa, erë ie' tö ie'pa a iska chéne:

—¡A ala'r, darërëë idir dökwa i' blúie Skëköl tso' e' a! <sup>25</sup> Inuköl blu'pa a dökwa i' blúie Skëköl tso' e' a, e' dör darërëë tkòka kameio tkòmi datsi' yuo diké ese wöukla a e' tsata.

<sup>26</sup> Mik e' ttsé ie'pa tö, etä ie'pa kî tkinëwa taië ta' ie'pa ñi chaké:

—E' dör es, e'ma ¿yi tsatkërmi?

<sup>¶</sup>10:8 Génesis 2.24

<sup>§§</sup>10:19 Éxodo 20.12-16; Deuteronomio 5.16-20

<sup>27</sup> Ie'pa webléitō t̄a ichéitō:

—E' kè onuk s'ditsō a wēs, erē kè dōr es Skēkōl a, ie' a íyi ulitane ormi.

<sup>28</sup> Pedro tō ie' a ichémi:

—Sa' tō íyi ulitane me'at t̄a sa' bitē be' ta.

<sup>29</sup> Jesús iiuté:

—Mok̄i ye' tō a' a ichè tō yi tō iu ö iēlpa ö ikutapa ö imì ö iyé ö ila'r ö iká me'at ye' dalērmik ena ye' tté buaē dalērmik, <sup>30</sup> e' t̄a ká i' k̄i ese ulà a iské dōrane taiē dōka u cien eyök. Es ñies iēlpa ö ikutapa ö imì ö iyé ö ila'r ö iká ese dōraē iulà a dōka cien eyök. Erē ñies iweirdaē siarē ye' tté buaē kuēk̄i. Erē aishkuö t̄a sene michoē dōraē iulà a. <sup>31</sup> Erē ñne t̄a s'tso' taiē keweie esepa dōraē bataie, ena s'tso' bataie ñne t̄a esepa dōraē keweie.

**Jesús skà e' biyó chéne tō itterawā**

(Mateo 20.17-19; Lucas 18.31-34)

<sup>32</sup> Et̄a ie'pa mirk̄a ñalā k̄i micho Jerusalén. Jesús shkōrami ittōkatapa yōk̄i kewe. Ittōkatapa mir tkirulewā ena pē' mir ie'pa itōk̄i e'pa suane. Ie' ttōkatapa dabom eyök k̄i bōl, e'pa kiémiitō bānet t̄a ì tkōraē ie' t̄a e' pakémiitō ie'pa a. Ichéitō: <sup>33</sup> “Se' mirk̄a Jerusalén i', et̄a eē ye' dōr S'ditsō Alà, e' merdattsa sacerdotepa wōkirpa ena s'wōbla'uk ttè dalöiēno wa wakpa ulà a. Ie'pa tō ye' kichateraē t̄a ye' wōmerattsa pē' kè dōr judiowak esepa ulà a ttēwā. <sup>34</sup> Ye' wayueraē ie'pa tō, iwiri tuōraē ye' k̄i, ye' pperarakitō, ena ye' tterawarakitō; erē e' k̄i ká de mañat et̄a ye' shkerdakane.”

**Santiago ena Juan tō kawō kié Jesús a**

(Mateo 20.20-28)

<sup>35</sup> Santiago ena Juan e'pa dōr Zebedeo ala'r e'pa dewā Jesús o'mik t̄a ichéitō ia:

—A s'wōbla'ukwak, sa' k̄i ikiane tō ì kieke sa' tō be' a e' mú sa' a.

<sup>36</sup> Ie' tō ichakérak:

—¿Ì kiane a' k̄i?

<sup>37</sup> Ie'pa tō iiuté:

—Mik be' tkēnekā s'blúie olo t̄a taiē, et̄a kawō mú sa' a e' tkōks̄er be' o'mik, ekōl be' ulà bua'kka, ekōl be' ulà bak-  
l̄i'kka s'wēttsuk be' ta.

<sup>38</sup> Ie' tō ie'pa iuté:

—A' kè wā ijcher ì kiök a' tso'. ¿Íyi yeraē ye' tō bacha'bachaē, e' yarmi a' a? ¿A' e' ché weinuk wēs ye' weirdaē es?

<sup>39</sup> Ie'pa tō iiuté:

—Tō, sa' dirmi.

Ie' tō iché ia:

—Ye' tka' wā yeraē a' tō. A' weirdaē wēs ye' es. <sup>40</sup> Erē e' tkōks̄er ye' ulà bua'kka ö ye' ulà bakl̄i'kka, e' kè kēwō menuk ye' a. E' tso'tke klöule yi a imeke esepa a.

<sup>41</sup> Mik ttè e' ttsēwā ittōkatapa malepa dōk̄a dabom eyök (10) e'pa tō, et̄a ie'pa ulunekā Santiago ena Juan k̄i. <sup>42</sup> Erē ie' tō ie'pa kié seraa t̄a ichéitō:

—A' wā ijcher tō pē' kè tō Skēkōl dalöiē, esepa wōkirpa kōs e' alōkekā ie'pa k̄i kekraē, ñies iblúpa tō ie'pa patkeke kēsik wa. <sup>43</sup> Erē a' kè kàne e' wamblök es. E' skéie, a' isie e' yuak s'wōkirie, ese kawōtā e' wōökwa s'malepa dik̄ia diōshēt ikanè mésoie. <sup>44</sup> Ñies a' isie e' yuak ibua'ie s'malepa tsatā, ese kawōtā e' muktsā s'malepa a kanè mésoie. <sup>45</sup> Ye' dōr S'ditsō Alà, e' kè dē'bitū as yi tō ye' k̄imù, ye' dē'bitū s'k̄imuk ena e' muktsā ttēwā s'tso' taiē e' nuì skéie. E' kuēk̄i a' kawōtā e' wōökwa s'malepa kanè mésoie.

**Bartimeo bua'wēne Jesús tō**

(Mateo 20.29-34; Lucas 18.35-43)

<sup>46</sup> Ie'pa demi Jericó. Mik Jesús e' yökettsatke ittōkatapa t̄a ena pē' dami taiē itōk̄i e'pa t̄a, et̄a eē wēm ekōl siarē tkēr ñalā ska'. E' dōr inukōl kak kiökwak kié Bartimeo dōr Timeo alà, e' wōbla kè wawēr. <sup>47</sup> Mik ie' ittse' tō Jesús Nazaret wak damitkō, et̄a ie' iché aneule:

—¡A Jesús, s'blú bak David e' aleri, ye' saū er siarē wa!

<sup>48</sup>Taië pè' tò ie' uñeke as isiwa'blòwa, erè ie' kī arkeka:

—¡A David aleri, ye' saú er siarè wa!

<sup>49</sup>Eta Jesús e' duésér ta ichéitò:

—Ie' kióttsa.

Eta wëm wöbla kè wawër, e' kiéttsa ie'pa tò ta ichéraitò ia:

—Be' er kuú. Be' e' kōka. Ie' tso' be' kiök.

<sup>50</sup>Eta wëm tò ipaio kīkke yéttsa ppéumi ta ie' e' kēka bet dewa Jesús ska'.

<sup>51</sup>Ta Jesús tò ie' a ichaké:

—¿I kiane be' kī tò ye' tò iwè be' a?

Ta ie' tò iiuté:

—A s'wöbla'ukwak, ye' kī ikiane tò ye' wöbla buarne.

<sup>52</sup>Jesús tò iché ia:

—Be' erblé ye' mik, e' wa be' buanene. Be' yúne.

E' wöshā ta ie' wöbla buanene ta imía Jesús ta ñala wa.

**Jesús demi Jerusalén**

(Mateo 21.1-11; Lucas 19.28-40; Juan 12.12-19)

**11** Mik Jesús ena ittökatapa dökemitke Betfagé ena Betania tso' tsinet Jerusalén, Olivo kēbata kuli' a ta eē ie' tò ittökatapa kié bö! <sup>2</sup>ta ichéitò iarak:

—A' yú wì u wène eruleè eē. Mik a' demi eē, e' bet ta burro pupula moulewa kueraè a' tò etò kè kī yi e' tkēuleka ese. E' wötsóo ta itsúbitu ña. <sup>3</sup>Yile tò a' a ichakeke: '¿I uk a' tso?', e' ta iiutó: 'Skékēpa kī ikiane', e' wa ie' tò imène.

<sup>4</sup>Eta ie'pa míyal tò burro ñe' kué, motér ukkò a ñala shaè. Iwötsée ie'pa tò tsèmi.

<sup>5</sup>Eta welepa ièter eē e' tò ichakérak:

—¿I uk a' tso'? ¿Iie a' tò burro se wötsée?

<sup>6</sup>Ittökatapa tò iiuté wës Jesús tò iché ia es ta ie'pa tò iébitu. <sup>7</sup>E' ukuökī ittökatapa wa burro bitetsér Jesús a. Ie'pa tò ipaio kīkke méka burro kī ta Jesús e' tkéka iki. <sup>8</sup>Taië pè' tò ipaio kīkke shuélor ñala kī, iskà tò kal kò t'lor kañika tsèmi ese shuélor ñala kī Jesús ñalé tsoie.

<sup>9</sup>Pè' mirwa keweie Jesús yöki ñies itöki, e'pa ulitane arke taië:

—¡Skéköl kīkōkasò! Yi datse ie' ttò wa, ayècha buaè e'. <sup>10</sup>E' datse s'wëttsukne s'blúie wës se' yé David bak es. Ayècha buaè ie'. ¡Skéköl tso' ká jai a e' kīkōkasò!\*

<sup>11</sup>Jesús dewa Jerusalén ta imía dewa Skéköl wé a. Ie' tò íyi weblé sēraa. Ká tuirketke, e' kueki imía Betania ittökatapa dabom eyök kī bö! e'pa ta.

**Jesús tò higowö yulé**

(Mateo 21.18-19)

<sup>12</sup>Bule es ta mik ie'pa e' yélur Betania, eta Jesús dué bli wa. <sup>13</sup>Kamiè ie' tò higuera klò sué kò arwa buaè. Ie' mía iweblök tò iwö ta'. Erè kè ie' wa iwö kune. Kam iwö kēwö dōwa, e' kueki ikò è arwa taië.

<sup>14</sup>Ie' tò iché higo klò a:

—¡Kè yi tò be' wö katepaia!

E' tse ittökatapa tò.

**Jesús tò Skéköl wé batse'wé**

(Mateo 21.12-17; Lucas 19.45-48; Juan 2.13-22)

<sup>15</sup>Ie'pa demi Jerusalén ta Jesús dewa Skéköl wé a. Eē ie' e' kēka wēpa tso' íyi taúk ena íyi wataúk e'pa tré'ukyal. Inuköl mane'ukwakpa† mesa trélurkaitò. Ñies nuböl wataúkwakpa kula' trélurkaitò. <sup>16</sup>Ñies ie' kè tò yi a kawö mè íyi tsuktök Skéköl wé shua. <sup>17</sup>Eta ie' tò s'wöbla'wémítke ta ichéitò:

\*11:10 Salmo 118.25-26

†11:15 inuköl mane'uk: Judiowak a inuköl tso' wakanewè Skéköl wé è a, e' tuekene ie'pa tò inuköl èse wa.

—Skëköl tō iyë'at iyëkkuō kī: 'Ye' u kirdaë tto ye' tã wé ká ulitane wakpa a,<sup>17</sup> erë a' tō iia'wëkã akblo wéie.

<sup>18</sup> Mik e' ttsé sacerdotepa wōkirpa ena s'wōbla'uk ttè dalöiëno wa wakpa tō, etã ie'pa ileritsëmi Jesús ttowaie. Ie' tō s'wōbla'wëke e' tō pë' kos tkiwëwã, e' kuekī judiowak wōkirpa suane iyōkī. <sup>19</sup> Erë mik kã tuine, etã ie' e' yëttsã Jerusalén ittōkatapa tã.

**Higo klò sinewa**

(Mateo 21.20-22)

<sup>20</sup> Bule es bla'mi ie'pa tkamine higuera klò o'mik, etã ie'pa tō isuë tō isinewa dò iwí kicha è. <sup>21</sup> Etã ì bak e' anewa Pedro éna, e' kuekī ie' tō Jesús a iché:

—A S'wōbla'ukwak, isaú higuera klò wayë'abö e' sinewa.

<sup>22</sup> Jesús iüté:

—A' erbló Skëköl mik. <sup>23</sup> Mokī ye' tō a' a' iché tō yi tō iché kabata wī a: 'jBe' e' skóttsa íe anúwa dayë a!' tã iklö'wëitō mokī kè ibikeitsekã bōtböt tō ì chéitō e' wã tkōraë, e' tã es iwã tkōraë. <sup>24</sup> E' kuekī ye' tō a' a' iché tō iklö'ú tō ì kié a' tō Skëköl a e' wã detke a' ulã a, etã iwã dōraë. <sup>25-26</sup> Nies mik a' tso' ikiök ie' a, etã ilè tté tso' a' wã yile kī, ese nuí olo'yó ikī as Syé tso' kã jai a e' tō a' icha olo'yò a' kī nies.

**¿Yi tō kawö mè Jesús a?**

(Mateo 21.23-27; Lucas 20.1-8)

<sup>27</sup> E' ukuökī tã ie'pa dene Jerusalén. Jesús shkòdur Skëköl wé a. Etã sacerdotepa wōkirpa ena s'wōbla'uk ttè dalöiëno wa wakpa ena judiowak kueblupa e'pa de ie' ska' <sup>28</sup> tã ichaké ia:

—¿Yi ttò wa be' tō íyi ikkë wëke? ¿Yi tō e' këwö mé be' a?

<sup>29</sup> Ie' tō iüté:

—Nies ye' tō a' a' ilè chakeke, e' iüté a' tō, e' tã ye' tō a' a' icheke tō yi tō

ikkëwö me' ye' a. <sup>30</sup> ¿Yi tō Juan patkë' s'wöskuök? ¿Skëköl tso' kã jai a e' ö s'ditsö? Ye' iütó.

<sup>31</sup> Ie'pa ñi iütémi tã ichekerakitö: “Sö ichëmi tō Skëköl tō ipatkë'bitu, e' tã ie' tō se' a ichëmi: '¿I kuekī a' kè wã ie' ttè klöne?’” <sup>32</sup> Pë' ulitane tō iklö'wé tō Juan dör Skëköl tteköl chökle, e' kuekī ie'pa suane pë'yöki. E' kuekī ie'pa tō icheke ñi a: 'Kè se' a iyënuK tō s'ditsö tō ie' patkë'.”

<sup>33</sup> E' kuekī ie'pa tō iüté:

—Kè sa' wã ijcher.

Ie' tō ie'pa a' iché:

—Es ñies ye' kè tō a' a' ichepa tō yi tō ye' a kawö mé íyi ikkë woie.

**Uva kanéukwakpa sulusipa e' tté**

(Mateo 21.33-46; Lucas 20.9-19)

**12** Jesús tō ttè kleé ie'pa a' i' es: “Wëm eköl tō uva kuatké tajë tã ikkoiéwãitö buaë, kawuk biéitö uva diò tuoie. Nies úla yuëitö kakkëë uva kk'noie. E' ukuökī tã ie' tō ipeitéat wëpa wëlepa a' as ie'pa tō ipataü ie' a' iwörke e' kak wa. E' ukuökī tã ie' mía kã bänet. <sup>2</sup> Mik uva wöline tso'tke wë'iaë shtë, etã ie' tō ikanè méso patkëmi eköl ie' icha tsuk. <sup>3</sup> Erë ie'pa tō ikanè méso klö'wëwã ppé tajë patkëmine ulã wöchka. <sup>4</sup> Etã kanè wák tō ikanè méso skã patkëmine eköl, erë e' shka'wé ie'pa tō iwökir kī tã iché suluë. <sup>5</sup> E' ukuökī tã eköl skã patkëmine ie' tō tã e' ttëwã ie'pa tō. E' ukuökī ikanè mésopa skã patkëmiitö tajë, erë ie'pa tō wëlepa ppélor wëlepa ttélur.

<sup>6</sup> “Bata ekkë tã iatëia eköl è. E' dör iwák alã, e' dalër tajë ie' éna. E' patkëmi-itö tã ie' ibikeitsè: ‘Ye' alã idir, e' kuekī ie'pa tō idalöieraë.’” <sup>7</sup> Erë ie'pa tō iché ñi a: ‘Kã i' atdaë ie' wī ulã a. Ittöwasö, es kã i' dōraë se' ulã a.’ <sup>8</sup> E' kuekī ie'pa tō iklö'wëwã ttëwã tã inú kéumi ie'pa tō uva ké a bänet.”

<sup>17</sup>11:17 Isaías 56.7

<sup>9</sup> Età Jesús tò ie'pa a chaké:

—¿Ima a' ibikeitsè? ¿Ì weraë kanè wák tò? Ie' mira kanéukwakpa ttökulur ta uva kané meraneitö pè' kua'ki a.

<sup>10</sup> Ye' tté tso' kitule Skéköl yëkkuö ki, ¿e' kè sune a' wa? E' tò ichè:

‘Ák watéttsa u yuökwakpa tò e' yönene ák bua'buaié.

<sup>11</sup> E' kaneö' Skéköl tò, ta e' tò s'ttsë'weke buaë, s'tkinewa iwe-blök.\*<sup>1</sup>

Es Skéköl yëkkuö tò ichè.

<sup>12</sup> Ie'pa tò isuéwa tò kleè e' wa Jesús tò ie'pa ché, e' kueki ie'pa éna iklö'wakwa. Erè ie'pa suane pè' yöki, e' kueki ie'pa tò iméat ta iponemi.

### S'wökirpa patauk, e' tté

(Mateo 22.15-22; Lucas 20.20-26)

<sup>13</sup> E' ukuöki ta ie'pa tò fariseowakpa welepa ena Herodes klépa welepa patkémi Jesús ska'. Ie'pa ki ikiane tò ie' tò ilè ché ikkatoie. <sup>14</sup> Ie'pa demi ie' ska' ta ichérakitö ia:

—A s'wöbla'ukwak, sa' wa ijcher tò këkraë be' ttö mokí. Be' tò sulitane sueke ñikkëë. Ima pè' tò be' cheke e' kè ki be' tkine. E' kueki be' tò s'wöbla'weke yësyësë Skéköl ñalé tté wa. Ichó sa' a, Roma wökir kibi patuësö ¿e' dör buaë ö kè idör buaë?

<sup>15</sup> Erè ie' tò isuéwa tò ie'pa e' öke er sulu wa, e' kueki ie' tò iché iarak:

—¿Ì kueki a' tso' ye' ma'uk tsaiè? Inuköl wöshki tsúbitu ña et suè.

<sup>16</sup> Età ie'pa tò inuköl wöshki tsémi ie' a et ta ie' tò ichaké ie'pa a:

—¿Yi diököl ena yi kiè me'rka iki?

Ie'pa tò iüté:

—Roma wökir kibi.

<sup>17</sup> Età ie' tò iché ie'pa a:

—E'ma kos Roma wökir kibi icha, ese mú ie' a, ta kos Skéköl icha ese mú ie' a. Ie' tò ie'pa iüté es, e' tò ie'pa tkiwéwa.

### ¿S'duolur e' shkërmikane ö au?

(Mateo 22.23-33; Lucas 20.27-40)

<sup>18</sup> Età saduceowakpa welepa de Jesús ska'. E' wakpa tò iklö'wé tò s'duowa e' kè shkenukane. Ie'pa tò ie' a ichaké:

<sup>19</sup>—A s'wöbla'ukwak, Moisés tò tté dalöiëno kitat yëkkuö ki e' tò ichè i' es: Wëm blënewa kè alà atë, e' ta ie' èl kawö-ta ischó tsukwa as ilà kôka iël blënewa, e' a. <sup>20</sup> Etökicha wëpa bak döka kul ñi ëlpa, ikibi alaköl tséwa, erè iblënewa kè alà atë. <sup>21</sup> Ie' itöki iël tò ischó tséwa, erè e' ñies blënewa kè alà atë. E' sù iwamblëne iël ta <sup>22</sup> ena imalepa ta. Ie'pa kul blëru-lune kè alà atë alaköl e' ta. Bata ekkë ta ñies alaköl e' blënewa. <sup>23</sup> Wëpa kul e' bak alaköl eköl è ta. Mik s'duowa e' shkenekane, età ¿wéne dòmi ie' wëm chókíe?

<sup>24</sup> Ie' tò ie'pa iüté:

—A' kè wa Skéköl yëkkuö suule, ñies ie' diché kè jcher a' wa, e' kueki a' wöa ká chowa. <sup>25</sup> Mik s'duolur e' shkenekane, età wëpa ena alakölpa kè serpawajä ñita. E'pa míyal wës Skéköl biyöchökwakpa tso' ká jai a kè sërta'wa ñita es. <sup>26</sup> ¿A' ki kiane jcheno tò mokí s'duowa e'pa shkerdakane? Skéköl ut Moisés ta kal tsir wönarke bö'ie, e' shua, ¿e' pakè kè arit-sule a' wa Moisés yëkkuö ki? E' këwö ska' ta Skéköl tò iyè: ‘Ye' dör Abraham, Isaac ena Jacob, e'pa Këköl.’<sup>§</sup> <sup>27</sup> E' wa kiane ché tò ie' kè dör s'duowa, e'pa Këköl. ¿Ie' dör s'ttsë'ka, e'pa Këköl! Taië a' wöa ká chowa.

<sup>1</sup>12:11 Salmo 118.22-23

<sup>§</sup>12:26 Ye' dör Abraham, Isaac ena Jacob, e'pa Këköl: Mik tté e' ye' Skéköl tò Moisés a, età Abraham, Isaac ena Jacob e'pa blërulunebak ká iajäë. Wës ie' tò ichè, e' wa kiane ché tò ie'pa tso' tsë'ka Skéköl ta. Éxodo 3.6 saü.



**¿Skèköl ttè dalöiëno e' isie dör ibua'ie?**

(Mateo 22.23-40)

<sup>28</sup> Età s'wöbla'ukwak ttè dalöiëno wa dur eköl ie'pa tso' ñi iütök e' ttsök. Ie' tö ittse tö Jesús tö ie'pa iüté buaë, e' kueki ie' ichaké ia:

—Skèköl ttè dalöiëno, ¿e' wéne dör ibua'ie imalepa tsata?

<sup>29</sup> Ie' iüté:

—Skèköl ttè dalöiëno kibiie imalè tsata e' dör i': 'A Israel aleripa, a' tö ittso'. Kèkè dör se' Kèköl, e' è dör Skèköl. <sup>30</sup> E' dalëritsó a' er kos wa ena a' wák kos wa ena a' erbikè kos wa ena a' diché kos wa.' <sup>31</sup> E' itöki e' dör i': 'A' malepa dalëritsó wés a' wákpa e' dalër es.' Kè ttè ta' dalöiëno tkòka ttè böt e' tsata.

<sup>32</sup> Età s'wöbla'ukwak ttè dalöiëno wa, e' tö iché ia:

—A s'wöbla'uk, be' iüté buaë. Ì ché be' tö e' dör mokì. Skèköl dör eköl ème. Kè e' skà ta. <sup>33</sup> Nies s'kawöta ie' dalëritsók se' er kos wa ena se' kabikeitsò kos wa, ena se' diché kos wa, ñies s'kawöta s'malepa dalëritsók wés se' wák e' dalër es. E' wésò, e' ta' e' dör buaë se' a' tkòka iyiwak jchëule ña'wè wa'ne ena iyiwak jchëule skà mèsò Skèköl a' e' kos tsata.

<sup>34</sup> Mik ie' isué tö s'wöbla'ukwak ttè dalöiëno wa, e' tö ie' iüté buaë yësyësë, età ie' tö iché ia:

—Ì blúie Skèköl tso' e' o'mik tsinet be' tso'.

Età kè yi kësik dè'kaia ie' a' ì skà chakök.

**¿Wé pairine'bitu idi' wa s'blúie e' dör yi aleri?**

(Mateo 22.41-46; Lucas 20.41-44)

<sup>35</sup> Jesús tso' ie'pa wöbla'uk Skèköl wé a' ta' ie'pa a' ichakéitö:

—¿Wés s'wöbla'uk ttè dalöiëno wa wakpa tö ichèmi tö wé pairine'bitu idi' wa s'blúie, e' dör s'blú bak kiè David e' aleri? <sup>36</sup> Erè David wák tö iyè' Wiköl Batsèr wa i' es:

'Skèköl tö ichè ye' Kèköl a:

Be' e' tkóser ye' ulà bua'kka dalöiëno taië, dò mik ye' tö be' bolökpa mërö be' klò dikia età.\*\*

<sup>37</sup> Wé pairine'bitu idi' wa s'blúie e' dör David aleri, e' ta' ¿wés e' kièmi David tö ie' Kèköl?

Età pè' tso' taië, e'pa tö Jesús ttè ttseke er bua' wa.

**Jesús tö s'wöbla'uk ttè dalöiëno wa wakpa kkaté**

(Mateo 23.1-36; Lucas 11.37-54; 20.45-47)

<sup>38</sup> Jesús tö s'wöbla'wéke e' shua ie' tö iché: "A' e' kkö'nú s'wöbla'uk ttè dalöiëno wa wakpa yöki. Ie'pa wöbatsö shkök datsi' batsiè ese mik wé pè' tso' taië ese ska' as pè' tö ie'pa shke'ù wés kékèpa dalöiërta' taië es. <sup>39</sup> Nies se' ñi dapa'wo wé a' ena wé ie'pa kawö tkö'wekerakitö, ese ska' kula' tso' kékèpa dalöiërta' esepa a, ese yuleke ie'pa tö e' tkoie. <sup>40</sup> Ie'pa tö alakölpä schó u yeta'tsa iulà a, età ittök-erak S'yé ta' braraé sulitane wöwa idik-ïñoie tö ie'pa dör pè' buaë yësyësë. Ie'pa weirdaé siarè s'malepa tsata."

**Alaköl siarè tö inuköl mé Skèköl a**

(Lucas 21.1-4)

<sup>41</sup> Etökicha ta' Jesús tkër kalkuö tso' inuköl ioie mè Skèköl a' e' wösha pè' tso' inuköl iök kalkuö a' e' sauk. Inuköl blúpa tso' taië esepa tö inuköl ieke taië. <sup>42</sup> E' wöshäe ta' alaköl siarè dör schó debitu eköl, e' tö inuköl wöshkila yöule cobre wa tuè tottola ese iéwa böt kalkuö ek a.

<sup>43</sup> Jesús tö ittökataka kié ta' ichéitö ia:

\*\*12:36 Salmo 110.1

—Mok̄i ye' tō a' a' ichè tō alakōl siarēla dōr schō wī tō inukōl iéwa kibiiie imalepa tō iie kōs e' tsata. <sup>44</sup>Ie'pa ulitane tō inukōl kuō atē ese ié, erē ie' siarē, e' tō ie' wa' itso' sēnoie e' kōs métt̄sa. E' kuek̄i ye' tō ie' ché es.

### Jesús tō iché tō Skékōl wé olordawa

(Mateo 24.1-2; Lucas 21.5-6)

**13** Mik Jesús e' yétt̄sa Skékōl wé a, et̄a ittōkata ekōl tō iché ie' a:

—¡A s'wōbla'uk, isaú! U bua'buae yöule ák bua'buala wa.

<sup>2</sup>Ie' iituté:

—U kōs tso' bua'buae sué a' tō íe, e' olordawa sēraa, iékwō è kè atpa ñi bata k̄i.

### ¿I wa sō isuēmi tō k̄a i' erkewatke?

(Mateo 24.3-28; Lucas 21.7-24; 17.22-24)

<sup>3</sup>E' ukuōk̄i t̄a ie'pa míyal kabata kiè Olivo tkērka Skékōl wé wōshaè ee. Jesús e' tkēs̄er t̄a Pedro, Santiago, Juan ena Andrés e'pa tō ie' a' ichaké bánet: <sup>4</sup>“Ichó sa' a: ¿mik íyi ekkē wamblērmi? ¿I wa sō isuēmi tō iwamblērketke?”

<sup>5-6</sup>Ie' iituté: “Tajē pē' dat̄s̄e e' chōk tō ie'pa dōr ye'. Icherarakitō: ‘Ye' dōr wé pairine'bitū idi' wa s'blúie e', t̄a pē' k̄iterarakitō tajē. E' kuek̄i a' tso' wōsh wa as kè yi tō a' k̄itō'ù.

<sup>7</sup>“Mik a' tō ibiyō t̄s̄é tō k̄a tajē wakpa ñippōke tajē w̄i a' dià a, et̄a e' kè tō a' tkiuk. E' wake' tkōraè, erē k̄a i' erwami e' kianeia. <sup>8</sup>K̄a kuā'k̄i kuā'k̄i wakpa ñipōraè ñita. Ñies í tō k̄a wōt̄i'weraè k̄a wa'ñe. Ñies k̄a t̄s̄eè wakpa t̄teraè bli tō tajē. Íyi ekkē dōr erpa s'ts̄á weirketke kam ye' dōne e' yök̄i ese. E' dōr wēs alakōl alà k̄urketke t̄a ikirirke es.

<sup>9</sup>“A' e' kk'ō'nú. A' merdatt̄sa s'shulōkwakpa a t̄a a' burdaè siarē judiowak ñi dapa'wō wé a. Ie'pa tō a'

keraè e' duōks̄er shulè s'wōkirpa ena s'blúpa wōrk̄i ye' tté kuek̄i. Es a' tō ye' tté pakeraè ie'pa a. <sup>10</sup>Erē kam k̄a i' erwa e' yök̄i ye' tté buaè e' kawōt̄a paké k̄a ulitane wakpa a. <sup>11</sup>Mik a' menettsa tté shulōkwakpa a, et̄a kè a' tkinuk ima a' e' tsat̄kōmi. Mik e' kēwō de, et̄a kè a' ttōpa a' wākpa er wa, e' skéie Wikōl Batse'r ttōraè a' wa. E' kuek̄i tté eraè Skékōl tō a' a' ché e' chō. <sup>12</sup>Et̄a wēlepa tō iēl wōmeratt̄sa ttēwa, iyé tō ilà wōmeratt̄sa, ñies ala'r e' kōrak̄a iyé ena imi kkatōk as ittōwa. <sup>13</sup>Sulitane tō a' sueraè suluè ye' tté kuek̄i. Erē yi e' tkéwa darērēè dōka bata ekkē, esepa tsat̄kērdāe.

<sup>14</sup>“Íyi sulusi tō ì dōr batse'r ia'wè ñáie e' tkērdak̄a wé kè ikawōt̄a tkēka ee†† (yi tso' yēkkuō i' sauk, e' éna iwà anú). Mik e' sué a' tō, et̄a wépa s̄erke Judea e'pa tkōyalmi kabata a. <sup>15</sup>Yi tso' u bata k̄i ese kè dōkwane weshkē íȳi yökt̄sa, itkōshkarmi. <sup>16</sup>Ñies yi tso' kanēblōk kañika ese kè dōkwane weshkē idatsi' yökt̄sa. <sup>17</sup>E' kēwō ska' t̄a alakōlpa alà k̄urketke ena alakōlpa tsu' muke ilà a' iwēstela ina esepa t̄a! <sup>18-19</sup>S'ditsō weirdaè tajē shute kōs kè s'we'ikule ekkē mik k̄a yö' Skékōl tō dō ikkē t̄a, ñies kōs kè s'weirpa aishkuō t̄a ekkē. E' kuek̄i ik-iō Skékōl a' as kè e' wamblēr a' t̄a yuēdiō kēska'. <sup>20</sup>E' kēwō kè wōōpawa Skékōl tō, e'ma kè yi isie at̄uk̄ia t̄s̄e'ka. Erē e' kēwō wōerawaitō, wépa shuk̄itbakitō esepa dalērmik.

<sup>21-22</sup>“Kachōkwakpa e' kōrak̄a e' chōk tō ie'pa dōr wé pairine'bitū idi' wa s'blúie e' ö ie'pa dōr Skékōl ttekōl wēle. E'pa tō ì kè or yi a' ese weraè s'kitō'woie tō ie'pa tté dōr mok̄iē. Dō wépa shuk̄it Skékōl tō, esepa k̄itō'wēmi e' mú k̄itērm̄i e'ma. E' kuek̄i yile tō iché a' a: 'Isaú, wé pairine'bitū idi' wa s'blúie e' dur íe', ö 'Isaú, idur w̄ie', e' t̄a kè a' tō iklō'war.

††13:14 Íyi sulusi...tkēka ee: Mateo 24.15 saú.

<sup>23</sup> ¡A' tso' erki! Íyi ekké biyó chétkeyö a' a keweie.

**Jesús dörane olo ta' taië**

(Mateo 24.29-35,42,44; Lucas 21.25-36)

<sup>24</sup> “Erë s'weine e' kèwö tka, etä diwö wötuirdawa, ñies si'wö kè wõnarpaia. <sup>25</sup> Bëkwö darolordaë ena ì kos tso' ká jai a' e' wõtirdaë. <sup>26</sup> Etä ye' dör S'ditsö Alà, e' datse mò a' diché ta' taië olo ta' taië, e' wërdaë. <sup>27</sup> Skëköl biyöchök-wakpa patkeramiyö wépa shukitbakyö, esepa dapa'ukka ek tsjín ème. Ie'pa tò iyuleraë ká wa'ñe dò wé ká i' bata erk-erö eë ena wé ká jai bata erkerö eë.

<sup>28</sup> “A' e' wöbla'ú ttè ikkè wa iwà saú higo klò wa: Mik iulatska tso' ulölöla ena erpa iköyök tskirdoka, etä a' wä ijcher tò duas dewatke tsjinet. <sup>29</sup> Es ñies mik a' tò isué tò íyi ekké wamblërke, etä a' wä ijchenú tò ye' datskene, e' diwö dewatke tsjinet. <sup>30</sup> Mokí ye' tò a' a' ichè tò íyi ekké wamblërdaë wépa dör wes a' es esepa kam erwa e' yöki. <sup>31</sup> Kashuk ena ká i' erdawa, erë ye' ttè michoë e' kè erpawa yës.

<sup>32</sup> “Erë e' kèwö e' diwö kè jcher yi wä. Skëköl biyöchök-wakpa tso' ká jai a, e'pa kè wä ijcher, ñies ye' dör Skëköl Alà e' kè wä ijcher. S'yé è wä ijcher.

<sup>33</sup> “A' kè wä ijcher wekkè ta' idiwö de, e' kueki a' tso' erki, a' senú wösh wa. <sup>34</sup> E' dör wes wëm eköl mi'keä kamië ká kua'ki a es. Ie' tò iché ikanè mé-sopa a: 'U kkönú ña.' Eta kanè tuléatitö ie'pa bik ekké a. Ie' tò iché ie' ká wékkö kkönukwak a: 'Be' tso' wösh wa.' <sup>35</sup> Es ñies a' tso' erki. A' kè wä ijcher mik ye' dör wes u wák es e' dotkene. Ye' dömibitü ká tuietke ekké alè, ká shaböts alè, dakro ane ekké alè ö ká ñine alè ta. <sup>36</sup> A' tso' wösh wa dó' a' kuëwayö kapè a. <sup>37</sup> Ttè chéyö a' a, e' chekeyö suli-tane a: ¡A' tso' wösh wa!”

**Judiowak wökirpa  
tö Jesús aleritsé klö'wëwä**

(Mateo 26.1-5; Lucas 22.1-2; Juan 11.45-53)

**14** Ká böt è kianeia Judiowak Yépa Yërulune Egipto e' kèwö tkö'woie. Nies e' kèwö ska' ta Pan Kè Yöule Iwölöwoka Wa e' kèwö tkö'weke judiowak tò. Sacerdotepa wökirpa ena s'wöbla'uk ttè dalöiëno wa wakpa tò Jesús aleritsé kitö'wè iklö'wowa ttëwa. <sup>2</sup> Ie'pa welepa tò iché:

—Kè sò wamblò Se' Yépa Yërulune Egipto e' kèwö a' as pè kè shutirka. E' kueki ie'pa éna iklö'wakwa ikitè wa.

**Jesús klò ki kiò masmas  
téka alaköl eköl tò**

(Mateo 26.6-13; Juan 12.1-8)

<sup>3</sup> Jesús mineä Betania, Simón kiri'uk lepra bak, e' u a. Ie' tkëria mesa ki, e' dalewa alaköl debitü eköl e' wä kiò masmas kiè nardo ese chökle tuë darërè, ese debitü. Kiò e' ukkuö yöule ák kiè alabastro e' wa. Kiò ukkuö kuli' péwaitö ta itéka Jesús wökir ki. <sup>4</sup> Welepa uluneka ie' ki ta ñi a' ichérak:

—¿Ì kueki alaköl tò kiò we'ikéwa? <sup>5</sup> Ituë darërè döka s'kanablò duas ek ské ekké. Iwatormittsa s'siarëpa kimoie.

Etä suluë ie'pa tò alaköl e' paké.

<sup>6</sup> Erë Jesús tò iché:

—Imúat bèrè. ¿Ì kueki a' itsiriweke? Íyi buaë kanewé ie' tò ye' a. <sup>7</sup> S'siarëpa tso' kekraë a' shua, etä e'pa kimèmi a' tò mik a' ki kiane e' ta. Erë ye' kè ku' kekraë a' ta. <sup>8</sup> Ie' tò iwé ye' a' kos ie' a' ior ekké. Ie' kiò té ye' ki ye' kanéwoie kam ye' nu wötërwa e' yöki. <sup>9</sup> Mokí ye' tò a' a' ichè tò ká wa'ñe wé Skëköl ttè buaë pakarke eë ipakardaë ñies tò ie' tò ì buaë o' ye' a. Es e' kè chöpawa yi éna.

**Judas tö Jesús wöméttsa**

(Mateo 26.14-16; Lucas 22.3-6)

<sup>10</sup> Jesús ttókatapa dabom eyök kí böl, e' eköl dör Judas Iscariote, e' mía sacerdotepa wókirpa ska' ichök tö ye' a Jesús mermittsa a' a. <sup>11</sup> Mik e' ttsé ie'pa tö, etä ittse'nerak buaë ta ikablé ie' a inuköl muk. Etä ie' tö kawö yulémi bua'iewa Jesús wömottsa.

**Jesús bata chkéia ittókatapa ta**

(Mateo 26.17-29; Lucas 22.7-23; Juan 13.21-30; 1 Corintios 11.23-26)

<sup>12</sup> Kawö kiè Pan Kè Yöule Iwölöwoka Wa e' kéwö tsá diwö dewatke<sup>‡‡</sup> E' diwö wa ie'pa obeja pupula jcheke Judiowak Yépa Yërulune Egipto, e' kéwö tkö'woie. Etä Jesús ttókatapa tö ie' a ichaké:

—¿Wé be' kí kiane tö sa' mi' kawö tkö'wekesö e' chké kanéuk be' a?

<sup>13</sup> Ie' tö iché ie'pa böl a:

—A' yú Jerusalén. Mik a' demi eë, etä wëm kueraë a' tö eköl, e' wa di' dami skauna a. E' itöki a' yú. <sup>14</sup> Ta u wé a ie' demi e' wák a ichó: 'S'wöbla'ukwak be' chakök ké: ¿Úshu wé a ie' tö kawö tkö'wekesö e' chké nëmi ie' ttókatapa ta?'

<sup>15</sup> Ie' tö úshu bërie tso' kákke tso'tke kaneoule buaë, e' kkacheraë a' a. Eë ichké kaneú se' a.

<sup>16</sup> Etä ie'pa böl míyal Jerusalén ta íyi ulitane kuérakitö wes ie' tö iché es. Eë chké kanewérakitö kawö tkö'woie.

<sup>17</sup> Mik ká tuine, etä ie' debitu ittókatapa dabom eyök kí böl, e'pa ta. <sup>18</sup> Mik ie'pa e' tulésér chkök, etä ie' tö iché ie'pa a:

—Mokí ye' tö a' a ichè tö a' eköl tö ye' wömerattsa. E' wák tso' ye' ta chkök.

<sup>19</sup> Etä ie'pa erianeká taië ta ie'pa tö ie' a ichakémi eköl eköl:

—¿Ye' alè idir?

<sup>20</sup> Ie' tö iüté:

—E' dör a' dabom eyök kí böl tso' ye' ta pan nuuk tka' etké a në, e' eköl. <sup>21</sup> Ye' dör S'ditsö Alà e' ta itköraë wes itso' kitule Skököl yëkkuö kí es. Erë wéstela ina yi ye' wömekettsa e' ta. ¡Buaë idir wëm e' a tö kè ikunúpa!

<sup>22</sup> Ie'pa tso'ia chkök, e' shua pan klö'wéitö, e' kí wéstela chéitö Skököl a ta iblatéitö watié ie'pa a ta ichéitö:

—Pan se dör ye' chká, e' nüú a' tö.

<sup>23</sup> E' ukuöki tka' a vino tso', e' klö'wéitö, e' kí wéstela chéitö Skököl a ta ie'pa ulitane tö tka' e' wayé. <sup>24</sup> Ie' tö iché ie'pa a:

—Vino se dör ye' pé. Ye' tterawa e' pé' tërdaë taië, e' wa ttè pa'alí me' Skököl tö, e' wà de. E' wa pé' taië tsatkërdaë.

<sup>25</sup> Mokí ye' a' a ichè tö vino kè yepaiayö dò mik ì blúie Skököl tso' e' kéwö de etä. Mik ide, etä iská yeraneyö a' ta.

**Pedro tö icheraë tö ie' kè wa Jesús suule**

(Mateo 26.30-35; Lucas 22.31-34; Juan 13.36-38)

<sup>26</sup> Etä ie'pa tö Skököl ttseittsé, e' ukuöki ta ie'pa míyal Olivo kébata a. <sup>27</sup> Jesús tö iché ie'pa a:

—A' ulitane tköyaldaë. A' ye' meatdaë ekörla. E' dör wes itso' kitule Skököl yëkkuö kí es, e' tö ichè: 'Obeja kkö'nukwak ttewaraëyö, etä obeja por-dami wì a dià a.'<sup>¶¶</sup> <sup>28</sup> Erë mik ye' ttéwa shkenekane, e' ukuöki ta ye' miraë Galilea a' yöki kéwe.

<sup>29</sup> Pedro tö ie' a iché:

—Erë ie'pa ulitane be' memiat ekörla, erë ye' kè tö be' mepaat.

<sup>30</sup> Ie' iüté:

<sup>‡‡</sup>14:12 **Pan Kè Yöule Iwölöwoka Wa e' kéwö:** Kawö e' tkö'weke judiowak tö dò ká kul, e' tsá diwö kièrakitö Se' Yépa Yërulune Egipto e' kéwö.

<sup>¶¶</sup>14:27 Zacarías 13.7

—Mokí ye' tō be' a ichè tō i' nañewe, kām dakro skà arne, e' yōkí be' tō icheraë mañatōkicha tō be' kè wā ye' suule.

<sup>31</sup> Erè Pedro tō ikí ché ia kröröe:

—Erè ye' ttèwamirakitō be' ta, erè kè ye' ichepa tō kè ye' wā be' suule.

Etā ie'pa ulitane ttōke es ème.

**Jesús tté S'yé ta Getsemaní**

(Mateo 26.36-46; Lucas 22.39-46)

<sup>32</sup> E' ukuōkí ta ie'pa míyal ká kiè Getsemaní ee. Jesús tō iché ittōkatapa a:

—A' ate tulur íe, ye' mía ttök S'yé ta.

<sup>33</sup> Pedro, Santiago ena Juan e'pa mítser iwā e' ta. Etā ie' erianemi chkenewami tajë. <sup>34</sup> Ie' tō iché ie'pa a:

—Ye' eriane tajë ttseskua ye' ttèwami-itō ekkè. A' e' tsúat íe, kè a' kapökwa.

<sup>35</sup> E' ukuōkí ie' mía wishke ta ie' e' kéutër wōwakköt iski ta ikiéitō Skéköl a tō ì tkōraë ie' ta, e' diwō tkōami ie' kī, e' ta itkōúu. <sup>36</sup> Ie' ichè: “A yéwōla, íyi ulitane ormi be' a. Ì tkōraë ye' ta e' dör wes íyi bacha'bachaë yèwasō es. E' ulà a ye' yóttsa. Erè kè iwār wes ye' kī ikiane es, iú wes be' kī ikiane es.”

<sup>37</sup> E' ukuōkí ta ie' dene wé ittōkatapa tulur ee ta ie'pa kuéitō kapõtulur. Ie' tō iché Pedro a:

—A Simón, ¿be' kapowa? ¿Kè be' wā kapèwā wōklōne dò hora ek è? <sup>38</sup> Kè a' kapökwa. A' ikió Skéköl a as ì sulu tō a' erkiōwēke ese kè e' alòka a' kī. Mokí a' éna ì buaë wāk, erè a' diché kè dē'ka iwā uk, e' kuekí a' a darèrèe idir.

<sup>39</sup> Ie' míane ta tté Skéköl a wes kewé itté es. <sup>40</sup> Mik ie' dene ta ie'pa kuéneitō kapõtulur; ie'pa wōbla surirkewa kapè wā e' kuekí. Ie'pa kè wā ttè kune ie' iutoie. <sup>41</sup> Ie' skà míane ttök S'yé ta e' dene, i' ta idare mañatōkicha, etā ie' tō iché iarak:

—¿A' kapõtuluríá enukeia? Wè' a' kapowa. Ye' dör S'ditsō Alà, e' diwō dekatke mèttsa pè' sulusipa ulà a. <sup>42</sup> A'

e' kóka, yi tō ye' wōmekettsa, e' dotke i' ta. Mishka ie' panuk.

**Jesús klō'wéwā ibolōkpa tō**

(Mateo 26.47-56; Lucas 22.47-53; Juan 18.2-11)

<sup>43</sup> Jesús tso'ia ttök, e' dalewa ittōkatapa dabom eyök kī bōl, e' eköl kiè Judas, e' debitu pè' ta tajë. E' wakpa debitu tabè kī ena kal wölö kī. Ie'pa patkè'mi sacerdotepa wōkirpa ena s'wōbla'uk ttè dalöiëno wa wakpa ena judiowak kuēblupa ekkèpa tō. <sup>44</sup> Judas dör iwöméttsa e' tō ie'pa a iyè'bak: “Wé shke'wéyō wōalattse wa, e' dör ie', iklō'úwā a' tō ta itsúmi kk'onaule buaë as kè itkōshkar.” <sup>45</sup> Etā ie' e' skéwā Jesús o'mik ta iché ia:

—¿A S'wōbla'ukwak!

Tā iwōalattséwāitō. <sup>46</sup> Etā Jesús klō'wéwā pè' tō.

<sup>47</sup> Erè ie'pa ièter ee, e' eköl tō itabè yéttsa ta e' wa sacerdoté kibi e' kanè méso kukuōña téttsa. <sup>48</sup> Etā Jesús tō ichaké pè' ekkèpa a:

—¿Ì kuekí a' bité ye' klō'ukwā tabè kī kal wölö kī wes akblōkwakpa klō'wéwā es? <sup>49</sup> Kēkraë ye' bak a' shūa s'wōbla'uk Skéköl wé a, erè a' kè wā ye' klōñewa. Erè i' tkōke as itkō wes itso' kitule Skéköl yēkkuō kī es.

<sup>50</sup> Etā ittōkatapa kōs tkayalmi tō iméat ekōrla. <sup>51</sup> Erè duladula eköl dowā ie' itōkí e' patrēwābitu ka' kishuo wa, e' klō'wéwarakitō, <sup>52</sup> erè idatsi' ppéeatitō wak tkashkarmi sume.

**Jesús demi ie'pa wā Judiowak wōkir kibipa wōrkí**

(Mateo 26.57-68; Lucas 22.54-55,63-71; Juan 18.12-14,19-24)

<sup>53</sup> Jesús tsémirakitō sacerdoté kibi ska'. Etā ee sacerdotepa wōkirpa malepa ena judiowak kuēblupa ena s'wōbla'uk ttè dalöiëno wa wakpa kōs daparke. <sup>54</sup> Pedro datse ie'pa itōkí kamië dōttsa

sacerdote kibi u pamik, eṭa eḗ ie' e' tséat tkēr Skéköl wé shkékpa ṭa bö' baiklök.

<sup>55</sup> Eṭa sacerdotepa wókirpa ena judiowak wókirpa malepa tō ttè yuleke Jesús kkatōie aṣ ie'pa tō iwömüttsa ttèwa, erè kè ie'pa wā ì ttè kune ikkatōie. <sup>56</sup> Tajè pè' de ie' kkatök kachè wa, erè ie'pa ttè kè dè'ttsa ñittsèè. <sup>57</sup> Welepa tō ie' kkatémi kachè wa ṭa ichérakitō:

<sup>58</sup> —Sa' tō ie' ttsè'wā ichök tō Skéköl wé yō' s'ditsō tō i', e' olo'yerawaitō ṭa iské, kè yöne s'ditsō wā, ese yuérakaneitō ká mañat šua.

<sup>59</sup> Erè ie'pa ttè kè dè'ttsa ñittsèè.

<sup>60</sup> Eṭa sacerdotē kibi e' kékā iyamipa šua, ṭa Jesús a ichakéitō:

—¿Kè be' ie'pa iuteku' yès? ¿Ñe' ie'pa be' kkatēke, e' dör ì?

<sup>61</sup> Erè Jesús siwā'bléwā ie'pa yöki, kè ie' wā ì iütēne.

Sacerdote kibi ie' skà chaké:

—¿Be' dör wé pairine'bitu' idi' wa sa' blúie e'? ¿Be' dör Skéköl kikaulekā tajè e' Alà?

<sup>62</sup> Jesús ie' iuté:

—Tó, ye' idir. Ye' dör S'ditsō Alà e' suerāè a' tō tkērka Skéköl diché ṭa' íyi ulitane tsāṭa e' ulà bua'kka dalöiërta' tajè. Nies ye' datskene kashuk a' mò a' e' suerāè a' tō.

<sup>63</sup> Eṭa sacerdotē kibi e' datsi' jchéé ikkachoie tō ilunekā ṭa ichéitō:

—¿Iie se' kī ikkatökwakpa kī kiarmitiā?

<sup>64</sup> A' ittse' tō ie' e' chò tō ie' dör Skéköl Alà, e' wa ie' tso' Skéköl chök suluè. ¿Wes a' iweke?

Ie'pa ulitane ñi sini'kué tō ie' iane iwiiie, e' kueki ikawötā ttèwa.

<sup>65</sup> Ie'pa welepa wirituémi iki ñies iwöbla pabakéwarakitō ṭa itérakitō ṭa ichakérakitō:

—Be' dör Skéköl tteköl, e'ma sa' a' ichókā ¿yi tō be' té?

Eṭa Skéköl wé shkékpa tō ippé iwö kī tajè.

**Pedro tō iblé tō kè ie' wā Jesús sule**

(Mateo 26.69-75; Lucas 22.56-62;

Juan 18.15-18,25-29)

<sup>66</sup> Pedro tkéria įski u pamik, e' dalewa tayēla debitu' e' dör sacerdotē kibi e' kanè méso eköl. <sup>67</sup> Ie' Pedro sué bö'iklök, ṭa isuéitō krereè ṭa ichéitō ia:

—Be' ñies dör Jesús Nazaret wak e' klé eköl.

<sup>68</sup> Pedro tō iblé. Ie' tō iché:

—Kè ye' wā ie' sule. Ye' kè éna iane tō ì chök be' tso'.

Eṭa ie' e' yéttsa ukkō a. E' wöshāè dakro ane. <sup>69</sup> Kanè méso ñe' tō Pedro suéne ṭa ie' e' kékā ichök imalepa a:

—Ie' i' dör Jesús klépa e' eköl.

<sup>70</sup> Erè Pedro tō iskà bléne. E' kuölō ṭa wépa tso' eḗ ñies e'pa tō iché ie' a:

—Be' dör Galilea wak, e' kueki moki be' dör ie'pa éltē wak.

<sup>71</sup> Ie' tō iché:

—¿Skéköl wörki ye' iché tō wém chök a' tso' e' kè sule ye' wā! Kè idör es, e'ma as ye' kichatēr.

<sup>72</sup> E' wöshāè ṭa dakro ane etökichane, ṭa ie' éna ianewā tō Jesús tō ie' a iyè': 'Kam dakro skà arne e' yöki be' icheraè mañatökicha tō be' kè wā ye' sule.' Eṭa ie' iékā tajè.

**Jesús mítser Pilato wörki**

(Mateo 27.1-2,11-14; Lucas

23.1-5; Juan 18.28-38)

**15** Mik ká ñine, eṭa sacerdotepa wókirpa ena judiowak kuęblupa ena s'wöbla'uk ttè dalöiēno wa wakpa ñi dapa'wéka ṭa Jesús aleritsétke. Ie'pa wā imítser moulewā mé Pilato a. <sup>2</sup> Pilato tō ichaké ie' a:

—¿Be' dör judiowak blú?

Ie' iuté:

—Tó, wes be' iché, e'ma es idir.

<sup>3</sup> Sacerdotepa wókirpa tō ie' kkaté tajè.

<sup>4</sup> Eṭa Pilato tō iskà chakéne:

—Ñekkë ie'pa be' kkaté ¿e' ttsébö? ¿Ï kuëkí e' kè iütèbö?

<sup>5</sup>Erë ie' kè wá iütène, e' tò itkiwéwa darërëë.

### Jesús méttša ttèwa

(Mateo 27.15-31; Lucas 23.13-25; Juan 18.38–19.16)

<sup>6</sup>Judiowak Yépa Yërulune Egipto e' kèwö wa Pilato wöblar s'wötëulewa s'wöto wé a ese yöktsa eköl émine wé kié pè' tò e'. <sup>7</sup>Wëm kiè Barrabás e' tso' wötëulewa s'wöto wé a imalepa sulusipa ta. Ie'pa wá s'kötulewa mik ie'pa e' ka'ka ñippök romawakpa ta eta. <sup>8</sup>Ta pè' deb-itü Pilato ska' e'pa tò ikié ie' a tò iü wes iwöblar es. <sup>9-10</sup>Ie' tò isuéwa tò ukyëne wa sacerdotepa wökirpa tò Jesús me'ttsa ie' ulá a. E' kuëkí ie' tò ichakérak ia:

—A' judiowak blú ¿e' èmineyö?

<sup>11</sup>Erë sacerdotepa wökirpa tò pè' shutiwékatke as ie'pa tò kiò Pilato a tò Barrabás yöktsa Jesús skéie. <sup>12</sup>Pilato tò ichakéne:

—Eta ¿wes a' kí kiane tò ye' tò wëm kiè a' tò judiowak blú e' wè?

<sup>13</sup>Ie'pa iüté aneule:

—¿Iwötówa krus mik!

<sup>14</sup>Ie' tò ichaké ie'pa a:

—¿Ï kuëkí? ¿Ï sulu wambléitö?

Erë ie'pa kí arke:

—¿Iwötówa krus mik!

<sup>15</sup>Ie' atak buaé ie'pa ta, e' kuëkí Barrabás yéttšaitö. Eta Jesús ppök patkëmiitö tsa' bata daloie wa. E' ukuökí ta ie' tò iméttša wötèwa krus mik.

<sup>16</sup>Eta ñippökwakpa wá Jesús mítser ká e' wökir u kiè Pretorio e' shua wé ulat tso' áie eë. Eë ie'pa tò ñippök-wakpa malepa kiéttša dapa'wè ek tsiní ème. <sup>17</sup>Ie'pa tò datsi' mat daloshdalosh ese iéka Jesús kí blu'ie. Ñies dika'kicha yuérakitö wöshkiie tkékarakitö iwökir kí blu'ie iwayuoie. <sup>18</sup>E' ukuökí ta ie' wayuémirakitö aneule:

—¿Be' dör judiowak blú! ¿Be' kikökka sa' tso'!

<sup>19</sup>Eta ippémirakitö taië iwökir kí kuaköl wölö wa ena iwiri tuérak ikí ena ie' e' tuléserak kuchë kí iwörkí iwayuök tò sú sa' be' dalöie.

<sup>20</sup>Mik iwayué one, eta datsi' mat daloshdalosh, e' yéttšarakitö ta iwák datsi' iékanerakitö ikí ta imítserak iwa wötèwa krus mik.

### Jesús wötène krus mik

(Mateo 27.32-44; Lucas 23.26-43; Juan 19.17-27)

<sup>21</sup>Ñippökwakpa tò wëm kiè Simón dör Cirene wak, e' kué ñalá kí, e' datse bánet micho Jerusalén. Ie' dör Alejandro ena Rufo yé. Ie' ké ie'pa tò Jesús krus tsukmi.

<sup>22</sup>Ie'pa wá Jesús mítser ká kiè Gólgota eë. (Gólgota e' wá kiane chë s'wökirdiche.) <sup>23</sup>Eta vino shutuule kapöli kiè mirra e' wa, ese mé Jesús a yè, erë kè ie' wá iyanewa. <sup>24</sup>Eta iwötérakitö krus mik. E' ukuökí ta ie'pa iné ñi ma'woie suè tò wes ie'pa tò Jesús datsi' blatemi ñi a.

<sup>25</sup>Mik ie'pa tò iwötèwa krus mik, eta diwö de sulítu (9). <sup>26</sup>Kaltak tso' e' kí itso' kitule tò ichë: "I' dör judiowak blú e'", e' dör iwá kkachöie tò ì nuí kí ie' wötènewa krus mik. <sup>27-28</sup>Ñies wépa böl akblök-wakpa wötèwarakitö krus mik, eköl iulá bua'kka, eköl iulá baklí'kka.

<sup>29</sup>Pè' tköke eë e'pa tò icheke sulu, iwökir wötiükerak iwöa, es ichekerakitö:

—¿Íkëta, be' se' tò Skëköl wé tkekettsa eta ká mañat è ta be' tò iyuékane!

<sup>30</sup>¿E'ma be' e' tsatkó, be' e' ówa krus se mik!

<sup>31</sup>Es ñies sacerdotepa wökirpa ena s'wöbla'uk ttè dalöiëno wa wakpa tò Jesús wayueke. Ie'pa tò icheke ñi a:

—O'kapa tsatkéitö erë ie' wák kè a e' tsatkër. <sup>32</sup>Mokí ie' dör wé pairine'bitü idi' wa s'blúie, mokí ie' dör se' Israel

aleripa e' blú, e'ma as ie' e' òwa krus wí mik, e' iarma ta se' erblòmi ie' mik.

Wépa wötène ie' ta krus mik e'pa tso'ñak ie' chòk suluë.

**Jesús duowa**

(Mateo 27.45-56; Lucas 23.44-49; Juan 19.28-30)

<sup>33</sup> Mik diwö de bata a, eta ká mía ttsetseë ká wa'ñe dò tsáji diwö de mañat ekkë. <sup>34</sup> E' wòshà ta Jesús anekà taië ta iché: “Eloí, Eloí, ¿lemá sabactani?” (e' wà kiane chè: A ye' Kèköl, a ye' Kèköl, ¿iók be' ye' we'ikéttsa?)

<sup>35</sup> Welepa tso' ee, mik e'pa tö ttè e' ttsé ta ichérakitö:

—¿A' ittseé? Ie' tso' Skèköl tteköl bak kiè Elías, e' kiök.

<sup>36</sup> Eta ie'pa eköl tunemi tö suiyök nuwékà vino shkòshkò wa e' tkékaitö kuaköl bata kī ta itkéwà ikkò mik as ikuyòitö. Ie'pa tö iché:

—Imúat bër, ipanusö suè tö Elías datse iökwa.

<sup>37</sup> Jesús anekà taië ta isiwà' bata tké. <sup>38</sup> Eta Skèköl wé a ie'pa wà datsi' buririë ese shukuar u blatoie e' jchënane kákke döttsa iski. <sup>39</sup> Eta Roma ñippökwapka eköl dör capitán e' durshkò Jesús wömik. Mik e' tö isué tö wës Jesús duowa, eta ichéitö:

—Mokī, wëm wí dör Skèköl Alà je'.

<sup>40</sup> Ñies alakölpa iëter eë ie' kī sauk kamië. E' shua eköl dör María Magdala wak. Ièköl dör María e' dör Santiago tsirla ék ena José, e'pa mì. Ièköl dör Salomé. <sup>41</sup> Alakölpa e'pa bak shkòk Jesús ta ena ikime' mik ibak Galilea eta. Ñies alakölpa skà tso' taië dë'bitu Jesús ta dò Jerusalén.

**Jesús nu wötène**

(Mateo 27.57-61; Lucas 23.50-56; Juan 19.38-42)

<sup>42-43</sup> E' diwö dör judiowak a íyi kanëwoie eno diwö yöki. Ká tuirketke<sup>§§</sup> e' kueki wëm eköl kiè José Arimateawak, e' kèsik iéwà ta imía Jesús nu kiök Pilato a blèwà. Ie' dör judiowak wökirpa e' eköl dalöiërta' taië ese. Ñies ie' tso' i blúie Skèköl tso' e' kèwö panuk. <sup>44</sup> Pilato tkinewà tö Jesús duowatke, e' kueki ie' tö icapítán kié chakè tö mokī Jesús duowatke. <sup>45</sup> Mik ie' wà ijchenewà, eta ie' tö Jesús nu kèwö mé José a tsëmi. <sup>46</sup> E' ukuökī ta José tö datsi' ukuö bua'buasaruru ese tué et. Jesús nu éwaitö krus mik, e' patrëwaitö datsi' ñe' wa blèwà ákuk biule s'nu blóie ese a. Eta ákuk kkò wötëwaitö ák bërrie wa. <sup>47</sup> Wé Jesús nu menewà e' sué María Magdala wak ena María dör José mì, e'pa tö.

**Jesús shkënekane**

(Mateo 28.1-10; Lucas 24.1-12; Juan 20.1-10)

**16** Mik eno diwö tka, eta María Magdala wak ena María dör Santiago mì ena Salomé e'pa tö kiö masmas bua'buaw ese tué mí ie'pa wà tèkà Jesús nu kī. <sup>2</sup> Eta domingo bla'mi erpa diwö tschine ta ie'pa míyal wé Jesús nu blène ee. <sup>3</sup> Ie'pa ñi a iché:

—¿Yi tö se' a ák yëmittsa ákuk kkò a?

<sup>4</sup> Erë mik ie'pa tö iweblé, eta ie'pa tö isué tö ák rratune bánet. Ák e' dör bërrie.

<sup>5</sup> Mik ie'pa dewà ákuk a, eta ie'pa tö isué tö duladula tkër eköl ulà bua'kka, e' datsi' saruruë batsjë. Ie'pa tkinewà iyöki.

<sup>6</sup> Erë ie' tö iché ie'pa a:

—Kè a' tkinukwà. Ye' éna iane tö a' tso' Jesús Nazaret wak kótewà krus mik e' nu

§§15:42-43 **Ká tuirketke:** Judiowak ttè dalöiëno tö ichè tö s'nu kè tserta'mi eno diwö a. Eno diwö e' tkèrkewami Viernes ká tuine ekkë. Ñies kè idör buaë ie'pa a tö s'nu at áie nañewe. E' kueki José Arimateawak éna Jesús nu akwa blèwà bet kam ká tuir e' yöki.



yulök. Erë kè iku' ié, ie' shkenekane. Wé ie'pa tö ime'wa e' tò webló. <sup>7</sup> A' yú Pedro ena ittökatapa malepa a ibiyó chök tö ie' mitke a' yöki kewe Galilea. Ee a' tö ie' sueraë wes ie' tö a' a iyé' es.

<sup>8</sup> Alakölpa tkinewa painéka taië, e' kuëki ie' e' yélur ákuk a tkayalmi. Ie'pa suane, e' kuëki kè wa ì yëne yi a.

### María Magdala wak tö Jesús sué

[<sup>9</sup> Jesús shkenekane domingo bla'mi, e' ukuöki ta ie' e' kkaché kewe María Magdala wak a, e' a ie' tò aknamapa bak kul (7) e' trëo'yal. <sup>10</sup> Etá alaköl e' mía ibiyó chök wépa bak shkök Jesús ta e'pa a. Ie'pa eriarke iü tulus siarë. <sup>11</sup> Erë mik ie'pa ittse tö Jesús shkenekane ñies tö alaköl ñe' tö isué, etá kè ie'pa wa iklöone.

### Jesús ttökatapa böi e'pa tö ie' sué

(Lucas 24.13-35)

<sup>12</sup> E' ukuöki ta ittökatapa böi shkörami micho bänet, etá ñalá ki Jesús e' kkaché ie'pa a, erë iwër kuá'ki. <sup>13</sup> Etá ie'pa míyal ibiyó chök imalepa a, erë ñies kè ie'pa wa ittö klöone.

### Jesús tö ittökatapa patké s'wöbla'uk

(Mateo 28.16-20; Lucas 24.36-49; Juan 20.19-23)

<sup>14</sup> E' ukuöki ta Jesús e' kkaché ittökatapa dabom eyök ki eköl e'pa a. Ie'pa tu-

lur chkök e' dalewa ie' de. Wépa tö ie' shkenekane e' sué, e'pa ttö kè klöone ie'pa wa, ie'pa er darërë e' kuëki. E' ki ie' tö ie'pa unélor. <sup>15</sup> Etá ie' iché ie'pa a: "A' yú ká wa'ñe ye' tté buaë e' pakök sulitane a. <sup>16</sup> Yi erblé ye' mik ta ie' e' wöskuée esepa tsatkërdaë. Erë yi kè erblëne ye' mik esepa kichatërdaë. <sup>17</sup> Wépa erblöke ye' mik esepa tö ì kè or yi a ese weraë iwà kkachöie. Ye' ttö wa ie'pa tö aknamapa trëwerattsá, ñies ie'pa a imeraë ttoie s'ttö kuá'ki kuá'ki wa. <sup>18</sup> Tkabè chök klö'wéwa ie'pa tö ulá wa ö kapöli sulusi yéwarakitö, e' ta kè ie'pa dòpa wes. Ñies ie'pa ulá muraká s'kirirke esepa ki ta ibuardane."

### Jesús míkane ká jai a

(Lucas 24.50-53)

<sup>19</sup> Mik Skëképa Jesús tté e' ché one, etá ibutséka mía ká jai a ta ee ie' tkéser Skëköi ulá bua'kka. <sup>20</sup> Etá ittökatapa míyal ká wa'ñe Jesús tté buaë pakök. Skëképa Jesús tö ie'pa kimé, ì kè or yi a ese uk. E' wa ie' tö iwà kkaché tö ie' tté dör moki.]\*

\*16:20 Yëkküö këchke wele tö 16.9-20 kí kuötkéka. Ttè e' kè ku' yëkküö këchke bua'ie ese ki.

## Jesús Tté Buaë Kit Lucas tò

*Lucas*

Wëm tò yëkkuö i' kit e' wák kiè Lucas. Ie' tò ikit wëm eköl kiè Teófilo e' a. Welepa tò ibikeitsè tò Teófilo dör romawak eköl ena ie' dör kékëpa taië ese. Lucas tò ie' a yëkkuö i' kit as ì o' Jesús tò ena ì wa s'wöbla'itö e' jcherwä ie' wä yësyësë.

Yëkkuö i' kî Lucas tso' ikkachök tò Jesús dë'bitu sulitane tsatkök, Israel aleripa ena pë' ulitane. Jesús kè dë'bitu Israel aleripa è a. Lucas tò ichè tò Jesús kune' ká i' kî sulitane kimoie. Ñies Lucas kî ikiane tò s'wä ijcherwä tò Jesús dë'bitu iyé kkachök se' a.

Ì tso' kitule Colosenses 4.14 ena Filemón 24 ena 2 Timoteo 4.11, e' wa se' wä ijcher tò Lucas bak Pablo wapiöuk. Welepa tò ibikeitsè tò ie' kè dör Israel aleri. Ie' bak kanëblök s'kapeyökwakie. Ñies welepa tò ibikeitsè tò ie' tò yëkkuö i' kit ká kiè Roma eë Jesús kune' e' kî duas de dabom teryök (60) ena dabom kuryök kî sulitu (79) e' shü ulat.

### Ttè tsá kitule

**1**<sup>1-3</sup> A kékëpa taië Teófilo, ì o' Jesús tò sa' shüa mik ibak ká i' kî eta, e' paka' sa' a wépa itsá su'bitu dò ibata ekké e'pa tò. Ie'pa dör Jesús ttè buaë e' kanëukwakpa. Taië sa' malepa imao' shtë yëkkuö kî, erè kè idë'ttsa wes ikiane shtë es. E' kuekî ye' tò iwà chakéwa bua'iewa itsá dò ibataë. Es ye' isué tò buaë idir shtëmi be' a yëkkuö i' kî seraa wes ibak es<sup>4</sup> as be' éna iar tò ttè wa be' wöblane, e' dör moki.

### Juan S'wöskuökwak kúrke e' biyó yëne

<sup>5</sup> Mik Herodes bak judiowak blúie eta sacerdote tso' eköl kiè Zacarías. Ju-

diowak sacerdotepa ñi dapa'oule erule erule kanëblök Skëköl wé a. Zacarías dör sacerdotepa erule kiè Abías wakpa e' eköl. Ie' alaköl kiè Elisabet, e' dör ñies sacerdotepa ditséwö wes iwëm es.<sup>6</sup> Ie'pa bül serke yësyësë Skëköl wöa. Ie'pa tò Skëköl ttè me'bak dalöiëno, e' dalöieke buaë, kè kî ì sulu tté ta'.<sup>7</sup> Erë Elisabet kè dötä' aläë. Ñies ie'pa bül dör kékëpalatke.

<sup>8</sup> Etökicha ta mik Zacarías ena imalepa kane iwakanëuk Skëköl wé a,<sup>9</sup> eta ie'pa iné ilè wa wes ie'pa wöblar es isuöie tò yi kane shkökwa Skëköl wé shüa iyi masmas ña'uk Skëköl a. Eta idettsa tò Zacarías kawöta shkökwa.<sup>10</sup> Mik ie' tso' Skëköl wé shüa iyi masmas ña'uk, e' dalewa taië s'daparke u'rki ttök S'yé ta.<sup>11</sup> E' wöshä ta Skëköl biyöchökwak eköl e' kkachéwa ie' a ká' tso' iyi masmas ña'woie Skëköl a e' ulä bua'kka.<sup>12</sup> Mik ie' tò Skëköl biyöchökwak sué ta ie' tkinewa suane taië iyöki.<sup>13</sup> Eta biyöchökwak tò iché ie' a:

—A Zacarías, kè be' suanuk. Ì kié be' tò Skëköl a, e' meraëitö be' a. Be' alaköl dör Elisabet, e' döraë aläë, e' wák wëm. Ie' kiè múka a' tò Juan.<sup>14-15</sup> Ie' döraë kékëpa taië Skëköl wöa. E' kuekî e' be' ttsé'weraë buaë kaneë. Ñies ie' tò taië pë' ttsé'weraë buaë. Ie' kè ì shköshkö yepa. Kam ie' kur eta Wiköl Batse'r döraë ie' kî taië.<sup>16</sup> Ie' tò Israel aleripa taië, e' kerane ie'pa Këköl yulökne.<sup>17</sup> Ie' döraë Skëköl yöki kewe itté pakök. Ie' tò ipakeraë Wiköl Batse'r diché taië e' wa wes Skëköl tteköl kiè Elías bak ká iaiaë es. Ie' ipakeraë as iyé er buarne ila'r kî ena ila'r er buarne iyé kî. Ñies ipakeraëitö as wépa tò Skëköl ttè dalösewéwa, esepa e' wöbla'ü senuk yësyësë. Es ie' tò ie'pa pateräë Skëköl datse e' panoie.

<sup>18</sup> Eta Zacarías tò Skëköl biyöchökwak a ichaké:

—¿Ì wa be' ye' a ikkachëmi tò ttè e' dör moki? Ye' dör kékëpalatke. Ñies ye'

alaköl dewatke kéképalatke, ta ζwes sa' alala kòkamiia?

<sup>19</sup> Ie' iüté:

—Ye' dör Gabriel. Ye' kanéblöke Skököl a. Ie' ye' patké ttè buaë i' chök be' a. <sup>20</sup> Erë be' kè wä ye' ttè klöone, e' kueki be' ttò wöblërdawä kè ttöpaia dö mik be' alà kune etä. Mik i' chéyö be' a e' kèwö de, etä be' ttörane.

<sup>21</sup> E' dalewa ie'pa tso' Zacarias panuk u'rki, e'pa tó ibikeitsé, “ζi tó ie' wöklö'wé, e' kè dötsa bet Skököl wé a?” <sup>22</sup> Mik ie' dettsa, etä ie'pa tó isué tó ie' ttò wöblënewa, kè ie' ttoia ta ulä è wa ie' tó iwä kkaché ie'pa a. Etä ie'pa éna iane tó ilè suéitö kabsueie. Es ie' ate me'ie.

<sup>23</sup> Mik ie' kanè one Skököl wé a, etä imíane iu a. <sup>24</sup> E' ukuöki ta ie' alaköl Elisabet duneka. Ie' e' tkéwa iu a dö si' skel, kè dë'ttsa wëro. <sup>25</sup> Ie' tó iché, “Ikképa Skököl tó alà mé ye' a. Es ie' er buaë ché ye' a, ekké ye' jaëne.”

### Jesús kurke e' biyó yëne

<sup>26</sup> Elisabet duneka e' ki si' de teröl, etä Skököl tó ibiyöchökwak kiè Gabriel, e' patké Nazaret, ká e' ate Galilea. <sup>27</sup> Ee busi serke eköl kiè María. Ie' kam ser wëm ta, erë ie' ttè meule wëm eköl kiè José e' a senowä ie' ta. José dör blu' bak kiè David e' aleri eköl. <sup>28</sup> Etä Skököl biyöchökwak dewä wé María tkër ee, ta ichéitö ie' a:

—ζIs be' shkene? Skököl er buaë ché be' a. Ie' tso'ie be' ta.

<sup>29</sup> Ttè e' tó María tkiwéwä ta ibikeit-séitö, “ζIók ye' shké'wé es?” <sup>30</sup> Etä Skököl biyöchökwak tó iché ie' a:

—A María, Skököl er buaë ché be' a, e' kueki kè be' suanuk. <sup>31</sup> Be' durkaraë, be' alà kurdaë wák dör wëm, ikiè múkabö Jesús. <sup>32</sup> Ie' doraë kéké taië, dalò taië. Ie' kirdaë Skököl dör íyi ulitane tsata, e' Alà. Skököl tó ie' meraka blu'ie wes iyé bak

kiè David es <sup>33</sup> as Jacob aleripa wëttsütö blu'ie kekraë kè erta'wa.

<sup>34</sup> Etä María tó ichaké Skököl biyöchökwak a:

—Kam ye' ser wëm ta, etä ζwes i' ché be', e' wä tkömi ye' ta?

<sup>35</sup> Skököl biyöchökwak iüté:

—Wiköl Batser doraë be' ki, Skököl dör íyi ulitane tsata e' diché ardaë be' ki. E' kueki be' alà kurdaë, e' serdaë Skököl è a. Ie' kirdaë Skököl Alà. <sup>36</sup> Nies be' yami kiè Elisabet kéképalatke cheke tó kè idö-ta' alä, e' alà kurdaë. Si' i' wa ta ie' ki ide si' teröl. <sup>37</sup> I' kos or Skököl a, kè i' ku' darëre ie' a wè.

<sup>38</sup> Etä María tó iché:

—Ye' dör Skököl kanè méso, as ie' tó iü ye' ta wes be' iché es.

Etä Skököl biyöchökwak mía.

### María mía Elisabet pakök

<sup>39</sup> E' ukuöki ta María dali ié ta imía bet Elisabet pakök. Elisabet serke Judea ká dör kabataie ee. <sup>40</sup> Mik ie' dewä Zacarias u a, etä ie' tó Elisabet shké'wé. <sup>41</sup> Mik e' ttsé Elisabet tó, etä ilä wöti'ne taië ie' shua ta Wiköl Batser de iki taië. <sup>42</sup> Ie' ttémi darëreë ta ichéitö María a:

—Skököl er buaë ché be' a alakölpa ulitane tsata. Nies ie' er buaë ché be' alà kurmi e' a. <sup>43</sup> Ye' siarë ζwes e' a ie' er buaë ché tó ye' Kéképa mi e' de ye' pakök? <sup>44</sup> Mik be' tó ye' shké'wé e' ttsé yö, e' bet ta ye' alà wöti'ne ye' shua ittse'ne buaë e' kueki. <sup>45</sup> I' yé Skököl tó be' a, e' klö'wébö tó iwä tkóraë, e' kueki ayécha buaë be' dör.

<sup>46–49</sup> María tó iché:

“Ye' dör Skököl kanè méso esela siarë ese è,

erë e' ska' ie' er de.

E' kueki ie' kikekeka ye' tó.

Ie' dör ye' tsatkökwa, e' tó ye' ttsé'weke buaë.

Ie' diché taië íyi ulitane tsata, e' tó i' buaë shuteë wé ye' a.

E' kuëki i'tami ye' yërdaë: ¡Ayëcha buaë!  
¡Skëköl dör batse'r!

<sup>50</sup> Wépa tō ie' dalöieke, esepa suëke ie' tō  
këkraë er siarë wa.

<sup>51</sup> Ì kè or yi a ese wéitō idiché taië wa:

Pè' e' tsoëka taië esepa tō ì bikeitseke wè  
ese wökl'wéitō.

<sup>52</sup> Ká wökirpa uyéttsaitō ikulé ki,  
e' skéie s'siarëpa tkékaitō.

<sup>53</sup> Wépa siarë kè wa ì ku' nê,  
esepa a ì buaë méitō taië.

Erë inuköl blúpa esepa patkëmiitō ulà  
wöchka.

<sup>54</sup> Israel aleripa dör ie' kanë mésopa.

Ká iaiaë ie' tō ie'pa a iyë' tō ie' tō ie'pa  
sueraë er siarë wa.

Ttè e' kè chë'wa ie' éna.

<sup>55</sup> Es ie' tō iyë'bak Abraham a,  
ñies ie' aleripa kos daiä ie' itökü e'pa a.”  
Es María tō iché.

<sup>56</sup> María sené Elisabet ska' dō si' mañat  
ta imiane iu a.

### Juan S'wöskuökwak kune'

<sup>57</sup> Mik Elisabet alà kurke e' këwö de,  
eta iwà kune wëm. <sup>58</sup> Mik pè' serke tsinet  
ena iyamipa ekka, e'pa ibiyó tse tō Elis-  
abet sué Skëköl tō er siarë wa, eta ie'pa  
kos tse'ne buaë wës Elisabet es. <sup>59</sup> Mik  
ilà kune' e' ki ká de pàköl (8), eta ie'pa  
debitu ilà tottola kkuölit tërke tsir, e'  
këwö tkö'uk wës ie'pa wöblane es iwà  
kkachöie tō alà e' dör judiowak. Ie'pa éna  
iyé kiè Zacarías, e' kiè makka iki. <sup>60</sup> Erë  
imi tō iché:

—Au, ie' kirdaë Juan.

<sup>61</sup> Ie'pa tō iché:

—Kè yi ku' be' yamipa shua kiè es. Eta  
¿i kuëki be' ikiè mekeka es?

<sup>62</sup> Eta ie'pa ulà kkaché ichakoie alà  
yé a, “¿Ima be' éna ikiè makka?” <sup>63</sup> Eta  
iyé tō kaltak kié, e' ki ie' tō ishtë tō  
“ikiè Juan.” E' tō ie'pa kos tkiwëwä. <sup>64</sup> E'  
wöshä ta Zacarías ttékane, eta Skëköl  
kikéka ie' tō taië. <sup>65</sup> Pè' serke tsinet, e'pa  
kos tkirulune taië. Nies pè' kos serke

Judea kébata a, e'pa shua itté buneka  
taië. <sup>66</sup> Ie'pa ulitane tō itté tse e'pa tō  
ibikeitsé: “Alà e' dōraë këkëpa taië.”  
Ie'pa isuë tō Skëköl tso' ie' ta, e' kuëki  
ie'pa tō ibikeitsé es.

### Zacarías tō Skëköl kikéka

<sup>67</sup> Eta Wiköl Batse'r de taië Zacarías ki,  
e' wa ie' ttémi Skëköl ttekölöie ta ichéitō:

<sup>68</sup> “Skëköl dör Israel aleripa Këköl,

e' de ie' icha kos tsatök,

e' kuëki ikikökasö taië.

<sup>69</sup> Ie' tō S'tsatökkwak diché taië, e' patké  
eköl,

e' dör ie' kanë méso bak kiè David e' aleri.

<sup>70</sup> E' dör wës Skëköl ttekölpa batse'r

bak ká iaiaë e'pa tō iyë'at es.

<sup>71</sup> Skëköl tō iyë'atbak tō ie' tō se' tsatök-  
eraë s'bolökpa ulà a,

ñies wépa éna se' ar suluë esepa kos yöki.

<sup>72</sup> Ie' tō itté batse'r me' se' yépa bak ká  
iaiaë e'pa a

tō ie' se' sueraë er siarë wa,

e' kè ska' ie' er chë'wa.

<sup>73</sup> Ie' tō iyë' se' yé bak ká iaiaë kiè Abra-  
ham e' a

<sup>74</sup> tō se' tsatkeraëitō s'bolökpa ulà a

as se' ser ie' a kè suarta,

<sup>75</sup> ñies as se' ser batse'r ena yësyësë ie'  
wöa se' tso'ia tse'ka e' dalewa.

<sup>76</sup> A ye' bëbëla, mik be' de këchke,

eta be' miraë kewe s'pattök

as se' tō Skëköl kiöwä buaë mik ide eta.

E' kuëki be' kirdaë Skëköl dör íyi ulitane  
tsata, e' tteköl.

<sup>77</sup> Israel aleripa a be' tō ttè pakeraë

as ie'pa wä ijcher tō ì sulu wambleke  
ie'pa tō,

e' olo'yèmi Skëköl tō ie'pa ki itsatkoie.

<sup>78</sup> Skëköl tō se' suëke er siarë wa,

e' kuëki ie' tō S'tsatökkwak patkekebitu  
se' a datse ká jai a

olo ta' taië wës diwö tskir bla'mi es.

<sup>79</sup> Wépa tso' klöulewä ì sulu ulà a wës  
s'tso' stui a es,

wépa tso' iduökewatke e' è kinuk,

esepa wöa ká ñi'weraë ie' tō aš itsatkërdak.

Ie'pa wëttseraitō sene bèrë ie' ta e' ñalé ki."

Es Zacarías tō iché.

<sup>80</sup> Juan talane de këchke ta Wiköl Bats'e' tso' taië ie' a. Ie' sené ká wé kè yi serku' eë dö mik ikéwö de e' kkachoië Skëköl ttekölie Israel aleripa a eta.

### Jesús kune'

(Mateo 1.18-25)

**2** Juan kune', e' kéwö ska' ta, Roma wökir kibi kië Augusto, e' tō ká kos tso' ie' ulá a, e' wakpa kië shtök ké seraä. <sup>2</sup> (Ï dö'r s'kië tsá kite mik Cirenio dö'r ká kië Siria e' wökir e' kéwö ska' ta.) <sup>3</sup> Suli-tane kawötä shkökne ká wé iyëpa datse eë e' kië shtök.

<sup>4-5</sup> José dö'r David bak Israel blú e' aleri. David kune' Belén aṭe Judea eë. Erë José serke Nazaret aṭe Galilea eë. E' kuëki ie' mía María ta Belén e' kië shtök. Ie'pa ttë meuletke ñi a senowaie, erë kam ie'pa serwa ñita. María batsö dur. <sup>6</sup> Ie'pa tso' Belén, e' dalewa ie' alá kurke, e' diwö de. <sup>7</sup> Wé s'kapökerö, e' wé a, kè ká kuneia ie'pa a kapoie. E' kuëki ie'pa míyal iyiwak wé a kapökrö. Eta eë ie' alá tsá kune wák wëm, ipatrëwaitö datsi'tak batsi wa mékaitö iyiwak tioie ese kulé' a ka skéie.

### Skëköl biyöchökwakpa tō ttë buaë ché obeja kkö'nukwakpa a

<sup>8</sup> E' nañewe tsinet Belén obeja kkö'nukwakpa tso' iyyiwak kkö'nuk. <sup>9</sup> E' bet ta Skëköl biyöchökwak de eköl ie'pa ska' ta Skëköl olo taië e' olo buneka ie'pa pamik, e' yöki ie'pa suane taië. <sup>10</sup> Erë Skëköl biyöchökwak tō iché ie'pa a: "Kè a' suanuk, ttë buaë datse ye' wa a' a, e' tō pë' ulitane ttsë'weraë buaë. <sup>11</sup> Ìñe a' tsatkökwak kune David ká a, e' dö'r Skëkëpa pairine'bitu idi' wa a'

blúie e'. <sup>12</sup> A' tō ie' kueraë parratulewa datsi'tak batsi wa tër kulé' tso' iyyiwak tioie ese a. E' wa a' wa ijcher tō ì ché ye' tō a' a, e' dö'r moki."

<sup>13</sup> E' bet ta Skëköl biyöchökwakpa ki de taië shute, e' tō Skëköl kikekeka ta ichekerakitö:

<sup>14</sup> "iSkëköl tso' ká jai a, e' kikökasö!

ñies wépa a Skëköl er buaë chö as esepa ser bèrë ñita ká i' ki!"

<sup>15</sup> Mik Skëköl biyöchökwakpa míyalne ká jai a, eta obeja kkö'nukwakpa tō iché ñi a:

—Mishka Belén, ì ché Skëköl tō se' a, e' wá sauk.

<sup>16</sup> Eta ie'pa míyal bet, ta María ena José kuërakitö, ta iyëne tō alá àr iyyiwak tio kulé' a. <sup>17</sup> Mik ie'pa isué, eta ì kos ché Skëköl biyöchökwak tō ie'pa a alá e' ki, e' pakéne ie'pa tō itso'rak eë e'pa a. <sup>18</sup> Mik wépa tō, ì ché obeja kkö'nukwakpa, e' ttsé, eta e'pa kos tkirulune. <sup>19</sup> Ttë e' kos bleke María tō ier a ta ie' iwá bikeitseke è. <sup>20</sup> Eta obeja kkö'nukwakpa míyalne. Ì kos ttsé ie'pa tō, sué ie'pa tō, e' ki ie'pa tō Skëköl kikekarami.

### Alala Jesús tsémi Skëköl wé a

<sup>21</sup> Mik alala ki ká de paköl (8), eta ie'pa itóttola kkuölit téé tsir ta ikie mékarakitö Jesús wes Skëköl biyöchökwak iyé' María a kam ie' bukurka e' yöki es.

<sup>22</sup> Mik Jesús kune' e' ki ká de dabom tkëyök (40), eta María ena José mía e' batse'uk† wes ttë dalöiëno kit Moisés tō e' tō iché es. Ie'pa wa ilá mí mè Skëköl a Skëköl wé aṭe Jerusalén eë. <sup>23</sup> Skëköl ttë dalöiëno e' ki itso' kitule e' tō iché: "Alaköl alá tsá kune wëm, e' kir-daë batse'r Skëköl a." E' kuëki ie'pa wa ilá mí mè Skëköl a. <sup>24</sup> Ñies ie'pa mía iyyiwak muk jché Skëköl a e' batse'woie wes Skëköl ttë dalöiëno tō iché es: e' dö'r dü

†2:22 e' batse'uk: E' batse'wè ì e' kè dö'r wes se' bribriwak e' batse'ù es awá wa ì wa.

kiè tórtola, et wěñe ena et alaki ö nuböl pupula böt.

<sup>25</sup> E' kěwö ska' tã wēm serke Jerusalén kiè Simeón. Ie' serke yěsyēsē wēs Skėköl kĭ ikiane es. Skėköl tō Israel aleripa tsatkeke e' kěwö paneke ie' tō. Wiköl Bats'e'r tso' ie' a, <sup>26</sup> e' tō ie' a iyē': "be' kě blěrpawā kam be' tō wě pairine'bitu idi' wa a' blúie patkeraē Skėköl tō e' saü' u' yökĭ." <sup>27</sup> Ie' ittse Wiköl Bats'e'r wa tō ie' kawōtã shkök Skėköl wé a, e' kuękĭ ie' mĭa demi ee. Eę ñies José ena María demi. Ie'pa wã ilala Jesús mĭ wakanewē wēs Moisés ttē dalöiēno tō ichē es. <sup>28</sup> Simeón tō alala kėka ulã a tã Skėköl kĭkėkaitō tã ichėitō:

<sup>29</sup> "A Skėköl, ye' dör be' kanē méso, ì yē' be' tō ye' a, e' wã suéyō. E' kuękĭ ire', ye' duōwami bērē.

<sup>30</sup> Sa' tsatkökwak patké be' tō e' wã suėi-ayō ye' wák wōbla wa.

<sup>31</sup> E' patké be' tō kã ulitane wakpa a.

<sup>32</sup> Ie' dōraē wēs kã olo es, pē' kē dör judiowak esepa er ñi'woie as ie'pa éna be' ttē mokĭē e' wã ar.

Ñies Israel aleripa dör be' icha, e'pa kĭkardakã taijē ie' batamik."

Es Simeón tō ichē.

<sup>33</sup> Jesús ché Simeón tō Skėköl a, e' tō Jesús mĭ ena iyē tkiwēwã. <sup>34</sup> Ie' tō ikié Skėköl a as e' er buaē chō ie'pa a tã ichėitō María dör Jesús mĭ e' a:

—Skėköl ibikeitsbak tō alã i' kuękĭ se' Israel aleripa taijē tsatkērdaē ñies e'pa taijē weirdaē. Ie' tō Skėköl olo kkacheraē se' a, erē taijē pē' tō ie' waterattsã. <sup>35</sup> E' tō ì bikeitsekēsō e' wã kkacheraē. Be' er a idalērdaē taijē wēs tabē tiēwã be' wák er a es.

<sup>36-38</sup> E' wōshã tã alaköl debitũ eköl ie'pa ska' kiè Ana, e' dör Skėköl tteköl. Ie' yé kiè Fanuel, e' dör Aser aleri. Ie' dör kėkėpalatke. Ie' sene'wã mik iĭã busi etã. Ie' sene' wēm e' tã duas kul (7) è tã iwēm blėnewã. Ie' schönewã e' kĭ

duas de dabom paryök kĭ tkěl (84). Ie' serkeie Skėköl wé a idalöiök ñiē nañēē S'yé tã ttē wa ena batsē wa. Ie' tō wěstela chėmi Skėköl a alala Jesús kuękĭ. Ñies ipakėitō taijē Israel aleripa malepa tso' it-satkē panuk esepa a.

### José ena María míyalne Nazaret

<sup>39</sup> Mik José ena María e'pa tō ì kos kanewē wēs Skėköl ttē dalöiēno tō ichē es, etã ie'pa míyalne Nazaret atē Galilea ee, e' dör iwakpa kã. <sup>40</sup> Alala talar è, e' tso' buaē, ñies ie' yörke buaē, ikăbikēit-sōke taijē tã Skėköl er buaē chōke ie' a.

### Jesús atē Skėköl wé a

<sup>41</sup> Duas bit tã Jesús mĭ ena iyē mĭ'ke Jerusalén Judiowak Yépa Yėru-lune Egipto e' kěwö tkō'uk. <sup>42</sup> Mik Jesús kĭ duas de dabom eyök kĭ bök (12), etã ie'pa míyal kawō e' skã tkō'uk wēs ie'pa wōblar es. <sup>43</sup> Mik ikėwō tka, etã ie'pa míyalne iu a, erē Jesús atē Jerusalén, e' kē jcher imĭ wã iyē wã. <sup>44</sup> Ie'pa tō ibikeitsé tō ie' dami iyamipa tã. Ie'pa shké kã et tã ie'pa isué tō Jesús kē ku' ie'pa tã. E' kuękĭ ie'pa iyulėmi iyamipa dami taijē e'pa shuã. <sup>45</sup> Erē ie'pa kē wã ie' kune, e' kuękĭ ie'pa mĭane Jerusalén iyulökne.

<sup>46</sup> Kã de böiki es, etã ie'pa tō Jesús kué Skėköl wé a. Ie' tkēr s'wōbla'uk ttē dalöiēno wa wakpa shuã ikĭttsök ena ichakök. <sup>47</sup> Jesús tō iĭuteke e' ttsé ie'pa kos tō e'pa wōkrarulune ittšök ena isaük tō wēs ie' wã ĩyi jcher taijē. <sup>48</sup> Mik imĭ ena iyē tō ie' sué ee, etã ie'pa tkinewã. Etã imĭ tō iché iã:

—A alã, ĩlók be' e' wamblé sa' tã es? ĩlók be' tō be' yé ena ye' eriwã ekkē? Sa' be' yulē taijē.

<sup>49</sup> Jesús tō ie'pa iüté:

—ĩlók a' ye' yulē taijē? ĩWēs a' kē wã ijcher tō a' ye' kueraē ye' Yé u a?

<sup>50</sup> Erē ì ché ie' tō, e' wã kē ane ie'pa éna.

<sup>51</sup> Età imíane ie'pa tã Nazaret tã ie' tò ie'pa ttò iuteke buaè kékraë. E' kos bleke imì tò ie' er a. <sup>52</sup> Jesús talarke buaè, ñies ie' kî yörke taië, kabikeitsöke buaè, wër buaè Skëköl wa, ñies s'ditsö wa.

### Juan S'wöskuökwa

(Mateo 3.1-12; Marcos 1.1-8; Juan 1.19-28)

**3**<sup>1-2</sup> Ká et tã Skëköl tté Juan dör Zacarías alà e' tã wé kè yi serku' eë ipatkoie ittè pakök. E' kèwö ska' tã wëm kiè Tiberio e' dör Roma wökir kibi. Ie' tkënekã ká e' wökirie, e' kî duas de dabom eyök kî skel (15). Ie' dikia ká tsitsirpa wökirpa tso'. E'pa kiè dör i' es: Poncio Pilato dör Judea wökir, Herodes dör Galilea wökir, e' ël kiè Felipe e' dör Iturea ena Traconítide e' wökir ena Lisania dör Abilinia wökir. E' kèwö ska' tã Anás ena Caifás e'pa dör judiowak sacerdotepa wökirpa. E' kèwö ska' tã Skëköl tté Juan tã ká sir poë wé kè yi serku' eë. <sup>3</sup> Etã Juan mía di' kiè Jordán kkömik pë serke eë, e'pa a Skëköl tté pakök. Ie' tò iché ie'pa a: "A' er mane'ú Skëköl a as a nuì olo'yòitö a' kî tã a' e' wöskuólor iwà kkachöie." <sup>4</sup> Isaías dör Skëköl tteköl e' tò Juan tté kit ká iaiaë Skëköl yëkkuö kî, e' tò iché:

"Ká sir poë wé kè yi serku', eë yile ttöraë aneule, e' tò icheraë:

'A' er mane'ú Skëköl datse e' yöki, e' dör wës ñala yuèsö yësyèsé ie' yöki es.

<sup>5</sup> Káblë kos kawötã wà ièka seraa, ñies kabata ena kakuö kos kawötã wë ñikkëë,

ñala shkuli'shkuli', e' kos kawötã yëttsa yësyèsé,

ñies ñala suluë, e' kos kawötã paiklëttsa buaë.

<sup>6</sup> Skëköl tò s'tsatkè, e' suëraë sulitane tö."<sup>†</sup>

Es Isaías iyë'.

<sup>7</sup> Pë debitu taië Juan ska' as ie' tò ie'pa wöskuö tã ie' tò ie'pa a iché: "¡A' dör s'kitö'ukwakpa suluë wës tkabè es! ¿Yi tò a' a iché tò a' tkömishkar Skëköl tò a' we'ikeraë siarë e' ulà a? <sup>8</sup> A' senú yësyèsé, e' wa iwërmiwã tò moki a' er mane'wétke Skëköl a. Kè a' tò ibikeitsök tò a' dör Abraham aleripa e' è kueki Skëköl kè tò a' we'ikepa. Ye' tò a' a iché tò Skëköl kî ikiane, e' ta ie' tò ák ikkè yuèmi Abraham aleripaie. <sup>9</sup> Ie' dör wës kal bikökwa es. Ie' tso'tke kal ulitane kè wörtã ese kos bikökök ña'wëwa bö' a."

<sup>10</sup> Etã ie'pa tò Juan a ichaké:

—¿E'ma i wëmi sa' tò?

<sup>11</sup> Ie' tò ie'pa iüté:

—Yi wã datsi' tso' böt, e' etka mú wé kè wã itã' ese a. Es ñies yi wã chkè tso', ese tò chkè kaku' wé kè wã itã' ese a.

<sup>12</sup> Inuköl shtökwaipa Roma wökirpa a, e'pa welepa debitu Juan ska' as ie' tò ie'pa wöskuö, ie'pa tò ie' a ichaké:

—A' s'wöbla'ukwak, ¿i wëmi sa' tò?

<sup>13</sup> Ie' tò ie'pa iüté:

—Kè a' tò inuköl shtök kos ikawötã shtë e' tsata.

<sup>14</sup> Ñies ñippökwaipa welepa ie' a ichaké:

—Ñe' tã ¿i wëmi sa' tò?

Ie' tò ie'pa iüté:

—Kè a' s'pauñuk inuköl yottsaië. Kè a' kachök s'ña'woie. Kos a' patörke, ekkè è klö'ú, tã a' ttsë'nú buaë iwa.

<sup>15</sup> Wé pairine'bitu idi' wa s'blúie e' datske bet, e' wã panuk sulitane tso'. E' kueki ie'pa tso' ibikeitsök tò isalema Juan dör e'.

<sup>16</sup> Erë Juan tò iché ie'pa ulitane a: "Moki ye' a' wöskueke di' wa. Erë ye' itöki idatse eköl, e' tò a' ierawa Wiköl Batse'r a ena bö' a. Ie' dör këkëpa taië ye' tsata, e' kueki ie' klökkuö kicha è kè wöt-sënanuk ye' siarla e' a. <sup>17</sup> Ie' tò se' wöperaë wës iyiwö wöppè es. Ibu'a'bu'a' bler-

<sup>†</sup>3:6 Isaías 40.3-5

aëitò idichakuò a, erë isulusi uyerawaitò bö' kè wöitta'wa e' a.”

<sup>18</sup> Es Juan ie'pa patté ttè ese wa taië. Es ie' tò S'tsatkòkwak ttè buaë e' pakeke ie'pa a. <sup>19</sup> Nies Juan tò Herodes dör Judea wökir, e' uñé. Herodes serke ie' wák ël e' alaköl kiè Herodías e' ta. Nies ie' tò i sulu skà wamblé taië. E' kuekij Juan ie' uñé. <sup>20</sup> Herodes tò i sulu wamblé taië, erë e' kjié ta ie' tò Juan wötökwa patké s'woto wé a.

### Jesús wösune

(Mateo 3.13-17; Marcos 1.9-11)

<sup>21</sup> Mik Juan bak sulitane wöskuök, eta nies ie' tò Jesús wöskué. Mik Jesús tso'ia ttök S'yé ta, e' dalewa ká jai kköbunane <sup>22</sup> ta Wiköl Batse'r de ie' ki wër nuböl sù. Eta ttò tssene ká jai a, e' tò iché:

—Be' dör ye' alà dalër taië ye' éna, e' wër ye' wa buaë shute.

### Jesús yépa bak e'pa kiè

(Mateo 1.1-17)

<sup>23</sup> Mik Jesús ki duas de dabom mañayök (30) ulatök, eta ie' tò Skököl ttè pakémitke. Ie'pa tò ibikeitsé tò ie' dör José alà. José dör Elí alà<sup>f</sup>, <sup>24</sup> e' dör Matat alà, e' dör Leví alà, e' dör Melquí alà, e' dör Janai alà, e' dör José alà, <sup>25</sup> e' dör Matatías alà, e' dör Amós alà, e' dör Nahúm alà, e' dör Eslí alà, e' dör Nagai alà, <sup>26</sup> e' dör Máhat alà, e' dör Matatías alà, e' dör Semeí alà, e' dör Josec alà, e' dör Judá alà, <sup>27</sup> e' dör Johanán alà, e' dör Resá alà, e' dör Zorobabel alà, e' dör Salatiel alà, e' dör Nerí alà, <sup>28</sup> e' dör Melquí alà, e' dör Adi alà, e' dör Cosam alà, e' dör Elmadam alà, e' dör Er alà, <sup>29</sup> e' dör Josué alà. e' dör Eliézer alà, e' dör Jorim alà, e' dör Matat alà, <sup>30</sup> e' dör Leví alà, e' dör Simeón alà, e' dör Judá alà, e' dör José alà, e' dör Jonam alà, e'

dör Eliaquim alà, <sup>31</sup> e' dör Melea alà, e' dör Mená alà, e' dör Matatá alà, e' dör Natán alà, <sup>32</sup> e' dör David alà, e' dör Jesé alà, e' dör Obed alà, e' dör Booz alà, e' dör Sélah alà, e' dör Nahasón alà, <sup>33</sup> e' dör Aminadab alà, e' dör Admín alà, e' dör Arni alà, e' dör Esrom alà, e' dör Fares alà, e' dör Judá alà, <sup>34</sup> e' dör Jacob alà, e' dör Isaac alà, e' dör Abraham alà, e' dör Térach alà, e' dör Nahor alà, <sup>35</sup> e' dör Serug alà, e' dör Ragau alà, e' dör Péleg alà, e' dör Heber alà, e' dör Sélah alà, <sup>36</sup> e' dör Cainán alà, e' dör Arfaxad alà, e' dör Sem alà, e' dör Noé alà, e' dör Lámeç alà, <sup>37</sup> e' dör Matusalén alà, e' dör Enoc alà, e' dör Jéred alà, e' dör Mahalalel alà, e' dör Cainán alà, <sup>38</sup> e' dör Enós alà, e' dör Set alà, e' dör Adán alà. Adán dör Skököl alà.

### Bé tò Jesús erkiöwé

(Mateo 4.1-11; Marcos 1.12-13)

**4** Jesús tso' Jordán di kkömik, ie' a taië Wiköl Batse'r tso'. E' tò ie' tsémi ká sir poë wé kè yi serku' ee. <sup>2</sup> Ee ie' sené doka ká dabom tkéyök (40), e' dalewa bé tso' ie' erkiöuk i sulu wamblök. E' kéwö kos ta ie' kè chkane yës, e' ukuöki ta ie' dué bli wa. <sup>3</sup> Eta bé tò ie' a iché:

—Be' dör Skököl Alà, e'ma ichó ák se a tò iyónú chkeie.

<sup>4</sup> Jesús tò iüté:

—Skököl yékkuò tò ichè: “Kè se' senuk chké è mik.”<sup>8</sup>

<sup>5</sup> E' ukuöki ta bé tò ie' tsémi kabata kakkeë a, ta ee ká kos wes ká tköke ekké kkachéitò ia bet. <sup>6</sup> Ie' tò iché ia:

—Ká kos suébö e' meule ye' ulà a, e' kuekij yi a ye' éna imak, ese a ye' imeke. Ye' be' yuèmi ká kos e' blúie. Nies íyi buaë tso', inuköl tso', i tso' ká ulitane ki, e' kos wákie be' yuèmi ye' tò. <sup>7</sup> Be' e'

<sup>f</sup>3:23 Kiè ikképa kos dör wépa è kiè.

§4:4 Deuteronomio 8.3



tkéwā kuchewō kī ye' wōrkī ye' dalōiök, e' tā e' kōs dōraē be' ulā a.

<sup>8</sup> Erē Jesús ie' iūtē:

—Skököl yēkkuō tō ichē: 'Skököl dōr a' Kēköl, e' è dalōiō, ie' è a' a' senú.'\*\* E' kuekī be' e' skōttsa ye' yōkī bānet.

<sup>9-11</sup> E' ukuōkī tā bé wā imítser Jerusalén tā iduékaitō Skököl wé e' bata kī kakkeē tā ichéitō iā:

—Skököl yēkkuō tō ichē:

'Skököl tō ibiyōchōkwakpa patkeraē be' kkō'nuk be' tsātkök.

Ie'pa be' klō'werakā iulā a as be' klō kē tērwa ak kī.<sup>††</sup>

Es Skököl yēkkuō tō ichē, e' kuekī be' dōr Skököl Alā, e'ma be' e' ppōōmi dōttsa iski.

<sup>12</sup> Erē Jesús iūtē:

—Ñies Skököl yēkkuō tō ichē: 'A' kē kawō tā' a' Kēköl wōtsiriuk.<sup>‡‡</sup>

<sup>13</sup> Mik bé kē wā i skā kune Jesús erk-iōwoie, etā ie' iméat dō iētōkicha.

### Jesús dene Galilea

(Mateo 4.12-17; Marcos 1.14-15)

<sup>14</sup> Jesús mineā dene Galilea. Kēkraē Wiköl Bats'e'r diché tso' ie' a' taiē. Ie' tté bunekā ká e' kōs a. <sup>15</sup> Judiowak nī dapa'wō wé kōs tso', e' a' ie' tō s'wōbla'wēke Skököl ttē wa tā sulitane tō ie' kīkekekā buaē.

### Nazaret wakpa tō Jesús uyéttsa iká kī

(Mateo 13.53-58; Marcos 6.1-6)

<sup>16</sup> Jesús demine Nazaret wé ie' talane eē. Mik judiowak eno diwō de, etā ie' de-wā ie'pa nī dapa'wō wé a wēs ie' wōblane es. Etā eē ie' e' duéser Skököl yēkkuō arit-sök ie'pa tso' eē, e'pa kukua. <sup>17</sup> Yēkkuō kit Skököl tteköl kiē Isaías e' tō, e' mé ie'pa tō ie' a' suē. Ie' ishuppée tā ikuéitō

wé Skököl kanē méso bua'iewā e' tté tso' kitule eē. E' tō ichē i' es:

<sup>18</sup> "Skököl Wiköl tō ye' pairi'bitū idi' wa ttē buaē pakoie s'siarēpa a, e' kuekī ie' tso' ye' a.

Ie' tō ye' patkē'bitū ichök s'tso' klōulewā i sulu ulā a esepa a tō 'a' yērdattsa.'

Ie' tō ye' patkē'bitū wēpa wōbla kē wawēr esepa wōbla bua'ukne.

Ie' tō ye' patkē'bitū wēpa weirke siarē s'sulusipa ulā a, esepa tsātkök.

<sup>19</sup> Ie' tō ye' patkē'bitū ipakök sulitane a tō Skököl er buaē chōke se' a, e' kēwō detke."<sup>¶¶</sup>

<sup>20</sup> E' ukuōkī tā Jesús tō yēkkuō wōtrēwane mé judiowak nī dapa'wō wé e' kīmukwak a, tā ie' tkéser iwā pakök. Kōs s'daparke eē e'pa tō ie' suēwā krereē. <sup>21</sup> Etā ie' tō ichē ie'pa a:

—Skököl yēkkuō aritśe ye' tō ñe', e' wā tka i' tā.

<sup>22</sup> Ie'pa ulitane tō icheke ie' dōr pē' buaē. Ñies ttē bua'buāē chekeitō, e' tō sulitane tkiwēwā. Ie'pa tō ichē nī a:

—A'ka, ¿ie' kē dōr José alā?

<sup>23</sup> Ie' tō iūtē:

—Ye' wā ijcher buaē a' tō ye' cheraē ttē i' wa: 'A' s'kapeyōkwak, be' wák e' bua'úne.' Ñies a' tō ye' a' icheraē: 'Sa' ittśé tō i' kē or yi a ese wé taiē be' tō Cafarnaúm, ese ú ñies íe be' wák ká a.'

<sup>24</sup> Ie' tō ikí ché ie'pa a:

—Mokī ye' a' a' ichē tō Skököl ttekōlpa kōs kē dalōiērtā' iwakpa ká kī. <sup>25</sup> Mokī ye' a' a' ichē tō mik Skököl tteköl kiē Elías bak, etā kaļi kē yēne yēs dōka duas mañal kī shābōts tā bli bak poē Israel. E' kēwō ska' tā alakōlpa schōpa tso' taiē Israel, <sup>26</sup> erē Skököl kē wā Elías patkēne ie'pa ska' ikīmukrak. Ie' tō Elías patkē alakōl dōr schō ekōl serke Sarepta, ká e'

\*\* 4:8 Deuteronomio 6.13

†† 4:9-11 Salmo 91.11-12

‡‡ 4:12 Deuteronomio 6.16

¶¶ 4:19 Isaías 61.1-2

atɛ tsinet Sidón, e' kimuk. <sup>27</sup> Es ñies mik Skëköl tteköl kiè Eliseo e' bak, e' kɛwö ska' ta lepra tö s'teke taijê Israel. Erê ie'pa kos kè buaone. Wëm kiè Naamán dör ká kiè Siria e' wak, e' è buaone Eliseo tö Skëköl batamik.

<sup>28</sup> Mik ie'pa tö ttè e' ttsé, etá ie'pa kos tso' judiowak ñi dapa'wo wé a, e'pa uluneká taijê ie' ki. <sup>29</sup> Ie'pa iëneká ie' ki ta iuyétsarakitö ká e' a bánet. Ká e' tso' kábata kákkéè e' ki, ie'pa wa ie' mítser dô katte kákkéè e' kkömik batrèemi as iduöwa. <sup>30</sup> Erê ie' tkami ie'pa shua ta imía.

### Wëm eköl a aknama tso' e' bua'wéne Jesús tö

(Marcos 1.21-28)

<sup>31</sup> Jesús míá Cafarnaúm, ká e' atɛ Galilea. Eno diwö bit ekké ta ie' tö s'wöbla'weke judiowak ñi dapa'wo wé a.

<sup>32</sup> Ie' tö s'wöbla'weke ttè mokí diché ta' taijê ese wa, e' kuekí ie'pa tkinewa.

<sup>33</sup> Ká et ta ie'pa ñi dapa'wo wé a wëm dur eköl e' a aknama ö wimblu sulusi tso', ie' tö iché aneule:

<sup>34</sup> —A Jesús Nazaret wak, sa' múat bèrè. ¿Iie be' tso' sa' tsiriuk? ¿Be' debitu sa' eukwa? Ye' wa be' suule. Ye' wa ijcher tö yi be' dör. Be' dör batse'r patkè'bitu Skëköl tö e'.

<sup>35</sup> Jesús tö aknama e' uné:

—¡Be' siwa'blówa, be' e' yótsa wëm se a!

Etá aknama tö wëm e' éró iski sulitane wörki, ta ie' e' yétsa ia kè wa wes wëm one. <sup>36</sup> Sulitane tkinewa iweblök ta ñi chakérak:

—¿Ttè wése dör ñe'? Ttè diché ta' taijê e' wa wëm wí wimblupa sulusi kè e' yöktsa ta ie' yélur je'.

<sup>37</sup> Etá Jesús tté buneká taijê ká e' kos a.

### Jesús tö Simón yàk bua'wéne

(Mateo 8.14-15; Marcos 1.29-31)

<sup>38</sup> Jesús e' yétsa judiowak ñi dapa'wo wé a ta imía Simón u a. Eɛ Simón yàk kiri'weke duè dalölö tö taijê. Ie'pa kköché Jesús a tö ibua'üne. <sup>39</sup> Etá Jesús e' wöéwa ie' ki ta duè dalölö unéitö ta ibuanene. E' bet ta ie' e' kéká ta ilè yulémiitö ie'pa a ñè.

### Jesús tö s'kirirke taijê esepa bua'wéne

(Mateo 8.16-17; Marcos 1.32-34)

<sup>40</sup> Diwö mi'kewatke ta taijê pè' wa iyamipa kiri'weke duè tsakié tö, esepa debitu taijê Jesús ska'. Ie' ulá méka ie'pa kirirke kos ki eköl eköl, ta es ie' tö ibua'wenerak seraa. <sup>41</sup> Ñies e' shua taijê s'tso' tteke aknamapa tö. Mik ie' tö ie'pa bua'wéne, etá aknama e' yélur ie'pa a ta aknamapa tö iché ie' a aneule:

—¡Be' dör Skëköl Alà chökke!

Erê ie' tö ie'pa uné. Ie'pa wa ijcher tö ie' dör wé pairine'bitu idi' wa s'blúie e'. E' kuekí kè ie' wa ie'pa kàne ttök.

### Jesús tö Skëköl ttè paké judiowak ñi dapa'wo wé kos a

(Marcos 1.35-39)

<sup>42</sup> Bule es ká ñine ta Jesús e' yétsa míá bánet wé kè yi ku' ese ska'. Erê ie'pa tö ie' yulé. Mik ie'pa tö ikué, etá ie'pa tö ima'wé wöklö'wé as kè imi'. <sup>43</sup> Erê ie' tö ie'pa iuté:

—Ì blúie Skëköl tso' e' tté buaé pakök ye' kawöta ñies judiowak serke ká malepa a esepa a, eseie ye' patkè'bitu.

<sup>44</sup> E' kuekí ie' míá ttè pakök judiowak ñi dapa'wo wé tso' taijê Judea e' a.

### Jesús ttò wa nima klöne taijê

(Mateo 4.18-22; Marcos 1.16-20)

**5** Etökicha ta Jesús dur s'wöbla'uk batsöri kiè Genesaret e' kkömik (batsöri e' kiè ñies Galilea). Taijê pè' dapane ie' ska' Skëköl ttè pakekeitö e' kïttsök, e' kè

wa ie' shkoia. <sup>2</sup>Nima klö'ukwakpa dene tso' ikla' skuök, e'pa kanò àr bötö, e' sué Jesús tö. <sup>3</sup>Ta ie' e' iéka kanò etö a, e' dör Simón kanò. Ie' tö ikié Simón a: "Be' we'ikéyö, kanò patkómi béré wöwík." Ie' e' tkéser kanò a ta ie'pa wöbla'wéitö. <sup>4</sup>Mik ie' s'wöbla'wé one, eta ie' tö iché Simón a:

—Kanò patkóumi di' shua ta a' tö kla' uyómi nima klö'woie.

<sup>5</sup>Simón tö ie' iuté:

—A s'wöbla'ukwak, nañeë sa' ima'wé, eré kè sa' wa iwà klöne yës. Eré be' ttö wa ye' tö kla' uyekene.

<sup>6</sup>Mik ie'pa tö ikla' uyémi ta iwà klö'wérakitö tajë, e' tö kla' batseeketke.

<sup>7</sup>Ta iulà kkaché iyamipa tso' kanò etö a e'pa a tö a' shkó sa' kímuk. Iyamipa debitu ie'pa kímuk ta kanò bötö wà iérakitö chié, tsir eta kanò woturkewatke di' a. <sup>8</sup>Mik e' sué Simón Pedro tö, eta ie' e' tkéwa kuché kī Jesús klö' ska' ta ichéitö ia:

—¡A Skékëpa, ye' dör pë' sulusi, be' e' skóttsa ye' yöki!

<sup>9</sup>Nima klöne tajë, e' tö Simón Pedro ena iyamipa kos tso' ie' ta, e'pa tkiwéwa tajë, e' kuëki ie' tö iché es. <sup>10</sup>Nies Santiago ena Juan dör Zebedeo ala'r e'pa tkirulune. Ie'pa kanëblöke Simón ta nima klö'uk. Eta Jesús tö iché Simón a:

—Kè be' suanuk. Be' kè tö nima klö'wëpaia. I' tami be' wa s'ditsö bituraë ye' ska'.

<sup>11</sup>Eta ie'pa tö kanò ikléka, ta íyi kos tuléat ie'pa tö eë ta imiyal Jesús ta.

## Wëm eköl kiri'weke lepra tö e' bua'wéne Jesús tö

(Mateo 8.1-4; Marcos 1.40-45)

<sup>12</sup>Etökicha ta Jesús tso' Judea ké et a. Eta eë wëm debitu eköl kiri'weke lepra<sup>§§</sup> tö. Mik ie' tö Jesús sué, eta ie' wöéwa dö iski ta ikköché tajë Jesús a:

—A kékëpa, be' kī ikiane, e' ta be' a ye' buarmine as ye' batse'rne.

<sup>13</sup>Jesús tö ikéwa ulà wa ta ichéitö ia:

—Tó, ye' kī ikiane. Be' dene batse'r.

E' wösha ta ie' buanene, kè kī lepra ku'ia. <sup>14</sup>Eta Jesús tö ie' a iché:

—Kè ichar yi a. Be' yú e' kkachök sacerdote a. Ì muk Moisés tö a' ka' e' batse'woie, ese tsúmi mè Skéköl a ie'pa a ikkachoie.

<sup>15</sup>Eré Jesús tté tineka tajë shutë. Tajë pë' döke ie' ska' ie' tté kīttsök, ñies as ie' tö ie'pa bua'üne. <sup>16</sup>Eré tajë ie' mi'ke bánet ttök S'yé ta wé kè yi ku' ese ska'.

## Jesús tö wëm eköl kraulewa e' bua'wéne

(Mateo 9.1-8; Marcos 2.1-12)

<sup>17</sup>Etökicha ta Jesús tso' s'wöbla'uk ta eë fariseowakpa ena s'wöbla'uk tté dalöiëno wa wakpa tulur Jesús tso' s'wöbla'uk e' kīttsök. Ie'pa datse ká kos tso' Galilea ñies Judea ena Jerusalén. Jesús wa Skéköl diché tso' s'kirirke ese bua'wone. <sup>18</sup>Eta wëpa wëlepa debitu e'pa wa wëm kraulewa debitu eköl ka'la kī. Ie'pa éna iduë tsakmi u shua wé Jesús dur eë as ie' tö ibua'üne. <sup>19</sup>Eré tajë s'tso', e' kuëki ie'pa kè a itkömi wes u shua. E' kuëki ie'pa mīka u bata kī\* tö u jchéé ta iduë émirakitö enaë döttsa iski wé Jesús dur pë' tso' tajë e' shua eë. <sup>20</sup>Mik Jesús

§§5:12 **lepra**: E' dör duë s'méwöie ese. Judiowak tö iklö'wé tö duë e' tö yi teke ese dör ñá. Esepa batsetkettsa bánet kè a kawö ta' senuk pë' malepa shua. Nies ie'pa kè a kawö ta' shkowa Skéköl wé a.

\*5:19 u **bata kī**: Ie'pa u kè dör wes se' bribriwak u es. Ie'pa u tsabata dör kkuëie klökata ta'.

tö isué tö mokí ie'pa erblé ie' mik, etá ie' tö iché wëm kirirke e' a:

—A yami, ì sulu kos wamblébö, e' nuí olone be' kí.

<sup>21</sup> Etá s'wöbla'uk ttè dalöiëno wa wakpa ena fariseowakpa tö ibikeitsè: “¿Ima wëm wí erbikò tö ie' dör yi e' tö Skëköl ché suluë es? Skëköl è a se' nuí olo'yarmi.”

<sup>22</sup> Erë ì bikeitsök ie'pa tso' e' suéwa Jesús tö bet. E' kuëki ie' tö ie'pa a ichaké:

—¿Ì kuëki a' ibikeitseke es? <sup>23</sup> Ye' tö wëm i' bua'wëmine as ishköne, e' ta ç wes a' tö iklö'wëmi tö ye' kè a inuü oloyanuk iki? <sup>24</sup> Ye' dör S'ditsö Alà, sù e' tö a' a ikkachè tö ye' wa kawö ta' ká i' a nuü olo'yoie.

Etá ie' tö iché wëm kraulewa e' a:

—Be' e' kóka, be' ka'la kóka ta' be' yúne u a.

<sup>25</sup> E' wöshá ta' ie' e' kéká sulitane wörki ta' ka'la a ie' debitu, e' kékaitö ta' imíane iu a Skëköl kikekaramiitö taijé. <sup>26</sup> Ie'pa wökrarulune iweblök ta' Skëköl kikekarakitö taijé. Ie'pa suane ta' ichéitörak:

—Ì sué se' tö ì'ne, e' kè sùle se' wa yës.

### Jesús tö Leví kié ittökataie

(Mateo 9.9-13; Marcos 2.13-17)

<sup>27</sup> E' ukuökí ta' Jesús míá, e' tö wëm sué eköl kié Leví, e' dör inuköl shtökwak Roma wökirpa a. Ie' tkër ikaneblöke e' wé a. Ta' Jesús tö ie' a iché:

—Be' shkó ye' ta' ye' ttökataie.

<sup>28</sup> Etá Leví e' kéká tö ì kos méat ta' imía Jesús ta'.

<sup>29</sup> E' tsáli ta' Leví tö ikéwö tkö'wé buaë chké wa di'yè wa Jesús dalöioie. Inuköl shtökwakpa de taijé. Nies pè' kuá'kípa de, e'pa tulur chkök Jesús ena ittökatapa ta'.

<sup>30</sup> Mik fariseowakpa ena s'wöbla'uk ttè dalöiëno wa wakpa tö isué, etá ie'pa tö ichémi Jesús ttökatapa a:

—¿Íók a' chköke di' yöke inuköl shtökwakpa ta' ena pè' sulusipa malepa ta'?

<sup>31</sup> Jesús tö ie'pa iuté:

—Wépa kè kirirku' esepa kè kí s'kapeyökwak kiane. Erë wépa kirirke esepa kí s'kapeyökwak kiane. <sup>32</sup> Ye' kè dë'bitu wépa e' bikeitsò tö iserke yësyësé esepa kiök. Ye' dë'bitu pè' sulusipa kiök as ie'pa er mane'ü.

### Ì kuëki Jesús ttökatapa kè batsöta'

(Mateo 9.14-17; Marcos 2.18-22)

<sup>33</sup> Judiopa wökirpa welepa tö iché Jesús a:

—Juan S'wöskuökwak ttökatapa batsöke taijé, ttöke S'yé ta' taijé, wes fariseowakpa klépa tö iweke es, erë be' ichapa chköke ena di'yöke kekraë kè batsöta'.

<sup>34</sup> Jesús tö ie'pa iuté:

—Mik s'kiule ulabatsè kéwö tkö'uk ta' ç wes ie'pa batsömi wëm ulabatske ese tso'ia' ie'pa ta' e' dalewa? <sup>35</sup> Erë ikéwö döraë etá ie' mi'datser ie'pa yöki. E' je' ta' ie'pa batsöraë.

<sup>36</sup> Nies Jesús tö ie'pa wöbla'wé tö judiowak ttè kéchke e' kè shüturpaká ie' ttè pa'alí ta. E' kleéitö ttè i' wa:

—Kè yi tö datsi' pa'alí tak teepa bat-sëwa datsi' kéchke wöyuowaie. Iwésö es, e' ta' e' tö datsi' pa'alí we'ikéwa, nies itak pa'alí kè mène buaë datsi' kéchke kí. <sup>37</sup> Nies vino pa'alí kè terta'ka' iyiwak kkuölit yöule ibloie ese kéchke a. Itékasö es, e' ta' mik ibacha'nebitu, etá ikkuölit kéchke jchëemiitö. Es vino ena ikkuölit weirwami éme. <sup>38</sup> E' kuëki vino pa'alí tekeka' ikkuölit pa'alí a. <sup>39</sup> Yi tö vino bacha'bacha yeke, ese tö ibikeitseke tö e' ya' bua' vino pa'alí tsata. E' kuëki ie' kè éna vino pa'alí yakiá. Es nies a' tö ibikeitseke tö ye' ttè pa'alí e' kè dör buaë.

### Jesús ttökatapa tö trigo wöikléé eno diwö a

(Mateo 12.1-8; Marcos 2.23-28)

**6** Etökicha ta' eno diwö a Jesús dami trigo shua ta' ittökatapa tö trigo wöiklérami ta' iwösiéitö irikirik ulá wa

ta ikatér Amirakitö. <sup>2</sup> Etä fariseowakpa welepa tö ie'pa a ichaké:

—¿I kuéki a' tso' i kè kèwö ta' wè eno diwö a ese uk?

<sup>3</sup> Jesús tö ie'pa iuté:

—¿I David tö ká iaiaë ¿e' kè arisule a' wa Skéköl yékküö ki? Etökicha ta' ie' ena iklépa dué bli wa. <sup>4</sup> Ie' dé'wa Skéköl wé a ta pan meule Skéköl a' klö'wéitö nêitö. Nies ie' tö iblaté iklépa a ta inérakitö. Sacerdotepa è a pan e' kèwö ta' nê. Erè a' éna iane tö i o' David tö nê' kè dör suluë Skéköl wöa.

<sup>5</sup> Nies Jesús tö iché ie'pa a:

—Ye' dör S'ditsö Alà, e' wa kawö ta' ichoie tö i dör buaë ö i dör suluë wè eno diwö a.

### Wëm eköl ulà siulewä e' bua'wéne Jesús tö

(Mateo 12.9-14; Marcos 3.1-6)

<sup>6</sup> Eno diwö skà ta Jesús dewä ju diowak nî dapa'wo wé a ta eë ie' tö s'wöbla'wémítke. Ta eë wëm detkër eköl e' ulà bua'kka siulewä. <sup>7</sup> S'wöbla'uk ttè dalöiëno wa wakpa ena fariseowakpa éna ie' kkaták ilè ki, e' kuéki ie'pa tso' ie' weblök tö wëm nê' bua'wëmineitö eno diwö a. <sup>8</sup> Erè i bikeitseke ie'pa tö, e' suéwä ie' tö, e' kuéki ie' tö iché wëm ulà siulewä e' a:

—Be' e' kóka ta be' e' duóser íe sulitane wöshaë.

Etä wëm e' duéser. <sup>9</sup> Jesús tö iché ie'pa a:

—A' chakèyö: ¿I kèwö ta' se' a wè eno diwö a: i buaë ö i suluë? ¿S'tsatsök ö s'ttökwa?

<sup>10</sup> E' ukuöki ta' ie' tö ie'pa ulitane weblé e' pamik ta' ichéitö wëm ulà siulewä e' a:

—Be' ulà shulöö.

Ta' ie' tö iwé es etä iulà buanene. <sup>11</sup> E' tö ie'pa uluwéka taië, ta' inî chakérak, ¿wes se' tö Jesús wëmi?

### Jesús tö ittekölpa tsá dabom eyök kí böl e'pa shushtë

(Mateo 10.1-4; Marcos 3.13-19)

<sup>12</sup> E' kèwö ska' ta Jesús míä kabata a ttök S'yé ta, eë ie' tté ie' ta nañeë. <sup>13</sup> Mik ká ñine, etä ie' tö ittökatapa kié dapa'wé ie' ta. E' shüa ie' tö wépa shushtë dabom eyök kí böl (12), e'pa kiéitö ittekölpa tsá. <sup>14</sup> Ie'pa kiè i' es: Simón, e' kiè méka Jesús tö Pedro; Andrés dör Simón èl, Santiago, Juan, Felipe, Bartolomé, <sup>15</sup> Mateo, Tomás, Santiago dör Alfeo alà, Simón kine Celote, <sup>16</sup> Judas dör Santiago alà ena Judas Iscariote tö Jesús wömekettsä ibolökpa a e'.

### Jesús tö s'wöbla'wé ñies s'buawéne

(Mateo 4.23-25)

<sup>17</sup> Jesús biteatkene kabata a ittekölpa tsá e'pa ta, e' e' wöklö'wé kakkue ki. Eë iklépa tso' taië ie' panuk. Nies pè' datse Judea ena Jerusalén, esepa de taië. Nies pè' de taië datse Tiro ena Sidón. Ká böt e' atë dayé kkömik. <sup>18</sup> Ie'pa ekképa kos debitu Jesús tö s'wöbla'wéke e' kittsök ñies as ikirirkerak e' bua'üneitö. Nies wépa tteke wimblupa sulusi tö esepa bua'wéitö. <sup>19</sup> Taië diché tso' ie' a e' wa s'kirirke kos e' buanene, e' kuéki sulitane éna ie' kakwa.

### I wër buaë Skéköl wa

(Mateo 5.1-12)

<sup>20</sup> Jesús tö ittökatapa weblé ta' ichéitö ie'pa a:

“A' wépa dör siarë kè wa i ta' taië, esepa tso' i blúie Skéköl tso' e' a, e' kuéki ayécha buaë a'.

<sup>21</sup> “A' wépa tteke bli tö ká i' a, esepa tts'ërdaë dö wè', e' kuéki ayécha buaë a'.

“A' wépa iúke ká i' a, esepa jañurane buaë, e' kuéki ayécha buaë a'.

<sup>22</sup> “Ayécha buaë mik pè' éna a' ar suluë, a' wateke, a' cheke suluë, a' cheke tö a' dör pè' sulusipa ye' dör S'ditsö Alà e'

tté kuëki. <sup>23</sup> Mik e' tköke a' ta, eta kè a' erianuk. E' skéie a' ttsë'nú buaë. Aishkuö ta ká jaì a' i buaë merdaë a' a' iskéie e' kuëki a' ttsë'nú kaneë. Kè a' éna ichökwa tö ká iaiaë ie'pa yépa bak Skëköl ttekölpa wë'ikök es.

<sup>24</sup> “Erë wëstela ina a' wa' íyi tso' tajë ká i' a' esepa ta, e' ukuöki ta kè i' skà ta'ia' a' ttsë'woie buaë.

<sup>25</sup> “Wëstela ina a' wa' íyi tso' tajë nê wë' i' nê ta' esepa ta, e' ukuöki ta' a' tterane bli tö.

“Wëstela ina a' jañuke buaë ká i' a' e'pa ta, e' ukuöki ta' a' eriaradë, iuraë siarë.

<sup>26</sup> “Wëstela ina a' ta' mik sulitane tö a' kíkëka, es ie'pa yépa bak ká iaiaë e'pa tö kachökwa'pa e' chò tö ie'pa dör Skëköl ttekölpa, e'pa kíkaka.

### **S'bolöpka ché Jesús tö**

*(Mateo 5.38-48; 7.12)*

<sup>27</sup> “Erë a' tso' ye' ttò kíttsök, esepa a' ye' tö ichè: a' bolöpka dalëritsó. Wépa éna sulu a' ar, esepa a' i' buaë ú. <sup>28</sup> Wépa alibchöke a' ki, esepa a' a' er buaë chó. Wépa tö a' cheke suluë esepa ki ikió S'yé a' tö ikimú. <sup>29</sup> Yi tö a' ppé a' aswö ki, e' ta' a' aswö etta mú ia' ppè. Yi tö a' paio kíkë tsémi, e' ta' nïes a' paio mú ia'. <sup>30</sup> Yi tö ilè kak kiè a' a, e' ta' imú ia'. Yi wa' a' íyi mítser, e' ta' kè a' tö ikiökneia. <sup>31</sup> A' senú s'malepa ta' wes a' ki ikiane tö ie'pa ser a' ta' es.

<sup>32</sup> “Wépa tö a' dalëritseke, esepa è ské dalëritseke a' tö, e' ta' ze' ki Skëköl tö wëstela chëmi a' a? ¡Au! Nïes pë' sulusipa tö wépa tö ie'pa dalëritseke, esepa ské dalëritseke. <sup>33</sup> Wépa tö i' buaë weke a' a, esepa è a' a' tö iské weke buaë, e' ta' ze' ki Skëköl tö a' kíkëkami? ¡Au! Nïes pë' sulusipa tö iweke es. <sup>34</sup> A' tö íyi peiteke, wépa kló'wé a' tö tö imeraneitö, esepa è a, e' ta' ze' ki Skëköl tö a' kíkëkami? ¡Au! Nïes pë' sulusipa tö íyi peiteke nï a, mik ie'pa tö ikló'wé tö imerdane eta. <sup>35</sup> A' bolöpka dalëritsó. I' buaë ú ie'pa a,

íyi peitö ie'pa a, kè iské panane. A' tö iweke es, e' ta' Skëköl tö a' a' iské merane buaë. Ie' er buaë chöke s'sulusipa a' ena wépa kè tö wëstela cheta' ie' a' esepa a. A' tö iweke es, e' ta' a' tö ikkcheraë tö mokië a' dör ie' dör íyi ulitane tsata, e' ala'r. <sup>36</sup> S'malepa saú er siarë wa wes S'yé tö a' sueke er siarë wa es.

### **Kè se' kàne s'kichatök**

*(Mateo 7.1-5)*

<sup>37</sup> “Kè a' s'kichatök, e' ta' Skëköl kè tö a' kichatepa. Kè a' ichök yi a' tö Skëköl mú tö be' tsaiò, e' ta' Skëköl kè tö a' tsaiëpa. I' sulu kos wamblé ie'pa tö a' ki, ese nuí olo'yó ie'pa ki, e' ta' a' nuí olo'yeraë Skëköl tö a' ki. <sup>38</sup> Kos a' tö i' mé s'malepa a, ekkè a' a' imerdane. E' kuëki íyi kákmu s'malepa a, eta' iské merane Skëköl tö a' a. Erë ie' tö imerane a' a' tajë wes dakö'ukuö wà ièsò chië wötjoule buaë ikí wà iè döká ikkò a' katötöë tsá tkënettsamitke es.”

<sup>39</sup> Nïes Jesús tö ttè kleé ie'pa a' i' es: “¿Wé a' wa' isuule tö s'wöbla kè wawër, ese tö eköl wöbla kè wawër ese ulà ièmi? ¿E'pa kè brutarmi bölë kawk a? <sup>40</sup> Wé wöblarke ese kè dör iwöbla'ukwak tsata. Mik iwöblaone, e' je' ta' idöraë wes iwöbla'ukwak es.

<sup>41</sup> “Kaltak jchela tsir tso' a' yami wöbla a, ese sué a' tö, erë ¿i' kuëki kaltak bërie tso' a' wák wöbla a, ese kè sune a' wa? <sup>42</sup> ¿Wes a' ichëmi a' yami a: ‘A yami, súyö kaltak jchela tsir tso' be' wöbla a, e' yëttsa?’ Erë kaltak bërie tso' a' wöbla a, e' kè sune a' wa. ¡A' e' ò suluë! Kaltak bërie tso' a' wöbla a, ese yóttsa kewe, es kaltak jchela tsir tso' a' yami wöbla a, ese wërmi a' a' buaë yëttsa.

### **Kal buaë ena kal sulusi**

*(Mateo 7.17-20; 12.34-35)*

<sup>43</sup> “Kal buaë kè wörtá' kalwö suluie, nïes kal sulusi kè wörtá' kalwö bua'ie. <sup>44</sup> Kal wërkewá iwö ki. Higowö ö uvawö

ese kè shteta'sö dika' kicha mik. <sup>45</sup> Ì bikeitsekesö, ese è chekesö. E' kueki wëm dör buaë, ese er dör buaë, e' kueki ie' serke buaë, ttò yësyësë. Erë wëm dör suluë, ese er dör suluë, e' kueki ie' serke suluë, ttò suluë.

### U yuökwak bøl

(Mateo 7.24-27)

<sup>46</sup> “;Ì kueki a' tō ye' kieke: 'A Skëkëpa, a Skëkëpa,' erë kè a' tō ye' ttè iuteku'?”  
<sup>47</sup> Yi datse ye' ska', ta ye' ttò tseke ta iwà iuteke, süyö a' a' ichè tō wes ese dör.  
<sup>48</sup> Ese dör wes wëm eköl tō u yué es. E' tō u chkí töbié iskië, ká dör ák è, ese a. Mik di' pone taië, tkami u kî taië, erë u kè minetser iwà, iyöule buaë e' kueki. <sup>49</sup> Erë yi tō ye' ttò tse erë kè iwà iuteku', ese dör wes wëm eköl tō u yué, erë kè wà itöbinewà iskië, tkékaitö jalëjalë íyök è bata kî es. Mik di' pone taië e' tkami u kî, età u mítser iwà, kè ì ateia.

### Jesús tō ñippökwakpa wökir eköl e' kanè méso bua'wéne

(Mateo 8.5-13; Juan 4.43-54)

**7** Mik Jesús tō s'wöbla'wé one, età imiã demi Cafarnaúm. <sup>2</sup> Età ee Roma ñippökwakpa dökã cien, e' wökir serke eköl. E' kanè méso eköl kirinewà taië duökewatke. Iwökir éna ie' dalër taië. <sup>3</sup> Mik ñippökwakpa wökir tō Jesús tté tse, età ie' tō iché judiowak kueblupa welepa a: “A' yú Jesús ska' ta ichó ie' a: 'Be' we'ikè sa' tō, be' shkó ñippökwakpa wökir, e' kanè méso eköl duöke taië, e' bua'ukne.” <sup>4-5</sup> Mik ie'pa demi Jesús ska' ta ikköcherak taië ie' wöa:

—Ñippökwakpa wökir e' éna se' judiowak dalër taië. Ie' wák tō se' ñi dapa'wo wé e' yuök patkë' se' a. E' kueki sa' a ta buaë idir tō be' ie' kimè.

<sup>6</sup> Età Jesús miã ie'pa ta. Erë mik ie'pa dökemitke ñippökwakpa wökir e' u a, età ie' tō iyamipa welepa patké ichök Jesús a: “A kékëpa, kè be' e' tsiriuk. Be'

dör kékë taië, e' döwã ye' u a, e' kè dör ye' siarla e' a. <sup>7</sup> E' kueki ye' kè dërö be' ska'. Erë ikëwö è mú ta ye' kanè méso buardane. <sup>8</sup> Ye' wökirpa ta', e'pa ttò iütök ye' kawöta. Nies ye' dör ñippökwakpa taië e'pa wökir, ie'pa kawöta ye' ttò iütök. Mik ye' tō eköl a' icheke, 'Be' yú' ta imí. Eköl a ye' tō icheke, 'Be' dou' ta ide. Nies ye' tō icheke ye' kanè méso a, 'Íyi ú' ta iwéitö. Ye' iklö'wé tō be' wã kawö ta' íyi ulitane tsata, e' kueki ye' wã ijcher tō be' tō ikëwö mé, e' ta ye' kanè méso buardane.”

<sup>9</sup> Mik Jesús tō ttè e' tse, età e' tō ie' tkiwéwã. Ie' wötréne ta' ichéitö pè' dami ie' itöki e'pa a:

—Ye' ichè a' a tō Israel aleripa kos shua, kè yi kune ye' wã erblök ye' mik wes wëm i' es.

<sup>10</sup> Età mik ñippökwakpa wökir yamipa dene u a, età ie'pa tō isuë tō ikanè méso kirirke, e' buanene.

### Alaköl eköl schó alà blënewã e' shkë'wékane Jesús tō

<sup>11</sup> E' ukuöki ta' Jesús miã ká kiè Naín ee. Ie' dami ittökatapa ta, nies pè' dami ie'pa ta taië. <sup>12</sup> Mik ie'pa de tsinet ká e' a, età ie'pa isuë tō taië pè' datse, e' wã s'nu datse micho wötëwã. Dëütö e' mi dör schó, ie' alà eköl ème wëm, e' blënewã. Taië ká e' wakpa tō ie' pablerami. <sup>13</sup> Mik Skëkëpa Jesús tō isuë, età ie' wa iwër siarë ta' ichéitö ia:

—Kè be' iukia.

<sup>14</sup> E' bet ta' ie' dewã tsinet ka'la kî s'nu dami e' o'mik ta' ka'la kèitö. Wépa wã idami e'pa e' wöklö'wéwã. Jesús tō iché s'nu a:

—A duladula, be' a ye' tō ichè, ;Be' e' kókã!

<sup>15</sup> E' bet ta' s'nu shkenekane e' tkéser ta' itté. Età Jesús tō imé imi a. <sup>16</sup> Kos pè' tso' ie'pa ta' e'pa suane taië, Skëköl kikéka ie'pa tō taië ta' ichérakitö:

—Skèköl tteköl chók eköl, e' de se' shuà.

Ñies ie'pa tò iché:

—Skèköl de se' dör ie' icha esepa kimuk.

<sup>17</sup> Età ì wé Jesús tò e' tté bunekà taijé Judea ké kòs e' a, ñies ká tso' Judea pamik e' a itté tìnekà.

### Juan S'wöskuökwak ttökatapa de Jesús ska' ichakök

(Mateo 11.2-19)

<sup>18</sup> Juan S'wöskuökwak ttökatapa tò ì kòs weke Jesús tò, e' paké Juan tso' s'wöto wé a e' a. E' kuekì ie' tò ie'pa böl kié <sup>19</sup> tã ichéitò ie'pa a:

—A' yú Skèkèpa Jesús a ichakök tò çbe' dör wé pairine'bitù idi' wa s'blúie yéule tò idatse e', ö yi skà panèia sa' tò?

<sup>20</sup> Mik ie'pa de Jesús ska' tã ie'pa tò iché ie' a:

—Juan S'wöskuökwak tò sa' patké be' a ichakök tò çbe' dör wé pairine'bitù idi' wa s'blúie yéule tò idatse e', ö yi skà panèia sa' tò?

<sup>21</sup> E' wöshã tã Jesús tò s'kirirke duè tsakìe wã, esepa bua'wé taijé. Ñies s'tteke wimblupa sulusi tò, ena s'wöbla kè wawër esepa bua'wéitò taijé. <sup>22</sup> E' ukuökì tã ie' tò iché Juan ttökatapa böl a:

—A' yúne Juan ska' tã ì sué a' tò, ì ttsé a' tò, e' kòs pakó ie' a. Ichó ie' a tò s'wöbla kè wawër esepa wöbla wawënene; s'kraulewã kè shko esepa shkéne; wépa kiri'weke lepra tò esepa buanene bates'nene; s'kukuò kè wats'ser esepa wats'senene; s'duowã shkenekane; ñies Skèköl ttè buaé e' pakane s'siarèpa a. <sup>23</sup> Yi kè yökì ye' sulusi, ayècha buaé ese!

<sup>24</sup> Mik ie'pa míyalne, etã Jesús tò Juan tté pakémitke pè' a, tã ichéitò ie'pa a: “Mik a' dè'rö ká sir poé wé kè yi serku' ee Juan sauk, etã çima a' erbikò wëm

wése suèmi a' tò? A' kè dè'rö wëm èse, kabikeitsò wì a dià a wës kua'kò wöppè siwã' tò es, ese sauk. <sup>25</sup> A' kè dè'rö wëm ese sauk, e' tã çwëm wése sauk a' dè'rö? A' kè dè'rö wëm e' paiò datsi' bua'buwa wa, ese sauk. A' wã ijcher tò wépa e' paiò es ena íyi bua'buwa tso' iwã taijé e' ttsé'woie buaé, esepa serke blu' u a. <sup>26</sup> Erè çwëm wése sauk a' dè'rö? A' dè'rö wëm dör Skèköl tteköl ese sauk. Ye' tò a' a iché tò mokì Juan dör Skèköl tteköl, erè ie' kè dör e' è. Ie' dör Skèköl tteköl ese tsata. <sup>27</sup> Skèköl yèkuò kì itso' kitule wé Skèköl tò iché wé pairi'bitùitò idi' wa s'blúie e' a, e' tò iché i' es:

‘Ye' tso'tke ye' tté pakök'wak patkòk be' yökì kewe be' ñalé yuök.’†

Skèköl tté pakök'wak e' dör Juan. <sup>28</sup> Ye' iché a' a tò s'ditsö ulitane shuà, kè yi ku' Juan tsata. Erè ì blúie Skèköl tso', e' shuà yi dör èsela, ese dör ie' tsata.”

<sup>29</sup> (Mik pè' ulitane ñies inuköl shtök'wakpa Roma wökirpa a, e'pa tò Jesús s'wöbla'weke e' ttsé, etã ie'pa tò iché tò Skèköl tté dör yésyèsè. Ie'pa dè' as Juan tò ie'pa wöskuò iwã kkachioie tò ie'pa tò Juan tté klö'wé, e' kuekì ie'pa tò iché es. <sup>30</sup> Erè fariseowakpa ena s'wöbla'uk tté dalöièno wa wakpa kè wã Juan tté klö'one, e' kuekì ie' kè wã ie'pa wösune, es ie'pa tò Skèköl er buaé chòke ie'pa a e' watéttsa.)

<sup>31</sup> Jesús tò iché: “çIma a' chèmi ye' tò? çWes a' dör? <sup>32</sup> A' dör wes tté i' tò iché es: Ala'rla tso' inuk u itökì. Shabòtspa arke taijé tã iché iyamipa a: ‘Sa' tò pulé bla'wé, erè a' kè klötène'; sa' tò s'eriar ttseitsté, erè a' kè iine.’ <sup>33</sup> E' wã dör tò Juan S'wöskuökwak de batsötã, kè blo' yetã' tã a' tò iché tò aknama tso' ie' a. <sup>34</sup> E' ukuökì tã ye' dör S'ditsö Alà, e' de kè batsötã, blo' yetã, tã a' tò ye' cheke tò ye' chkò taijé, blo' yè taijé, ñies tò ye' dör inuköl shtök'wakpa ena pè' sulusipa



malepa, esepa sini'. <sup>35</sup>A' tō ye' cheke es erē isuerasō bulebōk t̄a tō wēpa serke wes Skēkōl siwē tō ichē es, esepa dōr yēsyesē.”

### Jesús mīa upakōk Simón dōr fariseowak e' ska'

<sup>36</sup>Fariseowak ekōl kiē Simón, e' tō Jesús kiē chkōk ie' u a. E' kuēkī Jesús mīa ie' ska' t̄a ie'pa e' tuléser chkōk. <sup>37</sup>Et̄a alakōl sulusi serke k̄a e' a, e' w̄a ijchenew̄a tō Jesús tso' chkōk fariseowak e' u a. Ie' w̄a kiō masmas de' ukkuō yōule ák bua'buwa kiē alabastro ese wa. <sup>38</sup>Ie' de dur Jesús ska', e' iuke Jesús tsikka, iwōriō yēnane taijē Jesús klō kī, e' pasiwēitō its̄a wa, t̄a Jesús klō wōalattsémiitō t̄a kiō masmas téitō Jesús klō kī. <sup>39</sup>Mik fariseowak tō Jesús kiē chkōk e' tō alakōl sué, et̄a ibikeitséitō: “Wēm wī́ mú dōr Skēkōl ttekōl mokī, e'ma ie' éna iarmi alakōl wése tso' ie' kōk. Ie' éna iarwami tō e' dōr alakōl sulusi.” <sup>40</sup>Jesús iché ie' a:

—A Simón, ilē tso' ye' w̄a yēnoie be' a. Ie' iūtē:

—A s'wōbla'ukwak, ichó ña.

<sup>41</sup>Jesús tō iché:

—Wēm bōl ñarke inukōl peitōkwak ul̄a a. Ekōl ñarke cien skeyōk (500), iēkōl ñarke dabom skeyōk (50). <sup>42</sup>Ie'pa bōl kē a ipator, e' kuēkī inukōl peitōkwak tō inuī olo'yé ie'pa kī. Ye' tō be' a ichakē tō ie'pa bōl, ¿wēne ék éna inukōl peitōkwak dalērmi kibiie?

<sup>43</sup>Ie' iūtē:

—Ye' a t̄a, wēne nuī olone kibiie e' ék. Jesús tō iché:

—Buaē be' iūtē.

<sup>44</sup>Et̄a Jesús tō alakōl sué t̄a ichéitō Simón a:

—Alakōl i' saú. Mik ye' dew̄a be' u a, et̄a be' kē w̄a ye' a di' mēne ye' klō skuoie, erē alakōl i' tō ye' klō skué iwōriō

wa t̄a ipasiwēitō its̄a wa. <sup>45</sup>Be' kē w̄a ye' shkeone wōalattse wa wes s'wōblar es. Erē ie' dew̄a iē, et̄a ie' tō ye' klō wōalattsémi taijē.

<sup>46</sup>Be' kē w̄a kiō esela, e' tēne ye' wōkir kī wes s'wōblar es. Erē ie' tō kiō masmas tuē darērēē ese té ye' klō kī. <sup>47</sup>E' kuēkī ye' ichē be' a tō ie' éna ye' dalēr taijē e' wa iwēnew̄a tō i sulu wamblé ie' tō taijē, e' nuī olone ie' kī. Erē wēpa kē éna ye' dalērt̄a taijē, e' wa iwēnew̄a tō esepa kī inuī olone elkela è.

<sup>48</sup>E' ukuōkī t̄a ie' iché alakōl e' a:

—Ì sulu kōs wamblé be' tō e' nuī olone be' kī.

<sup>49</sup>Imalepa kiule chkōk ñies tso' ee, e'pa ñi chakérak:

—A' iché ¿yi ie' dōr e' ttō es? Skēkōl è a se' nuī olo'yarmi.

<sup>50</sup>Erē ie' tō alakōl a iché:

—Be' erblé ye' mik, e' tō be' tsatké. Be' yúne bèrē.

### Alakōlpa tō Jesús kímé

**8** E' ukuōkī t̄a Jesús mīa i blúie Skēkōl tso' e' tté buaē pakōk k̄a blublu ena k̄a tsitsir tso' e' a. Ie' ttekōlpa tsá dabom eyōk kī bōl, e'pa shkōke ie' t̄a. <sup>2</sup>Ñies alakōlpa wēlepa bua'ne ie' tō, e'pa shkōke ie' t̄a. E'pa wēlepa bak weinuk wimblupa sulusi w̄a, ñies dué w̄a. Ie'pa ekōl, kiē María Magdala wak, e' a aknamapa yē'ttsaitō dōka kul. <sup>3</sup>Ñies Juana dōr Cuza alakōl, e' shkōke ie' t̄a. Cuza dōr Herodes dali kkō'nukwak. Ñies Susana ena alakōlpa malepa taijē shkōke ie' t̄a. Ie'pa tō Jesús ena ittōkatapa kimeke taijē, i tso' ie'pa w̄a ese wa.

### Tē kuatkōkwak, e' pakē

(Mateo 13.1-9; Marcos 4.1-9)

<sup>4</sup>Pē' e' yélur ik̄a kī debitu taijē Jesús ska'. Ie' tō ie'pa a ittē kleé i' es: <sup>5</sup>Wēm mīa ekōl tē kuatkōk t̄a ie' tō iwō ppé ululu

të kî<sup>‡</sup> Mik ie' tso' iwö ppök, etä ditsöwö wele anewa ñala ska' ta pë dakélor iki, e' tó ñnatélur, ñies dù debitu tó ikatéwa. <sup>6</sup>Ditsöwö wele anewa áklo a ta e' kuölö ta itskine buaë. Erë ká tsabe kè ta' ee, e' kueki bet ta isinewa. <sup>7</sup>Ditsöwö wele anewa dika'chka shua. Dika'chka ena ditsöwö talane ñita, erë dika'chka e' aléka iki. <sup>8</sup>Erë ditsöwö wele ane iyök bua'buakí, ese tskine talane wöne buaë. Iklö wele wöne döka cien eyök (100) elka elka.

Mik Jesús tó iché one, etä ikí chéitö ie'pa a aneule: “¡A' éna ye' ttò ttsak, e'ma ikukuebló bua'ie!”

### Ì kueki Jesús tó s'wöbla'weke kleaule

(Mateo 13.10-17; Marcos 4.10-12)

<sup>9</sup>Jesús ttökatapa tó ie' a ichaké:

—Ttè waklébò, ¿ima e' wà dör?

<sup>10</sup>Ie' tó iché ie'pa a: “Ì blúie Skéköl tso' e' tté bléulewa, e' kéwö meneat a' a ijchenoie. Erë pë' tso' taië kè éna ye' tté klö'wak, esepa a ye' tó ikleeke as ie'pa tó iwebló je', erë kè ie'pa a iwà wër, ñies as ie'pa tó ittò je', erë kè ie'pa a iwà ar.”<sup>f</sup>

### Të kuatkökwak tté e' wà paké Jesús tó

(Mateo 13.18-23; Marcos 4.13-20)

<sup>11</sup>“Ttè wakléyö e' wà dör i' es: Skéköl tté pakésö e' dör wës ditsöwö kuatkésö es. <sup>12</sup>Pë' welepa ta itkòmi wës itka ditsöwö anewa ñala ska' ñe' ta itka es. Es-epa tó Skéköl tté ttsé, erë bé de ie'pa ska' ta iyéttsaitö ie'pa er a as ie'pa kè tó iklö'ù ta itsatkër. <sup>13</sup>Welepa skà ta itkòmi wës itka ditsöwö anewa áklo a ñe' ta itka es. Es-epa tó Skéköl tté ttsé ta iklö'wérakitö ttsë'ne buaë wa erë ekuölö è. Ie'pa kè a e' tkërwa darërë Skéköl tté a. Mik ie'pa weinemitke ie' tté kueki, etä ie'pa anemine tottola. <sup>14</sup>Welepa skà ta itkòmi wës

itka ditsöwö anewa dika'chka shua ñe' ta itka es. Es-epa tó Skéköl tté ttsé, erë ie'pa tó íyi tso' ká i' kî e' bikeitseke kibiie. Ie'pa er me'rie inuköl ena ì tso' ká iki tó s'ttsé'weke buaë ese kî. Ese kos tó Skéköl tté kui'wéwa ie'pa er a, ta ie'pa kè sene buaë Skéköl tté a. <sup>15</sup>Erë welepa skà ta itkòke wës itka ditsöwö anewa iyök buaë kî ñe' ta itka es. Es-epa tó Skéköl tté ttsé ta iklö'wé er buaë wa mokí. Ie'pa tó iuteke buaë ta iwà dalöiekerakitö kekraë. E' kueki ie'pa tó ì buaë kos ese wé wës Skéköl kî ikiane es.

### Bö'wö tté

(Marcos 4.21-25)

<sup>16</sup>“Mik bö'wö wötskékasö, etä kè sò ipabikepawa, kè sò ipatkepawa ka' dik-ia. E' skéie itkekeka kákke s'yamipa dat-se esepa wö a ká ñi'woie. <sup>17</sup>Es ñies tté tso' bléulewa i'ñe ta, ese jcherdawa sultane wa aishkuó ta. Ì ché ye' tó, e' kè wà ane ie'pa éna i'ñe ta, erë e' wà ardaë ie'pa éna aishkuó ta.

<sup>18</sup>“Yi e' yuak buaë ye' tté wa, ese a ikí meraëyö as ie' éna iwà ar buaë. Erë yi kè e' yuak ye' tté wa, ì bikeitsé ese tó tó ane iéna, e' kos yérdattsane iyökí. E' kueki ye' ttó kukuebló a' tó bua'ie.”

### Jesús mì ena ie' èlpa debitu ie' weblök

(Mateo 12.46-50; Marcos 3.31-35)

<sup>19</sup>Etä Jesús mì ena ièlpa ena ikutapa e'pa debitu ie' weblök. Erë ie' tkër wé pë' tso' taië e' shua, e' kueki ie'pa kè dë'wa ie' ska'. <sup>20</sup>E' biyó ché yile tó ie' a:

—Be' mì ena be' èlpa ena be' kutapa e'pa shkò be' weblök.

<sup>21</sup>Ie' tó iuté:

—Èkèkè, erë ye' tó a' a ichè tó wépa tó Skéköl tté ttsé ta iwà iutéitö, esepa dör wës ye' mì ena ye' èlpa ena ye' kutapa es.

<sup>‡</sup>8:5 të kuatkök ppé ululu: Ie'pa wöblar të kuatkök wö ppélur të kos e' kî.

<sup>f</sup>8:10 Isaías 6.9

**Siwa' tajë e' wöklö'wé Jesús tö***(Mateo 8.23-27; Marcos 4.35-41)*

<sup>22</sup> Etökicha ta Jesús e' iéka kanò a itökatapa ta, ta ichéitò ie'pa a:

—Mishka batsöri wishet.

Etä ie'pa míyal. <sup>23</sup> Ie'pa mirwaia ta ie' kapowa kanò a. E' dalewa siwa' bat-sineka tajë tö di' uyéka taië ta kanò a di' iënekam katsirkewatke. <sup>24</sup> E' kueki ie'pa tö itiwéka ta ichérakitò ia:

—A s'wöbla'ukwak! ;A s'wöbla'ukwak! ;Se' duölrumi!

Etä ie' e' kéka ta siwa' ena di' yöli ünéitò ta iwöklönewa míane alamië.

<sup>25</sup> E' ukuöki ta ie' tö iché ie'pa a:

—¿Wes a' erblöke ye' mik, e' de?

Erë ie'pa suanéka taië, tkinewa taië ta iní chakéka:

—¿Yi dör wëm wí? ;E' ttò dalöié di' tö ena siwa' tö!

**Wëm eköl a aknamapa tso' tajë e' bua'wéne Jesús tö***(Mateo 8.28-34; Marcos 5.1-20)*

<sup>26</sup> E' ukuöki ta ie'pa mia demi ká kië Gerasa atë batsöri wishet Galilea wöshaë eë. <sup>27</sup> Mik Jesús e' yéttsa de ká sí ki, etä wëm eköl de ie' ska', e' a aknamapa tso'. Ie' dör Gerasa wak. Iaiäë ie' sene'mi sume, kè serku'ia u a, ie' serke pö a. <sup>28</sup> Mik ie' tö Jesús sué, etä ie' anekä taië ta ie' tkéwa kuchë ki. Ie' iché Jesús a:

—A Jesús, be' dör Skököl dör íyi ulitane tsata e' alà. ¿Iók be' de ye' tsiriuk? Ye' múat bèrè. Ye' kköchò taië be' a tö kè ye' we'ikar.

<sup>29</sup> Jesús tö ichétke wimblu sulusi a kewe: “Be' e' yóttsa wëm se a.” E' kueki wimblu tö ie' a iché es. Iaiäë ie' we'ikbitu aknama tö. Kekraë aknama tö ie' wö aliweke. E' kueki pè' tö ie' muëke iulà a iklò a tabechka daloie wa, erë e' batsélor ie' tö tottola ta aknama tö ie' kí aliwéka patkémi wé kè yi serku' ese ska'. <sup>30</sup> Etä Jesús tö ie' a ichaké:

—¿Ima be' kiè?

Ie' iüté:

—Ye' kiè Taië Wakpa.

Ie' a aknamapa tso' taië, e' kueki ie' tö iüté es. <sup>31</sup> Ie'pa kköchöke taië Jesús a: “Kè sa' patkarmi kauk taië tso' iskië e' a.” <sup>32</sup> Tsinet kabata kuli' a köchi iëter taië chkök, e' kueki wimblupa kköchöke Jesús a: “Kawö mú sa' a e' tiukwa köchipa jai a.” Jesús tö ikéwö mé ie'pa a. <sup>33</sup> Etä ie'pa e' yélur wëm a ta ie' tiélur köchipa a. Köchi kos poneka tunemirak ká spé mik brutolonemi batsöri a ta eë iduolur.

<sup>34</sup> Mik köchi kkö'nukwakpa tö isuë, etä itkayalmi ta itté ppékarakitò ká e' wa'ne. <sup>35</sup> Pè' de taië iweblök tö ì tka. Mik ie'pa de Jesús ska', etä wëm a aknamapa yëru-lune taië, e' sué ie'pa tö itkër Jesús wörki datsi' iéne éna ká anene buaë. E' tö ie'pa suawé. <sup>36</sup> Wépa tö ì tka e' sué, e'pa tö ipaké ie'pa a tö wes wëm a aknamapa bak e' buanene. <sup>37</sup> Ká e' wakpa ulitane suane taië, e' kueki ie'pa kköché Jesús a: “Be' e' yóttsa sa' ká a.” Etä Jesús e' iéka kanò a ittökatapa ta ta imiatke. <sup>38</sup> Etä wëm a aknamapa yërulune e' kköché Jesús a: “Ye' shkakmi be' ta.” Erë Jesús tö iüté:

—Au, be' e' tsúat. <sup>39</sup> Be' yúne be' u a ta ì kos wé Skököl tö be' a, e' pakó sulitane a.

Ta ie' mia, ta ì kos buaë wé Jesús tö ie' a, e' pakéitò sulitane a.

**Jesús tö Jairo alà busi shké'wékane ñies alaköl bua'wéneitò eköl***(Mateo 9.18-26; Marcos 5.21-43)*

<sup>40</sup> Mik Jesús dene batsöri iöshet, etä pè' tso' taië ie' panuk, e' kueki ie'pa tö ie' kiéwa ttsë'ne bua' wa. <sup>41</sup> Etä wëm eköl kië Jairo e' de. Ie' dör judiowak ñi dapa'wo wé e' wökir eköl. Ie' e' téwa wöwakköt Jesús wörki ta ikköchöke taië ie' a: “Mishka bet ye' u a.” <sup>42</sup> Jairo alà dör

ekla è wák dör alaköl kī duas tso' dabom eyök kī bök ulatök (12), e' duökewatke.

Jesús miriä, e' dalewa taië pë' dami, e' tērdami ie' mik. <sup>43</sup>E'pa shūä alaköl dami eköl e' du'mi alakölpa duè wä e' kī duas de dabom eyök kī bök (12). Ì kōs tso' ie' wä e' ewēwaitō yēs s'kapeyōkwak kī, erē kē yi ä ibuanene. <sup>44</sup>Ie' dewä tsīnet Jesús tsī kķer tā idatsi' bāta kēwāitō. E' wōshā tā ipé wōklōne tā ibuanene buaë. <sup>45</sup>Etä Jesús tō ichaké:

—¿Yi tō ye' ké?

Sulitane tō iché:

—Kè sa' wä be' kàne.

Pedro tō iché iä:

—A s'wōbla'ukwak, pë' tso' taië e' tērdami be' mik.

<sup>46</sup>Erē Jesús tō iché:

—Ye' ittse tō ilè tka ye' diché wa. E' kuēki ye' wä ijcher tō yile tō ye' ké.

<sup>47</sup>Mik alaköl buanene, e' tō isuē tō kē ie' ä e' blēnukīä tā ide Jesús ska' painéka taië suane wa. Ie' e' tkéwä kuchē kī Jesús wōrkī tā ie' e' chéka sulitane kukua tō ì kuēki Jesús kēwāitō. Ie' tō iché: “Mik ye' tō be' kéwä, e' wōshāē tā ye' buanene.”

<sup>48</sup>Jesús tō iché iä:

—A alà busi, be' erblé ye' mik, e' kuēki be' buanene. Be' yüne bērē.

<sup>49</sup>Ie' ttōkeiä alaköl tā, e' dalewa eköl bitē Jairo u ä, e' debitū tā iché Jairo ä:

—Be' alà busi blēnewatke. S'wōbla'ukwak kē tsiriwāriä.

<sup>50</sup>Mik e' tse Jesús tō, etä ie' tō iché Jairo ä:

—Kè be' tkinuk. Be' erbló ye' mik è, be' alà busila buardane.

<sup>51</sup>Mik ie'pa de Jairo u ä, etä Jesús kē wä yi kàne shkōkwä wé busila nu me'r eē. Pedro ena Santiago ena Juan ena alà yé ena imì, e'pa è kiéwāitō e' tā. <sup>52</sup>E' dalewa sulitane iūke alárke taië. Erē Jesús tō ie'pa ä iché:

—Kè a' iūkiä. Busila kē du'wä, ikapōme'r è.

<sup>53</sup>Sulitane wä ijcher tō busila duowa, e' kuēki ie'pa tō ie' wayuéka jañeitséka taië. <sup>54</sup>Erē Jesús tō busila ulà klō'wéwä, tā iché ie' ä:

—¡A tayēla, be' e' kōka!

<sup>55</sup>Etä ishkenekane, e' bet tā ie' e' kéka tā Jesús tō iché ie'pa ä:

—Itiō.

<sup>56</sup>Iyé ena imì tkirulune iweblök. Etä Jesús tō iché ie'pa ä:

—Ì tka iē, e' kē char yi ä.

### Jesús tō ittōkatapa patké s'wōbla'uk

(Mateo 10.5-15; Marcos 6.7-13)

**9** Jesús tō ittōkatapa dabom eyök kī bōl e'pa dapa'wé tā diché méitō ie'pa ä aknamapa ulitane trē'woyal. Nies kawō méitō ie'pa ä s'kirirke bua'wone. <sup>2</sup>Ipatkérak ì blúie Skéköl tso' e' tté buaë pakök nies s'bu'ukne. <sup>3</sup>Tä ie' tō iché ie'pa ä:

—Mik a' mi'ke, etä kē ì tsarmi. Shko kéli, sku', íyi ñanoie, inuköl, datsi' skà, ese kōs kē tsarmi.

<sup>4</sup>Mik yile tō a' ä iché a' kapóro, etä a' tso' ká e' ä e' dalewa a' kapóro ie' u è ä.

<sup>5</sup>Etä ká wele wakpa kē wä a' kinewä, e' tā a' e' yólur ká e' ä, tā kapo tso' a' klöttō mik, e' ppōō a' tō. E' tō ie'pa ä ikkacheraë tō ie'pa dör Skéköl bolökpa.

<sup>6</sup>Etä ie'pa míyal judiowak ké tsitsir kōs ä Skéköl tté buaë pakök nies s'kirirke bua'ukne.

### Herodes tō ibikeitséka taië tō yi dör Jesús

(Mateo 14.1-12; Marcos 6.14-29)

<sup>7-8</sup>Herodes dör Galilea wōkir, mik e' tō ì kōs weke Jesús tō e' tté tse, etä ie' tō ibikeitséka taië tō yi dör Jesús. Welepa tō icheke tō Jesús dör Juan S'wōskuōkwak kōtewä e' shkenekane. Welepa tō icheke tō ie' dör Skéköl tteköl bak kiè Elías e' shkenekane. Welepa tō icheke tō ie' dör Skéköl ttekölpa skà bak

esepa wele shkenekane. <sup>9</sup> Erë Herodes tö iché:

—Ye' wák tö Juan kuli' tökök patkë', e' ta wëm tté ttséyö tso' iyi uk taië s'tkiwè ekkë ze' dör yi?

E' kuëki Herodes éna suluë Jesús suakwa.

**Pë' dōka mil skeyök e'pa tié Jesús tö**

(Mateo 14.13-21; Marcos 6.30-44; Juan 6.1-14)

<sup>10</sup> Mik Jesús ttekölpa tsá e'pa dene, etá ì kos wé ie'pa tö, e' pakéne ie'pa tö Jesús a. Etá Jesús tö ie'pa kiémi e' ta dò tsinet ká kiè Betsaida wé kè yi serku' ee. <sup>11</sup> Erë mik pë' malepa wá ijchenewa, etá ie'pa mí itöki ta ie'pa kiéwaitö buaë. Ì blúie Skéköl tso' e' tté buaë paké ie' tö ie'pa a ñies s'kirike bua'wéneitö.

<sup>12</sup> Mik ká tuirketke, etá Jesús ttökatapa dabom eyök kí böi (12) e'pa de ie' ska' ta ichéraitö ia:

—Ká i' kī kè ì ku' katanoie ñanoie, e' kuëki ie'pa yuómi as ie'pa mi' ká tso' tsinet ena pë' serke tsinet esepa ska' chké tauk ñè ena kapökrö.

<sup>13</sup> Jesús tö ie'pa a iché:

—Ie'pa tió a' tö.

Ie'pa tö iüté:

—Sa' wá pan skel ena nima bötö e' è tso'. Kè sa' mìnè ikí tauk, e' ta ì tso' sa' wá e' kè dōkka ie'pa taië ekképa tioie.

<sup>14</sup> Wëpa tso' eë dōka mil skeyök (5000), e' kuëki ittökatapa tö iché es. Erë Jesús tö ie'pa a iché:

—A' tö ie'pa kó e' tköksér iski ek tsiní ek tsiní dabom skeyök (50) dabom skeyök. <sup>15</sup> Es ie'pa tö iwé ta pë' ulitane e' tkésér. <sup>16</sup> E' ukuöki ta ie' tö pan skel ena nima bötö, e' klö'wé ta iká sué ká jai a ta wéstela chéitö Skéköl a. E' ukuöki ta ie' tö pan ena nima blaté mé ittökatapa a as ie'pa tö iwatiö pë' a. <sup>17</sup> Mik ie'pa chké de wé', etá ibata ate, e' shtéraitö iène dōka kkóla dabom eyök kī bök (12).

**Pedro tö iché tö Jesús dör wé pairine'bitü idi' wa s'blúie e'**

(Mateo 16.13-19; Marcos 8.27-29)

<sup>18</sup> Etökicha ta Jesús tso' ittökatapa è ta. Ie' tso' S'yé ta ttök, ta eë ie' tö ie'pa a ichaké:

—¿Ima pë' tö iché tö ye' dör yi?

<sup>19</sup> Ie'pa tö iüté:

—Welepa tö icheke tö be' dör Juan S'wöskuökwak. Welepa skà tö icheke tö be' dör Skéköl tteköl bak kiè Elías e' shkenekane. Welepa skà tö icheke tö be' dör Skéköl ttekölpa bak ká iaiaë e' wele shkenekane.

<sup>20</sup> Ie' tö ie'pa a ichaké:

—Erë ¿ima a' iché, ye' dör yi?

Pedro tö iüté:

—Be' dör wé pairine'bitü idi' wa sa' blúie e'.

**Jesús e' biyó ché tö ie' tterawa**

(Mateo 16.20-28; Marcos 8.30-9.1)

<sup>21</sup> Erë Jesús kè wá ie'pa kàne yi a ichök yi dör ie'.

<sup>22</sup> Ñies ie' tö iché:

—Ye' dör S'ditsö Alà, e' weirdaë taië. Judiowak kuëblupa ena sacerdotepa wökirpa ena s'wöbla'uk tté dalöiëno wa wakpa tö ye' waterattsa. Ye' tterawa, e' kī ká de mañat etá ye' shkerdakane.

<sup>23-24</sup> E' ukuöki ta ie' tö iché ie'pa ulitane a:

—Yi e' tsatkak ittèwá yökī, ese kè ulà a sene michoë dòpa. Erë yi e' mettsa ttèwá ye' dalèrmik, ese ulà a idöraë. E' kuëki yi e' yuak ye' ttökataie, ese kè kàne tkinukia e' kī. E' skéie kekraë ikawötá e' chök dò ittèwá wötèulewá krus mik ekkë. Es ie' kawötá shkök ye' itökī. <sup>25</sup> Iyi ulitane tso' ká i' a, e' de a' ulà a, erë sene michoë kè dè' a' ulà a, e' ta e' dör ¿iie bua' a' a? <sup>26</sup> Mik ye' dör S'ditsö Alà, e' dene ye' olo wa, ñies ye' Yé olo wa, ñies ibiyöchökwakpa batse'r e'pa olo wa, etá wépa jaëne ye' kī, esepa kī ye' jaërdaë

ñies. <sup>27</sup> Moki ye' tō a' a' ichè tō a' tso' íe, e' welepa tō ì blúie Skéköl tso' e' sueraë kam iblërulur e' yöki.

**Jesús tō ilo tã tajë e'  
kkaché ittökatapa a**

(Mateo 17.1-8; Marcos 9.2-8)

<sup>28</sup> E' ki ká de pàköl (8) ulatök, etã Jesús míã kabata a ttök S'yé tã. Pedro ena Juan ena Santiago e'pa mítser iwã e' tã. <sup>29</sup> Ie' tso' ttök S'yé tã, etã iwö manenetsã míã kuã'ki dalölöë ñies idatsi' míã saruruë wõnarke dalölöë. <sup>30</sup> E' wõshã tã wëpa de iëter bõl tso' ttök ie' tã. Ie'pa dör Skéköl ttekölpã bak kã iãiaë kiè Moisés ena Elías e'pa. <sup>31</sup> Ie'pa olo bunekã tajë dalölöë. Ie'pa iëter kapakök Jesús tã wes ie' tterawã pë' tō Jerusalén as iwà tkò wes Skéköl ki ikiane es. <sup>32</sup> Pedro ena iyamipa bõl, e'pa tteke kapewã tō tajë. Erë mik ie'pa tñekane bua'ie, etã ie'pa tō Jesús olo tajë e' sué, ñies wëpa bõl iëter ttök ie' tã e'pa suérakitō. <sup>33</sup> Mik Moisés ena Elías mitkene, etã Pedro tō iché Jesús a:

—A S'wõbla'ukwak, buaë se' tso' íe. Sú sa' tō úla yuëkã mañatkuela, etkue be' a, etkue Moisés a, etkue Elías a.

Erë ì cheke Pedro tō e' wà kè ane ie' éna. <sup>34</sup> Pedro ttökeia, e' wõ shã tã mochka tō ie'pa kíwëwã. E' tō ie'pa suawé tajë. <sup>35</sup> Mochka shuã ie'pa tō ttò ttsé tō ichè: “Se dör ye' alà, e' pairi'bitubak ye' tō idi' wa a' blúie. Ie' ttò iütó.”

<sup>36</sup> Mik ie'pa tō ttè e' ttsé, etã ie'pa tō isué tō Jesús atë dur ekörla. Erë ì ttsé ie'pa tō, ì sué ie'pa tō, e' blé ie'pa tō ier a, kè ie'pa wã ipakane yi a dò aishkuö tã.

**Duladula eköl tteke aknama tō  
e' bua'wéne Jesús tō**

(Mateo 17.14-21; Marcos 9.14-29)

<sup>37</sup> Bule es tã ie'pa tso' kabata a e'pa biteyal, etã tajë pë' de Jesús ñaletsuk.

<sup>38</sup> E' shuã wëm tso' eköl, e' tō iché aneule:

—A s'wõbla'ukwak, be' we'ikèyö, ye' aladulaköl saú, e' dör ye' alà eköl è. <sup>39</sup> Mik wimblu sulusi tō ie' éna kã chówéwa, etã ie' anekã tajë, painéka katötöë, tã ikkò a ishuya deka tajë. Kekraë ie' we'ikekeitō siarë. Wimblu kè éna ie' akwa. <sup>40</sup> Ye' kköché tajë be' ttökatapa a tō wimblu trë'úshkar erë kè ie'pa a iöne.

<sup>41</sup> Jesús tō iché ie'pa ulitane a:

—A' wakpa kè erblötã Skéköl mik, a' kè éna kã ane. ¿Mik ye' sermirö a' tã? ¿Kos ye' tō a' dalé'ttsemirö? Be' alà tsúbitü ña.

<sup>42</sup> Mik duladula de tsinet, etã aknama tō ie' éna kã chówéwa kéu iski tã ipainekã tajë. Erë Jesús tō wimblu sulusi uné trë'wëshkar tã duladula bua'wéneitō méneitō iyé a. <sup>43</sup> Ì buaë wé Skéköl tō idiché tajë wa e' tō ie'pa ulitane tkiwéwã.

**Jesús skà e' biyó chéne tō itterawã**

(Mateo 17.22-23; Marcos 9.30-32)

Ì buaë wé Jesús tō, e' chekeia ie'pa tō ñi a, e' dalewa ie' tō iché ittökatapa a:

<sup>44</sup> —Ì cheke ye' tō a' a, e' ttsó buaë, kè a' éna ichökwa: Ye' dör S'ditsö Alà, e' wömerdattsa pë' ulã a.

<sup>45</sup> Erë ì ché ie' tō e' bléulewã ie'pa yöki, e' kueki ie'pa kè éna iwà ane. Nies ie'pa suane ichakök tō ima iwà dör.

**Yi dör ibua'ie Skéköl wöã**

(Mateo 18.1-5; Marcos 9.33-37)

<sup>46</sup> E' ukuöki tã Jesús ttökatapa ñi iütökerak tō ie'pa shuã yi dömi ibua'ie imalepa tsata. <sup>47</sup> Ì bikeitsök ie'pa tso', e' suéwã Jesús tō, e' kueki ie' tō alala kié eköl duéser ie' o'mik <sup>48</sup> tã ichéitō ie'pa a:

—A' shuã yi e' wöéwa imalepa dikia diöshet ese dör ibua'ie. E' kueki yi tō alala i'se kiéwã ye' ttò wa, ese tō ye' wák kiéwã. Es ñies yi tō ye' kiéwã, ese tō yi tō ye' patkë'bitü, e' kiéwã.

**Yi kè ku' ñippök se' ta ese  
tö se' bikeitseke er bua' wa**

(Marcos 9.38-40)

<sup>49</sup> Juan tö iché Jesús a:

—A s'wöbla'ukwak, wëm sué sa' tö eköl, e' tö aknama tré'wéyal be' ttò wa. Eré ie' kè ku' se' ta, e' kueki sa' tö iché ia tö kè iwaria.

<sup>50</sup> Jesús tö iüté:

—Yi kè ku' ñippök se' ta, ese tso' se' ta. E' kueki kè iwöklö'war.

**Santiago ena Juan e'pa uné Jesús tö**

<sup>51</sup> Jesús mi'kekane ká jai a, e' kéwö dökewatke, eta Jesús tö ibikeitse tö ye' mía diché wa Jerusalén, ta imía. <sup>52</sup> Ie' tö wëpa welepa patkemi ie' yöki kewe u yulök kaporöie. Ie'pa mía demi ká tso' etk Samaria ee. <sup>53</sup> Eré Samaria wakpa wa ijcher tö Jesús ena ittökatapa mi'ke Jerusalén, e' kueki ie'pa kè wa ikinewa. <sup>54</sup> Mik Jesús ttökatapa kié Santiago ena Juan e'pa tö isué tö Samaria wakpa kè wa ie'pa kinewa, eta ie'pa tö Jesús a iché:

—A Skékëpa, ¿be' ki ikiane tö sa' tö bö' kié ká jai a ie'pa ewowa?

<sup>55</sup> Eré Jesús wötréene ie'pa sauk ta ie'pa unéitö. <sup>56</sup> E' ukuöki ta ie'pa mía ká skà tso' tsinet ee.

**Wëpa mañal e' yuak Jesús ttökatapaie**

(Mateo 8.19-22)

<sup>57</sup> Ie'pa mirwa ñala ki ta wëm eköl tö Jesús a iché:

—A kékëpa, ye' mi'ke be' ta ká wa'ne wé be' mîró ee.

<sup>58</sup> Jesús tö iüté:

—Bakli' u ta', ñies dúla u ta', eré ye' dör S'ditsö Alá, e' kè wa u ta' senoie.

<sup>59</sup> Jesús tö iché wëm eköl skà a:

—Mishka ye' ta.

Eré wëm tö iüté:

—A kékëpa, kawö mú ña, mik ye' yé blérkewa e' nu wötökwa, e' ukuöki ta ye' mi'ke be' ta.

<sup>60</sup> Jesús tö iüté:

—Wépa dör wes s'duulewa es Skéköl wöa, as esepa tö iyamipa nu wötö. Eré be' yú, i blúie Skéköl tso' e' tté pakök suli-tane a.

<sup>61</sup> Wëm eköl skà tö iché Jesús a:

—Ye' e' yuak be' ttökataie, eré kewe kawö mú ña shkoie e' chökät ye' yamipa a.

<sup>62</sup> Jesús tö iüté:

—Yi e' yué ye' ttökataie ta i kos méatitö ye' dalérmik, eré ibikeitséneitö taié, eta ese kè ki i blúie Skéköl tso' e' mène.

**Jesús tö ittökatapa dabom  
kuryök ki böi (72) e'pa patké**

**10** E' ukuöki ta Skékëpa Jesús tö ittökatapa skà shushtë dökä dabom kuryök ki böi (72) patkemi ie' yöki kewe böi böi wé ie' mi'ke ese ska'.

<sup>2</sup> Ie' tö iché ie'pa a: “Moki pè' tso' taié e' ki Skéköl tté buaé kiane ttsé. Esepa dör wes iyiwö tso'tke wé'iaé shtë es, eré ishtökwakpa kè dör taié. E' kueki a' tö ikió kané wák a tö ishtökwakpa patkó.

<sup>3</sup> A' yú. Ye' tso' a' patkök ye' tté pakök pè' shua wes obejala èmi namu tso' taié, ese shua es. <sup>4</sup> Inuköl skúla ena dali skú ena klökkuö skà, ese kos kè tsarmi yés. Ñies yi kué a' tö ñala wa, ese kè ta a' ttök taié. <sup>5</sup> Mik a' dewa yile ska', eta kewe ichó ie'pa a tö 'Skéköl er buaé chò a' a'.

<sup>6</sup> Ie'pa tö a' kiéwa er bua' wa, e' ta Skéköl er buaé chöraé ie'pa a. Eré kè idör es, e' ta Skéköl kè er buaé chòpa ie'pa a. <sup>7</sup> Ie'pa tö a' kiéwa buaé, e' ta a' e' tsúat u e' a. Tté tso' e' tö iché i' es: 'Kaneblökwak chkòmi i kanewekeitö e' ské wa.' E' kueki i meke ie'pa tö a' a nê yè, e' ñú, e' yó. U e' è a a' e' tsúat a' tso' ká e' a e' dalewa. <sup>8</sup> Ká wé a' demi ta ká e' wakpa tö a' kiéwa buaé, e' ta i mekeitö a' a nê e' ñú. <sup>9</sup> Ie'pa duöke, e' ta e'pa bua'üne. Ñies ichó ie'pa a: 'Í blúie Skéköl tso' e' kéwö dewatke tsinet a' o'mik.' <sup>10</sup> Eré ká wele wakpa kè

wa a' kinewa, e' ta a' yu ie'pa ñala wa ta ichó ie'pa a: <sup>11</sup> 'A kapo tso' sa' klóttó mik, e' ppée sa' tò iwà kkachoe tò a' dör Skéköl bolókpa. Erè a' wa ijchenú tò ì blúie Skéköl tso' e' kèwö dewatke tsinet a' o'mik.' <sup>12</sup> Ye' tò a' a' ichè tò mik Skéköl tò a' chakeketke inuí kī aishkuò ta, eta ká e' wakpa weirdaè siarè Sodoma wakpa bak senuk suluè e'pa tsata.

### **Ká mañat wakpa weirdaè siarè**

(Mateo 11.20-24)

<sup>13</sup> "A Corazín wakpa, a Betsaida wakpa, iwěstela ina a' ta! Ì kè or yi a ese wé ye' tò taiè a' wörki, erè kè a' er maneone. E' úpa ye' tò Tiro ena Sidón e' wakpa wörki, e'ma ká iaiaè ie'pa er mane'bak. Ie'pa tò eriane datsi' ajaè ese iè'kábak, ñies ie'pa e' tkè'kábak muluchka kī iwà kkachoe tò ie'pa er mane'wé Skéköl a. <sup>14</sup> E' kueki ye' tò ichè tò aishkuò ta mik a' wöchakirketke a' nuñ kī e' kèwö de, eta a' wömerdattsa weinuk taiè shute Tiro ena Sidón wakpa tsata. <sup>15</sup> A Cafarnaúm wakpa, kè a' tò ibikeitsök tò a' mi'mitser ká jai a. Ie' tò a' patkerami diöshet wé s'wimblu weirke ee."

<sup>16</sup> Eta Jesús tò iché ittökatapa a: "Yi tò a' ttò tseke ta iutekeitö, ñies ese tò ye' ttò tseke ta iutekeitö. Yi tò a' wateke, ñies ese tò ye' wateke. Ñies yi tò ye' wateke, ese tò Skéköl tò ye' patkè, e' wateke."

### **Jesús ttökatapa dabom kuryök kī bōl (72) e'pa dene**

<sup>17</sup> E' ukuöki ta Jesús ttökatapa dōka dabom kuryök kī bōl (72) patkè ie' tò, e'pa dene tts'nerak buaè. Ie'pa tò iché ie' a:

—A Skékēpa, aknamapa tò sa' ttò dalöié be' ttò wa.

<sup>18</sup> Ie' tò ie'pa iuté:

—Tó. A' e' aléka Satanás kī je'. Ye' isué tò ie' bateshkar ká jai a wes alá wōñar es.

<sup>19</sup> Ye' tò a' a' diché mé e' aloka tkabè kī ena bachè kī ñies e' aloka Satanás diché kī. Es kè ì tò a' we'ikepa. <sup>20</sup> Kè a' tts'enuk buaè wimblupa sulusi tò a' ttò dalöié, e' è kueki. E' skéie a' kiè tso' kitule ká jai a sene michoè yèkkuò kī, e' kueki a' tts'enuk buaè.

### **Jesús tts'ene buaè**

(Mateo 11.25-27; 13.16-17)

<sup>21</sup> Jesús tso'ia ttök ittökatapa ta, e' shua Wiköl Bats'er tò ie' tts'ewé buaè shute. Ie' tò iché: "A ye' Yé, be' dör íyi ulitane tso' ká jai a ena ká i' a' e' Kéköl. Be' tò ttè ikkè blé'wa pé' wa siwa' jcher iskiè ena erbikò taiè esepa yöki. Erè ikkachéwábö s'esela a. Es be' kī ikiane, e' kueki be' iwé es. E' kueki be' kíkékayö."

<sup>22</sup> Jesús tté S'yé ta one ta ichéitö pé' tso' ee e'pa a: "Ye' Yé tò íyi ulitane méat ye' ulá a. Ye' dör Skéköl Alá, kè yi wa ijcher moki tò wes ye' dör, e' jcher ye' Yé è wa. Ñies kè yi wa ijcher moki tò wes ye' Yé dör, e' jcher ye' è wa. Ñies wépa a ye' éna ikkachakwa esepa wa ijchermi."

<sup>23-24</sup> Eta Jesús wotréene ittökatapa kke ta ichéitö ie'pa è a: "Ye' tò a' a' ichè tò Skéköl ttekölpa taiè ena blu'pa bak ká iaiaè esepa taiè tò, ì sué a' tò, e' kkeyé' siarè suè, erè ie'pa kè wa isune. Ñies ì ttsé a' tò, e' kkeyé' siarè ie'pa tò ttsé, erè ie'pa kè wa ittšene. E' kueki wépa tò ì sué a' tò e' sué, ayècha buaè esepa."

### **Samariawak buaè e' pakè**

<sup>25</sup> Etökicha ta s'wöbla'uk ttè dalöiéno wa ese eköl debitu Jesús ska', e' tò ie' a' ichaké itsaioie:

—A s'wöbla'ukwak, ¿Ì wèmi ye' tò as sene michoè dò ye' ulá a?

<sup>26</sup> Jesús tò ie' a' ichaké ñies:

—¿Ì tso' kitule Skéköl yèkkuò kī? ¿Ima e' wà dör be' a?

<sup>27</sup> Eta s'wöbla'ukwak tò iüté:

—Skéköl yèkkuò tò iché: 'Skéköl dalèritsó a' er qos wa, a' wák qos wa,



a' diché kōs wa, ena a' erbikè kōs wa.'  
Ñies e' tò ichè: 'A' malepa dalëritsó wēs  
a' wákpa e' dalër es.'

<sup>28</sup> Jesús tò iché ie' a:

—Be' tò iüté buaë. Be' tò iwé es, e' ta  
sene michoë dōraë be' ulà a.

<sup>29</sup> Erë ie' e' tsatkak ttè e' yöki, e' kuëki  
ie' tò Jesús a ichaké:

—Eta s'yamipa chë Skëköl yëkkuö tö,  
çesepa dör s'yamipa wése?

<sup>30</sup> Eta Jesús tò iüté ttè i' wa:

—Wëm eköl datse Jerusalén, e' micho  
Jericó, eta ñala wa akblökwakpa tò ie'  
klö'wéwa. Ì dami iwa kōs dò idatsi' e'  
bléwarakitö. Ie' ppéraitö taijë ta imíyal.  
Ie' méat tēr ie'pa tò ñala ska', tsir eta  
iduowa. <sup>31</sup> Eta judiowak eköl dör sacer-  
dote e' dami ñala e' ki. Mik ie' tò wëm  
tēr shkə'ule e' sué, eta ie' tkami bánet  
iyöki. <sup>32</sup> Es ñies judiowak skà eköl dör  
Leví aleri kanëblöke Skëköl wé a, e' dami  
ñala e' ki. Mik ie' tò wëm tēr shkə'ule, e'  
sué, eta ie' ñies tkami bánet iyöki. <sup>33</sup> Erë  
samariawakpa kè mik a' wödör, suëke a'  
tò suluë, esepa eköl dör wëm, e' dami  
ñala e' ki. Mik ie' tò wëm tēr shkə'ule e'  
sué, eta ie' wa iwër siarë. <sup>34</sup> Ie' de iska',  
ta wé ishka'ne e' paskueítö vino wa, paik-  
léitö kiö wa, ta ipatréwaitö datsi'tak wa.  
E' ukuöki ta ie' tò itkéka iwák burro ki  
tsémi wé s'kaporö ese wé a, ta eë ie'  
tò ikkö'néia ipasuëia buaë. <sup>35</sup> Bule es ta  
samariawak tò s'kaporö wé, e' wák patué  
inuköl döka s'kanëblò ká böt e' ské ekké,  
ta iché ie' a: 'Wëm shkə'ule i' kkö'nú ña.  
Ilè ki tué be' tò ie' a, e' ta e' ki ye' tò be'  
patuerane mik ye' dene eta.'

<sup>36</sup> Eta Jesús tò ichaké s'wöbla'ukwak a:

—Wëm shkə'wé akblökwakpa tò e' sué  
ie'pa mañal tö, çie'pa wé tò idalëritsé  
moki wēs s'kawötä s'yamipa dalëritsök  
es?

<sup>37</sup> S'wöbla'ukwak tò iüté:

—Wé tò isué er siarë wa e'.

Jesús tò ie' a iché:

—Es be' yú ta iü wēs samariawak tò  
iwé es.

### Jesús mía Marta ena María ska' upakök

<sup>38</sup> Jesús ena ittökåtapa míyal ñala wa  
dò Jerusalén, ta ie'pa de ká tsir ese a. Eë  
alaköl serke eköl kiè Marta, e' tò Jesús  
kiéwa buaë ie' u a. <sup>39</sup> Marta èl, kiè María,  
e' e' tkéwa tsinet Jesús ska', ta ì cheke  
Jesús tò e' tsök ie' tkër. <sup>40</sup> Erë Marta wa  
kanè tso' taijë iu a kanewè, e' kuëki ie' de  
Jesús ska' ta ichéitö ie' a:

—A Skëképa, ye' èl tò ye' méat ekörla  
u kanéuk, ç'è kè ki be' tkine? Ichó ie' a tò  
ye' kimú.

<sup>41</sup> Erë Jesús tò iüté:

—A Marta, a Marta, taijë be' e' tkiuke  
kanè tso' taijë be' u a e' ki, <sup>42</sup> erë iyi etkè,  
e' dör ibua'ie, e' shushtë María tò wè. Kè  
yi tò iyepattsä iulà a.

### Jesús tò ittökåtapa wöbla'wé ttök S'yé ta

(Mateo 6.9-15; 7.7-11)

**11** Etökicha ta Jesús tso' ttök S'yé ta.  
Mik ie' tté one, eta ie' ttökåtapa  
eköl tò ie' a iché:

—A Skëképa, Juan S'wöskuökwak tò  
ittökåtapa wöbla' ttök S'yé ta. Es ñies  
sa' wöbla'ú ttök S'yé ta.

<sup>2</sup> Jesús tò ie'pa a iché:

—Mik a' ttöke S'yé ta, eta ichó ie' a i'  
es:  
'A Sa' Yé, as be' dalöiö sa' tò ì ulitane  
tsatä.

As be' dò sa' blüie da'äie.

<sup>3</sup> Chkè kiane sa' ki senoie, e' mú sa' a ká  
bit ekké.

<sup>4</sup> Sa' malepa kōs e' nuì olo'yeta' sa' tò  
ie'pa ki,  
e' kuëki sa' nuì olo'yó sa' ki.

Kè sa' marrtsä tò ì sulu tò sa' erkiöü.'

<sup>5-6</sup> Ñies ie' tò ie'pa wöbla'wé ttè i' wa:

—Sö ichèmi tò a' wële wa yami tso'  
eköl, ese ska' a' mía nañewe ká shaböts,

ta a' tö iché ie' a: 'A yami, írö ye' yami datse b́anet, e' debitu ye' ska', eré ye' kè wa ì ta' mè ie' a. Be' we'ikèyö, pan peitö ña mañat.' <sup>7</sup> Be' yami e' tö a' iütèmi i' es: 'Kè ye' tsiriwar. Ukkö wötènewatke. Ye' ena ye' ala'r, sa' e' téwatke kapökwa. Ye' kè e' köpaka ì muk be' a.' <sup>8</sup> Jesús tö iché ie'pa a' tö u wák e' kè e' köpaka chkè muk a' a, a' dör iyami e' è kueki. Eré a' tö ikié kröröë, kè wöklör ekkè, e' ta' ie' e' köraqa ta ì kos kiane a' ki, e' meraëitö a' a, a' tö ie' a' ikié kröröë e' kueki. <sup>9-10</sup> "Wépa tö iyi kié Skéköl a, esepa a' imeraëitö. Wépa tö iyi yulé ie' ska' esepa tö ikueraë. Wépa tö ie' chaké, esepa kierawaitö weshke. E' kueki ì kiane a' ki e' kió ie' a, eta' ie' tö a' a imeraë; e' yuló ie' ska', eta' a' tö ikueraë; ie' chakó, eta' ie' tö a' kierawa weshke.

<sup>11</sup> "Kè alà yé wéne tö tkabè mepa ilà a nima kiéitö e' skéie. <sup>12</sup> Nies kè a' wéne tö baché' mepa ilà a dakro siá' kiéitö e' skéie. <sup>13</sup> A' dör pè' suluë eré e' tö iyi buaë meke a' alà a. ¡E' yita' buaë S'yé tso' ká jai a e' tö Wiköl Bats'er meraë yi tö ie' a' ikié ese a!"

### Judiowak tö Jesús kkaté

(Mateo 12.22-30; Marcos 3.20-27)

<sup>14</sup> Etökicha ta Jesús tso' aknama tré'ukshkar wém eköl a. Aknama tö wém e' ttò wöblë'wa. Mik aknama mía, eta' wém ttékane buaë. Wépa kos tö isué, e'pa tkirulune iweblök. <sup>15</sup> Eré ie'pa welepa tö iché: "Beelzebú dör bé, e' diché wa ie' tö ie'pa tré'wekeyal."

<sup>16</sup> Ie'pa welepa skà éna Jesús tsaiak, e' kueki ie'pa tö ikié ie' a' tö ì kè or yi a ese úitö iwà kkachoie tö moki ie' patké'bitu Skéköl tö. <sup>17</sup> Eré ì bikeitseke ie'pa tö, e' suéwa ie' tö, e' kueki ie' tö ie'pa a' iché:

"S' serke ká etkè ki, e' ñi blabatsélor ta inippöke iwakpa è ñita, kè wöklör,

e' ta' ie'pa wákpa è ñi eukewa kè diché ta'ia. Nies ñi yamipa è e' kéká ñippök ñita, kè wöklör, e' ta' ie'pa sulunewa mía siarè. <sup>18</sup> Es nies Satanás mú tö aknamapa tré'wéyal, e' ta' ie' tso' ñippök iwakpa è ta. ¿Wes ì blúie ie' tso' e' sermiia? A' icheke tö aknamapa tré'wéyal ye' tö Beelzebú diché wa, e' kueki e' ché ye' tö. <sup>19</sup> Ye' tö itré'úpaya Beelzebú diché wa, e' ma ¿yi diché wa a' klépa tö itré'wéyalmi? Ie'pa kè a' itrénukyal Beelzebú diché wa. E' kueki ¿wes a' tö ye' kkatèmi tö ye' tö itré'wekeyal Beelzebú diché wa? A' wakpa klépa tö iwà kkacheraë tö a' ttè kè dör moki. <sup>20</sup> Aknamapa tré'wéyalyö Skéköl diché wa, e' ta' e' wà kiane yénoie tö ì blúie Skéköl tso', e' kéwö dewatke a' a.

<sup>21</sup> "Mik wém diché taié tö iu kkö'neke buaë tabè wa, ì wa, eta' ie' iyi kos tso' blëule buaë. <sup>22</sup> Eré mik wém skà datse diché ta' taié shütè ie' tsata, ñippök ie' ta, eta' e' e' aléka iki ta' iyi mik ierblöke e' tsatkoie ena ì skà kos tso' ie' wa, e' yéttsa seraá iyöki, ta ikakmémiitö iyamipa a.<sup>s</sup>

<sup>23</sup> "Yi kè dör ye' sini', ese dör ye' bolök. Yi kè tö ye' kímè obeja kkö'nuk buaë, ese tö obeja po'wekemi.

### Aknama dene wém a

(Mateo 12.43-45)

<sup>24</sup> "Mik wimblu sulusi tréshkar yile a, eta' imía ká sir poë wé kè yi ku' ese ska'. Ie' tso' ká yulök senoie, eré kè ie' wa ikune. E' kueki ie' ibikeitsé: 'Ye' míane wé ye' tréshkar ee' senuk.' <sup>25</sup> Mik ie' demine wém e' a, eta' ie' tö isué tö wém dör wes u shuiriule buaë maneneë es. <sup>26</sup> Eta' ie' mía iyamipa kí yulök döka kul suluë shütè ie' tsata ta' ie'pa kos de senuk wém e' a. Wém e' míane suluë shütè kenet tsata."

§11:22 Ttè i' wa kiane ché tö Jesús e' aléka Satanás ki, e' kueki ie' tö aknamapa tré'wekeyal.

### Ayëcha buaë e' dör yi

<sup>27</sup> Jesús tso' ttök, etä alaköl eköl dur ee, e' tö iché aneule:

—¡Alaköl tö be' tsöö', be' talao', ayëcha buaë e'!

<sup>28</sup> Erë ie' iüté:

—¡Ayëcha buaë shütë, wépa tö Skököl ttë ttsé tä idalöiekerakitö esepa!

### Wépa dör pë' suluë esepa kë tö Jesús tté klö'weta'

(Mateo 12.38-42; Marcos 8.12)

<sup>29</sup> Ie'pa kí ñi dapa'wé Jesús pamik, etä ie' tö iché ie'pa a: “A' dör pë' suluë. A' tö ye' a ikieke tö ì kè or yi a ese uyö iwà kka-choie tö mokí Skököl tö ye' patkë'bitü. Erë ye' tö ilè weraë etökicha ème iwà kkachoie, e' dör wes Jonás tä ibak es. <sup>30</sup> Ì bak Jonás tä e' tö iwà kkayë' Nínive wakpa a tö Skököl tö ie' patkë'bitü ie'pa pattök. Es ñies, ye' dör S'ditsö Alà, e' tö iwà kkacheraë a' a tö mokí Skököl tö ye' patkë'bitü. <sup>31</sup> Aishkuö tä mik a' wöchakirketke a' nuí kí, etä alaköl datse ká bánet diwö tskirke e' o'mik\*\* bak iká blúie, e' e' kóraká Skököl wörkjí a' kkatök tö a' dör pë' suluë. Ká iaiaë ie' dë'bitü datse kamië shütë se' blú bak kiè Salomón wá íyi jcher taië, e' ttò kittsök. Erë íñe tä ye' dur a' shüa, e' dör Salomón tsata, erë a' kè tö ye' ttò iütë. E' kuëkjí alaköl e' tö a' kkateraë. <sup>32</sup> Mik Jonás tö Nínive wakpa paut, e' tö ie'pa er mane'ot'sa Skököl a, erë íñe tä ye' dur íerö, e' dör Jonás tsata, erë a' kè er mane'ü Skököl a. E' kuëkjí aishkuö tä mik a' wöchakirketke a' nuí kí, etä Nínive wakpa e' kóraká Skököl wörkjí a' kkatök.

### Se' wöbla buaë ena se' wöbla suluë

(Mateo 5.15; 6.22-23)

<sup>33</sup> “Kè yi tö bö'wö tskepaka tä ibléwaitö ö ipatkéwaitö kalkuö dikjá. E' skéie se' tö itkekeka kákke se' yamipa datse e'pa wö a ká ñi'woie. <sup>34</sup> Se' wöbla dör wes bö'wö es se' chkà kos a. E' kuëkjí se' wöbla dör buaë, e' tä se' chkà kos e' a ká olo tä buaë. E' dör wes se' er dör buaë es, ì kos yësyësë buaë, ese kí se' er me'rie. Erë se' wöbla dör suluë, e' tä se' chkà kos e' tso' stui a. E' dör wes se' er suluë es, ì kos suluë, ese kí se' er me'rie. <sup>35</sup> A' e' kkö'nú buaë as a' kè e' kütö'ü tö a' wöbla wawër buaë, erë kè iwawër buaë. <sup>36</sup> A' wöbla dör buaë, e' tä ì kos buaë, ese wër buaë a' wa. E' dör wes a' serke wé bö'wö ñarke kekraë ee es, kè ku' stui a.”

### Wéstela ina fariseowakpa ena s'wöbla'uk tté dalöiëno wa wakpa tä

(Mateo 23.1-36; Marcos 12.38-40; Lucas 20.45-47)

<sup>37</sup> Mik Jesús tté one, etä fariseowak eköl tö ie' kiémi chkök iu a. Etä ie' miá demi ee e' tkéser mesa kulé kí. <sup>38</sup> Erë fariseowak e' tö isuë tö kè ie' wá iulà paköne wes ie'pa wöblar es, e' tö ie' tsiriwéka. <sup>39</sup> E' kuëkjí Jesús tö iché ie' a:

—A fariseowakpa, A' dör wes a' tká' kos pa skueke a' tö ikikë è es. A' wër buaë, erë a' er suluë. A' dör akblök-wakpa. A' kí s'yamipa íyi kos e' kianettsa a' è a. <sup>40</sup> ¡A' kè éna ì ane yës! ¿A' kè wá ijcher tö Skököl tö se' chkà yö', e' è tö se' er yö'? <sup>41</sup> S'siarëpa kimú a' íyi wa, etä ì kos atdaë maneneë a' a.

<sup>42</sup> ¡A fariseowakpa, wéstela ina a' tä! Káköla tso' iëno chkè a kiè menta ena ruda ena iskà tso', ese kos tsá meke a' tö Skököl a. Erë a' kè serku' yësyësë

\*\* 11:31 *diwö tskirke e' o'mik*: Si'kuaie tté e' dör sur. Kè se' wá ijcher tö ima e' chëmisö bua'ie se' ttö wa.

s'malepa ta. A' kè tò Skèköl dalëritseta', e' uk a' kawöta ñies.

<sup>43</sup> ;A fariseowakpa, wëstela ina a' ta! Kula' tso' a' ñi dapa'wo wé a kékëpa dalöieräta' esepa a, ese ki a' wöbatsö e' tkökser. A' ki ikiar tò a' shké'wë wës kékëpa taië shké'wë es, wé pë' tso' taië, e'pa wöwa.

<sup>44</sup> ;Wëstela ina a' ta! A' dör wës pö tso' kè jcher yi wa e' bata ki s'shkörami es. Ishu dör ña taië alar suluë, e' kè alar ttsëne s'wa.

<sup>45</sup> S'wöbla'ukwak ttè dalöiëno wa, ese tso' eköl ee, e' tò iché Jesús a:

—A s'wöbla'ukwak, mik be' tò e' ché fariseowakpa a, eta ñies be' tso' sa' chök suluë.

<sup>46</sup> Jesús tò iüté:

—;A s'wöbla'uk ttè dalöiëno wa wakpa, wëstela ina a' ta ñies! A' ttè dalöiëno taië darërëë, ese meke a' tò s'malepa a wà dalöië wës dali ekkéë iè s'ki es, erë a' ulatska è kè tietä'wa a' tò ie'pa kimoie.

<sup>47</sup> ;Wëstela ina a' ta! A' tò Skèköl ttekölpa bak ká iaiäe e'pa pö yuekene pa'ali, erë a' yépa tò ie'pa kótulur. <sup>48</sup> Es a' tso' iwà kkachök tò i wamblë' a' yépa tò, e' dör buaë a' a. A' yépa tò ie'pa kótulur, ta i'ne ta a' tò ie'pa pö yuekene buaë.

<sup>49</sup> “E' kueki Skèköl wa íyi jcher taië, e' tò iyë'atbak: ‘Ye' tò ye' ttekölpa ena ye' ttè pakökwakpa patkeraë Israel aleripa a, eta e'pa welepa tterawa ie'pa tò, ñies welepa skà we'ikeraë ie'pa tò.’ <sup>50</sup> Skèköl ttekölpa taië kótulur a' yépa tò. Mik ká i' yöne kuaë, <sup>51</sup> eta Abel kótwa Caïn tò. E' itöki a' yépa bak tò Skèköl ttekölpa taië kótmi. Ibata kótwarakitö e' dör Zacarias. E' kótwa ie'pa tò ká' tso' íyi moka Skèköl a e' ena iwé e' shusha. Skèköl ttekölpa kos kótulurbak a' yépa tò, e' nuí kierane ie' tò a' ena wépa dör a' es, e'pa a. Moki ye' tò a' a iché tò Skèköl ttekölpa kos kótulur a' yépa bak e'pa tò, e' nuí kueki a'

ena wépa dör wës a' es, esepa weirdaë siarë.

<sup>52</sup> “;A s'wöbla'uk ttè dalöiëno wa wakpa, wëstela ina a' ta! A' wa Skèköl yëkkuö tso', e' dör wës ukkö yottsä tso' es as se' wa ijcher tò wës Skèköl dör. Erë e' kkëuk a' tso' a' malepa yöki. A' kè wa ijcher moki tò wës Skèköl dör, ñies wépa ki e' kiane jchenoie, esepa wöklö'weke a' tò as ie'pa kè wa ijcher.”

<sup>53</sup> Eta Jesús e' yéttsä u e' a. S'wöbla'uk ttè dalöiëno wa wakpa ena fariseowakpa uluneka taië ie' ki. Ie'pa tò ie' chakémi taië ttè darërëë wa. <sup>54</sup> Ie'pa éna ie' klö'wakwa ittè ki ikkatoie.

### A' e' kkö'nú fariseowakpa yöki

(Mateo 10.26-27)

**12** <sup>1-3</sup> Eta pë' dapane taië Jesús ska' döka miles, e'pa tërke ñi mik taië. Jesús tò ichémi ittökatapa a kewe: “A' e' kkö'nú fariseowakpa pan wölöwoka yöki. E' wà kiane ché tò a' e' kkö'nú wës ie'pa ser e' yöki. Ie'pa e' wamblö suluë, erë ie' òrak tò ie'pa dör buaë s'malepa tsata. Kè i ku' blëulewa ese kè kkayëpawä aishkuö ta. Ese kos jcherdane. Ì cheke a' tò bikeitsè a' tò tò kè ittëne, ese tterane sulitane tò. Ì kos cheke a' tò asas ukkö wötëulewa shua, ese yërdane aneule sulitane kukua. E' kueki a' e' kkö'nú as a' kè e' ò wës ie'pa es.

### Yi yöki s'kawöta suanuk

(Mateo 10.28-31)

<sup>4</sup> “A ye' yamipa, kè a' suanuk yi tò s'ttetä'wa esepa yöki. Ie'pa tò s'ttëwa, erë e' ukuöki ta kè wës ie'pa a se' onukia. <sup>5</sup> Erë süyö a' a iché tò yi yöki a' ké suanuk. A' suanú Skèköl yöki. Ie' tò a' ttëwami, e' ukuöki ta ie' wa diché ta' a' uyowa bö' ké a. Ye' tò iskà chène a' a, a' suanú ie' yöki.

<sup>6</sup> “Dúla skel tuë tottola, inuköl böt wöshkila è, erë ie'pa kè ska' Skèköl er chöta'wa. <sup>7</sup> Ñies a' kè ska' ie' er chöpawa.

Dò a' tsakò bitò tso' shtaoule ie' wà. Ie' a' ta' a' tuè tajë tkòka dula tso' tajë ese tsata, e' kuëki kè a' suanuk.

### **Wépa kè jaène Jesús kî**

(Mateo 10.32-33; 10.19-20)

<sup>8</sup>“Yi e' chò sulitane wòrkî tò ie' dör ye' dör S'ditsö Alà, e' ttökata, e' ta' ese cheraëyö Skëköl biyöchökwakpa wòrkî tò ie' dör ye' ttökata. <sup>9</sup>Erë yi tò iblé sulitane wòrkî tò ie' kè dör ye' ttökata, e' ta' ñies ibleraëyö Skëköl biyöchökwakpa wòrkî tò ie' kè dör ye' ttökata.

<sup>10</sup>“Yi tò, ye' dör S'ditsö Alà, e' ché suluë, e' nuí olo'yèmi Skëköl tò ikî. Erë yi tò Wiköl Batse'r ché suluë, e' kè kî inuú olorpa.

<sup>11</sup>“Mik pè' tò a' klò'wéwà tsémi kkatè ye' ttè kuëki judiowak ñi dapa'wò wé a' ö s'shulökwakpa wòrkî ö s'wòkirpa wòrkî, eta' kè a' tkinuk tò ì chèmi a' dör e' tsatkoie. <sup>12</sup>E' wòsha ta' Wiköl Batse'r tò ttè eraë a' a' ché ie'pa a.”

### **Inuköl blú eköl e' er me'rie inuköl è kî**

<sup>13</sup>Pè' dapane tajë e' eköl tò Jesús a' iché:

—A s'wòbla'ukwak, ichó ye' èl a' tò sa' yé' íyi ukuò atë kos e' blatóò, ye' icha mú ye' a.

<sup>14</sup>Jesús tò iuté:

—A wèm, ye' kè dör a' íyi shulökwak, ñies ye' kè dör a' íyi blatökwak.

<sup>15</sup>Ñies Jesús tò iché:

—Sene chók e' kè dòku' s'ulà a' íyi tso' s'wà tajë ese wa. E' kuëki a' e' kko'nú íyi kkechè tajë ese kos yöki.

<sup>16</sup>Eta' Jesús tò ttè kleé ie'pa i' es: “Wèm eköl dör inuköl blú tajë, e' tò íyi wówé tajë shütë iká kî. <sup>17</sup>Ie' tò ibikeitsè: ‘Ye' íyi wöne tajë ¿wes e' wèmi ye' tò? Kè ichë'kaia iwé a.’ <sup>18</sup>Eta' ie' tò iché: ‘Ye' éna iane tò wes ye' tò iwèmi. Súyö iwé tkëttsa ské yuèkane pa'alí, bérie shütë, e' a' ye' iyiwò kos ena ì kos tso' ye' wà e' blekeyö. <sup>19</sup>E' ukuökî ta' ie' tò ibikeitsé:

íyi tso' tajë ye' wà bléule, e' mik ye' sermi dò duas tajë. E' kuëki sú ye' enù, chkö, di'yò, tse'r buaë.’ <sup>20</sup>Erë Skëköl tò iché ie' a: ‘Be' kukuò darërëë, béré nañewe be' duòwaraë, eta' ì kos tso' be' wà bléule, e' atë pè' kuá'kî ulà a.’” <sup>21</sup>Eta' Jesús tò iché: “Es itkóraë wé tò íyi blé tajë iwák a' ká i' a, erë kè serku' wes Skëköl kî ikiane es, ese wák dör siarë Skëköl a.”

### **Kè a' tkinuk ì kî**

(Mateo 6.25-34)

<sup>22</sup>E' ukuökî ta' Jesús tò iché ittökatapa a: “Ye' tò a' a' iché: Kè a' tkinuk ì kiane a' kî senoië, chkeie, datsi'ie, ñie, ese kos kî. <sup>23</sup>S'tso' tse'ka e' kè dör chkök ème, ñies s'chkà kè dör datsi' è ioie. <sup>24</sup>Dù saú a' tò. Ie'pa kè tò ì kuantketa' ì wòshmeta' kè tò chkö bleta', erë Skëköl tò ie'pa tieke. E' yita' ie' a' ta' a' tuè tajë dù kos tsata. <sup>25</sup>A' tkirke tajë e' kî, e' kè tò a' a' kawò kî mepa senoië ekuölò è. <sup>26</sup>E' dör tottola erë kè a' a' ior. ¿Wes a' tkirke íyi malë kî?

<sup>27</sup>“A' tò ma'ma wòrkua bua'buuála ese saú wes italar, kè kanëblöta', kè datsi' yueta'. Eré blu' bak kiè Salomón, e' wà íyi ulitane bua'buuáë bak tajë, erë ye' tò a' a' iché tò ie' datsi' bua'buu, e' kè wër buaë wes ma'ma wër es. <sup>28</sup>Kakò suésö j'ñe, bule ta' ñanewa, erë Skëköl tò ik-ítkeke buaala iwòrkua wa. Ie' tò kakò kítkeke es, je' yita' ie' tò a' kianeia' erblò buaë ie' mik, e' paieraë! <sup>29</sup>E' kuëki kè a' er mukwà chkö kî, di'yè kî, ese kos kè kî a' tkinuk. <sup>30</sup>Pè' kè tò Skëköl dalöiè esepa tkirke tajë íyi kos ekké kî. Erë ì kos kiane a' kî e' jchertke a' Yé wà. <sup>31</sup>E' skéie ì kos blúie Skëköl tso' e' kî a' er mú keweie. A' tò iwé es, e' ta' ñies íyi ñekkë dóraë a' ulà a.”

### **Íyi buaë bleke ká jai a**

(Mateo 6.19-21)

<sup>32</sup>“A ye' obejapala, kè a' suanuk ì yöki. A' kè dör tajë, erë S'yé er buaë chöke a' a. Ie' tò a' shushtë as ì blúie ie' tso' e' dò a'

ulà a ie' tã ñita. <sup>33</sup> Ì tso' a' wã, e' wataúttsa tã iské mú s'siarëpa a. Ì dör buaë Skëköl a, e' ú, etã es a' a íyi bua' bua blërdaë kã jai a wës inuköl blësö, ì kè nurta' wã, ese a es. Eë akblökwakpa kè a iekiblë nuk, ñies powak kè a ikatanukwã. <sup>34</sup> Wë a' íyi bua' bua tso' eë a' er me'rie ñies, e' kueki a' íyi bló kã jai a."

### A' tso' erki Jesús datsene e' panuk

<sup>35-36</sup> "A' tso' erki wës kanè mésopa tò iwökir tso' ulabatsè këwö tkö'uk datsene, ese panè es. Ie'pa tso'tke ie' panuk datsi' iënetke ikanewoie, ib'wö tskékatke buaë. Mik iwökir de tã ichaké ukkò a, etã bet tã ie'pa ukkò ppée ie' a. <sup>37</sup> Wépa kué iwökir tò ttsë'ka ie' panuk mik ide etã, ayëcha bua esepa. Moki ye' tò a' a ichè tò ie' e' paiöraë wës chkè watiökwak es tã ikanè mésopa keraëitö e' tköksër kula' ki tã ie'pa tieräëitö chkè buaë wa. <sup>38</sup> Kanè mésopa kué iwökir tò ttsë'ka ie' panuk kã shaböts alè ö kã ñir-ketke alè etã, ayëcha buaë esepa. <sup>39</sup> Erë a' éna íanú tò u wák mú wã ijcher tò wekkè akblökwak datse, e'ma ie' kè tò kawö mepa yi a dökwa' íyi ekiblök. <sup>40</sup> Es ñies ye' dör S'ditsö Alà, e' datsene mik a' kè ku' ye' panuk etã, wës akblökwak es. E' kueki a' tso' erki."

### Kanè mésopa bül eköl dör buaë, eköl dör suluë

(Mateo 24.45-51)

<sup>41</sup> Pedro tò Jesús a' ichaké:

—A Skëkëpa, ttè wakleébö ¿e' dör sa' è a ö sultane a?

<sup>42</sup> Ie' iüté: "Kanè méso yësyesë kabikeitsö buaë, ese mekekã iwökir tò imalepa kuebluie ie'pa tiök kekraë mik kè iku' e' dalewa. <sup>43</sup> Iwökir dene tã ikuéitö iuk wës iyëniã es, e' tã ayëcha e' dör buaë ie' a. <sup>44</sup> Moki ye' tò a' a ichè tò kanè méso e' merakaitö, ie' wã íyi tso' kos, e' kuebluie. <sup>45</sup> Erë kanè méso ñe' erbikö tò 'ye' wökir kè döpane bet.' E'

kueki ie' tò imalepa wëpa ena alakölpa ppémi darërëë. Ñies ie' chkémi, di'yémi taië ena ie' ttémi blo' wa. <sup>46</sup> Erë idiwö ena ikéwö kè wa ie' ku' ipanuk, etã iwökir dörane tã iwe'ikeraitö siarë wömerattsã weinuk wës pé' kè erblöta' Skëköl mik esepa es.

<sup>47</sup> "Kanè méso wë wa ì kiane iwökir ki, ese jcher buaë, erë ie' kè wa ì one yës, kè tò ittò dalöië, ese we'ikeraë iwökir tò siarë. <sup>48</sup> Erë kanè méso wë kè wa ijcher tã e' tò ì suluë wamblé, e' tã ese we'ikeraë iwökir tò erë kè taië. Wépa a imène taië kanebloie Skëköl a, esepa a ikieraëitö taië. E' sù wépa a imène taië shütë, esepa a ikieraëitö taië shütë. Kos se' a imène e' mik se' a ichakirdaë.

### Jesús tté kueki se' ñi blabatsöraë

(Mateo 10.34-36)

<sup>49</sup> "Ye' dë'bitü kã i' a s'aláuk wës bö' taië wöbatskã ese tò s'alawè es, e' mú wöbatskatke. <sup>50</sup> Erë kewe tã ye' weirdaë siarë, e' kawöta' dalë'ttsëyö, e' tò ye' eriaweke taië dô mik itka etã. <sup>51</sup> ¿A' ibikeitsö tò ye' dë'bitü kã i' a as a' ser bèrë ñita? Ye' ichè, au. E' skéie ye' dë'bitü a' blabatsök. <sup>52</sup> I' tã ñnak tkënewamitke, se' serke skel ñita, e' ñi blabatsöraë ye' tté kueki, bül ñippöraë mañal tã, mañal ñippöraë bül tã. <sup>53</sup> Iyé ñippöraë ilà wëbie tã ena ilà ñippöraë iyé tã; imi ñippöraë ilà busi tã ena ilà ñippöraë imi tã; yäk ñippöraë iyäk tã."

### Ì weke Jesús tò e' wã kè ane ie'pa éna

(Mateo 16.1-4; Marcos 8.11-13)

<sup>54</sup> Ñies Jesús tò ie'pa a' iché: "Mik a' isué tò kalí monekã diwö mi'ke e' ëkã, etã a' tò icheke 'kalí yërdaë', etã moki iwà yërdaë. <sup>55</sup> Mik a' ittse' tò siwa' datse kã sir poë e' ëkã, etã a' tò icheke 'diba ardaë', etã moki iwà ane. <sup>56</sup> ¿A' e' ò suluë! A' éna íane mik kalí yërmi, mik diba armi, erë ì uk ye' tso' iwà kkachoie tò yi

dör ye', ¿wes kè e' wà ane a' éna? ¡A' kè wà ì jcher tajë wes a' ibikeitseke es!"

### A' ñi shulö

(Mateo 5.25-26)

<sup>57</sup> “¿Ì kuëki a' kè a' ibikeits tö ì dör buaë, ì dör suluë Skëköl a? <sup>58</sup> Yile tö a' kkaté nuì kuëki e' wà a' mí s'shulök wé a, e' tã ima'ú shulè ie' tã ñalã kã as ie' kè tö a' wömüttsa s'shulökwak ulã a' we'ikè. A' kè tö iwè es, e' tã s'shulökwak tö a' wömerattsa s'shkëkipa ulã a' tã e'pa tö a' wöterawã s'wöto wé a. <sup>59</sup> Ye' tö a' a' ichè tö kè a' döpattsã dò mik a' tö nuì e' patuéttsã seraã eta. E' kuëki a' er mane'ú Skëköl a' kam iwã dò a' kã e' yöki.”

### S'kawötã er mane'uk Skëköl a

**13** E' è kèwö tã pè' welepa tso' ee, e'pa tö iché Jesús a' tö Galilea wakpa wëpa welepa tso' iyiwak jchök mè Skëköl a' iwé a. E' dalewa Pilato tö ie'pa ttökulur patké tã ipé shutuëka iyiwak jchéne e' pé tã.

<sup>2</sup> Jesús tö iché ie'pa a: “¿Ima a' erbikò? ¿Galilea wakpa kötulur ñe'pa dör pè' sulusipa tkòkã imalepa tsatã, e' kuëki ie'pa weine es? <sup>3</sup> Ye' tö iché au, kè idör es. Erë a' kè er mane'ù, e' tã ñies a' wákpa kos duölurdaë. <sup>4</sup> Ñies u' tso' Jerusalén kiè Siloé, e' yöule kãkëë ák wa, mik e' anebitü anekã ie'pa kã, eta' ie'pa duo döka dabom eyök kã pãköl (18). ¿Ima a' erbikò? ¿Ie'pa duolur ñe'pa kã inuì tso' tkòkã Jerusalén wakpa malepa tsatã? <sup>5</sup> Ye' tö a' a' ichè au, kè idör es. Erë a' kè er mane'ù Skëköl a, e' tã ñies a' duölurdaë.”

### Higuera klö tté wà pakè Jesús tö

<sup>6</sup> Jesús tö tté kleé ie'pa a' i' es: “Wëm eköl wã kal kiè higuera tso' tkëule elka idali shuã. Ie' mía iwö yulök, erë kè iwö tã' yës. <sup>7</sup> E' kuëki ichéitö idali kk'ö'nukwak a: 'Tã tã duas mañal, ye' de këkraë higuera wö yulök, erë kè iwö tã'.

E' kuëki itööbö as kè iku' àr éanas.' <sup>8</sup> Erë idali kk'ö'nukwak tö iché: 'A' këkëpa, as iariã duas ek. Súyö iwí paiklè kapöli tkèkã iki. <sup>9</sup> E' wa sò isué tö duas ètö tã iwörmí e'ma buaë idir. Erë kè iwöne, e' tã iteerasö.”

### Alaköl eköl wököulewã e' bua'wëne Jesús tö

<sup>10</sup> Eno diwö etã Jesús tso' s'wöbla'uk Skëköl tté wa ñi dapa'wo wé etkue a. <sup>11</sup> Eta' ee alaköl tso' eköl tteke wimblu sulusi tö wököulewã. Ie' kirirke es, e' kã duas de dabom eyök kã pãköl (18). Kè ie' a' e' wödurkã yësyësë. <sup>12</sup> Mik Jesús tö isué, eta' ikiéitö e' ska' tã ichéitö ia:

—A' tayë, be' buanene. Duè tö be' kiri'weke, e' ulã a' be' tkashkar.

<sup>13</sup> Eta' ie' ulã mékã iki tã iwödunekane yësyësë tã Skëköl kíkëkamiitö tajë. <sup>14</sup> Erë Jesús tö alaköl bua'wëne eno diwö a, e' kuëki judiowak ñi dapa'wo wé e' wökir ulunekã iki tajë. E' kuëki ie' tö iché pè' dapane ee' e'pa a:

—Domingo etö shuã kã tso' kul. Kã teröl dör se' a' kanebloie. Kã teröl shuã a' shkó ìe' bua'wëne. Kè a' kine eno diwö a' bua'wëne.

<sup>15</sup> Jesús tö iché ie' a:

—¡A' e' ò suluë! Eno diwö a' a' ulitane tö a' iyiwak wöttseeke tã itsekemi di' yök. <sup>16</sup> Tayë i' dör Abraham aleri, e' tso' klöulewã Satanás ulã a' döka duas dabom eyök kã pãköl (18) wes iyiwak moulewã es. Erë ì'ne dör eno diwö, erë ¿wes a' kè kã ikiane tö iwöttseeyö aknama yöki?

<sup>17</sup> Mik Jesús tö e' ché, eta' ibolökpa jaënekã tajë. Erë pè' malepa tsë'nerak buaë, ì buaë kos wé Jesús tö e' kuëki.

### Mostaza wö tté

(Mateo 13.31; Marcos 4.30-32)

<sup>18</sup> Ñies Jesús tö iché: “Ì blúie Skëköl tso' ¿wes e' dör? ¿Tté wé wa yö ikleëmi? <sup>19</sup> E' dör wes mostaza wö tkéwã wëm eköl tö iyök a' es. Mostaza wö dör tsir-

lala, erë itskine talane bërie kalie, ese ulà tsakà dù u yuöke.”

### Pan wölowoqa tté

(Mateo 13.33)

<sup>20</sup> Ñies Jesús tò iché: “Ì blúie Skéköl tso' çttè wé wa yö ikleèmi? <sup>21</sup> E' dör wes pan wölowoqa wötué tayë tò harinachka mañayök a es. E' tò harinachka, e' kos wölowéka tajë.”

### Ukkö tsitsir

(Mateo 7.13-14,21-23)

<sup>22</sup> Jesús dami Jerusalén ñalé wa, etä eë ká tso' tseë, ká blublu ena ká tsitsir, e' wakpa wöbla'weke Jesús tò. <sup>23</sup> Etä yile tò ie' a ichaké:

—A këképa çyëne tò kè yi tsatkërpa tajë?

Ie' iüté:

<sup>24</sup> —Tsatkè wékkö dör tsir. Tajë pë tò ima'weraë shkökwaia, erë kè ie'pa dö-pawa. E' kueki a' e' diché ió shkökwaia. <sup>25</sup> Mik u wák e' kéka tò ukkö wötéwa, etä a' tso' urki, e'pa tò ie' kieke ukkö a. A' tò ichakeke: ‘A këképa, be' ukkö kkóppóö sa' a.’ Erë ie' tò a' iüteraä: ‘Kè ye' wä a' suule.’ <sup>26</sup> Etä a' tò icheraë ie' a: ‘Sa' chka' be' ta. Sa' di'ya' be' ta. Be' tò sa' wöbla' sa' ká a.’ <sup>27</sup> Erë ie' tò a' iüteraä: ‘Kè ye' wä a' suule. A' dör ì sulu wamblökwakpa, a' yúshka bánet ye' yöki.’ <sup>28</sup> Mik a' tò Abraham, Isaac, Jacob ena Skéköl ttekölpa kos e'pa sué ì blúie Skéköl tso' e' a, erë a' uyanettsa bánet, etä a' iuraë siarë a' kà yilidawa weine kueki. <sup>29</sup> S'ditsö dat-se ká wa'ñe, esepa dóraë chkök buaë ì blúie Skéköl tso' e' a. <sup>30</sup> Es se' welepa kè dalöiërta' ká i' a, esepa dalöiërdaë tajë aishkuö ta. E' sù se' welepa dalöiërta' tajë ká i' a, esepa atdaë ibataie aishkuö ta.

### Jesús eriane Jerusalén wakpa dalërmik

(Mateo 23.37-39)

<sup>31</sup> E' wöshä ta fariseowakpa welepa de Jesús ska' ta ichéitörak ia:

—Herodes éna be' ttakwa, e' kueki be' yúshka ká bánet.

<sup>32</sup> Jesús tò ie'pa iüté:

—A' yú ta ichó s'kit'ö'ukwak ñe' a: ‘I'ñe ena bule ye' tso' aknamapa trë'ukyal, ñies s'bu'ukne, böiki ta ye' kanè ene.’ <sup>33</sup> Ye' mitke i'ñe, e' shkòmi bule böiki tkörö Jerusalén wé ie'pa wöblane Skéköl ttekölpa bak e'pa ttökulur ee, e' kueki ye' kè ttepawa íe.

<sup>34</sup> ¡A Jerusalén wakpa, Skéköl ttekölpa kos ttekewa a' tò kekraë! ¡Ñies ittè pakökwakpa patkeke ie' tò a' a, e'pa ttekewa a' tò ák wa! ¡Wekkë ye' erkië tò ye' mú a' dapa'wè e' ska' wes dakro mitchke tò ila'rla dapa'wè ipik dikia es, erë kè a' ki ikiane yës! <sup>35</sup> Ye' ttò ttsó, Skéköl kè tò a' ká kk'ö'nepaia. Ye' tò a' a ichè tò a' kè tò ye' suëpaia dò mik ye' dene etä. E' kéwö ska' ta a' tò ye' cheraë: ‘¡Ayëcha buaë yi datse Skéköl ttö wa e'!

### Wëm eköl iënekä tajë e' bua'wé Jesús tò

**14** Etökicha ta eno diwö a Jesús mía chkök fariseowakpa wökir eköl, e' u a. Etä eë fariseowakpa welepa tso' iweblök krereë ikkatoie ilè ki. <sup>2</sup> Etä wëm eköl kirirke iënekä tajë, e' de dur Jesús wörki. <sup>3</sup> Etä Jesús tò ichaké s'wöbla'uk ttè dalöiëno wa wakpa a ena fariseowakpa a:

—¿Kawö ta se' a s'bu'ukne eno diwö a?

<sup>4</sup> Erë ie'pa kè wä ie' iütëne yës. Etä Jesús tò wëm e' kl'ö'wé ta ibua'wéitö ta ichéitö ia: ‘Be' yúshka.’ <sup>5</sup> Etä ie' tò iché fariseowakpa a:

—A' alà ö a' baka anemi di' biule uk a eno diwö a, e' ta bet a' mía iyöktsa.



<sup>6</sup> Ie'pa kè a ie' iutène yës.

### Skawöta e' ökwa s'malepa yöki

<sup>7</sup> Jesús isué tö pè' shkeñaule chkök, e'pa welepa tö kula' tso' kékëpa dalöier-ta' taië, esepa a ese shushtë e' tkoie. E' kuëki ie' tö ie'pa patté i' es:

<sup>8</sup>—Mik yile tö a' wele shkeñé ulabatsè kèwö tkö'ük, etä kè a' e' tköksër kula' tso' kékëpa taië a ese kulé ki. Isalema kékëpa dalöier-ta' taië a' tsata ese de, <sup>9</sup> etä yi tö a' shkeñé, e' tö ichè a' a: 'Be' we'ikèyö, kula' se mú kékëpa i' a e' tkoie.' Etä a' jaërkami taië, miraë e' tköksër kula' tso' se' esepa a ese ki. <sup>10</sup> E' skéie, mik yi tö a' shkeñé, etä a' e' tköksër kula' tso' se' esepa a ese kulé ki. Es mik yi tö a' shkeñé, e' de a' ska', etä ie' tö ichè be' a: 'A yami, be' yú e' tköksër kula' tso' kékëpa a, ese kulé ki.' Es pè' kos tso' ee, e'pa tö a' dalöieraë wes kékëpa taië es. <sup>11</sup> Yi e' ttsòkà taië, ese ardawa diöshet, erë yi e' wöëwa, ese kïkardakà taië.

<sup>12</sup> Wëm tö ie' shkeñé chkök, e' a Jesús tö iché nïes:

—Mik be' tö pè' shkeñeke chkök be' ska' ö di'yök be' ska', etä be' sini'pa ena be' ëlpa ena be' yamipa malepa ena inuköl blúpa serke tsinet be' pamik, esepa kos kè shkeñar. Ie'pa tö be' shkeñemine, etä es be' ulà a iské de-tke. <sup>13</sup> E' skéie mik be' kawö tkö'uke, etä s'siarëpa ena s'yulépa ena s'klò bachiule-wa ena s'wöbla kè wawër, esepa shkeñú. <sup>14</sup> Ie'pa kè a iské menukne be' a. Erë mik s'ser yësyësë, esepa duowa shkeneka aishkuö ta, etä Skököl tö be' a iské meraë, e' tö be' tse'weraë buaë.

### Kéwö taië e' tkö'wé

(Mateo 22.1-10)

<sup>15</sup> Wëm eköl tkër chkök mesa ki ie'pa ta, mik e' tö i' ché Jesús tö e' tse, etä ie' tö iché ia:

—Wépa kawö tkö'weraë buaë aishkuö ta i' blúie Skököl tso' e' a, ayëcha buaë esepa.

<sup>16</sup> Jesús tö ie' a iché:

—Wëm eköl tö kawö tkö'weke taië ta ie' tö taië pè' shkeñé. <sup>17</sup> Mik ikawö tkö'uke e' diwö de, etä ie' tö iché ikanè méso a: 'Se' kawö tkö'uke, e' tso'tke kanequle e' kuëki be' yú s'kiule kos e'pa a ichök tö a' shkó kawö tkö'ük.' <sup>18</sup> Erë ie'pa ulitane tö iché kanè méso a: 'Wéstela be' ta, erë sa' wötkërke taië, kè sa' dòpa.' Itsä tö iché ie' a: 'Erpa ye' tö ká tué e' sauk ye' mi'ke, e' kuëki ye' kè dòpa. Ye' kköchò be' a tö e' olo'yó ye' ki.' <sup>19</sup> Iskà tö iché: 'Baka wëñe tuéyö kanebloie dabop, e' wà ma'uk ye' mi'ke, e' kuëki ye' kè dòpa. Ye' kköchò be' a tö e' olo'yó ye' ki.' <sup>20</sup> Iëköl tö iché: 'Írö ye' ulabatséwa, e' kuëki kè ye' dòpa.' <sup>21</sup> Ikanè méso biteane iwökir ska' ta i' kos ché ie'pa tö ie' a e' chéne ie' tö. Etä u wák ulunekà taië ta ichéitö ia: 'Be' yú bet ñalà kibi ki, nïes ñalà malepa ki, ta s'siarëpa ena s'yulépa ena s'wöbla kè wawër ena s'klò bachiule-wa, esepa tsúbitu íe kawö tkö'ük ye' ta.' <sup>22</sup> Béré ta kanè méso dene, e' tö iché iwökir a: 'A kékëpa, i' uk be' tö ye' patké, e' wétke ye' tö, erë be' u kam wà iër.' <sup>23</sup> Etä iwökir tö iché ie' a: 'Be' skà yúne u tso' bánet ese ñalé kos wa, etä pè' kó shkökwa ye' u a as iwà iërka.' <sup>24</sup> Ye' tö iché tö wépa shkeña' ye' tö kewe, e'pa kè wéne kawö tkö'upa ye' ta.'

### Jesús ttökataie sene e' dör darërë

(Mateo 10.37-38)

<sup>25</sup> Taië pè' mir Jesús itöki ta ie' e' wötrée ta ichéitö ie'pa a: <sup>26</sup> "Yi senak ye' ttökataie, erë kè iëna ye' dalër iyé, imì, ilaköl, ila'r, iëlpa, ikutapa tsata, nïes iwák tsata, e' ta ese kè dòpa ye' ttökataie. <sup>27</sup> Yi kè e' chò weinuk dò ittèwa krus mik ta iser wes ye' ttökata es, ese kè dòpa ye' ttökataie. <sup>28</sup> Ichösö tö a' wele éna u yuak bërie. Kewe ie' e' tköksër ibikeitsök tö

kos u e' tuè isuoiè tò inukòl dömikà ò kè idòpakà iyuoie. <sup>29</sup> Erè ie' kè wà ibikeitse kewè, e' tã ie' tò ichkí tuléwã tã inukòl kè tã'ia iyuoie. Sulitane tò isuèmi, e'pa tò ie' wayueraè. <sup>30</sup> Ie'pa tò ichèmi: 'Wèm wí u yuèmi, erè kè ie' a iyòneia.' <sup>31</sup> Nies ká blu' wele wã ijcher tò ká kuã'ki blu' datse ñippòk ie' tã, e' tã ie' e' tkòraser ibikeit-sòk kewè: 'Ye' wã ñippòkwakpa tso' dòkã 10.000. Ye' bolòk wã ñippòkwakpa tso' dòkã 20.000. ¿Ye' e' alòmikã ikí ò kè ye' e' alòpakã ikí?' <sup>32</sup> Ie' isué tò ie' kè e' alòpakã ibolòk kí, e' tã kam ibolòk dò tsinet, e' yòkí ie' tò ibiyòchòkwakpa patkeraè ibolòk a ichòk tò '¿wes sò ishulèmi as se' ser bèrè ñitã?' <sup>33</sup> E' kuèkí yi senak ye' ttòkataie ese tò iwà bikeitsò kewè. Es a' kè e' chò ì kos tso' a' wã e' mukat, e' tã kè a' dòpa ye' ttòkataie.

### Dayè kè kke tã'ia

(Mateo 5.13; Marcos 9.50)

<sup>34</sup> "Dayè dör buaè, erè kè ikke tã'ia, e' tã kè ibuarpaiane. <sup>35</sup> Kè ibua'ia iyòk kapeyoie. Kè ibua'ia iie. E' dör buaè kèumi è. ¿Yi éna ye' ttò ttsak, e'ma ikukuebló bua'ie!"

### Obeja kkò'nukwak e' tté

(Mateo 18.10-14)

**15** Kekraè inukòl shtòkwakpa Roma wòkirpa a, esepa dòke taiè Jesús ska' ikittsòk. Nies pè' malepa cheke fariseowakpa tò tò e'pa dör pè' sulusipa, esepa dòke taiè Jesús ttòke e' kittsòk. <sup>2</sup> Fariseowakpa ena s'wòbla'uk tté dalöièno wa wakpa tò Jesús chémi suluè ñi a. Ie'pa tò iché:

—Ie' tò pè' sulusipa suèke buaè, ñies esepa tã ie' chkòke.

<sup>3</sup> E' kuèkí tté kleé ie' tò ie'pa a i' es: <sup>4</sup> "A' isie wã obeja tso' dòkã cien, e' etò chowa, e' tã a' tò imalepa dòkã dabom suliyòk kí sulítu (99), e' meraat iké a tã a' miraè ichowa e' yulòk dò wé a' tò ikué eè. <sup>5</sup> Mik a' tò ikué, etã a' tts'erdaè

buaè tã a' tò ikerakã pperakã kuli' kí. <sup>6</sup> Mik a' dene iu a, etã a' yamipa ena pè' serke a' o'mik, e'pa kiera a' tò a' u a tã a' tò icheraè ie'pa a: 'Ye' obeja ché'wa, e' kuéneyö. A' ttsé'nú buaè ye' ta.' <sup>7</sup> Es ñies ye' tò a' a' ichè tò mik pè' sulusi ekòl, ese er mane'wé Skèkòl a, etã e' tò Skèkòl tso' ká jaì a, e' ttsé'wé buaè shute tkòkã imalepa dòkã dabom suliyòk kí sulítu (99) e' bikeitsò tò ie'pa dör yèsyèsè, kè kawòtã er mane'uk, esepa tsatã.

### Inukòl chowa, e' tté

<sup>8</sup> "Nies alakòl wã inukòl tso' dòkã dabop, e' chowa etk, e' tã ie' tò bò'wò tskéka iushkléttsã tã iyulé bua'iewã tã iwà kuéitö. <sup>9</sup> E' ukuòkí tã ie' tò iyamipa ena pè' serke io'mik e'pa kié iu a tã ichéitö ie'pa a: '¿A' ttsé'nú buaè ye' ta! Ye' inukòl ché'wa, e' kuéneyö, e' kuèkí e' kéwö tkò'üsö ñitã.' <sup>10</sup> Es ñies ye' tò a' a' ichè tò mik pè' sulusi ekòl er mane'wé Skèkòl a, etã e' tò Skèkòl biyòchòkwakpa ttsé'weke buaè shute."

### Alà e' wamblò suluè e' nú olo'yé iyé tò iki, e' tté

<sup>11</sup> Nies Jesús tò ikleé ie'pa a tté i' wa: "Kèkèpa ekòl alà dör bøl wèpa. <sup>12</sup> Ilà tsirla tò iché iyé a: 'A yéwö, ì mekeat be' tò ye' a mik be' duòkewatke etã, e' mútke be' tò ye' a.' Etã iyé iyi kos, e' blabatséitö méitö ila'r bøl a ekòl ekòl kos ikawòtã imuk ia ekkè. <sup>13</sup> Ká kè bak taiè, etã ì kos méitö ilà tsirla a, e' watuéttsã ilà tò, e' ské klò'wéitö tã imã ká kuã'ki. Eè ie' tò ie' inukòl kos we'ikéwa iyi sulu è kí. <sup>14</sup> Mik ie' inukòl enewa, etã bli ane taiè ká e' kí, e' kuèkí ie' ttémitke bli tò. <sup>15</sup> Eè tã ie' mĩa kanè yulòk ká e' wakpa ekòl ska'. Etã wèm e' tò ie' a kanè mé köchi tiök. <sup>16</sup> Ie' duéwã bli wã suluè. Köchi chkè kè ñano se' a ese ñakwã ie' éna, erè kè yi tò ie' a imè. <sup>17</sup> Bata ekkè tã ie' tò ibikeitsé: '¿Iók ye' e' tótker bli wã íe? Wèkkè ye' yé u a kanè mésopa tso', e'pa wã chkè tso' taiè.

<sup>18</sup>Ye' míane ye' yé ska', tã ye' tò icheraé ie' a: A yéwö, ye' tò ì sulu wamblé Skéköl kî, ñies be' kî. <sup>19</sup>Ye' jaéne taijè. Ye' kiök be' alà, e' kè dör ye' siarla e' a. E' skéie ye' saú wes be' kanè mésopa suekebö es.' <sup>20</sup>Etã ie' e' kéka mia iyé ska'.

“Mik idökemitke iyé ska', etã iyé wö de iska' tã idoiã kamié tã ie' wa iwër siarè. Ie' tunemi ñinaletsuk tã ipakl'owéwaitö iwöalattseitö. <sup>21</sup>Etã ilà tò iché ie' a: 'A yéwö, ye' tò ì sulu wamblé Skéköl kî ñies be' kî. Ye' jaéne taijè. Ye' kiök be' alà, e' kè dör ye' siarla e' a.' <sup>22</sup>Erè iyé tò iché ikanè mésopa a: 'Datsi' bua'ie yuló iókã ie' kî bet, tã ula'tsio iówa tã klökkuó iókã ikî. <sup>23</sup>Baka pupula bua'buaya yuló tã ittówa. Ye' alà dene e' kéwö tk'öwekesö. <sup>24</sup>Ye' alà i' dene, e' dör wes ie' du'wa e' shkenekane es. Ye' alà minea ye' yöki kè tté ttsëneia ye' wa, e' dene e' kueki ikéwö tk'ö'üsö.' Etã ie'pa tò ikéwö tk'owémi taijè.

<sup>25</sup>“E' dalewa ilà kibi tso' kaneblök kañika. Mik ie' datse e' de tsinet u a, etã ie' tò ittse tò iyamipa alárkerak taijè blarkerak, klötöke taijè. <sup>26</sup>Etã ie' tò kanè méso kié eköl tã ichakéitö: '¿Ì kéwö tk'öweke a' tò ekké?' <sup>27</sup>Etã kanè méso tò ie' iuté: 'Be' èl dene, e' kueki be' yé tò sa' patké baka pupula bua'ie ttökwa be' èl dene buaé, kè wes ie' dè', e' kéwö tk'öwoie.' <sup>28</sup>Erè e' tò ilà kibi uluwéka taijè. Ie' kè shkakwa weshke. E' kueki iyé e' yéttsa urki tã iwöpablé taijè tã iché ie' a: 'Be' shkówa sa' tã, kè be' ulunuk.' <sup>29</sup>Erè ie' tò iyé iuté: 'Ye' kaneblémi be' a e' kî duas de taijè. Ye' kè wa be' ttò dalóseoulewa yés. Erè chibola è kè meule be' wa ye' a katano ye' sini'pa tã. <sup>30</sup>Erè ñie tã be' alà e' dene. Ie' tò be' inuköl we'ikwa alakölpa sulusipa tã etã be' tò baka bua'ie ttökwa patké ie' dene e' kéwö tk'öwoie.'

<sup>31</sup>“Iyé tò ie' iuté: 'A alala, be' tkëria ye' tã kekraé. Ì kos tso' ye' wa e' dör be' icha. <sup>32</sup>Erè be' èl dene buaé, e' dör wes

ie' du'wa e' shkenekane es. Ie' minea ye' yöki kè tté ttsënene ye' wa, e' dene, e' kueki s'kawöta e' kéwö tk'ö'uk chke wa, di'yé wa, ttsë'ne bua' wa.'”

### Inuköl blú iyi kueblu e' erbikö buaé, e' tté

**16** Ñies Jesús tò tté kleé ittökatapa a i' es: “Wëm bak eköl kaneblöke inuköl blú a iyi kuebluie. Etökicha tã pè welepa tò ie' kkaté iwökir a tò ie' tso' iwökir inuköl we'ikökwa. <sup>2</sup>Iwökir tò ie' kié tã iché ia: 'Ye' wa ijchenewa tò be' tso' ye' inuköl we'ikök. Be' kè a kanè tã'ia. Ye' be' tré'wekeshkar. E' yöki ì kos kanewé be' tò, e' yëkkuó kkachó ye' a.' <sup>3</sup>Ie' ibikeitsé: 'Ye' wökir tò ye' tré'wekeshkar, ¿wes ye' e' ùmi? Kè ye' diché tã'ia kanè darèrè woie ena ye' jaéne inuköl kakkiök. <sup>4</sup>Ye' éna ianetke tò wes ye' e' ùmi mik ye' trë'neshkar etã as yile tò ye' kkö'nü.' <sup>5</sup>Etã ie' tò pè kos ña'weke iwökir tò e'pa kiéttsa eköl eköl. Mik e' tsá de, etã e' a ie' tò ichaké: '¿Kos be' ñarke ye' wökir ulà a?' <sup>6</sup>E' tò iuté: 'Ye' ñarke ie' ulà a kiö dökã galon cien (100) ekké.' Ie' iché ia: 'T' be' yëkkuó. Be' e' tkóser bet tã yëkkuó se kî be' ñarke se, e' mane'úttsa tã ishtókã tò be' ñarke galon dökã dabom skeyök è (50).' <sup>7</sup>E' ukuöki tã ie' tò ichaké iëköl ñarke a: '¿Ñe be', kos be' ñarke ye' wökir ulà a?' E' tò iuté: 'Ye' ñarke trigowö dökã saco cien (100) ekké.' Ie' tò iché ia: 'T' be' yëkkuó. Se kî be' tò imane'úttsa tã ishtó ikî saco dökã dabom paryök è (80).' <sup>8</sup>Mik ì wambléitö, e' jchenewa iwökir wa tã ibikeitséitö: 'Ye' iyi kueblu kè wa ikanè one yësyësè, erè ie' kabikeitso buaé e' kimoie. E' è kueki ikikekekayö.'”

Jesús tò ichéne: “Es ñies yö iché tò wépa kè tò Skéköl dalóie esepa kabikeit-sò buaé e' kimoie tkökã wépa dör ie' olo tã taijè e' icha esepa tsata. <sup>9</sup>E' kueki yö iché a' a tò inuköl kè dör ibua'ie. E' wa s'malepa kimú as ie'pa tò Skéköl dalóie.”

A' tō iwé es e' tã aishkuö tã ie'pa tō a' kierawã buaë wëshke sēno wé yöbië e' a.

<sup>10</sup> “Yi tō kanè tsitsir wēke yēsýsē, ñies ese tō kanè taië wēmi es. Erë yi kè tō kanè tsitsir wēku' yēsýsē, ñies ese kè tō kanè taië wēpa yēsýsē. <sup>11</sup> E' kueki inuköl kè wakanewè a' tō yēsýsē, e' tã çyi erblòmi a' mik ì tueta' chòkle, ese wakanéwoie? <sup>12</sup> Ñies a' kè tō o'ka icha wakanewè yēsýsē, e' tã çyi tō a' icha mēmi a' a wakanewè?”

<sup>13</sup> “Wé klöulewã kanè mésoie, ese kawöta iwökir è ttò dalöiök. Iwökirpa chópa böl, e'ma ie' kawöta eköl è dalöiök ena iëköl watöktsã. Es a' kè a' er menuk-wã Skëköl ki ena inuköl ki ñita.”

<sup>14</sup> Ì ché Jesús tō e' ttsé seraã farise-owakpa tō. Ie'pa éna inuköl dalër taië, e' kueki ie'pa tō iwayué. <sup>15</sup> Ie' tō iché ie'pa a: “A' e' ò sulitane wörki tō a' dör pē' buaë yēsýsē, erë a' er suule buaë Skëköl wã. Ì kikekëkã s'ditsö tō taië, ese wër suluë ie' wa.

### Ì qos kitule Skëköl yëkkuö ki e' wã tköraë

<sup>16</sup> “Ì kit Moisés ena Skëköl ttekölpa tō yëkkuö ki, e' wa s'wöblaonebitu dö mik Juan S'wöskuökwak dē'bitu etã. Erë e' itöki tã ì blúie Skëköl tso' e' tté buaë pakarke tã sulitane tso' ima'uk darërëë diché wa dökwa e' a.

<sup>17</sup> “Kã jaì ena kã i' erta'wa. Erë Skëköl yëkkuö kitule, e' kè erta'wa yës, e' wã tköraë seraã döwã ttè bataë.

### Se' ñi òwa ese ché Jesús tō

(Mateo 19.1-12; Marcos 10.1-12)

<sup>18</sup> “Wēm tō itayë éwa ese tō tayë skã tséwane, e' tã e' wa ie' tō isenewabak kewe e' dalösewéwã. Ñies tayë a'wa iwēm tō, ese tséwane wēm o'ka tō, e' tã e' wa ie' tō tayë e' senewabak kewe e' dalösewéwã.

### Inuköl blú ena Lázaro, e' tté

<sup>19</sup> “Inuköl blú bak eköl e' e' paiò datsi' bua'buá è wa. Këkraë ie' chkòke, di' yöke buaë. <sup>20</sup> Ñies s'siarë bak eköl kiè Lázaro, e' e' tkökeser blu' e' u wékkö a. Ie' pa dör smewö ème. <sup>21</sup> Ie' éna blu' chkè po darke, e' ñakwã suluë. Chichi döke ie' smewö pakuyök. <sup>22</sup> Kã et tã ie' siarla blënewã, tã Skëköl biyöchökwakpa tō ie' wimblu tsémi kã jaì a' chkök Abraham tã. Ñies inuköl blú ñe' blënewã tã inú wötënewã.

<sup>23</sup> “Etã ie' tso' weinuk siarë wé s'wimblu weirke eë tã iwökéka tã Abraham suéitö kamië kã bánet, e' batsi' a' Lázaro tkër. <sup>24</sup> Etã ie' ar taië Abraham wöa tã ichéitö: ‘ja këkëpa Abraham, ye' saú er siarë wa! Ye' weirke taië bö' i' a. Be' we'ikëyö, Lázaro patkó iulatska bata nuukka di' a' tã ipatkó ye' ku' nuukka as ipaser.’ <sup>25</sup> Erë Abraham tō iüté: ‘Be' éna ianú tō mik be' bak ttsë'ka, etã íyi buaë qos bak be' wã. E' skéie Lázaro bak weinuk siarë. Erë ì'ne tã ie' wöpablëne buaë, e' skéie be' weirkene siarë. <sup>26</sup> Kíie tã, káblë iskië e' tso' se' shushaë. E' kueki sa' shkak a' ska', esepa kè döpa a' ska'. Ñies a' shkak sa' ska', esepa kè döpa sa' ska'.”

<sup>27</sup> “Inuköl blú tō iché: ‘A yéwö Abraham, ye' kköchò be' a, Lázaro patkó ye' yé u a' <sup>28</sup> ye' èlpa döka skel, e'pa pat-tök as ie'pa kè dö kã i' a' wé s'weirke siarë eë.’ <sup>29</sup> Abraham tō iché ie' a: ‘Ì kit Moisés ena Skëköl ttekölpa malepa e'pa tō yëkkuö ki, e' tso' ie'pa wã, jas ttè e' iütö ie'pa tō!’ <sup>30</sup> Blu' tō iüté: ‘A yéwö Abraham, e' kè dör wē'. Erë se' duowã eköl shkënekane ese tō ie'pa patté, e' tã ie'pa er mane'uraë.’ <sup>31</sup> Erë Abraham tō iché ia: ‘Ttè kit Moisés ena Skëköl ttekölpa e'pa tō, e' kè iütëne ie'pa wã, e' tã s'du'wã shkënekane ese miã ie'pa pattök, e' tã ñies ie'pa kè tō ie' ttò iütepa.’”

**A' tso' wösh wa ì tò ské ì sulu wamblök ese yöki**

(Mateo 18.6-7,21-22; Marcos 9.42)

**17** Jesús tò iché ittökatapa a: “Kekraë se' erkiöörke ì sulu wamblök; jerë yi tò se' erkiöweke, esepa tò inuí sueraë! <sup>2</sup>Yi tò ikkëpala erblöke ye' mik, esepa eköl ké ì sulu wamblök, esepa weirdaë siarë shüte tkòka ák wawoie muéwa ikuli' a batrëemi dayë a e' tsata. <sup>3</sup>¡A' tso' wösh wa!

“A' yami tò ì sulu wamblé a' k<sub>i</sub>, e' ta iuñú. Ie' er mane'wéne, e' ta inuí olo'yó iki. <sup>4</sup>Eré ká etkë a ie' tò ì sulu wamblé a' k<sub>i</sub> döká kuktökicha (7), erë ie' iché döká kuktökicha: ‘ye' er mane'wéne,’ e' ta ilo'yó iki.”

**S'k<sub>i</sub> erblö Skëköl mik**

<sup>5</sup>Etä Skëkëpa Jesús ttekölpa tsá e'pa tò ie' a' iché:

—Sa' kimú k<sub>i</sub> erblök Skëköl mik.

<sup>6</sup>Ie' tò ie'pa iüté:

—A' erblöpa Skëköl mik tsir wës mostaza wö dör tsirla ekkë, e'ma a' tò ichëmi kal bërie i' a: ‘Be' e' yóttsa íe e' tkówa dayë a', ta iyërdattsa.

**Wës s'kawöta kanëblök Skëköl a**

<sup>7</sup>“Ichösö tò a' wële wa kanë méso tso' eköl, e' mía të tòk alè ö a' iyiwak kkö'nuk alè. Mik idene u a, etä a' kè tò ichëpa ie' a: ‘Weshkë, be' e' tkóser chkök, ye' tò be' tieke.’ <sup>8</sup>A' kè tò ichëpa ía es. E' skéie a' tò ichëra ie' a: ‘Be' datsi' mane'ú, be' uló ye' a ta ye' tió. Ye' panú, ye' chké one, ye' di' yane one, e' wa be' mi' chkök.’ <sup>9</sup>Ie' tò iwë wës a' tò ie' kè iuk es, e' k<sub>i</sub> a' kè tò wëstela chëpa ía. <sup>10</sup>Es ñies mik ì uk Skëköl tò se' kè, ese wësö seraä, etä ichösö ie' a i' es: ‘Í uk sa' kàne, e' è wë sa' tò. Sa' dör kanë mésopa èsepala è.”

**Wëpa dabop kiri'weke lepra tò e'pa bua'wéne Jesús tò**

<sup>11</sup>Jesús michoë Jerusalén, e' damitkö Samaria ena Galilea. <sup>12</sup>Mik ie' dökemitke ká tsitsirla a ta ee wëpa dökä dabop kiri'weke lepra tò, e'pa e' yéttsa iëter kamie <sup>13</sup>ta iarakerak Jesús tsäka:

—¡A Jesús, a s'wöbla'ukwak, sa' saü er siarë wa!

<sup>14</sup>Mik ie' tò ie'pa sué, etä ichéitö ie'pa a:

—A' yú e' kkachök sacerdotëpa a as sulitane wa ijcher tò a' buanene. Ie'pa mirwajä ñalä k<sub>i</sub> e' dalewa ie'pa buanene.

<sup>15</sup>Mik ie'pa eköl tò isuë tò ibuanene, etä ibiteane Jesús ska' Skëköl kikökka taië aneule. <sup>16</sup>Ie' e' tkéwa kuchë k<sub>i</sub> iwö méwa íyök k<sub>i</sub> Jesús klö ska' wëstela chök. Wëm e' dör Samaria wak. <sup>17</sup>Jesús tò iché ía:

—¿A' buanene e' kè dör dabop? ¿Wé be' malepa sulitu (9)? <sup>18</sup>Wëm dör ká kuak<sub>i</sub> wak ¿e' è biteane Skëköl kikökka?

<sup>19</sup>Ie' tò iché wëm a:

—Be' e' kóka be' yúshkane. Be' erblé ye' mik, e' tò be' bua'wéne.

**Ì blúie Skëköl tso', wës e' këwö dör**

(Mateo 24.23-28,36-41)

<sup>20</sup>Fariseowakpa tò ichaké Jesús a:

—Ì blúie Skëköl tso', ¿mik e' këwö datse?

Ie' tò ie'pa iüté:

—Ì blúie Skëköl tso' e' kè dör íyi suëmi sulitane tò ese. <sup>21</sup>Itso'tke a' shua, e' kueki kè ye' a iyërpa, ‘Íe itso', ö ‘Wíe itso'”.

<sup>22</sup>Ta' ichéitö ittökatapa a:

—Ikëwö döraë mik a' tò ibikeitseraë: ‘Jesús dör S'ditsö Alà, e' mú dò i' ta s'blúie. E' diwö et è kkechekesö suë.’ A' tò biekitseraë es, erë a' kè tò isuëpa kam ye' döne e' yöki. <sup>23</sup>Wëlepa tò ichëraë: ‘Íe ie' de', ö ‘Diàe ie' de'; erë kè a' minuk isaük, kè a' minuk itöki. <sup>24</sup>Ye' dör S'ditsö Alà, mik e' dene, etä sulitane tso' ká wa'ñe e'pa tò isueraë wës alá wöñar tò ká olo

ppèe ká wañe e' suèsö es. <sup>25</sup> Erë e' yöki kewe ye' kawöta weinuk taië ye' bolökpa ulà a, ie'pa tö ye' waterattsä. <sup>26</sup> Ye' dör S'ditsö Alà, mik e' dene, etä e' kèwö doraë wes Noé këska' es. <sup>27</sup> E' kèwö ska' ta ie'pa tso' chkök, di'yök, senukwa wes kekraë es dö mik Noé dewä ikanö bérie e' a etä. E' bet ta di' dettsä taië ie'pa ki, e' tö ie'pa ulitane ttélur. <sup>28</sup> Es ñies iwambléne wëm bak kië Lot, e' kèwö ska' ta. Sodoma wakpa tso' chkök, di'yök, ie'pa tso' íyi taúk ena íyi wataúk, ie'pa tso' íyi kuatkök ena u yuök wes kekraë es. <sup>29</sup> Erë mik Lot e' yétttsä Sodoma, etä azufre datse ká jaì a wõnarke bö'ie, ese yëne ká e' ki wes kalí es, e' tö ie'pa kos ttélur. <sup>30</sup> Es itköraë mik ye' dör S'ditsö Alà, e' dene eta.

<sup>31</sup> “Mik e' kèwö de, etä yi tso' u bata ki, ese kè dökwanë weshke íyi tsukmi. Ñies yi tso' kanëblök kañika, ese kè dökwanë weshke. <sup>32</sup> Ì bak Lot alaköl ta<sup>††</sup> e' ska' a' er anú. Ie' yónane dayë wösiie, ie' éna íyi dalër taië e' kuëki. <sup>33</sup> Yi e' tsatkak ittëwa yöki, ese ulà a sene michoë kè döpa aishkuö ta. Erë yi e' mettsä ttëwa ye' dalërmik, ese ulà a sene michoë doraë aishkuö ta.

<sup>34</sup> “Ye' tö a' a ichè tö e' nañewe se' böi kapöke ka' etkè ki, ta eköl mira iwä ta iëköl atdaë. <sup>35-36</sup> Alakölpa böi tulur ák wawök ñita ta eköl mira iwä ta iëköl atdaë.‡‡

<sup>37</sup> Jesús ttökatapa tö ie' a ichaké:

—A Skëképa, ¿wé e' wamblërmi?

Jesús tö ie'pa iütë ttë i' wa:

—Sulitane wa ijcher tö wé öló daparke taië, eë ilè nu tër. Es ilè suëraë a' tö iwä kkachoie tö wé iwamblërmi.

## Alaköl dör schó ena s'shulökwak eköl, e' tté

**18** Jesús éna ikkachak ittökatapa a tö s'kawöta ikiök S'yé a kekraë kè shtrirta'wa, e' kleéitö ie'pa a i' es: <sup>2</sup> “Ká et ki s'shulökwak eköl tso', e' kè suarta' Skëköl yöki, ñies ie' kè tö yi dalöieta'. <sup>3</sup> Ká e' a ñies alaköl dör schó tso' eköl, e' ñippöke ibolök ta. Kekraë ie' mía s'shulökwak ñe' ska' ta ichëkeitö ia: ‘Ye' kimú. Ye' bolök tö ye' we'ikeke, e' shuló ye' a'. <sup>4</sup> E' tka ká taië erë s'shulökwak kè wa iütëne. Bata ekké ta s'shulökwak tö ibikeitsé: ‘Alaköl schó i' tso' ye' tsiriük ñie. Erë ye' kè suarta' Skëköl yöki, ñies kè ye' tö yi dalöieta', <sup>5</sup> erë ie' tté shuleraëyö as kè idöia ye' shtriük taië ttë e' wa.”

<sup>6</sup> Skëképa tö ikí ché: “Ì ché s'shulökwak suluë ñe' tö e' bikeitsó buaë. <sup>7</sup> Wépa shukitulebak Skëköl wa, tso' ie' a ikiök ñie nañeë, ¿esepa kè tsatkepaítö? ¿Ie' tö ie'pa keraë ipanuk? <sup>8</sup> Ye' ichè, au. Ie'pa tsatkeraitö bet, kè dör ká taië. Erë ye' dör S'ditsö Alà, mik e' dene, etä s'erblöke Skëköl mik, ¿esepa kuëmiyö ká i' a?

## Fariseowak ena inuköl shtökwak Roma wökirpa a, e' tté.

<sup>9</sup> Pë' tso' Jesús ttö kittsök, e'pa welepa e' bikeitsö tö ie'pa serke yësyësë Skëköl wöa, erë ie'pa wöska sulu s'malepa wër. Esepä a ie' tö ttë kleé i' es: <sup>10</sup> “Wépa böi mía Skëköl wé a ttök S'yé ta. Eköl dör fariseowak, eköl dör inuköl shtökwak Roma wökirpa a. <sup>11</sup> fariseowak ttödur S'yé ta, ie' iché i' es: ‘A Skëköl, wëstela chekeyö be' a tö ye' kè dör suluë wes s'malepa es. Ie'pa dör akblökwakpa ena pë' sulusipa ena s'senewabak e' dalöseukwa wakpa. Ñies ye' kè dör suluë wes

††17:32 Génesis 19.26 saú.

‡‡17:35-36 Yëkkuö këchke wele tö versículo 36 kí kuötkéka. E' tö ichè i' es: Wépa böi tso' kanëblök të a, eköl mitsër ta iëköl ate.

inuköl shtökwak dur wí es. <sup>12</sup>Domingo bit ta ye' batsöke ká böt ká böt kekraë. Nies ì kos de ye' ulà a, e' blatekeyö doka dabop, e' tsá eyök mekeyö be' a.' <sup>13</sup>Erë inuköl shtökwak e' dur bānet, ie' eriane tajë, ie' wö è kè kanekā ká jaì sauk, ie' batsi' è tōke iulà wa ie' eriane tajë kuëki. Ie' tō iché: '¡A Skëköl, ye' dör pë' sulusi, ye' saü er siarë wa!'

<sup>14</sup>Jesús tō ichéne: Ye' tō a' a ichè tō yi e' ttsòka tajë ese wōardawa, erë yi e' wōewa ese kīkardakā tajë. E' kuëki inuköl shtökwak ñe' mīñane iu a klō'wé Skëköl tō wēs pë' buaë yēsēsē es. Erë fariseowak kè minene es.

### Jesús tō ikié S'yé a ala'rla kī

(Mateo 19.13-15; Marcos 10.13-16)

<sup>15</sup>Pë' wā ala'rla debitu Jesús ska' as ie' ulà mùkā ikī. Erë mik e' sué ittōkatapa tō, eṭa ie'pa tō pë' uñélor. <sup>16</sup>Erë ie' tō ittōkatapa kié ta ichéitō:

—As ala'rla bitu ye' ska'. Wépa dör wēs ie'pa es, esepa blúie Skëköl tso', e' kuëki kè iwöklō'waria. <sup>17</sup>Mokī ye' tō ichè tō yi kè e' wōōwa wēs alala es, ì blúie Skëköl tso' e' kiowa, ese kè dōpawāia.

### Inuköl blú eköl tō Jesús a ichaké

(Mateo 19.16-30; Marcos 10.17-31)

<sup>18</sup>Judiowak wōkir eköl tō Jesús a ichaké:

—A S'wōbla'ukwak, be' dör buaë, çì wèmi ye' tō as sene michoë dò ye' ulà a?

<sup>19</sup>Ie' tō iüté:

—Çì kuëki be' ye' kié buaë? Skëköl eköl è dör buaë. <sup>20</sup>Ttè me'atbak ie' tō dalöiëno, e' jcher be' wā buaë. E' tō ichè: 'Kè a' kawō ta' s'senewābak dalōseukwā, kè a' kawō ta' s'ttökwa, kè a' kawō ta' ak-blök, kè a' kawō ta' s'kkatök kachè wa, a' yé ena a' mī dalöió.'<sup>¶¶</sup>

<sup>21</sup>Wëm e' tō ie' a iché:

—Ttè e' kos dalöië'bitu ye' tō, ye' ià du-ladula eṭa.

<sup>22</sup>Ie' tō ttè e' ttsé ta ie' iüté:

—Íyi etkè kianeia be' a wè, e' dör i': ì tso' be' wā, e' wataúttā seraā ta iské múttā s'siarēpa a. E' ukuökī ta be' shkó ye' ta ye' ttökataie. Es ta íyi buaë tajë dōraë be' ulà a ká jaì a.

<sup>23</sup>Erë wëm e' dör inuköl blú tajë e' kuëki mik ie' tō e' ttsé, eṭa ie' erianekā tajë. <sup>24</sup>Jesús tō isué tō ieriane ta ichéitō ia:

—¡Inuköl blúpa a darerëë idir dōkwā ì blúie Skëköl tso' e' a! <sup>25</sup>Esepa a dōka ee, e' dör darerëë tkōka kameio tkōmi datsi' yuo diké ese wōukla a e' tsata.

<sup>26</sup>Wépa tso' ittsök e'pa tō ichaké Jesús a:

—E' dör es, e'ma çyi tsatkërmi?

<sup>27</sup>Ie' tō ie'pa iüté:

—Ì kè or s'ditsö a, ese ormi Skëköl a buaë.

<sup>28</sup>Eṭa Pedro tō ie' a iché:

—Ittsó, sa' íyi kos me'at sa' tō ta sa' bite be' ta.

<sup>29</sup>Ie' tō iché ie' a:

—Mokī ye' tō a' a iché tō yi isie tō iu ö ilaköl ö iēlpa ö iyé ö imì ö ila'r, e' méat ì blúie Skëköl tso' e' dalërmik, <sup>30</sup>ese ulà a iské dōrane tajë shute ká i' a, nies aishkuö ta sene michoë dōraë iulà a.

### Jesús skà e' biyó ché tō itterawā

(Mateo 20.17-19; Marcos 10.32-34)

<sup>31</sup>Jesús tō ittōkatapa dabom eyök kī bōl (12), e'pa kiémi bānet ta ichéitō ie'pa a: "Se' mirkā Jerusalén i', eṭa ee ì kos kitat Skëköl ttekōlpa tō yëkuö kī e' wā tkōraë, ye' dör S'ditsö Alà, e' ta. <sup>32</sup>Ie'pa tō ye' wōmerattsa pë' kè dör judiowak esepa ulà a. E'pa tō ye' wayueraë, cheraë suluë, iwiri tuōrarak ye' kī. <sup>33</sup>Ie'pa tō ye' pperaë, ye' tterawā; erë e' kī ká de mañat eṭa ye' shkerdakane.

<sup>34</sup>Erë ì ché ie' tō ittōkatapa a, e' wà blëulewà ie'pa yōkì, e' kuëkì ie'pa kè a iwà ane.

**Wëm eköl wöbla kè wawër tso'  
Jericó e' bua'wëne Jesús tō**

(Mateo 20.29-34; Marcos 10.46-52)

<sup>35</sup>Mik Jesús demi tsinet Jericó, etā ee wëm tkër eköl ñalā ska' inuköl kak kiök. Ie' wöbla kè wawër. <sup>36</sup>Mik ie' tō ittse tō pè' dami tajë ñalā kì, etā ie' tō ichaké tō çì wamblërke? <sup>37</sup>Ie'pa tō iché ie' a tō Jesús Nazaret wak dami ñalā kì. <sup>38</sup>E' kuëkì ie' tō iché aneule:

—¡A Jesús, s'blú David bak e' aleri, ye' saú er siarë wa!

<sup>39</sup>Pè' dami Jesús yōkì kewe, e' tō wëm e' uñeke as isiwa'blōwā. Erë ie' tō ikì ché aneule:

—¡A David aleri, ye' saú er siarë wa!

<sup>40</sup>Jesús e' duëser tā itsuk patkéitō. Mik ide, etā Jesús tō ie' a ichaké:

<sup>41</sup>—¿Ì kiane be' kì tō ye' tō iwè be' a? Ie' iüté:

—A kékëpa, ye' kì ikiane tō ye' wöbla buarne.

<sup>42</sup>Jesús tō ie' a iché:

—¡Be' erblé ye' mik, e' wa be' buanene!

<sup>43</sup>E' wöshā tā ie' wöbla buanene tā imía Jesús tā e' tō Skëköl kikekarami tajë. Nies wépa kos tō isué e'pa tō Skëköl kikekarami tajë.

**Jesús ena Zaqueo, e' pakè**

**19** Jesús de Jericó, e' shkòdur ee. <sup>2</sup>Eë wëm eköl serke kiè Zaqueo, e' dör inuköl shtökwakpa Roma wökirpa a, e'pa wökir. Ie' dör inuköl blú tajë. <sup>3</sup>Ie' kì Jesús kiane suè, erë ie' dör tsirlala iskìla, tajë pè' tso', e' kuëkì ie' kè wö dè'kà Jesús sauk. <sup>4</sup>E' kuëkì ie' tunemi wé Jesús tkökemi ee tkakā kal ulā a ipanuk suè. <sup>5</sup>Mik Jesús dökemitke kal e' dikìā, etā iwökékā tā iché Zaqueo a:

—A Zaqueo, be' e' ówa bet. Ìñe ye' mi'ke be' ska' kapökrö.

<sup>6</sup>Zaqueo e' éwa bet tā Jesús kiéwaitō iu a ttsé'ne buaë. <sup>7</sup>Mik pè' ulitane tō isué, etā ie'pa tō Jesús ché suluë. Ie'pa tō iché ñi a: “¿Iók ie' mi'ke pè' sulusi u a?” <sup>8</sup>Zaqueo e' duékā tā iché Skékëpa Jesús a:

—A kékëpa, ye' tto tso'. Ì kos tso' ye' wā, e' shaböts meraëyö s'siarëpa a. Nies yile íyi ekibléyö, e' tā e' mekeneyö ie' a dökā tkëtökicha.

<sup>9</sup>Jesús tō iché ie' a:

—Be' dör Abraham aleri, erë be' erblé Skëköl mik mokì wës Abraham es, e' kuëkì ìñe tā be' de Abraham alā chókìe. E' kuëkì ìñe be' tsatkëne, ñies wépa tso' be' u a erblé Skëköl mik e'pa tsatkëne. <sup>10</sup>Ye' dör S'ditsö Alā, e' dè'bitu, wépa chë'ulur ì sulu ulā a esepa yulök tsatkè.

**Inuköl mène wakanewè, e' tté**

<sup>11</sup>Jesús dökemitke Jerusalén. Pè' tso' ie' tto kïttsök, e'pa tō ibikeitsé tō mik ie' de Jerusalén etā ì blúie Skëköl tso' e' kéwö dewatke da'äie. E' kuëkì ie' tō ie'pa a ikléé i' es:

<sup>12</sup>“Wëm tso' eköl dör blu' ditséwö, e' mía kamië ká kuā'kì a iblú kibi ska' as e' tō ie' tkökā blu'ie, wé ie' bite ee. E' ukuökì tā ibitūkeane. <sup>13</sup>Kam ie' mi', etā ie' tō ie' kanè mësopa kié dabop, e'pa a ie' tō inuköl mé tajë ñikkëé eköl eköl a. Ie' tō iché ie'pa a: ‘A' tō inuköl se wakanéú dò mik ye' döne etā, isuöie kos a' tō ikì kló'wëmi.’ <sup>14</sup>Erë pè' serke ie' kaska', e'pa éna ie' ar suluë. E' kuëkì ie'pa wëlepa patkérakitō blu' kibi ska' ichök: ‘Sa' kè kì ie' kiane sa' blúie, e' kuëkì kè itkarka.’

<sup>15</sup>“Erë blu' kibi tō ie' tkékā blu'ie tā ie' míane wé ibite ee. Mik ie' dene, etā ie' tō ikanè mësopa dabop, wépa a ie' tō inuköl me'at, e'pa kiök patké isuöie tō kos inuköl kì kló'wérakitō. <sup>16</sup>It-sá debitu tō iché iblú a: ‘A kékëpa, be' inuköl wakanewéyö, e' kì kló'wéyö dökā dabobtökicha.’ <sup>17</sup>Blu' tō ie' iüté: ‘E' dör buaë. Be' dör kanè méso buaë. Ì elkela wakanewébö yësyësë, e' kuëkì ye' tō be'



tkekeka ká dabop, e' wökirie.' <sup>18</sup> Iskà debitu tō iché: 'A kékēpa, be' inuköl wakanewéyö, e' kí klö'wéyö dōka sketō-kicha.' <sup>19</sup> Nies blu' tō ie' iüté: 'Ye' tō be' tkekeka ká skel, e' wökirie.'

<sup>20</sup> "Eré iëköl debitu, e' tō iblú a iché: 'A kékēpa, i' be' inuköl. Ye' tō ipatréwa tsamo a ta ibléyö. <sup>21</sup> Be' dör wēm er darërëë ese. Ì kè dör be' icha ese klö'wekewabö. Nies be' tō íyi wöshteke wé kè be' wá ikuatkéne ee. Ye' suane be' yöki, e' kueki ye' tō be' inuköl blé.' <sup>22</sup> Eta blu' tō ie' a iché: 'Be' dör kanè méso sususi ese. Ye' tō be' kichaterattsa be' wák ttè wa. Be' tō iché tō ye' dör wēm er darërëë ese. Be' tō iché tō ì kè dör ye' icha ese klö'wekewayö, nies tō ye' tō íyi wöshteke wé kè ye' wá ikuatkéne ee. <sup>23</sup> E' dör es, e' ta çì kueki be' kè wá ye' inuköl bléne inuköl bló wé a as ee ikí klör? Be' tō iüpa es, e'ma mik ye' dene, eta ye' inuköl ena ikí klöne e' de ye' ulá a.' <sup>24</sup> Eta blu' tō iché itso'rak ee, e'pa a: 'Inuköl yóttsa ie' ulá a, ta imú wé wá itso' dabop, e' a.' <sup>25</sup> Eré ie'pa tō blu' a iché: 'A kékēpa, eré çì kueki be' tō ie' a ikí meke, ie' wá itso'tke dabop?' <sup>26</sup> Ie' tō ie'pa iüté: 'Ye' tō a' a iché tō wé wá íyi tso', ese a ikí merdaë. Eré wé kè wá ì ku', ì tso' ese wá elkela, e' yerattsa iyöki. <sup>27</sup> Wépa kè ki ye' kiane blu'ie, e'pa dör ye' bolökpa; ie'pa tsúbitu íe ta ittölur ye' wörki.'"

### Jesús demi Jerusalén

(Mateo 21.1-11; Marcos 11.1-11; Juan 12.12-19)

<sup>28</sup> Jesús ttè paké one, eta ie' mirkaia Jerusalén ñalé ki. <sup>29</sup> Mik idökemitke tsinet Betfagé ena Betania ate kabata kiè Olivo kébata e' kuli' a, eta ie' tō ittökatapa böl kié <sup>30</sup> ta ichéitö iarak:

—A' yú kewe, u tso' se' wöshäë e' a, eta ee burro kueraë a' tō etö moule kè ki yi

e' tkëuleka ese. E' wötsöö ta itsúbitu ña. <sup>31</sup> Yile tō a' a ichaké: çìie a' tō iwötseeke? e' ta iütó: Skékēpa ki ikiane.

<sup>32</sup> Ittökatapa míyal ta ikuérakitö wes Jesús tō iché ie'pa a es. <sup>33</sup> Ie'pa tso' burro wötsöök ta burro wakpa debitu ta ichakéitö:

—çìie a' tō burro se wötseeke?

<sup>34</sup> Ie'pa tō iüté:

—Skékēpa Jesús ki ikiane e' kueki.

<sup>35</sup> Eta ittökatapa wá burro bitetser Jesús a. Ie'pa tō ipaio kikke méka burro ki, ta Jesús kimerakitö e' tkökka iki. <sup>36</sup> Jesús mirkaia Jerusalén ñalé ki, ee pé' tso' taië, e'pa tō paio kikke shuélor ñala ki kewe Jesús yöki. <sup>37</sup> Ie'pa mirwa Olivo kébata kuli' a wö wa'k. Iklépa tso' taië, e'pa anemi ttsé'ne buaë wa. Skéköl kikékarakitö taië. Ì kè or yi a ese o' Jesús tō taië ie'pa wörki, e' kueki Skéköl kikékarakitö.

<sup>38</sup> Ie'pa tō iché:

—Ayëcha buaë s'blú i' datse Skéköl ttò wa! Skéköl tso' ká jai a olo ta' taië as e' ta se' ser bèrë. Ie' kikökasö.<sup>88</sup>

<sup>39</sup> Pé' shua fariseowakpa welepa tso', e'pa tō iché Jesús a:

—Be' klépa uñú.

<sup>40</sup> Eré ie' tō ie'pa iüté:

—Ye' tō iché a' a tō ie'pa siwa'bléwa, e' ta ák tō ye' kikeraka aneule.

<sup>41</sup> Mik ie' de tsinet Jerusalén, eta ie' ikí sué ta ie' íe idalërmik. <sup>42</sup> Ie' tō ibikeitsé: çìA' mú wá ijcher ñne tō wes a' sermi bèrë Skéköl ta! Eré e' tso' bléule a' yöki, e' kueki a' kè a isurpa. <sup>43</sup> Kawö sulu dōraë a' ki. A' bolökpa dōraë, e'pa tō a' ká köierawa shkit as a' kè tköyal. Ie'pa miraë ñip-pök a' ta. <sup>44</sup> Ie'pa tō a' ká ena a' wakpa kos ewerawa. A' u kos olordawa, e' éki kè atpa ñi bata ki. Skéköl de a' tsatkök, e' kèwö de a' ki eré iwattétsa a' tō. E' kueki e' kos tkōraë a' ta.

### Jesús tò Skèköl wé batse'wé

(Mateo 21.12-17; Marcos  
11.15-19; Juan 2.13-22)

<sup>45</sup> E' ukuökij ta' Jesús de Skèköl wé a, ta ie' tò iyi wataukwakpa trë'wéyalmi, <sup>46</sup> ta ichéitö ie'pa a:

—Skèköl tò iyë' iyëkkuö kij: 'Ye' u dör tto ye' ta wé', erë a' tò iia'wékä akblo wéie.

<sup>47</sup> Kekraë Jesús tò s'wöbla'weke Skèköl wé a. Sacerdotepa wökirpa ena s'wöbla'uk ttë dalöiëno wa wakpa ñies judiowak wökirpa malepa, e'pa tò ileritsekerak Jesús ttowaie. <sup>48</sup> Erë judiowak malepa ulitane tò ie' ttöke e' kïttseke er bua' wa, e' kuekij ibolökpa kè ulä dë'wä ittökwa.

### ¿Yi tò kawö mé Jesús a?

(Mateo 21.12-17; Marcos 11.27-33)

**20** Etökicha ta Jesús tso' s'wöbla'uk ena Skèköl ttë buaë e' pakök Skèköl wé a ta eë sacerdotepa wökirpa ena s'wöbla'uk ttë dalöiëno wa wakpa ena judiowak kueblupa e'pa de. <sup>2</sup> Ie'pa tò ichaké ie' a:

—¿Yi ttö wa be' tò iyi ikké weke? ¿Yi tò e' kéwö mé be' a?

<sup>3-4</sup> Ie' iüté:

—Ñies ye' tò a' a ilè chakeke: ¿Yi tò Juan patkë' s'wöskuök? ¿Skèköl tso' ká jaì a e' ö s'ditsö? Ye' iütö.

<sup>5</sup> Eta ie'pa ichémi ñi a: “Se' tò ichèmi tò Skèköl tò Juan patkë', e' ta ie' tò se' iütëmi: ‘¿Ì kuekij a' kè wä ie' ttë klöone?’

<sup>6</sup> Ñies pë' ulitane tò iklö'wé tò mokjë Juan dör Skèköl tteköl, e' kuekij kè se' a iyënuke tò ipatkë' s'ditsö tò. Se' tò iché es, e' ta ie'pa tò se' ttëwami ák wa.” <sup>7</sup> E' kuekij ie'pa tò iüté:

—Kè sa' wä ijcher tò yi tò Juan patkë' s'wöskuök.

<sup>8</sup> Ie' tò ie'pa a iché:

—Es ñies ye' kè tò a' a ichepa yi tò ye' a kawö mé iyi ikké wöie.

### Uva kanéukwakpa sulusipa, e' tté

(Mateo 21.33-44; Marcos 12.1-11)

<sup>9</sup> E' ukuökij ta Jesús ttëmi pë' ta ta ttë kleítö i' es: “Wëm eköl tò uva ku-atké taië. Ie' tò ipeitéat wëpa wëlepa a as ie'pa tò ipataü ie' a iwörke e' kak wa. E' ukuökij ta ie' mia ká ku'kij dò ká taië. <sup>10</sup> Mik uva wöline tso'tke wë'iaë shtë, eta ie' tò ikanè méso patkëmi eköl ie' icha tsuk. Erë kanéukwakpa tò ikanè méso klö'wëwä, ppé siarë, ta ipatkëmine ulä wöchka. <sup>11</sup> Eta iwák tò ikanè méso skä patkëmine eköl. Ñies e' ché ie'pa tò suluë, ppé siarë, ta ipatkëmine ulä wöchka. <sup>12</sup> Ikanè méso skä patkëmine ie' tò eköl, eta ñies e' shkä'wërakitö taië, ta itrë'wëshkar.

<sup>13</sup> “Bata ekkë ta iwák tò iché: ‘¿Ì wëmi ye' tò? Ye' alä dalër taië ye' éna, e' patkerami ye' tò. Isalema ie'pa tò ie' dalöiëmi.’ <sup>14</sup> Erë mik kanè mésopa tò kanè wák alä sué, eta ie'pa tò iché ñi a: ‘Ie' wì dör ká i' wak alä, e' a ká i' atdaë. E' kuekij ittöwasö, eta es ká i' atdaë se' ulä a.’ <sup>15</sup> E' kuekij ie'pa tò iklö'wëwä yëttsa bánet ta ittëwarakitö.

“Ye' tò a' a ichakè: ¿Ima a' ibikeitsé? ¿Ì wëraë kanè wák tò? <sup>16</sup> Yö ichè tò ie' miraë ta kanéukwakpa tteratulur, ta uva kanè meraneitö pë' ku'kij a.”

Mik e' tse judiopa wökirpa tò, eta ie'pa tò iché:

—E' mú kè wamblër es.

<sup>17</sup> Erë ie' tò ie'pa sué krereë, ta ichéitö:

—¿Wes a' tò ibikeitsëmi tò e' kè tköpa a' ta? Skèköl yëkkuö tò ye' ché i' es:

‘Ák watë'ttsa u yuökwakpa tò, e' yönene ák bua'buaië.’\* <sup>18</sup> Yi klaskëne ák e' mik ese parolordaë ena yi kij ák e' anekä ese yalitdawa idikia.

\*20:17 Salmo 118.22

<sup>19</sup> Ie'pa tö isuéwā tö kleè e' wa Jesús tö ie'pa ché. E' kueki ie'pa éna ie' klö'wakwā ee, erè ie'pa suane pè' yöki.

### S'wökirpa patuè, e' tté

(Mateo 22.15-22; Marcos 12.13-17)

<sup>20</sup> E' kueki ie'pa tso' Jesús weblök isuoié tö ì kī ikkatërmi. Ie'pa tö wépa welepa patké ie' chakök ittö yoktsā, e' wa ikkatè Roma wökirpa ā as e'pa tö iklö'ūwā. Wépa e'pa e' ò tö ie'pa dör pè' buaè yésyèsè ese. <sup>21</sup> Ie'pa tö ie' a ichaké:

—A s'wöbla'ukwak, sa' wā ijcher tö ì cheke be' tö ena tté wa be' tö s'wöbla'weke, e' dör mokī. Be' ā suli-tane dör ñies ème. Be' tö s'wöbla'weke yésyèsè Skéköl ñalé tté wa. <sup>22</sup> ¿Ima be' tö ibikeitsè? Roma wökir kibi patuèsö ¿e' dör buaè ö kè idör buaè?

<sup>23</sup> Ie' wā ijcher tö ie'pa tso' ie' chakök er sulu wa, e' kueki ie' iüté i' es:

<sup>24</sup> —Inuköl tso' a' wā Roma wökir patuoie, e' kkachó ye' ā et. ¿Yi diököl ena yi kiè me'rka ikī?

Ie'pa tö iüté:

—Roma wökir kibi.

<sup>25</sup> Ie' iché ie'pa ā:

—E'ma kos Roma wökir kibi icha, ese mú ie' ā. Tā kos Skéköl icha, ese mú ie' ā. <sup>26</sup> Ì kos ché ie' tö sultane wörki, e' ā ie'pa kè wā ì kune ie' kkatoie. Ie' tö ie'pa iüté es, e' tö ie'pa tkiwéwā. E' kueki ie'pa siwā'blélur iyöki.

### ¿S'duolur e'pa shkermikane ö au?

(Mateo 22.23-33; Marcos 12.18-27)

<sup>27</sup> E' ukuöki tā saduceowakpa welepa debitu Jesús ska'. E' wakpa tö iklö'wé tö s'duowā e' kè shkenukkane. Ie'pa tö ie' a ichaké:

<sup>28</sup> —A s'wöbla'ukwak, Moisés tö tté dalöiëno kitat yékkuö kī se' ā, e' tö iché i' es: Wëm blënewā kè alà atē, e' tā

ie' ël kawötā ischó tsukwā as ilà kòkā iël blënewā e' ā. <sup>29</sup> Etökicha wépa bak dökā kul ñi ëlpa. Ikibi alaköl tséwā, erè iblënewā kè alà atē. <sup>30</sup> E' ukuöki tā ie' itöki iël tö ischó tséwā, erè ñies e' blënewā kè alà atē. <sup>31</sup> Es itka iël skā tā ñies imalepa kos e'pa tā. Ie'pa kul blërulune kè alà atē yës. <sup>32</sup> Bata ekké tā ñies alaköl e' blënewā. <sup>33</sup> Wépa kul e'pa bak alaköl eköl è tā. Mik s'duowā e'pa shkenekane, etā ¿wéne dömi ie' wëm chókíe?

<sup>34</sup> Ie' tö ie'pa iüté:

—S'tso'ia' ká i' a tā wépa ena alakölpa ñi tsukewā. <sup>35</sup> Erè aishkuö tā wépa kī sene michoë mène, esepa shkerdakane tā ee wépa ena alakölpa kè serpawāia ñi-tā. <sup>36</sup> Ie'pa ser michoë kè duötā'wā wes Skéköl biyöchökwakpa kè duötā'wā es. Skéköl tö ie'pa shkeokane, e' kueki ie'pa döraë ie' ala'rie. E' kueki ie'pa kè ser-pawāia ñitā. <sup>37</sup> Ñies Moisés wák tö se' ā ikkayè tö s'duowā e'pa shkerdakane. Kal tsir wönarke bö'ie e' paka'itö, ee ie' tö iyè' tö Skéköl dör Abraham, Isaac ena Jacob, e'pa Kéköl.† Es isuésö tö ie'pa tso'ia' ttsé'ka Skéköl ā. <sup>38</sup> E' wā kiane ché tö s'tso' ttsé'ka ena s'duowā, e'pa kos tso' ttsé'ka Skéköl ā kekraë. E' kueki ie' kè dör s'duowā e' Kéköl. Ie' dör s'ttsé'ka e' Kéköl.

<sup>39</sup> Etā s'wöbla'uk tté dalöiëno wa wakpa welepa tö iché ie' a:

—A s'wöbla'ukwak, ì ché be' tö, e' chébö buaè yésyèsè.

<sup>40</sup> Etā saduceowakpa kè kësik dë'kaia ie' ā ì skā chakök.

### ¿Wé pairine'bitu idi' wa s'blúie e' dör yi aleri?

(Mateo 22.41-46; Marcos 12.35-37)

<sup>41</sup> Jesús tö ie'pa ā ichaké:

†20:37 Skéköl dör Abraham, Isaac ena Jacob, e'pa Kéköl: E' ché Skéköl tö ie'pa blërulunebak ká iaiaë e' ukuöki.

—¿Wes ie'pa tō ichēmi tō wé pairine'bitu idi' wa s'blúie, e' dōr s'blú bak kiè David e' aleri? <sup>42</sup>Erè David wák tō ie' yě'at yèkkuò kiè Salmos e' ki. Ie' tō iyě'at i' es:

'Skèköl tō iché ye' Kèköl a:

Be' e' tkóser ye' ulà bua'kka dalöiēno taijè <sup>43</sup>dò mik ye' tō be' bolökpa mérò be' klò dikia eta.<sup>‡</sup>

<sup>44</sup>Es se' isué tō wé pairine'bitu idi' wa s'blúie, e' kié David wák tō ie' Kèköl, e' ta ¿wes ie' dōr David aleri?

### Jesús tō s'wöbla'uk ttè dalöiēno wa wakpa kkaté

(Mateo 23.1-36; Marcos 12.38-40; Lucas 11.37-54)

<sup>45</sup>Sulitane tso' Jesús ttöke e' kittsök, eta ie' tō iché ittökatapa a: <sup>46</sup>"A' e' kkö'nú s'wöbla'uk ttè dalöiēno wa wakpa yöki. Ie'pa wöbatsö shkök datsi' batsiè ese mik wé pè' tso' taijè ese ska' as pè' tō ie'pa shke'ù wes kékèpa dalöiërta' taijè es. Nies se' nì dapa'wo wé a ena wé ie'pa kawò tkò'wèkerakitò, ese ska' kula' tso' kékèpa dalöiërta' esepa a, ese yuleke ie'pa tō e' tkoie. <sup>47</sup>Ie'pa tō alakölpa schó u yekettsa iulà a ta iwökatekerakitò ittökerak Syé ta braraè e' wa. Ie'pa weirdaè siarè s'malepa tsata.

### Alaköl eköl siarè e' tō inuköl mé Skèköl a

(Marcos 12.41-44)

**21** Jesús tso'ia Skèköl wé a, eta ie' tso' inuköl blüpa tso' inuköl iök kalkuò tso' iioie mè Skèköl a ese a e'pa sauk. <sup>2</sup>Nies ie' tō alaköl eköl siarèla dōr schó e' sué inuköl wöshkila yöule cobre<sup>f</sup> wa ese böt iökwā. <sup>3</sup>Eta Jesús tō iché:

—Mokj ye' tō a' a ichè tō alaköl wj siarèla dōr schó e' tō inuköl iéwā kibiie imalepa kos tsata. <sup>4</sup>Ie'pa ulitane tō

inuköl kuò atē ese ié, erè ie' siarè, e' tō ie' wā itso' senioie e' kos méttsa. E' kuekj ye' tō ie' ché es.

### Jesús tō iché tō Skèköl wé olordawa

(Mateo 24.1-2; Marcos 13.1-2)

<sup>5</sup>Eta Jesús ttökatapa welepa tso' ichök tō Skèköl wé wër buaala, kitkèule taijè ák bua'buwa ena íyi bua'buwa kakmeule Skèköl a taijè, ese wa. Jesús tō iché:

<sup>6</sup>—Ikéwö dōraè eta i kos sué a' tō i', e' olordawa seraa, iékwö è kè atpa nì bata ki.

<sup>7</sup>Eta ittökatapa tō ichaké:

—A s'wöbla'ukwak, ¿mik e' wamblërmi? ¿I wa sò isuèmi tō iwamblërketke?

<sup>8</sup>Ie' iüté: "Taijè pè' datse e' chök tō ie'pa dōr ye'. Icherarakitò: 'Ye' dōr wé pairine'bitu idi' wa s'blúie e'. Nies icherarakitò tō s'erkewa e' kéwö detke. Erè kè a' minuk esepa itöki. Pè' kiterarakitò taijè. E' kuekj a' tso' wösh wa as kè yi tō a' kitö'ù. <sup>9</sup>Mik a' tō biyó ttsé tō ká wele wakpa nippöke taijè ká kuakj wakpa ta, eta e' kè tō a' tkiuk. Nies mik a' tō ibiyó ttsé tō pè' nippöke taijè iké wakpa wökirpa ta, eta e' kè tō a' tkiuk. Ese wamblërdaè kam ye' dōne e' yöki, erè ká i' erwa e' kam kéwö dōwa."

<sup>10</sup>Ie' tō ie'pa a ikj ché ia: "Ká kuakj kuakj wakpa nippöraè nita. <sup>11</sup>Nies í tō ká wötj'weraè taijè. Nies ká kuakj kuakj ki bli tō ena duè tō pè' tteraè taijè. Ká jai a íyi sueraèsö taijè sulué iwā kkachioie, e' tō ie'pa tkiweraè taijè.

<sup>12</sup>Kam e' kéwö tkò, e' yöki ie'pa tō a' klö'werawa, we'ikeraè siarè. A' miraè ie'pa wā se' nì dapa'wo wé a shulè, nies a' wötërdawa s'wöto wé a. Ie'pa wā a' miraè duésër s'blüpa ena s'wökirpa wörkj ye' ttè kuekj. <sup>13</sup>Erè es nies a' tō ye' ttè pakeraè ie'pa a. <sup>14</sup>Eta kè a' tkinuk tō ima

<sup>‡</sup>20:43 Salmo 110.1

<sup>f</sup>21:2 cobre: E' dōr tabechka èse kè tueta' darèrè wes orochka ena inukölchka es.

a' e' tsatkòmi. <sup>15</sup>Ye' tò ttè eraë a' a' e' tsatkoie buaë, e' kuëki kè a' tkinuk e' ki. A' bolòkpa kè a' iwöklönuk, ñies ie'pa kè a' iyënuk tò e' dör kachè. <sup>16</sup>A yé, a' mì, a' èlpa, a' yamipa malepa, a' sini'pa, e'pa welepa tò a' wömerattsa a' bolòkpa ulà a. Ie'pa tò a' welepa tterawa. <sup>17</sup>Sulitane tò a' sueraë suluë ye' ttè kuëki. <sup>18</sup>Erè kè a' tkinuk, a' kè weirpa kekraë, a' döraë buaë ká jai a' aishkuö ta. <sup>19</sup>A' e' tkéwa darèrè dòka bata ekkè, e' ta' a' tsatkërdaë.

<sup>20</sup>Mik a' isuë tò ká kua'ki ñippök-wakpa iëne tajë Jerusalén kköiëule e' pamik shkit ñippök Jerusalén wakpa ta, eta' a' éna ianú tò Jerusalén erdawa bet. <sup>21-22</sup>Mik e' kèwö de, eta' wépa serke Judea e'pa tkóyalmi kabata a. Skéköl tò Jerusalén wakpa we'ikeraë tajë siarë. E' kuëki wépa serke Jerusalén, e'pa e' yólur. Nies wépa tso' kañika, esepa kè kinewane ee. E' kos tköraë wes itso' kitle Skéköl yëkuö ki es. <sup>23</sup>Kawö suluë döraë ká i' ki, iwakpa we'ikeraë siarë Skéköl tò. E' kuëki e' kèwö ska' ta iwëstela ina alakölpá alá kurketke ena alakölpá tsu' muke ilà a' esepa ta! <sup>24</sup>Judiowak welepa tterawa tabè wa; welepa tserdami klöulewa ká wa'ne. Eta' pè' kè dör judiowak, esepa tò Jerusalén klö'werawa wes iwákpa icha es, dò mik Skéköl tò ikéwö mé ie'pa a' ekkè.

### Jesús dörane olo ta' tajë

(Mateo 24.29-35; Marcos 13.24-37)

<sup>25</sup>“Diwö a, si'wö a ena bëkwö a íyi wërdaë tajë suluë iwà kkachoie tò ká i' erkewatke. Nies ká i' ki dayë blardaë tajë ena iyöli busdaka tajë, ese yöki ká ulitane wakpa suardaë tajë, kè ie'pa a' e' onukia wes. <sup>26</sup>Ì sulu tköraë ká i' ki, ese yöki ie'pa suardaë tajë, isiwa' ardawarak suane è wa. Ì kos tso' ká jai a' e' wötir-daë. <sup>27</sup>Eta' ye' dör S'ditsö Alà, e' datse mò a' diché ta' tajë olo ta' tajë, e' wërdaë. <sup>28</sup>Mik íyi ikké sué a' tò, eta' bet ta

a' tsatkërkettek, e' kuëki a' er kuí, a' wö kóka siwa' ki.”

<sup>29</sup>Nies ie' tò ie'pa a' ikleé ttè i' wa: “Kal kiè higuera ö kal ulitane, e' bikeit-só. <sup>30</sup>Mik a' isuë tò erpa kal kò shlör-kettek, eta' a' wa ijcher tò duas dewatke tsinet. <sup>31</sup>Es ñies mik a' tò isuë tò íyi ekkè wamblërke, eta' a' wa ijchenú tò i' blúie Skéköl tso', e' kèwö dewatke tsinet.

<sup>32</sup>“Moki ye' tò a' a' ichè tò íyi ekkè wamblërdaë wépa dör wes a' es esepa kam erwa e' yöki. <sup>33</sup>Kashuk ena ká i' erdawa, erè ye' ttè michoë e' kè erpawa yës.

<sup>34</sup>“¡A' e' kkö'nú! Kè a' e' muktsá i' sulu ulà a. Kè a' e' ttökka blo' wa. Kè a' er mukwa i' tso' ká i' a, e' è ki. E' kos tò a' er darë'werawa Skéköl ki. A' e' kkö'nú as ye' datskene, e' kèwö kè tò a' klö'ù <sup>35</sup>wes iyiwak klör sho' a es. Kawö e' döraë silitane serke ká wa'ne e'pa ki, e' kuëki a' e' kkö'nú e' yöki. <sup>36</sup>A' senú wösh wa. A' ikíó S'yé a' kekraë as íyi suluë kèwö datse, e' kè dò a' ki. Nies ikíó ie' a' kekraë as a' e' duöser buaë ye' wörki mik Ye' dör S'ditsö Alà, e' datskene silitane shulök eta'.”

<sup>37</sup>Ñiwe ta' Jesús tò s'wöbla'weke Skéköl wé a, nañewe ta' ie' mia' kabata kiè Olivo e' a. <sup>38</sup>Bla'mi silitane mi'ke Skéköl wé a Jesús tò s'wöbla'weke e' kittsök.

### Judas ena judiowak kuëblupa tò Jesús aleritsé klö'wëwa

(Mateo 26.1-5,14-16; Marcos 14.1-2,10-11; Juan 11.45-53)

**22** Judiowak Yépa Yërulune Egipto, e' kèwö tkö'wekerakitö, e' döke-watke tsinet, ese kèwö ska' ta judiowak wöblar pan kè yöule iwölöwoka wa ese ñuk. <sup>2</sup>Sacerdotepa wökirpa ena s'wöbla'uk ttè dalöiëno wa wakpa suane pè' yöki, e' kuëki ie'pa tso' ikéwö yulök Jesús ttowa.

<sup>3</sup>Eta' Satanás tkawa Judas er a. Judas e' kiè ñies Iscariote. Ie' dör Jesús ttökata-apa dabom eyök kí bøl e' eköl. <sup>4</sup>Ie' mia'

ttök sacerdotepa wökirpa tã ena Skëköl wé shkëkipa wökirpa tã. Wes ie' tó Jesús mëttsami ie'pa ulà a e' chéitö ie'pa a. <sup>5</sup> E' tó ie'pa ttsé'wérak buaë tã ikablé ie' a inuköl muk. <sup>6</sup> E' dör buaë ie' a. E' kueki ie' tó kawö yulëmi iwömottsã mik kè yi ku' taië Jesús tã e' dalewa.

### Judiowak Yépa Yërulune Egipto e' k'éwö tkö'wé Jesús tó ittökatapa tã

(Mateo 26.17-29; Marcos 14.12-25; Juan 13.21-30)

<sup>7</sup> Etã Pan Kè Yöule Iwölöwoka Wa e' k'éwö tsá de. E' diwö a judiowak tó obeja pupula jcheke Ie'pa Yépa Yërulune Egipto, e' k'éwö tkö'woie. <sup>8</sup> Jesús tó Pedro ena Juan kié, tã iché ie'pa a:

—A' yú kawö tkö'wëkesö, e' chké kanéuk.

<sup>9</sup> Ie'pa ie' a ichaké:

—¿Wé be' ki ikiane tó sa' mi' ikaneuk?

<sup>10</sup> Ie' iüté:

—Mik a' de Jerusalén, etã eë wëm kueraë a' tó eköl, e' wã di' dami skauña a. E' itöki a' yú dò u wé a ie' demi eë. <sup>11</sup> U e' wák a' ichó: 'S'wöbla'ukwak be' chakök ké: ¿Úshu wé a ie' tó kawö tkö'wëkesö e' chké nëmi ie' ttökatapa tã?' <sup>12</sup> Ie' tó a' a úshu bërie tso' kákke, kaneuletke buaë, e' kkacheraë. Eë ichké kanéu se' a.

<sup>13</sup> Etã ie'pa mía tã íyi ulitane kuéraitö wes ie' tó iché es. Eë chké kanewéraitö kawö tkö'woie.

<sup>14</sup> Mik ichköetke e' diwö de, etã ie' e' tkéser chkök mesa o'mik ittekölpa tsá e'pa tã. <sup>15-16</sup> Ie' tó iché ie'pa a:

—Ye' tó a' a iché tó kawö i' kè tkö'wepaiyö a' tã dò mik iwã tka mik i blúie Skëköl tso' e' k'éwö de etã. E' kueki suluë ye' éna ikéwö bata tkö'wákia a' tã kam ye' ttöwã ie'pa tó e' yöki.

<sup>17</sup> Etã tka' klö'wéitö, tã wëstela chéitö Skëköl a, tã ichéitö ie'pa a:

—Íkë, a' itsá yó eköl eköl. <sup>18</sup> Ye' a' a iché tó vino kè yepaiyö dò mik i blúie Skëköl tso' e' k'éwö de etã.

<sup>19</sup> E' ukuöki tã pan klö'wéitö, tã wëstela chéitö Skëköl a tã iblatéitö wã tié ie'pa a tã ichéitö:

—Pan se' dör ye' chkà wömeulettã ttëwã a' skéie e'. A' tó inü kekraë as a' er arne ye' ska'.

<sup>20</sup> Es ñies mik ie'pa chké one, etã tka' klö'wéitö tã ichéitö:

—Vino i' dör ye' pé. Ye' tterawã e' pé tërdaë a' tsatkoie. E' wa ttè pa'ali me' Skëköl tó, e' wã de. <sup>21</sup> Erë yi ye' wömekettsã, e' tkër ye' tã mesa i' o'mik. <sup>22</sup> Ye' dör S'ditsö Alà, e' tã itköraë wes isuletëeatbak es, erë iwëstela ina yi ye' wömekettsã, e' tã!

<sup>23</sup> Etã ie'pa ñi chakémitke: "A' iché, ¿yi ie' wömekettsã?"

### ¿Yi dör kékëpa taië Skëköl a?

<sup>24</sup> Jesús ttökatapa ñi iütéka tó ie'pa wé ék dör kékëpa taië imalepa tsata. <sup>25</sup> Jesús tó iché ie'pa a: "Pé kè tó Skëköl dalöie, esepa blúpa e' alòka ie'pa ki kekraë, erë ie'pa e' chò tó ie'pa dör imalepa kimukwakpa buaë. <sup>26</sup> Erë e' kè dör es a' tã. E' skéie yi dör kékëpa taië imalepa tsata a' shua, ese kawöta e' ökwa se' ëselaie. Ñies a' wökir kawöta e' ökwa wes kané méso es. <sup>27</sup> E'ma ¿yi dör kékëpa taië? ¿Itkër chkök mesa o'mik ese ö wé tso' chké watiök ese? Tó, itkër mesa o'mik ese dör kékëpa taië. Erë ye' tso' a' shua wes kané méso tso' chké watiök es.

<sup>28</sup> "Kos ye' weirke e' a' a' tso' ye' tã ye' wapie. <sup>29</sup> E' kueki ye' tó a' tkekeka blu'paie, wes ye' Yé tó ye' tkéka blu'ie es. <sup>30</sup> Aishkuö tã i blúie ye' tso' e' a' a' e' tulöraser chkök di'yök buaë ye' tã. Ñies a' e' tulöraser blu' kulé ki, Israel dit-séwöpa dökã dabom eyök kí bøl (12), e'pa wëttsuk."

**Pedro tö icheraë tö  
ie' kè wà Jesús sùule**

(Mateo 26.31-35; Marcos  
14.27-31; Juan 13.36-38)

<sup>31</sup> Nies Skèkèpa Jesús tö iché:

—A Simón, a Simón, ¡ye' tò tto' tso'! Satanás tò a' kèwö kié ma'wè. Ie' tò a' ulitane wöpperaë darèrèë wës iyiwö wöppè es. <sup>32</sup> Erè ye' ikiétke Skèköl a' as be' erblò ye' mik e' kè olo'yòbò. Mik be' erbléne buaë ye' mik, età ye' ttòkatapa malepa kimú as ie'pa e' tkòwà darèrèë ye' mik.

<sup>33</sup> Simón tö ie' a' iché:

—A Skèkèpa, ye' e' chétke wötènu kwa be' ta' s'wöto wé a' dò ttèwà be' ta'.

<sup>34</sup> Ie' iüté:

—A Pedro, ye' ichè be' a' tò i'ñe kam dakro ar, e' yökì be' icheraë mañatökicha tò be' kè wà ye' sùule.

**Jesús weirketke e' kèwö dökewatke**

<sup>35</sup> E' ukuökì ta' Jesús tö ittòkatapa a' ichaké:

—Mik ye' tò a' patkèmi Skèköl ttè pakök inuköl kè ta', chkewö kè ta', klökkuò kè ta', età ùi kianeia a' kì?

Ie'pa tö iüté:

—Kè ùi kianeia sa' kì.

<sup>36</sup> Ie' tò iché ie'pa a':

—E' skéie, i'ñe ta', ye' tò a' a' ichè tò a' wé wà inuköl ta', e' tsúmi; a' wé wà chkewö ta', e' tsúmi; a' wé kè wà tabè ta' e' tsatkoie, età a' paio wataútsa ta' e' ské wa tabè taútsa. <sup>37</sup> Ye' tté kos tso' kitule Skèköl yèkkuò kì, e' wà tkóraë wës itso' kitule es, e' tò ichè: 'Ie'pa tö ye' we'iké wës pè' sulusi we'iké es.' <sup>38</sup> Ttè e' wà tkòketke i' ta', e' kueki a' tò iú wës ye' tò a' a' ichè es.

<sup>38</sup> Ie'pa tö iché ie' a':

—A Skèkèpa, ié tabè tso' böt.

Ie' tò ie'pa iüté:

—Wè' idir, ¡kè a' ttòkia!

**Jesús tté S'yé ta' Getsemaní**

(Mateo 26.36-46; Marcos 14.32-42)

<sup>39</sup> E' ukuökì ta' Jesús mía Olivo kèbata a' wës iwöblar es, età ittòkatapa míyal ie' ta'. <sup>40</sup> Mik ie'pa demi wé ie'pa mîrö ee, età ie' iché ie'pa a':

—A' ikió Skèköl a' as ùi sulu tö a' erkiöweke e' kè e' alòka a' kì.

<sup>41</sup> Ie' mía bānet ie'pa yökì dò kos ák uyèmisö ekkè, ee ie' e' tkésér kuchè kì ta' itté S'yé ta' i' es: <sup>42</sup> "A yéwö, ùi tkóraë ye' ta', e' dör wës íyi bacha'bachaë yèwasö es. Be' kì ikiane, e'ma be' ye' yótsa e' ulà a'. Erè kè iwar wës ye' kì ikiane es, iú wës be' kì ikiane es."

<sup>43</sup> [E' wöshà ta' Skèköl biyöchökwak de eköl ie' ska' idiché kì iök. <sup>44</sup> Ie' eriane taië, e' shuà ie' ttémitke S'yé ta' taninië, ta' ipaali wër s'pé es e' yërke taië darke íyök kì.]\*\*

<sup>45</sup> Mik ie' tté one, età idene ittòkatapa ska' ta' ie'pa kuéitö kapòtulur. Ie'pa shtrinewà eriar è wà, e' kueki ie'pa kapolur. <sup>46</sup> Ie' tò ie'pa a' ichaké:

—¿Iók a' kapòtulur? A' e' kóka, a' ikió Skèköl a' as ùi sulu tö a' erkiöweke e' kè e' alòka a' kì.

**Jesús klö'wéwà ibolökpa tö**

(Mateo 26.47-56; Marcos  
14.43-50; Juan 18.2-11)

<sup>47</sup> Jesús tso'ia' ttök e' dalewa taië pè' de. Ie' ttòkatapa dabom eyök kì bøl, e' eköl kié Judas e' debitu' ie'pa wètsè. Ie' dewà Jesús ska' ishke'uk wöalattsè wa. <sup>48</sup> Erè Jesús tö ie' a' iché:

—A Judas, ¿wöalattsè wa be' tò ye' dör S'ditsö Alà, e' wömekettsa?

<sup>49</sup> Mik Jesús ttòkatapa tso' ie' ta', e'pa tò isué tò ie' klörkewatke, età ie'pa tò ie' a' ichaké:

§22:37 Isaías 53.12

\*\*22:44 Ttè i' kè ku' yèkkuò kèchke wele kì.

—A Skëkëpa, çtabè yëttsa sa' tō ie'pa kī?

<sup>50</sup> Etā ie'pa eköl tō sacerdote kibi, e' kanè méso eköl kuköña ulā bua'kka téttsa. <sup>51</sup> Jesús tō iché:

—Imúat; wé' idir.

Etā ie' tō kanè méso kukuöña kéwa tã ibua'wéneitö. <sup>52</sup> E' ukuökī tã sacerdotepa wökirpa ena Skëköl wé shkëkipa wökirpa ena judiowak kuëblupa debitu ie' tsukmi, e'pa a' ie' iché:

—Ç' kuekī a' bite' ye' ñalé kī tabè kī kal wölö kī ye' klö'ukwā wës akblökwakpa klö'wëwā es? <sup>53</sup> Këkraë ye' bak a' shua Skëköl wé a, erë a' kè wā ye' klöönewa. Erë i' tã a' a' ikéwö de ye' klö'wowäie. Ñies bé a' ikéwö de ì sulu wamblak ie' éna e' wamblöie.

### **Pedro tō iblé tō kè ie' wā Jesús sūule**

(Mateo 26.57-58,69-75; Marcos 14.53-54,66-72; Juan 18.12-18,25-27)

<sup>54</sup> Etā ie'pa tō Jesús klö'wëwā tsémi sacerdote kibi, e' u a. Pedro dami ie' itökī kamië. <sup>55</sup> Etā eë pe' wëlepa tō bö' batséka upa shushaë baiklè, etā Pedro e' tkéser ie'pa tã. <sup>56</sup> Etā alaköl eköl dör kanè méso, e' tō Pedro sué bö' kkö a' tã isuwëwā krereë tã ichéitö:

—Ñies ie' wī dör Jesús klé.

<sup>57</sup> Erë Pedro tō iblé. Ie' tō iché:

—A tayë, ye' kè wā wëm e' sūule.

<sup>58</sup> E' ukuökī kukuie tã wëm eköl tō Pedro sué ñies tã ichéitö:

—Be' ñies dör Jesús klépa eköl.

Erë Pedro tō iüté:

—A wëm, kè ye' dör ie'pa eköl.

<sup>59</sup> E' ukuökī hora de et tã iskà tō iché:

—Wëm se dör Galilea wak e' kuekī mokī ie' dör Jesús klé eköl.

<sup>60</sup> Pedro tō iché:

—A wëm, ì cheke be' ye' a, e' kè jcher ye' wa.

Pedro ttökeia e' wöshā tã dakro ane.

<sup>61</sup> Etā Skëkëpa Jesús wötrée, tã Pedro

suéitö ék. Etā Pedro éna ianewa tō ttè i' ye' Jesús tō ye' a: “I'ñe kam dakro ar, e' yökī be' tō icheraë mañatökicha tō be' kè wā ye' sūule.” <sup>62</sup> Etā Pedro e' yëttsa kañika tã iüé siarë.

### **Jesús wayué ie'pa tō**

(Mateo 26.67-68; Marcos 14.65)

<sup>63</sup> Wëpa ulā a Jesús tso' klöulewā, e'pa tō ie' wayué suluë, ippé tajë. <sup>64</sup> Ñies ie'pa tō iwöbla pamuwëwā datsi'tak wa, etā ie'pa tso' ippök, e' dalewa ie'pa tō ie' a ichakeke:

—Be' dör Skëköl tteköl, e'ma sa' a ichóka çyi tō be' ppé?

<sup>65</sup> Etā ie'pa tō ie' skà cheke suluë ttè ulitane wa ku'kī ku'kī.

### **Jesús mítser ie'pa wā judiowak kuëblupa wörki**

(Mateo 26.59-66; Marcos 14.55-64; Juan 18.19-24)

<sup>66</sup> Mik ká ñine, etā judiowak kuëblupa ena sacerdotepa wökirpa ena s'wöbla'uk ttè dalöiëno wa wakpa tō Jesús tsémi wé judiowak wökir kibipa ñi dapa'uke eë. Tã ie'pa tō ie' a' ichaké:

<sup>67</sup> —Ichó sa' a' çmokī be' dör wé pairine'bitu idi' wa s'blúie e' ö au?

Ie' tō ie'pa iüté:

—Ye' tō ichëmi tó, erë kè a' tō ye' ttö klö'wëpa. <sup>68</sup> Ñies ye' tō a' a' ilè chakëmi, e' tã a' kè tō ye' iütëpa. <sup>69</sup> Erë ye' dör S'ditsö Alà, i' ukuökī tã ye' e' tkóraser Skëköl diché dör ñyi ulitane tsata, e' ulā bua'kka dalöiërta' tajë.

<sup>70</sup> Ie'pa ulitane tō ie' a' ichaké:

—Ç'E'ma be' e' chò tō be' dör Skëköl Alà?

Jesús tō ie'pa iüté:

—Tó, wës a' tō iché es idir.

<sup>71</sup> Etā ie'pa iché:

—Ç'lie se' kī ikkatökwakpa kī kiarmiia? Ì ché ie' tō, e' ttsé se' wákpa tō.



### Jesús mítser Pilato wörki

(Mateo 27.1-2,11-14; Marcos 15.1-5; Juan 18.28-38)

**23** Etä ie'pa ulitane e' kéka ta Jesús tsémirakitō Pilato ska' as ishulōitō. Pilato dör ká e' wōkir patkē' Roma wōkir kibi tō. <sup>2</sup>Ie'pa tō Jesús kkatémi Pilato a ta ichérakitō:

—Sa' wā ijcher tō wēm i' tō taiē sa' judiowak mekeka ñippök s'wōkirpa ta. Ie' iché tō sa' kē kawōta inuköl patauκ Roma wōkir kibi a. Ñies ie' iché tō ie' dör wé pairine'bitu idi' wa s'blúie e'. Ie' e' chō tō ie' dör sa' judiowak blú.

<sup>3</sup>Pilato tō ichaké ie' a:

—¿Be' dör judiowak blú?

Ie' iüté:

—Tó, wes be' iché, e'ma es idir.

<sup>4</sup>Etä Pilato tō iché sacerdotepa wōkirpa a ena pē' tso' eē, e'pa a ñies:

—Ye' kē wā ì nuí kune wēm i' kī.

<sup>5</sup>Erē ie'pa tō ikī kcateke aneule ta ichekerakitō:

—Ttē wa ie' tō s'wōbla'weke, e' tō sa' wakpa mekeka ñippök ñita. Ie' tō itsá paka'bitu Galilea, i'ñe ta ide íe Judea.

### Pilato tō Jesús patkēmi Herodes ska'

<sup>6</sup>Mik e' ttsé Pilato tō, etä ichakéitō: ¿wēm i' dör Galilea wak? <sup>7</sup>Mik ie' wā ijchenewā tō Jesús dör Galilea wak, etä ie' tō ipatkēmi Herodes ska' as e' tō ishulō, e' dör Galilea wōkir e' kuēki. E' kéwō ska' ta ie' tso' Jerusalén. <sup>8</sup>Mik ie' tō Jesús sué, etä e' tō ie' ttsé'wé buae. Bānet ie' éna isuak. Ie' wā ittē jchenewā tō, ì kē or yi a ese wekeitō, e' wā paneke ie' tō suē. <sup>9</sup>Ie' tō Jesús chaké taiē, erē Jesús kē wā ie' iütēne yēs. <sup>10</sup>Ñies sacerdotepa wōkirpa ena s'wōbla'uk ttē dalöiēno wa wakpa tso'ñak eē. Ie'pa tō Jesús kcateke taiē ie' a. <sup>11</sup>Ie' ena ñippök'wakpa, e'pa tō

Jesús sué suluē, ta ie'pa tō datsi' bua'bua, blu' datsi' sū, ese iéka ikī iwayuoie. E' ukuōki ta ie' tō ipatkēmine Pilato ska'. <sup>12</sup>Herodes ena Pilato dör ñi bolökpa, erē e' diwō shā ta ie'pa er buanene ñi kī.

### Jesús méttša ttēwā

(Mateo 27.15-26; Marcos 15.6-15; Juan 18.39–19.16)

<sup>13</sup>Sacerdotepa wōkirpa ena judiowak wōkirpa malepa ena judiowak taiē, e'pa kiéttša Pilato tō e' dapa'uk ek tsiní ème. <sup>14</sup>Ie' tō ie'pa a iché:

—A' wā wēm i' de ye' ska' kkatē. A' tō iché tō ie' tō a' wakpa mekeka ñippök sa' ta. Erē ye' tō ie' a' ichaké a' wörki, etä ì kī a' tō ie' kkatē, e' kē nuí kune ye' wā ie' kī yēs. <sup>15</sup>Ñies Herodes kē wā ì nuí kune ie' kī, e' kuēki ie' tō ipatkébitune ye' ska'. E' kuēki a' tō isué tō ie' kē wā ì sulu nuí kī ittēwami ese wamblēne. <sup>16-17</sup>Súyo ìppök patkē ttsa'bata daloie wa iwe'ikoie bērebēre, e' ukuōki ta ye' tō ie' ekemine.††

<sup>18</sup>Erē ie'pa ulitane anemi ñikkēē:

—¡Jesús ttōwā ta Barrabás ómine sa' a!

<sup>19</sup>Barrabás e' tō iyamipa dapao'ka ñippök ká e' wōkirpa ta, ñies ie' wā s'kötulewā. E' kuēki ie' tso' wötēulewā s'wōto wé a. <sup>20</sup>Pilato éna Jesús akmine, e' kuēki ie' tō iskà chéne Jesús tsatkoie. <sup>21</sup>Erē ie'pa kī arkeka taiē:

—¡Iwötōwā krus mik! ¡Iwötōwā krus mik!

<sup>22</sup>Pilato tō iskà chéne ie'pa a, i' ta ide mañatökicha:

—¿Ì kuēki? ¿Ì sulu wambléitō? Ye' kē wā ì sulu kune ie' wōmottsā ttēwā. Súyo ìppök patkē ttsa'bata daloie wa iwe'ikoie, e' ukuōki ta ye' tō ie' ekemine.

<sup>23</sup>Erē ie'pa kī arkeka taiē shüte: “¡Iwötōwā krus mik!” Bata ekkē ta Pi-

††23:16-17 Yēkkuō kēchke wele tō kuōtkéka. E' tō iché i' es: *Pilato wōblar s'wötēulewā e' ökmí eköl mik judiowak tso' Ie'pa Yēpa Yērulune Egpto e' kéwō tkō'uk eta.*

lato tö ie'pa ttè iüté. <sup>24</sup>Ie' tö iwé wés ie'pa kī ikiane es. <sup>25</sup>Es wēm tso' wötëulewā ñippè s'wōkirpa tā kuëkī, ñies s'ttëwā kuëkī, e' émine Pilato tö. Etā Jesús ttök-wā patkéitō wés judiowak kī ikiane es.

### Jesús wötëne krus mik

(Mateo 27.32-44; Marcos 15.21-32; Juan 10.17-27)

<sup>26</sup>Mik Roma shkëkipa wā Jesús dami, e'pa tö isuë tö ie' kè kī krus dë'kaia, etā ie'pa tö wēm eköl kiè Simón e' klō'wëwā tā iké krus ppökka tsëmi Jesús itōki. Wēm e' dör Cirene wak. Ie' tso' bānet, erpa e' de Jerusalén.

<sup>27</sup>Taië pë mirwā Jesús itōki. E'pa shūa alakōlpa tso' taië iūramirak taië ie' iëit-sök. <sup>28-29</sup>Jesús wotrëene ie'pa sauk tā ichéitō:

—A Jerusalén alékōlpa, kawō suluë dōraë a' kī, e' kuëkī kè a' iuk ye' iëit-sök. E' skéie a' wākpa e' iëitsó, ñies a' ala'r iëitsó. Aishkuö tā iyërdaë: 'Ayëcha buaë alakōlpa kos kè dōtā' aläë. Ayëcha buaë alakōlpa kos kè alà tā'. <sup>30-31</sup>Ye' dör wés kal pa'alī es e' weirke i' es, e' tā ÷i kè wamblërpa a' dör wés kal sí es, e'pa tā? E' kuëkī e' këwō ska' tā iyërdaë kabata a: 'Be' anūka sa' kī as sa' duōwā wötëulewā iyök a.'<sup>††</sup>

<sup>32</sup>Ñies wëpa bōl dör pë' sulusipa e'pa mirwarak iwā Jesús tā wötëwā krus mik.

<sup>33</sup>Mik ie'pa demirak ká kiè S'wōkirdiche eë, etā ie'pa tö Jesús wöté krus mik. Ñies wëpa bōl sulusipa wötérakitō, eköl iulà bua'kka, eköl baklī'kka. <sup>34</sup>[Jesús tö iché: "A yëwō, ÷i wambleke ie'pa tö ye' tā, e' kè ane ie'pa éna, e' kuëkī e' nu' olo'yó ie'pa kī."]<sup>†††</sup>

Etā Roma shkëkipa iné ñi ma'woie suë tö wés ie'pa tö Jesús datsi' blatemi ñi a. <sup>35</sup>Pë' iëter Jesús sauk. Dò judiowak

wōkirpa tso' ie' wayuök suluë, ie'pa tö icheke:

—Mokī ie' dör wé pairine'bitū idi' wa s'blúie shukit Skëköl tö e' e'ma as iwák e' tsatkó wés o'kapa tsatkéitō es.

<sup>36</sup>Ñies Roma shkëkipa tö ie' wayué. Ie'pa de tsinet ie' ska' tā blo' shkōshkō watké ie'pa tö ie' a. <sup>37</sup>Ie'pa iché:

—iMokī be' dör judiowak blú, e'ma be' wák e' tsatkó!

<sup>38</sup>Kaltak kī itso' kitule tö iché: "I' dör judiowak blú e'", e' batsulewā Jesús tsaka.

<sup>39</sup>Etā wēm eköl àr wötëulewā ikrus mik Jesús o'mik, e' tso' ie' chök suluë. Ichéitō ia:

—iMokī be' dör wé pairine'bitū idi' wa s'blúie e', e'ma be' e' tsatkó, ñies sa' tsatkó!

<sup>40</sup>Erë iëköl tso' wötëulewā ie' o'mik, e' tö iëköl uné tā ichéitō:

—Be' wömenettsā ttëwā wés ie' es, erë wësua be' kè suar tā Skëköl yöki. <sup>41</sup>Mokī se' weirke se' wák kuëkī, se' nu' kuëkī. Erë ie' kè wā ÷i sulu wamblëne yës.

<sup>42</sup>E' ukuökī tā ie' tö iché Jesús a:

—A Jesús, mik be' detkene s'blúie, etā kè be' éna ye' chökwa.

<sup>43</sup>Ie' tö iüté:

—Mokī ye' tö be' a iché tö i'ne be' dōrawā ká buaala tso' ká jai a e' a ye' tā.

### Jesús duowa

(Mateo 27.45-46; Marcos 15.33-41; Juan 19.28-30)

<sup>44</sup>Mik diwō de bata a, etā ká miá ttsettseë ká wa'ne, dò tsáli diwō de mañat ekkë. <sup>45</sup>Diwō kè dalöbuneia, etā Skëköl wé a ie'pa wā datsi' buririë ese shukuar u blatoie, e' jchënane shushaë.

<sup>46</sup>Etā Jesús tö iché aneule:

—A yëwō, ye' wiköl méat be' ulà a.

E' chéitō tā isiwā' bata tké.

††23:30-31 Oseas 10.8

†††23:34 Ttè tso' iwakyöule i' es...e' shūa, e' kè ku' yëkkuö këchke wele kī.

<sup>47</sup> Roma ñippökwa eköl dör capitán, mik e' tó isué, etá Skéköl kíkékaitó tá ichéitó:

—Moki, wém wí sene' yésyèsè.

<sup>48</sup> Pè' daparke taiè isaúk, mik e'pa tó isué tó wés Jesús blénewa, etá ie'pa erianeká taiè tá es imíyalnerak iu a. <sup>49</sup> Eré wépa wá Jesús sule buaé ena alakólpa manetwá ie' tá Galilea, e'pa qos ièter ie' kí saúk eré kamiè.

### Jesús nu wötène

(Mateo 27.57-61; Marcos 15.42-47; Juan 19.38-42)

<sup>50-51</sup> Wém tso' eköl kiè José, e' dör ká kiè Arimatea e' wak. Arimatea áte Judea. Ie' dör wém buaé yésyèsè. Ñies ì blúie Skéköl tso' e' kéwö panuk ie' tso'. Ie' dör judiowak wókirpa e' eköl, eré ie' tó ibikeitsé tó wés imalepa tó Jesús wé e' dör sulué. <sup>52</sup> Ie' míá Pilato ska', etá Jesús nu kiéitó. <sup>53</sup> Ie' tó Jesús nu yéttsá krus mik éwa iski tá ipatréwaitó datsi' ukuó bua' bua saruru ese wa. E' ukuóki tá ie' tó Jesús nu bléwá ákuk bine pa'alí s'nu blóie ese a. <sup>54</sup> Ká tuirketke etá eno diwó batseitsekemitke, e' kueki ie' kawó-tá Jesús nu wótókwa bet.

<sup>55</sup> Etá alakólpa manetwá Jesús tá Galilea, e'pa mirwañak isaúk tó wé Jesús nu mekewa. Ie'pa tó isué tó wés ie' nu bléne ákuk a. <sup>56</sup> Mik ie'pa dene u a, etá kiò masmas tso' tó s'nu ki, ese kanewérakitó. Ie'pa tó eno diwó batseitsé wés Skéköl tte dalóieno tó iché es.

### Jesús shkenekane

(Mateo 28.1-10; Marcos 16.1-8; Juan 20.1-10)

**24** Eré domingo ká ñirketke, etá alakólpa míane Jesús pö a kiò masmas kanewétke ie'pa tó, e' mí ie'pa wá tó Jesús nu ki. <sup>2</sup> Mik ie'pa de, etá ie'pa tó isué tó ák bérie bastkér pö kkò a, e' rratune bánet. <sup>3</sup> Eré mik ie'pa dewá

ákuk a, etá ie'pa tó isué tó Jesús nu kè ku'. <sup>4</sup> Ie'pa tso'ia ibikeitsök tó wék Jesús nu mí, e' bet tá ie'pa tó isué tó wépa bõl de ièter ie'pa o'mik, e'pa datsi' wõnarke dalólõé. <sup>5</sup> E' tó alakólpa suawéka taiè tá iwó éwarak dõ iski. Eré wépa e'pa tó iché ie'pa a:

—¿Iók a' tó ie' tso' ttsé'ka, e' yuleke s'nupa shua? <sup>6</sup> Ie' kè ku' íe, ishkenekane. Ì yé'bakitó a' a mik ibak Galilea etá, e' anú a' éna. <sup>7</sup> Ie' tó a' a iyé'bak tó ie' dör S'ditsó Alá, e' wõmerdatsá pè' sulusipa ulá a tá iwóterdawa krus mik, e' kí ká de mañat etá ishkerdakane. <sup>8</sup> Etá ì yé' Jesús tó, e' anewane ie'pa éna.

<sup>9-10</sup> Alakólpa dare Jesús pö a, e'pa kiè María Magdala wak ena Juana ena María dör Santiago mì. Ñies alakólpa ská tso'ñak ie'pa tá. Ì sué ie'pa tó pö a, e' pakéne Jesús ttekolpa tsá dabom eyök kí eköl (11) e'pa a, ñies imalepa a. <sup>11</sup> Eré ì paké alakólpa tó e' kè wá tá ie'pa a, e' kueki ie'pa kè wá iklõone. <sup>12</sup> Eré Pedro tunemi pö a isaúk. Mik ie' demi tá ie' tó isué ákuk shua, etá datsi' wa Jesús nu parratewá, e' è tkéter. Etá ie' biteane u a, e' tó ibikeitséro tó ¿wék imi?

### Jesús ttókatapa bõl tó ie' suéne Emaús ñalé ki

(Marcos 16.12-13)

<sup>13</sup> E' diwó wa Jesús ttókatapa bõl e' yéttsá Jerusalén michoé ká kiè Emaús ee. E' ñalé dör kamiè kilómetro dõka dabom eyök kí et (11), e' ulatök. <sup>14</sup> Ì tka Jesús tá Jerusalén, e' qos pakerami ie'pa tó ñi a. <sup>15</sup> Ie'pa kapakõrami ñita, etá Jesús tó ie'pa kué etá ishkémi ie'pa tá. <sup>16</sup> Ie'pa tó isué, eré ie'pa kè a ikkayénewa tó yi idir.

<sup>17</sup> Jesús tó ie'pa a ichaké:

—¿Ì pakerami a' tó?

Etá ie'pa e' wóklõwé ièter. Ie'pa eriarke taiè e' wénewa iwó ki. <sup>18</sup> Ie'pa eköl kiè Cleofás, e' tó Jesús iuté:

—Wësua se' kos dë'rö Jerusalén kawö tkö'uk e' shua be' è kè wä ijcher tö ì bak ee chki bökli.

<sup>19</sup> Ie' tö ie'pa a ichaké:

—¿Ì bak?

Ie'pa iituté:

—Ì bak wëm kiè Jesús dör Nazaret wak e' ta e'. Ie' dör Skëköl tteköl buaë, diché ta' tajë Skëköl wöa. Ì kè or yi a ese wé ie' tö tajë sulitane wörki. Nies s'wöbla'wëitö ttë buaë mokì wa. <sup>20-21</sup> Sa' tö ie' pana' tö isalema Skëköl tö ie' patkë' se' dör Israel aleripa e' tsatkök. Erë sacerdotepa wökirpa ena s'wökirpa malepa, e'pa tö ie' wömëttsa ttëwä wötëulewa krus mik. E' kiië ta, ì kos wamblëne, e' ki ká de mañat eta ¿ì panemiä sa' tö? <sup>22</sup> Nies alakölpa welepa tso' sa' ska', e'pa tö sa' tkiwëwä. Ìñe bla'mi ie'pa dare Jesús pö a <sup>23</sup> erë ie' nu kè ku' ee. Ie'pa tö sa' a iché tö Skëköl biyöchökwakpa de ie'pa ska', ta ichéitö ie'pa a tö Jesús tso'ne ttsë'ka. <sup>24</sup> E' ukuökì ta sa' wakpa welepa dare isaük ta ie'pa tö ikué wes alakölpa tö iché es, erë ie'pa kè wä Jesús sune.

<sup>25</sup> Eta Jesús tö iché ie'pa a:

—A' kuköña darëréë. A' kè wöblar bet. Ì kos ye'atbak Skëköl ttekölpa tö e' kè klöne a' wä bet. <sup>26</sup> Skëköl yëkkuö tö iché tö wé pairine'bitu idi' wa s'blúie e' kawö-ta weinuk es kam ie' dò sulitane wökirie olo ta' tajë e' yöki.

<sup>27</sup> Eta ie' wák tté tso' kitule Skëköl yëkkuö ki, e' kos wä pakémiitö ie'pa a. Kewe ì kit Moisés tö, e' wä pakéitö. E' ukuökì ta ì kit Skëköl ttekölpa kos e'pa tö, e' wä pakéitö ie'pa böi a.

<sup>28</sup> Mik ie'pa demi wé ie'pa mîró ee, eta iwër tö Jesús kí mi'keia ñala kí, <sup>29</sup> erë ie'pa tö ie' kiémi kröröë kapökrö ie'pa ska'. Ie'pa tö iché ia:

—Ká tuirketke, e' kueki be' e' tsuat sa' ska' kapökrö.

E' kueki ie' dewa ie'pa ta weshke. <sup>30</sup> Mik ie'pa e' tulëwä mesa o'mik chkök, eta ie' tö pan klöwé ulä a ta wëstela

chéitö Skëköl a ta iblatéitö méitö ie'pa a. <sup>31</sup> E' wö shä ta ie'pa tö isuëwä tö Jesús idir; erë bet ta ie' kè ku'ia ie'pa ta. <sup>32</sup> Eta ie'pa tö iché ñi a:

—Wëe', mik ie' kapaköratse se' ta ñala wa, Skëköl yëkkuö wä pakeratseitö, e' tö se' ttsë'wé buaë ichök.

<sup>33</sup> E' wöshä ta ie'pa e' yëttsa míyalne Jerusalén. Mik ie'pa demi ee, eta ie'pa tö Jesús ttökatapa tsá döka dabom eyök ki eköl (11) ena imalepa, e'pa kué ee ñita. <sup>34</sup> E' a ie'pa iché:

—Mokì Skëképa Jesús shkenekane. Ie' e' kkaché Simón a.

<sup>35</sup> Eta wëpa böi tö ì kos tka ie'pa ta ñala wa e' paké imalepa a. Nies wes ie'pa tö Jesús suëwä, mik ie' tö pan blaté eta, e' pakéitörak.

### Jesús e' kkaché ittökatapa a

(Mateo 28.16-20; Marcos 16.14-18; Juan 20.19-23)

<sup>36</sup> Ie'pa tso'ia ipakök, eta Jesús de dur ie'pa shua, e' tö ie'pa shke'wé ttë i' wa:

—As a' kawö tkö buaë.

<sup>37</sup> Ie'pa tkirulune tö ibikeitsé tö ie'pa tso' s'wimblu saük. <sup>38</sup> Erë Jesús tö iché ie'pa a:

—¿Ì kueki a' tkirulune? ¿Ì kueki a' ibikeitsé bötböt? <sup>39</sup> Ye' ulä ki itö saü. Ye' klö ki itö saü. Ye' kó, e' wa a' isuëwä tö ye' kè dör wimblu. S'wimblu kè chkà ta', kè dichëwö ta', erë a' isuë tö ye' chkà ta' ye' dichëwö ta'.

<sup>40</sup> E' chök ie' tso' ie'pa a, ta ie' tö iulä ena iklö kkaché ie'pa a. <sup>41</sup> Ie'pa iëteria ttsë'nerak buaë tkirulune tajë, e' kueki darëré ie'pa a iklö'ö tö mokì idir. E' kueki Jesús tö ie'pa a ichaké:

—¿Ì tso' a' wä ñè? <sup>42</sup> Eta ie'pa tö nima katuule bö' a, e' mé ia. <sup>43</sup> Ta ie' tö ikaté ie'pa wörki. <sup>44</sup> Eta ie' tö iché ie'pa a:

—Ì tka ye' ta, e' ye' ye' tö a' a, mik ye' bak a' ta eta. Ye' tö a' a iyë' tö ye' tté kos kit Moisés ena Skëköl ttekölpa tö yëkkuö

k<sub>i</sub> ñies Salmos yëkküö k<sub>i</sub>, e' k<sub>os</sub> k<sub>awöta</sub> wà tkök.

<sup>45</sup> Et<sub>a</sub> ie' tö ie'pa er ñi'wé as ì ché Skéköl yëkküö tö, e' wà ar ie'pa éna. <sup>46</sup> T<sub>a</sub> ichéitö ie'pa a:

—Itso' kitule Skéköl yëkküö k<sub>i</sub> i' es: wé pairine'bitü idi' wa a' blúie e' k<sub>awöta</sub> ttèwà, mik e' k<sub>i</sub> k<sub>a</sub> de mañat et<sub>a</sub> ishkerdakane. <sup>47</sup> Ñies tö iché i' es: Ttè buaë pakardaë ye' ttò wa Jerusalén wakpa a kewe, e' itök<sub>i</sub> ipakardaë k<sub>a</sub> ulitane wakpa a. Ttè buaë e' dör tö wépa er mane'wé Skéköl a, esepa k<sub>i</sub> ie' tö ì sulu wamblérakitö e' nuí olo'yeraë. <sup>48</sup> Ì k<sub>os</sub> tka ye' t<sub>a</sub>, e' sué a' tö, e' pakök a' k<sub>awöta</sub>

sulitane a. <sup>49</sup> Ye' yé kablë' Wiköl Batse'r muk a' a, e' patkeraë ye' tö a' a. Ie' datse k<sub>a</sub> jai a, e' döraë a' k<sub>i</sub> idiché taië wa, e' panú íe Jerusalén.

### Jesús míane k<sub>a</sub> jai a

(*Marcos 16.19-20*)

<sup>50</sup> E' ukuök<sub>i</sub> t<sub>a</sub> Jesús w<sub>a</sub> ittökatapa mítser tsinet Betania. Eë Jesús ulà kéka t<sub>a</sub> ie' er buaë ché ie'pa a. <sup>51</sup> Ie' tso'ia ie'pa a er buaë chök t<sub>a</sub> ie' butséka mí a k<sub>a</sub> jai a ie'pa wörk<sub>i</sub>. <sup>52</sup> Ie'pa tö ie' dalöié taië, e' ukuök<sub>i</sub> t<sub>a</sub> ie'pa míane Jerusalén tts'nerak buaë. <sup>53</sup> Kékraë ie'pa tso' Skéköl k<sub>i</sub>kökka iwé a.

## Jesús Tté Buaë Kit Juan tò

*Juan*

Yëkkuò i' kit Juan tò e' dör Jesús ttökatapa dabom eyök kí böl e' eköl. Yëkkuò i' kī Juan tò Jesús ttökata eköl tté cheke (13.23; 19.26; 20.2,21; 7.7, 20, 24). E' kièitò “Jesús ttökata dalër tajë iëna e'.” Ibikeitsèsò tò Juan wák tso' e' chök es. Ie' dör Israel aleri. Ie' ena iël Santiago e'pa ki' Jesús tò ittökataie. Ie'pa bak kaneblok nima kli'uk. Ie'pa bak senuk batsöri tajë me'r Galilea e' o'mik tsinet. Ikl'wésò tò yëkkuò i' kit ie' tò Jesús kune' e' kī duas de dabom paryök ena suliyök e' shü ulat (80-90 DC).

Ie'pa tò ibikeitsè tò ie' tò ikit Israel aleripa bak senuk bánet Israel esepa a. Juan 20.31 ee ie' tò se' a ikkachè tò iie ie' tò yëkkuò i' kit. E' tò ichè i' es: yëkkuò i' kitule as a' tò ikl'ò'ù tò Jesús dör Skëköl Alà pairine'bitü idi' wa s'blúie e'. Nies ik-itule as sene michoë dò a' ulà a' a' erblò ie' mik e' wa. Es Juan tò ikit. Yëkkuò i' kī ie' tò se' a ikkachè bua'iewa tò Skëköl dör Jesús Yé.

Mik Juan wötënewa s'woto wé a dayë nane kiè Patmos ee etä ie' dewatke këkëlaie. Mik ie' bak ee, etä Jesús tò ie' ka' yëkkuò kiè Apocalipsis e' shtök. Nies ie' tò yëkkuò tsitsirla skà kit dökä mañat.

### Skëköl Ttò yöne s'ditsöie

**1** Tsawe tã eköl kiè Skëköl Ttò e' tso'tke. Ie' tso' Skëköl tã, nies ie' dör Skëköl. <sup>2</sup>Kenet ie' tso'tke Skëköl tã. <sup>3</sup>Skëköl tò iyi ulitane yö' ie' tã nita. Kè i' ku' kã i' kī, e' kè yöneñak ie' wa. <sup>4</sup>Ie' dör sene michoë e' wák. Ie' dör wes bö'wò es, e' tò se' er nī'weke. <sup>5</sup>Bö'wò nē' tò se' er suluë tso' wes stui a es e' nī'wemir. Kè i' sulu e' alòpaka iki.

<sup>6</sup>Wëm eköl patk'bitü Skëköl tò e' kiè Juan. <sup>7</sup>E' dë'bitü yi dör bö'wò nē' ttekölie

itté pakök as sulitane erblò imik Juan tò itté pakeke e' wa. <sup>8</sup>Ie' wák kè dör bö'wò nē', erè ie' dë'bitü itté pakök.

<sup>9</sup>Yi dör bö'wò nē' e' dör bö'wò chökke datse kã jai a sulitane er nī'woie e'. <sup>10</sup>Kã i' kos yö' Skëköl tò ie' tã nita, erè mik idë'bitü kã i' a, etä kã i' wakpa kè éna iane tò yi dör ie'. <sup>11</sup>Ie' dë'bitü iwák kã a ena iwák ditsëwöpa a, erè e'pa kè wa ikinewa. <sup>12</sup>Erè wépa tò ikiéwa tã ier-blé imik, esepa a kawò méitò as idörak Skëköl ala'rie. <sup>13</sup>Ie'pa de Skëköl ala'rie, erè e' kè dör wes se' ala'r kurke yé wa mi wa es. Ie'pa de Skëköl ala'rie ie' wák er wa.

<sup>14</sup>Wé kiè Skëköl Ttò nē' yöne s'ditsöie tã isene' sa' shua. Ie' dör Skëköl Alà eköl è e'. Ie' wa Skëköl er buaë chò se' a ena wes Skëköl dör mokī, e' kos kkayëne se' a. E' su' sa' tò. <sup>15</sup>Juan tò ie' tté paka' tã ichéitò aneule: “Wëm i' yö'yö a' a' mik ye' iché tò wëm eköl daia ye' ukuökī s'pattök ye' skéie, e' tso'tke kã iaiaë ye' yöki, e' kueki ie' dör buaë ichökke ye' tsata.”

<sup>16-18</sup>Skëköl ttè dalöiëno e' mène Moisés wa. Erè kos Skëköl er buaë chò se' a ena wes ie' dör mokī e' jchenewa sa' wa Jesucristo wa. Kè yi wa Skëköl suule iwöbla wa, erè ilà eköl è tkérie iyé tã, e' dör nies Skëköl, e' tò iyé kkaché se' a. E' kueki ie' dör er buaë chökwak. Ie' er buaë kī ché se' a tajë shute.

### Juan dör S'wöskuökwak e' tò Jesucristo tté pakè

*(Mateo 3.11-12; Marcos 1.7-8; Lucas 3.15-17)*

<sup>19</sup>Judiowak wökirpa tò sacerdotepa ena Leví aleripa, e'pa welepa patké Juan ska' ichakök: “¿Yi dör be? ¿Be' dör wé pairine'bitü idi' wa s'blúie e'?” <sup>20</sup>Juan kè wa iblène. Ie' tò ie'pa iuté yösyësè:

—Ye' kè dör wé pairine'bitü idi' wa s'blúie e'.

<sup>21</sup>Ie'pa tò iskà chaké:

—E'ma ¿be' dör yi? ¿Be' dör Skëköl tteköl bak kiè Elías e'?

Juan tö ie'pa iüté:

—Au, ye' kè dör ie'.

Ie'pa tö iskà chaké:

—¿Be' dör Skëköl tö iyë'at tö itteköl skà datse e'?

Etä Juan tö iüté:

—Au, ye' kè dör ie'.

<sup>22</sup> Etä ie'pa tö iskà chaké ia:

—E'ma, ¿be' dör yi? Sa' kī ikiane jchenowā yësyësë chëne yi tö sa' patké e'pa a. E' kuekī ichó sa' a tö ¿yi dör be'?

<sup>23</sup> Juan tö ie'pa iüté:

—Ye' dör wé yë' Skëköl tteköl Isaías tö e'. Ie' tö iyë': 'Ká sir poë wé kè yi serku' ee yile ttöraë aneule, e' tö icheraë: A' er mane'ú Skëköl datse e' yöki. E' dör wes nälā yuësö yësyësë ie' yöki es.'<sup>§§</sup>

<sup>24</sup> Etä wépa patké fariseowakpa tö ttök Juan tā, <sup>25</sup> e'pa tö ie' a iskà chaké:

—Be' kè dör wé pairine'bitū idi' wa s'blúie e', be' kè dör Elías, be' kè dör Skëköl tteköl ñe', e'ma ¿i kuekī be' tö s'wöskueke?

<sup>26</sup> Ie' tö iüté:

—Ye' s'wöskueke di' a, erë eköl dur a' shuā kè ijcher a' wā tö yi idir, <sup>27</sup> e' döraë ye' ukuökī kanëblök ye' skéie. Ie' dör kékë taië ye' tsata, e' kuekī ie' klökkuö kicha è kè wötsënanuk ye' siarla e' a.

<sup>28</sup> E' qos tka Betania. Ká e' atë di' kiè Jordán e' wışet. Eë Juan tso' s'wöskuök.

### Jesús dör Skëköl obeja jchëne e'.

<sup>29</sup> Bule es tā Juan tö Jesús sué tö idatse ie' ska' tā ichéitö: "Isaú. Wī idatse e' dör Skëköl obeja pupula patkébitū jchë ì sulu wambleke sulitane tö e' nuí olo'yoie e'. <sup>30</sup> Ie' wī paka' ye' tö a' a mik ye' tö iyë': 'Eköl doia ye' ukuökī, e' tso'tke ká iaiaë ye' yöki, e' kuekī ie' dör buaë ichökke ye' tsata.' <sup>31</sup> Ye' wák kè wā ijcher bua'iewā tö

yi dör ie', erë ye' tö s'wöskueke as Israel aleripa wā ijcherwā tö yi dör ie'."

<sup>32</sup> Nies Juan tö iché: "Ye' isué tö Wiköl Batse'r datse ká jaì a nubölie, e' atë ie' a. <sup>33</sup> E' yöki ye' kè wā ijcher tö yi idir, erë Skëköl tö ye' patké' s'wöskuök di' a, e' tö ye' a iyë': 'Yi kī Wiköl batse'r de atë ie' a, e' dör wé tö a' iekewā Wiköl Batse'r a e' wák.' <sup>34</sup> E' sué ye' tö, e' kuekī ye' tö ichë a' a tö ie' dör Skëköl Alà ichökke."

### Jesús ttökatapa tsá

<sup>35</sup> Bule es tā Juan durne eë tā ie' tā it-tökatapa de böl. <sup>36</sup> Mik Juan tö isué tö Jesús damia e' wa, etä ie' tö iché ie'pa a: —iWëm wī dör Skëköl obeja pupula patkébitū jchë se' skéie e'!

<sup>37</sup> Ì ché Juan tö, e' ttsé Juan ttökatapa böl tö, etä e'pa míyal Jesús itöki. <sup>38</sup> Jesús e' wötréene tā isué tö idatserak ie' itöki tā ichakéitö:

—¿Ì kiane a' kī?

Ie'pa tö iüté:

—A Rabí (judioie ttë e' wà kiane chë s'wöbla'ukwak), ¿wé be' serke?

<sup>39</sup> Etä ie' tö ie'pa iüté:

—A' shkó isaük.

Etä ie'pa míyal ie' tā, tā wé ie' serke, e' sué ie'pa tö. Mik ie'pa míā ie' tā etä diwö detke tkël. Ie'pa e' tséat ie' ska' dö kauiirketke ekkë.

<sup>40</sup> Ittökatapa böl tö Juan ttö ttsë' tā imineyal Jesús itöki, e' eköl kiè Andrés, e' dör Simón Pedro ël. <sup>41</sup> E' ukuökī bet tā Andrés tö iël Simón e' kué tā ichéitö ia:

—Wé pairine'bitū idi' wa s'blúie, e' kue sa' tö. ("Wé pairine'bitū idi' wa s'blúie" e' kiè judioie "Mesías" ena griegoie ikië "Cristo".)

<sup>42</sup> E' ukuökī tā Andrés wā Simón mítser wé Jesús tso' eë. Mik Jesús tö Simón sué, etä ie' tö iché ia:

—Be' dör Simón, Juan alà, erë be' kir-daë Cefas (griegoie s'kië Pedro, e' wà kiane chè ák.)

### Felipe ena Natanael e'pa kié Jesús tò ittòkatapaie

<sup>43</sup> Bule es ta Jesús tò ibikeisé tò “ye' mi'keä Galilea.” Kam ie' mi' e' yöki ta ie' tò Felipe kué ta ichéitò ia:

—Be' shkó ye' ta ye' ttökataie.

<sup>44</sup> Felipe dör ká kië Betsaida e' wak. Andrés ena Pedro e'pa serke ñies Betsaida. <sup>45</sup> Felipe tò Natanael kué ta ichéitò ia:

—Wé pairine'bitu idi' wa s'blúie kit Moisés ena Skéköl ttekölpa tò yëkkuö ki, e' wák kué sa' tò. Ie' dör Jesús, José serke Nazaret, e' alà.

<sup>46</sup> Natanael tò iché:

—¿I buaë dötsami Nazaret?

Felipe tò iché ia:

—Be' shkó sa' ta, ta iwà saú.

<sup>47</sup> Mik Jesús tò isué tò Natanael datse ta ichéitò:

—Wëm wí e' je' dör Israel aleri bua'ie. Ie' kè kachöta'.

<sup>48</sup> Natanael tò ie' a ichaké:

—¿I be' a ichök tò ye' dör es?

Ie' tò iüté:

—Ye' kè ku' dur ee, erë kam Felipe tò be' kiö, e' yöki ye' tò be' su' higuera klò dikia.

<sup>49</sup> Natanael tò iché ie' a:

—A S'wöbla'ukwak, ¡Be' dör Skéköl Alà ichók! ¡Be' dör Israel aleripa blú ichók!

<sup>50</sup> Jesús tò ie' iüté:

—Ye' be' a iché tò “ye' be' su' higuera klò dikia,” ¿e' è kueki be' erblé ye' mik? Erë e' tsata be' tò ikí sueraia.

<sup>51</sup> Ñies ie' tò iché:

—Mokí ye' tò a' a iché tò ká jai sueraë a' tò áie ta a' isueraë tò ye' dör S'ditsö Alà

e' dör wes klökata\* es shkokaie ká jai a, e' ki Skéköl biyöchökwakpa shköke wo'k wa'k.

### Ulabatsè kéwö tkö'weke Caná

**2** Böiki es ta ulabatsè Caná ate Galilea ee, ee Jesús mì tso'. <sup>2</sup> Ñies Jesús ena ittòkatapa kiule, e'pa de ulabatsè e' kéwö tkö'uk. <sup>3</sup> Mik ie'pa vino enewa, eta Jesús mì tò iché ie' a:

—Vino enewa.

<sup>4</sup> Jesús tò ie' a iché:

—¿Iók be' tò e' ché ye' a? Kam ye' kéwö dò iwà kkachöie tò yi dör ye'.

<sup>5</sup> Eta imì tò iché íyi watiökwakpa a:

—Ì kos chekeitò a' a, e' ú a' tò es.

<sup>6</sup> Ee skau tso' teröl (6) judiowak e' batse'ukerak Skéköl a, e' dí dapa'woie. Skau ek è a di' choka galon döka dabom böyök (20) ö dabom mañayök (30) ekkë.

<sup>7</sup> Jesús tò iché watiökwakpa a:

—Skau ikképa wà ióka chië di' wa.

Ta watiökwakpa tò iwà iékarak es.

<sup>8</sup> Eta Jesús tò iché iarak:

—I' ta itsá yóttsa elkela ta itsúmi ikéwö tkö'uk wökir a pattsé.

Es ie'pa tò iwé. <sup>9</sup> Eta iwökir tò di' yöne vinoie e' pattsé. Ie' kè wa ijcher tò wé vino e' datse (erë watiökwakpa tò di' yéttsa, e'pa è wa ijcher tò wé idatse.) E' kueki ie' tò wëm ulabatske, e' kié <sup>10</sup> ta ichéitò ia:

—Sulitane wöblane vino bua'iewa, ese watiök kewe. Mik s'kiulepa tò iyé taië, eta vino èse watieke. Erë be' tò vino bua'ie blé, ikké erpa be' tò iwatieke.

<sup>11</sup> I' wé Jesús tò Caná ate Galilea ee, e' dör ì kè or yi a ese tsá o' ie' tò. E' wa ie' tò ilo taië, e' kkaché ie'pa a, ta ittòkatapa erblé ie' mik.

<sup>12</sup> E' ukuöki ta ie' mia imì ta, iëlpa ta, ñies ittòkatapa ta, ká kië Cafarnaüm ee. Ee ie'pa e' tséat ká böt ká mañat ekkë alè.

\*1:51 Génesis 28.11 saú.



### Jesús tò Skèköl wé batse'wé

(Mateo 21.12-13; Marcos 11.15-18; Lucas 19.45-46)

<sup>13</sup> Judiowak Yépa Yërulune Egipto e' kéwö tkö'wè dökewatke tsinet, e' kueki Jesús miá Jerusalén kawö e' tkö'uk. <sup>14</sup> Mik ie' de Skèköl wé pamik, etä ie' tò obeja ena bakala pupula ena nuböl ese wataukwakpa kué. Nies inuköl mane'ukwakpa<sup>†</sup> kuéitö turlurdak imesa o'mik. <sup>15</sup> Tä ie' tò tsa' tréwa, e' wa ie' tò iyi wataukwakpa kos tré'wéyal iobeja ibakala tso' kos e' ta. Nies inuköl mane'ukwakpa inuköl tuléttsaitö ta imesa trélurka. <sup>16</sup> Ie' tò iché nuböl wataukwakpa a:

—Íyi i' yólur sera! jKè ye' Yé u klö'warwa a' iyi watuoie!

<sup>17</sup> E' ukuöki ta ittökatapa éna ianewa tò Skèköl yèkkuö tò iché: “Be' u dalër taië ye' éna, e' tsatkeræ ye' tò dö ye' duöwa ekké.”

<sup>18</sup> Judiowak wökirpa tò ichaké Jesús a:

—Ì kè or yi a ¿e' wése wèmi be' tò sa' a iwà kkachöie tò be' wa kawö ta' iyi ikké woie?

<sup>19</sup> Ie' tò iiuté:

—U i' tkéttsa a' tò, e' ta böiki es ta ye' tò iyuékane.

<sup>20</sup> Ie'pa tò iché ia:

—U i' kané dör duas dabom tkéyök kí teröl (46), etä ¿wes iyuékami be' tò ká mañatk è?

<sup>21</sup> Erè u cheke ie' tò, e' dör iwák e' chöke. <sup>22</sup> E' kueki mik ie' shkènekane, etä ittökatapa éna ianewa tò ie' tò iyé' es. E' kueki ie'pa tò Skèköl yèkkuö ena i' yé' Jesús tò e' klö'wé.

### Jesús wa sulitane er sùle buaë

<sup>23</sup> Mik Jesús tso' Jerusalén Judiowak Yépa Yërulune Egipto e' kéwö tkö'uk, etä ì kè or yi a ese weke ie' tò taië. E' kueki taië pé' erblé ie' mik. <sup>24</sup> Erè ie' wa ie'pa er sùle buaë, e' kueki kè ie' erblène ie'pa mik. <sup>25</sup> Ie' wák wa ijcher buaë wes sulitane er dör. E' kueki kè yi a i' yènuke ie' a tò wes se' er dör.

### Jesús ena Nicodemo tté ñita

**3** Wèm tso' eköl kiè Nicodemo, e' dör judiowak wökirpa eköl. Ie' dör fariseowak. <sup>2</sup> Ká et nañewe ie' de Jesús ska' ta' ichéitö ia:

—A S'wöbla'ukwak, ì kè or yi a ese weke be' tò. Skèköl kè kúpa be' ta, e'ma kè be' a i' onuk. E' kueki sa' wa ijcher tò ie' tò be' patké' sa' wöbla'uk.

<sup>3</sup> Jesús tò iché ia:

—Mokí ye' be' a iché tò yi kè skà kunene etökichane, ese kè döpa wa i' blúie Skèköl tso' e' a.

<sup>4</sup> Nicodemo tò ie' a ichaké:

—Mik s'de këchke, etä ¿wes s'kurmine etökichane? ¿Wes s'mi' miwane s'mi shua, e' kurmi etökichane?

<sup>5</sup> Jesús tò iiuté:

—Mokí ye' be' a iché tò yi kè kune di' wa ena Skèköl Wiköl wa, ese kè döpa wa i' blúie Skèköl tso' e' a. <sup>6</sup> S'kune s'mi wa s'yé wa ese ser wes s'ditsö ser es, erè yi kune Skèköl Wiköl wa, ese ser wes Skèköl ser es. <sup>7</sup> Ye' tò be' a iché tò be' kawöta kunukne etökichane. ¿Wes e' tò be' ktiwèmi? <sup>8</sup> Ì wakanewéke Skèköl Wiköl tò se' a, e' dör wes siwa' bitsirke ká wa'ne es. E' blar ttsésö, erè wé idatse ena wé imíró e' kè jcher s'wa. Es itköke sulitane kune Skèköl Wiköl wa e'pa ta. Se' wa ijcher tò ie'pa kunene Skèköl Wiköl wa, erè kè se' wa ijcher wes iwà tköke.

<sup>†</sup>2:14 inuköl mane'ukwakpa: Inuköl tso' Skèköl wé a, e' dör kua'ki, kè dör inuköl tso' judiowak wa iyi tuoie bánet ese. E' kueki yi tò iyi tueke ee, ese kawöta ie'pa inuköl mane'uk inuköl ñe'se wa.

<sup>9</sup>Nicodemo tö iská chaké:

—¿E' ma ima iwà dör?

<sup>10</sup>Etá Jesús tö iüté:

Be' dör s'wöbla'ukwak dalöiértá' taië Israel aleripa shuá ese, erë ¿wes be' kè wá íyi ikké jcher? <sup>11</sup>Mokí ye' tö be' a ichè tö ì jcher sa' wá, e' cheke sa' tö a' a, ñies ì sué sa' tö, e' pakeke sa' tö, erë a' kè éna sa' ttò klö'wak yës. <sup>12</sup>Íyi tso' ká i' kí, ese wa ye' tö ikleeke a' a, erë e' kè klö'wè a' tö. Ye' mú tö ipakè íyi tso' ká jai a' ese wa kè kleaule, e' ma ¿wes e' klö'wëmi a' tö?

<sup>13</sup>“Kè yi mine'ká ká jai a' ese dene ká i' a. Erë ye' dör S'ditsö Alà, e' datse ká jai a, e' kuekí íyi tso' ee' e' jcher sèraa ye' wá buaë. <sup>14</sup>Mik Israel aleripa bak ká wé kè yi serku', ese ké a, etá Moisés tö tabechka yué tkabè diökölíe,<sup>3</sup> e' batséwaitö kalka mik tá itkéka. Es ñies, ye' dör S'ditsö Alà, e' kawötá tkèka kal mik <sup>15</sup>as wépa erblé ye' mik, esepa ulà dò sene michoë e' ska'.” Es Jesús tö iché Nicodemo a.

**Skéköl éna sulitane dalër**

<sup>16</sup>Skéköl éna ká ulitane wakpa dalër taië. E' kuekí ie' alà eköl è, e' me'ttsaitö ttèwá se' skéie, as yi erblé imik esepa kè duöwá aishkuö tá, e' skéie sene michoë dö iulà a. <sup>17</sup>Skéköl kè wá ilà patkéne ká i' a se' kichatöksa. E' skéie ipatké'itö se' tsatkök.

<sup>18</sup>“Yi erblé Skéköl Alà mik, ese kè kichatène. Erë yi kè erblène imik, ese kè erblène Skéköl Alà eköl è e' mik, e' kuekí ikichaténetsatke. <sup>19</sup>Skéköl Alà dè'bitu ká i' a, e' dör wes bö'wö es se' er ñi'woie. Erë s'tso' ì sulu wamblök, esepa dör wes s'tso' stui a es, e' wa ie'pa wöbatsö bua'ie. Ie'pa kè kí ie' kiane. E' kuekí wépa kè erblène ie' mik, esepa kichaténetke. <sup>20</sup>Wépa tö ì sulu wambleke, esepa éna

suluë Skéköl Alà ar. Ie'pa kè kí Skéköl Alà ttè kiane ttsè as ì sulu wamblekerakitö, ese wá kè kkayërwa. E' dör wes s'tso' stui a kè shkakwá bö'wö olo ska' es. <sup>21</sup>Erë wépa serke wes Skéköl ttè mokí tö ichè es, esepa kí Skéköl Alà kiar buaë. Ie'pa dewá buaë Skéköl Alà dör wes bö'wö es e' ska' iwá kkachoie tö ì weke ie'pa tö, e' wekerakitö Skéköl batamik.”

**Juan S'wöskuökwak tö iché tö Jesús dör ie' tsatá**

<sup>22</sup>E' ukuökí tá Jesús mía Judea ittökátapa ta. Ee ie' e' tséat ká taië ie'pa tá s'wöskuök. <sup>23</sup>Ñies Juan tso' s'wöskuök ká kiè Enón ee, ee di' tso' taië e' kuekí. Ká e' até tsinet Salim. Pé' döke ie' ska' tá ie' tö ie'pa wöskueke. <sup>24</sup>(Íyi ikké kaneone kam ie' wötërwa s'wöto wé a, e' yöki.)

<sup>25</sup>Erë ie' ttökátapa welepa ñi iütémi judiowak eköl tá, ie'pa e' batse'uke di' wa, e' tté kí. <sup>26</sup>E' kuekí ie'pa míyal Juan ska' tá ichéitö ia:

—A S'wöbla'ukwak, wëm dè' be' ska' Jordán di' wishet ye' be' tö, e' wák tso' s'wöskuök tá sulitane mi'ke ie' tá. ¿E' kè tö be' tsiriwè?

<sup>27</sup>Juan tö iüté:

—Au, e' kè tö ye' tsiriwè. Skéköl kè wá se' a ikéwö mène, e' tá kè se' a ì onuk yës. <sup>28</sup>Ye' tö iyé' tö 'ye' kè dör wé pairine'bitu idi' wa s'blúie e', erë ye' patkéne'bitu ie' yöki keweie, e' ttsé' a' wákpa tö buaë. <sup>29</sup>Mik ulabatske, etá alaköl dör iwëm icha. Etá iwëm sini' tso' ee, ese tö wëm ttò ttsé, etá e' tö ie' ttsé'wé buaë. Ye' dör wes wëm sini' es. E' kuekí ye' ttsé'ne buaë i'ñe tö sulitane mi'ke Jesús tá. <sup>30</sup>Ie' kawötá kikèka taië ye' tsatá, e' skéie ye' kè e' wöökwa diöshet.

<sup>3</sup>3:14 Moisés tö tabechka yué tkabè diökölíe: Israel aleripa ukyène Skéköl kí ena Moisés kí. E' nufie Skéköl tö tkabè patké' ie'pa ttökulur. Erë Skéköl tö iyé' Moisés a tö tabechka yuó tkabè diökölíe tá ibatsówa kalka mik as wépa duökewatke esepa isaü tá ibuarne. Números 21.4-9 saü.

### Jesús datse ká jai a

<sup>31</sup> Yi datse ká jai a, e' dör sulitane tsata. Wépa tso' ká i' ki, esepa dör ká i' wakpa, i' tso' ká i' ki, ese è cheke ie'pa tö. Erë yi datse ká jai a e' dör sulitane tsata. <sup>32</sup> Ì suule ie' wá ena ì ttsëule ie' wá ká jai a ese pakekeitö, erë pé' kibiiepa kè wá ie' ttè klöone. <sup>33-34</sup> Yi patkë'bitu Skëköl tö e' a Skëköl Wiköl mène taië shüte, e' kuëki ie' tö Skëköl ttò pakekene. E' kuëki wépa tö ie' ttè klö'wé, e' wa esepa tso' ichök tö Skëköl ttè dör mokjë. <sup>35</sup> S'yé éna ilà dalër taië, e' kuëki íyi ulitane méatitö iulà a. <sup>36</sup> Wé erblé Skëköl Alà mik, ese ser michoë. Erë wé kè tö Skëköl Alà ttò iütè, ese kè ulà dõpa sene michoë ska'. E' skéie Skëköl kësik me'rie iki.

### Jesús tté alaköl eköl ta Samaria

**4** <sup>1-3</sup> Fariseowakpa tö ittsé tö Jesús klépa kí iërke ena s'wösurkerak taië Juan tö s'wöskué e' tsata. (Erë Jesús wák kè wá s'wösune, ittökatapa tö s'wöskué.) Mik i' cheke ie'pa tö e' ttsé Jesús tö, eta ie' e' yéttsa Judea míane Galilea.

<sup>4</sup> Erë ie' ittsé tö ie' kawõtá shkòk-tkò Samaria. <sup>5</sup> Ie' ena ittökatapa de ká ate Samaria kiè Sicar ee. Ee tsinet ká me' Jacob tö ilà José a, e' ate. <sup>6</sup> Di' bi' Jacob tö ká íaiäe e' tso' ee. Ee Jesús demi ta ishtrinewá. Ie' e' tkéser di' biule e' kkómik eta diwö dökette bata a. <sup>7-8</sup> Jesús ttökatapa míyal Sicar chkwö taúk ñè. E' dalewa alaköl eköl dör Samaria wak, e' debitu di' tsuk ta Jesús tö iché ia:

—A tayë, be' we'ikèyö, di' kaktú ña yè.

<sup>9</sup> Ie' tkinewá ta iütéitö:

—Be' dör judiowak, ye' dör Samaria wak. ¿Wes be' tö ye' a di' kiekie? (Jud-iowak ena Samaria wakpa kè wö dör ñi mik, kè dõtá'wá ñi ska', e' kuëki alaköl tö iüté es.)

<sup>10</sup> Jesús tö iüté:

—Ì meke Skëköl tö se' a éme ena yi dör ye', e' jchenúpa be' wá, e' ma be' tö ye' a di' kieraë ta di' tö sene meke sia ese meraëyö be' a.

<sup>11</sup> Alaköl e' tö Jesús a iché:

—A kékëpa, be' kè wá tká' ku' di' i' yottsá, ñies di' i' tso' iskië. ¿Wé be' tö di' e' kuëmi mè ye' a? <sup>12</sup> ¿Ima be' tö ibikeitsè? Se' yé bak dör Jacob, e' tö di' i' me'at sa' a. Di' i' ya' ie' wák tö ena ila'r tö ñies iiyi-wak. ¿Be' tö ibikeitsè tö be' dör ie' tsata?

<sup>13</sup> Jesús tö ie' iüté:

—Wépa tö di' i' yé esepa er sirdane. <sup>14</sup> Erë wépa tö di' meke ye' tö e' yé, esepa kè er sirpaiane yës. Di' e' dör ie'pa er a wes di' tskirke wötuò taië es, e' tö sene michoë meraë ie'pa a.

<sup>15</sup> Eta alaköl tö iché ia:

—A kékëpa, di' e' mú ye' a as kè ye' er siria, ñies as kè ye' döia di' watsuk íe.

<sup>16</sup> Jesús tö iché ia:

—Be' yú, be' wëm kiök ta be' kiéne.

<sup>17</sup> Eta alaköl tö iüté:

—Ye' kè wëm ta'.

Jesús tö iché ia:

—Buaë be' iché tö kè be' wëm ta'. <sup>18</sup> Be' ulabatsule skëtökicha ta íñe ta be' wá itso', e' kè ta' be' ulabatsule. Ì ché be' tö, e' dör mokí.

<sup>19</sup> Eta alaköl tö iché ie' a:

—A kékëpa, ye' tö isué tö wësua be' dör Skëköl tteköl. <sup>20</sup> Sa' dör Samaria wakpa, e' kékëpa bak ká íaiäe, e'pa tö Skëköl dalöie e' wakane' kabata i' ki. Erë a' judiowak tö icheke tö s'kawõtá e' kanéuk Jerusalén è.

<sup>21</sup> Eta Jesús tö iüté:

—A tayë, ye' ttò klö'ú. Kawö doraë ta Skëköl dalöie e' wakane'ordaë ká wa'ñe, kè dör kabata i' è ki ö Jerusalén è a.

<sup>22</sup> A' tö Skëköl dalöieke, erë e' kè jcher a' wá buaë. Erë s'atskër tté e' datse sa' dör judiowak ditséwö wa, e' kuëki sa' wá ie' jcher buaë. <sup>23</sup> S'yé dalöiök-wakpa chökle, esepa tö ie' dalöieraë mokjë i'Wiköl wa. E' kèwö dökette, mokí

idetke i' ta. <sup>24</sup> Skëköl dör wiköl, kè wër-ta'wa, e' kueki wépa tō ie' dalōieke esepa ké idalōiök mokijë wes ie' ki kiane es iWiköl wa.

<sup>25</sup> Etā alaköl tō iché:

—Ye' wā ijcher tō wé pairine'bitu idi' wa s'blúie e' datse (e' kiè “Cristo” griegoie ena “Mesías” hebreoie). Mik ie' de eta ië tō íyi ulitane wā pakeraë se' a.

<sup>26</sup> Jesús tō ie' a iché:

—E'ma e' dör ye' tso' ttök be' ta e'.

<sup>27</sup> E' wōsha tã ittökataka debitune. E'pa tō Jesús sué kapakök alaköl ta, e' tō ie'pa tkiwéwā tajë. Erë kè yi kësik dë'kã ichakök ie' a tō “¿ì kiane be' ki?” ö “¿iök be' tso' kapakök alaköl se' ta?” <sup>28</sup> Etā alaköl tō iskaü méat tkër ee' ta imiãne wé iu tso'rak ee, tã ichéitō e' wakpa a:

<sup>29</sup> —Mishka wëm dur eköl e' sauk. Ì sulu kos wamblë'yö, e' chéitō ye' a seraã. ¿Ie' alè dör wé pairine'bitu idi' wa s'blúie e'?

<sup>30</sup> Etā kã e' wakpa biteyal Jesús weblök. <sup>31</sup> E' dalewa Jesús ttökataka tō iché ia:

—A S'wöbla'ukwak, be' chkó.

<sup>32</sup> Erë Jesús tō ie'pa a iché:

—Ye' wā chkè tso', e' kè suule a' wā.

<sup>33</sup> Ie'pa ñi chakérak:

—¿Yile wā chkè debitu ie' a ñè?

<sup>34</sup> Erë Jesús tō ie'pa a iché:

—Ye' chkè dör, yi tō ye' patkë', e' ttò iütök ena kanè me'itō ye' a, e' eukwa seraã. <sup>35</sup> A' wā ttè tso' e' tō ichè: ‘Kawö kianeia si' tkël eta iyiwö tso'tke shtè'; erë ye' tō a' a ichè tō pë' datse tajë e'pa webló. Ie'pa dör wes iyiwö alinetke tso'tke wë'iaë ténuk es. Ie'pa tso'tke erblök ye' mik. <sup>36</sup> Wépa tō ie'pa kimeke erblök ye' mik, esepa dör wes iyiwö shtökwakpa es, e' ské dōraë ie'pa ulà a. Ñies wépa shteke ie'pa tō, esepa ulà a sene michoë dōraë. Es wépa dör wes íyi kuatkökwakpa es ena wépa dör wes iyiwö shtökwakpa es, esepa ttsé'rdäë buaë ñita. <sup>37</sup> Pë' tō icheke:

‘wele tō ikuatkeke, skà tō iwöshteke.’ Ttè e' dör moki. <sup>38</sup> Ye' tō a' patkë'mi iyiwö shtök wé a' kè wā ikuatkëule ee. Eë o'ka kaneblë', erë iwà de buaë a' ulà a.

<sup>39</sup> Alaköl e' tō ipaké Samaria wakpa a: “Ì sulu kos wamblë'yö, e' chéitō ye' a seraã.” E' kueki Samaria wakpa tajë serke kã e' a, e'pa erblé Jesús mik. <sup>40</sup> Etā mik Samaria wakpa de Jesús ska', eta ie'pa kköché ie' a tã ichérakitō ia:

—Be' e' tsúat sa' ta.

Ie' e' tséat ie'pa tã kã böt. <sup>41</sup> Ie' kapaköke ie'pa tã, e' kueki ie'pa kí dapané tajë erblök ie' mik. <sup>42</sup> Etā ichérakitō alaköl a:

—Sa' erblé ie' mik e' kè dör be' tō sa' a iché, e' è kueki. Ìñe ta' sa' wákpa tō ittò ttsé, e' kueki sa' tō ikl'wé tō moki ie' dör sulitane tsatkökwak.

### Jesús tō blu' kanè kueblu eköl e' alà bua'wéne

(Mateo 8.5-13; Lucas 7.1-10)

<sup>43</sup> Böiki es tã Jesús e' yéttsã Samaria e' michone Galilea. <sup>44</sup> Ie' tō iyë': Skëköl tteköl kè dalöier'ta' iwák kã ki. <sup>45</sup> Mik ie' demi Galilea eta kã e' wakpa tō ikiéwã er bua' wa. Mik ie'pa dër'ö Jerusalén Judiwak Yépa Yërulune Egipto e' këwö tkö'uk, eta ì kos buaë o' Jesús tō, e' su' ie'pa tō. E' kueki ie'pa tō ikiéwã er bua' wa.

<sup>46</sup> Jesús dene Caná atë Galilea wé ie' tō di' yö' vinoie ee. Kã e' blú kanè kueblu eköl tso' Cafarnaúm, e' alà kirinewã tajë. <sup>47</sup> Mik ie' wā ijchenewã tō Jesús tso' Judea, e' dene Galilea, eta ie' mía Jesús ska' tã ikköché ia:

—Mishka Cafarnaúm ye' alà duöke-watke e' bua'ukne.

<sup>48</sup> Ie' tō iüté:

—Wësua ì kè or yi a ese kè one ye' wã a' a iwà kkachoie tō yi dör ye', e' tã kè a' erblöpa ye' mik.

<sup>49</sup> Erë blu' kanè kueblu tō iché ia:

—A kékëpa, mishka bet kam ye' alà duòwà e' dalewa.

<sup>50</sup> Jesús tò iché ia:

—Be' yúne be' u a. Be' alà serdaia.

Ie' tò Jesús ttò klöwé mokië tã ie' mãne iu a. <sup>51</sup> Kam idömine u a, etã ikanë mësopa tò ikué ñalã kî tã ie'pa tò ie' a iché:

—Be' alà buanene.

<sup>52</sup> Ie' tò ie'pa a ichaké:

—¿Diwö wekké ye' alà buanémine?

Ie'pa tò iuté:

—Chki diwö bata rrate ekké.

<sup>53</sup> Iyé éna ñane tò diwö ekké Jesús tò iyé' ie' a tò be' alà serdaia. E' kuekî ie' ena iyamipa kos e'pa erblé imik.

<sup>54</sup> Jesús tso' Galilea, i' tã, ì kè or yi a ese wéitö bötökicha ee.

### Jesús tò wëm kraulewã bua'wéne

**5** E' ukuökî tã judiowak tso' kawö tkö'uk Jerusalén, ee Jesús mía. <sup>2</sup> Jerusalén di'dape kuoie me'r ukkò kiè Obeja Ukkò e' o'mik tsinet. Di'dape e' kiè hebreoie Betsata, e' kkömik úla tso' skel. <sup>3-4</sup> Úla ekké a taië s'kirirke esepa tso'. E'pa welepa kè wöbla wawër, welepa kè shko, welepa kraulewã. Ie'pa tso' ipanuk tò as di' wötir. <sup>5</sup> Ie'pa shua wëm tär eköl kraulewã. Ie' kirinemi e' kî duas de dabom mañayök kî pàköl (38). <sup>6</sup> Jesús tò isué tär ee. Ie' wã ijchenewã tò kã ñaiaë ikirinemi. Etã ie' tò wëm kraulewã e' a ichaké:

—¿Be' kî ikiane tò be' buarne?

<sup>7</sup> Etã ikirirke tò ie' iuté:

—A kékëpa, kè yi ku' ye' kimuk e' iowa di' a mik iwötirke etã. Bitökicha ye' e' iakwa, etã yile e' iéwatke ye' yöki kewe.

<sup>8</sup> Jesús tò ie' a iché:

—Be' e' kóka, be' ka'la kóka tã be' shkómi.

<sup>9</sup> E' bet tã wëm buanene ika'la kékaitö tã ishkémi ekká. Erë e' diwö dör judiowak eno diwö. <sup>10</sup> E' kuekî judiowak wökirpa tò iché wëm buanene e' a:

—I'ñe dör eno diwö, e' kuekî be' kè a kawö tã' ka' se tsukmi i'ñe.

<sup>11</sup> Ie' tò ie'pa iuté:

—Yi tò ye' bua'wéne, e' tò ye' a iché: 'Be' kã shtóka tã be' shkómi.'

<sup>12</sup> Etã ie'pa tò ie' a ichaké:

—¿Yi tò be' a iché tò 'be' kã shtóka tã be' shkómi'?

<sup>13</sup> Jesús mía pë' tso' taië e' shua, kè wëneia, e' kuekî wëm buanene e' kè wã ijcher yi tò ie' bua'wéne. <sup>14</sup> E' ukuökî tã Jesús tò ie' kué Skéköl wé a tã ichéitö ia:

—Ye' ttò ttsó. Be' buanene, e' kuekî ì sulu kè wamblaria dö' ì sulu kí döbitune be' kî.

<sup>15</sup> Etã wëm e' mía judiowak wökirpa ska' tã ichéitö, 'Jesús tò ye' bua'wéne.'

<sup>16</sup> Jesús tò ì kè or yi a ese wé eno diwö a, e' kuekî judiowak wökirpa tò ie' suémitke suluë. <sup>17</sup> Erë ie' tò iché ie'pa a:

—Ye' yé kanablöke kekraë, es ñies ye' kanablöke.

<sup>18</sup> Ttè e' tò judiowak wökirpa kí uluwéka, éna ie' ttakwa ème. Ie'pa kè ulune ie' kî, ie' tò eno diwö dalösewéwa, e' è kuekî. Erë ie' icheke tò Skéköl dör ie' yé, es ie' e' chò tò ñies ie' dör Skéköl, e' tò ie'pa kí uluwé taië ie' kî.

### Skéköl tò ilã a diché taië mé

<sup>19</sup> Jesús tò iché ie'pa a: “Moki ye' tò a' a iché tò ye' dör Skéköl Alà, e' kè a ì onuk ye' wák er wa. Ì kos weke ye' Yé tò, e' sué ye' tò, e' è weke ye' tò. Ì weke ye' Yé tò, e' kos weke ye' tò. <sup>20</sup> S'yé éna ye' dör ie' Alà e' dalër taië, e' kuekî ì kos wekeitö, e' kkachekeitö ye' a. Ñies ilè kí kkacher- aëitö taië ye' a, e' tò a' tkiwerawã taië.

<sup>21</sup> S'yé tò s'duulewã e' shkewetãkane tã

<sup>5</sup>5:3-4 Ttè i' kè ku' Juan yëkkuö këchke kibipa e' kî. E' tò iché i' es: *Mikle tã mikle tã Skéköl biyöchökwak eköl e' ökewa di' wötiuk. Di' wötirke etã yi mwa di' a kewe, e' buanene. Kè itkine tò duè wése tò ie' tteke. E' kuekî s'kirirke tso' ipanuk tò as di' wötir.*

sene mekeneitö ie'pa a. E' suë ye' dör ie' Alà, e' tö sene meke wépa a ye' kī ikiane mē esepa a. <sup>22</sup>Ñies S'yé kē tö yi shule-ta' ichoie tö yi kichatërdaë ö yi ser michoë, e' kēwō méitö ye' a as ye' tö s'shulö. <sup>23</sup>Ie' tö iwé es as sulitane tö ye' dalöiö wes ie'pa tö ie' dalöieke es. Wépa kē wā ye' dalöiëne, ñies esepa kē wā S'yé tö ye' patkë'bitu e' dalöiëne.

<sup>24</sup>“Mokī ye' tö a' a ichè tö wépa tö ye' ttè iuteke ena ierblökerak yi tö ye' patkë'bitu, e' mik, esepa ulà a sene michoë detke. Ie'pa kē kichatërpattsa. Ie'pa kē ku'ia wes s'duulewā es, ie'pa ulà detke sene chökle ska'. <sup>25-26</sup>Ye' Yé dör sene mukwak ñies ye' dör sene mukwak, e' kēwō me' ie' tö ye' a e' kueki. Wépa kē wā sene michoë ku', esepa dör wes s'duulewā es Skëköl a. Kawö döraë ta ie'pa tö ye' dör Skëköl Alà e' ttò ttersaë. Wépa tö ye' ttò ttsé ta iklö'wéitö mokī, esepa ser michoë. Mokī ye' tö a' a ichè tö e' kēwō datse, ñies e' de i' ta. <sup>27</sup>Ñies ye' dör S'ditsö Alà, e' kueki ie' tö kawö mé ye' a sulitane shuloie. <sup>28-29</sup>Kawö datse aishkuö ta, ta s'duulewā kos tö ye' ttò ttersaë ta ie' yörattsarak pö a. Wépa tö i' buaë o', esepa shkerdakane sene michoë a. Erë wépa tö i' sulu wamblë', esepa shkerdakane kichatënoie. Ttè e' kē tö a' tkiukwa.

### Wes se' wā ijcher tö Jesús tté dör mokïë

<sup>30</sup>“Kè ye' a i' onuk ye' wák er wa. Ye' kē kī i' kiane wè ye' wák er wa. E' skéie i' kiane wè Skëköl tö ye' patkë'bitu, e' kī, ese wekeyö. E' kueki ye' tö s'shuleke wes ye' Yé tö ye' a icheke es. E' kueki ye' tö s'shuleke yësyesë. <sup>31</sup>Ye' wák e' chöpa tö ye' ttò dör mokī, e'ma e' kē wā ta'. <sup>32</sup>Erë itso' eköl e' tö ye' tté cheke, e' dör Skëköl. Ye' wā ijcher tö ima ie' tö ye' tté cheke, e' wā ta'. <sup>33</sup>A' tö ye' chakök patkë' Juan a ta' ie' tö ye' tté yë', e' dör mokïë ñies. <sup>34</sup>Erë s'ditsö tö ye' tté cheke, e' kē ska' ye' tkine.

Erë i' yë' Juan tö, e' chéyö a' a as a' tsatkër e' è kueki. <sup>35</sup>A' a Juan dör wes bö'wö wönarke olo burke es. Kuaë a' tö ie' tté klö'wé buaë ttsë'ne bua' wa, erë ekuölö è. <sup>36</sup>Erë i' skà tso', e' tö ye' tté cheke buaë, i' ye' Juan tö, e' tsata. E' dör, i' kē or yi a ese wekeyö taië wes ye' Yé tö ye' patkë' iuk es. E' tö sulitane a ikkacheke tö mokī ye' Yé tö ye' patkë'bitu. <sup>37</sup>Ñies ye' Yé tö ye' patkë'bitu, e' tö ye' tté cheke, erë a' kē wā ie' ttò ttsëule, ñies a' kē wā ie' suule. <sup>38</sup>Ie' tö ye' patkë'bitu, erë a' kē erblëne ye' mik. E' kueki a' kē tö ye' tté klö'weta' mokī a' er a. <sup>39</sup>A' tö ibikeitseke tö Skëköl yëkküö tö ichëmi tö wes sene michoë dōmi a' ulà a, e' kueki a' tö isuekewa' bua'iewā. Erë yëkküö e' tö ye' tté cheke. <sup>40</sup>Erë a' kē erblak ye' mik as sene michoë dō a' ulà a.

<sup>41</sup>“S'ditsö tö ye' kikëka, e' kē ska' ye' tkine. <sup>42</sup>Erë ye' wā a' suule buaë tö wes a' dör. Ye' wā ijcher tö kē a' éna Skëköl dalër. <sup>43</sup>Ye' dë'bitu ye' Yé ttò wa, erë kē a' wā ye' kinewā. Erë o'ka bitúpa iwák ttò wa, e'ma e' kiéwā a' tö buaë. <sup>44</sup>A' wakpa nì kikökeka, e' wa a' wöbatsö bua'ie. Erë a' kē kī ikiane tö Skëköl eköl è, e' tö a' kiköka, e' ta' zes a' erblömi ye' mik? <sup>45-46</sup>Moisés tö ye' tté kitat yëkküö kī, e' kueki mokī a' tö ie' tté klö'wé, e'ma ñies a' tö ye' tté klö'wëmi. E' kueki kē a' ibikeit-sök tö ye' tö a' kkatëmi ye' Yé a. I' kit Moisés tö ká iaiaë e' mik a' erblöke, e' je' tö a' kkatëraë. <sup>47</sup>Erë i' kitbak ie' tö, e' kē klöne a' wā, e'ma zes i' cheke ye' tö, e' klö'wëmi a' tö?”

### Pë' dökā mil skeyök e'pa tié Jesús tö

(Mateo 14.13-21; Marcos 6.30-44; Lucas 9.10-17)

**6** E' ukuöki ta Jesús mía batsöri kië Galilea e' wishet. Batsöri e' kië ñies Tiberias. <sup>2</sup>I' kē or yi a ese weke ie' tö taië. Ie' tö s'kirirke esepa bua'wëne, e' suë pë' tö, e' kueki taië pë' mir ie' itöki. <sup>3</sup>Ie' mía ittökatapa ta kabata a ta ee ie'

e' tkésér ie'pa ta. <sup>4</sup> Judiowak Yépa Yéru-lune Egipto e' kówö dökewatke tsinet tkö'wë. <sup>5</sup> Mik ie' tö isué tö pé' de taië ie' itöki, etä ichéitö Felipe a:

—¿Wé se' mi'mi iyi tauk pé' kos ikképa a në?

<sup>6</sup> E' chéitö Felipe a isuoie tö ima Felipe tö ie' iutëmi. Erë ie' wák wa ijcher buaë tö i wëmi ie' tö.

<sup>7</sup> Felipe tö iutë:

—S'kanëblömi dò ká cien böyök, erë e' ské kè dör wë' iyi tuoie më ie'pa a elke.

<sup>8</sup> Ittökata eköl kiè Andrés dör Simón Pedro ël, e' tö iché ia:

<sup>9</sup> —Íe duladula tso' eköl, e' wa pan yöule cebada wa tso' skel ena nima bötö; erë e' kè döpaká s'tso' taië e' ki.

<sup>10</sup> Jesús tö iutë:

—Ichó ie'pa ulitane a tö a' e' tulúser iski.

(Ká e' a taië ta'tsi tso'.) Etä pé' ulitane e' tuléser. Eë wëpa è döka mil skeyök (5.000). <sup>11</sup> Jesús tö pan klö'wé ta wéstela chéitö Skéköl a. E' ukuöki ta iblatéitö méitö ittökatapa a as iwatiörakitö. Nies iwéitö nima ta es. Etä ie'pa tö iné kos ie'pa ki ikiane ekké. <sup>12</sup> Mik ie'pa chké de wë' etä Jesús tö iché ittökatapa a:

—Ibata ate e' shtë as kè iweirwa.

<sup>13</sup> Etä ittökatapa tö pan yöule cebada wa döka skel, e' bata ate, e' shtë iëne döka kkóla dabom eyök ki bök (12).

<sup>14</sup> Mik pé' isué tö, i kè or yi a ese wé Jesús tö, etä ie'pa iché:

—Mokí wëm wí dör Skéköl tteköl cheke ká iaiaë tö idatse e'.

<sup>15</sup> Erë Jesús wa ijchenewa tö ie'pa wa ie' mi'ketsér diché wa tkéka blu'ie, e' kueki ie' mífane kabata a e' tsukat ekörla.

### Jesús shké di' kí

(Mateo 14.22-27; Marcos 6.45-52)

<sup>16</sup> Mik ká tuirketke, etä Jesús ttökatapa biteyalne dò batsöri a. <sup>17</sup> Jesús ichétke ie'pa a tö kè ye' panar. Ká ttse-

newatke etä Jesús kam döne, e' kueki ie'pa e' iékarak kanò a ta imichorak batsöri wishet dò Cafarnaúm. <sup>18</sup> E' wösha ta siwa' bitsineka taië, e' tö di' uyeke taië.

<sup>19</sup> Mik ishkerak dò kilómetro skel ö teröl e' ulatök, etä ie'pa isué tö Jesús shkóratse ie'pa kker di' ki. E' tö ie'pa suawé. <sup>20</sup> Ie' iché ie'pa a:

—¡Kè a' suanuk! Ye' idir.

<sup>21</sup> Ie'pa ttsë'ne buaë ie' ikiökwa kanò a, e' wösha ta idemirak wé imi'kerak eë.

### Pé' tö Jesús yuleke

<sup>22</sup> Bule es ta, pé' ate batsöri wishet, ie'pa wa ijchenewa tö Jesús ttökatapa mineyal kanò ar eë etö è, e' ki, erë Jesús kè minea ittökatapa ta. <sup>23</sup> Etä kanò skà datse tsee Tiberias, e' irine tsinetkla wé ie'pa pan ña' mik Jesús wéstela yé' Skéköl a pan ki etä eë. <sup>24</sup> Mik pé' isué tö ie' ena ittökatapa kè ku'ia, etä ie'pa e' iéka kanò demi taië ese ki ta imíyal Cafarnaúm iyulök.

### Jesús dör chké tö sene michoë meke e'

<sup>25</sup> Mik pé' demi batsöri wishet, etä ie'pa tö Jesús kue ta ie' a ichakerakitö:

—A S'wöbla'ukwak, ¿mik be' dë'bitu íe?

<sup>26</sup> Ie' iutë:

—Mokí ye' tö a' a iché tö a' kè ku' ye' yulök, i kè or yi a ese wéyö, e' wà ane a' éna e' kueki. A' tö chké ña' taië, e' è kueki a' tso' ye' yulök. <sup>27</sup> Kè a' kanëblök chké erta'wa ese skéie. A' kanëblök chké kè erta'wa tö sene michoë meke a' a, ese skéie. Chké e' meraë ye' dör S'ditsö Alà e' tö, ye' Yé dör Skéköl e' tö ikéwö me' ye' a e' kueki.

<sup>28</sup> Ie'pa tö ie' a' ichaké:

—¿Ì wëmi sa' tö as i kiane Skéköl ki ese ü sa' tö?

<sup>29</sup> Ie' tö iutë:

—Skéköl tö ye' patké' e' ki ikiane tö a' erblö ye' mik. E' è kiane ie' ki.

<sup>30</sup> Ie'pa tö iché ie' a:

—Ì kè or yi a ç'e wése wèmi be' tò as sa' tò isaù tã sa' erblò be' mik? ¿Ì wèmi be' tò? <sup>31</sup> Se' yépa bak ká iaiaë e'pa tò ì kiè maná e' ña' ká sir poë wé kè yi serku' eë. E' tso' kitule Skèköl yèkkuò kì wé ichè: 'Moisés tò ie'pa dè' chkè datse ká jai a e' wa.'

<sup>32</sup> Jesús tò ie'pa iuté:

—Mokì ye' tò a' a' ichè tò Moisés kè wa chkè datse ká jai a e' mène a' yépa bak e'pa a. Ye' yé tò chkè e' me' ie'pa a. Erè chkè chòkle datse ká jai a e' watkeke ie' tò a' a. <sup>33</sup> Chkè chòkle meke Skèköl tò, e' dör yi datse eköl ká jai a tò sene michoë mèmi sulitane a e'.

<sup>34</sup> Ie'pa tò Jesús a' iché:

—A kékèpa, chkè e' mú sa' a' kékraë.

<sup>35</sup> Ie' tò ie'pa a' iché:

—Ye' dör chkè tò sene michoë meke e'. Yi bitúke ye' ska' ena ierblöke ye' mik, ese kè tepaia' bli tò, ñies ese kè ersirpa-ia. <sup>36</sup> Erè e' dör wes ye' tò a' a' ichétke tò eré a' wa ye' suule a' wöbla wa, erè a' kè erblöku' ye' mik. <sup>37</sup> Wépa me' ye' Yé tò ye' a, esepa kos bituraë ye' ska' tã wépa bitúke ye' ska', esepa kè watepattsayö. <sup>38</sup> Ye' datse ká jai a, e' kè dè'bitü ì kiane ye' wák kì e' uk. Ye' dè'bitü ì kiane yi tò ye' patké' e' kì e' uk. <sup>39</sup> Yi tò ye' patké', e' kì ikiane tò wépa kos me'itò ye' a, esepa kè wéne we'iköyö. E' kueki ie'pa kè watepattsayö. E' skéie ie' kì ikiane tò ie'pa kos shke'wèkaneyö aishkuò tã mik ká i' enewa e' kèwö ska'. <sup>40</sup> Ye' Yé kì ikiane tò wépa tò ye' sué ena erblé ye' mik, esepa kos ser michoë kékraë. Ie'pa shke'wèkaneyö aishkuò tã mik ká i' enewa e' kèwö ska'.

<sup>41</sup> Jesús tò ichétke: "Ye' dör chkè datse ká jai a e'." E' kueki ie'pa ukyënemi ie' kì sulüë. <sup>42</sup> Ie'pa tò iché:

—¿I' kè dör Jesús dör José alà e'? Iyé ena imì suule se' wa buaë. ¿Wes ie' tò ichèmi tò ie' datse ká jai a?

<sup>43</sup> Ie' tò ie'pa iuté:

—Kè a' ukyënukiã ye' tã. <sup>44</sup> Kè yi bitúpa ye' ska', ye' Yé tò ye' patké', e' kè wa idè' e'ma. Wépa bite ye' Yé wa, e'pa shke'wèkaneyö mik ká i' erke-watke etã. <sup>45</sup> Skèköl yèkkuò kitule itekölpa wa e' tò ichè: 'Skèköl tò ie'pa kos wöbla'weraë.' Es wépa tò ye' Yé ttò tsetã, ñies e' wöblautã' ie' wa, esepa kos bituraë ye' ska'.

<sup>46</sup> "Kè yi wa Skèköl suule. Erè ye' dè'bitü ie' ska', e' kueki ye' è wa ie' suule. <sup>47</sup> Mokì ye' tò ichè a' a' tò wépa erblé ye' mik, esepa ser michoë kékraë. <sup>48</sup> Ye' dör chkè tò sene michoë meke e'. <sup>49</sup> A' yépa bak ká iaiaë, e'pa tò chkè kiè maná e' ña' ká wé kè yi serku' ese ska', erè ie'pa durulune. <sup>50</sup> Erè chkè datse ká jai a, e' cheke ye' tò a' a. Wépa tò chkè e' ñé, e'pa kè duòpawa. <sup>51</sup> Erè chkè tò sene michoë meke datse ká jai a, e' dör ye'. Wépa tò chkè e' ñé, e'pa ser michoë. Chkè mer-aëyö ie'pa a, e' dör ye' wák chkà, e' mer-attsayö ttèwa as ká ulitane wakpa isiepa erblé ye' mik, esepa ser michoë."

<sup>52</sup> Etã ie'pa ñi iutémi:

—¿Wes ie' tò ichkà mèmi se' a' katè?

<sup>53</sup> Ie' tò ie'pa iuté:

—Mokì ye' tò a' a' ichè tò a' kè tò ye' dör S'ditsö Alà, e' chkà katè, e' pé yè, e' tã sene michoë kè dòpa a' ulà a. <sup>54-55</sup> Ye' chkà e' dör chkè chòkle, ye' pé, e' dör di'yè chòkle. E' kueki wépa tò ye' chkà katé, ye' pé yé, esepa ulà a sene michoë detke. Aishkuò tã mik ká i' erkewatke, etã ie'pa shke'wèkaneyö. <sup>56</sup> Wépa tò ye' chkà katé, ye' pé yé, esepa bàtse buaë ye' mik. Ñies ye' bàtse buaë ie'pa mik. <sup>57</sup> Ye' yé tò ye' patké' e' serke iwák mik. Ie' mik ye' serke. Es ñies wépa tò ye' chkà katé esepa serke ye' mik. <sup>58</sup> Chkè dè'bitü ká jai a, e' chök ye' tso' a' a. Chkè e' kè dör wes chkè kiè maná ña' a' yépa bak ká iaiaë e'pa tò e' es. Ie'pa tò ñña' erè ie'pa durulune. Erè wépa tò chkè cheke ye' tò a' a e' ñé, esepa ser michoë.



<sup>59</sup>Ttè e' wa Jesús tò ie'pa wöbla'wé judiowak ñi dapa'wo wé tso' Cafarnaúm e' a.

### Jesús ttè batamik se' ser michoë

<sup>60</sup>Pè' shkòke taië Jesús ta, e'pa tò ttè ñe' ttsé ta ichérakitö:

—Ttè e' dör darërë. ¿Yi tò iklö'wèmi?

<sup>61</sup>Ima ie'pa tso' ichök e' suéwaitö. E' kueki ie' tò ie'pa a ichaké:

—¿Ttè e' kueki a' éna ye' wataksa?

<sup>62</sup>Ye' dör S'ditsö Alà, e' míkane ká jai a wé ye' datse ee, e' mú sué a' tò, e'ma e' je' ta ¿a' erblömi ye' mik? <sup>63</sup>Wiköl Batse'r tò sene michoë meke sia. Ì weke s'ditsö tò, ese kè dör iie bua'. Ttè wa a' pattekeyö e' wà datse Wiköl Batse'r wa. Ttè e' klö'wé a' tò, e' ta a' ser michoë. <sup>64</sup>Erë a' welepa kè erblökü' ye' mik.

Wépa kè erblökü' ie' mik ena yi tò ie' mekettsa e' jchertke ie' wà kewe, e' kueki ie' tò ichè es. <sup>65</sup>Ie' tò ikí ché:

—E' kueki ye' tò a' a' ichè tò kè yi bitúpa ye' ska', ye' Yé kè wà imène e' ta.

<sup>66</sup>E' ukuöki ta taië pé' shkòke Jesús ta, e' kibiiepa tò iméat, kè shkòia' ie' ta.

<sup>67</sup>Etá Jesús tò ittökatapa dabom eyök ki böl (12), e'pa a' ichaké:

—¿A' shkakmi ñies ye' yöki?

<sup>68</sup>Etá Simón Pedro tò iüté:

—A Skèkèpa, ¿yi ta sa' mi'mi? Be' ttè è wa sa' ser michoë. <sup>69</sup>Sa' erblétke be' mik. Sa' wà ijcher mokië tò be' dör yi dör batse'r patkè'bitu Skèköl tò e'.

<sup>70</sup>Jesús tò ie'pa iüté:

—A' dabom eyök kí böl (12), e' shukit ye' tò, erë a' eköl dör bé icha.

<sup>71</sup>Mik Jesús tò e' ché etá Judas chéitö. E' dör Simón Iscariote e' alà. Ie' dör Jesús ttökatapa dabom eyök kí böl (12) e' eköl erë ie' tò Jesús wömekettsa.

### Jesús èlpa kè erblène ie' mik

**7** E' ukuöki ta Jesús shkòke Galilea. Judiowak wökirpa éna ie' ttakwa, e' kueki ie' kè shkak Judea. <sup>2</sup>Erë ju-

diowak tò kawö tkö'weke kiekerakitö Úla Kéwö, e' kéwö tkö'wekerakitö Judea, e' dewatke tsinet. <sup>3</sup>E' kueki Jesús èlpa tò ie' a' iché:

—Kè be' e' tsukat íe. Be' yú Judea as ì kè or yi a' ese weke be' tò, e' wà saü be' ttökatapa serke ee e'pa tò. <sup>4</sup>Yi kí ikiane tò s'malepa tò ikikèka taië, ese tò iyi kos wé sulitane wörki. Moki ì kè or yi a' ese ormi be' a, e' ta iú sulitane wörki.

<sup>5</sup>Jesús èlpa kè erblène ie' mik, e' kueki ie'pa tò iwayué es. <sup>6</sup>Ie' tò iché ie'pa a:

—Kam ye' kéwö doka, erë a' kawö kos ese dör buaë. <sup>7</sup>Wépa kè tò Skèköl dalöie esepa kè a' a' sunuk suluë. Erë ye' tso' ie'pa a' ichök tò ì wambleke ie'pa tò, ese dör suluë. E' kueki ie'pa éna ye' ar suluë.

<sup>8</sup>A' yúshka Úla kéwö tkö'wekerakitö e' a. Ye' kéwö kam doka, e' kueki kam ye' mi'.

<sup>9</sup>E' chéitö ta ie' e' tséat Galilea.

### Jesús mía Jerusalén Úla kéwö tkö'uk

<sup>10</sup>Jesús èlpa míyal, e' ukuöki ta ñies ie' mía. Erë ie' mía bèrë, kè e' kkayëule.

<sup>11</sup>Kéwö tkö'weke, e' shua judiowak wökirpa tso' ie' yulök. Ie'pa tò ichaké:

—¿Wé ie' tso'?

<sup>12</sup>Pè' dapane taië ee, e'pa tò Jesús cheke ñi a' bèr ñi kukuö a. Wélepa tso' ichök: “Jesús dör buaë.” Erë welepa tso' ichök: “Ie' kè dör buaë. Ie' tò se' kiteke.”

<sup>13</sup>Erë ie'pa suane judiowak wökirpa yöki, e' kueki ie'pa kè ttöku' darërë.

<sup>14</sup>Mik ikéwö tkö'wekerakitö, e' dökette shaböts, etá Jesús dawa Skèköl wé a' ta ie' tò s'wöbla'wémi. <sup>15</sup>Etá judiowak wökirpa tkirulune iweblök ikittsök ta ichérakitö:

—Ie' kè yöule ¿wes e' wà ttè jcher taië?

<sup>16</sup>Jesús tò iüté:

—Ttè wa a' wöbla'weke ye' tò, e' kè dör ye' wák ttè, e' dör Skèköl tò ye' patkè' e' ttè. <sup>17</sup>Yi e' chétke ì kiane Skèköl kí e' wà uk, ese wà ijcherdaë tò ttè wa s'wöbla'wekeyö, e' dör Skèköl ttè. Ie' kè tò ibikeitsepa tò e' dör ye' wák ttè è. <sup>18</sup>Yi

ttöke iwák er wa, ese kī ikiane tō pē' tō ie' kīkēka. Erē wē kī ikiane tō yi tō ipatkē' e' kīkarka, ese ttō mokī kē kachōta'.

<sup>19</sup>“Sulitane wā ijcher tō Moisés tō Skēkōl ttē dalōiēno e' méat se' a. Erē a' ulitane kē tō iwā dalōiē. ¿Ī kuēki a' kī ye' kiane ttēwa?”

<sup>20</sup>Etā pē' tso' tajē ee, e'pa tō iūtē:

—Be' a' aknama tso'. ¿Yi éna be' ttakwa?

<sup>21</sup>Ie' tō ie'pa a' iché:

—Ī kē or yi a' ese wē ye' tō etōkicha eno diwō a, e' tō a' ulitane tkiwēwa. <sup>22</sup>Moisés tō ttē dalōiēno me'at a' a' tō a' ala'r wēpa kos wakyuōō itōttola kkuōlitla tēe tsir e' wa ká de ikī pākōl (8) etā. (Ñermata se' wā ijcher tō ttē e' kē mēne Moisés wā, imēne a' yēpa bak ká iaiāē Moisés yōki e'pa a.) Nies Skēkōl yēkkuō tō ichē tō kē a' kawō ta' kaneblōk eno diwō a. Erē mik ká de ala'rla kī pākōl, e' ane eno diwō a, etā a' tō a' ala'rla wakyueta' eno diwō a. <sup>23</sup>A' a' kawō ta' alala wakyuōk eno diwō a Moisés ttē dalōioie, e' ta' ¿wes a' ulurmi ye' kī, ye' tō wēm ekōl bua'wēne wa'ñe eno diwō a e' kī? <sup>24</sup>Kē s'kkatar is iwēr e' è wa. E' skéie itō yulō yēsýsē.

### Jesús dōr wē pairine'bitū idi' wa s'blúie e'

<sup>25</sup>Jerusalén wakpa wēlepa tō ichaké:

—¿Wēm wī kē yuleku' s'wōkirpa tō ttēwa? <sup>26</sup>Isaú, wī idur ttōk sulitane wōrkī etā ie'pa kē tō ĩ chē ie' a' yēs. ¿A' iché, s'wōkirpa tō iklō'wē tō mokī ie' dōr wē pairine'bitū idi' wa s'blúie e'? <sup>27</sup>Erē se' wā ijcher buaē tō wē ie' datse. E' skéie mik wē pairine'bitū idi' wa s'blúie e' datse, etā kē yi wā ijcherpa tō wē idatse.

<sup>28</sup>Jesús tso' s'wōbla'uk Skēkōl wē a. Mik e' tō ttē e' tse, etā ichéitō aneule:

—A' ibikeitseke tō a' wā ye' sūule buaē. A' ibikeitseke tō a' wā ijcher buaē tō wē ye' datse. Erē ye' kē dē'bitū ye' wák er wa. Yi tō ye' patkē'bitū e' mik s'erblōmi, ie' kē sūule a' wā. <sup>29</sup>Erē ye' datse ie' ska',

e' kuēki ye' wā ie' sūule buaē. Ie' tō ye' patkē'bitū.

<sup>30</sup>Ie'pa tō ima'wē klō'wēwa, erē kam ie' kēwō dōka, e' kuēki kē yi ulā dē'wa iska'. <sup>31</sup>Erē tajē pē' erblé ie' mik e'pa tō iché:

—Kē yi skā a' ĩ kē or yi ese onuk tkōka Jesús tō iwē e' tsata. Ie' wake' dōr wē pairine'bitū idi' wa s'blúie e'.

### Fariseowakpa éna Jesús klō'wakwa

<sup>32</sup>Jesús cheke pē' tō bèrē ñi kukuō a, mik e' tse fariseowakpa tō, etā ie'pa ena sacerdotepa wōkirpa, e'pa tō Skēkōl wē shkēkipa patkē iklō'ukwa. <sup>33</sup>Jesús tō iché:

—Ye' tso'ia a' ta' bērbēr ème ta' ye' míane yi tō ye' patkē'bitū e' ska'. <sup>34</sup>A' tō ye' yuleraē, erē a' kē tō ye' kuēpa. A' kē dōpaka wē ye' mīrō ee, e' kuēki a' kē tō ye' kuēpaia.

<sup>35</sup>Ta' judiowak wōkirpa ñi chaké:

—¿Wē ie' wī mi'kea, e' kē kuēpa se' tō? ¿A' iché imi'kea wē judiowak mineyal senuk ká kuā'kī wakpa shūa ese ska' pē' kē dōr judiowak, esepa wōbla'uk? <sup>36</sup>Ie' tō iché: 'A' tō ye' yuleraē, erē a' kē ye' kuēpa. A' kē dōpaka wē ye' mīrō ee, e' kuēki a' kē tō ye' kuēpaia.' ¿Ima e' wā kiane chē?

### Se' er a' ituōraē tajē wes di' klōka tuō es

<sup>37</sup>Ikēwō tkō'wēke judiowak tō, e' kēwō bata e' dōr ibua'ie, e' kēwō Jesús e' kēka ta' ichéitō aneule:

—Wēpa ersine, esepa shkō ye' ska' di'yōk. <sup>38</sup>Wēpa erblé ye' mik, esepa ta' itkōraē wes Skēkōl yēkkuō tō ichē es, e' tō ichē: “Ie'pa er a' ituōraē tajē wes di' klōka tuō es.”

<sup>39</sup>Mik Jesús tō di' klōka ché, etā ie' tso' Skēkōl Wikōl merdaē wēpa erblé ie' mik esepa a, e' chōk. Erē e' kēwō ska' ta' kam Jesús mi'kane iyé ska' olo ta' tajē, e' kuēki kam Skēkōl Wikōl mer.

**Judiowak ttè chilineka Jesús batamik**

<sup>40</sup> Wépa tò ttè e' ttsé, e'pa welepa tò iché:

—Mokí wém wí dör Skéköl tteköl dat-se e'.

<sup>41</sup> Welepa skà tò icheke:

—Ie' dör wé pairine'bitü idi' wa s'blúie e'.

Erë welepa skà tò icheke:

—Au, kè idör e'. Wé pairine'bitü idi' wa s'blúie e' kè bitüpa Galilea. <sup>42</sup> Skéköl yékkuö tò ichè tò ibitüraë se' blú bak David e' ditséwö wa, ñies ibitüraë Belén wé David bak senuk eë.

<sup>43</sup> Es ie'pa ttè chilineka Jesús batamik.

<sup>44</sup> Ie'pa welepa éna iklö'wakwa, erë kè yi ulà dè'wa ie' ska'.

**Judiowak wökirpa kè erblène Jesús mik**

<sup>45</sup> Skéköl wé shkékipa dè'bitü Jesús klö'ukwa, e'pa dene fariseowakpa ena sacerdotepa wökirpa ska', eta e'pa tò ichakérak ishkékpa a:

—¿I kuékí a' kè wa Jesús dè'?

<sup>46</sup> Ishkékpa tò iüté:

—¿Sa' kè wa yi ttséule ttök wés wém e' ttò es!

<sup>47</sup> Fariseowakpa tò iché ie'pa a:

—¿Ñies a' e' mettsa kitö'wè? <sup>48</sup> ¿Ima a' ibikeitsè tò s'wökirpa ö fariseowakpa e'pa wele erblé ie' mik? <sup>49</sup> Pè' èsepa kè wa Moisés ttè dalöiëno suule, esepa e' mukettsa kitö'wè. Erë ie'pa kichatënettsatke.

<sup>50</sup> Erë fariseowak eköl kiè Nicodemo dè'rö Jesús sauk nañewe, e' tò iché ie'pa a:

<sup>51</sup> —Ttè mène se' a dalöiëno, e' tò ichè kè se' kawö ta' yi wömuksa we'ikè kam itö yulöttsasö buaë e' yöki. Es se' wa ijcher tò ì sulu wambléitö ö kè iwamblène.

<sup>52</sup> Ie'pa tò ie' iüté:

—¿Wësua ñies be' dör Galilea wak! Skéköl yékkuö saü bua'ie, eta be' isueraë tò Skéköl tteköl kè karpaka yès Galilea.

**Alaköl eköl tò isenewabak dalösewéwa**

<sup>53</sup> [Eta ie'pa ulitane míane iu a.

**8** Erë Jesús mía Olivo kébata a. <sup>2</sup> Bule es bla'mi ie' dene Skéköl wé a ta pè' ulitane debitü ie' ska'. Ie' e' tkéser ie'pa wöbla'uk.

<sup>3</sup> S'wöbla'uk ttè dalöiëno wa wakpa ena fariseowakpa de ie' ska'. Ie'pa wa alaköl eköl kunewa isenewabak dalöseukwa e' debitü. Ie'pa tò iké e' duökser sulitane wörki. <sup>4</sup> Ie'pa tò iché Jesús a:

—A s'wöbla'ukwak, alaköl i' kunewa isenewabak dalöseukwa. <sup>5</sup> Ttè dalöiëno me'at Moisés tò se' a, e' tò se' ké alaköl i'se ttökwa ák wa. ¿Ima e' chè be' tò?

<sup>6</sup> Ie'pa tò Jesús a ichaké ima'woie tò ima ie' tò iütëmi ikkatoie. Erë Jesús e' wöéwa iski ta iulatska wa ishtémiitö iski wés íyi shtësö yékkuö ki es. <sup>7</sup> Ie'pa tò iki chaké ia. Ie' wöduéka ta ichéitö:

—A' wé kè wa ì sulu wambléule yès, ese tò ák tsá uyó ie' ki.

<sup>8</sup> Eta Jesús e' wöéwane iski ta ishtémineitö iski. <sup>9</sup> Mik ie'pa tò ttè e' ttsé, eta ì sulu wambleke ie'pa tò, ese ane ie'pa éna ta imíyal eköl eköl. Ikékëpa míyal kéwe, e' itöki iduladulapa. Bata ekkè ta alaköl è atë dur Jesús wörki. <sup>10</sup> Eta Jesús e' wöduékane ta ie' a ichakéitö:

—A tayë, ¿wé ie'pa? ¿Yi atë be' kkatök?

<sup>11</sup> Ie' tò iüté:

—A kékëpa, kè yi atë.

Jesús tò iché ia:

—Ye' ñies kè tò be' kkatè. Be' yúshka. Kè ì sulu skà wamblaria.]<sup>8</sup>

### Jesús dör wes ká olo es sulitane a

<sup>12</sup> Età Jesús tò iskà chéne pè' a:

—Ye' dör ká ulitane wakpa a wes ká olo es. Wépa e' yué ye' ttökataie, esepa ser michoè ká olo e' a. Ie'pa kè serpaia wes s'shkò stu' a es.

<sup>13</sup> Fariseowakpa tò iché ie' a:

—Be' wák tso' e' tté chök, e' kueki be' ttò kè wà ta'.

<sup>14</sup> Ie' tò ie'pa iüté:

—E' yéne tò ye' e' tté chöke, erè ima ye' e' chöke e' wà ta'. Ye' wà ijcher wé ye' datse, ñies wé ye' michoè, erè e' kè jcher a' wà. E' kueki ima ye' e' chò e' wà ta'. <sup>15</sup> A' tò ye' bikeitseke wes a' wakpa kábikeitsò es, e' kueki a' tò ye' kcateke tò ye' dör kachökwak. Erè ye' kè tò ye' bikeitseta' es. Ye' kè dè'bitü ye' shulök, ye' dè'bitü s'tsatkök. <sup>16</sup> Erè mik ye' tò s'shulè, età ye' kè tò s'shuletà ekörla, e' kueki ye' tò s'shuleraè yèsyèsè. Ye' yé tò ye' patké', e' tso' ye' ta' s'shulök. <sup>17</sup> Ttè dalöiëno tò ichè tò s'ditsö bö' tso' ittekölie, e'pa tò iché ñikkèè, e' ta' ie'pa ttè wà ta'. <sup>18</sup> Es e', ye' dör ye' wák tteköl. Ñies ye' Yé tò ye' patké', e' dör ye' tteköl. E' kueki ye' ttekölpa dör bö'.

<sup>19</sup> Ie'pa tò ie' a' ichaké:

—¿Wé be' yé tso'?

Ie' iüté:

—A' kè wà ye' suule, ñies a' kè wà ye' Yé suule. A' mú wà ye' suule, e'ma ñies a' wà ye' Yé suule.

<sup>20</sup> Ttè ikkè ché Jesús tò itso' s'wöbla'uk e' dalewa. Ie' tker s'wöbla'uk Skököl wé a' wé kalkuö tso' inuköl ioie mè Skököl a' ee. Erè kam ie' kèwö döka, e' kueki kè ye' wà iklönewa.

### A' kè dòpa wé ye' mirö ee

<sup>21</sup> Jesús tò iskà ché ie'pa a:

—Ye' mía ta' a' tò ye' yuleraè, erè a' duöralur ì sulu kos wambleke a' tò e' a. E' kueki kè a' döpaká wé ye' mirö ee.

<sup>22</sup> Età judiowak wökirpa tò iché:

—Ie' iché tò sa' kè döpaká wé ie' mirö ee. Ie' e' ttökewa alè, e' kueki ie' iché es.

<sup>23</sup> Ie' tò ie'pa a' iché:

—A' dör ká i' wakpa è, erè ye' dör ká jai wak. A' dör ká ie' wakpa, erè ye' kè dör ká ie' wak. <sup>24</sup> E' kueki ye' tò a' a' iché tò 'a' duöralur ì sulu kos wambleke a' tò e' a.' A' kè wà iklöne tò ye' dör ye' yé'bitü ye' tò a' a' e', e' ta' a' duöralur ì sulu kos wambleke a' tò ese a.

<sup>25</sup> Età ie'pa tò ie' a' ichaké:

—¿Yi be' dör?

Ie' tò iüté:

—Ye' dör ye' yé'bitü ye' tò a' a' kuaè e'. <sup>26</sup> Taiè ye' wà ttè tso' a' kkatöie. Erè ì kos cheke ye' tò sulitane a' e' tseüle ye' wà ye' tò ye' patké' e' kkö a. Ie' ttè dör mokie.

<sup>27</sup> Erè ie'pa kè éna iwà ane tò ie' tso' iyé dör Skököl, e' chök. <sup>28</sup> E' kueki ie' tò iché ie'pa a:

—S'ditsö Alà, e' dör ye'. Mik a' tò ye' batséka krus mik, età a' tò isueraè tò ye' dör ye'. Ye' kè tò ì wépa ye' wák er wa. Ì cheke ye' Yé tò ye' a' tò ichó, e' è chekeyö. <sup>29</sup> Yi tò ye' patké' e' tso' ye' ta. Ì wër buaè ie' wa, e' è wekeyö, e' kueki kè ie' wà ye' meuleat ekörla.

<sup>30</sup> Mik e' ché Jesús tò, età taiè pè' erblé ie' mik.

### Se' yënetsa' ì sulu ulà a Jesús batamik

<sup>31</sup> Jesús tò iché judiowak erblé ie' mik, e'pa a:

—A' serke kekraè ye' ttè dikia, e' je' ta' a' dör ye' ttökatapa chökke. <sup>32</sup> A' wà

<sup>8</sup>8:11 Isalema ttè i' kè ku' yèkkuö këchke kit Juan tò. E' ukuöki ta' yile skà tò ime'ka iki.

Skëköl ttè mokì e' jcherdaë buaë ta' e' tò a' yerattsa, ì ulà a' klöulewà e' yöki.

<sup>33</sup> Ie'pa tò ie'pa iüté:

—Sa' dör Abraham aleripa. Sa' kè klöulewà ì ulà a. ¿Wes be' tò ichèmi tò sa' yërdattsa?

<sup>34</sup> Ie' tò ie'pa iüté:

—Mokì ye' tò a' a' ichè tò wépa tò ì sulu wambleke, esepa tso' klöulewà sene sulu ulà a. <sup>35</sup> Eré s'klöulewà kanè mé-soie ese serke iwökir ska', erè kè idör iwökir yami ekka. Iwökir alà e' dör iyami ekka kekraë. <sup>36</sup> Ye' dör Skëköl Alà. Ye' tò a' yéttsa sene sulu ulà a, e' ta' mokì a' yënettsa. <sup>37</sup> Ye' wà ijcher tò a' dör Abraham aleripa, erè a' kè tò ye' ttè klö'wè, e' kuëki a' kì ye' kiane ttèwà. <sup>38</sup> Ì kkacheke ye' Yé tò ye' a, ese cheke ye' tò a' a. Es nïes a' tò iwambleke wes a' yé tò a' a' ikkacheke es.

<sup>39</sup> Ie'pa tò iüté:

—Sa' yé bak ká iaiäë e' dör Abraham.

Erè ie' tò ie'pa a' iché:

—A' mú dör Abraham aleripa, e'ma' a' sermi wes ie' sene' es. <sup>40</sup> Ye' tò ttè mokì ché a' a' wes Skëköl tò ye' a' ikkaché es. E' è wéyö, erè a' kì ye' kiane ttèwà. Ese kè wamblène Abraham wà. <sup>41</sup> A' e' wamblò wes a' yé e' wamblò es.

Ie'pa tò ie'pa a' iché:

—¡Sa' kè dör nälà alé! ¡Sa' yé dör eköl è e' dör Skëköl!

<sup>42</sup> Ie' tò ie'pa a' iché:

—Ye' datse Skëköl ska', e' tso' íe. Ye' kè dè' ye' wák er wa. Ie' tò ye' patké'. E' kuëki mokì ie' chópa a' yé, e'ma' ye' dalèrmi a' éna. <sup>43</sup> ¿Ì kuëki a' kè éna ye' ttè wà ane? A' kè kì ye' ttè kiane klö'wè, e' kuëki a' kè éna ye' ttè wà ane. <sup>44</sup> A' yé dör bé. A' dör ie' ala'r. A' dör ie' icha ta' a' e' wamblò wes ie' kì ikiane es. Kekraë ie' dör s'ttökwak. Ie' ttò kos e' dör kachè wöchka, e' kuëki Skëköl ttò mokì, e' kè wa ie' wöbatsö. Ie' dör kachökwak, ie' wák dër es, e' kuëki ie' kachò taië. Ie' dör kachè këköl. <sup>45</sup> Erè ye' tò ttè mokì ché a'

a, e' kuëki a' kè tò ye' ttè klö'wè. <sup>46</sup> ¿A' wé tò ikkachèmi tò ye' tò ì sulu wamblé? Ye' tò ttè mokì cheke a' a, e' ta' ¿ì kuëki a' kè tò ye' ttè klö'wè? <sup>47</sup> Yi dör Skëköl icha, ese tò ie' ttè ttsè er bua' wa. Erè a' kè dör ie' icha, e' kuëki a' kè éna ie' ttè ttsak.

**Abraham kam kur e' yöki Jesús tso'tke**

<sup>48</sup> Eta' judiowak kè erblène Jesús mik, e'pa tò iché ie' a:

—Mik sa' iché tò be' dör Samaria wak suluë, e' a' aknama tso', eta' sa' tò iché yësyesë.

<sup>49</sup> Jesús tò ie'pa iüté:

—Au, kè ye' a' aknama ku'. Ye' tò ye' Yé dalöieke, erè a' kè tò ye' dalöie. <sup>50</sup> Ye' kè ku' ì yulök ye' wák a' e' kíkoka. Erè itso' eköl, e' kì ikiane tò a' tò ye' kíkèka. E' dör s'shulökwak. <sup>51</sup> Mokì ye' tò a' a' ichè tò yi tò ye' ttè iuteke mokìë, ese kè duòpawà.

<sup>52</sup> Ie'pa tò iché ie' a:

—Iñe je' sa' tò iklö'wé mokì tò be' a' aknama tso'. Abraham ena Skëköl ttekölpa kos durulune. ¿Wes be' tò iché tò yi tò be' ttè iuteke, esepa kè duòpawà? <sup>53</sup> ¿Ima be' erbikò tò be' dör se' yé Abraham e' tsatà? Ie' blènewà nïes Skëköl ttekölpa kos blèrulune. ¿Ima be' erbikò tò be' dör yi?

<sup>54</sup> Ie' tò ie'pa iüté:

—Ye' wák e' kíkòkeka, e'ma' e' kè dör iie bua'. Erè ye' Yé tò ye' kíkèkeka, e' wák cheke a' tò e' dör a' Këköl. <sup>55</sup> Erè a' kè wà ie' suule. Ye' je' wà isuule. Ye' ichópa tò ye' kè wà ie' suule, e'ma' ye' kachò suluë wes a' es. Mokì ye' wà isuule. Ie' ttè iutekeyö. <sup>56</sup> Abraham dör a' yé bak ká iaiäë e' tò ye' datse, e' kèwö sueraë, e' kuëki ie' ttsè'ne buaë. Ie' tò isu' ta' e' tò ie' ttsëo' buaë.

<sup>57</sup> Ie'pa tò ie'pa a' iché:

—Kam be' kì duas dò dabom skeyök (50), eta' ¿wes be' ichèmi tò be' wà Abraham suule?

<sup>58</sup> Jesús tò ie'pa iüté:

—Mokì ye' tò a' a' ichè tò ye' tso'tke Abraham bak ká iaiä e' yöki kewe.

<sup>59</sup> Etä ie'pa tò ák klö'wé taië Jesús toie. Erë Jesús e' bléwä ie'pa shüä e' yéttsa Skéköl wé a.

### Jesús tò s'küne eköl wöbla kè wawër e' bua'wéne

**9** Jesús shkörämi e' tò wëm küne' wöbla kè wawër ese sué eköl. <sup>2</sup> Etä ittökäta pa tò ie' a' ichaké:

—A S'wöbla'ukwak, çyi tò ì sulu wamblé', e' nuí kuëki wëm i' küne' wöbla kè wawër, ie' wák ö iyé ö imì?

<sup>3</sup> Ie' tò ie'pa iüté:

—Kè idör tò ie' ö iyé ö imì tò ì sulu wamblé' e' nuí kuëki. Ie' küne' es as Skéköl diché taië e' wawër iki. <sup>4</sup> Yi tò ye' patké', e' kanè kəwötä wè se' tò kəwö tã'ia se' a' e' dalewa. E' dör wës se' kanèblö ñiwe es. Se' blénewä etä kè se' a' ì kaneoneia. E' dör wës kätuine s'ki es, kè se' a' kaneblénukia. <sup>5</sup> Ye' tso'ia ká i' ki, e' dalewa ye' dör wës ká olo es sulitane er ñi'woie.

<sup>6</sup> Ie' tò iché one tã ie' wiritué íyök ki, e' wa ie' tò dóchka yué. Tã wëm kè wöbla wawër e' wöbla ki dóchka e' tiéitö. <sup>7</sup> Tã ichéitö ie' a:

—Be' yú wöskuök di'dape kiè Siloé ee. (Siloé e' wà kiane chè: “patkéule”).

Wëm wöbla kè wawër e' mía tã iwöskuée tã iwöbla wawënene buaë tã imía iu a. <sup>8</sup> Pè' serke ie' o'mik ena pè' wä ie' sùle inuköl kak kiök e'pa ñi chaké:

—¿Wëm wí kè dör wëm e' tkökeseer inuköl kak kiök e'?

<sup>9</sup> Welepa tò iché:

—Tó, ie' idir.

Erë welepa skà tò iché:

—Au, kè dör ie' eré ie' sù idir.

Erë ie' wák tò iché:

—Tó, ye' je' idir.

<sup>10</sup> Etä ie'pa tò ie' a' ichaké:

—¿Wës i' tã be' wöbla wawënene?

<sup>11</sup> Ie' tò ie'pa iüté:

—Wëm kiè Jesús e' tò dóchka yué, e' tiéitö ye' wöbla ki tã ichéitö ña: 'Be' yú wöskuök di'dape kiè Siloé e' a.' Etä ye' mía wöskuée tã ye' wöbla wawënene.

<sup>12</sup> Etä ie'pa tò ie' a' ichaké:

—¿Wé wëm e'?

Ie' tò ie'pa iüté:

—Kè ye' wä ijcher.

### Wëm wöbla buanene e' kí chaké taië fariseowakpa tò

<sup>13-14</sup> Mik Jesús tò dóchka yué ena wëm wöbla kè wawër e' bua'wéneitö, e' kəwö dör eno diwö. E' kuëki wëm buanene e' tsémirakitö fariseowakpa ska'. <sup>15</sup> E'pa tò ie' a' ichaké:

—¿Wës be' wöbla buanene?

Ie' tò ie'pa iüté:

—Wëm eköl tò dóchka tié ye' wöbla ki tã ye' wöskuée tã ye' wöbla buanene.

<sup>16</sup> Ie'pa welepa tò iché:

—Wëm wé tò e' wé e' kè wä eno diwö dalöiëne, e' kuëki e' wák kè patkéne Skéköl wä.

Erë welepa skà tò iché:

—Ie' chópa pè' sulusi, e'ma çwës ì kè or yi a' ese ormi ie' a'?

Es ie'pa ttè chilinekã.

<sup>17</sup> Ie'pa tò iskà chakéne wëm buanene e' a:

—Ie' tò be' wöbla bua'wéne, çima e' wák bikeitsè be' tò?

Ie' tò ie'pa iüté:

—Ye' a' tã ie' dör Skéköl tteköl.

<sup>18</sup> Erë ie'pa kè éna iklö'wak tò ie' bak wöbla kè wawër tã iwásuéitö. E' kuëki ie'pa tò imì ena iyé tsuk patké <sup>19</sup> tã ie'pa a' ichaké:

—¿Wëm i' dör a' alà? A' ichè tò ie' küne' wöbla kè wawër, e' tã çwës i'ñe tã iwöbla wasuéitö?

<sup>20</sup> Iyé ena imì tò iché ie'pa a:

—Sa' wä ijcher buaë tò ie' dör sa' alà. Nies sa' wä ijcher tò iküne wöbla kè wawër. <sup>21</sup> Erë wës i'ñe tã ie' wöbla buanene e' kè ijcher sa' wä. Nies kè sa'

wa ijcher yi tö ie' wöbla bua'wéne. E' chakó ie' wák a. Ie' detke këchke. ¡Ie' wák tö ichèmi a' a! <sup>22</sup>Iyé ena imì e'pa suane judiowak wökirpa yökì, e' kueki ie'pa tö iché es. Judiowak wökirpa tö iyë'bak ñi a tö wépa ikló'wé tö Jesús dör wé pairine'bitü idi' wa s'blúie e', e' ta esepa yekelur ie'pa tö ie'pa ñi dapa'wo wé a, kè kièwajia yës. <sup>23</sup>E' kueki iyé ena imì tö iché: "Ie' detke këchke. Ie' wák tö ichèmi a' a."

<sup>24</sup>Età ie'pa tö wëm buanene, e' skà kiéne ta ie' a ichaké:

—Be' ttó mokië Skëköl wörki. Sa' wa ijcher tö wëm tö be' bua'wéne, e' dör pë sulusi.

<sup>25</sup>Wëm tö iüté:

—Kè ye' wa ijcher tö wëm e' dör pë sulusi ö au. Erë ye' wa ijcher buaë tö ye' bak wöbla kè wawër, erë ñne ta ye' tö iwasué. E' è jcher ye' wa.

<sup>26</sup>Ie'pa tö iska chakéne ie' a:

—¿Wes be' wéitö? ¿Wes ie' tö be' wöbla bua'wéne?

<sup>27</sup>Ie' tö ie'pa iüté:

—E' chétkeyö a' a, erë a' kè éna itt sak. ¿Iie a' ki ikiane tö ye' tö iska ché? Wësua ñies a' e' yuak ie' kléie.

<sup>28</sup>Ie'pa tö ie' ché suluë ta ichéakitö ia:

—Be' dör wëm e' ttökata, erë sa' dör Moisés ttökatapa. <sup>29</sup>Sa' wa ijcher tö Skëköl ut Moisés ta, erë wëm e', kè jcher sa' wa wé ie' datse.

<sup>30</sup>Ie' tö ie'pa iüté:

—¡I ché a' tö, e' tö ye' wökrawéwa! Ie' tö ye' wöbla bua'wéne ta ¿wes a' kè wa ijcher wé ie' datse? <sup>31</sup>Se' wa ijcher tö pë' sulusipa ttö kè iüteta' Skëköl tö. Erë wépa tö Skëköl dalóieke ena iserke wes ie' ki ikiane es esepa è ttö iüteke ie' tö. <sup>32</sup>Ká i' tsá yöne e'tami kè yi wa ittseule tö se' kune wöbla kè wawër esepa wöbla buarta'ne. <sup>33</sup>Ie' kè patkópa Skëköl tö, e'ma kè ñ orpa ie' a.

<sup>34</sup>Ie'pa tö iüté:

—Be' kune', be' talane ñ sulu è a. ¿Wes be' kësik deka sa' wöbla'uk?

Età ie'pa tö itrë'wëshkar.

### Wëm wöbla buanene e' erblé Jesús mik

<sup>35</sup>Jesús ittse tö wëm wöbla buanene e' trë'wëshkar ie'pa tö Skëköl wé a. Mik ie' tö ikué ta ie' a ichakéitö:

—¿Be' erblé S'ditsö Alà mik?

<sup>36</sup>Ie' tö iüté:

—A këkëpa, ichó ña yi idir as ye' erbló imik.

<sup>37</sup>Jesús tö iüté:

—Be' wa isuulebak; e' dör ye' tso' ttök be' ta e'.

<sup>38</sup>Età ie' e' tkéwa kuchë ki idalóioök ta iché ia:

—A Skëkëpa, be' mik ye' erblé.

<sup>39</sup>E' ukuöki ta Jesús tö iché:

—Ye' dë'bitü ká i' a s'shulök as wépa dör wes s'wöbla kè wawër es esepa wöbla wawër. Ñies ye' dë'bitü wépa e' chò tö iwöbla wawër buaë esepa mukat wes iwöbla kè wawër es.

<sup>40</sup>Mik fariseowakpa welepa tso' ie' ska', e'pa tö tté e' tse, età ichéakitö ia:

—¿Ima be' sa' bikeitsè? ¿Sa' dör wes s'wöbla kè wawër es?

<sup>41</sup>Ie' tö ie'pa iüté:

—A' mú wöbla kè wawër, e'ma ñ sulu nuí kè ku' a' ki. Erë a' tö icheke tö a' wöbla wawër, e' kueki a' ki ñ sulu nuí tso'ia.

### Obeja kkö'nukwak e' tté

**10** Età Jesús tö iché: "Moki ye' a' a iché tö obeja ekiblökwaqpa, esepa kè shkötawa wé obeja tso' wötëule, e' wékkö chökla a. E' skéie ie'pa shkoke-wa bánet. Esepa dör akblökwaqpa. <sup>2</sup>Erë wé shkökewa obeja wékkö chökla a, ese dör obeja kkö'nukwak chökla. <sup>3</sup>Obeja wékkö kkö'nukwak, ese tö obeja wékkö kköppeeke obeja kkö'nukwak a ta e' tö iobeja kieké ikiè wa etö etö. Obeja tö

ie' ttò t̄səw̄a buaë, t̄a ie' t̄o iyekelur wé itso'rak w̄ot̄eule ee. <sup>4</sup>Obeja t̄o ie' ttò t̄səw̄a buaë, e' kuək̄i mik ie' t̄o iyélur s̄eraa, et̄a imi'kerak ie' it̄ok̄i. <sup>5</sup>Yi k̄è suule ie'pa wa, ese k̄è t̄oie ie'pa t̄o. Ie'pa k̄è w̄a ese ttò t̄s̄eule, e' kuək̄i ie'pa poneka iyök̄i.”

<sup>6</sup>Ttè e' pakè Jesús t̄o judiowak a, erè ie'pa k̄è éna iwà āne.

### Jesús dör w̄es obeja kk̄o'nukwak buaë es

<sup>7</sup>Ie' t̄o iskà ché ie'pa a: “Mok̄i ye' t̄o a' a ichè t̄o ye' wák dör w̄es obeja w̄ot̄eule ese wékk̄o es. <sup>8</sup>Pè' d̄è'bit̄u ye' yök̄i kew̄e s'wöbla'uk k̄ache tté wa, esepa dör w̄es obeja ekiblök̄wakpa es, ie'pa dör p̄è' suluë. Erè wépa dör w̄es ye' obeja es, esepa k̄è w̄a ie'pa ttò t̄s̄ene. <sup>9</sup>Ye' dör w̄es obeja wékk̄o es, wépa shk̄ökew̄a ye' wa, esepa tsat̄k̄erdaë. Ie'pa dōraë w̄es obeja shk̄ökew̄a dōketts̄ane chk̄ök kk̄o'naule buaë ese es.

<sup>10</sup>“Obeja ekiblök̄wakpa dat̄s̄e iekiblök̄ ena ittök̄ulur ie'uk̄wa, e' è wamblök̄ esepa dat̄s̄e. Erè ye' d̄è'bit̄u k̄a i' a s̄ene bua'ie muk a' a, e' dör s̄ene michoë chök̄le. <sup>11</sup>Ye' dör w̄es obeja kk̄o'nukwak buaë es, e' e' muratts̄a ttèw̄a iobeja tsat̄koie. <sup>12</sup>Erè wé kaneblöke inuköl dalèrmik, ese k̄è dör ikk̄o'nukwak chök̄le. Ie' k̄è dör obeja wák, e' kuək̄i mik chichi kañiru dat̄s̄e, et̄a ie' t̄o obeja méat̄ t̄a itkashkar t̄a chichi kañiru t̄o obeja ttèw̄a t̄a imalepa poneka. <sup>13</sup>Wēm e' k̄è tkine obeja k̄i. Ie' tkirke inuköl è k̄i, e' kuək̄i itkashkar.

<sup>14-15</sup>“Ye' wák dör w̄es obeja kk̄o'nukwak buaë es. Ye' Yé w̄a ye' suule buaë, es ñies ye' w̄a ie' suule. Wépa dör ye' icha e'pa dör w̄es ye' obeja es, ie'pa suule ye' w̄a buaë, ñies ie'pa w̄a ye' suule. Ye' e' muratts̄a ttèw̄a ie'pa tsat̄koie. <sup>16</sup>Ñies ye' w̄a ye' icha skà tso' b̄anet, esepa dör ye' obejapa ñies, erè

ie'pa k̄è dör a' ditséw̄o. Ie'pa dōraë ye' w̄a ye' ska' t̄a ie'pa t̄o ye' ttò iut̄eraë t̄a ièrdawarak ye' icha tso' ié e'pa t̄a ñita echka ème. Ye' è dōraë ie'pa k̄os e' kk̄o'nukwakie.

<sup>17</sup>“Ye' e' muratts̄a ttèw̄a e' shk̄er-dakane, e' kuək̄i ye' Yé éna ye' dalèr taië. <sup>18</sup>Kè yi a ye' duök̄w̄a. Ye' e' muratts̄a ttèw̄a ye' wák er wa. Ye' a kawö mène e' motts̄a ttèw̄a ena shk̄enok̄ane w̄es ye' Yé t̄o ye' pat̄k̄è iwà uk es.”

<sup>19</sup>Mik judiowak t̄o ttè e' t̄s̄é, et̄a ie'pa ttè chiliwék̄ane. <sup>20</sup>Ie'pa kibiiepa t̄o icheke:

—¡Ie' dör aljie! ¡Ie' a aknama tso'! ¿Iie a' t̄o ittò ttseke?

<sup>21</sup>Erè imalepa t̄o icheke:

—¡Yi a aknama tso', ese k̄è ttò es! Aknama k̄è a s'wöbla buanukne.

### Judiowak k̄è erblène Jesús mik e'pa t̄o iwat̄étts̄a

<sup>22</sup>Tskiri k̄éw̄o de, et̄a Jerusalén wakpa tso' Skéköl wé batse'one k̄a iaiaë, e' k̄éw̄o tkö'uk. <sup>23</sup>E' sh̄ūa Jesús shk̄òdur Skéköl wé ùle kiè Salomón ùle e' a. <sup>24</sup>Et̄a judiowak k̄è erblène Jesús mik, esepa iènew̄a ie' pamik taië t̄a ie'pa t̄o ie' a ichaké:

—¿Kos sa' t̄o be' ttè panemirò? Iwà chò sa' a yèsyèsè t̄o be' dör wé pairine'bit̄u idi' wa s'bl̄úie e' ò k̄è be' dör e'.

<sup>25</sup>Ie' t̄o ie'pa iut̄é:

—Ye' t̄o ichétke a' a, erè a' k̄è erblène ye' mik. Ì k̄è or yi a ese wéyö ye' Yé ttò wa. E' t̄o ikkaché buaë sulitane a t̄o yi dör ye'. <sup>26</sup>Erè a' k̄è dör ye' obeja, e' kuək̄i a' k̄è erblöku' ye' mik. <sup>27</sup>Ye' obeja t̄o ye' ttò ttseke. Ye' w̄a ie'pa suule buaë ena ie'pa dat̄s̄e ye' it̄ok̄i. <sup>28</sup>Sene michoë mekeyö ie'pa a t̄a ie'pa k̄è duöpaw̄a aishkuö t̄a. Ie'pa k̄è yèrpatts̄aia yi a ye' ulà a. <sup>29</sup>Ye' Yé t̄o ie'pa me' ye' a' e' dör íyi ulitane tsa-t̄a. E' kuək̄i k̄è yi a ie'pa yèrpatts̄a ie' ulà a. <sup>30</sup>Ie' ena ye', sa' dör eköl è.



<sup>31</sup> Etā judiowak kè erblène Jesús mik, e'pa tò ák skà klö'wéne taië ie' toie. <sup>32</sup> Ie' tò ie'pa a iché:

—Ye' Yé batamik íyi buaë wé ye' tò taië a' wörki çe' wé kueki a' ki ye' kiane ttèwà ák wa?

<sup>33</sup> Ie'pa tò iüté:

—Sa' kè éna be' ttakwa íyi buaë wé be' tò ese kueki. Sa' éna be' ttakwa be' tò Skéköl ché suluë e' kueki. Be' dör s'ditsö è, erè be' e' chò tò be' dör Skéköl.

<sup>34-36</sup> Ie' iüté:

—¿Wes a' tò ye' kcateke ttè e' ki? ¿A' kè éna iane tò ká iaiaë Skéköl tò iyè' a' shülökwakpa bak e'pa a: “a' dör kékölpa”?\*\* Ttè e' tso' kitule Skéköl yékkuò ki. Se' wà ijcher tò yékkuò e' dör mokí kekraë. Ie'pa wépa a Skéköl tò ittè me'bak s'shülök, esepa ki' ie' tò kékölpa, e' yita ye' kirmi buaë ie' alà. E' wà dör tò ie' wák tò ye' klöo' ta ye' patkë'bituitò ká i' a. ¿Wes a' ichèmi tò ye' tò ie' ché suluë mik ye' iché tò ye' dör ie' alà etā? <sup>37</sup> Ì kiane ye' Yé ki tò ye' tò iwè, e' mú kè uk ye' ku', e'ma kè a' erblök ye' mik. <sup>38</sup> A' kè erblöku' ye' mik, erè i wekeyö, e' mik a' erblö as a' wà ijcher mokí tò ye' Yé ena ye' sa' dör eköl è.

<sup>39</sup> Judiowak tò Jesús skà ma'wé klö'wèwà, erè ie' tkashkar ie'pa yöki.

<sup>40</sup> E' ukuöki ta Jesús míane Jordán wishet wé Juan bak s'wöskuök ee. Ee ie' e' tséat. <sup>41</sup> Taië pè' de ie' ska' ta ichekerakitö:

—Juan kè wà, i kè or yi a ese one, erè wëm i' paka' Juan tò qos e' dör mokí.

<sup>42</sup> Etā taië pè' tso' ká e' a, e'pa erblé Jesús mik.

### Lázaro blènewa

**11** Wëm tso' eköl duöke kiè Lázaro serke Betania. Ee María ena iël kiè Marta e'pa serke. <sup>2</sup> María e' dör Lázaro kutà tò Skékëpa Jesús klò ki kiò

masmas tè'ka ta ipasiö'waitö itsakö wa e'. <sup>3</sup> Ie' ena Marta e'pa tò Jesús a ichök patké:

—A Skékëpa, Lázaro dalër taië be' éna, e' duöke.

<sup>4</sup> Mik Jesús tò ittse ta ichéitö:

—Duè e' kè e' alòpaka iki da'a. E' dör buaë Skéköl olo kkachöie, nies ye' dör ie' Alà e' olo kkachöie.

<sup>5</sup> Marta ena iël ena Lázaro, e'pa dalër taië Jesús éna. <sup>6</sup> Erè mik ie' ittse tò Lázaro duöke, etā ie' kè mine iska'. Ie' e' tséatia dò ká böt wé itso' ee. <sup>7</sup> E' ukuöki ta ie' iché ittökatapa a:

—Mishkane Judea.

<sup>8</sup> Ie'pa tò iché ie' a:

—A S'wöbla'ukwak, i' kukuie se' dè'rö ee, ta judiowak ki be' kiane ttèwà ák wa. ¿Wes ee be' shkakne?

<sup>9</sup> Ie' tò ie'pa a iché:

—Kè a' tkinuk e' ki. Kam ye' kéwö döka, e' kueki kè i tköpa ye' ta. E' dör wes ttè i' tò iché es: Ká niwe a diwö tso' döka dabom eyök ki böt (12). Niwe ta ká olo buaë, e' kueki se' shköke niwe, e' ta kè se' klastkërpawa. <sup>10</sup> Erè s'shköke ká ttsettse a, e' ta se' klastkërdaë. Ye' tso'ia shkök wes s'shköke niwe es, e' kueki kè i tköpa ye' ta.

<sup>11</sup> E' ukuöki ta ie' tò ichéne:

—Se' yami Lázaro kapowa, erè ye' mi'ke ishke'ukwane.

<sup>12</sup> Etā ittökatapa tò iché ie' a:

—A Skékëpa, ie' kapowa, e' ta ibuarmine.

<sup>13</sup> Ie' tò Lázaro blènewa e' ché ie'pa a es. Erè ittökatapa tò ibikeitsé tò é ikapowa. <sup>14</sup> E' kueki ie' tò ie'pa a iché yësyësë:

—Lázaro blènewa. <sup>15</sup> Erè a' kueki ye' tts'ne buaë tò ye' kè ku' ee as a' erblö ye' mik. Mishka isaük.

<sup>16</sup> Etā Tomás (e' kiè nies Dídimó) e' tò iché imalepa a:

\*\*10:34-36 kékölpa: Si'kuaie ttè e' dör dioses.

—Mishka as se' ttòwà ie'pa tò Jesús ta.

**Jesús dör s'duulewà  
ese shkë'ukkanewak.**

<sup>17</sup> Mik Jesús demi Betania, età Lázaro nu wötënewà, e' kî ká de tkël. <sup>18</sup> Betania atë tsinet Jerusalén o'mik kilómetro mañat ekkë. <sup>19</sup> Marta ena María akë blënewà, e' kuëkî taië judiowak dë'bitu ie'pa pablök. <sup>20</sup> Mik Marta wà ijchenewà tò Jesús döketke ta imía inaletsuk, erë María atë u a. <sup>21</sup> Ie' tò iché Jesús a:

—A Skëképa, be' chópa tkër íe, e'ma ye' akë kè blënewà. <sup>22</sup> Ie' blënewatke, erë ye' wà ijcher tò ì kié be' tò Skëköl a, e' meraëitö be' a.

<sup>23</sup> Ie' tò ie' a iché:

—Be' akë blënewà e' shkerdakane.

<sup>24</sup> Marta tò iché ia:

—Ye' wà ijcher tò ie' shkerdakane aishkuö ta mik ká i' erkewatke età.

<sup>25</sup> Jesús tò iché ie' a:

—Ye' dör s'duulewà e' shkë'ukkane wak. Ye' dör sene michoë e' mukwak. Yi erblé ye' mik erë iblënewatke, erë ishkerdakane ta iser michoë. <sup>26</sup> Yi serke ye' mik erblöke ye' mik, ese kè duöpawà aishkuö ta. ¿E' klö'wé be' tö?

<sup>27</sup> Marta tò iüté:

—A Skëképa, iklö'wéyö. Ye' tò iklö'wé tò be' dör Skëköl Alà, be' dör wé pairine'bitu idi' wa s'blúie cheke ká iaiaë tò idatse ká i' kî e'.

**Jesús íé wé Lázaro nu blëne ee**

<sup>28</sup> Marta tò ttë e' ché one, ta imía iël María kiök, ta iché ie' kukuö a:

—S'wöbla'ukwak detke. Ie' tò be' kié.

<sup>29</sup> Mik e' tse María tò, età bet ie' e' kékà míà Jesús sauk. <sup>30</sup> Jesús tso'ia wé ie' tté Marta ta ee. Kam ie' döwà wé ie'pa serke ee. <sup>31</sup> Mik wépa tso' María u a ipablök, e'pa tò isué tò ie' e' kékà míà bet, età ie'pa míà itöki. Ie'pa ibikeitsé tò ie' míà iuk idëütö nu blëne ee.

<sup>32</sup> Mik María demi Jesús ska', età ie' e' tkéwà kuchë kî iklö ska' ta ichéitö ie' a:  
—A Skëképa, be' chópa tkër íe, e'ma ye' akë kè blënewà.

<sup>33</sup> Mik Jesús tò isué tò María iúke ena wépa debitu ie' ta e'pa iúkeñak, età e' tò ie' chkewéwà taië shüte. <sup>34</sup> Ie' tò ie'pa a ichaké:

—¿Wé a' tò inú blë'wà?

Ie'pa tò iüté:

—A Skëképa, be' shkó isauk.

<sup>35</sup> Età Jesús íé. <sup>36</sup> Ie'pa tò iché:

—Isaú. Ie' éna Lázaro dalër taië.

<sup>37</sup> Erë ie'pa welepa tò iché:

—Ie' tò wëm wöbla kè wawër, e' bua'o'ne ta ¿ì kuëkî ie' kè wà ì one as Lázaro kè blërwa?

**Jesús tò Lázaro shkë'wékane**

<sup>38</sup> Età Jesús skà erianeka ta idemi wé Lázaro nu blëne ee. E' dör ákuk bérie. Ák bérie bastkër, e' wa ákuk wötëulewà.

<sup>39</sup> Jesús tò iché:

—Ák bastkër ákuk kkò mik, e' skóttsa bánet.

Marta dör dëütö kutà e' tò iché:

—A Skëképa, ká detke tkël inú kî, e' kuëkî suluë inú alanewatke.

<sup>40</sup> Ie' tò iüté:

—Ye' tò be' a ichétke tò be' erblé ye' mik, e' ta mokî be' tò Skëköl olo taië e' sueraë.

<sup>41</sup> Età ie'pa tò ák skéu bánet ta Jesús wökéka ká jaí a ta ichéitö:

—A yéwö, ì kiéyö be' a e' ttsébö. E' kuëkî wéstela chekeyö be' a. <sup>42</sup> Ye' wà ijcher tò kekraë ì kiekeyö be' a, e' ttsekebö. Erë ikiéyö be' a pë' tso' taië íe, e'pa kukua as ie'pa tò iklö'ü tò mokî be' ye' patké'.

<sup>43</sup> E' chéitö one ta ie' iché aneule:

—A Lázaro, ¡be' e' yóttsa see!

<sup>44</sup> Età Lázaro blënewà e' dettsa ttsë'ka. Ie' ulà, ie' klö parratulewà datsi'tak wa. Nies iwö parratulewà datsi'tak wa. Jesús tò iché iarak:

—Iparratulewā datsi'tak wa, e' wötsóö as imi'a.

### Judiowak tō Jesús ileritsé klō'wèwā

(Mateo 26.1-5; Marcos 14.1-2; Lucas 22.1-2)

<sup>45</sup>Judiowak dē'bitū María wapiōuk, e'pa tō ì wé Jesús tō e' sué, e' kuēki ie'pa taijē erblé ie' mik. <sup>46</sup>Erē ie'pa welepa mía, ì wéitō, e' chök fariseowakpa a. <sup>47</sup>Etā fariseowakpa ena sacerdotepa wōkirpa, e'pa tō judiowak wōkirpa kié ta ìni dapa'wéka ta ichérakitō ñi a:

—¿Wes se' tō Jesús wèmi? Ì kè or yi a ese wekeitō taijē. <sup>48</sup>Se' tō ie' méat es, e' ta sulitane erblóraē ie' mik ta itkérdakā se' blúie. E' mú ttsé Roma wōkirpa tō, e'ma ie'pa bituraē ta Skéköl wé tskerawarak-itō, ñies se' judiowak ewerawarakitō.

<sup>49</sup>Erē ie'pa shuā wēm tso' eköl kié Caifás, e' dör sacerdote kibi duas e' wa. Ie' tō iché ie'pa a:

—A' kè wā ì jcher yēs. <sup>50</sup>Ttseskua' a' kè éna iane tō wēm eköl è duòwā se' judiowak skéie, e' dör bua'ie se' kos erwa e' skéie.

<sup>51</sup>Erē e' kè yēne Caifás wā iwák er wa. Ie' dör sacerdote kibi duas e' wa, e' kuēki Skéköl tō ie' ké ichök es ittekölle. Ie' tō iché Skéköl ttekölle tō Jesús tterawā judiowak ulitane skéie. <sup>52</sup>Kè idör judiowak è skéie, ñies itterawā Skéköl ala'r ulitane serke ká wa'ne e'pa skéie as ie'pa dò judiowak ta ñita wes wakpa etökicha è es. <sup>53</sup>E' diwō ta judiowak wōkirpa tō kawō mé ñi a Jesús ttowā.

<sup>54</sup>E' kuēki ie' kè shkōia sulitane wōsha judiowak shuā. Ie' e' yéttsa mía ká kié Efraín eē. Ká e' atē ká sir poē wé kè yi serku' ese ska' tsinet. Eē ie' e' tséat it-tōkatapa ta.

<sup>55</sup>Judiowak Yépa Yërulune Egipto e' kéwō dökewatke tsinet tkō'wè. Judiowak serke bānet e'pa taijē dökemitke Jerusalén e' batse'ukne ikawō tkō'uke e' yōki wes ie'pa wöblar es. <sup>56</sup>Ie'pa tso'ie

Jesús yulök. Ie'pa ñi chakökerak Skéköl wé a:

—¿Ima a' tō ichè, Jesús dòmi kawō tkō'uk ö kè idōpa?

<sup>57</sup>Fariseowakpa ena sacerdotepa wōkirpa, e'pa tō iché sulitane a tō yi wā ijcher tō wé Jesús tso', e' ta ibiyó chó sa' a iklō'wōwā.

### Alaköl eköl tō kiò masmas tēka Jesús klò kī

**12** Kawō kianeia teröl Judiowak Yépa Yërulune Egipto e' kéwō tkō'woie ta Jesús mía Betania wé Lázaro serke eē. Lázaro du'wā e' shkeo'kane ie' tō e' ska' ie' mía. <sup>2</sup>Eē ie'pa ulérak, chkérak buaē Jesús kikoka. Marta tso' iwatiök. Lázaro tker ie'pa shuā mesa kī chkök Jesús ta. <sup>3</sup>Etā María wā kiò masmas kié nardo chökke tuē darerē, ese debitū litro shābōts, e' téitō Jesús klò kī. E' ukuōki ta ipasiwéwaitō itsakō wa. Kiò e' tō úshu kos alappowéka buaē jama-maē. <sup>4</sup>Etā Jesús ttökata eköl kié Judas Iscariote tō iwōmekettsa e' tō iché:

<sup>5</sup>—Kiò masmas se tuē kanè duas ek ské ekké. ¿Ì kuēki kè iwatonettsa s'siarēpa kimoie?

<sup>6</sup>Erē e' kè yēne ie' wā, ie' éna s'siarpa dalēr taijē e' kuēki. Ie' dör akblökwa, e' kuēki ie' tō iché es. Ie' dör Jesús ttōkatapa inuköl blökwa, e' kak ekibleke ie' tō iwák a. <sup>7</sup>Jesús tō iché ia:

—Imúat. Kiò e' bleke tē se' nu kī, erē ité ie' tō ye' kī kam ye' ttōwā e' yōki. <sup>8</sup>S'siarēpa tso' kekraē a' shuā as a' tō ikimū, erē ye' kè ku' kekraē a' ta.

### Sacerdotepa wōkirpa kī Lázaro kiane ttēwā

<sup>9</sup>Taijē judiowak wā ijchenewā tō Jesús tso' Betania ta imíyal eē, kè dör Jesús è sauk. Ñies ie'pa kī Lázaro shkeo'kaneitō e' kiane suē. <sup>10-11</sup>Lázaro batamik taijē ie'pa erblé Jesús mik, ta sacerdotepa wōkirpa ttē kè iutēia ie'pa tō. E'

kuęki sacerdotepa wökirpa tö ibikeit-sétke Lázaro ttowa ñies.

### Jesús demi Jerusalén

(Mateo 21.1-11; Marcos 11.1-11; Lucas 19.28-40)

<sup>12</sup>Taië pë de Jerusalén Judiowak Yépa Yërulune Egipto e' kėwö tkö'uk. Bule es ta ie'pa wa ijchenewa tö Jesús datse ñies Jerusalén. <sup>13</sup>E' kuęki ie'pa sĭ kò tēlor tsēmi shuēlor ie' datse e' ñalé kĭ idalōioie ta imĭyal ñaletsuk. Ie'pa tö iché aneule:

—ĭSkėköl kĭkōkasö! ĭAyēcha buaē s' Israel aleripa blú datse Skėköl ttō wa e'!<sup>††</sup>

<sup>14</sup>Etā Jesús tö burro pupula kué etö, e' kĭ ie' e' tkėka wes ikitule Skėköl yėkkuö kĭ es, e' tö iché:

<sup>15</sup>A Sión wakpa, kè a' suanuk.

Isaú, a' blú datse

e' tkėuleka burro pupula kĭ.<sup>‡‡</sup>

Es Skėköl yėkkuö tö iché.

<sup>16</sup>Ima Jesús tté tso' kitule Skėköl yėkkuö kĭ e' wà tka ie' ta. Eré e' kėwö ska' ta ie' ttōkatapa kè éna iwà ane tö Skėköl yėkkuö kitule ká ĭaĭaē e' tö Jesús tté pakeke. Eré ie' mĭkane ká jaĭ a olo ta' taië, e' ukuöki ta ie'pa éna iwà ane tö ĭ kos wé pë' tö ie' ta, e' tso'tke kitule Skėköl yėkkuö kĭ.

<sup>17</sup>Wépa tso' mik Jesús tö Lázaro shkeō'kane eta, e'pa tö tté e' pakeke imalepa a. <sup>18</sup>E' kuęki pë' wa taië tté e' jchenewa, e' kuęki imĭyal Jesús ñaletsuk.

<sup>19</sup>Eré fariseowakpa tö iché ñi a:

—ĭIsaú, sulitane mi'ke Jesús è itōki! ĭSe' tsaiēne buaè!

### Griegowak welepa tö Jesús yulé

<sup>20</sup>Pë' mĭne Jerusalén Judiowak Yépa Yërulune Egipto e' kėwö tkö'uk, e' shuā griegowak welepa tso'ñak. <sup>21</sup>Griegowak

e'pa debitu Felipe ska'. Felipe dör ká kiè Betsaida e' wak. Ká e' atē Galilea. Ie'pa kköché taië:

—A kėkēpa Felipe, sa' kĭ Jesús kiane suè.

<sup>22</sup>Etā Felipe mĭa ichök Andrés a ta ie'pa bōl mĭyal ichök Jesús a. <sup>23</sup>Jesús tö iché ie'pa a:

—Ye' dör S'ditsö Alà, e' olo taië e' kkayėrketke. <sup>24</sup>Mokĭ ye' tö a' a iché tö iyiwö etkla kè tkēnewa íyök a, e' ta ĭat-daē ekōrla, kè wō ta'. Eré iyiwö etkla tkēnewa íyök a, ese shölōne ta iwōdaló duowa, e' ta itskine wōrdaē taië. <sup>25</sup>Wé e' dalēr taië kè duakwa, ese weirdaē aishkuö ta. Eré wé e' mettsa ttēwa ká i' a, ese tsatkerdaē ser michoē. <sup>26</sup>Yi kanebalak ye' a, ese kawōta shkōk ye' ta; wé ye' tso' eē ye' kanè mėsopa tso' ñies. Yi kanebloke ye' a, ese kĭkeraka ye' Yé tö.

### Jesús ttekwatke, e' ché ie' tö

<sup>27</sup>“Ye' ittse i' ta, taië ye' eriane. ĭĭ chēmĭyö? ĭYö ichēmi ye' Yé a: ‘A yéwö, ye' tsatkōó ĭ tkōketke ye' ta e' yöki?’ Au, e' kè chepayō. ĭYe' wák e' dē'bitu ttēwa! <sup>28</sup>A yéwö, be' olo taië e' kkachó as be' kĭkarka.”

Etā ká jaĭ a ttō ttsēne e' tö iché: “Ye' olo taië e' kkachétkeyō be' kĭ, ta iskā kkacheraneyō.”

<sup>29</sup>Pë' tso' ittsoök eē, e'pa tö iché tö alá blane, eré welepa tö iché:

—Skėköl biyōchōkwak wele tté ie' ta.

<sup>30</sup>Jesús tö iché ie'pa a:

—Ttō ttsé a' tö, e' kè dör ye' a, e' dör a' kĭmoie. <sup>31</sup>Ká i' wakpa shulē kėwö detke. Bé dör ká i' wakpa wökir, e' uyardattsā i' ta. <sup>32</sup>Mik ye' wötēnewa krus mik e' tkēneka, eta ye' wa sulitane bituraē ye' ska'.

<sup>33</sup>Es ie' tö wes itterawa e' ché. <sup>34</sup>Pë' tö ĭiuté:

<sup>††</sup>12:13 Salmo 118.25

<sup>‡‡</sup>12:15 Zacarías 9.9

—Se' wā ijcher tō Skëköl yëkkuö kī ikitule tō wé pairine'bitū idi' wa s'blúie e' ser michoë. ¿Wes be' tō ichè tō S'ditsö Alà, e' kawötā tkëkà krus mik? S'ditsö Alà ¿e' dör yi?

<sup>35</sup> Jesús tō iché ie'pa a:

—Yi shköke stui a, ese kè wā ijcher wé imíró. Ye' dör wes ká olo es, erè ye' tso'ia a' shūa ekuölö è. E' kuekī a' shkó ye' olo a as kè stui tō a' kùwā. <sup>36</sup> Ye' dör wes ká olo es, e' tso'ia a' shūa. Ye' mik a' erbló as a' dò ye' ichaie.

E' ché one Jesús tō tā imía e' bléwa ie'pa yöki.

### Ì kuekī judiowak kè erbló Jesús mik

<sup>37</sup> Ì kè or yi a ese wé Jesús tō taië judiowak wörki, erè ie'pa kè erblène ie' mik. <sup>38</sup> E' kōs wamblène wes Skëköl tteköl Isaías e' tō ikit Skëköl yëkkuö kī es, e' tō ichè:

“A Skëköl, ttè paka' sa' tō wësua kè yi wā iklöne.

Be' diché taië e' kkayë' be' tō ie'pa a, erè ie'pa kè wā sa' ttò iütène.”<sup>¶¶</sup>

<sup>39</sup> Es ie'pa kè a Skëköl ttè klör. Nies Isaías ikitat tō ì kuekī ie'pa kè wā Skëköl ttè klöone. E' tō ichè:

<sup>40</sup> “Ie'pa er darërë, kè éna Skëköl ttè klö'wak yës.

E' kuekī ie'pa wōa Skëköl tō ká chówéwa. Ie' tō ie'pa méat wes s'wöbla kè wawër es.

Ie' tō ie'pa er darë'wéwā as ie'pa kè éna iwà ar.

Skëköl tō ichè tō ye' tō iwé es

as ie'pa kè er mane'ù ye' a tā ie'pa bua'wèneyö.”<sup>§§</sup>

<sup>41</sup> Isaías tō Jesús olo taië e' su' ena ie' tō Jesús cheke, e' kuekī ie' tō iché es.

<sup>42</sup> Erè taië judiowak wökirpa erblé Jesús mik. Erè ie'pa suane fariseowakpa yöki, e' kuekī kè ie'pa ichékā sulitane

kukua. Ie'pa kè kī ikiane tō fariseowakpa tō ie'pa trë'wëshkar ie'pa nì dapa'wō wé a. <sup>43</sup> S'ditsö tō ie'pa kikekeka e' wa ie'pa wöbatsö bua'ie, Skëköl tō ie'pa kikekeka e' skéie.

### Ì ché Jesús tō e' wa se' kichatërdaë

<sup>44</sup> Jesús tō iché aneule: “Wépa erblé ye' mik, esepa kè erblène ye' è mik. Ie'pa erblé ye' Yé tō ye' patkè' e' mik nies. <sup>45</sup> Wépa tō ye' sué, esepa tō ye' Yé tō ye' patkè' e' sué nies. <sup>46</sup> Ye' dör wes ká olo es. Ye' dë'bitū ká i' a as wépa erblé ye' mik, esepa kè ku'ia wes s'tso' stui a es. <sup>47</sup> Wépa tō ye' ttò ttsé, erè kè iwā iwà iütène, esepa kè kichatepa ye' wák tō. Ye' kè dë'bitū ká i' a s'ditsö kichatök. Ye' dë'bitū s'ditsö tsatkök. <sup>48</sup> Wépa tō ye' watekettsa, kè tō ye' ttò dalöie, esepa kkatökwak tso'tke, e' tō ie'pa kichaterattsä. Ttè yë'bak ye' tō, e' kè klöne ie'pa wā, e' kuekī mik ká i' erkewatke, etā ie'pa kichatërdattsä. <sup>49</sup> Ye' kè wā ì yëule ye' wák er wa. Ì cheke ye' tō, e' chekeyö wes ye' Yé tō ye' patkè'bitū, e' tō ye' patkè' ichök es. E' kuekī ye' ttò dör mokië. <sup>50</sup> Ye' wā ijcher tō ì ché ie' tō e' tō sene michoë mé. Es ì chekeyö, e' chekeyö wes ye' Yé tō ye' ké ichök es.”

### Jesús tō ittökatapa klò skué

**13** Judiowak Yépa Yërulune Egipto e' kèwö dökewatke bule es. Jesús wā ijcher tō ie' tō ká i' mekeattke tā imichone iyé ska', e' kèwö dewatke. Wépa dör ie' icha tso' ká i' a, e'pa dalër kekraë ie' éna. Es ie'pa dalër michoë ie' éna kekraë.

<sup>2</sup> Jesús ena ittökatapa tso' chkök nañewe. Ie'pa eköl kiè Judas, e' dör Simón Iscariote e' alà. Bé tō ie' kétke ibikeitsök Jesús wömúttsa. <sup>3</sup> Erè Jesús wā ijcher tō iyé tō ì kōs kèwö mé iulá

<sup>¶¶</sup>12:38 Isaías 53.1

<sup>§§</sup>12:40 Isaías 6.10

a. Nies ie' wa ijcher tō ie' dē'bitu Skēkōl ska' e' mitkene ee. <sup>4</sup> Es ie' e' kēka wē ie'pa tso' chkōk ee, ta ipaio kikkē yēttsaitō ta datsi' ukuō e' pasiwoje, ese muēwaitō e' kipa mik. <sup>5</sup> E' ukuōki ta di' téitō kulē' a ta ie' tō ittōkatapa klō skuēmi. Datsi' ukuō tso' iwa moule e' kipa mik, e' wa ittōkatapa klō pasiwéitō.

<sup>6</sup> Mik Jesús mi' Simón Pedro klō skuök, eta e' tō ie' a iché:

—A Skēkēpa, be' dōr sa' wōbla'ukwak. ¿Wes e' tō ye' klō skuēmi?

<sup>7</sup> Jesús tō iūté:

—Ì uk ye' tso' e' wà kē ane be' éna i'ñe, erē i' ukuōki ta be' éna iwà ardaē.

<sup>8</sup> Eta Pedro tō iché ie' a:

—¿Kē ye' tō kawō mepa be' a as be' tō ye' klō skuō!

Jesús tō iūté:

—Ye' kē tō be' klō skuē, e' ta be' kē dōpaia ye' ttōkataie.

<sup>9</sup> Simón Pedro tō iché ia:

—A Skēkēpa, e' dōr es e'ma ye' klō skuō. ¿Nies ye' ulà ena ye' wōkir e' kōs skuō!

<sup>10</sup> Erē Jesús tō iūté:

—Yi kuétke ñikōl pa sunetke maneneē, ese kē kawōta kuōwēne, iklō è kiane skuē. A' kibiiēpa tso'tke maneneē, erē ekōl dur a' shua, e' kē dōr manene.

<sup>11</sup> Ie' wa ijcher tō yi tō iwōmekettsa, e' kuēki ie' tō iché: “ekōl dur a' shua, e' kē dōr manene.”

<sup>12</sup> Jesús tō ittōkatapa klō skuē one ta ipaio kikkē iékaneitō ta imía e' tkéserne mesa o'mik ta ichéitō:

—¿Ì wē ye' tō a' a, e' wà ane a' éna? <sup>13</sup> A' tō ye' kiē S'wōbla'ukwak ö Skēkēpa, es je' idir, ye' dōr e'. <sup>14</sup> Ye' dōr a' wōbla'ukwak, ye' dōr a' kēkēpa, erē ye' e' wōēwa dō diōshet a' klō skuök wes kanē méso es. E' yita a' ké e' wōōkwa dō diōshet ñi yōki ñi kimuk. <sup>15</sup> Ì wē ye' tō a' wōrkī, e' wà kkachéyō a' a as a' tō iwakaneū es. <sup>16</sup> Mokī ye' tō a' a iché tō

kanē méso pa kōs, esepa kē dōr iwōkirpa tsata. Nies yi patkéule, ese kē dōr yi tō ipatké ese tsata. <sup>17</sup> Ttē e' wà ane a' éna ta iwawé a' tō es, e' ta ayēcha e' dōr buaē a' a.

<sup>18</sup> “Kē ye' ku' a' ulitane chōk. Ye' tō a' shukitbak, e' kuēki ye' wa ijcher buaē wes a' dōr. Erē Skēkōl yēkkuō tō iché: ‘wēpa chkōke ye' ta, e' isie alē ekōl mīane ye' bolōkie.’ Ttē e' kawōta wà tkōk es. <sup>19</sup> E' ché ye' tō a' a kam iwà tkō e' yōki. Es mik iwà tka, eta a' tō iklō'weraē mokī tō Skēkōl tō ye' patkē'bitu. <sup>20</sup> Mokī ye' tō a' a iché tō yi tō yi patkekeyō, ese kiekewa er bua' wa, ese tō ye' kiekewa er bua' wa. Nies yi tō ye' kiekewa er bua' wa, ese tō yi tō ye' patkē'bitu e' kiekewa er bua' wa.”

### Jesús tō iché Judas tō ye' wōmerattsā

(Mateo 26.20-25; Marcos

14.17-21; Lucas 22.21-23)

<sup>21</sup> Jesús tō iché one ta ichkenewa ta ichéitō ittōkatapa a yēsyesē:

—Mokī ye' tō a' a iché tō a' ekōl tō ye' wōmerattsā.

<sup>22</sup> Ittōkatapa ñi suēka. Ie'pa kē wa ijcher tō yi chōk ie' tso'. <sup>23</sup> Ie'pa ekōl dalēr taiē Jesús éna, e' tkēr io'mik tsinet ie'pa chkōke e' dalewa. <sup>24</sup> Ie' a Simón Pedro ulà kkaché tō ichakó yi cheke Jesús tō. <sup>25</sup> Ie' kī e' skéwa tsinet Jesús skà ta ichakéitō ia:

—A Skēkēpa, ¿yi idir?

<sup>26</sup> Jesús tō iūté:

—Ye' tō pan takla nuweke udiō a, ta yi a yō imé e' idir.

E' bet ta ie' tō pan takla nuwēka ta iméitō Judas dōr Simón Iscariote alà e' a. <sup>27</sup> Judas tō pan takla ñé ta bet Satanás tkawa ie' er a. Jesús tō iché ia:

—Ì weke be' tō e' ú bet.

<sup>28</sup> Erē ie'pa tso' chkōk mesa o'mik, e'pa kē éna iane ñi kuēki Jesús tō iché es. <sup>29</sup> Judas dōr inukōl blōkwak, e' kuēki Jesús ttōkatapa wēlepa tō ibikeitsé tō Jesús tō

Judas ké ilè taṽk ikawö tk'wëkerakitö e' a ö ilè kakkuk s'siarëpa a.

<sup>30</sup> Es Judas tö pan ñë ta imía. Mik imía, eta ká detke nañewe.

### Jesús tö ttè dalöiëno pa'alí mé ittökatapa a

<sup>31</sup> Judas mía e' ukuöki ta Jesús tö iché:

—Ye' dör S'ditsö Alà e'. I'ñe ye' olo wërdaë, ñies Skëköl wák olo wërdaë ye' ki.

<sup>32</sup> Skëköl olo wërdaë ye' ki, e' ta ie' wák tö ye' olo kkacheraë sulitane wörki, e' weraëitö bet. <sup>33</sup> A ala'r, kè ye' serpaia a' ta ká taië. A' tö ye' yuleraë, erë ì yë'bak ye' tö judiowak wökirpa a, e' cheke ye' tö a' a ñies: a' kè dõpa wé ye' mi'ke ee. <sup>34</sup> Ye' tö ttè pa'alí meke a' a dalöië, e' dör i': a' ñi dalëritsó. A' kawöta ñi dalëritsök wes ye' tö a' dalëritseke es. <sup>35</sup> A' ñi dalëritsöke es, e' ta sulitane wa ijcherdaë tö a' dör ye' ttökatapa.

### Pedro icheraë tö ie' kè wa Jesús suule

(Mateo 26.31-35; Marcos 14.27-31; Lucas 22.31-34)

<sup>36</sup> Simón Pedro tö ichaké Jesús a:

—A Skëkëpa, ¿wé be' mi'ke?

Ie' tö iüté:

—Kè be' döpami ye' itöki wé ye' mi'ke ee, erë aishkuö ta be' dömi ye' itöki.

<sup>37</sup> Pedro tö iché ie' a:

—A Skëkëpa, ¿i' kueki ye' kè mi'pa be' itöki i' ta? ¡Ye' e' chétke duökwa be' tsatkök!

<sup>38</sup> Jesús tö iüté:

—¿Moki be' e' chétke duökwa ye' tsatkök? Ye' be' a ichè yësyësë tö kam dakro ar, e' yöki bö icheraë mañatökicha tö be' kè wa ye' suule.

### Shkowá Skëköl ska' e' ñalé dör Jesús

**14** E' ukuöki ta Jesús tö iché ittökatapa a:

“Kè a' tkinuk. A' erbló Skëköl mik. Ñies a' erbló ye' mik. <sup>2</sup> Ye' yé u blatëule taië. Ye' mi'ke iwakanéuk kewe a' yöki. E' kè

chópa es, e'ma kè ye' wa iyëne. <sup>3</sup> Ye' mía ta mik iwakaneone, eta ye' datskene a' tsukmi as a' mi' senuk wé ye' tkër ee. <sup>4</sup> Wé ye' mi'ke e' ñalé suule a' wa buaë.”

<sup>5</sup> Tomás tö ie' a ichaké:

—A Skëkëpa, kè sa' wa ijcher wé be' mi'ke ta ¿wes sa' a ñalé armi?

<sup>6</sup> Ie' tö iüté:

—Ye' dör ñala e'. Ì dör mokjë ena sene michoë e' dör ye'. Kè yi dõpa S'yé ska', e' kè dör ye' wa e' ta. <sup>7</sup> A' wa ye' suule mokjë, e' ta es a' wa ye' Yé suule. I' tami a' wa ie' suule, mokjë isuétke a' tö.

<sup>8</sup> Felipe tö iché ia:

—A Skëkëpa, S'yé kkachó sa' a ta e' è dör wë'.

<sup>9</sup> Jesús tö iüté:

—A Felipe, ká taië ye' sené a' ta, ¿wes kè be' wa ye' suule? Yi tö ye' sué, ese tö S'yé sué ñies. ¿Wes be' ichëmi, 'S'yé kkachó sa' a'? <sup>10</sup> A Felipe, ¿be' kè wa iklöone tö ye' ena S'yé, sa' böi dör eköl è? Ì chekeyö a' a, e' kè chekú ye' wa ye' wák er wa. Ì kos kanewekeyö, e' kaneweke S'yé serke ye' a e' tö. <sup>11</sup> Iklóú tö ye' ena S'yé sa' böi dör eköl è. Ì chekeyö a' a, e' kè klöwë a' tö, e' ta iklóú ì kè or yi a, ese wéyö e' wa. <sup>12</sup> Moki ye' tö a' a ichè tö wépa erblé ye' mik, esepa tö ì weke ye' tö, e' weraë ñies. Erë ye' mi'ke S'yé ská e' kueki ì qule ye' wa, ese weraë ie'pa tö, ye' wa iqule e' tsata. <sup>13</sup> Ì kos kieke a' tö ye' ttö wa, e' weraëyö as S'yé olo taië e' kkayër ye' dör ilà e' wa. <sup>14</sup> Ì kos kieke a' tö ye' a, e' weraëyö.

### Jesús kablé Wiköl Batsë'r patkök

<sup>15</sup> “A' éna ye' dalër, e'ma ye' ttè dalöiëno e' dalöieraë a' tö. <sup>16</sup> Ye' tö ikieraë S'yé a ta ie' tö iska patkeraë eköl a' kimuk, e' dör Sulaiökwak, ie' tso'ie a' ta kekraë. <sup>17</sup> Ie' dör Skëköl Wiköl. Ie' tö S'yé ttö moki e' kkacheraë a' a. Wépa kè tö Skëköl dalöië esepa kè a iWiköl wënuuk ena ie'pa kè wa isuule, e' kueki ie'pa kè

a ikinukwa e' kimoie. Erë a' wa ie' sũule. Ie' serke a' ta, ñies ie' serdaë a' er a.

<sup>18</sup>“Ye' kè tò a' mepaat s'jchu'rlaie. Ye' datskene a' ska'. <sup>19</sup>Kukur ta wépa kè dör ye' icha esepa kè tò ye' suepaia. Erë a' tò ye' suerane. Ye' duowa shkenekane, e' batamik sene michoë döraë a' ulà a. <sup>20</sup>Mik e' kéwö de, eta' a' wa ijcherdaë tò ye' ena S'yé sa' böl dör eköl è. Ñies a' wa ijcherdaë tò a' ena ye', se' dör wes wák eköl è es. <sup>21</sup>Wépa tò ye' ttè dalöiëno klö'weke ta iwà iuteke, esepa éna ye' dalër. Wépa éna ye' dalër, esepa dalërdaë ye' Yé éna. Ñies ye' éna ie'pa dalërdaë ena ye' e' kkachöraë ie'pa a.

<sup>22</sup>Eta' eköl skà kiè Judas, kè dör Judas Iscariote, e' tò ie' a' ichaké:

—A Skékëpa, ¿wes be' e' kkachòmi sa' a, erë be' kè e' kkachòpa sulitane a?

<sup>23</sup>Ie' iüté:

—Wépa éna ye' dalër, esepa tò ye' ttè iüteraë. Ie'pa dalëritseraë ye' Yé tò. Ie' ena ye', sa' döraë ie'pa ska' senuk ie'pa ta. <sup>24</sup>Wépa kè éna ye' dalër, esepa kè tò ye' ttè iütepa. Ttè chekeyö a' a, e' kè dör ye' wák ttè, e' dör Skéköl tò ye' patké', e' ttè.

<sup>25</sup>“T' kos chekeyö a' a, e' chekeyö ye' tso'ia a' ta e' dalewa. <sup>26</sup>Erë Sulaiökwak, e' dör Wiköl Batse'r, e' patkeraë Skéköl tò a' a ye' ttò wa. I' kos yé' ye' tò a' a, e' wa ie' tò a' wöbla'weraë as a' éna iarne.

<sup>27</sup>“Sene bèrè méatyö a' a, e' datse ye' wa. E' dör ichók kè dör wes sene bèrè cheke wépa kè tò Skéköl dalöie esepa tò es. E' kueki kè a' tkinuk, kè a' suanuk. <sup>28</sup>A' wa ittseule tò ye' tò a' a iché tò 'ye' mi'ke erë ye' datskene a' ska'.' A' éna ye' dalër moki, e' ta' a' tts'erdaë buaë tò ye' mi'ke S'yé ska', e' dör ye' tsata' e' kueki. <sup>29</sup>I' ta' ye' tò ichétke a' a kam iwà tkò e' yöki as mik iwà tka, eta' a' erblò ye' mik.

<sup>30</sup>“Bé dör ká i' wökir, e' datsetke bet, e' kueki ye' kè a' kawö ta'ia ttök a' ta taië. Ie' kè diché ta' e' aloka ye' ki yës. <sup>31</sup>Erë

ye' tò iwé wes ye' Yé tò ye' ka' iuk es as sulitane tò isaü tò ye' Yé dalër ye' éna.

“Se' e' yölur íe, mishkatke.

### Jesús dör wes uva kicha es

**15**“Ye' dör uva kicha chökle, e' kaneweke ye' Yé tò. <sup>2</sup>Iulà wé kè wör, ese télor ye' Yé tò. Iulà wör ta' kos, ese paikléloritö buaë maneneë as ikí wör taië. <sup>3</sup>A' pairiuletke maneneë ttè wa ye' tò a' wöbla'wé e' wa. <sup>4</sup>A' senú ye' ta' nita, eta' ye' serdaë a' ta' nita. Mik ulà kè ku'ia iwí mik, eta' kè iwöria. Kè iwönuk iwák è mik. Es ñies a' kè ku' ye' mik, eta' kè a' wörpa.

<sup>5</sup>“Ye' dör uva kicha. A' dör iulà. A' kè ku' ye' mik, eta' kè i' onuk a' a yës. E' kueki wépa serke ye' mik, ñies ye' serke e'pa a, esepa wörke taië. <sup>6</sup>Wépa kè serku' ye' mik, esepa tãrdattsã kéu bãnet ta' isinewa wes uva kicha ulà sir es. Iulà ese shtekeka uyëwa bö' a' ta' iñanewa.

<sup>7</sup>“A' serke ye' mik, ñies ye' ttè tso'ie a' er a, e' ta' i' kos kiane a' ki, e' kió Skéköl a' ta' imeraëitö a' a. <sup>8</sup>Mik i' kiane Skéköl ki, ese wé a' tò, eta' e' dör wes uva wör es. E' tò ye' Yé kikekeka taië. E' wa iwënewa tò moki a' dör ye' ttökatapa. <sup>9</sup>Ye' éna a' dalër wes ye' Yé éna ye' dalër es. A' senú kekraë ye' mik as ye' tò a' dalëritsö kekraë. <sup>10</sup>Ye' ttè dalöiëno e' dalöieke a' tò, e' ta' ye' tò a' dalëritsè michoë. E' dör wes ye' tò ye' Yé ttè dalöiëno e' dalöieke ta' ie' tò ye' dalëritsè michoë es.

<sup>11</sup>“T' kos chekeyö a' a as a' tts'er buaë wes ye' es. Ye' ki' ikiane tò a' tts'er buaë shüte. <sup>12</sup>Ye' ttè dalöiëno e' dör i': a' ñi dalëritsö wes ye' tò a' dalëritseke es. <sup>13</sup>Se' e' mettsã duökwã yile dalër se' éna, e' skéie, e' ta' kè se' éna yi dalënuke e' tsata. <sup>14</sup>I' uk ye' tò a' ké, ese weke a' tò, e' ta' a' dör ye' sini'pa. <sup>15</sup>I' bikeitseke i' kaneweke kanè wökir tò, ese kè jcher ikanè méso wa. Iwökir kè tò ipaketa' ie' a. Erë i' kos yé' ye' Yé tò ye' a, e' chényö a' a, e' kueki a' kè kiëiyö ye' kanè mésopa, a' kiekeyö



ye' sini'pa. <sup>16</sup> A' kè wà ye' shukite, e' skéie ye' tó a' shukit. Ye' tó a' patkeke as a' mi' wónuk buaè wes uva ulà es, erè iwò ese tso'ie kekraè. Es ì kos kié a' tó ye' Yé a ye' ttò wa e' meraëitò a' a. <sup>17</sup> Ye' ttè dalöiëno dör i': a' ñi dalëritsó.

### Pè' kè erblène Jesús mik esepa tó Jesús ttókatapa sueraë suluë

<sup>18</sup> “Wépa kè tó Skéköl dalöiè esepa tó a' sueke suluë, e' tã a' éna íanú tó ie'pa tó ye' su'bak suluë a' yökí kewe. <sup>19</sup> A' chópa wes ie'pa es, e'ma ie'pa tó a' dalëritsëmi wes ie'pa ñi dalër es. Erè ye' tó a' shukit ie'pa shua, e' kuëki í'ne tã a' kè dör wes ie'pa es. E' kuëki ie'pa éna suluë a' ar. <sup>20</sup> Ye' tó iyë'bak a' a tó 'íkanè méso kè dör iwókir tsatã, e' anú a' éna. Ie'pa tó ye' we'iké siarè, e' tã ie'pa tó a' we'ikeraë siarè. Ie'pa tó ye' ttò dalöié, e' tã ñies ie'pa tó a' ttò dalöieraë. <sup>21</sup> A' dör ye' ichapa. Ie'pa kè wà ye' Yé tó ye' patkè' e' suule. E' kuëki ì kos suluë wambleraë ie'pa tó a' ki.

<sup>22</sup> “Ye' kè dòpa ká i' a, ye' kè ttè pakópa ie'pa a, e'ma ie'pa kè kí ì sulu nuí tã'. Erè í'ne tã ie'pa kè tkòpashkar inuí ulà a. <sup>23</sup> Wépa tó ye' sueke suluë, esepa tó ye' Yé sueke suluë ñies. <sup>24</sup> Ì kè or yi a ese kè úpayö ie'pa wörki, e'ma ie'pa kè kí ì nuí tã'. Erè ie'pa tó isu'bak erè ie'pa tó ye' sué suluë, ñies ye' Yé sué suluë ie'pa tó. <sup>25</sup> Erè itka es as ì tso' kitule Skéköl yékkuö kí, e' wà tkò es, e' tó ichè: 'Ie'pa tó ye' sué suluë kè wà tã'.”

<sup>26</sup> “Ye' tó Sulaiökwak tso' ye' Yé ska', e' patkeraë a' a, e' dör Skéköl Wiköl. Ie' dör Skéköl ttò mokí chökwaq. Mik ie' de, eta ie' tó ye' tté cheraë. <sup>27</sup> A' manetwã ye' tã kuaë, e' kuëki a' tó ye' tté cheraë ñies.

**16** Ttè e' kos chéyö a' a as a' erblö ye' mik e' kè olo'yò a' tó. <sup>2</sup> Ie'pa tó a' uyerattsa se' ñi dapa'wö wé a. Mokí kawö

dökewatke tã yile tó a' ttéwa, e' tã e' tó ibikeitseraë tó es ie' tso' Skéköl kanè uk. <sup>3</sup> Ie'pa kè wà ye' ena ye' Yé suule mokí, e' kuëki ie'pa e' wamblò es. <sup>4</sup> Erè ttè e' chéyö a' a as mik ikéwö de, eta a' éna iar.

### Ì weke Wiköl Batse'r tó, e' pakè

Ye' tso'ia a' tã, e' kuëki kuaë ttè e' kè yène ye' wã a' a. <sup>5</sup> Erè í'ne tã ye' mitkene, ye' Yé tó ye' patkè', e' ska'. Erè a' kè tó ye' a' ichakè tó '¿Wé be' mi'ke?' <sup>6</sup> E' skéie a' erianeka taië, ì ché ye' tó a' a e' kuëki. <sup>7</sup> Mokíë ye' tó a' a' ichè tó buaë idir a' a tó ye' mía. Ye' kè mine, e'ma Sulaiök-wak kè dòpa a' a. E' kuëki ye' tó a' a' ichè tó buaë idir a' a tó ye' mía. Ye' mía, e' tã ye' tó Sulaiökwak patkeraë a' a. <sup>8</sup> Mik ie' de, eta ie' tó ikkacheraë wépa kè tó Skéköl dalöiè esepa a tó ie'pa e' wamblò sulu. Ñies ie' tó ikkacheraë ie'pa a tó ye' eköl è dör yësyësé Skéköl wöa. Ñies ie' tó ikkacheraë ie'pa a tó ie'pa kichatërdaë aishkuö tã. <sup>9</sup> Ie'pa kè erblöku' ye' mik, e' kuëki ie'pa dör ì sulu wamblökwakpa. <sup>10</sup> Ye' mi'kene ye' Yé ska', e' kuëki kè ye' suëpaia a' tó. E' wa ikkayëne ie'pa a tó ye' eköl è dör yësyësé Skéköl wöa. <sup>11</sup> Bé dör ká i' wakpa wókir e' kichatënetke, e' wa ikkayëne tó ñies ie'pa kichatërdaë.

<sup>12</sup> “Taië ye' wã íyi tso'ia chè a' a, erè i' tã kè a' a iwà anuk. <sup>13</sup> Erè mik Skéköl Wiköl ttò mokíë e' de, eta ie' kè ttòpa iwák er wa. Ì tseke ie' tó Skéköl ska', ese cherane ie' tó a' a. E' kuëki ie' tó a' wöbla'weraë ttè mokí kos ese wa. Ì tköraë aishkuö tã, ese cheraëitò a' a. <sup>14</sup> Ì tso' ye' er a, ese cheraneitò a' a. Es ie' tó ye' kikeraka. <sup>15</sup> Ì kos tso' ye' Yé er a, ñies e' tso' ye' er a. E' kuëki ye' tó a' a' iché tó, ì tso' ye' er a, ese cherane Wiköl Batse'r tó a' a.

### Ittökatapa eriane e' manerdattsane ttsërdane buaë

<sup>16</sup>“Bërbër setcha, etä kè a' tò ye' suepaia. Erë e' ukuöki setcha, etä a' tò ye' suëmine.”

<sup>17</sup>Ie' ttökatapa welepa nî chaké:

—Ie' tò iché, 'Bërbër setcha etä a' kè tò ye' suepaia. Erë ekuölö tã a' tò ye' suëmine.' ¿Ì cheke ie' tò es? ¿Ima iwà dör? Ñies ie' tò iché tò 'Ye' mi'ke ye' Yé ska'.' <sup>18</sup>Ie' iché 'Bërbër setcha' ¿ima e' wà kiane ché? ¿Ì ché ie' tò, e' wà kè ane se' éna!”

<sup>19</sup>Jesús wã ijcher tò ie'pa éna ie' chakak, e' kueki ie' tò iché ie'pa a:

—Ye' tò iché a' a: 'Bërbër setcha, etä a' kè tò ye' suepaia. Erë e' ukuöki setcha, etä a' tò ye' suëmine.' ¿E' wà chakeke a' tò nî a? <sup>20</sup>Moki yö iché a' a tò a' iuraë kköchöraë siarë, erë wépa kè tò Skëköl dalöië esepa ttsërdäë buaë. Eré a' eriaräë, erë e' manerdattsane ttsërdane buaë. <sup>21</sup>Mik alaköl alà kurketke, etä ieriane taië, ikirine e' kèwö de, e' kueki. Erë mik ilà kune, etä ittse'nene buaë. Ie' alà kune e' tò ie' ttsë'weke buaë. E' kueki ikirine weine siarë e' chowa ie' éna. <sup>22</sup>E' sù i'ne tã a' eriarke siarë, erë se' nî saurane, e' tò a' ttsë'werane buaë shute. Ttsë'ne buaë e' kè yënuksa yi a' er a.

<sup>23</sup>“Mik e' kèwö de, etä kè ì kiepaia a' tò ye' a. Moki ye' tò a' a iché tò ì kos kié a' tò ye' Yé a ye' ttò wa, e' meraëitò a' a. <sup>24</sup>Ikké tã a' kè wã ì kiule Skëköl a ye' ttò wa, erë i' tã ikiómitke ie' a, ikió ie' a këkraë etä imerdaë a' a as a' ttsë'r buaë shute.

### Jesús e' alékatke pë' kè erblëne ie' mik esepa ki

<sup>25</sup>“I' kos chéyö a' a, e' chéyö ttè kleaule wa. Erë kawö döraë etä kè ye' tò ichèia a' a es. Ye' tò ye' Yé ttè pakeraë a' a wës idör es kè kleaule. <sup>26</sup>Mik e' kèwö de, etä

ì kiane a' ki e' kieraë a' wákpa tò ye' Yé a ye' ttò wa. E' wà kiane ché tò kè ikianukia tò ye' tò ì kos kiane a' ki e' kiò ye' Yé a. Ie' wák éna a' dalër taië, e' kueki ì kiane a' ki, ese kiëmi a' wákpa tò ie' a ye' ttò wa. <sup>27</sup>Ie' éna a' dalër, e' kueki a' wákpa tò ikiëmi ie' a. A' éna ye' dalër, ñies a' tò iklö'weke tò ye' dë'bitu ie' ska', e' kueki ie' éna a' dalër. <sup>28</sup>Ye' datse ie' ska' e' dë' ká i' a, i'ne tã ye' mitkene ie' ska'.”

<sup>29</sup>Ittökatapa tò iché ie' a:

—I' tã be' tso' ichök sa' a wës idör es kè kleaule. Be' kè ku' ichökia ttè kleaule wa. <sup>30</sup>Ire' sa' wã ijcher tò be' wã iyi kos e' jcher. Dò ì chakak sa' éna be' a, e' jchertke be' wã. E' kueki sa' tò iklö'wé tò be' datse Skëköl ska'.

<sup>31</sup>Jesús tò iüté:

—¿Ire' a' tò iklö'wé? <sup>32</sup>A' tò ye' meraät ekörla. A' michone eköl eköl a' u a. Kawö e' datse, e' detke i' tã. Erë moki ye' kè ku' ekörla. Ye' Yé tso' ye' tã. <sup>33</sup>E' kos chéyö a' a as a' ser bèrë a' batsulewã ye' mik e' wa. Ká i' ki' a' weirdaë siarë. Erë a' er kuü, ¿ye' e' ali'kabak ì sulu diché ki!

### Jesús ikié Syé a' ittökatapa ki

**17** Ttè ekké ché Jesús tò one tã iká sué ká jai a tã ichéitö: “A Yéwöla, ye' kèwö detke. Ye' dör be' alà, e' olo kkachó as be' olo kkayër sulitane a ye' wa. <sup>2</sup>S'ditsö ulitane kèwö me' be' tò ye' a as sene michoë mù ye' tò, wépa kos me' be' tò ye' a, esepa a. <sup>3</sup>Sene michoë e' dör tò ie'pa bats buaë be' dör Skëköl chökke eköl è e' mik, ñies ye' dör Jesucristo patkë' be' tò e' mik.

<sup>4</sup>“Kanè me' be' tò ye' a wè ká i' a, e' wétkeyö. E' wa ye' tò be' olo kkayë'bitu. <sup>5</sup>E' kueki i' tã, a yéwöla, ye' tò be' a ikiè tò mik ye' dene be' ska', etä ye' olo kkachó, wës be' tò ye' olo kkayë' mik ye' bak be' tã kam ká i' yör e' yöki etä es.

<sup>6</sup>“Wépa shukitbak be' tò ká i' wakpa shua mè ye' a, e'pa a ye' tò ikkaché tò be'

dör yi. Be' ichapa idir, e'pa me' be' tö ye' a. Ie'pa tö be' ttè iuteke. <sup>7</sup>I'ne ta ie'pa wa ijcher tö ì kos wéyö, ñies ì kos chéyö, e' me' be' tö ye' a. <sup>8</sup>Ttè me' be' tö ye' a pakè, e' pakéyö ie'pa a, ta ie'pa tö iklö'wé. Ie'pa wa ijcher tö mokì ye' datse be' ska' patké' be' tö.

<sup>9</sup>“Ye' tso' be' a ikiök ie'pa ki. Ye' kè ku' ikiök wépa kè tö be' dalöieta' esepa ki. Ye' tso' ikiök wépa me' be' tö ye' a esepa ki, ie'pa dör be' icha e' kueki. <sup>10</sup>Wépa kos dör ye' icha, esepa dör be' icha. Ñies be' icha kos esepa dör ye' icha. Ie'pa wa ye' olo taië e' kkayëne.

<sup>11</sup>“Kè ye' serpaia taië ká i' ki. Ye' mitkene senuk be' ska'. Erè ie'pa ate ká i' ki. A Yéwöla batse'r, be' dalò taië, be' diché taië me' be' ye' a, e' wa ie'pa kkö'nú as ie'pa ser niita wes wák eköl è es wes be' ena ye' es. <sup>12</sup>Mik ye' tso'ia ká i' a ie'pa ta, eta ye' tö ie'pa kkö'ne tsatké diché me'bö ña e' wa. Ie'pa kos tsatkéyö. Wé wömenettsabak weinuk, e' è e' yé'tsa sa' shua. Ie' è weinewa as iwà tkò wes be' yékkuò tö ichè es.

<sup>13</sup>“Író ye' mitke be' ska', erè ttè i' chekeyö, ye' tso'ia ká i' a e' dalewa, as ie'pa tts'er buaë mokie wes ye' es. <sup>14</sup>Be' ttè yé'yö ie'pa a, erè wépa kè tö be' dalöie esepa tö ie'pa sueke suluë. Ye' kè dör wes ká i' wakpa es, e' sù ye' ttökatapa kè dör wes ie'pa es. E' kueki ká i' wakpa tö ie'pa sueke suluë. <sup>15</sup>Ye' kè ku' ikiök be' a tö ie'pa yótsa ká i' ki. Ye' tso' be' a ikiök tö ie'pa bló bé yöki. <sup>16</sup>Ye' kè dör wépa kè tö be' dalöie esepa eköl, ñies ye' ttökatapa kè dör ie'pa es. <sup>17</sup>Ie'pa klöübö be' wák è a be' ttè wa. Be' ttè dör mokì. <sup>18</sup>Ye' tso' ie'pa patkók ká i' wakpa shua, wes be' tö ye' patké' ká i' wakpa shua es. <sup>19</sup>Es ye' e' müttsa be' a as ie'pa e' müttsa mokì be' a ñies.

<sup>20</sup>“Ye' kè ku' ikiök be' a ie'pa è ki. Erè wépa erblömi ye' mik ie'pa ikképa ttö batamik, ñies esepa ki ye' tso' be' a ikiök. <sup>21</sup>Ye' tö be' a ikiè as ie'pa dò wes wák

eköl è es. Be' ena ye', se' dör wák eköl è. Es ye' tö be' a ikiè tö ie'pa dò wes wák eköl è es se' ta wes se' dör eköl è es, as ká i' wakpa tö iklö'ü mokì tö be' tö ye' patké'. <sup>22</sup>Diché me' be' tö ye' a, e' mé ye' tö ie'pa a as ie'pa dò wes wák eköl è es, wes be' ena ye', se' dör eköl è es. <sup>23</sup>Ye' batsé buaë ie'pa mik, ñies be' batsé buaë ye' mik. Es idir as ie'pa dò mokie wes wák eköl è es. E' dör es, e' ta ká i' wakpa wa ijcherdaë tö be' tö ye' patké'. Ñies ie'pa wa ijcherdaë tö be' éna ye' ttökatapa dalër taië wes be' éna ye' dalër es.

<sup>24</sup>“A yéwö, be' tö ie'pa me' ye' a. Ye' ki ikiane tö aishkuò ta ie'pa dòmi ye' ta, wé ye' tso' ee, as ie'pa tö olo me' be' tö ye' a, e' saü. Kam ká i' yör, eta wake' be' éna ye' dalër taië, e' kueki olo e' me'bak be' tö ye' a. <sup>25</sup>A Yéwö, be' dör yésyèsë. Wépa kè tö be' dalöie esepa kè wa be' suule, erè ye' wa be' suule. Ñies ie'pa ikképa wa ijcher tö be' tö ye' patké'bitu. <sup>26</sup>Ye' tö ie'pa a ikkayé' tö be' dör yi, e' kkachekeiyö ie'pa a as ie'pa ñi daléritsò wes be' tö ye' daléritseke es, ñies as ye' dò senuk ie'pa er a.”

### Judiowak tö Jesús klö'wéwa

(Mateo 26.47-56; Marcos

14.43-50; Lucas 22.47-53)

**18** Jesús tté S'yé ta one, ta imia it-tökatapa ta di'la kiè Cedrón, e' wishet. Ie'pa de wé kal klò tso' tkéule ee. <sup>2</sup>Ee Jesús krá ñi dapa'uk ittökatapa ta, e' kueki Judas tö ie' wömekettsa, e' wa ká e' suule buaë. <sup>3</sup>E' itöki Judas demi ee Roma ñippökwakpa ta taië. Ñies Skéköl wé, e' shkékipa de ie' ta. E'pa patké judiowak sacerdotepa wökirpa ena farise-owakpa tö. Ie'pa de Judas ta bö'wö ki ena kuàtak sí wönarke taië ese ki, ñies tabè damirak iwà taië. <sup>4</sup>Ì wamblërketke ie' ta, e' kos jcher buaë ie' wa, e' kueki ie' dettsa ta ichaké ie'pa a:

—¿Yi yuleke a' tö?

<sup>5</sup>Ie'pa iüté:

—Jesús Nazaret wak, e' yuleke sa' tō.

Jesús tō iché:

—Ye' idir.

Judas tō ie' wōmekettsa, e' tso' ñip-pōkwakpa ta. <sup>6</sup>Mik Jesús tō iché: “Ye' idir”, e' wōsha ta ie' skéurak tsikka ta ianerōrak iski. <sup>7</sup>Jesús tō iskà chaké ie'pa a:

—¿Yi yuleke a' tō?

Ie'pa tō iüté:

—Jesús Nazaret wak.

<sup>8</sup>Jesús tō iskà iüté:

—Ye' tō ichétke a' a tō ye' idir. A' ye' yuleke, e'ma wépa tso' ye' ta, e'pa múat bër.

<sup>9</sup>Ie' tō iché es as ttè yé'itō iyé a, e' wà tkò. Ie' tō iyé: “wépa mé be' tō ye' a, es-epa kè weinuk yés.” <sup>10</sup>Etā Simón Pedro wā tabè shkò, e' yéttaitō ta sacerdote kibi kanè méso, e' kukuōña ulà bua'kka téttsa, e' kiè Malco. <sup>11</sup>Jesús tō iché Pedro a:

—Be' tabè blówane ikkuölit a. Ye' Yé tō íyi bacha'bacha i' mé ye' a, e' ta ¿wes e' kè yepawayö?

### Jesús mítser Anás wörki

(Mateo 26.57-58; Marcos 14.53-54; Lucas 22.54)

<sup>12</sup>Etā Roma ñippōkwakpa ena iwökir kibi ena Skèköl wé shkèkpa tō Jesús kló'wéwa muéwa iulà a. <sup>13</sup>Tā itsémirak-itō kéwe Anás u a. Anás dör Caifás nu-aki. Duas e' wa Caifás dör judiowak sacerdote kibi. <sup>14</sup>Caifás e' tō iyé' judiowak wökirpa a tō buaé idir ie'pa a tō wëm eköl è ttèwa ie'pa ulitane skéie.

### Pedro iblé tō kè ie' wā Jesús sūle

(Mateo 26.69-70; Marcos 14.66-68; Lucas 22.55-57)

<sup>15</sup>Simón Pedro ena Jesús ttökata skà eköl, e'pa bōl mirwā Jesús itōki. Ittökata tso' Pedro wapieie, e' sūle buaé sacerdote kibi wā, e' kuéki ie' dewā buaé Jesús ta sacerdote kibi upa a. <sup>16</sup>Erè Pedro ate

dur u'rkī ukkō tkër kañika eē. Etā ittökata sūle sacerdote kibi wā, e' biteame ttök tayè tso' ukkō kkō'nuk e' ta as Pedro döwa. Etā es Pedro dewā. <sup>17</sup>Etā tayè dur ukkō kkō'nuk, e' tō Pedro a ichaké:

—¿Yëne be' dör wëm klönewa e' klé?

Ie' tō iüté:

—Au, ye' kè dör iklé.

<sup>18</sup>Kā dör seseë, e' kuéki sacerdote kanè mésopa ena Skèköl wé shkèkpa tō bō' batséka baiklè. Eē Pedro de bō' baiklök ñies ie'pa ta.

### Sacerdote kibi tō Jesús chaké

(Mateo 26.59-66; Marcos 14.55-64; Lucas 22.66-71)

<sup>19</sup>Anás bak sacerdote kibi e' tō Jesús chaké ittökata kī ena ttè wa ie' s'wōbla'weke, e' kī. <sup>20</sup>Jesús tō iüté:

—Kékraë ye' tté sulitane kukua. Kékraë ye' tō s'wōbla'wé se' ñi dapa'wō wé kos a ena Skèköl wé a wé sulitane ñi dapa'uke eē. Kè ye' wā i yëule akir. <sup>21</sup>¿Íók be' tō ye' chaké? Ì chéyö e' jcher wépa wā ye' ttséule ichök, esepa wā. Ie'pa a ichakó.

<sup>22</sup>Mik e' ché Jesús tō, etā Skèköl wé shkèkpa eköl tō ie' ppé iwō kī iulatō wa ta iché ia:

—¿Wes be' tō sacerdote kibi iütèmi es?

<sup>23</sup>Jesús tō iüté:

—Ì chéyö, e' dör suluë, e'ma ichó wé isulune. Erè i ché ye' tō e' dör moki, e' ta ¿i kī be' tō ye' ppé?

<sup>24</sup>E' ukuökī ta Anás tō Jesús patkèmi moule Caifás ska', e' dör judiowak sacerdote kibi.

### Pedro tō ibléne tō kè ie' wā Jesús sūle

(Mateo 26.71-75; Marcos 14.69-72; Lucas 22.58-62)

<sup>25</sup>E' dalewa Pedro duriā bō' baiklök ta ichakérakitō:

—¿Yëne be' dör wëm klönewa e' klé eköl?

Ie' iüté:

—Au, ye' kè dör ie' klé.

<sup>26</sup> E' ukuöki tã sacerdote kibi kanè meso kukuõña tãa' Pedro tã, e' yami eköl tã ie' a' iché:

—Ye' tã be' sué ie' tã, kal klõ tso' tkëule ee.

<sup>27</sup> Pedro tã iskà bléne tã e' wõshã tã dakro ane.

### Jesús mítser Pilato wörki

(Mateo 27.1-2,11-14; Marcos 15.1-5; Lucas 23.1-5)

<sup>28</sup> Bla'mi, diwö tskirketke, etã Jesús yétsarakitö Caifás u a' tsëmi judiowak wökir kiè Pilato, e' ska'. E' kè dör judiowak. Ie' tkëulekã Roma wakpa wã judiowak wökirie. Eë ie'pa tã Jesús tsëmi. Judiowak éna Ie'pa Yépa Yëru-lune Egipto e' kèwö tkö'wak, e' kueki ie'pa kè e' ia'wakã. Ie'pa a' tã shkëwã yi kè dör judiowak ese u a' e' dör ñá, e' kueki ie'pa kè dë'wã Pilato u a'. <sup>29</sup> E' kueki ie'pa dettsã ie'pa tã ttök, tã ie'pa a' ichakéitö:

—¿I' ki a' tã wëm e' kcateke?

<sup>30</sup> Ie'pa tã iüté:

—Wëm e' kè tã íyi sulu wamblõpa, e'ma sa' kè wã ie' mène be' ulã a'.

<sup>31</sup> Ie' tã ie'pa a' iché:

—Itsúmine tã ishuló wes a' wakpa ttè dalöiëno e' tã ichè es.

Erë judiowak wökirpa tã iché:

—Kè sa' a' kawö mène sttökwa.

<sup>32</sup> Mik e' ché ie'pa tã es, etã e' wa Jesús tã wes ie' duõrawã e' yè', e' wã tka.†

<sup>33</sup> Pilato míane weshkë tã Jesús kiéitö tã ichakéitö:

—¿Be' dör judiowak blú?

<sup>34</sup> Jesús tã iché ie' a':

—¿E' chaké be' tã be' wák er wa, ö yile tã ye' ché be' a' e' kueki?

<sup>35</sup> Pilato tã iüté:

—¿Ttsëskua tã ye' dör judiowak? Be' wák ditsëwõpa ena sacerdote wökir

kibipa, e'pa wã be' debitu ye' a' shulè. ¿I' sulu wamblébö?

<sup>36</sup> Jesús tã iüté:

—Moki ye' dör blu', erë ì blúie ye' tso' e' kè dë'kã kã i' ki. Imú dör es, e'ma ye' ttökatapa ñippõmi as judiowak wökirpa kè tã ye' klõ'wëwã. Erë ì blúie ye' tso' e' kè dë'kã kã i' ki.

<sup>37</sup> Etã Pilato tã ie' a' ichaké:

—¿E'ma moki be' dör blu'?

Jesús tã iüté:

—Tó, wes be' iché e'ma es idir. Ye' dör blu'. Ye' kune' kã i' a' ttè moki e' choie, e' kueki ye' dë'bitu. Wëpa éna ttè moki dalër esepa kos tã ye' ttè iüteraë.

<sup>38</sup> Pilato tã ie' a' ichaké:

—¿I' dör ttè moki?

### Pilato tã iché tã Jesús ttõwã

(Mateo 27.15-31; Marcos 15.6-20; Lucas 23.13-25)

Pilato tã ichaké one tã ie' skã dettsã ttök judiowak tã, tã ichéitö ie'pa a':

—Ye' kè wã ì sulu kune Jesús ki.

<sup>39</sup> Erë a' wöblanewatke tã mik A' Yépa Yëru-lune Egipto e' kèwö tkö'weke, etã s'wõtëule e' yekettsã èmine ye' tã eköl. ¿A' ki ikiane tã a' blú e' èmiyö?

<sup>40</sup> Ie'pa tã iüté aneule:

—¿Ie' kè wõttsaar! ¿Barrabás wõttsóó sa' a'!

(Barrabás e' dör akblökwak.)

**19** Etã Pilato tã Jesús ppök patké tsa' bata daloie wa. <sup>2</sup> Roma ñippökwa tã dika'kicha yué wõshkiie tã itkékarakitö Jesús wökir ki blu'ie. Ñies ie'pa tã datsi' daloshdalosh ese iéka' i' ki blu'ie iwayuoie. <sup>3</sup> E' ukuöki tã idewarãk tsinet ie' o'mik tã iché iã:

—¿Be' dör judiowak blú! ¿Be' mú kawö tkõ buaé!

Taië ie'pa tã ippé iwö ki.

<sup>4</sup> Pilato dettsane tã iskã ché judiowak a':

†18:32 Juan 3.14 ena 12.32 saú.

—Isaú, ye' mía itsukbitu as a' wa ijcher tö ye' kè wa ttè kune ie' kkatöie.

<sup>5</sup> Etá Jesús dettsa dika'kicha yöule wöshkiie, e' tkëuleka iwökir kî ta ipaiëule blu' datsi' daloshdalosh ese wa. Pilato tö iché:

—I' dör wëm e'. A' tö isaú.

<sup>6</sup> Mik sacerdotepa wökirpa ena Skëköl wé shkëkipa tö Jesús sué, etá ie'pa tö iché aneule:

—¡Iwötówa krus mik! ¡Iwötówa krus mik!

Pilato tö iché ie'pa a:

—Ye' kè wa ì ttè kune ie' kî, e' kuekî itsúmine, iwötówa a' wákpa tö krus mik.

<sup>7</sup> Judiowak wökirpa tö iché ie' a:

—Sa' wa ttè dalöiëno tso', e' tö ichè ie' kawóta ttèwa, ie' e' ye' tö ie' dör Skëköl Alà e' kuekî.

<sup>8</sup> Mik e' ttsé Pilato tö, etá ie' kî suane taië. <sup>9</sup> Ie' míane u shua ta Jesús a ichakéitö:

—¿Wé be' datse?

Erë Jesús kè wa iütëne yës. <sup>10</sup> Pilato tö iché ie' a:

—¿Íók be' kè ttò ye' ta? ¿Be' kè wa ijcher tö ye' a kawó tso' be' wötówa krus mik ö be' omine?

<sup>11</sup> Jesús tö iüté:

—Skëköl kè wa kawó meule be' a, e'ma be' kè a wës ye' onuk. E' kuekî wépa tö ye' me'ttsa be' ulà a, e'pa kî inuí tso' be' tsata.

<sup>12</sup> Etá Pilato tö ibikeitséka taië tö wës ie' a Jesús armimine, erë judiowak tö iché ie' a aneule:

—Be' ie' émine, e' ta be' mía romawak wökir kibi e' bolökíe. Wé e' chò tö ie' dör blu', ese dör se' wökir kibi e' bolök.

<sup>13</sup> Mik e' ttsé Pilato tö, etá Jesús tsuk patkéitö u'rkî. E' ukuökî ta ie' e' tkéser s'shulo kulé kî. E' atë uitö kî kiè hebreoie Gabatá eë (e' wà kiane chè uitö yöule ák wa). <sup>14</sup> E' dör Judiowak Yépa Yërulune Egipto e' kéwö tkö'weke e' chki es, diwö

detke bata a ekkë. Etá Pilato tö iché ie'pa a:

—¡I' dör a' blú!

<sup>15</sup> Erë ie'pa tö iché aneule:

—¡Ittówa! ¡Ittówa! ¡Iwötówa krus mik!

Pilato tö ie'pa a iché:

¿Ima a' ibikeitsè tö ye' tö a' blú ttèwami?

Sacerdotepa wökirpa tö iüté:

—Sa' blú eköl è, e' dör romawak wökir kibi.

<sup>16</sup> Etá ie' tö iwé Jesús ta wës ie'pa kî ikiane es. Ie' tö imétsa inippökwakpa ulà a wötéwa krus mik ta ie'pa wa imítser.

### Jesús wötéwarakitö krus mik

(Mateo 27.32-44; Marcos

15.21-32; Lucas 23.26-43)

<sup>17</sup> Etá Jesús e' yétsa Jerusalén, krus kueramiitö michoë ká kiè S'wökirdiche eë (ká e' kiè hebreoie Gólgota). <sup>18</sup> Eë ie'pa tö iwöté krus mik. Nies wépa böi sulusipa wöténe krus mik wíkë iö'kë, Jesús atë ie'pa shushäë. <sup>19</sup> Pilato tö ishtök patké kaltak kî, e' batséwarakitö Jesús krus mik. Ikitule e' tö ichè: “I' dör Jesús Nazaret wak dör judiowak blú e'.”

<sup>20</sup> Wé ie' wötéwarakitö krus mik, e' atë Jerusalén tsinet, e' kuekî taië judiowak tö ikitule e' sué. Ikitule ttè mañatökicha wa: hebreoie, latinie ena griegoie. <sup>21</sup> E' kuekî judiowak sacerdotepa wökirpa tö iché Pilato a:

—Kè ishtar tö ie' dör judiowak blú. Ishtö tö ie' e' chò tö ie' dör judiowak blú.

<sup>22</sup> Erë Pilato tö iüté:

—Ì shtétke ye' tö, e' shtétkeyö, iméat-tkeyö es.

<sup>23</sup> Roma nippökwakpa tö Jesús wötéwa krus mik, e' ukuökî ta ie'pa tö idatsi' blatélor ie'pa tkél a. Erë Jesús datsi' batsië e' atë. Datsi' e' yöule alabo, <sup>24</sup> e' kuekî ie'pa tö iché ñi a:

—Kè se' tō ijchëlor. Mishka inuk ákwōla wa isuoie tō yi ulà a iatmi.

Es itka wes itso' kitule Skëköl yëkkuö kī es, e' tō ichè: “Ye' datsi' blabatsélor ie'pa tō ñi a, tã inérak ákwōla wa isuoie tō yi ulà a ye' datsi' batsië e' atmi.”<sup>‡</sup> Es Roma ñippökwakpa tō iwé.

<sup>25</sup> Krus o'mik Jesús mì ena imila ena María dör Cleofás alaköl ena María Magdala wak e'pa iëter. <sup>26</sup> Mik Jesús tō imi ena ittökata dalër taië ie' éna, e'pa sué iëter ee, etã ichéitō imi a:

—A tayë, se be' alà dur.

<sup>27</sup> Etã ie' tō iché ttökata ñe' a:

—Se be' mì dur.

Es ittökata ñe' wã Jesús mì mítser kkö'nè ie' u a.

### Jesús duowa

(Mateo 27.45-56; Marcos 15.33-41; Lucas 23.44-49)

<sup>28</sup> Jesús wã ijcher buaë tō ì uk ie' dë'bitu, e' wakaneone. Ñies ttè kitule Skëköl yëkkuö kī, as e' wà tkò, e' kuëkī ie' tō iché: —Ye' er sine.

<sup>29</sup> Etã ee tka' tkër, e' a vino shkòshkòë tso'. E' wa ie'pa tō suiyök nuwéka, tã itkéka kal kiè hisopo, ese ulatska kī, tã itkéwã ie' kkò a. <sup>30</sup> Ie' tō ikuyé tã ichéitō:

—Ì kòs uk ye' dë'bitu, e' wakaneonetke.

E' ukuökī tã ie' e' wöéwa tã iwiköl émitō, es iduowa.

### Jesús nu tkéraitō ichane a kuaböt wa

<sup>31</sup> Kawö e' wa, judiowak e' katablöke Ie'pa Yépa Yërulune Egipto e' kéwö tk'wëkerakitō bule es, e' yöki. Bule es e' dör eno diwö. Erë eno diwö e' bat-seitseke taië shutë ie'pa tō, e' kuëkī ie'pa wökirpa kè kī ikiane tō pë' wötëulewã

krus mik, esepa nu mèat dò bule es. E' kuëkī ie'pa tō ikié Pilato a tō itu' puklor patkó as iduölur bet tã inú öwarakitō iski wötëwã. <sup>32</sup> Etã Roma ñippökwakpa mía, tã wëm kewe e' tu' péwã, e' ukuökī tã ñies iëköl wötënewã Jesús tã krus mik, e' tu' péwã. <sup>33</sup> Erë mik ie'pa de Jesús ska', etã ie'pa tō isuë tō iduowatke. E' kuëkī ie'pa kè wã itu' panewa.

<sup>34</sup> Erë ñippökwak eköl, e' tō Jesús nu àr e' tké kuaböt wa ichane a tã pé ena di dettsã. <sup>35</sup> E' kòs tka, e' sué ye' tō ye' wák wöbla wa, e' chök ye' tso' a a. Ì chekeyö, e' dör moki. Ye' wã ijcher tō e' dör moki. Ipakekeyö a' a as a' erblò ie' mik. <sup>36</sup> E' kòs tka as ì tso' kitule Skëköl yëkkuö kī e' wà tkò, e' tō iché: “Ie' diché kè parpawã yës.”<sup>¶</sup> <sup>37</sup> Ikitule skà tō iché: “Ie' tkëule kuaböt wa, e' suëraë ie'pa tō.”<sup>§</sup>

### Jesús nu wötëwã ie'pa tō pö a

(Mateo 27.57-61; Marcos 15.42-47; Lucas 23.50-56)

<sup>38</sup> E' ukuökī tã wëm de eköl kiè José Arimatea wak, e' dör Jesús klé eköl, erë ie' suane judiowak wökirpa yöki, e' kuëkī ie' dör iklé eköl kè jcher yi wã ese. Ie' tō Pilato a kawö kié Jesús nu tsukmi blè. Pilato tō ie' a ikéwö mé, etã ie' mía tã Jesús nu mítser iwã. <sup>39</sup> Nicodemo dë'rö ttök Jesús tã nañewe, e' wák debitu José tã. Kapöli tso' s'nu patioie as kè inurwã bet, e' debitu Nicodemo wã dò kilo dabom mañayök (30) ekkè. Kapöli e' shutule kiò masmas kiè mirra ena áloe ese wa. <sup>40</sup> Ie'pa bül tō Jesús nu patrëwã datsi'tak batsië bua'buwa saruru nuulekã kapöli e' wa wes judiowak wöblar es. <sup>41</sup> Wé Jesús du'wã krus mik, ee tsinet kal klò tso' tkëule. E' a ákuk tso' biule et s'nu blóie, erë kam s'nu blëria. <sup>42</sup> Pö e' atë tsinet wé Jesús dunewã ee, ñies judiowak eno

<sup>‡</sup>19:24 Salmo 22.18

<sup>¶</sup>19:36 Salmo 34.20

<sup>§</sup>19:37 Zacarías 12.10

diwö dökette, e' kuëki ie'pa tö Jesús nu blé ee.

### Jesús shkenekane

(Mateo 28.1-10; Marcos 16.1-8; Lucas 24.1-12)

**20** Eno diwö, e' bule es bla'mi, ká ià ttsetseë tá María Magdala wak mía wé Jesús nu bléne ee. Ie' tö isué tö ák wa ákuk kkò wötëule, e' sinettsá bánet. <sup>2</sup>Ie' tunemi bet wé Simón Pedro ena Jesús ttökata skà tso' ee. Ittökata e' dalëritsök ie' bak tajë. Tá ichéitö ie'pa a:  
—Yile wá Skëképa nu minetsër! ¡Kë sa' wá ijcher tö wes ie'pa tö iwé!

<sup>3</sup>Ie'pa míyal pö a. <sup>4</sup>Ie'pa bül tunemirak, erë Jesús ttökata ñe' tunemi bet Pedro tsata, e' kuëki ie' demi kewe pö a. <sup>5</sup>Eë ie' e' wöéwa tá iká sué ákuk shuá. Jesús nu kè ku'. Ie' tö datsi' wa Jesús nu parratëwá e' è sué, erë kè ie' minewá ákuk a iweblök. <sup>6</sup>Ie' itöki Simón Pedro debitu míwá ákuk a tá ñies e' è suéitö. <sup>7</sup>Ñies datsi'tak wa Jesús wökir monewá, e' suéitö wörrat tër bánet. <sup>8</sup>Jesús ttökata de kewe, e' míwãnak ákuk a tá isuéitö tá ikló'wéitö tö mokí Jesús shkenekane. <sup>9</sup>Kam ie'pa éna iwá arwá tö Jesús kawötá shkenukkane wes ikitule Skëköl yëkkuö kí es. <sup>10</sup>E' ukuökí tá ittökatapa bül míyalne wé ikapökerö ee.

### María tö Jesús sué shkeulekane

(Marcos 16.9-11)

<sup>11</sup>María iü dur ákuk kkò a. Ie' iukeia tá ie' e' wöéwa ká sauk ákuk a. <sup>12</sup>Etá Skëköl biyöchökwakpa suéitö bül idatsi' saruruë, e'pa tulur wé Jesús nu bak tër ee. Eköl tkër wé iwökir bak tër ee, iëköl tkër wé iklö bak tër ee. <sup>13</sup>Ie'pa tö María a ichaké:

—A tayë, ¿ì iëitseke be' tö?

Ie' tö ie'pa iütë:

—Ye' Këképa nu minetsër yile wá. Kë ye' wá ijcher tö wes ie'pa tö iwé.

<sup>14</sup>E' wöshá tá María wötrée tá eë Jesús dur. Ie' tö isué erë ie' kè wá isunewá tö Jesús idir. <sup>15</sup>Jesús tö ie' a ichaké:

—A tayë, ¿ì iëitseke be' tö? ¿Yi yuleke be' tö?

María tö ibikeitsé tö eë idur e' dör kal klò tso' tkëule, e' kanëukwak, e' kuëki ie' tö iché ie' a:

—A këképa, be' wá iminetsër, e' tá ichó ña wé be' tö iblé, as ye' mi' itsuk.

<sup>16</sup>Etá Jesús tö iché ie' a:

—¡A María!

Tá María e' wötrée tá ichéitö ie' a hebreoie:

—¡Rabuni! (e' wá kiane chë: "S'wöbla'ukwak")

<sup>17</sup>Jesús tö iché ie' a:

—Ye' ówa. Kam ye' mi'ka ye' Yé ska', e' kuëki kè ye' wöklö'wariá. Erë be' yú ichök ye' ttökatapa a tö ye' mi'kekane ye' Yé ska', e' dör a' Yé ñies. Ie' dör ye' Këköl, a' Këköl ñies.

<sup>18</sup>Etá María Magdala wak mía Jesús ttökatapa ska', tá ichéitö: "Ye' tö Skëképa sué." Ñies ì kos ché Jesús tö ie' a, e' pakéneitö Jesús ttökatapa a.

### Jesús e' kkaché ittökatapa a

(Mateo 28.16-20; Marcos 16.14-18; Lucas 24.36-49)

<sup>19</sup>Eno diwö, e' bule es nañewe tá Jesús ttökatapa tulur ñita u etkue è a. Ie'pa suane judiowak wökirpa yöki, e' kuëki ie'pa u wékkö wötë'tkër darërë. Erë e' bet tá ie'pa tö isué tö Jesús de dur ie'pa shuá. Ie' tö ie'pa shké'wé ttë i' wa:

—¡A' senú bèrè!

<sup>20</sup>Mik e' ché one tá ie' tö iulà ena ichane shká'ule, e' itö kkaché ie'pa a. Etá ittökatapa ttsë'ne buaë tö Skëképa suéne ie'pa tö ttsë'ka. <sup>21</sup>Ie' tö iskà ché ie'pa a:

—¡A' senú bèrè! Wes ye' Yé tö ye' patké'bitü ká i' a ie' ttë pakök, es ye' tö a' patkémi ye' ttë pakök.

<sup>22</sup>Ie' tö ie'pa wöiké siwá' wa tá ichéitö ie'pa a:



—Wiköl Batse'r kiówa buaë a' tò a' er a. <sup>23</sup>Yi kî íyi sulu nuí tso', ese olo'yé a' tò, e' ta ñies Skëköl tò ilo'yeraë iki. Yi kî íyi sulu nuí tso', ese kè olo'yane a' wa, e' ta ñies Skëköl kè tò ilo'yepa iki.

### Tomás tò Jesús suéne ttsë'ka

<sup>24</sup>Jesús ttökatapa dabom eyök kî böl (12), e' eköl kiè Tomás, e' kiè ñies Dídimó. Ie' kè ku' imalepa ta mik Jesús dë'dur ie'pa shua eta.

<sup>25</sup>E' kueki ie'pa tò iché ie' a:

—Sa' tò Skëképa sué.

Erë Tomás tò ie'pa a iché:

—Ye' kè wa iulà shka'ule clavo wa, e' itò sune, ye' kè wa ye' wák ulatska patkënewá itò a, ye' kè wa ye' ulà patkënewá ichane shka'ule e' a, e'ma ye' kè tò yi ttè klö'wepa yës.

<sup>26</sup>Ká de paköl, eta Jesús ttökatapa skà iënene iu a, eta Tomás tso'ñak ie'pa ta. U wëkkö wötë'tkër, erë Jesús skà dedurne ie'pa shua, ta ichéitö ie'pa a:

—¡A' senú bèrè!

<sup>27</sup>E' ukuökî ta ichéitö Tomás a:

—Be' ulatska patkówa ye' ulà shka'ule a, eta isaú. Be' ulà patkówa ye' chane shka'ule e' a. Kè ibikeitsaria bötböt. ¡Iklö'ú!

<sup>28</sup>Eta Tomás tò iüté:

—¡Be' dör ye' Blú! ¡Be' dör ye' Këköl!

<sup>29</sup>Jesús tò iché ie' a:

—Be' ye' sué, e' kueki be' erblé ye' mik. Erë wépa erblé ye' mik, eré kè iwá ye' sune, jayëcha buaë esepa!

### Yëkkuö i' wà dör i' es

<sup>30</sup>Ì kè or yi a ese o' taië Jesús tò ittökatapa wörki ikkachoie tò yi dör ie', ese kibiie kè kitule yëkkuö i' kî. <sup>31</sup>Erë yëkkuö i' shtekeyö as a' tò iklö'ù tò Jesús dör Skëköl Alà pairine'bitü idi' wa s'blúie e'. Ñies ishtekeyö as sene michoë dò a' ulà a, a' erblö ie' mik e' wa.

### Ittökatapa kul tò Jesús suéne ttsë'ka

**21** E' ukuökî ta Jesús e' kkachéne ittökatapa a batsöri kiè Tiberias, e' kkömik. E' pakè dör i' es: <sup>2</sup>Ittökatapa ñi dapa'wé ee, e'pa dör Simón Pedro, Tomás (e' kiè ñies Dídimó), Natanael (e' dör ká kiè Caná ate Galilea e' wak), Zebedeo ala'r böl tso'ñak, ñies Jesús ttökatapa skà böl tso'ñak. <sup>3</sup>Simón Pedro tò iché ie'pa a:

—Ye' mía nima klö'uk kla' wa.

Ie'pa tò iüté:

—Sa' mi'keñak be' ta.

Eta ie'pa míyal ta ié' iékarak kanò a. Erë e' nañewe ie'pa kè wa nima klöone yës. <sup>4</sup>Mik ká ñirketke, eta Jesús demi batsöri kkömik, erë ittökatapa kè wa ijcher tò ie' idir. <sup>5</sup>Ie' tò ie'pa a ichaké:

—A wëpa, ¿a' nima klöne?

Ie'pa tò iüté:

—Au, kè sa' wa iklöne yës.

<sup>6</sup>Eta ie' iché:

—A' kla' uyó ulà bua'kka kke, eta nima klördaë.

Eta ie'pa tò iuyé ta iwà klöne taië, kè dë'kaia ie'pa kî. <sup>7</sup>Eta ittökata dalër taië ie' éna, e' tò iché Pedro a:

—¡Skëképa Jesús idir!

Mik Simón Pedro tò ittse tò Skëképa Jesús idir, eta bet idatsi' iékanéitö, ie' dur kiparuó è mik kaneblök e' kueki. Eta ie' e' ppée di' a ulaiklémi dòmi Jesús ska'. <sup>8</sup>Jesús ttökatapa malepa wa kanò datse batsöri kkömik, kla' wà deka chië, e' kueratse enaena. Ie'pa tso' kukuie batsöri kkò a, cien metro ekkë, e' kueki ie'pa tò kla' kueratse. <sup>9</sup>Mik ie'pa e' yéttsa kanò a, eta ie'pa tò isué bö' ñarke, e' kî nima me'r etö. Ñies pan tso'. <sup>10</sup>Eta Jesús tò iché:

—Nima klö'wé a' tò, e' wele tsúbitü.

<sup>11</sup>Simón Pedro e' iéka kanò a ta ikla' wà deka chië nima blublu è wa, e' yéttsaitö ká sí kî. Nima döka cien eyök kî dabom skeyök kî mañatö (153). Nima

e' dör taië, erë ikla' kè butsolone. <sup>12</sup> Jesús tō ie'pa a iché:

—A' shkó chkök.

Ie'pa wa ijcher tō Skëképa Jesús idir, e' kueki ie'pa kè wa ie' a ichakine tō ¿be' dör yi? <sup>13</sup> E' ukuöki ta ie' mia bö' kkömik ta pan ena nima kló'wéitō blaté méitō ittökatapa a.

<sup>14</sup> I' ta mañatökicha Jesús e' kkachéne ittökatapa a ishkenekane e' ukuöki.

### Jesús tté Pedro ta

<sup>15</sup> Ie'pa chké one ta Jesús tō ichaké Simón Pedro a:

—A Simón, Juan alà, ¿be' éna ye' daléne, ye' ttökatapa malepa éna ye' dalër, e' tsata?

Pedro tō iüté:

—A Këképa, be' wa ijcher tō be' daléne ye' éna.

Jesús tō iché ia:

—E'ma wépa dör ye' icha, esepa kkö'nú ña buaë wes obeja kkö'nukwakpa tō iobejala kkö'neke buaë es.

<sup>16</sup> Jesús tō iskà chakéne:

—A Simón, Juan alà, ¿be' éna ye' daléne?

Pedro tō ie' a iché:

—A Skëképa, be' wa ijcher tō be' daléne ye' éna.

Jesús tō iché:

—E'ma wépa dör ye' icha, esepa kkö'nú ña buaë wes obeja kkö'nukwakpa tō iobejala kkö'neke buaë es.

<sup>17</sup> Jesús tō Pedro a iskà chakéne i' ta ide mañatökicha.

—A Simón, Juan alà, ¿be' éna ye' daléne?

Jesús tō Pedro a ichaké mañatökicha, e' kueki Pedro erianeka. Ie' tō Jesús iüté:

—A Skëképa, i' kos jcher be' wa. Be' wa ijcher tō be' daléne ye' éna.

Jesús tō ie' a iché:

—E'ma wépa dör ye' icha, esepa kkö'nú ña buaë wes obeja kkö'nukwakpa tō iobejala kkö'neke buaë es. <sup>18</sup> Moki ye' tō be' a iché tō mik be' bak duladula, etā be' wák e' paiöke ena be' mi'ke wé be' wák shkak ee. Erë mik be' dewa wökela siarëla, etā be' ulà shulöraë ta o'ka tō be' ki datsi' ieraë ta be' tseramiitō wé be' kè shkak ee.

<sup>19</sup> Ttè e' wa Jesús tō iwaché Pedro a tō wes ie' duörawa, e' wa ie' tō Skëköl kikeraka. E' ukuöki ta Jesús tō iché ia:

—Be' e' tkówa darërë ye' ttökataie kekraë.

### Ittökata dalër taië Jesús éna, e' pakè

<sup>20</sup> Pedro e' wötrée tō isué tō Jesús ttökata dalër taië ie' éna, e' datse ie'pa itöki. Mik Jesús ttökatapa bata chka' ie' ta, etā ittökata e' e' tkéser tkër Jesús o'mik ta ie' a ichakéitō, “A Skëképa, ¿yi tō be' wömerattsä?” <sup>21</sup> Mik Pedro tō isué Jesús ttökata e' datse ie'pa itöki, etā ie' tō Jesús a ichaké:

—A Skëképa, be' ttökata datse se' itöki ¿i tkömi e' ta?

<sup>22</sup> Ie' tō iüté:

—Ye' ki ikiane tō ie' at ttsë'ka dò mik ye' döne ekkë, e' ta ¿wes e' de be' yöki? Be' e' tkówa darërë ye' ttökataie kekraë.

<sup>23</sup> Ttè e' kueki Jesús ttökata e' tté tineka iyamipa shua, tō kè iduöpawa. Erë Jesús kè wa iyéne tō kè iduöpawa. É ie' tō iché: “Ye' ki ikiane tō ie' at ttsë'ka dò mik ye' döne ekkë, e' ta ¿wes e' de be' yöki?”

<sup>24</sup> Jesús ttökata e' tso' tté i' pakök a' a, e' tso' tté i' shtök yëkkuo' i' ki. Sa' wa ijcher tō tté i' dör mokië.

<sup>25</sup> Jesús tō i' skà o' taië, e' kos shtëpa yëkkuo' ki, e'ma ye' ikló'wé tō yëkkuo' kitule e' kos kè chöpaka ká i' a.

## Ì ɔ' Jesús ttekölpa tsá e'pa tò e' pakè

### Hechos

Yèkkuò i' dör yèkkuò skà kit Lucas tò Teófilo a e', i' ta ide böt. Itsá kite ie' a e' dör ì ɔ' Skèkèpa Jesús tò e' pakè. Ie' mine'ka ká jài a e' ukuökì ta ì kí ɔ' ie' tò ká i' kì ittekölpa tsá e'pa wa Wiköl Batse'r batamik, e' pakè Lucas tò yèkkuò i' kì.

Kam Jesús mi'kane ká jài a e' yökì ie' tò ittekölpa tsá e'pa patké ttè i' wa: Mik Wiköl Batse'r de a' kì, età ie' tò diché meraë a' a ye' ttè pakoie. A' miraë ipakök s'tso' kos Jerusalén e'pa a. Nies ipakeraë a' tò s'tso' Judea ká malepa a ena Samaria ena ká wa'ne dò wé íyök erkerò ee. E' tso' kitule yèkkuò i' kì 1.8 ee. E' ukuökì ta ì ɔ' Skèköl tò Pedro wa Jerusalén ena Judea ká malepa ena Samaria e' tté tso' kitule yèkkuò i' kì.

E' ukuökì ta Pablo tò Jesús tté buaë paka' ká taië wakpa a e' tté kit Lucas tò yèkkuò i' kì. Yèkkuò i' wa Lucas tò se' a ikkachè tò Jesús dör sulitane tsatökkwak.

Lucas bak s'kapeyökwakie. Iekkè ta ká kos wé Pablo dè'rò ee Lucas mir ie' ta. E' kuekì Lucas tò isu' iwák wöbla wa tò wes Skèköl kanèblè' Pablo wa. E' tté tso' kitule yèkkuò i' kì.

### Skèköl tò iWiköl patkeraë

**1**<sup>1-2</sup> A kèkè Teófilo, ì ɔ' Jesús tò ena ì wa s'wöbla'itò kuaë dò mik imineka ká jài a, e' kos paka' ye' tò be' a yèkkuò tsá kityò e' kì. Kam ie' mi'kane ká jài a, e' yökì ì kiane ie' kì tò ittekölpa tsá shükít-bakitò, e'pa tò iwè, e' uk ie'pa kéitò Wiköl Batse'r wa. <sup>3</sup>Ie' kötewà shkenekane, e'

ukuökì ta ie' wák e' kkayène taië ie'pa a döka ká dabom tkéyök (40) ekkè. Es ie' tò ie'pa a ikkachè tò mokì ie' tso'ne ttsè'ka. Nies ie' tò ì blúie Skèköl tso' e' tté paké ie'pa a. <sup>4</sup>Ká et ta ie' tso' ittekölpa tsá e'pa ta, ta ichéitò iarak:

—A' kè kàne e' yöktsa Jerusalén. Ye' Yé kablè' iWiköl patkók a' a yè' ye' tò a' a, e' panú dò mik ide età. <sup>5</sup>Juan tò s'wösuk di' a, erè ká kè tkòpa taië ta Skèköl tò a' ierawà iWiköl Batse'r a.

### Jesús mineka ká jài a

<sup>6</sup>Mik Jesús ttekölpa tsá ñì dapa'wéka ie' ta, età e'pa tò ie' a ichakè:

—A Skèkèpa, ì' ta be' tò se' wakpa tkekekane se' Israel aleripa, e' wökirpaie?\*

<sup>7</sup>Ie' tò iüté:

—E' kèwö kè mène a' a jchenoie. E' kèwö tso' ye' Yé wa klöuletke. <sup>8</sup>Erè mik Wiköl Batse'r de a' kì, età ie' tò diché meraë a' a ye' tté pakoie. A' miraë ipakök s'tso' kos Jerusalén e'pa a. Nies ipakeraë a' tò s'tso' Judea ká malepa a ena Samaria ena ká wa'ne dò wé íyök erkerò ee e'pa a.

<sup>9</sup>Mik ie' tò e' ché one, età ibutséka míá ká jài a ie'pa wörkì ta ichowa mò shüa kè wër ta'ia. <sup>10</sup>Ie'pa tso' ká sauk ká jài a krereë tò wes imichoká, e' dalewa bet wèpa bøl datsi' saruruë de ièter ie'pa ɔ'mik. <sup>11</sup>E'pa tò iché iarak:

—A Galilea wakpa ì'ók a' ièterìa ká sauk ká jài a? Jesús bak a' shüa e' mítser Skèköl wa. Wes a' tò isuë tò imía ká jài a, e' suë idörane ká i' kì.

### Matías atë Judas skéie

<sup>12</sup>Età Jesús ttekölpa tsá e'pa tso' Olivo kébata a, ie'pa bitéane Jerusalén. E' ñälé dör wekkè ulat kawö mène judiowak a

\***1:6 Israel aleripa e' wökirpaie:** Jesús ttekölpa tso'ia ibikeitsök tò ie' e' tkökeka Israel aleripa blúie ie'pa ká kì ta ie'pa tkekekà ie' kayuapaie.

shkoie eno diwö a ekkë.<sup>††</sup> <sup>13</sup> Mik ie'pa dene Jerusalén ta ie'pa tkaqa u etkuö ki wé ikapökerak ee. Ee itso'rak Pedro, Juan, Santiago, Andrés, Felipe, Tomás, Bartolomé, Mateo, Santiago Alfeo alà, Simón Celote, ñies Judas Santiago alà. <sup>14</sup> Ie'pa ulitane ñi dapa'uke kekraë ttök S'yé ta. Alakölpa welepa ena María, Jesús mi, ena Jesús ëlpa, e'pa tso'ñak ie'pa ta ttök S'yé ta.

<sup>15</sup> Jesús mik erblökwakpa e' dapa'uke e'pa döka cien eyök ki dabom böyök ekkë ulatök (120). E' k'ewö ska' ta Pedro e' k'eka ie'pa wörki ta ichéitö: <sup>16</sup> "A yamipa, ima Judas yë' Wiköl Batse'r tö se' blú bak David e' wa, e' wà tka wes itso' kitule Skëköl yëkkuö ki es. Judas wa pë' míne Jesús klö'ukwa. <sup>17</sup> Ta ie' bak Jesús kléie wes se' es, ie' bak kaneblök Jesús ta wes se' es. <sup>18</sup> (Ie' tö ì sulu wamblé', e' ské wa ie' tö ká tué et. E' ukuöki ta ie' anebitu wöwakköt ñawi tskinewa ta inattse yerulune. <sup>19</sup> Mik Jerusalén wakpa tö ttë e' ttsé, eta ká e' kiè mékarakitö iwákpa ttë wa Hacéldama e' wà kiane chë S'pé Ké). <sup>20</sup> Es itso' kitule Skëköl yëkkuö kiè Salmo e' ki e' tö iché i' es: 'As ie' u weir ñies as kè yi seria e' a."<sup>‡‡</sup> Ñies ichéitö: 'O'ka múka iskéie ie' kanè méat e' kanéukne."<sup>¶¶</sup>

Es itso' kitule Skëköl yëkkuö ki. <sup>21</sup> "Wëpa tso' íe e'pa manetwa se' ta kekraë Jesús bakia se' shua eta. <sup>22</sup> Mik Juan tö Jesús wösuk e' kos ta ie'pa tso'ñak se' ta dö mik Jesús minea ká jai a eta. Se' kawöta wëpa ekkëpa shushtök

eköl se' k'íe as itö Jesús shkënekane, e' tté pakò se' ta."

<sup>23</sup> Es ie'pa tö wëpa shushté böi. Eköl kiè José, e' kiè Justo ñies. E' kkabata dör Barsabás. Iëköl kiè Matías. <sup>24</sup> Eta ie'pa tö ikié S'yé a i' es: "A Skëköl, be' wa sulitane er suule buaë. E' kueki ikkachó sa' a wéne shushté be' tö <sup>25</sup> as iat Jesús ttekölpa tsá e' k'íe Judas skéie. Judas e' wamblé sulu, e' kueki ie' tö kanè e' méat ta imía weinuk wé ikawöta weinuk ee."

<sup>26</sup> Eta ie'pa iné isuioie tö wëpa böi shushtétke ie'pa tö e' wéne kiè dömittsa. Eta Matías kiè dettsa. Es ie' ate Jesús ttekölpa tsá e' k'íe imalepa döka dabom eyök ki eköl (11) e'pa ta.

**Wiköl Batse'r de Jesús mik erblökwakpa ki**

**2** Mik Pentecostés k'ewö<sup>§§</sup> de, eta Jesús mik erblökwakpa kos tso' dapaule ek tsinjé ème. <sup>2</sup> E' bet ta ká jai a ì blane taië wes siwa' darëréë es, e' blane u shu kos a wé ie'pa tso' ee. <sup>3</sup> Eta ie'pa tö isué tö idebitu taië ku'ie bö' wörkua suë, e' ane ie'pa ulitane ki et et. <sup>4</sup> Eta ie'pa a Wiköl Batse'r iënewa ta eköl eköl ttëmi ká banet wakpa ttö wa kua'ki kua'ki wes Wiköl Batse'r tö ie'pa ké ttök es.

<sup>5</sup> E' k'ewö ska' ta judiowak tö Skëköl dalöieta' datse ká ulitane ki, esepa tso' taië Jerusalén. <sup>6</sup> Mik ie'pa tö Jesús mik erblökwakpa aláneka taië e' ttsé, eta ie'pa e' dapa'wéka ikí ttsök bua'ie. Ie'pa tö ittse eköl eköl iwákpa ttö wa kua'ki kua'ki es. E' kueki ie'pa tkinewa taië. <sup>7</sup> Ie'pa wökranewa ta ichéraitö ñi a:

<sup>††</sup>1:12 *shkoie eno diwö a ekkë*: E' dör kilómetro etk ulatök.

<sup>‡‡</sup>1:20 Salmo 69.25

<sup>¶¶</sup>1:20 Salmo 109.8

<sup>§§</sup>2:1 *Pentecostés k'ewö*: Pentecostés wà kiane chë Ká Dabom Skeyök k'ewö. Judiowak tö Ie'pa Yépa Yerulune Egipto e' k'ewö tkö'wé one, e' ki ká de dabom skeyök, eta kawö ská tkö'weke ie'pa tö e' kiekerakitö Pentecostés. Ñies e' k'ewö kièraitö Iyiwö Shtök K'ewö. Kawö e' dör wéstela choie Skëköl a iyiwö kite e' ki. Éxodo 23.16 saú.

—¿A'ka ie'pa kè dör Galilea wakpa tso' ttök? <sup>8</sup>¿Wes se' ulitane tso' ittök tö ie'pa ttöke se' ulitane ttò kua'ki kua'ki wa? <sup>9</sup>Íe se' shuá se' tso' datse Partia, Media, Elam, Mesopotamia, Judea, Capadocia, Ponto, Asia, <sup>10</sup>Frigia, Panfilia, Egipto ena ká tso' Libia ate tsinet Cirene kke. Nies pè' datse Roma serke íe esepa tso' íe. <sup>11</sup>Se' welepa dör judiowak chökle. Welepa kè dör es, esepa e' yöbak judiowakie. Nies se' tso' íe datse Creta ena Arabia. Erè ì kos kaneö' Skèköl tö buaè e' chök ie'pa tso' e' ane buaè se' éna se' wákpa ttò kua'ki kua'ki e' wa.

<sup>12</sup>E' kueki ie'pa ulitane wökrarulune taiè ikittök. Ie'pa wöa ká chowa. Ie'pa ñi chakerak:

—Íyi ikké, ¿ima e' wà kiane chè?

<sup>13</sup>Erè welepa tö Jesús mik erblök-wakpa wayué sulu ta' icherakitö:

—Ie'pa tteke blo' tö.

### Pedro tö ttè paké

<sup>14</sup>Etá Pedro e' duéka shkè'ka Jesús ttekölpa tsá malepa döká dabom eyök kí eköl (11), e'pa ta. Ie' tö iché sulitane a' aneule: “A yamipa judiowak, ñies a' ulitane serke Jerusalén. Íyi ikké e' wà pakekeyö a' a. Ye' ttò ttsó buaè a' tö.

<sup>15</sup>Sa' kè tteku' blo' tö wes a' tö ibikeitsè es. Erpa diwö de sulitu (9) bla'mi, diwö ikké kè yi e' ttötá'ka blo' wa. <sup>16</sup>Erè ì tköke sa' ta, e' dör wes Skèköl tteköl kiè Joel, e' tö iyè'atbak es. Ie' tö iyè'at i' es:

<sup>17</sup>‘Skèköl tö ichè tö mik ká i' erkewatke, etá ye' tö ye' Wiköl patkeraè sulitane kí. E' kueki a' ala'r, wèpa ena alakölpa, ekkèpa kos ttöraè wes ye' ttekölpa es.

A duladulapa a' ilè kkayërdaè kabsueie ie'pa kè ku' kapökwa e' dalewa.

Ñies a' kèkèpa a' ilè kkayërdaè kabsuè a.

<sup>18</sup>Ñies e' kèwö ska' ta ye' Wiköl patkeraèyö

ye' kanè mésopa kí, wèpa ena alakölpa. Es ie'pa tö ye' ttè pakerane imalepa a.

<sup>19</sup>Ká jai a ye' tö íyi taiè suluè kkacheraè, kè suule a' wá ese.

Ká i' kí ñies íyi kkacheraèyö as a' isaù: s'pé sueraè a' tö, bö' sueraè a' tö, shkle taiè sueraè a' tö ñies.

<sup>20</sup>Diwö tterdawa. Si'wö iardawa batsè wes s'pé es.

E' kos tköraè kam Skèköl kèwö dò e' yöki.

Kawö e' dör buaè shute, e' olo ta' taiè.

<sup>21</sup>E' kèwö ska' ta yi kos tö e' tsatkè kiè Skèköl a,

esepa ulitane tsatkërdaè.”\*

Es Joel tö iyè'at.

<sup>22</sup>“A Israel aleripa, ye' ttò ttsó. A' wá ijcher tö mik Jesús Nazaret wak sene' ká i' kí, etá ì kè or yi a ese wéitö taiè se' shuá Skèköl batamik kkayènoie. Es Skèköl tö se' a' ikkaché tö ie' tö ipatkè'.

<sup>23</sup>Erè Jesús menetsa a' a' klö'wèwa wes Skèköl tö isulet'atbak kuaè es, ñies wes ie' kí ikiane es. A' tö wèpa sulusipa ké ie' ttökwa wötèulewa krus mik. <sup>24</sup>Ie' weine siarè ie' kòtewa, erè Skèköl tö ie' shkeo'kane. Duewa kè a' ie' wöklöne yès.

<sup>25</sup>E' kueki ká iaiáè blu' David ut Skèköl ta' ima Jesús ttömi e' yè'itö i' es:

‘Ye' wá ijcher tö kèkraè be' tso' ye' ta.

Be' tso' ye' ta ye' ulà bua'kka ye' kimuk, e' kueki kè ì a' ye' orpa wes.

<sup>26-27</sup>E' kueki ye' ttsè'r buaè,

ye' ttsò kaneè.

Be' kè tö ye' mepaät pö a,

e' kueki ye' enuraè iwà panuk bèrè.

Ye' dör be' kanè méso batse'r e',

e' kueki be' kè tö imepaät as ye' nurwa.

<sup>28</sup>Be' tö sene michoè ñalé e' kkayè' ye' a.

Ye' tso' be' wörki, e' kueki be' tö ye' ttsè'weraè buaè.”†

Es David tö iyè'at.

\*2:21 Joel 2.28-32

†2:28 Salmo 16.8-11

<sup>29</sup>“A yamipa, ye' tō icheke a' a yēsüyēsē. Se' blú kēkē David bak ká iaiāē, e' du'wabak tã inú wötēnewā. Ie' pō tso'ia dō ikkē tã íē. <sup>30</sup>Erē David bak Skēkōl ttekōlie. E' kuēkī ie' wā ijcher tō Skēkōl kablē' ie' a iwák ttō wa ttē i' wa: 'Ye' tō be' aleri tkerakā ekōl blu'ie wes be' es.' <sup>31</sup>E' jcher David wā, e' kuēkī ie' tō Cristo shkenekane e' yē'. Ie' tō iyē' tō inú kē atuk pō a, kē inurpawā. <sup>32</sup>Es iwā tka. Skēkōl tō Jesús shkeō'kane, e' sué sa' ulitane tō sa' wákpa wōbla wa. <sup>33</sup>Skēkōl tō ie' tsémikā tã itkēkaitō iulā bua'kka dalōiērta' taiē. Ie' Yé tō iWikōl mé ie' a wes ikablē' imuk es. E' ukuōkī tã ie' tō iWikōl Bats'e'r patké sa' kī. E' sué a' tō, e' ttsé a' tō enia. <sup>34</sup>Erē David kē mine'ka ká jai a wes Jesús es. Ie' wák tō iyē'at:

'Skēkōl tō ichē ye' Kēkōl a:  
Be' e' tkōkā ye' ulā bua'kka,

<sup>35</sup>e' dalewa ye' tō be' bolōkpa merarō be' klō dikīa.<sup>‡</sup>

Es David tō iyē'.

<sup>36</sup>“A Israel aleripa ulitane. Ijchenú buaē a' wā tō ye' tso' Jesús chök. E' kōtwā a' tō wötēulewā krus mik, erē e' wák tkēkā Skēkōl tō se' wōkirie nīes se' blúie.”

<sup>37</sup>Mik ie'pa tō ttē e' ttsé, etā ie'pa eri-aneka taiē. Ie'pa tō Pedro ena imalepa a ichaké:

—A yamipa, ¿wes sa' e' ùmi?

<sup>38</sup>Ie' tō iüté:

—A' er mane'ú Skēkōl a tã a' e' wōskuōō ekōl ekōl Jesucristo ttō wa as a' nu' olo'yar a' kī. A' tō iwé es, e' tã Skēkōl tō iWikōl Bats'e'r meraē a' a. <sup>39</sup>Kablē e' dōr a' a ena a' aleripa ulitane a ena suli-tane serke ká kamiē, esepa a nīes. Kablē e' dōr wēpa kōs kieke Kēkē dōr Se' Kēkōl e' tō esepa a.

<sup>40</sup>Es ttē e' wa ena ttē skā taiē wa Pedro tō iché iarak darērē, ipatté taiē tã ichéitō iarak:

—A' e' tsatkō ì tkōraē pē' sulusipa tã e' yōkī.

<sup>41</sup>Es wēpa tō ì ché Pedro tō, e' klō'wé, e'pa wōskuérakitō. E' diwō Skēkēpa Jesús icha erule e' kī iēne taiē dōkā mil mañayōk ulatōk (3000). <sup>42</sup>Etā ie'pa e' ché ttē wa Jesús ttekōlpa tsá e'pa tō s'wōbla'weke, e' ttsök kēkraē er bua' wa. Nīes ie'pa e' ché ñi kīmuk ì tso' i' wa e' wa. Nīes kēkraē ie'pa e' dapa'uke pan ñuk Jesús kōtēwā e' kēwō tkō'woie. Nīes ie'pa e' ché ttök S'yé tã.

### Wes Jesús mik erblōkwakpa tsá e'pa ser

<sup>43</sup>Etā ì kē or yi a ese weke taiē Jesús ttekōlpa tsá e'pa tō Skēkōl batamik. E' tō pē' ulitane wōkrawé taiē. <sup>44</sup>Wēpa erblé Jesús mik e'pa kōs serke wes wák ekōl è es. Ì tso' ie'pa wā ese kakkemkerakitō ñi a. <sup>45</sup>Es íyi tso' ie'pa wā, ká ö ilē skā, ese watuēke ie'pa tō tã iské blatekerak-itō imalepa kīmē kiane esepa a. <sup>46</sup>Diwō bit tã ie'pa ulitane e' dapa'ukerak Skēkōl wé a. Nīes u a u a ie'pa chkōke ñita er bua' wa tts'rdak buaē. Jesús kōtēwā e' kēwō tkō'weke pan ñē wa ñita. <sup>47</sup>Skēkōl kīkekekā ie'pa tō. Sulitane wa ie'pa wēr buaē. Ká bit ekkē Skēkōl tō s'tsatkeke taiē, e' kuekī ie'pa kī daparke taiē.

### Pedro tō s'kraulewā ekōl e' bua'wéne

**3** Ká et tsáli diwō de mañat tã Pedro ena Juan míyal ttök Skēkōl tã iwé a. Diwō e' dōr ttoie ie' tã. <sup>2</sup>Etā eē wēm tkēr ekōl kune' klō kraulewā. E' datse iyamipa wā itkekeser kēkraē Skēkōl wé wékkō kiē Wékkō Buuala e' a as inukōl kak kiōitō sulitane dōkewā eē esepa a. <sup>3</sup>Mik ie' tō Pedro ena Juan dōkewatke e' sué, etā inukōl kak kiéitō ie'pa a. <sup>4</sup>Etā ie'pa tō ie' suēwā krereē iwō kī tã Pedro tō iché ia:

—Sa' saú.

<sup>‡</sup>2:35 Salmo 110.1

<sup>5</sup> Età ie' tò ie'pa sué tã ibikeitséitò tò ilè kakmekeitò ye' a. <sup>6</sup> Erè Pedro tò iché ia:

—Kè ye' wã inuköl tã'. Kè ye' wã oro tã'. Erè ì tso' ye' wã e' mekeyö be' a. Jesucristo Nazaret wak e' ttò wa, be' e' kóka tã be' shkó.

<sup>7</sup> Età Pedro tò iklö'wéwã iulà bua'kka tã ibatséka. E' wöshã tã iklö a idiché iène <sup>8</sup> tã itunekã e' duékãie tã ishkémi wí'kè iö'kè. E' ukuöki tã imíwã Skéköl wé a Pedro ena Juan tã iwák klò wa. Ie' turkeka, es Skéköl kikekaramiitò. <sup>9</sup> Etã pè' tso' kos e'pa tò isué tò ishkörãmi tã Skéköl kikekaramiitò. <sup>10</sup> Ie'pa tò ie' suéwã tò ie' dör wëm e' tköke inuköl kak kiök Skéköl wé wékkö kiè Wékkö Buaala e' a e'. E' tò ie'pa tkiwéwã taië. Ie'pa wökrãnewã iweblök.

### Pedro tò s'patté Skéköl wé a

<sup>11</sup> Skéköl wé e' ùle kiè Salomón ùle, ee wëm buanene e' tso'ia Pedro ena Juan paklö'uk. E' dalewa pè' kos datse tuneule wé ie'pa tso' ee tã ie'pa tkinewã taië isaük. <sup>12</sup> Mik e' sué Pedro tò, etã ie' tò ie'pa a iché: “A Israel aleripa çì kueki a' tkirke? çì kueki a' tso' sa' saük krereë wësua sa' wák tò wëm i' bua'wéne shköwéne sa' wák diché wa ö sa' serke yësyësé Skéköl a e' kueki? <sup>13</sup> Erè Skéköl dör Abraham, Isaac, Jacob ena se' yépa malepa bak kã iaiaë, e'pa Kéköl, e' tò ie' kanè méso kiè Jesús, e' kíkékã íyi ulitane tsãta, e' dör yi me'ttsã ttèwã a' tò e'. Ie' waté'ttsã a' tò Pilato wörki eré e' tò ibikeitsbak iökshka. <sup>14</sup> Jesús dör batse'r ena yësyësé warma a' tò iki' tò e' yótttsã. Erè e' skéie a' tò pè' suluë e' yöktsã ka'. <sup>15</sup> Es sene mukwak e' kötwã a' tò, erè ishkeo'kãne Skéköl tò. E' kos su' sa' tò sa' wöbla wa. <sup>16</sup> Wëm i' kraulewã e' suule a' wã buaë. Ie' diché iënene sa' erblöke

Jesús mik e' wa. Jesús mik erblè, e' tò wëm i' bua'wéne buaë a' wörki.

<sup>17</sup> “A yamipa, ye' wã ijcher tò mik a' ena a' wökirpa tò Jesús kötwã, etã a' kè wã ijcher mokì tò ì wamblök a' tso'. <sup>18</sup> Erè ì yè'atbak Skéköl tò ittekölpa ulitane kkò wa tò wé pairine'bitü idi' wa s'blúie e' kawöta ttèwã es, e' wawé Skéköl tò es. <sup>19</sup> E' kueki ì sulu watótttsã. A' er mane'ú Skéköl a as a' nuì olo'yòitò a' kì. <sup>20</sup> Etã es ie' tò a' er pableraë tã Jesús pairi'bituitò idi' wa s'blúie e' patkeraneitò se' a. <sup>21</sup> Erè i' tã ie' kawöta senuk kã jai a dò mik Skéköl tò ì kos yuéne buaë wes kenet es etã. Es Skéköl tò iyè'bak kã iaiaë ittekölpa batse'r e'pa wa. <sup>22</sup> Moisés tò Jesús ye' se' yépa bak kã iaiaë, e'pa a' i' es: ‘A' shuã Skéköl tò itteköl kerakã eköl wes ye' es. E' ttò kos dalöiö a' tò. <sup>23</sup> Wépa kè wã ie' ttò dalöiëne, esepa ulitane skerattsa se' wakpa yöki bãnet, ie'pa erdawa seraa.’”<sup>f</sup> Es Moisés tò iyè'at.

<sup>24</sup> “Es ñies Samuel ena Skéköl ttekölpa malepa dè'bitü ie' itöki, e'pa kos tò ì tköke kawö ikké tã, e' yè'atbak. <sup>25</sup> Ì uk Skéköl kablè' kã iaiaë ittekölpa wa, e' wã döraë se' ulà a. Ñies ttè me'atbakitò se' yépa bak kã iaiaë e'pa a, e' wã döraë se' ulà a. Ie' tò iyè'atbak Abraham a' i' es: ‘Be' aleripa batamik ye' er buaë chöraë kã ulitane wakpa a.’”<sup>26</sup> E' kueki mik ie' tò ilà Jesús shké'wékãne, etã ipatkéitò se' a kewe se' a er buaë choie as se' ser sulu ese olo'yösö eköl eköl.”

### Pedro ena Juan e' tsatké judiowak wökirpa wörki

**4** Etã Pedro ena Juan tso'ia s'pattök, e' shuã sacerdotepa biteshka Skéköl wé shkëkipa wökir tã ena saduceowakpa tã. <sup>2</sup> Pedro ena Juan tso' s'wöbla'uk tò Jesús kötwã e' shkenekãne. E' wa iwã kkachéitò tò s'duowã e'pa shkerdakãne. E' tò sacerdotepa ena ie'pa

<sup>f</sup>3:23 Deuteronomio 18.15,18-19

malepa uluwéka tajë. <sup>3</sup> Ie'pa tö Pedro ena Juan klö'wéwa. Ká detke tsáli, e' kueki iméarakitö s'woto wé a dö bule es. <sup>4</sup> Erë wépa tso' Pedro ttö ttsök, e'pa shua tajë ie'pa tö Jesús tté buaë klö'wé. Es Jesús mik erblökwakpa wépa è esepa deka mil skeyök e' ulatök (5000).

<sup>5</sup> Bule es ta judiowak wökirpa ena ikuéblupa ena s'wöbla'uk tté dalöiëno wa wakpa e' dapa'wéka Jerusalén. <sup>6</sup> Nies sacerdote kibi kië Anás e' tso'. Nies Caifás, Juan, Alejandro ena imalepa döer sacerdote kibi e' ditséwö e'pa kos tso'. <sup>7</sup> Ie'pa tö Pedro ena Juan tsuk patké ta iduésérak ie'pa wörki ta iwà chakéarakitö:

—¿Yi diché wa, yi ttò wa wëm klö kraulewá e' bua'wéne a' tó?

<sup>8</sup> Etá Pedro a Wiköl Batse'r iënewá tajë ta iütéitö:

—A s'wökirpa, a s'kuéblupa. <sup>9</sup> Sa' tö s'kirirke e' kime' er bua' wa, e' chaké a' tö sa' a. A' kí ikiane jchenuk tö wes ibuanene. <sup>10</sup> I'ne ta sa' tö ichè a' wörki, nies Israel aleripa ulitane e'pa wörki tö wëm i' buanene sulitane wörki Jesucristo Nazaret wak e' ttò wa. E' wák kötwá a' tö krus mik erë Skéköl tö ishkeokane. <sup>11</sup> Skéköl yëkkuö kí itso' kiture: “Ák wat'ettsa u yuökwakpa tö, e' yönene ák bua'buaië.”<sup>8</sup> Ák e' döer Jesucristo chë. <sup>12</sup> Ie' döer S'tsatkökwak. Skéköl kè wá yi skà patkéule ká i' kí s'tsatkoie. E' kueki Jesucristo eköl è wa s'tsatkërmi.

<sup>13</sup> Mik iwökirpa tö isué tö Pedro ena Juan döer skle siarla, kè wöblaule yëkkuö wa erë ittöke buaë kè suane, etá ie'pa tkinewá. Ie'pa éna ianewa tö ie'pa bak shkök Jesús ta ittökatapaie. <sup>14</sup> Wëm buanene e' dur Pedro ena Juan ta, e' kueki ie'pa kè a iyënuke tö e' döer kache. <sup>15</sup> Etá ipatkémirakitö ur'ki ta ie'pa atë ileritsök. <sup>16</sup> Ie'pa iché nì a:

—¿Wes sö wépa i' wëmi? Kos Jerusalén wakpa wa ijcher tö i' kè or yi a ese wé ie'pa tö etk. E' kè yënuke se' a tö e' döer kache. <sup>17</sup> Erë ipaunúsö as i'tami Jesús tté i' kè paköia ie'pa tö yi a, es kè itté bunukka ká wa'ne.

<sup>18</sup> Etá ikiéarakitö ta iché iarak:

—Kè a' kawö ta'ia Jesús tté pakök yi a. Nies a' kè kawö ta'ia yi wöbla'uk tté e' wa.

<sup>19</sup> Erë Pedro ena Juan tö iütérak:

—A' wákpa tö ibikeitsó tö Skéköl wá yi ttò dalöië döer buaë sa' a, a' ttò ö ie' ttò. <sup>20</sup> Erë i' su' sa' tö ena i' tse' sa' tö, e' pakerae sa' tö kekrae sulitane a.

<sup>21</sup> Etá iwökirpa tö ie'pa kí pauné darerëe ta iémirakitö. Wëm kraulewá buanene e' kueki pè kos tso' Skéköl kíkókka. E' kueki iwökirpa kè ulá dë'wá Pedro ena Juan we'ikök. <sup>22</sup> Wëm buanene Skéköl diché wa e' kí duas tso' dabom tkëyök (40) kíta.

### Jesús mik erblökwakpa tö ikié Skéköl a

<sup>23</sup> Etá Pedro ena Juan émirakitö ta imíyal wé imalepa tso' ee. I' kos yé' sacerdotepa wökirpa ena judiowak kuéblupa e'pa tö e' pakéarakitö imalepa a seraa.

<sup>24</sup> Mik e' tse' ie'pa tö, etá ie'pa ulitane kköché nita Skéköl a i' es: “A Skéköl, ká jai ena ká i' ena dayë ena i' kos tso' iki, e' yö' be' tö. <sup>25</sup> Ká iaiaë be' tö sa' kéképa David döer be' kané méso, e' ka ttök Wiköl Batse'r wa. Ie' tö iyë i' es:

‘¿Iók ká malepa wakpa uluneká tajë troká tajë Skéköl kí?

¿Iók ie'pa ileritseke nippök ie' ta? Kè e' wamblënuke ie'pa a.

<sup>26</sup> Ká wökirpa ena blu'pa e'pa ulitane nippakka ie' ta.

Ie'pa ileritseke nippök ie' ta ena wé pairi'bitüitö idi' wa s'blúie e' ta.\*\*

§4:11 Salmo 118.22

\*\*4:26 Salmo 2.1-2



Es David tö iyë'.

<sup>27</sup> “Ttè e' dör mokië. Iwà sué sa' tö tö s'wökirpa kiè Herodes ena Poncio Pilato, e'pa ñi dapa'wéka ká i' a Israel aleripa ta ena pé' kè dör Israel aleripa esepa ta ñita Jesús we'ikök. Ie' dör be' kanè méso batse'r pairi'bitu' be' tö idi' wa s'blúie e'.  
<sup>28</sup> Es ì kòs wé ie'pa tö ie' ta e' wé ie'pa tö wes be' tö isuletë'atbak es. <sup>29</sup> A Skëköl, e' kueki ie'pa tso' sa' pañuk darërëë, e' ttsó. Sa' dör be' kanè mésopa e'pa a diché kí mú Jesús tté pakoie kè suane. <sup>30</sup> Be' diché kkachó. S'kirirke bua'üne, ì kè or yi a ese ú iwà kkachoe, ñies íyi ese ú taië Jesús dör be' kanè méso batse'r e' ttö wa.”

<sup>31</sup> Mik ie'pa tö ikié one, e'ta wé ie'pa tso' e' ké wötí'ne. E'ta ie'pa ulitane a Wiköl Batse'r iënewa ta ie'pa tö Skëköl tté paké kè suane.

### Jesús mik erblökwakpa ñi kímé

<sup>32</sup> Jesús mik erblökwakpa dör taië. Ie'pa kabikeitsöke ñikkëë, ulitane er ttsë'r ñittsëë. Kè yi tö icheku' tö ie'pa íyi e' dör ie'pa è icha, e' skéie e' dör ie'pa icha ñikkëë. <sup>33</sup> Jesús ttekölpa tsá e'pa tö Jesús shkenekane, e' tté kí pakeke diché taië wa. Skëköl tö ie'pa kos kimeke taië.  
<sup>34-35</sup> Yi wa ká tso' ö ilè skà tso'rak iwa, ese watuëkerakitö ta iské mekerakitö Jesús ttekölpa tsá e'pa a blatè wépa dör siarë esepa a wes e'pa kiane kímé eköl eköl es. E' kueki kè yi weirku' siarë ie'pa shua. <sup>36</sup> Ie'pa shua wëm tso' eköl dör Leví aleri datse ká kiè Chipre, e' kiè José. Jesús ttekölpa tsá tö ikié méka Bernabé (e' kiane yëno s'pablökwak). <sup>37</sup> Wëm e' wa ká tso'. E' watuëitö ta iské méitö Jesús ttekölpa tsá a as ie'pa tö s'siarëpa kímü iwa.

### Ì sulu wamblé Ananías ena Safira e'pa tö e' paké

**5** Erë wëm bak eköl kiè Ananías, e' tayë kiè Safira. E'pa tö ká watuëttsa.

<sup>2</sup> E'ta wëm e' tö iká ské tsá yéttsa iwákpa a ta iëyök méitö Jesús ttekölpa tsá a wes ká ské sera a es. E' jcher ilaköl wa sera a.

<sup>3</sup> E'ta Pedro tö iché ie' a:

—A Ananías, ¿Iók be' e' mettsa Satanás a kitö'wè ta be' kéitö kachök Wiköl Batse'r a? Ká watuëbö e' ské kak tséatbö.

<sup>4</sup> Kam be' tö iwatuëttsa e'ta be' icha idir. Ta be' tö iwatuëttsa, e'ta iské dör be' icha. ¿Iók be' ibikeitsé wamblé es? Be' kè kayëne s'ditsö a. Be' kaché Skëköl a.

<sup>5</sup> Mik e' ttsé Ananías tö e'ta ianewa duowaie. E'ta ie'pa kos wa ijchenewa, e'pa suane taië. <sup>6</sup> E'ta duladulapa wélepa debitu ta inü patrëwarakitö tsémi blëwa.

<sup>7</sup> Hora tka mañat e' ulatök, e'ta Ananías tayë dewa Pedro ska'. Wes iwëm de e' kè jcher ie' wa. <sup>8</sup> Ta Pedro tö ie' a ichaké:

—Ichó ña. ¿Moki a' tö ká watuë kos a' tö iché ekké?

Safira tö iüté:

—Tó, ekké je'.

<sup>9</sup> Pedro tö iché ia: ¿Iók a' tö kawö mé ñi a Skëköl Wiköl wötsiriuk? Wépa wa be' wëm nu mí blëwa, se e' wakpa doyalne ta író ie'pa wa be' nu michoë blëwa ñies.

<sup>10</sup> E' bet ta Safira anewa ta iduowa Pedro klö ska'. Mik duladulapa dewa ta Safira nu tär ta ie'pa wa inü mítser blëwa iwëm o'mik. <sup>11</sup> E'ta Skëképa Jesús icha erule ulitane ena sulitane wa ijchenewa, e'pa suanerak taië.

### Ì kè or yi a ese wé taië Jesús ttekölpa tsá tö

<sup>12</sup> Jesús ttekölpa tsá e'pa tö ì kè or yi a, ese weke taië pé' shua iwà kka-choie. Jesús mik erblökwakpa ulitane e' dapa'uke Salomón üle a. <sup>13</sup> Pé' èltëpa tö ie'pa dalöieta' erë kè diché dë'ka e' tiuk-wa ie'pa shua. <sup>14</sup> Erë wépa erblé Jesús mik, wépa ena alakölpa, esepa kí iërkerak taië kekraë. <sup>15</sup> Pé' tö s'kirirke tsémirak katà shuélur ñala kkömik as Pedro tkò ta ilo mú ar esepa wele kí as ibuarne. <sup>16</sup> Nies ká tso' kos Jerusalén pamik, e'

wakpa de taijê s'kirirke wëttisë. Nies wimblupa sulusi s'tteke esepa wëttisë. Eta e'pa ulitane buanene s<sub>eraa</sub>.

**Jesús ttekölpa tsá  
wötënewa s'wöto wé a**

<sup>17</sup> Eta sacerdote kibi ena iklépa kiè saduceowakpa, e'pa ukyëneká taijê Jesús ttekölpa tsá e'pa k<sub>i</sub>. <sup>18</sup> E' kueki ikló'wéwarakitó wötéwa s'wöto wé a. <sup>19</sup> Erë nañewe ta Skéköl biyöchökwak eköl tö s'wöto wékkö ppée ta iyétsarak ta iché ia: <sup>20</sup> "A' yúne Skéköl wé a. Ee a' e' duóká sene pa'ali Jesús ta, e' tté pakök sulitane a." <sup>21</sup> Bule es bla'mi ta idewarak Skéköl wé a ta ie' kékarak s'wöbla'uk wes ie'pa a iyëne es.

Eta sacerdote kibi ena iklépa tö Israel aleripa wökirpa ulitane kiétsa e' dapa'ukká ie'pa ta. Eta Jesús ttekölpa tsá e'pa tsuk patkérakitó. <sup>22</sup> Erë mik ishkékupa demirak s'wöto wé a, eta kè iwá ikunerak. Ta idebiturak ibiyó mukne <sup>23</sup> ta ichérakitó:

—Sa' tö s'wöto wékkö kué wötéule buaë. Nies shkékupa tso'rak iwékkö kkó'nuk. Erë mik sa' tö iwékkö ppée, eta kè sa' wa yi kune ee.

<sup>24</sup> Mik Skéköl wé shkékupa wökir ena sacerdote wökir kibipa, e'pa tö tté e' ttsé eta ie'pa éna ká chowa ta ini chakérak: "¿Wes iwá dötsami?" <sup>25</sup> E' ukuök<sub>i</sub> ta bet eköl de ibiyó muk ta iché iarak:

—Wépa wöté'wa a' tö s'wöto wé a, e'pa tso'ne Skéköl wé a s'wöbla'uk.

<sup>26</sup> Eta shkékupa wökir miá iyulök ishkékupa ta. Ikló'wéwarak erë ie'pa suane dö' pé' tö s'té ák wa, e' kueki ie'pa kè wa iweineia. <sup>27</sup> Mik ideminerak eta it-sémirakitó judiowak wökirpa wörk<sub>i</sub>. Eta sacerdote kibi tö iché ie'pa a:

<sup>28</sup> —Sa' tö a' a' iyé' etkéme tö wém e' tté kè pakar yës. Eta çì wamblé a' tö? A' tö Jerusalén wakpa ulitane wöbla'weke tté e' wa. Nies a' tso' ichök tö wém e' kötëwa, e' nuí tkënewa sa' mik.

<sup>29</sup> Erë Pedro ena Jesús ttekölpa tsá malepa tö iütérak:

—Sa' kawöta Skéköl ttò dalöiök s'ditsó ttò tsata. <sup>30</sup> A' tö Jesús ttökwa ka' wötéulewa krus mik. Erë se' wakpa bak iaiaë e' Kéköl e' wák tö Jesús shkeo'kane. <sup>31</sup> Skéköl tö ibatsékami e' ska' tkéser iulá bua'kka s'wökirie ena s'tsatkökwakie as Israel aleripa er mane'ü ta ie'pa k<sub>i</sub> ie'pa nuí olo'yarmi. <sup>32</sup> Iyi ikké kos su' sa' tö e' pakök sa' tso' a' a. Nies Wiköl Batse'r mène wépa tö Skéköl ttò dalöieke esepa a, e' tso' a' a ipakök.

<sup>33</sup> Mik ie'pa tö e' ttsé eta ie'pa uluneka taijê Jesús ttekölpa tsá e'pa k<sub>i</sub>. Ie'pa éna ittakulur. <sup>34</sup> Erë ie'pa shua wém tso' eköl e' dör fariseowak kiè Gamaliel. Ie' dör s'wöbla'uk tté dalöiëno wa wakpa ese eköl. Sulitane tö ie' dalöieke taijê. Ie' e' duéka ta iché: "Jesús klépa yólur kañika ekuölö." Eta ie'pa tö iyélur.

<sup>35</sup> E' ukuök<sub>i</sub> ta ichéitö imalepa a:

—A yamipa Israel aleripa. A' isaü bua'ie tö ì weke a' tö wépa wíkképa ta. <sup>36</sup> A' éna ianú tö barbane wém kiè Teudas e' e' ka'ka ichök tö e' dör wém taijê ese. Wépa döká cien tkéyök (400) e'pa e' yué ie' klépaie. Ie' du'wa kötulewa ta iklépa pone'mi w<sub>i</sub> a diá a. Es ilone'.

<sup>37</sup> E' ukuök<sub>i</sub> ta mik s'wökirpa s'kiè shtök patkè, e' kéwö ska' ta wém skà eköl kiè Judas Galilea wak e' e' ka'ka. Pé' welepa e' yué ie' klépaie. Erë nies ie' kötëwa ta iklépa pone'mi s<sub>eraa</sub> w<sub>i</sub> a diá a ta ee ilone'. <sup>38</sup> E' kueki ye' tö iché a' a tö wépa wí múat bèrè. Kè ì sulu wamblar ie'pa ta. Ì aleritseke ie'pa tö ena ì weke ie'pa tö e' dör tté ësë, e' ta bet ta kè ita'ia. <sup>39</sup> Erë Skéköl tté idir, e' ta kè a' e' alòpaka iki. A' isaü buaë dö' a' tso' ñippök Skéköl ta.

Ie'pa tö Gamaliel ttò iüté. <sup>40</sup> Ie'pa tö Jesús ttekölpa tsá e'pa tsuk patkéne ta ippök patkérakitó ta iché iarak: "Kè a' a kawö ta'ia Jesús tté pakök." E' ukuök<sub>i</sub> ta iémirakitó. <sup>41</sup> Es Jesús ttekölpa tsá e'pa e' yélur judiowak wökirpa wé a. Skéköl

tö ie'pa mé weinuk Jesús tté kuëkj, e' tö ie'pa ttsë'wé buaë. <sup>42</sup>Es kekraë ká bit ekkë Skëköl wé a ñies u a u a ie'pa tö s'wöbla'weke s'patteke Jesús dör wé pairine'bitü idi' wa s'blúie e' tté buaë wa.

### Wëpa kul shushtérakitö Jesús ttekölpa tsá kimoie

**6** E' këwö ska' tã Jesús ttökatapa kí darpke taië e'pa dör judiowak. Ie'pa wëlepa ttöke griegoie, esepa tö imalepa ttöke iwakpaie e'pa cheke suluë. Ie'pa tö icheke:

—Mik chkè blatërke kekraë, etã sa' tayëpa schó, esepa kè a imène kos imalepa ttöke judioie esepa a imène ekkë.

<sup>2</sup>E' kuëkj Jesús ttekölpa tsá dabom eyök kí bö (12), e'pa tö Jesús ttökatapa ulitane kié e' dapa'uk tã ichéitörak:

—A yamipa, kè idör buaë sa' a s'wöbla'weke sa' tö Skëköl ttè wa e' kané mukat iyi watioie e' è kuëkj. <sup>3</sup>E' kuëkj a' shua wëpa yuló kul as kanè e' ü ie'pa tö. Wëpa suule sulitane wã tö ie'pa a Wiköl Batsë'r tso' taië ena ikabikeitsö buaë, esepa shushtó tã sa' tö ie'pa mekeka kanè ñe' uk. <sup>4</sup>Etã sa' e' ché kekraë ttök Skëköl tã ena s'wöbla'uk ie' ttè wa.

<sup>5</sup>E' wër buaë ie'pa ulitane wa. Ie'pa tö Esteban shushté. E' erblé buaë Skëköl mik ñies ie' a Wiköl Batsë'r tso' taië. Ñies Felipe, Prócoro, Nicanor, Timón, Pármegas ena Nicolás e'pa shushté ie'pa tö. Nicolás dör Antioquía wak, e' e' yö'bak judiowakie. <sup>6</sup>Etã itsémirakitö wé Jesús ttekölpa tsá e'pa tso' eë. Etã ie'pa ulá méka wëpa ñekkëpa kí tã ie'pa tö ikié S'yé a tö ikimú.

<sup>7</sup>Es Skëköl ttè kí pakanemi taië. Ñies Jesús ttökatapa kí darpke taië Jerusalén. Ñies judiowak sacerdotepa taië tö ttè mik se' erblöke e' wà klö'wé.

### Esteban klönewa

<sup>8</sup>Etã Skëköl er buaë ché Esteban a taië tã diché méitö ia' taië. E' wa i kè or yi a ese wëkeitö taië pë' shua iwà kka-choie tö Jesús tté dör mokj. <sup>9</sup>Erë wëpa wëlepa tö Esteban chémi suluë. Ie'pa wëlepa dör judiowak ñi dapa'wo wé kié Kanè Mésopa Auleshka Esepa Wé e' wakpa. (Ie'pa bak klöulewã kaneblök erë iyërulunebak.) Ñies judiowak wëlepa tso' datse Cirene, Alejandría, Cilicia ena Asia, e'pa kos wönarke Esteban kj. <sup>10</sup>Erë Wiköl Batsë'r tö Esteban a ttè mé ttoie buaë, e' kuëkj ie'pa kè a e' alirka ie' kj. <sup>11</sup>E' kuëkj ie'pa tö wëpa wëlepa patué kachök: “Sa' ittse tö Esteban tso' Moisés ena Skëköl chök suluë.” <sup>12</sup>E' wa ie'pa tö pë' uluwéka taië Esteban kj. Ñies judiowak kuëblupa ena s'wöbla'uk ttè dalöiëno wa wakpa uluwékarakitö Esteban kj. E' kuëkj ie'pa de Esteban ska' tã iklö'wëwarakitö tsémirakitö judiowak wökirpa ska'. <sup>13</sup>Ñies wëpa yulérakitö kachöie, e'pa tö iché:

—Këkraë wëm wí tö Skëköl wé dör batsë'r i' ena Moisés ttè dalöiëno e' cheke suluë. <sup>14</sup>Ñies sa' tö ie' ttsé ichök tö Jesús Nazaret wak e' tö Skëköl wé tskerawã ena sene me'at Moisés tö se' a e' mane'wëkettsaitö.

<sup>15</sup>Etã judiowak wökirpa kos tulur eë, e'pa tö isuë tö Esteban wö wër dalölöë wës Skëköl biyöchökwak wö wër es.

### Esteban e' tsatké

**7** Sacerdote kibi, e' tö Esteban a ichaké:

—Ì kj be' kkatërke ¿e' dör mokj?

<sup>2</sup>Ie' iüté: “A yamipa, a yépa, ye' ttò ttsó. Mik se' këkëpa Abraham bak iai-ä Mesopotamia, kam imi' senuk Harán, etã eë se' Këköl olo tã taië, e' e' kkayé' ie' a. <sup>3</sup>Etã ichéitö ia: ‘Be' ká ena be' yamipa, e' múat tã be' yúshka senuk, ká kkachekeyö be' a eë.’ <sup>4</sup>Es Abraham e'

yé'ttsa Caldea aṭe Mesopotamia ee, ṭa imía senuk Harán. Iyé blénewa e' ukuöki ṭa Skéköl tö ie' patké' senuk íe, wé se' serke i'ne ṭa ee. <sup>5</sup> Kuaë Skéköl kè wá ká i' mène ie' a yés, elkela wé'ia è kè ie' a imène. Eré e' kéwö ska' ṭa ie' kè ala'r ṭa', eré Skéköl kablé' ie' a ṭtè i' wa: 'Ká i' mer-aéyö be' aleripa a be' blénewa e' ukuöki ṭa.' <sup>6</sup> Nies Skéköl tö iché ie' a: 'Be' aleripa serdaé ká kuá'ki kī wés ká kuá'ki wakpa es. Ee ie'pa klördawa kanè mésoie kè patueta' ese. Iweirdarak siarè dōka duas cien tkëyök (400).' <sup>7</sup> Eré Skéköl tö iché ia: 'Ká wé wakpa tö ie'pa we'ikera, esepa ské we'ikerayö siarè. E' ukuöki ṭa ie'pa e' yóratssa ká e' a as ye' dalöiorakitö ká i' kī.' <sup>8</sup> Eta Skéköl tö iché ia: 'A' ala'r wépa kurke kos esepa tottola kkuölitla töó tsir. E' ú kekraé iwà kkachöie tö ye' tö ṭtè me' be' a.' E' kueki mik ie' alà kiè Isaac kī ká de pàköl, eta itóttola kkuölitla téeitö tsir. Es nies Isaac tö iwé ilà Jacob†† ṭa. E' sù Jacob tö iwé ila'rla dabom eyök kī böl (12), e'pa ṭa. Ie'pa dör se' dör Israel aleripa ditséwöpa dabom eyök kī böl e' yépa tsá.

<sup>9</sup> "Eré se' yépa tsá, e'pa ukyène iél tsirla kiè José e' ṭa. E' kueki ie'pa tö iwato'ttsa ṭa yi tö itué e' wá imítser Egipto. Eré Skéköl tso' ie' ṭa. <sup>10</sup> Ie' tö it-satké kekraé kos iweirke e' shua. Nies kabikeitsè buaé méitö ia. Nies ie' tö Faraón ké isauk er bua' wa (Egipto wakpa tö iblupa kos kiè Faraón). E' kueki Faraón tö ie' tkéka Egipto íyi kos e' wökirie nies ie' wák u wökirie.

<sup>11</sup> "E' ukuöki ṭa ketba aneká Egipto ena Canaán, e' kos a. E' wakpa weine siarè. Se' yépa tsá kè wá ì kune ñanoie katanoie. <sup>12</sup> Eré mik Jacob wá ijchenewa tö iyiwö tso' Egipto, eta ie' tö ila'r dör se' yépa tsá, e'pa patkemi iyiwö ṭauk ee, e' dör ie'pa tsá dè'rö. <sup>13</sup> Mik ie'pa skà dè'rö eta José tö ie'pa a iché: 'ye' dör a' èl.'

Es Faraón wá ijchenewa tö yi ditséwö José dör. <sup>14</sup> E' ukuöki ṭa ie' tö iyé Jacob ena iyamipa kos tsuk patké as idöbitu Egipto. E'pa dōka dabom kuryök kī skel (75). <sup>15</sup> Es Jacob minea senuk Egipto. Ee iblénewa. Ee ie' ala'r dör se' yépa tsá, e'pa blèrulune nies. <sup>16</sup> Ie'pa nu minene Siquem wötéwa iwakpa pō a. Ká e' wato' Hamor ala'r tö Abraham a pōie.

<sup>17</sup> "Eré Skéköl kablé' Abraham a ṭtè i' wa: 'Be' aleripa yerattsane ye' tö Egipto.' Mik e' kéwö dökewatke, eta se' yépa kī alöne taié. <sup>18</sup> E' kéwö ska' ṭa Egipto blú ské tkéneka, e' kè wá José paké jcher. <sup>19</sup> Blu' e' tö se' yépa kītō'wé we'iké siarè. Ie' tö ie'pa ké kèsik wa ila'rla wépa kune erpa esepa kos watöktsa as iduölur. <sup>20</sup> E' kéwö ska' ṭa Moisés kune', e' dör buaala shute. Iyé ena imi tö ikkö'né u a dōka sí mañat. <sup>21</sup> E' ukuöki ṭa ie'pa kawōṭa iwatöktsa as iduōwa eré Egipto blú alà busi tö ikuéwa tsémi u a tala'wé wés iwák alà es. <sup>22</sup> Es Moisés yöne taié íyi jcher Egipto wakpa wá, kos e' wa. It-tō è kī ittšenewa, nies ì wekeitö e' è kī iwénewa tö ie' dör wém taié ese.

<sup>23</sup> "Mik ie' kī duas de dabom tkëyök, (40) eta ibikeitséitö: 'Ye' mia ye' yamipa dör Israel aleripa e' weblök.' <sup>24</sup> Eta ie' isué tö egiptowak eköl tso' Israel aleri eköl we'ikök. E' kueki ie' mishka it-satökṭa ṭa egiptowak ttéwaitö iskieie. <sup>25</sup> Ie' ibikeitsé tö iyamipa Israel aleripa éna iarmi tö Skéköl tö ie' patké ie'pa tsatökṭ. Eré kè iwà ane ie'pa éna. <sup>26</sup> Bule es ṭa ie' tö Israel aleripa kué böl ñippök. Ie' kī ikiane tö ie'pa mú er buarne ñi kī, e' kueki ichéitö iarak: 'A' dör ñi yamipa. ¿Iók a' ñi we'ikò?' <sup>27</sup> Eta eköl tö iyami we'ikeke, e' tö Moisés patkéumi ṭa ichéitö ia: '¿Yi tö be' tkéka sa' wökirie sa' shulökwakie? <sup>28</sup> ¿Be' éna ye' ttakwa wés chki be' tö egiptowak kötwa es?' <sup>29</sup> E' ttséwa Moisés tö ṭa itkashkar ká bánet

††7:8 **Jacob:** E' kiè nies Israel.

kiè Madián ee. Ee isené wes ká kuak'i wak es. Ee ila'rla kéka böl.

<sup>30</sup>“Ee ie' sené dò duas dabom tkëyök (40). Ká et tã Skëköl biyöchökwak eköl e' kkaché ie' a Sinaí kébata a tsinet ká sir poë wé kè yi serku' ese ska'. Ie' e' kkaché ia kal tsir wõnarke bö'ie e' shua.

<sup>31</sup>Moisés wökranewa iweblök. Erë mik ie' e' skéwa isauk bua'iewa tã Skëköl ttò ttséitö, e' tò iché ia: <sup>32</sup>‘Ye' dör be' yépa bak iaiaë kiè Abraham, Isaac ena Jacob e'pa Këköl.’ Etã Moisés painéka taië suane kuëki. Ie' kè diché dë'kaia isauk.

<sup>33</sup>Etã Skëköl tò iché ia: ‘Wé be' dur, e' ké dör batse'r, e' kuëki be' klökuö yóttsa. <sup>34</sup>Mok'i ye' isué tò wépa dör ye' icha tso' Egipto e'pa weirke. Ie'pa kköchöke e' ttséyö. E' kuëki ye' dë'ttsa ie'pa tsatkök. E' kuëki ittso': Ye' tò be' patkerami Egipto.’

<sup>35</sup>“Israel aleripa tò iyë' Moisés a: ‘¿Yi tò be' tkéka sa' wökirie sa' shulökwakie?’ Eré ie'pa tò ie' waté'ttsa, erë Skëköl tò patkë' ie'pa wökirie ena ie'pa tsatkök-wakie. E' bak mik Skëköl biyöchökwak e' kkayë'wa ie' a kal tsitsirla shua etã. <sup>36</sup>Es Moisés tò se' yépa yé'ttsa Egipto a. Egipto ena dayë kiè Dayë Mat ee ie' tò ì kè or yi a ese wé taië. Nies e' wéitö duas dabom tkëyök ekké ká sir poë wé kè yi serku' ee. <sup>37</sup>Ie' wák tò iché ie'pa a: ‘Skëköl tò itteköl keraka eköl a' shua wes ye' es.’

<sup>38</sup>Mik Israel aleripa tso'rak echkaie ká sir poë wé kè yi serku' ee, etã Moisés tso' ie'pa shua. Nies Skëköl biyöchökwak tté ie' tã Sinaí kébata a. Skëköl ttè tò sene meke sia e' yëne ie' a ee, e' pakéne ie' tò se' a.

<sup>39</sup>“Erë se' yépa kè wa ie' ttè dalöiëne'. Ie'pa tò ie' ttè waté'ttsa. Ie'pa shkakne Egipto. <sup>40</sup>E' kuëki ie'pa tò iché Aarón a: ‘Moisés tò se' yé'ttsa Egipto a. Kè sa' wa ijcher ì tka ie' tã. E' kuëki íyi diököl yuó se' a böt mañat dalöie skëkölíe as e' mi'

se' wëttsuk.’ <sup>41</sup>Es ie'pa tò baka pupula diököl yué dalöie. Tã iyiwak jchérakitö mè baka diököl a idalöioie. Ie'pa tò e' kéwö tkö'wé taië, baka diököl yuéra-kitö iwákpa ulà wa, e' dalöioie. <sup>42</sup>E' kuëki Skëköl e' skéttsa ie'pa yöki. Ie' tò ie'pa méat as bëkwö dalöiorakitö ie' skéie. Es Skëköl ttekölpa tò ikit iyëkuö ki. Ie'pa tò ichè:

‘A Israel aleripa,

mik a' sene' ká sir poë wé kè yi serku' ee duas dabom tkëyök (40) ekkë, etã a' tò iyiwak jché' erë e' kè dör ye' dalöioie.

<sup>43</sup>Wé dalöieke pë' tò skëkölíe kiè Moloc, e' diököl wéla dami a' wa.

Nies wé dalöieke pë' tò skëkölíe kiè Refán e' diököl bëkwöie, e' dami a' wa. E' kos diököl yué a' wákpa tò, esepa dami a' wa dalöie.

E' kuëki ye' tò a' patkeraë kamië weinuk siarë Babilonia wí'kie.’<sup>††</sup>

Es ikiteat.

<sup>44</sup>“Es mik se' yépa bak senuk ká sir poë wé kè yi serku' ee, etã ie'pa wa datsi'kuö dami e' shukuekëar Skëköl wéie. E' a ie' bak e' kkachök ie'pa a. U e' yöne wes ie' tò Moisés ka' iyuök es, wes ie' tò ikkayë' ia es. <sup>45</sup>E' ukuök'i tã u e' méat se' yépa bak e'pa tò ileripa a. Mik ie'pa demi Josué tã pë' kuak'i wakpa ká klö'ukwa, etã u e' mirwarak iwa. Skëköl tò pë' kuak'i wakpa uyéttsa ie'pa yöki. E' ukuök'i ká taië tã David tkëneká blu'ie. E' kéwö ska' tã u yöne iaiaë datsi'kuö wa, e' tso'ia. <sup>46</sup>David wër buaë Skëköl wa tã ie' a David tò kawö kié ie' dalöio wé yuoie Israel aleripa a. <sup>47</sup>Erë David alà kiè Salomón, e' tò Skëköl wé e' yué. <sup>48</sup>Erë Skëköl dör íyi ulitane tsata e' kè ser u yué s'ditsö tò ese a. Es itteköl eköl tò iyë'at,

e' tò ichè:

<sup>49-50</sup>‘Skëköl tò ichè:  
Ká jai e' dör ye' e' tkoie.

ká i' dör ye' klò tkoser.  
Ye' wák tò iyi kos yö',  
e' kuëki ¿wes a' tò u yuëmi ye' a?  
¿Wes a' tò ká mëmi ye' a enoie?''  
Es ikiteat.

<sup>51</sup> “Erë a' kè tò Skëköl dalöieta'. A' er darërë. A' kukuöña darërëë. Këkraë Wiköl Batse'r wökl'wè a' tò. A' dör wes a' yépa bak ká iaiäe es. <sup>52</sup> Ie'pa tò Skëköl ttekölpa kos we'ik. Es nies ittekölpa bak ichök tò yi dör Yësyësë Chökke e' dat-se, e'pa kötulur ie'pa tò. I'ne ta yi dör Yësyësë Chökke ñe' detke, erë iwatuëttsa a' tò ttèwä. <sup>53</sup> A' ulä a Skëköl ttè dalöiëno dë' ibiyöchökwakpa wa. Erë a' kè tò idalöië.”

### Esteban ttèwä ie'pa tò

<sup>54</sup> Mik iwökirpa tò ì paké Esteban tò e' ttsé, etä ie'pa ulunekä iki taië. Ie'pa kà wötèwä ulune è kuëki. <sup>55</sup> Erë Esteban ki Wiköl Batse'r kī de taië ta iwö këkä ká jai a ta Skëköl olo taië e' suëitö. Nies ie' tò Jesús suë dur Skëköl ulä bua'kka. <sup>56</sup> Ie' tò ichë:

—¡Isaú! Ye' tso' isauk tò ká jai wékkö är áie. Nies Jesús dör S'ditsö Alä e' sauk ye' tso' tò idur Skëköl ulä bua'kka.

<sup>57</sup> Erë ie'pa e' kukuöña wötèwä as kè iwattsër. Etä ianekarak taië ta imishkarak seraa Esteban ki. <sup>58</sup> Ta iyëttsarakitö Jerusalén a mítser ur'ki eë, ta ie'pa tò ie' témi ák wa ittowaie. Esteban kkatökwakpa tso' itök, e'pa datsi' me'itörak duladula kiè Saulo e' a blè.

<sup>59</sup> Ie'pa tso' Esteban tök ák wa, e' dalewa ie' tò ikië Skëköl a i' es: “A Skëképa Jesús, ye' wiköl tsúmi be' ska'.”

<sup>60</sup> E' ukuökī ta ie' e' tkéwä kuchë kī ta ianekä taië: “A Skëképa, ì sulu wamblökk itso'rak, e' nuí olo'yó ie'pa kī.”

Mik e' chéitö ta iduowa.

**8** Esteban ttèwä ie'pa tò e' tò Saulo ttsé'wé buaë.

### Saulo tò Jesús mik erblökwakpa we'ikémitke

E' diwö shä ta Skëképa Jesús icha erule tso' Jerusalén e'pa we'ikémitke pè' tò. Ie'pa kos tkayalmi dô Judea ena Samaria. Erë Jesús ttekölpa tsä e'pa kè mineyal. <sup>2</sup> Wëpa wëlepa tò Skëköl dalöieke taië, esepa tò Esteban nu bléwä ta ie' ieitsérakitö taië. <sup>3</sup> Erë Saulo tò Skëképa Jesús icha erule e'pa we'ikémi siarë. Ie' mirwä u a u a ie'pa yöktsa kùulemi patkëmi wötèwä s'wöto wé a wëpa ena alakölpa nies.

### Jesús tté pakane Samaria wakpa a

<sup>4</sup> Erë wëpa bakyalmi Jerusalén, e'pa tò Jesús tté buaë pakémir ká wa'ne wé imirwarak eë. <sup>5</sup> Es Felipe mía Samaria. Eë ie' tò wé pairine'bitü idi' wa s'blúie e' tté pakémi ká e' wakpa a. <sup>6</sup> Mik ie'pa tò ie' ttöke e' ttsé nies ì kè or yi a ese wëkeitö, e' suërakitö etä ie'pa tò ittö kīttsëke bua'iewä. <sup>7</sup> Es pë' a wimblupa sulusi tso', esepa bua'wëneitö taië. Wimblupa sulusi yërulune arkekarak taië. Es nies s'kraulewä taië ena s'bachiulewä taië, esepa buanene buaë. <sup>8</sup> E' kuëki ká e' wakpa kos ttsé'ne buaë.

<sup>9</sup> Etä ká e' a wëm tso' eköl kiè Simón. Ie' kaneblë'mi iaiäe wes awä es. E' wa ie' tò Samaria wakpa kītë' taië. Es ie' e' kkeö tò ie' dör imalepa tsata. <sup>10</sup> Ká e' wakpa ulitane, siarëpa nies inuköl blüpa, e'pa tò ie' ttö klö' buaë. Ie'pa tò iyë: “Skëköl kiè Diché Taië, e' e' yué Simónie.”

<sup>11</sup> Bànet ie' tò ie'pa kītë'bitü ikanë wa. E' kuëki ie'pa tò ie' ttö iütë' buaë. <sup>12</sup> Erë mik Felipe tò ì blúie Skëköl tso' e' tté buaë paké nies Jesucristo tté buaë paké, etä ie'pa tò ikl'wé ta ie' wöskuélor wëpa ena alakölpa. <sup>13</sup> Nies Simón wák erblé

Jesús mik tã iwöskuée. Ie' michoë Felipe tã kekraë. Es ie' isuë tö ì kè or yi a ese weke Felipe tö tajë, e' tö ie' tkiwéwa.

<sup>14</sup>Mik Jesús ttekölpa tsá tso' Jerusalén, e'pa wã ijchenewã tö Samaria wakpa tö Skéköl ttè klö'wé, etã ie'pa tö Pedro ena Juan patkémí ee. <sup>15</sup>Mik idemirak, etã ikiérakitö S'yé a Samaria wakpa tö iklö'wé, e'pa kî as Wiköl Batse'r dò ie'pa kî. <sup>16</sup>Kam Wiköl Batse'r döbitü ie'pa ulitane kî. Ie'pa wösuule Skékëpa Jesús ttò wa, e' è o' ie'pa tö. <sup>17</sup>E' kuekî Pedro ena Juan ulã méka ie'pa kî tã Wiköl Batse'r de ie'pa kî.

<sup>18</sup>Simón tö isuë tö mik Jesús ttekölpa tsá ulã méka ie'pa kî etã Wiköl Batse'r debitü ikî. E' kuekî ie' tö inuköl watké Pedro ena Juan a, <sup>19</sup>tã ie' tö iché iarak:

—A' wã diché tso' se, e' mú ye' a as yi kî ye' ulã méka tã ese kî Wiköl Batse'r döbitü wes a' tö iwëke es.

<sup>20</sup>Pedro tö iiuté:

—Be' tö ibikeitsè tö ì kadmè Skéköl tö e' tormi inuköl wa, e' kuekî be' inuköl weinú kekraë be' wák tã. <sup>21</sup>Be' er kè dör yësyësè Skéköl wöa, e' kuekî diché i' kè menuk be' a. <sup>22</sup>Be' er mane'ú ì sulu wamblekebö i', e' yökî. Skéköl a ik-ió as ì bikeitsébö suluë isalema e' núf olo'yèmiitö be' kî. <sup>23</sup>Ye' tö isuë tö be' er dör suluë kësik ème. E' wã be' wák kos tso' klöulewã.

<sup>24</sup>Simón tö iiuté:

—Skéköl a ikió as ì kos ché a' tö e' kè tkò ye' tã.

<sup>25</sup>Etã ì o' Skéköl tö ie'pa tã e' ttè paké Pedro ena Juan tö. Nies s'pattérakitö Skékëpa Jesús tté wa. E' ukuöki tã ie'pa míyalne Jerusalén. Tã ñalã wa Samaria shua ká tso' tajë, e' wakpa a ie'pa tö Jesús tté buaë pakerami wes imirdak es.

### Felipe tö Etiopía wák eköl wöbla'wé

<sup>26</sup>E' ukuökî tã Skéköl biyöchökwak eköl tö iché Felipe a: “Be' yúshka dayé ñak kke Jerusalén ñalé wa dò Gaza.” Ñalã e' tkökemi ká sir poë wé kè yi serku' e' kke. <sup>27</sup>Etã Felipe mía tã ñalã e' kî wëm kuéitö eköl, e' dör Etiopía wak. Ie' dör iká wökirpa e' eköl. Ie' dör alaköl tso' Etiopía blúie, e' inuköl blök wökir. Ie' dare Jerusalén Skéköl dalöiök. <sup>28</sup>Ie' mir-wane ikaska' karreta kî, e' a itkër yëkkuö kit Skéköl tteköl kiè Isaías tö, e' sauk.

<sup>29</sup>Etã Wiköl Batse'r tö iché Felipe a: “Be' yú, be' e' skówa karreta se o'mik.”

<sup>30</sup>Mik Felipe e' skéwa karreta o'mik, etã ie' tö ittse tö Etiopía wak tö Skéköl yëkkuö kit Isaías tö, e' aritserami. Felipe tö ie' a ichaké:

—Yëkkuö se aritseke be' tö ¿e' wã ane be' éna?

<sup>31</sup>Ie' tö iiuté:

—Kè yi ku' ye' wöbla'uk tã ¿wes ye' a iwà armi?

Ie' tö Felipe kié e' tkökka ie' o'mik. <sup>32</sup>Ie' tö iaritserami wé ichéitö:

“Ie' dör wes obeja urula tsèmi ttèwã es. Wes obeja pupula kè artã' mik iköyök tërke etã,

es nies kè ie' wã ì yène.

<sup>33</sup>Ie'pa tö ijaëwé siarè tã ikichatéttsarakitö, erè ì kî ikichatënetsã e' kè dör moki.

Ie' ttéwarakitö as kè iseriã ká i' kî, e' kuekî kè ie' alã ate.”<sup>§§</sup>

<sup>34</sup>Etiopía wak tö Felipe a ichaké:

—Be' we'ikèyö, ichó ña, ¿yi cheke Skéköl tteköl Isaías tö ttè i' wa? ¿Ie' wák e' chöke ö o'ka chekeitö?

<sup>35</sup>Etã ttè aritsétkeitö, e' wa Felipe tö ie' a Jesús tté buaë pakémi. <sup>36-37</sup>Es it-töramirak ñalã wa tã ee di' kuérakitö. Etã Etiopía wak tö iché Felipe a:

—*Íe* di' tso'. *¿Í* *kuéki* be' kè tò ye' wöskuè?\*

<sup>38</sup>Età Etiopía wak tò iché karreta ñakókwak *a* tò karreta wökló'úwá. Tà ie'pa *e'* éwa t*a* imíyal bölé di' *a*. E*e* Felipe tò Etiopía wak wöskuée. <sup>39</sup>Mik ie' yélune di' *a* età Skéköl Wiköl tò Felipe batsékami bet *ká* bánet *a*, Etiopía wak kè w*a* isuneia yès, erè imía t*sé*'ne buaè kaneè. <sup>40</sup>Età Felipe tò isué tò ie' demi dur *ká* kiè Azoto e*e*. Età ie' mía Jesús tté buaè pakók *ká* t*sé*' ñalá *kí* ese wakpa *a* òmì Cesarea.

### Saulo er mane'wé Jesús *a*

**9**<sup>1-2</sup>E' dalewa Saulo tso'ia Skékèpa ttókatapa pauñuk ttèwá. E' *kuéki* ie' mía sacerdote kibi ska' yèkkuò kiók shkowaie judiowak ñi dapa'wó wé tso' Damasco e*e*. Yèkkuò e' *kí* kawó mène *ia* s'tso' tté kiè Jesús dör Ñalá Pa'á*l*i e' dikia esepa yulók kló'wowa tsèmi Jerusalén, kè tkine tò alakólpa ò wépa idir. <sup>3</sup>Erè mik Saulo dökemitke tsinet Damasco e' bet ibiteshka *ká* j*a*i *a* bö'wöie e' olo bune taiè ipamik. <sup>4</sup>Tà ie' anere *iski*. Età ttò t*sé*itò tò iché *ia*: “A Saulo, a Saulo, *¿í*ók be' tò ye' we'ikeke?”

<sup>5</sup>Saulo tò ie' *a* ichaké: “A Skékèpa, *¿*be' dör yi?” Età i*u*téneitò: “Ye' dör Jesús we'ikeke be' tò e'. <sup>6</sup>Erè be' e' kóka. Be' yú Damasco. E*e* be' *a* iyèrmi tò ì uk be' kè.”

<sup>7</sup>Età Saulo wapiepa tkirulune taiè. Ie'pa tò yile ttò t*sé*, erè kè ie'pa w*a* yi s*u*ne. <sup>8</sup>E' ukuóki t*a* Saulo e' kék*a* t*a* iwöbla shuppée, erè kè iwawër. E' *kuéki* itsémirakitò ulá ièrule dò Damasco. <sup>9</sup>E*e* ie' sené *ká* mañat kè wöbla wawène, kè w*a* ì ñane, kè w*a* ì yane yès.

<sup>10</sup>Jesús ttókata eköl kiè Ananías serke Damasco e' *a* Skékèpa Jesús e' k*k*achéwa

kabsueie t*a* iché *ia*: “*¡*A Ananías!” Ie' i*u*té: “A Skékèpa Jesús, ichó ñ*a*.”

<sup>11</sup>Skékèpa tò iché *ia*: “Be' yú ñalá kiè Yésyèsè e' *kí* dò Judas u *a*. E*e* wèm tso' kiè Saulo dat*sé* Tarso, e' yuló. Ie' tso' ttók S'yé t*a*. <sup>12</sup>Ie' tò isué kabsueie tò wèm kiè Ananías dew*a* ie' ska' iulá méka *ikí* *a* s iwöbla wawërne, e' dör be'.”

<sup>13</sup>Ie' i*u*té: “A Skékèpa Jesús, erè ye' *a* iyèule taiè ie'pa w*a* tò wèm e' tò be' icha batse'r tso' Jerusalén e'pa we'ikeke siarè. <sup>14</sup>I'ñe t*a* e' de *íe*. Sacerdotepa wökirpa tò kawó mé ie' *a* *a*s wépa tò be' *a* e' tsatkè kiè esepa kos kló'uluritò.”

<sup>15</sup>Erè Skékèpa Jesús tò iché *ia*: “Be' yú. Ye' tò wèm e' shukitbak *a*s ie' tò ye' tté pakò p*e'* kè dör Israel aleripa esepa *a* ena iblúpa *a* ñies Israel aleripa *a*. <sup>16</sup>Ye' wák tò ikkacheraè ie' *a* tò ie' kawöt*a* weinuk ye' tté *kuéki*.”

<sup>17</sup>Età Ananías demi Saulo ska' t*a* iulá méka *ikí* t*a* iché *ia*:

—A yami Saulo, Skékèpa Jesús e' k*k*ayé'w*a* be' *a* ñalá *kí* be' d*e*'bitu e' wa, e' tò ye' patké *a*s be' wöbla wawërne ñies *a*s Wiköl Batse'r ièrw*a* be' *a*.

<sup>18</sup>E' bet t*a* ì tso' Saulo wöbla mik nima kkuò s*u*, e' darolone t*a* iwöbla wawënene. Età ie' e' kék*a* t*a* imía t*a* ie' e' wöskuée. <sup>19</sup>E' ukuóki t*a* ichkéne t*a* idiché iènene. Età ie' e' tséat Jesús ttókatapa w*e*lepa tso' Damasco e'pa t*a* *ká* elke ulatók.

### Saulo tò Jesús tté paké Damasco

<sup>20</sup>E' ukuóki t*a* bet Saulo tò Jesús tté pakémi judiowak *a* ie'pa ñi dapa'wó wé kos *a*. Ie'pa *a* ichkeitò tò Jesús dör Skéköl Alá chökle. <sup>21</sup>Wépa kos tò ie' ttò t*sé*, e'pa wökrarulune ittök t*a* ñi chakérak:

—*¿*Ie' w*í* kè dör wépa tò e' tsatkè kiè Jesús *a* tso' Jerusalén esepa we'ik siarè?

\*8:36-37 Yèkkuò kitule *ká* iaiä keweie imalepa yöki esepa kè w*a* 8.37 kiteka. Ttè e' tò ichè: *Felipe tò ie' a iché: —Be' tò ttè i' kló'wé mokjë e' t*a* be' wösurmi. Età wèm tò i*u*té: —Ye' tò ikló'wé tò Jesucristo dör Skéköl Alá e'.*



¿Kè ie' wëbi wí dë'bitu ie'pa esepa tso' íe' e'pa klö'ukwá wömëttsa sacerdotepa wökirpa ulà a?

<sup>22</sup> Erë Saulo tö Jesús tté pakéwaie kíta kíta, kè suane. Ie' tö ikkaché judiowak serke Damasco e'pa a tö mokí Jesús dör wé pairine'bitu idi' wa s'blúie e'. Ttè e' wa ie'pa siwa'blöwélur ie' tö.

### Saulo tkashkar judiowak yöki

<sup>23</sup> Ká taië ukuöki tá judiowak tté ñi-ta Saulo ttowa. <sup>24</sup> Erë e' jchenewá ie' wá. Ñië nañeë ie'pa tso' ipanuk ttéwá ká wékkö dökettsa ese ska'. <sup>25</sup> Erë nañewe iklépa tö ie' iéka kkó blublu a tá iíemi ká tso' kköiëule shkit kakkeë e' mik enaena. Es ie' tkashkar.

### Saulo dene Jerusalén

<sup>26</sup> Mik ie' demi Jerusalén, eta ie' dapa'wak Jesús ttökatapa tá. Erë ie'pa kè wá iklöone tö mokí ie' erblé Jesús mik. Ie'pa suane iyöki. <sup>27</sup> Erë Bernabé wá ie' mítser kkaché Jesús ttekölpa tsá e'pa a. Bernabé tö ipaké ie'pa a tö Saulo tö Skéképa Jesús su' ñalá kí tá eë itté ie' tá. Ñies ichéitö tö Saulo kapakétke Damasco Jesús ttò wa kè suane. <sup>28</sup> Es Saulo e' tséat Jerusalén dami Jesús ttekölpa tsá e'pa tá. Kékraë ie' tö Skéképa Jesús tté pakeke kè suane. <sup>29</sup> Ñies ie' tö itté pakeke judiowak ttöke griegoie esepa a. Erë ie'pa ñi iutéka taië ie' tá. E' kueki ie'pa tö ima'wé ttéwa. <sup>30</sup> Mik e' jchenewá iyamipa wá, eta ie'pa wá imítser Cesarea, eë tá ipatkémi dö Tarso.

<sup>31</sup> E' ukuöki tá Skéképa Jesús icha erule erule kos tso' Judea ena Galilea ena Samaria e'pa atene bèrè, kè yi tö ie'pa we'ikèia. Ie'pa yörike buaë Skéköl tté dikia. Ñies ie'pa tö Skéköl dalöieke taië. Wiköl Bats'e'r tö ie'pa kimeke as ikí iërdak taië kékraë.

### Eneas buanene

<sup>32</sup> Pedro shköke ká wañe ie'pa kos pakök wé ie'pa tso' ese ska'. Eta ide ñies ká kiè Lida s'batse'rpa serke eë e'pa pakök. <sup>33</sup> Eta eë wëm eköl kuéitö kiè Eneas e' kraulewá me'r ká kí e' kí duas de pàköl (8). <sup>34</sup> Pedro tö iché ia:

—Jesucristo tö be' bua'wéne. Be' e' kóka tá be' ká' pashuó.

E' bet tá ie' e' kéka. <sup>35</sup> E' ukuöki tá pë' tso' Lida ena Sarón, e'pa ulitane tö ie' sué. E' kueki ie'pa er mane'wé Skéképa Jesús a.

### Dorcas shkënekane

<sup>36</sup> E' kéwö ska' tá ká kiè Jope eë alaköl serke eköl dör Jesús ttökata, e' kiè Tabitá (griegoie ikiè e' dör Dorcas†). Kékraë ie' bak ì buaë uk ena s'siärépa kimuk. <sup>37</sup> Ká e' ulatök tá ie' kirinewá tá iduowá. Inú pasunetke tá iméka úshu kákke ese a. <sup>38</sup> Jope ate Lida o'mik wé Pedro tso' eë. Jesús ttökatapa serke Jope, e'pa wá ijcher tö ie' tso' Lida, e' kueki ie'pa tö wépa patké bül ichök ie' a: “Be' shkó bet Jope.”

<sup>39</sup> Es ie' mía ie'pa tá. Mik idemirak, eta ie' tsémi u shuá wé Dorcas nu me'r eë. Alakölpa schó<sup>3</sup> kos iúke taië. E'pa iënewá ie' pamik. Eta ie'pa tö paio ena datsi' yö' Dorcas tö mik ibak ttsé'ka eta, e' kkaché Pedro a. <sup>40</sup> Eta Pedro tö ie'pa ké e' yökulur tá ie' e' tkéwá kuchè kí tá itté S'yé tá. E' ukuöki tá ie' tö inú sué tá iché:

—A Tabitá, be' e' kóka.

Eta ie' wöbla shuppée. Mik Pedro suéitö eta ie' e' tkéser. <sup>41</sup> Pedro tö iklö'wéwá iulà a duéka. E' ukuöki tá ie' tö alakölpa schó ena s'batse'r malepa kié tá Tabitá kkachéitö ie'pa a ttsé'ka. <sup>42</sup> E' jchenewá Jope wakpa kos wá tá ie'pa taië erblé Skéképa Jesús mik. <sup>43</sup> Tá Pedro

†9:36 *Dorcias*: S'kiè e' wà kiane ché *suli*.

\*9:39 *schó*: E' dör alakölpa wëm bléulewá kam serwane ese.

e' tséat tajë Jope wëm kië Simón e' ska'. Wëm e' dör iyiwak kkuölit kanéukwak.

**Pedro tö Jesús tté buaë  
paké Cornelio a**

**10** Ká kië Cesarea eë wëm serke eköl kië Cornelio, e' dör Roma ñippök-wakpa eruleë kië Italiano e' capitán. <sup>2</sup> Ie' kè dör judiowak erë ie' dör wëm yësyësë Skëköl wöa. Ie' ena iyamipa ekka, e'pa tö Skëköl dalöieke tajë. Ñies ie' tö inuköl kakmeke tajë judiowak kimoie. Kekraë ie' ttöke Skëköl ta. <sup>3</sup> Ká et tsáli ta diwö de mañat, eta' ie' tö isuë buaë kabsueie tö Skëköl biyöchökwak eköl dewa wé ie' tso' eë ta ichéitö ia: "A Cornelio." <sup>4</sup> Ie' tkinewa ta Skëköl biyöchökwak suéwaitö krereë ta ie' tö iché ia: "A kékë, ¿Ï kiane be' kí?" Eta' Skëköl biyöchökwak tö ie' iüté: "Be' ttöke Skëköl ta ena s'siärëpa kimeke, e' wër buaë ie' wa. <sup>5</sup> E' kuëki yile patkómi Jope. Eë wëm tso' kië Simón, kië ñies Pedro e' kiök patkó. <sup>6</sup> Ie' tso' wëm eköl kië ñies Simón dör iyiwak kkuölit kanéukwak, e' ska', ie' u me'r dayë kkömik."

<sup>7</sup> Mik Skëköl biyöchökwak tté one Cornelio ta e' mía eta' Cornelio tö ikanè mé-sopa kié bül ena ñippök-wak kiéitö eköl ñies. Ñippök-wak e' tö Skëköl dalöieke tajë. Ie' dör Cornelio kimukwak bua'ie. <sup>8</sup> Cornelio tö ì kos tka ie' ta e' paké ie'pa a. E' ukuökí ta ie'pa patkémii tö Jope.

<sup>9</sup> Bule es diwö de bata a ta Cornelio kanè mé-sopa dami ñalá wa döketke tsinet Jope. E' dalewa Pedro tkaká u bata kí ttök Skëköl ta. <sup>10</sup> Pedro dué bli wá erë ulirkeia ie' a, e' dalewa isuëitö kabsueie.

<sup>11</sup> Ie' tö isuë tö ká jai kköbunane ta datsi' ukuö bérie suë iklöulewá ibata tkël a, e' bitewá dò iski. <sup>12</sup> Datsi' ukuö e' shua iyiwak klöka, e' sköke ibatsi' kí ena dù dör ñá judiowak a esepa tkërkí tsakië. <sup>13</sup> Eta' ie' tö ttö tse ta ichéitö ia: "A Pedro, be' e' kóka. Iyiwak se ttó ta ikatö."

<sup>14</sup> Erë ie' tö iüté: "Au. A Skëköl, iyiwak dör ñá ese kè kataule ye' wá yës." <sup>15</sup> Ta ttö e' tö ichéne Pedro a: "Ï batse'wétke Skëköl tö e' kè kiaria ñá."

<sup>16</sup> E' tka mañatökicha ta datsi' ukuö míkane ká jai a. <sup>17</sup> Pedro tso'ia ibikeitsök tajë ì suéyö kabsueie ¿ima e' wá kiane chë? E' wöshaë ta wëpa patké' Cornelio tö, e'pa tö Simón u kué ta iëter Simón ukkó a. <sup>18</sup> Ie'pa tö ichaké: "¿Ïe wëm kië Simón kiekerakitö ñies Pedro, e' tso'?"

<sup>19</sup> Pedro tso'ia ì suëitö kabsueie e' bikeitsök, eta' Wiköl Batse'r tö iché ia: "Ittsó. Wëpa mañal tso' be' yulök. <sup>20</sup> Be' e' ówa ta be' yú ie'pa ta. Kè ibikeitsar böt-böt. Ye' tö ie'pa patkébitü be' tsukmi."

<sup>21</sup> Eta' Pedro e' éwa ta iché ie'pa a:

—Yi yuleke a' tö, e' dör ye'. ¿Ï dör iwá?

<sup>22</sup> Ie'pa iüté:

—Wëm kië Cornelio dör Roma ñippök-wakpa capitán eköl, e' tö sa' patké' be' yulök. Ie' dör wëm yësyësë. Skëköl dalöiekeitö tajë. Judiowak ulitane kí ie' kiar tajë. Skëköl biyöchökwak batse'r e' eköl tö iyë' ie' a: "Pedro kió as ie' bitü be' u a. Ì kos cheke ie' tö be' a, e' ttsó."

<sup>23</sup> Eta' Pedro tö ie'pa kiéwá weshke. Eë ie'pa kapére. Bule es ta ie' mía ie'pa ta. Ñies s'yamipa serke Jope e'pa wëlepa mía ie' wapieie. <sup>24</sup> Bökkí es ta idemirak Cesarea. Eë Cornelio tö iyamipa ena pë' suule iwá buaë e'pa ki' e' dapa'ukka Pedro ttö ttsök. E'pa kos de ie' panuk. <sup>25</sup> Mik ie' de Cornelio u a eta' Cornelio dettsa ishke'uk ta ie' e' tkéwá kuchë kí ie' wöshaë idalöioie. <sup>26</sup> Erë ie' tö iké e' duökká ta iché ia:

—Be' e' duóká. Ye' dör s'ditsö ñies wes be' es.

<sup>27</sup> Pedro ttöramiia Cornelio ta eta' ide-warak weshke ta ie' isuë tö tajë pë' dapanewa. <sup>28</sup> Ie' tö iché ie'pa a:

—A' wá ijcher tö sa' judiowak kè a kawö ta' pë' kè dör judiowak esepa pakök ena shkök pë' esepa ta. Erë Skëköl tö ikkaché ye' a tö kè ye' kawö ta'ia ichök

tö yile dör nã. <sup>29</sup>E' kuekî mik ye' kine, e' bet ta ye' bitëa, kè wã ì chakine. Ye' tö a' a ichakè çíók a' tö ye' kié?

<sup>30</sup>Cornelio tö iüté:

—Tkali ikèkkè ta ye' tkër ttök Skèköl ta ye' u a wës ye' wöblar kã bit ekkè diwö de mañat eta. E' bet ta wëm eköl de dur ye' wörkî, e' datsi' dör dalölä. <sup>31</sup>E' tö ye' a iché: 'A Cornelio, be' ttöke Skèköl ta e' ttsé ie' tö. Be' tö s'siarëpa kimeke e' wër buaë ie' wa. <sup>32</sup>Yile patkómi Jope Simón kiè ñies Pedro, e' kiökbitü. Ie' tso' wëm skà kiè Simón dör iyiwak kkuölit kanéukwak e' u a. E' u me'r dayë kkömik.' <sup>33</sup>E' bet ta ye' tö be' tsuk patké ta be' debitü er bua' wa. Es sa' ulitane e' dapa'wé íe Skèköl wöa ì chök ie' tö be' ké sa' a e' ttsök.

### Pedro tö Skèköl tté buaë paké Cornelio ska'

<sup>34</sup>Eta Pedro ttémi ta ichéitö ie'pa a:

—Íñe ta ye' éna iane tö mokî suli-tane dör ñies ème Skèköl a. <sup>35</sup>E' kuekî kã wa'ñe wépa tö ie' dalöieke ta iserke yësyësë esepa kiar ie' kî. <sup>36</sup>Ie' er buarmine se' kî Jesucristo dör sulitane Kèköl e' batamik, e' tté buaë pakane sa' dör Israel aleripa e'pa a. E' jcher a' wa. <sup>37</sup>Ñies ì bak judiowak ké kos a e' jcher buaë a' wa. Juan tö iyé' tö s'kawöta e' wöskuök. E' ukuökî ta Jesús tö s'pattémi Galilea. <sup>38</sup>Ñies a' wa ijcher buaë tö Skèköl tö iWiköl Bats'e'r patké Jesús Nazaret wak e' kî idiché taië. Ie' shkè kekraë pè' ulitane shua íyi buaë kanéuk. Ñies s'we'ikeke bé tö esepa bua'wéneitö Skèköl tso' ie' ta e' kuekî. <sup>39</sup>Í wé ie' tö Jerusalén ena judiowak kã malepa a, e' kos sué sa' tö. E' ukuökî ta ittëwarakitö wötëulewã krus mik. <sup>40</sup>Erë e' kî kã de mañat ta Skèköl tö ishke'wékane ta ikkachéitö sa' a. <sup>41</sup>Ie' kè e' kkayëne sulitane a. Sa' è a ie' e' kkaché. Skèköl tö sa' shukitbak as sa' tö Jesús saü sa' wák wöbla wa. Ie' shkënekane

e' ukuökî ta sa' chké sa' di'yé ie' ta. <sup>42</sup>Ie' tö sa' patké ittë buaë pakök suli-tane a ñies ichök iarak tö ie' tkéka Skèköl tö s'ttséka ena s'duulewã, e'pa shulök-wakie. <sup>43</sup>Kã iaiaë Skèköl ttekölpa ulitane tö Jesús paka'atbak ta iyé'atraitö tö yi erblé ie' mik esepa nuì olordaë ie'pa kî ie' batamik.

### Pè' kè dör judiowak esepa kî Wiköl Bats'e'r de

<sup>44</sup>Pedro tso'ia ipakök ie'pa a ta e' shua Wiköl Bats'e'r debitü ie'pa kos tso' ie' ttö kittsök, e'pa kî. <sup>45-46</sup>Eta Jesús mik er-blökwakpa dör judiowak dë'bitü Pedro ta e'pa tö isué tö wës Wiköl Bats'e'r debitü pè' kè dör judiowak, esepa kî ñies. Ie'pa tö ittse' tö ittökerak ttö ku'a'kî ku'a'kî wa. Ñies Skèköl kíkókka itso'rak. E' tö ie'pa tkiwéwa. <sup>47</sup>Eta Pedro tö iché:

—Wiköl Bats'e'r debitü ie'pa kî wës sa' kî itsá dë'bitü es. E' kuekî kè yi a iwök-lönuk tö kè ie'pa wöskuar di' a.

<sup>48</sup>Ie' tö ikérak e' wöskuök Jesucristo ttö wa. E' ukuökî ta ie'pa tö ie' a ikié taië: "Be' e' tsúat sa' ta kã böt mañat."

### Pedro tö Cornelio tté paké Jerusalén

**11** Jesús ttekölpa tsá ena s'yamipa malepa tso' Judea, e'pa tö ittse' tö pè' kè dör judiowak, ñies esepa tö Skèköl tté klö'wé. <sup>2</sup>Mik Pedro dene Jerusalén, eta Jesús mik erblökwakpa dör judiowak, esepa wëlepa tö ie' ché suluë. <sup>3</sup>Ie'pa tö ie' a ichaké:

—Çíók be' dare pè' kè dör judiowak esepa pakök ena chkök ie'pa ta?

<sup>4</sup>Ie' tö ì kos tka e' paké ie'pa a seraã ta iché ia:

<sup>5</sup>—Ye' bak Jope ta ye' ttöke Skèköl ta, e' shua ye' tö ì sué kabsueie. Ì suéyö e' dör datsi' ukuö bërie sué klöulewã ibata tkél a. E' bitëwã kã jai a dò wé ye' tso' ee. <sup>6</sup>Eta ye' tö isué bua'iewã isuöie tö ì tso' ishua. Ye' tö iyiwak klöka, iyiwak kañiru, iyiwak e' sköke ibatsi' kî

ena dù, esepa sué. <sup>7</sup> Età ye' tò ttò ttsé e' tò iché ye' a: 'A Pedro, be' e' kóka. Iyiwak se ttó tã ikató.' <sup>8</sup> Ye' iüté: 'Au. A Skéköl, ye' kè wã iyiwak dör ñá ese kataule yés.' <sup>9</sup> Tã ttò datse ká jai a, e' tò ichéne ye' a: 'Í batse'wétke Skéköl tò ese kè kiaria ñá.' <sup>10</sup> E' tka mañatökicha tã imíkane sekka ká jai a. <sup>11</sup> E' wöshaë tã, wëpa mañal patkéule datse Cesarea ye' yulök, e'pa debitu wé ye' tkër e' wé a. <sup>12</sup> Wiköl Batse'r tò ye' a iché: 'Kè ibikeit-sar bötböt. Be' yú ie'pa tã.' Nies s'yamipa teröl i' dare ye' tã. Sa' kos dewã Corne-lío u a. <sup>13</sup> Ie' tò sa' a ipaké tò wes ie' tò Skéköl biyöchökwaq sué dur eköl ie' u a. E' tò iché ia: 'Yile patkómi dò Jope ee wëm tso' kiè Simón, e' kiè ñies Pedro, e' kióbitu. <sup>14</sup> Ie' tò icheraë be' a wes be' ena be' yamipa kos e'pa tsatkërmi.' <sup>15</sup> Mik ye' tò Jesús tté pakémi ie'pa a, etã Wiköl Batse'r debitu ie'pa kã wes idë'bitu sa' kã kuaë es. <sup>16</sup> Etã ì yé' Skékëpa Jesús tò ye' a, e' ane ye' éna. Ie' tò ye' a iyé': 'Juan tò s'wöskué di' a, erë a' iërdawã Wiköl Batse'r a.' <sup>17</sup> Iwënewã tò Skéköl tò iWiköl mé ie'pa a wes imenebak se' a kuaë mik se' erblé' Skékëpa Jesucristo mik etã es. E' kuekã ye' dör yi Skéköl wöklö'woie?

<sup>18</sup> Mik ì ché Pedro tò e' ttsé ie'pa tò, etã isiwa'bléwarak tã Skéköl kikékarak-itö. Ie'pa tò iché:

—E' wa se' wã ijcher tò pë' kè dör ju-diowak, esepa a ñies Skéköl tò imé as ie'pa er mane'ü ie' a sënöie michöë.

### Skékëpa Jesús icha eruleë tso' Antioquia e' pakè

<sup>19</sup> Esteban kötwarakitö e' ukuökã tã Jesús mik erblökwaqpa we'ikémitke tajë pë' tò. E' yökã ie'pa welepa tkayal. Welepa míyal dò Fenicia. Welepa míyal dò Chipre. Iskã mírak dò Antioquia. Kã ekkëpa a ie'pa tò Jesús tté buaë pakeke judiowak è a. <sup>20</sup> Erë Jesús mik erblökwaqpa datse Chipre ena Cirene, ese welepa míyal Antioquia. Eë Skékëpa

Jesús tté buaë pakérakitö pë' kè dör ju-diowak esepa a. <sup>21</sup> Etã Skékëpa tò ie'pa kímé tajë. E' kuekã tajë kã e' wakpa erblé Skékëpa Jesús mik tã ier mane'wërak ie' a.

<sup>22</sup> Mik Skékëpa Jesús icha erule tso' Jerusalén, e'pa tò tté e' ttsé, etã Bernabé patkémirakitö tkörö Antioquia. <sup>23</sup> Mik ie' demi, etã ie' tò isué wes Skéköl er buaë ché ie'pa a. E' tò ie' ttsé'wé buaë. Ie' tò ie'pa kã patté as ie'pa e' tköwã darëre kekraë ier kos wa ie'pa erblö Skékëpa mik e' a. <sup>24</sup> Ie' dör wëm yësyësë. Ie' a tajë Wiköl Batse'r tso'. Ie' tò Jesús bikeitseke bua'iewã. Es tajë pë' kã de erblök Skékëpa mik.

<sup>25</sup> E' ukuökã tã ie' míã Tarso Saulo yulök. <sup>26</sup> Mik ikuéitö, etã itsémi Antio-quia e' tã. Eë ie' tsëarak duas ek. Ie'pa e' dapa'uke Skékëpa Jesús icha erule e'pa tã. Kã e' wakpa tajë wöbla'wëkerakitö. Kã e' a Jesús ttökatapa tsã kine Cristo wakpa.

<sup>27</sup> E' këwö ska' tã Skéköl ttekölpa welepa tso' Jerusalén míyal Antioquia. <sup>28</sup> E'pa shuã eköl kiè Agabo, e' e' duéka tã ichéitö Wiköl Batse'r wa tò bli dat-se kã wa'ne kã. E' debitu mik Claudio bak Roma wökir kibi e' këwö ska'. <sup>29</sup> Etã Jesús ttökatapa tso' Antioquia e'pa tò iché ñi a: "Mishka inuköl shtök patkë se' yamipa serke Judea, e'pa kimoie kos se' a imer ekkë." <sup>30</sup> Es ie'pa tò iwé. Etã ipatkémirakitö Bernabé ena Saulo ulã a as ie'pa tò imü Skékëpa Jesús icha wökir kibipa tso' Judea e'pa ulã a.

### Pedro wötëwarakitö s'wöto wé a

**12** E' këwö ska' tã blu' kiè Herodes, e' tò Skékëpa Jesús icha welepa klö'wëwã we'ikè. <sup>2</sup> Ie' tò Santiago dör Juan ël, e' ttökwa patké tabè wa. <sup>3</sup> Mik ie' isué tò e' wër buaë judiowak wa, etã ie' tò Pedro klö'ukwa patké. E' wëitö mik judiowak tò Pan Kë Yöule Iwölö-wokã Wa e' këwö tkö'wëkerakitö etã.

<sup>4</sup>Mik Pedro klönewa, eta Herodes tö iwötewa s'woto wé a. Ee ñippökwakpa döka dabom eyök ki teröl (16) e'pa tö ikkö'neke tkël tkël. E'pa mane'weke tkël tkël kukur kukur. Herodes tö ibikeitsé tö kawö tkö'wekerakitö, e' ukuöki ta iyekettsaneyö shulè sulitane wöa. <sup>5</sup>E' dalewa Pedro tso' s'woto wé a. Erë Skëkëpa Jesús icha erule e'pa tso' ikiök Skëköl a darërëe ie' ki kekraë.

### Skëköl biyöchökwak tö Pedro yéttsa s'woto wé a

<sup>6</sup>Herodes tö Pedro yekettsa shulè, e' nañewe Pedro kapötër ñippökwakpa böi shusha moulewa tabechka kichaie böto wa. Nies ñippökwakpa böi tso' s'woto wé ukkö kkö'nuk. <sup>7</sup>E' bet Skëköl biyöchökwak de dur ie' ska' ta bö'wö olo buneka dalölöe s'woto wé a. Eta ikéwaïto ichane a as itirka ta iché ia: “¡Be' e' kóka bet!” E' bet ta imoulewa tabechka kichaie wa e' wöyerulune. <sup>8</sup>Eta Skëköl biyöchökwak tö iché ia: “Be' datsi' ióka, be' klökkuo ióka.” Ta ie' tö iwé es. Skëköl biyöchökwak ikí ché ia: “Be' paio kikküo ióka ta be' shkó ye' itöki.”

<sup>9</sup>Eta Pedro mia itöki, erë ie' kè éna iane tö ì weke Skëköl biyöchökwak tö e' dör mokí. Ie' tö ibikeitsé tö ie' tso' kabsauk. <sup>10</sup>Eta ie'pa tkami wé ñippökwakpa iëter ukkö kkö'nuk ee. E' ukuöki ta wé ñippökwakpa skà iëter ee itkamirak nies. Mik ie'pa demi ukkö kibi a yöule tabechka wa afe ñala kke, eta e' kköbunane er wa. Eta ie'pa deyal urki shkémirak ekuölö ta Skëköl biyöchökwak tö iméat eköl.

<sup>11</sup>Ekké ta ie' éna iane tö ì suéitö e' dör mokí. Ie' ibikeitsé: “Iñe ta yö isué tö mokí Skëköl tö ibiyöchökwak patké ye' tsatkök Herodes ulà a ena ì qos wamblak judiowak éna ye' ki, e' ulà a nies.”

<sup>12</sup>Mik ie' éna ianewa bua'iewa ta imía María u a. María dör Juan mi. Juan kiè nies Marcos. Ee ie'pa daparke taië

ttök Skëköl ta. <sup>13</sup>Mik Pedro de dur ukkö a ie'pa chakök, eta busi eköl dör kané méso kiè Rode e' mia iweblök tö yi idir. <sup>14</sup>Mik ie' ttò ttséwa Rode tö, eta ittse'neka buaë kè deia ukkö ppöök ta itunemine weshke ichök tö Pedro de dur ukkö a. <sup>15</sup>Ie'pa tö iché ia:

—¡Be' alineka!

Erë ie' iuté:

—Mokí ye' ttöke.

Ie'pa ie' a iché:

—Au, e' kè dör ie'. E' dör Skëköl biyöchökwak patkéule ikkö'nuk e'.

<sup>16</sup>E' dalewa Pedro tso'ia ichakök ukkö a. Mik ukkö kköppéerakitö, eta isuérakitö tö ie' e' idir ta itkinewarak taië. <sup>17</sup>Erë ie' tö ikkaché ulà wa tö a' siwa'bló. E' ukuöki ta ie' tö ipaké ie'pa a tö wes Skëköl tö iyéttsa s'woto wé a ta ichéitö:

—Ttè e' pakó Santiago a ena s'yamipa malepa a.

E' ukuöki ta ie' e' yéttsa mia bánet.

<sup>18</sup>Mik ka nine eta s'woto wé a ñippökwakpa shutineka taië Pedro kè ku' e' kuëki. <sup>19</sup>Herodes tö Pedro yulök patké. Erë mik ie'pa kè wa ikune, eta ie' tö inuí tkéwa ñippökwakpa mik ta ie' tö ie'pa ttökwa patké.

E' ukuöki ta ie' e' yéttsa Judea mia senuk Cesarea.

### Herodes du'wa

<sup>20</sup>E' kéwö ska' ta blu' Herodes ulurke taië Tiro ena Sidón wakpa ki. E' kuëki ie'pa kawö mé ñi a shkowaie ie' ska' ttök ie' ta. Ie'pa tö wëm kiè Blasto e' pablé'bak as ie' mi' ie'pa ttekölle ttök Herodes ta. Ie' kanéblöke Herodes a iu kuëbluie. Ie' ttò wa ie'pa tö kawö kié Herodes a tö ie'pa múat bèrè, ie'pa tö chkewö tuëke Herodes ka a e' kuëki.

<sup>21</sup>Ka et ta Herodes tö ie'pa kiéttsa. Mik e' kéwö de, eta ie' tö blu' datsi' iéka ta ie' e' tkéka s'shulo kulé tso' iwé a e' ki ta ee ikapaké ie'pa ta. <sup>22</sup>Ie'pa tö Herodes ché aneule i' es: “¡Ittöke i', e' kè dör s'ditsö, e'

dör kéköl wele ttöke!” <sup>23</sup> E' ttsër buaë ie' kukua ta' ie' e' kíkéká taië, kè wá Skéköl kíkaneqá. E' kueki e' wöshaë ta' Skéköl biyöchökwak eköl tö duè méká iki. Ie' katéwa öña tö ta' iduowa.

<sup>24</sup> E' dalewa ta' Skéköl ttè pakarke ème ká wa'ñe.

<sup>25</sup> Mik Bernabé ena Saulo e'pa tö ì uk ie'pa dë' Jerusalén e' wawé one, eta' ie'pa míyalne Antioquía. Ie'pa wá Juan kiè nies Marcos, e' mitsernak.

### Wiköl Batse'r tö Bernabé ena Saulo patké Jesús tté buaë pakök

**13** Skéképa Jesús icha erule tso' Antioquía, e'pa shüa Skéköl ttekölpa ena s'wöbla'ukwakpa tso'rak ee. E'pa dör Bernabé ena Simón (Simón e' kiè nies Dalor'iwak), ena Lucio dör Cirene wak, ena Menahem (Menahem e' talane Galilea blú kiè Herodes e' ta' nita), nies Saulo tso'ñak. <sup>2</sup> Ká et ta' ie'pa tso' Skéköl dalöiök batsè wa ta' e' shüa Wiköl Batse'r tö iché ie'pa a: “Kanè kuá'ki tso' ye' wá Bernabé ena Saulo a. Ie'pa shushtékeyö iwakanéwoie e' kueki ie'pa böl yóttsa ye' a kanè e' woie.”

<sup>3</sup> Ie'pa batsé ena tté Syé ta' one, ta' iulá mékarak ie'pa böl ki' e' dalewa ikié Syé a iki. E' ukuöki ta' ipatkémirakitö iwakanéuk.

### Bernabé ena Saulo tö Jesús tté paké Chipre wakpa a

<sup>4</sup> Es Bernabé ena Saulo míyal Seleucia patkéule Wiköl Batse'r wá. Ta' ee' ie'pa e' iéka kanò a míyal ká kiè Chipre ee. <sup>5</sup> Idemirak Chipre wé kanò irirke ee, e' ké kiè Salamina. Mik idemirak ee, eta' ie'pa tö Skéköl ttè pakémi judiowak a ini dapa'wo wé kos a. Juan mirwá ie'pa ta' ie'pa kímuk. <sup>6-8</sup> Chipre kos a itkarak demirak ká kiè Pafos ee. Ee' ie'pa tö judiowak kué eköl kiè Barjesús (e' kiè griegoie Elimas). E' dör ie'pa awá eköl. Ie' e' chò tö ie' dör Skéköl tteköl. Ie'

ye'arie kekraë ká e' wökir kiè Sergio Paulo, e' ska'. Sergio Paulo kabikeitsò buaë, ie' ki' Skéköl ttè kiane ttsè. E' kueki ie' tö Bernabé ena Saulo tsuk patké. Eré awá ñe' kè ki' ikiane tö Sergio Paulo tö ttè mik se' erblöke e' klö'wè. E' kueki ie' tö Bernabé ena Saulo ma'wé wöklö'wè. <sup>9</sup> Eta' Saulo, e' kiè nies Pablo, e' ki' Wiköl Batse'r debitu taië. Eta' Elimas suéwaitö krereé <sup>10</sup> ta' iché ia:

—Be' kachò. Be' e' wamblo' suluë. Be' dör wes bé es. Sene yésyèsè kos, e' bolök be' dör. ¿Kos be' tö Skéköl ñalé yésyèsè e' shkuli'wemirö? <sup>11</sup> I' ta' Skéköl tö be' we'ikeraë. Be' wöbla kè wawerpaia. Ká tköraë taië be' ki' ta' be' kè tö diwö olo suepaia.

E' bet ta' Elimas wöa ká mía ttsetseë, iwöbla kè wawéneia, e' kueki yile yulekeitö as tö iulaiö. <sup>12</sup> Mik ká e' wökir tö e' sué, eta' ie' erblé Jesús mik. Ie' wökranewa wes Skéképa ttè dör e' kíttsök.

### Pablo ena Bernabé tö Jesús tté paké Antioquía atë Pisidia ee

<sup>13</sup> Pablo ena ishköwapa e' iékarak kanò a Pafos ta' imíyal Perge atë Panfilia ee. Eta' Juan tö ie'pa méat ee, ta' imíane Jerusalén. <sup>14</sup> E' ukuöki ta' imíyal Antioquía atë Pisidia ee. Eta' ee' judiowak eno diwö ta' ie'pa dewá judiowak ni dapa'wo wé a e' tulésér. <sup>15</sup> Eta' wele tö ì kit Moisés ena Skéköl ttekölpa tö yékuö ki, e' aritsé dò ekuölö. E' ukuöki ta' ni dapa'wo wé wökirpa tö ichök patké Pablo ena Bernabé a:

—A yamipa, a' wá ilè tso' sa' pattoie, e' ta' sa' pattó.

<sup>16</sup> Eta' Pablo e' kéká ta' ikkaché ulá wa tö a' siwa'bló ta' ichéitö:

—A Israel aleripa nies ká kuá'ki wakpa tö Skéköl dalöieta, a' tö ye' tò ttsó. <sup>17</sup> Skéköl dör Israel aleripa e' Kéköl, kuaë e' tö se' bak ká iaiaë, e'pa shukitbak iwák a. Ie'pa sene' Egipto wes ká kuá'ki wakpa

es. Eë ie' tò ie'pa kímé taië alóne taië. E' ukuöki tã ie' tò ie'pa yéttsa ká e' kî idiché wa. <sup>18</sup>Ie' tò ie'pa dal'ëttsé ká sir poë wé kè yi serku' e' a dôka duas dabom tkëyök (40). <sup>19</sup>Pë' ditséwöpa dôka kul bak senuk Canaán e'pa e'waitö ká mè se' yépa bak ká iaiäë, e'pa a. <sup>20</sup>E' kos kî duas bak cien tkëyök kî dabom skeyök (450) ekkë.

“E' ukuöki tã Skëköl tò ie'pa shü kéka eköl eköl imalepa wëttsöie dö itteköl Samuel e' kéwö ska'. <sup>21</sup>E' ukuöki tã ie'pa tò Samuel a blu' kié eköl. Es Skëköl tò Saúl méka ie'pa blúie, e' dör Quis aladulaköl. Ie' dör Benjamín ditséwö. Saúl sené ie'pa blúie dôka duas dabom tkëyök (40). <sup>22</sup>E' ukuöki tã Skëköl tò Saúl uyéttsa tã David mékãitö blu'ie iskéie. David ché Skëköl tò i' es: ‘Ye' tò David dör Jesé alá, e' sué. Ie' wër buaë ye' wa, ie' erbikò wës ye' erbikò es. Ì kiane ye' kî wë, e' wakaneweraëitö.’ <sup>23</sup>David aleri eköl dör Jesús, e' patké Skëköl tò se' dör Israel aleripa e'pa tsatkök wës ie' kablë' es. <sup>24</sup>Erë kam Jesús döbitü e' yöki Juan S'wöskuökwak tò se' Israel aleripa ulitane patté tò se' kawötã er mane'uk Skëköl a. Nies se' kawötã e' wöskuöklor di' a. <sup>25</sup>Mik Juan kanè erkewatke tã ie' tò iché: ‘Wëm datse eköl e' kinuk a' tso', e' kè dör ye'. Ie' datseia ye' itöki. Ie' dör ye' tsatã, e' kueki ie' klökkuö kicha è kè wötsënanuk ye' siarla e' a.’

<sup>26</sup>“A s'yamipa, Abraham aleripa, nies a' wépa kè dör ie' aleripa erë Skëköl dalöieta' esepa, se' ulitane a tsatke tté e' patkënetke. <sup>27</sup>Jerusalén wakpa ena iwökirpa e'pa kè wã ijcher tò Jesús dör S'tsatkökwak. Nies eno diwö bit tã ie'pa tò ie' tté kitule yëkkuö kî Skëköl ttekölpa wã, e' aritseke, erë e' kè wã ane ie'pa éna. Mik ie'pa tò Jesús wómëttsã ttèwã

etã e' wa ie'pa tò ie' tté tso' kitule Skëköl yëkkuö kî e' wã tkö'wé. <sup>28</sup>Ie'pa kè wã ì sulu kune ikî ittowa erë ikkatéraitö Pilato a as ittökwa patkòitö krus mik. <sup>29</sup>Es Jesús ttéwarakitö. Mik ie'pa tò ì kos kitule Skëköl yëkkuö kî, e' wawé one, etã inú éwarakitö krus mik tã iwötéwarakitö pö a. <sup>30</sup>Erë Skëköl tò ie' shké'wékane. <sup>31</sup>E' ukuöki tã ie' e' kkachéne ká taië wépa manetwa ie' wapie Galilea dö Jerusalén, e'pa a. Iñe tã e'pa kos dör ie' ttekölpa judiowak ulitane wörki.

<sup>32</sup>“Es sa' tso' tté buaë i' pakök a' a. E' dör ì uk Skëköl kablë' sa' yépa bak ká iaiäë e'pa a <sup>33</sup>e' wã tka sa' dör ie'pa aleripa e' wörki. Itka mik Skëköl tò Jesús shké'wékane etã. Itka wës itso' kitule Salmo böt kî es wé ichéitö: ‘Be' dör ye' alá. Iñe yö ikkachétke tò ye' dör be' yé.’<sup>¶</sup> <sup>34</sup>Nies Jesús yé'at Skëköl tò iyëkkuö kî: ‘Wës ye' tò ye' tté yësyësë batse'r taië e' me' David a tò ye' er buaë chöraë ie' a, es ye' er buaë chöraë be' a.’<sup>§</sup> E' wã dör tò Skëköl tò ie' shké'werane as kè ichkà nurwa. <sup>35</sup>E' kueki nies itso' kitule: ‘Be' kanè méso batse'r, e' kè mepaatbö as ichkà nurwa.’<sup>\*\*</sup> <sup>36</sup>Es David, se' blú bak iaiäë, e' tò imalepa bak e' kéwö ska', e'pa wëttsé wës Skëköl tò iyë'ia es. E' ukuöki tã idu'wã tã itöbinewa iyëpa pö a tã inunewa. <sup>37</sup>Erë wé shké'wékane Skëköl tò e' chkà kè nune'wa. <sup>38</sup>A yamipa, a' wã ijchenü tò se' nuì olo'yarmi se' kî Jesús batamik, e' tté pakeke sa' tò a' a. <sup>39</sup>Tté méat Moisés tò dalöiëno, e' kè a se' nuì olonuk. Erë wépa erblé Jesús mik esepa nuì olordaë ie'pa kî. <sup>40</sup>A' tso' erkî as a' kè tã itkò wës Skëköl ttekölpa tò ikit es wé Skëköl tò iché:

<sup>41</sup>‘A ye' wayuökwakpa, ye' ttò ttsó. Ì weraëyö a' kéwö ska' tã, e' dör taië kè klöonuk a' a ekkë.

<sup>¶</sup>13:33 Salmo 2.7

<sup>§</sup>13:34 Isaías 55.3

<sup>\*\*</sup>13:35 Salmo 16.10

Eré a' a' ipakarmi eré kè a' tò iklö'wëpa. E' kuekî a' tkinú. A' enúwa.<sup>††</sup>

<sup>42</sup>Etá Pablo ena Bernabé e' yélur ñi dapa'wó wé a. Etá pè' tò iché ie'pa a a' kiéne ttè ekképa skà pakókne sa' a eno diwö ètò wa. <sup>43</sup>Mik ie' dapa'wérak e' one, etá judiowak, ñies pè' e' yué judiowakie esepa taië míyal Pablo ena Bernabé ta. Pablo ena Bernabé tò ie'pa patté tò a' e' tkówa darèrèè Skèköl er buaë chöke se' a e' a.

<sup>44</sup>Eno diwö ètò wa etá ká e' wakpa iekkè ta idettsarak seraa Skèköl ttè kïttsök. <sup>45</sup>Eré mik judiowak tò isué tò pè' dapane taië Pablo ttò kïttsök, etá ie'pa yökî isulune ta ie' kékarak ichök tò ì cheke ie' tò e' dör kache. Ie'pa tò ie' ché sulué. <sup>46</sup>Eré ie' ena Bernabé kè suane ta iché iarak:

—Sa' kawötá a' dör judiowak e'pa pattoie kewe Skèköl ttè wa, eré a' kè wá iklöne. Wësua a' ibikeitseke tò sene michoë kè mène a' kî. E' kuekî sa' míyal ipakök pè' kè dör judiowak esepa a. <sup>47</sup>Es Skèköl tò sa' patké. Ie' yèkkuö tò ichè:

'Be' tkékayö wes bö'wö wöñar stui a es. Es ye' tò be' patkeraë ká ulitane wakpa pattök, Ie'pa tsatké e' tté pakeraëbö ká wa'ne dö wé ká i' erkerö ee.<sup>‡‡</sup>

<sup>48</sup>Mik pè' kè dör judiowak e'pa tò ttè e' ttsé etá ie'pa ttsenekarak buaë. Ie'pa e' kékarak Skèkèpa Jesús tté kïkökka. Wëpa qos suleténeat senuk michoë, esepa erblé Jesús mik. <sup>49</sup>Es Skèkèpa Jesús tté pakane ká e' wa'ne a. <sup>50</sup>Eré alakölpa dalöiertä' taië ká e' kî esepa tò judiowak tté dalöieke buaë, ñies wëpa dalöiertä' taië ká e' kî, esepa shutiwéka judiowak tò as Pablo ena Bernabé we'ikörakitö as ie' yöttssarak ká e' kî. <sup>51</sup>Etá Pablo ena Bernabé tò iklö po ppée ikkachoie ie'pa a tò ie'pa kî inuí ane ta míyal Iconio.

<sup>52</sup>Eré Jesús ttókatapa atë e'pa tts'ene buaë ñies ie'pa a Wiköl Bats'e'r tso' taië.

### Pablo ena Bernabé tò Jesús tté paké Iconio wakpa a

**14** Mik Pablo ena Bernabé demi Iconio, etá ie'pa dewá judiowak ñi dapa'wó wé a wes ie'pa wöblar es. Ie'pa tò Jesús tté paké buaë. Es judiowak ñies pè' kè dör judiowak, esepa taië erblé Jesús mik. <sup>2</sup>Eré judiowak kè erbléne imik, e'pa tò pè' kè dör judiowak, esepa shutiwéka ena iluwéka taië s'yamipa kî as iwe'ikörakitö. <sup>3</sup>Eré Pablo ena Bernabé e' tséat ká taië ee. Ie'pa tò Skèkèpa tté pakeke kè suane. Skèköl tò diché mé ie'pa a ì kè or yi a ese woie iwà kka-choie tò ie' er buaë chöke siá e' tté dör moki. <sup>4</sup>Eré ká e' wakpa ñi blabatsélor, shabötspa wa judiowak tté wër buaë, shabötspa wa Jesús ttekölpa tsá e'pa tté wër buaë. <sup>5</sup>Judiowak ena pè' kè dör judiowak, e'pa tò kawö mé ñi a iwökirpa ta Pablo ena Bernabé we'iköie, tè ák wa itowáie. <sup>6-7</sup>Eré mik Pablo ena Bernabé, e'pa wa ijchenewa, etá ie'pa tkayalmi dömi ká kiè Licaonia ee. Ká kiè Listra ena ká kiè Derbe atë ee. Ká e' wa'ne ie'pa tò Jesús tté buaë paké.

### Pablo tène ák wa ittowáie ká kiè Listra ee

<sup>8-9</sup>Etá wëm tso' eköl Listra, e' kune' klö bachiulewa. Ie' kè shko. Ie' tkër Pablo ttöke e' ttsök. Pablo tò isuéwa kreere. Ie' wa ijcher tò wè' ierblé Jesús mik as ibuarne. <sup>10</sup>Etá ie' tò iché ia aneule:

—;Be' e' kóka, be' e' duóká!

Etá wëm e' kéká tuneka tsut ta ishkémi. <sup>11</sup>Mik pè' tò, ì wé Pablo tò e' sué, etá ie'pa tò ichémi aneule ie'pa Licaonia ttò wa:

††13:41 Habacuc 1.5

‡‡13:47 Isaiás 49.6



—¡Wépa dalöiekesö skökölie e'pa dettsa se' shuá s'ditsöie!

<sup>12</sup> Pablo kapaké kibiie, e' kueki ie'pa tö ie' klö'wé ie'pa kéköl kiè Hermes e' skéie. Bernabé klö'wérakitö ie'pa kéköl kiè Zeus e' skéie.<sup>¶¶</sup> <sup>13</sup> Zeus wé merka ká e' ñalé ukuö o'mik tsinet. Zeus sacerdote wa baka wé'ne ena ma'ma wörkua debitu taié. Ie' ena pè' ulitane éna baka wé'ne jchak mè Pablo ena Bernabé a idalöioie ikékölpaié. <sup>14</sup> Eré mik Bernabé ena Pablo wa ijchenewa, etá ie'pa e' datsi' jchéé ikkachoie tö e' dör sulué ie'pa a. Tà ie'pa mía pè' shuá tá ichérakitö aneule:

<sup>15</sup> —A kéképa, ¿ì uk a' tso'? Sa' dör s'ditsö wes a' es. Sa' debitu tté buaé pakök a' a as a' tö íyí ikké kè wà ta' ese kos watöttsa tá a' er mane'ù Skéköl chók e' a. Ie' tö ká jai ena ká i' ena dayé ena ì kos tso' ikí e' yó'at. <sup>16</sup> Ká iaiaé dò ikké tá sulitane serke wes iwák kí ikiane es, e' dalé'ttsé'bitu Skéköl tö. <sup>17</sup> Eré e' dör es, eré ie' dör buaé se' tá kekraé, e' wa ie' tö iwà kkaché sia tö ie' dör Skéköl chók. Ie' tö kalí patkeke a' a. Ie' tö iyiwö weke a' a. Ie' tö chkè meke a' a ñanoie a' ttsé'woie buaé.

<sup>18</sup> Eré ie'pa tö ì kos ché iarak, eré iekké tá baka wé'ne jchérakitö Pablo ena Bernabé dalöioie wes Zeus ena Hermes es.

<sup>19</sup> E' shà tá judiowak welepa datse Antioquía ena Iconio, e'pa debitu tá Lистра wakpa dakíñérakitö Pablo ttökwa. Iklö'wéwarakitö tá itérakitö taié ák wa. Ibikeitsérakitö tö iduowa, e' kueki ie'pa tö ikuémi méat tär Lистра ké kkö a wí'kie. <sup>20</sup> Eré mik Jesús ttókatapa malepa e' dapa'wéká ipamik, etá ie' e' kéká míane Lистра. E' bule es tá ie' mía Bernabé tá dò ká kiè Derbe ee.

<sup>21</sup> Ie'pa demi Derbe tá Jesús tté buaé pakérakitö ká e' wakpa a. Taié ie'pa e' yué Jesús ttókataie. E' ukuökí tá ie'pa

debitune Lистра ena Iconio ena Antioquía. <sup>22</sup> Ká ekké kos a ie'pa tö Jesús ttókatapa er diché íé ena ipablérakitö as ie' tköwarak daréréè tté mik se' erblöke e' a. Ie'pa tö iché iarak: “Se' wake' weirdaé ká i' kí dowáie aishkuö tá ì blúie Skéköl tso' e' a.” <sup>23</sup> Nies ká kos e' kí ie'pa tö wépa shushté kaneblök Skéképa Jesús icha erule erule e'pa wókirpaie. E'pa kí ie'pa ikié Syé a ena batsé, e' ukuökí tá iméarakitö Skéképa mik ie'pa erblöke e' ulá a.

### Pablo ena Bernabé dene Antioquía até Siria ee

<sup>24</sup> E' ukuökí tá Pablo ena Bernabé tkami ká kiè Pisidia demirak Panfilia. <sup>25</sup> Ie'pa tö Jesús tté buaé paké ká kiè Perge e' wakpa a. E' ukuökí tá ie'pa mía ká kiè Atalía ee. <sup>26</sup> Ee tá ie'pa e' iéka kanò a míane Antioquía iyamipa tö ie'pa patké'mi Jesús tté pakök e'pa ska'. Ee iyamipa tö ie'pa me' Skéköl er buaé chöke se' a e' ulá a ì kanéuk ie'pa dare e' woie. <sup>27</sup> Mik ie'pa demine Antioquía, etá Skéképa Jesús icha erule e' dapa'wékarakitö. Tá ì kos wé Skéköl tö ie'pa tá, nies wes ie' tö ikkayé pè' kè dör judiowak, esepa a tö ie'pa erblömi ie' mik wes judiowak es, e' kos pakérakitö iyamipa a. <sup>28</sup> Etá ie'pa e' tséat ká taié Jesús ttókatapa tso' Antioquía, e'pa tá.

### Skéképa Jesús icha e'pa wókir kibipa ñi dapa'wé Jerusalén

**15** E' kèwö tá, wépa welepa e' yéttsa Judea demi Antioquía. Ie'pa tö s'yamipa wöbla'wémi tté i' wa: “A' wépa kos kawötá tottola kkuölit tée tsir wes Moisés ikitat es. E' kè kaneone a' wá, e' tá kè a' tsatkérpa.” <sup>2</sup> E' kueki Pablo ena Bernabé ñi iutéka daréréè ie'pa tá. E' kueki iyamipa tö Pablo ena Bernabé

**¶¶14:12 Zeus ena Hermes:** E'pa dalöiök griegowak bak skökölie ká iaiaé. Ie'pa a Zeus dör skéköl bua'ie imalepa tsata. Ie'pa tö iklö'wé tö Hermes dör Zeus tteköl. Romawak tö Zeus kiè méka Júpiter ena Hermes kiè mékarakitö Mercurio.

ena welepa skà, e'pa shushtë as imi'yal Jerusalén ttè ñe' shulök Skëkëpa Jesús icha wökir kibipa ena Jesús ttekölpa tsá, e'pa ta.

<sup>3</sup>Es Skëkëpa Jesús icha erule tso' Antioquía, e'pa tö Pablo ena imalepa patkëmi Jerusalén. Ie'pa tkami Fenicia ena Samaria. Eta ipakeramirakitö iyamipa a tö wes pé' kè dör judiowak, esepa er mane'wé Skëköl a. Ttè e' tö ie'pa ttsé'wé buaë.

<sup>4</sup>Mik Pablo ena Bernabé demirak Jerusalén, eta eë Skëkëpa Jesús icha eruleë e'pa kos ena iwökirpa ena Jesús ttekölpa tsá, e'pa tö ie'pa kiéwa buaë. Eta ì kos o' Skëköl tö ie'pa wa e' pakérakitö imalepa a. <sup>5</sup>Erë Jesús mik erblökwakpa dör fariseowakpa, esepa welepa e' kéka ta ichéitörak:

—S'yamipa kè dör judiowak esepa wëpa kawötä itóttola kkuölit tée tsir. Ñies ie'pa a ikawötä chè tö Moisés ttè kitulebak e' dalöiök ie'pa kawötä.

<sup>6</sup>Eta Skëkëpa Jesús icha wökir kibipa ena Jesús ttekölpa tsá, e'pa ñi dapa'wéka ttè e' bikeitsök bua'iewa. <sup>7</sup>Ie'pa tö ipaké tajë, e' ukuöki ta Pedro e' kéka ta ichéitö:

—A yamipa, a' wa ijcher tö ká iai-äë Skëköl tö ye' shukitbak a' shua Jesús tté buaë pakök, pé' kè dör judiowak, esepa a as ie'pa erblö imik. <sup>8</sup>Ie' wa se' er suule buaë, ie' tö Wiköl Batse'r mé ie'pa a wes se' a ime'itö es. Es ie' tö se' a ikkaché tö ñies ie' tö ie'pa klö'wé ie' ichaie. <sup>9</sup>Ie' tö ie'pa er paiklé ie'pa erblé Jesús mik e' wa. Es se' wa ijcher tö ie'pa ena se' dör ñies ème ie' wöa. <sup>10</sup>A' tö ie'pa ké Moisés ttè darërëë e' dalöiök, erë e' kè dalöiëne' se' a, ñies se' bak ká iaiäë e'pa kè a idalöiëne'. Iñe ta çiók a' tso' Skëköl wönatkök es? <sup>11</sup>E' kè dör es. Se' tö iklö'wé tö se' tsatkëne Skëkëpa Jesús er buaë chöke sia e' è wa. E' suë ie'pa tsatkëne ñies.

<sup>12</sup>E' ukuöki ta ie'pa ulitane siwa' blélur tso' Bernabé ena Pablo e'pa kapaköke e' ttsök. Ie'pa tso' ipakök tö wes ì kè or yi a ese wérakitö Skëköl batamik pé' kè dör judiowak, esepa shua Skëköl diché kka-choie. <sup>13</sup>Ie'pa kapaké one eta Santiago tö iché:

—A yamipa, ye' ttö ttsö. <sup>14</sup>Simón tö se' a ipaké wes Skëköl tö, pé' kè dör judiowak, esepa tsá kímé er bua' wa as ie'pa welepa dò ie' wák ichaie. <sup>15</sup>Ñies e' sini'kué Skëköl ttekölpa bak ká iaiäë e'pa tö. Ie'pa tö iyé':

<sup>16</sup>Skëköl tö iché: 'Aishkuö ta ye' datsene. Eta David jchúlipa kerakayö iwák suë. Ie'pa dörane diché ta' tajë wes iaiäë es <sup>17</sup>as pé' malepa kè dör judiowak dör ye' icha esepa tö ye' yulö.

<sup>18</sup>Es ye' tö ttè i' chétke.

Ká iaiäë ttè i' me'atbakyo a' a.'<sup>§§</sup>

<sup>19</sup>“Ttè i' kueki ye' ibikeitsè tö, pé' kè dör judiowak er mane'wé Skëköl a, esepa kè tsiriuk s'kàne judiowak ser ese wa. <sup>20-21</sup>E' kueki yëkkuö patkëmisö ie'pa a e' ki ichösö tö iyi meule iyi diököl tso' dalöië skëkölle ese a, ese kè kar, ese kè katar. Ñies ie'pa kè kàne trënuuk. Iyiwak ttéwa kuli' siuleka ese chkà kè katar ñies ipé kè katar. Ká iaiäë ttè i' pakanemi ká wa'ñe se' ñi dapa'wo wé a eno diwö bit ekkè. E' kueki iyi ekkè è shtëmisö ie'pa a.”

### **Yëkkuö patkëne s'yamipa kè dör judiowak, esepa a**

<sup>22</sup>Skëkëpa Jesús icha eruleë e'pa kos ena iwökir kibipa ena Jesús ttekölpa tsá, e'pa wa iwër buaë tö wëpa welepa shushtë ie'pa shua as imi'rak Pablo ena Bernabé ta dòmi Antioquía. Es ie'pa tö Judas kiè ñies Barsabás ena Silas, e'pa shushtë. Wëpa e'pa dalöieke tajë s'yamipa ulitane tö. <sup>23</sup>Eta yëkkuö shtë

iwökirpa tö e' mé ie'pa a as iwä imi'rak. Yëkkuö e' tö iché i' es:

“Sa' dör Skëkëpa Jesús icha eruleë e'pa wökir kibipa ena Jesús ttekölpa tsá, sa' dör a' yamipa. Sa' tso' yëkkuö i' shtök a' dör sa' yamipa erë kè dör judiowak serke Antioquia ena Siria ena Cilicia e'pa a. A' shkë'wémi sa' tö. <sup>24</sup>Sa' wä ijchenewä tö sa' yamipa wëlepa e' yë'ttsä sa' shüä, e'pa dë'mi a' ska'. Ie'pa tö a' tsirio' iwákpa ttè wa. E' tö taië a' wökir tsiriwëka. Kè sa' wä kawö mène ie'pa a a' wöbla'woie i' wa. <sup>25</sup>E' kueki sa' ulitane wa iwër buaë wëpa wëlepa shushtök sa' shüä as imi' a' sauk Bernabé ena Pablo tä. Sa' yami e'pa dalër taië sa' éna. <sup>26</sup>Ie'pa e' me'ttsa weinuk taië. Ie'pa kè suane ttèwä Skëkëpa Jesucristo tté kueki. <sup>27</sup>Sa' tö Judas ena Silas patkëmi ttök a' tä. Ie'pa tö ipakeraë a' wöshaë yësyësë wës yëkkuö i' ki ikitule es. <sup>28-29</sup>Buaë idir Wiköl Batse'r a, nies sa' a, tö a' kè kawötä judiowak ser e' blök seraa. I' è blök a' ké: Chkè meule iyi diököl tso' dalöië ese a, e' kè katar. Nies ipé kè katar ena iyiwak ttèwä kuli' siuleka ese chkà kè katar. Kè a' kàne trënu. İyi ekkè è kawötä blè a' tö. A' tö iwé es, e' tä e' dör buaë. Skëköl tö a' kimè.”

<sup>30</sup>Etä ie'pa e' chëat tä imíyal Antioquia. Mik ie'pa demi eë tä ie'pa iyamipa dapa'wéka, e'pa a yëkkuö mirdak iwä e' méitö. <sup>31</sup>Mik iyamipa tö yëkkuö aritsé, etä e' tö ie'pa er pablé taië, e' kueki ittse'nerak buaë. <sup>32</sup>Judas ena Silas, e'pa dör Skëköl ttekölpa nies, e' kueki ie'pa tö iyamipa patté taië. E' tö iyamipa er pablé taië, ikimé taië. <sup>33-34</sup>Ie'pa sené eë kukuie. Mik ie'pa mitkene itö wane etä iyamipa tö iché iarak a' shkó wöbla wa. <sup>35</sup>Erë Pablo ena Bernabé e' tsëat Antioquia. Ie'pa ena imalepa taië e'pa tso'rak

Skëkëpa Jesús tté buaë pakök. Nies ttè e' wa s'wöbla'uk ie'pa tso'.

### Pablo ena Bernabé kè kaneblöku'ia nita

<sup>36</sup>Kawö tka taië, e' ukuöki tä Pablo tö iché Bernabé a:

—Mishkane etökichane ká kos ki se' bak Skëkëpa Jesús tté pakök e' ane s'yamipa sauk tö is ie'pa tso'.

<sup>37</sup>Bernabé ki Juan kiane tsëmi ie'pa tä. Juan e' kiè nies Marcos. <sup>38</sup>Erë Marcos tö ie'pa me'at ká kiè Panfilia ee. Ie' kè kaneblëneia ie'pa tä. E' kueki Pablo kè éna ie' tsakmi ie'pa tä. <sup>39</sup>Ini iutérak darërëë erë kè ishüline. E' kueki ie'pa ni blabatsélor. Bernabé wä Marcos mítser e' tä tä ie'pa míyal kanò ki dò Chipre. <sup>40</sup>Pablo tö wëm kiè Silas e' kiëmi e' wapie. Iyamipa tö ie'pa méat Skëköl er buaë chò siä e' ulä a. Etä ie'pa e' yé'ttsä eë <sup>41</sup>tkamirak Siria ena Cilicia. Ie'pa tso' Skëkëpa Jesús icha erule erule tso' ká e' ki ie'pa diché ki iök Jesús ttè wa.

### Timoteo mía Pablo ena Silas wapie

**16** E' ukuöki tä Pablo ena Silas demi Derbe tä imíyal Listra. Eë wëm kiè Timoteo e' serke, ie' dör Jesús ttökata. Ie' mi dör judiowak e' dör Jesús ttökata nies. Erë iyé dör griegowak. <sup>2</sup>S'yamipa serke Listra ena Iconio, e'pa tö icheke tö Timoteo dör pë' buaë. <sup>3</sup>Pablo ki ie' kiane tsëmi e' wapie. Erë judiowak serke ká e' ki e'pa ulitane wä ijcher tö Timoteo yé e' dör griegowak. E' kueki Pablo tö ie' ké itóttola kkuölit tök tsir as judiowak kè ulurka iki. <sup>4</sup>Ká kos wé ie'pa dami eë i' uk patkë' Skëkëpa icha erule tso' Jerusalén e'pa wökirpa ena Jesús ttekölpa tsá e'pa tö, e' wä paké ie'pa tö s'yamipa ulitane a. <sup>5</sup>Es Skëkëpa Jesús icha erule erule e'pa kos diché ki iëne Jesús tté a. Nies pë' ki iërke taië kekraë.

**Pablo tö wëm döer Macedonia  
wak e' sué kabsueie**

<sup>6</sup> Etä Wiköl Bats'e'r kè wä kawö mène ie'pa a Jesús tté buaë pakök ká kiè Asia ee. E' kueki ie'pa tkami ká kiè Frigia ena Galacia <sup>7</sup> demi ká kiè Misia e' kköröwä ee. Etä ie'pa tö ima'wé shkök-wä ká kiè Bitinia e' a, erè Jesús Wiköl kè wä kawö mène ie'pa a. <sup>8</sup> E' kueki ie'pa tkami yësyësë Misia kker demi ká kiè Tróade dayë kkò a wé kanò irirke ee. <sup>9</sup> Etä nañewe Pablo tö ì sué kabsueie. Ie' tö wëm sué eköl, e' döer ká kiè Macedonia e' wak. E' dur shkë'ka tã ikköché ia: “Be' shkótkö Macedonia sa' kimuk.” <sup>10</sup> Pablo tö e' sué one tã bet sa' dali iémi mitke Macedonia. Sa' wä ijcher buaë tö Skököl ki ikiane tö sa' tö Jesús tté buaë pakè ká e' ki.

**Alaköl kiè Lidia e' erblé Jesús mik**

<sup>11</sup> Etä sa' e' iéka kanò a Tróade, míyal yësyësë ká kiè Samotracia ee. Bule es tã sa' demi ká kiè Neápolis ee. <sup>12</sup> Ee tã sa' míyal klò ki dö ká kiè Filipos ee. Ká e' a romawak tso' taië. E' döer ká bua'buwa ate Macedonia. Ee sa' sené ká tkël ká skël ulatök. <sup>13</sup> Judiowak eno diwö tã sa' e' yélur míyal di' kkömik wé sa' tö ibikeitsè isalema judiowak wä ká tso' ttoie Skököl tã ee. Mik sa' tö ikué, etä ee sa' e' tulésér Jesús tté buaë pakök alakölpä ni dapa'wéka e'pa a. <sup>14</sup> Ie'pa eköl kiè Lidia, e' döer ká kiè Tiatira e' wak. Ie' döer datsi' bua'buwa daloshdalosh ese wataukwak. Ie' tö Skököl dalöieke taië. Skökëpa tö ie' er ñi'wé as Pablo ttöke kos e' klö'uitö mok-ië. <sup>15</sup> Etä ie' e' wöskué iyamipa tso' ie' u a e'pa tã. E' ukuök tã ie' tö sa' a iché kröröë:

—A' ibikeitsè tö mokijë ye' döer Jesús mik erblökwak, e' tã a' klönüia ye' ska'.

Es ie' tö sa' ké klönükia ie' ska'.

**Pablo ena Silas wötënewa  
s'wöto wé a Filipos**

<sup>16</sup> Ká et tã sa' mirwane wé s'ttöke S'yé tã ee. Sa' mirwäia tã pe' busi kuéwa sa' tö eköl, e' a wimblu sulusi tso' eköl, e' wa íyi tötkëkitö. Wëpa wëlepä tö ie' töttsä ie'pa a kanëblök íyi tötkök, e' ské klö'weke ie'pa tö taië e' a. <sup>17</sup> Busi e' shkëmi Pablo ena sa' itöki. Ie' ardatse:

—Wëpa ikkëpa döer Skököl íyi ulitane tsatã e' kanè mësopa. Ie'pa tö s'tsatkë ñalé e' tté pakeke a' a.

<sup>18</sup> E' wambléitö ká taië, bata ekkë tã Pablo ulunekã taië. Ie' e' wotrëene tã ichéitö wimblu sulusi tso' busi a e' a:

—Jesucristo ttò wa ye' tö be' a iché be' e' yóttsa ie' a.

E' wöshäe tã wimblu sulusi e' yéttsa ia.

<sup>19</sup> Mik busi wökirpa tö isué tö inuköl kè dë'ia ie'pa ulà a busi batamik, etã ie'pa tö Pablo ena Silas klö'wëwä tsémirak wé tté shulökwakpa tso' ee. <sup>20</sup> Ie'pa tö ikkatérak tté shulökwakpa a tã ichérakitö:

—Wëpa ikkëpa döer judiowak. Taië ie'pa tso' sa' shutiuk. <sup>21</sup> Sa' döer romawak, e' kueki kè sa' a kawö mène ie'pa tö s'wöbla'weke sene wa e' klö'uk ena e' wä uk.

<sup>22</sup> Etä ká e' wakpa bitëshka Pablo ena Silas ki. Etä ishulökwakpa tö idatsi' yöktsä ké iki tã ippök ké darërëe kal wa.

<sup>23</sup> Ibunerak siarë wötëwarakitö s'wöto wé a. Tã ichérakitö s'wöto wé wökir a tö ikkö'nú bua'iewä as kè itköyal. <sup>24</sup> Mik ie' a kawö e' mène, etã ie' tö Pablo ena Silas wötëwä iwé wötëulewä bua'iewä, ese a. Ie' tö ie'pa klò tiéwä kaltak wöbiule s'klò wötowä ese a. Es iméarakitö.

<sup>25</sup> Ká de ká shaböts etã Pablo ena Silas tso' ttök Skököl tã ena ittseittsök. Imalepa tso' ittök. <sup>26</sup> E' wöshã tã í tka darërëe. S'wöto wé wöppéitö darërëe. E' wöshäe tã ukkö ulitane kköburolone. Ì kos wa ie'pa tso' moulewä, e' wöt-

sërolone. <sup>27</sup> S'wöto wé wökir tĩ'neka. Mik ie' isuë tö ukkö kos tso' áie ta ibikeitséitö s'tso' wötëule e' kos tkayal. E' kueki itabë kuéttisaitö e' ttowaie. <sup>28</sup> Erë Pablo aneka: —Kè be' e' ttökwa! Sa' tso'ia ulitane.

<sup>29</sup> Eta s'wöto wé wökir tö bö'wö kié ta itunewa Pablo ena Silas ska'. Eë ie' e' tkéwa kuchë ki ie'pa wöa painéka suane taië. <sup>30</sup> Eta ie' tö ie'pa yéttsa u'rki ta ie'pa a ichaké:

—A këkëpa, çì uk ye' kawöta e' tsatkoie?

<sup>31</sup> Ie'pa ie' iuté:

—Skëkëpa Jesús mik be' erbló eta be' tsatkërdaë ñies be' yamipa tsatkërmi es.

<sup>32</sup> Eta ie'pa tö Skëkëpa ttë paké ie' a ena iyamipa kos tso' iu a, e'pa a. <sup>33</sup> Eta e' nañewe ulatök s'wöto wé wökir tö ie'pa tsémi e' ta. Ie'pa shka'ule taië e' kapeyéitö. Eta ie' ena iyamipa kos e' wöskuélor. <sup>34</sup> E' ukuöki ta ie' tö itsémirak iu a ta itíerakitö. Ie' ena iyamipa e'pa erblé Skëköl mik, e' kueki ie'pa kos tts'ëne buaë.

<sup>35</sup> Kä ñine ta ishulökwakpa tö ishkekípa patkémi ichök s'wöto wé wökir a tö Pablo ena Silas ómine. <sup>36</sup> S'wöto wé wökir tö iché Pablo a:

—Sa' shulökwakpa tö ye' a kawö mé a' ökmine. E' kueki a' yüne bèrë.

<sup>37</sup> Erë Pablo tö iché ia:

—Sa' dör romawak\* Ie'pa tö sa' buk sulitane wöshäë kam sa' shulir e' yöki. Sa' wöt'ëwaitö s'wöto wé a. Iñe ta ie'pa ki sa' kiane èmine akir. Ie'pa kè a kawö ta' iwöje es. As ie'pa wákpa bitu sa' ökmine.

<sup>38</sup> Eta shkëkípa tö ttë e' chéne ishulökwakpa a. Mik ie'pa ittse tö Pablo ena Silas dör romawak, eta taië ie'pa suane. <sup>39</sup> Eta ie'pa míyal Pablo ena Silas ska' ta ichéerakitö:

—Ì sulu wamblé sa' tö a' ki e' olo'yó sa' ki.

Eta iémine ta ikköchéarak ia: “A' e' yólor sa' ká ki.” <sup>40</sup> Eta Pablo ena Silas yénettsa s'wöto wé a míyal Lidia u a iyamipa weblök. Ie'pa pablérakitö eta imíyal.

### Tesalónica wakpa tsirineka Jesús ttë kueki

**17** Pablo ena Silas tkami ká kiè Anfípolis ena ká kiè Apolonia demirak ká kiè Tesalónica wé judiowak wa ñi dapa'wo wé tso' ee. <sup>2</sup> Eta Pablo de'wa e' wé a eno diwö wa wes ie' wöblar es. Eë ie' kapaké ie'pa ta Skëköl yëkküö wa eno diwö mañat. <sup>3</sup> Ie' tö ikkaché ie'pa a tö itso' kitule Skëköl yëkküö ki tö wé pairine'bitu idi' wa s'blúie e' tterawa ta ishkerdakane. Ie' tö iché ie'pa a:

—Jesús pakök ye' tso' a' a, e' wák dör wé pairine'bitu idi' wa s'blúie e'.

<sup>4</sup> Judiowak welepa erblé Jesús mik, ta ie'pa de Pablo ena Silas kíie. Ñies griegowak tö Skëköl dalöieke wes judiowak es, esepa taië erblé Jesús mik ena alakölpa dalöier'ta esepa taië erblé imik ñies. <sup>5</sup> Erë e' tö judiowak malepa uluwéka taië. Eta wëpa sulusipa tso' éme ñala ki, esepa kíerakitö pé' dapa'uk taië, e'pa kí uluwérakitö ta imíyal késik wa pé' malepa uluwéka. Eta itkawarak késik wa Jason u a Pablo ena Silas yulök yéttsa më imalepa ulurke taië e'pa ulà a. <sup>6</sup> Erë kè iwa ikunerak ee. E' kueki Jason ena iyamipa welepa e'pa kuémirakitö ká e' wökirpa wöa ta ichéitörak aneule:

—Wëpa ikkëpa tö ká ulitane wakpa tsirio', e'pa de íe ñies. <sup>7</sup> Jason tö ie'pa kiéwa iu a. Ie'pa ulitane tso' ichök tö se' blú kibi dör ku'ki, e' kiè Jesús. Ie'pa tö sa' blú kibi e' ttë dalösewëwa.

<sup>8</sup> Mik pé' ulitane ena iwökirpa tö ttë e' ttsé, eta ie'pa shutíneka taië. <sup>9</sup> Erë Jason ena iyamipa kërakitö inuköl mukat iwá

\*16:37 Romawak: Pablo ditséwö dör judiowak erë ie' yami bak e' wele e' yö' romawakie, e' kueki ñies ie' dör romawak.

kkachoie tō ie'pa datskene ishulök tã  
ie'minerakitō.

**Pablo ena Silas tō Jesús tté  
paké Berea wakpa a**

<sup>10</sup>Ká tuinetke etã bet iyamipa tso'  
Tesalónica e'pa tō Pablo ena Silas  
patkémí ká kiè Berea ee. Ie'pa demi  
Berea etã imíyal judiowak ñi dapa'wo  
wé a. <sup>11</sup>Judiowak e'pa er dör buaë ju-  
diowak tso' Tesalónica e'pa tsatã. Ie'pa  
tō Jesús tté kí tssé er bua' wa. Këkraë  
ie'pa tō Skëköl yëkkuö suëkewã bua'iewã  
isuioie tō ì ché Pablo tō e' yëne ö kè iyëne.  
<sup>12</sup>Es taië ie'pa erblé Jesús mik. Ñies taië  
griegowak erblé imik alakölpa dalöier-  
ta' ena wëpa ñies. <sup>13</sup>Erë mik judiowak  
serke Tesalónica e'pa wã ijchenewã tō  
Pablo tso' ñies Berea Skëköl tté pakök,  
etã imíyal ee. Ie'pa tō Berea wakpa  
dapa'wémi shutiwémi Pablo kî. <sup>14</sup>Erë  
s'yamipa tso' Berea, e'pa tō Pablo ké  
e' yöktsã tã ipatkémí dayë kkömik. Erë  
Silas ena Timoteo e' tséat Berea. <sup>15</sup>Wépa  
wã Pablo mirwã, e'pa wã imí dò ká kiè  
Atenas ee. E' ukuökî tã ie'pa biteyalne.  
Pablo tō ie'pa ka' ichök Silas ena Timo-  
teo a tō “a' kié bet.”

**Pablo tō Jesús tté paké  
Atenas wakpa a**

<sup>16</sup>Pablo tso' Silas ena Timoteo kînu-  
k Atenas, e' dalewa ie' tō isué tō ká e'  
wakpa wã íyi diököl tso' dalöiè, ese  
tso' taië. E' tō ie' tsiriwéka taië. <sup>17</sup>E'  
kuekî judiowak ñi dapa'wo wé a ie' ka-  
paköke judiowak tã ena pë' kè dör ju-  
diowak erë Skëköl dalöieta' esepa tã.  
Ñies ie' kapaköke këkraë Atenas wakpa  
tã wé ie'pa döke taië íyi tauk ee. <sup>18</sup>Ñies  
ie'pa wöbla'ukwakpa welepa kiekerak-  
itō epicúreo wakpa† ena estoico wakpa‡,

e'pa ñi iütémí Pablo tã. Ie'pa welepa tō  
ie' cheke i' es:

—¿Ì kabeweke s'ñeñe dió tō?

Ie'pa welepa skà tō icheke:

—Ttsëskua e' dör këkölpa tsakië  
dalöieke ká bár wakpa tō e'pa tté  
pakökwak.

Pablo tso' Jesús kötewã shkenekane e'  
tté buaë pakök e' kuekî ie'pa tō ie' ché  
es. <sup>19</sup>E' kuekî ie' tsémirakitō wé ie'pa e'  
dapa'uke tté tsakië pakarke ese ttsök ee.  
Ká e' kiè Areópago. Tã ichakérakitō:

—Ttè pa'alí pakeke be' tō, ¿e'  
pakëmbö sa' a? <sup>20</sup>Ttè pakeke be' tō,  
e' kè tssëule sa' wa, e' kuekî e' kiane  
jchenukwã sa' kî ¿ima e' wã dör?

<sup>21</sup>Atenas wakpa kos ena ká kua'kî  
wakpa serke Atenas, e'pa ulitane tō tté  
pa'alí tseke ese è pakeke ñi a këkraë.

<sup>22</sup>Etã Pablo e' duékã ie'pa shua Areó-  
pago wé a tã ichéitō:

“A Atenas wakpa, ì kos suéyö, e' wa ye'  
wã ijcher tō a' tō këkölpa tsakië dalöieke.  
<sup>23</sup>Mik ye' tkami a' ká shua, etã wé a' tō  
këkölpa ñe' dalöieke ese ké suéyö taië. E'  
shua ye' tō kã' tso' idalöioie ese kué et e'  
kî itso' kitule i' es: ‘Skëköl eköl kè jcher  
se' wã tō yi idir, e' dalöioie’. Ie' dalöieke  
a' tō, erë a' kè wã ijcher tō yi idir. Skëköl  
e' pakeke ye' tō a' a.

<sup>24</sup>“Te' tō ká ulitane ena íyi ulitane tso'  
ikî e' yö'at. Ie' dör ká jai ena ká i' e' kos  
wák. Ie' kè serku' Skëköl wé yöule s'ditsö  
wa ese a. <sup>25</sup>Sulitane serke ie' mik. Ñies  
íyi ulitane kiane se' kî sènoie, e' mekeitō  
se' a këkraë. E' kuekî ie' kè kî ikiar tō se'  
ie' kimé ì wa.

<sup>26</sup>“Wëm eköl è wa ie' tō se' ditsöwö  
ulitane alöwé. Ie' tō se' ké senuk ká  
wa'ñe. Mik ie' tō ká i' yö', etã ie' tō  
se' katatë'atbak tō mik se' sermi, wé se'  
sermi ditséwö wa ditséwö wa. <sup>27</sup>Ie' tō se'

†**17:18 epicúreo wakpa:** E' wakpa tō iklö'wé tō s'ser e' wã bua'ie dör ttsë'ne buaë.  
Ttè e' wa s'wöbla'weke ie'pa tō.

‡**17:18 estoico wakpa:** E' wakpa tō iklö'wé tō s'ser e' wã bua'ie dör se' e' kkö'nü ì  
sulu kos e' yöki. Ttè e' wa s'wöbla'weke ie'pa tō.

katatë'at es as se' tō ima'ū yulè isalema sō ikuëmi. Erë mokī ie' kè ku' kamië se' yöki. <sup>28</sup>E' dör wes yile tō iché es, e' tō iché: 'Skököl mik se' serke se' shköke, ie' wa se' tso.' Nies e' dör wes a' wákpa ttsököl eköl tō iyë'at es, e' tō iché: 'Sulitane dör Skököl aleripa.' <sup>29</sup>Se' dör Skököl ditséwö, e' kueki kè se' kàne ibikeitsök tō ie' dör wes íy diököl yöule se' wä orochka wa ö inukölchka wa ö ákchka wa es. E' kos yuésö wes se' ibikeitsè es wes se' wákpa a iyör es. Erë Skököl kè dör es. <sup>30</sup>Iaiä tã kè se' wä ijcher tō wes ie' dör, e' kueki e' nuí tköo'atbak ie' tō ie'pa kī. Erë ìñe tã ie' tso' ichök kã ulitane wakpa a tō a' kawötã er mane'uk. <sup>31</sup>Skököl tō idiwö me'atbak wekkè alè tã ie' tō sulitane shuleraë yësyësë wëm eköl tkë'kaitö e' wa. Wëm e' kötewã erë ishkeo'kane Skököl tō, e' wa ie' tō iwã kkaché sulitane a tō mokīë wëm ñe' tkë'kaitö."

<sup>32</sup>Erë mik Atenas wakpa tō ittse' tō Pablo tō s'du'wã shkenekane e' ché, etã ie'pa welepa tō ie' wayué, erë welepa skã tō iché:

—Ì pakeke be' tō, e' skã ttsëmi sa' tō iëtökichane.

<sup>33</sup>Etã Pablo mĩa. <sup>34</sup>Erë wëpa welepa míyal Pablo tã, tã e'pa erblé Jesús mik. Ie'pa e' shuã Dionisio tso'ñak, e' dör Areópago wökirpa eköl. Nies alaköl eköl kiè Dámaris ena pë' skã tso'ñak ishüã.

### Pablo mĩa Corinto

**18** E' ukuöki tã Pablo e' yëttsã Atenas mĩa Corinto. <sup>2</sup>Eë wëm kuëwãitö eköl dör judiowak kiè Áquila, e' dör kã kiè Ponto e' wak. Ie' alaköl kiè Priscila. Ie'pa bak senuk Roma atë Italia eë. Ie'pa dë'bitü erpa Corinto. Kã tso' tseë romawak ttè dikjã e' wökir kibi kiè Claudio, ie' tō judiowak kos serke Roma e' yökukur patké. E' kueki Áquila ena ilaköl e' yë'lur Roma demi Corinto. Pablo mĩa ie'pa pakök. <sup>3</sup>Ie' kanè dör ie'pa kanè ese

è, e' kueki ie' e' tséat ie'pa tã kaneblök. Kanè e' dör iyiwak kkuölit yueke üie tsëmi ese kanè. <sup>4</sup>Eno diwö bit ekkë Pablo mi'ke judiowak ñi dapa'wö wé a. Eë ie' tō Jesús tté pakeke ie'pa ulitane a. Ie' tō judiowak ena pë' kè dör judiowak e'pa ulitane pableke as ie'pa erblö Jesús mik.

<sup>5</sup>Mik Silas ena Timoteo tso' Macedonia, e'pa demirak Corinto, etã Pablo kè kaneblëneĩa Áquila tã. E' skéie ie' e' mé Jesús tté buaë e' è pakök kekraë. Nies ie' tō judiowak pablé kekraë tō Jesús dör wë pairine'bitü idi' wa s'blüie e'. <sup>6</sup>Erë ie'pa wötkëmi Pablo tã tã iché suluë. E' kueki ie' datsi' wöppée iwã kkachöie tō ie' kè kī inuí ku' tã iché iarak:

—A' weirdaë siarë, e' wiie a' wákpa iane. E' kè wëneĩa ye' wöki. I'tami ye' mĩa pë' kè dör judiowak esepa pattök.

<sup>7</sup>Etã Pablo e' yëttsã judiowak ñi dapa'wö wé a mĩa wëm kiè Ticio Justo, e' u a senuk. Wëm e' tō Skököl dalöieke taië. Ie' serke judiowak ñi dapa'wö wé o'mik. <sup>8</sup>Wëm kiè Crispo, e' dör judiowak ñi dapa'wö wé, e' wökir. Ie' erblé Skökëpa Jesús mik iyamipa kos e' tã. Es ñies taië Corinto wakpa tō Jesús tté ttsé tã ierblérak imik tã ie' wöskuélor. <sup>9</sup>Kã et nañewe Skökëpa Jesús tō Pablo a iché kabsueie: "Kè be' suanuk. Ye' tté kí pakó kekraë. Kè be' siwã'blök. <sup>10</sup>Ye' tso' be' tã. Kè yi a ì sulu wamblënuke be' kī yës. Ye' wã pë' tso' taië kã i' kī." <sup>11</sup>Es Pablo atë duas ek kī shaböts Corinto ie'pa wöbla'uk Skököl ttè wa.

<sup>12</sup>Mik Galión bak Acaya wökirie, etã judiowak serke Corinto e'pa ñi dapa'wéka Pablo naméie ie' tsëmi ttè shulo wé a. <sup>13</sup>Ie'pa tō Pablo kkaté Galión a tã iché ia:

—Wëm i' tso' sa' pablök tō Skököl dalöió sa' tō, erë kè dör wes ttè dalöiëno meneat sa' a e' tō iché es.

<sup>14</sup>Pablo ttëmitke tã Galión tō iché judiowak a:

—Mokí ì sulu wamblópaítò, e'ma ye' tò a' ttò tsemì. <sup>15</sup> Erè a' tso' ñi wõnatkòk ttè kì ena wèpa wèlepa kiè kì, ena a' wákpa ttè dalöièno e' kì, e' kuèkì e' shuló a' wákpa tò. Ye' kè tò ttè ese shulè.

<sup>16</sup> Età Galión tò ie'pa uyéttsà ttè shulo wé a. <sup>17</sup> Età pè' tso' taiè e'pa tò wëm kiè Sóstenes dör judiowak ñi dapa'wo wé wökir, e' klò'wéwa ppérakitò ttè shulo wé wöshaè. Erè e' kì Galión kè tkine yès.

### Pablo dene Antioquia

<sup>18</sup> Pablo e' tséatía taiè Corinto. E' ukuökì tã ie' e' chéat iyamipa a tã imía ká kiè Cencreas wé kanò irirke eè. Etã eè ie' e' iéka kanò mi'ke Siria ese a. Áquila ena Priscila mitke ie' tã ñies. Kam ie' e' iökã kanò a, etã ie' tsà téé manene. E' wéitò ittè me'itò Skèköl a e' blóie wes iyè'itò es. <sup>19-21</sup> Mik ie'pa demi ká kiè Éfeso eè, etã Pablo míã judiowak ñi dapa'wo wé a Jesús tté buaè pakök judiowak ñi dapa'uke eè, e'pa a. Ie'pa tò iché iã taiè: “Be' e' tsúatía sa' tã.” Erè kè ie' e' tsakat. Ie' e' chéat ie'pa a tã ichéitò: “Skèköl kì ikiane, e'ma ye' skà dörane a' pakök.” Áquila ena Priscila e' tséat senuk Éfeso.

E' ukuökì tã Pablo e' iéka kanò a tã imía. <sup>22</sup> Mik idemi Cesarea tã imía Jerusalén Skèkèpa Jesús icha erule e'pa shké'uk. E' ukuökì tã imía Antioquia. <sup>23</sup> Eè ie' sené ekuölö. E' ukuökì tã iskà míane Galacia ena Frigia, ká e' kos a Jesús ttókatapa er diché kì iök.

### Apolo tò Jesús tté paké Éfeso wakpa a

<sup>24</sup> E' kèwö ska' tã wëm eköl kiè Apolo dör judiowak, e' de Éfeso. Ie' datse ká kiè Alejandría eè. Ie' dör wëm ttò buaè ese. Ie' wã Skèköl yèkkuö sùle buaè. <sup>25</sup> Ie' yöule buaè Skèköl ñalé tté wa. Ie' tò s'wöbla'weke kaneè yèsyèsé Jesús tté wa. Erè ie' kè wã Jesús tté jcher seraa. Ie' wã Juan S'wöskuök'wak, e' ttè è sùle. <sup>26</sup> Ie' ttémi judiowak ñi dapa'wo wé a, kè

suane. Etã mik Priscila ena Áquila tò ie' kapaköke e' ttsé, etã ikiémirakitò iu a. Tã eè ie'pa tò ie' kì wöbla'wé buaè Skèköl ñalé tté wa. <sup>27-28</sup> E' ukuökì tã ie' shkak ká kiè Acaya eè. E' kuèkì iyamipa serke Éfeso, e'pa tò ie' kímé. Yèkkuö shtérakitò Jesús ttókatapa tso' Acaya, e'pa a as ie'pa tò ie' kiöwa buaè. Mik ie' demi Acaya tã wépa erblè'bak Jesús mik Skèköl er buaè ché ie'pa a e' kuèkì, esepa kímé taiè ie' tò. Ie' e' alöke judiowak kì ie' ttè wa suli-tane wörki. Ie' tò ie'pa siwa'blöweke. Ie' tò ikkacheke yèsyèsé Skèköl yèkkuö wa tò mokí Jesús dör wé pairine'bitü idi' wa s'blüie e'. Es ie' tò iyamipa kímé.

### Pablo tò Jesús tté buaè paké Éfeso wakpa a

**19** Apolo tso'ia Corinto e' dalewa Pablo tkami kabata wa demi Éfeso. Eè ie' tò Jesús ttókatapa wèlepa kué. <sup>2</sup> Ie' tò ie'pa a ichaké:

Mik a' erblè' Jesús mik etã ¿Wiköl Batse'r dé' a' kì?

Ie'pa tò iüté:

—Kè sa' wã ittseüle tò Wiköl Batse'r tso'.

<sup>3</sup> Pablo tò ie'pa a ichaké:

—Etã ¿wöskuè wése wa a' wösune?

Ie'pa iüté:

—Juan s'wöskuè e' wa.

<sup>4</sup> Ie' tò iché iarak:

—Wépa er mane'wé Skèköl a, esepa wösuk Juan tò. Erè ie' tò iyè' ie'pa a tò wëm datse ie' itökì e' mik ie'pa ké erblök.

<sup>5</sup> Ttè e' ttsérakitò tã iwöskuélor Skèkèpa Jesús ttò wa. <sup>6</sup> Pablo ulà méka ie'pa kì tã Wiköl Batse'r debitu ie'pa kì tã ie'pa ttémi ttò ku'a'kì ku'a'kì wa. Ñies ñ mé Skèköl tò ie'pa a ché, e' ché ie'pa tò. <sup>7</sup> Seraa ie'pa döka dabom eyök kì bøl (12) wépa.

<sup>8</sup> Si' mañat Pablo shkére judiowak ñi dapa'wo wé a, eè Jesús tté pakéitò kè suane. Ie' tò ie'pa pableke taiè as ie'pa e' tiüwa ñ blüie Skèköl tso' e' tté dikia. <sup>9</sup> Erè



ie'pa welepa wökir darërëë, e' kuëki ie'pa kè wà ttè e' klöne. Ie'pa tò Jesús dör se' ñala e' tté ché suluë sulitane kukua. Eta Pablo e' skéttsa ie'pa yöki. Wépa detke Jesús ttökatapaie e'pa tsémi e' ta dò wé wëm kiè Tirano e' wà u tso' s'wöbla'woie eë. Eë Jesús tté pakeke Pablo tò kékraë. <sup>10</sup> Es iwéitò dò duas bök. Sulitane serke Asia, judiowak ena pè' kè dör judiowak, e'pa tò Skékëpa Jesús tté ttsé. <sup>11-12</sup> Ì kè or yi a ese wé Skéköl tò kibiie Pablo wa tkòka imalepa tsata dò tsamo ena datsi' döne ie' mik ese mi'kerak iwà wépa kirirke esepa ska' ta ibuanene ta wimblupa sulusi e' yélur ie'pa a.

<sup>13</sup> Erë judiowak welepa shkörami ñala ki wimblupa sulusi yökulur pè' a. E'pa tò iché 'ima'üsö Skékëpa Jesús ttò wa.' Ie'pa ichémi wimblupa sulusi a' i' es: "i'A' e' yólur Jesús pakeke Pablo tò, e' ttò wa!"

<sup>14</sup> Es wëm kiè Esceva e' ala'r dökä kul e'pa tò ima'wémi ñies. Esceva dör judiowak sacerdotepa wökirpa e' eköl. <sup>15</sup> Erë etökicha ta wimblu sulusi tò ie'pa iüté: "Yi dör Jesús e' jcher ye' wà. Ñies yi dör Pablo e' jcher ye' wà. Erë za' dör yi?"

<sup>16</sup> E' wöshaë wëm a wimblu sulusi tso', e' unekä ie'pa ki. Ie' e' aléka ie'pa ki idiché taië wa. Ie'pa ppéitò siarë. Ie'pa e' yélur tkayal sume shka'ule taië. <sup>17</sup> Éfeso wakpa kos, judiowak ena kè judiowak, e'pa wà ijchenewa. Taië ie'pa suane. Es Skékëpa Jesús tté ki bunekä taië.

<sup>18</sup> Taië pè' erblé Jesús mik esepa debitu i kos wamblë'rakitö suluë e' chökka sulitane kukua. <sup>19</sup> E'pa shua taië ie'pa awápa tso'ñak. E'pa kos wa iyëkkuö tso'rak iwà wakanewè, ese debitu ta ina'wéwa sulitane wöshaë. Ie'pa tò iyéttsa kos yëkkuö e' ské dör ta idettsa inuköl taië. E' dör ie'pa inuköl dökä 50.000 ekkë. <sup>20</sup> Es Skékëpa Jesús tté ki bunekä taië. Sulitane tò isuë tò ttè e' diché ta' taië.

<sup>21</sup> E' ukuöki ta Pablo ibikeitsé: "Ye' mi'ke ká kiè Macedonia ena Acaya e' wakpa pakök. E' ukuöki ta ye' michoë dò Jerusalén. Eë ta ye' kawötä shkök dò Roma ñies."

<sup>22</sup> E' ukuöki ta ie' kimukwakpa bül, Timoteo ena Erasto, e'pa patkëmiitò dò Macedonia, e' dalewa ie' atëia Asia ekuölö.

### Éfeso wakpa shutineka taië

<sup>23</sup> E' kèwö ska' Éfeso wakpa shutineka taië Jesús dör Se' ñala e' tté kuëki. <sup>24</sup> Wëm tso' eköl kiè Demetrio e' dör íyi diököl yuök inukölchka wa e' sté. E' tò Éfeso wakpa Kéköl kiè Artemisa wak dör alakölie, e' wé diököl yueke inukölchka wa. Kanè e' wa ie' ena ikanè mésopa inuköl klö'uke taië. <sup>25</sup> Ikanè mé-sopa dapa'wékaitö imalepa kaneblöke kanè ese è a e'pa ta, ta ichéitö: "A kékëpa, a' wà ijcher tò kanè i' wa se' inuköl klö'uke. <sup>26</sup> Erë a' isuë, a' ittse tò Pablo e' tso' ichök tò íyi diököl yuekesö dalöie skékölie, e' kè dör skéköl mokí. Taië pè' tò ttè e' klö'wétke íe Éfeso ñies Asia kos e' a. <sup>27</sup> E' dör suluë. E' tò se' kanè sulu'wëmiwa. Ñies Artemisa, se' kéköl taië, e' wé dalösewëwamiitö. Se' kéköl taië dalöiertä' taië Asia ena ká wa'ne, e' dalösewëwaraitö."

<sup>28</sup> Mik ttè e' tsérakitö, eta ilunekarak taië. Eta inanekarak: "Artemisa dör Éfeso wakpa kéköl, e' dör kéköl taië."

<sup>29</sup> Eta Éfeso wakpa kos aláneka taië. Wépa datse bül Macedonia. Eköl kiè Gayo iëköl kiè Aristarco, e'pa dör Pablo wapiepa, e'pa tso'ñak eë. Éfeso wakpa tò ie'pa bül klö'wéwa kuëmi dò wé ie'pa ñi dapa'uke e' wé a. <sup>30</sup> Eta Pablo shkakwa eë ttök ie'pa ta, erë Jesús ttökatapa malepa kè wà ianemi. <sup>31</sup> Ñies Asia wökirpa welepa éna Pablo dalër taië, e'pa tò ttè patké Pablo a: "Kè be' minukwa eë." <sup>32</sup> E' dalewa Éfeso wakpa daparke e'pa shutineka taië. Ie'pa

arkekarak taië. Ikibiiepa kè éna iwà ane iók ie' dapa'wérak. E' kuëki eköltépa arke kuá'ki, iëköltépa arke kuá'ki. <sup>33</sup> Età judiowak tò wëm kiè Alejandro e' tsémi patkéule duéser sulitane wörki, e' kuëki pé' welepa tò ibikeitsé tò ie' wöki iwërke. Età ie' tò ikkaché ulà wa tò "A' siwa'bló. Ye' ttöke judiowak tsatkoie." <sup>34</sup> Erë mik ie'pa wa ijchenewà tò ie' dör judiowak, età ie'pa skà e' kékane anuk: "Artemisa dör Éfeso kéköl. E' dör kéköl taië." Es ie'pa arkerak dò hora böt.

<sup>35</sup> E' ukuöki tà ká wökirpa yëkkuö shtökwak, e' tò pé' ké siwa'blökwa. Ie' tò iché ie'pa a: "A Éfeso wakpa, ká ulitane wakpa wa ijcher tò se' dör Éfeso wakpa e'pa dör se' kéköl taië Artemisa e' wé kkö'nukwakpa, nïes ie' diököl anebitu ká jai a, e' kkö'nukwakpa. <sup>36</sup> Kè yi a iyërpa tò kè idör es. E' kuëki a' siwa'blólur. Kè ì wamblar kè bikeitsule buaë. <sup>37</sup> Wëpa i' debitu a' wà, e'pa kè wà ì blëulewà se' kéköl wé a. Ie'pa kè wà se' kéköl yëule suluë. <sup>38</sup> E' kuëki Demetrio ena ikanè mésopa, ie'pa éna yile kkatàk, e' tà as imi'rak ikkatök ttè shulökwakpa a ena s'wökirpa a. E'pa tso' kaneblök ttè shulo wé a. Eë ie' tsatkömirak nì wöshaë. <sup>39</sup> Erë ì skà kianeia a' kì yënoie, e' tà e' choie a' kawötà mik se' daparke wës ikanewekesö es età. <sup>40</sup> Ì tka ferö i'ne, e' kì s'wökirpa tò se' kkatèmi. Kè iwà ta' mok-ië, e' kuëki ie'pa tò se' kkaté iki, e' tà kè se' a e' tsatkënuk iyöki." <sup>41</sup> Ie' tté one tà ichéitö ie'pa a, "A' yúshka."

### Pablo míá Macedonia ena Grecia

**20** Éfeso wakpa shutineka, e' olone tà Pablo tò Jesús ttökatapa kiéttsa pattè. E' ukuöki tà ie' e' chéat ie'pa a tà imía Macedonia. <sup>2</sup> Ie' tkami ká e' wa'ne iyamipa pattök, e' tò ie'pa er kuwé taië. E' ukuöki tà ie' míá Grecia. <sup>3</sup> Eë ie' sené si' mañat. Ie' tso'tke kanò klö'uk shkomi dò Siria, e' shua tà ie' wa ijchenewà tò judiowak ileritsétke

ie' ttowà. E' kuëki ie' míane klò wa tkamine Macedonia. <sup>4</sup> Ie' wapiepa dör kul. Eköl kiè Sópatro, e' dör Berea wak, iyé kiè Pirro. Iëköl kiè Aristarco. Iëköl kiè Segundo, e' dör Tesalónica wak. Iëköl kiè Gayo, e' dör Derbe wak. Iëköl kiè Timoteo. Nies wëpa bøl dör Asia wakpa, e'pa kiè Tíquico ena Trófico. <sup>5</sup> Wëpa ekkëpa míá kewe sa' yöki sa' kïnuk ká kiè Tróade ee. <sup>6</sup> Pan Kè Yöule Iwölöwoka Wa e' kèwö tka, età sa' e' yélur Filipos míá kanò kì dò Tróade. Ká skël ukuöki tà sa' demi Tróade, età ie'pa kué sa' tò ee. Eë sa' e' tséat ká kul.

### Pablo tò ttè bata paké Skëképa Jesús icha erule tso' Tróade, e'pa a

<sup>7</sup> Eno diwö tuinetke tà sa' e' dapa'wéka nita Jesús kötewà e' kèwö tkö'uk. Pablo tso' iyamipa tà kapakök. Ie' kawötà e' yöktsa bule es, e' kuëki ie' kapaké dò ká shaböts. <sup>8</sup> Sa' dapaneka u kakkeë e' a. Taië bö'wö tso' wötskiuleka ee. <sup>9</sup> Duladula tkër eköl ukkö tsitsir kì, e' kiè Eutico. Pablo tso' kapakök taië e' dalewa Eutico shtrinewatke kapakwatke. Bata ekké tà ikapowà tà ibrutanemi döttsa iski. Età ikéka ie'pa tò erë iduowäie. <sup>10</sup> Età Pablo dur kákke, e' e' éwa tà ie' e' méka duladula bata kì, ipaklö'wëwaitö tà ichéitö:

—Kè a' tkinukia. Itso' ttsë'ka.

<sup>11</sup> E' ukuöki tà Pablo tkakane kákke tà Jesús kötewà e' kèwö tkö'wéitö ie'pa tà. Età ie' kapakéia dò ká nïne ekké tà imía. <sup>12</sup> Età duladula tsémirakitö ttsë'ka iu a. E' tò ie'pa ulitane kì ttsë'wéka buaë.

### Pablo e' yéttsa Tróade míá Mileto

<sup>13</sup> Sa' míyal kewe Pablo yöki kanò kì dò ká kiè Aso ee. Pablo wák shkak klò wa dò ee, e' kuëki sa' kawö me'attke ie' tà nì kïnuk ee. <sup>14</sup> Mik sa' tò ie' kué, età ie' e' iéka sa' tà kanò kì tà sa' míyal ká kiè Mitilene ee. <sup>15</sup> Tà sa' michoë. Bule es tà sa' tkami ká kiè Quío, e' wöshaë. E'

bule es tã sa' demi wé kanò irirke kiè Samos ee. E' bule es tã sa' mía Mileto. <sup>16</sup> Pablo shkakmi bet dõ Jerusalén Pentecostés kèwõ tkò'uk, e' kuèki sa' mineyal es. Pablo kè e' wòklò'wak taiè Asia, e' kuèki ie' kè dè' Éfeso.

### Pablo kapaké Skèkèpa Jesús icha erule tso' Éfeso e' wòkirpa ta

<sup>17</sup> Pablo tso' Mileto e' tò Skèkèpa Jesús icha erule tso' Éfeso e' wòkirpa tsuk patké ñi dapa'uk ie' ta. <sup>18</sup> Mik idebiturak, eta Pablo tò iché iarak:

—Wes ye' sené a' shua ye' tsá dè'bitu Asia e'tami, e' jcher buaè a' wa. <sup>19</sup> Eré judiowak ileritseke ye' tsaiök e' ye' rreweke taiè, eré kekraè ye' e' wòawa diöshet ta Skèkèpa Jesús kanè uk ye' bak a' shua iè wa ì wa. <sup>20</sup> Ñies a' wã ijcher tò ttè buaè a' kimoie, ese kè blènawa ye' wã yès a' yòki. Ese wa ye' bak a' wòbla'uk sulitane wòrki, ñies u a u a. <sup>21</sup> Ye' bak ichök wò yèsyèsè wa judiowak a ena pè' kè dör judiowak esepa a: 'A' ké er mane'uk Skèköl a. A' ké erblök Skèkèpa Jesús mik mok-iè.' <sup>22</sup> Iñe ye' mitke Jerusalén. Ye' ittse tò es Wiköl Batse'r ki ikiane. Kè ye' wã ijcher wes ye' wëmiraakitò ee. <sup>23</sup> Ká wa'ne wé ye' dè'ule ee Wiköl Batse'r tò ye' a icheke: 'be' wòterdaè, be' weirdaè siarè,' e' è jcher ye' wa. <sup>24</sup> Ye' a ta ye' ttèwa ö ye' tso' tse'ka, kè e' ki ye' tkine. Kanè me' ye' a Skèkèpa Jesús tò, e' è ewakwa ye' éna er bua' wa. Kanè e' dör Skèköl er buaè chöke sia, e' ttè buaè pakök.

<sup>25</sup> Ì blúie Skèköl tso' e' ttè pakéyö a' a. Iñe ye' wã ijcher buaè tò a' ulitane kè tò ye' suepaiane. <sup>26</sup> E' kuèki iñe ta yö ichè a' a mokie tò a' wépa kè tsatkene, e' ta kè ye' iane iwiie. <sup>27</sup> Ì kiane kanewé Skèköl ki, e' ttè pakéyö a' a se. Kè ye' wã ttè wéne blènawa yès a' yòki. <sup>28</sup> E' kuèki a' e' kkönú. Ñies Wiköl Batse'r tò a' tkè'ka Skèköl ichapa erule e'pa wòkirpaie ikkónukrak, e' kuèki ie'pa kkönú buaè a' tò. Ie'pa tõttsã Skèköl tò iwák

pé wa. <sup>29</sup> Ye' wã ijcher tò mik ye' mía e' ukuòki ta pè' doraè s'yamipa ewkwa wes chichi sulusi tò iyiwak ewèwa es. <sup>30</sup> Ñies a' shua welepa e' kòrakã s'wòbla'uk kache ttè wa as s'yamipa erblé Jesús mik e'pa mi' ie'pa è itòki. <sup>31</sup> A' tso' erki. A' éna ianú tò duas mañal, ñiwe nañewe, kekraè ye' bak a' ulitane pattök eköl eköl iè wa ì wa.

<sup>32</sup> Es ye' tò a' méat Skèköl ulà a. Ñies a' méatyö Skèköl er buaè chöke se' a e' ttè a. Ie' wã diché ta' a' er diché kí ioie. Ñies ie' wã diché ta' ì kos buaè moie a' a wes ikablè' imuk ie' icha batse'r esepa a es. <sup>33</sup> Kè ye' wã yi inuköl ena yi datsi' kkeyëule yès. <sup>34</sup> Eré a' wã ijcher buaè tò ye' kè bak senuk yi ulà mik. E' skéie ye' kanèblè' ye' wák ulà i' wa e' kkönnoie. Ñies e' wa ye' tò ye' wapiepa kímé. <sup>35</sup> Es ye' bak a' wòbla'uk kekraè tò s'kawõtã kanèblök darèrèè wépa kè a kanèblèr, esepa kimoie. Kè se' éna ichökwa tò Skèkèpa Jesús wák tò iyè': "Se' tò ikakmé e' dör ibua'ie se' a, kè dör ikaktsè."

<sup>36</sup> Mik Pablo ttè one, eta ie' e' tkéwa kuchè ki ta itté Skèköl ta ie'pa ulitane ta. <sup>37</sup> Ie'pa ulitane tso' e' chökãt Pablo a iúke taiè ta ie'pa tò ipaklò'wémi iwòalattsémi. <sup>38</sup> Pablo tò ichétke ie'pa a: "A' kè tò ye' suepaiane." E' tò ie'pa eriauwé taiè. E' ukuòki ta ie'pa mía inalemuk dò wé kanò irirke ee.

### Pablo mía Jerusalén

**21** Mik sa' tò sa' yamipa méat, eta sa' e' iéka kanò a. Sa' míyal yèsyèsè ká kiè Cos ee. E' bule es tã sa' míyal ká kiè Rodas ee ta sa' míyal ká kiè Pátara ee. <sup>2</sup> Eta sa' tò kanò kué Pátara mi'ke ká kiè Fenicia, e' a sa' e' iéka ta sa' míyal. <sup>3</sup> Sa' tkami ta sa' tò ká kiè Chipre e' sué, e' atè ulà bakli'kka. Eta sa' mir dõ Siria. Dalí mir kanò a e' mekeat Tiro, e' kuèki sa' demi ee. <sup>4</sup> Eta Jesús mik erblökwakpa serke ee, e'pa yulé sa' tò ta ikué sa' tò. Sa' sené ká kul ie'pa ska'. Ie'pa tò iché

Pablo a Skëköl Wiköl wa: “Be' mú kè mi' Jerusalén.”<sup>5</sup> Erè ká kul tka sa' kî etá sa' e' yéttsane. Ie'pa kos, ilakölpa ena ila'r, e' yéttsa ie'pa ká a míyal sa' ñalemuk dõmi dayë kkõmik. Eë sa' e' tuléwá kuchë kî ttök Skëköl tá.<sup>6</sup> E' ukuökî tá sa' e' chéat ie'pa a tá sa' e' iéka kanò a. Etá ie'pa míyalne u a.

<sup>7</sup> Sa' e' yéttsa Tiro demi ká kiè Tole- maida eë. Sa' tò s'yamipa serke eë e'pa shké'wé. Sa' e' tséat ie'pa ska' ká et.<sup>8</sup> E' bule es tá sa' e' yéttsane demi klò wa Cesarea. Eë sa' mí Felipe dör Jesús tté buaë pakökwak e' u a. Ie' dör wëpa kul shukitulebak Jesús ttekölpa tsá e'pa ki- muk, e' eköl. Ie' ska' sa' e' tséat.<sup>9</sup> Ie' ala'r busipa dõka tkël kam iserdak wëpa tá. Ie'pa kos dör Skëköl ttekölpa.<sup>10</sup> Sa' sené ie' ska' elkeë etá wëm debitu eköl datse Judea, e' kiè Agabo. Ie' dör Skëköl tteköl.<sup>11</sup> Ie' dewá sa' o'mik tá Pablo kipamo klò'wéwáitò. Tá e' wa ie' e' muéwá iklò a ena iulà a tá ichéitò:

—Wiköl Batse'r tò ichè: “I' es judiowak tò kipamo i' wák, e' muerawá Jerusalén. Tá imerattsa ie'pa tò pé' kè dör judiowak, esepa ulà a.”

<sup>12</sup> Mik sa' tò ttè e' ttsé, etá sa' ena Cesarea wakpa tso'ñak sa' tá, e'pa uli- tane kköché tajë Pablo a: “Kè be' minuk Jerusalén.”<sup>13</sup> Erè Pablo tò iüté:

—¿I' kuëki a' iüke? E' tso' ye' eriauk tajë. Ye' e' méttsatke monukwá, ñies ttèwá Skëképa Jesús tté kuëki Jerusalén.

<sup>14</sup> Ie' kè wá sa' ttò iütène, e' kuëki kè sa' wa ì kî yène iá. Sa' iché:

—As Skëképa tò iü wes ie' kî ikiane es.

<sup>15</sup> E' ukuökî tá sa' dali ié míyal Jerusalén.<sup>16</sup> Jesús ttókatapa tso' Ce- sarea, e'pa wëlepa míyal sa' tá. Ie'pa wá sa' mítser wëm kiè Mnasón, e' u a kapökrö. Wëm e' datse ká kiè Chipre eë. Ie' dör wëpa tsá erblë' Jesús mik esepa eköl.

### Pablo mía Santiago pakök

<sup>17</sup> Mik sa' deka Jerusalén, etá s'yamipa tso' eë, e'pa tò sa' kiéwá buaë, ittse'nerak buaë.<sup>18</sup> E' bule es tá Pablo mía sa' tá Santiago pakök. Ñies Skëképa Jesús icha e'pa wökir kibipa tso'ñak Santiago ska' sëraa.<sup>19</sup> Ie' tò ie'pa shké'wé tá ì kos wéitò Skëköl batamik, pé' kè dör ju- diowak, esepa shüa, e' pakéitò ie'pa a yësyësé.<sup>20</sup> Mik e' ttsé ie'pa tò, etá Skëköl kikëkarakitò tajë. Ie'pa tò iché iá:

—A yami Pablo, be' isuë buaë tò ië ju- diowak dõka miles e'pa erblétke Jesús mik. Ie'pa ulitane e' mettsá da'a Moisés ttè dalöiëno e' tsatök.<sup>21</sup> Ie'pa a iyène tò be' tò judiowak tso' ká kuá'ki kuá'ki kî, esepa wöbla'wëke tò ttè e' olo'yó. Ñies ichekerakitò tò be' tò icheke tò ila'r kurke wëpa, esepa tottola kkuölit kè tar. Ñies ichekerakitò tò be' tò s'wöbla'wëke tò se' judiowak ser e' kè dalöiaria.<sup>22</sup> Ie'pa ulitane wá ijcherdawá tò be' dë'bitü. E' kuëki ¿ì wëmi be' tò ie'pa siwa'blówowa?<sup>23</sup> ¿cheke sa' tò be' a e' ú. Ië sa' shüa wëpa tso' tkël kawö me'bak Skëköl a, e' or- ketke.<sup>24</sup> E'pa tsümi e' tá, tá be' e' batse'ú ie'pa tá. Kos e' patuë e' pataúbö as ie'pa tsá tóttsa manene iwá kkachoie tò kawö me' ie'pa tò Skëköl a e' one. Be' tò iwé es, e' tá judiowak ulitane isüeraë tò ì kos kî pé' tso' be' chök suluë e' dör kache. Ie'pa tò isuëmi tò Moisés ttè dalöiëno e' dalöieta' be' tò ñies.<sup>25</sup> Erè s'yamipa kè dör judiowak, esepa a ì bikeitsé sa' tò e' kitmibak sa' tò yëkkuö kî. E' kî sa' tò ie'pa a iyë' tò ie'pa kè kàne chkè meule iyi diököl tso' dalöiè ese a ese katök. Iyiwak pé' kè katar. Iyiwak ttèwá kuli' siuleka ese chkà kè katar. Ñies ie'pa kè kàne trënu.

### Pablo klò'wéwarakitò Skëköl wé pamik

<sup>26</sup> Es Pablo e' yéttsa wëpa tkël, e'pa ta. E' bule es tá ie' e' batse'wé ie'pa ta. E'

ukuökj tã ie'pa tkawã Skëköl wé a. Eë Pablo tö ibiyó ché tö mik tã ie'pa batse'ne e' diwö ene tã ie'pa iyi meke Skëköl a iwakpa bil ekkë.

<sup>27</sup> Kãwö kul shuã ie'pa tso' batse'ne e' erkewatke etã judiowak welepa datse Asia, e'pa tö Pablo sué Skëköl wé a. Ie'pa tö imalepa shutiwëkã tã imishkarak Pablo kï iklö'wëwarakitö. <sup>28</sup> Ie'pa anekarak: “A yamipa, sa' kimú. Wëm i' shköke kã wa'ñe s'wöbla'uk tö se' judiowak ser, e' kè dör buaë. Ie' icherami tö Moisés ttè dalöiëno ena Skëköl wé i' kè dör buaë. I'ñe tã pë' kè dör judiowak esepa welepa debitu ie' wã ië Skëköl wé a. E' tö kã i' dör batse'r e' ia'wëkã.”

<sup>29</sup> Wëm kiè Trófimo e' su' ie'pa tö Jerusalén ie' dör Éfeso wak. Ie'pa tö ibikeitsé tö Pablo wã imí Skëköl wé a, e' kuekij ie'pa tö iché es.

<sup>30</sup> Kã e' wakpa qos shutineka debitu tuneule. Tã Pablo klö'wëwarakitö kuémi urkij. E' bet Skëköl wé wëkkö ulitane wötëwarakitö. <sup>31</sup> Ie'pa tö ittekewatke etã ttè de Roma ñippökwakpa eruleë e' comandante a tö Jerusalén wakpa ulitane shutineka taië. <sup>32</sup> Etã ie' tö ñippökwakpa dapa'wë ikayuapa tã, etã itunemirak wé pë' daparke eë. Mik pë' tö ñippökwakpa ena icomandante sué, etã ie'pa tö Pablo méat, kè ippëia. <sup>33</sup> Etã comandante debitu, e' tö Pablo klö'wëwã tã imaukwã ké tabechka kichaie bötö wa. E' ukuökj tã ie'pa a ichakéitö: “¿I' dör yi? ¿I' wambléitö?” <sup>34</sup> Erë welepa tö iché kuã'kij aneule, iëltëpa iché kuã'kij aneule. Taië ie'pa arkerak kuã'kij kuã'kij, e' wa kè ishulir, e' kuekij ie' tö itsukmi ké ñippökwakpa wé a. <sup>35</sup> Pë' éna ie' klö'wakwã kësik wa, e' kuekij mik idemirak ñippökwakpa wé klékata kij, etã ñippökwakpa tö Pablo batsékami. <sup>36</sup> Pë' qos arke Pablo itökij: “¡Ittöwã!”

### Pablo e' tsatké judiowak wörkj

<sup>37</sup> Mik Pablo dökewatke ñippökwakpa wé a etã ie' tö comandante a iché:

—Kãwö mú ña ttök be' tã.

Etã comandante tö iüté:

—Ye' kè wã ijcher tö be' ttö griegoie.

<sup>38</sup> E' ma be' kè dör Egipto wak dë'bitu eköl e' ka'ka ñippök sa' tã e'. Ie' mia kã wé kè yi ku' eë s'ttökwa wakpa tã döka mil tkëyök (4000).

<sup>39</sup> Etã ie' tö iché ia:

—Au, ye' dör judiowak kune Tarso, kã e' dör kã kibi ate Cilicia. Kãwö mú ye' a ttoie ie'pa tã.

<sup>40</sup> Etã comandante tö kãwö mé ia. Etã ie' dur shkë'ka ñippökwakpa wé klékata kij tã iulã kkaché pë' tso' taië, e'pa a tö a' siwa'blólur. Mik isiwa'blëwarak, etã ie' tté ie'pa tã hebreoie. Tã ichéitö iarak:

**22** “A yamipa, a kékëpa, ye' e' tsatköke, e' ttsó.”

<sup>2</sup> Mik ie'pa tö ittsé tö Pablo ttöke ie'pa tã iwákpa ttö wa, etã ie'pa kij siwa'blólur. Ie' tö iché:

<sup>3</sup> “Ye' dör ñies judiowak wes a' es. Ye' kune' Tarso ate Cilicia eë. Erë ye' talane ië Jerusalén. Gamaliel tö ye' yö' yësyësë wes se' ttè dalöiëno kiteat iaiaë e' tö iché es. Këkraë ye' tso'ie Skëköl dalöiök ye' er qos wa qos a' ulitane tö idalöiëke i'ñe ekkë. <sup>4</sup> Mik se' wëpa tö Jesús dör Se' ñalã e' tté klö'wë, etã esepa tötiuk ye' bak ttëwã, klö'wëwã, wötëwã s'wöto wé a. Kè ye' tkine tö wëm idir ö alaköl idir. <sup>5</sup> Ñies sacerdote kibi ena s'kueblupa ulitane, e'pa tö a' a ichëmi tö e' dör mokijë. Ie'pa tö ye' a yëkkuö me' tsëmi s'yamipa tso' Damasco e'pa a. Yëkkuö e' tö kãwö me' ye' a Jesús mik erblökwakpa esepa tsöbitu dö Jerusalén we'ikë.

<sup>6</sup> “Erë ye' miria ñalã kij. Diwö de bata a tã ye' dökemitke Damasco tsinet, e' bet tã i biteshka kã jai a bö'wöie e' olo bune taië ye' pamik. <sup>7</sup> Eë ye' anere iski. Etã ittö ttséyö tö iché ña: ‘A Saulo, a Saulo ¿iök

be' tō ye' we'ikeke?' <sup>8</sup> Etā ichakéyō: 'A Skékēpa, ¿be' dōr yi?' Etā ie' tō iūté: 'Ye' dōr Jesús Nazaret wak, e' we'ikeke be' tō.' <sup>9</sup> Itso'rak ye' tā, e'pa tō bō'wō sué, erē ì yēne ye' a, e' wà kè àne ie'pa éna. <sup>10</sup> Etā ye' tō ie' a ichaké: 'A Skékēpa Jesús, ¿ì wēm iyō?' Tā ie' tō iché ye' a: 'Be' e' kōka. Be' yú Damasco. Eē ì kōs wēmi be' tō, e' yērdaē be' a.' <sup>11</sup> Bō'wō olo tō ye' wōbla batuwēwā, e' kueki ye' wapiepa tō ye' ulā iémirak dō Damasco.

<sup>12</sup> "Eē wēm tso' ekōl kiè Ananías, e' tō Skékōl dalōieke taiē. Moisés ttē dalōiēno kitule e' dalōiekeitō yēsyesē. Judiowak kōs serke Damasco e'pa tō icheke tō ie' dōr wēm buaē. <sup>13</sup> Ie' deb-itū ye' ska' tā ye' a iché: 'A yami Saulo, be' wōbla buanú.' E' wōshāē tā ye' wōbla buanene iwawēnene Ananías suéyō iwa. <sup>14</sup> E' ukuōki tā ie' tō ye' a iché: 'Skékōl dalōiōk se' yēpa bak ká iaiāē, e' tō be' shukitatbak as ì kiane wē ie' ki e' jcher be' wā. Nies be' shukititō as yi dōr Yēsyesē e' saūbō ena ie' wák ttō tōsōbō. <sup>15</sup> Be' dōraē ie' ttekōlie. Ì kōs su' be' tō, ì kōs ttsē' be' tō, e' cheraēbō sulitane a. <sup>16</sup> I' tā kè bō ipanukia. Be' e' kōka. Be' e' wōskuó. Skékōl a ikió as ì sulu kōs wamblébō e' nu' olo'yōitō be' ki.'

<sup>17</sup> "Mik ye' dene Jerusalén etā, ye' mīa ttōk Skékōl tā iwé a, eē ye' tō ì sué kab-sueie. <sup>18</sup> Skékēpa Jesús suéyō tā ichéitō ña: 'Be' tō ye' ttē pakēmi judiowak a, e' kè klō'wepa ie'pa tō. E' kueki be' e' yóttsa bet Jerusalén.' <sup>19</sup> Etā ye' iché ia: 'A Skékēpa, ie'pa wákpa wā ijcher tō ye' bak ie'pa ñi dapa'wō wé kōs a, be' mik erblōk-wakpa, esepa yulōk ppè, wōtēwā s'wōto wé a. <sup>20</sup> Mik Esteban dōr be' kanè méso bak be' ttē pakōk, e' kōtwā ie'pa tō, etā ye' tso' eē. E' wēne buaē ye' wa. E' dalewa ye' tso' ie'pa datsi' kō'nuk.' <sup>21</sup> Erē ie' tō ye' a iché: 'Be' shkómitke ñalā ki. Ye' be' patkeke kamiē pē' kè dōr judiowak esepa a.'"

### Pablo atē comandante ulā a

<sup>22</sup> Pablo ttōke e' ttsök ie'pa tso' buaē, erē mik pē' kè dōr judiowak e' arit-séitō, etā ie'pa ñi kēka anuk darērē: "¿Wēm ese kè kawōtā senukia! ¿It-tōwasō!" <sup>23</sup> Ie'pa arkekarak taiē, tā idatsi' wōtī'wēkerakitō kashuk a, ñies ká po uyekerakitō kashuk a kēsik wa. <sup>24</sup> E' kueki comandante tō Pablo tsukmi ké weshke ñippōkwakpa wé a tā ippōk ké as itō ichōka ì kueki pē' wōñarke ie' ki taiē. <sup>25</sup> Erē mik ie'pa tō Pablo muéwatke ppè tsa'bata daloie wa, etā ie' tō capitán dur eē, e' a ichaké:

—¿A' a kawō mēne wēpa dōr romawak esepa ppōk kam ishulir e' yōki?

<sup>26</sup> Mik e' ttsé capitán dur eē e' tō, etā imía icomandante a ibiyó chōk tā iché ia:

—¿Wēs be' iwēmi? Wēm e' dōr romawak.

<sup>27</sup> Etā comandante debitu Pablo ska' tā ie' tō ie' a ichaké:

—¿Moki be' dōr romawak?

Pablo iūté:

—Tó, es idir.

<sup>28</sup> Etā comandante tō iché:

—Ñies ye' dōr romawak, e' pato'yō inukōl taiē wa.

Tā Pablo iūté:

—Erē ye' dōr romawak ye' kune' es e' kueki.

<sup>29</sup> Mik ittserakitō, etā ippōkwakpa tō Pablo méat bèrē. Mik comandante wā ijchenewā tō Pablo dōr romawak, etā ie' suane tō iók ie' tō imaukwā patkē'.

### Pablo e' tsatké judiowak wōkirpa wōrki

<sup>30</sup> Comandante ki ikiane jchenowā mokiē tō ì ki Pablo kcateke judiowak tō. E' kueki bule es tā ie' tō sacerdotepa wōkirpa ena judiowak wōkir malepa ké e' dapa'ukka. E' ukuōki tā ie' tō Pablo

wötsöök patké ta iyéttsaitö tsëmi duéser ie'pa wörki.

**23** Etä Pablo tö ie'pa suéwa krereë iwö ki ta iché iarak:

—A yamipa, ikké ye' senére, etä ye' er kè wa ye' kkaténe i ki Skëköl wöa.

<sup>2</sup> Etä sacerdote kibi kiè Ananías, e' tö, itso'rak Pablo o'mik, e'pa ké Pablo ppök ikkò ki. <sup>3</sup> Erë Pablo tö iüté:

—iBe' dör e' ökwak, e' pperaë Skëköl tö! Së be' tkër ye' shulök Moisés ttè dalöiëno e' wa. Erë zïök ye' ppök kébö? E' wa ttè ñe' dalösewéwa be' tö.

<sup>4</sup> Itso'rak ee, e'pa tö iché Pablo a:

—iBe' tso' Skëköl sacerdote kibi e' chök suluë!

<sup>5</sup> Pablo tö iché:

—A yamipa, ye' kè wa ijcher tö ie' dör sacerdote kibi. Skëköl yëkkuö tö iché: 'Yi tso' s'wökirie, ese kè char suluë.'

<sup>6</sup> Mik Pablo wa ijchenewa tö iwökirpa shäbötspa dör saduceowakpa, shäbötspa dör fariseowakpa, etä ie' tö ie'pa a iché aneule:

—A yamipa, ye' dör fariseowak. Ñies ye' yépa kos dör fariseowakpa. S'duowa shkerkane, e' wà panekeyö kröröë, e' ki a' tso' ye' kkatök.

<sup>7</sup> Mik Pablo tö ttè e' ché, etä fariseowakpa ena saduceowakpa e'pa wönanemi ñi ki. Etä ie'pa ñi blabatsélor.

<sup>8</sup> Saduceowakpa tö icheke tö s'duowa kè shkerta'kane. Ñies ichekerakitö tö Skëköl biyöchökwakpa kè ta', wimblupa sulusi kè ta'. Erë fariseowakpa tö iyi ekké kos klö'wé tö itso'. E' kueki ie'pa ñi blabatsélor. <sup>9</sup> Ie'pa ulitane arkerak taië. Fariseowakpa dör s'wöbla'uk ttè dalöiëno wa wakpa welepa e' kékä ta ichéraitö:

—Wëm i' kè wa i sulu wamblëne. Isalema wimblu ö Skëköl biyöchökwak wele utule ie' ta.

<sup>10</sup> Erë ie'pa ki shutirkeka taië kësik wa, e' kueki comandante suane dö' Pablo ttèwarakitö. E' kueki inippökwakpa tsuk

patkéitö Pablo yottsä ee tsëmi ñippök-wakpa wé a.

<sup>11</sup> E' nañewe ta Skëképa Jesús debitu e' tö Pablo a iché: "Be' er kuü. Wes be' tö ye' tté paké ië Jerusalén es ñies be' kawöta ipakök Roma."

**Judiowak kawö mé ñi a Pablo ttökwa**

<sup>12</sup> E' bule es ta judiowak welepa tö kawö mé ñi a Pablo ttökwa. Ie'pa tö ittè mé Skëköl a ttè i' wa: "Kè sa' chköpa, kè sa' di' yöpa dò mik Pablo ttèwa sa' tö etä." <sup>13</sup> Wëpa tö ittè mé es, e'pa döka dabom tkëyök (40). <sup>14</sup> Etä ie'pa míyal sacerdotepa wökirpa ena judiowak kueblupa, e'pa ska' ta iché iarak:

—Sa' tö ttè me' Skëköl a tö kè sa' chköpa, Pablo kam ttöwa sa' tö e' yöki. E' kè wà one sa' wa, e' ta as Skëköl tö sa' we'ikö. <sup>15</sup> E' kueki a' ena s'wökirpa malepa, a' ichó comandante a tö Pablo tsúbitu bule. A' e' ó tö a' ki ie' kiane chakè bua'iewa ishuloie. E' dalewa sa' tso'tke ikinuk ñala ki ttèwa kam idö a' ska' e' yöki.

<sup>16</sup> Erë Pablo nauyö wa ijchenewa ta imía ñippökwakpa wé a ta ibiyó méitö Pablo a. <sup>17</sup> Etä Pablo tö capitán kié eköl ta iché ia:

—Duladula i' tsúmi comandante ska'. Ie' wa ilè tso' yënoie ie' a.

<sup>18</sup> Etä capitán e' tö itsëmi comandante ska' ta iché ia:

—Pablo tso' wötëule, e' tö ye' kié ta ikköché ye' a tö duladula i' tsúmi be' ska'. Ie' wa ilè tso' yënoie be' a.

<sup>19</sup> Etä comandante tö iklö'wéwa iulä a ta itsëmi bánet. Eë ie' a ichakéitö:

—i' cheke be' tö ye' a?

<sup>20</sup> Ie' tö iché ia:

—Judiowak kawö métké ñi a be' a ichök tö bulepa Pablo tsúmi wé judiowak wökirpa e' dapa'uke ee. Ie'pa e' öke tö Pablo ttè kiane shulë bua'ie ie'pa ki. <sup>21</sup> Erë ie'pa ttè kè klö'war. Judiowak wëpa döka dabom tkëyök (40)

kita, e'pa tso' blëule Pablo panuk. Ie'pa kablë' Skëköl a ttë i' wa: "Kë sa' chköpa, kë sa' di' yöpa dö mik sa' tö Pablo ttëwä eta." Ie'pa tso'tke, ima be' icheke, e' ë panuk.

<sup>22</sup> Etä comandante tö ipatkémine ta iché ia: "Kë yi a ichar tö e' ché be' tö ye' a."

### Pablo patkémi Judea wökir kië Félix e' ska'

<sup>23</sup> Etä comandante tö ikimukwakpa kië böi ta ichéitö ie'pa a: "Ñippök-wakpa mi'ke klö wa esepa klö'ü döka cien böyök (200). Ñies ñippök-wakpa mi'ke kabaio ki esepa shtó döka dabom kuryök (70). Ñies ñippök-wakpa wa kët mi'ke esepa klö'ü döka cien böyök (200). Katuine de sulitu (9:00 pm) etä e'pa kos dapa'ü as imi'rak Cesarea." <sup>24</sup> Ñies ichéitö: "Kabaio yuló Pablo tso'ni. It-sümi kkö'nü buaë dömi s'wökir Félix ska'." <sup>25</sup> Ie'pa ta comandante tö yëkkuö patkémi më Félix a. Ikitule yëkkuö ki e' tö iché i' es:

<sup>26</sup> "A Félix, s'wökir kibi. Ye' dör Claudio Lisias. Yëkkuö i' shtéyö be' a. Be' shké'wéyö. <sup>27</sup> Judiowak wökirpa tö wëm i' klö'wä iminerak ittökwa. Erë mik ye' wa ijchenewä tö ie' dör romawak, etä ye' mä ye' ñippök-wakpa ta ta itsatkée sa' tö. <sup>28</sup> Ye' ki ikiane jchenukwa tö i ki ie'pa tö ikkateke. E' kueki itsémiyö judiowak wökirpa wörki. <sup>29</sup> Ie'pa tö ikkaté ie'pa ttë dalöiëno kitule, ese ki. Erë kë ye' wa i sulu kune ie' ki ittowaie ö iwötoie s'wöto wé a. <sup>30</sup> Erë ye' wa ijchenewä tö judiowak welepa kawö mé ni a ittowaie, e' kueki ye' tö ipatkébitu be' a. Ñies ye' tö ichétke ikkatök-wakpa a tö i ki ie'pa éna ikkatak, e' chó be' wöshäë."

<sup>31</sup> Etä ñippök-wakpa wa Pablo mítser nañewe wes ie'pa a ikéwö mëne es. Ie'pa demi ká kië Antípatris ee. <sup>32</sup> Bule es ta ñippök-wakpa dami klö wa, e' éltépa biteane ñippök-wakpa wé a. Etä iéltépa dami kabaio ki, e'pa wa Pablo mítser. <sup>33</sup> Mik ie'pa demirak Cesarea ee, etä ie'pa tö yëkkuö mé iwökir kibi a. Ñies Pablo méitörak ia. <sup>34</sup> Iwökir kibi tö yëkkuö sué one etä ie' tö Pablo a ichaké: "¿Wé be' datse?" Mik ie' wa ijchenewä tö idatse Cilicia, <sup>35</sup> etä iché ia:

—Mik be' kkatök-wakpa debitu etä be' ttë ttseraëyö.

Etä ie' tö Pablo wötökwa patké s'wöto wé tso' u bërie yö' blu' Herodes tö ká e' wökirpa a e' a. Eë iwötéwarakitö.

### Pablo e' tsatké Félix wörki

**24** Ká de skel etä sacerdote kibi kië Ananías, e' demi Cesarea judiowak kuëblupa welepa ta Pablo kkatök. Ñies wëm eköl kië Tértulo, e' de ie'pa wa ie'pa ttekölie Pablo kkatök Félix a. <sup>2</sup> Mik Pablo debitu etä Tértulo tö ikkatémi. Ie' tö Félix a iché:

A këképa s'wökir kibi, be' ttë dikia ká taië sa' serke bëre nita. Be' erbikö buaë, e' wa be' tö sa' wakpa kimé taië. E' kueki sa' tö wéstela chë be' a. <sup>3</sup> A Félix, këképa taië, be' tö sa' kimeke taië, e' kueki këkraë ká ulitane ki sa' tö wéstela chë taië be' a. <sup>4</sup> Kë ye' éna be' kawö chöwak taië, erë be' we'ikéyö, sa' ttö tso' bërber è er bua' wa. <sup>5</sup> Sa' wa ijchenewä tö wëm i' dör pë suluë. Ie' shköke ká wa'ne judiowak shutiuk ni ki as ini bla-batsölor. Ie' dör Jesús Nazaret wak e' klépa eruleë e' wökir eköl. <sup>6-7</sup> Ñies ie' éna Skëköl wé ia'wakka naïe. E' kueki sa' tö iklö'wéwa. <sup>8</sup> Be' wák a ie' chakirmi, es be' wa ijchermi tö i ki sa' tö ikkateke, e' dör mokië.

**24:6-7** Yëkkuö kitule ká iaiaë welepa tö ttë i' ká méka ttë i' wa: Sa' ki ikiane shulé wes sa' ttë dalöiëno tö iché es. **7** Erë shkëkipa wökir kibi kië Lisias, e' debitu ta iyétsa sa' ulä a kësik wa. **8** Ie' tö sa' a iché tö Pablo kkatök-wakpa kawöta ikkatök be' wörki.



<sup>9</sup>Judiowak tso' eë, e'pa ulitane tö Pablo kcateke ñittsë. <sup>10</sup>Etä Félix tö ie' a kawö mé ttoie ta ie' tö iché:

—Ye' wä ijcher tö ká iaiaë be' dör ká i' wakpa ttè shulökwak. E' kueki ye' tts'ene buaë e' tsatkök be' wörki. <sup>11</sup>Be' wák wä ijchermi tö ye' dë'rökä Jerusalén Skëköl dalöiök, e' ki ká detke dabom eyök ki böt (12). <sup>12</sup>Ie'pa kè wä ye' kune yi ta ñi chök. Ie'pa kè wä ye' sune pë' shutiükka Skëköl wé a, ñies judiowak ñi dapa'wo wé malepa a, ñies Jerusalén kos a. <sup>13</sup>Ï kos ki ie'pa tö ye' kcateke, e' kè yërpa ie'pa a yësyësë be' a. <sup>14</sup>Erë ye' tö be' a ichè tö Jesús dör ñala chökke, e' tté wa ye' tso' sa' yépa bak ká iaiaë e'pa Këköl dalöiök. Ie'pa tö ichè tö ttè e' kè dör buaë. Erë ñies ñ kos kitatbak yëkküö ki Moisés ena Skëköl ttekölpa tö, e' klö'wé ye' tö. <sup>15</sup>Ñies ye' erblöke Skëköl mik wës ie'pa es tö se' yësyësë ena se' suluë duowa e' shkerdakane. <sup>16</sup>E' kueki kekraë ye' e' chöke senuk buaë Skëköl wöa ena sultane wöa as kè ye' er tö ye' kkatö ñ ki.

<sup>17</sup>“Ye' mine sené duas tajë kè dë'ia íe, e' ukuöki ta ye' dene íe ye' wakpa shua inuköl kalmuk s'siarëpa a. Ñies ye' dene íyi muk Skëköl a idalöioie. <sup>18</sup>E' kanéuk ye' tso' Skëköl wé a e' dalewa ye' sué ie'pa tö. Ye' e' batse'wétke wës sa' ttè kitule tö ichè es. Eë pë' kè ku' tajë. Kè yi shutineka. <sup>19</sup>Erë judiowak welepa datse Asia, e'pa tso' eë. E'pa éna ye' kkatök ilè ki, e' ta warma ie'pa kawöta shkörö íe ye' kkatök. <sup>20</sup>Ie'pa kè shkärö, e' ta as íe itso'rak e'pa tö ichè tö ñ sulu kué ie'pa tö ye' ki mik ye' dë' e' tsatkök judiowak wökirpa wörki etä. <sup>21</sup>Erë mik ye' bak ie'pa wörki, etä ttè i' è yë' ye' tö aneule: ‘S'duowa e' shkerkane e' klö'wéyö, e' ki a' tso' ye' kkatök íñe.’”

<sup>22</sup>Jesús dör ñala chökke e' ttè jchertke buaë Félix wä. E' kueki mik ñ ché Pablo tö, e' ttséitö ta ie' kè ki ttè i' kianeia tsè. Ie' iché ie'pa a:

—Mik comandante kiè Lisias, e' de, e' wa ye' tö a' ttè shulè.

<sup>23</sup>Etä Félix tö capitán eköl ké Pablo wötökwane s'wöto wé a, erë ichéitö ia:

—Ikkö'nú er bua' wa wës kè s'wötëule es. Kawö mú ie' a as iyamipa bitu ikané uk.

<sup>24</sup>Bökki es ta Félix debitune ilaköl kiè Drusila e' ta. E' dör judiowak. Félix tö Pablo tsuk patké. Pablo tö s'kawöta erblök Jesucristo è mik e' wä paké Félix a. E' ttsök ie' tso'. <sup>25</sup>Erë mik Pablo tö sene yësyësë ena e' kkö'nè sene sulu yöki ena s'shulir aishkuö ta e' wä paké, etä e' tö Félix tkiwéwa. Ie' tö iché Pablo a:

—Be' yüne. Mik ye' kawö kune e' wa ye' tö be' kiene.

<sup>26</sup>Ñies Félix tö ipaneke tö Pablo mú tö inuköl watkè ia iomine bër, e' kueki ie' tö Pablo kiekerö kekraë ttök ie' ta. <sup>27</sup>Es itka dö duas böc. E' ukuöki ta Félix kè kanëblöia s'wökirie. Ie' skéie wëm kiè Porcio Festo, e' de s'wökirie. Félix atak buaë judiowak ta, e' kueki Pablo méatitö wötëule s'wöto wé a.

### Pablo e' tsatké Festo wörki

**25** Festo demi Cesarea kanëblök s'wökirie e' ki ká de mañat ta imía Jerusalén. <sup>2</sup>Eë ta sacerdotepa wökirpa ena judiowak wëpa kibipa, e'pa tö Pablo kkaté Festo a. <sup>3</sup>Ie'pa tö ikié ie' a: “Sa' kímú er bua' wa. Kawö mú Pablo tsöbitu íe Jerusalén.” E' dör Pablo ttowa ñala ki. <sup>4</sup>Erë Festo tö iüté:

—Pablo tso' Cesarea wötëulewa s'wöto wé a. Eë ye' mi'ke kukuie. <sup>5</sup>Ï sulu wamblé ie' tö, e' ta as a' wökirpa mi' ye' ta Cesarea ie' kkatök ee.

<sup>6</sup>Festo sené Jerusalén ká päköl (8) ká dabom (10) e' ulatök ta imíane Cesarea. E' bule es ta ie' e' tkéka ikula' ki ttè shulo wé a. Etä Pablo tsuk patkéitö shulè. <sup>7</sup>Mik Pablo dewa, etä judiowak datse Festo ta Jerusalén, e'pa dewa ie' o'mik ta ikkaté íyi suluë tajë ese ki. Erë ie'pa kè a iwök-

lönuk yës tö e' dör moki. <sup>8</sup>E' ukuöki ta Pablo tté e' tsatkoie. Ie' tö iché ia:

—Ye' kè wä ì sulu wamblène yës judiowak ttè dalöiëno ki, ñies Skëköl wé ki, ñies Roma wökir kibi e' ta. Ekkëpa kè yëule ye' wä suluë.

<sup>9</sup>Erë Festo atak buaë judiowak ta, e' kuëki ie' tö Pablo a ichaké:

—¿Be' shkak Jerusalén as ye' tö be' shulö ee?

<sup>10</sup>Ie' tö iüté:

—Au. Ye' tso'tke Roma wökir kibi e' ttè shulo wé a. Íe a' kawöta ye' shulök. Be' wä ijcher buaë tö ye' kè wä ì sulu wambléule judiowak ta. <sup>11</sup>Erë ilè sulu wambléyö, ese kué a' tö, e' ki ye' kawöta ttèwa, e' ta ye' ttówa. Erë ì kos ki ie'pa tö ye' kKateke, e' kè yëne, e' ta kè yi kawöta ye' muktsa ie'pa ulä a. E' kuëki ye' tö ikié tö Roma wökir kibi as e' wák tö ye' shulö<sup>8</sup>

<sup>12</sup>Etä Festo tté ipattökwakpa ta eta ichéitö Pablo a:

—Buaë be' ikiétke tö Roma wökir kibi tö be' shulö. E' kuëki ye' tö be' patkekemi Roma as ie' be' shulö.

### Festo tö Pablo tté paké blu' Agripa a

<sup>13</sup>Ká tka wekké alè e' ukuöki ta blu' kiè Agripa e' demi Cesarea ikutä kiè Berenice e' ta Festo tkëneka ká wökirie e' kèwö tkö'uk. <sup>14</sup>Ie'pa e' tséat ká taië. E' dalewa Festo tö ì tköke Pablo ta e' paké blu' Agripa a: Ie' tö iché ia:

—Íe wëm tso' eköl méat Félix tö wötëule s'wöto wé a. <sup>15</sup>Mik ye' bak Jerusalén, etä sacerdotepa wökirpa ena judiowak kuëblupa, e'pa debitu wëm e' kkatök ye' a. Ye' a' ikiérakitö as ye' iwömüttsa ttèwa. <sup>16</sup>Ye' tö ie'pa iüté tö romawak wökirpa kè yi tteta'wa, kam ie' tsatkö ikkatökwakpa ta ñi wöshaë e' yöki. <sup>17</sup>E' kuëki mik ie'pa debitu íe, eta

kè ye' kawö chöone. E' bule es ta ye' e' tkéka ye' kula' ki ttè shulo wé a ta wëm e' tsuk patkéyö. <sup>18</sup>Erë mik ikkatökwakpa debitu, etä ie'pa kè wä ikkatëne íyi sulu ki wës ye' ibikeits es. <sup>19</sup>Ie'pa tö ikkaté wës ie'pa Skëköl dalöieke ese ki. Nies wëm kótewä kiè Jesús, e' ché Pablo tö tö itsö' tse'ka, ese è ki ie'pa tö ikkaté. <sup>20</sup>Ye' kè wä ijcher wës yö ttè e' wè, e' kuëki ye' tö Pablo a ichaké: “¿Be' shkak Jerusalén as ee be' shulir ttè i' ki?” <sup>21</sup>Erë ie' ikié tö as se' wökir kibi tö ishulö. E' kuëki ye' tö ikéwö mé tö as itkër wötëule dò mik ye' tö ipatkekemi etä.

<sup>22</sup>Etä Agripa tö iché Festo a:

—Ye' éna wëm e' ttò tsak ñies.

Tä Festo tö iüté:

—Bule bö ittseraë.

<sup>23</sup>Bule es ta Agripa ena Berenice, e'pa debitu, tkawa u a shkörami wës kéké taië es. Nippökwakpa wökirpa ena ká e' kékëpa dalöiërtä taië, esepa debitu ie'pa ta ñies. Etä Festo tö Pablo tsuk patké <sup>24</sup>ta ichéitö:

—A blu' Agripa ena kékëpa ulitane tso' íe se' ta, íe wëm dur eköl kiè Pablo. Judiowak kos tö ie' kKateke ye' a Jerusalén ñies íe Cesarea. Ie'pa kè shtrirta'wa ye' a ikiök aneule tö ikéwö müttsa ttèwa. <sup>25</sup>Erë ye' a ta ie' kè wä ì wamblène ì ki yö ittökwa ipatkëmi. Erë ie' wák tö ikié as Roma wökir kibi tö ishulö. E' kuëki ye' tö ibikeitsbak patkëmi ee. <sup>26</sup>Erë kè ì kune ye' wä shtëmi yëkküö ki mëmi s'wökir kibi a ikkatoie. A Agripa, e' kuëki ye' wä idebitu a' wörki, bua'ie be' wörki, as be' ichakö. İma be' iché, e' ukuöki ta iyëkküö shtëmiyö. <sup>27</sup>¿Wes ye' tö yi patkemimi shulè kè wayëule tö ì ki ikkatërke?

### Pablo e' tsatké blu' Agripa wörki

**26** E' ukuöki ta Agripa tö Pablo a iché:

§25:11 Pablo dör romawak e' kuëki ie' a kawö ta' ikiök Roma wökir kibi a tö e' tö ishulö. Roma wökirpa tsitsir kè a iwöklönuk.

—Be' ttó e' tsatkoie.

Etá Pablo ulà kéka tá ittémitke i' es: 2-3 “A blu' taië Agripa. Se' judiowak ser, e' jcher buaë be' wa. Nies ttè i' kî sa' nî chöke, e' jcher buaë be' wa. E' kuekî i'ñe tá ye' tts'ne buaë e' tsatkök be' wörkî ì kos kî judiowak tò ye' kcateke, e' yöki. Es ikiéyö be' a tò ye' ttó tso' enaë.

4 “Se' wakpa kos wa ijcher buaë tò wes ye' ser ye' kaska' ena Jerusalén mik ye' bak duladula eta. 5 Nies ie'pa wa ijcher buaë tò kekraë ye' dör fariseowak. Ese wakpa e' tiuke Skéköl ttè dikia yesyésë se' wakpa malepa tsata. Ie'pa kî ikiane, e' tá ie'pa tò ichèmi tò mokî ye' dör fariseowak. 6 Skéköl kablè' se' yépa bak ká iaiaë e'pa a tò s'duowa e' shkerdakane, e' wà panekeyö moki, e' kî ie'pa tso' ye' kkatök i'ñe tá. 7 Se' dör Israel aleripa e' ditséwöpa döká dabom eyök kî böl (12), e'pa tò iwà paneke nies er mokî wa. E' kuekî ie'pa tò Skéköl dalöie e' wakanewekerakitö nië nañeë kekraë. A blu' Agripa, s'duowa shkerdakane, e' panekeyö wes se' wakpa malepa es, e' tá çì kî ie'pa tso' ye' kkatök? 8 Çì kuekî a' ibikeitseke tò s'duowa e' kè shkenukkane Skéköl a?

9 “Ye' wák bak ibikeitsök tò ye' kawö-tá ì kos or ye' a e' uk Jesús Nazaret wak e' tté wöklö'woie. 10 Es ye' tò iwamblè' Jerusalén. Sacerdotepa wökirpa tò ye' a kawö me' iwambloie. S'batser'pa taië wötè'wa ye' tò s'wöto wé a. Kè dör e' è, nies mik ie'pa ttekerakitö, eta ye' a tá e' dör buaë. 11 Taië ie'pa we'ikyö se' nî dapa'wö wé ulitane a ie'pa koie ie'pa erblö Jesús mik e' olo'yök. Ye' kësik blè' ie'pa kî taië. Ye' tò ie'pa tötè'rö tkörö ká bár kî we'ikè.

12 “Sacerdotepa wökirpa tò ye' a kawö me' ena ye' patkè' ese wamblök Damasco, e' wakanéuk ye' mirwa. 13 Erë, a blu', nälá kî dibata a tá ká jai a ye' tò ì sué bö'wöie e' tköká diwö olo tsata. Bö'wö e' olo bune ye' pamik ena imirwarak ye'

tá e'pa pamik nies. 14 Sa' kos anere iski tá ittò tseyö e' tò iché ña hebreoie: 'A Saulo, a Saulo, çíók be' ye' we'ikeke? Ì sulu wamblekebö ye' kî e' wa be' wák e' mukettsa we'ikè wes iyiwak kè shkak ppèsö kal wa es.' 15 Ye' tò ie' a ichaké: 'A Skéképa, çibe' dör yi?' Ie' ye' iüté: 'Ye' dör Jesús, e' we'ikekebö. 16 Erë be' e' duóka. Ye' e' kkaché be' a be' patkoie kanablök ye' a. Ì kos suébö i'ñe ena ì kos kkacher-aéyö be' a, e' pakerabö sulitane a. 17 Ye' tò be' patkeraë be' yamipa a ena pè' kè dör judiowak esepa a. Ye' tò be' tsatkeraë ie'pa ulà a. 18 Ye' tò be' patkeraë ie'pa wöa ká nî'uk as ishkörak Skéköl tá ká nî a, kè ku'ia klöulewa stui a Satanás ulà a; nies as inuì olo'yardak iki as idörak Skéköl icha batser' e'pa kîie ierblérak ye' mik e' wa.'

19 “A blu' Agripa, ì yène ña ká jai a e' wawéyö. 20 Jesús tté buaë tsá pakéyö Damasco wakpa a, e' ukuökî tá yo ipaké Jerusalén wakpa a nies ká malè tso' Judea e' kos wakpa a. Nies ipakéyö pè' kè dör judiowak esepa a. Ye' tò ie'pa kos patté: “A' er mane'ú Skéköl a. A' senú buaë yesyésë ikkachoie tò mokî a' er mane'wétke ie' a.” 21 E' kuekî se' yamipa judiowak e'pa tò ye' klö'wá Skéköl wé a ttèwa. 22 Erë dö ikkè tá Skéköl tò ye' kímé, e' kuekî ye' tso'ia ie' tté pakök sultane a, s'dalöier'ta' taië esepa a, nies se' esepa a. Ì yé'atbak Skéköl ttekölpá ena Moisés, e'pa tò tò itkoraë, e' è pakekeyö. Kè ye' wa ttè ku'ki pakane. 23 Ie'pa tò iyé'at tò wé pairine'bitü idi' wa s'blüie e' kawötá ttèwa. E' ukuökî tá ie' shkerdakane keweie sultane yöki, tá s'atsatko tté pakeraëitö judiowak a ena ká ulitane wakpa a. Ttè e' dör wes bö'wö es se' er ñi'woie.”

### Pablo tò Agripa shkeñé erblök Jesús mik

24 Es Pablo e' tsatköke e' shua Festo tò iché ie' a aneule:

—¡A Pablo, be' alíneka! Be' é' yuè chékküö wa taië, e' tò be' alíwéka.

<sup>25</sup> Erë ie' iüté:

—A kékëpa Festo. Ye' kè alíneka. Ì chéyö e' kè dör alípa ttè, e' dör ttè moki.

<sup>26</sup> Se blu' Agripa tkër. Ie' wà ttè ikkè suule buaë. E' kuëki kè ye' tkine ttök ie' wörki. Íyi ikkè kôs kè wamblène blèule-wa. E' kuëki ye' wà ijcher tò ie' wà íyi ikkè jcher buaë. <sup>27</sup> A blu' taië Agripa, ye' wà ijcher buaë tò be' tò i' y'atbak Skëköl ttekölpa tò, e' klö'wé.

<sup>28</sup> Agripa tò iüté:

—Kè be' ibikeitsök tò be' ye' kèmi e' mane'uk Cristo kléie i' tã.

<sup>29</sup> Pablo tò iché:

—I' tã ö i' ukuöki tã, erë Skëköl mú ki ikiar tò be' ena a' kôs tso' i'ñe ye' ttö ttsök, e'pa mú dör wes ye' es, erë kè moulewa tabecka kicha wa wes ye' es.

<sup>30-31</sup> Etã blu' ena s'wökir kibi ena Berenice ena kôs itulur ee, e'pa ulitane e' kékã míyal bánet ttök ñita Pablo tté ki. Ie'pa tò iché ñi a:

—Wëm i' kè wà ì sulu wamblène ì ki ittèwasö, warma kè ie' kawöta wötèwa.

<sup>32</sup> Etã Agripa tò iché Festo a:

—Wëm i' kè tò ichöpa: 'ye' patkómi Roma wökir kibi a shulè', e'ma sö iëmimi.

### Pablo patkémirakitö Roma

**27** Mik ie'pa tò ibikeitsétke tò sa' patkekemi Italia, etã Pablo ena pè' skà tso' wötèule, e'pa mérakitö wëm eköl kiè Julio e' ulà a. Wëm e' dör ñip-pökwakpa eruleë kiè Emperador Icha, e' capitán. <sup>2</sup> Etã sa' e' iéka kanò a. Kanò e' datse ká kiè Adramitio ee michoë Asia wé kanò irirke dayë kkömik ese a. Wëm kiè Aristarco, e' tso'ñak sa' tã ñies. Ie' datse Tesalónica atë Macedonia ee. <sup>3</sup> Bule es tã sa' demi Sidón. Julio tò Pablo sué er bua' wa. Ie' tò iémi s'yamipa serke ee, e'pa pakök as ì kiane ie' ki e' mù ie'pa tò ie' a. <sup>4</sup> Sa' e' yéttasã Sidón mir wöwí,

erë siwã' bitsirke darërëë wöiá. E' kuëki sa' míyal dayë nane kiè Chipre e' kke wé siwã' kè bitsirku' taië e' éka. <sup>5</sup> Sa' tkami Cilicia ena Panfilia demi Mira atë Licia ee.

<sup>6</sup> Etã ee capitán tò kanò datse Alejandra, e' kué etö. E' mi'ke Italia. Eë sa' e' mane'wé kanò e' etö a tã sa' míyal. <sup>7</sup> Siwã' kuëki sa' mirwã kanò ki enaë, kanè taië wa. Ká böt ö ká mañat alè etã sa' demi ká kiè Cnido wöshaë. Siwã' bitsirkeia sa' kke, e' kuëki sa' tkami Salmona wöshaë tã sa' tkami dayë nane kiè Creta e' wishet. <sup>8</sup> Sa' mí kanò ki dayë kkò è wa kanè taië wa. Etã sa' demi ká kiè Buenos Puertos (kiè e' wà kiane chë wé kanò irirke buaë), e' atë tsinet ká kiè Lasea ee.

<sup>9</sup> Sa' ki kawö chó taië tã yuëdiö de-watke. E' késka' tã kè se' a shkanukia dayë ki dö' ì sulu tkò s'tã. E' kuëki Pablo tò ipattérak:

<sup>10</sup>—A kékëpa, yö isuë tò se' mirwã' i' etã ì sulu tkömi. Kanò i' ena dalì i', e' weirwami, ñies dö' se' wákpa duölur.

<sup>11</sup> Erë capitán kè wã Pablo ttö iütène. Ie' tò kanò wák ena kanò ñakökwakpa wökir, e'pa ttö iüté. <sup>12</sup> Wé ie'pa kanò irine e' kè dör buaë yuëdiö tkó'woie. E' kuëki kanò wakpa kibiiepa tò ibikeitseke tò se' mú dòmi Fenice yuëdiö tkó'uk ee, e' dör bua'ie. Ká e' atë dayë nane kiè Creta ee. Eë dayë atë noroeste ena sudoeste.

### Siwã' bitsirke taië dayë ki

<sup>13</sup> Etã siwã' datse sur kke, e' bitsine-mitke bërëbërë. Ie'pa tò ibikeitsè tò se' tkömimi, e' kuëki ie'pa e' yéttasã míyal Creta dayë kkò è mik kanò ki. <sup>14</sup> E' ukuöki bet tã sèrkë bitsineka taië datse nordeste kke, e' tërke kanò mik. <sup>15</sup> E' tò kanò uyémi. Sa' kè a kanò wöklöneia siwã' kke. E' kuëki sa' tò iémi as siwã' wã imítser sa' tã. <sup>16</sup> Sa' tkami dayë nane tsitsir kiè Cauda, e' tsikka, wé kè siwã' bitsirku' darërë shütë ee. Sa' kaneblé darërëë, e' wa sa' tò kanóla

tso' s'tsatkoie e' muéwā buaë as kè imi'a dayë a. <sup>17</sup> E' ukuöki tã ie'pa tō kanò kibi ètò kī payuéwā buaë ttsa' wa. Ie'pa suane dō' kanò tkërka ttsa'wō tso' taië kiè Sirte, e' kī. E' kueki ie'pa tō datsi' ukuö tso' kanò shkōwoie, e' iéwā dayë a kanò wöklō'woie as imi' enaë. Tã ie'pa tō iémi as siwā wā imi'. <sup>18</sup> Bule es tã siwā' bit-sirkeia taië, e' kueki ie'pa tō dalì damirak iwā kanò a, e' tuléttsami dayë a. <sup>19</sup> Böiki es tã ie'pa tō íyi taië tso' kanò shkōwoie, e' kibiie tuléttsa dayë a iwákpa ulà wa. <sup>20</sup> Ká tka taië etã diwō kè wëneia bëkwō kè wëneia. Sërkë taië tërkeia sa' kī. E' kueki sa' tō ibikeitsé tō sa' duölurdaë, kè sa' tsatkërpaia.

<sup>21</sup> Sa' tka ká taië kè chkaule. E' kueki Pablo e' kéka ie'pa tso' kos e' shuā tã ichéitō:

—A kékëpa, a' tō ye' ttò ttsópa, e'ma kè se' e' yënettsā Creta ena ì sulu tka se' tã, e' kè bak se' tã. Nies kè se' íyi weinewa. <sup>22</sup> Erë i'ñe tã a' er kuú. Kè yi duòpawā. Erë kanò è weirwami. <sup>23</sup> Enia nañewe Skëköl dör ye' blú dalöieke ye' tō, e' tō ibiyöchökwak patké ye' ska', <sup>24</sup> e' tō ye' a iché: 'A Pablo, kè be' suanukia. Be' kawötã shkókrö Roma wökir kibi e' ska'. Skëköl er buaë ché be' a. E' kueki pé' kos tso' be' tã kanò a, e'pa tsatker-aëitō.' <sup>25</sup> A kékëpa, e' kueki a' er kuú. Ye' erblöke Skëköl mik. Ye' wā ijcher buaë tō ì kos tköraë wës Skëköl biyöchökwak tō ye' a iché es. <sup>26</sup> Erë siwā' tō se' patkeraë dō ká wele dayë kkömik.

<sup>27</sup> Dayë kiè Adriático e' kī sa' dami si-wā wā wī'kè iō'kè. E' kī ká de domingo bötö e' nañewe ká shābōts etã kanò ñakökwakpa éna iane tō sa' dökette ká sí kī. <sup>28</sup> Ie'pa tō dayë shū ma'wé tō wekké idir döttsa iski tã ide metro dökā dabom mañayök kī teröl (36). E' ukuöki tã wī'kie iskà ma'wënerakitö tã ide metro dabom böyök kī kul (27). <sup>29</sup> Ie'pa suane dō' ák tso' blubluë ese mik kanò tër, e' kueki tabechka tso' kanò wöklō'woie e' émirak-

itö tkël kanò ñakka dayë shuā. Tã ik-iérakitö Skëköl a tō sa' kímú ká ñirke e' dalewa. <sup>30</sup> Erë kanò ñakökwakpa tō ibikeitsé: se' tköyalmi as se' e' tsatkò. E' kueki ie'pa tō kanóla éwami dayë a. Ie'pa e' é tō ie'pa mí tabechka tso' kanò wöklō'woie, e' ökmi kanò wökka dayë shuā. <sup>31</sup> Erë ì weke ie'pa tō e' biyó ché Pablo tō ñippökwaipa a ena capitán a. Ie' tō iché:

—Ie'pa tkayal, e' tã a' kè tsatkërpa.

<sup>32</sup> Etã ñippökwaipa tō kanóla e' tssé télor tã iémirak dayë a.

<sup>33</sup> Ká ñirketke etã Pablo tō ie'pa uli-tane a iché:

—Ilè nú. A' tso' ipanuk tō ì tkömi, e' kī domingo de bötö e' dalewa kè ì ñane a' wā yës. <sup>34</sup> A' kényö ilè ñuk. A' e' tsatkak, e' tã a' kawötã ilè ñuk. Kè a' weirpa yës. <sup>35</sup> Pablo tté one, etã pan klö'wéitö et, tã wëstela chéitö Skëköl a. Sulitane wörki iblatéitö tã ie' wák tō itsá ñé. <sup>36</sup> Etã e' tō imalepa erkiöwé tã ichkérak nies. <sup>37</sup> Sa' dökā cien böyök kī dabom kuryök kī teröl (276) seraa. <sup>38</sup> Ie'pa chké one kos ie'pa kī kiane ekké tã dalì eyök atë e' tuléttsarakitö dayë a as kanò at öböbla. Dalì e' dör trigowö.

### Kanò jchënane

<sup>39</sup> Ká ñine tã kanò ñakökwakpa kè wā dayë kkò suule. Erë ie'pa tō isué tō ttsa'wō buaë ulat tër kanò ikloka. E' kueki ie'pa tō ibikeitsétke tō kanò ma'üsö klèka ee. <sup>40</sup> Etã íyi tso' kanò wöklō'woie, e' tssé télor ie'pa tō émi dayë a. Etã kaltak tso' kanò ñakoie, e' wötsélor ie'pa tō. E' ukuöki tã datsi'kuö skékarakitö kanò wökka tã idökemitke dayë kkömik. <sup>41</sup> Erë ttsa'wō tkërka dayë dikia, e' kī kanò tkëne kuj. Tã kanò wökka bunewa ttsa'wō a, kè yënettsaia. E' dalewa dayë tërke kanò ñakka e' tō kanò tskélor taië.

<sup>42</sup> Wépa mir klöulewā e'pa kiane ñippökwaipa kī ttélur as kè itköyal ùkule. <sup>43</sup> Erë capitán éna Pablo tsatkak, e' kueki

ie' kè wà ikéwö mène ittökukur. Ie' tö iché: “Wépa ukuo, e'pa e' ppólor kéwe dayë a as e'pa döttsa ká sí kī. <sup>44</sup>As imalepa mi' kanò tak kī.” Es sa' ulitane dettsa ká sí kī buaë.

### Pablo sené si' mañat ká kiè Malta ee

**28** Mik sa' dettsa età sa' wà ijchenewa tö ká e' kiè Malta. <sup>2</sup>Ká e' wakpa tö sa' kiéwa buaë seraá. Kase suluë ena kalì yërke, e' kuekì bö' batsékarakitö taië ta sa' kiérakitö bö' baiklök. <sup>3</sup>Età Pablo tö bö' ulatska shté, e' tuleke bö' a. E' wöshaë ta tkabè sulusi e' yétsa bö'ba yöki, e' tö Pablo kuéwa iulà kkue a, kè èwa. <sup>4</sup>Mik ká e' wakpa tö isué tö tkabè moar Pablo ulà mik, età ichérakitö ñi a: “Wëm i' wà s'kötulewa alè. Eré dayë a itsatkéne, erë s'shulökwak tso' ká jai a e' kè wà kawö mène ia as iser.”

<sup>5</sup>Erë Pablo ulà wöppé ta tkabè anewa bö' a. Kè wes Pablo dé'. <sup>6</sup>Wékké Pablo iërkeka ö wékké Pablo duömiwa etkéme, e' panuk ie'pa tso' seraá. Erë ie'pa tö ipané taië. Mik ie'pa tö isué tö kè ì bak ie' ta, età ie'pa ibikeitséne kuakī. Ie'pa tö ichémi tö Pablo dör kéköl wele.

<sup>7</sup>Eë tsinet ká tso', e' dör Malta wökir kibi kiè Publio, e' icha. Ie' tö sa' kiéwa ena sa' sué buaë dò ká mañat. <sup>8</sup>Ta Publio yé, e' duöke duè dalölö wà ena ishütërke taië. E' ie' teme'r. Età Pablo mía iwe-blök ta ie' tö ikié S'yé a ta iulà méka iki ta ibua'wéneitö. <sup>9</sup>E' ukuökī ta imalepa kirirke tso' ká e' a, e'pa kos debitu ta ibuanerak ñies. <sup>10</sup>E' kuekī ká e' wakpa tö íyi kákmé sa' a taië. Mik sa' mitkene kanò kī ta ì kos kiane sa' kī shkoie, e' kákmé ie'pa tö sa' a.

### Pablo demi Roma

<sup>11</sup>Sa' sené ká e' a si' mañat ta sa' e' iéne kanò iëtö a. Eë kanò e' tö yuëdiö tköo'. E' datse Alejandría. Kanò e' kiè ie'pa kékölpa dalöiekerakitö dör klö e'pa

kiè wa. <sup>12</sup>Sa' míyal kanò e' kī ká kiè Siracusa eë. Eë sa' sené ká mañat. <sup>13</sup>E' ukuökī ta sa' míyal ká kiè Regio eë. E' bule es ta sa' e' yélur Regio a. Siwa' bit-sírke buaë datse sur kke, e' wa ká böt ta sa' demi Pozzuoli wé kanò irirke eë. <sup>14</sup>Eë sa' tö s'yamipa welepa kué. Ie'pa tö sa' ké e' tsukat ie'pa ta domingo etö. Bata ekké ta sa' demi Roma. <sup>15</sup>S'yamipa tso' Roma, e'pa wà ijchertke tö sa' datse. E' kuekī ie'pa de sa' ñaletsuk dò wé dalì wé tso' taië kiekerakitö Apio eë. Ñies ie'pa skà de sa' ñaletsuk ká kiè S'kaporö Wé Mañat eë. Mik Pablo tö ie'pa sué ta wéstela chéitö Skéköl a ta ittse'neka buaë. <sup>16</sup>Mik sa' demi Roma, età Roma wökirpa tö ie' ké senuk u etkue a ekörla, erë ishkekī méarakitö eköl Pablo kkö'nuk.

### Pablo tö Jesús tté paké Roma

<sup>17</sup>Pablo demi Roma, e' kī ká de mañat, età ie' tö judiowak wökirpa tso' Roma, e'pa kiök patkè. Mik ie'pa e' dapa'wéka ie' ska' ta ie' tö iché iarak:

—A yamipa judiowak, kè ye' wà ì sulu wambléne se' wakpa kī. Ñies kè ye' wà ì sulu wambléne se' yépa bak ká iaiaë e'pa sene e' kī. Erë ye' tso' Jerusalén e' me'ttsarakitö Roma wakpa ulà a. <sup>18</sup>Roma wakpa tö ye' ichaké iskië, erë kè ie'pa wà ì sulu kune ye' kī ye' ttowaie. E' kuekī ie'pa éna ye' akmi. <sup>19</sup>Erë judiowak kè kī ikiane tö ye' émi ie'pa tö. E' kuekī ye' kawötá ikiök tö ye' patkó Roma wökir kibi a as ie' tö ye' shulö. Erë ye' kè wà ì ta' se' judiowak kkatoie. <sup>20</sup>Í paneke se' dör Israel aleripa e'pa tö, e' kuekī ye' tkër íe moule. Ñies e' kuekī ye' tö a' kiök patkè a' suoie ena ttoie a' ta.

<sup>21</sup>Ie'pa tö iché ia:

—Judea wakpa kè wà yëkküö patkéule sa' a be' choie yës. Ñies sa' yamipa datse Judea, e'pa kè wà ì sulu yëule sa' a be' kī. <sup>22</sup>Sa' wà ijcher tö ttè pa'alì i' pakè be' tö e' cheke suluë

sulitane tö ká wa'ne. E' kueki sa' ki ikiane ttsè tö çima be' tö ibikeitseke?

<sup>23</sup> Ie'pa tö kawö skà mé ñi a kapakoie. Mik e' kéwö de, eta ie'pa dapaneka taië Pablo ska'. Ie' tö ì blúie Skëköl tso' e' tté paké bla'mi dò tsáli. Ì kit Moisés ena Skëköl ttekölpä tö yëkkuö ki e' wa ie' tö ie'pa pablé taië as ie'pa tö iklö'ù tö Jesús dör wé pairine'bitü idi' wa s'blúie e'. <sup>24</sup> Ie'pa welepa tö tté paké Pablo tö, e' klö'wé. Erë welepa kè wä iklö'one. <sup>25</sup> Ie'pa kè wä ibikeitse ñikkëë, e' kueki imítkerak erë Pablo tö ttè i' bata ché iarak:

—Ì yè' Wiköl Batse'r tö a' yépa bak iai-  
aë, e'pa a, itteköl bak kiè Isaiás e' wa, e'  
dör moki. Skëköl tö iché ia:

<sup>26</sup> 'Be' yú ta ichó ká i' wakpa a.

A' tö ittseraë je', erë kè a' éna iwà anak.

A' tö iwebleraë je', erë kè a' tö isuepa.

<sup>27</sup> Es ie'pa dör, ie'pa wökir suluë, e' kueki.

Ie'pa tö ikukuò wötéwä as kè iwattsër.

Ie'pa tö iwöbla tsimiwéwä as kè iwawër.

Ie'pa kè éna iwà anak.

Ie'pa kè shkakne ye' ska' as ye' tö ibua'üne.\*\*

Es Isaiás tö iyé'at. <sup>28-29</sup> A' wä ijchenú tö i' ukuóki ta Skëköl tö s'tsatkè e' tté tso'tke paké pè' kè dör judiowak esepa a. Ie'pa e' tö iklö'weraë.

<sup>30</sup> Pablo e' tséat duas bök wa'ne wé u patuekeitö eë. Sulitane mi'ke ie' weblök ta eë ie' tö ikiéwä. <sup>31</sup> Ie' tso'ie ì blúie Skëköl tso' e' tté pakök ena s'wöbla'uk Skëképa Jesucristo tté wa. Kè yi wä ie' wöklö'one. Kè yi wä ie' tsirione yës.

\*\*28:27 Isaiás 6.9-10

## Yëkkuö kit Pablo tö Roma wakpa a

### Romanos

Yi tö yëkkuö i' kit, e' wák kiè Pablo. Welepa tö ibikeitsè tö yëkkuö i' kit ie' tö etä ie' wák tso' Corinto. Ie' tö ikit duas dabom skeyök k<sub>i</sub> kul (57) Cristo kune'bak e' ukuök<sub>i</sub> ta. Ie' ikkeye' taië shkökmi Jesús mik erblökwakpa tso' Roma e'pa pakök. Erë kè ie' a kawö kune shkoie. E' kuek<sub>i</sub> ie' tö yëkkuö i' kit patkèmi ie'pa a as ie'pa wä ijcher tö i o' Jesús tö ie'pa dalèrmik. Ie'pa kibiiepa kè dör Israel aleripa erë Israel aleripa erblé Cristo mik esepa e' ie'wa ie'pa ta. Israel aleripa erblé Cristo mik esepa tö ibikeitsè tö ie'pa klö'bak Skëköl tö keweie e' kuek<sub>i</sub> ie'pa dör ibua'ie pè' kè dör ie'pa ditséwö esepa tsata. E' kuek<sub>i</sub> ie'pa kè ñi sini'kune.

E' kuek<sub>i</sub> Pablo k<sub>i</sub> ikiane kkachè ie'pa a yëkkuö i' k<sub>i</sub> tö sulitane dör ñies è Skëköl wöa. Israel aleri ö kè idör ileri e' dör ñies ème. Kewe Pablo tö ie'pa a ikkaché tö sulitane tö Skëköl wat'etsä e' kuek<sub>i</sub> e' nuí tso' sulitane k<sub>i</sub>. E' ukuök<sub>i</sub> ta ie' tö ie'pa a ikkaché tö Jesús tté buaè e' è wa Skëköl tö se' tsatkèmi ñikkèè, Israel aleripa ena kè idör ileripa esepa ñies. E' kkaché ie' tö ie'pa a. Ñies Pablo tö ikkaché tö erblé Jesús mik e' wa Skëköl tö se' klö'wèmi wes pè' buaè yësyèsè es. Israel aleripa tö ibikeitsè tö Moisés tté dalöiëno e' dalöiè wa Skëköl tö se' klö'wèmi wes pè' buaè yësyèsè es. Erë Pablo tö ie'pa a iché tö e' kè dör es. Se' kè a i onuk Skëköl tts'woie buaè as se' tsatköitö. Erë Jesús mik erblé e' wa ie' tö se' tsatkeke. Es Pablo tö iché yëkkuö i' k<sub>i</sub>.

### Shkëwè

**1** Ye' dör Pablo. Ye' dör Cristo Jesús kanè méso klöule ie' ttekölpa tsä e'

ekölie. Ñies ye' klöule tté buaè kkayè' Skëköl tö e' pakök.

<sup>2</sup>Ká iaiaè Skëköl kablè' tö tté buaè ñe' kkayërdaè, e' kit ittekölpa tö iyëkkuö bats'e' e' k<sub>i</sub>. <sup>3</sup>Tté buaè ñe', e' dör ilä Skëképa Jesucristo e' tté. S'ditsö wa ta ie' dör Israel blú bak kiè David e' aleri. <sup>4</sup>Erë mik ishkenekane, etä e' wa ikkayène Wiköl Bats'e' wa tö ñies ie' dör Skëköl Alä diché ta' taië e'.

<sup>5</sup>Ie' batamik Skëköl er buaè ché ye' a. Ie' ye' tkë'ka kaneblök Jesucristo a ittekölpa tsä e'pa ekölie as ká wa'ne pè' kè dör judiowak esepa kur ie' tö iutök erblé ie' mik e' wa. <sup>6</sup>Ñies a' tso' ie'pa shua. A' klöule Jesucristo ichaie. <sup>7</sup>Ye' tso' yëkkuö i' shtök a' dalèr taië Skëköl éna serke Roma e'pa a. A' klöule ie' wä s'bats'e'pa k<sub>i</sub>ie. S'yé dör Skëköl ena Skëképa Jesucristo as e'pa er buaè chò ena sene bèrè mù a' a.

### Pablo wéstela ché Skëköl a

<sup>8</sup>Kewe ye' iché tö a' erblé Jesús mik e' tté buneka ká wa'ne. E' kuek<sub>i</sub> wéstela chekeyö Skëköl a Jesucristo ttö wa a' ulitane k<sub>i</sub>. <sup>9</sup>Skëköl a ye' kaneblöke ye' er kos wa ie' alä tté buaè e' pakök, e' wák wä ijcher tö kekraè ye' er arke a' ska'. <sup>10</sup>Kekraè ie' a ikiekeyö tö ie' k<sub>i</sub> ikiane, e'ma as bata ekkè ta ie' kawö mù ye' a shkoie a' pakök. <sup>11</sup>Sulu ye' éna a' suak. Ye' éna a' k<sub>i</sub>mak as a' er diché k<sub>i</sub> ièr buaè Skëköl Wiköl wa. <sup>12</sup>E' wä dör tö se' erblöke Jesús mik eköl eköl, e' wa se' ñi er diché iò buaè.

<sup>13</sup>A yamipa, ye' k<sub>i</sub> ikiane tö a' wä ijcher tö taië ye' ileritsé shkoie a' pakök, erë dò ikkè ta ye' wötkërke. Ye' k<sub>i</sub> ikiane tö kanè me' Skëköl tö ye' a e' wä döttsä buaè a' shua wes ká malepa wakpa shua id'etsä es. <sup>14</sup>Ye' ittse' tö ye' k<sub>i</sub> kanè tso'ia Jesús tté buaè pakök sulitane a. Kè ye' tkine tö s'dalöièr ta' taië ese idir ö s'èsepa idir ö s'yöule ö kè s'yöule idir.



<sup>15</sup> E' kueki ñies ye' shkak Roma Jesús tté buaé pakök a' wakpa shüa.

**Jesús tté buaé dör Skököl  
diché taië s'tsatkoie e'**

<sup>16-17</sup> Jesús tté buaé e' wa Skököl a wépa kos tö ikl'wé esepa tsatkërmi. E' kueki ye' kè jaène tté e' ki. Tté e' pakane judiowak a kewe, e' itöki pè' kè dör judiowak esepa a. Tté e' tö ikkachè se' a tö wes Skököl tö se' kl'wèmi wes pè' buaé yësyësé es. Se' kl'wéitö es se' erblé Jesús mik e' wa. E' è wa ie' tö se' kl'wèmi es. E' dör wes itso' kitule Skököl yëkkuö ki es, e' tö ichè: "Yi dör yësyësé ierblö Skököl mik e' batamik, ese serdaë."<sup>††</sup>

**Sulitane ki ì sulu nuí tso' Skököl wöa**

<sup>18</sup> Skököl tso' ká jaì a, e' tso' wépa tö ì sulu wambleta' ena kè ser yësyësé esepa we'ikök. E' wa ie' tso' ikësik kkachök. Ì sulu kos wambleke ie'pa tö, ese tö ie' tté mokì e' wökl'wëke. <sup>19</sup> Kos s'ëna iane tö wes ie' dör, e' kkayè' ie' wák tö ie'pa a, e' kueki buaé ie'pa wa ijcher. <sup>20</sup> Kewe ta' ie' tö ká i' yö'at, e'tami sulitane wa ijcher tö wes ie' dör. Ie' kè wërta' erè ì kos yö'itö e' wa iwënewa buaé tö ie' dör Skököl, ñies tö ie' diché kè ertá'wa. E' kueki kè ie'pa a iyënuke tö kè sa' wa ijcher. <sup>21</sup> Eré ie'pa wa ijcher buaé tö ie' tso'tke, eré ie'pa kè wa ikikaneka wes ikawöta kikëka es. Ñies ie'pa kè wa wëstela yëne ie' a. E' skéie ì bikeitseke ie'pa tö ese kè wà ta'. Ie'pa erbiköke kos ese dör sulu ème. <sup>22</sup> Ie'pa e' chò tö ie'pa wa iyi kos ese jcher buaé, ñermata ie'pa ianewa kè kabikeitsöta'. <sup>23</sup> Ie' olo ta' taië kè ertá'wa, e' kè dalöiëne' ie'pa wa. E' skéie ie'pa tö s'duöta'wa ese diököl dalöieke. Dó kal ö ák yöule dùie ö bakaie ö talokie ese dalöiekerakitö ie' skéie.

<sup>24</sup> E' kueki Skököl tö ie'pa émi e' ia'ukka sene sulusi wa wes ie'pa ki ikiane es. Es ie'pa ñi dalösewéwa iyi s'jaëwè taië ese wa. <sup>25</sup> Ie' tté mokìe e' olo'yérakitö, e' skéie kache tté è kl'wëkerakitö. İyi yö'at ie' tö ese è dalöiekerakitö skökölíe, kè dör ie' wák dalöie. Ie' è ki kikëka mène buaé këkraë. Es e' idir.

<sup>26</sup> E' kueki Skököl tö ie'pa émi e' ya'uk wes ie'pa er sulu ki ikiane es. Dò alakölpá e' mane'wëttsá kè senakiá wépa ta' wes imeneat es. Ie'pa senéka ñita iwakpa è. <sup>27</sup> Es ñies wépa kè senakiá alakölpá ta. Ie'pa e' mane'wëttsá. Sulué ie'pa éna senakká iwákpa è ñita. E' dör jaé taië. Ie'pa e' ya'u sulu es, e' nuí ki iwákpa weirke siarè wes ikiane we'ikè es.

<sup>28</sup> Ie'pa kè éna Skököl bikeitsak, e' kueki ie' tö ie'pa émi ì sulué e' è bikeitsök as ì kè wamblök s'kàne ese wamblörakitö. <sup>29</sup> Es ie'pa er sulunewa da'áie. Ì sulu kos e' wambleke ie'pa tö taië. Ie'pa wöttserke taië. Ie'pa e' wamblöke sulué. Ie'pa ukyërke imalepa ta. Ie'pa sttekewa ena ñi wöñakköke sulué ena s'kit'wëke taië. Këkraë ie'pa er me'rie ì sulu è ki. Ie'pa biyöblöke ñi ki. <sup>30</sup> Ie'pa tö s'malepa cheke sulué. Sulu ie'pa éna Skököl ar. Ie'pa e' kkeökeka taië e' ttsökeka taië ena kè tkirkü' imalepa ki. İyi sulusi bikeitseke ie'pa wákpa tö, ese wamblekerakitö. Ie'pa kè tö imì ena iyé tté dalöieta'. <sup>31</sup> Ì dör buaé e' kè ane ie'pa éna. Ì uk ie'pa kablé e' kè wawëta'itö. Ie'pa kè éna yi dalërta'. Kè yi suëta' er siarè wa. <sup>32</sup> Eré ie'pa wa ijcher buaé tö Skököl tté dalöiëno tö ichè tö wépa tö iyi ekké wambleke esepa ki duëwa kiane, eré ie'pa tö iwamblekeia. E' kíie ta' ie'pa wa buaé iwër tö s'malepa tö iwamblé.

<sup>††</sup>1:16-17 Habacuc 2.4

### Skëköl tō sulitane shuleraë ñikkëë

**2** A' isie<sup>‡‡</sup> tō pë' chéyö ñe'sepa kichatekettsa, esepa kè a ì yënuK e' tsatkoie Skëköl wörki. Ì sulu kos wambleke ie'pa tō ese wambleke a' tō ñies. E' kueki mik a' tō ie'pa kichatëttsa, etä e' wa a' wákpa tso' e' kichatöktsa. E' kueki kè a' a e' tsatkënuK. <sup>2</sup>Se' wä ijcher tō Skëköl tō s'shulë yësyësë, e' tō se' e' wamblò sulu es esepa kos kichaterattsä. <sup>3</sup>A' tō ì sulu wamblé wes wépa kichatëttsa a' tō es, e' tã çwes a' ibikeitsëmi tō Skëköl kè tō a' kichatepattsä ñies? <sup>4</sup>A' tō ibikeitseke es, e' tã e' wa ie' er buaë se' tã, e' watöktsa a' tso'. Ie' tō se' anewekeia tajë, ie' kè tō se' we'ikè bet. Ie' er buaë a' tã, e' tō a' dalëttsekeia buaë, e' wa ie' tso' a' ulaiök as a' er mane'ù ie' a, ç' e' kè jcher a' wä? <sup>5</sup>Erë a' er darërëë. A' kè éna er mane'wak ie' a, e' nuí ki a' tso' Skëköl kësik e' kí kiök e' ki. Mik ie' s'shuleraë e' kéwö de etä ie' tō s'shuleraë yësyësë. <sup>6-11</sup>Sulitane dör ñies ème ie' a, e' kueki ie' tō iské meraë eköl eköl a wes s'ser es. Wépa e' chöke kekraë ì buaë uk, tso' ilo ena ikikëka ena sene michoë yulök, esepa ulä a sene michoë döraë. Erë wépa tkirke iwák è ki, e' wamblò sulu, kè tō ie' tte mokí dalöië, esepa we'ikeraëitö kësik wa da'a. Wépa e' wamblò suluë esepa kos weirdaë siarë kewe judiowak e' ukuöki tã sulitane, e' dalërdarak imik tajë. Erë wépa serke yësyësë esepa kos a ilo ena ikikëka ena sene bèrë e' merdaë tajë kewe judiowak a e' ukuöki tã sulitane a.

<sup>12</sup>Pë' kè dör judiowak esepa kè ku' Moisés tte dalöiëno e' dikia. Ie'pa tō ì sulu wamblé, e' tã iweirdaë siarë erë ie'pa kè shulirpa tte ñe' wa. Erë judiowak

tso' tte e' dikia, e'pa tō ì suluë wamblé e' tã tte e' wa ie'pa shulirdaë. <sup>13</sup>Wépa tō tte dalöiëno e' ttsé, e' è kueki ie'pa kè klö'wepa Skëköl tō wes pë' buaë yësyësë es. E' skéie wépa tō tte e' wä dalöië esepa klö'weraëitö es. <sup>14-15</sup>Pë' kè dör judiowak esepa kè wä Skëköl tte dalöiëno kit Moisés tō yëkkuö ki e' jcher. Erë mik ie'pa tō tte ñe' wä dalöië iwákpa wä ijcher e' kueki, etä e' wa iwënewä tō tte dalöiëno tso' ie'pa er a. Tte e' dikia ie'pa tso'. Tte e' è wa ie'pa er tō ie'pa a icheke tō ì dör buaë ì dör suluë. Tte e' wa mikle tã ie'pa er tō ie'pa kcateke, mikle tã ie'pa tsatkeke. Tte e' wa ie'pa shulirdaë. <sup>16</sup>E' tköraë aishkuö tã mik Skëköl tō ì kos tso' blëulewä se' er a e' shuleraë Cristo Jesús batamik etä, wes tte buaë pakekeyö e' tō ichè es.

<sup>17</sup>Erë a' welepa dör judiowak, esepa erblöke Moisés tte dalöiëno e' mik. A' e' ttsökä tō a' dör Skëköl icha. <sup>18</sup>Ì kiane ie' ki ese jcher buaë a' wä. A' yöule buaë ie' tte wa, e' kueki ì dör ibua'ie e' shukitmi a' a wë. <sup>19</sup>A' ibikeitseke tō o'ka pautmi a' a buaë. E' dör wes s'wöbla kè wawër esepa ulaië es ö wes se' tso' stui a esepa a bö'wö kkachè es. <sup>20</sup>A' wä tte dalöiëno tso', e' dör tte mokí ena íyi jcher tajë e' tté. E' kueki a' ibikeitseke tō a' a se' kam yör esepa yörmí ena wépa kè wä ì jcher esepa wöblarmi. <sup>21</sup>E' dör es, e' tã çwes a' kè e' wöbla'ù? A' tō s'patteke tō kè s'kàne akblök tã çwes a' akblöke? <sup>22</sup>A' icheke tō kè s'kawötä s'senewabak dalöseukwä tã çwes a' tō idalöseweke? Íyi diököl tso' dalöië e' ar suluë a' éna tã çwes íyi tso' iwé a' ekibleke a' tō? <sup>23</sup>Tte dalöiëno meneat a' a, e' wa a' e' ttsökä tajë tã çwes a' kè tō idalöië? E' wa a' tō ie' dalösewéwä. <sup>24</sup>Wëe' Skëköl

<sup>‡‡</sup>2:1 Versículo i' a Pablo ttökemi judiowak tã. E' wënewä bua'ie verículo 12 ena itóki itso' e' ki.

yëkkuö tö ichè: “Pè' kè dör judiowak, esepa tö Skèköl cheke suluë a' ukuömik.”<sup>¶¶</sup>

<sup>25</sup>Mokì wépa tö Moisés ttè dalöiëno e' iuteke, esepa a itóttola kkuölit tëule tsir e' dör buaë. Erè yi kè tö iiutè, esepa a kè idör iie bua', e' dör wës kè s'wakyöule es. <sup>26-29</sup>¿Wépa dör judiowak chökke? E' kè dör iditséwö è wa. E' kè dör iwakyöule iyese alè kì e' wa. Judiowak chökke e' dör wépa er yësyësé Skèköl wöa esepa, e' dör wës ie'pa wakyöule ier a es. E' kè onuk ttè dalöiëno e' a. E' ormi Wiköl Batse'r è a. Esepa wër buaë Skèköl wa, kè dör s'ditsö wa. E' kueki pé' kè dör judiowak, kè wakyöule, kè wä Moisés ttè dalöiëno e' ku', esepa tö idalöié buaë, e' ta ie'pa sueraë Skèköl tö wës judiowak wakyöule es eré kè iwakyöule mokì. Pé' tö ttè dalöiëno e' dalöié, eré kè iwakyöule ichkà kì, esepa tö judiowak kè tö iiutè esepa kkat-eraë ikì aishkuö ta, eré iwakyöule ena ttè dalöiëno tso' iwä.

**3** Yile tö ichakèmi: “E' dör es, e' ta ¿iie bua' idir tö se' dör judiowak? Se' tottola kkuölit tëule tsir ¿iie bua' e' dör?”<sup>2</sup> Ye' iiutè tö e' dör buaë shute ena iwä dör tajë. I'bu'ie dör tö Skèköl tö ittè me'atbak judiowak ulà a. <sup>3</sup>Yëne tö ie'pa welepa tö ttè ñe' dalösewéwä, erè e' è kueki ¿ichémisö tö Skèköl kè ttò mokjè?<sup>4</sup> Au, kè idör es. Eré sulitane kachömi suluë, erè ie' ttò mokjè kekraë. E' dör wës itso' kitule ie' yëkkuö kì es, e' tö ie' chè i' es:

“Sulitane isueraë tö be' ttò mokjè. Be' ttè shulirmi, e' ta be' e' alörakà be' kkatökwakpa kì.”<sup>§§</sup>  
Es Skèköl yëkkuö tö ichè.

<sup>5</sup>Pè' welepa kè wä ijcher yësyësé, esepa tö icheke tö s'ser suluë, e' wa ikì wënëwä bua'ie tö Skèköl dör yësyësé sulitane tsata. E' kueki ie'pa tö icheke tö e' nuí kì s'we'ikéitö, e' kè dör yësyësé. ¿Es idir? <sup>6</sup>Au, kè idör es. Skèköl chópa kè dör yësyësé, e'ma ¿wës ie' a sulitane shulirmi yësyësé?

<sup>7</sup>Es yile tö ichakèmi: “Ye' kache wa Skèköl ttò mokjè e' kikarkeka tajë, e' ta ¿ì kueki e' nuí kì ye' kkatèkeiaitö?”<sup>8</sup> E' chópa es, e'ma sö ichèmi tö “ì sulu kí wamblösö as e' wa ì buaë kì dò tajë.” Welepa tö icheke tö ttè ese wa ye' tö s'wöbla'weke. Ie'pa éna ye' wöakwa, e' kueki ie'pa tö ye' cheke sulu es. Erè ie'pa esepa kichatëttsa kiane.

### Kè yi dör yësyësé Skèköl wöa

<sup>9</sup>E'ma ¿ì chémisö? Sa' dör judiowak ¿esepa dör buaë sulitane tsata? Au, kè idör es. Ikkachétkeyö a' a tö sulitane, judiowak ena wépa kè dör judiowak, esepa kos tso' sene sulu dikia. <sup>10</sup>E' dör wës itso' kitule Skèköl yëkkuö kì es, e' tö ichè: “¿Kè yi ku' eköl wé'ia dör yësyësé Skèköl wöa!

<sup>11</sup>¿Dör buaë Skèköl a ese kè ane yi éna yës.

Kè yi ku' Skèköl yulök.

<sup>12</sup>Sulitane tsj tröuke ie' yöki;

Ie'pa er sulunewä suluë.

Kè yi ku' eköl wé'ia ì buaë ese uk.\*

<sup>13</sup>Ie'pa ttò suluë, e' dör wës s'nu kélkuö kköppèe alar suluë es.

Ie'pa kkò kì s'kitö'wè me'rie.†

Ie'pa kapakò e' dör wës tkabè ichók kapöli es.‡

¶¶2:24 Isaiás 52.5; Ezequiel 36.22

§§3:4 Salmo 51.4

\*3:12 Salmo 14.1-3; 53.1-3

†3:13 Salmo 5.9

‡3:13 Salmo 140.3

<sup>14</sup> Ie'pa tso'ie alibchök s'malepa kî kësik wa.<sup>¶</sup>

<sup>15</sup> Ie'pa er me'rie s'ttëwà è kî.

<sup>16</sup> Wé ie'pa dami ee s'we'ikè ena s'eriawè siarè ese mekearakitö.

<sup>17</sup> Sene bèrè ñalé e' kè suule ie'pa wà.<sup>§</sup>

<sup>18</sup> Skëköl dalöie e' kè eri ta' ie'pa wà yës."<sup>\*\*</sup>

Es Skëköl yëkkuö tö ichè.

<sup>19</sup> Se' wà ijcher tö ì kos chè Skëköl ttè dalöieno tö, e' chëtö wépa tso' idikiä, esepa a. Ttè e' wa sulitane si-wà'blöwekewa Skëköl tö. Nies ttè e' tö ikkacheke tö sulitane kî nuì tso' ie' wöa.

<sup>20</sup> Ttè dalöieno e' dör ikkachoie se' a tö se' dör ì sulu wamblökwakpa. E' kuekî kè yi a iyënucca: "ttè dalöieno iütéyo seraä, e' kuekî Skëköl kawötä ichök tö ye' dör pè' buaë yësyësè."

### Wes Skëköl tö se' klö'wëmi wes pè' buaë yësyësè es

#### (3.21-31)

<sup>21-23</sup> Erè i'ñe ta Skëköl tö se' a ikkachétke tö wes ie' tö se' klö'wëmi wes pè' buaë yësyësè es. E' kè dör ttè dalöieno iütèsö e' wa. E' dör se' erblé Jesucristo mik e' wa. Wépa kos erblé ie' mik, esepa klö'wé Skëköl tö wes pè' buaë yësyësè es. Nies Skëköl yëkkuö kos e' tö isini'kué tö mokî idir. Sulitane dör ì sulu wamblökwak. Kè se' serku' buaë yësyësè wes Skëköl olo ta' taiè e' ser es. E' kuekî sulitane dör nies ie' wöa. <sup>24</sup> Erè Cristo Jesús tö se' yé'ttsa ì sulu ulà a. E' wa Skëköl tö se' klö'wé wes pè' buaë yësyësè es. E' kè kî se' ñarku', e' dör éme. Es ie' er buaë ché se' a. <sup>25</sup> Ie' tö Jesucristo me'ttsa ttëwà se' skéie e' pé tène taiè se' nuì olo'yoie. E' de se' ulà a se' er-

blé Jesús mik e' wa. E' wa ie' tö ikkaché tö ie' dör yësyësè. Ká iaiäe ie' tö sene sulué dalé'ttsé'bitu' enaè. <sup>26</sup> E' kéwö ska' ta ie' kè wà se' weine wes s'kawötä weinuk es. Erè se' nuì patone Jesucristo weine e' wa. E' wa Skëköl tso' ikkachök i'ñe ta tö ie' dör yësyësè. Nies ie' tso' ikkachök tö wes ie' tö wépa erblé Jesús mik esepa klö'wëmi wes pè' buaë yësyësè es.

<sup>27</sup> E' dör es, e' ta çì wa se' e' tso'kami Skëköl wöa? ;Kè ì wa! Se' erblé Jesús mik, e' kuekî ie' tö se' klö'wé wes pè' buaë yësyësè es. Kè idör ttè dalöieno iütèsö e' kuekî. E' kuekî kè se' a e' tssënucca ì wa yës. <sup>28</sup> Es se' tö ibata chéat tö Skëköl tö se' klö'wé wes pè' buaë yësyësè es se' erblé Jesús mik e' kuekî. Kè idör ttè dalöieno e' iütèsö e' kuekî.

<sup>29</sup> Erè çSkëköl dör judiowak è Këköl? çIe' kè dör pè' malepa Këköl? Tó, ie' dör pè' kè dör judiowak esepa Këköl nies.

<sup>30</sup> Ie' dör eköl ème. Wépa erblé Jesús mik esepa klö'wëitö wes pè' buaë yësyësè es. Kè ie' tkine tö judiowak idir ö kè idir judiowak. <sup>31</sup> Se' tsatkërmi se' erblé Jesús mik e' wa, eta çsö ichëmi tö Moisés ttè dalöieno e' kè diché ta'ia? ;Au, e' kè dör es! E' skéie se' tö ikî ché mokî tö idiché tso'ia iwák es.

### Abraham erblé Skëköl mik

**4** Eta sa' judiowak yé bak kiè Abraham, çima e' chëmisö? çÌ jchenewa ie' wà erblé Skëköl mik e' wa? <sup>2-3</sup> Skëköl tö Abraham klö'upa wes pè' buaë yësyësè es ì buaë wëitö e' kuekî, e' ma buaë ie' a e' tssërmika. Erè Skëköl yëkkuö tö ichè: "Abraham erblé Skëköl mik, e' kuekî iklö'wëitö wes pè' buaë yësyësè es."<sup>††</sup> E' kuekî ie' kè a e' tssënucca yës Skëköl wöa. <sup>4</sup> E' dör wes s'kaneblétké ese patuè

<sup>¶</sup>3:14 Salmo 10.7

<sup>§</sup>3:17 Isaías 59.7-8

<sup>\*\*</sup>3:18 Salmo 36.1

<sup>††</sup>4:2-3 Génesis 15.6

es, e' kè dör kakmeule. E' dör ikanebletke e' ské. <sup>5</sup> Erë yile erblé Skéköl tö s'sulusipa klö'wèmi wes pè' buaë yësyësë es e' mik, e' ta ese klö'weraë Skéköl tö es, eré kè iwà ì buaë one e' tsatkoie. <sup>6</sup> Nies e' sini'ku' David tö. Ie' iché tö ayëcha buaë wé klö'wé Skéköl tö wes pè' buaë yësyësë es, kè dör ì buaë wéitö e' kueki. <sup>7</sup> Ie' tö iyè':

“Wépa ki inuì olo'yé Skéköl tö ena itkòwée iki, jayëcha buaë esepa!

<sup>8</sup> Wépa kè chakepaia Skéköl tö inuì ki, jayëcha buaë esepa!”<sup>‡‡</sup>

Es itsö kitule.

<sup>9</sup> Ye' ichakè tö wépa yé' David tö ayëcha buaë esepa dör wépa wakyöule itóttola kkuölit tëule tsir e' wa esepa è? Au. Nies ie'pa dör wépa kè wakyöule esepa. Ye' ichétke tö Abraham erblé Skéköl mik, e' kueki iklö'itö wes pè' buaë yësyësë es. <sup>10</sup> Erë mik Skéköl tö iklö' es? ¿E' dör iwakyöne e' ukuöki ö e' yöki? Kè idör e' ukuöki, e' dör e' yöki. <sup>11</sup> Ie' tö iklö'wé es ierblé imik e' kueki. E' ukuöki ta ie' kéitö e' wakyuök iwà kka-choie tö iklö'wéitö wes pè' buaë yësyësë es. Es ie' de wépa erblé Skéköl mik eré kè iwakyöule, esepa kos yé tsaweie. Es ie'pa kos klö'wé Skéköl tö wes pè' buaë yësyësë es. <sup>12</sup> Nies ie' dör wépa wakyöule ena ierblö Skéköl mik wes ie' es kam iwakyuö e' yöki, esepa kos yé.

### Skéköl tö ttè me' Abraham a

<sup>13</sup> Skéköl kablè' Abraham a ttè i' wa: “Ye' tö ká ulitane meraë be' a ena be' aleripa a.” Erë ie' kè wà imène Abraham a ttè dalöiëno e' iütè wa. Iméitö ia ierblé imik e' wa. E' wa Abraham klöne wes pè' buaë yësyësë es. <sup>14-15</sup> Mik Skéköl ttè dalöiëno dalösewéwasö, età e' nuí ki se' we'ikeraëitö. Erë ttè ñe' kè kunúpa, e'ma

kè ì ta' dalösewèwà. E' kueki ì uk Skéköl kablè' Abraham a e' wà mú dò wépa tö ttè dalöiëno e' wà iütè esepa a, e'ma erblé Skéköl mik ena ie' kablè' Abraham a e' kè dör iie bua'.

<sup>16</sup> E' kueki ì uk Skéköl kablè' Abraham a, e' wawéitö éme wes íyí kakmeule es ie' erblé imik e' wa. Ie' tö iwé es er buaë choie sulitane a as iwà dò Abraham aleripa ulitane ulà a. E' wà dör tö ì yène Abraham a, e' kè dör wépa tso' ttè dalöiëno dikia esepa è a. Nies e' dör wépa kos erblé Skéköl mik wes Abraham es esepa a. Es Abraham de se' ulitane erblé Skéköl mik esepa yéie. <sup>17</sup> E' dör wes itsö' kitule Skéköl yëkkuö ki es. E' ki Skéköl tö iché Abraham a: “Ye' tö be' tkéka ká tajë wakpa yéie.”<sup>¶¶</sup> Skéköl dör s'duowà shké'ukkanewak e'. Ì kè ku' e' yuëmiitö ittò è wa. Skéköl e' mik Abraham erblé.

<sup>18</sup> Ì yé' Skéköl tö Abraham a wësua kè iwà tkòpa suë. Erë Abraham tö iklö'wé mokië ta iwà panéitö. E' kueki ie' de ká ku'ki tajë e' wakpa yéie wes ie' a iyënebak es. Skéköl tö ie' a iyè': “Be' aleripa alördaë tajë.”<sup>§§</sup> <sup>19</sup> Tsir età ie' ki duas de cien eyök (100). Ie' wà ijcher tö ie' ena ilaköl Sara dewatke kéképa alula kè döpaia aläë. Erë erblé Skéköl mik e' kè olo'yane ie' wà yës. <sup>20</sup> Ie' kè wà ibikeitseká bötböt. Skéköl kablè' ie' a e' kè bikeitse ie' wà tö kè iwà tkòpa. E' skéie ie' kí erblé Skéköl mik ta iikékéaitö. <sup>21</sup> Ie' tö iklö'wé mokië tö Skéköl wà diché tso' ì uk ie' kablè' ese woie. <sup>22</sup> E' kueki Skéköl tö iklö'wé wes pè' buaë yësyësë es.

<sup>23</sup> “Skéköl tö iklö'wé wes pè' buaë yësyësë es.” Ttè e' kè kiteat yëkkuö ki Abraham è a. <sup>24</sup> Nies ikiteat se' a. Skéköl tö Skéképa Jesús shkéokane e' mik se' erblé, e' ta nies ie' tö se'

<sup>‡‡</sup>4:8 Salmo 32.1-2

<sup>¶¶</sup>4:17 Génesis 17.5

<sup>§§</sup>4:18 Génesis 15.5

klö'weraë wes pë' buaë yësyësë es. <sup>25</sup>Jesús wömenettsa ttëwä se' nuì kî, e' ukuökî tã ishkeo'kaneitö as se' klör wes pë' buaë yësyësë es.

### Skëköl er buanene se' kî

**5** Se' erblé Jesucristo mik e' wa Skëköl tö se' klö'wé wes pë' buaë yësyësë es. E' kuekî i'ñe tã ie' er buanene se' kî Skëképa Jesucristo batamik. <sup>2</sup>Jesucristo batamik ie' er buaë ché se' a, se' erblé ie' mik e' wa. Ie' er buaë chò se' a, e' a se' e' tkéwä darërë. Se' wä ijcher tö se' dörami ie' ska' olo tã tajë ie' tã ñita. E' wä paneke se' tö kröröë, e' tö se' ttsë'weke buaë. <sup>3</sup>Erë kè dör e' è, ñies se' ttsërke buaë mik se' weirke etã. E' wä dör tö se' wä ijcher tö mik se' weirke, etã e' tö se' kî diché ieke idalë'ttsök er bua' wa. <sup>4</sup>Ì kos dalë'ttsésö er bua' wa e' wër buaë Skëköl wa. Se' wër buaë ie' wa, e' tã e' tö se' ké iwà kî panuk kröröë. E' kuekî se' ttsërke buaë se' weirke e' shüa. <sup>5</sup>Wiköl Batse'r mène se' a e' tö se' a ikkacheke tö Skëköl éna se' dalër tajë, e' kuekî ipanè ñe' e' kè tö se' eriwepa.

<sup>6</sup>Mik Skëköl tö ikéwö me' e' de, etã Cristo kötëwä se' nuì skéie se' tso'ia kè a e' tsatkër e' dalewa. <sup>7</sup>Darërë idir se' a e' muksa ttëwä o'ka skéie, eré imú dör pë' buaë yësyësë ese. Isalema yile e' mummittsa ttëwä pë' buaë shutë ese skéie. <sup>8</sup>Erë Cristo e' me'ttsa ttëwä se' skéie, se' bakia e' wamblök suluë e' dalewa. E' tö se' a ikkacheke tö kos Skëköl éna se' dalër. <sup>9</sup>Ie' kötëwä ipé tene tajë e' wa Skëköl tö se' klö'wé wes pë' buaë yësyësë es. E' yita buaë ie' wa se' tsatkërdaë Skëköl kësik yöki. <sup>10</sup>Mik se' bak Skëköl bolökpaie, etã ie' wák tö ier bua'wéne se' kî ilà ttëwä e' batamik. Erë i'ñe tã ie' er buanene se' kî, e' yita buaë se' tsatkërdaë Cristo tso'ne ttsë'ka e' diché wa. <sup>11</sup>Erë kè dör e' è. Skëképa Jesucristo batamik Skëköl er buanene se' kî, e' kuekî se' ttsërke buaë ie' batamik.

### Adán ena Cristo

<sup>12</sup>Wëm tsá yöne kiè Adán, e' wä sene sulu tsá dë'bitu ká i' a. Ie' dör sultane yéie. E' kuekî mik ie' tö ì sulu tsá wamblë', etã e' dör wes sultane tö iwamblë' ie' tã ñita es. E' tö sultane wöme'ttsa ì sulu wamblök ena e' nuí kî duökwa. E' kuekî duèwä de sultane kî. <sup>13</sup>Kam ttë dalöiëno mer Moisés a, e' yöki ì sulu wamblënemibak je'. Erë e' kèwö ska' tã ttë dalöiëno kè tã, e' kuekî kè yi kkatëne inuì kî. <sup>14</sup>Erë Adán kèwö ska' dò Moisés kèwö ska' sultane blërke. Ñies wépa kè wä Skëköl ttò dalöseonewa wes Adán es, esepa blërlune. Ie' dör wëm eköl doia ie' itöki e' klíla.

<sup>15</sup>Ì sulu wamblë' Adán tö ena ì buaë o' Skëköl tö se' a e' dör kuakî. Adán tö ì sulu wamblë', e' kuekî tajë s'blërlune. Erë wëm eköl skà, e' dör Jesucristo, e' batamik Skëköl er buaë ché se' a éme kè tuè tã. E' dör buaë ichökle, e' wa s'tsatkërke tajë. <sup>16</sup>Adán tö ì sulu wamblë' etökicha éme, e' nuí kî sultane kichatë'ttsa Skëköl tö. Erë Skëköl er buaë ché se' a, e' kuekî ie' tö se' klö'wé wes pë' buaë yësyësë es, eré se' tö ì sulu wamblë' tajë. E' kuekî ì buaë o' ie' tö se' a, e' kè dör wes ì sulu wamblë' Adán tö es. <sup>17</sup>Es wëm eköl è tö ì sulu wamblë', e' wa duèwä e' aléka sultane kî. E' yita ì o' Jesucristo tö, e' wa wépa a Skëköl er buaë ché klö'wéitö wes pë' buaë yësyësë es, esepa kos ulà a sene pa'alí doraë tã ie'pa e' alöraka ie' tã ñita. E' dör tajë tkòka ì wamblé Adán tö e' tsatã.

<sup>18</sup>Ì sulu wamblé Adán tö etökicha, e' wa sultane kichatënettsa. Erë ì yësyësë wé Jesucristo tö etökicha, e' wa sultane klörmi wes pë' buaë yësyësë es as iser michoë. <sup>19</sup>Adán tö Skëköl ttò tsá dalöseowä e' wa sultane wömenettsa ì sulu wamblök. Erë Jesucristo tö Skëköl ttò dalöié, e' wa se' tajë klördaë wes pë' buaë yësyësë es.

<sup>20</sup> Skëköl tō ttè dalöiëno mé se' a as ì sulu wamblekesō kos e' jcherwā se' wā yësyësë tō e' dör suluë. Erë mik ijchenewā se' wā, etā se' éna iwā armī bua'ie tō kos Skëköl er buaë ché se' a. E' dör taië ì sulu kos wamblekesō e' tsa-tā. <sup>21</sup> Mik se' bak klöulewā duewā ulā a, etā sene sulu e' ali'ka se' kī. Erë Skëköl er buaë ché se' a, e' dikīa se' tso' i'ñe tā wës se' bak kuaë sene sulu dikīa es. Ie' er buaë ché se' a Skëkëpa Jesucristo batamik, e' wa se' klöwëitō wës pë' buaë yësyësë es tā sene michoë méitō se' a.

### Se' dör wës s'duulewā es sene sulu yöki

**6** E' dör es e'ma çīma sö ichëmi? Çī sulu kī wamblëiasō as Skëköl er buaë kī chò se' a taië shütë? <sup>2</sup> Au, e' kè dör es. Se' dör wës s'duulewā es sene sulu yöki. Çī wës ì sulu wamblëmīiasō? <sup>3</sup> Çī a' kè wā ijcher tō se' wösune e' tō iwā kkacheke tō se' batsulewā Cristo Jesús mik? E' dör wës se' ttëwāñak ie' tā es. <sup>4</sup> Se' wösune e' wā kiane chë tō se' töbinewā ie' tā. E' dör es as se' serne kuā'kī wës Cristo shkenekane S'yé olo tā taië e' wa e' ser es.

<sup>5</sup> Se' batsulewā ie' mik ie' dunewā eërö, es ñies se' shkerdakane wës ie' shkenekane es. <sup>6-7</sup> Se' wā ijcher tō s'duulewā kè ku'ia ì sulu wamblök. Es ñies wës se' dör kuaë e' dunewā Cristo tā wötëulewā krus mik. E' tka es as s'wák dër suluë e' diché erwa tā s'tkòshkar sene sulu ulā a kè ku'ia klöulewā. <sup>8-9</sup> Se' wā ijcher tō Cristo shkenekane, e' kuëki ie' kè duöpawane. Duewā kè e' alòpakaia ie' kī. E' kuëki se' duulewātke ie' tā, e' tā se' tō iklöwé mokīë tō se' serdane ie' tā. <sup>10</sup> Mik ie' kötwa, etā ikötwa etökicha ème se' nuí kī, kè iskà duöpawaiane. Erë ishkenekane serkene Skëköl a. <sup>11</sup> Es ñies a' e' ttsó mokīë tō a' duulewā sene sulu yöki, erë a' tso' ttsë'ka senoie yësyësë

Skëköl a a' batsulewā Cristo Jesús mik e' wa.

<sup>12</sup> E' kuëki kè a' kawö mukīa sene sulu a as kè ie' alòka a' kī tā ì sulu kos wamblak a' éna ese wamblè a' tō.

<sup>13</sup> Kè a' e' muktsaiā sene sulu ulā a as e' kè tō a' klö'üwā ì sulu wambloie. E' skéie a' e' múttsa Skëköl a wës s'duulewā shkenekane es. A' e' múttsa wa'ñe Skëköl a senuk yësyësë. <sup>14</sup> A' kè ku'ia Moisés ttè dalöiëno dikīa. A' tso' Skëköl er buaë chòke se' a e' dikīa. E' kuëki a' e' múttsa senuk yësyësë tā es sene sulu kè e' alò-paka a' kī.

### Skawötā senuk buaë yësyësë Skëköl a

<sup>15</sup> E' dör es, e' tā çīma sö ichëmi? Se' kè ku'ia ttè dalöiëno e' dikīa. Se' tso' Skëköl er buaë chò se' a e' dikīa. E'ma e' kuëki çī sulu wamblösö? Au, kè idör es. <sup>16</sup> A' wā ijcher buaë tō yi ttò iütokesö, ese ulā a se' tso' klöulewā wës s'klöulewā kanè mésoie tso' iwökir ulā a es. Es sene sulu ttò iütokesö, e' tā e' ulā a se' tso' klöulewā wës kanè méso es tā e' nuí kī se' duóralur weir michoë. Erë Skëköl ttò iütokesö, e' tā e' ulā a se' tso' tā e' wa se' serdaë yësyësë. <sup>17</sup> A' bak klöulewā sene sulu ulā a wës kanè méso es. Erë wëstela Skëköl a tō i'ñe tā ttè buaë pakane a' a e' iuté a' tō er mokī wa. <sup>18</sup> Es a' yëulettsatke sene sulu ulā a tā i'ñe tā a' de sene yësyësë e' ulā a. <sup>19</sup> (A' ià katötö Skëköl ttè a, e' kuëki ttè i' kleekeyö a' a kanè méso ttè wa.) Kenet a' e' me'ttsa e' ia'ukka sene sulusi wa ena ì sulu è kī wamblök. Erë e' sù i'ñe tā a' e' múttsa senuk yësyësë as a' ser bats'er.

<sup>20</sup> Mik a' bakia klöulewā sene sulu ulā a, etā kè a' tkine sene yësyësë kī. <sup>21</sup> E' wa çī bua' dë' a' ulā a? E' ulā a a' mīne duökulur weir michoë. I'ñe tā ì sulu wamblè' a' tō ese tō a' jaëwéne. <sup>22</sup> Erë a' yënettsa sene sulu ulā a. A' de Skëköl kanè mé-sopaie. E' ulā a a' serke bats'er, e' bata dör sene michoë. <sup>23</sup> ì sulu wamblekesō

ese skéie s'duörawa. Erë wépa batsulewa Skéképa Cristo Jesús mik, esepa a sene michoë meraë Skéköl tö éme.

### Se' du'ulur ttè dalöiëno yöki

**7** A yamipa, Moisés ttè dalöiëno, e' suule buaë a' wa. A' wa ijcher tö ttè e' dikia s'tso', s'tso'ia ttsë'ka e' dalewa. <sup>2</sup>E' dör wes alaköl senewabak es. Ese kè kawöta iwëm ökwa iwëm tso'ia ttsë'ka e' dalewa. Erë mik iwëm blënewa, eta e' ttè olone ie' ki. <sup>3</sup>Alaköl ese senë wëm o'ka ta iwëm chökke tso'ia ttsë'ka e' dalewa, e' ta ttè e' dalösewëwaitö. Erë iwëm chökke blënewa, e' ta ie' kè ku'ia ttè e' dikia. Ie' a serwamine buaë wëm skà ta, e' kè dör trë.

<sup>4</sup>A yamipa, es idör se' a ñies. Se' batsulewa Cristo mik, e' kuëki se' du'ulur ie' ta ttè dalöiëno e' yöki. Ñies se' shkenekane ie' ta as se' ser wes Skéköl wa iwër buaë es.

<sup>5</sup>Mik se' bak senuk s'wák dër sulu e' dikia, eta ttè dalöiëno tö se' wörieikeke i sulu k'j wamblök. E' ulà a se' mine duökulur. <sup>6</sup>Se' bak klöulewa ttè dalöiëno e' dikia, erë i'ne ta se' durulune ttè e' yöki. Se' yënetsa ttè e' ulà a as se' kanëblö Skéköl a ku'ki sene pa'alí mé iWiköl tö se' a e' wa. E' kè dör wes se' bak kanëblök ie' a ttè dalöiëno kitule yëkkuo ki e' iutè wa es.

### Sene sulu ta ñippök

<sup>7</sup>Es idir, e'ma zima sö ichëmi? Moisés ttè dalöiëno kitule ze' dör suluë? Au, kè idör es. Ttè e' kè kunúpa, e'ma ye' kè wa ijcher tö i dör suluë. Ttè e' kè tö ichöpa: "Kè a' kawö ta' o'ka iyi kkechök," e'ma ye' kè wa ijcher tö e' dör suluë. <sup>8</sup>Erë ttè dalöiëno kè kunúpa, e'ma sene sulu kè diché ta. E' kuëki ttè dalöiëno e' wa sene sulu tö ye' erkiowéka i sulu tsakië wamblök. <sup>9</sup>Ká iaiaë kam ye' wa ttè dalöiëno jcherwa, e' yöki ye' ttsë'ne' buaë. Erë mik ye' wa ttè e' jchenewa, eta

sene sulu tso' ye' a e' diché iëne ta ye' éna ianewa tö ye' dör i sulu wamblök-wak <sup>10-11</sup>kichatëulletsa. Ttè dalöiëno batamik sene sulu tö ye' kitö'wé as i sulu wamblöyö, ese tö ye' kichatëttsa. Es ttè e' tö warma sene michoë mëmi ye' a, e' skéie ye' kichatëttsaitö.

<sup>12</sup>Es Moisés ttè dalöiëno e' dör buaë, e' dör yësyësë, e' dör batse'r. <sup>13</sup>Eta ze' yëne tö ttè buaë e' tö ye' kichatëttsa? Au, kè idör es. Ttè buaë e' batamik, i sulu wamblekeyö, ese tö ye' kichatëttsa. Ttè dalöiëno e' tö se' a ikkacheke mokië tö i sulu wamblekesö, ese dör suluë ichök. Es ttè dalöiëno dör buaë, e' wa sö isuëmi tö mokië i sulu wamblekesö ese dör sulu ème.

<sup>14</sup>Se' wa ijcher tö ttè dalöiëno e' dör Skéköl wák ttè. Erë ye' dör siarë kè diché ta' klöulewa sene sulu ulà a ikanë mé-soie. <sup>15</sup>I wamblekeyö ese kè ane ye' wák éna. I buaë wak ye' éna ese kè wëyö. Erë i ar suluë ye' éna, ese wamblekeyö. <sup>16</sup>I kè wamblak ye' éna ese wambléyö, e' ta e' wa ye' icheke tö ttè dalöiëno e' dör buaë. <sup>17-18</sup>I buaë wak ye' éna, ese kè or ye' a, e' wa ye' wa ijcher tö i dör buaë e' kè ku' ye' er a. Sö ichöma kè i bua' ku' ye' wák dër sulu e' a. Es idir e' kuëki ye' kè tö i sulu wambleku' ye' wák er wa. Sene sulu tso' ye' er a, e' tö ye' ké iwamblök. <sup>19</sup>I buaë wak ye' éna, ese kè wëyö. Ñies i sulu kè wamblak ye' éna, ese wamblekeyö. <sup>20</sup>Es i sulu kè wamblak ye' éna, ese wambléyö, e' ta e' kè dör tö ye' tö iwambleke ye' wák er wa. E' dör tö sene sulu tso' ye' éna, e' tö ye' keke iwamblök.

<sup>21</sup>Es ye' éna iane tö eré i buaë wak ye' éna erë ye' a sene sulu tkër. <sup>22</sup>Ttè dalöiëno me'at Skéköl tö, e' wa ye' wö-batsö taië. <sup>23</sup>Erë ilè skà tso' ye' a, e' ttséyö tö e' tso' i buaë wak ye' éna ese wöklö'yuk. E' dör sene sulu tso' ye' er a e', e' ulà a ye' tso' klöulewa.



<sup>24</sup>Ye' dör siarëla. Ì sulu tso' ye' er a, e' tō ye' kichatëttsa. E' yöki çyi tō ye' tsatkëmi? <sup>25</sup>Skëköl tō ye' tsatkë Skëképa Jesucristo batamik. E' kueki wëstela chëyö ia.

Es ye' éna ttë dalöiëno me'at Skëköl tō e' è iütak. Erë ye' wák dër suluë, e' tō ye' kè ì sulu wamblök.

### Se' sermi buaë yësyësë Skëköl Wiköl wa

**8**<sup>1-2</sup>Cristo Jesús batamik Skëköl Wiköl tō sene michoë meke se' a, e' tō ye' yëttsa sene sulu ena duëwā e' ulā a. E' kueki ìñe tā wépa batsulewā Cristo Jesús mik, esepa kè kichatepa Skëköl tō yës. <sup>3</sup>Ì kè onuk Moisés ttë dalöiëno a, e' wé Skëköl tō. Se' wák dër sulu e' kè tō se' kè ttë dalöiëno iütök buaë, e' kueki e' kè a se' tsatkënu. Erë Skëköl tō iwák alā patkë'bitü s'ditsöie ttëwā se' skéie se' nuñ patuoie. Es ie' tō sene sulu tso' se' er a e' kichatëttsa. <sup>4</sup>E' wé ie' tō as se' klö'üitō wës pë' buaë yësyësë es wës ttë dalöiëno yësyësë e' tō se' a ikië es. Se' klöne es, esepa serke wës Skëköl Wiköl kī ikiane es. Ie'pa kè serku'ia wës s'wák dër sulu kī ikiane es.

<sup>5</sup>Wépa serke wës s'wák dër sulu kī ikiane es, esepa er me'rie ì kiane e' kī ese è kī. Erë wépa serke wës Skëköl Wiköl kī ikiane es, esepa er me'rie ì kiane e' kī ese è kī. <sup>6</sup>Ì kiane s'wák dër sulu kī, ese kī se' er me'rie, e' tā e' bata dör se' duòwā. Erë se' er me'rie ì kiane Skëköl Wiköl kī, ese kī, e' tā e' bata dör sene michoë, ñies sene bèrë Skëköl tā e'. <sup>7</sup>Erë wépa er me'rie ì kiane s'wák dër sulu kī, ese kī, esepa kè tō Skëköl ttë dalöiëno e' dalöië, moki ie'pa kè a idalöier. E' kueki ie'pa dör Skëköl bolökpa. <sup>8</sup>Wépa serke wës s'wák dër sulu kī ikiane es, esepa kè a ì onuk wër buaë Skëköl wa.

<sup>9</sup>Erë Skëköl Wiköl tso' se' a, e' tā se' kè ku'ia s'wák dër sulu ulā a. E' skéie se' tso' Skëköl Wiköl ulā a. Yi kè a Cristo Wiköl

ku', ese kè dör ie' icha. <sup>10</sup>Erë Skëköl tō se' klö'wé wës pë' buaë yësyësë es, e' kueki Cristo tso' se' a. E' dör es, e' tā erë s'chkà nurdawā se' nuñ kueki, erë se' wiköl ser michoë. <sup>11</sup>Skëköl tō Cristo Jesús shke'okane, e' Wiköl tso' se' a, e' tā aishkuö tā ie' tō se' nu shke'weraka iWiköl tso' se' a e' wa.

<sup>12</sup>A yamipa, e' kueki kè se' kàne senukiā wës s'wák dër sulu kī ikiane es. <sup>13</sup>Se' serke es, e' tā se' duòrawā. Erë se' e' aléka iki Skëköl Wiköl wa, e' tā se' ser michoë.

<sup>14</sup>Wépa wëttseke Skëköl Wiköl tō, esepa dör Skëköl ala'r. <sup>15</sup>Skëköl kè wā iWiköl mène se' a se' klö'wowā kësik wa as se' suarne. E' skéie iWiköl wa se' de ie' ala'rie. Ie' Wiköl wa ie' a ichëmisö: “A yéwöla.” <sup>16</sup>Ñies ie' Wiköl tō se' kè ittök se' er a tō se' dör ie' ala'r. <sup>17</sup>Es se' dör ie' ala'r. Se' weirke Cristo tā ñita, e' je' tā ñies se' kirdawā buaë ie' tā ñita ie' olo tā taië e' ska'. Aishkuö tā ì kos tso' blëule Skëköl wā mè se' a, e' döraë se' ulā a Cristo tā ñita.

### Ì tso' se' a aishkuö tā e' dör buaë chökle

<sup>18</sup>Ye' a tā ie' olo taië e' a se' dörañak aishkuö tā, e' dör buaë shütë. E' omik tā se' weirke kos ká i' kī e' kè dör ì. <sup>19</sup>Aishkuö tā ikkayërdaë wöshäë tō se' dör Skëköl ala'r. E' këwö paneke kröröë íyi ulitane yö'at Skëköl tō ese tō. <sup>20</sup>Íyi ulitane yö'at Skëköl tō ese kos sulunewā. Ì kos yöule e' kè wák e' suluonewā. Erë Skëköl wák tō iwöm'ettsa es. Erë ibua'weneraëitō aishkuö tā. <sup>21</sup>Ie' wák tō iyë'at: “Aishkuö tā íyi kos yö'at ye' tō e' yerattsaneyö iweirke taië e' ulā a as tsatkënar ena ilökarka taië ye' olo wa ye' ala'r tā ñita.” E' kueki íyi ulitane yö'atitō e' tso' kawö e' panuk kröröë. <sup>22</sup>Se' wā ijcher tō dò ikkë tā íyi ulitane yö'atitō e' rrerkeia ena iweirkeia wës alaköl alā kurketke weir es. <sup>23</sup>Erë kè e' è rrerku'

kawö e' panuk. Nies se' a Skëköl Wiköl menetke wes iyi tsá kalmè siá es, e'pa rrerkeia kawö e' panekesö e' dalewa. E' kèwö ska' ta' Skëköl tò se' tseratkö da'a ila'rie, ta' se' chkà mane'werattsaneitö buaë kè duöta'waja. <sup>24</sup> Se' tsatkëne erë se' tsatkërketke da'aie e' panekesö. Ì tso'tke s'wa ese kè paneku'sö. E' kueki mik se' tò iché tò e' kèwö panekesö, etá e' wà kiane ché tò kam sö isaù. <sup>25</sup> Erë ì kam saùsö ese panekesö, e' ta' se' kawöta' ipanuk bèrë s'weirke kos e' dalé'tsè wa.

<sup>26</sup> Es nies se' kè diché ta', e' kueki Skëköl Wiköl tò se' kimeke. Kè se' wöblar buaë ttök Skëköl ta' wes se' ké ttök itá es. Erë ie' wák Wiköl tso' se' tté chök ie' a taië kköchè wa ena ttè kè yër siá ese wa. <sup>27</sup> Ie' wá se' er suule buaë. Ie' Wiköl tò ikieke ie' ichapa batse'r ki wes ie' ki ikiane es. E' kueki ì cheke iWiköl tò ie' a e' ane buaë ie' éna.

### Se' e' aléka iyi ulitane ki Cristo batamik

<sup>28</sup> Se' wá ijcher tò wépa éna Skëköl dalër, nies iklö'bakitö wes ie' wák tò ibikeitsbak es, esepa ta' ì kos tköke, e' a ie' ulà ter ie'pa kimoie as idöttsa buaë wes ie' ki kiane es. <sup>29</sup> Wépa shukitbakitö e'pa bikeitsbakitö tò idöraé wes ie' Alà es as ie' Alà dò ie'pa taië e' shua wes ikok es. <sup>30</sup> Wépa bikeitsbakitö e'pa kiéitö nies. Wépa kiéitö e'pa klö'wéitö wes pè buaë yësyësè es. Wépa klö'wéitö es, esepa döraé ie' ta' nita ilo taië e' a.

<sup>31</sup> E' dör es, e' ta' kè ì kianeia ché. Skëköl tso' se' ta, e' ta' ì e' alömika se' ki? <sup>32</sup> Ie' kè wá iwák Alà kkëone, e' me'ttsaitö ttèwa se' ulitane skéie je' yita ì kos mer-aëitö se' a ilà ta' nita! <sup>33</sup> ¿Yi tò wépa shukitbak Skëköl tò esepa kkatèmi? Kè yi. Ie' wák tò ie'pa klö'wétke wes pè buaë yësyësè es. <sup>34</sup> ¿Yi a ie'pa kichatèrmi? Kè yi. Cristo Jesús kötwa se' skéie, e' kiié

ta' ishkenekane tkër Skëköl ulà bua'kka se' tté chök. <sup>35</sup> ¿Ì tò se' yëttsami Cristo éna se' dalër taië e' ulà a? ¿Se' weir taië alè? ¿Ì darërèè alè? ¿Se' weir Jesús tté batamik alè? ¿Se' duöke bli wa alè? ¿Kè se' datsi' ta' alè? ¿Ilè tkò se' ta' alè? ¿S'ttèwa alè? Au. Kè ì a se' yèrpattsa ie' ulà a. <sup>36</sup> E' dör wes Skëköl yëkkuö tò ichè es, e' tò ichè:

Be' dalèrmik wekkè alè ta' sa' tterawa pè tò.

Sa' sueke ie'pa dör wes obeja tsèmi ttèwa es.\*

Es Skëköl yëkkuö tò ichè.

<sup>37</sup> Erë e' shua se' dör e' alökwakpa tsa-ta, Cristo éna se' dalër taië e' batamik. <sup>38</sup> E' kueki ye' wa ijcher buaë tò kè ì tò se' yepattsa Skëköl éna se' dalër taië e' ulà a. Duewa, sene, ie' biyöchökwakpa, iyi wökir kè wërta'wa, ì tköke se' ta' i'ne ta, ì tkömi se' ta' aishkuö ta, ì skà tso' diché ta', <sup>39</sup> ì kos tso' ká ja' a, ì kos tso' ká diöshet, ekkè kos ena ì skà yö'atitö, e' kos kè a se' yèrpattsa ie' éna se' dalër taië e' ulà a. Ie' éna se' dalër taië, e' kkachéitö se' a Skëképa Cristo Jesús e' wa.

### Skëköl tò Israel aleripa shukitbak ie' ala'rie

**9** Ì cheke ye' tò a' a e' dör mokië. Ye' dör Cristo icha, kè ye' kaçhò. Nies Wiköl Batse'r wa ye' er tò ye' a icheke tò e' dör mokië. <sup>2-3</sup> Moki ye' chkenewa siarè, taië ye' eriarke kekraë ye' wák ditséwöpa kueki. Ye' wák mú kichaté Skëköl tò yëttsa Cristo ulà a as ie'pa tsatkër ye' skéie. <sup>4</sup> E'pa dör Israel aleripa. Ká iaiaé Skëköl tò ie'pa tse'tkò ie' ala'rie. Ie'pa a ie' tò ilo taië e' kkayè'. Ie' ena ie'pa ttè me' nì a tsakië nies ittè dalöiëno e' me'itö ie'pa a. Wes iyi wakanewè ie' dalöioie e' wa ie'pa wöbla'itö. Nies ie' kablè' ie'pa a er buaë chök. <sup>5</sup> Ie'pa dör sa' yépa bak ká iaiaé dalöiërta' taië,

\*8:36 Salmo 44.22

e'pa aleripa. Nies wé pairine'bitu idi' wa s'blúie e' kune' ie'pa ditséwö wa, e' dör Skéköl dör iyi ulitane tsata kïkarkeka kekraë e'. Es e' idir.

<sup>6</sup> Kè ye' ku' ichök tö Skéköl kablè' er buaë chök ie'pa a e' kè wa bak. E' kè dör es. E' dör tö kè ie'pa seraa dör Israel aleripa chökke Skéköl a. <sup>7</sup> Nies Abraham aleripa, e'pa kibiiepa kè dör ie' aleripa chökke Skéköl a. Skéköl tö iyè' ie' a: "Be' aleripa chökke, e'pa döraë Isaac wa." <sup>†8</sup> E' wà kiane chè tö kè ye' dör Skéköl ala'r s'ditséwö wa. E' skéie wépa tö ì uk Skéköl kablè' e' klö'wé wes Abraham tö iklö'wé es, esepa è dör Abraham aleripa chökke Skéköl a. <sup>9</sup> Skéköl kablè' ie' a ttè i' wa: "Kawö ikkè ta duas iëk ye' dörane ta be' alaköl Sara alà ta'tke." <sup>‡</sup> E' klö'wé Abraham tö.

<sup>10</sup> Erè kè dör e' è. Sara alà kune' ñe' dör sa' yé bak ká iaiäë kiè Isaac e'. Ie' alà ka'ka itayë Rebeca ta' e'pa dör klò' wakpa wëm. <sup>11-13</sup> Erè kam ie'pa kur, kam ie'pa tö ì buaë ü ö ì sulu wamblò, e' yöki Skéköl tö iyè' Rebeca a: "Ikibi ék döraë itsirla kanè mésoie." <sup>¶</sup> E' dör wes iskà tso' kitule Skéköl yëkkuö kï es, e' kï ie' tö ichè: "Jacob dalène ye' éna, erè Esau watéttsayö." <sup>§</sup> Es iatëtke tö wéne shush-tak ie' wák éna, ese shushtéitö as iwà döttsa wes ie' kï ikiane es. Kè dör ì wésö ese kueki.

<sup>14</sup> Es idir, e' ta' zso ichèmi tö Skéköl kè dör yësyësé? Au, kè idör es. <sup>15</sup> Ie' tö iyè' Moisés a: "Wé a ye' er buaë chak, ese a ye' er buaë chöraë. Nies wé suak ye' éna er siarè wa, ese suerayö er siarè wa." <sup>\*\*\*</sup> <sup>16</sup> E' kueki ie' kè er buaë chò se'

a, se' kï ikiane ö ì wëkesö e' kueki. Erè wépa sueke ie' tö er siarè wa, esepa a ie' er buaë chöraë. <sup>17</sup> E' dör wes itso' kitule Skéköl yëkkuö kï es. E' kï Skéköl tö ichè Egipto blú a: "Ye' tö be' tkéka ká i' blúie, e' wà ta' ye' wa. E' dör ye' diché kka-choie be' wa as ye' dör ye' e' tté pakar ká wa'ne." <sup>††</sup> <sup>18</sup> Es ye' suak Skéköl éna er siarè wa, ese sueraëitö er siarè wa. Nies ye' er darè'wakwa ie' éna, ese er darè'werawa ie' tö.

<sup>19</sup> Erè isalema a' wele tö ye' a ichèmi: "Mokï tö ì kiane wè Skéköl kï ese kè wöklönuk ye' a zwes ie' tö se' chakèmi se' nuï kï?" <sup>20</sup> Erè ye' iütèmi: A wëm zïma be' erbikò be' dör ye', e' tö Skéköl iütè er sulu wa? Skaü kè tö ichepa iyuökwa a: "Zì kueki be' tö ye' yué i' es?" <sup>21</sup> Skaü yuök-wak e' a iyörmi wes ie' éna iyuak es. Skauchka e' è yörmï skaü bua'buaië ena skaü èsieie ñies.

<sup>22</sup> Es ñies Skéköl tö iwèmi wes ie' kï ikiane es. Ie' éna ie' kèsik ena ie' diché kkachak ì sulu wamblökwakpa wömeulettsa weinuk esepa ewèwa wa, e' ta' e' wèmi ie' tö. Erè e'pa kos dalè'ttsekeia ie' tö bèrè enaë <sup>23</sup> as ie' olo taië shüteë e' kkachòitö se' shukitbakitö e'pa a. Ká iaiäë ie' tö se' shukitbak suè er siarè wa ñies se' klö'bakitö as se' dö' ie' ska' olo ta' taië ie' ta' ñita. <sup>24</sup> Es judiowak ena pè' kè dör judiowak, e'pa shüa ie' tö se' klö'bak ie' wák a. <sup>25</sup> E' dör wes Oseas tö ikit iyëkkuö kï es. E' kï Skéköl tö ichè: "Wépa kè dör ye' icha, esepa kieraëyö ye' icha.

Wépa kè dalèr ye' éna, esepa a icheraëyö: 'ye' éna a' dalèr.' <sup>‡‡</sup>

<sup>†9:7</sup> Génesis 21.12

<sup>‡9:9</sup> Génesis 18.10,14

<sup>¶9:11-13</sup> Génesis 25.23

<sup>§9:11-13</sup> Malaquías 1.2-3

<sup>\*\*9:15</sup> Éxodo 33.19

<sup>††9:17</sup> Éxodo 9.16

<sup>‡‡9:25</sup> Oseas 2.23

<sup>26</sup> Nies ká wé kī ye' tō iyē': 'a' kè dör ye' icha'

ká e' è kī ye' icherane: 'Ye' dör Skëköl chók e' ala'r a' dör.'"<sup>¶¶</sup>

<sup>27-28</sup> Isaías tō Israel aleripa yē' i' es:

"Ká wa'ñe wépa wömeulettsa kichatë nuk

e' wakaneweraë Skëköl tō bet kè wötkë nuk yës.

E' kuekī eré Israel aleripa dör taië wes dayë tséwö es,

erë ie'pa welepa è tsatkërdaë, kè dör taië."<sup>§§</sup>

<sup>29</sup> E' dör wes Isaías tō iyē' es. Ie' iché:

"Skëköl diché tã' íyi ulitane tsata, e' kè tō se' aleripa múpaat,

e'ma se' enewa seraa wes Sodoma ena Gomorra wakpa enewa es."<sup>\*</sup>

### Jesús tté buaë e' dör Israel aleripa a' ñies

<sup>30</sup> Es sö isuë tō pē' kè dör Israel aleripa, kè kī' sene yësyësë e' yulök, esepa klö'wë Skëköl tō wes pē' buaë yësyësë es ie'pa erblé Jesús mik e' wa. <sup>31</sup> E' skéie Israel aleripa kī ikiane tō Skëköl tō ie'pa klö'wë wes pē' buaë yësyësë es tté dalöiëno e' dalöië wa, erë e' kè ska' ie'pa ulà dē.

<sup>32</sup> ¿I' kuekī e' kè dē' ie'pa ulà a? Ie'pa kè erbléne Jesús mik e' kuekī. Ie'pa erblé i' buaë wekerakitō e' mik. E' kuekī ie'pa tēne Jesús mik wes s'klastkër ák mik es.

<sup>33</sup> E' dör wes itso' kitule Skëköl yëkkuö kī es, e' tō ichè:

"Ye' ttò tsó. Ák tkē'atyö et Sión,

e' mik pē' klastkërdaë, ák e' tō ie'pa eröraë iski.

Erë wépa erblé ák e' mik, esepa kè eripara."<sup>†</sup>

Es Skëköl yëkkuö tō ichè. Ák e' tō Jesús chè.

**10** A yamipa, Israel aleripa mú tsatkër e' kkechekeyö taië ye' er a, e' kiekeyö Skëköl a. <sup>2</sup> Ye' ichè tō mokī ie'pa kaneblak darërë Skëköl a. Erë ie' tté mokīë e' wà kè ane ie'pa éna buaë. <sup>3</sup> Ie'pa kè éna iane tō ie' tō s'klö'weke wes pē' buaë yësyësë es s'erblé Jesús mik e' wa. Ttè e' watéttsa ie'pa tō. Ie'pa atak buaë yësyësë ie' wöa ie'pa serke es e' wa. <sup>4</sup> Erë Moisés tté dalöiëno e' wà dör Cristo kkachè. E' kuekī mik ie' de, etã ttè e' wà de. E' kuekī wépa erblé ie' mik esepa ulitane klö'weraë Skëköl tō wes pē' buaë yësyësë es.

<sup>5</sup> Se' wër yësyësë Skëköl wa sene yësyësë wa, e' yē' Moisés tō i' es: "Yi tō tté dalöiëno e' dalöië yësyësë seraa, ese ser michoë ttè e' wa."<sup>‡</sup> <sup>6</sup> Erë se' wër yësyësë Skëköl wa se' erblé Jesús mik, e' yē' Moisés tō i' es: "Kè a' tō ibikeitsar tō ¿yi mi'mi ká jai a?" —E' dör wes se' mú mi' Cristo yulök as ibitune ká i' kī.—

<sup>7</sup> "Nies ¿yi mi'mi ká dià kaska'?" —E' dör wes se' mú mi' Cristo yulök as ishkerkane s'duulewã tso' esepa shã.— <sup>8</sup> Erë ttè e' tō ichè: "Ttè buaë e' tso' tsinet se' ska' ena se' kkò a ena se' er a."<sup>¶</sup> Ttè buaë e' dör as a' erblö Jesús mik, e' tté pakeke sa' tō.

<sup>9-10</sup> Se' er a ttè e' klö'wësö as Skëköl tō se' klö'ù wes pē' buaë yësyësë es. Nies s'wák kkò wa ichésö tō Jesús dör Skëképa eköl è e' as se' tsatkër. E' kuekī iché a' tō a' wák kkò wa tō Jesús dör Skëképa eköl è e', ñies iklö'wé a' tō a' er a tō Skëköl tō ishkeo'kane, e' tã a' tsatkërdaë.

<sup>¶¶</sup>9:26 Oseas 1.10

<sup>§§</sup>9:27-28 Isaías 10.22-23

<sup>\*</sup>9:29 Isaías 1.9

<sup>†</sup>9:33 Isaías 8.14; 28.16

<sup>‡</sup>10:5 Levítico 18.5

<sup>¶</sup>10:8 Deuteronomio 30.14

<sup>11</sup> Skëköl yëkküö tō ichè: “Yi erblé ie' mik esepa kè eriarpa.”<sup>§</sup> <sup>12</sup> Skëkëpa ñe' è dör sulitane Këköl. Judiowak ena wépa kè dör judiowak, esepa kos Këköl ie' dör. E' kuekî ie'pa dör ñikkëé ie' wöa. Wépa kköchöke ie' a as ie'pa tsatköitö, esepa a ie' er buaë chò tajë. <sup>13</sup> E' dör wes Skëköl yëkküö tō ichè es, e' tō ichè: “Yi kos tō e' tsatkè kié Skëköl a, esepa ulitane tsatkërdäe.”<sup>\*\*</sup> <sup>14</sup> Erë kè s'erblène ie' mik, e' ta çwes s'kköchömi ie' a? Ñies kè s'wa ie' tté ttsëule, e' ta çwes s'erblömi ie' mik? Ñies kè yi wa ie' tté pakane sia, e' ta çwes ittsemisö? <sup>15</sup> Ñies ie' tté pakökwakpa kè patkëne yi wa, e' ta çwes e'pa dömi ie' tté pakök sia? E' dör wes Skëköl yëkküö tō ichè es, e' tō ichè: “Wépa wa tté buaë datse sia, esepa de e' dör buaë shütë.”<sup>††</sup>

<sup>16</sup> Erë kè sulitane wa tté buaë e' klöne. Es Isafás tō iyë'bak: “A Skëköl, tté paka' sa' tō wësua kè yi wa e' klöne.”<sup>‡‡</sup> <sup>17</sup> Es sö isuè tō se' erblé Skëköl mik, e' datse ie' tté ttsésö, e' wa. Ttè e' dör Cristo tté.

<sup>18</sup> Erë ye' ichakè: çA' ichè, kè iwarak tté e' ttsëule? Erë ye' e' iütöne tó, ie'pa wa ittseule je'. E' dör wes Skëköl yëkküö tō ichè es wé ichèitö:

“Skëköl tté pakökwakpa, e'pa tka ká wañe,

Ttè i' de dò wé ká i' erkerö ee.”<sup>¶¶</sup>

Es Skëköl yëkküö tō ichè.

<sup>19</sup> Ye' iskà chakène: çA' ichè Israel aleripa kam éna iwà ar? E' iütè' Moisés tō mik ie' tō iyè' ie'pa a tō Skëköl tō iyè' i' es:

“Ye' tō a' keraë sbinukka pè' kè dör ì, esepa wa.

Ye' tō a' keraë ulunukka pè' kè éna ì ane, esepa kî.”<sup>§§</sup>

<sup>20</sup> E' ukuökî ta Isafás diché dë'ka ichök tō Skëköl tō pè' kè dör Israel aleripa esepa ye' i' es:

“Wépa kè ku' ye' payulök, esepa tō ye' kué.

Wépa kè ku' ye' chakök, esepa a ye' e' kkaché.”<sup>\*†</sup>

<sup>21</sup> Ñies Isafás tō iskà ye' tō Skëköl tō Israel aleripa ye' i' es:

“Ie'pa tō ye' ttö dalösewéwa ñippöke ye' ta,

esepa a keraë ye' tō ikimè watkè.”<sup>†</sup>

Es Skëköl yëkküö tō ichè.

### Skëköl er buaë chöraë Israel aleripa a

**11** I' ta ye' ichakè: çA' ichè, Israel aleripa watéttsa Skëköl tō seraq? Au, kè idör es. Ye' wák dör Israel aleri eköl. Ye' dör Abraham aleri eköl Benjamín ditséwö wa. <sup>2</sup> Kuaë Skëköl tō Israel aleripa shükitbak iwák ichaie. Kè ie'pa watëulettsa ie' wa. Elías tté tso' kitule Skëköl yëkküö kî wé Israel aleripa kkatë'kaitö Skëköl a, çe' kè jcher a' wa? Ie' iché Skëköl a: <sup>3</sup> “A Skëköl, ie'pa tō be' ttekölpa malepa kos ttélur. Ñies ka' tso' íyi moká be' a, e' kos tkéttsarak-itö. Ye' è atéat ttsë'ka erë ye' ttakwa ie'pa éna ñies.”<sup>‡</sup> <sup>4</sup> Erë Skëköl tō ie' iüté: “Wépa döka mil kuryök (7.000) e'pa kè e' tkëulewa kuchè kî Baal dalöioie

§10:11 Isafás 28.16

\*\*10:13 Joel 2.32

††10:15 Isafás 52.7

‡‡10:16 Isafás 53.1

¶¶10:18 Salmo 19.4

§§10:19 Deuteronomio 32.21

\*10:20 Isafás 65.1

†10:21 Isafás 65.2

‡11:3 1 Reyes 19.10,14

ekkëpa tso'ia ye' wã."¶ 5 Es ñies i'ñe ta Israel aleripa tso' tajë, erë e' shuã wëpa a Skëköl er buaë ye' ta ishukititö, esepa kè dör tajë. 6 Ie'pa shukititö ie' er buaë ché ie'pa a e' kuëki, e' ta e' wà kiane chë tò e' kè dör i buaë wé ie'pa tò e' kuëki. Ichöpa es, e'ma kè ie' er bua' yëne.

7 E' kuëki sö isuë tö Israel aleripa bak tsatkë yulök, e' kè dë' ie'pa ulitane ulà a. Erë ie'pa welepa shukit Skëköl tò, e'pa ulà a ide, erë imalepa er darërulune. 8 E' dör wes Skëköl yëkkuö tö ichë es. E' ichë: "Skëköl tò ie'pa ké er chöukwa ie' ska'. E' dör wes ie'pa wöbla ta', erë kè iwawër es. E' dör wes ie'pa kuköna ta' erë kè iwattsër. Dö i'ñe ta ie'pa dör es."§ 9 Es ñies David tö ie'pa ye' i' es:

"Mik ie'pa tso' kawö tkö'uk kaneë, etã as eë ibolökpa tö iklö'üwã kësik wa as ie'pa klastkër ta iweirdak.

10 Iwöbla mú kè wawëriã.

Itsiwö mú körwã dali ekkeë dikia kekraë."\*\*

### Pë' kè dör Israel aleripa esepa tsatkërdaë

11 I' ta ye' ichakè: A' ichë Israel aleripa tö Jesús watëttsã ¿e' wà kiane chë tò ie'pa kè tsatkërpa? Au, e' kè dör es. E' skéie i sulu wamblé ie'pa tò ñe' batamik pë' malepa tsatkërmi. E' tka es as ie'pa sibirkã pë' malepa ki ta ierkindak erblök Jesús mik. 12 I' sulu wamblé' ie'pa tò, e' batamik pë' malepa a Skëköl er buaë ché tajë ká wa'ñe. E' yitã buaë sulitane a ie' er buaë kí chöraë tajë shütë mik judiowak tajë erblé Jesús mik etã.

13 Erë a' kè dör judiowak, esepa a ye' tö ilë cheke. Skëköl tò ye' a kanë i' me' Jesús ttekölíe pë' kè dör judiowak es-

epa a ttë pakök. Kanë e' dalër tajë ye' éna. 14 Isalema kanë e' wa ye' tö ye' wák ditséwöpa welepa mú ukyëwëka ta ie'pa ñies erblömi Jesús mik as itsatkër.

15 Ie'pa watëttsã Skëköl tò e' batamik ie' ena ká wa'ñe wakpa malepa er buarmine ñi ki. E' yitã mik ie' tö ie'pa skà kiéwane buaë, etã e' dör buaë shütë. E' dör buaë wes s'duulewã e' shkenekane es.

16 Harinachka tsã meule Skëköl a†† e' dör batse'r, e' ta iëyök dör batse'r ñies. Ñies kal wikicha dör batse'r, e' ta kal e' kos dör batse'r ñies. Es judiowak yépa tsã dör Skëköl icha, e' kuëki ileripa dör ie' icha ñies.

17 Skëköl tö judiowak watëttsã, e' dör wes kal uru kië olivo e' ulà téé es. Pë' kè dör judiowak esepa dör wes olivo klö kañiru ulà tkéwã olivo uru ulà tëule ese skéie es. E' batamik i'ñe ta a' serke buaë olivo klö uru e' wí mik. 18 E' kuëki olivo uru ulà tëule, e' kè ki a' e' ttsökka. Erë a' e' ttsakka, e' ta a' éna ianú tö ulà serke iwí mik; iwí kè serku' iulà mik.

19 Isalema a' ichëmi: "E' yëne erë iulà uru tërolone as sa' tkërwane iskéie." 20 E' yëne erë ie'pa tërolone ie'pa kè erbléne Jesús mik e' kuëki. Erë a' erblé Jesús mik, e' è kuëki a' tkéulewã olivo klö uru mik. E' kuëki kè a' e' ttsökka. Warma a' kawötã Skëköl dalöiök. 21 Ie' kè wã kal chök e' ulà meneat, e' yitã kè ie' tö a' mepaat. 22 A' éna ianú tö wes Skëköl dör. Ie' er buaë chömi se' a, erë ñies ie' a s'kichatërmi. Wëpa anemi i sulu a, esepa kichaterattsaitö. Erë ie' er buaë ché a' a. A' erblökeiã ie' mik, e'ma buaë idir. Erë a' kè serku'ia es, e' ta a' tërdattsã ñies. 23 Judiowak kè erbléne Jesús mik. Erë e' kè wambléiã ie'pa tò ta ierblé imik,

¶11:4 1 Reyes 19.18

§11:8 Deuteronomio 29.4; Isaías 29.10

\*\*11:10 Salmo 69.22-23

††11:16 *Harinachka tsã meule Skëköl a*: Pablo tso' jchök tö judiowak dör wes harinachka es. Harinachka tsã e' dör wes judiowak yépa tsã Abraham ena Isaac ena Jacob es. Harinachka iëyök e' dör wes ileripa datse itökí es.

e' tã Skëköl wã diché tso' ie'pa tkowãne iwákpa kéli mik, e' kuëki itkërdawarak. <sup>24</sup>E' wã dör i' es: a' kè dör judiowak, e'pa dör wës olivo kañiru ulã tẽule tkẽulewã olivo uru mik es. Eré e' kè wëtã'sò es, eré es Skëköl tã iwé a' a. E' yitã buaé judiowak dör wës ulã chók es, esepa tkër-wãmíne buaé iwákpa kéli mik.

### Israel aleripa tsatkerdaë tajë

<sup>25-26</sup>A yamipa, kenet tã ttè tso' blẽule, ese chekeyò a' a. Ye' kã ikiane tã ttè e' jcherwã a' wã as a' kè e' tssòka tã a' wã íyi jcher Israel aleripa tsata. Ttè blẽule e' dör i': ìñe tã Israel aleripa kibiiepa er darërulene dò mik pẽ malepa shukitbak Skëköl tã e' kos tsatkëne eta. E' ukuòki tã ie'pa kos tsatkerdaë wës Skëköl yëkkuò tã ichè es, e' tã ichè:

“S'tsatkòkwak datse Siòn,  
e' tã sene sulu kos yerattsa Jacob aleripa shuã.

<sup>27</sup>Ttè e' meraëyò ie'pa a mik ie'pa nuì olo'yéyò ie'pa kã eta.”<sup>††</sup>  
Es Skëköl yëkkuò tã ichè.

<sup>28-29</sup>Mik Skëköl tã s'shushtë er buaé choie sia, eta e' kè mane'wepaitò. Israel aleripa tã Jesús ttè buaé watëttsã, e' kuëki ìñe tã ie'pa dör Skëköl bolòkpa. Eré kã ìaiaë ie'pa yépa bak e'pa shukititò er buaé choie ie'pa a. E' kuëki ie'pa aleripa dalërkeia ie' ãna. E' tka es ie'pa tã as a' tsatkër. <sup>30-32</sup>Sulitane tã ie' ttè dalõsëwëwã, e' nuì ulã a se' tso' klõulewã. E' me'atbakitò es as ie' a sulitane sur er siarë wa ñikkëë. E' kuëki kenet a' tã ie' dalõsëwëwã, eré ìñe tã a' suëtò er siarë wa, ie'pa tã ie' dalõsëwëwã e' kuëki. Es ñies ìñe tã ie'pa tã ie' dalõsëwëkewã, eré e' dör as a' saùitò er siarë wa, ñies as ie'pa saùneitò er siarë wa.

<sup>33</sup>Skëköl er buaé ché tajë shutë se' a. Ie' wã íyi ulitane jcher buaé sulitane tsatã. Ie' kabikeitsò tajë iskië. Ì bikeitseke

ie' tã ese kè wã pakanuk yi a. Ì wekeitò ese kè anuk yi éna. <sup>34-36</sup>Ì kos e' wì dör ie'. Ì kos tso' ie' batamik. Ì kos tso' ie' wák a. E' kuëki Skëköl yëkkuò tã ichè: “Skëköl erbikò e' kè jcher yi wã.

Kè yi a ie' pautuk.

Kè yi a ì menuk ie' a keweië as ie' tã iské mune ia.”

¡Skëköl kíkòkasò këkraë! ¡Es e' idir!

### Wës se' kawõtã senuk Skëköl ala'rie

**12** A yamipa, Skëköl er buaé ché se' a tajë, e' kuëki ye' kkòchò a' a tã a' e' müttsã eköl eköl ie' a këkraë wës ì batse'r meule ie' a wër buaé ie' wa es. Es se' tã ie' daloië e' wakanewëmi mokjé. <sup>2</sup>Kè a' senukia wës wépa kè tã ie' daloië esepa ser es. E' skéie a' erbikè mane'úttsa pa'alì tã e' wa a' sermi buaé yësyësë. Es ì kiane ie' kã ese jchermi buaé a' wã wawë. E' wã dör ì dör buaé, ì wër buaé ie' wa ena ì dör yësyësë ese.

<sup>3</sup>Ie' er buaé ché ye' a, e' kuëki ie' tã kanè me' ye' a Jesús ttekòlie. E' wa ye' tã a' kos a' ichè tã kè a' e' bikeitsòkka tkòka kos s'ké e' bikeitsòk e' tsata. E' skéie se' e' bikeitsò yësyësë kos Skëköl tã imé se' a erbloie ie' mik ekkë. <sup>4</sup>E' dör wës se' dör es. Se' wòbla tã, ulã tã ena s'yese skà tso' tajë kuã'kã kuã'ki, eré e' kos woiëulewã ñita s'wák eköl è a. <sup>5</sup>E' sù se' erblòke Cristo mik esepa dör tajë kuã'kã kuã'ki, eré se' kos dör wës wák eköl è es, se' kos batsulewã ie' mik e' wa.

<sup>6</sup>Es Skëköl tã imé se' a kuã'kã kuã'ki ñi kimoie wës ie' kã ikiane es. E' kuëki wépa a iméitò ttoie ittekòlie, esepa ttò es, ie'pa erblò Skëköl mik e' wa. <sup>7</sup>Wépa a imé Skëköl tã s'kimoie, esepa tã s'kimú. Wépa a iméitò s'wòbla'woie Skëköl ttè wa, esepa s'wòbla'ú. <sup>8</sup>Wépa a imène s'er diché ioie, esepa tã s'er diché ió. Wépa a imène íyi kakmoie, esepa ikakmú er bua' wa kè dör ì skéie. Wépa a imène

††11:27 Isaiás 59.20-21; 27.9

s'wëttsoie, esepa s'wëttśú kaneë. Wépa a imène s'malepa suoie er siarë wa, esepa tò iwà ù ttsë'ne buaë wa.

### Jesús mik erblökwakpa ñi dalër

<sup>9</sup>A' ñi dalëritśó er mokí wa. Sene sulu kos e' watóttśa. E' skéie sene yësyësë kos e' a' senú kekraë. <sup>10</sup>A' ñi dalëritśó wes ñi ëlpa ñi dalër es. A' ñi dalöiö taië.

<sup>11</sup>Ï kos weke a' tò, e' ù kaneë. Kë a' bikënuK. Skëköl kanë ù ttsë'ne buaë meke iWiköl tò se' a' e' wa.

<sup>12</sup>Ï buaë panekesö, e' kueki a' senú ttsë'ne bua' wa. A' weirke e' dalë'ttsó er bua' wa. A' ttó S'yé ta kekraë.

<sup>13</sup>S'batse'rpa malepa weirke ki ilë kiane, esepa kimú. Yi de a' pakök, ese kiówa er bua' wa.

<sup>14</sup>Wépa tò a' we'ikeke Jesús tté kueki, kë esepa ki alibchök, e' skéie er buaë chó iarak.

<sup>15</sup>Wépa ttsë'rke buaë, esepa ta' a' ttsë'nú buaë. Wépa iuke, esepa ta' a' iú.

<sup>16</sup>A' senú bèrë ñita. Kë a' e' ttsökka s'malepa tsata. E' skéie a' e' batsó se' ësepala ta' buaë. Kë a' e' bikeitsökka tò a' wa íyi jcher taië.

<sup>17</sup>Yi tò ì sulu wamblé a' ki, e' ta' kë iské wamblarne. Ì kos dör buaë yësyësë sulitane a' ese ú. <sup>18</sup>A' senú bèrë sulitane ta' kos a' dirmi ekkë. <sup>19</sup>A' yamipa dalër ye' éna, kë ì sulu ské wamblarne yi ki. E' skéie imuat Skëköl kësik ulà a. Ie' tò ichë iyëkkuö ki i' es: "Ye' è wöki iské wërke wë. Yi tò ì sulu wamblé, e' ské werayö iki."<sup>¶¶</sup> <sup>20</sup>Ñies ichë: "A' bolökpa dué bli wa, e' ta' itió. Ie' er sine, e' ta' di' mú ia yë. A' iwé es, e' ta' ie'pa jaërdaë."<sup>§§</sup> <sup>21</sup>Kë sene sulu kar e' alökka a' ki. E' skéie a' e' alökka sene sulu ki sene yësyësë wa.

**13** Sulitane kawöta ká wökirpa ttë dalöiök. Skëköl tò kawö me' ie'pa a' s'wëttsoie. Itso'rak kos e'pa tkë'ka ie' tò. <sup>2</sup>E' kueki wépa kë tò ie'pa dalöië, esepa ñippöke wépa tkë'ka ie' tò esepa ta. Ese wakpa weirdaë iulà a. <sup>3-4</sup>S'wökirpa kë tkëneka s'ser yësyësë esepa we'ikök as isuardak. Ie'pa dör Skëköl kanë mé-sopa a' kimoie. Ie'pa tso' s'ser suluë esepa we'ikoie. Esepa je' kawöta suanuk. A' senak kë suar ta' s'wökirpa yöki, e' ta' a' senú yësyësë ta' ie'pa tò a' kikeraka. Erë wépa serke suluë, esepa je' kawöta suanuk. Kë é ichök ie'pa a' kawö mène s'we'ikoie. Ie'pa tso' kaneblök Skëköl a' s'ser sulu we'ikoie wes kawö meneat ie'pa a' es.

<sup>5</sup>E' kueki se' kawöta ie'pa ttë iütök, e' kë dör as kë itö s'we'ikö e' è kueki. E' dör tò se' er tò se' a' icheke tò e' dör buaë yësyësë e' kueki. <sup>6</sup>E' kueki ñies inuköl patauk ie'pa tò se' keke ese patuekesö. Ie'pa dör Skëköl kanë mésopa kaneblöke ie' a' s'wökirpaie. E' dör ie'pa kanë, e' kueki ie'pa patuë e' dör buaë. <sup>7</sup>E' kueki imusö ie'pa a' eköl eköl wes s'kawöta imuk es. Ilë kawöta patuë eta' ipataú. Wépa kawöta dalöië esepa dalöiö.

<sup>8</sup>A' wa nuì tso' kos e' pataú. Erë nuì tso'ia se' ki kekraë, e' dör ñi dalëritsë, e' kë patonuktsa se' a. S'malepa dalëritsekesö, e' ta' e' wa ttë dalöiëno me'at Moisés tò e' wà kos dalöiësö. <sup>9</sup>Ttë e' tò ichë: "Kë a' kawö ta' s'senewabak dalöseukwa; kë a' kawö ta' s'ttökwa, kë a' kawö ta' akblök; kë a' kawö ta' o'ka íyi kkechök."<sup>\*</sup> Ttë e' ena imalepa kos e' wöiënewa ttë etkë a, e' dör i': "A' malepa dalëritśó wes a' wákpa e' dalër es."<sup>†</sup> <sup>10</sup>S'malepa dalëritsekesö, e' ta' kë ì

<sup>¶¶</sup>12:19 Deuteronomio 32.35

<sup>§§</sup>12:20 Proverbios 25.21-22

\* 13:9 Éxodo 20.13-17

† 13:9 Levítico 19.18



sulu wamblepasö yi ta. Es ttë dalöiëno kos e' dalöiekesö mokië yësyësë.

<sup>11</sup> A' senü es. S'tsatkë këwö kî dewatke tsinet se' erblë' Jesús mik kuaë e' tsata. E' këwö a se' tso' i'ne ta, e' anü a' éna. E' kueki kè a' senukia wes s'kapötër nañewe es. <sup>12</sup> Sene sulu këwö erkewatke ta se' tsatkeke e' këwö dökewatke wes ká nîrketke s'kî es. E' kueki kè se' e' wamblöia suluë wes pë' tso'ia stui a e' wamblö es. E' skéie se' senü yësyësë, e' dör wes s'ser ká nî a es. Se' e' duöser nîppök sene sulu ta wes nîppökwakpa es. <sup>13</sup> Se' senü buaë yësyësë wes s'ser ká nî a es. Kè se' kàne e' wamblökiä bloblopa es. Kè se' kàne trënu, e' ya'uk sulu. Kè se' kàne nîppök. Kè se' kàne ukyënu, s'malepa ta. <sup>14</sup> E' skéie a' senü buaë yësyësë wes Skëképa Jesucristo kî kiane es. Kè a' tö ibikeitsök tö wes a' a' s'wák dër sulu e' wopatërmi.

### Kè a' nî bikeitsök suluë

**14** Wépa erblöke Jesús mik, erë kam ierblö bua'ie, esepa kiówa er bua' wa. Ttë bikeitseke a' tö kua'kî kua'kî ese kè kî a' nî iütök. <sup>2</sup> A' welepa tö ibikeitseke tö Jesús mik erblökwakpa a' i'yi ulitane katarmi. Erë a' welepa skà kam erblö bua'ie Jesús mik, esepa tö iklö'wé tö i'yiwak chkà kè katar. <sup>3</sup> Wépa tö i'yi ulitane katé, esepa kè kàne wépa kè ikatè esepa chök iki. Nies wépa kè ikatè, esepa kè kàne wépa tö ikatè esepa chök iki, Skëköl tö ie'pa klö'bak ie' ichaie e' kueki. <sup>4</sup> Se' dör Skëképa Cristo kanè mé-sopa. Wes se' wër ie' wa eköl eköl, e' wërke ie' wák wöki. Ie' a' se' kimermi as se' wër buaë ie' wa, e' kueki se' wërdaë ie' wa buaë. E' kueki çwes s'yamipa chëmisö suluë?

<sup>5</sup> Nies se' shua welepa tso' tö ibikeitseke tö s'kawöta diwö wele batseitsök imalepa tsata. Erë iëltëpa tö ibikeitseke tö diwö ulitane dör nies ème. Se' kawöta

wa ijchenuk eköl eköl tö i'klö'wésö e' dör yësyësë. <sup>6</sup> Wépa tö iklö'wé tö s'kawöta diwö wele batseitsök bua'iewa, esepa tö batseiteke Skëképa Cristo dalöioie. Nies wépa tö i'yi ulitane katé esepa tö ikateke Skëképa Cristo dalöioie ta wéstela chekeitö Skëköl a' iki. Wépa kè tö i'yiwak chkà katëia, esepa tö ilo'yé Skëképa Cristo dalöioie ta wéstela chekerakitö Skëköl a' i'nekerakitö e' kî.

<sup>7</sup> Se' dör Skëképa Cristo icha, e'pa tso' ttsë'ka ö e'pa duowa e' dör ie' dalöioie, kè idör se' wák dalöioie. <sup>8</sup> Mik se' tso'ia ttsë'ka, eta se' serke ie' a. Mik se' duowa, eta se' duowa ie' a. Se' tso' ttsë'ka ö se' duowa, erë se' dör ie' icha. <sup>9</sup> Ie' kötëwa e' shkenekane as ie' dō s'durulune ena s'tso' ttsë'ka e'pa kos Këkölë.

<sup>10</sup> Se' ulitane doraë Skëköl tkër s'shulo kulé kî e' wörki. E' kueki çiók a' nî chö ö nî saü suluë? <sup>11</sup> Skëköl tö ichè iyëkküö kî i' es:

“Ye' wák ser wa yö ichè:

Sulitane e' tulörawa kuchë kî ye' wörki. Sulitane tö ye' kikeraka.”<sup>‡</sup>

Es Skëköl yëkküö tö ichè. <sup>12</sup> Es sö isuë tö wes se' serke e' kî Skëköl tö se' chakerane eköl eköl.

<sup>13</sup> E' kueki kè se' kàne nî chökia suluë. E' skéie a' e' tköwa darërë i' tö s'yamipa wöklö'wëmi ö i' tö iëminine sene sulu a, ese kè war. <sup>14</sup> Ye' wa ijcher buaë tö kè chkè wëne tö s'ia'wëpa nâie Skëköl wöa. Ye' erblöke Skëképa Jesús mik, e' wa ye' iklö'wé yësyësë tö es idir. Erë wépa tö iklö'wé tö chkè wele tö s'ia'wëmi nâie, e' ta es idir esepa a. <sup>15</sup> E' kueki a' tö s'yami wele siawéwa i' kateke a' tö e' batamik, e' ta e' kè dalëritseku'ia' a' tö. Nies ie' skéie Cristo kötëwa, e' kè sulu'warwa i' kateke a' tö e' batamik. <sup>16-18</sup> I' blúie Skëköl tso' e' wà kè dör chkè ena di'yë. E' wà dör sene yësyësë ena sene bèrë ena ttsë'ne buaë Wiköl Batse'r wa. Yi tö Cristo kanè weke

<sup>‡</sup>14:11 Isaías 45.23

es, ese wër buaë Skëköl wa ñies sulitane wa. E' kueki ì tò a' yamipa kèmi a' chök suluë ì dör buaë a' a e' ki, ese kè war.

<sup>19</sup> Es ì kos tò se' kimeke senuk bèrè ñita ena ñi diché iök Skëköl a, ese üsö. <sup>20</sup> Ì buaë wétke Skëköl tò a' er a, e' kè sulu'warwa chkè è kueki. Mokì chkè ena di'yè kos dör batse'r. Erè sulu idir tò s'yamipa armine sene sulu a se' ukuömik ì katèsö ì yésö ese wa. <sup>21</sup> Buaë idir tò iyiwak chkà mú kè katèsö ö blo' mú kè yèsö ö ì kos mú kè wèsö. Erè kè idör buaë tò s'yamipa armine se' ukuömik. <sup>22</sup> Ima a' ttè i' bikeitsè e' bló a' er a Skëköl è a. Wépa tò ì wër buaë ie'pa wa ese wé ta ittsé tò kè iki ì nuí ku', jayécha buaë esepa! <sup>23</sup> Erè yi tò ì katé ta ibikeitsékaitö bötböt dö' ye' tso' ì sulu wamblök, e' ta e' nuí tso' iki. Ie' kè wà iklöne mokì tò buaë idir, e' kueki e' dör suluë ie' a. Ì kos wésö e' kè one se' wà yësyësë wës iklö'wésö es, e' ta e' dör suluë se' a.

**S'kawötä s'malepa kimuk**

**15** Se' wépa erblöke buaë Cristo mik, esepa ké wépa kam erblò buaë tso'ia katötö esepa sauk wës se' wák katörwä es. Kè se' kàne ì tò se' wák ttsë'weke buaë ese è bikeitsök. <sup>2</sup> Se' kos ké ì tò s'malepa ttsë'wèmi buaë ese bikeitsök eköl eköl ikimoie ena idiché ioie buaë Skëköl a. <sup>3</sup> Cristo wák kè wä ì tò ie' ttsë'weke buaë ese è bikeitse. E' skéie ie' ta itka wës Skëköl yëkkuö tò ichè es, e' tò ichè: “A Skëköl, wépa tò be' cheke suluë esepa tò ye' cheke suluë ñies.”<sup>¶</sup> <sup>4</sup> Ì kos kite ká iaiaë Skëköl yëkkuö ki, e' kite s'wöbla'woie as se' e' tköwä darërè ena as se' er pablö. E' wa ì buaë panekesö e' kè olo'yepasö. <sup>5</sup> Skëköl

tò se' ké e' tkökwä darërè ñies se' er pablekeitö. As ie' tò a' kimù senuk bèrè ñita wës Cristo Jesús ser es. <sup>6</sup> A' serke es, e' ta Skëköl dör Skëképa Jesucristo Yé e' kikerakä a' ulitane tò sekka ñita.

<sup>7</sup> Es a' ñi kiöwä er bua' wa wës Cristo tò a' ki'wä es as sulitane tò Skëköl küköka. <sup>8</sup> Mokì ye' ichè a' a tò Cristo de'bitu judiowak kimuk ikkachoie ie'pa a tò ì uk Skëköl kablè' sa' yépa bak ká iaiaë e'pa a, e' wawéitö. <sup>9</sup> Ñies idè'bitu as pè' kè dör judiowak, esepa tò Skëköl küköka ie'pa suéitö er siarè wa e' kueki. E' dör wës Skëköl yëkkuö tò ichè es wé ichéitö:

“E' kueki ye' tò be' kikerakä pè' kè dör judiowak esepa ulitane shua. Ye' ttsöraë be' kikokaie buaë.”<sup>§</sup>

<sup>10</sup> Ñies itso' kitule i' es:

“¡A' kè dör judiowak esepa ttsë'nú buaë wépa dör Skëköl icha esepa ta ñita!”<sup>\*\*</sup>

<sup>11</sup> Ñies ichéitö:

“¡A pè' kè dör judiowak Skëköl küköka! ¡A ká ulitane wakpa, Skëköl küköka!”<sup>††</sup>

<sup>12</sup> Ñies Isaías tò ikitat iyëkkuö ki i' es:

“Jesé aleri eköl döraë se' shua, e' tkërdakä ká ulitane wakpa wëttsöie. Pè' kè dör judiowak esepa tò ie' è paneraë e' tsatkoie.”<sup>\*\*‡</sup>

Es itso' kitule.

<sup>13</sup> Ì buaë kos doia se' a e' panekesö kröröe e' wi dör Skëköl. As e' tò ttsë'ne buaë ena sene bèrè mù a' kos erblé ie' mik e'pa a. As ie' tò a' kimù iwä kí panuk buaë Wiköl Batse'r diché batamik.

<sup>14</sup> A yamipa, mokì ye' iklö'wé tò a' serke buaë yësyësë. Ñies ye' iklö'wé tò a' wä iyi jcher taië. A' a ñi pautmi buaë. <sup>15</sup> Erè yëkkuö i' ki ye' er deka a' pat-tök wöshäë ttè wésele wa as kè a' éna

<sup>¶</sup>15:3 Salmo 69.9

§15:9 2 Samuel 22.50; Salmo 18.49

\*\*15:10 Deuteronomio 32.43

††15:11 Salmo 117.1

\*\*15:12 Isaías 11.10

ichòwa. Skèköl er buaë ché ye' a e' wa kanè me'itò ye' a, e' kuèkì ye' a kawò ta' a' pattoie es. <sup>16</sup>Ye' dör Cristo Jesús kanè méso ie' tté buaë kkayè' Skèköl tò se' a e' pakoie pé' kè dör judiowak esepa moie Skèköl a batse'oule Wiköl Batse'r wa. E' dör wës íyì mè sacerdotepa tò Skèköl dalöioie wër buaë ie' wa es.

<sup>17</sup>Ye' batsulewà Cristo Jesús mik, e' kuèkì ye' kaneblöke Skèköl a e' tò ye' ttsè'weke buaë. <sup>18</sup>Ye' kè er dè'kà kabenukka à kè òne Cristo wa ye' wa ese kì. Ie' batamik ye' tò pé' kè dör judiowak esepa ulaié Skèköl ttè iutök. E' wé ye' tò ipakè wa ena iwakanewè wa <sup>19</sup>ena Skèköl Wiköl diché wa. Nies ì kè or yi a ese wéyò taiè ie'pa wörkì ikkachoie tò ì chéyò e' dör moki. Es kanè mène ye' a Cristo tté buaë pakoie e' wawétkeyö ká tso' kos Jerusalén dò Iliria e' shuà. <sup>20</sup>Kekraë ye' e' mukettsà tté buaë e' pakök wé kè yi tò Cristo dalöieta' ese ska'. Ye' iwé es as ye' kè dör wës yi tò u yuéka u chkí tulu'wabak o'ka tò ese kì es. <sup>21</sup>E' skéie ye' éna iwak wës Skèköl yékkuò tò iché es, e' tò ichè:

“Wépa a ie' tté kè pakaule, esepa a ká ardaë;

Wépa kè wà ie' tté ttséule, esepa éna iar-daë.”<sup>¶</sup>

### Pablo shkak Roma

<sup>22</sup>Kekraë ye' shkak a' weblök, erè kanè i' tò ye' wöklö'weke. <sup>23</sup>Erè i'ñe ta ye' kaneone ká ikkèpa kì. Bànèt ye' tò a' kkey'mi pakè, <sup>24</sup>e' kuèkì ye' mú tkòmi Roma a' pakök mik ye' mi'ke España eta. Eré ye' kè a kawò kunuk taiè a' ska' senuk, erè ye' ttsè'rmi buaë. E' ukuökì ta a' mú ye' kìmè as ye' dò España. <sup>25</sup>Erè i'ñe ta ye' mitke Jerusalén s'batse'r malepa serke eë e'pa kìmuk. <sup>26</sup>E' dör tò s'yamipa serke Macedonia ena Acaya e'pa tò inuköl kitbak iwákpa

er wa patkèmi s'batse'rpa dör siarè tso' Jerusalén e'pa kìmoie. <sup>27</sup>E' wé ie'pa tò iwákpa er wa, erè moki ie'pa kì inuí tso'. E' kuèkì buaë idir tò ie'pa tò judiowak kìmè. E' dör tò ì buaë de judiowak ulà a Cristo wa, e' de ie'pa ulà a nies judiowak wa. E' kuèkì buaë idir tò ì tso' ie'pa wà e' kadmè s'yamipa dör judiowak esepa a. <sup>28</sup>Es mik ye' tò inuköl kitule kos ie'pa a e' mé ie'pa ulà a, eta ye' mífà España e' tkökemi a' pakök. <sup>29</sup>Ye' wà ijcher tò mik ye' demi a' ska', eta se' ñi er diché iöraë buaë Cristo er buaë chò sia e' kos wa.

<sup>30</sup>A yamipa, Skèkèpa Jesucristo ttò wa, nies se' ñi dalèritsöke Skèköl Wiköl wa, e' wa ye' kköchò a' a' tò a' e' chó darèrè ye' ta ñita kanè mène ye' a e' wà uk. E' wèmi a' tò, a' tò Skèköl a' ikiè ye' kì e' wa. <sup>31</sup>Ikió ie' a' as ie' tò ye' tsatkò Judea wakpa kè tò Jesús tté iutè esepa yöki. Nies ikió ie' a' tò ì kos mi'ke ye' wà s'batse'rpa tso' Jerusalén e'pa kìmoie as ie'pa tò e' tsü er bua' wa. <sup>32</sup>Es ikió ie' a' as ye' dòmi a' ska' ttsè'ne buaë wa enuk a' pakekeyö e' dalewa, es ie' kì ikiane e'ma. <sup>33</sup>Ie' dör sene bèrè mukwak as e' tò a' wapiöü. Es e' idir.

### Roma wakpa shké'wémi Pablo tò

**16** Tayè eköl kiè Febe dör s'yami, e' tté chekeyö a' a. Ie' dör Skèkèpa Jesús icha erule tso' Cencreas e' kìmukwak eköl. <sup>2</sup>Ie' kiòwà buaë Skèkèpa Jesús ttò wa wës s'batse'rpa ñi kiòwà es. Ie' tò s'yamipa taiè e'pa kìmé, nies ye' wák kìméitò. E' kuèkì mik ie' kì ilè kiane eta ie' kìmü.

<sup>3</sup>Prisca ena Áquila e'pa shké'ú ña. Ie'pa bak kaneblök ye' ta Cristo Jesús kanè a. <sup>4</sup>Ie'pa e' me'ttsa ye' tsatkök, kè tkine tò dö' ittèwà. Wèstela chekeyö ie'pa a, erè kè dör ye' è. Skèkèpa Jesús icha erule erule kos kè dör judiowak, e'pa tò wèstela cheke ie'pa a nies. <sup>5</sup>Nies

<sup>¶</sup>15:21 Isaiás 52.15

Skëkëpa icha erule daparke Prisca ena Áquila u a, e'pa shke'ú ña. Ñies ye' yami dalër tajë ye' éna kiè Epéneto, e' shke'ú ña. Ie' dör s'tsá erblë' Cristo mik Asia e'. <sup>6</sup> María shke'ú ña. Ie' kaneblé tajë a' a. <sup>7</sup> Wépa böl kiè Andrónico ena Junias, e'pa shke'ú ña. Ie'pa dör judiowak wes ye' es. Ie'pa bak wötëule s'wöto wé a ye' ta. Ie'pa dör Jesús ttekölpa kkeaulëkä buaë imalepa wa. Ie'pa erblë' Cristo mik ye' yöki kewe.

<sup>8</sup> Ampliato shke'ú ña. Ie' dör ye' yami Skëkëpa Jesús ttò wa, e' dalër tajë ye' éna. <sup>9</sup> Urbano shke'ú ña. Ñies ie' kaneblöke Cristo a wes sa' es. Ñies Estaquis shke'ú ña. Ie' dalër tajë ye' éna. <sup>10</sup> Apeles shke'ú ña. Ie' wër buaë Cristo wa. Ñies wépa dör Aristóbulo icha, e'pa shke'ú ña. <sup>11</sup> Herodión, e' shke'ú ña. Ie' dör judiowak wes ye' es. Ñies wépa dör Narciso icha erblë' Skëkëpa mik e'pa shke'ú ña. <sup>12</sup> Tayëpa kiè Trifena ena Trifosa shke'ú ña. Ie'pa kaneblöke Skëköl a. Ñies tayë dalër se' éna kiè Pérside e' shke'ú ña. Ie' kaneblöke tajë Skëköl a. <sup>13</sup> Rufo shke'ú ña, e' dör Jesús mik erblökwak buaë sùule sulitane wa. Ñies ie' mì e' shke'ú ña. Ie' dör wes ye' wák mì es. <sup>14</sup> Asíncrito, Flegonte, Hermes, Patrobas, Hermas ena s'yamipa kos tso' ie'pa ta, e'pa kos shke'ú ña. <sup>15</sup> Ñies Filólogo, Julia, Nereo ena ikutà, Olimpas ena s'batse'r malepa tso' ie'pa ta, e'pa kos shke'ú ña.

<sup>16</sup> A' ñi shke'ú ñi dalër wa. Cristo icha erule erule e' kos tó a' shke'wémi.

<sup>17</sup> A yamipa, ye' kköchò a' a tó wépa éna se' blabatsak ena se' akmine sene sulu a, esepa yöki a' e' kkö'nú. Ie'pa se' a icheke tó ttè wa se' wöblaule kewe e' kè dör mokijë. Esepa yöki a' e' skó. <sup>18</sup> Ie'pa

kè ku' Skëkëpa Cristo kanëuk. E' skéie ie'pa tso' iwákpa è kanëuk. Se' kam éna iar buaë esepa dakiñekerakitö ttè ttsër buaë ese wa. E' kuëki esepa yöki a' e' skó. <sup>19</sup> Sulitane wa ijcher tó Skëköl ttè mokijë e' dalöieke a' tó buaë. E' tó ye' ttsë'weke buaë. Ye' ki ikiane tó a' mú wöblar ttè buaë yësyësè wa wawë. Erë a' mú kè e' wöbla'ù kache ttè wa i' sulu wambloie. <sup>20</sup> A' serke es, e' ta betka Skëköl dör sene bèrè mukwak, e' tó Satanás shtowerawa a' klò dikia. As Skëkëpa Jesús er buaë chò a' a.

<sup>21</sup> Ye' yami Skëkëpa Jesús kanè a kiè Timoteo e' tó a' shke'wémi. Ñies Lucio ena Jasón ena Sosípatro, e'pa tó a' shke'wémi. Ie'pa dör judiowak wes ye' es.

<sup>22</sup> Ye' dör Tercio, e' tso' Pablo ttöke e' shtök yëkuö i' ki. Ñies ye' tó a' shke'wémi Skëkëpa ttò wa. I' ta i' cheke Pablo tó e' shtekeneyö.

<sup>23-24</sup> Gayo tó a' shke'wémi, e' u a ye' serke. Eë Skëkëpa Jesús icha erule tso' ká i' ki e'pa daparke. Erasto tó a' shke'wémi. Ie' dör ká i' inuköl kuëblu. Ñies s'yami kiè Cuarto, e' tó a' shke'wémi.

### Pablo tó Skëköl kíkëka

<sup>25</sup> ¡Skëköl kíkëkasó! Ie' a a' kimermi e' tkökwa darërè Jesucristo ttè buaë pakekeyö e' a. Ká iaiaë ttè buaë e' blëule se' yöki. <sup>26</sup> Erë i'ne ta ikkayënewa se' a i' kit Skëköl ttekölpa tó yëkuö ki e' wa. Skëköl yöbië e' tó ie'pa ka' ishtök. Ttè buaë ñe' kkayënewa as ká ulitane wakpa erblò imik ta iwà iütò.

<sup>27</sup> Skëköl e' dör Skëköl eköl ème e'. Ie' erbikò tajë sulitane tsata. ¡As e' kíkarka kekraë Jesucristo wa! Es e' idir.

## Yëkkuö tsá kit Pablo tö Corinto wakpa a

### 1 Corintios

Mik Pablo bak kanëblök Éfeso eta ie' tö yëkkuö i' kit Jesús mik erblök-wakpa serke Corinto e'pa a. Pablo këwö ska' ta Corinto dör Grecia ká bua'ie. Pë' bak senuk ikî dôka 650.000. E'pa shua 400.000 klöulewá kanëblök é. Pablo wák tö tsawe Corinto wakpa a Jesús tté buaë paka'. E' tté tso' kitule Hechos 18.1-17 e' kî.

Alaköl eköl kiè Cloe e' yami wele de Pablo pakök ie' tso' Éfeso ee. E' tö ie' a iyë' tö Jesús mik erblökwakpa tso' Corinto e'pa nippöke taië ena welepa tso' íyi sulusi wamblök taië, e' kueki ie' tö yëkkuö i' kit. Nies ie' tö ikit ilè chaki' ie'pa tö ie' a e' iutoie ie'pa kimoie ena ipattoie.

Kam Corinto wakpa erblö Jesús mik eta ie'pa tö íyi taië dalöieke Skëköl skéie, e' dör kabene et. Ì dalöieke ie'pa tö e' a ie'pa tö iyiwak jcheke e' chkà katekerakitö iyamipa ta ì dalöiekerakitö e' dalöioie. E' cheke Pablo tö yëkkuö i' kî.

Nies ì dalöieke ie'pa tö e' wé kos a alakölpá sulusi datse ta wëpa serkerak ita. Erë mik wëpa ñekkëpa erblë' Jesús mik eta ie'pa kè éna iane tö wes ie'pa ké senuk. E' kueki Pablo tö ikkaché tö wes wëpa alaköl ta' ena alaköl kè ta' e'pa kawötá senuk.

Kíie ta pë' wele bak ñi dapa'uk Jesús mik erblökwakpa ta, e'pa tö ie'pa wöbla'weke kache tté wa. Ese ché Pablo tö yëkkuö i' kî.

### Shkëwè

**1** Ye' dör Pablo. Skëköl tö ye' klöo'bak iwák er wa Cristo Jesús ttekölpa

tsá, e'pa ekölie. S'yami kiè Sóstenes tso' ye' ta. <sup>2</sup>A' dör Skëköl icha erule serke Corinto, e'pa a sa' tso' yëkkuö i' shtök. A' batse'oule a' batsulewá Cristo Jesús mik e' wa. A' klöo' Skëköl tö ie' icha batse'rpaie wëpa kos tso' ká wa'ne tö e' tsatkè kiè Skëkëpa Jesucristo a e'pa ta ñi-ta. Jesucristo dör ie'pa ena se', e' Këköl. <sup>3</sup>Skëköl dör S'yé ena Skëkëpa Jesucristo, as e'pa er buaë chò ena sene bèrè mù a' a.

### Pablo tö wëstela ché Skëköl a

<sup>4</sup>Skëköl er buaë ché taië a' a Cristo Jesús batamik, e' kueki ye' tso' wëstela chök ie' a kekraë. <sup>5</sup>A' batsulewá Cristo mik, e' wa ì kos kiane a' kî wakanewè Skëköl a, e' mène a' a taië. Skëköl tö ieri mé a' a iwà pakoie buaë, ñies iwà jchenowá buaë. <sup>6</sup>E' wa iwënewá a' shua tö mokî a' tö Cristo tté klö'wé buaë. <sup>7</sup>Es ì kos kiane a' kî kanëbloie Skëköl a, ese métke ie' tö a' a iWiköl wa. E' wakanewëke a' tö a' tso' Skëkëpa Jesucristo datskene e' panuk, e' dalewa. <sup>8</sup>Nies ie' tö a' kimeräe buaë as a' e' tköwá darërëe ie' mik dò bata ekkë. Es a' kè kî ì nuí ta' ie' wöa mik Skëkëpa Jesucristo datskene e' këwö ska'. <sup>9</sup>Skëköl ttö mokjë e' tö a' klöo'bak as a' ser batsulewá ie' alá Jesucristo dör Skëkëpa e' mik.

### Jesús mik erblökwakpa ñi blabatsélor

<sup>10</sup>A yamipa, ye' tö a' a iché Skëkëpa Jesucristo ttö wa tö a' kos erbikó ñikkëe. Kè a' ñi blabatsök. A' senu' buaë ñita. A' kabikeitsó ñikkëe wes wák eköl è es. <sup>11</sup>A yamipa, tayë kiè Cloe, e' yamipa welepa tö ibiyó ché ye' a' tö a' tso' nippök tté kî. E' kueki ye' tso' a' a ichök es. <sup>12</sup>Ie'pa tö ye' a' iché tö a' kos nippöke ñita i' es: "Ye' dör Pablo klé." Welepa skà tö icheke: "Ye' dör Apolo klé." Iëkölpá tö icheke: "Ye' dör Cefas<sup>ss</sup>

<sup>ss</sup>1:12 Cefas: E' è kiè ñies Pedro.

klé.” A' skà tò icheke: “Ye' dör Cristo klé.”<sup>13</sup> ¿Ima a' ibikeitsè tò Cristo tso' blabutsule? Au, kè idör es. ¿Ye' kötewà krus mik a' skéie? Au. ¿A' wösune ye' ttò wa? Au.<sup>14</sup> Wëstela chekeyö Skëköl a' tò ye' kè wà a' wösune tajë. Wëpa kiè Crispo ena Gayo, e'pa è wösuk ye' tò.<sup>15</sup> Kè yi a' iyënuk tò ye' tò a' wösuk ye' ttò wa.<sup>16</sup> Ye' éna ñanewà i' tã tò ñies ye' tò wëm kiè Estéfanas e' wösuk ena ie' yamipa ekka. Kè ye' éna ñane tò yi skà wösuk ye' tò.<sup>17</sup> Cristo kè wà ye' patkëne s'wöskuök, ie' tò ye' patké ie' tté buaë pakök. Ye' kè tò tté e' paketã' tté iskië wa wes s'yöule tajë esepa kapakò es. Ye' tò ipakeke tté wöshakla wa as Cristo kötewà krus mik e' tté diché kè chöwa.

### Skëköl diché tajë ena ie' siwé iskië, e' wà dör Cristo

<sup>18</sup> Wëpa weirdaë aishkuö tã, esepa a' Cristo kötewà krus mik, e' tté dör alipa ttëie. Erë se' tsatkërke, esepa a' Skëköl diché tajë, e' tté idir.<sup>19</sup> E' dör wes itso' kitule Skëköl yëkkuö kï es, e' tò ichè: “Skëköl tò ichè: Wëpa wà siwà' jcher iskië, esepa meraatyö wes kè wà ì jcher es. Wëpa kabikeitsö tajë, esepa éna ká chöwerawayö.”\* Es Skëköl yëkkuö tò ichè.

<sup>20</sup> Es idir e' kueki s'ditsö wà siwà' jcher iskië, ¿wes esepa de? S'wöbla'uk tté dalöiëno wa wakpa, ¿wes esepa de? Wëpa a' s'ditsö íyi tté wà pakar ñi a' buaë ¿wes esepa de? Skëköl a' tã siwà' iskië jcher s'ditsö wà, e' kè wà tã', e' dör wes alipa tté es.<sup>21</sup> Ttè e' wà dör i' es: Skëköl wa íyi jcher iskië, e' kueki ie' kè wà ime-neat tò se' tsatkër ì jcher s'ditsö wà iskië ese wa. E' skéie ie' tò ime'at tò wëpa er-

blé Cristo mik itté pakarke e' wa, esepa è tsatkërdaë eré ittser alipa ttëie.

<sup>22</sup> Ì kè or yi a' ese kiane suè judiowak kï tté klö'woie. Griegowak tò siwà' iskië ese yuleke tajë.<sup>23</sup> Erë Cristo kötewà krus mik, e' tté pakeke sa' tò. Ttè e' sulune judiowak yöki. Pë' kè dör judiowak, esepa a' tã e' dör alipa tté.<sup>24</sup> Erë wëpa kos klö'bak Skëköl tò iwák a', judiowak ö pë' kè dör judiowak, esepa a' Cristo dör Skëköl diché tajë ena ie' siwé iskië e'.<sup>25</sup> Ì wé ie' tò e' wër wes ì wë aliwakpa tò es. Ñermata ie' wà siwà' jcher iskië tkòka sulitane tsata. Iwër wësua tò ie' kè diché tã', ñermata ie' diché tã' tajë tkòka suli-tane tsata.

<sup>26</sup> A yamipa, mik Skëköl tò a' klö'bak, eta ¿wes a' dör? E' anú a' éna. Ká i' wakpa a' tã a' kibiiepa kè wà siwà' iskië jcher. A' kibiiepa kè ttò dalöiërta'. A' kibiiepa kè dör kékëpa tajë ese ditséwö.<sup>27</sup> Erë wëpa cheke ká i' wakpa tò tò kè iwà ì jcher, esepa shukit Skëköl tò wöbla wa, wëpa wà siwà' jcher iskië, esepa jaëwoie. Wëpa kè dör kékëpa tajë ká i' wakpa a', esepa shukit ie' tò wöbla wa, wëpa dör kékëpa tajë, esepa jaëwoie.<sup>28</sup> Wëpa watëuletsa, wëpa bikeitseke ká i' wakpa tò tò kè idör ñie bua', wëpa kè dör ì, esepa shukit ie' tò, wëpa dalöiërta' tajë ká i' kï, esepa wöowaie diöshet.<sup>29</sup> Es kè yi a' e' ttsënuka Skëköl wörki.<sup>30</sup> Erë Skëköl wák tò a' bätswà Cristo Jesús mik. Cristo batamik ie' tò se' ké siwà' moki jchenuk-wà iskië. Ñies Cristo batamik ie' tò se' klö'wé wes pë' buaë yësyësë es, ñies se' de ie' wák ichaie bats'e'r yënetsa sene sulu ulà a'.<sup>31</sup> E' kueki s'kawöta senuk wes Skëköl yëkkuö tò ichè es, e' tò ichè: “Yi e' tsakka as ese e' ttsòka ì wé Skëköl tò ese wa.”†

\* 1:19 Isaías 29.14

† 1:31 Jeremías 9.24

### Cristo kōtewā wōtēulewā krus mik, e' tté paké Pablo tō

**2** A yamipa, mik ye' dē' kewe Skēkōl tté buaē pakōk a' a, etā kē ye' wā iwā pakane siwā' iskiē ese wa wēs a' wakpa yöule taiē esepa tō s'wōbla'wēke es. <sup>2</sup>Mik ye' bak a' shuā, etā ye' kē kī i bār tté kianeia. Ye' ibikeitsétke Jesu-cristo kōtewā wōtēulewā krus mik e' tté è pakōk. <sup>3</sup>Mik ye' dē'bitū a' ska', etā ye' tse'arke alabēbē kē diché ta' taiē, ye' suarke taiē painuke taiē. <sup>4</sup>Ye' tō Skēkōl tté buaē e' paké a' a, erē kē ye' wā ipakane siwā' iskiē s'ditsō a' ese wa a' dakiñoie. E' skéie i pakéyō a' a, e' wā kkaché a' a Skēkōl Wikōl tō idiché wa tō mokiē idir. <sup>5</sup>Skēkōl tō iwé es as a' kē erblō siwā' iskiē ese mik, e' skéie as a' erblō ie' diché mik.

### Se' wā Skēkōl siwé jcher iWikōl wa

<sup>6</sup>Erē wēpa tkēulewatke darērē Cristo mik, esepa je' éna iane tō tté pakeke sa' tō, e' dōr siwā' iskiē chōkle. Erē e' kē dōr s'ditsō ena iwōkirpa siwā' ese; esepa diché erkewatke. <sup>7</sup>Siwā' pakeke sa' tō, e' dōr Skēkōl siwā' bak blēulewā s'ditsō yöki e'. Kā iaiāē kam kā i' yōr, e' yöki ie' tō ibikeitsbak tō sene michoē olo ta' taiē, e' meraëitō se' a' ie' siwā' wa. <sup>8</sup>Siwā' e' kē ane s'ditsō wōkirpa éna. Ie'pa éna ianúpa, e'ma ie'pa kē wā Skēkēpa Jesús olo ta' taiē e' kōtewa. <sup>9</sup>Erē e' dōr wēs itso' kitule Skēkōl yēkkuō kī es, e' tō ichè: “Ì buaē kē sūle yi wā, i buaē kē tse'ule yi wā, i buaē kē bikeitsule yi wā, ese tso' Skēkōl wā mè wēpa éna ie' dalēr esepa a.”<sup>‡</sup>  
<sup>10</sup>Erē e' kos wā kkachéitō se' a' iWikōl wa. Iwikōl tō iyi ulitane shuyulekettsa sekka dō Skēkōl erbikō iskiē esē.

<sup>11</sup>Se' wikōl tso' se' a, e' è wā ijcher i tso' se' er a. Es nīes Skēkōl Wikōl è wā ijcher i tso' ie' er a. <sup>12</sup>Ie' tō iWikōl mé se' a, e' kueki kē se' kabikeitsōiā wēs s'ditsō kabikeitsō es. Ie' tō iWikōl mé se' a as i buaē kos méitō se' a er bua' wa e' wā ar se' éna. <sup>13</sup>E' kueki kē sa' tō s'wōbla'wēku' kā i' a siwā' tso' ese wa. S'wōbla'wēke sa' tō tté kkaché Skēkōl Wikōl tō sa' a e' wa. Es sa' tō Skēkōl Wikōl iyi e' wā pakeke tté méitō sa' a ese wa.

<sup>14</sup>Wēpa kē a Skēkōl Wikōl ku', esepa a' ie' iyi dōr alīpa iyi, e' kueki ie'pa kē kī ikiane. Nīes ie'pa kē éna iwā ar, tté e' wā arke se' éna Skēkōl Wikōl è wa e' kueki. <sup>15</sup>Erē wēpa a Skēkōl Wikōl tso', esepa éna ie' iyi ulitane wā armi buaē. Erē i wēke ie' tō ie'pa a e' kē wā anuk yi éna. <sup>16</sup>E' dōr wēs itso' kitule Skēkōl yēkkuō kī es, e' tō ichè: “Skēkōl erbikō e' kē jcher yi wā. Kē yi a' ie' pautuk.”<sup>¶</sup> Erē se' eltēpa wā Cristo erbikē tso'.

### Se' kos dōr Skēkōl kanè mésopa

**3** A yamipa, mik ye' bak a' shuā, etā ye' kē a kapakar a' tā wēs s'wēttsēke Skēkōl Wikōl tō esepa tā kapakè es. E' skéie ye' kawōtā kapakōk a' tā wēs ye' kunúpa kapakōk s'tso'ia s'wák dēr sulu dikia ö ala'r tsitsirla kē yöule buaē Cristo tté wa esepa tā kapakè es. <sup>2</sup>Tté wa ye' tō a' wōblao' e' dōr tottola wēs tsu'diō mè ala'rla a es, kam a' a chke darērē katar e' kueki. ¶Erē ikkē tā kam a' a chke darērē katar, <sup>3</sup>a' serkeia wēs s'wák dēr sulu kī ikiane es e' kueki! A' nīppōke, a' ukyërke nī kī taiē, e' wā kiane chē tō a' seriā wēs s'wák dēr sulu kī ikiane es, wēs pē' kē a Wikōl Batse'r ku' es. <sup>4</sup>A' wēlepa tō icheke: “ye' dōr Pablo klé.” A' wēlepa skā tō icheke: “ye' dōr Apolo klé.” A' ttōkeia es, e' wa iwēnewā tō a' dōr wēs pē' kē a Wikōl Batse'r ku' es.

<sup>‡</sup>2:9 Isaías 64.4

<sup>¶</sup>2:16 Isaías 40.13

<sup>5</sup>Etā ichó ye' a tō ¿Apolo dör yi? ¿Pablo dör yi? Sa' dör Skëköl kanè mé-sopa è. Sa' tō Jesús tté buaë paka' a' a, e' batamik a' de erblök Jesús mik. Kanè me' ie' tō sa' böl a kuā'kī kuā'kī, e' wakanewé sa' tō. <sup>6</sup>Jesús tté buaë e' tsá tkéyö a' er a, wes íyi kuatkè es. Apolo tō ikk'óné as italar, erè Skëköl wák tō iwà tala'weke. <sup>7</sup>Yi tō íyi kuatkeke, ñies yi tō ikk'oneke, esepa kè dör ì. Skëköl tō iwà tala'weke, e' dör ibua'ie. <sup>8</sup>Yi tō íyi kuatkeke, ñies yi tō ikk'oneke, esepa dör ñies ème ie' a. Ie' tō iské meraë ie'pa a eköl eköl wes iwakanewekerakitö es. <sup>9</sup>A' dör wes ie' tē es, e' a sa' böl kaneblöke ie' a. Ñies a' dör wes u yörke ie' a es. <sup>10-11</sup>Ie' er buaë ché ye' a, e' wa ime'itö ye' a ichkí tkök-wa wes u yuökwak bua'buwa es. E' ukuöki ta u yuökwakpa skà de ikí yuökmi. U yörke Skëköl a e' chkí tkënewatke e' dör eköl è, e' dör Jesucristo. Kè yi a ichkí kuā'kī tkënuwane. E' kueki se' ulitane eköl eköl kawötā e' kkö'nuk buaë tō wes iwà kī yuekemisö. <sup>12</sup>Se' tō iwà yuèmi orochka wa, inukölchka wa ena ák bua'buwa wa ö iwà yuèmisö kaltak wa, kakö wa ena kuaköl wa. <sup>13</sup>Mik Jesucristo datskene, etā iwërdaë tō is iwà yuésö. E' kèwö ska' ta se' kanè ma'ordaë bö' wa isuöie tō is idir. <sup>14</sup>U chkí tulunewā, e' kī se' tō iwà yué, e' ta e' kè ñanewā bö' a ta esepa a iské merdaë. <sup>15</sup>Erè ì yuésö e' ñanewā, e' ta kanè e' weirdawa. Erè esepa tsatkërdaë bö' yöki, erè kè ì atē ie'pa ulā a wes s'tkòshkar u ñarkewa yöki es.

<sup>16</sup>¿A' kè wā ijcher tō a' wákpa dör Skëköl wé, ie' Wiköl serke a' shua e' kueki? <sup>17</sup>Ie' wé dör batse'r, e' dör a' wákpa. E' kueki e' olo'yéwā yi isie tō, e' ta ese olo'yerawā ie' tō.

<sup>18</sup>Kè a' e' kītō'ukia. A' welepa e' bikeitsö tō a' wā siwā' iskië jcher wes s'ditsö tō ibikeitseke es, e' ta esepa kawötā e' ökwa alijie as siwā' moki jcherwā iwā. <sup>19</sup>Ì dör siwā' iskië s'ditsö a, ese dör alipa ttè

Skëköl a. E' dör wes ie' yëkkuö tō ichè es: “Wépa wā siwā' iskië jcher taië, esepa klö'werawā Skëköl tō iwákpa erbikö s'dakiñoie e' wa wes iyiwak klö'wèwasö shö' wa es.” <sup>20</sup>Ñies ichéitö i' es: “Skëköl wā ijcher buaë tō ì tso' ká i' a, ese siwé jchermi s'wā taië, e' kè dör ìie bua'.” <sup>21-23</sup>Erè a' dör Cristo icha ena Cristo dör Skëköl icha. E' wā kiane chè tō íyi ulitane mé Skëköl tō a' a' kimoie. Ye' ena Apolo ena Pedro, e'pa tso' a' kimuk. E' kīie ta ì kos tköke i'ñe ta, ñies aishkuö ta, s'ser ena s'duöwā, ekkè kos tso' a' kimuk. E' kueki kè a' kàne s'ditsö wele kkeökka taië tō e' dör ibua'ie as s'mi' ikléie.

### Jesucristo ttekölpa tsá, e'pa kanè

**4** Sa' bikeitsö tō sa' dör Cristo kanè mé-sopa. Skëköl ttè bak blëulewā e' wā pakè wërke sa' wöki wes íyi kueblu es. <sup>2</sup>Íyi kueblu kawötā iwakanéuk yësyësë wes iwökir tō iuk patké es. <sup>3</sup>Es idir, e' kueki ima a' tō ö yile skà tō is ye' kaneblöke Cristo a e' bikeitseke, e' kè kī ye' tkine. E' kīie ta ima ye' wák tō ye' kanè bikeitseke, e' kè kī ye' tkine. <sup>4</sup>Ye' er kè wā ye' kkatène, erè kè e' wa yö ichepa tō kè ì sulu ku' ye' kī. Skëkëpa Jesucristo tō ye' shuleraë, ima e' tō ye' bikeitseke, e' è kī ye' tkirke. <sup>5</sup>Mik ie' dene etā silitane shuleraëitö. Ì kos tso' blëulewā se' er a, ñies ì dalërmik se' serke, ese kos kkacheraëitö wöshak silitane wörki. E' kèwö ska' ta se' kos kaneblöke buaë ie' a, e'pa kikerakā ie' tō. E' kueki kè s'kkatar, kam s'shulir kèwö döka e' yöki.

<sup>6</sup>A yamipa, ye' tō ye' wák ena Apolo ché a' a' kimoie as e' wa a' tō iwà saü tō kè a' kàne ì tso' kitule Skëköl yëkkuö kī chétkeyö ñe' dalöseukwā. Kè a' kàne e' ttsòka taië sa' eköl wa ena sa' eköl wöökwa diöshet. <sup>7</sup>¿Wes a' tō ichèmi tō a' dör s'malepa tsata? Ì kos tso' a' wā, ì buaë eri ta' a' wā, wes a' kabikeitsö, e' kos me' Skëköl tō a' a. ¿Íók a' e' ttsòka



taië tö wësua íyi kos e' dë'bitü a' wákpa wa, a' wákpa er wa?

<sup>8</sup>Wësua a' ibikeitseke tö Skëköl siwa' jcher taië a' wa, e' dör wë', kè ì kî kianeia a' kî. A' e' tso' tö a' s'wëttsémitke blu'paie, erë kam sa' dökä ekkë. Moki a' mú s'wëttsémitke blu'paie, e'ma sa' detke a' ta nita s'wëttsuk. <sup>9</sup>Erë ye' a' ta, wësua sa' dör Jesús ttekölpa tsá e'pa méat Skëköl tö s'ditsö malepa bataie. Ye' ittse tö ká ulitane wakpa nies Skëköl biyöchök-wakpa ulitane e'pa tso' sa' weirke e' we-blök. Sa' dör wes s'bolökpa tö s'klö'wéwa tsëmi sulitane wörki ttëwa es. <sup>10</sup>Cristo tté kueki sa' wër aljie, erë a' e' bikeitsö tö a' wa siwa' iskië jcher buaë a' batsule-wa Cristo mik e' kueki. Iyerke tö sa' kè diché ta', erë a' diché ta' taië. A' dalöier'ta' taië, erë sa' kè dalöier'ta'. <sup>11</sup>Dò ikkë ta' sa' tekeia bli tö ersir tö; kè sa' datsi' ta' buaë; pë' tö sa' we'ikeke siarë; sa' wákpa kè wa u ta' senoië; <sup>12</sup>sa' kaneblöke darërëe sa' wák ulà wa dò sa' shtrinewá da'á ekkë. Mik pë' alibchöke sa' kî, etá e'pa a sa' er buaë chöke. Mik ie'pa tö sa' we'ikeke, etá e' dalë'ttseke sa' tö er bua' wa. <sup>13</sup>Mik pë' tö sa' cheke suluë, etá e' iutekene sa' tö tté bua' wa. Dò ikkë ta' ká i' wakpa wa sulu sa' wër. Ie'pa a sa' dör wes ushña uyanettsá ur'ki es.

<sup>14</sup>Ye' kè wa ttè i' kite a' a' jaëwoie, é ye' tso' a' pattök wes iyé éna ila'r dalër ese pattëtö es. <sup>15</sup>Cristo Jesús tté buaë paka' ye' tö a' a' kewe, e' wa a' bätsewa ie' mik. E' kueki moki ye' dör wes a' yé es. A' mú wa s'wöbla'ukwakpa Cristo tté wa tso' dökä 10.000, erë ye' eköl è dör wes a' yé es. <sup>16</sup>E' kueki ye' tö a' pattè tö a' senú wes ye' serke es. <sup>17</sup>E' kueki ye' tö Timoteo patkémi a' ska'. Ie' dör wes ye' wák alà es Skëkëpa wa. Ie' dör ye' ttökata yësyësë dalër taië ye' éna. Wes ye' dör Cristo Jesús mik erblökwa e' ser, e' tté

wa ye' tö ie' icha kos tso' erule erule ká wa'ne, e'pa wöbla'weke. Ttè e' ska' Timoteo tö a' er erane.

<sup>18</sup>A' welepa e' tseka taië tö ibikeitseke tö ye' kè döpa a' ska'. <sup>19</sup>Erë Skëkëpa kî ikiane, e' ta ye' mi'ke a' pakök bet. Mik ye' de etá ye' tö isueraë tö a' wépa e' tseka taië, esepa wa Skëköl diché ta' ö ie'pa kabërke è. <sup>20</sup>Ì blúie Skëköl tso' e' wa wënewá idiché taië e' kî, kè dör ttè è wa. <sup>21</sup>¿Ì kiane a' kî? ¿A' kî ikiane tö ye' dò kësik wa a' uñuk? Ö ¿a' kî ikiane tö ye' dò a' ska' er bua' wa, a' dalëritse wa?

### Sene sulu watöttsasö

**5** Ye' itté tse tö a' shua wëm tso' eköl e' trërke suluë tköka pë' kè tö Skëköl dalöie, esepa tsata. Ie' wa iyé alaköl tso'. <sup>2</sup>Ì sulu e' tköke a' shua, erë e' wa a' e' tso'kekaia taië. E' skéie ¿wes e' kè wa a' jaëne? ¿Wes e' kè wa a' eriane? Warma wëm nê' uya'ttsabak a' tö a' shua. <sup>3-4</sup>Erë ye' wák kè ku' a' ta, erë ye' ttöke wes ye' wák tso' a' ta es. Wëm nê' shulétke ye' tö Skëkëpa Jesús ttö wa wes ye' wák tso' a' ta es. Mik a' nî dapa'uke etá ee ye' tso'ñak a' ta Wiköl Batse'r wa. Nies Skëkëpa Jesucristo diché tso' a' ta. <sup>5</sup>E' wöshá ta wëm nê' wömúttsá a' tö Satanás ulà a' as iwák dër suluë e' wöklör ta iwák tsatkër mik Skëkëpa datskene e' kéwö ska'.

<sup>6</sup>A' e' tso'ka taië sene sulu wa, e' kè dör buaë. ¿Kè a' wa ijcher tö pan wölöwoka elkela tö harinachka kos wölöwéka? <sup>7</sup>Sene sulu e' dör wes pan wölöwoka këchke<sup>s</sup> es, e' tö a' sulu'wekewa. E' kueki ese kos uyöttsá a' shua. Es a' döraë buaë yësyësë kè a' i' sulu ta'ia wes pan yöule kè a' iwölöwoka iëne es. Cristo kótewa se' nu' skéie. Ie' dör wes obeja jcheke Judiowak Yépa Yërulune Egipto, e' kéwö tkö'woie es. E' kueki nermata

**§5:7 pan wölöwoka këchke:** Judiowak wöblar pan wölöwoka tso' ie'pa u a' e' kos uyöktsa Ie'pa Yépa Yërulune Egipto e' kéwö tkö'weketke ie'pa tö e' yöki.

a' batse'oule Skëköl wōa Cristo batamik. <sup>8</sup>Es kè se' kàne Cristo kōtewā se' skéie, e' kēwō tkō'uk pan yöule iwölöwōka wa ese wa. Itkō'üsō pan kè yöule iwölöwōka wa ese wa. E' wà kiane chē tö itkō'üsō kēkraē sene moki yēsüesē ese wa. Kè se' kàne itkō'uk sene sulu tö s'sulu'wēkewā ese wa.

<sup>9</sup>Yēkkuō iēt patkē' ye' tö a' a, e' kī ye' iyē' tö a' kè kàne e' batsök trēr wakpa tā. <sup>10</sup>Erē pē' kè tö Skëköl dalöiē dör trēr wakpa ö iyi kkechök taiē ese wakpa ö akblökwakpa ö iyi diököl dalöiökwakpa, esepa kè chök ye' ku' a' a. Esepa chópa ye' tö, e'ma a' kawōtā duökwa as kè a' e' batsō esepa tā. <sup>11</sup>Wépa yē' ye' tö a' a yēkkuō kī, esepa dör wépa e' chō tö ie'pa erblöke Jesús mik esepa. Erē ie'pa dör trēnukwakpa ö iyi kkechök taiē wakpa ö iyi diököl dalöiökwakpa ö s'chök suluē wakpa ö bloblopa ö akblökwakpa. Kè a' e' batsök esepa tā, nīes kè a' chkök esepa tā. <sup>12-13</sup>Wépa kè dör Skëképa Jesús icha çwes esepa shulēmi ye' tö? Skëköl wák tö ie'pa shuleraē. Erē wépa dör Skëképa icha nī dapa'uke a' tā, esepa kawōtā shulē a' tö. E' kuēkī a' tö iú wes itso' kitule Skëköl yēkkuō kī es, e' tö ichē: “Yi tö ì sulu wamblé, e' uyōttsa a' shua.”

### A' nippöke e' shuló a' wákpa tö

**6** Mik a' wēle tö ì sulu wamblé iyami eköl kī, etā çwes ese mi'ke ie' wā kkatē s'shulökwakpa kè tö Skëköl dalöiē, esepa ska? çIók e' kè shulē a' wákpa dör batse'r e'pa tö? <sup>2</sup>çA' kè wā ijcher tö se' batse'r, e'pa tö ká i' wakpa shuleraē aishkuō tā? E' dör es, e' ta çwes i'ne tā iyi tsitsirla ese è kè shulir a' a? <sup>3</sup>çA' kè wā ijcher tö nīes Skëköl biyöchökwakpa shuleraēsö? Ie'pa shuleraēsö, e' ta çwes a' kè a nippē tso' ká i' kī ese shulir? <sup>4</sup>E' kuēkī a' wēlepa nippöke nīta, e' ta çwes ese mi'ke a' wā shulē pē' bānet ska? <sup>5</sup>I' chéyō a' jaēwoie. Yi a a' shulirmi çese kè ku' a' shua da'a? <sup>6</sup>Erē e' skéie a' mi'ke nī

kkatök s'shulökwakpa kè erblōtā' Jesús mik esepa ska'.

<sup>7</sup>A' nī kkatöke s'shulökwakpa ska', e' è wa iwēnewā tö sene sulu e' alékatke a' kī. Idalē'ttsök bēre çe' kè dör ibua'ie? çAs itō se' iyi ekiblō! <sup>8</sup>Erē e' skéie a' wákpa tö ì sulu nē' wambleke nī tā dō s'yamipa erblöke Cristo mik esepa iyi ekibleke a' tö.

<sup>9</sup>çA' kè wā ijcher tö wépa dör ì sulu wamblökwakpa, esepa kè dōpa ì blúie Skëköl tso' e' a? Kè a' e' kitō'uk. Wépa dör trēnukwakpa, wépa dör iyi diököl dalöiökwakpa, s'senewābak dalöseukwā wakpa, wépa trēr wépa tā, alakölpā trēr alakölpā tā, esepa kos kè dōpa ì blúie Skëköl tso' e' a. <sup>10</sup>Nīes wépa dör akblökwakpa, wépa dör iyi kkechök taiē wakpa, bloblopa, s'chök suluē wakpa, esepa kos kè dōpa ì blúie Skëköl tso' e' a. <sup>11</sup>A' wēlepa bak senuk iyi ekkē wamblök, erē Skëköl tö a' pakōa'bak, a' batse'ō'bak, a' klö'ō'bak wes pē' buaē yēsüesē es iWiköl wa Skëképa Jesucristo ttō wa.

### Skëköl kè wā se' tsatkēne as se' tö ì sulu wamblöia

<sup>12</sup>A' wēlepa tö icheke: “se' wā kawō tso', ì kos kiane wē se' kī, ese woie.” Erē ye' ichē tö kè ì ulitane dör buaē se' a wē. Ye' wā kawō tā' ì ulitane woie, erē kè ye' e' müpattsā as ilē e' alōka ye' kī. <sup>13-14</sup>A' wēlepa tö icheke: “chkè dör s'nawi a, nīes s'nawi dör chkè a.” E' yēne erē aishkuō tā iyi böt nē' ewerawa Skëköl tö. Erē s'chkà kè dör trēnoie. Skëköl tö s'chkà shkē'werakane aishkuō tā idiché taiē wa wes ie' tö Skëképa Jesús shkē'ō'kane es. E' kuēkī s'chkà kè meneat trēnoie wes a' tö ibikeitseke es, imeneat ì buaē woie Skëképa a, nīes ie' tö s'chkà kkō'neke.

<sup>15</sup>çA' kè wā ijcher tö se' batsulewā Cristo mik, e' kuēkī se' chkà dör etkè ie' chkà tā? E' dör es, e' tā çwes se'

tò s'chka dör Cristo icha e' ia'wèmika senukka alaköl sulusi ta ese wa? jKè se' kàne e' ia'ukka yès! <sup>16</sup> ¿A' kè wà ijcher tò mik yi sené alaköl sulusi ta, e' ta ie'pa bøl mía wés wák eköl è es? E' dör wés itso' ki-tule Skèköl yèkkuò kì es. E' tò wèm ena ilaköl e' ché i' es: "Ie'pa bøl serdaè ñita ta ie'pa mía wés wák eköl è es."\*\* <sup>17</sup> Eré yi batsulewà Skèkèpa Jesús mik, ese dör wés wák eköl è es ie' ta.

<sup>18</sup> E' kuèkì a' tkòshkar trè yòkì. Sene sulu skà kos, e' kè tò s'chka dalösewèwà wés trè es. Mik se' trërke, età s'chka dör Cristo icha, e' méttasò o'ka kè dör Cristo icha, ese a. E' wa s'wák chka dalösewèwasò. <sup>19-20</sup> ¿A' kè wà ijcher tò a' chka dör Wiköl Bats'e' e' wé? Skèköl tò iWiköl mé a' a, e' tso' a' a. Ie' tò a' t'ò'ttsabak, e' ské dör darèrèè. A' kè dör a' wákpa icha, a' dör ie' icha. E' kuèkì a' ké senuk yèsyèsè as ie' kíkarka.

### Se' serwà ñita e' pakè

**7** Ì chaki' a' tò ye' a' yèkkuò kì, e' wà iuteke ye' tò i'ñe. A' tò ye' a' ichaki' tò ¿buaè idör tò se' kè serwà alakölpa ta? <sup>2</sup> Eré ye' ichè a' a' tò taiè trè tso', e' yòkì a' kos maso tsúwà eköl eköl. <sup>3</sup> A' wèpa kos kawötà senuk ilaköl ta, es ñies a' alakölpa kos kawötà senuk iwèm ta. <sup>4</sup> Alaköl chka kè meneat ie' wák è a, e' meneat ñies iwèm a. Es ñies iwèm chka kè meneat ie' wák è a, e' meneat ñies ilaköl a. <sup>5</sup> Ie'pa kè kàne ichka kkèuk ñi yòkì. Eré ie'pa kawò mé ñi a' e' batsòktsà ñi yòkì ekuölò è ttoie S'yé ta, e' ta e' è dalewa kè ie'pa ñi köpawà. Mik kà e' tka, età ie'pa ñi kówane dö' Satanás tò ie'pa erkiöwè trènu, kè ie'pa diché dè'ka e' kkö'nuk e' kuèkì. <sup>6</sup> Eré ye' kè ku' a' a' ichök tò a' kawötà ñi batsòktsà ñi yòkì es, a' kì ikiane, e' ta a' tò iwèmi es. <sup>7</sup> Ye' a' ta sulitane mú dör wés ye' es, kè alaköl

ta'. Eré Skèköl tò imé sulitane a' kuà'kì kuà'kì ñi kimoie.

<sup>8</sup> A' wèpa tso'ia' ekörla ñies a' wèpa dör schó, esepa a' ye' ichè tò buaè idör tò ie'pa mú ser kekraè ekörla wés ye' es. <sup>9</sup> Eré ie'pa kè e' kkö'nuku' trè yòkì, e' ta ie'pa mú maso yulòne senowaie. S'serwà e' dör bua'ie maso kkechekesò ñiè e' tsàta.

<sup>10</sup> A' wèpa senewabak, esepa a' ye' tò ttè dalöièno i' meke: a' kè kàne ñi ökwa. Ttè e' kè dör ye' ttè, e' mé Skèkèpa Jesús tò se' a. Alakölpa kè kàne iwèm ökwa. <sup>11</sup> Eré ie' tò iéwa, e' ta ie' kè kàne senuk-wà wèm o'ka ta, ie' kawötà senuk ekörla kè wèm ta'. Ie' kè senak es, e' ta ie' ké er bua'ukne iwèm kì. Ñies wèpa alaköl ta', esepa kè kàne ilaköl ökwa.

<sup>12-14</sup> A' malepa senewabak, eré e' maso kè erblöta' Jesús mik, esepa a' ttè dalöièno kè meneat Skèkèpa Jesús wà. Eré esepa a' ye' ichè tò a' masopa kè arwa. Iwèm kè erblöta' Jesús mik, isalema e' tsatkèrmi ilaköl olomik. Ñies alaköl kè erblöta' Jesús mik, isalema e' tsatkèrmi iwèm olomik. Ie'pa ñi éwa, e' ta ie'pa ala'r dör wés pè kè erblöta' Jesús mik esepa ala'r es, ie'pa tsatkè e' dör darèrè. Eré iyé ena imì serke ñita, kè ñi anewa, e' ta isalema ie'pa tsatkèrmi iyé ò imì olomik. E' kuèkì ye' ichè tò a' maso senakia' a' ta, e' ta kè iarwa. <sup>15</sup> Eré a' maso kè erblöta' Jesús mik, e' éna a' akwa kró wa, e' ta kè iwöklö'war a' kè klöulewà iulà a. Eré Skèköl tò se' klö'bak senuk bèrè ñita. <sup>16</sup> E' kuèkì ibua'ie dör tò a' sermiia bèrè ñita. A' wèm ¿ì tò be' a' ichök tò be' alaköl kè tsatkèrpa be' olomik? A' alaköl ¿ì tò be' a' ichök tò be' wèm kè tsatkèrpa be' olomik?

<sup>17</sup> E' dör wés ttè wa ye' tò Skèkèpa Jesús icha erule erule e'pa ulitane wöbla'weke kà wa'ñe es. Ye' tò ie'pa a' ichè tò wés a' ku' Skèköl tò mik a' klö'itò iwák a' età, es a' atù' bër. Ie' tò ieri mé a' a

\*\*6:16 Génesis 2.24

seno eköl eköl es. <sup>18</sup> Wëpa tottola kkuölit tēule tsir, mik ie'pa klōō' Skëköl tō iwák a etā, esepa kè kàne e' mane'ukne wës. Es ñies wëpa kè wakyöule es, mik Skëköl tō ie'pa klōō' etā, esepa kè kàne e' wakyuök. <sup>19</sup> Se' wakyöule ö kè se' wakyöule e' ska' Skëköl kè tkine yës. Ie' ttè dalöiëno, e' dalöiekesö, e' je' kī ie' tkirke. <sup>20</sup> A' kos e' tsūat wes a' dör mik ie' tō a' klōō' iwák a etā es. <sup>21</sup> Mik ie' tō a' klōō', etā za' klöule-wā kanè mésoie? e' ta' kè a' tkinuk e' kī. Erè a' a' kawō tso'ia e' yöktsa e' ulā a, e' ta' a' e' yóttsa. <sup>22</sup> Mik ie' tō a' klōō', etā a' klöulewā kanè mésoie, e' ta' e' yé'ttsa ie' tō sene sulu ulā a kanebloie Skëképa Jesús a. Es ñies mik Skëköl tō a' klōō', etā a' kè dör kanè méso ñe'se, e' ta' e' klōō' Cristo tō ie' wák kanè mésopaie. E' kuekī a' klöulewā kanè mésoie, e' ta' kè a' tkinuk e' kī. <sup>23</sup> Skëköl tō a' to'ttsabak, e' kuekī kè a' e' tiukne yile skā ttè dikīa. <sup>24</sup> A' yamipa, wës a' ku' Skëköl tō mik a' klōō'itō etā, es a' atū bër. A' senú buaë yësyësë ie' a, sene me'itō a' a e' a.

<sup>25</sup> Ima a' tō ye' chaki' yëkkuö kī wëpa tso'ia ekörla, esepa kī, e' iuteke ye' tō i'ñe. Ese ttè kè mène ye' a Skëképa Jesús wā. Erè ima ibikeitsyö, e' chekeyö a' a. Skëköl ye' sué er siarë wa e' wa ieri méitō ye' a iwā jchenowā buaë. E' kuekī i chekeyö e' mik a' erblömi. <sup>26</sup> Iñe ta' se' serke kawō darërë a, e' kuekī ye' a ta' buaë idir tō se' kos e' tsūat wës s'tso' es. <sup>27</sup> Wëm senewābak, ese kè tō ilaköl ökwa. Wëm duriā ekörla, ese tayë kè yular. <sup>28</sup> Erè wëm senéwā, e' ta' buaë idir. E' wa ie' kè wā i sulu wamblëne. Ñies alaköl kam serwā, ese senéwā, e' ta' e' dör buaë. E' wa ie' kè wā i sulu wamblëne. Erè wëpa senewābak, esepa we'ikëmi ká i' kī s'weirke ese tō tkòka wëpa kè senewābak esepa tsata. E' yökī ye' éna a' tsatkak, e' è kuekī ye' ichè tō buaë idir tō a' ser ekörla.

<sup>29-31</sup> A' yamipa, ye' ichè tō kè se' a kawō ta'ia taië. Wes ká i' dör i'ñe ta' e' erkewatke. E' kuekī i'ñe ta' ena kekraë kè

se' kàne senukīa er me'rie i' tso' ká i' kī ese kī. Se' senewābak, esepa kè er mukwā e' kī. Se' iuke siarë, esepa kè er mukwā e' kī. Ñies se' ttsë'rke buaë, esepa kè er mukwā e' kī. Se' tō i' tuë ta', esepa kè er mukwā i' tso'rak iwā ese kī. Se' serke buaë i' tso' ká i' kī ese mik, esepa kè er mukwā ese kī.

<sup>32</sup> Ye' kī ikiane tō a' mú ttsë'r buaë, kè tkir i' kī. Wëpa serke ekörla, esepa wā kawō tso' kibiie Skëköl iyi sauk ena i' wër buaë ie' wa ese uk. <sup>33</sup> Erè wëpa senewābak, esepa kawōta i' tso' ká i' kī ese sauk as iwër buaë itayë wa. <sup>34</sup> Es ie'pa kī iyi böt kané tso'. Es ñies alakölpa dör schó ena busipa wëm kè ta', esepa wā kawō tso' kibiie Skëköl iyi sauk. Ie'pa e' mumittsa senuk batse'r. Erè alakölpa senewābak, esepa kawōta i' tso' ká i' kī ese sauk as iwër buaë iwëm wa. <sup>35</sup> Ttè ekkë chéyö a' kimoie, kè dör a' wöklö'woie. Ye' kī ikiane tō a' ser buaë yësyësë Skëköl è a, kè wötkeku' i' tō.

<sup>36</sup> Wëpa ttè meuletke tayë a senukwā, esepa wele tō ibikeitsè: "Tayë duëswö detke senowā, ñies ye' kè a seneia ekörla. Bua' idir ye' a senukwā ie' ta'", e' ta' esepa a ye' ichè tō a' senakwā, e' ta' a' senúwā, e' kè dör suluë. A' senúwā. <sup>37</sup> Erè wëpa ttè meuletke tayë a senukwā, erè esepa kè éna senakwāia, e' ta' esepa a ye' ichè tō e' dör buaë tō a' kè serwā. Erè a' kawōta ibikeitsökwa bua'iewā kewë tō a' wákpa er wa a' kè senakwā. Ñies a' kawōta isauk buaë tō kè yi ku' a' a' ichök tō kè a' senukwā. A' tō ibikeitsétke tō a' senak ekörla kekraë, e' ta' bua' idir tō a' kè serwā. <sup>38</sup> Es ye' tō ichè tō wëpa senéwā, esepa tō iwé buaë. Erè wëpa kè sene'wa, esepa tō iwé bua'ie.

<sup>39</sup> Alaköl senewābak, e' kawōta senuk iwëm è ta' dō mik iwëm blënewā etā. Iwëm blënewā e' ta' ie' serwamine wëm o'ka ta'. Erè ie' kawōta senukwā wëm erblé Skëképa mik ese è ta'. <sup>40</sup> Erè ye' ichè tō bua' idir ie' a tō ie' mú ser ekörla, kè senewane. E' tō ie' ttsë'weraë buaë shüte.

Ye' tō iklō'wé tō ye' a Skëköl Wiköl tso' nïes, e' kueki ye' tō a' a ichè es.

### Iyiwak jchëule íyi diököl tso' dalöiè ese a, e' pakè

**8** Chkè meule íyi diököl tso' dalöiè ese a, ese ki a' tō ye' a ichaki' yëkkuö ki, e' iutekeyö i'ñe.

Ima a' tō íyi diököl ñe'se ché, e' dör moki e' jcher se' wa. Erë kè a' éna ichökwa tō se' wa íyi jcher, e' tō se' kèmi e' ttsökka taië s'malepa ki. Erë s'malepa dalëritsekësö, e' tō ie'pa diché kí ieraë. <sup>2</sup>Yi e' bikeitsò tō ie' wa íyi jchertke taië, e' wa iwënëwä tō kam ie' wa ijcher wes ikawötä jchenuk es. <sup>3</sup>Erë yi tō Skëköl dalëritseke, ese mik ie' bätse buaë.

<sup>4</sup>Chkè meule íyi diököl tso' dalöiè ese a ese katèsö, e' ki a' tō ye' a ichaki'. Se' wa ijcher buaë tō íyi diököl ñe'se wák kè tá', e' kueki kè idör iie bua'. Skëköl chökke, e' dör eköl è. <sup>5</sup>Pë' kè tō Skëköl dalöiè, esepa tō iklō'wé tō ì dalöiekerakitö, esepa tso' taië serke ká jai a ö ká i' a. Esepa kíerakitö kéköl ö skëképa. Moki esepa tso', <sup>6</sup>erë Skëköl dalöieke se' tō, e' dör Skëköl eköl ème e'. Ie' dör S'yé. Ie' dör íyi ulitane wì, nïes se' tso' ie' è a. Nïes Skëképa dör eköl è, e' dör Jesucristo. Íyi ulitane tso' ie' mik, nïes se' tso' ie' mik.

<sup>7</sup>Erë kè s'yamipa ulitane éna iwà ane buaë tō íyi diököl tso' dalöiè, ese kos kè wà tá'. Ie'pa bak íyi diököl ñe'se dalöiök, e' kueki e' tso'ia' ie'pa er a dò ikkè tá. Mik ie'pa tō chkè meule íyi diököl a, ese katé, eta e' ki ier tō ikkaté. Ie'pa diché kè dë'ka ierbikò es, ese wöklö'woie. E' kueki ie'pa tō ittse tō iianekane ñáie. <sup>8</sup>Se' bats Skëköl mik e' kè dör chkè wa. Ì katekesö ö ì kè katèsö e' kè a se' onuk buaë ö suluë ie' wöa. <sup>9</sup>E' jcher a' wa, e' kueki a' tō iklō'wé tō chkè kos katèmi a' tō. E' yène, erë a' e' kkö'nú as kè a' ukuömik s'yamipa kam éna iwà ar buaë, esepa ardöne sene sulu a. <sup>10</sup>Ichòsö tō be' éna iane buaë, e' mía e' tkëser chkè meule íyi

diököl a, ese katök iwé a. Erë e' dalewa s'yami kam éna iwà ar buaë ese eköl tō be' sué chkök tá e' tō ie' erkiöwéka tá imía tá ikatéitö nïes. <sup>11</sup>Be' tō iwé es, e' tá e' wa be' tō se' yami, kè diché dë'ka wë', e' émine sene sulu a tá isulurdawa be' ukuömik. Ie' dör s'yami, nïes Cristo e' mettsa ttëwä ie' skéie. Be' tō iwé es, e' tá be' tō ì sulu wamblé s'yami ki. <sup>12</sup>Se' tō s'yamipa kam éna iwà ar buaë, esepa ki ì sulu wamblé es, e' tá nïes se' tso' ì sulu wamblök Cristo ki. <sup>13</sup>E' kueki ye' ichè tō s'yami wele armine sene sulu a ye' ukuömik, iyiwak chkä katéyö e' kueki, e' tá kè ye' tō ikatepaiane.

### Pablo tō ikanè tsätké

**9** ¿Wes a' tō ibikeitsëmi tō ye' kè a kawö tá' ì woie wes ye' ki ikiane es? Wësua a' tō ibikeitseke tō ye' kè dör Jesús ttekölpa tsá e'pa eköl. Erë ye' tō Skëképa Jesús s' ye' wák wöbla wa, e' kueki moki ye' dör ie'pa eköl. A' dör ye' kaneblöke Skëképa a e' wà. <sup>2</sup>A' wakpa ki iwënëwä tō moki ye' dör Jesús ttekölpa tsá e'pa eköl. O'kapa tō ichèmi tō ye' kè dör es, erë e' kè yënuke a' a.

<sup>3</sup>Wépa tō ye' ché es, esepa yöki ye' e' tsätköke i' es. <sup>4</sup>¿Wes a' ibikeitsëmi tō wépa wöbla'wekeyö, esepa kè kawötä ye' kímuk inuköl wa chkoie di' yoie? <sup>5</sup>Nïes ¿ima a' ibikeitsè tō ye' kè a kawö tá' senukwä tayë erblöke Jesús mik ese tá tsëmi e' tá wes Jesús ttekölpa malepa ena Jesús élpa ena Pedro e'pa tō iweke es? <sup>6</sup>¿Ima a' ibikeitsè tō ye' ena Bernabé, sa' böle kè kawötä kaneblök sa' wákpa ulä wa e' kkö'noie? <sup>7</sup>¿Wé a' wa isuule tō ñip-pökwakpa mi'ke, erë iwákpa e' kkö'nuke ichkè wa idi'yé wa? ¿Wé a' wa isuule tō iyiwö tkèsö, erë kè sò iwà katépa? ¿Wé a' wa isuule tō yi tso' chibo kkö'nuk, erë ese kè tō chibo tsu'diö yepa? <sup>8-9</sup>¿Chök ye' tso' a' a, e' kè bikeitse s'ditsö è wa, nïes itso' kitule Moisés ttè dalöiëno ki, e' tō ichè i' es: “Baka wë'ne tso'

kanebloie trigo wöttsoie, e' kè kawö ta' kkò payuèwà itso' kaneblök e' dalewa as trigowö katòitö." ¿Ima a' ibikeitsè? ¿Ttè dalöièno e' me'at Skèköl tö baka wè'ne è kkö'noie? <sup>10</sup> Au, ie' tö ime'at se' a' ñies. Wépa tö iyiwö tkeke ena wépa tö ishteke, esepa tö iwakanewéke ie'pa tö iwö kak paneke e' kueki. <sup>11</sup> Es ñies sa' tö Wiköl Batse'r íyi tsá paka' a' a, e' dör wes iyiwö tkèsö es, e' kueki kè idör suluè tö a' tö sa' kimù i tso' a' wà ese wa, e' dör wes iyiwö shtekesö es. <sup>12</sup> A' wöbla'ukwakpa skà e' kkö'nuk a' kawöta, e' yita' buaè a' kawöta sa' kkö'nuk.

Erè e' wà kè kine sa' wà a' a. Mik sa' bak a' ska', età sa' kè wà a' íyi kàne e' kkö'noie. Sa' kaneblè' sa' wákpa ulà wa e' kkö'noie. E' dör darèrè sa' a, erè e' kos dalè'ttsè' sa' tö as kè i tö a' wöklö'ù Cristo ttè buaè e' klö'uk. <sup>13</sup> A' wà ijcher tö wépa kaneblöke Skèköl wé tso' Jerusalén e' a, esepa serke i kanewéke ie'pa tö ese mik. E' wà dö tö iyiwak jcheke ie'pa tö ka' tso' imokà Skèköl a e' ki, ese chkà kak tsekeat ie'pa tö katè. <sup>14</sup> Es ñies Skèképa Jesús tö iyè'at tö wépa kaneblöke ie' a ittè buaè pakök, esepa serdaè kanè e' mik. <sup>15</sup> Erè ye' kè wà íyi ikkè kine a' a yès. Ñies ye' kè ku' i' chök a' a as a' tö ye' a imù. Ye' tö Jesús ttè buaè pakeke éme, e' tö ye' ttsè'weke buaè shüte. E' kè yepattsà yi tö ye' ulà a. Ye' a ta' buaè idir tö ye' duöwà, erè ye' kè tö a' ulà a i klö'wepa.

<sup>16</sup> Erè ye' patkèule Jesús ttè buaè pakök, e' kueki e' wa ye' kè a e' tsènuikka yès. Ye' kawöta iwà pakök. Ye' kè tö ipakè, e' ta' iwèstela ina ye' ta! <sup>17</sup> Ipakó-payö ye' wák er wa, e'ma ye' wà kawö ta' s'ña'woie iki. Erè kanè e' me'at Skèköl tö ye' ulà a, e' kueki ye' kawöta ipakök. <sup>18</sup> E' dör es e'ma ¿i dör iské ye' a? Ye' ttsè'ne buaè ipakök éme e' dör iské ye' a. E' wà kiane chè tö eré ye' wà kawö ta' senuk

ye' kanè e' wa, erè e' kè ki ye' s'ña'wèku' yès. E' tö ye' ttsè'weke buaè shüte.

<sup>19</sup> Eré ye' kè dör yi kanè méso, erè ye' e' mettsà sulitane kanè mésoie as kos ie'pa erblömi Jesús mik, ekképa dö erblök imik. <sup>20</sup> Mik ye' tso' judiowak shua, età ye' serke wes sa' judiowak ser Moisés ttè dalöièno dikia es as ie'pa erblö Jesús mik. Eré ye' kè ku'ia Moisés ttè dalöièno e' dikia, erè mik ye' tso' ie'pa shua, età idalöiekeyö as ie'pa erblö Jesús mik. <sup>21</sup> Es ñies mik ye' tso' pè' kè dör judiowak esepa shua, età ye' serke wes ie'pa ser es as ie'pa erblö Jesús mik. (Erè kè i sulu wambleku'yö. E' wà dör tö eré ye' kè ku'ia Moisés ttè dalöièno e' dikia, erè ye' tso'ia Skèköl ttè dalöièno e' dikia, ye' tso' Cristo ttè dikia e' kueki.) <sup>22</sup> Mik ye' tso' s'yamipa kam éna Jesús ttè wà ar buaè, esepa shua, età ye' serke wes ie'pa ser es, as ye' a ie'pa kimer as ie'pa éna iwà ar buaè. Es mik ye' tso' pè' shua età ye' serke wes ie'pa es as wes alè ie'pa welepa tsatkèr. <sup>23</sup> I kos wekeyö e' dör Jesús ttè buaè ki shköwoie as iwà döñak ye' ulà a.

<sup>24</sup> A' wà ijcher tö mik se' turke tseè isuöie tö wé e' alömi, età iturkerak seraa, erè eköl è e' alömi, ese ulà a iské doraè. E' sù a' senú Skèköl a buaè as iské dö a' ulà a wes wé e' alé ese ulà a iské de es. <sup>25</sup> Tunukwakpa ulitane e' kkö'nuke, e' yuöke kekraè e' aloka imalepa ki. I kos tö ie'pa wöklö'wèmi, e' olo'yeke ie'pa tö. E' kos weke ie'pa tö as kal kò yuekerakitö wöshkie<sup>††</sup> tkèka iwökir ki, ese dö ie'pa ulà a ie' alérak e' skéie. Iské e' chklörta'wà, erè se' iyuleke, e' dör yöbiè kè chklörta'wà. <sup>26</sup> Ye' serke Skèköl a wes yi tur e' aloka ese es, kè dör wes tunukwak turke éanas ese es. Ye' kè dör wes ñipökwa tö iulà tsini uyeke é siwa' ki, kè wà ta' ese es. <sup>27</sup> Ye' e' wöklö'uke darèrè, ye' chkà kekeyö kèsik wa as tö iù wes

<sup>††</sup>9:25 *kal kò yöule wöshkie*: E' merke tunukwakpa e' alé esepa a, e' kkecheke ie'pa tö taiè. Wé ki itkènekà ese wák dalöièrta' taiè.

Skëköl kî ikiane es. E' wekeyö es dö' ye' s'patté tajë Skëképa ttè wa, erë ye' wák kè ulà a iské dö.

**Kè a' minuk íyi diököl dalöiè ese wé a**

**10** A yamipa, ye' kè kî ikiane tö a' éna ichöwa tö ì bak se' yamipa bak ká iaiäë Moisés kéwö ska' e'pa ta. Ie'pa kos wëttse' Skëköl tö mò àr tajë e' wa. Nïes Skëköl diché wa ie'pa kos bak-tsa klò wa dayë kiè Dayë Mat, e' shua kè nune'ka dayë wa. <sup>2</sup>E' dör wes ie'pa wösunerak mò a éna dayë a es iwà kka-choie tö ie'pa batsulewá Moisés mik. <sup>3</sup>Es nïes chkè mé Skëköl wák tö ie'pa a, e' è ñé ie'pa ulitane tö. <sup>4</sup>Nïes di' mé ie' wák tö ie'pa a, e' è yé ie'pa ulitane tö. Di' e' döwéttsaitö ákkuö a. Ákkuö e' tö Cristo wà ché, e' mir ie'pa ta kékraë ikimukrak. <sup>5</sup>Erë ie'pa kibiiepa kè wër Skëköl wa buaë. E' kuekî ie'pa kibiiepa durulune, nu atë tkëter ká wa'ñe ká sir poë e' kî.

<sup>6</sup>E' kos tka ie'pa ta se' a iwà kkachöie tö kè se' kàne ì sulu kkechök wes ie'pa tö ikkeyé' es. <sup>7</sup>Se' kè kàne íyi diököl dalöiök wes ie'pa welepa tö idalöiè' es. Ì wamblé' ie'pa tö e' tso' kitule Skëköl yëkkuö kî. E' tö ichè: "Ie'pa e' tuléwá chkök di'yök tajë buaë íyi diököl dalöioie. E' ukuökî ta ie' kékarak klötök trënuK ì sulu wamblök tajë e' ttsé'wókarak buaë." <sup>8</sup>Kè se' kàne trënuK wes ie'pa welepa trënerak es, e' nuí kî ie'pa tajë e'pa durulune ká etkè a döka 23,000. <sup>9</sup>Kè se' kàne Cristo wönatkök ì sulu wa wes ie'pa welepa iwönatké' es, e' nuí kî ie'pa kötulur tkabè wa. <sup>10</sup>Kè se' kàne kköchökka Skëköl wöa wes ie'pa welepa kköyë'ka es, e' nuí kî S'ttökulurwak tö ie'pa kötulur.

<sup>11</sup>Íyi ekkè kos tka s'yamipa bak ká iai-aë, e'pa ta iwà kkachöie se' a tö se' kè kàne ì sulu wamblök wes ie'pa es. E' kos kiteat Skëköl yëkkuö kî se' serke i'ñe ta ká i' erkewatke e' kéwö ska', esepa a ikka-

choie tö wépa tö Skëköl watéttsa, esepa weirdaë inuí kî.

<sup>12</sup>A' welepa e' bikeitsò tö "ye' e' tkéwa darërë Jesús mik, kè ye' arpamine ì sulu a." Ese wakpa kawöta senuk erki as kè iarmine ì sulu a. <sup>13</sup>Se' erkirke ì sulu wamblök, ese kos tköke sulitane ta. Erë Skëköl ttò mokjè, ie' kè tö se' mepattsa tö ì sulu tö se' erkiowè tajë shute kè se' a iwöklör ekkè. Mik se' erkiowéke ì sulu tö, etá ie' tö se' a ikkacheraë wes se' tkòshkarmi iulà a as se' a iwöklör.

<sup>14</sup>A yamipa, a' dalër tajë ye' éna, íyi diököl tso' dalöiè ese kos yöki a' tkóshkar bánet. <sup>15</sup>A' kabikeitsò buaë, e' kuekî ì chekeyö a' a, e' bikeitsó ta a' isueraë tö mokië idir. <sup>16</sup>Mik se' ñi dapa'uke Cristo kötewá e' kéwö tkö'uk, etá wëstela chèsö Skëköl a vino yekesö ñita tka' etkè a e' kî. Vino ñé' tö ie' pé tène tajë s'tsatkoie e' wà chè. E' wa se' kos tso' batsulewá ie' mik. Nïes pan etö è blatesesö ñi a e' ñekesö ñita. E' tö ie' chkà wà chè. E' wa se' kos tso' batsulewá ie' mik. <sup>17</sup>Se' dör tajë, e' kos tö pan etö è e' ñeke, e' kuekî se' kos dör wes wák eköl è es.

<sup>18</sup>Ì weke Israel aleripa tö e' wà bikeit-só. Mik ie'pa tö iyiwak jcheke ka' tso' imoka Skëköl a e' kî, etá wépa tö ese chkà kak kateke, esepa kos tso' ie' dalöiök ñita. Es nïes a' mi'ke íyi diököl dalöio wé a, ta chkè meule íyi diököl a, ese kak katé a' tö, e' ta a' tso' idalöiök ie'pa ta ñita. <sup>19</sup>E' wa ye' kè ku' ichök tö íyi diököl ese ena chkè meule ia ese diché ta'. <sup>20</sup>Au, kè idör es. Ye' tso' ichök tö pé' kè tö Skëköl dalöiè esepa tö iyiwak jcheke mè íyi diököl a, ñermata e' meule aknamapa a, kè meule Skëköl ichök e' a. Ye' kè kî ikiane tö a' e' tiü aknamapa íyi shua yës. <sup>21</sup>A' kè a Skëképa Jesús tka' ena aknamapa tka' e' wà yanuk ñita. A' kè a Skëképa chkè ena aknamapa chkè katanuk ñita. <sup>22</sup>Iwësö es, e' ta

s'tso' Skëkëpa tsiriuk as isibirka s'ki. Ie' uluneka s'ki, e' ta ¿wes e' dalë'ttsërmi sia?

### Ì kos ú Skëköl è kíkoka

<sup>23</sup> A' welepa tò icheke tò "se' wà kawö tso', ì kos kiane se' kî wè, ese woie." E' yène erè kè ì ulitane e' dör buaë se' a wè. Ì kos kiane se' kî wè, e' wëmisö, erè kè ì ulitane a syamipa er diché iënuuk. <sup>24</sup> Se' kè kàne tkinuk se' wák è kî. Ñies s'kawöta tkinuk s'malepa kî.

<sup>25-26</sup> Skëköl yëkküò tò ichè: "Ká i' ena íyi kos tso' iki, e' dör Skëköl icha."<sup>¶</sup> E' kuekî iyiwak chkà watorke iwé a, ese kos katëmisö. Kè iwà chakar tò imeule íyi diököl a ö au as s'er kè tò s'kkatò iki.

<sup>27</sup> Yi kè erblöta' Jesús mik, ese eköl tò a' wele kié chkök ie' ta, ta a' shkak, e' ta a' yú. Ì kos wà a' dëne e' kató bèrè kè ichakar as a' er kè tò a' kkatò iki. <sup>28</sup> Erè o'ka tò a' a' iché: "Iyiwak chkà se meule íyi diököl a", e' ta kè ikatar ie' dalërmik, ñies erbikè dalërmik. <sup>29</sup> Ye' tso' ie' erbikè chök, ye' kè ku' a' erbikè chök.

Ye' a' kawö ta' iyiwak chkà ulitane katök, ¿wes e' kè katepayö, imène sulu o'ka kî e' è kuekî? <sup>30</sup> Ì kateke ye' tò, ese kî ye' tò wëstela cheke Skëköl a, e' ta ¿wes e' sulurmi o'ka yöki? ¿Wes e' kî ie' tò ye' chëmi suluè?

<sup>31</sup> E' kuekî ì kos yekesö, ñekesö, ñies ì kos wëkesö, e' üsö as Skëköl kíkarka.

<sup>32</sup> A' senú wösh wa as kè yi wöklör a' ukuömik. Judiowak idir ö kè idör judiowak ö wépa dör Skëköl icha ese idir, ese kos kè wökl'war. <sup>33</sup> A' senú wes ye' serke es. Ye' wák e' ché senuk këkraë as e' wër buaë sulitane wa. Ye' kè tkirku' ye' wák kî. Ye' tkirke sulitane kî ie'pa kimoie as itsatkërdak.

**11** A' senú wes ye' serke es. Ye' serke wes Cristo ser es.

### Wes alakölpa kawöta e' uk mik se' ñi dapa'uke eta

<sup>2</sup> Këkraë a' er arke ye' ska. Ñies ì kos wa ye' tò a' wöblao', e' wekeia a' tò. E' kuekî ye' tso' a' kíkökka. <sup>3</sup> Erè ye' kî ikiane tò a' wa ijcher tò Cristo dör wépa dör ie' icha esepa kos wökir. Ñies wëm dör alaköl wökir. Ñies Skëköl dör Cristo wökir. <sup>4</sup> Mik a' ñi dapa'uke ttök Skëköl ta, eta a' wépa welepa ttöke ie' ta ö ilè chekerakitö ie' ttekölie ta iwökir pabakekewaitö, e' ta e' wa yi dör iwökir e' dalösewëkewaitö. <sup>5</sup> E' skéie kè dör es alakölpa a. Ie'pa ttöke Skëköl ta ö ilè chekerakitö ie' ttekölie, kè wökir pabakulewa, e' ta e' wa ie'pa tò yi dör iwökir e' dalösewéwa. Ie'pa dör wes alakölpa tsà tò dabebe esepa es. <sup>6</sup> Alaköl wele kè éna iwökir pabakakwa, e' ta ese mú tò itsà tèe wes wëm es. Erè e' dör jaë taië ie' a. E' kuekî buaë idir ie' a tò iwökir pabaköwa. <sup>7-9</sup> Skëköl tò wëm yö' wes ie' wák es, e' kuekî wes ie' dör e' wërke wëm kî. E' kuekî wépa kè kàne iwökir pabakökwá mik ittöke ie' ta e' dalewa. Erè alaköl dë'ka wëm wa, e' kè dör tò wëm dë'ka alaköl wa. Ñies alaköl yöne wëm kuekî ikimoie, e' kè dör tò wëm yöne alaköl kuekî. E' kuekî wes wëm dör e' wërke alaköl kî. <sup>10</sup> E' kuekî alakölpa ké e' wà kkachök iwökir pabakéwa wa. Ñies ie'pa ké e' uk Skëköl biyöchökwakpa kuekî. <sup>11</sup> Erè alakölpa ena wépa batsulewa Skëkëpa mik esepa kè meneat ulawa ulawa ñi yöki. E' skéie imeneat ñi kimumk ñi dalöiök. <sup>12</sup> Mokî tò alaköl tsá dë'ka wëm tsá wa. Erè ñies e' ukuökî ta wépa ulitane kurke alaköl wa. Erè se' kos ena íyi kos, e' dë'ka Skëköl wa.

<sup>13</sup> A' wakpa tò ibikeitsö. ¿Buaë idir tò alakölpa ttöke Skëköl ta wökir kè pabakule? <sup>14</sup> Sulitane wa ijcher tò iwake' meneatbak tò wëm tsà batsi, e' dör jaë.



<sup>15</sup> Erë alaköl tsà batsì, e' mène ie' a iwökir pabakoie, e' kueki e' mène buaë ie' ki ikikoka. <sup>16</sup> Yile kè wà ye' sini'kune, e' tã ese éna íanú tò se' dör Skèköl icha erule erule ñi dapa'uke ká wa'ñe, e'pa kos wöblar tò alakölpa ttöke Skèköl tã wökir pabakulewa.

### Wes se' ké Skèkèpa kötewà e' kèwö tkö'uk

<sup>17</sup> Ì cheke ye' tò a' a' i' tã, e' kè ki ye' a' a' peñanuk. Mik a' ñi dapa'uke, e' tã e' wà dettsa suluë ichök ì buaë tsata. <sup>18</sup> Keweie yò ichè tò ye' wà ibiyó jcher tò mik a' ñi dapa'uke, e' tã a' ñi blabatsélor. Wele tã ye' iklö'wé tò e' dör moki. <sup>19</sup> Moki e' dör buaë tò a' ñi blabatsò as iwërwa a' shua tò a' wépa wër moki Skèköl wa buaë. <sup>20-21</sup> Mik a' ñi dapa'uke Skèkèpa kötewà e' kèwö tkö'woie chkè wa di'yè wa, e' tã a' wákpa tò a' chkè nèwà kè wà iyamipa kè wà ì tã' esepa bikeitse. Bataie tã a' welepa atè kè chkaule welepa e' ttéka taië blo' wa. E' wa ì ché a' tò tò ikéwö tkö'weke a' tò e' dalösewéwà a' tò. <sup>22</sup> Wësua a' kè ì tã' chkoie di'yoie. Wësua se' dör Skèköl icha e'pa dalösewekewà a' tò. Wësua a' éna s'yamipa dör siarè, esepa jaëwakkà. ¿Ì chëmiyò a' a' íyi ekkè kueki? ¿A' ki ikiane tò ye' tò a' peñè iki? Au, ye' kè tò iwepa.

<sup>23</sup> Skèkèpa Jesús tté meneat ye' a' paka'neyò a' a, e' dör i' es: Nañewe kam ie' mertsà, e' yöki ie' tò pan klö'wé. <sup>24</sup> E' ki wéstela chéitö Skèköl a. E' ukuöki tã iblatéitö tã iché: “Pan i' dör ye' chkà merdattsa a' tsatkoie e'. I' ú kekraë as a' er arne ye' ska'.” <sup>25</sup> Es ñies mik ie'pa chké one tã tkà' a' vino tkër, e' klö'wéitö tã iché: “Vino i' dör ye' pé. Ye' tterawà e' pé tërdaë, e' wa ttè pa'ali me' Skèköl tò, e' wà de. Bitökicha a' tò iyeke, e' tã a' er anú ye' ska'.” <sup>26</sup> Es bitökicha a' tò pan ñe' ñé ena vino ñe' yé, e' wa a' tso' ichök tò ie' kötewà se' skéie. Es a' tò ichè michoë dò mik ie' datskene e' tã.

<sup>27</sup> E' kueki yi isie tò pan ñe' ñé ena vino ñe' yé, erë kè iserku' wës kawö tkö'weke ñe' wà kiane ché es, e' tã esepa tso' Skèkèpa chkà ena ipé dalöseuk-wà. <sup>28-29</sup> Ìñésò ena iyésò, erë s'yamipa malepa dör wës wák eköl è es se' tã Skèkèpa batamik, esepa dalösewéwasò, e' tã Skèköl wö kiekésò e' ki. E' kueki se' kos eköl eköl kawötã e' sauk kewe tò is s'tso', e' ukuöki tã pan ñú ena vino yó. <sup>30</sup> Erë a' kè ku' iwà dalöiök es. E' kueki a' taië kirirke ianewà alabèbè, ñies a' welepa duolur. <sup>31</sup> Se' e' sué buaë, e' ma Skèkèpa kè tò se' shulepa. <sup>32</sup> Erë ie' tò se' shuleke, e' tã e' dör se' kimoie as se' kè kichatër aishkuö tã wépa kè tò ie' dalöi-eta' esepa tã ñita. <sup>33</sup> A yamipa, mik a' ñi dapa'uke chkök ñita Skèkèpa kötewà e' kèwö tkö'woie, e' tã a' ñi panú. <sup>34</sup> A' wépa dué bli wà, e' tã esepa chkóbitü iwák u' a' as a' kè tò Skèköl wö kiò e' ki a' ñi dapa'uke chkök ñita e' wa. Íyi malè kianeia' shulè, ese shulekeyö mik ye' dene a' ska' e' tã.

### Ì merke Wiköl Batse'r wa e' pakè

**12** A yamipa, i' tã ye' tò ì merke Wiköl Batse'r wa se' a' e' tté pakeke a' a. Ye' ki ikiane tò a' éna ttè e' wà ar buaë. <sup>2</sup> A' wà ijcher buaë tò kenet tã kam a' tò Skèköl dalöiò, e' yöki a' bak e' muktsa wëttsè wes alè íyi diököl kè ttò tã', ese dalöiök. <sup>3</sup> E' kueki i'ñe tã ye' ki ikiane tò a' wà ijcher tò wépa ttöke Skèköl Wiköl wa, esepa kè tò ichepa: “¡Jesús mú kichatër!” E' sù wépa kè ttöku' Wiköl Batse'r wa, esepa kè tò ichepa moki: “¡Jesús dör sulitane Kèköl!”

<sup>4</sup> Ì mène se' a' ñi kimoie ese dör kuak'i kuak'i, erë e' wì dör Skèköl Wiköl eköl è. <sup>5</sup> E' sù kanè tso' se' wà s'kimoie ese dör kuak'i kuak'i, erë e' wì dör Skèkèpa Jesús eköl è. <sup>6</sup> E' sù ì wèkesò ese wà dökettsa kuak'i kuak'i, erë e' wì dör Skèköl eköl è, e' tò iwakaneweke se' a' as iwà dòtsa

wes ie' k<sub>i</sub> ikiane es. <sup>7</sup> Se' k<sub>os</sub> eköl eköl a imène Skèköl Wiköl wa s'malepa k<sub>i</sub>-moie. <sup>8</sup> Welepa a imerke Skèköl Wiköl wa Skèköl siwé iskië e' pakoie. Welepa skà a Wiköl e' è wa imerke ttè blèule ese wà pakoie. <sup>9</sup> Welepa skà a imerke Wiköl e' è wa erbloie Skèköl mik bua'ie. Welepa skà a imerke Wiköl e' è wa s'duöke ese bua'wone. <sup>10</sup> Welepa skà a imerke i kè or yi a ese woie. Welepa skà a imerke ttoie Skèköl ttekölie. Welepa skà a imerke isuöie tö yile kapaköke ese dör Skèköl ttè mok<sub>i</sub> ö au. Welepa skà a imerke ttoie ttò ku'a'k<sub>i</sub> ku'a'k<sub>i</sub> wa. Welepa skà a imerke wépa ttöke ttò ku'a'k<sub>i</sub> ku'a'k<sub>i</sub> wa, ese wà pakone. <sup>11</sup> Erè ekkè k<sub>os</sub> dör Skèköl Wiköl eköl è e' kanè. Ie' tö imeke se' k<sub>os</sub> a eköl eköl wes ie' k<sub>i</sub> ikiane es. <sup>12-13</sup> Se' dör Cristo icha e'pa dör wes wák eköl è es. Se' ulà ta', klò ta' ena se' yese skà tso' taië, erè e' k<sub>os</sub> wöiëulewà etkème. Es ñies se' dör ku'a'k<sub>i</sub> ku'a'k<sub>i</sub>. Se' welepa dör judiowak, se' welepa skà kè dör judiowak, se' welepa klöulewà kanè mésoie, se' welepa skà kè dör es. Erè se' k<sub>os</sub> iënewà Skèköl Wiköl a, e' è a se' k<sub>os</sub> tso'. E' wa se' de wes wák eköl è es Cristo ta' ñita.

<sup>14</sup> S'chka kè dör etkème, iyese tso' taië ku'a'k<sub>i</sub> ku'a'k<sub>i</sub>. <sup>15</sup> Ichösö tö s'klò mú tö ichè: "Ye' kè dör ulà, e' kuëk<sub>i</sub> ye' kè ku' chka mik." Ie' tö ichèmi es, erè ie' tso' chka mik. <sup>16</sup> S'kukuöña mú tö ichè: "Ye' kè dör wöbla, e' kuëk<sub>i</sub> ye' kè ku' chka mik." Ie' tö ichèmi es, erè ie' tso' chka mik. <sup>17</sup> S'chka k<sub>os</sub> e' mú dör wöbla è, e'ma ¿wes i tsemisö? S'chka k<sub>os</sub> e' mú dör kukuöña è, e'ma ¿i wa fy<sub>i</sub> alar tsemisö? <sup>18</sup> Erè Skèköl kè wà se' chka yöne es. Ie' tö i k<sub>os</sub> tso' s'chka mik, e' méat wé ie' k<sub>i</sub> ikiane méat eé as ikaneblò buaë ñita. <sup>19</sup> Es s'chka ulitane mú dör wöbla è ö kukuöña è, e'ma s'chka kè dör mok<sub>i</sub>. <sup>20</sup> Erè kè idör es. S'yese tso' taië.

<sup>21</sup> E' kuëk<sub>i</sub> s'wöbla kè a iyënuke s'ulà a: "Be' kè dör iie bua' ye' a." Es ñies s'wökir

kè a iyënuke s'klò a: "Be' kè dör iie bua' ye' a." <sup>22</sup> E' skéie, s'chka wésele bikeitsekésö tö kè ia i or buaë, e' kè ta' età kè se' serpa. <sup>23</sup> S'chka wésele k<sub>i</sub> se' jaërke, kè kkayèr ta', ese paiekésö buaë datsi' wa kkö'neke buaë. <sup>24</sup> Erè s'chka wésele kè k<sub>i</sub> se' jaërku', e' kè paieku'sö datsi' wa. S'chka wésele bikeitsekésö tö kè idör buaë chökle, ese kkö'nekésö bua'ie. Es Skèköl tö s'chka tulu'wà. <sup>25</sup> Ie' tö iwé es as s'chka kè ñi blabatsö e' skéie ñi kkö'nurak buaë ñikkè. <sup>26</sup> Se' yese alè dalène s'mik, e' ta' s'chka k<sub>os</sub> e' tö ittse. Ñies se' yese alè peñarke buaë, e' ta' s'chka k<sub>os</sub> e' tse'ne buaë.

<sup>27</sup> A' k<sub>os</sub> eköl eköl tso' batsulewà Cristo mik wes wák eköl è es. <sup>28</sup> Se' dör Skèkëpa Jesús icha e'pa shuà Skèköl tö se' tkè'ka kanè ku'a'k<sub>i</sub> ku'a'k<sub>i</sub> uk. Kewe ie' tö Jesús ttekölpa tsá, e'pa tkè'ka. E' ukuök<sub>i</sub> ta' ittekölpa malepa tkènekà. E' ukuök<sub>i</sub> ta' s'wöbla'ukwakpa ittè wa esepa tkènekà. E' ukuök<sub>i</sub> ta' i kè or yi a ese ukwakpa tkènekà, ñies s'duöke ese bua'ukwakpa ena s'kimukwakpa ena s'wëttsukwakpa esepa tkènekà. Ñies wépa ttöke ttò ku'a'k<sub>i</sub> ku'a'k<sub>i</sub> wa, esepa tkènekà. <sup>29</sup> Se' ulitane kè dör Jesús ttekölpa tsá. Se' ulitane kè dör Skèköl ttekölpa. Se' ulitane kè dör s'wöbla'ukwakpa. Se' ulitane kè dör i kè or yi a ese ukwakpa. <sup>30</sup> Se' ulitane kè dör s'duöke ese bua'ukwakpa. Se' ulitane kè ttòpa ttò ku'a'k<sub>i</sub> ku'a'k<sub>i</sub> wa. I checkerakitö ttò ku'a'k<sub>i</sub> ku'a'k<sub>i</sub> wa, ese wà kè pakanukne se' ulitane a. <sup>31</sup> Erè i merke se' a Wiköl Batse'r wa, e' bua'ie yuló a' dör poë.

### Se' ñi dalëritsö e' dör ñalà bua'ie

Erè ñalà bua'ie shütè, e' kkachekeyö a' a i' ta.

**13** S'ttò ku'a'k<sub>i</sub> ku'a'k<sub>i</sub> dò Skèköl biyöchökwakpa ttò e' k<sub>os</sub> mú yèr ye' a, erè s'malepa kè dalèr ye' éna, e' ta' ye' dör wes tabechka ppésö ese blar es ö wes panakkuö ppésö ese blar es kè

wà tã'. <sup>2</sup>Ye' mú ttò Skèköl ttekölie, ñies ie' siwé blëule e' kòs mú ar ye' éna ñies íyi kòs mú jcher ye' wã ñies ye' mú er-blò Skèköl mik taiè dò kabata skéu ekkè, erè s'malepa kè dalër ye' éna, e' tã ye' kè dör i. <sup>3</sup>Ì kòs tso' ye' wã e' mú mèttsayö s'siarëpa a, ñies ye' wák mú e' müttsa we'ikè siarè Skèköl ttè kueki e' ttsoka<sup>§§</sup>, erè s'malepa kè dalër ye' éna, e' tã e' kè dör lie bua' ye' a.

<sup>4</sup>Se' ñi dalërítsòke, e' tã ì kòs dalè'ttsekèsò bèrè, ñies se' er buaè chòke s'malepa a. Se' ñi dalërítsòke, e' tã kè se' ukýerta' ñi ki, kè se' e' ttsöta'ka s'malepa ki, kè se' e' bikeitsöta'ka tò se' dör pè' taiè. <sup>5</sup>Se' ñi dalërítsòke, e' tã kè s'malepa suèsö er sulu wa, kè se' er mutã'wa se' wák è ki, kè se' ulurta'ka bet, ì sulu wamblërke se' tã, e' tã ese nuí olo'yekesö. <sup>6</sup>Se' ñi dalërítsòke, e' tã ì sulu wamblërke ese kè tò se' ttsë'wëpa buaè. E' skéie mik s'malepa serke wës ttè mokí tò ichè es, e' tã ese je' tò se' ttsë'weke buaè. <sup>7</sup>Se' ñi dalërítsòke, e' tã ì kòs dalè'ttsekèsò, se' erblò michoë Skèköl mik, ì buaè yè' Skèköl tò se' a ese kòs wã panekesö kröröë, ì kòs wöklö'wëkesö.

<sup>8</sup>Se' ñi dalërítsòke e' kè erta'wa. Iñe tã ìmerke ttoie Skèköl ttekölie, erè aishkuö tã e' kè merpaia es. Iñe tã ìmerke ttoie ttò kuã'ki kuã'ki wa, erè aishkuö tã e' kè ku'ia. Iñe tã ìmerke íyi blëule ese jchenoie Wiköl Batse'r wa, erè aishkuö tã e' erdawa. <sup>9</sup>E' wã dör tò ì mène se' a jchenoie iñe tã ese kè dör Skèköl íyi wañe, e' dör ikakla è. Ñies ì chekesö Skèköl ttekölie, ese kè dör seraa. <sup>10</sup>Ese kòs erdawa mik ì dör ibua'ie e' de seraa eta.

<sup>11</sup>E' dör i' es: Mik ye' iã alala, eta ye' ttòke wës alala es, ye' erbiökòke wës alala es, íyi suekeyö wës alala es. Erè mik ye'

kibineone, eta ye' kè dör alala, e' kueki ye' kè seriã wës alala es. <sup>12</sup>Iñe tã se' wã Skèköl jcher wës íyi olo suèsö wösuö nula wa es. Erè aishkuö tã isuërasö ñi wöshäë. Iñe tã ie' kak jcher ye' wã, erè aishkuö tã ijcherdawa ye' wã buaè wës ie' wã ye' jcher buaè es.

<sup>13</sup>Iñe tã se' erblòke Skèköl mik. Ñies ì yè'atbakitö, ese wã panekesö kröröë. Ñies se' ñi dalërítsòke. Íyi mañat ekkè wawëkesö iñe tã, erè ibua'ie dör se' ñi dalërítsò.

### Imène ttoie ttò kuã'ki kuã'ki wa, e' pakè

**14** A' e' chó ñi dalërítsòk buaè. Ñies ì merke se' a Wiköl Batse'r wa ñi kimoie ese yuló poë. Erè ttök Skèköl ttekölie e' yuló bua'ie imalepa tsata. <sup>2</sup>E' wã dör tò yi a imène ttoie ttò kuã'ki wa ese kè ttöku' imalepa tã, ittòke Skèköl è tã. Kè yi skà éna ittòke e' anuk. Erè ttè blëulewã ese chekeitö Skèköl Wiköl wa. <sup>3</sup>Erè yi a imène ttoie Skèköl ttekölie, ese ttòke imalepa tã ie'pa er diché kí ioie, ie'pa pattoie ena ie'pa er pabloie. <sup>4</sup>Yi ttòke ttò kuã'ki wa Wiköl Batse'r wa, ese tò iwák è er diché kí ieke. Erè yi ttòke Skèköl ttekölie, ese tò Skèkëpa Jesús icha malepa er diché kí ieke. <sup>5</sup>Ye' kí ikiane tò a' ulitane mú a ìmerke ttoie ttò kuã'ki kuã'ki wa. Erè a' mú ttò Skèköl ttekölpaie, e' dör ibua'ie ttök ttò kuã'ki kuã'ki wa ese tsata. Erè a' ttòke ttò kuã'ki kuã'ki wa tã yile tò iwã pakène imalepa a as ie'pa er diché kí ier, e' tã e' dör buaè wës yi ttòke Skèköl ttekölie ese es.

<sup>6</sup>A yamipa, e' wã pakekeyö a' a' i' es. Ichösö tò ye' de, e' ttòke a' tã ttò kuã'ki wa, e' tã ç' tò a' kimèmi? Au, e' kè dör lie bua'. Erè ilè kkeyène ye' a ese chéneyö a' a' ö ilè jcher ye' wã ese pakéneyö ö ilè chéyö Skèköl ttekölie ö a' wöbla'wéyö

§§13:3 ye' wák mú e' müttsa we'ikè siarè: Yëkküö këchke wële tò ichè: ye' mú e' müttsa ña'wëwa

ttè wésele wa ese kōs chéyō a' wákpa ttò wa, e' tã e' je' tō a' kímèmi buaë. <sup>7</sup> E' dōr wēs ma'ma tso' blarta' pulē sù ò ma'ma kicha tã sù ese blar es. Kè iblane wēs ikawōtã bla'wè es, e' tã çì se' a' ichök tō ì bla'wēkerakitō? <sup>8</sup> Nies duk bla'wēke ñippōkwakpa kioie ñippōk ibolōkpa tã, e' kè blane wēs ibla'wēke es, e' tã ñip-pōkwakpa kè bitúpa ñippōk. <sup>9</sup> E' sù a' tã itkōke. A' ttōke ttò kuã'kì kuã'kì wa, e' tã çwes e' wà armì yi éna? A' ttōke é, wēs yi ttò ekōrla ese es. <sup>10</sup> S'ttò daklilië, e' tso' taië kã i' a, ese kōs wà ane iwákpa éna. <sup>11</sup> Erë wele ttōke iwákpa ttò wa, kè wà ane ye' éna, e' tstsëyō, e' tã ie' dōr kã kuã'kì wak ye' a, ñies ye' dōr kã kuã'kì wak ie' a. <sup>12</sup> Ì meke Skëköl tō se' a' iWiköl wa, ese kōs yuleke a' tō poë. E' kuekì yō ichè a' a, e' wése tō se' malepa dōr Skëképa icha e'pa er diché kì ieke, ese kōs yulō bua'iewã.

<sup>13</sup> E' kuekì yi ttōke ttò kuã'kì wa ese wák tō ikió Skëköl a' as imùitō ie' a' iwà pakone imalepa a. <sup>14</sup> Ichösö tō ye' tso' ttök Skëköl tã ttò kuã'kì wa, e' tã mokì ye' tso' ttök ie' tã, erë iwà kè ane ye' wák éna. <sup>15</sup> Çwēs ye' iwèmi? Ye' iwēke i' es: ye' ttōke Skëköl tã ttò kuã'kì wa, ñies ye' ttōke ie' tã ttò ane ye' éna ese wa. E' sù ye' tso'ke ie' kíkokaie ttò kuã'kì wa, erë ñies ye' tso'ke ttò ane ye' éna ese wa. <sup>16</sup> Ichösö tō a' wele tso' wéstela chök Skëköl a' ttò kuã'kì wa a' malepa kukua, erë iwà kè ane a' éna, e' tã çwēs a' ichèmi, “Es e' idir?” <sup>17</sup> Mokì ie' tō wéstela ché buaë Skëköl a, erë e' kè wà a' er diché kì iëne. <sup>18</sup> Ye' ttōke ttò kuã'kì wa taië a' tsata, e' kì ye' tō wéstela cheke Skëköl a. <sup>19</sup> Erë mik se' ñi dapa'uke, etã ee ye' a' tã ye' kapakōke ttè böt mañat wà ane se' éna ese wa, e' dōr buaë ye' kapakōke ttè taië ttò kuã'kì wa dōka 10.000 kè ane yi éna e' skéie.

<sup>20</sup> A' yamipa, kè a' kabikeitsōkia wēs ala'rla es. A' kabikeitsó wēs s'kibinetke es. Erë buaë idir tō sene sulu yōkì a'

kabikeitsò wēs ala'rla es. <sup>21</sup> Skëköl tō ichè iyëkkuō kì i' es: “Eré ye' ttōraë kã i' wakpa tã s'ttò kuã'kì kuã'kì wa ena kã kuã'kì kuã'kì wakpa wa, erë ie'pa kè tō ye' ttò iutepa.” <sup>22</sup> E' wa isuésō tō s'ttōke ttò kuã'kì wa e' dōr ilè kkachōie wépa kè erblōtã' Jesús mik esepa a, kè idōr se' erblō Jesús mik esepa a. Erë se' ttōke Skëköl ttekōlie e' je' dōr se' erblō ie' mik esepa a. <sup>23</sup> E' wà dōr i' es: A' ñi dapa'uke e' kōs tso' ttök ttò kuã'kì kuã'kì kè ane yi éna ese wa, e' wōshã pè' kè yöne Jesús ttè wa kè erblōtã' ie' mik, esepa dewã a' shua, e' tã ie'pa tō ibikeitseraë tō a' dōr aljie. <sup>24</sup> Erë e' skéie a' ulitane ttōke Skëköl ttekōlie wà ane sulitane éna tã pè' kè erblōtã' Jesús mik kè yöne ie' ttè wa esepa dewã, e' tã ie'pa éna iardaë tō nuì tso' ie'pa kì tã ie'pa e' shulōraë. <sup>25</sup> Ì tso' blëule ie'pa er a, ese yënekã sulitane kukua tã ie'pa e' tkōralur kuché kì Skëköl dalōioie tã icheraërakitō, “Mokì Skëköl tso' a' tã.”

### A' ñi dapa'ú bèrè kè chiliwarka

<sup>26</sup> A' yamipa, ttè ikkè kōs bata dōr i' es: Mik a' ñi dapa'uke, etã a' ulitane wã ilè bitūmi eköl eköl s'malepa er diché ioie. A' wele wã Salmo bitūmi ttsoie. A' wele skà wã ttè tso' s'wōbla'woie. A' wele skà wã ttè kkaché Skëköl tō ese tso' chè. A' wele wã ilè skà tso' chè ttò kuã'kì wa. A' wele wã ì yöne ttò kuã'kì wa, e' wà pakè tso'ne. E' kōs ù ñi er diché ioie. <sup>27</sup> A' wépa ttōke ttò kuã'kì kuã'kì wa, e' tã buaë idir tō bōl è ttò, isalema mañal, erë e' dōr wè'. Nies esepa kawōtã ttök eköl eköl. Nies ì chekerakitō e' wà pakökne yile kawōta. <sup>28</sup> Erë kè yi ku' iwà pakökne, e' tã ie'pa kawōtã siwã'blōkwã. As ie'pa ttò Skëköl tã ttò kuã'kì wa bānet ekōrla. <sup>29</sup> Es ñies wépa a' imène ttoie Skëköl ttekōlie, esepa ttò bōl ò mañal, e' ukuōkì tã a' malepa tō iwà bikeitsó isuōie tō mokì idir ò au. <sup>30</sup> Erë a' wele ttōke Skëköl ttekōlie, e' dalewa a' wele skà tkër ee, ese a' Skëköl

tò ittè é ñies, e' tã wé tso' ttök ese si-wa'bló as iëköl tò icha chò. <sup>31</sup> Es a' ulitane ttömi Skëköl ttekölie eköl eköl as a' ulitane wöblar ena a' ulitane a' diché kî iër. <sup>32-33</sup> Skëköl dör sene bèrè mukwak e' kè chilirtã'ka. E' kuekî ie' kî ikiane tò se' ñi dapa'ù bèrè, kè chilirtã'ka wes s'batserpa erule ñi dapa'uke ká wa'ñe es. E' kuekî wépa a' imène ttoie Skëköl ttekölpaie, esepa a' e' wöklörmi as ittò eköl eköl.

<sup>34</sup> Mik a' ñi dapa'uke, etã alakölpa kos ké siwa'blökwa. Ie'pa kè kàne ttök, e' skéie ie'pa ké ittök bèrè wes Skëköl ttè dalöiëno tò ichè es. <sup>35</sup> Ie'pa ttöke mik a' ñi dapa'uke, e' dalewa e' dör jaë. E' kuekî ie'pa éna ilè chakak, e' tã as ichakörakitò iwëm a' iu a'.

<sup>36</sup> ¿Ima a' ibikeitsè? ¿Skëköl ttè de a' batamik? ¿A' è ulà a' ide? Au. ¡A' e' kîté!  
<sup>37</sup> Yi e' bikeitsò tò ie' dör Skëköl tteköl ö Wiköl Bats'er tò ie' ké ichök, e' tã ese kawõtã ichök tò ì shteke ye' tò a' a' e' dör ì uk se' patkè' Skëképa Jesús tò e'. <sup>38</sup> Erë yi tò ttè i' watéttsa, ese watërdattsa.

<sup>39</sup> A yamipa, es ye' tò a' a' ichè tò ttök Skëköl ttekölie, e' yuló poë. Ñies wépa ttöke ttò kua'kî wa, esepa kè wöklö'war.  
<sup>40</sup> Erë íyi kos ese ú a' tò buaë yësyësè, kè chiliwarka.

### Cristo shkenekane, e' pakè

**15** A yamipa, Jesús tté buaë paka' ye' tò a' a', e' skà pakekeneyö a' a' i' tã as e' ska' a' er döne. Ttè ñe' klöo'bak a' tò, e' a' a' tso' tkéulewã darërè. <sup>2</sup> A' e' tkéwa michoë ttè buaë ñe' a' yësyësè wes ye' tò a' a' iwã paka' es, e' tã e' wa a' tsatkëne. Kè idör es, e' tã é ichök a' erblé imik.

<sup>3</sup> Ttè meneat ye' a, e' è paka'neyö a' a. E' bua'ie dör i' es: Cristo kötewã se' nuî kî wes itso' kitule Skëköl yëkkuö kî es. <sup>4</sup> Ñies ie' wötënewã pö a, e' kî ká de mañat, etã ishkenekane wes itso' kitule Skëköl yëkkuö kî es. <sup>5</sup> Ñies ie' kkaché Cefas a. E' ukuökî tã ie' kkaché ittekölpa

tsã dabom eyök kî bül (12), e'pa a. <sup>6</sup> E' ukuökî tã ie' kkaché s'yamipa döka cien skeyök (500) kîta, e'pa a' mik ñi dapa'wé ek tsiní ème etã. Ie'pa ekkëpa wëlepa blërulunetke, erë ikibiiepa dobyërkeia.  
<sup>7</sup> E' ukuökî tã ie' e' kkaché Santiago a. E' ukuökî tã ie' e' kkaché ittekölpa kos a.

<sup>8</sup> Bata ekkè tã ie' e' kkaché ye' a. Ye' dör ittekölpa tsã e'pa yulé, erë ñies ie' e' kkaché ye' a. <sup>9</sup> Skëköl icha, e'pa we'ikök ye' bak. E' kuekî ye' dör ittekölpa malepa dikia diöshet. Ye' kiök ie'pa eköl, e' kè dör ye' siarla e' a. <sup>10</sup> Erë Skëköl er buaë ché ye' a, e' kuekî ye' dör ie'pa eköl. Ie' er buaë ché ye' a e' kè dör ème. E' wakanewéyö taië ie'pa malepa tsata. Ñermata kè dör tò ye' wák tò iwakanewé. Iwakanewéyö Skëköl er buaë chò ye' a e' batamik. <sup>11</sup> Erë Jesús tté buaë, e' dör etkëme, e' paka' sa' tò a' a, e' mik a' erblé. Ye' tò ipakè ö ie'pa tò ipakè, e' kè dè' wes.

### Se' duulewã shkerdakane

<sup>12</sup> Sa' tò ipakeke tò Cristo kötewã, e' shkenekane. Erë a' wëlepa tò icheke tò s'duulewã kè shkerta'kane. ¿Wes e' chëmi ie'pa tò? <sup>13</sup> S'duulewã kè shker-tã'kane, e'ma Cristo kè shkenekane. <sup>14</sup> Ie' kè shkenúpakane, e'ma é ye' tò ie' tté buaë pakeke. Ñies é a' erblöke ie' mik. <sup>15</sup> Sa' tò ipakeke tò Skëköl tò ie' shkeo'kane, erë s'duulewã kè shker-tã'kane, e'ma ie' kè shkenekane. E' mú dör es, e'ma ttè pakeke sa' tò Skëköl ttò wa e' dör kache. <sup>16</sup> S'duulewã kè shker-tã'kane, e'ma Cristo kè shkenekane. <sup>17</sup> Ie' kè shkenúpakane, e'ma é a' erblöke ie' mik. Se' tso'ia se' nuî ulà a. <sup>18</sup> Ñies e' mú dör es, e'ma wépa erblé' ie' mik blërulune, esepa tso'tke weinuk. <sup>19</sup> Se' tò Cristo paneke, e' kè wã tkópa aishkuö tã, e'ma se' dör siarè chökle s'malepa dikia.  
<sup>20</sup> ¿Erë mokî Cristo shkenekane! Ie' dör se' shkerkane e'pa tsã, e' kuekî se' wa ijcher tò ñies se' shkerdakane. <sup>21</sup> E'

wà dör i' es: Wëm eköl wa s'duòwà e' ali'kà sulitane k̄i. E' s̄ü wëm skà eköl wa s'duulewà shkerdakane. <sup>22</sup> Sulitane dē'kà Adán wa, e' kuēk̄i sulitane wömenettsa duòkwà wēs ie' es. Erē se' batsulewà Cristo mik e'pa kōs shkerdakane wēs ie' shkenekane es. <sup>23</sup> Erē e' kōs mir wēs ikawōtā minuk es. Cristo shkenekane kewe. E' itōk̄i mik idene, eṭa se' dör ie' icha, e'pa kōs shkerdakane. <sup>24</sup> Eṭa k̄á i' erdawa. E' kēwō ska' t̄a Cristo e' alōrakā f̄yi wōkir, f̄yi wák, f̄yi kēkōl wā diché t̄a' ese kōs k̄i. Ì kōs blu'ie ie' tso' e' merattsaitō Skēkōl dör S'yé e' ulà a. <sup>25</sup> Erē ìñe t̄a ie' tso'ia f̄yi kōs wēttsuk blu'ie dō mik ibolōkpa kōs menewā ie' klò dik̄ia eṭa. <sup>26</sup> Ie' bolōk bata, e' dör s'duòwà, e' k̄i ie' e' alōrakā bataie. <sup>27</sup> E' dör wēs itso' kitule Skēkōl yēkkuō k̄i es, e' tō ichè: “Íyi ulitane menewā ie' klò dik̄ia.” Erē se' éna iane tō mik iyēne “Íyi ulitane” eṭa Skēkōl kē k̄u' e' shūa, ie' wák tō ì kōs mérō Cristo klò dik̄ia e' kuēk̄i. <sup>28</sup> Erē mik f̄yi ulitane mérōtke Skēkōl tō Cristo dör ilà e' klò dik̄ia, eṭa ñies Cristo e' murattsā iyé ulà a as f̄yi ulitane dō ie' dik̄ia.

<sup>29</sup> S'duulewà kē shkert̄a'kane, e'ma wépa wōsune s'duulewà skéie\* çìòk e' wekerakitō? S'duulewà kē shkert̄a'kane, e'ma çìòk ie'pa wōsune esepa skéie? <sup>30</sup> S'duulewà kē shkert̄a'kane, e'ma çìòk se' e' mùm̄i weinuk kēkraē ttè e' pakōk? <sup>31</sup> A yamipa, k̄á bit t̄a ye' k̄i idalō me'rie ttsēsquia ye' ttēmiwā yile tō. E' dör mok̄i wēs a' tso' batsulewà Skēkēpa Cristo Jesús mik, e' tō ye' ttsēweke buaē e' dör mok̄i es. <sup>32</sup> Íe Éfeso ye' bolōkpa tso' ñip-pök ye' t̄a wēs iyiwak sulusi es. Kē se' shkert̄a'kane, e'ma çìòk e' dalē'ttsekeyō? E' kē dör ìie bua' ye' a. Mok̄i tō s'duulewà kē shkert̄a'kane, e'ma iṭsō wēs welepa tō icheke es. E' dör i' es: “Bulepa s'duōralur,

e' kuēk̄i ìñe se' chkò, se' di'yò buaē kaneē.”

<sup>33</sup> Kē a' e' muktsa e' kitō'uk es. E' dör wēs yile tō iyē' es, e' dör i' es. “S'yamipa e' wamblō sulu esepa tō s'ser yēsýēsē esepa sulu'wekewa.” <sup>34</sup> A' erbikōne buaē yēsýēsē. Ì sulu kē wamblariā a' tō. A' welepa kē bātse Skēkōl mik yēs. E' chéyō a' a' jaēwōka.

### Se' duulewà shkerdakane çis e' chkà dör?

<sup>35</sup> Isalema a' welepa tō ichakèmi: “Se' duowà, ç wēs e' shkermikane? ÇIs e' chkà dör?” <sup>36</sup> Ì chaké a' tō wēs kē s'kabikeitsō ese ì chaké es! Iyiwō tkēsō, e' kē dē'kane, ikuala deka t̄a iwō dalola nunéwā. <sup>37</sup> Mik se' tō trigo wō tkéwā, eṭa kē se' wā itkēne kuáie. Se' tō iwō dalola tké. <sup>38</sup> E' ukuōk̄i t̄a ikua deka wēs Skēkōl ime'atbak es. E' s̄ü iyiwō ulitane dōrakā iwakmik iwakmik wēs imeneat es.

<sup>39</sup> S'ditsō ena iyiwak klòka ena dù ena nima e' wák dör kuā'k̄i kuā'k̄i ñies ichkà dör kuā'k̄i kuā'k̄i. <sup>40</sup> Ñies ì meneat k̄á jai a ena ì meneat k̄á i' a e' dör kuā'k̄i kuā'k̄i. E' kōs dör buaala, erē iwēr kuā'k̄i kuā'k̄i. <sup>41</sup> Diwō si'wō bēkwō e' kōs dalōburke kuā'k̄i kuā'k̄i. Ñies bēkwō kōs e' wák dalōburke ek ek kuā'k̄i kuā'k̄i.

<sup>42</sup> Mik se' shkenekane, eṭa se' manenettsatke wēs iyiwō tkēne e' manerttsā es. Se' chkà i' nurt̄a'wā, erē mik ishkenekane, eṭa kē inurpawāia. <sup>43</sup> S'chkà i' dör èsela, erē ishkerdakane olo t̄a' tajē. S'chkà i' kē diché t̄a', erē ishkerdakane diché t̄a' tajē. <sup>44</sup> S'chkà i' dör buaē senoié ìñe t̄a, erē mik ishkenekane, eṭa imanenettsā senoié buaē aishkuō t̄a Wikōl Batse'r t̄a. <sup>45</sup> E' dör wēs Skēkōl yēkkuō tō ichè es, e' tō ichè: “Wëm tsá kiè Adán, e' yöne se'ie

\*15:29 s'wōsune s'duulewà skéie: E' dör ì uk ie'pa welepa wōblar es. Kē iyēne Skēkōl wā tō iṭ es.

ttsë'ka."<sup>†</sup> Erë wëm skà de eköl Adán es, e' dör Cristo, e' yöne sene michoë mukwak. <sup>46</sup>Erë s'chkà senoië aishkuö ta, e' kè mène Skëköl wà se' a kewe. S'chkà i' me'itö se' a kewe. E' itökì chkà senoië aishkuö ta Wiköl Batse'r ta ese merdaë se' a. <sup>47</sup>Wëm tsá yöne íyök wa, e' kuekì e' dör ká i' wak. Erë wëm skà de Adán es, e' datse ká jaì a. <sup>48</sup>Wépa dör ká i' wakpa, esepa dör wës wëm tsá yöne íyök wa ñe' es. Erë wépa dör Skëköl tso' ká jaì a e' icha esepa dör wës wëm datse ee es. <sup>49</sup>Se' tó wëm datse ká jaì a e' kitseraë wës wëm yöne íyök wa ñe' kits'e'sö es.

<sup>50</sup>A yamipa, ye' tó a' a ichè tó se' chkà i' duöta'wà nurta'wà e' kè döpa'wà ì blúie Skëköl tso' e' a. <sup>51-52</sup>Ye' ttò ttsó. Ttè bak blëulewà ese chekeyö a' a i' ta: Kè se' ulitane duöpawà erë mik Skëköl duk blane iwà kkachoië tó kawö i' enewatke età se' qos maneordattsa bet wës s'wöbla tsimiü es. Mik duk ñe' blane, età s'duulewà qos shkerdaka, kè duöpawaia. Nies se' tso'ia ttsë'ka, e' chkà maneordattsa. <sup>53</sup>Se' chkà i' nurta'wà, e' maneordattsa chkà kè nurta'wà ese wa. Se' chkà i' duöta'wà, e' maneordattsa chkà kè duöta'wà, ese wa. <sup>54</sup>Mik se' chkà i' manenettsa kè duöpawaia, kè nurpawaia, età ì tso' kitule Skëköl yëkkuö kì, e' wà de, e' tó ichè: "Duewà kì Skëköl e' aléka."<sup>‡</sup> <sup>55</sup>A Duewà, ¿wé be' diché taië e'? ¿Wé be' e' alò taië e'? Be' kirëbata tso' se' rrewoie taië, ¿wé e' i' ta?"<sup>¶</sup> <sup>56</sup>Se' ser sulu kuekì duèwà tó se' rreweke ena sene sulu diché iëne ttè dalöiëno wa. <sup>57</sup>Erë se' nuü olo'yane se' kì Skëkëpa Jesucristo batamik, e' kuekì kè se' suaneia s'duöwà yöki. E' kuekì kekraë wëstela chekesö Skëköl a.

<sup>58</sup>E' kuekì, a yamipa dalër ye' éna, a' e' tkó'wà darërë kekraë Skëkëpa ttè a, kè

a' e' sköktsa bánet. A' wà ijcher tó ì qos kanewé a' tó ie' a, e' kè weirpa éme. E' kuekì a' kì kanebloé buaë kekraë ie' a.

### Inuköl shteke s'siarëpa kimoie, e' pakè

**16** Inuköl shteke a' tó s'batse'rapa serke Jerusalén e'pa kimoie, e' pakeke ye' tó a' a i' ta. Inuköl shtó wes ye' tó iyë' Skëkëpa icha erule erule tso' Galacia, e'pa a es. <sup>2</sup>Domingo bit ta a' wakpa bik ekkè tó a' inuköl shta'ü tó qos a' ulà a ide. Età qos a' a imermi, e' bloé bánet. A' tó iwé es, età mik ye' de a' ska', età kè a' kawöta inuköl shtök, a' wà itso'tke blëule e' kuekì. <sup>3</sup>Mik ye' de a' ska', età wépa shushtétke a' tó patkëmi Jerusalén inuköl ñe' muk, e'pa tté choie yëkkuö shtekemiyö e' mi'ke ie'pa wà. Es ye' tó ie'pa patkeke Jerusalén. <sup>4</sup>A' ibikeitsé tó buaë idir tó ye' mi'ñak ie'pa ta, e' ta ye' mi'mi.

### Pablo tó ishkak e' aleritsé

<sup>5</sup>Ye' kawöta minuk Macedonia, e' ukuökì ta ye' mi'ke a' ska'. <sup>6</sup>Isalema ye' e' tsukeat a' ska' si' et si' böt ulatök ö isalema ye' e' tsümiat dô yuëdiö tka ekkè. Es a' a ye' kimermi ì kiane ye' kì shkoie ese wa as ye' mi' buaë wé ye' mi'mirö ee. <sup>7</sup>Ye' kè shkak a' pakök shkaule. Ye' mú ser a' ska' ká taië, Skëkëpa kì ikiane e'ma. <sup>8</sup>Erë ye' e' tsukeat íe Éfeso dò Pentecostés kéwö tka ekkè. <sup>9</sup>Íe buaë ye' a kawö kune Jesús tté buaë pakoie. Ye' bolökpa tso' taië, erë nies taië pè' éna Jesús tté buaë ttsak. E' kuekì kè ye' e' yaktsa i' ta íe.

<sup>10</sup>Timoteo kanebloke Skëkëpa a wes ye' es, e' kuekì ie' de a' ska', e' ta ikíowà buaë. <sup>11</sup>Kè yi kàne ie' dalöseukwà. E' skéie ie' kímú as ie' döne bèrë ye' ska'.

<sup>†</sup>15:45 Génesis 2.7

<sup>‡</sup>15:54 Isaías 25.8

<sup>¶</sup>15:55 Oseas 13.14

Ye' tso', ie' ena s'yamipa urke ie' ta, e'pa panuk.

<sup>12</sup>Ye' tò s'yami Apolo e' cheke a' a' i' ta. Ye' kköyè' ie' a' taië tò ie' yúñak s'yamipa mi'ke a' pakök e'pa ta. Ie' kè shkak i' ta, erè wekkè alè ta ie' a' kawö kürmi, eta ie' mi'mi.

### Pablo tò ie'pa bata patté

<sup>13</sup>A' senú erki. A' e' tkówa darèrè a' erblöke Jesús mik e' a. A' e' tkówa wëbla suë, kè a' suanuk. A' erbló darèrè ie' mik.

<sup>14</sup>Ì weke a' tò kos ese ú ñi dalëritsè wa.

<sup>15</sup>A yamipa, a' wa ijcher tò Estéfanos ena iyamipa e'pa dör Acaya wakpa tsá erblè' Jesús mik e'pa. Ie'pa e' ché buaë s'batse'r malepa kimuk. <sup>16</sup>Ye' tò a' a' ikiè taië tò ie'pa esepa ttò dalöió er bua' wa. Ñies yi isie tso'ñak kaneblök Skëképa kanè a' esepa ttò dalöió.

<sup>17</sup>Ye' tts'ne buaë tò Estéfanos ena Fortunato ena Acaico e'pa de ye' ska'. Ie'pa tso' ye' kimuk taië a' kè ku' e' skéie.

<sup>18</sup>Ie'pa tò ye' er pablé wes a' er pablérakitò es. Buaë idir ie'pa esepa kikökka.

### Pablo e' chéat

<sup>19</sup>Skëképa Jesús icha erule erule kos tso' Asia, e'pa tò a' shké'wémi. Áquila ena Prisca ena Skëképa icha ñi dapa'uke ie'pa u a, e'pa tò shkene patké taië a' a' Skëképa ttò wa. <sup>20</sup>S'yamipa kos tso' íe, e'pa tò a' shké'wémi. A' ñi shké'ú ñi dalër wa.

<sup>21</sup>Ye' dör Pablo e' tò shkene i' shté ye' wák ulà wa.

<sup>22</sup>Yi kè éna Skëképa dalër, e' ta as ese kichatër. ¡A Skëképa, be' shkóne bet!

<sup>23</sup>As Skëképa Jesús er buaë chò a' a.

<sup>24</sup>Ye' éna a' dalër Cristo Jesús batamik. Es e' idir.



## Yëkkuö skà kit Pablo tō Corinto wakpa a, i' tã ide böt

### 2 Corintios

Mik Pablo bak kaneblök Macedonia etã ie' tō yëkkuö skà kit Jesús mik erblökwakpa serke Corinto ena ipamik e'pa a. Wëm kiè Tito e' kaneblöke Pablo tã Jesús tté pakök. Ie' tso' Corinto, mik ie' dene Pablo ska' etã ie' tō Jesús mik erblökwakpa tso' Corinto e'pa kabërke ñitã e' paké Pablo a. E' kueki Pablo tō yëkkuö i' kit. Ì tköke Corinto wakpa tã e' dör i': Welepa e' chò tō ie'pa dör Jesús ttekölpa erè kè idör moki. Espä dë'mi Corinto tã Jesús mik erblökwakpa tō iki'warak buaë. Ie'pa ñekkëpa tō s'wöbla'weke kache tté wa. Ie'pa e' ù tō ie'pa dör buaë Pablo tsatã. Ie'pa tō icheke tō Pablo dör siarè kè dör këkëpa taië. Es ie'pa tso' Jesús mik erblökwakpa kit'ö'uk. Pablo éna Jesús mik erblökwakpa dalër taië e' kè kiane ie' ki tō imi'yal ñalã sulusi ki kachökwakpa itöki. E' kueki ie' tō yëkkuö i' kit ie'pa a as ie'pa tso' ttsë'ka kachökwakpa yöki ena er bua' wa ì kkeyëne ie'pa a e' dalöiök. Nies ie' tō ie'pa a iché tō ie' dör Jesús tteköl moki.

E' kije tã kam ie' tō yëkkuö i' shtò etã ie' tō inuköl ki' ie'pa a Jesús mik erblökwakpa siarëpa tso' Jerusalén e'pa kimoie. S'kit'ö'ukwakpa tō iyë' tō Pablo tō inuköl e' tsetkò iwák a, erè ie' tō iché tō e' kè dör es. Ie' mi'ke betkã Jerusalén pakök e' kueki Jesús mik erblökwakpa tso' Corinto e'pa kawötã inuköl kí shtök tsëmi Jerusalén.

### Shkë'wè

**1** Ye' dör Pablo. Skëköl wák er wa ye' dör Cristo Jesús ttekölpa tsã e'pa eköl. S'yami kiè Timoteo, e' tso' ye' tã íe. Sa' tso' yëkkuö i' shtök a' dör Skëköl icha erule serke Corinto, e'pa a. Nies

sa' tso' yëkkuö i' shtök s'batse'r malepa serke kã malepa atë Acaya, e'pa ulitane a. <sup>2</sup>Skëköl dör S'yé ena Skëkëpa Jesucristo as e'pa er buaë chò ena sene bèrè mù a' a.

### Pablo weirke e' shuã Skëköl kíkëkaitö

<sup>3</sup>Skëköl dör Skëkëpa Jesucristo yé, e' kíkëkasö taië. Ie' dör S'yé e' tō se' sueke er siarè wa ena se' er pableke këkraë. <sup>4</sup>Sa' weirke kos Cristo tté kueki, e' shuã sa' er pableke Skëköl tō as s'malepa weirke esepa er pablò sa' tō wes ie' tō sa' er pableke es. <sup>5</sup>Cristo weine taië, e' ukuö miriã sa' ki taië. Erè ñies ie' batamik sa' er pablërke taië shute. <sup>6</sup>Sa' weine es, etã e' dör a' er pabloie, a' tsatkoie. Nies Skëköl tō sa' er pablé, etã ñies e' dör a' er pabloie as a' weirke wes sa' es ese dal'ëttsò a' tō er bua' wa. <sup>7</sup>Sa' wã ijcher tō a' weirke wes sa' es, erè ñies a' er pablërke wes sa' er pablërke es. E' kueki sa' wã ijcher buaë tō a' kè tō sa' eriwëpa.

<sup>8</sup>A yamipa, sa' ki ikiane tō a' wã ijcher tō sa' weine Asia e' dör darërè sa' a. Sa' diché kè dë'kã iwökl'öwoie. Sa' ibikeits tō kè sa' döpattsã ttsë'ka. <sup>9</sup>Sa' e' ttsë' wes s'wömenettsã ttëwã es. Erè e' wamblène sa' tã as kè sa' erblò sa' wákpa mik, e' skéie as sa' erblò Skëköl tō s'shke'wëkane e' wák mik. <sup>10-11</sup>Sa' ttekelur ñe' e' ulã a ie' tō sa' tsatkë'ttsã ena sa' tsatkeraëitö. Ie' dapömik sa' monekã darërè. A' sa' kímé S'yé a ikiök sa' ki, e'ma ie' tō sa' tsatkè michoë. A' taië tō iwé es, e' tã ie' tō sa' kimeræ e' ki wëstela cheraë ie' a se' taië tō.

### Ì kueki Pablo kè dë' Corinto

<sup>12</sup>Sa' er kè tō sa' kkatè ì ki, e' tō sa' ttsë'weke buaë. Këkraë Skëköl tō sa' a imè seno yësyësë e' batseitsök buaë er moki wa sulitane wö wa ena bua'ie a' wö wa. Sa' ser es, e' kè dör siwã iskí tso' kã i' a ese wa, e' dör Skëköl er buaë chò se' a e' wa. <sup>13-14</sup>Yëkkuö kos kitmi sa' tō a'

a, e' wà kè dör ttè blëulewà ese, iaritsmi a' a ena iwà armi a' éna. Eré wes sa' dör e' kè ane a' éna bua'ie, eré ye' ipaneke tò wekkè alè ta' a' éna iardaë seraa. E' dör es, e' ta' mik Skëképa Jesús datskene, età e' kéwö skà' a' e' ttsörakà buaë sa' wa wes sa' e' ttsörakà buaë a' wa es.

<sup>15</sup>Ye' ibikeitsé tò a' e' ttsékà ye' wa buaë, e' kuekì warma ye' ibikeitsé tò ye' mi' a' pakök bötökicha as a' ttsë'r buaë bötökicha. <sup>16</sup>Ye' ibikeitsé tò mik ye' mi'ke Macedonia, età warma ye' tkökemi a' pakök. Ye' datskene, e' ta' ye' damitköne a' pakök. Es a' a ye' kimermi shkoie Judea. <sup>17</sup>Eré kè ye' wà ione es. Ye' dé' a' pakök etökicha è, e' kuekì ç' a' ibikeitsé tò ye' kè wà iwà bikeitse buaë kewe? ç' A' ibikeitsé tò ye' ttò bötöt wes s'ditsö èse es? <sup>18</sup>Eré Skëköl ttò mokië, e' ttò wa ye' ichè a' a' tò ye' kè ttò a' ta' bötöt. <sup>19</sup>E' wà dör tò Jesucristo dör Skëköl Alà, e' kè ttò bötöt, ie' ttò etkëme. Ie' tté buaë paka' ye' ena Silvano ena Timoteo, e'pa tò a' a. <sup>20</sup>Ì kos uk Skëköl kablè', e' wéitö Cristo wa. E' kuekì mik se' nì dapa'uke Skëköl kükökka, età se' tò icheke: "Es e' idir" Cristo Jesús ttò wa. <sup>21</sup>Yi tò a' ena sa' kkö'neke as se' turlurie Cristo mik, e' dör Skëköl. Ie' tò se' shukitbak iwák a. <sup>22</sup>Ie' tò se' er wakyué ie' wák a. Nies iWiköl méitö se' a wes íyi tsá patuésö es ikkachoie tò se' tsatkeraitö da'a.

<sup>23</sup>Ie' wà ye' suule buaë e' wöwa ye' ichè a' a tò kam ye' done Corinto warma wes ye' ibikeitsé es, e' wà dör tò kè ye' éna a' kì eriawak. <sup>24</sup>Sa' wà ijcher tò a' erblöke buaë Jesús mik, e' wa a' tkënewa darërë. E' kuekì sa' tso' a' kìmuk er bua' wa as a' ttsë'r buaë. Kè sa' ku' a' patkök kësik wa a' erblöke e' iütök.

**2** E' kuekì ye' ibikeits tò ye' kè shkakne a' pakök a' eriawoie. <sup>2</sup>A' è tò ye' ttsë'wëmi buaë. Eré a' eriawéyö, e' ta' ç'yi tò ye' ttsë'wëmi buaë? <sup>3</sup>Warma a' ye' ttsë'wë buaë, e' kuekì yëkkuö iët kitmiyö

a' a e' kì a' pautyö darërë as a' e' shulò, età es a' kè tò ye' eriawepa. Ye' iklöo' yësyësé tò a' ulitane ttsë'rdaë buaë ye' ta' nita. <sup>4</sup>Mik ye' tò yëkkuö ñe' kit, età ye' eriane siarë, ye' chkenewà taië dö ye' iëttsaie ekkë. Eré kè ye' wà ikite a' eriawoie. E' skéie ye' ikitmi as a' éna iar tò a' dalër taië ye' éna.

### Yi tò ì sulu wamblè' e' nuí olo'yé Pablo tò

<sup>5</sup>Wëm tò kabene tski'ka a' shua ì sulu wambléitö e' wa, e' kè wà ye' è eriaone. Isalema ye' tso' ikì kuötkökka, eré ye' ichè tò wes alè ie' tò a' ulitane eriawé. <sup>6</sup>Kos a' kibiepa tò ie' kì inuí métké e' dör wë'. <sup>7</sup>Iñe ta' a' tò inuí olo'yó ikì ta' ikimú as kè ieriar taië kè er pablëneia ekkë. <sup>8</sup>E' kuekì ye' kköchò a' a' taië tò ikkachóne ie' a' tò moki' a' éna ie' dalër. <sup>9</sup>Yëkkuö ñe' kitmiyö a' a' isuoié tò ye' ttò iüté a' tò seraa ö au. <sup>10</sup>Yi isie nuí olo'yé a' tò ikì, ñies ese kì ye' tò iloyeke. Moki' yö ichè Cristo wöwa ena a' dalërmik tò ilè nuí tso' kiane olo'yé, e' ta' e' olo'yétkeyö <sup>11</sup>as Satanás kè e' alòka se' kì. Wes ie' éna se' sulu'wakwa, e' ane se' éna buaë.

### Tito kè dë' Tróade

<sup>12</sup>Mik ye' de ká kiè Tróade Cristo tté buaë pakök ee, età ye' isué tò Skëképa tò ye' a' ñalà yuétke buaë itté pakoie. <sup>13</sup>Eré s'yami Tito wà a' biyó done ye' a, e' kè kune ye' wà wes ikablè' es. E' tò ye' tkiwé kabikeitséka taië. E' kuekì ye' e' chéat Tróade wakpa a' ta' ye' miá Macedonia ie' yulök.

### Íyi ulitane kì se' e' alökami Cristo wa

<sup>14</sup>Eré wëstela Skëköl a! Këkraë ie' tò sa' wëttseke e' aloka íyi ulitane kì Cristo ta' nita. Sa' wa ie' tò Cristo tté buaë pakeke ká wa'ñe, e' dör wes kiö masmas alabur es. <sup>15</sup>Sa' tò Cristo tté pakeke, e' dör wes íyi alar masmas ña'wë Cristo tò Skëköl a' ikikoka es. Sa' dör wes kiö

mmas alar es. Erë wépa tsatkërke ena wépa kè tsatkërku' esepa bôltépa wôa ilâr kuâ'kî kuâ'kî. <sup>16</sup>Wépa kè tsatkërku' esepa a ttè pakeke sa' tō e' dōr wēs s'nu alar es, e' wa ie'pa duōralur e' kuekî. Erë wépa tsatkërke esepa a e' dōr wēs íyî alar buaë es, e' wa sene michoë dōraë ie'pa ulà a e' kuekî. ¿Yî dirmi ttè i' wakanéuk? <sup>17</sup>Tajë pé' tō Skëköl ttè pakeke inuköl è klō'woie, erë sa' kè dōr es. Ie' tō sa' patké ipakök, e' kuekî sa' tō ipakeke er moki wa ie' wōwa Cristo dalërmik.

### Skëköl ttè pa'alî e' wakanéukwakpa sa' dōr

**3** ¿Ima a' ibikeitsè tō sa' wákpa e' ttè chōke a' a? ¿Ima a' ibikeitsè tō sa' kî yëkkuō kiane sa' ttè choie a' a ö a' tō yëkkuō mēmi sa' a sa' ttè choie wēs wele tō iweke es? Yëkkuō ese kè kiane sa' kî. <sup>2</sup>A' wakpa dōr wēs sa' ttè choie yëkkuō es. E' kitule sa' er a sūule ena aritsule sulitane wā. <sup>3</sup>Iwēnewā wōshak tō a' dōr wēs yëkkuō kitmi Cristo tō patkēne sa' ulà a es. Yëkkuō e' kè kitule tinta wa, e' skéie ikitule Skëköl ichōkle e' Wiköl wa. E' kè kitule ákkue kî wēs ttè dalöiēno kite ákkue kî es. E' skéie ikitule a' er a.

<sup>4</sup>Sa' erblōke Skëköl mik Cristo batamik, e' è kuekî sa' tō a' ché es. <sup>5</sup>Sa' kè a iyēnuk tō kanè wé sa' tō a' shūa, e' dōr sa' wákpa diché wa. Skëköl tō sa' a ieri mé iwakanéwoie. <sup>6</sup>Ie' tō sa' a ieri mé ie' ttè pa'alî mēne se' a e' wakanéuk. Ttè e' kè datse ttè dalöiēno mēne ká iaiaë e' wa. E' skéie idatse Skëköl Wiköl wa. Ttè dalöiēno ñe' tō s'kichateta'ttsa erë Skëköl Wiköl tō sene michoë meke se' a.

<sup>7</sup>Ttè dalöiēno kēchke kitule ákkue kî, e' mēne ká iaiaë Israel aleripa a. Mik ttè e' tsá mēne, etā Skëköl olo bune tajë. E' klōne Moisés wō kî dalölöë dō imalepa kè wō dē'wā ie' wō sauk ekkë. Erë dalö e' chowamine enaena. Ttè ñe' mēne olo ta' tajë ikkachoie tō e' dōr ttè dalö ta' tajë

ese. <sup>8</sup>¡E' yitā Skëköl Wiköl kanè e' olo tkōka tajë ttè ñe' tsata! <sup>9</sup>E' wā dōr tō ttè tō s'kichateta'ttsa ñe' mēne dalö ta' tajë, ¡e' yitā ttè wa Skëköl tō s'klō'wemi wēs pé' buaë yēsyesē es e' pakè olo ta' tajë shute tkōka ttè tsá mēne e' tsata! <sup>10</sup>Moki ttè pa'alî e' olo ta' tajë shute, e' o'mik ttè iēt olo kè dōr ì. <sup>11</sup>Ttè kè dōr yōbiē e' de olo ta' tajë, ¡e' yitā ttè dōr yōbiē e' olo ta' tajë shute!

<sup>12</sup>Ttè e' wā paneke sa' tō kröröe, e' kuekî sa' tō iwā pakeke sulitane kukua kè suarta'. <sup>13</sup>Sa' kè tō iwëku' wēs Moisés tō io' es. E' wō pabakéwā datsi'tak wa as Israel aleripa kè tō isaü tō ie' wō dalö bune e' chowamine seraa. <sup>14</sup>Erë ie'pa er darē'newa, kè éna iwā ane. Ie'pa er pabakulewā wēs Moisés wō pabakwā es. Es ñies i'ñe ta' ie'pa aleripa er pabakulewā mik ie'pa tso' ttè kēchke mēne iyēpa bak e'pa a e' aritsök etā. Ie'pa er pabakulewā e' sirmittsa erblè Cristo mik, e' è wa. E' kuekî ie'pa icha kam sirttsa. <sup>15</sup>Dò ikkë ta, mik ie'pa tō yëkkuō kit Moisés tō e' aritseke, etā ie'pa er tso'ia pabakulewā. <sup>16</sup>Erë mik se' er mane'wé Skëkēpa a, etā se' er pabakulewā, e' sinettsa. <sup>17</sup>Skëkēpa e' dōr Skëköl Wiköl. Wé e' tso', etā ee se' yēnettsa ttè dalöiēno ulà a. <sup>18</sup>Es se' dōr wēs s'wō kè pabakulewā es, esepa kos kî Cristo olo wërke buaë wēs wōsuō es. Se' maner michoë as se' dō wēs Skëkēpa olo ta' tajë es. E' kos wakanewēke Skëköl Wiköl tō.

### Sa' dōr Jesucristo ttekölpa tsá

**4** Skëköl tō sa' sué er siarē wa, e' batamik kanè i' méitō sa' a. E' kuekî kè sa' e' chkeuwa. <sup>2</sup>E' skéie kè sa' tō iwakanewëku' blēule wēs ì dōr jaë ese es. Sa' kè ku' s'kitō'uk. Sa' kè ku' Skëköl ttè shutuōkkā kache ttè wa. E' skéie ttè moki pakeke sa' tō yēsyesē Skëköl wōa as sulitane wā ijcher tō ì ché sa' tō, etā es idir. <sup>3</sup>Erë Jesús ttè buaë pakeke sa' tō, e' pabakulewā, e' ta' ipabakulewā wépa

kichatërke esepa è yöki. <sup>4</sup>Ie'pa kè erblö-ta' Cristo mik. Bé dör ká i' kéköl, e' tò ie'pa er pabakéwa da'äie as kè ie'pa éna Cristo dör Skéköl wák suè olo ta' taië e' tté buaë wà ar. <sup>5</sup>Sa' kè tò sa' wákpa tté pakeku'. Sa' tò Jesucristo dör Skékëpa, e' tté pakeke. Sa' e' chò tò sa' dör wes a' kanè mésopa es a' kimoie Jesús dalèrmik. <sup>6</sup>Mik Skéköl tò ká i' yö', etä ie' iyè: "ká nínú," etä ká ñine. Ie' wák tò se' er ñi'wé as ie' olo taië burke Jesucristo wò kī, e' ar se' éna. E' kueki sa' tò ie' tté buaë e' pakeke sulitane a.

### Se' weirke ká i' kī, e' dör bërber è

<sup>7</sup>Jesús tté buaë, e' dör wes íyi bua'buwa ské darèrè es, e' meneat sa' a wakanewè. Erè sa' kè diché ta'. Sa' dör tottola wes skau es. E' dör iwà kkachöie tò diché wa sa' tò iwakanewéke e' meke Skéköl tò sa' a, e' kè dör sa' diché. <sup>8</sup>Eré kabene tso' sa' kī taië kekraë, erè e' kè e' alineka sa' kī. Eré sa' kè wà ijcher wes sa' e' ùmi, erè kè sa' e' òwa e' yöki. <sup>9</sup>Eré sa' bolökpa tò sa' tötieke, erè Skéköl kè wà sa' meneat. Eré sa' dettsa įski, erè sa' e' kökekane. <sup>10-11</sup>Se' tso'ia' tse'ka ká i' a, e' dalewa sa' chöke sa' bolökpa ulà a sa' ttekelur Jesús tté kueki wes ie' kötwarakitò es. Sa' weirke es as iwërwa sa' kī tò moki ie' shkenekane, e' tso' sa' ta. <sup>12</sup>Duewa dalò me'rie sa' kī, es sa' weirke a' dalèrmik as sene michoë dò a' ulà a. <sup>13</sup>Itso' kitule Skéköl yëkkuò kī wé yile tò iyè: "Ye' erblé imik e' kueki ye' iché."<sup>8</sup> Es ñies sa' erblöke Skéköl mik wes yi ñe' es, e' kueki sa' tò ie' tté pakeke. <sup>14</sup>Sa' wà ijcher tò ie' tò Skékëpa Jesús shkeo'kane ñies ie' tò sa' shke'werakane wes Jesús shkeo'kaneitò es, sa' batsulewa Jesús mik e' kueki. Aishkuò ta' ie' wà sa' miraë a' ta' ñita wé ie' tso' ee. <sup>15</sup>Sa' weirke kos e' dör a' kimoie as se' taië tò wéstela chò Skéköl a' ier buaë ché se' taië a' e' kueki.

E' wa ie' kıkardaka taië. <sup>16</sup>E' kueki sa' kè e' chkeuwa. Eré sa' chkà mir wa'k è, erè sa' er diché kī iërke kīta kīta ká bit ekkè. <sup>17-18</sup>İ kos sukesò s'wöbla wa ese erta'wa. Erè i' kos kè wërta' ese dör yöbië. E' kueki kè sa' er menewa i' sukesò ese kī. E' skéie sa' er me'rie i' kè wërta' ese kī. E' kueki sa' weirke siarè, e' kè dör taië sa' a, e' dör ekuölò è. E' wà dör tò e' wa i' dör buaë, olo ta' taië yöbië, e' doraë sa' ulà a taië shute tkòka kos sa' weine e' tsata.

**5** S'chka dör wes úla es, e' dör buaë senöie ká i' kī è. Se' wà ijcher tò mik se' úla i' panane, etä u yöbië tso'tke Skéköl wà se' a ká jai a. E' dör se' chkà pa'alī ser michoë yöule ie' wà e'. <sup>2</sup>E' kueki moki ká i' kī se' rrerke. S'chka pa'alī merke se' a aishkuò ta' ká jai a, e' kkecheke se' tò poë. Se' éna s'chka i' mane'waktke s'chka pa'alī wa wes datsi' mane'wesò es. <sup>3</sup>E' kiane se' kī as se' wiköl kè at aishkuò ta' kè chkà ta' wes se' sume es. <sup>4</sup>Se' tso'ia' se' úla i' a etä se' kköchöke se' serke chkeulewa wes dali' ekkè e' dik-ia es. Kè dör tò se' duakulurtke senöie chkà kè ta'. E' skéie se' éna s'chka i' mane'waktke chkà pa'alī ñe' wa as i' duö-ta'wa ese manerttsane i' ser michoë ese wa. <sup>5</sup>Skéköl wák tò se' kanewétke maneonuk ñe' es. Ie' tò i'Wiköl mé se' a wes íyi tsá patuësò es iwà kkachöie tò iwà doraë se' ulà a wake'.

<sup>6</sup>E' kueki kè se' tkirkū i' kī, erè se' wà ijcher tò se' tso' kamië Skékëpa yöki, se' tso'ia' tse'ka ká i' a e' dalewa. <sup>7</sup>İñe ta' ie' kè sunuk se' a, erè se' serke se' erblé ie' mik e' wa. <sup>8</sup>Kè se' tkirkū i' kī. Se' a ta' s'chka i' mú mèatsö, e' ta' es se' mía senuk ie' ska', e' dör ibua'ie. <sup>9-10</sup>Se' ulitane kawötä dökwa Cristo tkër s'shulo kulé kī e' wörki. Ee i' kos wé se' tò ká i' kī, buaë ena suluë, ese kkayërdaë ta' e' ské meraëitò se' a eköl eköl. E' kueki se' tso'ia' tse'ka ö se' mía ie' ta, erè kekraë

se' e' chöke senuk yësyësë as ie' wa iwër buaë.

### Skëköl er buarne se' kî e' pakè

<sup>11</sup> Sa' tō Skëkëpa dalöieke taië, e' kuekî sa' e' chöke darërë s'malepa pablök as ñies ie'pa tō ie' dalöiö. Skëköl wä ijcher buaë tō sa' er yësyësë, e' mú jcher a' wä ñies. <sup>12</sup> Sa' kè skà ku'ne e' tté chök a' a. E' skéie sa' tso' a' a kawö skà mukne e' ttsòka sa' wa. E' wa a' tō sa' tsatkëmi wépa tō sa' cheke suluë, esepa yöki. Ie'pa esepa e' ttsòka taië is imalepa wa iwër ese wa, kè dör is ie'pa er dör Skëköl wöa ese wa. <sup>13</sup> Sa' wër alije, e' tã e' dör Skëköl dalërmik. Kè sa' wër es, e' tã e' dör a' kimoie. <sup>14</sup> Sa' éna iane tō Cristo éna se' dalër taië, e' tō sa' ké senuk ie' a. Sa' éna iane tō ie' eköl è kötëwä sulitane skéie, e' wä kiane chë tō e' dör wës sulitane kötëwä es. <sup>15</sup> Ie' kötëwä sulitane skéie as se' tso'ia' ttsë'ka esepa kè seriä wës se' kî ikiane es, e' skéie as se' ser wës ie' kötëwä shkenekane se' skéie e' kî ikiane es.

<sup>16</sup> E' kuekî kè sa' ku'ia' s'malepa bikeit-sök wës ká i' wakpa tō ibikeitseke es. Kenet sa' tō Cristo bikeits es. Sa' ibikeits tō ie' dör se' ëse è. Erë i'ne tã sa' kè tō ie' bikeitseku'ia' es. <sup>17</sup> E' kuekî yi batsulewä Cristo mik, esepa er maneonettsä yöne pa'ali. Wës ie'pa bak senuk e' kè ku'ia', e' skéie isenémine pa'ali. <sup>18</sup> E' kos wé Skëköl tō. Ie' er buanene se' kî Cristo batamik. Ñies ttè buaë pakè e' kané me'itō sa' a. <sup>19</sup> Ttè buaë ñe' dör i' es: Skëköl er buarmine ká ulitane wakpa kî Cristo batamik kè ie'pa wöchakeku' inu kî. Ñies ie' tō ttè buaë e' me' sa' a wä pakè sulitane a. <sup>20</sup> Sa' dör Cristo ttekölpa. E' dör wës Skëköl wák kköchöke a' a sa' wa es. E' kuekî sa' kköchöke a' a Cristo ttò wa tō a' er bua'üne Skëköl a. <sup>21</sup> Cristo kè wä i' sulu wamblëne yës, erë Skëköl tō ie' su' wës i' sulu wamblökwa es se' skéie.

Ie' tō iwé es as se' batsulewä Cristo mik e'pa saütö wës iwák dör yësyësë es.

**6** Sa' kaneblöke Skëköl tã ñita, e' kuekî sa' kköchöke a' a tō ie' er buaë ché a' a, e' kè tsar é. <sup>2</sup> E' wä dör tō ie' tō ichë iyëkkuö kî i' es:

“Mik ye' er buaë chö be' a e' këwö de, etã be' kköchöke e' ttséyö.

Mik be' tsatkè e' këwö de, etã be' kíméyö.”\*\*

Ye' ttò ttsó: Skëköl er buaë chö a' a, e' këwö detke. Ie' tō a' tsatkè e' këwö de i'ne.

<sup>3</sup> Sa' e' kkö'nuke buaë kekraë sulitane wörki as kè yi tō Skëkëpa Jesús watöttsä sa' ukuömik. E' kè dör es, e' tã sa' kaneblöke Skëköl a' e' yërmi suluë. <sup>4-5</sup> E' skéie i' ulitane wa sa' tō ikkacheke tō mokî sa' dör Skëköl kané mésopa. Mikle tã sa' weirke, mikle tã sa' kè wä i' tã, mikle tã kawö darërë tköke sa' tã. Mikle tã sa' burke siarë, sa' wöterke, pè iërkeka taië sa' kî. Sa' kaneblöke darërë taië shute, wönirke taië, tteke bli tō. Erë e' kos dalë'ttseke sa' tō bèrë. <sup>6</sup> Ñies sa' tō ikkacheke sa' ser batse'r ena i' jcher se' wä e' wa. I' kos paneke sa' tō bèrë er bua' wa. Sa' er buaë chöke s'malepa a. E' kos wa sa' tō ikkacheke tō mokî sa' dör Skëköl kané mésopa. Iwënewä tō Wiköl Batse'r tso' sa' tã. S'malepa dalëritseke sa' tō er mokî wa. <sup>7</sup> Ttè mokî pakeke sa' tō. I' kos weke sa' tō diché meke Skëköl tō sa' a e' wa. Sa' serke yësyësë, e' dör sa' a wës tabè tso' ñippökwa pa wä ñippoie ena e' tsatkoie es. <sup>8</sup> Mikle tã sa' dalöierke, mikle tã kè sa' dalöierku'. Mikle tã sa' kikekeka buaë, mikle tã sa' cheke suluë. Sa' ttò mokî, erë mikle tã sa' sueke kachök-wakpaie. <sup>9</sup> Ie'pa wä sa' sùule buaë, erë ie'pa tō sa' sueke wës ie'pa kè wä sa' sùule es. Wësua sa' duökelurtke, erë sa' tso'ia' ttsë'ka. Ie'pa tō sa' we'ikè siarë, erë kè itö sa' ttélur. <sup>10</sup> Sa' eriarke taië, erë

\*\* 6:2 Isaías 49.8

sa' ttsërke buaë kekraë. Wësua sa' dör siarëpa, inuköl kè ta', erë Skëköl ttè wa sa' tò s'blu'wëke taië. Wësua sa' kè wà ì ta', ñermata ì ulitane tso' sa' wà.

<sup>11</sup> A Corinto wakpa, sa' ttöke a' ta' yësyësë. A' dalër taië sa' éna. <sup>12</sup> E' kè blène sa' wà a' yöki, erë a' je' tò iblé sa' yöki. <sup>13</sup> E' kuëki ye' kköchöke a' a' wës alà a' iyé kköchö es, sa' bikeitsó er bua' wa wës sa' tò a' bikeitseke es.

### A' e' batsótsa ì sulu kos e' yöki

<sup>14</sup> Kè a' e' batsök wépa kè erblöta' Jesús mik esepa ta. ¿Wës sene yësyësë batsmi sene sulu ta? ¿Wës ká ttsetse ena ká ñí a' e' shuirimiká ñita? <sup>15</sup> ¿Wës Cristo ena bé sermi bèrè ñita? Yi erblöta' Jesús mik ena yi kè erblöta' imik ¿wës esepa batsmi ñi mik? <sup>16</sup> Se' dör wës Skëköl ichök e' wé mokí es. E' kuëki ¿wës e' ñi sini'kumi íyi diököl tso' dalöiè ese ta? E' ye' Skëköl tò i' es:

“Ye' serdaë ie'pa shua,  
Ye' shköraë ie'pa ta ñita;  
Ye' döraë ie'pa Këköl  
ena ie'pa döraë Ye' icha.”††

<sup>17</sup> E' kuëki ñies Skëköl tò iyë':

“A' e' yótsa, a' e' skótsa bänet pè' kè tò ye' dalöiè esepa yöki.

Ì kos dör ná ese kè kar e' ta' Ye' tò a' kierawa buaë.

<sup>18</sup> A' serke es, e' ta' Ye' döraë a' yéie ena Ye' tò a' klö'weraë Ye' alarie.

Ye' dör Skëköl diché ta' taië íyi ulitane tsata,  
e' wák tò iché es.”‡‡

**7** A yamipa dalër taië ye' éna, es se' a' Skëköl kablé' e' kuëki se' e' paiklò sene sulusi kos tò se' er ena se' chká ia'wëmi, e' yöki. Se' e' chò senuk batse' r kekraë, ie' dalöiè taië e' wa.

### Pablo ttsë'wé buaë Corinto wakpa tò.

<sup>2</sup> Sa' bikeitsó er bua' wa! Kè sa' wà ì sulu wamblène yi ta. Kè sa' wà yi weine yës. Kè sa' wà yi kitène kache tté wa. <sup>3</sup> A' dalër taië sa' éna, e' kuëki kè ye' ku' ttè i' chök a' kkatöie. Ye' tò a' a' iyë'baktke kuaë tò sa' tò a' bikeitsé michoé dö sa' duolur ekké. <sup>4</sup> Ye' erblöke buaë a' mik. A' wa ye' e' tséka taië. Sa' weirke kos e' shua ye' er künene buaë. Ye' ttsë'ne buaë shute.

<sup>5</sup> Sa' de Macedonia ta kè sa' wà kawö kune enoie. E' skéie kabene kí de taië sa' kí. Taië sa' tsiriwé sa' bolökpa tò. Ñies sa' suane taië. <sup>6</sup> Erë Skëköl tò s'er pableke, e' tò sa' er pablé s'yami Tito de sa' ska' e' wa. <sup>7</sup> Kè dör tò ie' de e' è kuëki. Ñies wës a' tò ie' er kuwé e' biyö tò sa' er pablé taië. Ie' tò sa' a' iché tò suluë a' éna ye' suak. Ñies ie' iché tò ì wamblé a' tò sulu, e' tò a' eriawé taië ta' ñne ta' a' tso'ne ye' tsatkök. Ttè e' tò ye' kí ttsë'wé buaë.

<sup>8</sup> Yëkkuö patkë'miyö a' a, eré e' tò a' eriawé, erë kè ye' tkine tò iók ye' tò ipatkë'mi. Tsawe ta' ye' ttsë'wéitö sulu, erë ñne ta' kè ye' ttsërku'ia es. Mokí yëkkuö e' tò a' eriawé, erë e' dör ekuölö è. <sup>9</sup> Ñne ta' ye' ttsë'ne buaë. E' kè dör tò ye' tò a' eria' e' kuëki. E' dör tò a' eriane es, e' tò a' er mane'wéne Skëköl a. A' eriane wës Skëköl kí ikiane es, e' kuëki sa' kè wà a' suluone yës. <sup>10</sup> Mik se' eriane wës ie' kí ikiane es, eta' e' dör se' er mane'woie ie' a' as se' tsatkër. E' kuëki kè se' kàne ttsë'nuk suluë se' eriar ese kí. Erë se' eriar èse, kè mène Skëköl wà, ese tò duëwà tskeke. <sup>11</sup> A' eriane wës Skëköl kí ikiane es, e' saü, jiwà dettsa buaë! E' wà bikeitsó. E' batamik a' er téwà darërè ta' a' ñi kékarak wëm tò ì sulu wamblé a' shua, e' shulök. E' wa a' tò ikkaché tò a' kè ku' ì sulu e' a. Iwënewa tò a' e'

††6:16 Levítico 26.12; Jeremías 32.38

‡‡6:18 2 Samuel 7.14; Isaías 52.11; Ezequiel 20.34,41

tuléwajie darërë. Ì sulu e' tò a' uluwé a' suawéitò. Iwënewā tò a' éna ye' dalène tajë. Iwënewā tò a' tso'tke ì sulu shulök. E' kos wa iwënewā tò mokì a' kè ku'ñak ì sulu ñe' a. <sup>12</sup>Ye' kè wā yëkkuö ñe' kitemi a' a wëm tò ì sulu wamblë' ñe' kkatoie. Ñies ye' kè wā ikitemi yi ta iwamblëitò e' tsatkoie. E' skéie ye' tò ikitmi as a' wákpa éna iar buaë Skëköl wöa tò mokì a' tò sa' bikitseke tajë. <sup>13</sup>Ì wé a' tò, e' tò sa' er kí kuwéne buaë.

E' kúie ta a' tò Tito er kuwé tajë. Ie' ttsë'ne buaë e' tò sa' kí ttsë'wé buaë. <sup>14</sup>A' kika'kayö ie' a ta a' kè wā ye' jaëone. Kekraë sa' ttò mokì a' ta, ñies ima sa' e' ttséka a' wa Tito kukua, e' suéitò tò e' dör mokì. <sup>15</sup>A' tò ie' kiéwā suane wa painè wa ena a' tso'tke ie' ttò dalöiök, mik e' ska' ie' er ane etā e' tò ie' ké a' kí dalërit-sök tajë. <sup>16</sup>Ye' erblömi a' mik e' tò ye' ttsë'weke buaë.

### Se' er buaë chò siarëpa kimoie

**8**A yamipa, sa' éna a' a ipakak tò wes Skëköl er buaë ché Skëképa icha erule erule ñi dapa'uke Macedonia kos a, e'pa a. <sup>2</sup>Ie'pa weine siarë iyi ulitane ulā a, erë e' shuā ie'pa ttsërke buaë. Ie'pa dör siarë, kè ì ta' tajë, erë ie'pa tò inuköl kakké er bua' wa. Wësua ie'pa dör inuköl blúpa. <sup>3</sup>Ye' tò a' a ichè tò ie'pa imé kos ie'pa a imermi, e' tsata iwákpa er wa. <sup>4</sup>Ie'pa kköché tajë sa' a tò ñies kawö mú sa' a s'batse'r malepa serke Jerusalén, e'pa kimoie inuköl wa. <sup>5</sup>Ie'pa tò imé tajë shüte, sa' kè wā ibikeitse tò ie'pa a imermi ekké. Kewe ie'pa wákpa e' mé Skëképa a, e' ukuöki ta ie'pa e' ché sa' a wes Skëköl kí kiane es. <sup>6</sup>E' kueki sa' tò ikié Tito a tò ie' mi'ne a' ska' inuköl tsá kititò a' shu a e' bata shtöktsā s'siarëpa kimoie. <sup>7</sup>Ì kos weke Skëköl a e' weke a' tò tajë. A' erblö buaë Jesús mik. A' tò ttè paké buaë. A' wā iyi jcher tajë. Sulu a'

éna s'malepa kimak. Sa' dalër tajë a' éna. E' sù sa' kí ikiane tò ñies a' er buaë chò tajë s'siarëpa a.

<sup>8</sup>Ye' kè ku' ichök a' a' patkoie. E' skéie ye' éna isuak tò mokì a' éna s'malepa dalër wes s'yamipa tso' Macedonia e'pa éna s'malepa dalër es. <sup>9</sup>A' wā ijchertke buaë tò Skëképa Jesucristo er buaë ché a' a tajë. Ie' iyi tso' tajë ká ja' a, e' me'atitò dë'bitu ká i' a siarëpaie a' dalërmik as a' blur ie' iyi tajë wa.

<sup>10</sup>A' tò ibikeits kewe sulitane yöki tò a' éna s'siarëpa kimak. Dwas suköt bak e' wa a' tò iwā kímémi kewe. E' kueki ima ye' tò ibikeitsè, e' chekeyö a' a. <sup>11</sup>Kanè buaë o'mi a' tò, e' eúwa er bua' wa wes tsawe a' tò ibikeits es. Inuköl shtó s'siarëpa kimoie kos a' a ikit ekké. <sup>12</sup>Ì kè ta' se' wā, ese kè kiekü' Skëköl tò se' a. Erë ì tso' se' wā ese kakkésö er bua' wa kos se' a imer ekké, e' ta' e' wër buaë ie' wa.

<sup>13</sup>Ye' kè ku' ichök tò a' iyi kakkú etā a' atne weinuk kè wā ì ta'. E' skéie buaë idir tò a' ñi kímù ñikké. <sup>14</sup>I'ne ta' a' wā iyi tso' tajë, e' kueki buaë idir tò a' tò s'yamipa kè wā ì ta', esepa kímù. Es aishkuö ta' mik a' kè wā ì ta' tajë, erë ie'pa wā itso', etā ie'pa tò a' kímémi. Es a' ulitane ñi kímùmi ñikké. <sup>15</sup>E' dör wes itso' kitule Skëköl yëkkuö kí es, e' tò ichè: "Wé tò ishtë tajë, e' icha kè bata atë. Wé tò ishtë bërëbërë, e' icha deka wë.""<sup>16</sup>

### Tito ena iwapiepa

<sup>16</sup>Skëköl tò Tito erkiöwé a' kímuk wes sa' éna a' kimak es. E' kueki ye' tò wëstela cheke Skëköl a. <sup>17</sup>Mik sa' tò ikié Tito a' tò ie' mi' a' ska' a' kímuk inuköl shtök, etā ie' éna a' kimak tajë, e' kueki ie' e' ché iwák er wa minuk a' ska'. <sup>18</sup>Tito ta' s'yami skā patkekemi sa' tò eköl. E' tò Jesús tté buaë pakeke buaë ká wa'ñe. E' kueki ie' tté cheke buaë Skëképa Jesús

icha erule erule tso' ká wa'ne e'pa tó. <sup>19</sup>E' k'íie tã ie'pa kos tó ie' shushtë as imi' sa' tã Jerusalén, inuköl shteke sa' tó e' muk. E' kaneweke sa' tó buaë Skëképa kíkoka ena iwà kkachioie tó mokí sa' éna ie'pa kímak. <sup>20-21</sup>Sa' e' chòke iwakanéuk buaë Skëképa wörki ñies sulitane wörki. E' kueki wëm ñe' mi'ke sa' wã, e' wa kè yi a' sa' kkatènik inuköl shteke tajë sa' tó e' ki.

<sup>22</sup>Ñies sa' tó s'yami skà patkeke ie'pa bõl ta. E' er merie kaneblok buaë kekraë. Bãnet sa' tó ie' su'bitu, e' kueki ie' suule buaë sa' wã. Ñies ie' isué tó a' dör pë buaë, e' kueki ie' e' ché sa' kímuk kanè i' wa. <sup>23</sup>Tito dör ye' wapie e' kanebloke ye' tã a' kímuk. S'yamipa bõl ñe' mi'ke ie' tã, e'pa patké Skëképa Jesús icha eruleë tso' ká wa'ne e'pa tó. Ie'pa wa Cristo kíkarkeka. <sup>24</sup>E' kueki ikkachó ie'pa a' tó ie'pa dalër a' éna as Skëképa icha eruleë tso' ká wa'ne e'pa kos wã ijcher tó mokí a' tó s'dalëritsetã'. Ikkachó ie'pa a' tó wëe' sa' e' ttsòka tajë a' wa.

**9**<sup>1-2</sup>Ye' wã ijcher tó s'batse'r malepa serke Jerusalén, e'pa kímak a' éna er bua' wa. E' kueki inuköl shteke sa' tó ie'pa a, e' ki ye' kè kawõtã a' a' yëkkuö skà shtökne. Kekraë ye' e' ttsòkeka a' tté pakök Macedonia wakpa a. Ye' iché ie'pa a' tó duas suköt bak e' wa a' dör Acaya wakpa, e'pa éna inuköl mak er bua' wa. E' tó ie'pa kibiie erkiowé. <sup>3</sup>Erë s'yamipa mañal ñe' patkekeyö a' ska' as ye' e' ttsòkeka a' wa e' kè dör é. E' skéie ye' ki ikiane tó a' wã inuköl tso'tke kitule wà mè è wës ye' tó a' pakè es. <sup>4</sup>Dö' Macedonia wakpa döbitu ye' tã e'pa tó isuéwã tó kãm a' tó inuköl e' shtë. E' tó sa' jaëweraë tajë sa' iklówé tó a' tó ishtétke e' kueki. ¿Wes e' kè tó a' jaëwepañak? <sup>5</sup>E' è kueki ye' ibikeitsé tó buaë idir s'yamipa mañal ñe' a' ikiök tó ie'pa mi' ye' yöki kewe a' kímuk inuköl muk a' kablë' e'

shtöktsã. Es inuköl meke a' tó e' tso'tke kitule mik ye' de eta, iwà kkachioie tó a' imeke er bua' wa, kè dör kké'blè wa.

<sup>6</sup>Ttè i' anú a' éna: “Yi tó ì kuantké elkela, ese ulà a' iwà wördane elkela. Erë yi tó ì kuantké tajë, ese ulà a' iwà wördane tajë.” <sup>7</sup>A' ulitane eköl eköl tó imú kos a' ibikeitsé mè ekkè. Wépa tó imeke ttsé'ne bua' wa esepa dalër Skëköl éna, e' kueki kè imar er sulu wa ö diché wa. <sup>8</sup>Kè a' tk-inuk. Skëköl er bua' kí chõmi a' a' tajë as ì kos kiane a' ki senoie ese dò a' ulà a' wë kekraë. Ñies ie' tó iki mèmi a' a' tajë shute as a' ulà a' idò tajë ì buaë kos e' wõie. <sup>9</sup>E' dör wës itso' kitule Skëköl yëkkuö ki es. E' tó, yi tó ì meke er bua' wa, ese chë i' es:

“Ie' tó ikakme' tajë er bua' wa s'siarëpa a;  
Ì buaë wéitö e' ska' Skëköl er arke kekraë.”<sup>§§</sup>

Es Skëköl yëkkuö tó ichè. <sup>10</sup>Skëköl tó iwö meke kuantké ena chkè mekeitö se' a' ñè, ñies e' è tó ì kos kiane se' ki s'kimoie, ese kí meraëitö a' a' tajë as a' tó ì buaë ese kí ù tajë. <sup>11</sup>Kekraë ie' tó a' a' iyi kí meraë buaë wë' as a' tó s'malepa kímù buaë kekraë. Ie' tó iweraë es as wëstela yër tajë ie' a' inuköl mèmi a' tó sa' ulà a' e' ki. <sup>12</sup>Es ì meke a' tó i' Skëköl dalëioie, e' wa s'batse'r malepa kímè kiane, esepa ulà a' ì kiane ie'pa ki ese döraë. E' k'íie tã ie'pa tó wëstela cheraë tajë ie' a' ttsé'ne bua' wa. <sup>13</sup>Ì buaë weke a' tó ie'pa kimoie, e' wa iwërdawã tó mokí a' tso' Cristo tté buaë cheke a' tó tó mokí idir e' wã iütök. Ñies iwërdawã tó a' tó ie'pa ena sulitane kimeke tajë er bua' wa. E' kos kueki ie'pa tó Skëköl kikerakã tajë. <sup>14</sup>E' k'íie tã ie' er buaë ché a' a' tajë shute, e' kueki ie'pa tó ikieraë ie' a' a' ki a' dalëritsè tajë e' wa. <sup>15</sup>Wëstela chòsö Skëköl a' ilà méitö se' a' e' ki, e' dör buaë shute kè se' a' iyënik ekkè.



**Pablo tò kanè me' Skèköl  
tò ie' a, e' tsatké**

**10**<sup>1-2</sup>Ye' dör Pablo, e' wák kköchöke a' a bèrè er bua' wa wés Cristo es tò ye' ttò tso'. A' welepa tò sa' cheke tò sa' kaneblöke e' kè dör Skèköl a, e' dör sa' wákpa a wés s'ditsö malepa es. Ie'pa icheke tò mik ye' tso' a' ska', etä ye' kèsik kè ta' a' uñoie. Erè mik ye' tso' yèkkuö shtök ká bánet, e' je' ta' ye' kèsik deka. Erè e' kè yène. Ye' kèsik ta' yi isie tso' ye' chök ese uñoie darèrè. E' kueki ye' kköchöke a' a tò a' e' shuló as kè ye' kawöta a' unuk darèrè mik ye' de a' ska' etä. <sup>3</sup>Moki sa' dör s'ditsö wés sulitane es, erè kè sa' ñippöku' wés s'ditsö ñippöke es. <sup>4</sup>Ì tso' sa' wa e' aloka ì sulu ki, e' kè dör wés ì tso' s'ditsö wa e' aloka ibolökpa ki es. E' skéie e' dör ì meke Skèköl tò sa' a diché ta' taiè e' aloka ì sulu diché ki ese. E' wa sa' tò kache ttè ewekewa. <sup>5</sup>Ñies ttè kos pakarke e' tsekä wa s'wöklö'woie as kè s'wa Skèköl jcher, ese chöwekewa sa' tò. Erbikè kos klö'wekewa sa' tò mekerö Cristo klò dikia as itö ittò iütò. <sup>6</sup>Mik a' de sa' ttò iütök buaè, etä sa' tso'tke wépa kè éna iütak, esepa kos we'ikök.

<sup>7</sup>A' tò pè' sueke ikikke è, e' kè dör buaè. A' welepa e' bikeitsö tò e'pa è dör Cristo icha, e' ta' as esepa tò ibikeitsöne. Ñies sa' dör Cristo icha wés ie'pa es. <sup>8</sup>Skèköl tò ye' a ikéwö me' a' wöbla'woie. Isalema e' wa ye' e' tso'ka taiè shute. Erè e' kèwö mène ye' a' a' er diché ki ioie, kè dör a' sulu'woie. E' kueki kè ye' jaène e' tso'kka ikéwö mène ye' a' e' wa. <sup>9</sup>Kè a' tò ibikeitsar tò ye' éna a' tkiwak yèkkuö shtekeyö a' a' e' wa. <sup>10</sup>Welepa tò icheke: "Yèkkuö kos kitbitu Pablo tò se' a, e' ki ie' tò se' uñébitu darèrè tseskua ie' kèsik deka buaè se' unuk. Erè mik itso' se' ska' etä ikèsik kè ta' yès. Wés ie' kapakò e' kè

wa yi wa ie' dalöiene." <sup>11</sup>Wépa tò icheke es, esepa wa ijchenú tò mik sa' demi a' ska' etä ì kit sa' tò yèkkuö ki ká bánet, e' waweraè sa' tò.

<sup>12</sup>Ie'pa esepa ñi kikökeka taiè. Kè sa' diché dè'ka e' chök tò sa' dör buaè wés ie'pa e' chö es. Ie'pa wákpa tò itské ier wa tò ì dör buaè wè. Wés ie'pa wakpa serke e' wéwa ie'pa ñi saü. jE' kueki ie'pa dör me'ukuöie! <sup>13</sup>Kanè me' Skèköl tò sa' a, e' è wa sa' a e' tso'ermika. Kè sa' a e' tso'enukka ì skä wa. Kanè mène sa' a ñies e' wà dör a'. <sup>14</sup>E' kueki kè sa' ku' e' tso'kka taiè shute. Sa' kè döpä kewé kaneblök a' shua, e'ma é sa' e' tso'ka. Erè sa' tò Cristo ttè buaè e' paka' a' a' tsawe. <sup>15</sup>Ñies sa' kè e' tso'ka o'ka kanè wa, e' kèwö kè mène Skèköl wa sa' a' e' kueki. E' skéie sa' ki ikiane tò sa' kanè a' shua e' mú ki ier buaè wés a' ki erblö mir Skèkëpa mik es. Erè kè sa' kaneblöpa kos sa' a' ikéwö mène e' tsata. <sup>16</sup>Ñies Jesús ttè buaè e' ki pakak sa' éna a' serke ee ká bánet tso' diwö mi'kewa e' kke ee. Erè kè sa' éna ipakak ká wé o'ka tso' ipakök ee as kè sa' e' tso'ka o'ka kanè wa.

<sup>17-18</sup>Wépa e' tso'ka taiè, esepa kè wër buaè Skèköl wa. Erè wépa kikéka ie' wák tò, esepa je' wër buaè ie' wa. Wèe' itso' kitule iyèkkuö ki i' es: "Yi e' tso'kka as ese e' tso'ka ì wé Skèköl tò ese wa."\*

**Pablo tò s'kitö'ukwakpa ché**

**11** Ye' ttöke aliwakpaie erè a' mú tò ye' dalè'ttsèia bèrbèr è. A' we'ikèyö, ye' ttò ki tso' ekuölö è. <sup>2</sup>Ye' éna a' dalèr taiè. Ye' éna a' kk'nak wés Skèköl tò se' kk'neke es. Ye' ki ikiane tò a' e' tköwa kekraè darèrè Jesús è a. E' dör wés ye' tò a' mé senukwa wém eköl è ta' es as a' dò wés busi bats'e' dò imaso ulà a' es. A' maso e' dör Cristo. <sup>3</sup>I'ne ta' a' tso' tkèulewa buaè darèrè Cristo è a, erè ye' suane dö' a' e' mütsa e' kitö'uk

\*10:17-18 Jeremías 9.24

wes Eva kitöo'ka Satanás e' a' tkabèie e' tò kache wa es. Ye' suane dö' a' er tso' buaë etkème Cristo è a, e' watè a' tò. <sup>4</sup> Welepa de a' ska' Jesús tté pakök, erè kè idör imokì wes sa' tò ipakeke es. Erè e' tseke a' tò buaë. Wiköl tté pakeke ie'pa tò, e' kè dör Wiköl Batse'r dè'wa a' er a e'. Ttè buaë pakeke ie'pa tò, e' kè dör imokì wes sa' tò ipaka' a' a es. Erè esepa kiekewa a' tò buaë. E' kuekì ye' suane dö' a' er-blò Cristo mik, e' olo'yène a' tò. <sup>5</sup> Ie'pa de a' ska' sa' itöki e' chök tò ie'pa dör Jesús ttekölpa tsá bua'iewa, erè ye' kè e' tse'ne ie'pa dikia diöshet yès. <sup>6</sup> Isalema ye' kè a ipakar buaë wes ie'pa icha pakò es. Erè tté pakeke ye' tò e' wà jcher buaë ye' wa. E' wà kkay'bitu sa' tò a' a taië íyi ulitane shua.

<sup>7</sup> Mik ye' tò Skèköl tté buaë e' paka' a' a, eta ye' kè wa a' ña'one e' kì yès. E' kuekì isalema a' tò ibikeitsé tò tté pakeke ye' tò a' a, e' kè dör buaë. Erè es ye' e' wöewa diöshet as a' dalöier. ¿Ima a' tò ibikeitsè? ¿Ì wéyò es e' dör sulué? <sup>8</sup> Skèkèpa icha erule erule ñi dapa'uke ká bánet, e' dapömik ye' moneka kanebloie éme a' shua. E' dör wes ie'pa íyi ekiblélyö a' kimoie es. <sup>9</sup> Mik ye' sene' a' shua, eta ilè kiane ye' kì senoie, e' ta ye' kè wa a' tsirione ese wa. Erè s'yamipa datse Macedonia, e'pa wa ì kos kiane ye' kì e' de ye' a. Es ye' kè wa ì kine a' a, ñies kè yò ì kiepa. <sup>10</sup> Ye' e' tso' es e' kè yenuktsa ye' ulà a' a' dör Acaya wakpa e' kos a. E' dör mokì wes Cristo tso' ye' a' e' dör mokì es. <sup>11</sup> Ye' ttò es, ¿e' dör tò ye' kè éna a' dalër? Au, e' kè dör es. ¿Skèköl wák wa ijcher buaë tò ye' éna a' dalër!

<sup>12</sup> Ye' kaneblöraë a' shua wes ye' io'bitu es as ie'pa ñe' kè e' tso'ka tò ie'pa kanebloke wes sa' es. <sup>13</sup> Ie'pa kè dör Jesús ttekölpa tsá mokì esepa. Ie'pa dör s'kitö'ukwakpa. Ie'pa e' ò tò ie'pa dör Cristo ttekölpa tsá mokì, erè e' kè dör es. <sup>14</sup> E' kè dör ì kè suule se' wa ese. Satanás

wák e' ò tò ie' dör Skèköl biyöchökwak olo ta' taië ese. <sup>15</sup> E' kuekì kè se' tkine tò ie' kanè mésopa e' ò tò ie'pa tso' sene yèsyèsè e' tsatkök. Bata ekkè ta' ie'pa ulà a' iské döraë wes ie' wamblörak es.

### Pablo weine ie' dör Cristo tteköl e' kuekì

<sup>16</sup> Ye' tò iskà chène a' a, kè a' tò ye' bikeitsök tò ye' dör aliie. Erè a' welepa tò ye' bikeitsè es, eta kawö mú ña bër-bër è e' tso'ka wes aliwak es. <sup>17</sup> Ye' e' tso'keka, e' tté kè mène Skèkèpa Jesús wa ye' a. Ye' wák tò icheke aliie. <sup>18</sup> Taië itso'rak e' tso'kka iwákpa íyi wa, es ñies ye' e' tso'keka wes ie'pa es. <sup>19</sup> ¡Aj! A' dör íyi jcher taië ese wakpa. Erè s'kukuò darèrè esepa dalè'tseke a' dör er bua' wa. <sup>20</sup> Wépa de a' ska' a' klö'ukwa wes ie'pa icha es, esepa kiekewa buaë a' tò. Ie'pa de a' kitö'uk a' íyi yottsá a' ulà a. Ie'pa e' tso'ke taië a' kì, a' ppeke a' wö kì, a' cheke erè ie'pa kiéwa a' tò er bua' wa. <sup>21</sup> ¡Aj! ¡Ye' wák e' jaèune mik ye' ichè tò sa' diché kè dè'ka a' sauk es eta!

Ie'pa diché deka e' tso'ka taië, e' ta ñies ye' diché deka e' tso'ka. Ye' wák a ta ye' ttò es, e' dör wes aliwakpa ttò es. <sup>22</sup> Ie'pa dör hebreowak, e' wa ie'pa e' tso'keka taië. Erè ñies ye' dör ie'pa ditséwö. Ie'pa e' chò tò ie'pa dör Israel aleripa, erè ñies ye' dör Israel aleri. Ie'pa e' tso'keka taië tò ie'pa dör Abraham aleripa. Ñies ye' dör Abraham aleri. <sup>23</sup> Ie'pa e' chò tò ie'pa dör Cristo kanè mésopa. Es ye' dör ñies, erè ye' dör ikanè méso bua'ie ie'pa tsata. Ye' ttò es e' dör wes aliwak ttò es, erè Cristo a kanèblè e' wa ye' e' aléka taië ie'pa kì. Ye' wötèule s'wöto wé a taië ie'pa tsata. Ye' buule tsa'bata daloie ese wa taië shuté ie'pa tsata. Taië ye' bakshkar ye' duòwa e' ulà a. <sup>24</sup> Sketö-kicha judiowak tò ye' buk tsa'bata wa. Bitökicha ie'pa tò ye' ppé, eta ie'pa tò ye' ppé dò dabom tkéyök tsá yènettša

et ekkē† 25 Mañatökicha romawak tö ye' buk kal wa. Etökicha ye' tērakitō ák wa ye' ttowa. Mañatökicha kanò kī ye' mir-wa, e' wötunewa dayē a. E' shua etökicha ye' bak ar kaltakla kī dayē kī ká et ñiē nañeē. 26 Ye' shkē taiē, e' shua di' taiē ena akblökwakpa tö ye' tkiwé siarē. Ye' wák ditséwöpa ena o'kapa, e'pa tö ye' we'ikeke, e' dalò taiē e' shua ye' shkē. Wé pé' serke taiē ena wé pé' kè serku' taiē, ñies dayē kī, ese ska' ye' shkē wósh wa. Ñies wépa e' ò tö ie'pa dör Jesús mik erblökwakpa, esepa dalò mène taiē ye' kī. 27 Ye' kanéblé taiē darērē. Ye' wōñine taiē, ye' bli dalē'ttsē' taiē, ye' ersi dalē'ttsē' taiē. Mikle ta ye' kè wa ì kune ñanoie, tteke kase tö taiē, kè datsi' ta' wē' e' patroie.

28 E' kī skà tso', e' dör tö Skékēpa Jesús icha erule erule, e'pa kos bikeitseyö kekraē tö is ie'pa mir. 29 Mik ie'pa welepa diché kè dē'kaia buaē e' tkowa darērē Jesús mik, etā ye' mik e' dalēne. Mik yile tö ie'pa ké ì sulu wamblök, etā e' tö ye' uluwé suluē. 30 Ye' mú e' ttsakka, e' ma ì tö ikkacheke tö ye' kè diché ta' ese wa ye' e' ttsömika. 31 Skéköl dör Skékēpa Jesús Yé ena ikéköl kīkarka kekraē, e' wa ijcher tö ye' kè ku' kachök. 32-33 Mik ye' bak Damasco, etā ká e' wókir kanéblöke iblú kiē Aretas e' a, e' tö ishékīpa patké ye' klö'ukwa ká e' kkoieule shkit kakkeē, e' wékkö a. Erē s'yamipa welepa tö ye' iéka kkó a ta tsa' wa ye' émi enaena iwékkö tsitsir tso' ese a dötsa iski. Es ye' tkashkar ie' yöki.

Ì kkaché Skékēpa tö Pablo a kabsueie

**12** Kè dör iie bua', erē ye' kawö-ta kī e' ttsökkaia e' tsatkoie. Ì kkaché Skékēpa Jesús tö ye' a kabsueie e' pakekeyö a' a' i' ta. 2 Wém sūule ye' wa eköl dör Cristo ttökata, e' minetser ká jai

a, e' kī duas de dabom eyök kī tkél (14). Ye' kè wa ijcher tö ie' mine'ka chkaē ö wikölie, e' jcher Skéköl è wa. 3-4 Wém e' sūule ye' wa, e' minetser ká jai a e' dör ká buaala ee. Ee ttè kè yēnuk se' a ena kè se' a ikéwö mène chē, ese ttséitō. Iskà chekeneyö a' a' tö ye' kè wa ijcher tö imine'ka chkaē ö wikölie, e' jcher Skéköl è wa. 5 Wém ese kīkēmika ye' tö, erē ye' wák kè e' kīkōpaka. Erē ye' diché kè ta' e' è wa ye' e' kīkōmika. 6 Ye' mú e' ttsakka, e' ma ye' a e' ttsēmika ttè mokī wa, e' kuekī e' kè dör suluē. Erē kè ye' e' tsötā'ka as kè yi ibikeitsō tö wes ye' wēr ena wes ye' ttō e' tsata ye' dör. 7 Ýi taiē buaē kkayēne ye' a ká jai a, ñe' kuekī ilè mène ye' a ye' wōowaie as kè ye' e' ttsōka ì buaē sū'yō e' wa. E' dör wes dika' tkēr-wa ye' chkà a es, e' wa ye' rrewēke Satanás tö kekraē. 8 Mañatökicha ye' kköyē' Skékēpa a tö iyóttsa ye' a. 9 Erē ie' ye' iutē: "Mik be' diché kè ta', etā e' kī Ye' diché wēnewa bua'iewa. E' kuekī ye' er buaē chò be' a, e' è dör wē' be' a." E' kuekī buaē idir ye' a e' ttsökka ye' diché kè ta' e' wa as Cristo diché taiē e' wērwa bua'iewa ye' kī. 10 Mik ye' ttsē'r tö ye' diché kè ta', e' je' ta ye' diché ta' taiē. E' kuekī mik ye' diché kè ta', mik ye' yērke suluē, mik ye' kè wa ì ta', mik ye' we'ikeke siarē pé' tö, mik ye' kawō tköke suluē, mik ese kos tköke ye' ta Cristo dalērmik, etā ye' ttsē'ne buaē.

11 Erē ye' kè dör yi, erē wēpa cheke a' tö tö e'pa dör Jesús ttekölpa tsá bua'iewa, e'pa kè dör ye' tsata. A' tö ye' tsatkōpa ie'pa yöki erē e' kè one a' wa. E' kuekī a' tö ye' ké e' ttsökka taiē wes aliwak es. 12 Mik ye' bak senuk a' shua, etā ye' weine kos e' dalē'ttséyö bèrē er bua' wa. Ñies ì kè or yi a ese wéyō taiē a' wörki Skéköl diché taiē wa s'tkiwē ekkē. E' wa iwēnewa tö mokī ye' dör Jesús

†11:24 *dabom tkëyök tsá yēnettsa et:* E' kēwō ska' ta judiowak ttè dalöiēno tö ichē tö kè kawō ta' s'ppök dōka dabom tkëyök tsata. Ie'pa wöblane pé' sulusipa ppök dōka dabom mañayök kī sulitu as kè itkōka dabom tkëyök tsata.

ttekölpa tsá, e'pa eköl. <sup>13</sup>Ye' kè wá a' káne ye' kanéuk. E' è wa a' wóanewa Skéképa icha erule erule malepa e' dikia diöshet. A' we'ikèyö, e' nuí olo'yó ye' kî.

### Pablo kablé ie'pa pakök

<sup>14</sup>Ye' tso'tke shkök a' pakök. I' tã ide mañatökicha. I' ètökicha wes kekraë kè ye' e' maupakã a' mik as a' tò ye' kkö'nü. Ye' kè tkirkü' a' fyi kî, ye' tkirke a' wákpa kî. A' dör wes ye' ala'r es. Ila'r kè kawö-tã iyé kkö'nuk, e' skéie iyé kawöta ila'r kkö'nuk. <sup>15</sup>E' kueki ye' e' chétké ì kos tso' ye' wá e' eukwa er bua' wa a' kimoie dö ye' wáké. Ye' tò a' daléritseke kîta kîta, etã a' éna ye' dalér ¿e' mir wa'k è?

<sup>16</sup>A' ye' sini'kué buaë tò mik ye' bak a' ska', etã ye' kè e' monekã a' mik. Erë a' welepa tò icheke tò ye' tò a' kîto'wé a' inuköl klö'woie akir. <sup>17</sup>¿Ima a' erbikö tò wépa patkè'yö a' ska', e'pa wa ye' tò a' kîto'wé? <sup>18</sup>Ye' kköyë taië Tito a' tò ie' mi' a' ska', etã s'yami skà eköl patkè'miyö ie' tã. ¿Tito tò a' kîto'o'? Au, ie' sene buaë yësyësé a' shüã wes ye' es. Sa' bö' sené a' shüã ñi süë.

<sup>19</sup>Isalema a' tso'ia' ibikeitsök tò sa' e' tsatököke a' yöki. E' kè dör es. Ñermata sa' tso' ttök Skéköl wörki wes s'batsulewã Cristo mik esepa ttö es. A' yamipa dalér ye' éna, ì kos weke sa' tò e' dör a' er diché kî ioie. <sup>20</sup>Moki ye' suane dö' mik ye' de a' ska', etã ye' kè tò a' suë wes ye' kî a' kiane suë es. Nies ye' suane dö' a' kè tò ye' suë wes a' kî ye' kiane suë es. Ye' suane dö' ye' ikué tò a' ñippöke, a' ukyërke ñi kî, a' ulurke ñi kî, a' er me'rie a' wákpa è kî, a' biyöblöke ñi kî, a' ñi chöke suluë, a' e' ttsökeka taië, a' ñi chiliuke. <sup>21</sup>Ñies ye' suane dö' mik ye' dene a' ska' etã Skéköl tò ye' jaëwé a' kueki. Dö' a' taië kè er maneone. Dö' a' e' ia'ukekaiã sene sulusi wa. Dö' a' tso'ia' trënuke ena a' tso'ia' ì sulu skà kukuëña a' wá e' a. E' dör es, e' tã Skéköl tò ye' iuwéraë siarë a' wa.

**13** I' tã mañatökicha ye' mi'ke a' pakök. Ì tso' a' wá shülë, e' shuler- aësö wes itso' kitule Skéköl yëkküö kî es, e' tò ichè: “Tè kos shülekesö etã ittekölpa kiane bö' ö mañal ichoie tò moki idir ö au.” <sup>2</sup>Mik ye' bata dërö a' ska', etã wépa tò ì sulu wamblé, e'pa a' ye' iyé' tò a' kawöta ilo'yök. I'ñe tã ye' kè kü' a' ska', erë ye' tò iskà chekene ekképa a' ena a' malepa tso' ì sulu wamblök, esepa a' tò mik ye' dene, etã a' shüleraëyö darërëë. <sup>3</sup>A' ichè tò a' kî ikiane suë tò moki ye' ttöke Cristo diché wa. Mik ye' de a' ska', etã a' isueraë tò es idir. Cristo diché tã taië, e' tso' iwakanéuk a' shüã, ie' kè dör wes se' kè diché tã' es. <sup>4</sup>Moki ie' kötewã wötëulewã krus mik wes se' kè diché tã' es, erë ie' serkene Skéköl diché taië e' wa. Es ñies sa' batsulewã ie' mik, e' kueki wë-sua sa' kè diché tã', erë Skéköl diché wa sa' serdaë a' kimoie.

<sup>5</sup>A' wakpa e' saü' tò moki a' erblöke Jesusucristo mik. A' ibikeitsö buaë. ¿A' kè wá ijcher tò ie' tso' a' er a'? E' kè dör es, e' tã e' wá kiane ché tò a' kè dör ie' icha. <sup>6</sup>A' mú wöã iwéne tò sa' kaneblé' a' shüã e' wá dettsã buaë. <sup>7</sup>Sa' tso' ikiök Skéköl a' tò a' kè tò ì sulu wamblökia. Sa' kè kü' e' kiök as iwër tò ye' kaneblé' a' shüã e' wá dettsã buaë. E' skéie sa' kî ikiane tò a' ser buaë yësyësé wes Skéköl kî ikiane es, eré welepa wa iwër tò sa' kaneblé' e' kè wá dë'ttsã buaë. <sup>8</sup>Mik a' serke buaë wes Skéköl ttè moki tò ichè es, etã e' kî kè sa' a' ì yënuke. E' skéie e' kikekeka taië sa' tò. <sup>9</sup>Sa' kè diché tã', erë mik a' e' tkëulewã darërë Skéképa ttè a, etã e' tò sa' ttsë'weke buaë. Sa' tò ikië michöë Skéköl a' tò a' mú dö' senuke buaë yësyësé kekraë wes ie' kî ikiane es. <sup>10</sup>Mik ye' de a' ska', etã kawö mène ye' a' a' kî, e' kè wá shülak ye' éna darërë kësik wa. Skéképa Jesús tò e' kèwö me' ye' a, se' er diché ioie, e' kè dör se' sulu'woie. E' kueki ye' tso' yëkküö i' shtök a' a' kam ye' dö' a' ska'

e' yökì as ì kòs tso' shulè, e' shulò a' tò kàm ye' dò e' yökì.

**Pablo e' chéat**

<sup>11</sup> A yamipa, bataie yö ichè tò a' ttsé'nú buaë. A' e' chó senuk yësyësë. A' er kuú. A' kábikeitsó ñikkëë. A' senú bèrë ñita. A' serke es, e' tã Skëköl dör dalëritsök-

wak ena sene bèrë mukwak, e' serdaë a' tã këkraë.

<sup>12</sup> A' ñi shkë'ú ñi dalëritsè wa. S'batse'rpa kòs tò a' shkë'wémi.

<sup>13-14</sup> As Skëkëpa Jesucristo er buaë chò a' a. As Skëköl tò a' a ikkachò tò a' dalër taië ie' éna. Nies as Wiköl Batse'r tò a' kò senuk wës wák eköl è es.

## Yëkkuö kit Pablo tö Galacia wakpa a

### Gálatas

Pablo tö yëkkuö i' kit Jesús mik er-blökwakpa tso' ká kiè Galacia e' shua ká wa'ñe e'pa a ikimoie. Iekkëta ie'pa kos e' kè dör Israel aleripa. E' kuëki kam ie'pa erblò Jesús mik etä ie'pa kè tö Moisés ttè dalöiëno e' dalöië. Mik Pablo dë'rö Jesús tté buaë kkachök ie'pa a etä ie' tö ie'pa a iché tö kè se' tsatkërpa Moisés ttè dalöiëno e' dalöië wa.

Erë mik ie' mineane etä Israel aleripa shua pë' demi e' ò tö ie'pa dör Jesús mik erblökwakpa. E'pa tö ie'pa wöbla'weke sulu ikitöwoie. Ie'pa tö iché tö se' kè tsatkërpa Jesús mik erblè e' è wa. E' kuëki ñies se' kawöta Moisés ttè dalöiök. Ì sulu e' wöklö'woie Pablo tö yëkkuö i' kit. Jesús mik erblökwakpa tö s'wöbla'uk kache tté wa, e'pa ki'wä buaë, e' kuëki Pablo tö yëkkuö i' kit as ie'pa tso' ttsë'ka iyöki ena ie'pa shulir er bua' wa. S'wöbla'uk kache tté wa e'pa tö icheke tö Pablo kè dör Jesús tteköl chökke ie' kè wa Moisés tté e' dalöiëne e' kuëki.

Pablo tö iché Jesús mik erblökwakpa a tö Jesús wák tö ie' klöo' kaneblok it-tekölie. Ñies ie' tö iché tö Jesús mik er-blè e' è wa Skëköl tö se' klö'wëmi wes pë' buaë yësyësë es. Kè dör Moisés ttè dalöië wa Skëköl tö se' tsatkeke. E' skéie ie' er buaë ché se' a e' wa ie' tö se' tsatkeke senoie ie' a iWiköl wa. E' kkacheke Pablo tö yëkkuö i' ki.

### Shkë'wè

**1** Ye' dör Pablo. Ye' dör Jesús ttekölpa tsá, e'pa eköl. Ye' kè kine s'ditsö wä ñies ye' kè patkëne s'ditsö wä. E' skéie Skëköl dör S'yé tö Jesús shkë'kane, e' ena Jesucristo, e'pa tö ye' patkë' ie' tté buaë pakök. <sup>2</sup>Ye' tso' yëkkuö i' shtök

Skëkëpa Jesús icha erule erule kos tso' Galacia e'pa a. Ye' ena s'yamipa kos tso' ye' ta ie, e'pa tö a' kos shkë'wëmi. <sup>3</sup>Skëköl dör S'yé ena Skëkëpa Jesucristo, as e'pa er buaë chò ena sene bèrè mù a' a. <sup>4</sup>Jesucristo e' me'ttsa ttëwä se' nuì skéie wes Skëköl dör S'yé e' ki ikiane es. E' o' ie' tö se' yottsä sene sulu kos tso' ká i' a e' ulà a. <sup>5</sup>¡Ie' kikkökasö kekraë! Es idir.

### Jesús tté buaë, e' dör etkëme

<sup>6</sup>Ye' tö a' me'at, e' itöki bet ta, Skëköl olo'yé a' tö. Ie' tö se' klöo'bak. Ie' er buaë ché tajë se' a Cristo batamik. Erë ie' olo'yé a' tö. E' skéie a' tso'ne tté kuä'ki klö'uk. E' tö ye' tkiwëwä eriwëkã tajë. Welepa tö icheke tö ttè e' dör Jesús tté buaë, <sup>7</sup>erë e' kè dör es. Jesús tté buaë moki, e' dör etkëme. Pë' welepa de a' wökir a ká chöukwa tté kuä'ki wa. Ie'pa tö Cristo tté buaë, e' kí kuötkéka. Es ie'pa tö ie' tté buaë moki e' shkulì'weke. <sup>8</sup>Erë ye' tö a' a iché tö yi tö tté kuä'ki pakeke a' a Jesús ttéie, kè dör wes sa' tö a' a ipaka' kuaë es, e' ta as ese wák kichatër. Kè ye' tkine tö ye' wák alè tö ipakè ö Skëköl biyöchökwak wele datse ká jai a, ese tö tté kuä'ki pakè a' a, as esepa kichatër. <sup>9</sup>Ye' tö a' a iskà chène: Yi tö tté kuä'ki paké a' a Jesús ttéie, kè dör ie' tté buaë paka' sa' tö a' a e', kè dör tté klöo' a' tö kewe e', e' ta as ese wák kichatër. <sup>10</sup>¿Ima a' ibikeitsë? Ye' ttöke es, ¿e' wa ye' atak buaë Skëköl ta ö s'ditsö ta? Ye' mú a-tak buaë s'ditsö ta, e'ma ye' kè dör Cristo kanè méso moki.

### Jesús tté buaë, e' kè dë'bitü s'ditsö wä

<sup>11</sup>A yamipa, a' wä ijchenú tö Jesús tté buaë pakekeyö, e' kè dë'bitü s'ditsö wä. <sup>12</sup>Ttè e' kè yëne yi wä ye' a, kè yi wä ye' wöblane iwa, e' skéie Jesucristo wák tö ikkayë' ye' a.

<sup>13</sup>Wes ye' bak senuk judiowak tté dik-ia, e' ttsëule a' wä buaë. Ye' bak Skëköl icha e'pa we'ikök siarë töiök kësik wa.

Ye' éna ie'pa ewakwa seraa. <sup>14</sup> Mik ye' bak judiowak ttè dikia, eta ye' tò sa' yépa bak e' ser kos iuté buaé yésyèsè, iwakpa bak kos ye' ta e' késka', e'pa taiè tsa-ta. <sup>15-16</sup> Erè Skèköl er buaé ché ye' a taiè, e' kueki ie' tò ye' shukitbak iwák a, kam ye' kur e' yöki. Ie' tò ye' klö'bak kanèblök ie' a. Mik ie' éna ilà kkachak ye' a, eta ie' tò ye' a ikkaché as ye' tò ilà ttè buaé e' pakò pè' kè dör judiowak esepa a. Mik ie' tò ilà kkaché ye' a, eta ye' kè dè' s'ditsö ska' e' yuök. <sup>17</sup> Nies ye' kè dè' Jerusalén, wépa dör Jesús ttekölpa tsá ye' yöki kewe, e'pa ska' e' yuök ie'pa ttè wa. E' skéie bet ye' mía Arabia, e' ukuöki ta ye' dene Damasco.

<sup>18</sup> Duas de mañal, e' ukuöki ta ye' mía Jerusalén Pedro, kè sùule ye' wa, e' sauk. Erè kè ye' sene ie' ska' ká taiè, domingo bötö è. <sup>19</sup> Nies Santiago dör Skèképa Jesús èl, e' suéyö. Erè kè ye' wa Jesús ttekölpa tsá, e'pa malepa sune. <sup>20</sup> Moki ye' tò a' a ichè Skèköl wörki tò i shtekeyö yèkkuö i' ki, e' dör moki.

<sup>21</sup> E' ukuöki ta ye' mía bánet Siria ena Cilicia. <sup>22</sup> E' kéwö ska' ta Cristo icha erule erule tso' Judea, e'pa wa ye' ttè jcher, erè ie'pa kè wa ye' sùule. <sup>23</sup> Ie'pa tò ittse: "Pablo bak se' we'ikök, ttè mik se' erblöke e' olo'yakwa ie' éna, erè i'ne ta ie' tso'ne ipakök." <sup>24</sup> E' kueki ie'pa tò Skèköl kikéka taiè ye' kueki.

**2** Dwas de dabom eyök ki tkël (14), e' ukuöki ta ye' skà míane Bernabé ta Jerusalén. Nies Tito mía ye' ta. <sup>2</sup> Skèköl tò ye' a ikkayé' tò ye' kawöta shkök Jerusalén ttök Skèképa Jesús icha kos e'pa wökirpa ta, e' kueki ye' mía. Se' ulitane wa ie'pa sùule tò ie'pa dör se' wökirpa. Mik ye' de Jerusalén, eta ttè buaé pakekeyö pè' kè dör judiowak esepa a, e' wa pakéneyö se' wökirpa ulitane e'pa è a bánet isuoié tò iyène ö kè iyène. Ye' kè ki ikiane tò yi tò ichè tò Jesús kanè kos o'bituyö, e' dör é.

<sup>3</sup> Ie'pa tò iché tò ttè pakekeyö, e' dör buaé yésyèsè, kè i' skà kianeia. Tito mir-wa ye' ta, e' dör griegowak, e' kueki ie' tottola kè kkuölit tëule tsir wes judiowak wöblar es. Erè ie'pa kè wa ie' kàne itót-tola kkuölit tök tsir. <sup>4</sup> Erè pè' welepa tso' ee' e' chö tò ie'pa dör Jesús mik erblök-wakpa, erè kè idör es. Ie'pa kè ichöpa tò Tito tottola kawöta kkuölit tëe tsir, e' ma s'wökirpa kè wa i' yène. Pè' esepa tso' se' shua se' weblök bër tò wes se' ser buaé, tse'r buaé Cristo Jesús ttè a. Ie'pa a ta kè idör buaé tò kè se' tò judiowak ttè dalöièno e' iutéia. Ie'pa ki ikiane tò se' klörwane ttè ñe' ulà a. <sup>5</sup> Sa' ki ikiane tò Jesús ttè buaé mokié, e' è klö'u' a' tò kekraé. E' kueki sa' kè wa ie'pa ttè iuténe yès.

<sup>6</sup> Se' wökirpa kièsö skèképa taiè, e'pa iché tò ttè pakekeyö e' dör buaé. Ie'pa kè wa ikí kuötkène yès. (Skèköl a ta se' ulitane dör nies ème, e' kueki é yö ichè tò ie'pa dör kèképa taiè ö kè idör es, e' kè ki ye' tkine.) <sup>7</sup> Ie'pa éna iane tò Skèköl tò kanè me'at ye' ulà a Jesús ttè buaé pakök, pè' kè dör judiowak, esepa a, wes ie' tò kanè me'at Pedro ulà a ipakök judiowak a es. <sup>8</sup> Skèköl tò Pedro patké' Jesús ttè buaé pakök judiowak a, e' è tò ye' patké' ipakök pè' kè dör judiowak esepa a. <sup>9</sup> Santiago ena Pedro ena Juan, e'pa sùule se' ulitane wa tò ie'pa dör se' wökirpa kibiie. Ie'pa éna iane tò Skèköl er buaé yè' ye' a kanè i' wa. E' kueki ie'pa ulà mé ye' a ena Bernabé a iwà kkachöie tò ie'pa tò sa' klö'wé ie'pa kiié. Ie'pa éna iane tò Skèköl tò sa' patké' Jesús ttè buaé pakök pè' kè dör judiowak esepa a, erè ie'pa patké'itö ipakök judiowak a. Es buaé idir ie'pa a. <sup>10</sup> Iyi etkè kié ie'pa tò sa' a, e' dör tò s'yamipa siarèpa serke Jerusalén, esepa kimè sa' tò. E' wawekeyö kekraé er bua' wa.

### Pedro uñé Pablo tö Antioquía

<sup>11-12</sup> Erë e' ukuöki ta mik Pedro demi Antioquía sa' pakök, eta kewe ie' chköke buaë Jesús mik erblökwakpa kè dör judiowak, esepa ta. Erë s'yamipa dör judiowak datse Jerusalén, patkë' Santiago tö, e'pa de. E'pa tö iklö'wé tö s'yamipa kè dör judiowak, esepa kawöta itóttola kkuölit tök tsir. Nies ie'pa tö iklö'wé tö esepa kawöta senuk wes judiowak ser es. Pedro suane ie'pa yöki, e' kueki mik ie'pa de, eta ie' e' batséttsa wépa kè dör judiowak, esepa yöki. Ie' kè chköia ie'pa ta nita. <sup>13</sup> Nies judiowak malepa tö Pedro e' a' ñe' es, e' wambléñak dò Bernabée. <sup>14</sup> E' kueki, mik ye' isué tö Pedro kè ku' iwà iütök yesyésë wes Jesús tté buaë moki tö ichè es, eta ye' tö ie' a' iché sulitane kukua: "Be' tso' e' ök. Be' dör judiowak, erë be' kè serku' wes judiowak ser es. ¿Iók be' tö, pë' kè dör judiowak, esepa keke senuk wes judiowak ser es? <sup>15</sup> Se' böi dör judiowak se' ditséwö wa. Se' kè dör pë' sulusipa kè tö Skéköl dalöie esepa. <sup>16</sup> Erë se' wa ijcher tö Skéköl kè tö se' klö'wépa wes pë' buaë yesyésë es, Moisés tté dalöiëno e' iütësö e' batamik. Se' wa ijcher tö se' erblé Jesucristo mik, e' kueki ie' tö se' klö'wé wes pë' buaë yesyésë es. Ie' ichè tö ie' kè tö se' klö'wépa wes pë' buaë yesyésë es, tté dalöiëno e' iütësö e' batamik. E' kueki se' böi erbléte Jesucristo mik as Skéköl tö se' klö'ù wes pë' buaë yesyésë es. E' kè dör tö Moisés tté dalöiëno, e' iütësö buaë e' batamik." Es ye' tö iché Pedro a.

<sup>17</sup> E' ukuöki ta ye' tö ie'pa ulitane a' iché: "Se' erblöke Cristo mik, e' batamik Skéköl tö se' klö' wes pë' buaë yesyésë es, e' wà paneke se' tö. Es se' kè erblöku'ia Moisés tté dalöiëno e' mik. E' kueki judiowak tö se' chëmi tö se' dör ì sulu wamblökwakpa wes pë' kè dör judiowak es. E' kueki ¿sö ichëmi tö Cristo tö se' ké ì sulu wamblök? Au, kè idör es.

<sup>18</sup> Se' éna iane tö Skéköl kè tö se' tsatkepa tté dalöiëno e' batamik. E' kueki se' kè erbléneia tté e' mik e' tsatkoie. Erë se' erbléne tté dalöiëno e' mik e' tsatkoie, e' ta e' je' tö se' a' ikkacheraë tö moki se' dör ì sulu wamblökwakpa, se' kè a' iwà iütënuk seraa e' kueki. <sup>19</sup> Mik ye' bak erblök Moisés tté dalöiëno e' mik e' tsatkoie, eta ye' éna iane tö ye' kè a' tté e' iütënuk yesyésë wes s'kawöta iütök es. E' kueki ye' éna iane tö nu' tso' ye' ki, e' ki Skéköl tö ye' kichaterattsä. E' kueki ìñe ta ye' kè erblöia tté dalöiëno e' mik e' tsatkoie. Ye' a' ta e' dör wes ye' du'wa tté dalöiëno e' yöki es. ìñe ta ye' erblöke Cristo è mik as ye' ser yesyésë Skéköl a. Cristo köte'wa krus mik ye' skéie ye' nu' patuoie, <sup>20</sup> e' kueki e' dör wes ye' köte'wa ie' ta krus mik es. ìñe ta e' dör wes kè ye' serku'ia es, erë Cristo serke ye' er a' iWiköl wa. Ie' tö ye' dalëritsé, ie' e' mettsa tté'wa ye' skéie. E' è mik ye' erblöke, e' mik ye' serke ká i' ki. <sup>21</sup> Es Skéköl er buaë ché ye' a, e' kè watepa ye' tö yës. Erë sene yesyésë mú dò se' ulà a' tté dalöiëno e' iüté wa, e' ma e' wà kiane ché tö Cristo köte'wa éme, kè wà ta'." Es ye' tö iché Jesús mik erblökwakpa tso' Antioquía, e'pa a.

### Skéköl tö iWiköl mé se' a, se' erblö Jesucristo mik, e' batamik

**3** ¿A Galacia wakpa, wësua a' kè kabikeitsöta! ¿Yi alibché a' ki, e' tö a' wöliwéka tajë es? Jesucristo köte'wa krus mik se' skéie, e' tté wa sa' tö a' wöbla' buaë yesyésë, e' wà ane buaë a' éna kuaë. Eta ¿wes tté e' olo'yakne a' éna? <sup>2</sup> I' chakeke ye' tö a' a, e' iütö: ¿Ì batamik Skéköl Wiköl dë' a' ki? ¿E' dör Moisés tté dalöiëno e' iüté a' tö e' batamik? Au, kè idör es. Ie' dë' a' ki mik a' tö Jesucristo tté buaë e' tse' ta' a' erblé' imik eta. <sup>3</sup> ¿A' kè kabikeitsöta! Kuaë Skéköl tö se' yué ie' ala'rie iWiköl wa, erë ¿wes a' tö ibikeitsë ìñe ta' tö se' kawö-



tà Moisés ttè dalöiëno e' iütök se' wákpa diché wa as se' at buaë yësyësë ie' wöa? <sup>4</sup>Es idör, e' tà éme se' weine taië Jesús ttè buaë kueki. ¡Ayëcha, e' kè weinewa éme! <sup>5</sup>Ye' tò iskà chakéne a' a: ¿Skököl tò iWiköl me' se' a, ñies ì kè or yi a ese o'itò a' shua, e' dör Moisés ttè dalöiëno e' iütësö, e' batamik? Au, kè idör es. E' kos o' Skököl tò, se' tò Jesucristo ttè buaë e' ttsé' tà se' erblé' imik e' kueki.

**Abraham erblé Skököl mik, e' kueki Skököl tò ie' klö'wé wes pè' buaë yësyësë es**

<sup>6</sup>Es ibak ñies sa' yé bak kiè Abraham e' tà. Skököl yëkkuö tò ichè: Abraham erblé Skököl mik, e' kueki iklö'wéitö wes pè' buaë yësyësë es. <sup>7</sup>E' kueki a' wa ijchenú tò wépa erblö Skököl mik, esepa dör Abraham aleripa chók. <sup>8</sup>Ká ¡ai- aë Skököl ibikeitsbak tò mik pè' kè dör judiowak, esepa erblé ie' mik, etä ie' tò ie'pa klö'weraë wes pè' buaë yësyësë es. E' kueki ttè buaë e' tso' kitule ie' yëkkuö ki wé ie' tò iyë' Abraham a' i' es: “Be' batamik ye' er buaë chöraë ká ulitane wakpa a.”<sup>9</sup> <sup>9</sup>Es se' isuë tò wépa kos erblöke ie' mik wes Abraham es, esepa kos a' ie' er buaë chöraë wes ie' er buaë yé' Abraham a' es. Esepa è a' ie' er buaë chöraë.

<sup>10</sup>Skököl yëkkuö tò ichè i' es: “Wépa kè tò ì kos tso' kitule ttè dalöiëno yëkkuö ki e' wà dalöieku' yësyësë, esepa kos kichateraë Skököl tò.”<sup>11</sup> Erè kè yi tò iwà iütepa es, e' kueki se' wa ijcher tò wépa erblé ttè dalöiëno mik e' tsatkoie, esepa kos kichateraëitö. <sup>11</sup>Ñies ie' yëkkuö tò ichè i' es: “Yi dör yësyësë ierblö Skököl mik e' batamik, ese serdaë.”<sup>8</sup> Es

se' wa ijcher tò kè yi tsatkënek Moisés ttè dalöiëno iütè wa. <sup>12</sup>Ñies Skököl yëkkuö tò ichè i' es: “Yi tò ttè dalöiëno e' dalöié yësyësë seraä, ese ser michoë ttè e' wa.”<sup>13</sup> Ttè e' tò se' a' ikkachè tò ttè dalöiëno, e' tò se' ké idalöiök seraä. Erè se' erblö Cristo mik, e' kè dör es, e' ki erblé è kiane ie' mik. E' kueki ttè e' kè shütunukka Moisés ttè dalöiëno e' wa, e' dör ttè kua'ki e' kueki.

<sup>13</sup>Skököl yëkkuö tò ichè: “Yi ttéwa kichatkëule kal mik, e' wa iwënewa tò ese kichatéttsa Skököl tò.”<sup>14</sup> Es Cristo kötëwa krus mik, e' wà kiane chè tò ikichatéttsa Skököl tò. Erè ikichatënetsa se' skéie, Skököl ttè dalöiëno e' dalösewéwasö e' nuí ki. Es Cristo tò se' yé'ttsa se' nuí ulà a. <sup>14</sup>Es ibak ie' tà as Skököl kablé' er buaë chök Abraham a, e' wà dò ñies pè' kè dör judiowak esepa ulà a' Cristo Jesús batamik. E' dör tò Skököl kablé' iWiköl muk se' a, se' erblö Cristo mik, e' batamik.

**Skököl er buaë ché se' a, e' kè dè' ttè dalöiëno e' batamik**

<sup>15</sup>A yamipa, se' a' tà mik se' tò se' ttè mé ñi a, e' shtésö yëkkuö ki tà s'kiè shtésö iki, etä ttè e' kè maneorpattsane yës, kè iki kuötkërpakajä yës. <sup>16</sup>Es ì uk Skököl kablé' Abraham a' ena ileri eköl a, e' dör. Skököl yëkkuö tò Abraham ditséwö eköl è e' cheke, kè dör seraä. Abraham ditséwö chekeitö e' dör Cristo. <sup>17</sup>Ì chök ye' tso' e' dör i': Skököl tò ittè me'tke Abraham a' tà ikkachéitö ia' tò mokí iwaweraëitö. E' ukuöki tà duas tka dökä cien tkëyök kí dabom mañayök (430) tà ie' tò ittè dalöiëno me' Moisés a

§3:8 Génesis 12.3

¶3:10 Deuteronomio 27.26

§3:11 Habacuc 2.4

\*\*3:12 Levítico 18.5

††3:13 Deuteronomio 21.23

as Israel aleripa tō idalōiò. E' wa isuésò tō ttè mène Abraham a, e' mène ià kewe, ttè dalōièno mène Moisés a e' yōki. E' kuęki ttè dalōièno mène Moisés a, e' kè a ì uk Skėköl kabl' Abraham a, e' wöituk-wa. <sup>18</sup> Ì uk Skėköl kabl' se' a, e' wà dōpa se' ulà a, Moisés ttè dalōièno e' iutésò e' batamik, e'ma e' kè dē'ttsa se' a wes ì kabl'ule es. Erē Skėköl kabl' Abraham a imuk éme.

<sup>19</sup> E' dör es, e' ta çì kuęki Skėköl tō ittè dalōièno me' Israel aleripa a? Ie' kabl' Abraham a, e' ukuökì ta ittè dalōièno méitò ie'pa a ì sulu wamblekerakitò, e' wà kkachoie dò mik Abraham aleri eköl yène ie' a, e' de eta, e' dör Cristo. Ttè dalōièno e' me' Skėköl biyöchökwakpa tō Israel aleripa a Moisés dör itteköl e' wa. <sup>20</sup> Erē Skėköl wák kabl' Abraham a, e' kè dör itteköl wele wa. E' kuęki se' wa ijcher tō ttè e' dör kibiie, ttè dalōièno mène Moisés a e' tsata.

### çÌ kuęki Skėköl tō ittè dalōièno me' Israel aleripa a?

<sup>21</sup> E' dör es, e' ta çe' wà kiane chè tō ttè dalōièno, e' kè ñi sin'ikune Skėköl kabl' Abraham a e' ta? ¡Au, kè idör es! Ttè dalōièno tō sene michoë múpa se' a, e'ma se' dōmi buaë yësyësë Skėköl wörki ttè ñe' dalōiësò e' wa. <sup>22</sup> Erē e' kè dör es. Skėköl yėkuö tō ichè tō s'ditsö kos klöulewa sene sulu ulà a, kè se' a e' tsatkėnuk. E' dör es as Skėköl kabl', e' wà dò se' ulà a, se' erblò Jesucristo mik e' wa.

<sup>23</sup> Kam Cristo döbitu s'tsatkök se' erblò ie' mik e' wa, e' yōki se' bak klöulewa ttè dalōièno dikia wes s'wötəwa s'woto wé a es. Erē se' kè a e' yėnuktsa ttè e' dikia dò mik Cristo dē'bitu ikkachök se' a tō s'kawötə erblök ie' mik e' tsatkoie eta. <sup>24</sup> Ñies ichemisö tō Skėköl tō se' mēwa ttè dalōièno dikia s'kk'noie dò mik Cristo de eta. E' dör wes alà yé tō yi yulè ilà kk'noie es. Skėköl tō iwé es

as ie' tō se' klö'ü wes pē' buaë yësyësë es, se' erblò Cristo mik e' wa. <sup>25</sup> Ìñe ta se' erblò Jesucristo ttè buaë e' mik, e' kuęki ttè dalōièno kè ku'ia se' kk'ö'nuk wes alà kk'ö'nukwak es. <sup>26</sup> A' kos dör Skėköl ala'r, a' erblé Cristo Jesús mik e' wa. <sup>27</sup> A' wépa kos wösune iwə kkachoie tō a' erblé Cristo mik, esepa kī Cristo ser iene wes se' datsi' iò es. E' kuęki a' serke buaë wes Cristo ser es. <sup>28</sup> Se' kos batsulewa Cristo Jesús mik, e' kuęki se' dör wes wák eköl è es. E' kuęki se' dör judiowak ö se' kè dör es, se' klöulewa kanè mésoie ö se' kè dör es, se' dör wēm ö se' dör alaköl, e' kè dē' wes Skėköl a. <sup>29</sup> Se' dör Cristo icha, e' ta se' dör Abraham aleripa chók. Ñies ì uk Skėköl kabl' Abraham a e' wà dōraë se' ulà a.

### Se' kè ku'ia Moisés ttè dalōièno e' dikia

**4** <sup>1-2</sup> Ye' tō ikleeke a' a ttè i' wa: Ichòsö tō pē' eköl dör inuköl blu' taië e' blēnewa. Ie' iyi kos méatitò ilà ulà a. Erē ie' alà ià tsirlala, kè a ikaneonuk. E' kuęki o'ka tso'ne ie' kk'ö'nuk, ie' wëttsuk. Ie' kawötə ie'pa ttè iutök dò mik wekké iyé tō ikéwö me'at ekké. Eré ie' dör iyé blēnewa e' dali kos e' wák, erē kam ikéwö dò e' yōki ie' dör wes s'klöulewa kanè mésoie tso' iu a es. Eré mik iyé blēnewa e' tō ikéwö me'at e' deka, eta iyé dali kos dōraë iulà a. <sup>3</sup> E' sù sa' judiowak bak wes alala ñe' es. Kam Skėköl tō ilà patkò e' yōki sa' bakiā klöulewa ttè èse tso' ká i' a ese dikia idalōiök. <sup>4</sup> Eré mik kawö bikeitsitò e' de, eta ie' tō ilà patké ká i' ki, e' kune' s'ditsöie sene' Moisés ttè dalōièno e' dikia. <sup>5</sup> Ilà debitu sa' bak klöulewa ttè e' ulà a, e'pa yöktsa as sa' dò Skėköl ala'rie. <sup>6</sup> A' erblé Cristo mik, e' kuęki a' dör Skėköl ala'r ñies wes sa' es. E' kuęki ie' tō ilà Wiköl patké senuk se' er a, e' wa se' kköchöke buaë Skėköl ska', ie' wa se' tō icheke buaë Skėköl a: “¡A yéwöla!” <sup>7</sup> Es se' kè ku'ia wes s'klöulewa

kanè mésoie es. E' skéie se' detke Skëköl ala'rie, e' kuëkî ì kôs tso' ie' wà e' dör se' icha ñies.

<sup>8</sup> Kenet tã a' kè e' batsöta' ie' mik, e' kèwö ska' tã a' bak klöulewã skëkölpa dalöiök a' bak esepa ulà a. Ñermata ie'pa kè dör Skëköl ichökle e'. <sup>9</sup> Erë i'ñe tã a' båtse buaë Skëköl chök e' mik — ö ichëmisö bua'ie tö ie' båtse buaë a' mik— ¿wes i'ñe tã a' e' maktsane ttè èse kôs e' ane? Ttè ekkëpa kè a se' tsatkënuke. Ttè e' kè dör iie bua' se' a. Kè se' senukne ttè ese dikia. <sup>10</sup> Judiowak tö idiwö tkö'weke, isi'wö tkö'weke, ikéwö tkö'weke ñies iduéswo tkö'weke. ¿lök se' tö e' wakaneweke es? <sup>11</sup> Ye' suane dö' kanè kôs wéyö a' shua, e' weirwa é.

### Kenet tã Galacia wakpa tö Pablo kiéwã buaë

<sup>12</sup> A yamipa, ye' dör judiowak erë ye' kè serku'ia judiowak ttè dikia. ¿Wes i'ñe tã a' e' tiakwã ttè e' dikia? E' kè war a' tö es. Ye' kköchö a' a' tö a' senú wes ye' es. Mik ye' bak a' ska' kuaë, etã a' kè wã ì sulu wamblène ye' tã. <sup>13</sup> Mik ye' tö Jesús ttè buaë tsá paka' a' a, etã ye' kirirke taië, e' kuëkî ye' e' tsëat a' ska'. <sup>14</sup> Ye' kirirke, e' dör darërëe a' a, erë e' kuëkî a' kè wã ye' watënetsã. E' skéie a' tö ye' sué buaë wes Skëköl biyöchökwak suë es. A' tö ye' kiéwã buaë wes Cristo Jesús kiéwã a' tö es. <sup>15</sup> A' ttsë'ne buaë ye' tã kuaë, ¿wes e' de i'ñe tã? Ye' ichè tö a' wák wöbla mú yërttsã a' a' tkèwã ye' icha skéie, e'ma a' tö iö' es. Es a' kikékayö. <sup>16</sup> Erë i'ñe tã wësua a' ye' suë a' bolokie, ttè moki chéyö a' a' e' è kuëkî.

<sup>17</sup> Pë' tso' a' wöbla'uk judiowak ttè wa, e'pa tö ichè tö ie'pa kî a' kiar taië, erë e' kè dör er bua' wa. Ie'pa kî kiane tö a' tö sa' watöttsã tã es a' mi' ie'pa è ttè iütök.

<sup>18</sup> Ie'pa tö a' saüpa, a' kimüpa er bua' wa mik ye' tso' a' tã ö ye' kè ku' a' tã, e'ma buaë idir ye' a. Erë ie'pa tso' a' wöbla'uk ttè kè dör moki esë wa. E' kuëkî ye' yöki

isulune. <sup>19</sup> A ye' ala'r, ye' skà weirke taië a' dalërmik wes alaköl alà kurke weir es dö' mik a' de senuk wes Cristo ser es eta. <sup>20</sup> I' tã ye' mú dö' a' ska' ttök bua'ie a' tã as a' isaü tö a' dalër taië ye' éna. Ì wambleke a' tö es, e' tö ye' tkiwéwã suawé taië.

### Agar ena Sara, e' pakè

<sup>21</sup> A' welepa senak judiowak ttè dikia, erë ì tso' kitule Moisés yëkkuö kî, ¿e' jcher a' wã? <sup>22</sup> E' tö ichè tö Abraham ala'r bö. Eköl kune' alaköl kiè Agar, e' tã. E' kiè Ismael. Agar dör Abraham alaköl kiè Sara e' kanè méso toulettsã esë. Iëköl kune Sara tã. E' kiè Isaac. Sara kè dör yi kanè méso. <sup>23</sup> Kanè méso ñe' alà kune' wes se' èsepa kur es. Erë Sara kè dö-tã' alàe, e' alà kune' mik idetke kèkë-palatke eta, wes Skëköl kablë' Abraham a es. <sup>24-25</sup> E' tö ilè kleeke se' a. Alakölpa bö ñe' tö ttè mène bö't e' wà chë. Agar bak kanè méso e' tö ttè dalöiëno mène Israel aleripa a' Sinaí kébata atë Arabia, e' wà chë. E' wà dör tö Israel aleripa erblé ttè dalöiëno e' mik e' tsatkoie. E' dör wes ie'pa tso' klöulewã ttè e' dikia wes kanè méso tso' klöulewã iwökir ulà a es. E' kuëkî wépa kôs tso' klöulewã ttè dalöiëno e' ulà a, esepa dör wes Agar ala'r es. Ñies Sinaí kébata, e' tö Jerusalén tso' kã i' kî i'ñe tã e' wà chë. Eë judiowak serke. Ie'pa tso' klöulewã Moisés ttè dalöiëno dikia wes kanè méso es. <sup>26</sup> Erë Sara alà kune' e' tö ttè mène Abraham a, e' wà chë. Se' kè ku' klöulewã Moisés ttè dikia, e' kuëkî se' dör wes Sara alà es. Se' dör Jerusalén èt tso' kã jai a' e' wakpa. <sup>27</sup> E' dör wes itso' kitule Skëköl yëkkuö kî es, e' tö ichè i' es:

A alaköl, be' kè dö'tã' alàe,  
is alala kur, e' kî alakölpa weir, e' kè  
ttsëule be' wã.

Erë be' döraë alàe taië  
tkökã alaköl dö'tã' alàe e' tsatã.  
E' kuëkî be' ttsë'nú buaë.

Be' anú tajë ttsë'ne bua' wa.††

Es Skëköl yëkkuö tö ichè.

<sup>28</sup> A yamipa, se' dör wës Isaac es. Isaac kune' wës Skëköl kablë' Abraham a es. Es ñies se' erblë Cristo mik, esepa de Skëköl ala'rie wës ie' kablë' es. <sup>29</sup> Agar alà kune' wës s'ditsö kur es, erë Isaac kune' Skëköl Wiköl batamik. E' këwö ska' tã Agar alà tö Isaac we'ik tajë. E' sù ì'ne tã wëpa tso' klöulewã Moisés ttë dikia, esepa tso' se' dör Skëköl ala'r, esepa we'ikök. <sup>30</sup> Erë Skëköl yëkkuö tö iché ì' es: "Iyé íyi tso' mè alaköl kè dör kanè méso, e' alà a, e' kè kawö tã blaté alaköl dör kanè méso e' alà a. E' kueki iyuóshkar alàè."<sup>¶¶</sup> <sup>31</sup> E' kueki, a yamipa, se' kè dör wës alaköl dör kanè méso e' ala'r es. Se' dör wës alaköl kè dör kanè méso, e' ala'r es.

### Se' yënetsã ttë dalöiëno dikia

**5** Cristo tö se' yë'ttsã Moisés ttë dalöiëno e' yöki as se' kè ku'ia klöulewã ttë e' ulã a. E' kueki se' e' tköwã darërë erblök Cristo è mik. Kè se' e' tiukwane ttë dalöiëno dikia wës s'klöulewã kanè mésoie es.

<sup>2</sup> A' tö ye' ttö ttsó. Ye' dör Pablo. Ye' wák tö ichè a' a' tö a' wëpa e' mettsã itóttola kkuölit tök tsir wës judiowak wöblar es e' tsatkoie, e' tã Cristo kè tö a' kimepa yës. <sup>3</sup> Ye' tö iskã chène wëpa ulitane e' mettsã itóttola kkuölit tök tsir, esepa a' tö ie'pa kawötã Moisés ttë dalöiëno e' wà dalöiök seraa. <sup>4</sup> A' ulitane éna ttë dalöiëno, e' iütak as a' dò yësyësë Skëköl wöa, esepa kos e' batséttsã bánet Cristo yöki. Es Skëköl er buaë ché se' a' Cristo batamik, e' watéttsã ie'pa tö seraa. <sup>5</sup> Erë se' erblöke Cristo mik, esepa wã ijcher Skëköl Wiköl wa tö ie' tö se' klö'weraë wës pe' buaë yësyësë es, se' erblë Cristo mik, e' batamik. E' wà panekesö ttsë'ne

bua' wa. <sup>6</sup> Se' batsulewã Cristo Jesús mik, e' tã yi tottola kkuölit tëule tsir ö kè itëule e' kè ska' Skëköl tkine. Se' erblö Cristo è mik, e' tö se' ké ñi dalëritsök, e' dör ibua'ie.

<sup>7</sup> Kuaë tã a' mir buaë. ¿Yi tö a' wöklö'wé as a' kè tö ttë mokí iütö? <sup>8</sup> E' kè dör Skëköl tö se' klö'bak iwák a e'. <sup>9</sup> A' tajë e'pa sulu'wërawã ttë suluë elkela è tö wës pan wölöwoka elkela tö hari-nachka kos wölöwekëka es. <sup>10</sup> Erë ye' erblöke Skëkëpa Jesús mik tö a' kè mi'pa ttë sulu e' itöki. Wé tso' a' tsiriuk ttë ese wa, e' we'ikera Skëköl tö. Kè ki ie' tkine tö yi idir.

<sup>11</sup> Erë a yamipa, ye' mú tso'ia ipakök tö wëpa kawötã itóttola kkuölit tök tsir, e'ma ¿ì kueki judiowak tö ye' we'ikekia tajë? Ye' tö ttë e' pakópaia, e'ma ie'pa kè ulurku' ye' ki mik ipakekeyö tö Cristo kötëwã krus mik se' skéie eta. <sup>12</sup> Erë wëpa tso' a' wökir a ká chöukwa ttë ese wa, jesepa mú e' bióttsaie i' tã!

### Ñi dalëritsè

<sup>13</sup> A yamipa, Skëköl tö se' klö'bak as se' kè seriã ttë dalöiëno dikia. Erë e' kè dör ì sulu wambloie wës s'wák dër sulu ki ikiane es. E' skéie se' ñi kimù, ñi dalëritsè kueki. <sup>14</sup> Moisés ttë dalöiëno kos e' wöiënewã ttë etkè a, e' tö ichè: "A' malepa dalëritsó wës a' wákpa e' dalër es."<sup>§§</sup> <sup>15</sup> A' e' kkö'nú. A' ñi saukeia suluë, a' ñippökeia tajë wës iyiwak sulusi es, e' tã a' wákpa è ñi eura.

### Senë Wiköl Batse'r wa

<sup>16</sup> Es ye' tö a' a' ichè tö se' senü Skëköl Wiköl wa. Se' serke es, e' tã ì sulu kiane s'wák dër sulu e' ki wamblé, ese kè wamblepasö. <sup>17</sup> Ì kiar s'wák dër sulu e' ki, ese kè kiar Skëköl Wiköl ki. Ñies ì kiar

††4:27 Isaiás 54.1,2

¶¶4:30 Génesis 21.10

§§5:14 Levítico 19.18

Skëköl Wiköl kî, ese kè kiar s'wák dër suluë e' kî. S'wák dër suluë ena Skëköl Wiköl e'pa ñi wöklö'uke, e' kuekî ì kiar se' kî wè ese kè or se' a. <sup>18</sup> Erë Skëköl Wiköl tò se' wëttsëke, e' tã se' kè kû'ia ttè dalöiëno dikia.

<sup>19</sup> Wépa tso' iwák dër sulu e' iütök, e' wërwa wöshak. Esepa trër ena e' ia'uke sene sulusi wa. Ýi sulu ese skà kakuetéwarakitò darërëë. <sup>20</sup> Ie'pa tò ýi diököl dalöieke. Ie'pa dör alibchök-wakpa. Ie'pa ñi saü suluë, ñi wönatkò ñië, ñippò tajë, ukýër ñi kî. Ie'pa ulurka bet. Ie'pa e' ttsòka imalepa tsata. Ie'pa dör s'labatsökwakpa. Wépa e' batsöke ie'pa mik, e'pa è tã ie'pa ser buaë. <sup>21</sup> Ie'pa kè wöbatsö tò ì kiane ie'pa kî, ese tso' s'malepa wa. Ie'pa e' ttöke blo' wa, e' kuekî ì sulu kî wamblekerakitò tajë. E' sù ýi skà suluë wambleke ie'pa tò. Ye' tò a' a' ichekene wes ye' tò iyë'bak es tò wépa serke es, esepa kè döpa ì blúie Skëköl tso' e' a.

<sup>22</sup> Erë mik se' serke Skëköl Wiköl wa, etã se' ñi dalëritsöke, se' ttsërke buaë, se' serke bèrë, ì kos dalëttsekese er bua' wa, se' ñi saü er bua' wa, se' er buaë chò s'malepa a, se' ttò moki, <sup>23</sup> kè se' e' ttsòka tajë, se' e' kkö'nü buaë. Se' serke es, e' tã ttè dalöiëno kos, e' kè dalöseonewa se' wa. <sup>24</sup> Se' wák dër suluë, ñies ì kos suluë wamblak se' éna, ese kos watéttsã se' dör Cristo Jesús icha e'pa tò. E' dör wes se' tò ese kos ttéwa wötëulewa krus mik es.

<sup>25</sup> Se' serke Skëköl Wiköl mik, e' kuekî se' e' mù as ie' tò se' wëttsü. <sup>26</sup> Kè se' e' ttsökka tajë, kè se' ñi tsiriük, kè se' ukyënik ñi kî.

### Se' kawötã ñi kîmuk

**6** A yamipa, a' wele anemine ì sulu wamblè a, e' tã a' serke Wiköl Batse'r wa, esepa ké ie' kîmuk er bua' wa as ie' e' kökane. Erë a' e' kkö'nü dö' ì sulu tò a' erkiöwè tã a' armi ì sulu wamblè a wes ie' es. <sup>2</sup> A' welepa kawö tköke suluë, e' tã

a' ñi kîmú. A' tò iwé es, e' tã a' serke wes Cristo ttè dalöiëno tò ichè es. <sup>3</sup> A' wele e' bikeitsò tò buaë idir imalepa tsata, ñermata kè dör ì, e' tã ie' kitö'uke.

<sup>4-5</sup> Is se' ser buaë ö suluë ese wërke se' wöki eköl eköl. E' kuekî se' ulitane ké e' sauk tò is se' ser, e' wa se' e' kkö'nü. Se' serke buaë yësyësë, e' tã se' ttsërdaë buaë se' wák a. Erë kè se' kàne e' kkö'nuk wes s'malepa serke es.

<sup>6</sup> Ì buaë kos tso' a' wa ese kalmú wépa tò a' wöbla'weke Skëköl ttè wa esepa a.

<sup>7</sup> Kè se' e' kitö'uk tò se' a' Skëköl wayörmi kè nuí tã. Ì kuatkésö buaë ö suluë, e' wà wöweranesö. <sup>8</sup> Ì sulu kiane s'wák dër suluë e' kî wamblè, ese wamblésö, e' tã e' wà dörane s'kî tã se' weir michoë. Erë ì buaë kiane Skëköl Wiköl kî wè ese wésö, e' tã e' wà dörane s'kî tã sene michoë döraë se' ulà a. <sup>9</sup> Ì buaë wëkesö kekraë, kè ilo'yeta', e' tã aishkuö tã mik ikéwö de, etã iské döraë se' ulà a. E' kuekî kè se' shtrinuk ì buaë uk kekraë. <sup>10</sup> E' kuekî mik se' a' ì buaë ormi, etã iüsö sulitane a, bua'iewã s'yamipa er-blöke Cristo mik, esepa a.

### Pablo e' chéat

<sup>11</sup> Ttè bata i' shtök ye' tso' ye' wák ulà wa. A' isaü tò ikite bërie, es a' wã ijchermi tò moki ye' tso' ishtök. <sup>12</sup> Wépa tò a' keke a' wépa tottola kkuölit tók tsir, e'pa tò iweke es as ie'pa at buaë judiowak malepa tã. Ie'pa tò ichópa tò se' tsatkërke, Cristo kötëwa krus mik se' skéie, e' batamik, e'ma judiowak tò ie'pa we'ikera siarë. <sup>13</sup> Erë ie'pa wákpa tottola kkuölit tëule, e'pa kè tò Moisés ttè dalöiëno e' iütë seraã. Ie'pa tò a' keke a' tottola kkuölit tók tsir e' ttsokã iwákpa a' tò ie'pa tò a' ké e' wakyuök wes judiowak es. <sup>14</sup> Erë ye' i', e' kè e' ttsöpakã ì ulitane kî. Skëképa Jesucristo kötëwa krus mik, e' è kîkekekayö. E' batamik ì sulu kos tso' kã i' a' ese dunewabak ye' a, ñies ese a ye' dunewabak. <sup>15</sup> S'tottola kkuölit tëule tsir

ö kè tëule, e' kè kị Skèköl tkine. Ie' tō se' er mane'wé pa'alí iWiköl wa, e' è kiar ie' kị. <sup>16</sup> Wépa kọs serke wes ttè i' tō ichè es, as esepa a ie' tō sene bèrè mù ena isaù er siarè wa. Esepa dör ie' ala'r chók, esepa dör Israel aleripa chók ie' a.

<sup>17</sup> Ye' weine kọs Jesús tté kuẹkị, e' tō tso' ye' wạ ye' chkà kị. E' wa ye' tō iwà

kkacheke tō ye' dör ie' kanè méso moki. E' kuẹkị i'tami kè yi tō ye' tsiriwaria ttè e' kị.

<sup>18</sup> A yamipa, as Skèkèpa Jesucristo er buaè chò a' ulitane a. Es e' idir.

## Yëkkuö kit Pablo tö Éfeso wakpa a

### Efesios

Pablo tö yëkkuö i' kit mik ie' bak Roma wötëulewā s'wōto wé a Jesús tté buaë pakè kuekī e' tā. Ì bak ie' tā e' tso' kitule yëkkuö Hechos 28.17-31 e' kī. Pablo tö yëkkuö i' kit Jesús mik erblök'wakpa tso' Éfeso ena ipamik e'pa a. E' kēwō ska' tā Éfeso dör ká bua'ie ena eē tajē u tso' ì dalöieke ie'pa tö Skëköl skéie e' dalöioie. E' bua'ie dör ie'pa kéköl eköl kiè Artemisa e' dalöioie (Hechos 19.23-31). Mik Pablo shka' Jesús tté buaë pakök, etā ie' dē'mi Éfeso (Hechos 18.18-21). Erē eē ie' sené bērbēr è tā imineā. E' ukuökī tā iskà mineane tā isené eē duas mañal Skëköl tté kkachök. E' tso' kitule Hechos 19 kī.

Jesús mik erblök'wakpa kē wā kabene ku' tajē. E' kuekī Pablo kē wā ì kite tajē e' kī. E' skéie ì buaë tsakīē o' Skëköl tö se' a, ier buaë yē' siā e' batamik, e' kī ie' tö ikit kibiie. Ie' tö ichè tö e' kuekī se' kawōtā senuk Skëköl kīkokaie. E' kit ie' tö yëkkuö i' kī.

Jesucristo wa Skëköl tö se' ulitane tsatkē' Israel aleripa ena pē' ulitane, ñies e'pa er bua'wëitö ñi kī.

### Shke'wè

**1** Ye' dör Pablo. Skëköl wák er wa ye' dör Jesús ttekölpa tsá, e'pa eköl. Ye' tso' yëkkuö i' shtök s'batse' rpa e' tkëulewā darērē Cristo Jesús mik serke Éfeso, e'pa a. <sup>2</sup>Skëköl dör S'yé ena Skëképa Jesucristo as e'pa er buaë chò ena sene bèrē mù a' a.

### Skëköl tö se' tsatké Jesucristo batamik

<sup>3</sup>Skëköl dör Skëképa Jesucristo yé, e' kīkōkasö tajē. Se' batsulewā Cristo mik,

e' kuekī Skëköl er buaë ché se' a ì kos buaë tso' ie' wā ká jai a e' wa. <sup>4</sup>Kam ie' tö ká i' yuò, e' yökī se' shukitbakitö as se' dō batse'r, kē kī ì sulu tā yēs ie' wōa, se' batsulewā Cristo mik e' batamik. Ie' éna se' dalēr taijē, <sup>5</sup>e' kuekī ie' tö ibikeitsbak tö se' tseratköitö ila'rie Jesucristo batamik, e' kiane ie' wák kī, ñies e' tö ie' ttsé'weke buaë. <sup>6</sup>Ie' tö iwé es as se' tö ie' kīkōka michoë ie' er buaë ché se' a taijē shute e' kuekī. E' kos wé ie' tö ilà dalēr taijē ie' éna, e' batamik. <sup>7-8</sup>Cristo kötewā se' skéie, ie' pé tēne, e' wa se' yēnettsā sene sulu ulā a ena se' nu' olo'yé Skëköl tö se' kī. E' wa se' isué tö ie' er buaë ché taijē shute se' a. Ñies ie' tö erbikè buaë mé se' a as ì weke ie' tö e' wā ar se' a. <sup>9</sup>Ì bikeitsbak ie' tö wè, e' wawéitö ì o' Cristo tö e' batamik. Kuaë tā ibl'wāitö sulitane yökī, erē iwā kkachéitö se' a. <sup>10</sup>Ie' ibikeitsbak tö mik ikéwō de, etā ie' tö Cristo tkerakā íyi ulitane tso' ká jai a ena ká i' a e' wökirie.

<sup>11</sup>Ì kos weke Skëköl tö, e' weke ie' tö iwák er wa wēs ie' kī ikiane es, wēs ie' tö ibikeitseke es. Es sa' dör judiowak e'pa shukitbak ie' tö as sa' dō ie' ichaie, sa' batsulewā Cristo mik e' batamik wēs ie' tö ibikeitsbak es. <sup>12</sup>Ie' tö iwé es as sa' erblé' kewe Cristo mik e'pa tö ie' olo tajē e' kīkōka. <sup>13</sup>Es a' ñies, mik a' tö s'tsatké tté buaë mokī e' ttsé tā a' erblé' imik, etā a' bàtsēwā Cristo mik ena Wiköl Batse'r muk ikablé' e' méitö a' a iwā kkachoie tö a' dör ie' icha. <sup>14</sup>Wiköl Batse'r tso' se' a, e' dör iwā kkachoie tö ì kos yē' Skëköl tö tö imeke, se' dör ie' icha, e'pa a aishkuö tā, e' meraëitö se' a. E' kuekī se' wā ijcher tö ie' tö se' tsatkeraä da'a. E' kuekī ie' olo tā' taijē, e' kīkōkasö.

### Pablo tté Skëköl tā Éfeso wakpa kī

<sup>15</sup>E' kuekī, mik ye' tö a' tté ttsé tö a' erblöke mokīē Skëképa Jesús mik, ñies mik ye' ittse tö s'batse'r malepa kos dalëritseke a' tö taijē, <sup>16</sup>e'tāmi wëstela yē'miyö

Skëköl a' a' dalërmik këkraë mik ye' ttöke ie' tã eta. <sup>17</sup> Ie' dör Skëkëpa Jesucristo e' Këköl. Ie' dör S'yé olo tã' taië e'. Ie' a' ye' tso'ie ikiök tö ie' tö a' kímè iWiköl wa as ie' íyi wà ar buaë a' éna, ñies as a' wà ijcher bua'iewa tö yi dör ie'. <sup>18</sup> Ie' tö se' klöo' ikablë' se' a' e' wà panuk kröröë. E' tso' ie' wà mè se' dör ie' icha batse' rpa esepa a'. Ye' tso'ie ie' a' ikiök tö a' er ñi'úitö as kos kablë' ñe' bua' dör ena olo dör e' wà ar a' éna. <sup>19</sup> Ie' diché tã' taië íyi ulitane tsata. Ì kos ormi ie' a. Idiché e' wa ie' tso' se' erblöke Cristo mik, e'pa kímuk. Ye' tso'ie ikiök ie' a' tö a' er ñi'úitö as e' kos wà ar bua'ie a' éna. Diché e' dör taië shüte, <sup>20</sup> e' wa Cristo kötewa, e' shkeo'kane ie' tö. Diché e' wa ie' tö Cristo tkéka ká jai a' iulà bua'kka íyi ulitane wökirie. <sup>21</sup> Eë Cristo tkërka diché tã' taië íyi wökir, íyi wák, íyi këköl wà diché tã', ese kos tsata. Ie' tkënekã íyi ulitane tsata. Ie' dör ì kos tso' i'ñe tã' ena aishkuö tã' e' tsata. <sup>22</sup> Skëköl tö ì kos méwa ie' klö dikia. Ñies ie' tö iméka se' dör ie' icha e'pa kos wökirie. <sup>23</sup> Se' dör wës Cristo wák chkà es, tã' ie' dör wës s'wökir es. Ie' tö se' wëttseke ì kos kiane ie' kî wë ká i' kî, e' uk. Ie' tso' ká wa'ñe, kè ì a' ie' wöklönuk.

### Skëköl er buaë ché se' a' se' tsatkoie

**2** Kam a' erblö Cristo mik, e' yöki a' bak e' wamblök suluë, e' kueki a' bak wës s'duulewa es Skëköl a. <sup>2</sup> E' këwö ska' tã' a' bak senuk suluë wës wëpa kè tö Skëköl dalöie esepa ser es. Wimblu sulusi dör ì sulu kos tso' ká i' a' e' wökir e' ttö iütök a' bak. Ie' tso' Skëköl ttè dalöseukwa wakpa esepa wörieikök. <sup>3</sup> Se' kos bak senuk wës ie'pa es. Ì sulu kos kiane s'wák dër suluë e' kî wamblë, ese wamblök se' bak. Se' erbikë sulu, e' è wà wamblök se' bak s'wák tts'woie buaë. Se' bak wömeulettsã weinuk Skëköl ulà a' wës pë malepa es. <sup>4-5</sup> Se' bak duulewa se' nu' kî, erë Skëköl tö se' suë er siarë wa taië. Ie' tö se' dalëritsé taië. E' kueki ie' tö

sene michoë mé se' a. E' dör wës ie' tö se' shke'wékane Cristo tã es. Ie' er buaë ché se' a' taië, e' kueki se' tsatkëne. <sup>6</sup> Se' batsulewa Cristo Jesús mik, e' kueki e' dör wës Skëköl tö se' shke'wékane Cristo tã ñita es. Ñies ie' tö se' tkéka Cristo tã ñita ká jai a. <sup>7</sup> E' kos wë ie' tö es iwà kkachoie aishkuö tã tö kos ie' er buaë ché se' a' ì wë Cristo Jesús tö se' dalërmik e' batamik. E' dör taië shüte kè wöet tã' ekkë. <sup>8-9</sup> Skëköl er buaë ché a' a, e' batamik a' tsatkëne, a' erblöke Jesucristo mik e' kueki. E' kè dör ì buaë wë a' tö ie' wörki ese skéie. Ie' tö a' a' imé éme wës íyi kadmë es. Ie' tö iwë es as kè yi e' tso'ka tö ie' tsatkëe ì buaë wëitö ese batamik. <sup>10</sup> Ie' tö se' er mane'wë pa'ali se' batsulewa Cristo Jesús mik e' batamik. Ie' tö iwë es as se' tö ì buaë kos ese ù. E' kos bikeitsbakitö as se' ser wës ie' kî ikiane es.

### Judiowak ena wëpa kè dör es, esepa de wës wák eköl è es Cristo batamik

<sup>11</sup> A' wëpa kè dör judiowak, kè a' éna ichökwa tö wës a' bak kam a' erblö Cristo mik e' yöki. Judiowak wëpa kos esepa tottola kkuölit tëule tsir iwà kkachoie tö ie'pa dör Skëköl icha. Pë' kè dör judiowak, esepa kië ie'pa tö tottola kkuölit kè tëule ese wakpa. Es ie'pa tö a' cheke suluë. Ie'pa a' a' dör ñá. <sup>12</sup> A' éna ianú tö a' bak e' butsulettsã bánet Cristo yöki. A' kè bak Israel aleripa shua. Ì uk Skëköl kablë' ie'pa a' ena ttè mène ie'pa a' tsakië e' shua a' kè bak. A' bak senuk ká i' a' Skëköl chök kè tã', kè a' ì paneta'. <sup>13</sup> Erë i'ñe tã' a' batsulewa Jesucristo mik. E' kueki a' dewã Skëköl ska' buaë, Cristo Jesús kötewa a' skéie, ie' pé tène a' tsatkoie, e' batamik.

<sup>14</sup> Cristo tö judiowak ena pë' kè dör judiowak, esepa er bua'wë ñi kî. Se' bak ñi bolökpaie, erë Cristo tö se' er bua'wë ñi kî. Ie' tö se' wöiëwa ká etkë wakpaie. Ì tö se' wë ñi bolökpaie ese shulë ie' tö ikötewa krus mik se' skéie e' wa. <sup>15</sup> Ttè me'atbak Skëköl tö judiowak a' dalöieno,



e' tō se' me'ka ñi bolōkpaie. Erē Cristo kōtewā se' skéie e' kueki ttē e' kōs kē diché tājā. Skēkōl tō iwé es as sa' dōr judiowak ena a' kē dōr judiowak, e'pa dō ñi yamipaiē batsulewā Cristo mik wēs wák ekōl è es. Es ie' tō se' er bua'wé ñi kī. <sup>16</sup> Ì tō se' wé ñi bolōkpaie, ese shulé Cristo tō. Ie' kōtewā krus mik se' skéie, e' wa ie' tō Skēkōl er bua'wé judiowak kī ena pē' kē dōr judiowak esepa kī. Es se' de wēs wák ekōl è es Skēkōl a. <sup>17</sup> Sene bèrē Skēkōl ta, e' ttē buaē pakōk Cristo de, pē' kē dōr judiowak e' butsulettšā bānet Skēkōl yōki, esepa a, ñies judiowak kē e' butsulettšā bānet esepa a. <sup>18</sup> Cristo batamik se' kōs dōwami buaē S'yé ska', iWikōl dōr ekōl è, e' wa. <sup>19</sup> E' kueki ñīne tā a' kē dōr wēs ká kua'kī wakpa es. A' de s'batse'rupa kīie. Ñies a' de Skēkōl ala'rie. <sup>20</sup> Se' dōr wēs u es. Jesús ttekōlpa tsá ena Skēkōl ttekōlpa, e'pa dōr wēs u kukulēwō es. Jesucristo wák dōr wēs u chkí es. <sup>21</sup> Cristo dōr u wōklō'ukwak. Se' kōs dōr u e' yese alē. Cristo batamik u e' yōrmir dō ide u etkue batse'r Skēkēpa a ekkē. <sup>22</sup> Se' batsulewā Cristo mik, ñies se' batsulewā ñi mik, es se' kōs dō wēs Skēkōl wé es, e' a Skēkōl serke iWikōl wa.

### **Pablo klōne Cristo ttē pakōk pē' kē dōr judiowak esepa a**

**3** Ye' wák tso' wōtēulewā s'wōto wé a Cristo Jesús ttē pakē kueki a' kē dōr judiowak esepa kīmoie. Skēkōl er buaē ché a' a tajē, e' kueki ie' a ye' tso' ik-iōk a' kī. <sup>2</sup> Ye' wā ijcher tō a' wā ittšēule tō Skēkōl er buaē ché ye' a, e' kueki ie' tō kanē i' me' ye' a Jesús ttē pakōk a' kē dōr judiowak esepa a. <sup>3</sup> Ibikeitsbak Skēkōl tō wē, e' blē'waitō erē iwā kkay'itō ye' a. E' wā shtétke ye' tō a' a yēkkuō i' kī bōt mañat. <sup>4</sup> Yēkkuō i' sué a' tō, etā a' éna iwā armi tō Cristo ttē blēulewā se' yōki kuaē, e' wā ane ye' éna buaē. <sup>5</sup> Ibikeitsbak Skēkōl tō wē Cristo

batamik, e' blēulewā kuaē. Erē ñīne tā ie' tō iwā kkaché iWikōl wa sa' dōr Cristo ttekōlpa tsá e'pa a, ñies Skēkōl ttekōlpa batse'r e'pa a. <sup>6</sup> Ttē e' blēulewā se' yōki kuaē, e' wā dōr i' es: A' kē dōr judiowak, esepa kiekē Skēkōl tō Jesús ttē buaē e' wa as ì kōs tso' ie' wā mē sa' a, e' mūtītō a' a ñies, as a' dōñak sa' tā ñita wēs wák ekōl è es, as ì kōs muk Skēkōl kablē' sa' a e' dō a' ulā a ñies, a' batsulewā Cristo Jesús mik e' u' kueki. <sup>7</sup> Skēkōl er buaē ché ye' a, e' kueki ie' diché wa ie' tō ye' me'ka ttē buaē ñī wakanéuk.

<sup>8</sup> S'batse'rupa kōs, e' sulula ye' dōr. Erē Skēkōl er buaē ché ye' a, ie' tō ye' shushté Cristo ttē buaē e' pakōk pē' kē dōr judiowak esepa a. Ì tso' Skēkōl wā ie'pa a Cristo batamik, e' dōr buaē shūte, kē se' a iwā bikeitsuk ekkē. <sup>9</sup> Ñies ì bikeitsbak Skēkōl tō wē Cristo wa, e' wā pakōk suli-tane a ie' tō ye' patké. Ttē e' bak blēulewā ká iaiāē, ie' dōr íyi ulitane yuōkwak e' wā. <sup>10</sup> Ie' kē wā ikkayēne yi a ká iaiāē tā, ie' tso' se' dōr Skēkēpa Jesús icha e'pa panuk e' kueki. Se' wa ie' tō iwā kkaché ñīne tā íyi wōkir ena íyi wák tso' kē wēr-tā'wā ese kōs a as ie'pa éna iar tō ie' si-wā' dōr iskiē tsakiē íyi ulitane tsata. <sup>11</sup> E' kōs wé ie' tō Cristo Jesús dōr Skēkēpa e' wa, wēs ie' tō iwā yōbiē e' bikeitsbak es. <sup>12</sup> Se' batsulewā Cristo mik, se' erblōke ie' mik, e' kueki se' dōmiwā buaē ttōk ie' tā kē suarta', kē wōklōr ì a. <sup>13</sup> Ye' weirke kōs a' dalērmik, e' wa a' ké e' ttsōkka. E' kueki ye' tō a' a ichē tō kē a' e' siaukwa.

### **Pablo ttēne Skēkōl tā Éfeso wakpa kī**

<sup>14</sup> Íyi ekkē kōs kueki ye' e' tkéwa kuché kī S'yé wōrkī ttōk ie' tā. <sup>15</sup> Ì kōs dōr ttsē'ka ká jaì a ena ká i' a, e' tso' ie' è batamik. <sup>16</sup> Ie' olo tā' tajē shūte, e' a ye' tō ikieke tō ie' tō a' er diché ìō iWikōl wa. <sup>17</sup> Ñies ye' tō ikieke ie' a tō Cristo mú ser a' er a, a' erblōke ie' mik e' kueki. Ye' tō ie' a ikieke tō a' e' tkōwā darērēē ñi dalēritsōk ñies Skēkōl

dalëritsök. <sup>18</sup>Ye' tō ikieke ie' a es as a' ena s'batse'r malepa, e'pa kōs éna iwà ar tō kōs Cristo éna se' dalër, e' dör taië, shoë, batsië, kakkeë, iskië, kè enukwa. <sup>19</sup>Ye' kī ikiane tō a' éna iwà anù buaë tō kōs Cristo éna se' dalër, e' tkòkà kōs se' kabikeitsò e' tsatà. Es ye' kī ikiane as a' ser buaë yësyësë, kabikeitsò buaë mokïë wes Skëköl wák es.

<sup>20</sup>Skëköl diché ta' taië, e' tso' iwakanéuk se' er a. Ie' tō ì buaë wëmi se' a, ì kōs kiekësò ena ì kōs bikeitsekesò e' tsatà, e' kuekī ie' kikòkasò. <sup>21</sup>As Skëköl kikòkà se' dör Skëkëpa Jesús icha e'pa tō. Nies ikikòkasò Cristo Jesús kuekī kekraë. Es e' idir.

#### Se' dör wes nī yamipa es Wiköl Batsè'r wa

**4** Ye' tso' wötëulewà Skëkëpa Jesús ttè kuekī. Skëköl er buaë ché a' a taië Cristo batamik, e' kuekī ye' kköchò a' a tō a' senú buaë yësyësë wes Skëköl tō a' klö'bak senuk es. <sup>2</sup>A' e' wóowa bèrë, a' senú buaë nīta kè kësik wa. A' nī dalëritsò, nies a' nī dalë'tsò er bua' wa. <sup>3</sup>A' kōs dör wes nī yamipa es Skëköl Wiköl wa. A' e' chó darërë as a' kè nī blabat-sòlor nī yökī. A' senú bèrë nīta. <sup>4</sup>Se' kōs dör wes wák eköl è es. Skëköl Wiköl tso' se' ta e' dör eköl è. Skëköl tō se' kōs klö' as se' ser michoë ie' ta, e' wà paneke se' kōs tō nīta ttsë'ne buaë wa. <sup>5</sup>Se' Këköl dör eköl è, ttè mik se' erblöke e' dör etkè. S'wösokuë etkè a se' ulitane wösune. <sup>6</sup>Skëköl dör eköl è, e' dör se' ulitane yé. Ie' dör se' ulitane wökir. Ie' tso' iwakanéuk se' ulitane wa, nies ie' tso' se' ulitane ta.

<sup>7</sup>Se' kōs dör wes wák eköl è es, erë Cristo tō imé se' a eköl eköl kanebloie ie' a kuakī kuakī wes ie' kī ikiane es. <sup>8</sup>E' dör wes itso' kitule Skëköl yëkuuò kī es, e' tō ichè:

“Mik ie' e' aléka ibolökpa kī età ie' míkane ká jaì a. Ibolökpa klö'wëwaitò taië, e'pa mítser iwà e' ta, nies ì buaë méitò iwakpa a.”\*

Es Skëköl yëkuuò tō ichè. <sup>9</sup>Wé ichéitò tō “ie' míkane kákke”, età zima e' wà dör? E' wà dör tō ie' dërò kewe ká dià kaska'. <sup>10</sup>E' wà kiane chè tō ie' dërò ká dià kaska', e' è mine'kane ká jaì a fyi ulitane tsatà ká kōs wà ioie ie' olo taië e' wa.

<sup>11</sup>Cristo tō diché mé se' a eköl eköl kanebloie ie' a. Se' welepa shushtë ie' tō kaneblök ie' a ittekölpa tsáie. Se' welepa skà shushtë ie' tō Skëköl ttekölpaie. Se' welepa skà shushtë ie' tō ittè buaë pakökwakpaie. Se' welepa skà shushtë ie' tō ittè klö'ukwakpa wökirpaie ena s'wöbla'ukwakpaie ittè wa. <sup>12</sup>Esepa kanè dör s'batse'r malepa kōs wöbla'uk kaneblök buaë ie' a ena nī kīmuk buaë. Se' serke wes ie' kī ikiane es, e' ta se' kōs dör wes Cristo chkà es, e'pa er diché kī iërdaë Cristo ttè a. <sup>13</sup>Es se' kōs döraë erblök nīkkëë Jesús dör Skëköl Alà, e' mik. Nies se' kōs wà ijcherdaë nīkkëë se' er a tō wes ie' dör. Se' döraë wes wëm kibineone es. Se' serdaë buaë yësyësë wes Cristo es. <sup>14</sup>Es se' kè döpaia wes alala es kītër tottola ttè ulitane wa. Esepa dör wes dichawö ppé si-wa' tō es. S'wöbla'ukwakpa kache ttè wa, e'pa erbikò taië, ie'pa tō ttè pa'ali yuëmi s'kīt'woie. Mik se' kibine Cristo ttè a, età eseпа kè kītöonukia yi a. <sup>15</sup>Kè se' e' muksa kīt'wë kache ttè wa. E' skéie ttè mokī, ese chekesò nī a se' nī dalëritsò e' kuekī. Se' tō iwé es, età se' diché iërke buaë Cristo dör s'wökir, e' ttè kōs a. <sup>16</sup>Cristo batamik se' kōs dör wes s'chkà es. S'chkà a s'dichéwö tso', s'kicha tso' ena s'yese skà tso' tsakïë, e' kōs tso' iëulewà buaë nīkkëë, kaneblöke buaë nīkkëë

\*4:8 Salmo 68.18

ñita. Es se' dör taië, e'pa kanëblöke Cristo a eköl eköl kanë dör ku'a'ki ku'a'ki, erë Cristo batamik se' dör wes chkà etkè es, iëulewà buaë ñita, kanëblöke buaë ñita. Es se' mir buaë, ñi kí diché iöke buaë ñikkëë ñi dalër wa.

### Kè se' senukià wes pè' kè tö Skëköl dalöië es

<sup>17</sup> Skëkëpa Jesucristo ttò wa ye' tò a' a ichè tò kè se' serià wes pè' kè tò Skëköl dalöië ser es. Ì kos bikeitseke ie'pa tò, e' wà kè dör iie bua'. <sup>18</sup> Ie'pa erbikè ttse- newatke. Skëköl ttè mokì, e' wà kè ane ie'pa éna yës. Ie'pa er darërëë, e' kuekì sene mokì meke Skëköl tò se' a, e' kè dè' ie'pa ulà a. <sup>19</sup> Ie'pa er burinewà. Ie'pa e' mettsà ì sulu kukuétökwà darërëë. Ie'pa e' ia'uke sene sulusi wa, kè e' wöklö'uta' yës.

<sup>20</sup> Erë Cristo ttè kè wa se' wöblane senuk es. <sup>21</sup> Mokì a' tò ie' ttè ttsé, a' e' yué ie' ttè mokì wa. <sup>22</sup> E' kuekì se' bak senuk suluë, ese kos olo'yösö. Nies se' wák dër suluë, e' olo'yösö. E' tò se' kitò'weke ì sulu wamblök. Se' tò iüté es, e' ta se' er sulurdawà. <sup>23</sup> Erë se' erbiköne ku'a'ki buaë yësyësë. <sup>24</sup> Skëköl tò se' wák dër suluë, e' mane'wëttsà pa'alì wes ie' wák es, e' kuekì se' senú yësyësë ena batse'r wes ttè mokì tò ichè es.

<sup>25</sup> E' kuekì a' kè kachökia ñi kì. Se' kos dör wes wák eköl è es, e' kuekì ì cheke a' tò ñi a, e' chó ttè mokì wa.

<sup>26</sup> A' ulune, e' ta kè iwà wamblar. A' er buanúne kam katuirwà e' yöki. <sup>27</sup> Kè kawö mar bé a as ie' tò a' kò ì sulu wamblök.

<sup>28</sup> Yi bak akblök, e' kè akblökia. E' skéie ese kanëbló iwák ulà wa as iulà a iwà dò ta ikakmèitò s'siarëpa a.

<sup>29</sup> Ttè sulusi kè charia. E' skéie a' tò ttè buaë ese è chó s'malepa kukua as ie'pa kì er tòwà Skëköl mik darërëë. Es a' tò ie'pa kimëmi buaë mik ie'pa kì ikiane eta. <sup>30</sup> Skëköl tò iWiköl me' se' a iwà kka-

choie tò se' dör ie' icha. Es se' wà ijcher mokì tò Skëköl tò se' bleraë buaë dò mik se' tsatkërdattsà aishkuö ta, e' këwö ska' ta. E' kuekì kè ì sulu wamblaria as Wiköl Batse'r kè eriar. <sup>31</sup> Kè a' kësik blökia ñi kì. Kè a' ñi saukia suluë. Kè a' ulunukia ñi kì. Kè a' ñi wönanukia ñi kì. Kè a' ñi chökia suluë. Ese kos olo'yó. <sup>32</sup> E' skéie ì buaë è ú ñi a. A' ñi saú er siarë wa. Ì sulu wambleke a' tò ñi kì, ese nuí olo'yó ñi kì wes a' nuí olo'yé Skëköl tò a' kì Cristo batamik es.

**5** A' dör Skëköl ala'r dalër taië ie' éna, e' kuekì a' senú buaë yësyësë wes ie' ser es. <sup>2</sup> A' ñi dalëritsò këkraë wes Cristo tò se' dalëritsé es. Ie' e' mettsà ttèwà se' skéie. E' wër buaë Skëköl wa wes íyi mekesö ie' a ala'r buaë masmas es. <sup>3</sup> A' senú wes s'batse'rpa ké senuk es. Kè a' kàne trëruk. Kè a' kàne e' ia'ukka sene sulusi wa. Kè a' kàne íyi kkechök. Íyi ese yöki a' e' kkönú bua'iewà as kè yi tò a' kkatò iki. <sup>4</sup> Ttè sulusi kos, ttè kè wà ta' kos, ttè tsuleie kulúie kos, ese kè char. E' skéie Skëköl è kíkóka. <sup>5</sup> A' wà ijchenú buaë tò wépa trërke ena wépa tò íyi sulusi wambleke, nies wépa tò íyi kkecheke (e' dör wes íyi diököl dalöië skëkölíe es), esepa kos kè dòpa ì blúie Cristo ena Skëköl e'pa tso' e' a.

### Sene buaë yësyësë

<sup>6</sup> Íyi sulu ekkè kos kuekì wépa tò Skëköl ttè dalösewéwà, esepa kì Skëköl kësik ardaë. E' kuekì kè a' e' muktsà yi a kitò'wè ttè kè wà ta' ese wa. <sup>7</sup> Kè a' e' tiük ie'pa esepa ta, a' e' skó ie'pa yöki bánet. <sup>8</sup> A' bak senuk suluë, e' dör wes a' bak senuk ká ttsettseë a es. Erë i'ñe ta a' tso' batsulewà Skëkëpa Jesús mik, e' dör wes a' serke ká ñí a es. E' kuekì a' senú wes s'ser ká ñí a es. <sup>9</sup> S'serke wes ká ñí a es, esepa er buaë, ser yësyësë ena ttò mokìë. <sup>10</sup> A' e' chó e' wöbla'uk ì wër buaë Skëkëpa wa ese wa. <sup>11-12</sup> Ì sulu wambleke wépa ser wes

ká ttsetseë a es, esepa tö, ese kè dör iie bua'. Ì sulu wambleke ie'pa tö akirie, ese pakè tö s'jaëwè ekkè. E' kuekì kè ì sulu wamblaria yès wës ie'pa es. E' skéie ì buaë kí ú kekraë. E' tö ie'pa a ikkachèmi tö ì wambleke ie'pa tö e' dör suluë. <sup>13-14</sup> Erè ká ñiwe tö íyi ulitane kkachèwà buaë míá ñiweie. E' kuekì mik ì sulu wambleke ie'pa tö e' kkachésò ie'pa a, e' tã ie'pa welepa éna iarmi tö e' dör suluë tã ier mane'umi tã imía ser buaë wës ká ñiwe wakpa es. E' kuekì ttè tö ichè 'i es:

“A' dör wës s'kapötkëter es, esepa tì'nú, a' dör wës s'duulewà es, esepa shkenúkane, etã Cristo tö a' er ñi'weraë.”

<sup>15</sup> E' kuekì a' ser kkö'nú a' tö. Kè a' senukiã wës wépa kè er tã' esepa ser es. E' skéie a' senú yësyësë. <sup>16</sup> Taië pè' tö íyi sulu wambleke ñíne tã, e' kuekì ì buaë ormi se' a, e' tã iüsö kos se' a iormi ekkè. <sup>17</sup> Kè a' senuk wës kè se' erbiköta' buaë es. Erè ì kiane Skékëpa Jesús kì tö se' tö iwè, ese wà anú a' éna. <sup>18</sup> Kè a' e' ttökkaia blo' wa yës. E' tö s'sulu'wekewà da'a. E' skéie a' senú buaë yësyësë kekraë Wiköl Batse'r diché wa. <sup>19</sup> Mik a' ñi dapa'uke, etã a' ttsó ñita Salmo wa ena Skéköl ttsé wa, ñies ttsé meke iWiköl tö a' a ese wa. A' ttsó Skéköl a' ikikokaie a' er kos wa. <sup>20</sup> Wéstela chó kekraë Skéköl dör S'yé e' a Skékëpa Jesucristo ttò wa.

### Wës se' ké senuk ñita

<sup>21</sup> Cristo dalöieke a' tö, e' kuekì a' ñi dalöiö. <sup>22</sup> Alakölpa ké iwépa dalöiök wës ie'pa tö Skékëpa dalöieke es. <sup>23</sup> Alaköl wëm dör ie' wökir wës Cristo dör ie' ichapa wökir es. Ie' dör ie'pa tsatök-wak. Ie'pa dör wës ie' chkà es. <sup>24</sup> E' kuekì alakölpa ké iwépa dalöiök ì kos a wës

wépa dör Cristo icha esepa tö ie' dalöieke es.

<sup>25</sup> A wépa, a' alakölpa dalëritsó wës Cristo tö se' dör ie' icha esepa dalëritseke es. Ie' e' mettsa ttèwà se' skéie. <sup>26</sup> Ie' tö iwé es se' batse'woie. Ie' tö se' paiklé ittè wa as se' dò maneneë Skéköl wöa. E' wà suekesö mik se' wösune etã. <sup>27</sup> Ie' tö iwé es as se' dò ie' wák wörki batse'r, kè kì ì sulu tã' yës, olo tã' taië wës alaköl ulabatsöketke es, ese paiëule buaë, kè iauleka, idatsi' kè wökliuleka. <sup>28-30</sup> Es ñies wépa ké ilakölpa dalëritsök wës ie'pa e' dalëritsò es. Kè yi e' sauta' suluë. E' skéie se' e' kkö'nú buaë, e' tiö buaë. E' kuekì wëm tö ilaköl dalëritseke, e' wa ie' wák e' dalëritsò. Es ñies se' dör Cristo icha, e'pa dör wës ie' chkà es, e' kuekì ie' tö se' kkö'neke buaë. <sup>31</sup> Itso' kitule Skéköl yëkkuö kì 'i es: “Wëm kè serpaia iyé ena imì e'pa dapömik, e' skéie iserdawà ilaköl tã. Ie'pa bøl serdaë ñita tã ie'pa míá wës wák eköl è es.”† <sup>32</sup> Ttè e' dör taië iskië, kè se' éna iwà ar bet. Erè ye' a tã, ttè e' tso' Cristo ena se' dör ie' ichapa e'pa chök. <sup>33</sup> Erè ñies ttè e' tso' se' a ichök tö wépa kos ké ilakölpa dalëritsök wës iwákpa e' dalëritsò es. Ñies alakölpa kos ké iwépa dalöiök.

**6** A ala'rla, a' yé ena a' mì, e'pa ttò dalöiö Skékëpa Jesús dalërmik, e' dör buaë yësyësë e' kuekì. <sup>2-3</sup> Ttè dalöiëno me'atbak Skéköl tö e' et tö ichè: “A' yé ena a' mì e'pa dalöiö. A' tö iwé es, e' tã a' kawö tköraë buaë ena a' serdaë ká taië ká 'i kì.”‡ Ttè e' dör ttè dalöiëno tsã kablé se' a ilè uk iütè skéie e'.

<sup>4</sup> A' dör ala'rla yéwöpa ena imiwöpa, kè a' tö a' ala'r uluukka. E' skéie ie'pa tala'ú buaë, ie'pa shuló er bua' wa. Ñies ie'pa wöbla'ú Skékëpa Jesús ttè wa.

<sup>5</sup> A' klöulewà kanè mésoie, a' wökirpa tso' ká 'i kì, e'pa ttò iütó er mokì wa. Ie'pa

†5:31 Génesis 2.24

‡6:2-3 Deuteronomio 5.16

dalöiö suane wa painè wa. A' kanebló ie'pa a buaè wës a' chópá kaneblök Cristo a es. <sup>6</sup> A' kanebló buaè ie'pa a kekraë, kè dör mik ie'pa tó a' sueke e' è tá ie'pa wókatoie tó a' dör kanè mésopa buaè ese. Mokí a' dör Cristo kanè mésopa, e' kuekí a' kanebló ie'pa a kaneè wës Skéköl kí ikiane es. <sup>7</sup> A' kanebló ie'pa a kaneè wës Skékëpa Jesús wák a s'kaneblò es, kè dör wës s'kaneblò s'ditsó a es. <sup>8</sup> A' wa ijcher tó wépa tso' klöulewá kanè mésoie ena wépa kè dör es, esepa kos a Skékëpa Jesús tó iské meraë eköl eköl wës i buaè wésó es.

<sup>9</sup> A' dör kanè wökirpa, a' kanè mésopa dalöiö ñies. Kè ie'pa pauñar. A' éna ianú tó a' ena ie'pa, e'pa kos wökir dör Skéköl tso' ká jai a e'. Se' kos kawötá ie' tte dalöiök. Se' dör kanè wökirpa ö se' dör kanè mésopa esepa, esepa kos dör ñies ème ie' a.

### Se' e' tsatkò bé yöki

<sup>10</sup> A yamipa, ibataie tá ye' tó a' a' icheke tó a' e' diché ió kekraë a' batsulewá Skékëpa Jesús tá e' wa, ñies ie' diché taië e' wa. <sup>11</sup> I kos mé Skéköl tó a' a' e' tsatkoie i sulu yöki, e' dör wës i kos tso' ñippök-wakpa wa e' tsatkoie es. E' ió a' tó as a' e' tsatkò, e' wa a' e' tkówa darërè bé éna se' kitó'wak e' yöki. <sup>12</sup> Kè se' ñippöku' s'ditsó tá. E' skéie se' ñippöke íyi sulusi diché tá kè wërta'wá esepa tá. E'pa dör íyi wökir ena íyi wák tso' i sulu kos tso' s'pamik wës stui a es ese wëttsuk. <sup>13</sup> E' kuekí i kos mé Skéköl tó a' a' e' tsatkoie, e' ió a' tó, e' kló'ú as mik i sulu datse a' erkiöuk i sulu wamblök, eta' a' a' iwöklör. A' tó iwé es kekraë, e' tá a' e' alóraka i sulu kí tá a' a' e' tkërdawa darërè mokijë.

<sup>14</sup> E' kuekí a' tso' erki ñippök i sulu tá. Skéköl tte mokí e' kló'ú a' tó, e' dör wës ñippök-wakpa kipamo es. A' senú

yësyësë Skéköl a, e' tó a' kimerä wës íyi daloie ieke ñippök-wakpa tó ibatsí kí e' tsatkoie es. <sup>15</sup> Skéköl tó a' er bua'wéne ie' kí Cristo batamik, e' tte buaè kló'wé a' tó, e' dör a' a' wës ñippök-wakpa klökkuö iöká as kè ikulirttsá es. <sup>16</sup> Ñies a' erblö kekraë Skékëpa Jesús mik, e' dör wës i tso' klöule ñippök-wakpa wa iulá a shoë e' tsatkoie es. E' wa a' tó i sulu kos patkeke bé tó a' kí ese kos wöklö'weraë. E' dör wës kuaböt wönarke bö'ie uyeke ñippök-wakpa kí, e' wöklö'weke wöshteki i tso' ie'pa wa iulá a e' wa es. <sup>17</sup> Skéköl tó a' tsatkerä, e' bikeitsó a' tó kekraë, e' dör wës íyi daloie tkekeka ñippök-wakpa tó iwökir kí e' tsatkoie es. Ñies a' er múwa ie' tte kí, e' dör wës ie' Wiköl tabè es. <sup>18</sup> I kos a' tá ikió ie' a' tó ie' tó a' kimè. Ie' tá a' ttó kekraë iWiköl wa, kè ilo'yar yës. Ñies ie' a' ikió s'batse'r malepa kos kí. <sup>19</sup> Ñies ikió ie' a' tó ye' a' tte mèitö wá pakè as ye' tó Jesús tte buaè blëulewá ká iaiaë, e' wá pakò kè suarta'. <sup>20</sup> Ye' patkeule tte buaè e' pakök, erè i'ne tá ye' tso' wötëulewá s'wöto wé a' tte e' kuekí. A' ikió Skéköl a' ye' kí as ye' tó iwá pakò buaè kè suarta'.

### Pablo e' chéat

<sup>21-22</sup> Ye' kí ikiane tó a' wa ijcher tó is ye' tso' ena i weke ye' tó. E' kuekí ye' tó yëkkuö i' patkeke Tíquico ulá a. Ie' dör s'yami dalër taië sa' éna. Ie' dör Skékëpa Jesús kanè méso yësyësë ese. Ie' tó a' a' ichèmi tó is ye' tso'. Ñies ie' tó a' er diché ièmi.

<sup>23</sup> Skéköl dör S'yé ena Skékëpa Jesu-cristo as e'pa tó sene bèrè mù s'yamipa kos a. Ñies as Skéköl tó ie'pa kimù ñi daléritsök buaè. Ñies as ie'pa erblö Skéköl mik kekraë. <sup>24</sup> As Skéköl er buaè chò wépa éna Skékëpa Jesucristo dalër kekraë kè manerta'ttsa esepa kos a.

## Yëkkuö kit Pablo tö Filipos wakpa a

### Filipenses

Mik Pablo tö yëkkuö i' kit, etä ie' tso' Roma wötëulewä s'wöto wé a Jesús tté buaë pakè kueki. E' tso' kitule Hechos 28.14-31 e' ki. E' yöki mik Pablo dë'rö Filipos Silas ena Timoteo e'pa ta Jesús tté buaë pakök, etä taië pë' erblë' Jesús mik (Hechos 16.11-40). Mik Jesús mik erblökwakpa wä ijchenewä tö Pablo tso' wötëulewä, etä ie'pa tö inuköl ena ilè skà patkë'mi Epafrodito ulà a ikimoie. E' ki wëstela ché Pablo tö yëkkuö i' ki.

Filipos wakpa weirke Jesús mik erblë e' kueki. E' kueki Pablo tö ie'pa a ikkaché tö eré ie' weirke, eré ie' tssë'rke buaë. Ie' tö ie'pa a iché tö ie'pa ké senuk wës Jesús sené es. Ie' e' wöawa diöshet s'malepa ki-moie. Es se' kawötä senuk nì kimoie.

E' kiië ta ie' tö ie'pa a ibiyó ché tö Israel aleripa welepa tso' s'wöbla'uk suluë. E' yöki ie'pa kawötä e' kkö'nuk. Ie'pa ñekkëpa s'wöbla'weke tö kè se' tsatkërpa erblë Jesús mik e' è wa. Eré Pablo tö iché tö e' kè idör es.

### Shkë'wë

**1** Ye' dör Pablo. Nies Timoteo tso' ye' ta ie. Sa' dör Cristo Jesús kanè mé-sopa. Ye' tso' yëkkuö i' shtök a' dör batse'r batsulewä Cristo Jesús mik serke Filipos e'pa a, nies a' wökirpa ena ie'pa kimuk-wakpa e'pa kos a. <sup>2</sup>Skököl dör S'yé ena Skökëpa Jesucristo as e'pa er buaë chò a' a ena sene bèrè mù a' a.

### Pablo tö wëstela ché Skököl a Filipos wakpa dalërmik

<sup>3</sup>Bitökicha ye' er ane a' ska', etä ye' tö wëstela cheke Skököl a a' dalërmik. <sup>4</sup>Këkraë mik ye' tö ikieke Skököl a a' ki, etä ye' tssë'ne buaë. <sup>5</sup>Kuaë dò ikkë ta,

buaë a' tö ye' kimeke Jesús tté buaë pakè e' kané wa. E' kueki ye' tssë'ne buaë a' dalërmik. <sup>6</sup>Ye' wä ijcher buaë tö i' buaë tsá tkéwamitke Skököl tö a' er a, e' wä kí weraëitö buaë dò mik Jesucristo döne etä. <sup>7</sup>A' dalër taië ye' éna, e' kueki e' dör buaë tö ye' tö a' bikeitsè es. Këkraë a' er tso' ye' ska'. Eré ye' tso' wötëule s'wöto wé a Jesús tté buaë kueki, eré a' er tso' ye' ska'. Nies mik ye' kè ku' wötëule tso' Jesús tté buaë tsatkök ena ichök tö e' dör moki, etä a' er tso' ye' ska'. Skököl er buaë ché ye' a e' kueki kanè méitö ye' a Jesús tté buaë pakök. Kanè e' a a' ulitane tso' ye' ta nita. E' kueki buaë idir tö ye' tö a' bikeitsè es. <sup>8</sup>Skököl wä ijcher buaë tö kos ye' éna a' dalër wës Cristo Jesús éna a' dalër es. <sup>9</sup>Ye' tö Skököl a ikieke tö a' kí nì dalëritsò taië. Nies ye' tö ie' a ikieke tö as a' kí er bikò yësyësé ena a' kí éna ká ar buaë <sup>10</sup>as i' dör ibua'ie ese shushtò a' tö wë këkraë. Es a' sermi batse'r, kè ki i' nu' ta' dò mik Cristo döne etä. <sup>11</sup>Es Jesucristo batamik a' sermi yësyësé, e' wërdaë buaë wës kal bua'buwa wör buaë ese wër es. E' dör es, etä Skököl dalöierdaë buaë ikikardakä taië a' batamik.

### Pablo tso' wötëule eré Jesús tté buaë kí pakarke

<sup>12</sup>A yamipa, ye' ki ikiane tö a' wä ijcher tö i' sulu tköke ye' ta, moki e' kè wä Jesús tté buaë wöklöne. E' skéie ikí pakarke taië. <sup>13</sup>Shkëkipa kos tso' ie ká i' wökir kibi u a, nies imalepa kos tso' ie, e'pa wä ijcher tö ye' tso' wötëule Cristo tté kueki. <sup>14</sup>Nies ye' tso' wötëulewä moulewä, e' tö taië s'yamipa tso' ká i' a, e'pa kí erkiöwé tté pakök kè suarta'ia, ie'pa kí erblöke Skökëpa mik e' wa.

<sup>15</sup>Moki s'yamipa welepa ukyërke ye' ki, ie'pa wötköke ye' ki, e' kueki ie'pa tö Cristo tté pakeke. Eré welepa tö ipakeke er moki wa. <sup>16</sup>Ie'pa éna ye' dalër taië, nies ie'pa wä ijcher buaë tö ye' tso' wötëulewä ie, e' dör Jesús tté

buaë tsatkoie. E' kuëki ie'pa tö Cristo tté pakeke. <sup>17</sup> Erë welepa skà tso' e' è bikeit-sök, esepa tö ipakeke, erë e' kè dör er mokì wa. Ie'pa éna ye' kí we'ikak ye' tso' s'wöto wé a' e' dalewa. <sup>18</sup> Erë ipakarke er sulu wa ö er mokì wa, e' kè dé' wes ye' a. I'buai'e dör tö Cristo tté buaë e' pakarke, e' tö ye' ttsé'weke buaë.

Età ye' kí ttsé'rdäe buaë. <sup>19</sup> E' wà dör tö ye' wà ijcher tö ye' yèrdattsane e' kieke a' tö Skëköl a' e' batamik, nies Jesucristo Wiköl tso' ye' kimuk e' batamik. <sup>20</sup> Mokì yö iklö'wé tö ye' kè jaënu'kka Cristo kí s'shulök'wakpa wörki. Ye' wà ijcher tö mik ye' e' tsatköke ie'pa wörki, età ye' ttörae ie'pa tã kè suane wes kekrae ye' tö Cristo tté pakeke es as ie' kíkarka tajë ye' wa. Ye' serkeia ö ye' ttëwã e' wa Cristo kíkarka. <sup>21</sup> Ye' a' tã, ye' serkeia, e' dör Cristo kíkòkka. Erë ye' blënewã, e' tã ye' e' alé. <sup>22</sup> Ye' serkeia ká i' a, età es ye' kanëblömiã Cristo a' tã e' wà kí döratssa buaë. Ye' wák kè wã ijcher tö wéne dör ibua'ie. <sup>23</sup> Darëre ishukit ye' a. Sulu ye' shkakmitke Cristo ska', e' dör ibua'ie ichökle. <sup>24</sup> Erë a' a' buaë idir tö ye' serkeia a' kimoie. <sup>25</sup> Ye' wã ijcher buaë tö e' dör mokì, e' kuëki ye' wã ijcher tö ye' serkeia ká i' a' a' kimoie as a' kí ttsé'r buaë tté mik se' erblöke e' a. <sup>26</sup> Nies ye' serkeia ká i' a' e' dör as a' tö Cristo Jesús kíkòkka tajë mik a' tö isuë tö ie' wã ye' dene a' ska' età.

### Sene wes Cristo kí ikiane es

<sup>27</sup> I'buai'e dör tö a' senú yësyëse wes Cristo tté buaë tö ichè es. Ye' de a' ska' ö ye' kè dé' a' ska', erë ye' kí ikiane tö a' ser es as ye' tö a' tté ttsò tö a' er méwã ñita ñikkëe. Nies as ye' tö ittso tö a' e' tkéwã darëre ñita Jesús tté buaë mik se' erblöke e' tsatkök. <sup>28-29</sup> Skëköl er buaë ché se' a, e' kuëki ie' tö kawö mé se' a' erblök Cristo mik nies weinuk idalërmik. E' kuëki kè a' suanuk se' bolökpa yöki.

Ie'pa tö se' we'ikeke, e' dalë'ttsésö er bua' wa, e' tã e' tö ikkacheke ie'pa a' tö ie'pa weirdäe siarë aishkuö tã, erë se' tsatkërdaë. E' kos dör Skëköl kanè. <sup>30</sup> I'ñe tã a' weirke wes a' tö isu' tö ye' weine mik a' tã ye' bak età es. Nies i'ñe tã a' tö ittse tö ye' tso'ia weinuk.

### Se' ké e' wöökwa diöshet wes Cristo e' wöawa es

**2** Cristo tö a' er kuweke. Ie' éna a' dalër tajë e' tö a' er pableke. A' batsulewã ñi mik Skëköl Wiköl wa. Nies a' ñi saü er bua' wa, er siarë wa. <sup>2</sup> E' kuëki ye' tö a' a' ikië tajë tö a' er múwã ñita ñikkëe. A' ñi dalëritso ñikkëe. A' erbikò ñikkëe Skëköl a. A' senú buaë ñita ñikkëe, e' wa a' tö ye' ttsé'ú buaë. <sup>3</sup> Kè ì wã wötökoie ñita. Kè ì wã e' tsokã ñi kí. E' skéie a' e' wöowa bèrë. Ibikeitso tö s'malepa dör buaë a' tsata. <sup>4</sup> Kè a' e' tkiuk a' wákpa íyi è kí. A' ké s'malepa kí tkinuk ikimè wa isuë wa.

<sup>5</sup> Se' erbikò wes Cristo Jesús erbikò es, e' dör i' es:

<sup>6</sup> Ie' wák dör Skëköl je',

erë ie' kè tkine e' kí tö iwák dör Skëköl.

<sup>7</sup> E' kos méaitö iwák er wa,

ie' de ká i' a' yöne s'ditsöie wes kanè méso es.

Ie' kune' s'ditsöie.

<sup>8</sup> Mik ie' bak ká i' a, età ì kos kiane Skëköl kí e' iutë'itö s'raa

dò ie' e' me'tssa ttëwã wötëulewã krus mik wes pë' sulusi es.

Ekkè ie' e' wöawa.

<sup>9-11</sup> E' kuëki Skëköl tö ie' tkéka íyi ulitane tsata.

Ñies ikië mékaitö Këköl íyi ulitane tsata.

Ie' tö iwé es as ì kos tso' ká jai a, ena ká

i' a' ena ká diöshet e'pa kos e' tulöwã

kuchë kí Jesús wörki idalöioie,

ñies as sulitane tö ichòka tö Jesucristo dör Skëköl,

Skëköl dör S'yé e' kíkoka tajë.

### Sene yësyësë pë' sulusipa shuà

<sup>12</sup>A ye' yamipa dalër tajë ye' éna, Cristo tò Skëköl ttë iutë buaë, e' kuekì ye' tò a' a' ichè tò a' tsatkëne e' wà ú suane wa painè wa. Mik ye' bak a' ska' età kekraë a' tò Skëköl ttë iutë buaë, erë i'ñe tà ye' kè kù' a' tà, età ikí iutó bua'iewa. <sup>13</sup>Skëköl wák tò a' erkiowé ì kiane ie' kì wè ese woje. Ñies ie' tò idiché mé a' a' iwakané-woje. E' kuekì a' tò iwakanewëmi buaë.

<sup>14</sup>Ì kos weke a' tò, e' ú bèrë, kè dör kabene wa, kè dör ukyëne wa. <sup>15</sup>Iú es as kè ì sulu ttë kùr a' kì. Es a' sermi pë' sulusipa shuà yësyësë kè kì ì nuí ta' wës Skëköl ala'r es. Ie'pa shuà a' dör wës bëkwö wöñar ká ttsetse a es. <sup>16</sup>Jesús tò sene michoë mè se' a, e' tté wà pakó ie'pa a. A' tò iwakanewé es, e' tà ye' ttsë'rdaë buaë mik Cristo dene età. Es ye' tò isuëraë tò ye' kanëblé darërë e' kè weine é. <sup>17</sup>A' erblöke Jesús mik, a' tò Skëköl ttë iuteke buaë. Ñies a' e' mettsa weinuk ie' ttë kuekì. E' dör wës iyiwak jchè sacerdote tò mè Skëköl a es. Isalema ie'pa tò ye' ttëwami Jesús ttë kuekì. E' wà tka ye' tà, e' tà ye' doraë wës vino tekettsa iyiwak jchène mè Skëköl a e' kì es. Ie'pa tò ye' ttëwami, erë ye' ttsë'r buaë a' tà ñita. <sup>18</sup>Es ñies a' ttsë'nú buaë ye' tà ñita.

### Timoteo

<sup>19</sup>Skëkëpa Jesús ttò wa ye' mú tò Timoteo patkëmi bet a' ska'. Ie' tò a' a' ye' biyó meraë buaë, e' tò a' ttsë'weraë buaë. Ñies ie' wà a' biyó doraë ye' a' as ye' ttsë'r buaë. <sup>20</sup>Kè yi skà kù' ye' tà tkirke a' kì moki wës ie' es. <sup>21</sup>Imalepa tkirke ì kiane ie'pa wákpa kì, ese è kì, kè tkirta' ì kiane Jesu-cristo kì ese kì. <sup>22</sup>Erë a' wà ijcher tò Timoteo tò ikkayë'bak tò ie' dör Jesús kanè méso buaë. Ie' kanëblëule buaë ye' tà Jesús tté buaë pakök wës ye' wák ala es. <sup>23</sup>E' kuekì mik ye' wà ijchertke tò wës ye' dõmi íe, età ye' mú tò Timoteo patkëmi

a' ska'. <sup>24</sup>Ñies ye' erblöke Skëkëpa mik tò ye' dõmine a' ska' kukuie.

### Eprofodito

<sup>25</sup>Ñies ye' tò ibikeitsè tò ye' kawöta s'yami Eprofodito patkëkmine a' ska'. Ie' dör wës ye' ël es. Ie' kanëblöke buaë ye' tà. Ie' tò Jesús tté tsatkeke buaë ye' tà. A' tò ie' patkë'bitu ye' kìmuk a' skéie.

<sup>26</sup>Ie' kì a' kiane suë kröröë. Mik ie' wà ijchenewa tò a' tò ibiyó ttsë' tò ie' duöke, età e' tò ie' eriawëka tajë. <sup>27</sup>Moki ie' kirinebak. Tsir età ie' blënewa, erë Skëköl tò isuë er siarë wa, e' kuekì ie' buanene. Es Skëköl tò ye' suë er siarë wa ñies. Eprofodito duópawa, e'ma ye' kì eriane tajë. <sup>28</sup>E' kuekì sulu ye' éna ipatkakmi bet a' ska' as a' ttsë'rne buaë isaükne, ñies as ye' kè kì eriaría. <sup>29-30</sup>A' tò ie' kiówà ttsë'ne bua' wa wës Jesús mik erblökwakpa ñi kiówà es. Tsir età ie' blënewa Cristo kanè wè kuekì. Wës a' kè a' ye' kimer, e' kuekì ie' tò ye' kime' a' skéie. Eë iekkë tà ie' blënewa. E' kuekì se' esepa dalöió.

### Cristo dör buaë ichökle ì ulitane tsatà

**3** A yamipa, e' kíie tà ye' tò ichè a' a' tò a' ttsë'nú buaë Skëkëpa Jesús batamik. Ì kitbak ye' tò yëkkuö kì a' a, e' skà shtekeneyö a' a' i' tà. Ye' kè shtrine iskà chökne a' a. E' dör buaë a' a' a' tsatkoie wëpa éna a' kütö'wak esepa yöki. <sup>2</sup>A' e' kkö'nú pë' sulusipa datse wës chichi sulusipa es esepa yöki. Ie'pa e' wamblörak suluë. Ie'pa icheke tò wëpa tottola kkuölit tëule tsir wës Moisés tò ikitat es, esepa è dör Skëköl ala'r chökke. Ie'pa éna a' er sulu'wakwà ttë ese wa. E' kuekì a' e' kkö'nú esepa yöki. <sup>3</sup>E' kè dör wës ie'pa tò ichè es. Se' tò Skëköl dalöieke iWiköl batamik, esepa je' dör Skëköl ala'r chökke. Kè se' erblökü' se' wákpa mik e' tsatkoie. E' skéie se' erblöke ì o' Cristo Jesús tò e' mik, e' wa se' e' tsókeka tajë. <sup>4</sup>Yile e' ttsòka



tö itsatkärmī iwák batamik, e' tã ye' e' ttsòkami taië e' tsata. <sup>5</sup>Mik ye' kī ká deka pàkòl (8) eta ye' tottola kkuölit tène tsir wes Moisés tö ime'at es. Ye' dör Israel aleripa e' eköl. Ye' dör Benjamín ditséwö. Ye' dör hebreo ditséwö chökke. Ye' bak fariseowakie e' kuëkī Moisés ttè kitule dalöiëno e' dalöiök ye' bak buaë wes fariseowakpa es. <sup>6</sup>E' kèwö ska' tã ye' bak ttè e' tsatök darërè dō Skëkëpa Jesús icha esepa we'ikök siarë. Sene yësyësë kiekë ttè ñe' tö se' a' e' wã iütëule ye' wã sera, kè kī ì sulu ttè tã' yës. <sup>7</sup>Ye' bak ibikeitsök tö íyi ekkëpa kôs e' dör buaë ye' a' e' tsatkoie, erë ì'ne tã ye' éna iane tö e' kôs kè dör ìie bua' ye' a. E' kuëkī e' kôs kè wã tã'ia ye' a Cristo dalërmik. <sup>8</sup>E' kīie tã, Cristo Jesús dör ye' Këköl, e' mik ye' bätse buaë, mokī e' dör buaë ye' a íyi ulitane tsata. Ie' dalërmik íyi malè kôs watëttsayö, e' dör ushñaie ye' a as ye' ulà dō ie' ska' <sup>9</sup>ena ye' bätswã ie' mik da'äie. Es Skëköl tö ye' klö'wé wes pë' buaë yësyësë es ie' wörki, e' kè dör Moisés ttè dalöiëno e' dalöiëyö buaë e' kuëkī. E' skéie ie' tö ye' klö'wé wes pë' buaë yësyësë es ye' erblé Cristo mik e' kuëkī. E' wã dör tö mik ye' erblé Cristo mik eta, e' kuëkī Skëköl tö iché tö ye' dör pë' buaë yësyësë ie' a. Ñies ie' tö ye' kímé senuk yësyësë ie' a. <sup>10</sup>Ye' kī e' batsak Cristo mik bua'iewã. Ie' kötwã pë' tö e' shke'kane Skëköl tö ie' diché taië wa, e' diché kiane ye' kī ye' er a. Ye' e' chak weinuk ie' dalërmik wes ie' weine ye' dalërmik es. Ye' e' chak ttèwã ie' dalërmik wes ie' kötwã ye' dalërmik es. <sup>11</sup>Ye' senak es as Skëköl tö ye' shke'ükane aishkuö tã.

### Kam se' ser yësyësë wes Cristo es

<sup>12</sup>Ye' kè tö icheku' tö e' kôs wëtkeyö. Ye' kè tö icheku' tö ye' dekatke ser yësyësë wes Cristo Jesús ser es. Erë ie' tö ye' klö'bak as ye' dō wes ie' es. E' kuëkī ye' e' tkéwã darërë as ye' dō wes ie' es. <sup>13</sup>A yamipa, ye' kè ibikeitsë tö íyi

ekké kôs detke ye' ulà a. Ì o' ye' tö, ese kè biekitseku'iyö. E' skéie ì tso' Skëköl wã ye' a aishkuö tã, ese è yuleke ye' tö darërë. <sup>14</sup>Ye' e' tkéwã darërë kekraë dō mik ye' demi ká jai a eta as iské dō ye' ulà a. E' dör sene michoë Skëköl tã. E' tso' ie' wã bil yi klöule ie' wã Cristo Jesús batamik esepa a. <sup>15</sup>Se' ulitane erblö buaë Cristo mik, esepa kawötã ibikeitsök ñe' es. A' welepa tö ilè biekitseke ku'kī eta Skëköl tö a' er ñi'werane. <sup>16</sup>Erë ibua'ie dör tö se' ulitane kè senuk yësyësë kôs se' a' ikkayëne eköl eköl ekkë.

### Se' dör ká jai wakpa

<sup>17</sup>A yamipa, a' senú wes ye' serke es. Ñies wépa serke wes sa' serke es esepa webló tã a' senú es. <sup>18</sup>Ye' tö a' a' iyë' taië tö pë' tso' e' chò tö ie'pa erblöke Jesús mik, erë ie'pa serke wes Cristo kötwã krus mik e' bolökpa es. E' skà chëneyö a' a' i' tã ìè wa. <sup>19</sup>Ie'pa ekkëpa michoë ewëwa. Ì kiane ie'pa kī ese dör ie'pa këköl. Warma ì tö ie'pa kè jaënuk taië, ese wa ie'pa e' ttsòkeka. Ie'pa er me'rie ì tso' ká i' a' ese è kī. <sup>20</sup>Erë se' dör ká jai wakpa. Skëkëpa Jesucristo dör S'tsatökökwak tso' ká jai a, e' datskene, e' paneke se' tö krörö. <sup>21</sup>Ie' wã diché tso' taië e' alokã íyi ulitane kī. Idiché wa ie' tö se' chká nurta'wã e' mane'werattsã as idò wes ie' wák chká olo tã' taië es.

**4** A yamipa, a' e' tköwã darërë Skëkëpa Jesús a' kekraë. Suluë ye' éna a' suakne, a' dalër taië ye' éna. A' tö ye' ttsë'weke buaë. A' dör wes ye' kaneblöke Skëköl a' e' ské es.

### Evodia ena Síntique

<sup>2</sup>A Evodia ena Síntique, a' bül dör Skëkëpa Jesús icha, e' kuëkī ye' kköchò a' a' tö a' erbikó ñikkë. <sup>3</sup>Eköl tso' a' shua, e' dör ye' kímukwak buaë, e' a' ye' ikië tö alakölpã e'pa kímú er buanukne ñi kī. Ie'pa bak kaneblök buaë ye' tã Jesús ttè buaë pakè wa. Ie'pa ena Clemente ena

imalepa bak kanablök darërëe ye' tã, e'pa kiè kôs tso'tke kitule sene michoë yëkküö kî.

### A' ttsë'nú buaë kékraë

<sup>4</sup> A' ttsë'nú buaë kékraë a' dör Skékëpa Jesús icha e' kuëkî. Ye' tó iskà chène a' a' tó a' ttsë'nú buaë. <sup>5</sup> Sulitane saú er bua' wa kékraë. Skékëpa Jesús datskene bet.

<sup>6</sup> Kè ì tó a' eriauk, e' skéie ì kiane a' kî, ese kôs mú Skéköl ulà a, ie' a' ikiè wa ena kköchè wa. Nies wëstela chó ia. <sup>7</sup> A' tó iwé es, e' tã sene bèrè meke ie' tó e' mer-aëitò a' a. E' dör tajë iskië kè se' éna iwà ar ekkè. E' tó a' er ena a' erbikè kk'neraë Cristo Jesús batamik.

<sup>8</sup> A yamipa, ibataie tã ye' tó a' a' icheke tó ì kôs dör mokië, ì kôs dalöiërta', ì kôs dör yësyësë, ì kôs dör batse'r, ì kôs dör buaala, ì kôs kikauleka buaë, íyi ese kôs kî a' er múwa kékraë. Ì kôs dör buaë ena ì kôs kîkarkata', ese bikeitsó kékraë.

<sup>9</sup> Ì kôs wa ye' tó a' wöblaq', ttè kôs yë' ye' tó a' a, e' ttsë' a' tó. Wes ye' serke, e' su' a' tó. A' senú es, e' tã Skéköl dör sene bèrè mukwak, e' tso' a' tã kékraë.

### Pablo tó ie'pa a wëstela ché

<sup>10</sup> Ye' ttsë'ne buaë tó bata ekkè tã a' er dene ye' ska'. Ì patké a' tó ye' a, e' wà de ye' ulà a, e' tó ye' ké wëstela chök Skékëpa Jesús a. Ye' éna iane tó moki a' kè er chë'wa ye' ska', erè a' kè ulà dè' wes ipatkoie ye' a. <sup>11</sup> Ye' kè ku' e' chök a' a ilè kî kianeia ye' kî e' kuëkî. Ye' wöblanewatke ttsë'nuk buaë ì kôs tköke ye' tã e' a. <sup>12</sup> Ye' wöblanewatke senuk mik ye' wã íyi tso' tajë etã, nies mik ye' kè wã íyi tã yës etã. Ye' wöblanewatke ì kôs

tköke ye' tã e' dalë'ttsök. Íyi tso' ye' wã ñè ö íyi kè tã ye' wã ñè, erè ye' ttsë'rke buaë. Ì tso' ye' wã tajë ö ì kè tã ye' wã yës, erè ye' ttsë'rke buaë. <sup>13</sup> Íyi kôs dalë'ttsërmi ye' a buaë Cristo batamik, e' tó ye' a' diché meke e' kuëkî. <sup>14</sup> Erè buaë idir tó a' tó ye' kímé ye' weirke tajë e' shua.

<sup>15</sup> A yamipa, a' wã ijcher buaë tó mik a' tó Jesús tté buaë e' tsá ttsë', e' këwö ska' tã ye' e' yë'ttsa Macedonia tã a' erule serke Filipos e'pa è tó ye' kímé inuköl wa. Kè imalepa skà wã ye' kímène wes a' es. <sup>16</sup> E' kíie tã mik ye' bak Tesalónica, etã a' tó íyi patké' ye' a e' kimoie bötö-kichakkè. <sup>17</sup> Ye' kè ku' ì kakmeke a' tó ye' a e' è bikeitsök. Ì buaë kî merke a' a ká jai a ì kákmé a' tó ye' a e' skéie, ese bikeitsök ye' tso' bua'ie. <sup>18</sup> A' wã ijchenú tó ì kôs patké' a' tó ye' a, e' dè' ye' ulà a, e' kuëkî tajë ye' wã itso'. E' kíie tã ì ipatké' a' tó Epafrodito ulà a, e' kôs tã ye' wã itso' tajë shütë. Ì wé a' tó e' wër buaë Skéköl wa wes íyi meule ie' a' ala'r buaë masmas es. Ese kiar ie' kî. <sup>19</sup> E' kuëkî ye' Kéköl tó ì kôs kiane a' kî senoie ie' a' ese meraë a' a ì tso' ie' wã buaë tajë shütë e' wa Cristo Jesús batamik. <sup>20</sup> ;Skéköl dör S'yé, e' kíkokaşó tajë kékraë! Es e' idir.

### Pablo e' chéat

<sup>21</sup> Jesucristo icha batse'r e'pa kôs shké'ú ye' a. Nies s'yamipa tso' ye' tã, e'pa tó a' shké'wëmi. <sup>22</sup> Nies s'batse'rpa serke íe, e'pa kôs tó a' shké'wëmi. Sa' shua wépa kanablöke Roma wökir kibi a, e'pa tó a' shké'wëmi bua'iewa.

<sup>23</sup> As Skékëpa Jesucristo er buaë chò a' a.

## Yëkkuö kit Pablo tö Colosas wakpa a

### Colosenses

Mik Pablo tö yëkkuö i' kit etä ie' tso'ia wötëulewā Roma s'wōto wé a. Wes ì bak ie' tã e' tso' kitule Hechos 28.17-31 e' kī. Pablo wák kè wā Jesús tté buaë pakane Colosas. Wëm eköl kiè Epaфра, e' tö Colosas wakpa a ipaka'. E' ukuöki ie' dërö Pablo weblök s'wōto wé a tã ie' tö Pablo a ipaké tö Colosas wakpa shua kabene tso' taië.

Epaфра tö ie' a ipaké tö pë' wele tso' s'wöbla'uk Jesús tté wa erë kè dör yësyësë. Pë' ñe'pa tö s'wöbla'weke tö Skëköl kè wā íyi kos yöne Cristo wa. Ñies ie'pa tö icheke tö Jesús kè dör kékëpa taië ese. E' skéie Jesús mik erblök wakpa kawōtā tkinuk bua'ie ì kī Israel aleripa tkirke ese kī, es ie'pa tö s'wöbla'weke.

E' kuëki Pablo tö yëkkuö i' kit ñippoie ie'pa ñekkëpa tã Jesús tté buaë tsatkoie. Ie' tö ichè tö Jesús è a se' tsatkërmi. E' kuëki Skëköl tö ie' tkë'ka sulitane ena íyi ulitane tsatã. Ñies ie' ichè tö ì kkacheke pë' esepa tö e' kè dör iie bua' ena e' kè a se' tsatkënik. E' kīie tã ie' tö ikkaché tö wes se' kawōtã senuk Skëköl wörki.

### Shke'wè

**1** Ye' dör Pablo. Skëköl wák er wa ye' dör Jesucristo ttekölpa tsá, e'pa eköl. Ñies s'yami Timoteo e' tso' ye' tã íe. <sup>2</sup>Ye' tso' yëkkuö i' shtök a' dör bats'e'r serke Colosas e'pa a. A' dör s'yamipa e' tkëulewā darërë Cristo mik. Skëköl dör S'yé as e' er buaë chò ena sene bèrè mù a' a.

### Pablo tö wëstela ché Skëköl a ie'pa dalërmik

<sup>3</sup>Këkraë mik sa' tö ikieke Skëköl a a' kī, etã sa' tö wëstela cheke ie' dör Skëkëpa Jesucristo Yé e' a a' dalërmik. <sup>4</sup>Sa' tö

a' tté tse' tö a' tso'ia erblök buaë Cristo Jesús mik. Ñies sa' tö ittse' tö a' tö s'bats'e'r malepa kos dalëritseke buaë. E' kuëki sa' tso' wëstela chök ie' a a' dalërmik. <sup>5</sup>Mik Jesús tté buaë mokīe e' dë' a' ska' kuaë, etã a' tö ittse' tö Skëköl wā ì buaë tso' blëule a' a, e' tso' a' panuk kã jai a. E' wā paneke a' tö kröröe, e' kuëki a' er-blöke Cristo mik ena a' ñi dalëritsöke buaë këkraë. <sup>6</sup>Tté buaë e' pakarke taië kã wa'ñe, e' klö'weke pë' tö taië. E' tö ie'pa er mane'weke as iser buaë yësyësë. Es ñies ibak a' tã kuaë mik a' tö ittse' tã iklö'o'mi mokī tö Skëköl er buaë ché se' a Cristo batamik. Kuaë dò ñne tã tté e' wakaneorkear buaë a' shua. <sup>7</sup>Tté e' paka' Epafras tö a' a, ie' dalër taië se' éna. Ie' dör Cristo kanè méso wes sa' es. Ie' dör Cristo kanè méso yësyësë a' kimoie. <sup>8</sup>Ie' wā a' tté de sa' ska' tö a' tö sa' dalëritseke taië Skëköl Wiköl wa.

<sup>9</sup>E' kuëki mik sa' tö a' tté tse' kuaë, etã sa' utmi S'yé tã a' kī. E' kè olo'yeta' sa' tö dò ikké tã. Sa' tö ikiear Skëköl a tö ie' Wiköl tö a' er ñi'ú kabikeitsoie buaë, as ì kiane ie' kī tö a' iwè e' wā ar buaë a' éna. <sup>10</sup>E' ane buaë a' éna, e' tã a' ser-daë buaë yësyësë wes wépa dör Skëkëpa Jesús icha, esepa ké senuk es. A' serke es, e' tã ì kos weke a' tö, e' wër buaë ie' wa. Ì buaë kos weraë a' tö taië wes kal wör taië buaë es. Ñies wes Skëköl dör, e' wā kī ar michoë a' éna buaë. <sup>11-12</sup>Sa' tö ikieke S'yé a tö ie' tö a' er diché iò, ie' olo taië, ie' diché taië, e' wa. Es idir, e' tã a' weirke kos e' dalë'ttsërmi a' a er bua' wa. Ñies ì kos wé S'yé tö a' a, e' kī wëstela cheraë a' tö ie' a tse'ne bua' wa. Ì tso' ie' wā mè se' dör ie' icha bats'e'rpa e'pa a ilo bur taië e' a, e' yök a' yuétkeitö as idò a' ulà a' ñies. <sup>13</sup>Ie' tö se' yéttsã ì sulu kos dör wes stui es, ese ulà a tã se' tsëmitö wépa blúie ilà dalër íena e' tso' esepa kīie. <sup>14</sup>E' batamik se' tsatkéitö ena se' nu' olo'yéitö se' kī.

### Skëköl er buanene se' ki Cristo batamik

<sup>15</sup> Skëköl kè wërta'wà, erë Cristo wa ie' e' k'kayè' s'ditsö a. Kam íyi ulitane yör, e' yöki Cristo tso'tke. Ie' dör íyi ulitane kos e' tsata. <sup>16</sup> Í kos tso' ká jai a ena ká i' a, e' yö' Skëköl tö Cristo ta nita. Í wërta'wà, nies ì kè wërta'wà íyi wökirie ena íyi kékölíe ena íyi wákíe wà diché ta' ese kos yö' ie' tö Cristo ta ena Cristo kíkoka. <sup>17</sup> Kam íyi ulitane yör, e' yöki Cristo tso'tke. Íyi ulitane yöne ie' ta nita ta i'ne ta e' kos kicha a'tser ie' wà. <sup>18</sup> Nies se' dör ie' icha, e'pa wökir ie' dör. Se' dör wes Cristo wák chkà es, età ie' dör wes s'wökir es. Ie' kótewà, e' shkenekane se' tsáie as ie' dò íyi ulitane tsata. E' kuëki ie' dör se' sene michoë, e' wì kicha bua'ie. <sup>19</sup> Wes Skëköl dör, e' kos wënewà Cristo kí, es Skëköl tö ibikeitsbak. <sup>20</sup> Nies ie' tö ibikeitsbak tö íyi ulitane tso' ká jai a ena ká i' a ena ká wa'ne e' dörane ie' ulà a Cristo batamik. Es ie' tö se' er bua'wéne ie' wák kí Cristo kótewà krus mik, ipé tene taië se' nuì skéie e' wa.

<sup>21</sup> Kenet se' bak ì sulu wamblök ena ì sulu bikeitsök, e' kuëki se' bak Skëköl bolökpa siulettsa bánet ie' yöki. <sup>22</sup> Erë ie' tö se' er bua'one ie' kí Cristo kótewà se' nuì skéie e' wa as se' döwà ie' wörki batse'r, kè kí ì sulu ta, kè kí ì nuí ta'. <sup>23</sup> Erë se' kawöta e' tkókwà darërëe kékraë se' erblò Cristo mik e' a. Ttè buaë ttsè' a' tö wà paneke a' tö e' kè olo'yar, e' ta iwà döraë a' ulà a. Ttè buaë e' pakane sulitane a ká wa'ne nies ye' tso'ñak ipakök.

### Kanè mène Pablo a

<sup>24</sup> Erë ye' weirke a' dalërmik, erë ye' ttsè'rke buaë. Cristo weine ie' icha dalërmik. Ie'pa dör wes ie' chkà es, e' kuëki ie'pa weirke e' dör wes ie' wák tso'ia weinuk es. E' kuëki ye' weirke kos a' dalërmik, e' dalë'ttsök ye' tso'. Es

ye' tso'ñak weinuk Cristo ta. E' tö ye' ttsè'weke buaë. <sup>25</sup> Skëköl tö kanè mé ye' a Skëképa Jesús icha e'pa kanëuk. Ie' tö ye' patké ie' tté buaë kos e' pakök a' a. <sup>26</sup> Se' bak ká iaiaë, e'pa yöki tté buaë e' bak blëulewà, erë i'ne ta ikkayëne ie' icha batse'rpa a. <sup>27</sup> Ie' tö ibikeitsbak tö tté e' kkacheraë ie'pa a. Ttè e' dör buaë shuteë, e' wa ie' er buaë chömi pè' kos kè dör judiowak esepa a. Ttè buaë blëulewà, e' dör tö Cristo tso' se' er a, e' batamik se' dörañak Skëköl olo ta' taië, e' ska'. E' wà paneke se' tö kröröe.

<sup>28</sup> E' kuëki sa' tö Cristo tté pakeke sulitane a. E' wa sa' tö sulitane patteke wöbla'weke kabikeitsè buaë yësyësë wa as sa' tö ie'pa kos mù Skëköl ulà a yöuletke buaë batsulewà Cristo ta nita. <sup>29</sup> E' kuëki ye' e' tkéwà darërëe kanëblök diché taië meke Cristo tö ye' a, e' kos wa.

**2** Ye' kí ikiane tö a' wà ijcher tö ye' tso' kanëblök darërëe a' dalërmik kè shtrirta'wà. Nies ye' tso' kanëblök s'yamipa serke Laodicea e'pa dalërmik ena s'yamipa malepa kè wà ye' suule, e'pa kos dalërmik. <sup>2</sup> Ye' kanëblöke darërëe ie'pa dalërmik as ie'pa er diché kí iër buaë, nies as ie'pa kí ñi dalëritsö taië wes s'yamipa ekka ñi dalëritsö es. E' dör es, e' ta tté buaë blëulewà Skëköl wà kuaë, e' wà kos ardaë ie'pa éna buaë. Ttè buaë e' dör Cristo wák. <sup>3</sup> Skëköl er-bikò kos, ena Skëköl wà íyi jcher kos, e' tso' Cristo a blëule wes íyi bua'buatüe darërë blësö es. <sup>4</sup> Ye' tö a' a ichè es as kè yi tö a' kütö'ü tté ttsèr buaë, erë kè dör tté mokí, ese wa. <sup>5</sup> Ye' wák kè ku' a' ta, erë e' dör wes ye' wák tso' a' ta es. Ye' wà ijcher tö a' e' tkéwà darërë ñikkëe a' er-blò Cristo mik e' a wes wák eköl è es. E' tö ye' ttsè'weke buaë.

### Senë pa'ali Cristo a

<sup>6</sup> A' tö Jesucristo klö'wétke e' kékölíe, e' kuëki a' senú wes ie' kí ikiane es. <sup>7</sup> A' e' tkókwà darërëe ie' mik wes kal wì kicha

klörwā es. A' talanú ie' mik wēs kal talar iwí mik es. A' kī erbló ie' mik kēkraē wēs a' wöblaone es. Wēstela mú kēkraē ie' a.

<sup>8</sup> A' tso' erkī as kē yi tō a' kitō'ù ttè kē wà tã' ese wa. Ttè e' ttsér buaē erē iwà kē dör mokī, ese dör s'ditsō ttè è. Ttè ese kōs pakane'bitu ká iaiāē, e' dör ttè èse tso' ká i' kī ese kē idör Cristo ttè. <sup>9</sup> Cristo dör s'ditsō erē wēs Skéköl dör, e' kōs wēnewā ie' kī. <sup>10</sup> A' batsulewā ie' mik, e' kuekī kē ì skà kianeia a' kī Skéköl wörkī. Íyi wökir wā diché ta' kē wërta'wā ese kōs tsata ie' dör. E' kuekī kē a' e' kitō'uk ttè kuā'kī wa.

<sup>11</sup> A' batsulewā Cristo mik, e' tō a' wák dēr suluē yéttsā. Es ie' tō a' wakyué a' er a iwà kkachoe tō a' dör ie' icha. E' dör wēs sa' judiowak wöblar iwēpa tottola kkuölitla ttök tsir es iwà kka-choie tō ie'pa dör Skéköl icha. <sup>12</sup> A' tō iklö'wé mokī tō Cristo shkeo'kane Skéköl tō idiché taiē wa. E' kuekī mik a' wö-sune, etā e' dör wēs a' wötēnewā ena a' shkenekane Cristo tã es. <sup>13</sup> Kenet tã a' dör ì sulu wamblökwakpa, e' kēwō ska' tã a' kē dör Skéköl icha, e' kuekī a' dör wēs s'duulewā es ie' a. Erē ie' tō a' shkeo'kane, sene mokī méitō a' a' Cristo tã ñita. Sene sulu e' nuí kōs olo'yéitō a' kī. <sup>14</sup> Ie' ttè dalöiēno, e' dalöseō'wā se' tō, e' nuí kōs e' kī se' kkatēne. E' dör wēs se' nuí kōs tso' kitule yēkkuō kī es. Erē ie' tō e' nuí kōs patuéttsā Cristo kōtewā e' batamik. E' dör wēs ie' tō se' nuí yēkkuō wötē'wā krus mik Cristo tã ñita es. <sup>15</sup> Cristo batamik ie' tō íyi wökir ena íyi wák wā diché ta' kē wërta'wā esepa diché yē'lur. Ie' e' ali'kã ie'pa kī tã ijaëo'itō wēs s'klöulewā ñippè shua jaëwè sulitane wörkī yi e' aléka iki e' tō es.

### Í tso' ká jai a' ese kī a' er múwa

<sup>16</sup> E' kuekī kē yi kar a' kkatök chké kī di'yé kī. Nies kawō tkō'weke judiowak tō duas bit ena si' pa'alí bit ena eno diwō bit ekkē, ese kē tkō'wē a' tō e' kē kī yi

kar a' kkatök. <sup>17</sup> E' kōs me'atbak Skéköl tō ie'pa a iwà kkachoe tō ì weraē Cristo tō mik ide etā. Erē Cristo dē'bak. Es ttè e' kōs wà tka. E' kuekī ttè dalöiēno kēchke ese kē dalöiaria. <sup>18</sup> Wépa e' ò tō ie'pa dör pē' buaē ser bèrē, esepa tō Skéköl biyöchökwakpa dalöieke. Nies ie'pa e' chō tō Skéköl tō íyi kkacheke ie'pa a kab-sueie. E' wa ie'pa e' ttsökeka taiē. Erē ie'pa ttè kē wà tã, e' dör iwákpa kabikeit-sō è. Kē a' e' muktsā e' kitō'uk ie'pa esepa ttè wa. <sup>19</sup> Ie'pa esepa kē ku'ia e' batsök-wā Cristo dör s'wökir e' mik. Cristo dör wēs s'wökir es, etā se' dör wēs ie' chká es. Se' wöbla ta', se' kukuöña tã' ena s'yese skà tso' taiē kuā'kī kuā'kī, e' kōs iëulewā buaē ñikkēē tã ikaneblöke buaē ñita. Erē iwökir kē ta' etā s'chkà kōs e' kē dör ìie bua'. Es se' dör Cristo tã ñies. Se' batsulewā Cristo tã, e' tã se' kōs ser buaē ñita, ñi tsatköke buaē wēs s'chkà etkē es. E' dör es, e' tã se' er diché kī iërdaē buaē wēs Skéköl kī ikiane es.

<sup>20</sup> A' duulewābak Cristo tã ñita ttè èse tso' ká i' a' ese kōs yökī. A' kē ku'ia idik-ia. ¿Wēs a' tō iütekeia? Ttè ese dör i' es: <sup>21</sup> Chké se kē kar; chké wí kē katar, kē ñar; chké dió kē kar. <sup>22</sup> Í kōs dör ñá cheke ttè ese tō, e' erta'wa. Mik ichké one, di'yé one, etā kē itā'ia. Ttè ese kōs e' dör ttè dalöiēno me' s'ditsō tō ese è. <sup>23</sup> Kuaē tã ittèsō tō ttè ese dör mokī, wà tã'. Wépa tso' ttè ese iütök, esepa wër wēsua ie'pa tō Skéköl dalöieke buaē mokijē. Ie'pa e' ò taiē, suēsō tō wēsua mokī idir. Ie'pa wák e' we'iköke taiē. E' kuekī iwër tō ttè ese dör buaē, erē kē idör es. Ttè ese kē a' ì wamblak s'wák dēr suluē éna ese wök-lönuk yēs.

**3** Se' shkeulekane Cristo tã ñita, e' kuekī ì kōs tso' ká jai a, e' kī se' er múwā. Eē Cristo tkēr Skéköl ulà bua'kka dalöiërta' taiē. <sup>2-4</sup> Se' duulewā Cristo tã ñita. Se' sene mokijē e' tso' bléule Skéköl wā Cristo tã ñita, e' kuekī kam ikkayërwa da'äie. Cristo dör sene mokī se' a. Mik ie'

dene ká i' a, etá ikkayërdaë sulitane a. Se' kkayërdaë ie' ta ñita olo ta' taië. E' kueki se' er múwa kekraë ì tso' ká jai a ese ki. Kè se' er mukwa, ì tso' ká i' a, ese ki.

### Wépa dör Cristo icha, esepa serke wes ie' ki ikiane es

<sup>5</sup>E' kueki, ì sulu tso' ká i' a tò se' erk-iöweke, ese kos olo'yó a' tò. Trè kos, sene sulusi kos, s'er me'rie trè ki, s'erbikò sulusi kos, ese olo'yó a' tò. Ñies íyi kkechë taië, e' olo'yó a' tò (e' dör wes íyi diököl dalöie skëkölie es). <sup>6</sup>Íyi ekkë kos kueki, wépa kè tò Skëköl ttë iüteta', esepa ki Skëköl kësik ardaë. <sup>7</sup>A' bak senuk ì sulu kos ese diché dikia. <sup>8</sup>Erë ì'ne ta a' kawö-ta ì sulu skà tso' kos e' olo'yök. Ulune, kësik, ñi wamblò sulu, ese kos olo'yó a' tò. Kè a' ñi chökia suluë. Kè a' tò ttë sulusi chökia. <sup>9</sup>A' wák dër suluë ena wes e' ser, e' olo'ya a' tò, e' kueki kè a' kachök ñita. <sup>10</sup>A' wák dër suluë, e' maneonebak sene pa'alj wa. Skëköl tò a' er yuëne pa'alj. Ie' tò a' er mane'wë michoë kekraë as a' er dò wes ie' wák er es. E' uk ie' tso' as a' dò ie' sini'pa chökia. <sup>11</sup>Se' dör Cristo icha, e' shua s'tso' dör judiowak ena s'tso' kè dör judiowak. Se' shua s'tso' datse ká bänet, ñies s'tso' kè yöule taië esepa. Se' shua s'tso' klöulewa kanè mésoie ese ena s'tso' kè dör es. E' kos kè dë' wes se' a. Cristo batamik se' kos dör ñikkë. Ie' dör íyi ulitane tsata, ñies ie' tso' se' kos er a.

<sup>12</sup>Skëköl tò a' shukitbak iwák a. A' bat-seo'itò ena a' dalër taië ie' éna. E' kueki a' ñi saú er siarë wa, er bua' wa. A' e' ówa diöshet ñi yöki. A' senu' bërë. Íyi kos panú a' tò enaë. <sup>13</sup>A' ñi dalë'ttsó er bua' wa. Yile tò ì sulu wamblé a' ta, etá e' nuí olo'yó a' tò iki. A' nuí olo'yó a' tò ñi ki wes Skëképa tò a' nuí olo'yé es. <sup>14</sup>Íyi ulitane ekkë tsata, a' ñi dalëritsók kekraë, e' dör iwí bua'ie. A' ñi dalëritsöke es, e' ta a' ser-daë buaë ñita wes wák eköl è es. <sup>15</sup>Moki Skëköl tò a' klöo'bak senuk bërë ñita wes wák eköl è es. E' kueki a' e' mú as Cristo

tò a' wëttsü senuk bërë ñita kekraë. Ñies wéstela chó a' tò ie' a kekraë.

<sup>16</sup>Cristo ttë bló a' tò a' er a kekraë. A' ñi wöbla'ú iwa, a' ñi pattó iwa erbikë buaë kos meke Skëköl tò a' a, ese wa. Wéstela chó a' tò kekraë Skëköl a' a' er a Salmo wa ena Skëköl ttsé wa ena ttsé meke Wiköl Batse'r tò se' a ese wa. <sup>17</sup>Í kos weke a' tò, ñies ì kos cheke a' tò, e' kos ú ena ichó Skëképa Jesús ttò wa. Kekraë wéstela chó a' tò Skëköl dör S'yé e' a Cristo batamik.

### Wes se' ké senuk ñita

<sup>18</sup>A' alakölpa wëm ta', a' wëm ttò dalöio wes Skëképa mik erblökwakpa kawöta iuk es. <sup>19</sup>A' wépa, a' alaköl dalëritsók, kè kësik blök iki.

<sup>20</sup>A' ala'r, a' yé ena a' mi, e'pa ttò dalöio, e' wër buaë Skëképa wa e' kueki. <sup>21</sup>A' iyépa, kè a' tò a' ala'r uluwarka é ichökle as ie'pa kè eriar taië shüte.

<sup>22</sup>A' klöulewa kanè mésoie, a' wökirpa ttò dalöio kekraë. A' kanebló buaë ie'pa a kekraë, kè dör tò mik ie'pa tò a' sueke e' è ta ie'pa wökatoie. E' skéie a' kanebló ie'pa a er moki wa, Skëképa dalöieke a' tò e' kueki. <sup>23-24</sup>Ñermata a' dör Cristo kanè mésopa, ie' dör a' wökir moki. A' kaneblöke buaë ká i' a a' wökirpa a, e' ta e' ské meraë Cristo tò a' a aishkuó ta. E' kueki ì kos weke a' tò e' ú kaneë wes a' tso' iuk Skëképa wák a es, kè dör wes s'ditsó a iwë es. <sup>25</sup>Erë Skëköl a silitane dör ñies ème, e' kueki wépa tò ì sulu wambleke, ese nuí ki ie' tò ie'pa we'ikeraë aishkuó ta.

**4** A' wépa wa kanè mésopa tso', esepa tò ie'pa saú er bua' wa yësyesë. A' éna íanú tò a' wa wökir tso' ñies, e' dör Skëképa tso' ká jai a e'.

### Se' e' chò ttök Skëköl ta

<sup>2</sup>A' e' chó ttök Skëköl ta kekraë, kè ilo'yar. Mik a' ttöke ie' ta, etá e' è wá bikeitsó, ñies wéstela chó ie' a. <sup>3</sup>Ye' tso'

wõtëule íe s'wöto wé a Cristo tté buaë blëulewā kuaë, e' pakë kuëkí. E' kuëkí ik-íó Skëköl a tö ie' tö sa' kimú Cristo tté kí pakök buaë ká wa'ñe as kè ì tö sa' wöklö'ù. <sup>4</sup>Ikió Skëköl a tö ye' mú ipakë buaë yësyësë wes ye' kawötā ipakök es as sulitane éna iwà ar buaë.

<sup>5</sup>Mik a' tso' pë' kè dör Jesús mik er-blökwakpa, esepa tā, etā a' senú buaë wes Skëköl ala'r ká senuk es. Kè a' kawö chöuk é. Kawö yóttsa kapakök ie'pa tā. Cristo tté buaë pakó ie'pa a. <sup>6</sup>A' ké ttök ie'pa tā tté bua' buaë wa as ie'pa tö a' ttò ttsò er bua' wa. A' tso' erkí ì kos chakeke ie'pa tö a' a eköl eköl, e' iütök yësyësë.

### Pablo e' chéat

<sup>7</sup>Tíquico tö ye' biyó cheraë a' a. Ie' dör s'yami dalër tajë sa' éna ese. Ie' dör ye' ki-mukwak yësyësë ese. Ie' dör Skëképa Jesucristo kanè méso ye' tā. <sup>8</sup>E' kuëkí ye' tso' ie' patkök a' ska' as ie' tö a' a ichò tö is sa' tso', ñies as a' er kuütö. <sup>9</sup>Ie' tā Onésimo mi'ke ñies. Ie' dalër sa' éna, ie' dör s'yami e' tkëulewā darërë ese. Ie' dat-së a' ká a. Ie'pa böl tö a' a icheraë tö is sa' kawö tköke.

<sup>10</sup>Aristarco tso' wõtëule ye' tā s'wöto wé a, e' tö a' shké'wémi. Ñies Marcos dör Bernabé duö', e' tö a' shké'wémi. A' a iyënetke tö ie' de a' pakök, etā ik-

íówā buaë. <sup>11</sup>Jesús kiè ñies Justo, e' tö a' shké'wémi. Wépa tso' ye' tā ì blúie Skëköl tso' e' kanè a' e'pa shuā ie'pa mañal è dör judiowak. Ye' er pablérak-itö tajë. <sup>12</sup>Epafras dör a' wakpa eköl, e' tö a' shké'wémi. Ie' dör Cristo Jesús kanè méso. Kekraë ie' kköchöke Skëköl a' dalërmik tö a' mú e' tkéwā darërë Cristo tté a' kè ibikeitsè bötböt ena e' meulettsa da'äie ì kiane Skëköl kí ese woje. <sup>13</sup>Ye' wák tö ie' cheke mokí tö ie' kaneblöke darërëë a' dalërmik, ñies Jesús mik er-blökwakpa tso' Laodicea ena Hierápolis, e'pa dalërmik. <sup>14</sup>Lucas tö a' shké'wémi. Ie' dör s'kapeyökwak dalër tajë se' éna. Ñies Demas tö a' shké'wémi.

<sup>15</sup>S'yamipa serke Laodicea, e'pa shké'ú sa' a. Ñies Ninfa ena Skëképa icha erule ñi dapa'úke ie' u a, e'pa shké'ú sa' a. <sup>16</sup>Yëkkuö i' aritsé one a' tö sulitane kukua, e' ukuökí tā ipatkómi a' tö Skëképa icha erule ñi dapa'úke Laodicea, e'pa a as ie'pa tö iaritsò ñies. Ñies yëkkuö patké' ye' tö Laodicea wakpa a, e' saú mik ide a' ska' etā. <sup>17</sup>Ichó Arquipo a' tö Skëképa Jesucristo kanè mène ie' a wè, e' wà ú ie' tö seraa buaë.

<sup>18</sup>Ñies ye' dör Pablo, e' tö shkëne i' shtë ye' wák ulà wa. Kè a' éna ichökwa tö ye' tso' wõtëule s'wöto wé a. As Skëköl er buaë chò a' a.

## Yëkkuö Tsá Kit Pablo tö Tesalónica wakpa a

### 1 Tesalonicenses

Pablo tö yëkkuö i' kit duas dabom skeyök ena skeyök k<sub>1</sub> et Jesús k<sub>2</sub>ne'bak e' ukuök<sub>1</sub> (50-51 AC) e' sh<sub>1</sub> ulat. E' kuek<sub>1</sub> i' dör yëkkuö tsá kit ie' tö e'. Mik ie' ská dë'rö Tesalónica Skëköl tté buaë e' pakök etá Timoteo ena Silvano e'pa mir ie' ta. Mik Pablo tö Skëköl tté paka' ká e' a, etá tajë pë' uluneká ie' k<sub>1</sub>, e' kuek<sub>1</sub> ie' bak-shkarmi dë Atenas. E' ukuök<sub>1</sub> ie' shkakmine kanëblökne Tesalónica Jesús mik erblökwakpa k<sub>1</sub>imuk, erë kè ie' dë'röne. Erë Jesús mik erblökwakpa we'ikeke tajë pë' kè dör Jesús mik erblökwakpa esepa tö, e' kuek<sub>1</sub> Pablo tö Timoteo è patkë'mi yëkkuö i' muk ie'pa a ier diché ioie (Hechos 12.1-14).

Ì kit Pablo tö yëkkuö i' k<sub>1</sub> e' dör i' es: Et: Ie' tö wëstela mé Skëköl a ì buaë o' ie' tö Jesús mik erblökwakpa tso' Tesalónica e'pa a e' k<sub>1</sub>. Nies Pablo tö ie'pa a ieri mène tö Skëköl tso' ie'pa ta.

Böt: Pablo tö ie'pa a ieri méne tö wës ie' bak senuk ie'pa sh<sub>1</sub> ena wës ie' tö ie'pa dalërits. Ie' tö ikit es ie'pa er diché ioie senuk Jesús a.

Mañat: Pablo tö ie'pa er diché ié senuk këkraë Jesús a. Nies ì tköraë Jesús mik erblökwakpa ta mik iblërulune etá, e' paké ie' tö ie'pa a. Nies ie' tö ikkachè tö wës se' kawötá Jesús datskene e' panuk kröröë.

### Shkë'wè

**1** Ye' dör Pablo. Silvano ena Timoteo tso' ye' ta ié. Sa' tso' yëkkuö i' shtök Skëkëpa Jesús icha erule serke Tesalónica e'pa a. A' batsulewá Skëköl dör S'yé e' mik, nies Skëkëpa Jesucristo mik. As ie'pa er buaë chò ena sene bèrè mù a' a.

## Pablo wëstela ché Skëköl a Tesalónica wakpa dalërmik

<sup>2</sup>Këkraë sa' tö wëstela cheke Skëköl a a' dalërmik. Mik sa' ttöke ie' ta, etá këkraë sa' tö ikieke a' k<sub>1</sub>. <sup>3</sup>Sa' éna iane tö a' erblöke Jesús mik, e' kuek<sub>1</sub> a' tö ì kos buaë wëke. S'yé dalër tajë a' éna, e' kuek<sub>1</sub> a' kanëblöke darërè ie' a. Skëkëpa Jesucristo datskene, e' paneke a' tö mok-jë, e' kuek<sub>1</sub> a' e' tkëwá darërè ie' mik. E' kos kuek<sub>1</sub> këkraë mik sa' ttöke Skëköl ta, etá sa' tö wëstela cheke ie' dör S'yé e' a a' dalërmik. <sup>4</sup>A yamipa dalër tajë Skëköl éna, sa' wá ijcher tö ie' tö a' sh<sub>1</sub>kitbak ie' ala'rie. <sup>5</sup>Mik sa' tö Jesús tté buaë paka' a' a, etá kè sa' wá ipakane ttè è wa. Nies Wiköl Batse'r diché e' k<sub>1</sub>ayë' sa' tö a' a. A' tö isué tö ì ché sa' tö, e' ché sa' tö er mokië wa. A' wá ijcher buaë tö sa' bak senuk yësyësé a' sh<sub>1</sub> iwá kkachöie tö a' kawötá senuk es.

<sup>6</sup>Es a' dë'bak senuk yësyësé wës sa' ser es, nies wës Skëkëpa Jesús ser es. Mik a' tö Jesús tté buaë klöo'bak, etá e' kuek<sub>1</sub> pë' tö a' we'ik siarë, erë a' tö ttè e' klö'wëkeia ttsé'ne bua' wa Wiköl Batse'r batamik. <sup>7</sup>E' wa a' tö iwá kkaché Jesús mik erblökwakpa serke Macedonia ena Acaya, e'pa kos a' tö wës s'kawötá senuk Skëköl a. <sup>8</sup>A' batamik Skëkëpa Jesús tté buneká Macedonia ena Acaya. Ká wa'ñe, wé ye' mirwá, eë pë' kos wá ijcher tö a' erblöke Skëköl mik. E' kuek<sub>1</sub> kè ì ku'ia ché yi a ttè e' k<sub>1</sub>. <sup>9</sup>Sulitane tö sa' a' icheke tö a' tö sa' ki'wá buaë. Nies ie'pa tö icheke tö íyi diököl tso' dalöie, ese kos watëttsá a' tö kanëbloie Skëköl chökle eköl è e' a. <sup>10</sup>Nies ie'pa tö icheke sa' a' tö a' tso' Jesús datse ká jai a, e' panuk er moki wa. Ie' dör Skëköl Alá. Ie' kótëwá, erë Skëköl tö ie' shkëo'kane. Ie' tö se' tsatkée, se' weirdaë siarë aishkuö ta, e' yök<sub>1</sub>.



## Ì o' Pablo tò Tesalónica

**2** A yamipa, a' wà ijcher buaë tò sa' sene' a' shua, e' wà kè dör éme, e' tò a' kime' buaë. <sup>2</sup> A' wà ijcher tò kam sa' dò a' ska' e' yöki Filipos wakpa tò sa' yë' suluë, sa' we'ik siarë. Nies a' ká a' pë' bak e'pa éna sa' wöklö'wak erë Skëköl tò sa' kime'. Ie' tò diché mé sa' a' Jesús tté buaë pakoie a' a. <sup>3</sup> Sa' kè tò s'patteta' kache tté wa ö fyí sulusi dalërmik ö s'kitö'woie. <sup>4</sup> Sa' kè tò s'patteta' es. Skëköl tò sa' er webleke, e' tò sa' shukit. Ie' tò kanë me'at sa' ulà a' Jesús tté buaë pakök. E' kuëki sa' ipakeke as sa' wër buaë ie' wa, kè dör s'ditsö wa. <sup>5</sup> A' wà ijcher tò sa' kè dërö a' ska' a' kikökká kache tté wa. Kè sa' wà a' paulule inuköl kiane sa' kî e' kuëki. Skëköl wà ijcher tò sa' kè wà iwamblëne es. <sup>6</sup> Sa' kè dërö a' ska' as a' tò sa' kikökká ö yi skà tò sa' kikökká. <sup>7</sup> Sa' dör Cristo ttekölpa tsá, e' kuëki sa' wà kawö tã' as a' tò sa' saü buaë, erë e' kè kine sa' wà a' a. Sa' tò a' sué wës alà mì tò ila'rla suë es. <sup>8</sup> Sa' éna a' dalër taië, e' kuëki sa' tts'ëne buaë a' pat-tök Skëköl tté buaë wa. Kè dör e' è wa, nies sa' e' mumittsa weinuk a' dalërmik. <sup>9</sup> A yamipa, a' éna iane tò mik Skëköl tté buaë paka' sa' tò a' a, e' dalewa sa' kanëblë darërë. Sa' kanëblë' nië nañeë as sa' kè tò a' ulà panü sa' toië.

<sup>10</sup> A' wà ijcher, nies Skëköl wà ijcher, tò sa' sene' batse'r yësyësë kè kî ì sulu tté tã' a' dör Jesús mik erblökwakpa e'pa shua. <sup>11-12</sup> A' wà ijcher tò sa' tò a' paut, a' er pablë' eköl eköl wës iyé tò iwë iwák ala'r tã es. Nies sa' tò a' a iyë' kekraë tò a' senü yësyësë wës Skëköl kî ikiane es. E' tò se' klöo'bak as se' dö ì blúie ie' tso' olo tã' taië e' kíie.

<sup>13</sup> Mik sa' tò Skëköl tté paka' a' a, eta a' kè wà itsëne wës s'ditsö tté es. E' skéie a' tò itsë' wës Skëköl tté mokî es, tã es je' idir. E' kuëki kekraë sa' tso' wëstela chök Skëköl a' a' dalërmik. Ie' tté batamik, iwakanewëkeitö a' dör Jesús mik erblök-

wakpa e'pa er a. <sup>14</sup> A yamipa, a' wakpa ditséwöpa e'pa tò a' we'ik siarë. Es nies ibak Skëköl icha erule erule erblö Cristo Jesús mik tso' Judea e'pa tã. Judiowak malepa tò ie'pa we'ik siarë nies. <sup>15</sup> Judiowak tò iwakpa we'ik Jesús tté kuëki, e' wakpa è tò Jesús kötwá wës ká iai-aë ie'pa tò Skëköl ttekölpa kötulurbak es. Nies ie'pa è tò sa' trëo'yal. Ie'pa kè wër buaë Skëköl wa! Ie'pa kè wödör yi mik! <sup>16</sup> Mik sa' tò Skëköl tté pakeke pë' kè dör judiowak esepa a' as nies ie'pa tsatkër, eta judiowak ñe'pa tò sa' ma'wë wöklö'wë as kè sa' tò tté e' pakò, erë ie'pa kè ulà dë' iska'. Es ì sulu nuí, e' kî kiekie ie'pa tò e' kî taië. Bata ekkë tã Skëköl tò ie'pa kichatëttsatke.

## Pablo shkakne ie'pa weblök

<sup>17</sup> A yamipa, sa' manétyal, sa' kè ku'ia a' tã ñita, erë sa' er me'rie a' kî. Sa' manétyal erë bet tã sa' éna shkakne suluë a' weblökne. <sup>18</sup> Sa' tò ima'wë, ye' wák tò ima'wë tseë erë Satanás tò sa' wöklö'wë. <sup>19</sup> Mik Skëképa Jesús dene, eta çyi tò sa' tts'ëwëmi buaë mokîë ie' wöa? Ie' dör a! Ì buaë paneke sa' tò Jesús wörki a' batamik. A' dë' Skëköl ala'rie, e' tò sa' tts'ëweraë buaë Jesús wörki. <sup>20</sup> Yëne e', a' wa sa' e' tsoökeka, a' tò sa' tts'ëweke buaë.

## Timoteo patkémine Tesalónica wakpa ska'

**3** Bata ekkë tã, mik sa' kè a' idalë'ttsëneia, eta sa' tò ibikeits tò "sa' bül ate íe Atenas <sup>2</sup> tã s'yami Timoteo e' patkekemi sa' tò a' weblök." Ie' dör Skëköl kanë méso Cristo tté buaë pakök wës sa' es. Sa' tò ie' patkë'mi a' kîmuk as a' diché kî iër Jesús tté a' ena a' erblöia mokîë imik. <sup>3</sup> Sa' kè kî ikiane tò a' wele eriawë, a' weirke siarë Jesús tté kuëki, e' tò. E' tköraë se' tã wake'. <sup>4</sup> Mik sa' bak a' ska', eta sa' tò a' a iyë' taië tò se' weirdaë pë' kè dör Jesús mik

erblökwakpa esepa ulà a. A' wà ijcher buaë tò iwà tka es. <sup>5</sup>E' kuekì mik ye' wák kè a idalë'ttsëneia, età Timoteo patkë'miyö a' tté ttsök tò çis a' erblöke Jesús mik e' mir? Ye' suane siarë dö' Satanás tò a' erkiöwè tã a' èmine tã kos sa' tò a' patté e' weirdawa é.

<sup>6</sup>Erë Timoteo tso' a' ska', írö ie' dene. Ie' wà biyö buaë debitu sa' a. Ie' ichè tò a' erblökeia Cristo mik, ñies a' ñi dalërit-sökeia buaë. Këkraë a' tò sa' bikeitseke er bua' wa. A' éna sa' suakne suluë wës sa' éna a' suakne es. <sup>7</sup>A yamipa, a' erblöke Jesús mik buaë, e' tò sa' er pableke taië sa' eriarke kos sa' weirke kos e' shua. <sup>8</sup>Mik sa' ittse tò a' e' tkëwà darërë Skëképa mik, età sa' er dekanë. <sup>9</sup>A' tò sa' ttsë'wé buaë ichökle Skëköl wöa. Këkraë sa' tò wëstela cheke ie' a' taië a' kì, erë e' kè dör wë'. <sup>10</sup>Sa' tò ie' a' ikieke taië ñië nañëë as kawö mùitö sa' a' a' suoie a' kì wöbla'woie as a' kì yör erblök Jesús mik.

### Pablo tté Skëköl tã

<sup>11</sup>Skëköl dör S'yé e' ena Skëképa Jesús e'pa a' sa' tò ikieke tò sa' kìmú shkoie a' ska'. <sup>12</sup>As Skëképa tò a' kò ñi kì dalërit-sök taië shutë ñies sulitane dalëritsök wës sa' tò a' dalëritseke es. <sup>13</sup>As ie' tò a' er diché kì iö as a' dò Skëköl dör S'yé e' wörkì batse'r, kè kì i' sulu tté tã', mik Skëképa Jesús datskene ie' icha batse' rpa tã età. Es e' idir.

### Sene wër buaë Skëköl wa ese

**4** A yamipa, sa' tò a' wöbla' tò a' senú wës Skëköl wa iwër buaë es, e' iuteke buaë a' tò. I' tã sa' tò a' a' ikieke, sa' tò a' patteke Skëképa Jesús ttö wa, tò a' kì senú yësyë këkraë.

<sup>2</sup>I' uk a' ka' ye' tò Skëképa Jesús ttö wa, e' jcher buaë a' wà. <sup>3</sup>Skëköl kì ikiane tò a' ser batse'r, e' wà kiane chë tò a' e' skóttsa trë kos yöki. <sup>4</sup>A' e' wöbla'ú e' kkö'nuk batse'r dalöiertã'. <sup>5</sup>A' kè kàne senuk wës pé' kè e' batsöta' Skëköl mik es. Ie'pa trër

taië wës iwákpa kì ikiane es. <sup>6</sup>A' dör ñi yamipa Jesús tté wa, e' kuekì kè a' kàne ñi tsiriuk a' alakölpwa. A' ñi wamblö es, e' tã a' ñi dalöseukëwà. Sa' tò a' a' iyë'bak tò wépa tò iwambleke es esepa we'ikeraë siarë Skëképa Jesús tò. <sup>7</sup>Skëköl kè wà a' klöone e' ia'ukka sene sulusi wa. Ie' tò a' klöo' senuk batse'r ie' a. <sup>8</sup>E' kuekì yi tò tté i' watëttsa, ese kè wà s'ditsö tté watënettssa, ie' tò Skëköl tò Wiköl Batse'r mé se' a, e' tté watëttsa.

<sup>9</sup>Skëköl wák tò a' wöbla'wé ñi dalërit-sök, e' kuekì kè i' shteku'ia sa' tò tté e' kì. <sup>10</sup>A yamipa, e' yëne tò Jesús mik erblökwakpa serke Macedonia, e'pa kos dalër taië a' éna. Erë sa' tò a' kì patteke tò a' kì ñi dalëritsök taië shutë. <sup>11</sup>Ñies a' e' chó senuk bèrë. Pé' kè tsiriwar kanë wa, tté wa, i' wa. A' wakpa íyi è wà saú wà shuló. A' kanëblö a' wákpa ulà wa wës sa' tò a' iyë' es. <sup>12</sup>A' tò iwé es, e' tã pé' kè erblö Jesús mik, esepa tò a' dalöieraë. Ñies a' tò iwé es, e' tã i' kos kiane a' kì senoie, e' döraë a' ulà a' as a' kè tò yile ulà panù a' kanéwoie.

### Skëképa Jesús datskene

<sup>13</sup>A yamipa, sa' kì ikiane tò a' wà ijcher tò i' tköraë se' blërulunëbak esepa tã as a' kè eriar wës wépa kè ku' i' panuk, esepa eriar es. <sup>14</sup>Se' tò iklö'wé tò Jesús köte'wà shkenekane, e' kuekì ñies se' tò iklö'wé tò wépa batsulewà ie' mik blërulunëbak, esepa tserabitu Skëköl tò Jesús tã mik idatskene età.

<sup>15</sup>E' kuekì i' kkeyé' Skëképa tò sa' a' e' chekene sa' tò a' a, e' dör tò mik ie' dene, età se' dör ie' icha tso' ttsë'ka, esepa kè mine se' malepa blënewa, esepa yöki kewe. <sup>16</sup>Mik Skëképa wák bitukene ká jai a, età ittöraë aneule darërë tseraë sulitane tò. Ñies Skëköl biyöchökwakpa wökir kibi, e' ardaë tã Skëköl duk bla'wëraëitö taië. Età wépa batsulewà Cristo mik blërulunëbak, esepa shkerdakane kewe. <sup>17</sup>E' ukuökì tã se'

tso' ttsë'ka ká i' a, esepa kòs busdaká ie'pa tã ñita mò a tã Skëkëpa Jesús kueraësö kashuk a, etã es se' tso'ie ie' tã kekraë. <sup>18</sup>E' kueki a' ñi er diché ió ttè e' wa.

**5**<sup>1-2</sup>A yamipa, a' wã ijcher buaë tò mik Skëkëpa Jesús datskene, etã kèwö e' datse kè biyó yëule wes akblökwakpa dôwa se' u a nañewe es. Kè yi wã ijcher tò mik idatskene, e' kueki e' kèwö kè kituk sa' a yëkkuö kî a' a. <sup>3</sup>Mik sulitane tò iché: "Ire' sulitane serke bèrè ñita, kè pauirku'", e' bet tã ì sulu dôraë ká i' kî tã s'ditsö weirdaë siarë. Ie'pa kè tkòpashkar iulà a wes tayë alà kurke e' kè tkòpashkar iweir taië e' ulà a es. <sup>4</sup>Erë a yamipa, a' kè serku'ia ká ttsettse a wes ie'pa es. E' kueki e' kèwö kè dôpa a' kî wes akblökwakpa dôwa es. <sup>5</sup>A' kòs serke yësyësë Jesús ttè dikia, e' dör wes se' serke ká ñiwe a es. Skëkëpa Jesús kèwö, e' tò a' ttsë'weraë buaë. Kè se' tò ì sulu wambleku'ia wes ká ttsettse wakpa es. <sup>6</sup>E' kueki kè se' kàne senuk wes ie'pa es. Ie'pa dör wes se' kapòtulur es, kè ku' ì panuk. Erë se' kawöta senuk wösh wa, kabikeitsöke buaë wes s'tso' kkáme es. <sup>7</sup>Wépa kapötkëter, esepa kapötkëter nañewe. Wépa tteke blo' tò, esepa tteke blo' tò nañewe. <sup>8</sup>Erë se' dör wes ká ñiwe wakpa es, esepa ké kabikeitsök buaë wes s'tso' kkáme es. Se' erblö Jesús mik, ñies se' ñi dalëritsò, e' tò se' bleraë wes íyi daloie ieke ñippök-wakpa tò ibatsi' kî kuaböt yöki es. Ñies se' tsatkërdaë, e' panusö kröröë, e' tò se' tsatkeraë wes íyi daloie tkekeka ñippök-wakpa tò iwökir kî e' tsatkoie es. <sup>9</sup>Skëköl kè wã se' klöone ie' ala'rie se' we'ikoie. E' skéie se' klöo'bakitö se' tsatkoie Skëkëpa Jesucristo batamik. <sup>10</sup>Cristo kötewã se' skéie as se' ser michoë ie' tã ñita. Se' blënewã ö se' tso'ia ttsë'ka, e' kè dè' wes ie' a mik ie' datskene etã. <sup>11</sup>E' kueki a' ñi er pabló, a' ñi diché ió, ttè ikkë wa wes a' tso' iwà uk es.

### Pablo tò ie'pa kî pattë

<sup>12</sup>A yamipa, wépa tso' kanëblök darërë a' wökirpaie Skëkëpa Jesús ttè a, esepa tò a' kkö'neke, a' patteke as a' ser buaë yësyësë Skëköl a. E' kueki sa' tò a' a ikieke tò ie'pa dalöiö. <sup>13</sup>Ie'pa dalöiö taië. Ie'pa dalëritsö ie'pa kanë kueki. A' senú bèrè ñita.

<sup>14</sup>Ñies sa' tò a' pattë tò a' wépa bikëne, kè éna kanëblak, esepa unú. Wépa eriarke, esepa er pabló. Wépa kè ku' tkëulewã darërë erblök Jesús mik, esepa kimú. Sulitane dalë'ttsó er bua' wa.

<sup>15</sup>A' e' kkö'nú. Mik yi tò ì sulu wamblé a' kî, etã kè a' tò ì sulu wamblökne ie' kî iskéie. E' skéie a' e' chó kekraë er buaë chök ñi a ena sulitane a.

<sup>16</sup>A' ttsë'nú buaë kekraë. <sup>17</sup>A' ttö me'rie Skëköl tã. <sup>18</sup>Ì kòs kî wëstela chó Skëköl a. A' dör Cristo Jesús icha, e' kueki Skëköl kî ikiane tò a' ser es.

<sup>19</sup>Ì weke Skëköl Wiköl tò a' shua, e' kè wöklö'war. <sup>20</sup>Ttè Skëköl ttekölie, ese kè watarttsa. <sup>21</sup>Iwà kòs bikeitsó bua'iewã. Wé dör buaë ese bló. <sup>22</sup>Ì sulu kòs, ese yöki a' e' skótttsa.

<sup>23</sup>Skëköl dör sene bèrè mukwak, as e' tò a' kimú senuk batse'r. Ñies as ie' tò a' chkà, a' er, a' wiköl, a' wák wa'ne kkö'nü kè kî ì sulu ttè tã' yës dò mik Skëkëpa Jesucristo datskene etã. <sup>24</sup>Yi tò a' klöo'bak, e' ttö mokjë. Ie' tò ese kòs waweraë.

### Pablo e' chéat

<sup>25</sup>A yamipa, a' tò ikió Skëköl a sa' kî.

<sup>26</sup>S'yamipa kòs shke'ú sa' a ñi dalër wa.

<sup>27</sup>Ye' tò a' ké Skëkëpa Jesús ttò wa yëkkuö i' sauk s'yamipa kòs a.

<sup>28</sup>As Skëkëpa Jesucristo er buaë chò a' a.

## Yëkkuö Skà Kit Pablo tò Tesalónica wakpa a, i' ta ide böt

### 2 Tesalonicenses

Mik Pablo bak Corinto eta ie' tò yëkkuö i' kit Jesús mik erblökwakpa tso' Tesalónica e'pa a. I' dör yëkkuö skà kit ie' tò ie'pa a, i' ta ide böt. S'wöbla'ukwakpa wele tò ichè tò Jesús skà dë'röbakne e' kueki kè s'kawöta kaneblok. Jesús mik erblökwakpa welepa tò e' klö', e' kueki ie'pa kè kaneblöia chke yuloie. E' kueki Pablo tò Jesucristo skà datskene e' pake ie'pa a.

Pablo éna ie'pa a ichak yësyësë tò Jesús kam döne e' kueki ie' tò yëkkuö i' kit. Ie' tò ie'pa a iché tò Jesucristo datsketkene e' yöki wëm döraë eköl sulitane kitö'uk. E' kaneblöraë Satanás diché wa. Nies ie' tò ie'pa a iché tò mik Jesús dene eta pë' kos kè erblène ie' mik e' we'ikeraë Skököl tò.

Erë kam Jesús döne eta ie' mik erblökwakpa kawöta senuk yësyësë ena ie'pa kawöta kaneblok e' kkö'noie. Es Pablo tò ie'pa a iché.

### Shke'wè

**1** Ye' dör Pablo. Silvano ena Timoteo tso' ye' ta íe. Sa' tso' yëkkuö i' shtök Skökëpa Jesús icha erule serke Tesalónica e'pa a. A' batsulewa Skököl dör S'yé ena Skökëpa Jesucristo e'pa mik. <sup>2</sup>As ie'pa er buaë chò ena sene bèrè mù a' a.

### Mik Jesús dene, eta pë' suluë we'ikeraëitö

<sup>3</sup>A yamipa, kekraë sa' kawöta wëstela chök Skököl a a' dalërmik. A' erblöke Jesús mik, e' kí mir buaë. E' sù a' ñi dalëritsöke, e' kí mir buaë. E' tò sa' ké wëstela chök Skököl a. <sup>4</sup>Sa' tò a' tté ppéka buaë Skököl icha eruleë kos e'pa

shua. Eré a' weirke siarë s'bolökpa ulà a, a' töierke siarë Jesús tté kueki, eré a' e' tkéwa darërëë, a' erblökeia Jesús mik buaë, e' kueki sa' tò a' kikéka. <sup>5</sup>E' kos wa iwënewa tò Skököl tò s'shulè yësyësë. Ie' dör se' blú, e' tté kueki a' weirke. E' wa iwënewa tò ie' tò ibikeitseke tò a' je' didir ì blúie ie' tso' e' kfië.

<sup>6</sup>Skököl tò s'shuleke yësyësë kekraë, e' kueki buaë idir tò wépa tò a' we'ikeke esepa we'ikeraë ie' tò siarë. <sup>7</sup>Ta a' weirke siarë e'pa enuraë sa' ta ñita. E' kos tköraë mik Skökëpa Jesús datskene ie' biyöchökwakpa diché ta' taië e'pa ta ena bö'wö ñarke taië e' shua eta. <sup>8</sup>Wépa kè e' batsöta' Skököl mik, kè wa Skökëpa Jesús tté buaë e' iütene, esepa kos we'ikök ie' datse. <sup>9</sup>Ie'pa weir michoë siarë busdattsa banet Skököl diché ta' taië olo ta' taië, e' yöki. <sup>10</sup>E' kos tköraë mik Skökëpa Jesús datskene eta. E' kéwö ta' ie' icha bats'erpa kos tò ie' kikeraka. Se' erblé ie' mik, esepa kos tò ie' dalöieraë. A' tò tté yé sa' tò a' a, e' klö'wé e' kueki a' tso'nak e'pa shua.

<sup>11</sup>E' kueki sa' tò Skököl a ikieke kekraë a' kí. Sa' tò ikieke ie' a as ie' tò a' saü tò a' serke yësyësë wes ie' tò a' klö'bak senuk es. Nies sa' tò ikië ie' a tò ie' tò a' kimù ì buaë kos kiane wè a' kí e' wa uk buaë ie' diché wa. E' kos wak a' éna a' erblöke Jesús mik e' kueki. <sup>12</sup>Sa' tò ikieke es as Skökëpa Jesús kikarka a' batamik, nies as Skököl tò a' kikòka buaë. Ie' ena Skökëpa Jesucristo e'pa er buaë chò a' a, e' kueki ie'pa tò a' kimeräë iwà uk buaë.

### Wëm Sulusi Ichökle

**2** A yamipa, mik Skökëpa Jesucristo datskene, eta se' busdaka kashuk a ñi dapa'uk ie' ta, e' tté pakeke sa' tò a' a ñne. Sa' tò a' a ikieke kröröë tò <sup>2</sup>yile iché tò Skökëpa Jesús datskene, e' kéwö detke, e' ta kè a' e' kitö'uk e' tkiuk tté ese wa. Isalema yile tò a' a icheke tò Wiköl Bats'er tò sa' a ikkaché tò Jesús denetke.

Isalema yile tö icheke tö sa' tö ie'pa a iyë' ö sa' tö ikit yëkkuö kī tö Skëkëpa Jesús denetke ká i' a. Yile tö iché es, e' ta' e' dör kache. <sup>3</sup> Kë a' e' kītō'uk ttè ese wa yës. Skëkëpa Jesús kam döne e' yōkī taijē pē' tö Skëköl waterattsä. Nies wëm sulusi ichökle wömenettsabak weinuk e' dōraë. <sup>4</sup> İ kos tso' dalöië skëkölíe, ese kë kiarpa ie' kī. Ie' wák e' ttsōrakā ese kos tsata. Ie' kī ikiane tö sulitane tö ie' è dalöië. Ie' e' tkōrakā Skëköl wé kibi a ta' ie' chōraë: "ye' dör iyi ulitane kéköl."

<sup>5</sup> Mik ye' bak a' ska', etā iyi ekkë yë'yō a' a, ye' a ta' e' ane a' éna. <sup>6</sup> İ tö wëm sulusi ñe' wöklō'wekeia as kë idō kam ikéwō dò e' yōkī e' jcher a' wā. <sup>7</sup> Erë i'ñe ta' Satanás tso'tke iwakanéuk bër akirie as s'ditsö tö Skëköl ttè watōttsä. Erë wëm sulusi ñe' kë dōpa dò mik yi tso' iwöklō'uk e' yënettsä etā. <sup>8</sup> Mik iyënettsä, etā wëm sulusi e' dōraë sulitane wörkī. Erë mik Skëkëpa Jesús de, etā ie' e' alōrakā ikī ilo taijē wa ta' itterawaitō ikkō siwé è wa. <sup>9</sup> Mik wëm sulusi ñe' de (kam Jesús tö ittōwā e' yōkī), etā ie' dōraë Satanás batamik. Satanás diché wa, ie' tö ì kë or yi a ese kos weraë s'kītō'woie. <sup>10</sup> İ sulu kos wa ie' tö s'wōmeuletttsä weinuk aishkuö ta' esepa kītō'weraë. Ie'pa kë wā Jesús tté mokī e' dalëritsë e' tsatkoie, e' kuëkī ie'pa wōmeuletttsä weinuk. <sup>11</sup> E' kuëkī Skëköl tö ie'pa wōmerattsä as ie'pa e' kītō'ü Wëm Suluë Ichökle e' kache wa. <sup>12</sup> Es ie'pa kë tö ttè mokijë ñe' klō'wë. E' skéie ie'pa tsë'r buaë ì sulu wamblök, e' kuëkī Skëköl tö ie'pa wōmerattsä weinuk aishkuö ta'. Esepa kos kī inuī dōraë.

### S'yé tö se' shukitbak tsatkë

<sup>13</sup> Erë, a yamipa, a' dalër taijē Skëkëpa Jesús éna. Tsawe ta' Skëköl tö a' shukitbak tsatkë iWiköl tö a' batsë'wë e' batamik. Nies a' tsatkëne ttè mokijë klō'wé a' tö e' batamik. E' kos kuëkī sa' kawōtā wëstela chök Skëköl a' kēkraë a' kī. <sup>14</sup> Sa' tö Jesús tté buaë pakā a' a, e'

wa Skëköl tö a' klō'bak as a' ser michoë Skëkëpa Jesucristo ta' ñita e' olo taijē e' a.

<sup>15</sup> A yamipa, e' kuëkī, ttè wa sa' tö a' yō' mik sa' bak a' shua etā, ñies mik sa' tö yëkkuö kit a' a etā, ttè e' kos blō buaë a' er a, kë ilo'yar. <sup>16</sup> Skëkëpa Jesucristo ena Skëköl dör S'yé, e'pa éna se' dalër taijē. Ie'pa er buaë chë se' a, e' tö se' er pablë michoë. Nies ie'pa kablë' sene michoë muk se' a, e' panuk kröröë se' tso'ie. <sup>17</sup> As ie'pa tö a' er pablö. As ie'pa tö a' er diché kī iō as a' tö ì buaë kos ü ttè wa ena iwawatke.

### S'yé a ikió sa' kī

**3** A yamipa, bata ekkë ta, a' tö Skëköl a' ikió sa' kī as Skëkëpa Jesús tté pakeke sa' tö, e' kī pakar bet ká ulitane wakpa a ta' e'pa tö iklō'wé wes a' tö iklō' es. <sup>2</sup> Nies pē' tso' taijē kë erblökü' Jesús mik, e' kuëkī a' ikió Skëköl a' tö ie' tö sa' tsatkó pē' sulusi yōkī. <sup>3</sup> Erë Skëkëpa Jesús ttö mokijë, ie' tö a' se'weraë tkëule-wā darërë ie' mik ta' a' tsatkeraitō ì sulu yōkī. <sup>4</sup> Sa' e' mué ie' mik tö ie' tö a' kimeräe. E' kuëkī sa' wā ijcher tö ì uk a' ké sa' tö, e' wawé a' tö ta' a' iwë michoë. <sup>5</sup> As Skëkëpa tö a' kimù kos Skëköl éna se' dalër e' wā anuk. Nies as a' kimuitō a' weirke kos e' dalë'ttsök wes Cristo tö ie' icha dalë'ttsë' es.

### Se' kawōtā kanëblök

<sup>6</sup> A yamipa, Skëkëpa Jesucristo ttö wa sa' tö a' a' icheke tö s'yamipa welepa bikërke, esepa yōkī a' e' skó. Wépa kë tö ttè me'at sa' tö e' iutekü', esepa yōkī a' e' skó, kë iutur. <sup>7</sup> A' wā ijcher buaë tö a' kawōtā senuk wes sa' bak senuk a' ska' es. A' kë wā sa' sune bikënu. <sup>8</sup> Sa' kë wā yi chkë ñane kë patoule. E' skéie sa' bak kanëblök darërë ñië nañëë shtrine wa ì wa chkoie, di' yoie as sa' kë tö yi tsiriü e' tië wa e' kanewë wa. <sup>9</sup> Mik sa' bak a' ska' warma a' kawōtā sa' sauk, sa' kkō'nuk, erë sa' kë wā ì kine a' a' es. Es sa' kanëblë'

a' ska' as a' wöblar kaneblök wēs sa' tö a' a iwà kkayë' es. <sup>10</sup> Mik sa' bak a' ska', eta ttè i' yè' sa' tö a' a: “Yi kè kaneblak, ese kè tiar.” <sup>11</sup> Sa' tö ittse tö a' welepa bikërke taië. Ie'pa kè kaneblökü' yēs, e' skéie wépa kaneblöke esepa tsiriwēkerakitö ñië. <sup>12</sup> Pè' esepa patté sa' tö, ñies ie'pa ké sa' tö Skëképa Jesucristo ttò wa kaneblök darërë bèrë e' kanéwoie.

<sup>13</sup> Erë, a yamipa, kè a' shtrinuk ì buaë uk këkraë. <sup>14</sup> Ttè shtéyö yëkküö i' kī, e' kè iutè yile tö, e' ta' ichó a' malepa a. Ie' yöki a' e' skó as ijaërka ta' ier mane'üne.

<sup>15</sup> Erë kè ie' suar suluë wēs s'bolök es, e' skéie ipattó er bua' wa wēs s'ël es.

### Pablo e' chéat

<sup>16</sup> Skëképa Jesús dör sene bèrë mukwak, as e' tö sene bèrë mù a' a këkraë ì kos tköke a' ta' e' shua. As ie' tkërie a' ulitane ta' këkraë.

<sup>17</sup> Ye' dör Pablo, e' tö shkene i' shté ye' wák ulà wa wēs ye' tö ishteke yëkküö kos shtéyö ese kī es. Es sulitane wa ijcher tö ye' wák tö ishtë. <sup>18</sup> As Skëképa Jesucristo er buaë chò a' ulitane a taië.

## Yëkkuö tsá kit Pablo tö Timoteo a

### 1 Timoteo

Pablo tö yëkkuö kit mañat Jesús mik erblökwakpa wökirpa a, e' et e' dör it-sá kititö Timoteo a e'. Yëkkuö i' dör ie' pattoie wes ie'pa kawöta s'wëttsuk s'wökirpaie.

Timoteo dör Pablo wapiöuk ikanè a. Mik ie' bak duladula eta Pablo tö ie' klö' kaneblok ie' ta. Timoteo bak senuk ká kiè Litra ate Asia ee. Ie' yé dör griegowak ena imi dör Israel aleri. Mik Pablo tö Jesús tté buaë paka' Litra eta Timoteo erblé' Jesús mik. E' ukuökí mik Pablo skà bak Litra eta ie' tö Timoteo shukit kaneblok ie' ta (Hechos 16.1-4). E' ukuökí Timoteo kaneblé' taië Pablo ta Jesús tté buaë pakök ká kua'ki kua'ki a. E' ukuökí ta Timoteo bak Jesús mik erblökwakpa wëttsuk Éfeso. Pablo tö yëkkuö i' kit Timoteo a ie' kimoie wes ie' ké senuk kaneblok.

E' kfieta se' wése ké kaneblok Jesús mik erblökwakpa wökirpaie ena e'pa kímukwakpaie, e' kit Pablo tö Timoteo a. Nies Jesús mik erblökwakpa tso' Éfeso e'pa shua kabene tso' taië. Pè' welepa tö s'wöbla'weke kache tté wa, esepa kí talarke taië, e' ché Pablo tö Timoteo a tö wes ie' kawöta tté ese shulök.

Yëkkuö i' tö se' kimèmi taië i'ne ta. Yëkkuö i' tö se' a ikkachè tö se' wése kawöta shushtë s'wökirpaie, nies se' wése kawöta shushtë s'wökirpa kímukwakie. E' kfieta wes s'wökirpa ké kaneblok e' tso' kitule yëkkuö tsá kit Pablo tö Timoteo a e' ki.

### Shkè'wè

**1** Ye' dör Pablo. Ye' dör Cristo Jesús ttekölpa tsá, e'pa eköl. Skököl dör S'tsatkókwak ena Cristo Jesús mik se' er-

blöke, e'pa ye' ka' kanè e' wà uk. <sup>2</sup>A Timoteo, ye' tso' yëkkuö i' shtök be' a. Be' dör wes ye' alà chók es tté mik se' erblöke e' wa. Skököl dör S'yé ena Sköképa Cristo Jesús, as e'pa er buaë chò be' a ena be' saü er siarè wa nies sene bèrè mù be' a.

### Se' wöbla'ukwakpa kache tté wa, esepa wöklö'ú

<sup>3</sup>Mik ye' minea Macedonia, eta ye' kköyè' be' a: "Be' e' tsuat Éfeso pè' welepa tso' ee e'pa a ichó tö kè s'wöbla'war kache tté wa." <sup>4</sup>Ie'pa kawö chöke taië se' dit-séwö bak ká iaiä e' tté pakè wa. Tté e' kè erta'wa, e' dör tté èse. Ichó ie'pa a tö kè yi wöbla'wariä kache tté ese wa. Tté ese kí sulu s'nì chò. Tté ese tö, i weke Skököl tö se' erblé' ie' mik e' wa, ese wöklö'weke.

<sup>5</sup>Ye' kí ikiane tö s'yamipa nì dalërit-sò er maneneë wa, erbikè bua' wa. Mik ie'pa nì dalërit-sò es, eta e' wa iwënewa tö mokí ie'pa erblöke Jesús mik. E' kueki ye' tö be' ké s'wöbla'ukwakpa kache tté wa esepa wöklö'uk, kè kar s'wöbla'uk. <sup>6</sup>Ie'pa welepa tö tté mokí méat ta ittémirak biraraë. <sup>7</sup>Ie'pa erkiöke s'wöbla'uk tté dalöiëno wa. Eré ipakekerakitö wes ichópa éna iwà anerak buaë es, eré iwákpa kè éna iwà ane.

<sup>8</sup>Se' wa ijcher tö tté dalöiëno e' dör buaë, eré se' kawöta iwà jchenukwa tö i kueki imeneat. <sup>9</sup>Se' wa ijcher tö tté dalöiëno, e' kè meneat s'er yësyësë esepa shuloie. E' skéie imeneat wépa kè senak yësyësë, wépa tö tté dalösewekewa, wépa dör pè' sulusi, wépa e' wamblo sulu, wépa kè tö Skököl ena ie' siwé dalöië, wépa tö imi ö iyé ttèwa, wépa dör s'ttökwakpa, <sup>10</sup>wépa trër, wépa serke wépa ta alakölpa skéie, wépa tö s'ditsö ekibleke watuè, wépa dör kachökwakpa, wépa tö s'kkateke kache wa, nies wépa tö i skà kè dör tté yësyësë sini'kué ese wambleke, esepa kos shuloie tté dalöiëno meneat. <sup>11</sup>Es tté buaë ichökle e'

tö se' a ikkacheke. Ttè e' pakè kané me'at Skèköl kīkaulekà tajë, e' tö ye' ulà a.

### Pablo tö wëstela ché Cristo a

<sup>12</sup> Skèkëpa Cristo Jesús tö ye' er diché ieke. Ie' isuëwà tö ye' ttò mokijë, e' kueki ye' me'kaitö kanëblök ie' a. E' kueki wëstela chëyö ie' a tajë. <sup>13</sup> Ye' bak ie' chök suluë. Ñies ye' bak ie' ttökatapa chök suluë, we'ikök siarë. Erë Skèköl tö ye' sué er siarë wa, kam ye' erblò ie' mik e' kueki. Ì wamblë' ye' tö ie' ta, e' wà kè ane ye' éna tö e' dör suluë, e' kueki ie' tö ye' sué er siarë wa. <sup>14</sup> Es Skèkëpa Jesús er buaë ché ye' a tajë shute as ye' erblò ie' mik, ñies as ye' tö s'malepa dalëritsò buaë Cristo Jesús ttò wa.

<sup>15</sup> Cristo Jesús dë'bitu ká i' a pë' susulipa tsatkök. Ttè e' dör yësyësë je', sultane ké iklö'uk. Ye' bak e' wamblök suluë sultane tsata. <sup>16</sup> Erë Skèköl tö ye' sué er siarë wa, ie' tö ye' tsatkée sultane a ikkacheke tö kos Jesucristo tö se' dalë'ttseke énaë er bua' wa. Ie' tö iwé es as sultane erblò Jesús mik wës ye' es ta sene michoë dö ie'pa ulà a. <sup>17</sup> Skèköl dör s'blü yöbië, kè duöta'wà, kè wërta'wà, e' dör eköl ème. ¡As sultane tö ie' dalöiö tajë, ie' kīkōkà tajë kekraë!

<sup>18</sup> A Timoteo, be' dör wës ye' alà es, ye' tö be' ké iwakanéuk wës Skèköl tteköl tö iyë'bak be' a es. Be' e' tkōwà darërë wës ñippökwa bua' bua' ñippò es. <sup>19</sup> Be' erblò michoë Jesús mik. Be' erbiokò buaë e' wà iutó. Wëlepa kè wà ierbikò buaë e' wà iutëne, e' kueki ie'pa erblöke Jesús mik e' ol'yé ie'pa tö. <sup>20</sup> Esepa tso' bōl kië Himeneo ena Alejandro. Ie'pa métsa ye' tö Satanás ulà a as iwötkirdak tö Skèköl kè yërta' suluë.

### Skèköl a ikiösö sultane ki

**2** A Timoteo, ttè i' cheke ye' tö be' a e' dör ttè bua'ie: Jesús mik erblök-wakpa kawöta Skèköl a ikiök sultane ki kekraë. Ichó ie'pa a tö ie' a ikiö tö ie'

tö sultane kimè, ñies wëstela chó ie' a sultane ki. <sup>2</sup> Ie' a ikiö wëpa tso' se' blüpaie se' wökirpaie esepa kos ki as ie'pa s'wëttsü buaë. Ie'pa tö iwé es, e' ta se' serdaë bèrë buaë Skèköl dalöiök è, kè ñi chöta' suluë. <sup>3</sup> E' dör buaë, ñies iwër buaë Skèköl dör S'tsatkökwa e' wa. <sup>4</sup> Ie' ki ikiane tö sultane tsatkër. Ñies ie' ki ikiane tö sultane éna ttè mokijë e' wà ar. <sup>5</sup> Ttè e' dör i' es:

Skèköl dör eköl ème.

Ñies wëm tso' eköl ème, e' tso' se' ttè chök Skèköl a, e' dör Cristo Jesús.

<sup>6</sup> Ie' wák e' me'ttsabak ttëwà sultane nu' skéie.

E' bak mik Skèköl tö ikëwö me'wà eta, as sultane wà ijcher tö mokijë ie' éna se' tsatkak.

<sup>7</sup> Ttè e' wà pakök Skèköl tö ye' klö'bak Jesús ttekölpa tsá e'pa ekölie. Ie' tö ye' patkë' pë' kè dör judiowak esepa wöbla'uk ttè mokijë mik se' erblöke e' wa. Ì ché ye' tö e' dör mokijë, e' kè dör kache.

<sup>8</sup> Bitökicha a' ñi dapa'uke ká wa'ne, eta ye' ki ikiane tö wëpa ttò Skèköl ta er batse'r wa, kè ulune yi ki, kè ñi chöta'. <sup>9</sup> Ñies ye' ki ikiane tö alakölpa e' paio buaë, kè dör ichkà kkachök. Alakölpa kè kàne iyi tulökka tajë itsà ki. Ñies ie'pa kè kàne e' kītkōkka tajë iyi wōnarke dalölöë oroie ñie ese wa. Datsi tuë darërë ese kè iër e' ttsoka tajë. <sup>10</sup> E' skéie ie'pa ké e' kītkōkka ñi buaë wekerakitö ese wa wës alakölpa e' chò tö ie' tkëulewà darërë Skèköl ttè a esepa ké senuk es. <sup>11</sup> Ie'pa kawöta s'wöblarke e' kītsök bèrë dalöië wa. <sup>12-14</sup> Skèköl tö Adán yö' kewe, e' ukuöki ta Eva yö'itö. Ñies Adán kè kītëne, Eva kītëne, es ie' tö Skèköl ttè dalöse'wà. E' kueki mik a' ñi dapa'uke Skèköl dalöiök, eta ye' ki ikiane tö alakölpa tulur bèrë. Ye' kè tö kawö mè ie'pa a s'wöbla'uk. Ñies ye' kè tö kawö mè ie'pa a e' alökka wëpa ki. <sup>15</sup> Erë alakölpa tö ila'r kanewëke buaë ena ier-



blöke Jesús mik ena s'dalëritseke ena iserke batse'r ena iërbiköke buaë yësyësë e' kos a itkërie, e' ta itsatkerdarak.

### Skëkëpa Jesús ichapa erule e'pa wökirpa

**3** Ttë i' dör yësyësë: Yi éna kanëblak Skëkëpa Jesús ichapa erule e'pa wökirie, e' ta ese éna kanë buaë wak. <sup>2</sup>E' kuëki esepa ké senuk yësyësë, kè ki ì sulu kuepa yi tò ikkatoie. Esepa ké alaköl tsukwä eköl è, e' dalöiök tajë, kè kàne trënuK. Esepa ké e' kk'ö'nuK buaë, kabikeitsök buaë, ñies senuk yësyësë as idalöiër. Esepa ké s'yamipa datse bänet, esepa kiökwä buaë iu a. Esepa a buaë s'wöblar Skëköl ttë wa. <sup>3</sup>Esepa kè kàne e' ttökka blo' wa. Esepa kè dör kësik tsiriwëta', e' skéie ie' er buaë chò sultane a ta iserke bèrë. Esepa kè er me'rie inuköl ki. <sup>4</sup>Esepa dör iu wökir buaë. Ñies esepa ala'r wöblane buaë ie' ttò dalöiök, ñies sultane dalöiök. <sup>5</sup>Esepa kè dör iwák u wökir buaë, e' ta çwes idömi Skëköl ichapa erule e'pa wökirie buaë? <sup>6</sup>Wépa míwä erpa Skëköl ttë a, esepa kè menukka s'wökirpaie dö' ie' ttsòka tajë ta iwömerttsa weinuk wes bé es. <sup>7</sup>Ñies e' wakpa ké senuk yësyësë as wépa kè dör Skëkëpa Jesús ichapa esepa tò idalöiö. Kè dör es, e' ta ie'pa tò iwayuëmi ta ijaërkami ta iärmine wes bé ki ikiane es.

### Skëkëpa Jesús icha wökirpa e'pa kímukwakpa

<sup>8</sup>Es ñies Skëkëpa Jesús ichapa erule wökirpa e'pa kímukwakpa ké senuk yësyësë as idalöiër. Esepa ké ttök moki. Esepa kè kàne e' ttökka blo' wa. Esepa kè kàne inuköl klö'uk kache wa. <sup>9</sup>Esepa ké e' tkökwa darërë ttë mik se' erblöke kkayëne se' a, e' a erbikë maneneë wa. <sup>10</sup>Wépa merkeka iwökirpa kímukwakpaie, esepa kawötä suë kewe tò iserdak. Kè iki ì nuí ta', e' ta imerkami kímukwakpaie. <sup>11</sup>Esepa alakölpä ñies ké

senuk buaë as idalöiër. E'pa kè kàne biyöblök, kè kàne e' ttökka blo' wa. E'pa ké ì kos uk yësyësë. <sup>12</sup>Wépa kanëblak kímukwakpaie, esepa ké alaköl tsukwä eköl ème, e' dalöiök tajë, kè kàne trënuK. Esepa wöblane buaë ila'r wëttsuk ñies ie' dör iwák u wökir buaë. <sup>13</sup>Kímukwakpa tò iwakaneweke buaë, e' ta ie'pa dalöiërdaë, ñies Cristo Jesús ttë mik se' erblöke, e' pakeraëitö kè jaëne.

### Jesucristo siwé kkayë' Skëköl tò se' a

<sup>14</sup>Ye' mú mi' bet be' weblök. Ye' tso' yëkkuö i' shtök be' a <sup>15</sup>dö' ye' wöklör etä be' wa ijcher tò wes se' dör Skëköl yami-paie esepa kawötä senuk. Se' dör Skëköl chók e' ichapa, e'pa dör wes u chkü bua'ie es ttë mokië e' tsatkoie iwöklö'woie. <sup>16</sup>Jesucristo siwé e' kkayë' Skëköl tò se' a, ttë e' dör mokië buaë shutëë. Ttë e' dör i' es:

Jesucristo yöne s'ditsöie.

Ie' dör yësyësë e' kkayë' Skëköl Wiköl tö.

Ie' su' Skëköl biyöchökwakpa tò.

Ie' ttë buaë e' pakane ká wa'ñie wakpa a.

Ie' mik pë' erblöke ká wa'ñie.

Ie' kinewä buaë ká jai a olo ta' tajë eë.

### S'wöbla'ukwakpa kache ttë wa

**4** Skëköl Wiköl tò ichë yësyësë tò mik ká i' erkewatke, etä tajë pë' tò iërblö Jesús mik e' waterattsä. E' skéie ttë datse wimblupa tò s'kitö'weke esepa wa ena aknamapa wa ese klö'wekerakitö. <sup>2</sup>Pë' e' ò sulu kachò tajë erbikë burinewatke esepa iutekerakitö. <sup>3</sup>Pë' ñe'sepa kè tò s'kë senukwä. Ñies ie'pa tò icheke tò chke wésele kè katar, kè ñar. Erë chke kos me'atbak Skëköl tò se' a katanoie ñanoie. E' kuëki se' dör Jesús mik erblökwakpa wa ttë mokië e' jcher, e'pa wa kawö ta' chke ulitane katök ñuk wëstela chekesö ie' a e' wa. <sup>4-5</sup>Ì kos yö' ie' tò e' dör buaë, kè se' kàne iwatöktsa. Chke kos batse'ormi ie' ttë wa ena ie' a ikië wa.

E' kuęki ie' a wěstela chésö iki, e' ta inëmisö.

### Jesucristo kanè méso buaë

<sup>6</sup>Ttè ekkè wa be' tö se' yamipa wöbla'wé, e' ta be' döraë Cristo Jesús kanè méso buaë ese. Nies iwënewa tö be' er diché iërke buaë ttè mokı mik se' erblöke e' kos wa. Ttè e' wà iütë'bitu be' tö buaë dò ikkè.

<sup>7</sup>Erè kapakè èse, kè wà ta', kè tö Skëköl dalöiè, ese kos kè iutar. E' skéie be' e' paulaı kękraë senuk wës Skëköl kı ikiane es. <sup>8</sup>Se' e' diché iöke e' pa kè'woie e' dör bërëbërë buaë se' a ká i' kı è. Erè sene wës Skëköl kı ikiane es, e' tö sene buaë shüteë e' meraë se' a ká i' kı nıes aishkuö ta. <sup>9</sup>Ttè e' dör yësyësë, sulitane kè iklö'uk. <sup>10</sup>Se' erblétke Skëköl chók e' mik, e' kuęki se' dobchöke darërë kanëblök ie' a. Ie' dör sulitane tsatök-wak, erë bua'iewa ie' dör wépa erblé ie' mik esepa tsatök-wak.

<sup>11</sup>Ttè ekkè wa s'yamipa wöbla'ı ta ikó iwà iütök. <sup>12</sup>Kè be' e' muksa watè be' dör duladula e' kuęki. E' skéie be' ttò wa, be' ser wa, be' s'dalëritsè wa, be' erblö wa ena be' ser batse'r wa ikkachó s'malepa erblöke Jesús mik esepa a tö wës se' kè senuk. <sup>13</sup>Kam ye' dō e' yökı be' e' chó Skëköl yëkkuö aritsök s'yamipa a mik a' nı dapa'uke etä. Ie'pa wöbla'ı iwa, ie'pa pattó iwa. <sup>14</sup>Mik Skëkëpa Jesús icha e' wökirpa ulà me'kabak be' kı, etä Skëköl ttekölpa tö iyë' be' a tö i me' Wiköl Batse'r tö be' a kanëbloie Skëköl a, e' wakaneı ie' a buaë, kè iwe'ikar. <sup>15</sup>Be' e' chó ttè ekkè kos e' wakanéuk as sulitane tö isaı tö be' kı yörke buaë Cristo ttè wa. <sup>16</sup>Wës be' ser ena wës s'wöbla'wëbö e' kkö'nú. Be' tö iwé es kękraë, e' ta be' ena wépa tö be' ttöke e' ttsé, e'pa kos tsatkerdaë.

### Wes be' kè senuk Jesús mik erblök-wakpa ta

**5** Wépa kékëpatke esepa kè unar kësik wa, e' skéie ie'pa pattó er bua' wa wës s'yéwö es. Duladulapa pattó wës s'ëlpa es. <sup>2</sup>Es nıes alakölpa kékëpatke, e' pattó wës s'mi es. Nıes busipa pattó wës s'kutapa es er yësyësë wa.

<sup>3</sup>Alakölpa schó siarëla, kè wa yi ta' e' kkö'nuk, esepa dalöiö, esepa kkö'nú. <sup>4</sup>Erè schópa wa ala'r ta' ö uyökpa ta' ö wı'chkepa ta' esepa ala'r ö isı-bayökpa kawöta e' wöbla'uk iwıkela ö imi atë siarë e' kkö'nuk imipa tö ie'pa kköna' e' skéie. E' wër buaë Skëköl wa. <sup>5</sup>Alakölpa schó kè wa yi ta' e' kkö'nuk, serke ekörla, morke Skëköl è mik, ttöke ie' ta' nıie nañeë, esepa kawöta kımè. <sup>6</sup>Erè alakölpa schópa e' mettsa i sulu wamblök e' ttsé'woie buaë esepa tso' ttsë'ka, erë Skëköl a ie'pa dör wës s'duulewa es. Esepa kè kawö ta' kımè. <sup>7</sup>Ttè e' wà iütök s'yamipa kó as kè yi tö i sulu kı ie'pa kı ikkatoie. <sup>8</sup>Es yi kè tö iyamipa kkö'nè, kè tö iyamipa ekka kkö'nè bua'iewa, ese tö ttè mik se' erblöke e' watëttsa. Ie' dör suluë tköka pë' kè erblöta' Jesús mik esepa tsata.

<sup>9</sup>Alakölpa schó kı duas de dabom teryök (60) ö kı ta, senewabak wëm eköl è ta, esepa è kiè shtó kımè. <sup>10</sup>E' kıie ta ijcher sulitane wa tö ie'pa s'kimeke buaë, ie'pa ala'r talaö' buaë, ie'pa tö ipakök-wakpa datse' bänet esepa ki'wa buaë, kè ie'pa tkine kanè èse uk s'batse'r malepa kimoie, nıes s'weirke esepa kimeke ie'pa tö, ie'pa e' muke iyi buaë kos ese uk e' waweke ie'pa tö. Alakölpa schó esepa kiè shtök se' kawöta yëkkuö kı ikimoie.

<sup>11-12</sup>Erè alakölpa schó kam kı duas dō dabom teryök (60) esepa kiè kè shtar yëkkuö kı, esepa kè kawöta kımè. Ie'pa tö ichëmi Cristo a tö kè sa' serpawane, erë ie'pa erkiöwëne wépa tö, e' ta ie'pa serdawane. Es ie'pa ttè me' kuaë, e' kè

dalöiëne ie'pa wa, e' ta' e' nuí atë ie'pa ki. E' kueki esepa kiè kè shtar yëkkuö ki as kè itkò ie'pa ta' es. <sup>13</sup> Nies a' tò alakölpaschó esepa kimé etä ie'pa bikërdakä taië, michoë upakök u' èt u' èt biyöblök suluë, e' tiü mir mir s'yamipa tsiriuk, ttè kè yër ta' ese cherami shabatshabat. <sup>14</sup> E' kueki alakölpaschó iä busipa, esepa a' ye' tò ichè tò a' senúwane, a' ala'r kókane, a' wákpa u' kanéu. Ie'pa tò iwé es etä pé' kè wöbatsö Jesús ttè wa e'pa kè tò se' chepa suluë. <sup>15</sup> Alakölpaschó welepa anemibakne Cristo ttè yöki tso'ne Satanás ttò iütök, e' kueki ye' tò ichè es.

<sup>16</sup> Alaköl isie dör Jesús mik erblök-wak, e' yamipa alè dör alakölpaschó, etä ie' kè ie'pa kkö'nuk as kanè e' kè arka Skëképa icha malepa ki. Es imalepa tò alakölpaschó kè wä yi ta' e' kkö'nuk, esepa kkö'nemi.

<sup>17</sup> Skëképa Jesús icha erule erule e'pa wökirpa tò se' wëttseke buaë, esepa kawöta dalöië taië patuë buaë. Ie'pa wépa e' ché s'pattök s'wöbla'uk Skëköl ttè wa, esepa kawöta pasuë bua'iewa. <sup>18</sup> Skëköl yëkkuö tò ichè: "Baka wë'ne tso' kanebloie trigo wöttsoie, e' kè kawö ta' kkö payuëwa itso' kaneblök e' dalewa as ie' tò trigowö katò." Nies ichèitö: "Kaneblökwapka kawöta patuë." E' kueki s'wökirpa pasauk buaë se' kawöta.

<sup>19</sup> Yile debitü s'wökirpa eköl kkatök, ese kè iutar. Erè mik idebiturak bölnañal ikkatök ta' iché tò ie'pa tò isuë, etä ttè e' wä chakó tò iyëne ö kè iyëne. <sup>20</sup> S'wökirpa tò i' sulu wamblekeia, kè éna ilo'yak, esepa wöüü s'yamipa ulitane wörki as imalepa suarka ta' ie'pa kè tò iyi sulu wamblö.

<sup>21</sup> Ye' tò be' a' icheke Skëköl wörki nies Jesucristo wörki nies Skëköl biyöchök-wakpa shukitule e'pa wörki tò ttè ekképa wä iütö nikkëë s'wökirpa ulitane ta'. Ie'pa saü nikkëë. <sup>22</sup> Kè yi marka betbet s'wökirie. Mik be' tò imekeka, etä iwä

bikeitsöwa buaë kewe. Wëm tò i' sulu wamblé, ese mékabö s'wökirie e' ta' ie'pa tò ichèmi tò be' tso' ie' pabakök. Nies be' suëraë suluë ie'pa tò. Be' e' kkö'nú batse'r i' sulu kos e' yöki.

<sup>23</sup> Be' shü dalër nië, e' kueki kè be' kàne di' è yök. Mikle ta' vino yö' elkela kapöliie.

<sup>24</sup> I' sulu wambleke welepa tò ese jcher-wa sulitane wä bet, kam ishulir e' yöki. Erè i' sulu skä tso' ese kè jcherwa yi wä dò aishkuö ta' mik ishuline etä. <sup>25</sup> Es nies i' buaë wëkesö ese wërwa bet. Erè kè iwëne bet, e' ta' iwërdaë aishkuö ta', kè iblënu. E' kueki kè yi marka betbet s'wökirie kam iwä bikeitsöwa buaë e' yöki.

**6** Wépa tso' klöulewa kanè mésoie, esepa a' ichó tò ie'pa kawöta iwökirpa dalöiök er bua' wa as iwökirpa kè tò Skëköl chò suluë, nies as ie'pa kè tò ttè buaë wa se' tò s'wöbla'weke, e' chò suluë. <sup>2</sup> Ie'pa wökirpa dör Jesús mik erblök-wakpa, e' ta' ie'pa kè kàne idalöseukwa, ie'pa de nì yamiie Jesús ttè wa e' kueki. E' skéie ie'pa kè kaneblök bua'iewa. E' wä dör tò iwökirpa dör nies Jesús mik erblök-wakpa. Ie'pa dör nì yamipa nì dalër taië. Ttè ekké wa s'wöbla'ü, ichó sulitane a' tò iütö.

### Se' er me'rie inuköl ki, e' dör suluë

<sup>3</sup> Ttè buaë wa se' wöbla' Skëképa Jesucristo tò, e' tò se' a' ikkacheke tò wes seneke yësyësë Skëköl a. Ttè e' wa se' tò s'wöbla'weke. Yile tso' s'wöbla'uk ttè kuak'i wa, kè dör wes ttè wa se' tò s'wöbla'weke es, <sup>4</sup> e' ta' ie' e' tso'ka taië, erè ie' kè wä i' jcher yës. Ttè kè wä ta', ese è tso' ie'pa er a, e' kabewekerakitö nië se' tsiriwoie. Wépa tò ie'pa ttè iuteke, esepa ukyërke s'malepa ta', nì blabatsökëlor, nì chöke suluë ena nì bikeitsöke suluë. <sup>5</sup> Këkraë ini tsiriukerak ttè kueki. S'wöbla'ukwapka ttè kuak'i wa, esepa er me'rie i' sulu è ki. Ttè moki

ese kè ku'ia ie'pa wa. Ie'pa tö ttè ku'ki pakeke e' blu'woie ème. <sup>6-7</sup> Erë ye' tö a' a ichè tö mik se' kune, etä se' kè wa ì dè'ka. Nies mik se' blënewa, etä kè se' wa ì mîne yës. E' kueki se' serke yësyësë wës Skëköl ki ikiane es ena se' tts'er buaë, ì tso' se' wa e' è wa, e' ta e' dör buaë shute se' a inuköl taië tsata. <sup>8</sup> E' kueki se' wa chkè ta' datsi' ta', e' ta se' kè ttsë'nuk buaë, e' dör wë' se' a. <sup>9</sup> E' skéie wépa e' blu'wakka taië, esepa erkirke ì sulu wamblök ta' ianemine ì sulu ulà a wës dúla klörwa sho' a es. Ie'pa klöulewa sene sulu a, eré ese tö ie'pa sulu'weke, eré ie'pa tö iwawekeia, bata ekkè ta' ie'pa yilitéwa idikia weinuk. <sup>10</sup> Inuköl dalër s'éna e' dör ì sulu tsakië e' wì. Welepa tö inuköl kkecheke taië, e' ukuömik ttè mik se' erblöke e' olo'yérakitö ta' iweirke eriarke siarë.

### Pablo tö Timoteo bata patté

<sup>11</sup> Erë be' dör Skëköl kanè méso buaë. Be' e' skóttsa ì sulu kos ekkè yöki. E' skéie be' e' chó senuk yësyësë wës Skëköl ki ikiane es. Be' erbló Jesús mik kekraë. S'malepa dalëritsó. Be' weirke kos e' dalë'ttsó er bua' wa. S'malepa saú er bua' wa. <sup>12</sup> Be' erblöke Jesús tté buaë e' mik, e' kueki be' e' tkówa darërë nippök ì sulu datse be' ki e' ta. Mik be' erblë' Jesús mik kuaë, etä e' yë'ka be' tö pé' tso' taië e' kukua. E' kèwö ska' ta Skëköl tö be' klö'bak senuk michoë ie' ta, ttè e' mik be' e' klö'ú darërë kekraë, kè arwa as iwà dò be' ulà a. <sup>13</sup> Skëköl dör sene mukwak e' wörki, nies Cristo Jesús e' tsatké' ttè moki wa Poncio Pilato ska', e' wörki ye' tö be' a ichè tö <sup>14</sup> ì uk ye' tö be' kè e' wà iütó yësyësë as kè yi tö ì sulu kù

be' ki be' kkatoie dò mik Skëképa Jesucristo datskene olo ta' taië etä. <sup>15</sup> Mik ikéwö de, etä Skëköl tö Jesucristo patkerane kkachè sulitane a.

Skëköl kïkarkeka taië, e' eköl è dör íyi ulitane tsata.

Ie' dör blu'pa kos e'pa Blú ena skëkölpa kos e'pa Këköl.

<sup>16</sup> ¡Ie' eköl è kè duöta'wa!

Ie' serke ie' olo ta' taië e' shua, kè yi döpa'wa e' ska'.

Kè yi wa ie' suule iwöbla wa, nies kè yi a ie' sunukwa.

¡Ie' è kawöta kïkëka kekraë!

¡Ie' è diché ta' taië kekraë! ¡Es e' idir!

<sup>17</sup> A Timoteo, inuköl blúpa a ichó tö ie'pa kè kàne e' ttsökka taië. Inuköl er-ta'wa, chöta'wa e' kueki ichó ie'pa a tö ie'pa kè kàne e' maukka inuköl mik. E' skéie ie'pa a ichó tö a' e' mauka Skëköl è mik. Ie' tö se' a íyi buaë meke taië senoie, se' ttsë'woie buaë. <sup>18</sup> Ichó ie'pa a tö ì buaë ú taië s'kimioie. A' kè kàne kkë'blök. S'kimú a' inuköl wa er bua' wa. <sup>19</sup> Ie'pa tö iwé es, e' ta iské merane buaë Skëköl tö ie'pa a aishkuö ta. Es sene chökle e' döraë ie'pa ulà a.

### Pablo e' chéat

<sup>20</sup> A Timoteo, Skëköl tté buaë mène be' ulà a, e' wakaneú er moki wa. Kapakè kè wà ta', kè dör Skëköl dalöioie, ese kos yöki be' e' skóttsa. Ie'pa wákpa tö iché tö e' dör ttè mokië. Ie' chörak tö ie'pa wa íyi jcher taië, eré e' dör kache. <sup>21</sup> Se' welepa tö iché tö ttè ese sini'kuérakitö ta' ttè mik se' erblöke e' olo'yérakitö. E' kueki be' e' skóttsa bánet ttè ese kos yöki.

As Skëköl er buaë chò a' ulitane a.

## Yëkkuö skà kit Pablo tó Timoteo a, i' ta ide böt

### 2 Timoteo

Pablo bak wötëulewà Roma s'wöto wé a, e' yénettsà duas dabom teryök ena teryök kí böt Jesús kune'bak e' ukuöki (60-62 DC) e' ulatök. E' ukuöki ta ie' skà minea Jesús tté buaë pakök i' ta ide tkëtökicha. E' kèwö ska' ie' tó yëkkuö tsá kit Timoteo a ena Tito a. E' ukuöki ta wëm kiè Nero e' yöne Roma blúie età Pablo skà wötënewane s'wöto wé a. Mik ie' tso' wötëule e' dalewa ie' tó yëkkuö i' kit Timoteo a. I' ètökicha Pablo wötënewà kuà'ki. Kewe ie' bak wötëule iwák u a. I' ètökicha ie' wötënewà ká suluë ena sesëë ese a. Ñies ie' monewà tabechka kicha wa. Ie' wà ijcher tó e' dör ie' kanè bata, e' kuëki yëkkuö i' kit ie' tó Timoteo a. I' es ie' tó ikit. Et: Pablo ittse' tó ie' atë ekörla e' kuëki ie' siánewà. Wëpa kiè Figelo ena Hermógenes dör ie' wapiepa e'pa tó ie' méat. Ñies wëm kiè Demas e' ena imalepa skà tó ie' méat. E' kuëki ie' kí ikiane tó Timoteo bitu bet ie' kímuk.

Böt: Jesús mik erblökwakpa we'ikeke siarë Roma blú ñe' tó, e' kí Pablo tkirke tajë. E' kuëki ie' tó Timoteo patté tajë tó ie' kawötà e' tkökwa darërë Jesús tté a. Ñies ie' tó Timoteo a ichè tó ie' kawötà Jesús tté buaë e' kí wa s'wöbla'uk. E' kí- età ie' tó Timoteo a ichè tó ie' kawötà e' chöktke weinuk Jesús tté buaë kuëki.

Yëkkuö i' tó se' a ikkachè tó wës se' kawötà senuk Jesús a. Ñies se' a ichèitö tó se' kawötà e' chök weinuk Jesús mik erblë kuëki. Welepa tó ibikeitsë tó i' dör yëkkuö bata kit Pablo tó e'.

### Shkëwë

**1** Ye' dör Pablo. Skëköl wák er wa ye' dör Cristo Jesús ttekölpa tsá, e'pa

eköl. Ie' kablé sene michoë muk wépa batsulewà Cristo Jesús mik esepa a, e' tté pakök ye' patkë'itö. <sup>2</sup>A Timoteo, ye' tso' yëkkuö i' shtök be' a. Be' dalër tajë ye' éna wës ye' wák alà es. Skëköl dör S'yé ena Skëképa Cristo Jesús, as e'pa er buaë chö be' a ena be' saù er siarë wa ñies sene bèrë mù be' a.

### Pablo wëstela ché Skëköl a Timoteo dalërmik

<sup>3</sup>Skëköl dalöieke ye' tó erbikë maneneë wa wës ye' yépa bak ká iaiaë idalöiök es. Kekraë mik ye' ttöke ie' ta ñië nañëë, età ye' er arke be' ska' ta wëstela chekeyö be' dalërmik. <sup>4</sup>Mik ye' minea, età be' i' siarë. Mik e' anewà ye' éna, età ttsësquia ye' mú be' suène as ye' ttsërne buaë. <sup>5</sup>Ñies ye' éna iane tó be' erblöke Jesús mik er mokí wa. Ye' wà ijcher buaë tó be' erblöke Skëköl mik wës be' wí'kela Loida ena be' mì Eunice e'pa erblë imik kewe be' yöki es.

### Kè be' jaënuK Jesús tté buaë pakök

<sup>6</sup>E' kuëki i me' Skëköl tó be' a kanebloie ie' a mik ye' ulà me'ka be' kí età, e' kè oló'yar, e' kí wakaneü bua'iewà. <sup>7</sup>Skëköl kè wà se' a iWíköl mène as se' suar. E' skéie iWíköl tó se' a diché mé senoie yësyësë ie' a, ñi dalëritsoie, ñies erbikoie buaë yësyësë. E' kuëki be' kanebló Skëköl a kè suarta'. <sup>8</sup>Kè be' jaënuK Skëképa Jesús tté buaë pakök. Ñies ye' tso' wötëule Jesús tté pakë kuëki, e' kè kí be' jaënuK. E' skéie ye' tó be' a ichè tó be' e' chö se' weirke Jesús tté kuëki e' dalé'ttsök ye' ta Skëköl diché wa.

<sup>9</sup>Skëköl wák tó se' tsatkë'ttsa ñies ie' tó se' klög' senuk batse'r ie' a. E' kè dör tó se' tó i' buaë wé ie' a e' skéie. E' dör tó ie' wák tó ibikeitsé es ta iwawéitö,

ie' er buaë chë se' a, e' kuëki.

Kam ká i' yör e' yöki ie' tó ibikeits

tö ie' er buaë chöraë se' a Cristo Jesús batamik.

<sup>10</sup> Cristo Jesús dör S'tsatkökwaq e' dë'rö ká i' a

se' a ikkachök tö Skëköl er buaë ché se' a.

Ie' kötëwä shkenekane, e' wa ie' tö iwä kkaché

tö ie' e' aléka duëwä ki.

Ie' tté buaë e' tö se' a ikkacheke

tö se' kè duòpawä da'a,

e' skéie sene michoë döraë se' ulä a

ie' tté buaë e' batamik.

<sup>11</sup> Tté buaë e' wä pakök ena s'wöbla'uk iwa Skëköl tö ye' klö' Jesús ttekölpa tsá e'pa ekölie. <sup>12</sup> E' kuëki eré ye' weirke, eré ye' kè jaëne e' ki. Yi mik ye' erblöke, e' mik ye' bätse buaë, e' dör Jesús. Ye' wä ijcher buaë tö kanë me' Skëköl tö ye' a e' kkö'neraë ie' wák tö dò mik Skëképa Jesús datskene etä. E' kuëki ye' kè jaëne weinuk ie' dalërmik.

<sup>13</sup> Tté yësyësë wa ye' tö be' wöbla' e' wä iutó. Be' e' tkówä darërëë erblök Jesús è mik. Nies s'malepa dalëritsó Cristo Jesús batamik. <sup>14</sup> Tté mokïë mène be' a, e' wä kkö'nú buaë Wiköl Batse'r tso' se' a e' wa as kè yi tö imane'üttsä.

<sup>15</sup> Be' wä ijcher buaë tö s'yamipa serke Asia, e'pa sërää iekkë tä ye' watëttsä, e'pa böi kië Figelo ena Hermógenes.

<sup>16</sup> Erë Onesíforo kè jaëne ye' tso' wötëule e' ki. Kekräë ie' tso' ye' er pablök. As Skëképa Jesús tö ie' ena iyamipa saü er siarë wa. <sup>17</sup> Mik ie' de íe Roma, etä ie' tö ye' yulé poë tä ye' wakuéitö. <sup>18</sup> Skëképa Jesús datskene, mik e' këwö de etä as ie' tö Onesíforo saü er siarë wa. Be' wä ijcher buaë tö wekkë ie' tö se' kime' Éfeso.

**Be' weirke Jesús ttë kuëki e' dalë'ttsó**

**2** A Timoteo, be' dör ye' aläie, Skëköl er buaë chö se' a Cristo Jesús batamik, e' mik be' e' diché ió. <sup>2</sup> Wëpa ttö mokïë dirmi buaë s'wöbla'uk esepa

yuló tä ì yë'yö s'yamipa taië e' kukua, ttsë' be' tö ese wa ie'pa wöbla'ü as ie'pa tö s'malepa wöbla'ü iwa.

<sup>3</sup> Se' weirke Cristo Jesús ttë kuëki, ese dalë'ttsó darërëë wës nippökwaq buaë tö iweirke qos e' dalë'ttseke es. <sup>4</sup> Mik nippökwaqpa tso' ikanë a, etä ie'pa kè ku' e' tiük ì ku'ki a as iwër buaë iwökir wa.

<sup>5</sup> Es nies wëpa inukë esepa kawötä ittë iutök buaë. Kè iwä iutëne, e' tä kè e' alòpaka. <sup>6</sup> Wëpa kanëblöke darërëé íyi k- atkök, esepa ulä a iyiwö tsá döraë kewë. <sup>7</sup> Ì cheke ye' tö be' a ttë i' wa, e' wä bikeit- só buaë tä Skëképa Jesús tö be' kimeráë as be' éna iwä qos ar buaë.

<sup>8</sup> Be' tö Jesucristo bikeitsó me'rie. Ie' dör se' blú bak ká íaiäë kië David e' aleri. Cristo kötëwä shkenekane, e' tté buaë pakeke ye' tö. <sup>9</sup> Tté buaë e' kuëki ye' weirke siarë. Ye' tso' wötëulewä moule- wä s'wöto wé a wës pè' sulusipa es. Erë Skëköl ttë e' kè ku' wötëulewä. <sup>10</sup> E' kuëki ye' tö ì qos dalë'ttseke wëpa shukitbak Skëköl tö esepa kimoie as ie'pa tsatkër ena olo yöbië dò ie'pa ulä a Cristo Jesús batamik.

<sup>11</sup> Tté i' dör yësyësë:

Se' bätsewä Cristo kötëwä, e' tä nita, e' tä se' ser michoë ie' tä nita.

<sup>12</sup> Se' weirke Cristo dalërmik, e' dalë'ttsésö,

e' tä nies se' döraë s'wökirpaie ie' tä nita. Se' tö iché s'malepa a tö se' kè dör Cristo icha,

e' tä nies ie' tö icheraë aishkuö tä tö se' kè dör ie' icha.

<sup>13</sup> Ie' wák kè a e' watënik, e' kuëki eré se' tö ie' watëmittsä, erë ie' kè tö se' watepattsä.

**Be' kanëbló as be' wër buaë Skëköl wa**

<sup>14</sup> Be' tö ttë ekkëpa chó ie'pa a as ie'pa er arne iska' kekraë. Ie'pa pattó Skëköl wörki tö a' kè kàne nì wötkök nìe ttë èse ki. E' kè dör iie bua'. E' tö wëpa tso' ittök esepa sulu'wekewa. <sup>15</sup> Be' e' chó

kaneblök Skëköl a buaë as ie' wa be' wër buaë. S'wöbla'ú yësyësë ttë mokijë e' wa, kè shiliwar shilitshilit as be' kè jaërka be' kanë kî. <sup>16</sup>Kapakë kè dör Skëköl dalöioie, kè wà ta', ttë ese kos yöki be' e' skóttsa. Ttë ese tó se' wëttsëmi ì sulu è a, kè tó Skëköl ttë iütëia. <sup>17</sup>Ttë ese tó s'sulu'wëwami wës smewö tó s'katë es. Wëpa bøl kië Himeneo ena Fileto e'pa s'wöbla'weke kache tté wa. <sup>18</sup>Ie'pa tó ttë mokijë watëttsa. Ie'pa tó s'wöbla'weke kache tté wa. Ie'pa tó icheke tó mik se' wöskué, etä e' dör wës se' wiköl du'wa shkenekänetke Skëköl a es. E' kueki mik se' duowa, etä se' nu kè shkerpakane aishkuö ta. Ttë e' wa ie'pa tso' welepa er sulu'uk ta kè ierblöiarak Jesús mik. <sup>19</sup>Ie'pa tó s'wöbla'weke kache tté wa, erë Skëköl ttë dör mokijë e' kè manerta', e' kè wötirta' wës ak blublüë kè wötirta' es. Itso' kitule Skëköl yëkkuö kî, e' tó ichë: "Wépa dör Skëköl icha, esepa suule ie' wa buaë." Nies e' tó ichë: "Wépa iché tó ie'pa dör Skëköl icha, esepa kawöta ì sulu kos wamblekerakitö e' olo'yök."

<sup>20</sup>Inuköl blu' u a tka' tso' daklilië welepa yöule orochka wa, inukölchka wa, ese dör tka' bua'buwa ikawö tkö'uke buaë ese tkéie. Nies u e' a tka' èse tso' yöule skauçhka wa, nies kal yöule tka'ie ese dör tka' èse. <sup>21</sup>Es se' dör. Se' e' kkö'nuke ì sulu ñe' yöki, e' ta se' dòmi wës tka' bua'buwa maneneë es, batse'oule, dör buaë se' Blú a iyi ulitaneie tso'tke ì kos buaë ese woie ie' a.

<sup>22</sup>Ì sulu wamblak duladulapa éna, ese kos yöki be' tkóshkar. E' skéie be' e' chó senuk yësyësë. Be' kî erbló Jesús mik. S'malepa dalëritsó. Nies be' senú bèrë sulitane ta. E' kos yuló s'malepa tó Skëképa chakë er maneneë wa esepa kos ta nita. <sup>23</sup>Ttë kè wà ta', ese kabewëkerakitö, e' kè iutar be' tó. Be' wa ijcher buaë tó ttë ese tó sulu se' ké ñippök. <sup>24</sup>Skëképa Jesús kanë méso kè kawöta e' tiuk ñippë a. E' skéie ese ké senuk bèrë

sulitane ta. Ese a s'wöblarmi buaë Skëköl ttë wa, sulitane dalëttsekeitö er bua' wa. <sup>25</sup>Wépa kè éna ttë mokijë iütak, esepa kawöta shulëitö er bua' wa, isalema wekkë alë ta ie'pa er mane'umi Skëköl a ta iyörmine ttë mokijë wa. <sup>26</sup>Ie'pa er mane'wéne, e' ta es éme ie'pa tkómishkar bé ulá a. Ie' wa ie'pa tso' klöulewa wës dúla klöulewa sho' a es as ie'pa e' wamblö wës ie' kî ikiane es.

### Mik ká i' erkewa, etä s'ditsö e' wamblöraë suluë

**3** Be' kawöta wa ijchenuk tó mik ká i' erkewatke, etä kawö suluë datse taië s'ki. <sup>2</sup>Pë' wák è e' dalëritsöraë. Ie'pa er murawa inuköl kî. Ie'pa e' ttsöraka taië, kè tkirpa yi skà kî. Ie'pa ñi chöraë suluë. Iyé ena imì, e'pa ttò kè iüteparakitö. Ie'pa er suluë, kè wëstela chepa yi a. Ie'pa kè tó Skëköl dalöiepa. <sup>3</sup>Kè er ttsërpa buaë yi kî, kè er buarpane yi kî. Ie'pa biyöblöraë taië. Ì sulu datse ie'pa er a, ese wà wambleraë ie'pa tó. Ie'pa tó s'we'ikeraë siarë. Ì buaë kos sueraë suluë ie'pa tó. <sup>4</sup>Iyi sulu wambleraë akirie, iyi wambleraë kè ulé klöule. Ie'pa e' ttsöraka taië shütë. Skëköl kè dalëritsepaitö, e' skéie ì tso' ká i' a s'ttsë'weke buaë, ese è wa ie'pa wöbatsöraë taië. <sup>5</sup>Ie'pa e' ò tó mokijë Skëköl dalöiekerakitö, erë wës ie' wamblörak e' wa iwënewa tó e' dör kache.

Esepa yöki be' e' kkö'nú. <sup>6</sup>Wépa esepa welepa micho u èt u èt ta iwachekerakitö tó itso' s'pattök, erë e' dör kache. Ie'pa tso' alakölpa kitër tottola esepa dakijnuk. Alakölpa esepa tso' klöulewa ì sulu wamblekerakitö ese ulá a. Ì sulu wa ie'pa wöbatsö, ese tó ie'pa erkiöweke taië. <sup>7</sup>Ie'pa e' yuak ttë kuakî wa mir-mir kekraë, erë Skëköl ttë mokijë kè ska' ie'pa er dë'. <sup>8</sup>Ie'pa esepa tó Skëköl ttë mokijë cheke suluë wës ká iaië Janes ena Jambrés tó Moisés yé' suluë Skëköl ttë kueki es. Ie'pa kè a kabikeitsia buaë.

Ie'pa kè erblöku'ia mokië Jesús mik. <sup>9</sup> Erë ì wambleke ie'pa tö, ese wà kè kî ká dõpa taië. Bet ta sulitane wa ijcherdawa tö ie'pa ttè e' kè wà ta' wes ibak ká iaiaë Janes ena Jambrés e'pa ta es.

### Pablo tö Timoteo bata patté

<sup>10</sup> Erë ttè wa ye' s'wöbla'weke e' jcher buaë be' wa. Nies wes ye' ser, ì kiane ye' kî, wes ye' erblö Jesús mik, wes ye' tö s'dalë'ttseke er bua' wa, wes ye' tö s'dalëritseke, wes ye' weine e' kos dalë'ttsë'yö, e' kos jcher buaë be' wa. <sup>11</sup> Wes ye' yë'bak suluë pë' tö, wes ie'pa tö ye' we'ik siarë Antioquia ena Iconio ena Litra, e' kos suule buaë be' wa. Ye' weinebak taië siarë erë Skëkëpa Jesús tö ye' tsatkë' e' kos yöki. <sup>12</sup> Ttè i' dör moki: yi senak yësyësë wes Cristo Jesús kî ikiane es, esepa kos weirdaë siarë ie' ttè kî. <sup>13</sup> Erë pë' sulusipa ena s'kitö'ukwakpa esepa kî e' wamblöraë suluë shute, s'kitö'uk ena e' kitö'uk.

<sup>14</sup> Erë be' e' tkówa darërëë kekraë ttè wa be' wöblaone e' a. Ttè e' dör moki e' jcher yësyësë be' wa. Wépa tö be' wöbla' iwa e'pa suule bua' be' wa, e' kueki be' e' tkówaia kekraë. <sup>15</sup> Es nies, mik be' ia alala, etä Skëköl yëkkuö batse'r e' suule be' wa, e' a be' talane. Ttè e' tö be' a ikkachëmi tö Skëköl tö se' tsatkëmi se' erblé Cristo Jesús mik e' batamik. <sup>16</sup> Skëköl yëkkuö kos, e' kitule yësyësë wes ie' wák tö ibikeits es. E' dör buaë se' a s'wöbla'woie, s'wöuñoie, s'shuloie, nies ikkachoie se' a wes seneke yësyësë <sup>17</sup> as wépa dör Skëköl icha, esepa yör buaë da'äie tso'tke ì buaë kos ese uk.

**4** Cristo Jesús datskene s'blüie ká i' a olo ta' taië s'blërulunebak kos ena s'tso' ttsë'ka kos esepa shulök. Ie' wöa ena Skëköl wöa, ye' tö be' a ichè tö be' ké <sup>2</sup> ie' ttè buaë pakök kröröë, be' éna ipakak ö be' kè éna ipakak, erë ipakó kekraë. S'shuló, s'uñú, s'pattó, s'wöbla'ü enaë er bua' wa. <sup>3</sup> Kawö datse etä pë'

kè tö Jesús ttè moki e' ttsepaia. E' skéie s'wöbla'ukwakpa yuleke ie'pa tö taië ie'pa wöbla'woie ttè wése ttsak ie'pa éna ese è wa. <sup>4</sup> Ttè mokië e' waterattsarak-itö ta kapakè èse kos ese klö'werakitö. <sup>5</sup> Erë be' e' tkówa darërëë. Be' erbikó buaë yësyësë. Kos be' weirke e' dalë'ttsó buaë. Jesús ttè buaë pakó. Kanè kos me'at Skëköl tö be' a, e' wakaneü er bua' wa.

<sup>6</sup> Ye' duökewa, e' këwö dökewatke. Ye' a ta e' dör wes íyi mekesö Skëköl a idalöioie es. <sup>7</sup> Ye' e' tkéwa darërëë kanè me' Skëköl tö ye' a e' a, e' wawéyö buaë, ye' e' batseitsë iwawoie kekraë. <sup>8</sup> E' kueki sene yësyësë ské, e' tso' blëule ye' a. Mik ikéwö de, etä imeraë ye' a Skëkëpa Jesús dör s'shulökwak yësyësë e' tö. Kè dör ye' è a, nies e' dör wépa éna ie' dalër taië ena itso'rak ie' datskene olo ta' taië e' panuk esepa kos a.

### Pablo ttè bata ché Timoteo a

<sup>9-11</sup> Demas tö ye' méat, ì tso' ká i' kî e' dalërmik ta imía Tesalónica. Nies Crescente mía Galacia ena Tito mía Dalma-cia. Lucas è ate ye' ta. E' kueki be' shkó bet ye' weblök, kè be' e' wöklö'uk ì wa. Marcos yuló ta ikióbitü e' ta. Ye' kî ie' kiane e' kímuk ye' kanè wa. <sup>12</sup> Tíquico patkëmiyö Éfeso. <sup>13</sup> Be' we'ikëyö, mik be' datse, etä ye' paio kikküö me'atyö Tróade Carpo u a, e' tsúbitü ña. Nies ye' yëkkuö me'at tseë, e' shua wele tso', e' dör iyiwak kkuölit yöule yëkkuoie, ese kos kiane ye' kî, ttè bua'iewa tso' kitule ikî e' kueki, e' kos tsúbitü ña.

<sup>14</sup> Alejandro dör íyi yuök'wak tabechka wa, e' e' wamblé suluë ye' ta. Skëkëpa Jesús tö ie' patueraë wes ie' e' wamblé es. <sup>15</sup> Ttè buaë pakekesö e' ché ie' tö suluë. E' kueki be' e' kkönú ie' yöki nies.

<sup>16</sup> Ye' tsá mine shulë s'wökirpa ska' etä kè yi dé' ye' kímuk. Sulitane tö ye' méat ekörla. Skëköl mú kè tö ie'pa we'ikè e' kî. <sup>17</sup> Erë Skëkëpa Jesús tö ye' kímé, ie'



tö ye' a idiché mé as ye' tö S'tsatkōkwak tté pakò sulitane tso' ee, kè dör judiowak, e'pa kukua. Es Skëkëpa Jesús tö ye' tsatkée ye' bolökpa éna ye' ttakwa e'pa ulà a. <sup>18</sup>Ñies ie' tö ye' yerattsà ì sulu kos e' ulà a. Ie' tö ye' tserami ká jai a wé ie' tkër s'blúie ee, es ye' tsatkeräitö. ¡Ie' kíkōkāsö taië kekraë! Es e' idir.

### Pablo e' chéat

<sup>19</sup>Prisca ena Áquila ena Onesíforo yamipa, e'pa shke'ú ña. <sup>20</sup>Erasto e'

tséat Corinto. Tróximo kirirke, e' me'atyö Mileto. <sup>21</sup>Be' mú bitu kam tskiridiö döwa e' yöki. Eubolo, Pudente, Lino, Claudia ena s'yamipa kos tso' íerö e'pa tö be' shke'wémi.

<sup>22</sup>As Skëkëpa Jesucristo tso'ie be' ta. As Skëköl er buaë chò a' ulitane a taië.

## Yëkkuö kit Pablo tö Tito a

### Tito

Mik Pablo bak klöulewä Roma e' yënettsa, etä yëkkuö i' kititö Tito a duas dabom teryök kī mañal ena teryök kī skel Jesús kune'bak e' ukuökī (63-65 DC) e' ulatök. S'wä ijcher tö Tito erblë' Jesús mik Pablo ttò wa. E' ukuökī tã ie' kaneblé Pablo ena Timoteo e'pa tã ñita. Mik Pablo tsá bak klöulewä e' yënettsa etä ie' kaneblé Tito tã kánane blubluë tso' dayë kiè Mediterráneo e' a e' et kiè Creta ee. E' ukuökī tã Pablo mineä bánet tã ie' tö Tito méat e' skéie. Pablo ena Tito bak senuk e' kéwö ska' tã Creta wakpa bak senuk suluë. E' kuëkī Pablo tö yëkkuö i' kit Tito a ipattoie tö se' wése kawötã shushtë Jesús mik erblökwakpa wökirpaie ena ikimukwakpaie.

Ñies Pablo tö ie' patté tö wes ie' tö wépa kè kī Jesús tté buaë kiane, esepa wöklö'wëmi. E' kīie tã Pablo tö ie' a ichè tö s'wöbla'ukwakpa kache tté wa esepa döraë s'kītö'uk.

### Shke'wè

**1** Ye' dör Pablo. Ye' dör Skököl kanè méso. Ñies ye' dör Jesucristo ttekölpa tsá e'pa eköl. Ie' tö ye' patkë' wépa shukitbakitö, esepa kimuk as ikī erblörak bua'ie ie' mik ena siwä' moki e' kī wä ar buaë ie'pa éna. <sup>2</sup>Es ie'pa ser michoë aishkuö tã Skököl tã, e' wä paneke ie'pa tö kröröë. Skököl kè kachö tã'. Kam ká i' yör e' yöki ie' kablë' sene michoë muk se' a. <sup>3</sup>Mik kéwö me'bakitö e' de, etä ie' tö Jesucristo tté buaë e' wä kkaché sulitane a. Tté e' wä pakök ye' ka' Skököl dör S'tsatkökwak e' tö. <sup>4</sup>A Tito, ye' tso' yëkkuö i' shtök be' a. Tté mik se' böi erblöke e' wa be' dör wes ye' alà chök es. Skököl dör S'yé ena

Jesucristo dör S'tsatkökwak, as e'pa er buaë chò ena sene bèrè mù be' a.

### Wes Skökëpa Jesús ichapa wökirpa ké senuk

<sup>5</sup>Ye' tö be' méat Creta, kanè kianeia wè, e' eukwa. Ñies ye' tö be' méat ee as be' tö wépa tkökã Skökëpa icha wökirpaie wé itsorak erule erule ee Creta kos a wes ye' tö be' a iyë' es. <sup>6</sup>Wépa serke yësyësë, kè yi tö ì sulu kuëpa ie'pa kī ikkatoie, esepa yuló. Esepa ké alaköl tsukwã eköl è, e' dalöiök taië. Esepa ala'r kos ké erblök Jesús mik buaë, kè kkatënuk ì kī. Esepa ala'r ké ie'pa ttò dalöiök buaë. Wépa esepa tkökã be' tö Skökëpa Jesús icha erule erule wökirpaie. <sup>7</sup>Skökëpa icha erule erule e'pa wökirpa dör wes Skököl kanè kuëblupa es. E' kuëkī esepa ké senuk yësyësë, kè yi tö ì sulu kuëpa ie'pa kī ikkatoie. Esepa kè e' ttsö tö ie'pa è wä íyi jcher taië sulitane tsatã. Esepa kè dör kësikie, kè e' ttötã'ka blo' wa. Esepa kè kane ñippök yi tã. Esepa kè kane inuköl klö'uk kache wa s'kītö'wè wa. <sup>8</sup>E' skéie ie'pa ké s'yamipa datse ie'pa pakök, esepa kiökwa er bua' wa. Esepa tse'r buaë ì buaë kos e' uk. Esepa ké erbikök buaë, senuk yësyësë ena batse'r ena e' kkö'nuK. <sup>9</sup>Jesús tté yësyësë wa ie'pa wöblaoule, e' a ie'pa ké e' tkök-wä darërë, kè kane ilo'yök. Es esepa tö s'malepa kimëmi Jesús tté moki wa. Ñies wépa tö tté moki cheke suluë, esepa a ikkayërmi tö wes ie'pa tö ibikeitseke, e' dör suluë.

### S'wöbla'ukwakpa kache tté wa

<sup>10</sup>Jesús mik erblökwakpa serke Creta e'pa shua taië s'tso' kè éna Jesús tté moki e' iütak. Ie'pa esepa kibiiepa dör judiowak tö s'wöbla'weke tö Jesús mik erblökwakpa kawötã senuk wes judiowak ser es. Tté pakeke ie'pa tö, e' kè wä tã'. Ie'pa tö s'kītö'weke. <sup>11</sup>Ie'pa mir u èt u èt s'wöbla'uk kache tté wa, es

ie'pa tò u wákpa wélepa tso', e' kos wöa kachöwekewa kache tté wa. Ie'pa tò s'wöbla'wéke es inuköl è klö'woie. E' kueki ie'pa esepa kawötä wökl'wè.

<sup>12</sup> Ká iaiaë wëm bak eköl Creta e' wa iyi jcher taië, ie' tò iwakpa ye' i' es: "Creta wakpa kachö taië kekraë. Ie'pa dör wes iyiwak kañiru es, ie'pa bikër taië, chkö taië." <sup>13</sup> Ì yè' ie' tò, e' yène, e' kueki ie'pa unü darërëë as ie'pa tò ttè mik se' erblöke e' iütò yësyësë. <sup>14</sup> Es ie'pa tò judiowak tò kache ttè pakeke kè wà ta', ese kè iütepaia. Es ñies wépa tò ttè mokië e' watéttsa, esepa ttè dalöiëno kè dalöiepaia ie'pa tò. <sup>15</sup> Wépa er maneneë, esepa a ì kos dör maneneë. Erë wépa er suluë, kè erblö Jesús mik, esepa a kè ì dör maneneë. Ie'pa er ena ie'pa erbikè dör suluë. <sup>16</sup> Ie'pa e' chò tò ie'pa bàtse buaë Skëköl mik, erë wes iserdak sulu, e' wa iwënewa tò e' dör kache. Ie'pa dör suluë ichók, kè tò Skëköl ttò dalöierak, kè iarak ì buaë or yës.

### Wes se' kawötä senuk Skëköl a

**2** Erë be' ké s'wöbla'uk kekraë Jesucristo ttè moki wa. <sup>2</sup> Wépa kékëpatke, esepa wöbla'ú tò ie'pa ké e' kkö'nuk sene sulu yöki. Ie'pa ké senuk buaë yësyësë as sulitane tò idalöiö. Ie'pa ké erbikök buaë yësyësë. Ie'pa ké e' tkökwa darërëë ttè mik se' erblöke e' a. Ie'pa ké s'dalëritsök mokië ena ì kos dalë'ttsök er bua' wa. <sup>3</sup> Es ñies tayëpa kékëpatke, esepa wöbla'ú senuk Skëköl dalöie a. Ie'pa kè kàne blo' kukueblökwa. Ie'pa kè kàne biyöblök. E' skéie ie'pa ké s'wöbla'uk senuk buaë. <sup>4</sup> Ie'pa ké tayëpa wöbla'uk tò ikawötä imaso ena ila'rla e'pa dalëritsök buaë. <sup>5</sup> Ie'pa ké erbikök yësyësë. Ie'pa ké senuk kè trërta'. Ie'pa ké iu kanëuk buaë. Ñies ie'pa ké iwëm dalöiök buaë as kè yi tò Skëköl ttè chò suluë.

<sup>6</sup> Ñies duladulapa pattó tò ie'pa ké e' kkö'nuk sene suluë kos yöki. <sup>7-8</sup> Be'

senü yësyësë ie'pa wörki as ie'pa ser wes be' ser es. Mik be' tso' ie'pa wöbla'uk, etä iwöbla'ú yësyësë er moki wa Skëköl dalöioie, es kè yi a ì sulu yërpa be' ki. Es be' bolökpa kè a ì sulu kunuk be' ki, e' kueki ie'pa jaërdaka se' ki.

<sup>9</sup> S'tso' klöulewa kanè mésoie, esepa pattó tò ie'pa ké iwökirpa ttò kos e' iütök er bua' wa as iwërdak buaë iwökirpa wa. Ie'pa kè kàne iwökirpa iütök kësik wa. <sup>10</sup> Ie'pa kè kàne iwökirpa iyi ekiblök, e' skéie ie'pa ké ì kos wekerakitö e' uk buaë yësyësë iwà kkachöie ì kos wa tò Skëköl dör S'tsatkökwa, e' ttè dör buaë.

<sup>11</sup> Skëköl tò s'tsatkè, e' watkekeitö suli-tane a. Es ie' tò se' a iwà kkacheke tò ie' er buaë ché se' a. <sup>12</sup> Mik se' éna iane tò kos Skëköl er buaë ché se' a, etä kè se' éna ì sulu wamblakia wes wépa kè tò ie' dalöië esepa es. Ie'pa er me'rie ì suluë è ki. E' skéie se' erbikak buaë. Se' senak yësyësë ena batse'r ie' a wes ie' ki ikiane es, se' serkeia ká i' ki e' dalewa. <sup>13</sup> Se' tso'ia ká i' ki etä se' tso' Jesucristo datskene olo ta' taië, e' panuk, e' tò se' ttsë'wéke buaë. Ie' dör S'tsatkökwa, ie' dör Se' Këköl taië e'. <sup>14</sup> Ie' e' me'ttsa ttëwa se' skéie se' yottsaië ì sulu kos e' ulà a, ñies se' er paikloie manene. Es se' de ie' wák a, es se' er de ì buaë uk kekraë.

<sup>15</sup> A Tito, ttè e' chò ie'pa a, ie'pa pattó, ie'pa unü diché wa. Es kè yi tò be' watepattsa.

### Wes Jesús mik erblökwa kpa ulitane kawötä senuk

**3** A Tito, iskà chöne ie'pa a tò ká wökirpa ena s'shkëkipa, e'pa dalöiö, ie'pa ttè iütó. Ichó ie'pa a tò a' tso' erki ì buaë kos e' woie. <sup>2</sup> Ie'pa kè kàne yi chök suluë; ie'pa ké senuk bèrë, sulitane a er buaë chök. Ie'pa ké sulitane sauk er bua' wa.

<sup>3</sup> Se' bak senuk suluë, kè kabikeitsöta' buaë, kè Skëköl ttè iüteta'. Se' bak senuk kitöqule; se' bak klöulewa ì sulu ulà a. Ì

sulu kiane se' k<sub>i</sub> wamblè, ese è wamblök se' bak. Ì sulu tò se' ttsë'wëke buaë, ese è wamblök se' bak. Se' bak senuk ì sulu è a. Se' bak ukyënu<sub>k</sub> ñi k<sub>i</sub>. Se' sa<sub>u</sub>k suluë s'malepa bak, ñies ie'pa sa<sub>u</sub>k suluë se' bak. <sup>4</sup>Erë Skëköl dör S'tsatkök<sub>w</sub>ak, e' er buaë ché sulitane a, ie' éna se' dalër tajë, e' kkachéitö se' a Jesucristo wa. <sup>5</sup>Ie' tò se' tsatké ie' wák er wa, kè dör tò se' serke yësyësë e' kuek<sub>i</sub>. Ie' se' sué er siarë wa, e' è kuek<sub>i</sub> ie' tò se' tsatké. Skëköl tò Wiköl Bats'e'r mé senuk se' a, e' tò se' er paiklé mane'wé yué pa'al<sub>i</sub>. Sene pa'al<sub>i</sub> méitö se' a. <sup>6</sup>Skëköl tò iWiköl mé se' a tajë Jesucristo dör S'tsatkök<sub>w</sub>ak, e' batamik. <sup>7</sup>Skëköl tò se' klö'wé wes pë buaë yësyësë es ie' wöa, ie' er buaë ché se' a, e' kuek<sub>i</sub>. Ie' tò iwé es as se' ser michoë ie' ta. E' wà paneke se' tò kröröë, ttsë'ne buaë wa. E' kos kuek<sub>i</sub> ie'pa ké senuk buaë yësyësë Skëköl a.

<sup>8</sup>Ttè ikkë dör yësyësë. Ye' k<sub>i</sub> ikiane tò be' tò ttè ikkë wa s'k<sub>i</sub> wöbla'wë tajë buaë as wépa erblöke Skëköl mik, esepa tso'ie ì buaë uk. Íyi ikkë dör buaë sulitane a s'kimoie buaë. <sup>9</sup>Erë be' e' skótt<sub>s</sub>a ttè tò suluë s'blabatsélor ñi yök<sub>i</sub> ese kos yök<sub>i</sub>. Pë' wëlepa éna s'bak ká iaiaë, esepa dit-sëwö ese ttè pakak kekraë, esepa yök<sub>i</sub> be'

e' skó. Ñies pë' wëlepa ñi uñuke kësik wa kekraë ttè dalöiëno mène Moisés a e' k<sub>i</sub>, esepa yök<sub>i</sub> be' e' skó ñies. Ñi uñë esepa kos kè wà ta', kè dör ñie bua', kè a s'kimer ì wa. <sup>10</sup>Yi tò Jesús mik erblök-wakpa blabatsélor, ese wöuñú darërëë etökicha bötökicha. Kè itö iütë, etä ie' uyótt<sub>s</sub>a a' shua. <sup>11</sup>Be' wa ijcher buaë tò pë' ese er sulu'wëwa ì sulu tò. Ì sulu wambléitö, ese tò ikichatëttsatke.

### Ttè bata yëne Tito a

<sup>12</sup>Artemas ö Tíquico, e' eköl patkekeyö be' ska'. Mik ie' de, etä be' kawö yött<sub>s</sub>a ta be' shkó kröröë Nicópolis wé ye' tso' ee. Eë ye' tò ibikeitsétke tskiridiö tkö'uk. <sup>13</sup>Zenas dör s'shulök<sub>w</sub>ak ena Apolo, e'pa kimú buaë ì kiane ie'pa k<sub>i</sub> kos e' wa, as imi'rak buaë. <sup>14</sup>Se' icha wöbla'ú buaë ì kos buaë e' uk. Ñies ie'pa wöbla'ú s'siarëpa kimuk. Es ie'pa sermi buaë Skëköl wörk<sub>i</sub>.

### Pablo e' chéat

<sup>15</sup>Ie'pa kos tso' ye' ska', e'pa tò be' shké'wémi. Wépa éna sa' dalër ttè mik se' erblöke e' dalërmik, e'pa shké'ú ña. As Skëköl er buaë chö a' ulitane a.

## Yëkkuö kit Pablo tö Filemón a

### Filemón

Pablo tö yëkkuö i' kit mik ie' bak Roma s'wöto wé a etä. E' k'éwö ska' tä ie' tö yëkkuö kit Éfeso ena Filipos ena Colosas wakpa a. Ie' tö yëkkuö i' kit iklé eköl kiè Filemón e' a. Ie' serke Colosas ee. Ie' tö kanè méso kè patueta' ese to'tsa eköl e' kiè Onésimo. E' ukuöki tä Onésimo tö ie' íyi blélur tä ibakshkarmi. E' k'éwö ska' tä akblökwakpa ttekelur. E' kuëki Onésimo bakshkarmi dò Roma. Eë Pablo tso' wötëulewä Jesús tté buaë paké kuëki. Pablo tö Onésimo a Jesús tté buaë paké tä ierblé Jesús mik. E' kuëki ie' shkakmine iwökir Filemón ska' ie' a kët kët chökne.

E' kuëki Pablo tö yëkkuö i' kit Filemón a as ie' kè ulurkä Onésimo ki. Pablo tö iché Filemón a tö Jesús éna ie' daléne taië ena ì sulu nuí tso' ie' ki e' olo'ya'itö tä iki'wä buaë. Es ñies ie' kawötä Onésimo ki inuì olo'yök tä ikiökwa wës iyami eëka es.

S'kiè Onésimo griegoie e' wà kiane ché kanenamé buaë. Erè yëkkuö i' tö ichè tö kam Onésimo tö Jesús tté klö'ù etä ie' kè dör kanenamé buaë. Es Pablo tso' ichök tö Jesús batamik Onésimo dòmi wës ikiè wà kiane ché es.

### Shké'wè

**1** A Filemón, ye' dör Pablo tso' wötëule Cristo Jesús tté paké kuëki, e' tso' yëkkuö i' shtök be' a. Ye' ena s'yami Timoteo, e'pa tö be' shké'wémi. Be' dalër taië sa' éna, ñies be' tso' kaneblök Cristo a wës sa' es. <sup>2</sup>Ñies sa' tö s'yamipa kiè Apia ena Arquipo, e'pa shké'wémi. Arquipo dör Jesucristo tté buaë e' tsatkök'wak buaë wës sa' es. Ñies Skékëpa Jesús icha erule daparke be' u a, e'pa kos shké'wémi sa' tö. <sup>3</sup>Skéköl dör S'yé ena Skékëpa Je-

sucristo, as e'pa er buaë chò ena sene bèrè mù a' a.

### Pablo tö wéstela ché S'yé a Filemón ki

<sup>4-5</sup>Ye' tö be' tté ttsé tö be' erblöke buaë Skékëpa Jesús mik, ñies s'batse'r malepa kos dalër be' éna. E' kuëki mik ye' ttoke Skéköl tä, etä kekraë wéstela chekeyö be' dalërmik. <sup>6</sup>Tté mik se' erblöke e' a be' e' tkówa buaë s'yamipa tä ñita. Ye' tso' ikiök Skéköl a tö e' wa ì buaë kos wëmisö Cristo dalërmik, e' ar be' éna. <sup>7</sup>A yami, s'batse'r malepa kos er pableke be' tö buaë, ie'pa dalër taië be' éna. E' tö ye' ttsë'weke buaë, ttsëskua ye' er dekané.

### Pablo tö Onésimo tté ché Filemón a

<sup>8-9</sup>E' kuëki ye' tö be' a ikiè er bua' wa tö ì kiekeyö be' a, e' wà ú. Cristo tö ye' a kawö mé be' kök iük. Erè se' ñi dalër taië, e' kuëki ye' tö be' a ikieke er bua' wa. Ye' dör Pablo kékëpatke tso' wötëulewä Cristo Jesús tté paké kuëki e'. <sup>10</sup>Ye' be' a ikiè tö Onésimo saüne er bua' wa. Ie' erblé Jesús mik ye' ttò wa íe wé ye' tso' wötëule ee. E' kuëki ie' dör wës ye' alà es.

<sup>11</sup>Kuaë tä ie' bak be' wä toulettsä be' kanè mésoie kè dör iie bua' be' a, erè ñie tä ie' dör buaë be' a ñies ye' a. <sup>12</sup>Ie' dalër taië ye' éna, erè ye' tö ie' patkémine be' a. <sup>13</sup>Ye' a tä imú e' tsüat ye' tä ye' ki-moie be' skéie ye' tso'ia wötëulewä Jesús tté buaë paké kuëki e' dalewa. <sup>14</sup>Erè kè ye' éna ì wak kam be' tö ikéwö mù e' yöki. Ye' ki ikiane tö ì weke be' tö, e' übö be' wák er wa, kè dör tö ye' tö be' ké iük e' kuëki. <sup>15</sup>Isalema ie' minea be' yöki ekuölö è as idöne tso' be' tä kekraë. <sup>16</sup>Erè ie' dene e' kè dör kanè mésoie è, ie' dene be' yamiie Jesús tté wa dalër taië be' éna, e' dör buaë shütë kanè méso èse tsata. Ie' dalër taië ye' éna, erè ie' dör be' kanè méso, ñies ie' dör wës be' èl es Jesús wa. E' kuëki be' ké idalëritsök, ye' tö idalëritseke e' tsata.

<sup>17</sup> Be' tō ye' klō'wé be' yamiie Jesús mik ɛrblè e' wa, e' t̄a ie' klō'ú wēs ye' wák es. <sup>18</sup> Ie' tō ilè sulu wamblè' ö be' tō ie' ña'weke ilè kueki, et̄a ye' ña'ú iskéie. <sup>19</sup> Ye' dör Pablo tso' yëkkuö i' shtök ye' wák ulà wa, e' wák tō ie' nuì patuëraë. Kè ye' éna ichak, erë kè be' éna ichökwa tō ye' ttò wa be' tō Jesús tté klöo', e' kueki be' w̄a nuì t̄a'ia ye' a. <sup>20</sup> A yami, be' we'ikèyö, be' mú ɛr buaë chò ye' a Skëképa Jesús dalërmik. Ye' ɛr pabló Cristo batamik.

<sup>21</sup> Ye' w̄a ijcher buaë tō be' tō ye' iüteraë, e' kueki ye' tso' yëkkuö i' shtök

be' a. Ye' éna iane buaë tō ì kiéyö be' a, e' tsata be' tō iwëraë. <sup>22</sup> Ñies Skëköl mú tō kawö mè ye' a a' pakoie wēs a' tso' ie' a ikiök es. E' kueki u yuló ye' a.

### Pablo e' chéat

<sup>23</sup> Epafras tō be' shké'wémi. Ie' tso' wötéule ye' t̄a Cristo Jesús tté paké kueki. <sup>24</sup> Ñies Marcos, Aristarco, Demas ena Lucas, e'pa kaneblöke Skëköl a ye' t̄a, e'pa tō be' shké'wémi ñies. <sup>25</sup> As Skëképa Jesucristo ɛr buaë chò be' a.

## Yëkkuö kitule hebreowak a

### Hebreos

Yëkkuö i' kite Israel aleripa erblé Jesús mik e'pa a. Nies ie'pa kiè hebreowak ena judiowak. Kè yi wa ijcher yi tö yëkkuö i' kit. Pè' wele tö ibikeitsè tö Pablo tö ikit. Wele skà tö ichè tö Bernabé tö ikit. Wele tö ichè tö Apolo tö ikit erè kè s'wà ijcher yi tö ikit. Wele tö ibikeitsè tö ikité Roma wakpa tö Jerusalén suluo'wà e' yöki duas dabom kuryök Jesús kune'bak e' ukuöki (70 D.C.).

Israel aleripa erblé Jesús mik e' kueki e'pa bak weinuk. Ie'pa welepa éna ierblò Jesús mik e' olo'yak ta ishkakne Moisés ttè dikia. E' kueki yëkkuö i' kite ie'pa a ikimorak e' tkökwà darèrèe Jesús mik. S'kitöukwakpa tö ie'pa wöbla'weke tö Jesús kè diché ta' ie'pa kimoie, e' kueki ie'pa kawöta ie'pa erblò imik e' olo'yök. E' kueki yëkkuö i' kite Jesús mik erblök-wakpa a Jesús kkachoe ie'pa a i' es: Skököl e' kkaché se' a Jesús wa as se' éna iar buaé. Ká iaiäe ta' ie' utbitu se' ta ittekölpa wa ena ibiyöchökwakpa wa ena Moisés wa, erè bataie ta iut se' ta ilà eköl è Jesucristo e' wa.

E' kije ta ká iaiäe Skököl tö iyë'bak tö ie' kablorane Israel aleripa a. E' wà tka Jesucristo wa e' ché yëkkuö i' tö. Nies sacerdotepa tö iyiwak jcheke Jerusalén ká bit ekké judiowak nu' olo'yoie. Iyiwak jcherke e' kè diché ta' se' nu' paiklottsà da'äie. E' kueki ie'pa tö ijcheke kekraé erè e' kè dör buaé shute Skököl wöa. E' kueki Jesucristo köte'wà etökicha è se' nu' paiklottsà, e' je' dör buaé shute Skököl wöa. E' kueki Jesús dör ibua'ie. E' kueki se' kawöta erblök ie' mik ena ie' è kawöta ttò iutè. Iñeta ie' tkër Skököl

wörki se' tté chök Skököl a. Ie' dör ibua'ie e' kueki Israel aleripa erblé ie' mik e'pa kè kawöta ie' olo'yök. Ie' wa iyé tö ñala yö' se' a döka ikaska'. E' kueki se' kawöta senuk e' meulettsa weinuk erblé Jesús mik e' kueki. Se' tö ie' watettsa e' ta Skököl tö se' shuleraé wes ie' tö Israel aleripa shuli' es.

### Skököl ut se' ta' ilà wa

**1** Skököl utbitu taië se' yépa bak ká iaiäe e'pa ta ittekölpa wa. Ie' utbitu ie'pa ta taië kua'ki kua'ki. <sup>2</sup>Erè iñe ta, mik ká i' erkewatke e' kèwö ska' ta, ie' tté se' ta iwák alà patkè'itò ká i' ki e' wa. Tsawe ta ie' tö íyi ulitane yö' ilà ta ñita. Nies ie' tö ilà tkè'kabak as íyi ulitane dò ie' ulà a aishkuö ta. <sup>3</sup>Skököl Alà dör iyé olo taië e'. Wes Skököl dör e' sué ie' dör. Íyi ulitane kicha a'tser ie' wà ittè diché taië e' wa. Se' nu' paikléttisaitò e' ukuöki ta ie' tkéka ká ja' a dalöier'ta taië Skököl ulà bua'kka.

### Skököl Alà olo ta' taië shute Skököl biyöchökwakpa tsata

<sup>4</sup>E' wa iwënewa tö Skököl Alà dör Skököl biyöchökwakpa tso' ká ja' a, e'pa kos tsata. Es nies wes Skököl tö ie' kiè iwák alà, e' dör bua'iewa wes ie' tö ibiyöchökwakpa kiè e' tsata. <sup>5</sup>Skököl yëkkuö ki itso' kitule tö Skököl tö iché ilà a:

“Be' dör ye' alà;

iñe yö ikkachétke tö ye' dör be' yé.”<sup>4</sup>

Erè tté e' kè yëule ie' wà ibiyöchökwakpa isie a. Nies Skököl yëkkuö ki Skököl tö ilà tté ché i' es:

“Ye' tö icheraé tö ye' dör ie' yé,

eta' ie' dör ye' alà.”<sup>5</sup>

Erè Skököl kè wà ibiyöchökwakpa isie tté yëule es. <sup>6</sup>Nies mik ie' tö ilà eköl ème,

<sup>4</sup>1:5 Salmo 2.7

<sup>5</sup>1:5 2 Samuel 7.14; 1 Crónicas 17.13

e' patketetke ká i' a, etá ie' tò itté yè' i' es:

“Ye' biyöchökwakpa ulitane kawöta ie' dalöiök tajë.”\*\*

Ttè ekkè kos kuëki se' wá ijcher tò Skëköl Alà dör Skëköl biyöchökwakpa ulitane tsata.

<sup>7</sup>Mik Skëköl tò ibiyöchökwakpa tté cheke, etá ie' tò ichè i' es:

“Ye' tò ye' biyöchökwakpa patkeke wes siwá batsir es,

e'pa dör ye' kanè mésopa patkekeyö wes bö' wörkua wöñar es.”††

<sup>8</sup>Erè ie' tò ilà tté cheke i' es:

“jA Skëköl, be' tò s'wëttseke s'blúie e' dör yöbiè!

Be' tò s'wëttseke yësyësë.

<sup>9</sup>Sene yësyësë dalër be' éna, erè sene sulu ar suluë be' éna;

e' kuëki, ye' dör be' Këköl, e' tò be' klö'wë tá ttsë'ne buaë méyö be' a tajë be' malepa ulitane tsata.”‡‡

<sup>10</sup>Ñies Skëköl tò ilà tté cheke i' es:

“A Këköl, tsawe tá be' tò ká i' yö', ñies ká jai ena ì kos tso' iki e' yö' be' wák tò.

<sup>11-12</sup>E' kos chörawa erdawa wes datsi' nurwá tá ierwa es,

e' kos manerdattsa wes s'datsi' mane'wë tá iwötrëwá es.

Erè be' tso'tke kenet. Be' kè manerpattsa, be' ser michoë.”¶¶

<sup>13</sup>Skëköl tò iché ilà a i' es:

“Be' e' tkóser ye' ulà buakka

dò mik ye' tò be' bolökpa mérö be' klò dikia eta.”§§

Erè Skëköl kè wá ttè e' yëule ibiyöchökwakpa isie a. <sup>14</sup>Skëköl biyöchökwakpa dör wes siwá' es kè wërta'. E'pa kos kanëblöke Skëköl a. Ie' tò ie'pa patkeke

wépa tsatkërdaë, esepa kimuk. E' kuëki ie' kè wá ttè ese yëule ie'pa isie a.

**Skëköl Alà tté buaë e' kawöta dalöiè**

**2** Skëköl Alà dör íyi ulitane tsata, e' kuëki se' kè e' tkökwa darërè ie' tté buaë mokí ttsëule se' wá, e' a as kè se' mi'ne wes kanò èmi di' kí es. <sup>2</sup>Skëköl tò itté dalöiëno, e' me'atbak ibiyöchökwakpa wa se' yépa bak ká iaiäe e'pa a. Wépa kos kè wá ttè e' dalöiëne', e' nuí kí ie'pa weine wes ikawöta weinuk es. <sup>3-4</sup>Es ibak ie'pa ta, erè Skëköl Alà tté buaë, e' è wa se' tsatkërmi, e' dör tté bua'iewá ttè ulitane tsata. S'tsatko tté, e' tsá yè' Skëképa Jesús wák tò. Wépa tò ttè e' ttsë', e'pa tò iyè'ne se' a tá iwá kkachérakitò tò e' dör tté mokí. Ñies ì kè or yi a ese o' Skëköl tò ie'pa wa tajë kuá'kí kuá'kí iwá kkachöie tò ì ché ie'pa tò e' dör mokí. Ñies Wiköl Batse'r wa ie' tò imé se' a kanëbloie buaë ie' a tajë kuá'kí kuá'kí wes ie' kí ikiane es. E' wa ie' tò iwá kkaché tò ie'pa ttè dör mokí. Ttè e' wá kè dalöiëne se' wá, e' tá ¿wes se' tkómishkar inuí ulà a?

**Jesús dë'bitü se' yamiie**

<sup>5</sup>Aishkuö tá ká i' mane'werattsa ne Skëköl tò buaë pa'alí, e' chök sa' tso'. Skëköl tò ibikeitsbak tò ká pa'alí e' kè merpa ibiyöchökwakpa a as ie'pa dò iwökirpaie. <sup>6</sup>Kè idör es. Ie' tò ibikeitsbak tò imerdaë s'ditsö ulà a. E' dör wes itso' kitule Skëköl yëkuö kí es, e' tò ichè: “A' Skëköl, ¿S'ditsö dör yi? ¿Íók e' ska' be' er de?

¿Wes ie'pa kí be' tkine?

<sup>7</sup>Erè ekuölö è ie'pa yö' be' tò be' biyöchökwakpa dikia diöshet tsir.

\*\* 1:6 Deuteronomio 32.43

†† 1:7 Salmo 104.4

‡‡ 1:9 Salmo 45.6-7

¶¶ 1:11-12 Salmo 102.24-27

§§ 1:13 Salmo 110.1



Erë ie'pa yö'bö olo tã tajë dalöiërta' tajë.  
<sup>8</sup> Ie'pa tkë'ka be' tö íyi ulitane yö'bö e' wökirie.”\*

Yëkkuö e' ichë tö Skëköl tö se' tkë'ka íyi ulitane yö' ie' tö e' wökirie. “Íyi ulitane” e' wà kiane chë tö kè ì ku', e' kè ku' se' ulà a. Erë ì'ñe tã kam se' tö isa'uwa es. <sup>9</sup> Erë se' wà ijcher tö ì ché yëkkuö e' tö, e' wà tka Jesús wa. Ie' yöne s'ditsöie, e' wöanewa Skëköl biyöchökwakpa dik-ia diöshet tsir ekuölö è. Skëköl er buaë ché se' a, e' kuëki ie' tö Jesús me'tsa ttëwã sulitane nuì skéie. Jesús weine siarë kötëwã se' skéie, e' kuëki Skëköl tö ie' kika'kã tajë, tkë'ka íyi ulitane blúie dalöiërta' tajë.

<sup>10</sup> Skëköl dör íyi ulitane wì, e' kos tso' ie' wa ñies ie' a. Ie' kì ikiane tö se' tajë dör ie' ala'r esepa dò ie' tã ñitã olo tã tajë. E' wawé ie' tö Jesucristo wa. E' kuëki buaë idir ie' a tö Jesús weine kötëwã s'tsa'tkoie. Es ì kos kiane Skëköl kì tö Jesús tö iwè s'tsa'tkoie, e' wéitö seraa.

<sup>11</sup> Jesús ena se' batse'wëkeitö, e'pa Yé dör eköl è, e' dör Skëköl. E' kuëki Jesús dör Skëköl Alà, e' kè jaëne ichök tö se' dör ie' ëlpa ena ie' kutapa. <sup>12</sup> Es itso' kitule Skëköl yëkkuö kì wé ie' tö ichë Skëköl a' i' es:

“A Skëköl, ye' tö be' tté cheraë ye' ëlpa ena ye' kutapa a.

Mik ie'pa ñi dapa'uke, etã ye' tö be' kík-erakã ttsè wa ie'pa kukua.”†

<sup>13</sup> Ñies iskà tso' kitule Skëköl yëkkuö kì wé Jesús tö iché i' es:

“Ye' erblöraë Skëköl è mik.”‡

Ñies ichéitö:

“Íe ye' dur, wépa me' Skëköl tö ye' a ala'rie, e'pa tã.”¶

<sup>14-15</sup> Se' dör Jesús icha. Erë se' dör s'ditsö è. Se' ulitane serkeia tã sulu

se' suar s'duòwã yöki, e' wã se' tso' klöulewã. E' kuëki Jesús yöne s'ditsöie. Ie' dë'bitu e' muktsã ttëwã se' skéie e' alokaie bé iane s'duòwã wiie e' kì. Es ie' tö se' tsatkée, se' suar s'duòwã yöki, e' ulà a. <sup>16</sup> Iwënëwã buaë tö Jesús kè dë'bitu Skëköl biyöchökwakpa kìmuk. Ie' dë'bitu se' dör se' yé bak kã iaiaë Abraham, e' aleripa kìmuk. <sup>17</sup> E' kuëki ie' yöne s'ditsöie wes se' es as ie' dò sacerdote kibiie se' tté chök Skëköl a e' wakanewëkeitö yësyësë. Ie' dör s'ditsö wes se' es, e' kuëki ie' tö se' sueke er siarë wa. Ie' wák e' me'tsa ttëwã se' skéie as se' nuì olo'yar se' kì. <sup>18</sup> Ie' weinebak ñies ie' erkiöone ì sulu wamblök, e' kuëki ì'ñe tã wépa erkiöörke ì sulu wamblök, esepa kímermi buaë ie' a.

### Jesús dör Moisés tsata

**3** A yamipa, a' batse' Skëköl tö. Ie' tö a' klö'ñak as a' dò ie' ichaie. Jesús bikeitsó bua'ie. Se' tö ichekekã tö ie' dör Skëköl tteköl bua'ie ena se' sacerdote kibi mik se' erblöke e'. <sup>2</sup> Skëköl tö ie' tkë'ka kanëblök se' sacerdote kibiie e' wakanewéitö yësyësë wes Moisés tö, kanè me' Skëköl tö ie' a, e' wakanë' yësyësë es. Kos ì kiane wè Skëköl wé a e' o' Moisés tö yësyësë. <sup>3</sup> Erë Jesús dalöiër-tã tajë tkòkã Moisés tsata wes u wák dalöiër tkòkã u tsata es. <sup>4</sup> Se' wã ijcher tö u ulitane yué yile tö, erë Skëköl dör íyi ulitane yuökwak. <sup>5</sup> Mokì Moisés kanëblë' yësyësë Skëköl wé a ikanè mésoie. Ì o' ie' tö, e' wa ie' tö ì buaë kkachera Skëköl tö aishkuö tã Cristo wa e' klea'. <sup>6</sup> Erë Cristo dör Skëköl wák alà, e' kanëblöke yësyësë se' dör wes Skëköl wé es e'pa wökirie. Ì buaë ye' Cristo tö tö idoiã se' a, e' wã

\*2:8 Salmo 8.4-6

†2:12 Salmo 22.22

‡2:13 Isaías 8.17

¶2:13 Isaías 8.18

panekesö kröröë ttsë'ne bua' wa kè tò iloyè, e' tã mokì se' dör Skëköl icha.

**A' e' kkö'nú Skëköl kè watarttsa**

7 E' kuëki, ì ché Wiköl Batse'r tò Skëköl yëkkuö kì, e' wà iütó buaë. E' tò ichè i' es: "Ì cheke Skëköl tò e' ttsé a' tò i'ñe tã, 8 e'tã kè a' er darë'ukwã iyökì wes a' yépa bak ká iaiãë es.

Ie'pa e' ka'kã e' uk kësik kësik Skëköl wöa.

Ie'pa tò ie' wöñatké' ká sir poë wé kè yi serku' taië e' ké a.

9 Skëköl tò iché tò duas döka dabom tkëyök (40),

e' dalewa ye' tò ì kè or yi a ese wé taië ie'pa se'woie, ie'pa kkö'noie,

erë ie'pa tò ye' wöñatké' taië.

10 E' kuëki ye' ulunekã taië ie'pa kì e'tã ye' tò ie'pa ché i' es:

'Këkraë ie'pa kè kì ikiar tò ye' ie'pa wëttsè,

ie'pa kè senak wes ye' kì ikiane es.'

11 E' kuëki ye' ulunekã ie'pa kì e'tã ye' iché tò ie'pa kè döpawã wé warma ie'pa enuweke ye' tò eë."8

12 A yamipa, a' e' kkö'nú dö' a' isie er sulurwã tã a' kè erblöia Skëköl chók e' mik tã a' e' batsöttsã iyökì. 13 E' skéie a' ñi er diché ió këkraë s'tsãtkè kéwö tso'ia i'ñe tã e' dalewa. A' tò iú es as kè a' isie e' kitö'ù sene sulu wa tã a' er darërwa Skëköl yöki. 14 Se' erblö Cristo mik buaë këkraë dö ibata ekkë wes kuaë es, e' tã mokì se' tso' ie' tã. E' kuëki a' ñi er diché ió buaë. 15 Skëköl yëkkuö tò iché i' es:

"Ì cheke Skëköl tò e' ttsé a' tò i'ñe tã, e'tã kè a' er darë'ukwã iyökì wes a' yépa bak ká iaiãë es.

Ie'pa e' ka'kã e' uk kësik kësik Skëköl wöa."\*\*

16 Wépa tò Skëköl ttö ttsë' erë ie'pa e' o' ie' wöa kësik kësik, ¿e' wakpa dör yi? ¿Kè dör ie'pa ulitane yë'ttsã Skëköl tò Egipto Moisés wa, e'pa è? 17 ¿Yi kì Skëköl ulune dö duas dabom tkëyök (40)? ¿Kè dör ie'pa tò ì sulu wamblé' ká sir poë wé kè yi serku' e' a' e'pa è? E' nuí kì idurulune. 18 ¿Yi a' Skëköl tò ichétke: "A' kè döpawã wé warma a' enuweke ye' tò eë"? ¿Kè dör ie'pa tò ie' ttè dalöse'wã e'pa è? 19 Es se' tò isué tò ie'pa kè erblëne ie' mik, e' kuëki ie'pa kè dë'wã wé warma Skëköl tò ie'pa enuweke eë.

**4** Nies Skëköl kablë' se' a' tò se' döwami ie' tò se' enuweke e' a. E' kuëki e' tso'ia e' dalewa se' kawöta e' kkö'nuk taië dö' se' wele kè ulã a idö. 2 Se' a Skëköl tté buaë e' pakane wes ie'pa bak ká iaiãë, e'pa a ipakane es. Erë ie'pa kè erblëne imik, e' kuëki ttè buaë ttsë' ie'pa tò, e' kè dör ñie bua' ie'pa a. 3 Se' erblé Skëköl mik, e'pa dörawã ie' tò se' enuweke e' a. Erë wépa kè erblöku' ie' mik, esepa ché Skëköl tò iyëkkuö kì i' es:

"Ye' ulunekã ie'pa kì e'tã yö ichétke ie'pa kè döpawã wé warma ie'pa enuwekeyö eë."††

Ie' tò iché es, erë ie' kané enewa mik ká i' yöne one e'tã. 4 Skëköl tò iyi ulitane yö' dö ká teröl. Ká de kul tã ie' eni'. Es itso' kitule wele Skëköl yëkkuö kì. E' tò iché: "Ká de kul e'tã ì qos yö'bitütö e' yöne one, e' kuëki diwö e' wa ie' kè kaneblëne."‡‡

E' kuëki se' wã ijcher tò mokì Skëköl tò se' enuweke e' tso'tke. 5 Erë ttè kitule chétkeyö, e' kì Skëköl tò iché:

§3:11 Salmo 95.7-11

\*\*3:15 Salmo 95.7-8

††4:3 Salmo 95.11

‡‡4:4 Génesis 2.2

“Ie'pa kè döpa<sup>w</sup> wé warma ie'pa enu<sup>w</sup>keyö ee.”<sup>¶¶</sup>

<sup>6</sup>Es se' wä ijcher tö Skëköl tö se' enu<sup>w</sup>ke e' tso'tke se' a. Erè wépa a ttè buaë e' pakane kuaë, e'pa kè dë'wä, ie'pa tö idalöse<sup>w</sup> wä e' kueki. <sup>7</sup>E' ukuöki ta duas tka taië etä Skëköl tö ttè e' è skà pakène se' a ì kit se' blú bak kiè David e' tö e' wa. Ttè kitule ñe' chétkeyö, e' dör i' es:

“Ì cheke Skëköl tö e' ttsé a' tö i'ñe ta, e' ta kè a' er darë'ukwä iyöki.”

Es se' isué tö ikéwö skà mé Skëköl tö se' a as se' döwä ie' se' enu<sup>w</sup>ke e' a, e' kéwö dör i'ñe. <sup>8</sup>Josué tö Israel aleripa enu<sup>w</sup>pa ie' kéwö ska' ta, e'ma Skëköl kè wä ene skà yënene. <sup>9</sup>E' wä kiane chè tö Skëköl tö se' enuwèmi wés ie' eni' mik ká i' yö'itö etä es, e' tso'ia wépa dör ie' icha esepa a. <sup>10</sup>Wépa dewä Skëköl ene e' a, esepa enuraë wés ie' eni' es. <sup>11</sup>E' kueki se' ké e' diché iök shkowä ene e' a as se' kè isie tö ñe'pa kè wä Skëköl ttè iutène e'pa waköü.

<sup>12</sup>Skëköl ttè dör ttsë'ka, diché ta' taië, e' tö iwakanewéke buaë tkòka tabè kà yaule di'dië wì'ké iö'ké e' tsata. Idökewä buaë dö se' er a, se' wiköl a. Ì kos dalër-mik se' serke tso' blëule se' er a, ena ì kos bikeitsekesö, ese weblekettsaitö tö buaë idir ö sulu idir. <sup>13</sup>Se' e' chörakä Skëköl a. Ie' yöki ì kos yö'itö e' kè a e' blënu<sup>w</sup> wä. Ì kos tso' áie ie' wörki. E' kueki se' e' tkòwä darërè ie' ttè a.

**Jesús dör se' sacerdote kibi buaë shute**

<sup>14</sup>Se' wä sacerdote kibi tso' eköl, e' dör sacerdotepa ulitane tsata. E' dör Jesús, ie' dör Skëköl Alà. Ie' mineatke tso' ká jaì a se' tté chök Skëköl a. E' kueki se' kawöta e' tkök<sup>w</sup>ä darërèe ie' ttè buaë klö'wëkesö, e' a. <sup>15</sup>Se' sacerdote kibi e'

wa se' wër siarè. Mik ie' bak senuk ká i' ki, etä eré ie' ma'oule ì sulu kos wamblök wés se' es, erè ie' kè wä ì sulu wamblène yës. E' kueki ie' wä ijcher buaë tö is s'ttsér mik se' ma'örke ì sulu wamblök etä. <sup>16</sup>E' kueki a' shkówä Skëköl wörki. Mik s'kimè kiane etä ikiösö ie' a, kè suar ta'. Ie' tö se' sueke er siarè wa, e' kueki ie' tö se' kimeräe er bua' wa.

**5** Wépa dör sacerdotepa kibipa e'pa kos tso' shukitule iwakpa shua kanebloie imalepa tté chök Skëköl a. Ie'pa kanè dör iyiwak jchëule ena ilè skà merke Skëköl a, ese wakanéuk imalepa nuì olo'yoie. <sup>2</sup>Ie'pa dör wés imalepa es. Ie'pa diché kè dë'ka buaë ì sulu wöklö'woie. Ie'pa weirke siarè wés imalepa weir ì sulu ulä a es. E' kueki imalepa kè wöblaule íyì buaë wa, arkedö ì sulu a kekraë, esepa wërmi siarè ie'pa wa. <sup>3</sup>Ñies ie'pa wakpa tö ì sulu wambléta', e' kueki ie'pa kawöta iyiwak jchök mè Skëköl a ie'pa nuì ki ñies imalepa nuì ki. <sup>4</sup>Kaneblök Skëköl a sacerdote kibiie, e' dör kanè buaë, dalöiërta' taië. Kè yi yörtä' sacerdote kibiie iwák er wa. E' shushteke Skëköl è tö ta' itkéka sacerdote kibiie wés ie' tö Aarón tké'ka es. <sup>5</sup>E' sù Cristo kè e' tkënekä sacerdote kibiie iwák er wa e' kikoka. E' skéie Skëköl tö iché ie' a:

“Be' dör ye' alà; i'ñe ye' tö ikkacheke tö ye' dör be' yé.”<sup>§§</sup>

<sup>6</sup>Ttè kitule skà tö ichè i' es: “Be' dör sacerdote kekraë wés Melquisedec ese es.”<sup>\*</sup>

<sup>7</sup>Mik Jesús tso'ia ká i' ki, etä ie' kköyè' Skëköl a taië aneule wì'wìé iè wa ì wa. Skëköl è a ie' yërmittsa duèwä ulä a, e' kueki ie' tö iki' Skëköl a tö ye' yöttsa iulä a. Ie' tö Skëköl dalöieke taië, ittè iuteke buaë, e' kueki ì kiéitö e' iuté Skëköl tö.

<sup>¶¶</sup>4:5 Salmo 95.11

<sup>§§</sup>5:5 Salmo 2.7

<sup>\*</sup>5:6 Salmo 110.4

<sup>8</sup> Eré ie' dör Skëköl Alà, erë ie' weine tajë, e' wa ie' éna iane tò wës s'weir Skëköl ttë dalöië kueki. <sup>9</sup> Mik ì uk ie' patkëne e' wëitò seraa, età ie' de S'tsatkòkwakie. Wépa tò ie' ttë iuteke, esepa kôs tsatkè michoë ie' tò. <sup>10</sup> Nies Skëköl tò ie' tkéka sacerdote kibiie wës Melquisedec ese es.

### A' erblöke Cristo mik, e' kè olo'yar a' tò

<sup>11</sup> Ttë ese tso'ia sa' wà yëno tajë, erë kè a' éna ianuk bet, e' kueki iwà pakè a' a' e' dör darërë. <sup>12-13</sup> Kà iaiaë a' erblëmi Cristo mik, ikkè tã warma a' detke s'wöbla'ukwakpaie. Erë a' skà kianene wöbla'wë Skëköl ttë tsawe tottola ese wa. A' dör wës ala'rla es kè a' chkè darërë ñar, tso' tsu' è mik. Kam a' a' iwër tò ì dör buaë ì dör suluë. <sup>14</sup> E' skéie chkè darërë ese dör s'wöblautetke esepa a. Ie'pa a' iwënetke tò ì dör buaë ì dör suluë. E' kueki ie'pa éna iane mik tã buaë idir mik tã sulu idir.

**6** E' kueki Cristo tté tsá wa s'wöblane, e' è kè charia kekraë. E' skéie Cristo tté kí tso' tajë, ese wa se' kí e' yuò as se' yör iskië wës se' kibirwà es. Kè se' kàne e' wöbla'ukne Cristo tté tsá jchertke se' wà, ese wa. Se' wà ijchertke tò s'kawötã ì sulu núí kí s'duowami, ese kôs olo'yök. Se' wà ijchertke tò s'kawötã erblök Skëköl è mik. <sup>2</sup> S'wöskuë tté ena s'ulã mùka s'yamipa kí ese tté wa se' wöbla'netke. S'duulewà shkerdakane ena s'weir michoë ese tté jchertke se' wà. <sup>3</sup> E' kueki kè se' e' wöbla'ukia tté ese wa. E' skéie se' kí e' yuò Cristo tté skà tso'ia ese wa. Skëköl tò ikéwö mé se' a, e' tã iweraësö es.

<sup>4</sup> Wépa wöa kã ñine'bak Cristo tté wa, erë e'pa tò ilo'yé, e' tã çwës kawö mermine ie'pa a' er mane'ukne? Ì buaë mé Skëköl tò se' a, e' kak ttsëule ie'pa wà. Wiköl Batse'r dé'ñak ie'pa kí. <sup>5</sup> Ie'pa éna iane tò Skëköl tté dör buaë. Skëköl kéwö olo tã tajë datske aishkuö tã, e' diché

kak sùule ie'pa wà. <sup>6</sup> E' kôs ttsëule ie'pa wà, e' watéttsã ie'pa tò, e' tã çwës ie'pa dömine e' ska'? E' dör wës ie'pa tso'ne Skëköl Alà ttökwane wötëwane krus mik es. Ie'pa tso' ie' wayuök sulitane wö wa. <sup>7</sup> Se' dör wës tã es. Ýi kuatkëne iki, kalí yëne iki buaë, warma e' wà tskirmi buaë wà wörmu buaë wës iwák kí ikiane es. Të ese a' Skëköl er buaë chöraë. <sup>8</sup> Erë tã e' kí dika'chka tskine, kualkò tskine, ì tskine, e' tã e' kè dör ìe bua'. Kukur tã iwayë-narketke ì sulu a' tã iñardawa.

<sup>9</sup> A' yamipa dalër tajë sa' éna, sa' ttöke a' tã es, erë mokí sa' iklö'weke tò a' shköke buaë s'tsatkè ñalé kí. A' kè dör wës wépa tò Cristo watéttsã esepa es. <sup>10</sup> Skëköl dör yësyesë. A' kaneblöke buaë ie' a. A' tò s'batse'r malepa kimeke buaë, e' wekeia a' tò buaë. E' wa iwënewà tò mokí a' éna Skëköl dalër. E' kôs kè ska' ie' er chöpawa. <sup>11</sup> Erë sa' kí ikiane tò a' ulitane tò, ì buaë weke a' tò, ese kí ù er bua' wa dò ibata ekkë. Es ì buaë kôs panekesö, e' wà döraë a' ulã a' da'äie. <sup>12</sup> Sa' kè kí ikiane tò a' bikër. E' skéie sa' kí ikiane tò a' dò wës wépa erblöta' mokí Skëköl mik esepa es. Ì muk Skëköl kablë' se' a, e' wà panekesö enaë, e' wa iwà döraë se' ulã a.

### Se' erblömi Skëköl kablë' se' a, e' mik

<sup>13</sup> Mik Skëköl kablë' Abraham a, etã ie' kè kablëne yi skà ttö wa. Ie' kablë' iwák ttö wa, kè yi ku' ie' tsata e' kueki. <sup>14</sup> Ie' tò iyë' Abraham a: "Mokí ye' ichë tò ye' er buaë chöraë be' a' tajë. Be' aleripa alöweraëyö tajë."<sup>†</sup> <sup>15</sup> Ttë e' wa pané Abraham tò enaë tã Skëköl kablë'ia, e' wà de iulã a. <sup>16</sup> Mokí mik se' tò tté mé yi a, etã imekesö yi dör se' tsata, ese ttö wa. Mik se' tò tté métke es, etã tté e' kí kè ì skà ku'ia chë. <sup>17</sup> Es nies Skëköl kí ikiane kkachë wöshak wépa a' ikablë' esepa a' tò mokí iwà döraë ie'pa ulã a,

<sup>†</sup>6:14 Génesis 22.17

kè imane'wepaneitö yës. E' kueki ikablë' iwák ttò wa. <sup>18</sup> Es se' éna iane buaë tö Skëköl tö ittè mé se' a iwák ttò wa, e' kè mane'wepaneitö yës, ie' kè kachöta' e' kueki. Ie' tö ittè mé se' a iwák ttò wa tö se' erblöke ie' mik e'pa tsatkeraitö. E' tö se' er pableke buaë. Ttè e' wà paneke se' tö kröröë, e' a se' e' tköwà darërë kekraë. <sup>19-20</sup> Ttè e' wà paneke se' tö, e' tö se' tkéwà darërëë wës tabechka tso' kanò wöklö'wojie dayë shüa es. Jesús míkane se' yöki kewe ká jaì a. Eë ie' tso' Skëköl wé kibi e' úshu bates'r taië shüte, e' a. Úshu e' kköiëule àr datsi' buririë shükvar e' wa, e' etmik ie' tso' se' ttè chök kekraë Skëköl wörki. Es ie' de se' sacerdote kibi kekraë wës Melquisedec ese es.

### Jesús dör sacerdote kibi wës Melquisedec ese es

**7** Melquisedec bak ká kiè Salem e' blúie. Nies ie' kaneblë' sacerdotieie Skëköl dör íyi ulitane tsata e' a. Abraham e' ali'ka blu'pa skel wà ilayök Lot minetser e'pa ki. Mik Abraham dotkene iu a, eta Melquisedec dettsa ie' ñaletsuk ta ikié Skëköl a as e' er buaë chò ie' a. <sup>2</sup> Nies dali kos dë'ne Abram ulà a ñippè shüa, e' blatéitö dökà dabop, e' eyök méitö Melquisedec a. S'kiè Melquisedec, e' wà kiane chë "sene yësyësë e' blú." Nies ie' dör ká kiè Salem, e' blú. Salem, e' wà kiane chë "sene bèrë," e' kueki nies ie' dör sene bèrë blú. <sup>3</sup> Kè se' wà ijcher tö yi dör iyé, yi dör imì, yi dör iditséwö, mik ikune ö mik idu'wa. E' kos kè ku' kitule Skëköl yëkküö ki. E' kueki se' tö ichëmi tö ie' dör sacerdote kè erta'wa wës Skëköl Alà es.

<sup>4</sup> Ibikeitsó buaë, e' ta a' wà ijcherdaë tö Melquisedec dalöier'ta' taië sacerdotepa dör Leví aleripa, e'pa kos tsata. Abraham dör se' yé bak ká iaiaë dalöier'ta' taië ese. Nippè shüa ibolökpa dali de ie' ulà a, e' blatéitö dökà dabop, e' eyök tsá méitö Melquisedec a. <sup>5</sup> Leví

aleripa yé tsá dör Abraham wës Israel aleripa malepa es. Leví aleripa è meneat sacerdotepaie. Ie'pa dör Israel aleripa malepa yamipa, erè itso' kitule Moisés ttè dalöiëno, e' ki tö Israel aleripa kos kawöta' ífyi kos blatök dökà dabop, ta e' eyök tsá muk Leví aleripa a. <sup>6</sup> Skëköl kablë' Abraham a tö ie' doraë skëképa taië. Eré Melquisedec kè dör Leví aleri, erè e' a Abraham tö ífyi tsá mé. Nies Melquisedec tö ikié Skëköl a as e' er buaë chò Abraham a. <sup>7</sup> Sulitane wà ijcher tö yi tö e' ché o'ka a, ese wák dör yi a iyëne e' tsata. <sup>8</sup> Israel aleripa tö ífyi tsá meke sacerdotepa duöta'wà esepa a. Eré Skëköl yëkküö tö Melquisedec chë wës ie' tso'ia ttsë'ka es. <sup>9-10</sup> Mik Abraham tö ífyi tsá mé Melquisedec a, eta Leví kam kur. Eré se' tö ichëmi tö Leví aleripa bak tö ífyi tsá mé Melquisedec a Abraham wa, Abraham dör ie'pa yé tsá e' kueki.

<sup>11</sup> Ttè dalöiëno me' Skëköl tö Israel aleripa a Moisés wa, e' ichè tö Leví aleripa è meneat sacerdotepaie Israel aleripa ttè chök Skëköl a as e' tö ie'pa nuì olo'yò. Eré e' mú a nuì olo'yarmi se' ki seraa, e'ma kè sacerdote ské kua'ki kianeia. E' kueki Skëköl tö sacerdote ské patké. E' kè dör Leví aleripa e' eköl wës Aarón es. Ie' dör sacerdote wës Melquisedec ese es. <sup>12</sup> Sacerdote wës epa ské maneone kua'ki, e' ta nies ttè dalöiëno tsá e' kawöta' mane'wëttsa. <sup>13-14</sup> Sacerdote ské patké' Skëköl tö chëyö a' a, e' dör Skëképa Jesús. E' kè dör Leví aleripa eköl. Sulitane wà ijcher buaë tö ie' dör Judá aleri. Moisés kè wà i yëule tö Judá aleripa dõmi sacerdotieie. E' kueki kè ie' aleri isie tkëulekà sacerdotieie.

<sup>15</sup> Sacerdote ské tkënekane kua'ki wës Melquisedec ese es, e' ta se' éna iwà ane tö nies ttè dalöiëno meneat Moisés a e' maneonettsa. <sup>16-17</sup> Skëköl yëkküö ki itso' kitule tö ie' tö Jesús a iché i' es:

“Be' dör sacerdote kekraë wës Melquisedec ese es.”<sup>‡</sup>

E' kueki se' wà ijcher tō Jesús kè tkènekā sacerdoteie ie' ditséwō wa wës Moisés ttè kī itso' kitule es. Ie' de sacerdoteie ie' ser michoë, kè duōtā'wā, e' diché wa. <sup>18-19</sup> Moisés ttè dalōiëno bak kenet, e' kè a yi onuk buaë yësyësë Skëkōl wōa. E' kè diché tā', kè dör iie bua' ese woie. E' kueki ttè e' maneonettsā. E' skéie ttè pa'alī wà panekesō krörōë e' dör ibua'ie ttè kèchke tsatā, e' wa se' e' batsōwami buaë Skëkōl mik kè kī i sulu nuī tā'ia.

<sup>20</sup> Nies mik Skëkōl tō Jesús tkë'kā sacerdoteie, etā ie' kablë'ia iwák ttò wa tō ikaneblò michoë sacerdoteie. Ie' kè kablëne es sacerdotepa dör Leví aleripa, e'pa a. <sup>21</sup> Erë mik ie' tō Jesús tkë'kā sacerdoteie, etā ie' kablë'ia iwák ttò wa ttè i' wa:

“Be' dör sacerdote kekraë.

Ye' kablé be' a ye' wák ttò wa, e' kè olo'yepayö yës.”<sup>¶</sup>

<sup>22</sup> Es Skëkōl kablë' Jesús a, e' wa se' wà ijcher mokī tō ttè pa'alī mène se' a, e' dör bua'iewā ttè kèchke mène Israel aleripa a e' tsatā. Jesús wa se' wà ijcher yësyësë tō iwā suerasō.

<sup>23</sup> Nies sacerdotepa dör Leví aleripa, e'pa duōtā'wā, e' kueki ie'pa kè a kanablëne kekraë. E' kueki ie'pa ské tkëulekā tajë. <sup>24</sup> Erë Jesús ser michoë, e' kueki ie' kè skéie yi tkënukkā. <sup>25</sup> Wëpa kos shkökewā Skëkōl wörki Jesús batamik, esepa ttè chök ie' tso'ie kekraë Skëkōl a, e' kueki ie'pa kos tsatkërmī ie' a buaë kekraë.

<sup>26</sup> Es se' isuë tō Jesús dör sacerdote kibiie chökke. Ie' dör batse'r. Kè i sulu ku' iki, kè iaulekā sene sulusi wa. Ie' but-suletsā pë' sulusipa yöki. Skëkōl tō ie' tkëkā ká jai a íyi ulitane tsatā. Sacerdote ese kiane se' kī. <sup>27</sup> Ie' kè dör wës

sacerdote kibi malepa es. Ká bit tā ie'pa kawōtā iyiwak jchök mè Skëkōl a ie'pa nuī kueki. E' ukuōki tā iyiwak kī jchekerakitō mè Skëkōl a imalepa nuī kueki. Erë e' kos skéie Jesús e' me'ttsā ttèwā etökicha è se' nuī patuoie, e' kè skā tkōpaia. <sup>28</sup> Wëpa tkëulekā sacerdotepa kibiie Moisés ttè wa, mokī e'pa dör wës s'malepa es, kè diché dë'kā e' kkō'nuk buaë yësyësë. Erë Moisés ttè kite, e' ukuōki tā Skëkōl kablë' iwák ttò wa tō ie' alà tkërdakā se' sacerdote kibiie, e' dör se' sacerdote kibi yöbië bua'iewā yësyësë e'.

### Jesús dör ttè pa'alī me' Skëkōl tō, e' wakanéukwak

**8** Ì kos cheratse sa' tō e' wà dör i': Jesús tso' se' wà sacerdote kibiie. Ie' tkër dalōiërta' tajë ká jai a Skëkōl ulā bua'kka. <sup>2</sup> Ie' dör se' sacerdote kibi. Ie' tso' iwakanéuk Skëkōl wé batse'r chökke tso' ká jai a e' a. E' kè yöne s'ditsö wā, e' yö' ie' wák tō.

<sup>3</sup> Sacerdote kibi kos tkènekā iyiwak tso'rak iwā jchè mè Skëkōl a ena i skā mekerakitō, e' wakanéuk imalepa tsatkoie ie'pa nuī ulā a. E' kueki Jesu-cristo kawōtā nies ilè muk Skëkōl a se' tsatkoie. <sup>4</sup> Erë ie' kè tō ikanewëku' ká i' a, iwakanewëkeitō ká jai a. Moisés ttè dalōiëno tō ichè tō Leví aleripa è tkërkami sacerdoteie. E' kueki Jesús mú tō iwakanewëke ká i' a, e' ma ie' kè tkënukkā sacerdoteie, ie' kè dör Leví aleri e' kueki. <sup>5</sup> Ì kanewëke sacerdotepa tō ká i' a, ese dör ibua'ie tso' ká jai a, e' kleeke ie'pa tō ká i' a. E' dör wës ibak Moisés tā es. Mik Moisés tō u yueketke Skëkōl a, etā Skëkōl tō iché ie' a: “Ittsó, ì kos yuó wës be' a ikkayëne Sinaí ké-bata a e' suë.” E' kueki se' wà ijcher tō Skëkōl wé kibi tso' ká i' a, e' dör ichökke

<sup>‡</sup>7:16-17 Salmo 110.4

<sup>¶</sup>7:21 Salmo 110.4

tso' ká jai a e' klí è. <sup>6</sup> Erë Jesús tkëneká se' sacerdote kibiie, e' wakanewekeitö buaë sacerdotepa tso' ká i' a e'pa tsata. Nïes ie' batamik ì muk Skëköl kablë' se' a ttë pa'alí wa, e' dör ibua'ie. E' kuëkí ttë e' dör buaë shütë ttë këchke tsata.

**Ttë tsá mène Israel aleripa a, e' kè dalöta'ia**

<sup>7</sup>Ttë tsá mène Israel aleripa a, e' mú dör wë' as Skëköl tö se' kiöwa buaë, e'ma ttë skà pa'alí kè kianukia. <sup>8</sup>Erë ie' isuë tö ie'pa kè wá ttë tsá mène ie'pa a, e' wá iütëne buaë. E' kuëkí itso' kitule Skëköl yëkkuö kí e' tö ie'pa chë i' es:

“Skëköl tö ichë: Aishkuö ta kawö döraë, e' këwö ska' ta ye' tö ttë pa'alí meraë Israel wakpa a ena Judá wakpa a.

<sup>9</sup>Ttë e' kè dör wes ttë tsá me' ye' tö ie'pa yépa bak ká iaiäe e'pa a es.

Ttë e' me'yö ie'pa a mik ie'pa ulai'yö er bua' wa ibak klöulewa Egipto e' yottsäie etä.

Erë ttë me'yö ie'pa a, e' wá kè iütëne ie'pa wa,

e' kuëkí ye' tö ie'pa me'at.

<sup>10</sup>Nïes Skëköl tö ichë:

Ttë pa'alí meraëyö Israel aleripa a aishkuö ta, e' dör i' es:

Ye' ttë dalöiëno e' merdaë ie'pa er a, ta ie'pa tö iüteraë er bua' wa iwákpa er wa.

Ye' döraë ie'pa Këköl,

ta ie'pa döraë ye' icha.

<sup>11</sup>Ie'pa kos, tsitsirpa dò këkëpa,

e'pa batsdaë ye' mik.

E' kuëkí kè ikiarpaia tö yi tö iyamipa ö o'ka wöbla'weia as ibats ye' mik.

<sup>12</sup>Ï sulu kos wamblekerakitö, e' nuí olo'yeraëyö ie'pa kí,

kè ibikeitsepaia'yö.”<sup>8</sup>

<sup>13</sup>Es Skëköl tö ichë tö ttë pa'alí meraëitö se' a. E' wa ie' tso' ichök tö ttë tsá mène,

e' dör këchke wöitëwa. Ì kos ianewatke këchke, e' bet ta kè iku'ia.

**Cristo dewä Skëköl wé a ká jai a se' ttë chök**

**9** Ttë dalöiëno tsá me' Skëköl tö Israel aleripa a, e' a ttë tso' tö wes ie'pa kawöta Skëköl dalöië e' wakanëuk. Nïes ie'pa wa u tso' etkue bats'e'r ká i' a iwakanëwoie. <sup>2</sup>Ie'pa tö u yö' Skëköl dalöië e' wakanëwoie, e' blatërakitö böt. Úshu kewe e' kië úshu bats'e'r. Úshu e' a bö'wö taloka tso' et, nïes ka' tso' et, e' kí pan meke Skëköl a, ese me'r. <sup>3</sup>Úshu skà tso' datsi' buririë shukuar, e' etmik, e' kië úshu bats'e'r taië shütë. <sup>4</sup>Úshu e' a ka' tso' yöule orochka wa íyi masmas ña'woie Skëköl a e'. Nïes kalkuö tkër ek, e' paiëulewa orochka wa. Kalkuö e' shua tka' tso' etk yöule orochka wa. Tka' e' a chkë me' Skëköl tö Israel aleripa a kië maná, e' kak tso' blëule. Nïes kalkuö ñe' shua Aarón shko kéli përi tskineka, e' tso' blëule. Nïes ishua ák tak tso' böt, e' kí Skëköl tö ittë dalöiëno kit. Kalkuö e' kië Ttë Mène Nì A Kélkuö. <sup>5</sup>Kalkuö e' bata kí Skëköl biyöchökwak pik ta' kië kërub, e' diököl tulur böt. E' tö se' a iwà kkacheke tö Skëköl olo tso' ee. Ipik meuleka kalkuö kköshto bata kí, ee Israel aleripa nuí olo'yarke. Erë i' ta íyi ekkë kè wá pakanuktsa ye' a iskië.

<sup>6</sup>Es íyi ulitane bak kaneoule buaë Skëköl wé a, ta sacerdotepa bak shkëk-wa këkraë úshu bats'e'r e' a iwakanëuk. <sup>7</sup>Erë sacerdote kibi, e' è a kawö tso' shkowá úshu skà tso' dör bats'e'r taië shütë e' a. Eë ie' döwami etökicha è duas wa duas wa. Mik ie' mi'kewa ee, etä ie' wá iyiwak pé mi'ke mè Skëköl a e' nuí kí, nïes ì sulu wamblë pé' malepa tö kè wá jcher ie'pa wa, ese nuí kí. <sup>8</sup>E' kos wa Wiköl Bats'e'r tö se' a iwà kkacheke tö úshu bats'e'r, e' wakaneorkeia, e' dalewa

§8:12 Jeremías 31.31-34

kè sulitane dōpawā úshu batse'r taijē shūtē e' a. <sup>9-10</sup> Ì kōs kanewēke judiowak sacerdotepa tō ttē dalōiēno tsá mēne ie'pa a, e' wa, e' dōr chkeie, di'yeie, se' batse'wēie, ese kōs dōr s'pa kikkē è batse'woie. E' tō se' kīmeke kām ttē manerne e' dalewa è. E' kuekī ì meke ie'pa tō Skèkōl a idalōiē e' wakanéwoie, ñies iyiwak kōs jcheke mē ie' a se' nuì kī, ese kōs kē a wépa tō ie' dalōieke es, esepa erbikē pairinuk. Ie'pa ittse tō inuì tso'ia ie'pa kī. Erē ì kōs kanewēke ie'pa tō Skèkōl wé a, e' tō ttē pa'alī mé Skèkōl tō se' a Jesús batamik, e' wà kkacheke i'ñe ta.

<sup>11</sup> Cristo dē'bitubak. Ie' dōr se' sacerdotē kibi. Ie' dōr ttē buaē pa'alī me' Skèkōl tō se' a e' wakanéukwak. Ie' dur iwakanéuk Skèkōl wé tso' ká jai a, e' a. Skèkōl wé e' kē yöne s'ditsō wā, e' kē dōr wes íyi tso' ká i' a es. E' kuekī Skèkōl wé e' dōr buaē shūtē itso' ká i' a e' tsatā. <sup>12</sup> Etōkicha ème Cristo dewā Skèkōl wé tso' ká jai a e' shu batse'r taijē shūtē, e' a s'tsatkoie. Ì wé ie' tō eē, e' dōr wē, kē ie' mi'pane iskà kanéukne. Mik ie' dewā eē, etā kē ie' wā chibo ò baka pé mine mē Skèkōl a se' nuì kī. E' skéie ie' wák kōtewā e' pé mí ie' wā. Es ie' tō se' yēttsā michoē se' nuì ulā a. <sup>13</sup> Wépa bak ttē kēchke dikīā, esepa iane ñā, e' tā chibo pé ò baka wēñe pé ese sklippeke sacerdotepa tō ie'pa kī ò isalema baka alaki pupula ñā'weke ese muluchka diōblékā di' wa e' sklippekerakitō ie'pa kī. Mokī e' tō ie'pa pa kikkē batse'wēne paiklé. <sup>14</sup> Erē e' dōr es, e' yitā buaē Cristo pé diché tā' taijē iyiwak pé tsatā. Skèkōl Wikōl yöbiē, e' batamik ie' wák e' me'ttsā ttewā se' skéie wes iyiwak kē kī ì sulu ku' mē Skèkōl a ese es. Ie' pé tō se' erbikē paiklēmī ì sulu nuì kī s'duōwāmi ese yökī as se' tō Skèkōl chók e' dalōiē.

<sup>15</sup> Jesucristo dōr ttē pa'alī me' Skèkōl tō se' a, e' wakanéukwak. Ì sulu kōs wamblē' wépa bak ttē tsá mēne e' dik-

ia e'pa tō, e' nuì ulā a ie'pa yēnettsā Jesús kōtewā krus mik e' batamik. Ñies e' batamik ì buaē yöbiē muk Skèkōl kablē' wépa klōō'bakitō as idō ie' ichaie esepa a, e' dōraē ie'pa ulā a. <sup>16-17</sup> Ye' tō iwà pakē a' a i' es: Kām s'duōwā e' yökī s'wōblane ì mekesō s'yamīpa a, ese yēkkuō mukāt. Yēkkuō e' wà kē merpa, yi tō imé ese tso'ia ttsē'ka e' dalewa. Iwak blēnewā, e' è tā imermi. E' kuekī s'kawōtā isaukwā bua'ie tō yi tō imé, ese wák blēnewatke yēkkuō e' wakanéwōmi. <sup>18</sup> Es ñies ttē tsá mēne, e' mēne iyiwak jchēule e' pé tēne ese wa. <sup>19</sup> Ttē tsá mēne dalōiēno, e' wà paka' Moisés tō Israel aleripa kōs a. E' ukuōkī tā chibo ena baka wēñe pé shutuékaitō di' wa. E' sklippéitō yēkkuō kī Skèkōl ttē dalōiēno tso' kitule e' kī, ñies e' sklippéitō Israel aleripa kōs kī kal kiē hisopo e' ulatska mik datsitak batsē rratulewā e' wa. <sup>20</sup> E' wēkeitō tā icheramiitō i' es: "Pé i' dōr iwà kkachōie tō ttē mé Skèkōl tō se' a e' tsá kaneonemitke." <sup>21</sup> E' sū Skèkōl wé ena ì kōs tso'ia Skèkōl dalōiē e' wakanéwoie, ñies ese kī Moisés tō pé sklippé. <sup>22</sup> Mokī ttē dalōiēno tsá mēne, e' wa tā tsir etā íyi ulitane batse'wēkene pé wa. Ñies e' tō ichē tō iyiwak jchēule ese pé kē tēne, e' tā se' nuì kē olonuk se' kī. <sup>23</sup> Íyi tso' Skèkōl wé tso' ká i' a e' a, e' dōr ì tso' Skèkōl wé tso' ká jai a, e' klí è. Íyi ekkē kawōtā batse'wē iyiwak jchēule mē Skèkōl a, ese pé wa. Erē Skèkōl wé a íyi tso' ká jai a, e' kawōtā batse'wē ì dōr buaē shūtē iyiwak pé tsatā, ese wa.

<sup>24</sup> Ì buaē e' dōr Cristo. Ie' kē dē'wā Skèkōl wé shu batse'r yöne s'ditsō wā tso' ká i' a, e' a. E' dōr ibua'ie tso' ká jai a, e' klí è. E' skéie ie' de ká jai a Skèkōl wé chōkle e' a, eē ie' tso' Skèkōl a se' ttē chōk. <sup>25</sup> Judiowak sacerdotepa kibīpa, e'pa kawōtā shkōkwā Skèkōl wé shu batse'r taijē shūtē, e' a iyiwak pé muk Skèkōl a se' nuì kī duas bik ekkē etōkicha etōkicha. Erē Jesús kē dē'wā taijē wes ie'pa es. <sup>26</sup> Imú



dör es, e' ma ká i' yöne dõ ikkë tã, etã ie' kãwõtã e' muksã ttëwã duas bit ekkë. Erë e' kè dör es. E' skéie, i'ñe tã mik ká i' erkewatke, etã ie' de e' muksã ttëwã se' skéie etökicha è se' nuì kòs paiklottsa. <sup>27</sup> Sulitane a kãwõ meneat duökwa etökicha è, e' ukuökì tã se' shulirdaë. <sup>28</sup> Es ñies Cristo e' me'ttsã ttëwã etökicha è, se' taijè e' nuì paiklottsa. Ie' skà dörane, erë e' kè dör se' nuì shulök. Ie' dörane wëpa tso' ie' panuk esepa tsatkök.

**Ttè dalöiëno kè a se' nuì pairinuksa**

**10** Ttè dalöiëno mène ká iaiãe Moisés wa, e' dör ì bua'ie doia se' a Cristo batamik aishkuö tã, e' biyõ yöne. E' dör wës ilo es, kè dör iwã chók. E' kuëkì ttè e' kè a wëpa dökewa Skëköl ska' iyiwak jchök mè ie' a kekraë duas bik ekkë esepa batse'onuk da'a. <sup>2</sup> Ttè e' mú a ie'pa nuì pairinetsa moki, e' ma ie'pa er kè tã ie'pa kkatëpaia tã ie'pa kè tã iyiwak jchëpaia mè Skëköl a. <sup>3</sup> Erë e' kè dör es. E' skéie mik ie'pa tã iyiwak jcheke mè Skëköl a duas bit ekkë, etã e' tã ie'pa er awëkene ì sulu wamblekerakitõ ese ska'. <sup>4</sup> E' wã dör tã se' nuì kè pairirpattsã baka wë'ne pé wa ena chibo pé wa.

<sup>5</sup> E' kuëkì mik Cristo dökëtkë ká i' a, etã ì tso' kitule Skëköl yëkkuö kì, e' chéitõ Skëköl a, e' tã ichè i' es:

“Iyiwak jcheke mè be' a ena ilè skà tso' mè be' a, e' kè kiane be' kì. Erë be' tã ye' yueketke s'ditsöie chkà tã' diché tã'.

<sup>6</sup> Iyiwak jcheke ña'wè wa'ne be' a ena ilè skà tso' mè be' a nuì paikloie, e' kè wër bua' be' wa.”

<sup>7</sup> E' ukuökì tã Cristo tã iché Skëköl a: “A Skëköl, i' ye' dur ì kiane be' kì wè e' wöie,

wës ye' ttè tso' kitule be' yëkkuö kì es.”\*\*

<sup>8</sup> Kewe ie' tã iché Skëköl a: “Iyiwak jcheke mè be' a ena ilè skà tso' mè be' a, ñies iyiwak jcheke ña'wè wa'ne be' a nuì paikloie, ese kòs kè kiane be' kì, kè iwër bua' be' wa.” Erë ie' tã iché es, erë ese kòs yë'atbakitõ dalöië Skëköl ttè dalöiëno tso'tke kitule e' kì. <sup>9</sup> E' ukuökì tã ie' tã iché: “A Skëköl, i' ye' dur ì kiane be' kì wè e' wöie.” E' wa se' éna iane tã iyiwak jcheke ie'pa tã ttè tsã dikia ese kòs skëttsã Skëköl tã iské pa'alì mokane, e' dör Cristo kõtewa se' skéie e'. <sup>10</sup> Ì kiane Skëköl kì e' wã o' Jesucristo tã. Ie' wák e' me'ttsã ttëwã se' skéie etökicha è, kè skà ttëtã'wãia. E' kuëkì Skëköl tã se' batse'õ'.

<sup>11</sup> Kekraë judiowak sacerdotëpa tã iwakanewëke. Ká bit tã ie'pa tã iyiwak jcheke mè Skëköl a sene sulu nuì kì. E' è kanewëke ie'pa tã taijè kekraë, erë e' kè a nuì pairinuksa. <sup>12</sup> Erë Jesucristo e' me'ttsã ttëwã se' nuì skéie etökicha è, kè skà ttëtã'wãia, e' ukuökì tã ká jai a ie' tkë'kã dalöiërta' taijè Skëköl ulã bua'kka. <sup>13</sup> Eë ie' tkër Skëköl e' alékã ibolökpa kòs kì, e' mekerõ ie' klò dikia e' panuk. <sup>14</sup> Ie' e' me'ttsã ttëwã se' skéie etökicha è, e' wa wëpa dör ie' icha, esepa batse'wéitõ buaë ichökle Skëköl a etökicha è, kè batse'wè kianeia.

<sup>15</sup> Ñies Wiköl Batse'r tã iché tã e' dör moki. Ie' tã iché Skëköl yëkkuö kì i' es:

<sup>16</sup> “Kãwõ dõraë tã ye' tã ttè pa'alì meraë ie'pa a, e' tã ichè i' es:

Ye' ttè dalöiëno e' merdaë ie'pa er a, etã ie'pa tã iitëraë er bua' wa iwákpa er wa.

<sup>17</sup> Ie'pa e' wamblè sulu kòs, kè e' bikeitsepaia ye' tã.”††

<sup>18</sup> Es se' éna iane tã se' nuì ol'o'yane se' kì, kè se' kãwõtãia ì skà muk Skëköl a se' nuì kì.

\*\* 10:7 Salmo 40.6-8

†† 10:17 Jeremías 31.33,34

**Se' a kawö mène shkowa Skëköl wörki**

<sup>19</sup> A yamipa, e' kueki i'ñe ta se' dōwami buaë Skëköl dör batse'r taië shute e' ska', kè suarta', Jesús kötewa ipé tène taië, e' batamik. <sup>20</sup> Kè yi dōta'wa Skëköl wörki éanas wes kè yi dē'wa éanas Skëköl wé úshu nanetkëar datsi' buririë wa e' et-mik es. Erë Jesús kötewa se' skéie e' chë datsi'ukuö jchënane e' tò. E' wa ñala pa'alì dō Skëköl ska', e' kköyë'ttsa ie' tò se' a, e' dör sene michoë e' ñalé. <sup>21</sup> Jesús dör se' sacerdote taië. Ie' dör se' dör Skëköl icha, e'pa kos wökir. <sup>22</sup> E' kueki se' shkōwa Skëköl wörki er moki wa ena er-blë ie' mik yësyësë e' wa. Se' erbikë sulu e' pairiulettsa. Se' batse'ouletke, e' dör wes s'pa skuë buaë manene di' maneneë wa es. <sup>23</sup> Skëköl ttò mokjë. Ì uk ie' kablë' se' a, e' weraëitò. E' wà panekesö kröröë. E' kueki se' e' tkōwa darërë ttë e' a, kè tò ibikeitsë böt böt. <sup>24</sup> A' tò ibikeitsó tò wes a' a ñi kimermi as a' k'í ñi dalëritsò buaë, ñies as a' tò ì buaë k'í ù taië ñi ki-moie. <sup>25</sup> Se' ñi dapa'uke, e' kè olo'yar a' tò wes se' wëpa wöblane iwamblök es. E' skéie a' er k'í diché ió ñita. E' yita mik se' tò isué tò Skëképa Jesús datskene, e' k'éwö dökewatke, eta' er k'í diché iërmi ñita.

<sup>26</sup> Ttë mokjë e' jchertke se' wa, erë e' ukuök'í ta ì sulu wamblekeiasö wöbla wa, e' ta kè ì ku'ia jchë mè Skëköl a e' nuí olo'yoie se' ki. <sup>27</sup> Iwamblésö es, e' ta s'pauirke shulë wa, e' è tso' se' panuk. E' dör bö' ñarke taië wa Skëköl tò ibolökpa ewerawa e'. <sup>28</sup> Ká iaiaë yi tò ttë dalöiëno me'at Moisés tò, e' dalösewéwa ta ikkatökwakpa dör bül ö mañal, e' ta ese wák ttekewa kè ulé klöule. <sup>29</sup> E' dör es, e' ta wépa tò Skëköl Alà dalösewéwa ¿wes esepa kè weirpa taië shute? Jesús

pé wa ttë pa'alì mène se' a e' waka-neone, e' pé tuë taië e' wa ie'pa batse'one, erë isuekerakitò wes se' èse pé es. Nies Skëköl Wiköl er buaë ché se' a, e' chekerakitò suluë. ¿Wes ie'pa tkómishkar e' nuí ulá a? <sup>30</sup> Skëköl mik se' bätse e' tò ichë iyëkkuö ki i' es: “Ye' è wöki iské werke wë. Yi tò ì sulu wamblë ese ské werayö iki.”<sup>††</sup> Nies ichéitò: “Skëköl icha kos esepa shuleraë ie' tò.”<sup>¶¶</sup> <sup>31</sup> ;Se' arwa Skëköl chók ulá a weinuk, e' dör siarë ichók!

<sup>32</sup> Erë a' éna ianú tò mik kuaë Skëköl tò a' er ñi o' Jesús ttë buaë wa, e' k'éwö ska' ta pé' tò a' we'ik siarë Jesús ttë buaë kueki. Erë e' kos dalë'ttsë' a' tò er bua' wa. <sup>33</sup> Mikle ta pé' tò a' yë' suluë, ie'pa tò a' we'ik siarë sultane wörki. Mikle ta a' wák er wa a' e' ché weinuk wépa weirke es esepa ta. <sup>34</sup> Wépa wötëne s'wöto wé a Jesús ttë kueki, esepa su' a' tò er siarë wa, ie'pa kime' a' tò. A' wa ijcher tò ì bua'ie kè erta'wa ese tso' taië a' wa ká jaì a, e' kueki mik pé' tò a' íyi kos yë'lur a' yöki, eta' e' dalë'ttsë' a' tò ttsë'ne bua' wa. <sup>35</sup> A' kè e' ökwa a' weirke e' yöki, e' ské merdaë a' a taië, e' kueki iwöklö'ú a' tò darërë. <sup>36</sup> A' weirke e' dalë'ttsök a' kawōta bèrë er bua' wa as a' tò iù wes Skëköl ki ikiane es, ñies as ì buaë muk a' a ie' kablë' e' mùitö. <sup>37</sup> E' dör wes itso' kitule Skëköl yëkkuö ki es, e' tò Cristo ttë chë i' es:

“Wé kawōta dök e' datse kukuie, e' kè ki kawö tkōpa taië.

<sup>38</sup> Erë wépa dör ye' icha serke yësyësë, esepa erblé buaë ye' mik, e' kueki ie'pa ser michoë.

Erë ie'pa wépa suanéka ta ye' ttë olo'yérakitò,

e' ta kè ye' wa ie'pa wërpaia buaë.”<sup>§§</sup>

Es itso' kitule Skëköl yëkkuö ki. <sup>39</sup> Erë se' kè dör wes wépa tò Jesús ttë buaë e' olo'yé esepa es. Ie'pa weirdaë siarë

<sup>††</sup>10:30 Deuteronomio 32.35

<sup>¶¶</sup>10:30 Deuteronomio 32.36

<sup>§§</sup>10:38 Habacuc 2.3-4

aishkuö tã. Se' erblöke buaë Jesús mik, e' kueki se' tsatkërdaë.

**Se' erblò Skèköl mik wes kèkèpa bak ká iaiaë erblè' imik es**

**11** Erblè Skèköl mik, e' wà kiane chè tò se' tò iklò'wé mokjë tò ì muk ie' kablè' panekesò, e' meraëitò se' a. Eré e' kè wërta' i'ñe tã, eré se' tò iklò'wé yësyësè tò iwà suerasò. <sup>2</sup> Se' yépa bak ká iaiaë, e'pa bak erblök Skèköl mik, e' kueki ie'pa yé' ie' tò tò ie'pa dör buaë ie' wöã.

<sup>3</sup> Se' erblöke Skèköl mik, e' kueki se' wa ijcher tò ie' tò iyi ulitane yö' iwák ttè wa. E' wà kiane chè tò ì kos wërta' suësò i'ñe tã, e' yöne ì kè wërta', e' è wa.

<sup>4</sup> Abel erblè' Skèköl mik, e' kueki ì mé ie' tò Skèköl a inuì kï, e' dör bua'ie ì mé Caïn tò, e' tsatã. Abel erblè Skèköl mik, e' kueki Skèköl tò ie' klò'wé wes pè' buaë yësyësè es. Nies ì mé ie' tò Skèköl a e' wër buaë Skèköl wa. Ie' blènewabak ká iaiaë, eré ie' erblè Skèköl mik, e' tté pakarkeia i'ñe tã.

<sup>5</sup> Enoc erblè' Skèköl mik, e' kueki ie' kè blènewã. Ie' minetser ttsë'ka Skèköl wa, e' kueki kè yi wã ie' nu kune. Skèköl yèkkuö ichè tò kam Enoc mi'tser Skèköl wa, e' yöki ie' wër buaë Skèköl wa. <sup>6</sup> Yi isie shkakwã Skèköl wörki, ese kawöta iklò'uk tò mokï Skèköl tso'. Nies ie' kawöta iklò'uk tò wépa tò Skèköl yuleke er mokï wa, esepa ulà a iwà döraë. E' kueki kè se' erblöku' Skèköl mik, e' tã kè se' a ì onuk wërmi buaë ie' wa.

<sup>7</sup> Noé erblè' Skèköl mik, e' kueki mik Skèköl tò ie' a iché tò ì sulu tköraë ká i' kï kè suule yi wã ese, etã ie' tò ittè iuté. Ie' tò kanò bërie yué etò, e' a ie' ena iyamipa e' è tsatkëne. E' wa ikkayëne tò imalèpa kï nuì tso'. Nies sene yësyësè dòmi se' ulà a s'erblè Skèköl mik e' wa, e' de ie' ulà a.

<sup>8</sup> Abraham erblè' Skèköl mik, e' kueki mik e' tò iché ia: "Be' yú ká yë'yö tò imeraë be' a e' a," etã iüütéitò. Eré ie' kè wa ijcher tò ká wé a ie' mîró, eré bet tã ie'

yéttsã iwák ká a. <sup>9</sup> Ie' erblè Skèköl mik, e' kueki mik ie' de ká yëne ie' a eë, etã ie' sené wes s'dami shkal ser es. Ie' sené úla yöule datsi'tak wa, ese a. Ie' alà Isaac ena itala Jacob, e'pa nies sené wes ie' es. Nies ie'pa a ká e' muk Skèköl kablè'. <sup>10</sup> Ká bua'ie kè erta'wa bikeitsbak Skèköl tò, yö'itò ká jai a, e' wà pané Abraham tò. E' kueki ie' sene' wes s'dami shkal ser es, e' dalé'ttsëitò er bua' wa.

<sup>11</sup> Skèköl tò iyë' ie' a: be' alà kòrakã be' alaköl Sara e' ta. Eré ie' dewatke kèkèpala aluë, nies Sara wake' kè döta' alàë, eré ie' iklò'wé tò Skèköl kablè' ie' a e' weraëitò. E' kueki diché mène ie' a alà koka. <sup>12</sup> Ie' dewatke kèkèpala aluë, eré es ie' de alàë. Ilà e' wa ileripa dè'bitu taië kè shtar ekkè wes bëkwò tso' taië ö ttsã'wò tso' taië dayë kkömik kè shtar es.

<sup>13</sup> Ie'pa ekkèpa kos erblè' Skèköl mik, kè ilo'yane ie'pa wa, es ie'pa blèrulune. Ká muk Skèköl kablè' ie'pa a, e' wà kè dè' ie'pa ulà a ie'pa tso'ia' ttsë'ka e' dalewa. Eré ie'pa tò iklò'wé tò iwà döraë ie'pa ulà a aishkuö tã. E' dör ie'pa a wes ilo suë kamië es. E' kueki ie'pa tò iyë' tò ie'pa ser ká i' kï wes ká kuã'ki wakpa dami shkal es. <sup>14</sup> Wépa tò ichè es, e' wa iwènewã tò ie'pa tso'ia' ká yulök iwákpa a. <sup>15</sup> Ie'pa mú tso'ia' wé ie'pa manete, e' ké bikeitsök, e'ma ie'pa mi'mine buaë ká e' a. <sup>16</sup> Eré ie'pa tò ká bua'ie e' kkecheke, e' dör ká tso' ká jai a. Skèköl tò ká e' yö'bak ie'pa a, e' kueki Skèköl kè jaëne tò ie' kiè ie'pa Kèköl.

<sup>17-19</sup> Skèköl kablè' Abraham a ttè i' wa: "Be' aleripa chökle, e'pa döraë Isaac wa." Eré e' ukuöki tã ie' tò iché ia: "Isaac ttówa mè ye' a ye' dalöioie." Ie' kï ikiane suë tò mokï Abraham erblöke ie' mik, e' kueki ie' ima'wé es. Abraham erblè Skèköl mik, e' kueki mokï ie' tò Isaac mekettsã wes Skèköl tò ie' a iyë' es. Ie' tò ibikeitsé tò ie' tò ilà ttéwa, e' tã Skèköl a ishkerkamine, e' kueki ie' tò ittekewa. Eré bata ekkè tã Skèköl tò ie' wöklò'wé.

E' kuęki ichėmisö tō e' dör węs Isaac kōtewā shkenekane es.

<sup>20</sup> Isaac erblė' Skėköl mik, e' kuęki ie' tō iyė', ila'r Jacob ena Esaú, e'pa a tō aishkuö tå Skėköl er buaė chōraė ie'pa a.

<sup>21</sup> Jacob erblė' Skėköl mik, e' kuęki mik ie' blėrkewā, e' kėwō dōketke, etå ie' tō iyė' italapa dör José ala'r e'pa a eköl eköl tō Skėköl er buaė chōraė ie'pa a. Nies Skėköl dalöié ie' tō ie' e' duedur ishko kéli mik e' dalewa.

<sup>22</sup> José erblė' Skėköl mik, e' kuęki mik ie' blėrkewatke, etå ie' tō iché tō aishkuö tå Israel aleripa e' yōrattsarak Egipto. Es ie' ichéat tō mik a' e' yėttsā ká i' a etå ye' nu tso' blėule e' tsúmi a' tō blėwā wé a' mırō eę.

<sup>23</sup> Nies Moisés yé ena imi, e'pa erblė' Skėköl mik. Mik ie' kune, etå ie'pa tō isué tō alala buaala kune. Egipto blú tō iyė' tō Israel aleripa alala kurke wėpa, e'pa kos ttekelur. Erė Moisés yé ena imi, e'pa erblė Skėköl mik, e' kuęki ie'pa kė suane blu' ttė yōki. Ie'pa tō Moisés blė dōka si' mañat itsatkoie.

<sup>24</sup> Moisés talane Egipto blú duöchkeie dalöierťa' tajė. Erė ie' erblė Skėköl mik, e' kuęki mik ie' de kėchke, etå e' kos watėttsā ie' tō. Ie' kė kī ikiane tō ie' kirwā Egipto blú duöchke. <sup>25</sup> Ie' a tå weinuk wėpa dör Skėköl icha, esepa tå, e' dör buaė tkōka sene sulu tō s'ttsė'wėke buaė ekuölö è, ese kos tsata. <sup>26</sup> İ buaė dōraė ie' ulā a aishkuö tå iskėie, e' è kī ie' er me'rie. E' kuęki ie' tō bikeitsé tō iweir kos wé pairine'bitų idi' wa s'blúie e' ttė kī, e' dör buaė shute, íyi bua'buwa tso' Egipto ese kos tsata.

<sup>27</sup> Moisés erblė' Skėköl mik, e' kuęki ie' e' yėttsā Egipto, kė suane Egipto blú ulune yōki. Ie' e' tkėwā darėrė Skėköl kė wėrtā' e' mik kė ilo'yane ie' wa. <sup>28</sup> Ie' erblė Skėköl mik, e' kuęki ie' tō Israel aleripa patké Ie'pa Yėpa Yėrulune Egipto e' kėwō tkō'uk. Ie' tō ie'pa patké obeja

pupula ttōkwā tå ipé sklippök ie'pa ukkō kos e' mik. Ie'pa tō iwé es as Skėköl biyöchökwak patké Skėköl tō s'ttökulur, e' kė mi'wā u a alā wēm tsā kune, esepa kos ttökulur.

<sup>29</sup> Israel aleripa erblė' Skėköl mik, e' kuęki ie'pa tkami Dayė Mat shūā węs íyök è kī shkė es. Erė mik Egipto wakpa mí ie'pa itōki, etå e'pa kī dayė unekā tō ie'pa kos ttėlur.

<sup>30</sup> Israel aleripa erblė' Skėköl mik, e' kuęki ie'pa shkė ká kiė Jericó kköiėule e' pamik dōka ká kul. E' ukuōki tå ká e' kköiėule kos, e' tkėnettsā iski. <sup>31</sup> Nies alaköl sulusi kiė Rahab, e' erblė' Skėköl mik. E' kuęki mik wėpa bōl patké' Josué tō Jericó weblök bėr akir, etå e'pa ki'waitō bėrė blė' itsatkoie. E' kuęki ie' kė dunewañak wėpa tō Skėköl ttė dalösewėwā esepa tå.

<sup>32</sup> Ye' a ikī yėrmi tajė. Gedeón ena Barac ena Sansón ena Jėftė ena David ena Samuel ena Skėköl ttekolpa kos, e'pa kos ttė pakarmi ye' a, erė ye' kė kawō kune i' tå ipakoie seraa. <sup>33</sup> Ie'pa ena pė' skā erblė' Skėköl mik węs ie'pa es, e' wa e'pa wėlepa e' alėka ká kua'ki kua'ki wakpa kī. Nies ie'pa wėlepa ttė dalöiėno e' wakanewé yėsyėšė. Nies Skėköl kablė' ie'pa a, e' wā de ie'pa ulā a. Ie'pa wėlepa tō ma'name kkò tsatėwā. <sup>34</sup> Ie'pa wėlepa kė kī bō' dakanekā. Ie'pa wėlepa ttekewatke tabė wa, e' tsatkėe Skėköl tō. Ie'pa wėlepa kė dichė tå, erė idichė iėne. Ie'pa wėlepa nippė darėrė tå iė' alėka ká kua'ki nippökwakpa kī. <sup>35</sup> Nies alakölpa bak erblök Skėköl mik, e'pa wėlepa dėutōpa shkenekane menene ie'pa a.

Pė' wėlepa skā erblė' Skėköl mik, e'pa klō'wėwā pė' tō tå iwe'ikėrakitō tajė siarė dō iduowā ekkė. Erė ie'pa erblė Skėköl mik, e' kė watėnettsā ie'pa wā. Ie'pa wā ijcher tō ie'pa shkėrdakane aishkuö tå senoiė buaė shute, e' kuęki ie'pa ekemine áie, e' kė kinewā ie'pa wā. <sup>36</sup> Ie'pa wėlepa wayōne tajė, bune siarė. Ie'pa wėlepa skā

monewā tabechka yöule ttsa'ie ese wa, es iminerak s'wōto wé a. <sup>37</sup> Ie'pa wēlepa ttélur ák wa. Wēlepa ttélur jchēulettsa shushāē. Nies wēlepa ttélur tabè wa. Ie'pa bak shkōk wī a dià a paieule obeja kkuōlit ö chibo kkuōlit wa. Ie'pa dör siarē, töiene siarē, weine taijē. <sup>38</sup> Ie'pa dör buaē shūte, kè dör bua' tō ie'pa ser imalepa serke ká i' kī e' shūa. Erē ie'pa bak shkōk wī a dià a ká sir poē wé kè yi serku' taijē ese ska' ö kabata a. Ie'pa bak senuk siarē ákuk a ö kauk a.

<sup>39</sup> Ie'pa ekkēpa kos erblē' Skëköl mik buaē, e' kueki ie' wa ie'pa wēne buaē. Erē ie' kablē' ie'pa a, e' wà kam mer ie'pa a, <sup>40</sup> ie' tō iskà bikeitséne bua'ie se' batamik e' kueki. Ì buaē meke ie' tō se' a aishkuö ta, e' kiane ie' kī tō ie'pa ena se', e'pa ulà a idò ñita. E' kueki kam idò ie'pa ulà a.

**A' erbló Skëköl mik wes Jesús es**

**12** A yamipa, se' erblöke Skëköl mik ena se' serke ie' a, e' dör wes s'tur e' aloka as ì merke sia e' dō se' ulà a es. Wēpa erblē' Skëköl mik ká iaiaē e'pa durulunebak, e' dör wes ie'pa tūne e' ali'kabak es. Ie'pa ekkēpa dör taijē, e' kos erblē' buaē Skëköl mik, e' dör wes ie'pa iēne se' turke e' sauk es, tō is se' mir. E' kueki ì kos tō se' wöklö'weke ese ulà watösö. Ì sulu wamblekesö, ese dör wes ttsa' mulitswā s'klò mik es, e' kueki ilo'yösö. Eta se' tunú darērè dō mik se' deka wé se' mi'kerö eē. <sup>2</sup> Se' er mùwā Jesús è kī. Se' erblöke Skëköl mik e' wërke Jesús wökī tsawe dō bataie. Ie' kotewā krus mik, e' dör jaē taijē, erē e' kè kī ie' tkine yēs. Ie' wa ijcher tō ie' tts'erdaē buaē aishkuö ta, e' kueki idalē'ttséitö er bua' wa. Ìñe ta ie' tkërka dalöiërta' taijē Skëköl tkër ikulè kī e' ulà bua'kka.

<sup>3</sup> Pē sulusipa tō ie' we'ik taijē, e' kos dalē'ttséitö. E' bikeitsó buaē as a' kè shtrirwā erblök Skëköl mik ta ilo'yè.

<sup>4</sup> Moki a' tso' ñippök sene sulu ta, e' kueki a' weirke taijē, erē kam a' weir dō a' duòwā pé tēr taijē ekkè wes Jesús es. <sup>5-6</sup> Skëköl yëkkuö kī ie' tō a' pattè wes ie' ala'r es, wēsua e' chowa a' éna, e' tō iché i' es:

“A ye' alà, wēpa kos dalër Skëköl éna, esepa paruekitö.

Wēpa klö'wé ie' tō ila'rie, esepa uñekeitö. E' kueki mik ie' tō be' parueke, eta e' kè watöktsa be' tō.

Mik be' uñekeitö, eta kè be' erianuk.”\*

Es itso' kitule Skëköl yëkkuö kī.

<sup>7</sup> A' weirke kos, e' wa Skëköl tso' a' paruök, e' kueki e' dalē'ttsó er bua' wa. A' parueke e' wà kiane chē tō ie' tō a' sué wes ie' ala'r es. ¿Wé a' wā isuule tō alala kè paruetā' iyé tō? <sup>8</sup> Skëköl kè tō a' paruè wes ila'r ulitane es, e' ta e' wà kiane chē tō a' kè dör ie' ala'r chökle, a' dör wes ñalā alé es. <sup>9</sup> Mik se' bak ala'rla, eta se' yé tso' ká i' kī, e'pa tō se' paruetā' ta ie' dalöiè se' tō. E' dör es, e' yi-tā buaē se' kawöta S'yé tso' ká jai a' dalöiök taijē as sene michoé dō se' ulà a.

<sup>10</sup> Se' yé tso' ká i' kī, e'pa tō se' paruetā' ekuölö è wes ie'pa wa iwër buaē es. Erē Skëköl tō se' parueke se' kimoie as se' ser batse'r wes ie' es. <sup>11</sup> Mik se' padurke, eta e' kēwö ska' ta kè ittse'r buaē idalēne s'mik. Erē s'wöblane iwa, e' ta s'serdaē bèrè yēsyesè.

<sup>12</sup> E' kueki a' er diché ióne. A' erblöke Jesús mik, e' kè armi a' tō a' shtrine kueki. <sup>13</sup> A' shkó kekraē ttè yēsyesè e' ñalé wa as a' wēpa kè erblöku' buaē Jesús mik, shkōkeia wes s'klò kranewā shkò es, esepa kè kī ardö, e' skéie ie'pa buarne ta ishkömi buaē.

\* 12:5-6 Proverbios 3.11-12

**Skëköl er buaë ché se' a, e' kè watarttsa**

<sup>14</sup> A' e' mú senuk bèrè sulitane ta. Nies a' e' mú senuk batse'r wes Skëköl kî ikiane es. Yi isie kè serku' es, ese kè tò Skëképa Jesús suepa. <sup>15</sup> A' ñi kk'ónú buaë as Skëköl er buaë chöke se' a, e' kè watòttsa yi tò. Yi tò iwatéttsa, ese dör a' shuá wes kalkua sulusi tsirká es. Mik ideka, eta imalepa taië sulu'wéwaitö. <sup>16</sup> A' kè kàne trënuK. A' kè kàne ì dör batse'r ese dalöseukwá wes Esaú es. Ie' dör iyé alá tsá, e' kuekî iyé íyi kuò meke ie' a. Erè e' watò'ttsa ie' tò ièl a chkè tka' etkè, e' è skéie. <sup>17</sup> A' wá ijcher tò e' ukuòki ta ie' kî ikiane tò iyé mú er buaë chò ie' a wes ie'pa wöblar alá wëm tsá kune ese a er buaë chök es. E' kiéitö iyé a iè wa kköchè wa taië, erè kè wes ie' a ionukia, iwake' watènettsa.

<sup>18</sup> I'ne ta a' kè doku' Skëköl wörki wes ká iaiä se' yépa dè'rö ie' ska' es. Mik ie'pa dökewatke Sinaí kébata a, eta ká ttse- newá míá ttsettseë, e' shuá bö' taië ñarke kabata kî, siwá' bitsirke darèrè, e' kos ttsé ie'pa tò sué ie'pa tò. <sup>19-20</sup> Duk blarke taië ttsé ie'pa tò. Nies Skëköl ttöke e' ttsé ie'pa tò. Ì ché ie' tò ie'pa a, e' yöki ie'pa suane taië. Ie' iché ie'pa a: "Yi deka kabata i' kî, se' ö iyiwak, ese kawöta ttèwá ák wa." Ttè e' kè dal'è'ttsénuk ie'pa a. E' kuekî ie'pa kköché taië tò mú kè it-töia ie'pa ta. <sup>21</sup> Moki ì sué ie'pa tò, ì ttsé ie'pa tò e' tò ie'pa suawé taië. Nies Moisés wák kköchöwéitö ta ichéitö: "¡Taië ye' painéka suane è wa!"

<sup>22</sup> Erè i'ne ta kè idör es a' a. E' skéie a' detke kabata kè wërta' kiè Sión kébata ee, e' dör Jerusalén tso' ká jai a e'. Eë Skëköl chók serke. Eë ie' biyöchökwakpa tso' taië, kè shtar'ta' ekkè, e'pa daparke ie' kikökka. <sup>23</sup> Eë wépa kos de Skëköl alá tsáie esepa tso' ñi dapa'uk ttsé'ne bua'

wa. Ie'pa kiè tso' kitule yëkkuö tso' ee' e' kî, e'pa shu' a' dör. Eë a' detke Skëköl dör sulitane shulökwak, e' wörki. Nies a' detke pè' bak senuk yësyésè ká i' kî, esepa ta ñita. Ie'pa yuétke Skëköl tò yësyésè, kè ì kianeia ie'pa kî. <sup>24</sup> Nies a' detke Jesús ska', ie' dör ttè pa'ali me' Skëköl tò se' a, e' kanéukwak. Ie' kòtewa ipé tène taië, e' wa se' batse'wé Skëköl tò. Ie' kòtewa e' dör s'tsa'koie, e' kè dör wes Abel kòtewa, e' nuí kî ièl tsaiëne es.

<sup>25</sup> E' kuekî a' e' kk'ónú. Skëköl ttöke a' ta, e' kè watarttsa. Ká iaiä wépa ta ie' ut ká i' kî, e' watè'ttsa ie'pa tò, e' nuí kè ulá a ie'pa bakyal, e' ta çwes se' tkòyalmi i'ne ta ie' ttöke ká jai a e' ttò watéttsasö e' nuí ulá a? <sup>26</sup> Ká iaiä mik ie' ut ie'pa ta, eta e' tò ká i' wötio' darèrè. Erè i'ne ta ie' ichè: "kawö dörae ta ká i' wötí'weraëyö etökichane, erè kè dör ká i' è, ñies ká jai kos wötí'weraëyö."† <sup>27</sup> Mik ie' tò iché es, eta e' wà kiane chè tò íyi kos yö'itö wötirta', ese wötí'weraëitö, skerattsaitö as ì kè wötirta' kè erta'wa, ese è atne iskéie.

<sup>28-29</sup> Ì blúie Skëköl tso' e' a se' tso', e' kè wötirta' kè erta'wa. E' kuekî wéstela chösö ie' a. Ie' dalò ta' taië wes bö' ñar taië es, e' kuekî ie' dalöiösö taië suane wa, wes ie' wa iwër buaë es.

**Wes Jesús mik erblökwakpa kawöta senuk**

**13** A' ñi daléritsó buaë kekraë ñi èl-paie, kè ilo'yar.

<sup>2</sup> Yi kè suule a' wa, ese de a' u a, eta ikiówa buaë. Welepa tò io' es eta Skëköl biyöchökwakpa dè'wa ie'pa u a, erè e' kè ane ie'pa éna. E' kuekî kè a' éna ichökwa s'malepa kiökwá buaë a' u a.

<sup>3</sup> S'yamipa tso' wötëule s'wöto wé a, esepa kímú wes a' wákpa tso' wötëule ie'pa ta ñita es. S'yamipa welepa weirke Jesús ttè kuekî, eta a' tò ibikeitsó wes a' wákpa weirke es.

†12:26 Hageo 2.6

<sup>4</sup>S'senewabak e' tté dalöiö. Wépa tö tté e' dalösewéwá tré wa ì wa esepa wömerattsa weinuk Skéköl tö. E' kueki kè a' trénuq yés. Kè a' tö s'senewabak dalöseukwá.

<sup>5</sup>Kè a' er mukwá inuköl kî yés. Skéköl tö iyë'bak i' es: "Ye' kè tö be' mepaat yés, ye' tö be' kkönè michoë."<sup>3</sup> E' kueki ì tso' a' wá, as e' tö a' ttsë'ù buaë. <sup>6</sup>Se' erblöke Skéköl mik, e' kueki kè se' suane ì yöki. Se' tö ichèmi wés its'o' kitule Skéköl yékkuö kî es, e' tö ichè:

"Skéköl dör ye' kimukwak,  
e' kueki ì wèmi s'ditsö tö ye' ta, e' kè yöki ye' suane."<sup>4</sup>

<sup>7</sup>A' wökirpa bak a' wöbla'uk Skéköl tté wa, e'pa ska' a' er anúne. Wés ie'pa bak senuk qos ena wés ie'pa blénewa, e' bikeitsö buaë tã a' erblö Jesús mik wés ie'pa es. <sup>8</sup>Jesucristo kè manerta'. Wés ie' dör ká iaiaë, es ie' dör i'ñe, ñies es ie' döraë aishkuö tã kekraë. <sup>9</sup>E' kueki kè a' e' muktsá e' kitö'uk tté kuá'kî qos kè dör Jesús tté mokî ese wa. Tté dalöiëno wele tö ichè tö chkè wésele kè katar. Tté ese qos kè dör ìie bua' se' er diché ioie. Wépa tö tté ese dalöieke, e' kè tö ie'pa kímepa. Erë Skéköl er buaë chöke se' a, e' je' tö se' er diché iëmi buaë.

<sup>10</sup>Sacerdotepa bak kã' tso' íyi mokã Skéköl a' e' wakanéuk, e'pa a' kawö mène iyiwak ña'wëkewa kã' e' kî ese chkà kak katök. Erë se' erblöke Jesús mik, e' dör wés kã' ñe' wakanewekerakitö es, ie' wa se' tsatkërmí. Erë wépa tso'ia' erblök kã' ñe' mik, esepa kè a' e' tsatkënuq. <sup>11</sup>Iyiwak jhök sacerdote kibi bak duas bik ekkè nuì olo'yoie, ese pé tsukmi ie'pa bak Skéköl wé shü batse'r taië shütë ee. Erë iyiwak ese nu ña'ukwa ie'pa bak ie'pa ká döwá e' wishet. <sup>12</sup>Es ñies Jesús kótewá Jerusalén kköiëule e' wishet se' batse'woie ipé wa. <sup>13</sup>E' kueki kè se'

erblöia judiowak tté dalöiëno e' mik. Mishka bánet Jesús tã weinuk jaënuq wés ie' weine jaëne es. <sup>14</sup>E' wà dör tö ká i' a kè se' wá ká ta' wés Jerusalén es. E' skéie ká yöbië doia aishkuö tã, e' panuk se' tso' kröröë. <sup>15</sup>E' kueki Skéköl kíkõkasö kekraë Jesucristo batamik. E' dör buaë wés iyiwak jhèsò mè ie' a idalöioie es. E' kueki ikíkõkasö s'wák kkö wa. <sup>16</sup>Kè a' éna ichökwa ì buaë uk ena ñi kimuk. E' dör buaë ñies wés íyi mekesö Skéköl a es. A' tö iwé es, e' tã e' wër buaë ie' wa.

<sup>17</sup>A' wökirpa wöñirke taië a' kkönè batamik. Ie'pa éna iane tö e' kî ie'pa chakerane Skéköl tö. E' kueki ie'pa tté iütó ena idalöiö. E' ú as ie'pa ttsë'ù buaë ikanè tö, kè kköchöky'. A' kè tö iwé es, e' tã e' kè dör buaë a' a.

<sup>18</sup>A' tö ikió Skéköl a kekraë sa' kî. Sa' wá ijcher tö sa' er kè tö sa' kateku' ì kî. Kekraë sa' e' ché senuk buaë yësyësë. <sup>19</sup>Ñies ye' kköchò a' a tö a' ikió Skéköl a as ie' tö ye' a ikéwö mù tö ye' mi'ne bet a' weblök.

### Yëkkuö shtökwak e' chéat

<sup>20-21</sup>Skéköl dör sene bèrë mukwak e' tö Skékëpa Jesús shkeo'kane. As ie' tö ì qos kiane a' kî senioie wés ie' kî ikiane es, e' mù a' a. Ñies ì wër buaë ie' wa as ese qos uk ie' tö a' kò Jesucristo diché wa. Jesús tö tté pa'alí yöbië mène se' a, e' kaneó' ie' pé wa. Ie' dör se' kkö'nukwak kibiie. ¡Cristo kíkõkasö taië kekraë! Es e' idir.

<sup>22</sup>A yamipa, tté böt mañat i' shtéyö a' pattoie, e' mú klö'ù a' tö er bua' wa. <sup>23</sup>Ñies ye' kî ikiane tö a' wá ijchenú tö s'yami Timoteo bak wötëule, e' yënettsane. Ie' de bet ye' ska', etã ye' wá ie' mi'ke e' tã mik ye' mi'ke a' weblök etã.

<sup>3</sup>13:5 Deuteronomio 31.6

<sup>4</sup>13:6 Salmo 118.6-7

<sup>24</sup> A' wökirpa kōs ena s'batse'r malepa kōs shke'ú ña. Ñies s'yamipa dör Italia wakpa tso' ye' ta, e'pa tö a' shke'wémi.

<sup>25</sup> As S'yé er buaë chò a' ulitane a.



## Yëkkuö kit Santiago tö

### Santiago

Yëkkuö i' kit Santiago tö. Welepa tö ibikeitsè tö ie' dör Jesús ël eköl. Ie' bak senuk Jerusalén ena ee' ie' bak Jesús mik erblökwakpa wökirie. Nies mik Jesús ttekölpa tsá ena Jesús mik erblökwakpa wökirpa malepa e'pa nì dapa' Jerusalén Pablo kanè pakoie, etá Santiago tso' iwökirie (Hechos 15 saú). Mateo 13.55,56 tö Jesús ëlpa ena ikutapa e'pa chè.

Israel aleripa erblè' Jesús mik esepa taiè bak senuk ká bánet kuá'ki kuá'ki a o'kapaie. E'pa a Santiago tö yëkkuö i' kit. Yëkkuö i' kit ie' tö kabene kuá'ki kuá'ki cheke erè e' yöki ie' tö iché: Mik se' serkeia ká i' ki etá se' weirdaé Jesús mik erblè kueki, e' wa Skéköl tö se' kimeke senuk yesyésè ie' a. E' kueki kè se' kàne tkinukwa se' weirke e' wa. Se' ké ttsè'nuk buaè mik s'weirke etá. Es Santiago tö iché.

E' kjié ta ie' tö iché wes se' serke ena i weke se' tö, e' wa iwënewa tö mokì se' erblöke Jesús mik ö au. Wes se' tö s'malepa sueke e' dör ibua'ie. S'siarëpa ki Skéköl tkirke ena ie' wöa ta sulitane dör nies. E' kueki kè se' kàne inuköl blúpa sauk bua'ie s'siarëpa tsata.

E' kjiéta Santiago tö iché tö inuköl blúpa tö s'siarëpa watëttsa ena kè ipatuè buaè, esepa ki taiè kabene tso' S'yé wöa, e' tö iwe'ikeraè s'siarëpa we'ikè e' nuí ki.

### Shkë'wè

**1** Ye' dör Santiago. Ye' dör Skéköl ena Skékëpa Jesucristo, e'pa kanè méso eköl. Ye' tso' yëkkuö i' shtök a' dör Skéköl icha<sup>8</sup> e'pa a. A' shkë'wëmiyö.

### S'weirke kos e' dalè'ttsösö

<sup>2</sup>A ye' yamipa, mik i sulu tköke a' ta tsakiè a' ma'woie, etá a' ibikeitsó: “;Ayëcha buaè ye' ta!” <sup>3</sup>E' wà dör tö a' wa ijcher tö mik se' erblöke Skéköl mik e' ma'orke, etá e' tö se' kimeke e' tkökwa darërèè. <sup>4</sup>E' kueki a' e' tkökwa darërèè erblök Skéköl mik, kè ilo'yar as a' er kurwa buaè darërèè wes ie' ki ikiane es, kè i' kiarpaia a' ki ie' wöa.

<sup>5</sup>Erè a' welepa kè éna iane tö i dör bua'ie wè, e' ta ikió Skéköl a ta ie' tö a' kimeräé as a' éna iwà ar buaè. E' kiésö ie' a, e' kè tö ie' tsiriwè. Ie' tö i buaè meke sulitane a taiè kè erta'wa ekkè. E' kueki ikió ie' a. <sup>6</sup>Erè mik a' tö ilè kié ie' a, etá a' erbló darërèè ie' è mik, kè ibikeitsar bötböt. Yi ibikeitséka bötböt, ese dör wes dayè uyè siwa' tö wì a dià a es, kè merta'wa bèrè. <sup>7-8</sup>Yi dör es, ese erbiköke bötböt kekraé, kè erbikò etkëme. E' kueki ese kè tö ibikeitsök tö Skéköl tö i mèmi ie' a.

<sup>9</sup>S'yamipa siarëpa erblöke Jesús mik, esepa ttsè'nú buaè shute, Skéköl tö ie'pa tkéka pè' taiè ie' a e' kueki. <sup>10</sup>Es nies s'yamipa inuköl blúpa erblöke Jesús mik, esepa ttsè'nú buaè shute, Skéköl tö ie'pa wöéwa diöshet e' kueki. Ie'pa ta itköraé wes ma'ma wörkua es. <sup>11</sup>Mik diwö deka ba'baè, etá e' tö ma'ma wörkua alabëwëwa anewa, kè wëria buaè wes kuaè es. E' suè itköraé inuköl blúpa ta, ie'pa iyi tso' taiè, e' shua iblërdawarak.

<sup>12</sup>Wépa ma'orke e' dalè'ttsekerakitö er bua' wa, ayëcha buaè esepa. Ie'pa dettsa buaè, e' ta sene michoè merdaé ie'pa a iskéie. E' muk Skéköl kablè' wépa éna ie' dalèr esepa kos a.

<sup>13</sup>Mik yi erkié i sulu wamblök, e' ta kè ichar: “Skéköl tö ye' erkiöwé i sulu wamblök.” Kè yi a Skéköl erkinuk

§1:1 a' dör Skéköl icha: Griegoie ttè i' dör: *ditséwö dabom eyök kí bøl bakyalmi ká wa'ne*.

ì sulu wamblök. Nies Skëköl kè tö yi erkiöwepa ì sulu wamblök. E' kueki kè yi kàne ichök: “Skëköl tö ye' erkiöwé ì sulu wamblök.” <sup>14</sup>E' skéie, se' wák dër suluë, e' tö se' erkiöwëke ì sulu wamblök ta sulu se' éna iwamblak. <sup>15</sup>E' ukuöki ta iwawamblésö. E' ukuöki ta se' wöblanewatke ì sulu è wamblök, e' nuí ki s' duörawa.

<sup>16</sup>A yamipa dalër taië ye' éna, kè a' e' kitö'uk. <sup>17</sup>Ì kos dör buaë yësyësë tso' se' wa, ese meke se' a' S'yé tso' ká jaì a, e' tö. Ì kos dalöburke ká jaì a, e' yö' ie' tö. Íyi ekké kos e' olo maneortã'ne, erë ie' kè e' mane'uta'ne. Ie' wák dër buaë yësyësë kekraë. <sup>18</sup>Ie' wák er wa, ie' tö ibikeits se' er mane'uk pa'alí ie' ala'rie, se' tö ie' ttè mokí klö'wé e' batamik. Ie' tö iwé es as se' dö' íyi kos yö' ie' tö ese tsá bua'ie.

### Skëköl ttè iütösö

<sup>19</sup>A yamipa dalër taië ye' éna, ye' ttò ttsó. Mik yile ttöke a' ta, etã ikukuebló bua'ie, kè iütar bet ena kè a' ulunukka bet. <sup>20</sup>Se' ulur e' kè tö se' kè senuk yësyësë Skëköl wörki. <sup>21</sup>E' kueki e' ya'we kos ena ì sulu skà tso' taië, ese kos watótsã uyótsã a' tö seraa. E' skéie Skëköl ttè tso' se' er a, e' klö'ú, e' wà iütó bèrë er bua' wa. Ttè e' tkëule a' a' wes íyi kuatkësö es. Ttè e' a' a' tsatkërmi.

<sup>22</sup>Erë kè a' tö Skëköl ttè kittsar kukuö è wa, iwà iütó mokíë. A' kè tö iwè es, e' ta a' e' kitö'uke. <sup>23</sup>Yile tö Skëköl ttè ttsé kukuö è wa, erë kè itö iwà iütè, e' ta ese dör wes wëm e' saü wösuö wa es. <sup>24</sup>Ie' e' sué wösuö wa ta imía, erë bet iéna ichowa tö ì suéitö iwö ki. Ta çíók ie' e' wö sué? <sup>25</sup>Erë yi er me'rie ttè dalöiëno yësyësë tso' s'yottsã ì sulu ulà a' e' ki, ta e' a' ie' tkökewã darërë ena iwà iütekeitö buaë, kè ichöta'wa iéna, ese a' Skëköl er buaë chöraë ì kos wekeitö e' a.

<sup>26</sup>Yi e' bikeitsö tö ie' dör Skëköl dalöiökwak mokíë, erë kè ikkò ki ì sulu blërta'wã chë, e' ta ese e' kitö'uke siarë. Ie' e' bikeitsö tö ie' dör Skëköl dalöiökwak, erë e' dör kache, kè wà ta'. <sup>27</sup>Erë Skëköl dör S'yé, e' wöã wépa tö ie' dalöieke yësyësë, kè ì sulu ta', esepa tö jchu'rlapa ena alaköpa schöpa weirke siarë, esepa kimeke. Nies ie'pa kè e' ia'uta'ka ì sulu tso' ká i' a' ese wa.

### Sulitane dalöiösö ñikkëë

**2**A yamipa, se' erblöke Skëkëpa Jesu-cristo olo ta' taië e' mik, esepa ké sulitane sauk ñikkëë. <sup>2-3</sup>Iwã kkachekeyö a' a' i' es: ichösö tö wëm inuköl blú debitu eköl wé a' nî dapa'uke ee, paiëule buaë datsi' bua'buwa wa, ñies ula'tsio iéitö dalölöë. E' kiéwã a' tö weshke ta ishke'wé buaë ta' iché ia: “be' e' tkóser íe kula' buaë i' ki.” E' wöshã ta' s' siarë debitu eköl datsi' nula sulu dó è ta' a' tö iché ie' a: “Be' e' duódur seë ö be' e' tkóser iski.” <sup>4</sup>A' tö iwé es, e' ta' a' e' wamblö suluë. A' er suluë, e' kueki a' kè tö s' dalöieta' ñikkëë.

<sup>5</sup>A yamipa dalër taië ye' éna, ye' ttò ttsó: wépa dör siarë ká i' a' esepa shukitbak Skëköl tö as ie'pa dö erblé ie' mik e' blúie. Nies ie'pa shukitbakitö as idörak wépa blúie ie' tso' e' kíie wes ie' kablé' wépa éna ie' dalër esepa a' es. <sup>6</sup>Erë ie'pa dalösewëkewã a' tö. E' skéie inuköl blúpa suëke a' tö buaë dalöieke taië, erë esepa tö a' we'ikeke siarë. Ie'pa wã a' mi'ke kkatè s'shulökwakpa wörki. <sup>7</sup>A' dör Jesucristo icha erë inuköl blúpa tö ie' cheke suluë. ÇWes esepa dalöiëmi a' tö s' siarëpa tsata?

<sup>8</sup>Skëköl ttè dalöiëno bua'ie kitule iyëkuö ki, e' tö iché, “A' malëpa dalërit-só wes a' wákpa e' dalër es.”\*\* Ttè e' wà iütè a' tö mokí, e' ta' e' dör buaë. <sup>9</sup>Erë a' kè tö sulitane suë ñikkëë, e' ta' a' tso' ì sulu wamblök. E' wa a' tso' ttè

\*\*2:8 Levítico 19.18

dalöiëno bua'ie e' dalöseukwā. <sup>10</sup>Yi tö ttè dalöiëno e' dalöieke iekké tā seraā, erè e' et dalösewéwaitō, e' tā e' dör wēs ie' tö ttè kōs dalösewéwā es. E' nuī kōs ane ie' kī. <sup>11</sup>E' wā dör tö Skéköl tö iyè: “kè a' kawō tā' s'senewābak dalöseukwā,” ñies e' wāk tö iyè: “kè a' kawō tā' s'ttōkwā.” Kè se' wā s'senewābak dalöseonewā, erè s'ttēwāsō, etā e' wa se' ianewā ttè dalöiëno e' dalöseukwāwak. <sup>12</sup>Ttè e' me'at Skéköl tö se' tsatkoie se' er sulu e' yöki. Ttè e' wa ie' tö s'shuleraē aishkuō tā. E' kuēki a' ttō, a' senú wēs ttè e' tö ichè es. <sup>13</sup>Kè sō s'malepa suē er siarē wa, e' tā mik se' shulirketke, etā Skéköl kè tö se' suepa er siarē wa. Erè s'malepa suēkesō er siarē wa, e' tā idörattsā buaē se' a mik se' shulirketke etā.

### Ì buaē wēsō s'malepa a e' wa iwēnewā tö mokī se' erblöke Skéköl mik

<sup>14</sup>A yamipa, yi e' chō: “ye' erblöke Skéköl mik”, erè ese kè tö ì buaē wēku' s'malepa kimoie iwā kkachöie, e' tā ie' e' chō es, e' kè dör ìie bua'. ¿Wēs ie' tsatkermi? <sup>15</sup>E' wā kkachekeyō a' a' i' es: ichōsō tö s'yami eköl, wēm ö alaköl, ese tso' siarē, datsi' kè tā', chkewō kè tā', <sup>16</sup>etā a' wēle tö iché ie' a: “Be' shkó wöbla wa, Skéköl be' kīmè. Be' e' paiō buaē, be' chkó buaē.” A' tö iché ie' a es, erè ì kiane ie' kī e' kè mēne a' wā ie' a, e' tā e' wa çì buaē wé a' tö? <sup>17</sup>Es ñies se' e' chō tö se' erblöke Skéköl mik, erè se' kè tö ì buaē wēku' s'malepa a iwā kkachöie, e' tā se' e' chō es, e' kè dör ìie bua'.

<sup>18</sup>A' wēle tö ichēmi ye' a: “ye' tsatkerdaē ye' erblöke Skéköl mik e' è batamik.” A' wēle skā tö ichēmi ye' a: “ye' tsatkerdaē ì buaē wēkeyō e' è batamik.”

Ye' tö ie'pa iütēmi i' es: S'erblöke Skéköl mik ena ì buaē wēkesō, e' mir ñita. Se' kè wā ì buaē one, e' tā kè se' a iwā kkayēnuk tö se' erblöke Skéköl mik.

Erè se' tö ì buaē wēke, e' tā e' wa se' tso' iwā kkachök tö mokī se' erblöke Skéköl mik. <sup>19</sup>Se' e' chō tö iklō'wēsō tö Skéköl dör eköl ème, etā e' dör buaē. Erè ñies aknamapa tö iklō'wé es, etā e' tö ie'pa suawēkeka painuwēkeka tajē.

<sup>20</sup>Kè a' senuk wēs kè se' er tā' es. A' éna iwā anú tö yi e' chō tö ierblöke Skéköl mik, erè kè itō ì buaē wēku', e' tā ie' chō es e' kè dör ìie bua'. <sup>21</sup>Se' yé bak ká iaiāè kiè Abraham, e' tö ilā kiè Isaac, e' méka ka' yö'itō íyi moka Skéköl a e' kī ttēwā ña'wēwa wēs Skéköl tö iuk patké' es. Mokī ie' mí e' wā uk erè Skéköl tö iwöklō'wé. Skéköl tö isué tö mokī ie' mí ittō wā iütök. E' kuēki ie' tö iklō'wé wēs wēm yēsyesē es. ¿E' kè jcher a' wā? <sup>22</sup>Es a' éna iarmi tö mokī ie' erblé Skéköl mik. Ie' tö Skéköl ttō wā iüté, e' tö iwā kkaché tö mokī ie' erblé imik. <sup>23</sup>Es ì tso' kitule Skéköl yēkkuō kī e' wā ane se' éna, e' tö ichè: “Abraham erblé Skéköl mik, e' kuēki iklō'wéitō wēs pè' buaē yēsyesē es.”†† E' kuēki ie' kine Skéköl sini'. <sup>24</sup>Es se' wā ijcher tö Skéköl tö se' klō'wé wēs pè' buaē yēsyesē es, ì buaē wēkesō iwā kkachöie tö se' erblöke ie' mik ese batamik. E' kè dör tö se' erblöke ie' mik e' è batamik.

<sup>25</sup>Es ñies ibak ká iaiāè alaköl trēr tajē kiè Rahab, e' tā. Josué tö wēpa patké Jericó weblök tö wēs iulā dòmi iska'. Ká e' a e'pa kiéwā Rahab tö buaē ie' u a it-satkoie. E' ukuōki tā ie' tö ñalā kuāki kkaché ie'pa a as e' wa itkōshkardak. Es ie' tö iwā kkaché tö ie' erblé Skéköl mik. E' batamik Skéköl tö ie' klō'wé wēs alaköl yēsyesē es.

<sup>26</sup>Mik se' duowā, etā se' wiköl míā tā s'nu è atē. E' sū mik se' e' chō tö se' erblöke Skéköl mik, erè kè ì buaē wēku'sō iwā kkachöie, e' tā se' e' chō es, e' dör wēs s'nu es, kè dör ìie bua'.

### S'kkò paklòusò as kè sò ì sulu chò

**3** A yamipa, a' wà ijcher tò sa' wépa tso' a' wòbla'uk Skèköl ttè wa, esepa chakeraë aishkuò tã Skèköl tò taië s'malepa kè dör s'wòbla'ukwakpa esepa tsata. E' kueki kè a' e' yuókka s'wòbla'ukwakpaie taië. <sup>2</sup>Sulitane tò ì sulu wambleta' taië. Erè wé kè tò ì sulu cheta' yès, ese dör buaë yèsyèsè. Ie' a' e' wöklörmì as kè itò ì sulu kos wamblö. <sup>3</sup>Kabaio diché taië, erè ikkò payueke-wasò tsa'ukuöla wa tã iwëttsëmisò wës se' kî ikiane es. <sup>4</sup>Nies kanò blubluë shkòke dayè kî, ese bikeitsó. E'pa dör bérie, e' uyeke siwã' tò darërèè, erè ñakoie e' dör tsirlala, e' wa ñakökwak tò ñakeke buaë dò wé ie' kî ikiane tò imi' ee. <sup>5</sup>Es s'kkò dör tsirlala, erè e' a' ì taië wamblèrmì wës bö'wò tsir tò tè taië ña'wèwa es. <sup>6</sup>S'kkò dör wës bö' es, e' dör ì sulu chók tso' se' a. Se' tso'ia' tssè'ka, e' dalewa e' tò se' wák kos e' sulu'wëkewa kékraë wës bö' s'ña'wè es. Bö' e' datse bö' ké a. <sup>7</sup>Iyiwak ulitane urutèrmì se' a. Iyiwak kañiru kos, dù, tkabè, ñies ì tso' dayè a, e' kos urutòoule se' wã. <sup>8</sup>E' skéie kè yi a' ikkò paklönuk as kè itò ì sulu chò. S'kkò a' ì sulu dökettsã kékraë, kè wöklör se' a. E' tò s'sulu'weke wës kapöli sulusi tò s'ttèwã es. <sup>9</sup>S'kkò wa se' tò Skèköl dör S'yé e' kîkekekã e' è wa se' alibchòke s'malepa yö'itò wës ie' wák es e'pa kî. <sup>10</sup>Se' er buaë chòke, se' alibchòke s'kkò e' è wa. A yamipa, kè se' kàne e' wamblök es. <sup>11</sup>¿Wé a' wã isuule tò di' tum etkè a' yèri tskirke ena di' sese tskirke? <sup>12</sup>A' wã ijcher buaë tò higo klò kè wòrta' olivoie ö uva kicha kè wòrta' higoie. A yamipa, es ñies di' sese ena yèri kè tskirku' di' tum etkè a.

### Skèköl siwé moki, e' tò se' ké senuk yèsyèsè

<sup>13</sup>A' wèlepa e' bikeitsò tò a' wã siwã' meke Skèköl tò e' jcher taië iwã ane buaë

a' éna, e' tã e' wã kkachó sene yèsyèsè e' wa. A' senú kè e' tssòta'ka wës wépa wã siwã' yèsyèsè jcher esepa ser es. <sup>14</sup>Erè a' ukyërkeia' ñita, a' kköwërkeia' ñita, ese tso'ia' a' er sulu'ukwã, e' tã kè a' e' tssòkka tò a' wã siwã' yèsyèsè jcher. A' e' tssòka es, e' tã a' tso' kachök. <sup>15</sup>Siwã' ese kè mène Skèköl tso' kã jai a' e' wã. E' dör siwã' tskirke kã i' kî s'ditsò er a' ese. E' meke se' a' bé tò. <sup>16</sup>Mik se' ukyërke kköwërke ñi tã etã ee taië se' ñi chiliuke, ee ì sulu kos wamblërke. <sup>17</sup>E' skéie, wépa tò Skèköl siwã' datse kã jai a' e' iuteke, esepa serke yèsyèsè. Es-epa serke bèrè ñita. Ie'pa er buaë ñi kî. Ie'pa tò s'malepa sueke er siarè wa taië. Ie'pa tò ì buaë weke kekraë sulitane a' ñikkèè er moki wa. <sup>18</sup>Wépa tò s'patteke er bua'ukne ñi kî, esepa dör wës fyí kuatkökwa es. Sene bèrè kuateke ie'pa tò tã e' wã dörattsã sene yèsyèsèie.

### Yi éna sene sulu dalër, ese dör Skèköl bolök

**4** ¿Ì tò a' ké ñi tsiriuk ñippök ñita? E' dör tò a' éna ì sulu wamblak e' tssé'woie buaë, ese tso' ñippök, ì buaë tso' a' er a, ese tã. <sup>2</sup>Ilè kkecheke a' tò taië, erè e' wã kè dö a' ulã a, e' kueki a' tso'tke s'ttökwa. Ilè tò a' ukyèweke, erè e' kè dö a' ulã a, e' kueki a' ñi tsiriuke ñippòke ñita. Erè ì kiane a' kî, ese kè kiè a' tò Skèköl a, e' kueki kè idò a' ulã a. <sup>3</sup>Mik ilè kié a' tò Skèköl a, etã kè a' wã ikine er moki wa. A' éna iwã we'ikakwa a' wákpa kî e' tssé'woie buaë. E' kueki kè a' ulã a idé'. <sup>4</sup>¿A' kè tò Skèköl dalòie wës trër wakpa kè tò imaso dalòie es! ¿A' kè wã ijcher tò ì sulu tso' kã i' a, ese wa se' wöbatsò, e' tã se' mïã Skèköl bolòkie? Iskà chekeneyö, yi tò ì sulu tso' kã i' a ese sini'kué, e' tã ese wák mïã Skèköl bolòkie. <sup>5</sup>Kè a' tò ibikeitsök tò é Skèköl yèkkuò tò ichè: "Skèköl tò se' wiköl me'at senuk se' er a, e' ulatska tkënettsã se' kî, e' tò se' sibirtseke taië." <sup>6</sup>Erè ì sulu wamblak se'

éna ese wöklö'uk Skëköl tö s'kimeke taië. Es itso' kitule ie' yëkuö kî wé ichèitö: “Wépa e' ttsòka taië, esepa wöklö'weke Skëköl tö. Erë wépa e' wöéwa diöshet, esepa a ie' er buaë chö.”<sup>7</sup> E' kueki a' e' mú Skëköl ttè dalöiök. Bé kè iutar ta ie' tkörashkar a' yöki.<sup>8</sup> A' e' batsó Skëköl mik ta ie' e' batsöra a' mik. jA pè' sulusipa, sene sulu olo'yó, a' er batse'ú! A' erbikökeia bötböt, e' olo'yó, e' skéie a' er-bikó etkéme Skëköl è a.<sup>9</sup> jA' erianú, a' kköchó taië, a' iú siarè! jKè a' jañukia, e' skéie a' iú siarè! jKè a' tsë'nukia buaë, e' skéie a' erianú! <sup>10</sup>A' e' ówa bèrè Skëköl wöa ta ie' tö a' kikeraka.

### Kè se' ñi chök suluë

<sup>11</sup>A yamipa, kè a' ñi chök suluë. Yi tö iyami cheke suluë ö iwatekeitö, e' dör wes Skëköl ttè dalöiëno cheke suluë ena iwateke es. Es ese tö idalösewéwa. A' tö iwé es, e' ta a' e' tkéka iwà shulök, kè dör iwà dalöiök. <sup>12</sup>Skëköl eköl è tö ittè dalöiëno me'at se' a. Ie' è dör s'shulökwak. Ie' è a se' tsatkërmi. Ie' è a se' kichatërmi. Etä jyi tö a' a kawó mé s'malepa kichatök?

### Kè se' e' ttsökka

<sup>13</sup>Ye' ttò ttsó. A' welepa tö ichèmi i' es: “Bulebök sa' mi'ke ká kuak'i, etä ee sa' serke duas ek ta sa' kaneblömi taië, inuköl klö'weraë sa' tö taië e' blu'woie.” <sup>14</sup>A' tö ichèmi es, erë ì tkömi a' ta e' kè ijcher a' wa. A' dör wes mochka es, bla'mi ta sö isué, erë bet ta kè iku'ia. <sup>15</sup>A' kawötä ichök i' es: “Skëköl kî ikiane, e' ta sa' sermiia ta kanè wésele wèmi sa' tö.” <sup>16</sup>Erë a' e' ttsòka taië, e' kueki a' kè tö icheta' es. A' ibikeitseke tö a' serke a' wákpa è mik. Se' e' ttsòka es, e' kos dör suluë. <sup>17</sup>Ì dör buaë wè, ese jcher se' wa, erë kè se' wa iöne, e' ta e' dör suluë.

### Inuköl blúpa pattè

**5** jA inuköl blúpa, ye' ttò ttsó! jSkëköl tö a' we'ikeraë, e' kèwö döketke a' kî! jE' kueki a' iú, a' kköchó taië! <sup>2</sup>Ì bua' bua' tso' a' wa taië, ese sulunewatke, a' datsi' katétke powak tö. <sup>3</sup>Ñies a' orochka, a' inukölchka kos, e' döli tokatke weirketke. Döli e' tö iwà kkacheke tö a' kké'blö suluë. E' kueki aishkuö ta a' weirdaë bö ké a. Ká i' erkewatke, erë a' tso'ia íyi blök taië a' wákpa a. <sup>4</sup>A' tö ittso. Wépa kaneblöke a' a' iyiwö shtök, e'pa kè patone a' wa. E' tö ie'pa kköchöweke taië, e' tsé Skëköl diché ta' taië e' tö. <sup>5</sup>Ká i' a' a' wa íyi bua' bua' tso' taië e' tsë'woie buaë. Ñermata a' dör wes köchi kiéiesö ttèwä es; köchi kè éna iane tö ì sulu datse iki. <sup>6</sup>Pè' ser yésyèsè kè a' e' tsatkër a' yöki, esepa kkaté a' tö wóméttsa ttèwä.

### Se' weirke dalé'ttsòsö bèrè er bua' wa

<sup>7</sup>A yamipa, a' weirke kos, e' dalé'ttsó er bua' wa bèrè dò mik Skëképa Jesucristo datskene etä. Íyi kuatkökwakpa saú wes ie'pa tö iwörke e' wà paneke bèrè er bua' wa es. Ñies ie'pa tö kalí paneke bèrè er bua' wa as iyiwö tskir, talar buaë, wöne taië. <sup>8</sup>Skëképa datskene e' kèwö döketke tsinet, e' kueki e' wa panú bèrè. A' e' tkówa darèrèe ie' a.

<sup>9</sup>A yamipa, kè a' ñi chök suluë as a' kè we'ikö Skëköl tö. Jesucristo dör s'shulökwak, e' döketke tsinet wes yi dökewatke ukkö a es. <sup>10</sup>A yamipa, Skëköl ttekölpa bak ká iaiäe, e'pa weine taië, e' dalé'ttsé'raitö bèrè er bua' wa. E' saú, etä iwà ú es. <sup>11</sup>Se' tö ichè: “Wépa weine siarè, e' dalé'ttsé'raitö bèrè er bua' wa, ayécha buaë esepa.” A' wa ittseule tö ká iaiäe wëm bak eköl kiè Job, e' weine taië, erë ie' tö idalé'ttsé' bèrè er bua' wa. Ñies a' wa ijcher tö mik iweine siarè e' tka, etä Skëköl er buaë yè' ie' a taië.

Skëköl er dör buaë, se' wër siarë ie' wa, e' kuëki ier buaë yë' Job a tajë.

<sup>12</sup>A yamipa, ttè chekeyö i' e' dör ibua'ie: Mik a' tö ì cheke, età kè ichar: “Ì chéyö e' dör moki Skëköl tö ká jai ena ká i' yö' e' wöwa” ö yile skà wöwa. A' ttó etkè. Mik a' icheke, “tó”, età es idir; mik a' icheke, “au”, età es idir. A' ichó es as kè a' kichatër.

### Ikiösö Skëköl a ñi kï

<sup>13</sup>A' wele weirke eriarke siarë, e' ta ese ttó Skëköl ta. A' wele ttsërke buaë, e' ta ese tö Skëköl kïkóka ittse wa. <sup>14</sup>A' wele duöke, e' ta ese tö Skëképa Jesús icha erule e'pa wökirpa tsuk patkó, as e'pa bitu ikiök Skëköl a iki ena kiò tök iki Skëképa ttò wa. <sup>15</sup>Ie'pa tö ikié Skëköl a erblè imik moki e' wa, e' ta ibuardane ta Skëképa tö ikerakane. Ñies ì sulu nuí

tso' iki, e' ta e' olo'yeraëitö iki. <sup>16</sup>E' kuëki a' e' kkatóka ñi a ta ikió Skëköl a ñi kï as a' buarne. Mik s'ser yësyësë, esepa tö ì kié Skëköl a er moki wa, età ie' tö iwà iüteraë buaë tajë. <sup>17</sup>Skëköl tteköl bak ká iaiäë kiè Elías, e' dör s'ditsö wes sulitane es. Erë ie' tö iki' Skëköl a er moki wa tö as kalí kè yër, età kalí kè yène dö duas mañal kï shaböts. <sup>18</sup>E' ukuökí ta ie' tö ikiéne Skëköl a tö as kalí yërne, età moki kalí yënene ta íyi kuá kos talane buaë.

### Ì sulu wamblökwakpa kïmusö ilo'yök

<sup>19</sup>A yamipa, a' wele tö ttè moki, e' olo'yé, erë a' wele skà tö ikimé as idöne iiütökne, e' ta e' dör buaë. <sup>20</sup>A' éna ianú tö wépa tö pë' sulusi kímé ì wambléitö e' olo'yök, esepa tö ie' tsatkée ikichatër yöki, ñies inuü tajë e' kos olo'yane iki.

## Yëkkuö tsá kit Pedro tö

### 1 Pedro

Pedro, kiè ñies Simón, e' tö yëkkuö i' kit. Jesús ttókatapa shüa ie' dör kékë taijé imalepa tsata. Erë mik Jesús klönewa ttëwa eta Pedro è tö iyë' tö ie' kè wä Jesús suule. E' ukuöki ta ie' eriane taijé ta ie' e' me' Jesús dalöiökne. Kè s'wä ijcher wé ie' bak senuk mik ie' tö yëkkuö i' kit eta. Ie' tö iché tö ie' bak senuk Babilonia (1 Pedro 5.13) erë ká bak böt kuá'ki kuá'ki Babilonia. Roma wakpa taijé bak senuk suluë Skëköl wöa wës Babilonia wakpa bak senuk es. E' kueki ie'pa ká kiè ñies Babilonia. E' kueki pë' taijé tö ibikeitsè tö mik Pedro tö yëkkuö i' kit, eta ie' tso' Roma.

Ie' tö yëkkuö i' kit Jesús mik erblök-wakpa bak senuk ká kuá'ki kuá'ki tso' Asia Menor shüa e'pa a. Iñe ta ká e' kiène Turquía. Ie'pa bak weinuk, e' kueki Pedro éna ikimak senuk batse'ne kekraë Jesús a mik ie'pa weirke e' dalewa. Ñies ie' tö ie'pa a iché tö Skëköl wák tö ie'pa klö'bak iwák ichaie, e' kueki ie'pa tuë taijé Skëköl a. E' kueki ie'pa kè kàne tk-inuk iwák è ki. E' skéie ie'pa ké senuk tso'tke e' meulettsa er bua' wa weinuk Jesús dalërmik wes ie' weine ie'pa dalërmik es. Mik ie'pa weirke Jesús kueki eta ie'pa ké ttsë'nuk buaë Wiköl Batse'r tso' mokië ie'pa a e' kueki. Es Pedro tö iché.

### Shké'wè

**1** Ye' dör Pedro. Ye' dör Jesucristo ttekölpa tsá, e'pa eköl. Ye' tso' yëkkuö i' shtök wépa shukitbak Skëköl tö iwák a mineyal senuk Ponto, Galacia, Capadocia, Asia, ñies Bitinia, esepa a.

<sup>2</sup>Skëköl dör S'yé e' tö se' shukitbak wës ie' tö ibikeitsbak kuaë es. Iwiköl wa ie' tö se' batseq' as se' tö Jesucristo ttë iütò, ñies as se' er pairir Jesucristo pé wa se'

nü yöki. As Skëköl er buaë chò ena sene bèrè mù a' a taijé.

### Skëköl kíkokaşö

<sup>3-4</sup>Skëköl dör Skëképa Jesucristo yé, e' kíkokaşö taijé. Ie' tö se' sué er siarè wa. Jesucristo kötëwä shkenekane, e' batamik ie' tö se' a sene pa'alj mé. Aishkuö ta i' buaë kos tso' ie' wä blëule se' a ká jai a, e' döraë se' ulä a, e' wä panekesö kröröë. E' kos kè nurta'wa, kè sulurta'wa, kè ertä'wa yës. <sup>5</sup>A' erblöke Jesucristo mik, e' kueki Skëköl tso' a' kkö'nuk ie' diché wa as ie' tö a' tsatkè, e' dö a' ulä a. E' tso'tke kkachè sulitane a ká erkewatke eta.

<sup>6</sup>Isalema a' kawötä weinuk ekuölö wü sù diò sù Cristo ttë kueki, erë e' dalewa a' ttsë'rke buaë a' wä ijcher tö Skëköl tö a' tsatkeraë aishkuö ta e' kueki. <sup>7</sup>A' erblö Jesucristo mik, e' ské dör orochka weirtä'wa, e' ské tsata. Se' tö orochka ma'weke bö' wa iwä kkachöie tö moki oro wöchka idir. I kè dör oro wöchka ese ñarkewa. E' sù a' weirke, e' dör a' ma'woie iwä kkachöie tö moki a' erblöke Jesucristo mik. A' dettsa buaë, e' ta mik Jesucristo datskene, eta Skëköl tö a' ttë keraka, a' kikeraka buaë.

<sup>8-9</sup>A' kè wä Jesucristo suule a' wöbla wa, erë a' éna ie' dalër. Iñe ta a' kè ku' ie' sauk, erë a' erblöke ie' mik, e' wä tö a' tsatkeraë. E' kueki a' ttsë'rke buaë shute, kè ttë ta' iwä choie ekkè.

<sup>10</sup>Ká iaiaë Skëköl ttekölpa tö s'tsatkè ñe' bikeits ena itò yulö'ttsarakitö. Ñies i kos meraë Skëköl tö se' a ie' er buaë ché se' a e' dalërmik, e' yë'rakitö. <sup>11</sup>Cristo Wiköl tö ie'pa ka' ijchenuk tö Cristo weirdaë siarè, e' ukuöki ta ilo kardaka taijé. Erë kè ie'pa éna iwä ane tö yi idir ö mik ö wës iwä tkömi. <sup>12</sup>Erë Skëköl tö ie'pa a iwä kkayë' tö ttë e' kè wä tköpa ie'pa kéwö ska', e' skéie iwä tköraë se' kéwö ska'. Ttë buaë yé' ie'pa tö, e' dör Jesucristo ttë buaë ttsë'bak a' tö e'.

Ipakökwakpa tö a' a ipaka' Wiköl Batse'r patkülebitü ká jai a e' diché wa. Íyi ikké jchenakwá suluë Skëköl biyöchökwakpa wa.

### Skëköl tö se' kié senuk buaë yësyësë

<sup>13</sup> E' kuëki a' erbikó buaë yësyësë, a' e' kkö'nú, a' tso' erkí. Mik Jesucristo datskene, eta Skëköl er buaë ché a' a, e' wà döraë a' ulá a. E' wà panú kröröë, e' ki a' er múwäie kekraë. <sup>14</sup> Skëköl ttë iutó wes alar'la buaë tö sttò iutë es. Kè a' e' muktsane a' bak ì sulu wamblök ese ane wes a' bak kenet kè wá ie' ttë mokí jcher es. <sup>15</sup> E' skéie a' senú batse'r kekraë, Skëköl tö a' klöo' e' dör batse'r e' kuëki. <sup>16</sup> Skëköl yëkküö tö ichè i' es: “Skëköl tö ichè: Ye' dör batse'r, e' kuëki a' senú batse'r.”<sup>¶</sup> Es iyë'itö.

<sup>17</sup> Skëköl tö sulitane shuleke yësyësë ñikkëë wes se' serke es, e' kieke a' tö “S'yé”, e' ta' a' kawötá ie' dalöiök suane wa a' serkeia ká i' ki e' dalewa. <sup>18</sup> A' wá ijcher tö ie' tö a' yë'ttsa a' ser suluë wes a' yépa bak senuk suluë es, e' nuí ulá a. E' ské kè patone íyi ertá'wa wes orochka ö inukölchka ese wa. <sup>19</sup> E' skéie ipatone Cristo kótewá pé tène tajë, e' wa. Ie' pé tuë tajë kè tonuk yi a. Ie' dör wes obeja wë'ne pupula jchë judiowak tö mè Skëköl a es. Obeja e' dör bua'buä kè iki ì sulu ku' yës. E' sù Cristo kè ki ì sulu ta' yës, erë ie' e' me'ttsa ttëwá se' skéie. E' kuëki Skëköl dalöiösö kekraë. <sup>20</sup> Kam ká i' yör, e' yöki ie' tö Cristo wöme'ttsabak ttëwá, erë i'ñe ta' mik ká i' erkewatke, eta iwà tka a' tsatkoie. <sup>21</sup> Cristo batamik a' erblöke ie' mik. Ie' tö Cristo shkeo'kane s'duulewá shuá ta' ilo me'itö ie' a buaë. Ie' tö iö'bak es as a' erblö ie' mik, ñies as ì weraë ie' tö, e' wà panü a' tö.

<sup>22</sup> I'ñe ta' ttë mokí e' dalöié a' tö, e' batamik a' batse'one ñi dalëritsoie er

mokí wa. Es a' kí ñi dalëritsó a' er kos wa. <sup>23</sup> A' a sene pa'alí mène, e' dör wes a' kurne erpa etökichane es. Erë e' kè dör wes s'kur erpa s'mì wa s'yé wa es, e' duöta'wa. A' kune' etökichane Skëköl ttë dör tse'ka tso' kekraë e' wa. <sup>24</sup> E' dör wes Skëköl yëkküö tö ichè es, e' tö ichè: “S'ditsö ulitane dör wes kəkō es, Ie'pa dör wes ma'ma wörkua es. Kakö sinewá ta' iwörkua anewa, <sup>25</sup> erë Skëköl ttë e' tso' kekraë.”<sup>§§</sup>

Ie' ttë e' dör Jesús ttë buaë pakane a' a e'. **2** E' kuëki, sene sulu kos olo'yó. Kè a' kachökia ñi ki. Kè a' e' ökia tö a' dör pë' buaë. Kè ukyënukia. Kè yi charia suluë a' tö. <sup>2-3</sup> Skëkëpa Jesús er buaë ché se' a, e' kke tsetke a' tö, e' kuëki ie' ttë wák wöchka yuló poë wes alala kune erpa ese tö imì tsu' yulë es as a' er kí diché iër buaë as a' tsatkër.

### Cristo dör wes ák kibi tso' u katabloie es

<sup>4</sup> A' shkówa Skëkëpa Jesucristo ska, ie' dör wes ák tso' u yuoie es erë tse'ka. E' watë'ttsa s'ditsö tö wes u yuökwakpa tö ák kè dör buaë u yuoie ese kèu es. Erë Skëköl a ta' ie' dör wes ák shukitule tuë darërë es. <sup>5</sup> Es ñies se' dör wes ák tso' u yuoie es erë tse'ka. Se' wa Wiköl Batse'r tso' iwé yuök. U e' a se' dör wes sacerdotepa batse'r es. Eë se' tö ì wër buaë Skëköl wa ese meke ie' a Jesucristo batamik. Ì wër buaë ie' wa, e' dör tö se' tö ie' dalöiö Wiköl Batse'r wa se' er wa ena se' ser kos e' wa. <sup>6</sup> E' dör wes itso' kitule Skëköl yëkküö ki es. E' ki Skëköl tö Cristo chë i' es:

“Ittsó. Ye' tö ák kibiie tkéat ye' u katabloie Sión, e' dör ák bua'ie shukitule tuë darërëë ese.

<sup>¶</sup>1:16 Levítico 11.44-45

<sup>§§</sup>1:25 Isaiás 40.6-8



Yi erblöke imik, ese kè eriarpa.”\*

<sup>7</sup>Ák e' dör Jesucristo. Se' erblöke ie' mik, esepa kikeraka Skëköl tö. Erë wépa kè erblöku' ie' mik, esepa a ta e' kè dör es. Itköke ie'pa ta wes itso' kitule Skëköl yëkkuö kī es, e' tö ichè:

“Ák watë'ttsa u yuökwakpa tö, e' yönene ák bua'buaië.”†

<sup>8</sup>Nies e' tö ichè:

“Ák e' mik pë' klastkërdaë, ie'pa ardarö iski ák e' kueki.”‡

Ie'pa kè wa Jesucristo tté buaë e' iütène, e' kueki ie'pa weirdaë e' nuí kī. E' dör wes ie'pa klastkër Jesucristo mik es. Skëköl tö ie'pa wöme'ttsabak as itkö ie'pa ta es.

<sup>9</sup>Erë a' kè dör es. Skëköl tö a' shukit as a' dö ie' wák ichaie. Ie' dör a' blú ena a' dör ie' sacerdotepa. A' dör bats'e'r ie' a. A' bak senuk ì sulu dikia wes s'ser stui a es, erë ie' tö a' yë'ttsa e' ulà a senoië ie' olo buaë taië e' a. Ie' tö iwé es as ì buaë kos wé ie' tö, e' wà pakò a' tö sulitane a.

<sup>10</sup>Kenet ta a' kè dör ie' icha, erë i'ñe ta a' dör ie' wák icha. Kenet ta ie' kè wa a' sune er siarë wa, erë i'ñe ta ie' tö a' sueke er siarë wa.

### Se' senú wes Skëköl kī ikiane es

<sup>11</sup>A ye' yamipa dalër taië ye' éna, se' tso' bërberla è ká i' kī wes upakè shkal es. Se' ká bua'ie e' dör ká jai a. E' kueki a' wák dër suluë tö a' erkiöweke ì sulu wamblök, e' kè iutar. E' tö a' wöklöweke as a' kè tö Skëköl ttò iütè. <sup>12</sup>A' senú yësyësë kekraë pë' kè tö Skëköl dalöie esepa wörki. Erë i'ñe ta' ie'pa tö a' kcateke wes a' chópa pë' sulusipa es, erë ie'pa tso' a' serke yësyësë e' wà sauk. E' kueki aishkuö ta mik Skëköl de s'chakök se' nuí kī, etā ie'pa tö ie' kikeraka wes a' serke e' kī. E' kueki a' senú buaë yësyësë kekraë.

<sup>13</sup>S'wökirpa kos ttè iütó a' tö Skëkëpa Jesús batamik. Ká wökir kibi, e' ttè iütó, ie' dör s'wökir kibi ká i' kī e' kueki. <sup>14</sup>Nies wépa patkeke ie' tö s'wökirpaie, esepa ttè iütó a' tö. Ie' tö ie'pa patkeke wépa tö ì sulu wambleke esepa we'ikök ena wépa tö ì bua' weke esepa kikökka. <sup>15</sup>Skëköl kī ikiane tö a' tö ì buaë wë, pë' tö ie' ttè watëttsa, kè wa iwà jcher yës, esepa siwa'blöwowaie as ie'pa kè tö a' chöia suluë.

<sup>16</sup>A' senú wes pë' tsatkëulettsa es. A' bak klöulewa ì sulu ulà a, e' yöki a' tsatkë'ttsa Skëköl tö, erë e' kè klö'war a' tö ì sulu wambloie. E' skéie a' senú yësyësë ie' kanè mésopaie. <sup>17</sup>Sulitane dalöió. S'yamipa malepa dalëritsó. Skëköl dalöió. Nies ká wökir kibi, e' ttè dalöió.

### S'weirke kos e' dalë'ttsösö

<sup>18</sup>A' wépa klöulewa kanè mésoie, esepa tö a' wökirpa ttò iütó. Wépa er buaë tö a' sueke buaë, nies wépa er suluë tö a' sueke kësik wa, esepa ttò iütó er bua' wa. <sup>19</sup>A' kè kī ì nuí ta', erë a' wökir tö a' we'ikeke éme, e' dalë'ttseke a' tö bèrë, a' er me'rie Skëköl kī e' kueki, e' ta e' wër buaë ie' wa. E' kueki a' wökirpa ttò iütó. <sup>20</sup>Se' weirke ì sulu wamblekesö ese nuí kī, ese dalë'ttsésö bèrë, e' ta Skëköl kè tö se' kikepakā yës. Erë se' weirke ì buaë wësö ese kueki, ese dalë'ttsésö bèrë, e' ta e' je' wër buaë ie' wa. <sup>21</sup>Ie' tö se' klö'bak as se' tö idalë'ttsö es. Cristo weine taië se' dalërmik, e' dalë'ttsë' ie' tö bèrë. Es ie' kī ikiane tö se' tö se' weirke ese dalë'ttsö bèrë wes ie' tö idalë'ttsë' es. <sup>22</sup>Cristo kè wa ì sulu wamblène yës, ie' kè kayëne yës. <sup>23</sup>Mik ie'pa tö ie' yë' suluë iwöshaë, etā ie' kè wa ie'pa yëne sulu. Mik ie'pa tö ie' we'ik taië, etā ie' kè

\*2:6 Isaías 28.16

†2:7 Salmo 118.22

‡2:8 Isaías 8.14

wa yi paüne. E' skéie e' me'atitò, Skèköl tò s'shùleke yësyësë, e' ulà a. <sup>24</sup> Cristo kòtewā wõtëulewā krus mik se' nuì kos patuoie as se' ser yësyësë, ñies as ì sulu kè wamblòiasò. Ie' shkà'ne ichkà kī tajë, e' batamik a' buanene. <sup>25</sup> A' bak wës obeja chōwa es, erë i'ñe tā a' dene Cristo ska'. Ie' dör a' kkö'nukwak buaë, ie' tò a' kkö'neke er bua' wa.

### Wës s'senewabak esepa ké senuk ñita

**3** A tayëpa, a' wëpa ttò iütò er bua' wa. A' tò iwé es, e' tā a' wëpa welepa kè erblöku' Jesús mik, esepa erblömi alé Jesús mik, a' serke buaë ie'pa tā, e' è batamik, kè wà pakaule ie'pa a. <sup>2</sup> A' wëpa tò isué tò a' serke yësyësë, Skèköl ttè dalöieke mokië, e' tò ie'pa erkiöwëmi erblök Jesús mik. <sup>3</sup> A' tayëpa, ¿moki a' e' ttsakka buaala? e' tā kè a' e' kītkarka tajë a' chkà kī. Kè ì tularkà tajë e' kī ena a' tsà kī wõnarke dalölöë oroie iie. Kè a' e' paiökka datsi' tuë darërëë ese wa. Ese kos weirta'wa. <sup>4</sup> E' skéie er buaë ñies sene bèrë, ese wa a' e' kītkó. E' kè weirta'wa ñies e' wër buaë shütë Skèköl wa. <sup>5</sup> Alakölpa bak ká iaiaë tò Skèköl dalöieta', esepa bak e' kītkök es. Ie'pa bak e' maukka Skèköl mik, ñies ie'pa bak iwëpa ttè iütök buaë. <sup>6</sup> Sara tò iwëm Abraham ttè iütë' buaë tā iki'itò kékëpa. A' tò ì buaë weke, kè suarta' ì yöki, e' tā a' dör wës Sara es.

<sup>7</sup> A wëpa alaköl tā', a' senú itā bèrë er bua' wa. Ie'pa diché kè tā' tajë wës se' wëpa es. Ñies ie'pa ulà a sene michoë dōraë se' tā ñita Skèköl er buaë ché se' a e' wa. E' kuëki ie'pa dalöió. Iü es as ì kiekie a' tò Skèköl a, ese kè wöklör.

### Jesús mik erblökwakpa ké senuk buaë sulitane tā

<sup>8</sup> Es bata ekkë tā ye' tò ichè a' ulitane a, a' senú buaë ñita bèrë. A' ñi saü er

siarë wa. A' ñi dalëritsó buaë ñi elpaie. A' ñi saü er bua' wa. A' e' ówa ñi yöki diöshet. <sup>9</sup> Yi tò ì sulu wamblé a' kī, ese kè kī iské wamblarne. Yi tò a' ché suluë, ese kè ské charne suluë. E' skéie esepa a a' er buaë chône. Skèköl tò se' klöobak er buaë choie se' a, e' kuëki a' er buaë chó s'malepa a. <sup>10-12</sup> E' dör wës Skèköl yëkkuò tò ichè es, e' tò ichè:

“Skèköl wöbla me'rie s'ser yësyësë, esepa kī ikkönuk.

Ì kiekie ie'pa tò ie' a, ese meraëitò ie'pa a. Erë wëpa e' wamblò sulu, esepa suëkeitò ibolökpaie.

E' kuëki yi kī ikiane tò ikawò tkò buaë ttsëne bua' wa kekraë, ese wák kawöta e' kkö'nuk as kè itò ì sulu chò,

as kè itò yi kītö'ü.

Ese wák kawöta ì sulu kos olo'yök,

kawöta senuk yësyësë.

Ie' ké e' chök senuk bèrë kekraë sulitane tā.”<sup>11</sup>

<sup>13</sup> A' e' tkéwā darërëë senuk yësyësë kekraë, e' tā kè yi a a' sulunukwā da'a.

<sup>14</sup> Erë a' serke yësyësë, e' kī a' weirmi alé, e' tā ayëcha e' dör buaë. Kè a' suanuk wëpa tò a' we'ikeke esepa yöki. Kè a' tk-inuk ì yöki. <sup>15</sup> E' skéie Cristo dalöió a' tò e' blúie. Yile tò a' chaké Cristo paneke a' tò kröröë, e' kī, e' tā a' tso'tke erkī kekraë iwā iütök. <sup>16</sup> Erë iwā iütó bèrë er bua' wa. A' senú yësyësë as a' er kè tò a' kkatò ì kī. E' dör es, e' tā mik pë' tò a' ché suluë a' dör Cristo mik erblökwakpa e' kuëki, etā e'pa jaërdakā ì ché ie'pa tò e' dör kache e' kuëki.

<sup>17</sup> Se' weirke ì buaë weke se' tò ese kī, Skèköl kī ikiane alé es, e' tā e' dör buaë. Erë se' weirke ì sulu wamblekesö ese kī, e' tā e' dör suluë. <sup>18</sup> Ñies Cristo weine siarë se' nuì patuoie. Ie' kòtewā etökicha ème kè duöta'waiā yës. Ie' dör yësyësë, erë ie' e' mettsa ttëwā se' kè dör yësyësë

e'pa skéie se' tsoṃi Skéköl ska'. Moki ie' kótwa pè' tò, erè ie' shkeṓkane Skéköl tò iWiköl wa. <sup>19</sup> Nies Wiköl Batse'r wa ie' dè'rö wé wimblupa tso' wötèule ee, ie' e' ali'ka e' chök ie'pa a. <sup>20</sup> Ká iai- aè ie'pa tò Skéköl ttò dalöseṓ'wa Noé késka'. Noé bak kanò taiè e' yuök, e' dalewa Skéköl tò ipana' enaè tò pè' er mane'ù ie' a, erè ie'pa kè wà ìone. E' kuèki Noé ena iyamipa pàköl wa'ne, e'pa è tsatkène kanò a di' taiè yöki. <sup>21</sup> Di' taiè bakmi Noé késka', e' tò di' a s'wöskuèe e' tsatkoie i'netà e' klea' se' a. S'wöskuè e' kè dör s'chka paskuoie. E' skéie iwà kkachekeitö tò se' tso' ikiök Skéköl a tò se' nu' olo'yó s'ki as se' er kè tò s'kkatöia. E' tò se' tsatkeke Jesucristo shkenekane e' batamik. <sup>22</sup> I'ne ta Jesucristo mine'kane ká jai a e' tkèr Skéköl ulà bua'kka<sup>s</sup> Skéköl biyöchökwakpa ulitane, nies ì ulitane tso' s'wökirie wà diché ta' kè wërta'wa esepa kos tso' ie' klò dikia.

**4** Cristo weine taiè se' skéie, e' kuèki a' e' chó a' weirke kos e' dalé'ttsök er bua' wa wes Cristo es. Yi weine ì buaè wéitö e' kuèki, esepa kè éna ì sulu wamblakia. E' kuèki a' e' chó weinuk. <sup>2</sup> Wépa dör es, ese wakpa serkeia ká i' a età kè ie'pa éna ì sulu wamblakia wes s'malepa tò iwambleke es. E' skéie ie'pa senak buaè yësyësë kekraè wes Skéköl ki ikiane es. <sup>3</sup> Kenet ta' a' kè wà Skéköl suule, e' kéwö ska' ta' a' bak ì sulu è wamblök taiè wes pè' malepa kè wà ie' suule esepa ser es. A' bak trènuke taiè. Ì sulu kukuétè'wa darèrèe. A' bak e' ttökka blo' wa taiè. A' bak ñi dapa'uk blo' yök taiè. E' kéwa a' tò ì sulu ki wambleke taiè. Nies íyi diököl tò s'dako'wè ekkè, ese dalöiök a' bak taiè skékölie. <sup>4</sup> Erè i'ne ta' a' kè mineia pè' kè tò Skéköl dalöie esepa ta' ì sulu wamblök wes ie'pa tò iwambleke kè wöklörta' es. E' tò ie'pa

tkiwèwa, e' kuèki ie'pa tò a' cheke suluè. <sup>5</sup> Skéköl dör s'duulewa ena s'tso'ia ttsé'ka, e'pa kos shulökwak. Aishkuö ta' ì sulu wamblé' ie'pa tò, e' kos ki ie'pa kawöta e' chökka ie' wörki. <sup>6</sup> Cristo ttè buaè e' pakanebak nies s'durulune esepa a. Ie'pa durulune ì sulu wamblé' ie'pa tò e' kuèki, wes Skéköl tò ime'at tò sulitane kawöta duökwa es. Erè Cristo ttè buaè e' pakanebak ie'pa a as ie'pa wikölpa ser michoè wes Skéköl ser es.

### Se' ké ñi kímuk

<sup>7</sup> Ká i' erkewatke, e' kuèki a' tso' erki, a' e' kk'ónú buaè as a' a' s'yèyer buaè. <sup>8</sup> Íyi kos tsata' a' ñi dalèritsó a' er kos wa. A' ñi dalèritsóke es, e' ta' wes alè s'yamipa e' wamblò suluè a' ki, ese kè ki a' tkirpa. <sup>9</sup> A' tò s'yamipa kiöwa er bua' wa a' u a, kè isuar suluè. <sup>10</sup> Skéköl er buaè ché a' a, e' kuèki ie' tò ime' a' a' ku'ki ku'ki ñi kimoie, e' kuèblupa a' dör. E' kuèki ì mène a' eköl eköl a' s'malepa kimoie ese wà kaneú. <sup>11</sup> A' welepa a' imène ttè pakök, e' ta' esepa kawöta Skéköl ttè è pakök. A' welepa a' imène s'kímuk, e' ta' esepa kawöta s'kímuk kos Skéköl tò e'pa a' diché métké ekkè. Ì kos wekesö e' üsö buaè as Skéköl kíkarka taiè Jesucristo batamik. Jesucristo diché ta' taiè, olo ta' taiè íyi ulitane tsata' kekraè. Es e' idir.

### Se' ttsè'nù buaè se' weirke età

<sup>12</sup> A' yamipa dalèr taiè ye' éna, mik a' weirke siarè Cristo ttè kuèki, età kè e' ki a' tkinuk. Kè a' tò ibikeitsök tò a' ta' itkòmi wes ì kè suule yi wà tkò s'ta' es. <sup>13</sup> E' skéie a' ttsè'nú buaè. Cristo weine kos e' bata de a' ki nies, e' kuèki a' ttsè'nú buaè. E' tkòke a' ta' es as a' ttsè'r buaè shute mik Cristo dene olo ta' taiè età. <sup>14</sup> Ayècha buaè mik ie'pa tò a' ché suluè Cristo kuèki, e' wà dör tò Skéköl Wiköl

§3:22 ulà bua'kka: E' kéwö ska' ta' yi tkèr blu' ulà bua'kka ese wák dalöiërta' taiè imalepa tsata.

olo ʔa' ʔajë e' tso' a' ʔa. <sup>15</sup> A' weirke s'ttëwə kuəkɪ, akblë kuəkɪ, ì sulu wamblë kuəkɪ ö ulà tië ɔ'ka íyí a e' kuəkɪ, e' je' ʔa' jaënú. <sup>16</sup> Erë a' weirke se' dör Cristo icha e' kuəkɪ, eʔa kè e' kɪ a' jaënu. E' skéie Skëköl kɪkókə a' tō ie'pa tō a' kië Cristo icha e' kuəkɪ.

<sup>17</sup> Skëköl tō sultane shuleketke, e' këwō dökewatke. Erë ie' tō iwák icha shuleraë kewe. Se' weirke i'ne ʔa, e' dör sultane weirdaë e' tsá, e' ʔa çì kè tkòpa wépa kè tō ttè buaë me' Skëköl tō e' dalöieta' esepa ʔa? <sup>18</sup> E' dör wes itso' kitule Skëköl yëkkuö kɪ es, e' tō ichè:

“Pë' serke yësyësë, iekkë ʔa esepa kè tsatkëne, e' ʔa çì kè tkòpa pë' sulusipa ena pë' e' wamblö sulu esepa ʔa?”\*\*

<sup>19</sup> Wépa mé Skëköl tō weinuk ie' ttè kuəkɪ, esepa ké ì buaë wëkerakitö, ese kɪ uk. Ie' se' yö', ie' ttö mokïë, e' kuəkɪ se' e' mù bèrë ie' ulà a.

### Skëkëpa Jesús icha wökirpa esepa patté Pedro tō

**5** I'ne ye' tō ilè cheke a' dör Skëkëpa Jesús icha wökirpa esepa a. Nies ye' dör Jesús icha wökir eköl. Cristo weine siarë, e' su'yö ye' wák wöbla wa. Mik ie' datskene, eʔa ie' olo ʔajë e' kkayërdaë sultane a, e' a ye' tso'ñak a' ʔa. E' kuəkɪ ye' tō a' a ichè tō <sup>2</sup> wépa me' Skëköl tō a' ulà a kk'önè wës obeja es, esepa kk'önú buaë, er buaë wa wës ie' kɪ ikiane es. Kè dör tō a' kè éna iwak, erë a' tō iweke. E' skéie iwakaneú er bua' wa. Nies kè ie'pa kk'önar inuköl è dalërmik, e' skéie ikk'önú er bua' wa ie'pa kimoie. <sup>3</sup> Kè a' tō ie'pa wëttsuk kësik wa. Kè a' e' tso'kkə ʔajë ie'pa kɪ. E' skéie a' senú buaë yësyësë ie'pa wörki as ie'pa ser buaë wës a' ser es. <sup>4</sup> A' tō iwé es, e' ʔa mik Cristo dör se' uli-

tane wökir kibi e' datskene, eʔa iské buaë olo ʔa' ʔajë, kè sulturə'wə e' meraëitö a' a.

### Jesús icha malepa patté Pedro tō

<sup>5</sup> A' duladulapa, a' kékëpa ttö iutö buaë. Nies a' ulitane e' wöowa diöshet nì yöki, a' nì dalöió er bua' wa. Skëköl yëkkuö tō ichè:

“Wépa e' tso'kkə ʔajë, esepa wöklöwëke Skëköl tō.

Erë wépa e' wöowa diöshet, esepa a' ie' er buaë chö.”††

<sup>6</sup> E' kuəkɪ a' e' wöowa diöshet ie' diché ʔa' ʔajë e' yöki, as ie' tō a' kɪkókə mik ikéwö de eʔa. <sup>7</sup> Ie' er me'rie a' kɪ a' kk'önöie, e' kuəkɪ kè a' tkinuk ì kɪ. Ì kos tō a' tkiwëke, a' tsiriwëke, e' múat ie' ulà a.

<sup>8</sup> A' tso' erki, a' e' kk'önú! Bé dör a' bolök. Ie' tso' a' tötiuk wës ma' name arke ʔajë, e' tō iyiwak tötiëke katëwa es. <sup>9</sup> A' e' tkówa darërë a' erblöke Skëköl mik e' a, es a' tō Satanás wöklöwëraë. A' wə ijcher tō kə wa'ne s'yamipa tso' weinuk wës a' es. E' kuəkɪ a' e' tkówa darërë Skëköl a.

<sup>10</sup> Ie' er buaë ché se' a ʔajë shütë. Ie' tō se' shukitbak as se' döñak ie' olo yöbië e' a, se' batsulewə Cristo mik e' wa. Se' weirke ekuölö è kə i' a, mik e' tka, eʔa ì sulu tso'ia se' a, e' yerattsaitö sëkkə. Ie' tō se' tkëwaraë darërë. Ie' tō se' er diché ieraë, kè ì e' alöpakaja se' kɪ. <sup>11</sup> Ie' diché ʔa' ʔajë íyí ulitane tsata. Ie' dör íyí ulitane wökir këkraë. Es e' idir.

### Pedro e' chéat

<sup>12</sup> Ye' tō Silvano ké yëkkuö i' shtök. Ye' wə ijcher tō ie' dör s'yami e' tkëulewə darërë ese. Yëkkuö i' shtéyö a' a' er diché kɪ ioie. Skëköl er buaë ché se' a ʔajë, e' shtéyö yëkkuö i' kɪ. Ye' tō ichè tō e' dör ttè mokïë, e' a' a' e' tkówa darërë.

\*\* 4:18 Proverbios 11.31

†† 5:5 Proverbios 3.34

<sup>13</sup> Jesús mik erblökwakpa kōs tso' Babilonia, e'pa tō a' shkē'wémi. E'pa shukit Skököl tō wēs ie' tō a' shukit es. Nies

Marcos dör wēs ye' wák alà es, e' tō a' shkē'wémi. <sup>14</sup> A' ñi shkē'ú er bua' wa. A' kōs dör Cristo icha, e'pa senú bèrè.

## Yëkkuö skà kit Pedro tö, i' tã ide böt

### 2 Pedro

Yëkkuö skà i' kit Pedro tö. Ie' wa ijchenewa tö iblërkewatke, e' yë'itö 2 Pedro 1.12-15 e' ki. Jesús mik erblök-wakpa weirke ierblö ñe' kuëki, e'pa a Pedro tö yëkkuö i' kit ie'pa er one Jesús tté mokië e' ska' as iserdak yësyësë ena kekraë Jesús a. E' kfieta ie' tö ie'pa a ieri mène tö pë' e' ò tö ie'pa dör Jesús mik erblök-wakpa esepa doraë ie'pa shua ikitö'ukrak. Ie' tö ie'pa a iché tö wes s'kitö'ukwakpa ñe'sepa serdaë. Nies ie' tö ie'pa a iché tö s'kitö'ukwakpa we'ikeraë Skëköl tö. E' kfieta ì tkömi ká i' erke-watke etã e' eri mène Pedro tö ie'pa a. Ie' tö iché ká i' erkewa e' këwö dewatke tsinet, e' këwö ska' tã ie'pa kawöta senuk yësyësë Jesús kikokaie.

Nies Pedro tö iché tö mokië Jesús datskene erë Skëköl tö sulitane suëke er siarë wa ena ie' ki ikiane tö se' er mane'ü tã se' erblö Jesús mik. E' paneke ie' tö er bua' wa, e' kuëki kam ie' tö Jesús patkone.

### Shkë'wè

**1** Ye' dör Simón Pedro. Ye' dör Jesucristo kanè méso. Nies ye' dör ittekölpa tsá, e'pa eköl. Jesucristo dör Skëköl ena S'tsatkök-wak. Ie' dör yësyësë, e' batamik sa' de erblök ie' mik. Ye' tso' yëkkuö i' shtök wépa de erblök ie' mik buaë mokië wes sa' es, esepa a.

<sup>2</sup>Skëköl ena Skëképa Jesús as e'pa er buaë chò ena sene bèrë mù a' a taië, a' kfi batmir buaë ie'pa mik e' a.

**Se' er diché iò senuk yësyësë Skëköl a**

<sup>3</sup>Jesús tö se' klö'bak as se' dò ie' tã ñi-tã ie' olo taië e' a, ñies as se' ser wes ie' ser es. Se' bätse ie' mik, e' wa ì kos kiane se'

ki senoië wes ie' ki ikiane es e' me'tkeitö se' a ie' diché taië e' wa. <sup>4</sup>Íyi ekkë kos wa ie' kablë' se' a as se' dò wes ie' wák dër es, as se' tkòshkar ì sulu tso' ká i' a wamblak se' éna tö se' sulu'wëwami ese ulá a. Skëköl kablë' se' a, e' me'tkeitö se' a, e' dör taië buaë shütë. <sup>5</sup>E' kuëki a' e' diché ió a' erblöke Cristo mik, e' kfi senuk yësyësë. Sene yësyësë, e' kfi Skëköl íyi anuk. <sup>6</sup>Skëköl íyi ane, e' kfi e' kkö'nuk. E' kkö'në, e' kfi íyi panuk bèrë. Íyi panë bèrë, e' kfi er mukwa Skëköl è ki. <sup>7</sup>Er mèwa Skëköl è ki, e' kfi ñi sawk er bua' wa wes ñi élpa es. Ñi suë er bua' wa, e' kfi ñi dalëritsök. <sup>8</sup>Íyi ekkë kos weke a' tö, ñies ikí weke a' tö kekraë, e' tã e' wà kiane ché tö moki' a' bätse buaë Skëképa Jesucristo mik. A' serke es, e' tã ì kos weke a' tö Skëköl a, e' wà dörattsa buaë. <sup>9</sup>Erë wépa e' chò tö ie'pa erblö Cristo mik, erë ie'pa kè tö íyi ekkë wawë, esepa dör wes s'wöbla kè wawër buaë es. Ie'pa kè éna iwà ane buaë. Wësua ie'pa éna ichowa tö ì sulu wamblë' ie'pa tö, e' pairi'ttsa Skëköl tö ie'pa ki. <sup>10</sup>A yamipa, a' e' diché ió senuk buaë yësyësë kekraë, e' wa iwà kkayërdaë tö moki' Skëköl tö a' klö'bak, a' shukitbakitö iwák a. A' tö iwé es, e' tã a' erblöke Cristo mik, e' kè olo'yepa a' tö yës. <sup>11</sup>E' wa aishkuö tã a' kirdawa buaë ì blúie Skëképa Jesucristo dör S'tsatkök-wak, e' tso' e' a. E' dör yöbië.

<sup>12</sup>Íyi ekkë jcher a' wa buaë. Ttè moki' wa a' e' wöbla' e' a' a' tso' e' tkëulewa darërëë. Erë ye' tö a' a' ikí ché michöë as a' kè éna ichowa. <sup>13</sup>Ye' tso'ia' tse'ka, etã ye' a' tã buaë idir tö ye' tö a' a' tte i' kfi ché as a' tö íyi ekkë wà bikeitsò kekraë. <sup>14</sup>Skëképa Jesucristo tö ye' a' iyë' tö wekkë alé tã ye' kè ku'ia' ká i' ki. <sup>15</sup>Ye' tö ì kos weraë as ttè i' kè chöwa a' éna yës i'ñe tã ñies mik ye' blënewatke e' ukuöki tã.

<sup>16</sup>Skëképa Jesucristo olo tã taië, e' su' sa' tö sa' wákpa wöbla wa. E' kuëki mik sa' tö a' wöbla' ie' diché tã taië

ena ie' datskene e' tté wa, etá kè sa' wá ipakane a' a ttè kè wà ta' wes sa' wákpa tò ibikeitsè ché es a' kítò'woje. <sup>17-18</sup> Mik sa' dè'rò ie' ta kabata batse'r, e' tukir k<sub>i</sub>, etá eé Skéköl dör S'yé, e' tò ie' kíkéká taië. Ttò datse Skéköl olo ta' taië e' ska', e' tò ie' ché i' es: "Se dör ye' alà dalër taië ye' éna, e' wër ye' wa buaë shute." E' kos su' sa' tò. Ttò ñe' datse ká jai a, e' tse' sa' tò, sa' tso'ñak ie' ta eé e' kuek<sub>i</sub>.

<sup>19</sup> Ì su' sa' tò, ì tse' sa' tò, e' tò ik<sub>i</sub> cheke se' a tò Jesús tté tso' kitule Skéköl yékkuò k<sub>i</sub> ká iaiaë ittekölpa wa, e' yéne moki. E' kuek<sub>i</sub> ttè kit ie'pa tò yékkuò k<sub>i</sub>, e' wà iütök a' kawötá bua'iewa. Ttè e' dör wes bö'wö batsèká stui a tò ká olo ppeeke ese es. E' tò se' er ñi'weke as se' éna iar tò ì dör moki, ì dör kache. Ttè e' tò se' kimeräè dò mik Skéképa Jesucristo datskene etá. Mik ie' de, etá ì kos ardaë buaë se' éna, e' dör wes ká ñir s'k<sub>i</sub> es. Jesucristo dör wes békwo bérie wërke bla'mi e' es. <sup>20-21</sup> Erë ì kos tsatá a' wá ijchenú tò ì ye' Skéköl ttekölpa tò, tso' kitule Skéköl yékkuò k<sub>i</sub>, e' kè yéne ie'pa wá ie'pa wákpa er wa. Erë Skéköl tò ie'pa ké ichök wes ie' k<sub>i</sub> ikiane es Wiköl Batse'r wa. E' kuek<sub>i</sub> ì kit Skéköl ttekölpa tò ká iaiaë, e' kè yéne ie'pa wá iwákpa er wa, e' dör Skéköl ttè moki.

### S'wöbla'ukwakpa kache tté wa

**2** Ká iaiaë Israel aleripa shua kachök-wakpa e' ka'ka e' chök tò ie'pa dör Skéköl ttekölpa. Es ñies iñe ta' a' shua kachökwakpa e' köraká e' chök tò ie'pa dör s'wöbla'ukwakpa Skéköl tté wa. Ie'pa e' ò tò ie'pa tso' ttè moki pakök, erë ttè wa ie'pa tò s'wöbla'weke, e' tò s'er sulu'wewami e' iütésö, e' ta' Skéköl tò s'weikeraë. Skéképa Jesucristo tò ie'pa nuñ to'tsa, erë e' wák watéttsa ie'pa tò. E' kuek<sub>i</sub> ie' tò ie'pa we'ikeraë bet. <sup>2</sup> Erë taië s'yamipa ardarö kache ttè e' a' itrë-darak taië wes iwöbla'ukwakpa es. Ie'pa kuek<sub>i</sub> ttè moki e' cheraë suluë pè' malepa

tò. <sup>3</sup> S'wöbla'ukwakpa kache tté wa, e'pa k<sub>i</sub> inuköl è kiane taië, e' kuek<sub>i</sub> ie'pa tò a' inuköl yerattsa ttè kè wà ta' pakeke ie'pa tò ese wa. E' kuek<sub>i</sub> ká iaiaë ie'pa esepa wöme'ttsabak weinuk Skéköl tò, e' kè ché'wa ie' éna.

<sup>4</sup> Ká iaiaë Skéköl biyöchökwakpa welepa tò ì sulu wamblé' ie' k<sub>i</sub>, e' nuñ kè olo'yane ie' wá ie'pa k<sub>i</sub>. Ie' tò ie'pa batrélor bö' kè a, eé ie'pa tso' wötëule moulewa stui a' ie'pa kichateraëitö aishkuò ta' e' panuk. <sup>5</sup> Ñies ká iaiaë wakpa bak senuk Noé késka' ta, e'pa tò ì sulu wamblé' taië, e' nuñ kè olo'yane ie' wá ie'pa k<sub>i</sub>. Noé tò ipaka' ie'pa a tò ie'pa kawötá senuk yësyësé, erë ie'pa kè wa ie' ttè iütène. E' kuek<sub>i</sub> Skéköl tò ie'pa ewéwa di' taië wa. Noé ena imalepa döká kul (7), e'pa è tsatké Skéköl tò di' taië yöki. <sup>6-8</sup> Ñies ká iaiaë ká böt kië Sodoma ena Gomorra, e' wakpa dör pè' sulusi. E'pa shua wëm serke eköl kië Lot, e' serke yësyësé. Ie'pa trër taië, e' ttseke, e' sueke ie' tò kekraë, e' tò ie' dör buaë e' eria'weke siarë. Ie'pa nuñ k<sub>i</sub> Skéköl tò ie'pa wöméttsa ewéwa. Ie' tò ie'pa ena ie'pa ká e' kos ña'wéwa s'eraa imuluchka è ate. Erë Lot, e' è tsatkétsaitö. Ie' tò ie'pa ewéwa es iwá kkachoie sultane a' tò es itköraë pè' sulusipa kos esepa ta.

<sup>9</sup> E' kos bak ká iaiaë, e' wa se' wa ijcher tò wépa serke buaë yësyësé, esepa tsatkërmí buaë Skéköl a' ì kos tò ie'pa we'ikeke e' ulá a. Ñies se' wa ijcher tò wépa dör ì sulu wamblökwakpa, esepa tso' blëule ie' wá ishulirkerak e' kéwö panuk. <sup>10</sup> Wépa e' mettsa e' ia'ukká sene sulusi wa wes ie'pa wák dër sulu k<sub>i</sub> ikiane es ena Skéköl ttè watéttsarak-itö, esepa kos we'ikeraëitö taië s'malepa tsatá.

S'wöbla'ukwakpa kache tté wa, e'pa e' wamblörak kësik kësik, kè tò ì ulé klö'weta', iwökir darërëè. Ie'pa kè suane wépa olo ta' taië, esepa chök suluë.

<sup>11</sup> Skëköl biyöchökwakpa diché ta' taië, olo ta' taië s'wöbla'ukwakpa kache tté wa, esepa tsata, erë ie'pa kè tò imalepa dör suluë esepa cheta' Skëköl a suluë as ikichatër. <sup>12</sup> Erë ì sulu wambleke s'wöbla'ukwakpa kache tté wa, esepa tò, e' wamblekerakitö kè wà bikeitsule wës iyiwak kañiru kè a ká arta' tso' klö'wëwä ttëwä es. Ì kè ane ie'pa éna, e' qos cheke suluë ie'pa tò. Ie'pa duörawä wës iyiwak kañiru ttëwä es. <sup>13</sup> Ie'pa tò s'malepa we'ikeke, e' skéie ie'pa weirdäë siarë. Ì sulu tò ie'pa ttsë'weke buaë, ese qos wambleke ie'pa tò taië ñiwe kè jaër ta'ia, ese tò ie'pa ttsë'weke buaë. Mik a' ñi dapa'uke chkök ñita' di'yök ñita, etä ie'pa tso' a' shua ì sulu wamblök e' ttsë'woie buaë. Ese wa ie'pa éna a' kitö'wak. Es ie'pa tò a' kawö sulu'wekewä. Ie'pa tò a' jaëwekëka taië. <sup>14</sup> Ie'pa er me'rie trë è kî. Ie'pa kè shtrirta'wä ì sulu wamblök. Wépa kè e' tkënewä darërë S'tsätökökwak tté a, esepa dakiñekerakitö as ie'pa tò ì sulu wamblöne wës ie'pa es. Ie'pa tò inuköl è kkecheke taië këkraë. Ie'pa wöme'ttsabak kichatée Skëköl tò. <sup>15-16</sup> Ie'pa dör wës s'cholor es. Nala yësyësë e' olo'yé ie'pa tò e' wambloie wës ká iaiaë Beor alà kië Balaam dör Skëköl tteköl, e' e' wamblé' es. Ie' mí ì sulu wamblök inuköl è dalërmik, erë Skëköl tò ie' burro ké ttökka ie' ta' ta' iuñitö ta' ichéitö ia: ¿Ì wambleke be' tò alije? E' tò Balaam wöklö'wé.

<sup>17</sup> S'wöbla'ukwakpa kache tté wa, e'pa dör wës di' tum itö kè a di' ta' es. Ie'pa dör wës kalí morka mochka a uyè siwa' tò kè wà yërta' es. Ie'pa wömeuletsa weinuk michoë stui ké a. <sup>18</sup> Ttë pakeke ie'pa tò e' ttsë'r buaë, erë kè iwà ta'. Ì sulu kukuëña ie'pa wä ena ì sulu kiane s'wák dër sulu e' kî, e' wa ie'pa tò wépa e' yétsa tsaririë iserkerak kitëule e' ulà a, esepa erkiöwekëkane as iarminë ì sulu a.

<sup>19</sup> Ie'pa tò icheke: "A' tò sa' tté iüté, e' ta' a' kè ku'ia klöulewä ì ulà a, a' sermi wës a' wákpa kî ikiane es." Ie'pa tò icheke es, erë ie'pa wákpa tso' klöulewä ì sulu ulà a, ie'pa kè a e' yèrpattsä wës. Mik se' kè a e' yënetsä ì ulà a, etä e' wà dör tò se' tso' klöulewä iulà a. <sup>20</sup> Skëképa Jesucristo dör S'tsätökökwak e' mik se' e' batsé, e' wa sene sulusi tso' ká i' a e' olo'ya'sò. Erë se' anemine ì sulu ulà ane, kè tò ilo'yeta', e' ta' se' a e' dör sulu ichökle kewe tsata. <sup>21</sup> Se' tò sene yësyësë e' tté klö'bak buaë kewe. Erë e' ukuökî ta' tté dalöiëno batse'r mène se' a, e' olo'yésö, e' ma buaë idir tò kè sò iklö'úpa. <sup>22</sup> E' dör wës tté mokî i' tò iché es: "Chichi chöli tuéttsa, e' ukuökî ta' inéwaneitö."†† Nies skä tò iché: "Köchi kuöwésö buaë, e' mía kuekane dó a."

### Skëképa Jesús dörane

**3** A yamipa dalër taië ye' éna, ye' tò yëkkuö tsá kit a' a, e' skä shtekeyö a' a, i' ta' ide böt. Yëkkuö böt e' kî ye' tso', tté jchertke a' wä, e' chökne a' a' pattök as a' er arne iska' ta' iwà bikeitsö bua'iewä yësyësë. <sup>2</sup> Ì ye' Skëköl ttekölpa batse'r e'pa tò ká iaiaë, e' ska' a' er anú. Nies tté dalöiëno me'at Skëképa dör S'tsätökökwak e' tò, e' ska' a' er anú. Sa' dör ittekölpa tsá, e'pa tò tté e' yé' a' a.

<sup>3</sup> A' wä ijchenú bua'iewä tò ká i' erkewatke e' këwö ska' ta' pë' serke suluë esepa döraë. Ie'pa tò ì sulu è wambleke wës ier sulu tò ikieke ia es. Ie'pa tò a' wayueraë <sup>4</sup> ta' a' a' ichakeraë: "Jesucristo kablë' dökne ¿wës e' de? Ikké ta' kè iwër ta', ¿wé idir? Se' këképa blërulunëbak, etä iyi qos mir iwák suë wës iyöne kuaë es." <sup>5</sup> Erë ie'pa wä ijcher tò ì cheke ie'pa tò e' kè yëne. Ie'pa kè kî ikiane ttsëno tò ká iaiaë Skëköl tò ká ja' ena ì qos tso' ia, e' yö' ittö è wa. Nies ká i' ena ì qos tso' iki, e' yö' ie' tò ittö è wa. Ká i' dé'ka



ie' wā di' a, es di' tso' ká i' pamik shkit. <sup>6</sup> Ie'pa kè kī ikiane ttséno tō ì ulitane bak senuk ká i' a, e' eo'wa Skéköl tō di' taië bak e' wa. <sup>7</sup> Erë ká jai ena ká i' tso' i'ñe ta, e' kicha a'riā ie' wā iwák ttè wa dò mik ie' tō iewekewa bö' wa aishkuö ta etā. E' kos tköraë mik pë' sulusipa shulirke kichatërketsā e' kēwö de etā.

<sup>8</sup> A yamipa dalër taië ye' éna, kè a' éna ichökwa tō Skéköl a ká etkè, e' dör wes duas döka mil eyök es, ñies duas döka mil eyök, e' dör wes ká etkè es. <sup>9</sup> Skékëpa Jesús kablë', e' wā tköraë. Ie' datskene sulitane shulök mik Skéköl kī ikiane etā. E' kè dör tō ie' kablë' e' chowa ie' éna wes pë' welepa tso' ibikeitsök es. E' kè dör es. Ie' kè kī ikiane tō yi weir aishkuö ta. Ie' kī ikiane tō sulitane er mane'ù ie' a. E' wā panuk ie' tso' énaë. E' kuëkī ie' kam döne.

<sup>10</sup> Erë ie' dörane, kè tköpa. Mik ie' datskene, etā e' kēwö döraë kè e' biyó yëule wes akblökwakpa döwā nañewe es. Mik ie' de, etā ká jai kos blardaë taië ta ichörawa kè wërpaia. Ì kos tso' ká jai a, e' ñardawa diardawā. E' sū ká i' ena ì kos tso' iki, e' ñardawa sekka, kè ì atukia. <sup>11</sup> E' kos erdawa es, e' ta ¿wes kè se' serpa batse'r e' tkëulewā darërëë Skéköl è a? <sup>12</sup> E' kēwö panuk se' tso' poë, e' dalewa se' e' chò senuk wes Skéköl kī ikiane es as ikēwö e' dò bet. Mik e' kēwö de, etā ká jai ñardawa ena ì kos tso'ia, e' diardawā

erdawa bö' wa. <sup>13</sup> Erë Skéköl kablë' ká jai pa'ali ena ká i' pa'ali e' yuök se' a. Wépa serke yësyësë, esepa è serdaë ee. Eë ì sulu kè ta'. E' wā paneke se' tō poë.

<sup>14</sup> A yamipa dalër taië ye' éna, a' tso' íyi ekkè wā panuk, e' dalewa a' e' tkówa darërëë senuk as mik e' kēwö de, etā ie' tō a' kū senuk bèrë ñita, kè iauleka, kè kī ì sulu tté ta'. <sup>15</sup> A' éna ianū tō Skékëpa Jesús kam dò, ie' tso'ia ipanuk as s'tsätkër. Ñies ttè e' kitat a' a' yëkkuö kī s'yami Pablo dalër taië se' éna e' tō. Ie' tō ikitat erbikè taië me' Skéköl tō ie' a e' wa. <sup>16</sup> Ttè i' kit Pablo tō yëkkuö kos kit ie' tō ekkè kī. Ie' ttè wele dör darërë, kè wā ar se' éna bet. Pë' welepa kè yöule buaë, kè e' tkëulewā buaë Jesucristo ttè a, esepa tō Pablo ttè darërë, e' wā shkul'i'wekewā wes ie'pa tō Skéköl ttè kitule yëkkuö kī malepa, e' wā shkul'i'wekewā es. E' nuí kī ie'pa weirdaë siarë.

### Ttè bata

<sup>17</sup> A yamipa dalër taië ye' éna, íyi ekkè kos jchertke a' wā buaë. E' kuëkī a' e' kkö'nú pë' sulusi ñe'sepa yöki as a' kè tō ie'pa ttò iütò. A' tso' erki as a' e' tkëulewā buaë S'tsätkökwak mik, e' kè olo'yò a' tō. <sup>18</sup> Skékëpa Jesucristo dör S'tsätkökwak, e' er buaë ché se' a, e' ttè wa a' kí e' yuó. Ie' mik a' kí e' batsó bua'ie. ¡As ie' kíkarka taië i'ñe ta ena kekraë! Es e' idir.

## Yëkkuö tsá kit Juan tö

### 1 Juan

Yëkkuö i' kit Jesús ttekölpa tsá e' eköl kiè Juan e' tö. Ie' tö ikit Jesús mik erblök-wakpa serke Asia e'pa a. Iñe ta ká e' kiè Turquía. Ie' tö ikit etá ie' dewatke kékëla. Ñies yëkkuö skà kit ie' tö döká tkël, e' böt dör tsitsir, böt dör blublu. Yëkkuö blublu e' et kiè 'Jesús Tté Buaë kit Juan tö' ena iët kiè 'I' Kkayë' Jesucristo tö Juan a e' Pakè.'

Skëköl éna Jesús mik erblök-wakpa dalër taië ena íyi taië buaë o' ie' tö ie'pa a Jesucristo batamik, e' pakè Juan tö yëkkuö i' ki. Ñies ie' tö iché tö mik se' ñi dalëritsöke etá se' wa ijcher tö Skëköl dör se' wák, e' kuëki se' kawöta ñi dalëritsök.

E' kñie ta ie' tö yëkkuö i' kit Jesús mik erblök-wakpa a s'wöbla'ukwakpa kache tté wa esepa biyó choie. Ie'pa tö s'wöbla'weke tö Jesús kè dör wes s'ditsö es. Ie'pa tö ichè tö ie' wër se' sù erè kè idör se' es. Jesús mik erblök-wakpa kè kàne ie'pa ttò ttsök. Ie'pa dör s'kitö'ukwak. Skëköl Wiköl e' je' tö Skëköl ena ilà Jesucristo e'pa tté mokì e' kkacheraë se' a. Es Juan tö iché yëkkuö i' ki.

### Sene michoë mukwak

**1** Itso' eköl dör tté tö sene michoë meke se' a e'. E' tté pakeke ye' tö a' a yëkkuö i' ki. Tsawemi ta ie' tso'tke, erè iñe ta sa' tö ichè a' a tö ie' ttò ttsé' sa' tö, ie' su' sa' tö ena ì o' ie' tö e' su' sa' tö, ñies ie' ka' sa' tö sa' ulà wa. <sup>2</sup>Ie' dör sene michoë mukwak, e' patkë'bitü S'yé tö ká i' a s'ditsöie e' kkachök se' a, e' su' sa' tö. E' kuëki sa' tö ie' tté mokì e' pakeke a' a. Sa' tö ichè a' a tö ie' tö sene michoë meke se' a. Ie' bak S'yé ta ñita kuaë kërkaë, erè S'yé tö ie' kkayë' sa' a. <sup>3</sup>Es ie' su' sa' tö,

ittò ttsé' sa' tö, e' tté pakeke sa' tö a' a i' ta as a' bàtswa sa' mik wes sa' batsulewa S'yé mik ena ilà Jesucristo mik es. <sup>4</sup>Yëkkuö i' shteke sa' tö a' a as a' ttsé'r buaë mokìë.

### Sene yësyësë

<sup>5</sup>Tté wa Jesucristo tö sa' wöbلا', e' wà pakeke sa' tö a' a, e' dör i': Skëköl dör buaë yësyësë, kè kì ì sulu ta' wes ká ñi kè a ká ttsetse ta' es. <sup>6</sup>E' kuëki se' e' chò tö se' batsulewa ie' mik, erè se' tso'ia ì sulu wamblök, e' ta se' tso' kachök. Se' kè tö tté mokì e' iuteku'. E' dör wes se' serkeia ká ttsetse a es. <sup>7</sup>E' skéie, se' serke yësyësë wes ie' ser yësyësë es, e' ta se' bàtsë buaë ñi mik. Ñies ie' alà Jesucristo, e' pé wa se' pairirke se' nuì kos e' kì.

<sup>8</sup>Se' e' chò tö se' kè tö ì sulu wamblëta', e' ta se' wák e' kitö'uke, ñies tté mokì kè ku' se' er a. <sup>9</sup>Erè Skëköl ttò mokìë ena ie' dör yësyësë. E' kuëki se' e' kkatéka ie' a, e' ta se' nuì olo'yeraëitö se' kì, ñies sene sulu nuì kos paikleraëitö se' er a. <sup>10</sup>Se' e' chò tö se' kè tö ì sulu wamblëta', e' ta se' tso' ichök tö Skëköl kachöta', ñies iwënewa tö ie' tté kè ku' se' er a.

**2** A' ye' ala'rla, ye' tso' tté ikké shtök a' a as a' kè tö ì sulu wamblö. Erè se' wele tö ì sulu wamblé, e' ta s'atökök-wak tso' eköl S'yé ska', e' dör Jesucristo dör yësyësë e'. <sup>2</sup>Jesucristo e' me'ttsa ttëwa se' skéie sene sulu nuì olo'yoie se' kì. Erè ie' kè kötëwa se' è nuì kì, ñies ie' kötëwa ká ulitane wakpa nuì kì.

### Se' kawöta ñi dalëritsök

<sup>3</sup>Skëköl tté dalöiëno e' dalöiekesö, e' ta e' wa se' wa ijcher buaë tö se' bàtsë ie' mik. <sup>4</sup>Yi e' chò: "Ye' bàtsë buaë Skëköl mik", erè ese kè tö ittè dalöieku', e' ta ie' tso' kachök, kè ittò mokì. <sup>5</sup>Erè yi tö ie' tté dalöieke, ese je' éna ie' dalër mokìë. Es se' wa ijcher tö se' batsulewa ie' mik.

<sup>6</sup> Yi e' chò: "Ye' tkërie Skëköl mik", ese ké senuk wës Jesucristo sene' es.

<sup>7</sup> A yamipa dalër tajë ye' éna, ttë dalöiëno shtekeyö a' a i', e' kè dör ttë pa'ali a' a. Tsawe ta ttë e' yënebak a' a. Ttë e' meneat ká iaiaë, e' ttsëuletke a' wa, e' dör i': se' kawöta ñi dalëritsök. <sup>8</sup> Ttë e' meneat ká iaiaë, erë e' këwö ska' ta se' er tso'ia wës ká ttsettse a es, e' kuëki kè se' éna iwà ane buaë. Erë i'ñe ta se' er a ká ñirketke Cristo ttë mokí e' kuëki. Wës Cristo éna se' dalëne, ñies wës a' ñi dalër, e' wa iwër wësua tö ttë e' dör pa'ali.

<sup>9</sup> Yi e' chò: "Cristo ttë tö ye' er ñi'wé", erë ese éna iyami ar suluë, e' ta ie' er kam ñir, ie' er tso'ia ká ttsettse a. <sup>10</sup> Erë yi éna iyami dalër mokí, ese er a ká ñine buaë, kè ì tö ie' epamine sene sulu a. <sup>11</sup> Erë yi éna iyami ar suluë, ese er tso'ia ká ttsettse a. Ie' e' wamblò suluë, kè ie' wa ijcher ì dör suluë. Ie' dör wës s'shköke ká ttsettse a es. Ká ttsettse kè tö ie' kawö mè ká sauk, e' kuëki kè ie' wa ijcher wé ie' míró.

### A' kè kàne er mukwà ì kos tso' ká i' a ese ki

<sup>12</sup> A ala'rla, a' nuì kos olo'yane a' ki Jesús batamik, e' kuëki ye' tso' yëkküö i' shtök a' a. <sup>13</sup> A' dör kékëpatke, a' bätse Jesús tso'tke tsawe ta e' mik, e' kuëki ye' tso' yëkküö i' shtök a' a. A duladulapa, a' e' ali'ka bé ki, e' kuëki ye' tso' yëkküö i' shtök a' a.

A ala'r, a' dör wës ye' ala'rla es, a' bätse S'yé mik, e' kuëki ye' tso' yëkküö i' shtök a' a. <sup>14</sup> A' dör kékëpatke, a' bätse Jesús tso'tke tsawe ta e' mik, e' kuëki ye' tso' yëkküö i' shtök a' a. A duladulapa, a' e' tkéwa darërë Skëköl ttë a, e' tso' a' er a, ñies a' e' ali'ka bé ki, e' kuëki ye' tso' yëkküö i' shtök a' a.

<sup>15</sup> Kè a' er mukwà ká i' ki ena ì tso' iki ese ki. Yi er méwa iki ese kè éna S'yé dalërta'. <sup>16</sup> ¿Ì tso' ká i' a? E' dör ì kos tö s'wák dër sulu ttsé'weke buaë ese. Ñies e'

dör ì kos wa s'wöbatsö kkechekesö tajë ese. Ñies e' dör íyi tso' se' wa wa se' e' ttsöká tajë ese. Íyi ekké kos tso' ká i' a, ese kè menebitu S'yé wa se' a, e' datse ì sulu tso' ká i' a ese wa. E' kuëki kè se' er mukwà íyi ekké ki. <sup>17</sup> Ká i' erkewatke, ñies ì sulu kos tso' iki tö se' erkíöweke ese erkewatke. Erë wépa tö ì kiane Skëköl ki ese weke, esepa ser michoë.

<sup>18</sup> A ye' ala'rla, ká i' erkewa e' këwö döketke. A' éna iane tö sa' tö a' a iyé' tö mik ká i' erkewatke, eta eköl idatse kië Cristo Bolök. Es i'ñe ta a' tö isuëke tö tajë Cristo bolökpa tso', e' kuëki se' wa ijcher tö ká i' erkewa e' këwö döketke. <sup>19</sup> Ie'pa bak se' éltëpa ta, erë ie'pa e' yélurne. E' wa iwënewa tö ie'pa kè dör mokí se' éltëpa. Ie'pa chópa se' éltëpa mokí, e'ma ie'pa tso'ia se' ta. Erë ie'pa e' yélurne, e' wa iwënewa wöshak tö ie'pa kè dör se' éltëpa.

<sup>20</sup> Cristo dör yi dör batse'r ichökle, e' tö a' batse'wé Wiköl Batse'r wa, e' kuëki a' wa Cristo ttë mokíe e' jcher. <sup>21</sup> Ye' tso' yëkküö i' shtök a' a, e' wà kè dör tö a' kè wa Cristo tté jcher. E' skéie a' wa ie' tté jcher buaë, e' kuëki ye' tso' yëkküö i' shtök a' a. A' wa ijcher tö kachökwakpa kè tö ttë mokí paketa'. <sup>22</sup> Eta ¿wépa dör kachökwakpa? Wépa tö icheke tö Jesús kè dör wé pairine'bitu idi' wa s'blúie e', esepa dör kachökwakpa. Esepa dör Cristo bolökpa, ie'pa tö S'yé ena ilà watétsa e' kuëki. <sup>23</sup> Wépa tö icheke tö Cristo kè dör Skëköl Alà, esepa tso' ie' watöksa, ñies ie'pa tso' S'yé watöksa. Erë wépa tö icheke tö Cristo dör Skëköl Alà, esepa tso' buaë S'yé ta.

<sup>24</sup> Cristo ttë mokí ttsé' a' tö mik a' tö iklö' tsawe ta, e' seü' a' er a kekraë. E' wé a' tö es, e' ta a' serdaë batsulewa S'yé ena ilà mik kekraë. <sup>25</sup> Ì muk Jesucristo kablë' se' a' e' dör i': sene michoë e'.

<sup>26</sup> Ye' tso' yëkküö i' shtök a' a as a' e' kkö'nü s'kitö'ukwakpa yöki. <sup>27</sup> Erë Cristo tö a' batse'wé Wiköl Batse'r wa, e' tso'ie

a' a, e' kuəkɪ ye' wə ijcher tō ie'pa kè tō a' kītō'wəpa. Wikōl Bats'e'r mène a' a, e' tō a' er nī'wəke as ttè ikkè kōs wà ar buaè a' éna. Ttè wa ie' tō a' wōbla'wəke, e' dör ttè mokɪ, kè dör kache. E' kuəkɪ a' kè kɪ ikiane tō yi skà bitu a' wōbla'uk. Es a' senú batsulewə Cristo mik wəs Wikōl Bats'e'r tō a' wōbla'wəke es.

### A' kè e' muktsə e' kītō'uk yi a ì sulu wambloie

<sup>28</sup> A ala'rla, a' senú batsulewə Cristo mik kəkraë as a' kè suar ena a' kè jaër ie' wörkɪ mik idatskene eta.

<sup>29</sup> A' wə ijcher tō Cristo ser yēsyesë, e' kuəkɪ a' wə ijcher nīes tō wəpa serke yēsyesë, esepa dör Skəköl ala'r.

**3** A' ittso tō wəkkè Skəköl dör S'yé e' éna se' dalër, ie' tō se' kiè iwák ala'r. Mokɪ se' detke ie' ala'rie. Erë wəpa kè tō ie' dalöiè, esepa kè e' batsötə' ie' mik, e' kuəkɪ ie'pa kè éna iwà ane tō se' dör ie' ala'r. <sup>2</sup> A yamipa dalër tajë ye' éna, j'ñe tə se' tso'tke Skəköl ala'rie, aishkuö tə ie' tō se' mane'wəraë bua'ie, erë kam se' éna iwà ar tō wəs se' maneormi. Mik Cristo datskene, etə se' tō ie' wák suəraë, e' kuəkɪ se' wə ijcher buaë tō se' dōraë wəs ie' wák es. <sup>3</sup> Wəpa kōs tso' ttè e' wə panuk, esepa e' bats'e'uke sēnoie yēsyesë wəs Cristo ser es.

<sup>4</sup> Yi tō Skəköl ttè dalöièno e' dalösewəkewə, ese tō ì sulu wambleke. E' kuəkɪ wəpa tō ì sulu wamblekeia, esepa tō Skəköl ttè dalöièno, e' dalösewəkewə. <sup>5</sup> A' wə ijcher buaë tō Jesucristo dē'bitu kə' i' a se' nuì olo'yök. Ie' kè tō ì sulu wambletə' yēs. <sup>6</sup> E' kuəkɪ wəpa tkérie Cristo mik, esepa kè ku'ia ì sulu wamblok. Erë wəpa tō ì sulu wamblekeia, esepa kè wə Cristo suule mokɪ, ie'pa kè bats ie' mik. <sup>7</sup> A ye' ala'rla, a' kè e' muktsə e' kītō'uk yi a ì sulu wambloie. Yi serke yēsyesë, ese dör yēsyesë wəs Cristo dör yēsyesë es. <sup>8</sup> Erë yi tō ì sulu wambleke, ese dör

bé icha. Ie' e' wamblò sulu kuaëmi', es ie' dör kəkraë. E' kuəkɪ yi tō ì sulu wambleke, ese dör ie' icha. Erë Skəköl Alà dē'bitu e' wə dör bé kanè kōs e' olo'yökwa. <sup>9</sup> Wəpa erblé Jesucristo mik, esepa kunene etökichane Wikōl Bats'e'r wa, ie'pa dör Skəköl ala'r, e' kuəkɪ ie'pa wák dër wəs Skəköl wák es. E' kuəkɪ ie'pa kè serku'ia klöulewə ì sulu ulà a. Ie'pa dör Skəköl ala'r e' kuəkɪ ie'pa kè a ì sulu wamblənukia. <sup>10</sup> J' wa isuëmiso tō wəpa dör Skəköl ala'r ö bé ala'r? Wəpa kè ser yēsyesë, kè tō s'yamipa dalëritsè, esepa kè dör Skəköl ala'r.

### Se' nī dalëritsö

<sup>11</sup> Kuaë, mik a' tsá erblé' Cristo mik, e'tami ttè i' ttsē'bitu a' tō: se' nī dalëritsö. <sup>12</sup> Kè se' kàne nī sauk suluë wəs Caïn tō iël su' suluë es. Ie' dör bé icha. Ie' tō iël kötwa. Ie' e' wamblò suluë erë iël ser yēsyesë, e' kuəkɪ ie' tō ikötwa.

<sup>13</sup> A ye' yamipa, wəpa kè tō Skəköl dalöiè esepa tō a' suēke suluë, e' tə kè e' kɪ a' tkinuk. <sup>14</sup> Se' nī dalëritsöke e' wa iwənewə tō Skəköl tō se' er mane'wəttəsa pa'alɪ. Kam se' erblö Skəköl mik, etə se' dör wəs s'duulewə es ie' a, erë j'ñe tə se' dör ttsē'ka ie' a. Yi kè tō iyami dalëritsè, ese tso'ia wəs s'duulewə es ie' a. <sup>15</sup> Ie' a wəpa kōs tō s'yamipa suēke suluë, esepa dör s'ttökwa wakpa. A' wə ijcher tō s'ttökwa wakpa kōs kè wə sene michoë tə'. <sup>16</sup> Jesucristo e' me'ttsə ttəwə se' skéie, e' wa ie' tō iwà kkaché tō wəs se' kawötə nī dalëritsök. E' kuəkɪ se' kawötə e' muktsə s'yamipa kimuk se' wák er wa dō s'ttəwə ie'pa skéie ekkè. <sup>17</sup> E' kuəkɪ yi wə iyi tso' kə' i' a, ese tō s'yamipa sué tō iweirke, erë ie' er tēwə darërè iyöki, kè tō ì kəkmè ia, e' tə wəs ie' ichèmi tō ie' éna Skəköl dalër? <sup>18</sup> A ye' ala'rla, kè se' kàne nī dalëritsök kkò è wa, e' skéie se' kawötə nī dalëritsök mokie iwawatke.

<sup>19-20</sup> Se' nī dalëritsöke, e' wa se' wə ijcher mokie tō se' serke buaë wəs Skəköl

ttè mokì tò ichè es. Mikle tã se' wák er tò se' kKateke tò kè se' ku' iwà iütök buaë. Erè Skèköl dör se' er tsata, ie' wã iyi ulitane jcher. E' kuekì se' ñi dalèritsöke, e' tã se' er ttsè'rdaë buaë ie' wöã kè suane. <sup>21</sup> A yamipa dalër taië ye' éna, se' er kè tò se' kkatè, e' tã se' ttsè'rmi buaë Skèköl wöã kè suane. <sup>22</sup> Ie' ttè iütokesö ena ì wër buaë ie' wa ese wekesö, e' tã ì kos kiekesö ie' a, e' meraëitö se' a. <sup>23</sup> Ie' ttè dalöiëno, e' dör i': se' kawöta erblök ie' alà Jesucristo mik, ñies se' kawöta ñi dalèritsök wes Cristo tò se' a iyë'at es. <sup>24</sup> Wépa tò ie' ttè dalöieke, esepa serke batsulewã ie' mik, ñies ie' tso' batsulewã ie'pa mik. Ie' tò iWiköl me' se' a, e' wa se' wã ijcher tò ie' tso' batsulewã se' mik.

#### A' ké ttè ulitane wà sauk buaë tò mokì idir

**4** A yamipa dalër ye' éna, taië kachök-wakpa tso' kã wañe e' chök tò ie'pa dör Skèköl ttekölpa. Esepa webló buaë tò ie'pa dör Skèköl icha ö au. <sup>2</sup> Wépa tò ichekeka tò Jesucristo yöne s'ditsöie, esepa dör Skèköl icha. Es a' wã ijchermi tò wépa a Skèköl Wiköl tso'. <sup>3</sup> Erè wépa kè tò Jesús chè es, esepa kè a Skèköl Wiköl ku'. E' skéie Cristo Bolök wiköl tso' iarak. A' wã ittseüle tò ie'pa esepa datske, itso'raktke i'ne tã kã i' a.

<sup>4</sup> A ala'rla, a' dör Skèköl icha. Ie' Wiköl tso' a' a, e' diché taië tkòka yi tso' wépa kè tò ie' dalöieta' esepa a e' tsata. E' kuekì a' e' aléka kachökwakpa ñe'pa ki. <sup>5</sup> Ie'pa kè tò Skèköl dalöie, e' kuekì ie'pa tò s'wöbla'weke ttè ese wa. Imalepa tò ie'pa ttè ttseke buaë. <sup>6</sup> Erè se' kè dör es, se' dör Skèköl icha. Wépa batsë ie' mik, esepa tò se' ttè ttseke buaë. Wépa kè dör ie' icha, esepa kè tò se' ttè ttsepa. E' wa sö isuëmi tò yi tò s'wöbla'weke ttè mokì wa Wiköl Bats'e'r wa, ö yi tò s'wöbla'weke kache tté wa.

#### Skèköl tò se' dalèritseke taië

<sup>7</sup> A yamipa dalër taië ye' éna, Skèköl tò se' a diché mé ñi dalèritsoie, e' kuekì se' ké ñi dalèritsök. Wépa ñi dalèritsö-tã, esepa dör ie' icha, ñies ie'pa batsë ie' mik. <sup>8</sup> Skèköl wák éna s'dalër, es ie' dör, e' kuekì wépa kè ñi dalër, esepa kè bats ie' mik. <sup>9</sup> Ie' tò ilà eköl ème e' patkë' kã i' a as sene michoë dò se' ulà a ilà batamik, e' wa ie' tò se' a iwà kkaché tò se' dalër ie' éna. <sup>10</sup> Skèköl dalër se' éna, e' kè dör iwà. Iwà dör tò ie' tò se' dalèritsé tã ilà patkéitö ttèwã se' skéie as se' nuì olo'yar.

<sup>11</sup> A yamipa dalër taië ye' éna, ekkè Skèköl tò se' dalèritsé, e' kuekì se' ké ñi dalèritsök. <sup>12</sup> Kè yi wã ie' suule iwöbla wa, erè se' ñi dalèritsöke mokìë, e' tã e' wa iwënewã tò ie' batsulewã se' mik ena se' ñi dalèritsöke wes ie' kì ikiane es. <sup>13</sup> Ie' tò iWiköl me' se' a, e' wa se' wã ijcher tò se' batsulewã ie' mik ena ie' batsulewã se' mik. <sup>14</sup> Ñies sa' tò isy' tò S'yé tò ilà patkë' kã i' a sulitane tsatkök. Ì cheke sa' tò, e' dör mokì. <sup>15</sup> Wépa tò ikló'wé tã icheke tò Jesús dör Skèköl Alà, esepa mik Skèköl batsulewã, ñies ie'pa batsulewã ie' mik.

<sup>16</sup> Es se' wã ijcher ena ikló'wésö tò Skèköl éna se' dalër taië. Kekraë ie' wák éna se' dalër taië. Wépa éna s'malepa dalër ena ie' dalër, esepa batsulewã ie' mik ena ie' batsulewã ie'pa mik. <sup>17</sup> Se' ñi dalèritsö wes ie' kì ikiane es, e' tã es se' serke yësýësé kã i' a wes Jesucristo ser es. Se' serke es as kè se' suar s'shulirke e' kéwö yöki. <sup>18</sup> Se' suane Skèköl yöki, e' tã e' wã kiane chè tò se' éna iane tò se' weirdaë ì sulu wamblekesö ese nuì kì. Erè wépa éna ie' dalër ena s'malepa dalër, esepa kè suane ishulir-ketke aishkuö tã e' yöki. E' kuekì wépa suane e' yöki, e' wã kiane chè tò kam ie'pa éna ie' dalër ena s'malepa dalër buaë wes ie' kì ikiane es.

<sup>19</sup> Skèköl tò se' dalèritsé kéwe, e' kuekì se' ñi dalër. <sup>20</sup> Se' e' chò tò se' éna ie'

dalër, erë s'yamipa erblöke Jesús mik, esepa suëkesö suluë, e' tã se' tso' kachök. S'yami suësö, ese kè dalër se' éna, e' tã zes Skëköl kè sune s'wã e' dalërmi se' éna? E' kueki se' wã ijcher tö se' e' chò es, e' tã s'tso' kachök. <sup>21</sup> Ie' tö ttè i' me'at se' a dalöië: yi éna Skëköl dalër, ese ké iyamipa dalëritsök ñies.

### Se' erblò wa se' e' alòkã ì sulu tso' kã i' a ese ki

**5** Wépa kos tö iklò'wé mokië tö Jesús dör wé pairine'bitu idi' wa s'blúie e', esepa dör Skëköl ala'r mokië. Yi tö iyé dalëritseke, ese tö ila'r dalëritseke ñies. <sup>2</sup> Skëköl dalër se' éna ena ittè dalöiëno e' wã iutekesö, e' wa se' wã ijcher tö moki se' tso' Skëköl ala'r dalëritsök ñies. <sup>3</sup> Skëköl dalër se' éna e' wã dör tö ittè dalöiëno e' wã iutekesö. Ie' ttè dalöiëno, e' kè dör darërëe se' a iute. <sup>4</sup> E' wã dör tö wépa dör Skëköl ala'r, esepa e' alòkã ì sulu tso' kã i' a ese ki. Se' erblöke Jesús mik, e' wa se' a diché mène e' alokã ì sulu kos ese ki. <sup>5</sup> Wépa tö iklò'wé mokië tö Jesús dör Skëköl Alà, esepa è e' alòkã ì sulu kos tso' kã i' a ese ki.

<sup>6</sup> Jesucristo dë'bitu kã i' a, e' wösuk Juan tö di' a, ñies ie' kötewã krus mik ipé tène tajë; e' wa se' tö isueke tö ie' dör Skëköl Alà. Ie' kè dë'bitu wösuke è, ñies ie' dë'bitu ttewã pé tène tajë. Skëköl Wiköl tö se' a ikkacheke tö mokië idir, ie' ttò mokië kekraë e' kueki. <sup>7</sup> Jesucristo dör Skëköl Alà, e' wã kkayëne se' a íyi mañatökicha wa. <sup>8</sup> Skëköl Wiköl tö icheke se' a tö moki idir, ñies ie' wösune di' a, ñies ie' kötewã krus mik ipé tène; ttè mañat e' tö icheke ñikkëe. <sup>9</sup> S'ditsö ttè klò'wésö, e' yitã Skëköl ttè klò'wëmisö buaë, e' dör ibua'ie e' kueki. E' dör ie' Alà chéitö se' a e' tté. <sup>10</sup> Yi erblöke ie' alà mik, ese wã ijcher buaë tö moki Jesús dör ie' Alà wës ie' tö iyé' es. Erë yi kè tö iklò'wè,

ese tö Skëköl suëke kachökwakie, ie' kè tö ittè klò'wè e' kueki. <sup>11</sup> Ttè e' dör i' es: Skëköl tö sene michoë meke se' a ie' Alà batamik. <sup>12</sup> Yi batsulewã ie' Alà mik, ese wã sene michoë tso'. Erë yi kè ku' batsulewã imik, ese kè wã itã'.

### Ttè bata

<sup>13</sup> Ye' tso' yëkkuö i' shtök a' erblöke Skëköl Alà mik esepa a' as a' éna iar buaë tö a' wã sene michoë tso'.

<sup>14</sup> E' dör es, e' tã kè se' suane ilè kiök Skëköl a. E' wã dör tö se' wã ijcher tö ilè kiésö ie' a e' dör ì kiane ie' ki ese, e' tã ie' tö ittésé. <sup>15</sup> Se' wã ijcher tö ie' tö ittésé, e' tã se' wã ijcher tö ì kiésö ie' a, e' detke se' ulà a.

<sup>16</sup> Yile tö isué tö iyami erblöke Cristo mik, ese tso' ì sulu wamblök, erë e' kè ki ie' kichatënuke aishkuö tã, e' tã a' kawötã ikiök Skëköl a iki tã ie' tö inuí olo'yeraë iki tã sene michoë meraëitö ia. Erë ì sulu tso' et, e' nuí kè olo'yepa Skëköl tö se' ki, e' nuí ki se' kichatërdaë wake'. Ye' kè tö icheku' tö a' tö ikió yi tö ì sulu e' wamblé ese ki. <sup>17</sup> Ì sulu kos wamblekesö, e' dör suluë S'yé wöa. Ì sulu wamblekesö kos e' nuí olo'yëmiitö se' ki. Erë ì sulu chéyö ñe' è nuí kè olo'yepaitö se' ki.

<sup>18</sup> Se' wã ijcher tö wépa wã Skëköl tso' iyéie, esepa kk'neke Skëköl Alà tö as bé kè a ie'pa or wës, e' kueki ie'pa kè tö ì sulu wamblëia. <sup>19</sup> Se' wã ijcher tö se' dör Skëköl icha, ñies se' wã ijcher tö pé' malepa kos tso' klöulewã bé ulà a. <sup>20</sup> Ñies se' wã ijcher tö Skëköl Alà dë'bitu kã i' a, e' tö se' er ñi'wé as se' e' batsö yi dör Skëköl ichökle e' mik. Ìne tã se' serke batsulewã yi dör ichökle e' mik, se' batsulewã ilà Jesucristo mik e' wa, e' dör Skëköl ichökle ena sene michoë e' mukwak. <sup>21</sup> A ala'rla, a' e' kk'ónú, íyi diököl tso' dalöië ese kos yöki.

## Yëkkuö skà kit Juan tò i' tã ide böt

### 2 Juan

Yëkkuö i' kit Jesús ttekölpa tsá e' eköl kiè Juan e' tò. Ie' tò yëkkuö skà kit döka tkël. Pë' welepa tò ibikeitsè tò ie' tò yëkkuö i' kit alaköl eköl ena ila'rla e'pa a. Erë iëltëpa tò ibikeitsè tò “alaköl” ena “ala'rla” e' wà kiane chè Skëképa Jesús icha erule wele. E' kueki welepa tò ibikeitsè tò ie' tò ikit Skëképa icha erule wele a.

S'kitö'ukwakpa dë'mi Jesús mik erblökwakpa shua e'pa kè tò s'wöbla'weku' Jesús tté buaë e' wa. Ie'pa éna Jesús mik erblökwakpa tsakmi ñala sulusi ki. E' kueki Juan tò yëkkuö i' kit pë' ñekkëpa biyó choie ie'pa a. Ñies ie' tò iché tò Jesús mik erblökwakpa kawötã ñi dalëritsök.

### Shke'wè

**1** A tayë<sup>¶</sup>, be' shukitbak Skëköl tò. Ye' kiè a' tò blë'këképa, e' tso' yëkkuö i' shtök be' a' ena be' ala'r a. Mokjè a' dalër tajë ye' éna. Ñies wépa tò Skëköl ttè mokj e' klö'wé, esepa kos éna a' dalër tajë. <sup>2</sup>Ttè mokj e' tso' se' kos er a, e' tso' se' tã kekraë, e' kueki sa' éna a' dalër tajë. <sup>3</sup>Skëköl dör Syé ena ilà Jesucristo, as e'pa er buaë chò a' a' ena a' saù er siarë wa. As ie'pa tò sene bèrè mù a' serke ttè mokj a' ena ñi dalëritsè a, esepa kos a.

### Se' kawötã ñi dalëritsök

<sup>4</sup>Ye' wã ijchenewa tò be' ala'r welepa tso' Syé ttè mokjè, e' wà dalöiök buaë

wes ie' tò ime'at se' a es. E' tò ye' ttsë'weke buaë. <sup>5</sup>A tayë, ye' tò be' a' ichè tò se' ulitane kawötã ñi dalëritsök. Ttè e' kè dör ttè dalöiëno pa'alí shtekeyö a' a. E' dör ttè yënebitu se' a' tsawe e'. <sup>6</sup>Se' serke yësyësë wes Skëköl ttè dalöiëno tò ichè es, e' tã se' tso' Skëköl dalëritsök mokjè. Ie' ttè dalöiëno tò ichè tò se' kawötã ñi dalëritsök. Ttè e' ttsë'bitu a' tò tsawe.

### S'wöbla'ukwakpa kache tté wa

<sup>7</sup>Tajë s'kitö'ukwakpa tso' kã wañe. Ie'pa tò icheke tò Jesucristo dë', erë kè idë'bitu s'ditsöie. Yi tò icheke es, ese dör s'kitö'ukwak ena Cristo Bolök. <sup>8</sup>A' e' kkö'nú pë' esepa yöki as sa' kaneblë' a' shua, e' kè wà weirwa éme. Ye' ki ikiane tò iské mú dò a' ulã a seraã.

<sup>9</sup>Ttè wa Cristo tò s'wöbla', e' kè klö'weku'ia yile tò erë ikj kuötkékaitö tajë kos Cristo tò iyë', e' tsatã, e' tã ese kè batsulewã Skëköl mik. Erë yi e' tkéwã darërëë Cristo ttè mokj a, ese batsulewã Syé mik ena ilà mik. <sup>10</sup>Yile de a' ska' kè wã Cristo ttè mokj mir, etã kè ese a' weshke char, kè ishke'war. <sup>11</sup>Yi tò ishke'wé, ese tò ì sulu wamblekeitö e' kimeke. E' kueki esepa kè shke'war.

### Juan e' chéat

<sup>12</sup>Tajë ye' wã íyi tso' chè a' a, erë kè ye' éna ishtak yëkkuö ki. Ye' mú mi' a' ska' tã se' tò iwã chèmi ñi a. Es se' ttsërdaë buaë shute.

<sup>13</sup>Be' ël shukitbak Skëköl tò, e' ala'r tò be' shke'wëmi.

<sup>¶</sup>1:1 tayë: Es Juan tò Skëképa icha erule a' ie' tso' yëkkuö i' shtök e'pa kiè.

## Yëkkuö skà kit Juan tö i' ta ide mañat

### 3 Juan

Juan tö yëkkuö et ena böt kit e' wák tö i' kit. Ie' tö ikit isini' eköl kiè Gayo e' a. Ie' tö yile patké' Gayo ska' Jesús tté buaë pakök erë wëm eköl e' ttsòka tajë kiè Diótrfes e' kè éna Juan tö ipatké' e'pa kiakwa. E' kè mène buaë Juan a, e' kueki ie' tö yëkkuö i' kit Gayo a. Ie' wöa iwëne buaë tö Gayo tö s'wöbla'ukwakpa kieke-wa buaë e' chak ie' éna Gayo a ena ie' kï ikiane tö e' kï wë Gayo tö es. E' kueki ie' tö yëkkuö i' kit.

### Shkë'wë

**1** A Gayo, ye' dör blë'këkëpa, e' tso' yëkkuö i' shtök be' a. Ye' éna be' dalër tajë Jesús tté moki e' kueki.

### Juan tö Gayo kíkëka buaë

<sup>2</sup> A yami dalër tajë ye' éna, ye' tso' ik-iök Skëköl a tö be' mú mir buaë ì kôs tso' be' wà e' a, ena be' mú tso' buaë kè duö-ta' wes be' er tso' buaë Skëköl ta es. <sup>3</sup> Mik s'yamipa welepa dé' ye' ska', eta e'pa tö ye' a iyë' tö be' serke buaë kekraë yësyësë wes Skëköl tté mokië tö ichè es. E' tö ye' ttsë'weke buaë. <sup>4</sup> Kekraë mik ye' tö ittse tö wépa dör wes ye' ala'r es, esepa serke buaë yësyësë wes Skëköl tté moki tö ichè es, eta e' tö ye' ttsë'weke buaë tkòka íyi ulitane tsata.

<sup>5</sup> A yami, be' dalër tajë ye' éna, s'yamipa shkòke ká wa'ne Jesús tté buaë pakök, esepa kiekewa be' tö buaë kekraë, bua'iewa wépa kè sùule be' wà esepa. <sup>6</sup> Ie'pa welepa dene sa' ska', e'pa tö be' paké Skëkëpa Jesús icha erule e'pa a tö be' éna ie'pa dalër tajë. Ye' tö be' a ichè tö ie'pa esepa kï kímú. Ì kôs kiane ie'pa

kï shkoie Jesús tté buaë pakök, ese kôs wa ie'pa kímú. Ie'pa kímú er bua' wa wes Skëköl kï ikiane es. <sup>7</sup> Ie'pa mi'ke ká wa'ne kanëblök Jesucristo a, ie'pa kè tö ì ki-eta' pë' kè tö Skëköl dalöieta' esepa a. E' kueki ie'pa kímú. <sup>8</sup> Se' ulitane kawöta ie'pa kímuk, ì kôs kiane ie'pa kï e' wa. Es se' kôs tö ie'pa kimekeñak Jesús tté moki e' wà pakök.

### Diótrfes dör se' e' ttsòka tajë ese

<sup>9</sup> Skëkëpa Jesús icha erule serke a' ká a, e'pa a ye' tö yëkkuö kit. Erë wëm tso' eë eköl kiè Diótrfes, e' wöbatsö e' tkòka imalepa wökirie, e' kueki kawö mène ye' a Jesús ttekölíe, e' watëttsaitö. <sup>10</sup> E' kueki mik ye' de a' ska', eta ì sulu wamblé ie' tö, e' cherakayö a' ulitane kukua. Ie' tso' kachök ye' ta. E' kïe ta mik s'yamipa de a' weblök, eta e'pa kè kiëwa ie' tö. A' welepa éna ie'pa kiakwa e'pa wöklö'wekeitö, uyekettsaitö Skëkëpa Jesús icha erule e' shua.

<sup>11</sup> A yami dalër tajë ye' éna, ì sulu wambleke pë' tö, ese kè wamblar be' tö. E' skéie pë' ser buaë yësyësë, es be' senú buaë yësyësë. Yi serke yësyësë, ese dör Skëköl icha. Yi e' wamblö sulu, ese kè bätse Skëköl mik.

<sup>12</sup> Sulitane tö icheke tö wëm kiè Demetrio, e' dör pë' buaë. Ie' serke buaë yësyësë wes Skëköl tté moki tö ichè es. E' wa iwënewa tö ie' dör pë' buaë. Nies sa' tö ichè tö ie' dör pë' buaë. Be' wà ijcher tö ì kôs cheke sa' tö e' dör moki.

### Juan e' chéat

<sup>13</sup> Ye' wa íyi tso' tajë chë be' a, erë kè ye' éna ishtak yëkkuö kï. <sup>14</sup> Ye' mú mi' be' ska' bet, e' wa ye' tö be' a iwà chë.

<sup>15</sup> As be' ttsë'r buaë. Íe s'yamipa tö be' shkë'wëmi. S'yamipa tso' be' ska', e'pa shkë'ú ña eköl eköl.



## Yëkkuö kit Judas tö

Juan

Yëkkuö i' kit Judas tö. Kè s'wà ijcher mokjè tö yi dör ie'. Erë welepa tö ibikeitsè tö Jesús ttekölpa tsá e' eköl kiè Judas cheke Lucas tö (Lucas 6.16; Hechos 1.13), e' tö ikit. Pè' taiè tö ibikeitsè tö ie' dör Jesús èl eköl wes Santiago es. Mateo 1.55 ena Marcos 6.3 e' tö Jesús èl kiè Judas e' chè, e' kueki welepa tö ibikeitsè es.

Judas tö yëkkuö i' kit Jesús mik erblökwakpa a, ie'pa a s'wöbla'uk kache tté wa, esepa biyó choie. Pè' esepa dè'bitu e' chök tö ie'pa dör Jesús mik erblökwakpa erë ie'pa dör s'kitö'ukwakpa ème. Ie'pa ki Jesús mik erblökwakpa kiane tsèmi ñala sulu ki. E' chök Judas tso' ie'pa a tö a' e' kkö'nú iyöki. Ie'pa esepa tö s'wöbla'weke tö Skëköl éna se' dalër taiè ena ì sulu nuí tso' se' ki e' olo'ya'itö s'ki, e' kueki se' a ì sulu kí wamblèrmi. Judas tö iché tö e' kè dör es. Ká iaiaè wépa bak e' wamblök suluè e'pa we'ik Skëköl tö siarè. E' sù ie' tö s'kitö'ukwakpa ñe' we'ikeraè. E' kkachak Judas éna Jesús mik erblökwakpa a e' kueki ie' tö yëkkuö i' kit.

### Shke'wè

**1** Ye' dör Judas, ye' dör Jesucristo kanè méso, ñies ye' dör Santiago èl, e' tso' yëkkuö i' shtök a' a. Skëköl dör S'yé e' tö a' klöç'bak ie' ala'rie. Taiè a' dalër ie' éna. Jesucristo tso' a' tsatkök ì sulu kos yöki. <sup>2</sup>As Skëköl tö a' saù er siarè wa ena sene bèrè kí mù a' a. Ñies as a' kí ñi dalèritsò taiè.

### Jesús tté buaè, e' tsatkó

<sup>3</sup>A yamipa, a' dalër taiè ye' éna. Kewe ta ye' ibikeitsé yëkkuö shtök a' a se' tsatkéne e' tté pakoie. Erë ye' ittse tö ye' kawötä kköçhök a' a tö tté mik se' er-

blöke e' tsatkó kekraè. Ttè e' meneat etö-kicha ème s'batse'rupa a kkö'nè kekraè. <sup>4</sup>Pè' welepa dewa a' shua, erë a' kibiiepa kè wà ijcher tö e'pa dör s'kitö'ukwakpa. E' kueki ye' tso' yëkkuö i' shtök a' a. Es-epa kè tö Skëköl dalöieta' moki. Ie'pa tö icheke tö ie' er buaè ché se' a, e' kueki ì sulu kos wamblak se' éna, e' wamblèmisò, kè ulé klöule. Erë kè idör es. Ttè e' wa ie'pa tö Skëképa Jesucristo dör se' blú eköl è, e' dalösewéwa. Ká iaiaè Skëköl tö iyè'bak iyëkkuö ki tö esepa kos wömeuletsatke weinuk aishkuö ta. E' kueki ye' tso' a' a ichök tö Jesús tté buaè tsatkó ie'pa esepa yöki.

### Skëköl tö ì sulu wamblökwakpa we'ikeraè

<sup>5</sup>A' wà ijchertke buaè, erë ye' éna ichakne a' a, as a' éna iarne tö Skëköl tö Israel aleripa tsatké'ttsa egiptowak ulá a, yé'ttsa Egipto. E' ukuöki ta ie'pa wépa kè erblène ie' mik e'pa e'waitö. <sup>6</sup>Ñies a' éna ianú tö Skëköl biyöçhökwakpa, e'pa welepa tö kanè mène ie'pa a, e' olo'yé ta ie' yélur wé ie'pa bak senuk ee. E' kueki ie' wà ie'pa tso' wötèule stui ké a. Ee ie'pa tso' moule tabechka kè butsta'ttsa yöbiè ese wa. Ee ie'pa tso' ikichatërke e' kèwö panuk. <sup>7</sup>Es ñies a' éna ianú tö Sodoma ena Gomorra wakpa, ñies ká tso' tsinet ie'pa o'mik e' wakpa, e'pa bak trènuke taiè ena e' ya'uk suluè. E' kueki Skëköl tö ie'pa kos we'ik michoè bö' wa. Ie'pa wa ie' tö ikkaché tö ì tköraè ì sulu wamblökwakpa ta'.

<sup>8</sup>Es ñies wépa chök ye' tso' a' a, esepa e' wamblò suluè. Ie'pa e' ia'ukeka trè wa ta ichekerakitö tö e' kkeyène ie'pa a kabsuè a. Ñies Skëköl tté watekerakitö ena ibiyöçhökwakpa olo ta' taiè, e'pa chekerakitö suluè. <sup>9</sup>Ká iaiaè mik Moisés blènewa, eta bé ki inú kiane, erë Skëköl biyöçhökwak wökir eköl kiè Miguel, e' kè tö imè ie' a, e' kueki ie'pa ñi iüté iki. Miguel dör Skëköl biyöçhökwak olo

ta' taië ese, erë ie' kè wā bé yène suluë as ikichatër. Ie' tò iché ia: “Skèköl tò be' unú.” E' è ché Miguel tò ie' a. Eta ɷwes wépa chök ye' tso' esepa tò Skèköl biyöchökwakpa chëmi suluë? <sup>10</sup> Ì kè ane ie'pa éna, ì kè jcher ie'pa wā, ese kos cheke suluë ie'pa tò. Erë ì jcher ie'pa wā iwákpa er wa, ese wambleke ie'pa tò kè wā bikeitsule wes iyiwak es. E' kueki ie'pa weirdäe siarë aishkuö ta.

<sup>11</sup> Wëstela ina ie'pa ta! Ie'pa e' wamblò suluë wes Caín e' o' es. Ie'pa tò ttè moki olo'yé inuköl klò'woie wes Balaam es. Ie'pa tò Skèköl dalösewéwa wes Coré tò Moisés dalösewā es. E' kueki aishkuö ta ie'pa weirdäe siarë wes Coré es. <sup>12</sup> Mik a' ñi dapa'uke chkök di'yök ñita er bua' wa Cristo kötewā e' kèwö tkö'uk, eta e' sulu'wékewā ie'pa tò wes ie' wamblörak ese wa. Ie'pa kè jaër ì sulu wamblök kawö e' a. Ie'pa er me'rie iwákpa è kkö'nuk. Ie'pa dör s'kitö'ukwakpa wes kalì dami siwā' wa taië, erë kè iwà yër yës es. Ie'pa dör wes kal kè wör ta' mik iwörke e' kèwö ska' es. Ie'pa dör wes kal ponettsā iwïë e' sirwā es. <sup>13</sup> Ie'pa tò ì sulu wambleke kè jaër ta', e' uyekerakitö wes dayë tò íyi tso' kos ie' a e' uyëttsā u'rki es. Ie'pa dör wes bëkwö kè ku'ar ek tsiní ème es. Skèköl wā ká tso' ie'pa a tsettseë, ee ie'pa wötërdawā kè yërpattsāia.

<sup>14</sup> Adán aleripa de ie' itökì dökā kul, e' shuā wëm eköl bak, e' kiè Enoc. Ie' tò pë' sulusi esepa yë' i' es Skèköl ttekölie: “Ye' ttò ttsó. Skèköl dōraë ibiyöchökwakpa batse'r taië shütë e'pa ta <sup>15</sup> sultane shulök. Pë' sulusipa kè tò ie' dalöieku' tò ì sulu wambleke tò ie' cheke suluë, esepa kos wömerattsā ie' tò weinuk.” <sup>16</sup> Wépa chök ye' tso' a' a, esepa wa íyi ulitane wër suluë, íyi ulitane tò ie'pa kköchöweke. Ì sulu kiane ie'pa kì wamblè ese wamblekerakitö. Ie'pa e' tsòkā taië. Ñies s'malepa dakìñekerakitö ttè ttsë'r bua' ese wa as tò iü wes ie'pa kì ikiane es.

**A' e' tkówa darërëe Skèköl ttè a**

<sup>17</sup> Erë a yamipa, a' dalër taië ye' éna. Ì yë' Skèkëpa Jesucristo ttekölpa tsá e'pa tò, e' ska' a' er anú. <sup>18</sup> Ie'pa tò se' a iyë': “Mik ká i' erkewatke, eta s'wayuökwakpa datse taië. Ie'pa serdaë wes ie'pa wák dër suluë kì ikiane senuk es.” <sup>19</sup> Ye' tò a' a iché tò pë' esepa tso' a' shuā a' blabatsök. Ie'pa serke wes ie'pa er tò ikieke ia es. Skèköl Wiköl kè ku' ie'pa ta.

<sup>20</sup> Erë a yamipa dalër taië ye' éna, ttè batse'r ichökle mik se' erblöke, e' a a' kì er diché ió. A' ttó Skèköl ta Wiköl Batse'r wa. <sup>21</sup> Skèkëpa Jesucristo tò se' sué er siarë wa, e' kueki sene michoë dōraë se' ulā a aishkuö ta, e' wā panuk se' tso' er bua' wa. E' dalewa kè a' éna ichökwa tò Skèköl éna se' dalër taië, e' a a' e' tkówa darërëe.

<sup>22</sup> A' wépa erblöke Jesús mik, erë ibikeitsekeia bötböt, esepa saú er siarë wa ta ie'pa kímú. <sup>23</sup> A' wépa skà mi'ketke ì sulu a, esepa tsatkó wes s'ñarkewa ese tsatkësö es. A' wépa skà tso' ì sulu wamblök taië ichök, esepa saú er siarë wa ta ikímú, erë a' tso' erkì dö' a' armi ì sulu wambleke ie'pa tò e' a. Ì sulu wambleke ie'pa tò, e' yöki a' suanú taië; e' kè kiarwā a' a elkela wë'ia.

**Ttè bata**

<sup>24</sup> Skèköl è a se' kkö'narmi as kè s'armine ì sulu a. Ie' è a se' nuì olo'yarmi as se' dò ie' olo taië e' wörki ttsë'ne buaë wa, kè kì ì sulu ta' yës. E' kueki ie' kikökasö ttè bua' wa. <sup>25</sup> Ie' kikökasö Skèkëpa Jesucristo batamik. Ie' dör eköl ème. Ie' dör S'satkkökwak. Tsāwe ta, i'ñe ta, ñies dö kekraë ie' olo ta' taië, ie' diché ta' taië íyi ulitane tsāta. Ie' dör se' blú taië. As sultane tò ie' kikòkā er bua' wa kekraë. Es e' idir.

## Ì kkayè' Jesucristo tò Juan a, e' tté paké

### Apocalipsis

Jesús ttekölpa tsá eköl kiè Juan e' tò yèkkuö i' kit. Ie' bak klöulewá dayènane kiè Patmos ee. Ee ie' bak senuk mik ie' tò yèkkuö i' kit eta.

Jesucristo wák tò Juan ka' ishtök. Ì kos kkayène ie' a ena yène ie' a kabsueie, e' shtök Jesucristo tò ie' ka'. Mik Jesucristo e' kkayè' ie' a kabsueie eta e' tò ika' yèkkuö i' shtök Skèkèpa icha erule erule döká kul serke ká kuá'kí kuá'kí tso' Asia shua e'pa a.

E' kíie ta Satanás ñippöke Skèköl ta wes e' ukuö miria Juan kèwö ska' ena e' ukuöki, e' paké ie' tò yèkkuö i' kí as Jesús mik erblökwakpa wá ijcher tò Skèköl ena Jesucristo e' alöraká da'ie Satanás ena iklépa kí.

### Shke'wè

**1** Ttè shtök ye' tso' yèkkuö i' kí e' dör ì kkayè' Skèköl tò Jesucristo a as ie' tò ikkachòne ikanè mèsopa a as ie'pa éna iar tò ì tköraè bet. Ye' kiè Juan, ye' dör Cristo kanè méso. Ie' tò ibiyöchökwak patké' eköl ye' ska' íyi ikké kkachök ye' a. <sup>2</sup> Ì kos sué ye' tò, e' shteke ye' tò yèkkuö i' kí serea. Ye' tò a' a ichè tò e' dör Skèköl ttè moki, ñies e' dör ttè moki kkayè' Jesucristo tò e'.

<sup>3</sup> Ì shteke ye' tò yèkkuö i' kí, e' wá dökette bet. E' kueki wépa tò iaritseke ena ittseke ena iwà iuteke, ayècha buaè esepa.

<sup>4-5</sup> Ye' tso' yèkkuö i' shtök Skèkèpa Jesús icha eruleè serke ká kuá'kí kuá'kí döká kul até Asia e'pa a. Skèköl ena iWiköl ena Jesucristo, as e'pa er buaè

chò ena sene bèrè mù a' a. Skèköl e' tso'tke tsawe ta, ìñe ta, ñies kekraè. Wikölpa Kul<sup>§§</sup> tso' wé Skèköl tkèr s'blúie e' wörki. Jesucristo tò Skèköl ttè cheke yèsyèsè kekraè. Ie' dör s'duulewá e' tsá shkenekane sulitane yöki kewe e'. Ie' dör ká ulitane blúpa e'pa blú. Ie' éna se' dalèr taiè. Ie' kötewá, ie' pé tène se' skéie, e' wa ie' tò se' tsatkée sene sulu nuí ulá a. <sup>6</sup> Ie' tò se' shukit as se' dò s'blúpaie ena sacerdotepaie kaneblök Skèköl dör ie' yé e' a. Jesucristo olo ta' taiè, ie' diché ta' taiè, as sulitane tò ie' kíkòkà kekraè. Es e' idir.

<sup>7</sup> Ìttsó! Jesucristo datse mò a.

Sulitane tò ie' sueraè,

ñies wépa tò ie' kötwa, ie' tkèrakitö kuaböt wa,

e'pa tò isueraè.

Mik ká ulitane wakpa tò isué, eta ie'pa iuraè siarè suane yöki.

Es iwà tköraè. Es e' idir.

<sup>8</sup> Skèköl diché ta' taiè íyi ulitane tsata, ie' tso'tke tsawe ta, ìñe ta, ñies kekraè. Ie' tò ichè: “Ye' dör íyi wì ena íyi bata.”

### Juan tò Jesucristo sué kabsueie

<sup>9</sup> Ye' dör a' yami Juan, e' batsulewá Jesús mik e' wa ye' tso'ñak a' ta wépa blúie Skèköl tso' esepa shua. Ñies ye' tso'ñak weinuk a' ta ena idalè'ttsök a' ta er bua' wa. Ye' tò s'wöbla'wé Skèköl ttè wa, ñies ye' tò Jesús tté paké sulitane a, e' kueki ie'pa tò ye' uya'mi senuk dayè nane kiè Patmos e' a. <sup>10</sup> Skèkèpa Jesús diwö, e' dör Domingo, e' kèwö ska' ta Skèköl Wiköl de ye' kí taiè, eta ye' ittse ye' tsikka tò yi tté ye' ta, e' ttò dör darèrèè wes duk blar es. <sup>11</sup> Ie' tò ye' a ichè: “Ì sueke be' tò, e' shtó yèkkuö kí ta ipatkómi Skèkèpa Jesús icha eruleè serke Éfeso, Esmirna, Pérgamo, Tiatira, Sardes, Filadelfia ena Laodicea e'pa kos a.”

§§1:4-5 **Wikölpa Kul:** Mik yèkkuö i' tò Wikölpa Kul cheke, eta e' wá kiane ché Wiköl Batse'r. Isalema Juan tò ikié es ichoie tò ì kaneweke Wiköl Batse'r tò ese dör tsakiè buaè kè ì kianeia kiki. Apocalipsis 3.1; 4.5; 5.6 saü.

<sup>12</sup>Ye' wotrée isaük tö yi ttöke ye' ta, etä bö'wöla wöbastulur döka kul, e' sué ye' tö. E' tulur ituloka yöule orochka wa e' ki. <sup>13</sup>Bö'wöla kul shua, ye' tö isué tö ì dur s'ditsö suë. Ie' datsi' dör batsië döttsa iklökue ki. Ikiparuo àr icho' mik e' dör oro. <sup>14</sup>Ie' tsakö dör saruru shuteë wes suyök es wes mochka saruruë es\* Ie' wöbla wër wes bö'wö wönar es. <sup>15</sup>Ie' klò wër dalölöë wes tabechka bua'buwa ba'wë bö' a ena ipaiklè ta iwër dalölöë es. Ie' ttò ttsër wes di' blar tajë ákttö mik es. <sup>16</sup>Ie' ulattö bua'kka a ie' wa bëkwö tso' döka kul. Ie' kkò a tabè dettsa kaoule di'dië wì'kè iö'kè. Ie' wö wër dalölöë wes mik diba arke buaë etä diwö wër es.

<sup>17</sup>Mik ye' tö ie' sué, etä ye' anewa wöwakköt ie' klò ska' wes s'duowa es. Erë ie' ulä bua'kka méka ye' ki ta ichéitö ye' a: “Kè be' suanuk. Ye' dör ttè tsá ena ttè bata. <sup>18</sup>Ye' dör sene michoë e' wák. Ye' du'wa e' tso'ne ttsë'ka kekraë. Ye' wa diché tso' s'duöwa ki. S'wimblu ké e' wékkö yottsä tso' ye' wa. Ie'pa shkeormika ye' a. <sup>19</sup>Ì tso' i'ne ta ena ì kos datseia sueke be' tö e' shtó yëkkuö ki. <sup>20</sup>Bëkwö döka kul sué be' tö ye' ulattö bua'kka a ñies bö'wöla tuloka yöule orochka wa, e' wà cheke ye' tö be' a i' ta. Bëkwö kul, e' tö Skëköl biyöchökwakpa döka kul e'pa wà chè. E'pa dör Skëképa Jesús icha eruleë serke ká kul a ñe' kkö'nukwakpa. Bö'wöla döka kul, e' tö Skëképa Jesús icha eruleë serke ká kul a ñe' wà chè.”

### Ì ché Jesucristo tö ie' ichapa erule serke Éfeso, e'pa a

**2** Etä ie' tö ye' a iché: “Yëkkuö shtó Skëköl biyöchökwak tso' ye' icha erule serke Éfeso, e'pa kkö'nuk e' a. Yëkkuö e' ki ishtómi ie' a i' es:

‘Yi wa bëkwö kul tso' iulatö bua'kka a, ñies yi shkòdur bö'wöla tuloka yöule

orochka wa, e' shua, e' tö ichè a' a i' es: <sup>2</sup>Wes a' serke e' kos jcher ye' wa. A' kanëblöke darërëë, a' weirke kos ye' kueki, e' dalë'ttseke a' tö er bua' wa, e' kos jcher ye' wa. Ye' wa ijcher tö pë' suslusipa kè wër a' wa buaë. Wépa de a' ska' e' chök tö ie'pa dör ye' ttekölpa erë ikachörak, esepa ma'wé a' tö ta a' isué tö ie'pa dör kachökwakpa. <sup>3</sup>A' weirke tajë ye' tté kueki, e' dalë'ttseke a' tö er bua' wa, kè ilo'yane a' wa. <sup>4</sup>Erë ye' wa ilè tso' ki a' kkatè: a' kè ñi dalëritsöku'ia ena a' kè ye' dalëritsèia wes kuaë es. <sup>5</sup>E' kueki wes kuaë ta a' éna ye' dalër, ñies wes kuaë ta a' ñi dalërits e' anü a' éna. A' er mane'üne ta a' senüne wes a' sene' kuaë es. A' kè er maneone, e' ta ye' datskene bet a' ska' ta a' bö'wöla tuloka e' yerattsa ye' tö. <sup>6</sup>Erë ì sulu wambleke Nicolaiwakpa tö e' sueke a' tö suluë wes ye' tö isueke es, e' tö ye' ttsë'wé buaë. <sup>7</sup>Ì cheke Skëköl Wiköl tö ye' icha eruleë e'pa a, e' ttsó a' ulitane tö! Wépa e' aléka ì sulu ki, kè wa ye' tté olo'yaule, esepa kos a ye' tö kawö meraë sene michoë e' kéli wö katök. E' kéli àr ká buaala tso' ká jai a ee.”

### Ì ché Jesucristo tö ie' ichapa erule serke Esmirna, e'pa a

<sup>8</sup>E' ukuöki ta ie' tö iché ye' a: “Yëkkuö shtó Skëköl biyöchökwak tso' ye' icha erule serke Esmirna, e'pa kkö'nuk e' a. Yëkkuö e' ki ishtómi ie' a i' es:

‘Yi dör ttè tsawe ena ttè bata. Yi kötewa e' shkenekane, e' tö ichè a' a i' es: <sup>9</sup>A' weirke siarë ye' tté kueki ñies a' kè wa ì ta', e' kos jcher ye' wa, erë a' dör Skëköl icha e' kueki a' dör wes inuköl blúpa es. Ñies ye' wa ijcher tö pë' welepa tö a' cheke suluë. Ie'pa e' chò tö ie'pa dör Skëköl icha, ñermata ie'pa dör Satanás icha. <sup>10</sup>A' weirdaë kos, e' kè yöki a' suanuk. Ye' ttò ttsó: Bé tö a' welepa uy-

\*1:14 suyök ena mochka: Si'kuaie e' dör lana ena nieve.

erawa s'wöto wé a, a' erblöke ye' mik e' ma'woie. A' weirdaë siarè dōka ká dabop è. Ie'pa tò a' ttèwami ye' tté kueki, erè a' erblöke ye' mik, e' kè olo'yar a' tò yès, e' ta sene michoë meraëyö a' a' iskieie. <sup>11</sup> ì cheke Skèköl Wiköl tò ye' icha eruleë esepa a, e' ttsó a' ulitane tò! Wépa e' aléka ì sulu ki, kè wá ye' tté olo'yaule, esepa kè duòpawá bötökicha.”†

### Ì ché Jesucristo tò ie' ichapa erule serke Pérgamo, e'pa a

<sup>12</sup> E' ukuöki ta ie' tò iché ye' a: “Yèkkuö shtó Skèköl biyöchökwak tso' ye' icha erule serke Pérgamo, e'pa kk'ö'nuk e' a. Yèkkuö e' ki ishtómi ie' a' i' es:

‘Yi wá tabè tso' kaoule di'dië wi'kè iö'kè, e' tò ichè a' a' i' es: <sup>13</sup> Ye' wá ijcher tò a' serke wé Satanás tkër blu'ie ee, erè a' e' tkéwá darèrèe ye' a. Eré ye' tté chök-wak eköl yësyesè kiè Antipas, e' kötwá ie'pa tò a' ké a wé Satanás serke ee, erè a' kè wá a' erblöke ye' mik e' olo'yane. <sup>14</sup> Eré ilè tso' ye' wá böt mañat ki' a' kkatè: A' shuá welepa tso', e'pa tso' tté sulu iütök. Ttè e' dör wes ttè wa Balaam bak s'wöbla'uk es. Ká iaiaë Balaam tò Balac wöbla' as ie' tò Israel aleripa kò ì sulu wamblök. Balaam tò Israel aleripa dak-inë chké meule íyi diököl tso' dalöiè ese a, ese katök ñies trènuq taiè. <sup>15</sup> Es ñies a' shuá welepa tso', e'pa kè éna Nicolaiwakpa ttè olo'yak. <sup>16</sup> E' kueki a' er mane'üne Skèköl a. A' kè tò iwè es, e' ta bet ye' datske ñippök ie'pa ta tabè tso' ye' kkò a e' wa. <sup>17</sup> ì cheke Skèköl Wiköl tò ye' icha eruleë e'pa a, e' ttsó a' ulitane tò! Wépa e' aléka ì sulu ki, kè wá ye' tté olo'yaule, esepa kos tieraaëyö chké tso' blèulewá kiè maná ese wa. Nies ákwöla sarurula meraëyö ie'pa a eköl eköl, e' ki kiè pa'ali tso' kitule. Kiè e' kè jcher yi wá. Yi a imène, ese è wá ijcherdaë.”

### Ì ché Jesucristo tò ie' ichapa erule serke Tiatira, e'pa a

<sup>18</sup> E' ukuöki ta ie' tò iché ye' a: “Yèkkuö shtó Skèköl biyöchökwak tso' ye' icha erule serke Tiatira, e'pa kk'ö'nuk e' a. Yèkkuö e' ki ishtómi ie' a' i' es:

‘Skèköl Alà, e' wöbla wër wes bö'wö wöñar es. Ie' klò wër dalöläè wes tabechka bua'buá paiklèsö ta iwër dalöläè es, e' tò ichè a' a' i' es: <sup>19</sup> Wes a' serke e' kos jcher ye' wá. Ye' wá ijcher tò a' ñi dalèritsöke buaë ena a' erblöke ye' mik. Nies ye' wá ijcher tò a' ñi kímuke ñikkèe buaë ena a' weirke kos, e' dalèttseke a' tò er bua' wa. Ìñe a' tò ikí weke bua'ie, kuaë a' tò io' e' tsata. <sup>20</sup> Eré ye' wá ilè tso' ki' a' kkatè: alaköl tso' a' shuá kiè Jezabel, e' a' a' tò kawö meke s'wöbla'uk. Ie' e' chò tò ie' dör Skèköl tteköl, erè ie' tò s'wöbla'weke, e' wa ie' tò ye' kanè mésopa dakiñeke as itrèr ñies as itörak chké meule íyi diököl dalöiè ese a, ese katò. <sup>21</sup> Ye' tò ie' pané taiè as ie' tò íyi suluë e' olo'yò ta ier mane'ü ye' a, erè ie' kè er mane'wak yès. <sup>22</sup> E' kueki súyö duè patkè ie' ki darèrèe as kè ikarkaiá. Nies wépa kos trène ie' ta, esepa we'ikerayö. Ie'pa kè er mane'ü, kè tò ì sulu e' olo'yè, e' ta bet ye' tò ie'pa we'ikeraë. <sup>23</sup> Nies ye' tò alaköl e' klépa tteralur. Es ye' icha eruleë serke ká wa'ñe, e'pa wá ijcherdaë tò ye' wá sulitane er suule buaë tò wes idir, wes iser. Ye' tò a' ulitane a' iské meraë eköl eköl wes iser es. <sup>24</sup> Eré a' malepa tso' Tiatira, a' kè ku' tté sulu e' iütök. Ttè e' kiè ie'pa tò “Satanás ttè blèulewá se' èsepa yöki.” Ttè e' dör suluë. E' kè iütène a' wá, eta e' dör buaë. E' kueki ye' tò a' a' ichè tò ye' kè tò ttè dalöièno darèrèe ese skà kí meku' a' a' dalöiè. <sup>25</sup> Eré ye' tté tso'tke a' wá

†2:11 kè duòpawá bötökicha: S'duòwá bötökicha e' dör se' uyèwá bö' ké a wé s'weir michoë ee e'. Apocalipsis 20.16 saü.

klöule, e' a' a' e' tkówa darërë michoë dõ mik ye' datskene etã. <sup>26-27</sup> Wépa e' aléka ì sulu kî, kè wã ye' tté olo'yaule, wépa serke wes ye' kî ikiane es dõ mik s'ënewa ekkë, esepa a' ye' tã kawõ meraë s'blúpaie wes ye' Yé tã ye' a' imé es. Ie'pa tkeraka ye' tã kã ulitane wakpa wõkirsape. Ie'pa tã kã ulitane wakpa wõttseraë yësyësë kè janéweta' yës. Wépa tã ie'pa tté dalõsëwëwã, esepa olordawã wes skaúña olorwã es. <sup>28</sup> Ñies ye' tã bëkwõ kiè dukir wërke bla'mi e' meraë ie'pa a'. <sup>29</sup> Ì cheke Skëköl Wiköl tã ye' icha eruleë e'pa a', e' ttsó a' ulitane tã!"

### Ì ché Jesucristo tã ie' ichapa erule serke Sardes, e'pa a'

**3** E' ukuökî tã ie' tã ye' a' ichë: "Yëkkuõ shtë Skëköl biyõchõkwak tso' ye' icha erule serke Sardes, e'pa kkõ'nuk e' a'. Yëkkuõ e' kî ishtëmî ie' a' i' es:

'Yi wã Skëköl Wikõlpa Kul<sup>†</sup> tso'. Ñies yi wã iulatõ a' bëkwõ tso' dõka kul, e' tã ichë a' a' i' es: Wes a' serke e' kos jcher ye' wã. Sulitane tã ibikeitseke tã a' serke buaë ye' a' erë ye' wã ijcher tã e' kè dör es. A' kè serku'ia ye' a' buaë. Ye' a' tã a' dör wes s'duulewã es. <sup>2</sup> Ye' tã isuë tã a' serke Skëköl a', e' kam dõka wë' ie' wõã. E' kuekî a' tî'núne, a' senúne ye' a' buaë. Ì buaë tso'ia a' a' elkela, e' a' a' e' diché iõne kam ichõwa da'a e' yõkî. <sup>3</sup> Ttë buaë wa a' wõblane, e' ska' a' er anúne. Ttë e' iutõne. Ì sulu wamblé a' tã, ese olo'yõ tã a' er mane'ú ye' a'. A' kè tã iwë es, e' tã ye' dõraë a' ska' wes akblõkwak es a' we'ikõk, e' kèwõ kè jcherpa a' wa. <sup>4</sup> Erë a' tso' Sardes, e'pa welepa kè e' iaoneka sene sulu wa. E'pa serke yësyësë ye' a', e' kuekî aishkuõ tã ie'pa shkõraë ye' tã paieule buaë datsi' saruru wa. <sup>5</sup> Es ñies wépa e' aléka sene sulu kî, kè wã ye' tté olo'yaule, esepa kî datsi' saruruë iërdaë.

Ie'pa kiè kè yepattsayõ sene michoë e' yëkkuõ kî. E' skéie ye' tã icheraë Skëköl wõrkî ena Skëköl biyõchõkwakpa wõrkî tã ie'pa dör ye' icha. <sup>6</sup> Ì cheke Skëköl Wiköl tã ye' icha eruleë e'pa a', e' ttsó a' ulitane tã!"

### Ì ché Jesucristo tã ie' ichapa erule serke Filadelfia, e'pa

<sup>7</sup> E' ukuökî tã ie' tã ye' a' ichë i' es: "Yëkkuõ shtë Skëköl biyõchõkwak tso' ye' icha erule serke Filadelfia, e'pa kkõ'nuk e' a'. Yëkkuõ e' kî ishtëmî ie' a' i' es:

'Yi dör batse'r ena ttõ mokië e' ulã a' s'blú bak kiè David e' kè ukkõ yottsã tso'. Ie' wã kawõ tã' íyi ulitane kî. Mik ie' tã iukkõ yéttã, etã kè yi a' iwõtënukwãne. Mik ie' tã iukkõ wõtëwã, etã kè yi a' ikkõ yënuksane. Ie' tã ichë a' a' i' es: <sup>8</sup> Wes a' serke e' kos jcher ye' wã. Ye' wã ijcher tã erë a' kè dalõiërta' taië, erë a' tã ye' tté iutë buaë, a' kè wã ye' watënettã. E' kuekî ukkõ yéttã ye' tã a' a', kè yi a' iwõtënukwãne. <sup>9</sup> Ye' ttõ ttsó. A' shuã welepa tso', e'pa dör Satanás icha. Ie'pa e' chõ tã ie'pa dör Skëköl icha, erë ie'pa kachõ. Ie'pa keraë ye' tã e' tulõkwã kuchë kî a' wõrkî. Es ie'pa wã ijcherdaë tã ye' tã a' dalëritseke. <sup>10</sup> A' weirke ye' tté kuekî, e' dalë'ttsé a' tã er bua' wa wes ye' tã a' patkë' iwã uk es. E' wã iutë a' tã buaë, e' kuekî ye' tã a' tsatkëraë mik s'weirke taië e' kèwõ de kã ulitane wakpa kî ima'woie etã. <sup>11</sup> Ye' dat-sene bet. Ye' tté wa a' wõblane, e' a' a' e' tkówa darërë kërãe as kè yi tã a' ulã a' iské buaë e' yõttã. <sup>12</sup> Wépa e' aléka sene sulu kî, kè wã ye' tté olo'yane, esepa dõraë wes u chki' bua'ie es Skëköl wé tso' kã jaì a' e' a'. Eë ie'pa ser michoë kërãe. Skëköl kiè shteraëyõ ie'pa mik. Ñies Skëköl kè, e' kiè shteraëyõ ie'pa mik. Kã e' kiè Jerusalén Pa'ali, e' datse

<sup>†</sup>3:1 Apocalipsis 1.3 saú.

ká jai a. Nies ye' wák kiè pa'ali, e' shteraë ye' tò ie'pa mik. <sup>13</sup> Ì cheke Skèköl Wiköl tò ye' icha eruleë e'pa a, e' ttsó a' ulitane tò!"

### Ì ché Jesucristo tò ie' ichapa erule serke Laodicea, e'pa

<sup>14</sup> E' ukuökì ta ie' tò ye' a iché i' es: "Yèkkuò shtó Skèköl biyöchökwak tso' ye' icha erule serke Laodicea e'pa kkö'nuk e' a. Yèkkuò e' kì ishtómi ie' a i' es:

'Yi dör ì kos yè' Skèköl tò e' wà, yi tò ie' tté cheke yësyësë kekraë, yi ta ie' tò iyi ulitane yö', e' tò ichè a' a i' es: <sup>15</sup> Wes a' serke e' kos jcher ye' wà. Ye' wà ijcher tò a' tò ye' ttè dalöieke bërëbërë è, kè bua'ie. A' dör wes di' bashbash es, kè dör ba'baë, kè dör seseë, a' dör bashbash è. ¡A' mú dör ba'baë ö seseë! <sup>16</sup> Erë a' dör wes di' bashbash es ye' a. A' kè dör ba'baë, nies a' kè dör seseë. E' kuekì ye' tò a' tuerattsa ye' kkò a. <sup>17</sup> A' tò ichè tò a' dör inuköl blúpa. A' tò ichè tò a' kawö tköke buaë, kè ì kì kianeia a' kì. Erë a' kè wà ijcher tò ñermata ye' a ta a' dör wes pè' weirke siarë es. A' dör wes se' wër siarë s'yamipa wa es. A' dör wes pè' kè wà ì ku'ia es. A' dör wes pè' kè wà datsi' ta' es. <sup>18</sup> E' kuekì ye' tò a' patteke tò a' tò orochka taú ye' ska'. Oro ese dör oro bua'bu diaqule bö' wa ibua'bu yottsä ese. E' je' tò a' blu'wëmi buaë. Nies datsi' saruruë ese taú ye' ska'. E' wa a' e' paiömi buaë as a' kè jaëria. Nies a' tò kapöli taú ye' ska' a' wöbla bua'woie as iwawër buaë. <sup>19</sup> Wépa dalër ye' éna, e'pa kos ñeke ye' tò shurueke ye' tò as iserdak buaë. E' kuekì ye' dalöió er bua' wa. Ì sulu wambleke a' tò, ese watóttsa. A' er mane'ú bua'iewa ye' a. <sup>20</sup> ¡Ye' ttò ttsó! Ye' dör wes wëm dur eköl ukkò a a' a ik-iök tò ye' a kawö mú shkowà es. Yi tò ye' ttò ttsé ta ye' kiéwaitö weshke, e' ta ye' dörawa ta ye' chköraë ie' ta. <sup>21</sup> Ye' e'

aléka iyi ulitane kì ta ye' e' tkéka ye' Yé ta wé ie' tkër blu'ie eë. Es nies wépa e' aléka ì sulu kì, kè wà ye' tté olo'yane, es-epa a kawö meraë ye' tò e' tköksër ye' ta wé ye' tkër blu'ie eë. <sup>22</sup> Ì cheke Skèköl Wiköl tò ye' icha eruleë e'pa a, e' ttsó a' ulitane tò!"

### Skèköl kïkarkeka buaë ká jai a

**4** E' ukuökì ta ye' tò iyi skà sué kab-sueie. Ye' isué tò ká jai a ukkò tso' áie ta s'ttò ttsé ye' tò kewe wes duk blar es, e' tò ye' a ichè: "Be' shkóka íe, eta ì wamblërmi i' ukuökì ta, e' kkacheke ye' tò be' a."

<sup>2</sup> E' wösha ta Skèköl Wiköl de ye' kì taië, ta ye' tò blu' kulé tso' ká jai a e' sué et. E' kì itkër eköl. <sup>3</sup> Yi tkër kula' e' kì, e' dalöburke dalölöë wes ák bua'bu dalöbur es, e' wöaule spaspa ena mat wes ák bua'bu kiè diamante ena rubí es. Ie' kula' pamik shkaba' tkërke oloburke dalölöë, e' wöaule spaspa wes ák bua'bu kiè esmeralda es. <sup>4</sup> Nies ie' kula' pamik blu' kulé skà suéyö doka dabom böyök kì tkël (24). E' kì kékëpa tulur doka dabom böyök kì tkël (24), e'pa paiëulewa datsi' saruruë wa, nies ie'pa wà orochka tso' yöule tkëuleka iwökir kì wes blu'pa es. <sup>5</sup> Blu' kulé sué ye' tò kewe, eë alá wönarke taië, talachke blarke taië. Kula' e' wöshaë bö'wö ñarke kul wes kuatak wöbatsesö es. Bö'wö kul, e' tò Skèköl Wiköl ché. <sup>6</sup> Kula' e' wöshaë ì me'r dayëie kkueie wër sarërëë wes widrio es.

Ì ttsé'ka tso' kula' pamik doka tkël e'pa wöbla dör taië tsikka wökka. <sup>7</sup> Itsä e' wökir wër ma'name suë. Iëtö wökir wër baka wë'ne suë. Iëtö skà wö dör s'ditsö wö suë. Ibata wër wes pu ur ar es. <sup>8</sup> Itsä pik dör teröl, es imalepa kos pik dör teröl nies. Ie'pa pa kos e' dör wöbla è döttsä ipik dikia. Niië nañeë ie'pa tso' Skèköl tt-seittsök, kè ie' wöklö'utarak ta icheker-akitö i' es:

“Skëköl dör batse'r taië, ie' dör batse'r taië, ie' dör batse'r taië.

Ie' diché ta' taië íyi ulitane tsata.

Ie' tso'tke tsawe ta, í'ne ta, ñies kekraë.”

Es ie'pa tö icheke kekraë.

<sup>9</sup>Skëköl yöbië tkër kula' e' kî, e' pamik ì ttsë'ka tso' tkël, e'pa tso' ie' kîkökka, ie' olo kîkökka, ie' a wëstela chök kekraë.

<sup>10</sup>Mik ie'pa tso' e' uk, e' dalewa kékëpa dökä dabom böyök kî tkël (24) tulur ie' pamik, e'pa e' tulökeser iski wöwakköt itkër kula' kî e' dalöioie. Ie'pa tso' Skëköl ser michoë e' dalöiök, e' dalewa ì tkër ie'pa wökir kî yöle orochka wa, e' kos mekewarakitö iski Skëköl kula' wöshäë ta ichekerakitö:

<sup>11</sup>“A Sa' Këköl, íyi ulitane yö' be' tö.

Íyi ulitane tso' be' wák ttò wa.

E' kueki sa' ulitane kawötä ichök tö be' olo ta' taië.

Sa' ulitane kawötä be' dalöiök ñies be' diché kîkökka.”

### **Yëkkuö kitule wörratule ena Obeja Pupula, e' paké**

**5** E' ukuöki ta ye' tö isuë tö itkër kula' kî, e' wa yëkkuö wörratule a'tser iulä bua'kka, e' kî itso' kitule ikîkke ena ishüa. Yëkkuö e' kkò wöbatsulewa dökä kul.

<sup>2</sup>Etä Skëköl biyöchökwak suë ye' tö eköl, e' diché taië, e' tö ichaké aneule: “¿A yi wëë, yi e' didir yëkkuö wöbatsulewa, e' kkò batsöök wë iwöbatsulewa eë ta ishuppöök?” <sup>3</sup>Erë ká jai a ena ká i' kî ena ká diä kaska' kè yi didir yës yëkkuö e' shuppöök ena iwä sauk. <sup>4</sup>Ye' iuke taië, kè yi didir yëkkuö e' shuppöök ena iwä sauk e' kueki. <sup>5</sup>Etä skékëpa tso' eë dabom böyök kî tkël (24), e' eköl tö ye' a iché: “Kè be' iukia. Ittsó, eköl kiè Ma'name e' dör judáwak ditséwö, ie' kéköl dör blu' bak ká iaiaë kiè David e'. Ie' e' ali'kabak ibolökpa kos kî. Ie' je' didir

yëkkuö wöbatsulewa kul e' kkò batsöök ena ishuppöök.”

<sup>6</sup>Etä ye' tö obeja wë'ne pupula suë etö, e' pa kî itò tso' wësua ijchëulea mè Skëköl a, ese shkenekane. E' dur itkër kula' kî e' o'mik, ì ttsë'ka dökä tkël ena kékëpa dökä dabom böyök kî tkël (24) e'pa shüsha. Obeja e' dula' dökä kul ñies iwöbla dökä kul. Iwöbla dökä kul e' wä dör tö Skëköl Wiköl Kul<sup>n</sup> patké Skëköl tö ká wa'ne. <sup>7</sup>Obeja Pupula e' de itkër kula' kî e' ska' ta yëkkuö a'tser itkër kula' kî e' ulä bua'kka, e' klö'wëitö. <sup>8</sup>Mik ie' tö yëkkuö klö'wë, etä ì ttsë'ka dökä tkël ena kékëpa dökä dabom böyök kî tkël (24), e'pa kos e' télur wöwakköt Obeja Pupula wörki. E'pa kos wa ma'ma tso' blanco kicha ta' kiè arpa. Ñies tka' yöle orochka wa, ese tso' ie'pa kos wa. Tka' e' a íyi masmas tso' ña'wë Skëköl a, ese tso' chikchië. E' tö s'batse'rupa ttöke ie' ta e' wä chë. <sup>9-10</sup>Ì ttsë'ka dökä tkël ena kékëpa dökä dabom böyök kî tkël, e'pa kos ttsémi ttsè pa'alí wa Obeja Pupula kîkokaie. Ie'pa tö ittseittsé i' es:

“Be' kötulewa, be' pé tène taië

wes obeja pupula jchë mè Skëköl a es, e' wa be' tö s'ditsö ttò kuakî kuakî ena ditsöwö kuakî kuakî ena ká kuakî kuakî wakpa to'ttsa

as ekkëpa ulitane shüa se' dò taië Skëköl ichaie.

E'pa klö'wë be' tö as ie'pa kaneblö Skëköl a blu'paie ena sacerdotepaie.

Ie'pa doraë ká ulitane wakpa blúpaie, es ie'pa tö s'wëttseraë.

E' kueki be' je' didir moki yëkkuö wörratule se, e' klö'uk ena ikkò batsöök wë iwöbatsulewa eë.”

<sup>11</sup>E' ukuöki ta ye' wökéka etä ye' tö isuë tö Skëköl biyöchökwakpa tso' taië, kè ishtanuk yi a, e'pa ttò ttsé ye' tö. Ie'pa tso' itkër kula' kî ena ì ttsë'ka dökä tkël ena kékëpa dökä dabom böyök kî tkël,

<sup>n</sup>5:6 Apocalipsis 1.3 saú.



e'pa pamik. <sup>12</sup>Ie'pa tō ittseittsé wī'wīē i' es:

“Obeja Pupula kōtulewa, e' je' kī sulitane ie' kīkēka e' mēne buaē.

Ie' olo ta' taiē, ie' dōr ūyī ulitane wāk, ie' wa' ūyī ulitane jcher, ie' diché ta' taiē, e' kueki sulitane kawōta' ie' dalōiök, ie' kīkōkka.”

<sup>13</sup>Ñies ye' tō ittse tō ūyī ulitane yō' Skēkōl tō tso' ká ja' a ena ká i' kī ena ká dià kaska' ena dayē a, e' kos tō iché i' es:

“Itkēr kula' kī ena Obeja Pupula, e'pa olo ta' taiē, diché ta' taiē ūyī ulitane tsata,

e' kueki sulitane kawōta' ie'pa kīkōkka, ie'pa dalōiök kekraē.”

<sup>14</sup>Ì ttsē'ka dōka tkēl e'pa tō iché: “jEs e' idir!” Kēkēpa dōka dabom böyök kī tkēl, e'pa e' télur wōwakkōt Skēkōl ena Obeja Pupula wōrkī ie'pa dalōiök.

**Yēkkuō wōrratule e' kōò  
batsulewa dōka kul e' batsée  
Obeja Pupula tō etk etk**

**6** E' ukuōkī ta' ye' tō isuē tō Obeja Pupula tō yēkkuō wōrratule e' kōò batsulewa dōka kul e' tsá batsée. Eta' ì ttsē'ka dōka tkēl, e' ekōl ttō ttséyō, e' ttō darērēē wēs alá blar es. Wēpa tso' ipatkērke e' panuk e' ekōl a' ie' tō iché: “jBe' yú!” <sup>2</sup>Ye' wōkēka ta' kabaio saruru suéyō etō. Yi tkērka iki, e' ulā a' shkame' àr, ñies ì tkekeka wōkir kī iwā kkachōie tō ie' dōr e' alōkwak ese mēne ie' a' et. Ie' mīa kī e' alōkka ibolōkpa kī.

<sup>3</sup>Mik Obeja Pupula tō yēkkuō kōò batsulewa, e' skā batsée et, eta' ye' tō ittse tō ì ttsē'ka dōka tkēl, e' skā tō iché wēpa tso' ipatkērke e' panuk e' skā a: “jBe' yú!”

<sup>4</sup>Eta' kabaio batsē dettsa. Yi tkērka iki, e' a' kawō mēne sene bèrē ñita' e' yōttsa ká i' a' as pē' ñi ttōwa. Ie' a' tabē bērie mēne.

<sup>5</sup>Mik Obeja Pupula tō yēkkuō kōò batsulewa, e' skā batsée et, i' ta' ide mañat, eta' ye' tō ittse tō ì ttsē'ka dōka tkēl, e'

skā tō iché wēpa tso' ipatkērke e' panuk e' skā a: “jBe' yú!” Ye' wōkēka eta' ye' tō kabaio dalolo sué etō. Yi tkērka iki, e' wa' ūyī es ma'woje dami iulā a. <sup>6</sup>Ì ttsē'ka dōka tkēl, e' shua' ye' tō ttō ttsé tō iché: “Harinachka kilo elka è e' tor-daē s'kaneblō ká et e' ské ekkē. Ñies ce-bada kilo mañalka tor-daē s'kaneblō ká et e' ské ekkē; erē olivo kié ena vino e' kē sulu'warwa be' tō.”

<sup>7</sup>Mik Obeja Pupula tō yēkkuō kōò batsulewa, e' skā batsée et, i' ta' ide tkēl, eta' ye' tō ittse tō ì ttsē'ka dōka tkēl, e' bata tō iché wēpa tso' ipatkērke e' panuk e' skā a: “jBe' yú!” <sup>8</sup>Ye' wōkēka eta' kabaio tskrittiskris suéyō etō wēr suluē. Yi tkērka iki, e' kiē dōr S'duōwa. E' itōkī ekōl skā datse' e' kiē dōr S'wimblu Ké. Ie'pa a' kawō mēne ká ulitane wakpa e' mú blatēsō tkēl tsinī ta' e' et tsinī eukwa tabē wa, bli wa, duē wa ena iyiwak dōr se'name ese wa.

<sup>9</sup>Mik Obeja Pupula tō yēkkuō kōò batsulewa, e' skā batsée et, i' ta' ide skēl, eta' s'kōtulewa Skēkōl ttē paka' ie'pa tō taniniē e' kueki, e'pa wimblupa suéyō ka' tso' ūyī mokā Skēkōl a' e' dikīa. <sup>10</sup>Ie'pa tso' ichök Skēkōl a' aneule: “A Sa' Kēkōl, be' dōr ūyī ulitane tsata, be' dōr batse'r, be' ttō mokiē. jDō mik be' tō wēpa serke dià ūyōk kī tō sa' kōtulur esepa dalē'ttsekerō? jMik be' tō ie'pa wōmekettsa weinuk ì wamblē'rakitō sa' kī, e' nuī skéie?” <sup>11</sup>Eta' ie'pa wakpa bil ekkē e'pa a' datsi' saruru mēne iē. Skēkōl tō iché ie'pa a: “A' enūia bērbēr è dō mik pē' tō a' malepa dōr ye' kanē mēsopa kianēia ttélur, e'pa kos ttekeluriā wēs a' kōtulurakitō es eta'. E'pa panūia tsir.”

<sup>12</sup>Mik Obeja Pupula tō yēkkuō kōò batsulewa, e' skā batsée et, i' ta' ide terōl, eta' í tka darērēē. Diwō ttsenewa mīa ttsettseē wēs datsi' daloloē es. Si'wō mīa batsē wēs pé es. <sup>13</sup>Bēkwō darolone ūyōk kī wēs kalwō tkēttsa siwa' tō mik ibit-sirke taiē eta' es. <sup>14</sup>Eta' ká ja', e' wōr-

ratéwā wes yēkkuō wōtrēwasō es, kē iwértaiā. Kābata ulitane, dayē nane ulitane, e' kōs e' skélur bānet. <sup>15</sup> Etā kā blúpa kōs, pē' taiē kōs, nīppōkwakpa wōkīrpa kōs, inukōl blúpa kōs, s'dalōiēr tā' taiē esepa kōs, nīes s'klōulewā kanē mésoie, nīes kanē mēsopa malepa, esepa kōs e' blélur ákuk a ena ák blublu tso' kābata a ese dikīā e' tsatkoie. <sup>16</sup> Etā ie'pa tō iché aneule kābata a ena ák blublu a: “¡Sa' bló a' dikīā, sa' kk'ónú Skékōl tkēr ikula' kī ká jai a e' yōki! Nīes Obeja Pupula kēsik yōki sa' kk'ónú. <sup>17</sup> Ie'pa tō sulitane we'ikeraē siarē e' kēwō detke, kē yi tkòpashkar e' ulā a.”

### Skékōl kanē mēsopa wakyōule ie' a

**7** E' ukuōkī tā ye' tō Skékōl biyōchōkwakpa sué dōkā tkēl, e'pa iēter wé ká i' erkerō e' kk'ō mik. Bōl iēter diwō tskirke e' kke; ekōl dur ulā bua'kka, ekōl dur ulā baklī'kka. Bōl iēter diwō mi'kewā e' kke; ekōl dur ulā bua'kka, ekōl dur ulā baklī'kka. Ie'pa tso' siwā' kōs bitsirke e' wōklō'uk as kē ibitsiria ká i' kī, dayē kī, kal kī, i' kī yēs. <sup>2</sup> Ie'pa a kawō mēne ká i' ena dayē sulu'ukwā. Nīes ye' tō Skékōl biyōchōkwak skā sué ekōl, e' datse diwō tskirke e' kke. E' ulā a íyi tso' s'wakyuoie Skékōl chók wā, e' atser. Ie' ane imalepa tkēl tsākā tā ichéitō ie'pa a: <sup>3</sup> “¡A' kē tō ká sulu'ukwā, dayē sulu'ukwā, kal sulu'ukwā kam sa' tō Skékōl kanē mēsopa wakyuō iwōtsā kī e' yōki!”

<sup>4-8</sup> Etā bil wakyōule e' yēne ye' a. Wépa wakyōule e'pa dōr se' yé bak ká iaiāē kiē Israel, e' ala'r dabom eyōk kī bōl (12), e'pa aleripa shukitē iditséwō wa iditséwō wa. Ie'pa ditséwō kiē Judá, Rubén, Gad, Aser, Neftalí, Manasés, Simeón, Leví, Isacar, Zabulón, José ena Benjamín. Ekkēpa ditséwō shukitē dōkā 12.000 iditséwō wa iditséwō wa. Ishukitē e'pa dōr seraā 144.000 ekkē.

<sup>9</sup> E' ukuōkī tā ye' wō kēkā tā ye' isué tō s'ditsō dapane taiē kē shtanuk yi a ekkē.

E'pa dōr ká ulitane wakpa, ttō kuā'kī kuā'kī, ditsōwō kuā'kī kuā'kī. Ie'pa iēter, itkēr kula' kī ena yi kiē Obeja Pupula, e'pa wōrkī. Ie'pa kōs datsi' ié saruruē. Ie'pa ulitane wā sī kō dami iulā a. <sup>10</sup> Ie'pa tō iché aneule:

“¡S'tsatkē e' datse

Skékōl tkēr kula' kī ena Obeja Pupula e'pa wā!”

<sup>11</sup> Kékēpa dōkā dabom böyök kī tkēl (24) ena i' ttsē'ka dōkā tkēl, e'pa pamik Skékōl biyōchōkwakpa kōs iēter. E'pa kōs e' tēlur wōwakkōt, itkēr kula' kī, e' dalōioie <sup>12</sup> etā ichérakitō:

“¡Es e' idir!

Be' dōr sa' blú yōbiē, sa' tō be' kīkekeka kekraē.

Be' olo tā' taiē, be' wā íyi ulitane jcher buaē.

Sa' tō wéstela cheke be' a kekraē.

Be' dalōieke sa' tō kekraē.

Be' diché tā' taiē íyi ulitane tsata, be' è a i' kōs or,

¡Es e' idir!”

<sup>13</sup> E' ukuōkī tā kékēpa dōkā dabom böyök kī tkēl (24), e'pa ekōl tō ye' a ichaké: “¿Ie'pa paiēule datsi' saruru wa, e'pa dōr yi? ¿Wé ie'pa datse?” <sup>14</sup> Ye' tō ie' iūtē: “A kékēpa, ye' kē wā ijcher, ichō ye' a.” Etā ie' tō ye' a iché: “Ie'pa dōr wépa weine siarē sulitane weirke taiē e' kēwō ska' e'pa. Erē e' dalēttsē' ie'pa tō buaē. Ie'pa tō idatsi' skuē yi kiē Obeja Pupula e' pé wa etā idatsi' miā saruruē.

<sup>15</sup> “E' kuēkī ie'pa iēter Skékōl tso' ikulé kī, e' wōrkī.

Nīē nañēē ie'pa tso' ie' dalōiē e' wakanéuk iwé a.

Ie'pa tso' ie' tā ena ie' tō ie'pa kk'ōneraē kekraē.

<sup>16</sup> Ie'pa kē duōpaia bli wā, ie'pa kē er sirpaia.

Dība kē tō ie'pa ña'wepaia, kāba kē tō ie'pa we'ikepaia.

<sup>17</sup> Obeja Pupula tso' Skékōl kula' o'mik,

e' dör ie'pa kk'ö'nukwak, e' kuëki ie'pa kè weirpaia yës.

Obeja Pupula tö ie'pa wëttseraë di' tum tö sene michoë meke se' a, e' di' yök. Skëköl tö ie'pa wöriö kos e' paikleraë as ie'pa ttsë'r buaë."

**Obeja Pupula tö yëkkuö  
wörratule e' kk'ö batsulewa  
döka kul, e' bata batsée**

**8** Mik Obeja Pupula tö yëkkuö wöbat-sulewa, e' bata kk'ö batsée, eta ká jai a ká mía mejmeë dò hora shäböts ekkë.

<sup>2</sup>E' ukuöki ta Skëköl biyöchökwakpa döka kul iëter Skëköl wörki, e'pa suéyo. Ie'pa a duk mène eköl eköl. <sup>3</sup>E' ukuöki ta Skëköl biyöchökwak skà de wé ka' tso' íyi mokä Skëköl a e' wörki. Ie' wa iulà a tkä' yöule orochka wa ese a'tser. Ie' a íyi masmas mène taië s'batse'rpa kos e'pa ttöke Skëköl ta e' kí ioie as ie' tö inä'ü ká' yöule orochka wa inä'woie tso' Skëköl kulé wö shaë, e' kí. <sup>4</sup>Eta ie' tö íyi masmas nã'wé ká' nã' kí, e' shklë tka ie' ulà mik deka Skëköl wörki s'batse'rpa ttöke ie' ta e' ta nita. <sup>5</sup>Ie' tö itka' wà iéka bö' wörkua tso' ká' nã' kí, e' wa. Bö' wörkua e' uyémi ie' tö íyök kí. Eta ká wa'ne kí alá wöñane taië, iblane taië, ká wöti'wé taië í tö.

**Duk döka kul**

<sup>6</sup>Skëköl biyöchökwakpa döka kul, e'pa wa duk tso' iwakpa bil ekkë, ie'pa tso'tke iduk bla'weke e' panuk.

<sup>7</sup>Eta Skëköl biyöchökwak eköl tö iduk bla'wé kewe. Eta mò wöli wösi seseë, nães bö'wö shütuule pé ta, ese dane taië íyök kí wes kalí yër es. Ká i' ena kal e' nãnewa taië. Ká i' ena kal kos e' mú blatèsö mañat tsiní ta e' et tsiní nãnewa. Nães kākō kos tso' ká i' kí e' nãnewa saraq.

<sup>8</sup>E' ukuöki ta Skëköl biyöchökwak skà tö iduk bla'wé. Eta ì bitëshka kabataie bérie wöñarke bö'ie, e' anewa dayë a. Eta dayë mú blatèsö mañat tsiní ta e' et tsiní

mía péie. <sup>9</sup>Iyiwak kos serke dayë a ena kanò kos shköke dayë kí, e' mú blatèsö mañat tsiní ta e' et tsiní enewa.

<sup>10</sup>E' ukuöki ta Skëköl biyöchökwak skà tö iduk bla'wé, i' ta ide mañatökicha. Eta bëkwö bérie wöñarke wes kuàtak wöñar es, e' bitëshka anewa di' a ena di' tum a taië. Di' tso' kos ena di' tum tso' kos, e' mú blatèsö mañat tsiní ta e' et tsiní a bëkwö anewa. <sup>11</sup>Bëkwö e' kië Bacha'bachaë. Wé bëkwö e' anewa, e' di' kos mía bacha'bachaë. Di' e' tö s'ttélur taië.

<sup>12</sup>E' ukuöki ta Skëköl biyöchökwak skà tö iduk bla'wé, i' ta ide tkëtökicha. Eta diwö ena si'wö ena bëkwö, e' kos mú blatèsö mañat tsiní ta e' et tsiní kos ttse-newa. E' kuëki ñiwe ena nañewe, e' mú blatèsö mañat tsiní ta e' et tsiní ttsenewa.

<sup>13</sup>E' ukuöki ta ye' wökéka ta ye' tö pu sué et ur àr kashuk a, e' tö iché aneule: "¡Ayëwëë, ayëwëë, ayëwëë! ¡Wëstela ina ká ulitane wakpa ta, mik Skëköl biyöchökwakpa tso'ia mañal e'pa tö iduk bla'weke eta!"

**9** E' ukuöki ta Skëköl biyöchökwak skà tö iduk bla'wé, i' ta ide skëtökicha. Eta bëkwö et anewabak, e' suéyo iski. Eë kauk ter taië iskië, kè s'wö dëmi ekkë. Kauk e' kk'ö wötëule, e' kk'oyottsã mène bëkwö suéyo iski, e' a. <sup>2</sup>Mik ie' tö kauk kk'oyëttsã, eta e' a ishklé deka taië wes bö' wöñar taië e' shklë es. E' tö kashuk ttsewéwa, e' kuëki diwö kè olo bunea. <sup>3</sup>Shklë e' shuã ditski blubluë dettsã taië íyök kí, poneka ká wa'ne, ká ulitane wà iéwa. Ie'pa a kawö mène s'we'ikök wes bachë' tö s'kuèwa ta idalër es. <sup>4</sup>Ie'pa kè a kawö mène kākō kos, kalkō kos, e' katök. Ie'pa a kawö mène, wépa kè wakyöule Skëköl wa iwö tsã kí, esepa è we'ikök. <sup>5</sup>Erë ie'pa kè a kawö mène ittökulur. Ie'pa a kawö mène irreuk idalër taië wa dò si' skel ekkë. E' dalër taië wes bachë' s'kuèwa es. <sup>6</sup>E' kèwō ska' ta s'ditsö tö

duèwà yuleraè poë, erè duèwà wák, e' tkörashkar ie'pa yöki.

<sup>7</sup>Ditski e' wër wës kabaio tso' ñippoie ese payöule es. Iwökir k<sub>i</sub> itkëuleka, ì tkèkà blu' tò iwökir k<sub>i</sub> yöule orochka wa ese süè. Iwö wër wës s'ditsö wö wër es. <sup>8</sup>Itsà batsiè wës alakölpa tsà es. Ikà dör wës namu kà es. <sup>9</sup>Tabechka àr ibatsi' mik wës ñippökwapka tò ieke e' tsatkoie e' sù. Ipik blar taiè wës carreta skè kabaio tò tuneule michoè ñippök es. <sup>10</sup>Ikirè dör wës bachè' kirè es, e' diché wa ie'pa tò s'we'ikeke dò si' skel ekkè. <sup>11</sup>Ie'pa blü e' dör Skèköl biyöchökwak dör kawk iskiè, e' wökir. Hebreoie e' kiè dör Abadón. Griegoie e' kiè dör Apolión (kiè e' wà kiane chè: Se' eukwawak).

<sup>12</sup>Íyí sulu e' tsá tka et, erè iskà kianeia böt.

<sup>13</sup>E' ukuöki tã Skèköl biyöchökwak skà tò iduk bla'wé, i' tã ide tektökicha. Ye' tò s'ttò ttsé datse kã' tso' yöule orochka wa íyí mokã Skèköl a ee. Kã' e' bata tkél a iyöule dula'ie, e' shua s'ttò ttséyö. <sup>14</sup>E' tò iché Skèköl biyöchökwak tò iduk bla'wé író e' a: “Skèköl biyöchökwakpa dökã tkél tso' moulewa di' taiè kiè Éufrates e' kkömik, e'pa wöttsólor be' tò.” <sup>15</sup>Skèköl biyöchökwakpa dökã tkél e'pa tso'tke Skèköl wã iwakanéwoie i' kéwö ska'. Ie'pa kanè dör pè' taiè eukwa. Pè' ulitane mú blatesö mañat tsiní tã e' et tsiní erdawa seraa ie'pa ulà a. Eta Skèköl biyöchökwakpa dökã tkél wöttsérolone iwakanéuk. <sup>16</sup>Eta ye' a iyène tò ñippökwapka dami kabaio k<sub>i</sub>, e'pa dökã 200.000.000.

<sup>17</sup>Ñippökwapka ekkèpa dami kabaio k<sub>i</sub>, e' sué ye' tò, e'pa wã tabechka àr ibatsi' mik e' tsatkoie, e' wöaule batsè wës bö' wörkua suèsö es ena siè wës ák bua'buwa kiè jacinto es, ena tskiriri wës azufre es. Kabaio ekkèpa wökir wër wës namu wökir es. Ñies ikkò a bö' ena shklè ena azufre, e' dökettsã. <sup>18</sup>Bö' ena shklè ena azufre dökettsã kabaio ekkèpa

kkò a, e' dör ì mañat suluè döke pè' k<sub>i</sub> e'. E' tò pè' ewéwa taiè. Pè' ulitane mú blatesö mañat tsiní tã e' et tsiní enewa seraa. <sup>19</sup>E' wà dör tò kabaio ekkèpa wã diché tso' ikkò a ena ikirè a s'we'ikoie. Ikirè bata dör tkabè chók wökir es, e' wa s'shka'wëkeitö.

<sup>20</sup>Erè pè' malepa ate kè durulune ì sulu tka e' wa, e'pa kè wã ì sulu wamblekerakitö ese o'lyane. Ñies aknamapa ena íyí diököl dalöiekerakitö esepa kè o'lyanerak iwa. Íyí diököl ñe'pa yöule orochka wa, inukölchka wa, broncechka wa, ákchka wa ena kal tak wa, ese kos wöbla kè wawër, kè kukuò wattsër, kè shko, erè ie'pa tso'ia idalöiök ikèkölíe. <sup>21</sup>Ie'pa kè er maneone. Ie'pa s'ttekewaia, alibchökeia, trërkeia, akblökeia.

### Skèköl biyöchökwak e' wã yèkkuö a'tser iulà a

**10** E' ukuöki tã ye' tò Skèköl biyöchökwak sué eköl, e' diché tã' taiè. Ie' datse kã jai a paiëulewã buaè mò wa. Shkaba' tkènear iwökir tsaka. Ie' wö dalöburke wës diwö es. Ie' klölobo wa'ne wër wës bö' wöñar es. <sup>2</sup>Ie' wã yèkkuö tsitsirla a'tser iulà a shubukaule. Ie' klö bua'kka tkékaitö dayè k<sub>i</sub>, iklö bakli'kka tkékaitö kã sí k<sub>i</sub>. <sup>3</sup>Eta ie' ane taiè wës ma'name ar es. Mik e' one, eta alá blane dökã kuktökicha. <sup>4</sup>Ì ché alá tò e' shtök ye' mí yèkkuö k<sub>i</sub>, erè ttò ttséyö datse kã jai a e' tò iché: “Kè ishtar, iblówabö bèrè.”

<sup>5</sup>Eta Skèköl biyöchökwak suéyö iklö et tkèrkã dayè k<sub>i</sub>, iklö et tkèrkã kã sí k<sub>i</sub>, e' ulà bua'kka kékã kã jai a <sup>6</sup>tã ichéitö: “Skèköl ser michoè e' tò kã jai ena kã i' ena dayè ena ì kos tso'ia, e' yö'. Ie' wörki ye' tò ichè tò ì cheke ye' tò e' dör mok<sub>i</sub>. Skèköl kè tò ì panepaia. <sup>7</sup>Ì tso' Skèköl wã ier a blèule wè, e' yè'bakitö ikanè mé-sopa dör ittekölpa e'pa a, e' wà ordaè mik

Skëköl biyöchökwak bata tö iduk bla'wé eta.”

<sup>8</sup> Etä s'ttò ttsë'yö datse ká jai a, e' tténe ye' ta ta ichéitò: “Be' yú Skëköl biyöchökwak klò et tkërka dayë kî etä iklò et tkërka ká sí kî, e' ska', etä yëkkuò a'tser iulà a shübukaule, e' klò'ú.” <sup>9</sup> Etä ye' mí Skëköl biyöchökwak dur e' ska' ta yëkkuò e' kiéyö ie' a. Ie' tö ye' a iché: “Íkë, ikatówabò. Be' kkò a be' tö ittseraë tö blo'bloë idir wes bulali es, erë be' shüa imiaraë bacha'bachaë.”

<sup>10</sup> Etä yëkkuò a'tser Skëköl biyöchökwak ulà a, e' klò'wéyò ta ikatéwayö. Ye' kkò a ta blo'bloë idir wes bulali es, erë mik ide ye' shüa, etä imía bacha'bachaë.

<sup>11</sup> Etä ttè i' yëne ye' a: “Í wamblërmi ká kuà'kî kuà'kî wakpa taië ta, ñies ditsöwö kuà'kî kuà'kî wakpa taië ta, ñies s'ttò kuà'kî kuà'kî wakpa taië ta, ñies ká blúpa taië ta, e' kos chök be' kawöta Skëköl ttekölie.”

### Skëköl ttekölpa bøl

**11** Etä ye' a kua' mène ká ma'woie. Ye' a iyène: “Be' yú, Skëköl wé kibi, e' ma'uk. Ñies ka' tso' íyi moka Skëköl a, e' ma'ú. Bil s'tso' Skëköl dalöiök iwé a, e' shta'úttsa. <sup>2</sup> Erë Skëköl wé kibi upa ate urkî e' meule pë' kè dör judiowak esepa a, e' kuekî e' kè ma'war be' tö. Ie'pa tö Skëköl kè, e' dör Jerusalén dör batse'r e', e' klò'werawa, sulu'werawa ì sulu wa dò si' doka dabom tkëyök kî böt (42) ekkë. <sup>3</sup> Etä eë ye' tö ye' ttekölpa patkeraë bøl ye' tté pakök ká doka mil eyök kî cien böyök kî dabom teryök (1.260 días) ekkë. Ie'pa paiëule datsi' kra'kraë wa s'ká datsi' sù.”

<sup>4</sup> Olivo klò bølka ena bö'wöla tulur ituloka kî doka böt tso' Skëköl wörkî ká jai a, e' yëbak ká iaiäë Zacarías tö, e' wà dör ttekölpa bøl e'. <sup>5</sup> Yi datse ie'pa bøl we'ikök suluë kiane ppè, kiane ttèwà, e' ta ese ewerawa ie'pa tö bö' dökettsa ie'pa kkò a e' wa. <sup>6</sup> Ie'pa tso' Skëköl ttè pakök

ittekölpaie, e' dalewa ie'pa a kawö mène kalî wöklö'ukwà as kè iyër. Ñies ie'pa a kawö mène di' mane'uktsane péie. Ñies kawö mène ie'pa a ì sulu kos mukka ká i' wakpa kî bitökicha ie'pa kî ikiane ekkë.

<sup>7</sup> Erë mik ie'pa tö Skëköl ttè paké one, etä iyiwak sulusi aknamaie e' döraka kauk taië iskië e' a. E' ñippöraë ie'pa ta, etä ie' alöraka ie'pa kî, etä itteralurutò. <sup>8</sup> Ie'pa nu ardaë tkëter Jerusalén ká shushaë sulitanane wörkî. Ká e' a ie'pa Këköl kötwarakitò wötëulewà krus mik. Skëköl a ká e' dör suluë wes Sodoma ena Egipto es. <sup>9</sup> Pë' datse ká wa'ne, ditséwö kuà'kî kuà'kî, ttò kuà'kî kuà'kî ena ká kuà'kî kuà'kî wakpa e'pa tö Skëköl ttekölpa nu sueraë dò ká mañat kî shaböts ekkë. Ie'pa kè tö kawö mepa yi a inú wötökwa. <sup>10</sup> Ká ulitane wakpa tts'erdaë buaë, ie'pa bøl duolur e' kuekî. Skëköl ttekölpa bøl tö ie'pa we'ik siarë, e'pa duolur, e' tö ie'pa tts'weraë buaë, e' kuekî ie'pa íyi kakmeraë ñi a.

<sup>11</sup> Mik ká mañat kî shaböts e' tka, etä Skëköl tö ittekölpa bøl duolur, e'pa shkë'wékane ta ie'pa e' duéka. Wépa tö e' sué, e'pa kos suane iyökî taië. <sup>12</sup> E' ukuökî ta ttò darërë datse ká jai a, e' ttsé ittekölpa tö, e' tö iché: “¡A' shkóka íe!” Etä ie'pa mika ká jai a mò shüa, e' sué ibolökpa tö. <sup>13</sup> E' wösha ta í tka darërëë, e' tö Jerusalén mú blatësö doka dabop ta e' et tsiní chöraë í ulà a. Iwakpa duolur doka mil kuryök (7.000). Imalepa ate tts'ëka, e'pa kos suanerak taië. Ie'pa tö Skëköl tso' ká jai a, e' kikéka.

<sup>14</sup> Es ì suluë skà tka, i' ta ide bötökicha. Ì suluë skà datseia bet, e' ta ide mañatökicha.

### Duk blane, i' ta ide kuktökicha

<sup>15</sup> Etä Skëköl biyöchökwak bata tö iduk bla'wé, i' ta ide kuktökicha. Etä s'ttò tséne taië darërëë ká jai a, e'pa tö iché: “Í ta ká ulitane wakpa ena iwökirpa,

e'pa de Skëköl ena wé pairine'bitu idi' wa s'blúie, e'pa ulà a.

Ie'pa tò s'wëttsè michoè blu'ie.”

<sup>16</sup>E' ukuöki ta kékëpa doka dabom böyök kí tkël (24) tulus ikula' ki Skëköl ska', e'pa e' télur wöwakköt Skëköl wörki idalöiök. <sup>17</sup>Ie'pa tò iché:

“A sa' Këköl, be' diché ta' tajë íyi ulitane tsata.

Be' tso'tke tsawe ta, be' tso' i'ne ta, nies be' tso' aishkuö ta këkraë.

Be' e' tkéka ká ulitane wakpa blúie be' diché tajë wa,

e' kueki sa' tò icheke wëstela be' a.

<sup>18</sup>Ká ulitane wakpa wépa dör be' bolökpa,

esepa we'ikeketke be' tò kësik wa, e' kéwö de i' ta.

E' kueki ie'pa ulune tajë be' ki.

S'duulewa kos e' shulirke, e' kéwö detke.

Nies be' kanè mésopa ena be' ttekölpa ena s'batse'r malepa tò be' dalöieke, pë' dalöiërta' esepa ena pë' ësëpa, e'pa kos a iské meketke be' tò, e' kéwö de.

Wépa tò s'ditsö ewéwa ká i' ki, esepa ewëkewa be' tò, e' kéwö detke.”

<sup>19</sup>Etá Skëköl wé tso' ká jai a, e' wëkkö bunane, e' shua Skëköl tò ittè me' se' a, e' kélkuö suéyö. Etá alá wöñane blane tajë, e' ttsyö. Í tka darërëë, nies mò wösi seseë blubluë, e' dane tajë kalije.

**Alaköl eköl ena bé dör këtali kékölíe e'**

**12** E' ukuöki ta ilè tajë suéyö ká jai a ilè wà kkachöie. E' dör alaköl eköl parratulewa diwö wa. Si'wö tso' ie' klò dikia. Iwökir ki ì tkërka wes blu' wökir ki itkëka es, e' yöule bëkwö doka dabom eyök kí böt (12) e' wa. <sup>2</sup>Alaköl batsökëtkër buklú, e' kirinemitke, e' tò ie' kköchöwëke tajë.

<sup>3</sup>E' ukuöki ta ye' tò ilè skà sué ká jai a ilè wà kkachöie. E' dör iyiwak sulusi aknamaie blubluë, e' dör këtali kéköl wák

batsë e'. Iwökir doka kul, e' ki idula' tullurka doka dabop. Nies iwökir kos ki itulurka wes blu' wökir ki itkër es. <sup>4</sup>Bëkwö kos mú blatèsö mañat tsini ta e' et tsini kalëttsaitö dö ká i' ki ikirë wa. Ie' e' duéka alaköl alá kurketke, e' wöshäë ipanuk ilà kurketke e' katowaie. <sup>5</sup>Alaköl alá kune wëm, e' suletënebak ká ulitane wakpa wëttsuk iblúie. Ie' tò ie'pa wëttseraë yësyësë idiché tajë wa. Erë alá e' yënëttsa imi ulà a, minetsër wé Skëköl tkër ikulé ki ee. <sup>6</sup>Alaköl e' tkashkar këtali kéköl yöki ta imia ká sir poë wé kè yi serku' tajë ese ska'. Eë Skëköl tò ká me'baktke ie' a. Eë ie'pa tò alaköl se'weke ká doka mil eyök kí cien böyök kí dabom teryök ekkë (1260).

<sup>7</sup>E' ukuöki ta ie'pa nippëmi tajë ká jai a. Skëköl biyöchökwak kibi kiè Miguel, e' ena imalepa, e'pa nippé tajë këtali kéköl ta. Këtali kéköl ena iklépa, e'pa nippé tajë nies, <sup>8</sup>erë Miguel e' aléka ie'pa ki. E' kueki këtali kéköl ena iklépa, e'pa kè a kawö mène senukia ká jai a. <sup>9</sup>Es këtali kéköl bërie uyëttsarakitö ká jai a döttsa ká i' ki iklépa kos eta. Këtali kéköl e' dör tkabè bak ká iaiaë kiè Bé ena Satanás e'. Ie' dör ká ulitane wakpa kitö'ukwak as ie'pa tò ì sulu wamblö.

<sup>10</sup>E' ukuöki ta ttö darërëë ttsyö ká jai a tò iché:

“Bata ekkë ta Skëköl tò se' tsatkée, ie' e' tkëkatke ì ulitane blúie diché ta' tajë.

Wé pairi'bitu ie' tò idi' wa s'blúie e' detke ká ulitane wakpa wökirie.

Satanás bak s'yamipa kkatök nië nañë Skëköl a,

erë bata ekkë ta ie' uyëttsaitö.

<sup>11</sup>Obeja Pupula kötëwa, e' pé tène se' skéie,

ie' mik s'yamipa erblé,

e' tté buaë paké ie'pa tò,

e' kueki ie'pa e' aléka Satanás ki.

Ie'pa kè tkine tté buaë e' dalërmik ittëwa e' ki.

<sup>12</sup> ¡A Skëköl biyöchökwakpa serke ká jai, a' ttsë'nú buaë!

Erë jwëstela ina wépa tso' ká i' kī ena dayë kī esepa ta!

Bé wā ijcher tō ie' kēwō dökewatke tsinet,

e' kuëkī ie' ulune taië, ie' dē'ttsa' a' we'ikök."

<sup>13</sup> Mik këtali këköl tō isuë tō ie' uyanettsa döttsa ká i' kī, etā ie' tō alaköl alà kune', e' tōtiëmi. <sup>14</sup> Erë alaköl a' pu pik mène as iur kamië këtali këköl yöki ie' ká tso' ká sir poë wé kè yi serku' ee. Eë ie'pa tō ie' se'weraë dō duas mañal kī shaböts. <sup>15</sup> Etā këtali këköl tō di' tué ikkò a' taië as e' tō alaköl katòmi. <sup>16</sup> Erë íyök tō alaköl kímé. Íyök tskinane tã di' tué këtali këköl tō ikkò a, e' yéwa íyök tō. <sup>17</sup> E' tō këtali këköl uluwéka taië alaköl kī. E' kuëkī ie' mía ñippök alaköl e' aleripa datse ie' itökī e'pa ta. Ie'pa dör wépa tō Skëköl ttë dalöiëno, e' iuteke buaë e'pa. Nies ie'pa e' tkéwa darërëë kekraë Jesús tté mokī e' a' kè olo'yeta'. <sup>18</sup> Etā këtali këköl demi e' duéka dayë kkò mik.

**Iyiwak sulusi aknamaie e' deka dayë a**

**13** Etā ye' tō isuë tō iyiwak sulusi aknamaie deka etō dayë a, e' wökir dōka kul, idula' tulturka dabop. Idula' kos kī itulturka wes itkër blu' wökir kī es. Ie' wökir bik ekkë kī kië kitule et et, e' kos tō Skëköl cheke suluë. <sup>2</sup> Iyiwak sulusi suë ye' tō, e' dör wes namu es, iklö dör wes sini'urri bërre klò es, ikkò dör wes ma'name kkò es. Iyiwak sulusi e' a' këtali këköl tō idiché ena kawō mé s'blúie s'wëttsöie. <sup>3</sup> Iyiwak sulusi e' wökir dōka kul, iwökir ek shka'ule taië wësua ittëwamiitō ekkë. Erë e' buanene bet. E' tō ká ulitane wakpa tkiwéwa taië. E' kuëkī ie'pa tō ie' klò'wé iblúie. <sup>4</sup> Këtali këköl tō idiché me'baktke iyiwak sulusi dë'ka dayë a e' a, e' kuëkī ie'pa tō idalöie ikëkölíe. Nies ie'pa tō iyiwak sulusi e'

dalöie. Ie'pa tō iché: "Kè yi dör wes ie' es. Kè yi e' alòpaka ie' kī."

<sup>5</sup> Iyiwak sulusi dë'ka dayë a e' a kawō mène e' ttsökka taië, Skëköl chök suluë. Nies kawō mène ie' a' blu'ie s'wëttsuk si' dōka dabom tkëyök kī böt ekkë (42).

<sup>6</sup> Etā es ie' tō iwà wamblé. Ie' tō Skëköl ena Skëköl kië e' ché suluë. Nies ie' tō Skëköl wé ena wépa serke ká jai a, e' kos ché suluë. <sup>7</sup> Nies kawō mène ie' a' ñippök s'batserpa tso' ká i' kī e'pa ta e' alökka ie'pa kī. Kawō mène ie' a' blu'ie ká ulitane wakpa, s'ttò ku'a'kī ku'a'kī, ditsöwö ku'a'kī ku'a'kī, e'pa kos wëttsuk. <sup>8</sup> Wépa dör Obeja Pupula kótulewa se' skéie, e' icha, esepa kië tso' kitule iyëkkuö kī kuaë, mik Skëköl tō ká i' yö' e' yöki. Yëkkuö e' dör sene michoë e' yëkkuö. Wépa kië tso' kitule yëkkuö e' kī, esepa kè wā iyiwak suluë e' dalöiëne'. Erë ká ulitane wakpa malepa, wépa kië kè ku' kitule sene michoë yëkkuö kī, esepa kos tō iyiwak sulusi dë'ka dayë a e' dalöie ikëkölíe.

<sup>9</sup> Ì cheke ye' tō, e' ttsó a' ulitane tō:

<sup>10</sup> "Wépa suletë'bak Skëköl tō klò'wéwa, esepa tserdami klöulewa.

Wépa suletë'bak Skëköl tō duökwa tabè kkò a,

esepa tterawa tabè wa."

E' wa s'batserpa e' tkòwa darërë ena ier-blò ie' mik e' wërdaë.

**Iyiwak Sulusi aknamaie deka etō íyök a**

<sup>11</sup> E' ukuökī tã ye' tō iyiwak sulusi aknamaie skà suë etō, e' deka íyök a. Idula' dör bötö wes obeja wëñe dula' es, ittö wes këtali këköl ttö es. <sup>12</sup> Ie' wā kawō tso' ì kos woie wes iyiwak sulusi dë'ka dayë a e' wā itso' es. Ie' kanëblöke iyiwak sulusi dë'ka dayë e' a. Ie' kanë dör ká ulitane wakpa kök iyiwak sulusi dë'ka dayë a shka'ule taië iwökir kī wësua ittëwamiitō, e' dalöiök. <sup>13</sup> Ì kè or yi a, ese wëitö taië dōka bö' kiëitö ká jai a, e' ta ib-

iteshka tajë dötsa ká i' kǐ sulitane wörki. <sup>14</sup> Ì kè or yi a, ese wé tajë ie' tò iyiwak sulusi dè'ka dayè a e' wörki. E' wa ie' tò ká ulitane wakpa kè dör Skèköl icha, esepa kos kít'wé tajë. Ie' tò ie'pa a iché: "Iyiwak sulusi dè'ka dayè a e' shká'ule tajë iwökir kǐ tabè wa erè ishkenekane e' diököl yuó iwák sué idalöioie." <sup>15</sup> Iyiwak sulusi dè'ka íyök a e' a kawö mène siwá' muk iyiwak dè'ka dayè a e' diököl yöne e' a as ittöka, ñies as tò wépa kè tò idalöie, esepa ttökwa patkò. <sup>16</sup> Ñies iyiwak sulusi dè'ka íyök a, e' tò ká ulitane wakpa ké e' muk wakyuè iulà bua'kka kǐ ö iwötsa kǐ. Pè' esepa ena pè' dalöier-ta', pè' siarèpa ena pè' inuköl blúpa, pè' klöulewá kanè mésoie ena pè' kè dör es, e'pa kos kawöta e' muk wakyuè. <sup>17</sup> Wépa wakyöule es, esepa è a kawö mène íyi taúk ena íyi wataúk. Ie'pa kos wakyöule iyiwak sulusi dè'ka dayè a e' kiè wa ö ikiè e' número wa.

<sup>18</sup> A' kawöta iwà bikeitsökwa buaè as a' éna iar tò ì kiane yénuk. Wépa didir ena ká ane buaè, esepa éna iwà armi buaè. Iyiwak sulusi dè'ka dayè a e' número dör s'ditsö eköl e' número, e' dör cien teryök kǐ dabom teryök kǐ teröl (666).

### Obeja Pupula ena wépa tsatkéne esepa

**14** E' ukuökǐ ta ye' tò Obeja Pupula sué tò idur kabata kiè Sión e' wöbata kǐ. Ie' ta pè' tso' tajë döka 144.000 ekkè. Ie'pa kos wötsa kǐ Obeja Pupula ena iyé, e'pa kiè tso' kitule. <sup>2</sup> E' ukuökǐ ta ye' tò ittse tò ì blarke tajë ká jaí a, e' blar wes di' blar tajë ákttö mik es, wes alá blar tajë es, e' dör wes s'blar tajë ma'ma kiè arpa wa es. <sup>3</sup> Pè' tso' tajë döka 144.000, e'pa ièter Skèköl kulé wöshäè ñies itso' ttsé'ka döka tkèl ena kèkèpa döka dabom böyök kǐ tkèl (24), e'pa wöshäè ie'pa ièter. Ie'pa tso' ttsök ttsè pa'alǐ wa. Ká ulitane wakpa shua e'pa è tsatkéne, e' kuekǐ

kè yi skà a e' yönuk ttsè e' wa. <sup>4</sup> Ie'pa dör yésyèsè, kè e' iaouleka trè wa yès. Ie'pa michoè Obeja Pupula itökǐ wé imi'ke ee. Ie'pa tsatkéne, ie'pa dör wes íyi tsá mène Skèköl a ena Obeja Pupula a es. <sup>5</sup> Ie'pa kè kayèule yès. Ie'pa kè kǐ ì sulu ta' Skèköl wöa.

### Skèköl biyöchökwakpa döka teröl

<sup>6</sup> E' ukuökǐ ta ye' tò Skèköl biyöchökwak skà sué eköl urkear kashuk a. E' wa Skèköl tté buaè yöbiè e' dami wà pakè ká ulitane wakpa a, s'ditsöwö ulitane a ena s'ttò kua'kǐ kua'kǐ ulitane a. <sup>7</sup> Ie' tò iché aneule: "Skèköl tò sulitane shuleketke, e' kèwö detke. E' kuekǐ Skèköl dalöió, ie' kikóka. Kashuk ena ká i' ena dayè ena di' ulitane, e' kos yö'itö, e' kuekǐ idalöió sulitane tò."

<sup>8</sup> Eta Skèköl biyöchökwak skà debitu idè'bitu kewe, e' itökǐ, e' tò iché: "Ká kibi tajë bua'iewa kiè Babilonia, e' enewa seraa, sulunewa. Babilonia wakpa tò ká malepa wakpa erkiöwé ì sulu wamblök ie'pa ta wes s'ttèka blo' wa senokka ita es. E' kuekǐ ká e' wakpa enewa."

<sup>9</sup> Eta Skèköl biyöchökwak skà debitu itökǐ, e' tò iché: "Wépa tò iyiwak sulusi dè'ka dayè a e' ena idiököl dalöié ta ie' mérak wakyuè iwötsa kǐ ö iulà kkue kǐ, <sup>10</sup> esepa we'ikeraè Skèköl tò. Ie' kèsik tajë e' ardaè seraa ie'pa kǐ. E' dör wes ie' tò ie'pa ké ì bacha'bachaè e' yökwa seraa es. Ie' tò ie'pa we'ikeraè tajë kekraè bö' wönarke azufre ta e' wa ibiyöchökwakpa batse'r e'pa wörki ena Obeja Pupula wörki. <sup>11</sup> Wépa tò iyiwak sulusi dè'ka dayè a e' dalöié, ñies idiököl dalöierakitö, e'pa e' me' wakyuè iyiwak sulusi e' kiè wa, esepa weirke bö' ké a, e' shklé batrö michoè kè iwöittá'wá ñiè nañèe."

<sup>12</sup> S'batse'rpa tò ie' ttè dalöièno, e' iüté buaè, ñies ie'pa tkéulewá darèrèè Jesús mik. E' wa ie'pa diché wèrdaè.



<sup>13</sup> E' ukuökij ta ye' tö ttò datse ká jai a e' ttsé. E' tö ye' a iché: "Iñe ta ena aishkuö ta wépa erblé' Jesús mik ta idurulune es, ayécha buaé esepa." Nies Skéköl Wiköl tö iché: "E' dör moki, ie'pa kanéblé' daréréë Skéköl a ká i' ki, e'pa enuraé aishkuö ta. I buaé kos o' ie'pa tö, e' ské dóraé ie'pa ulà a."

<sup>14</sup> E' ukuökij ta ye' tö mò saruru sué, mò saruru e' ki yi tkër eköl wër tö ie' dör S'ditsö Alà. Ie' wökir ki itkëuleka i tkekeka blu' wökir ki yöule orochka wa ese. Tabe kà di'diè tso' iyiwö toie, ese a'tser ie' wa. <sup>15</sup> Eta Skéköl biyöchökwak eköl e' yéttsa Skéköl wé tso' ká jai a e' a, eta iché aneule yi tkër mò bata ki e' a: "Ká ulitane wakpa dör wes iyiwö es, e' kéwö detke wöshhtë wes íyi wöshhtësö es. E' kuëki e'pa wöshttö be' tabè wa." <sup>16</sup> Eta yi tkër mò bata ki, e' tö itabè waté ká i' ki, eta iwà wöshhtëitö.

<sup>17</sup> E' ukuökij ta Skéköl biyöchökwak skà e' yéttsa Skéköl wé tso' ká jai a e' a. Ie' wa tabè kà di'diè a'tser. <sup>18</sup> E' ukuökij ta Skéköl biyöchökwak skà tso' e' dör ka' tso' íyi moka Skéköl a e' bó kanéukwak. Ie' dettsa ta ichéitö aneule wé wa tabè dami e' a: "Uwawö kos tso' ká dià a e' detke wöshhtë, e' kuëki uwawöli kicha tö tabè wa." <sup>19</sup> Eta Skéköl biyöchökwak, e' tö uwawöli kos kicha té ta iékaitö ákuk a wé iwóli ñateke idiö yottsaié e' a. Ákuk e' wà kiane chè tö Skéköl tö ibolókpa we'ikeraé ikésik wa wes uwawö ñatësö es. <sup>20</sup> Ákuk e' tso' Jerusalén bánet, e' a iwöshhtë Skéköl biyöchökwak tö e' iène. Mik inatène, eta s'pé tène taijë wër wes di' taijë suësö es. Ibsíj dör kilómetro döká cien mañayök (300) ekkë, ishóló dör metro et ki shaböts.

### Ì sulu bata datse

**15** E' ukuökij ta ye' tö ì skà sué ká jai a ilè wà kkachioie, e' tö ye' tkiwéwa. E' dör Skéköl biyöchökwakpa döká kul, e'pa wa ì sulu bata datse döká kul ká i'

wakpa ki, e' dami. Mik ì sulu ikképa tka, eta Skéköl kësik taijë e' wöklöne.

<sup>2</sup> Nies ye' tö isué tö ì me'r bérie dayé sué, e' wër wösuochka sué saréréë shu-tuule bö' wörkua wa. Nies wépa e' alikabak iyiwak sulusi déka dayé a e' ki ena idiököl ki, esepa suéyö. Ie'pa kè e' menettsa wakyuë iyiwak sulusi kiè e' número wa. Ie'pa ièter dayé e' kkömik. Ma'ma blarta' kiè arpa me' Skéköl tö ie'pa a, e' a'tser ie'pa wa. <sup>3</sup> Skéköl kanè méso kiè Moisés e' ttsè, nies Obeja Pupula ttsè, e' tsseitseke ie'pa tö, e' tö iché i' es: "A Skéköl, be' diché ta' taijë íyi ulitane tsata.

Ì kos wé be' tö, e' dör taijë buaé, e' tö sa' tkiwéwa.

Be' è dör ká ulitane wakpa blú.

Be' dör yösyësé, be' ttò etkè.

<sup>4</sup> A Skéköl, sulitane tö be' dalöieraé.

Sulitane tö be' kikeraka.

Be' è dör batse'r.

Sulitane wa ijcher tö be' tö s'shüleke yösyësé,

e' kuëki ká ulitane wakpa dóraé be' ska' be' dalöiök."

<sup>5</sup> E' ukuökij ta Skéköl wé tso' ká jai a, e' úshu dalöiërta' taijë shüte, e' suéaryö áie, e' shüa ttè me'bak Skéköl tö se' a e' tso' bléule. <sup>6</sup> Skéköl biyöchökwakpa döká kul wa ì sulu datse ká i' ki e' dami-rak iwà iulà a, e'pa dettsa Skéköl wé e' a. Ie'pa datsi' yöule datsi' kiè lino ese wa e' dör sarurué wöñarke dalaláé, ikiparuo àr iwà icho' mik, e' dör oro. <sup>7</sup> Ì tso' ttsé'ka döká tkël, e' eköl tö tka' yöule orochka wa, e' mé Skéköl biyöchökwakpa kul a eköl eköl. Tka' e' a Skéköl ser michoë e' kësik iène chié. <sup>8</sup> Eta Skéköl wé e' wà ièneká Skéköl olo taijë ena idiché taijë e' shkle wa. Kè yi döpa wa Skéköl wé e' a dö mik, ì sulu dami Skéköl biyöchökwakpa kul wa, e' wà tka eta.

**16** Ye' tö yile ttò ttsé daréréë Skéköl wé a, e' tö iché Skéköl biyöchök-

wakpa kul a: “¡A' yú t̄a a' t̄k̄a' wà iène Skéköl k̄esik wa, e' wà tkótt̄sa k̄á dià k̄i!”

### Tk̄a' wà iène Skéköl k̄esik wa dōk̄a kul

<sup>2</sup> Skéköl biyöchökwak tsá, e' tō itk̄a' wà tkétts̄a k̄á i' k̄i, et̄a wépa wakyöule iyiwak sulusi dē'k̄a dayē a e' kiè wa ñies idiököl daloiérakitō, esepa k̄os k̄i s'méwō sulusi tschine dalēr taiē.

<sup>3</sup> E' ukuök̄i t̄a Skéköl biyöchökwak skà tō itk̄a' wà tkétts̄a dayē k̄i. Et̄a dayē m̄ía péie wes wēm kōtulew̄a pé es. Iyiwak k̄os tso' dayē a duolur yēs.

<sup>4</sup> E' ukuök̄i t̄a Skéköl biyöchökwak skà tō itk̄a' wà tkétts̄a di' k̄os k̄i. Et̄a di' k̄os m̄ía péie. <sup>5</sup> E' ukuök̄i t̄a ye' tō itt̄sé tō Skéköl biyöchökwak dör di' kkō'nukwak, e' tō iché:

“A Skéköl, be' dör bats'e'r, be' tso'tke ts̄awe t̄a, i'ñe t̄a ena k̄ekraē. K̄ekraē be' tō s'shuleke yēsyesē, e' kuēk̄i e' dör buaē tō be' tso' ie'pa we'ikōk es.

<sup>6</sup> Ie'pa tō s'batse'rp̄a ena be' ttekölp̄a, e'pa kōtulur pé tēne taiē, e' kuēk̄i e' dör buaē tō be' tō ie'pa we'ikē es.

I'ñe t̄a be' tō ie'pa ské kéne pé yök.

Es ie'pa k̄i inuí ské dene.”

<sup>7</sup> E' ukuök̄i t̄a k̄a' tso' iyi mok̄a Skéköl a eē t̄tō ts̄éyō se' t̄tōie e' tō iché: “A Skéköl, be' diché t̄a' taiē iyi ulitane ts̄ata, ayēcha e' dör mok̄iē, be' tō ie'pa nuí shulē mok̄iē yēsyesē.”

<sup>8</sup> E' ukuök̄i t̄a Skéköl biyöchökwak skà tō itk̄a' wà tkétts̄a, e' ane diwō k̄i. Et̄a diwō a kawō mēne s'ditsō ña'ukwa iba taiē e' wa. <sup>9</sup> D̄iba e' tō sulitane pa shayo'wétts̄a taiē. Ì sulu ikkē k̄os patké Skéköl tō ie'pa k̄i, erē ie'pa kē éna ì sulu wambleke ie'pa tō ese olo'yak, ie'pa kē er mane'wak ie' a. Ie'pa kē éna ie' k̄ikakk̄a. E' skéie ie'pa tō ie' ché suluē.

<sup>10</sup> E' ukuök̄i t̄a Skéköl biyöchökwak skà tō itk̄a' wà tkétts̄a, e' ane wé iyiwak sulusi dē'k̄a dayē a e' tkēr̄k̄a e' k̄i. Et̄a ie' k̄á k̄os ttsenew̄a wes stui es. K̄á ulitane

wakpa tō iku' kuke ipà dalēr taiē e' è kuēk̄i. <sup>11</sup> Erē ì sulu wambleke ie'pa tō, ese kē olo'yē ie'pa tō. Ie'pa pa dalēr taiē ñies ie'pa tteke smewō sulusi tō, e' kuēk̄i ie'pa tō Skéköl tso' k̄á jai a e' ché suluē.

<sup>12</sup> Skéköl biyöchökwak skà tō itk̄a' wà tkétts̄a, e' ane di' taiē kiè Éufrates e' a. Et̄a di' taiē e' sinew̄a as blu'pa dat̄se diwō tskirke e' wa, esepa tkōmi buaē in̄ippök-wakpa t̄a. <sup>13</sup> E' ukuök̄i t̄a ye' tō wimblupa sulusi suē bukuē'ie mañat. Et detts̄a kē-tali kéköl e' kkō a. Et detts̄a iyiwak sulusi dē'k̄a dayē a e' kkō a. Ibata èt detts̄a iyiwak sulusi e' tteköl kkō a. <sup>14</sup> Bukuē' e'pa dör aknamapa. Ì kē or yi a, ese ormi ie'pa a. Ie'pa mi'ke blu'pa tso' k̄á wa'ñe, e'pa dapa'uk ñippök Skéköl diché t̄a' taiē iyi ulitane ts̄ata, e' t̄a, mik ik̄ewō de sulitane shulök et̄a.

<sup>15</sup> Skékēpa Jesucristo tō iché i' es: “Ye' t̄tō t̄tsō. Mik ye' datsene, et̄a ye' dat̄se kē e' biyō yēule wes akblökwak dōw̄a es. Wépa tso' erk̄i ye' panuk, idatsi' tso'tke buaē iēnoie, ayēcha buaē esepa. Es ie'pa kē shkōpa sume sulitane wörk̄i t̄a ijaer̄karak.”

<sup>16</sup> Et̄a aknamapa mañal, e'pa tō blu'pa dapa'wék̄a k̄á kiè hebreoie Armagedón ee.

<sup>17</sup> Et̄a Skéköl biyöchökwak bata tō itk̄a' wà tkétts̄a, e' ane kashuk a. Et̄a se' t̄tōie dar̄er̄ē t̄tsē ye' tō dat̄se blu' kulé tso' Skéköl wé a e' ska, e' tō iché aneule: “¡Ye' tō iwakanewétke!” <sup>18</sup> Et̄a alá wōñane taiē iblane taiē. Í tka dar̄er̄ē, e' tō k̄á wōti'wé taiē k̄os í bakule k̄á i' k̄i e' ts̄ata. <sup>19</sup> K̄á wa'ñe wé s'ditsō serke, e' ké k̄os enewa. K̄á kibi taiē bua'iew̄a kiè Babilonia, e' tskinew̄a at̄e mañat ts̄iní. Es Babilonia k̄i Skéköl k̄esik suluē blé, ì sulu wamblekerakitō ese nuí kuēk̄i. E' dör wes Skéköl tō ie'pa ké ì bacha'bachaē yökwa serāa es. <sup>20</sup> Dayē nane k̄os, k̄abata k̄os, e' cholur. <sup>21</sup> Ñies mò wōli wōsi seseē, e' wōsi es tkōk̄a dabom tk̄eyök (40) kilo ts̄ata, ese dane

tajë s'ditsö k<sub>i</sub> wës kal<sub>i</sub> yër es. E' tö s'ditsö we'iké tajë e' kuek<sub>i</sub> ie'pa uluneka Skëköl k<sub>i</sub> ta ie' ché suluë.

### Alaköl trër tajë e' weirdaë

**17** Skëköl biyöchökwakpa doka kul wä tkä' tso', e' eköl de ye' ska' ta ye' a ichéitö: “Be' shkó ye' ta, súyö be' a ikkachë wës Skëköl tö alaköl trër tajë kkeauleka tajë, e' we'ikë. Alaköl e' tkërka d<sub>i</sub>' tso' tajë e' bata k<sub>i</sub>. <sup>2</sup>Ká ulitane blúpa e' mettsa trënuke ie' ta. Nies ká ulitane wakpa e' mettsa ì sulu wamblök wës ie' es kè wöklörta' wës s'tteke blo' tö es.”

<sup>3</sup>E' ukuök<sub>i</sub> ta Skëköl Wiköl de tajë ye' k<sub>i</sub> ta Skëköl biyöchökwak wä ye' mítser ká sir poë wé kè yi serku' tajë ese ska'. Eta ee ye' tö alaköl sué eköl tkërka iyyak sulusi dë'kã dayë a wák batsë e' k<sub>i</sub>. Iyyak sulusi e' pa kos k<sub>i</sub> kië tso' kitule tajë kuã'k<sub>i</sub> kuã'k<sub>i</sub>. Kië e' wä kos tö Skëköl cheke suluë. Iwökir doka kul, idula' doka dabop. <sup>4</sup>Alaköl e' paiëule buaë idatsi' dör sielsiel ena batsë. Ikitküle buaë tajë oro wa ena ák bua'buwa wa ena ákwöla bua'buwa kië perla ese wa. Tkä' yöule oro wa, e' a'tser iwä wä iëule chië blo' wa. Blo' e' tö ì kos wër suluë Skëköl wa ena alaköl e' ia'wëka trë wa e' chë. <sup>5</sup>Ie' wöt-sa k<sub>i</sub> ttë tso' kitule. Ttë e' wä blëulewä se' yöki, e' tö iché: “Ye' dör ká kibi tajë kië Babilonia. Ye' dör alakölpa trër suluë esepa kos m<sub>i</sub>. Nies ye' dör ì kos tso' ká i' k<sub>i</sub> wër suluë Skëköl wa ese m<sub>i</sub>.” <sup>6</sup>Eta ye' tö isuë tö alaköl tteke blo' tö. Blo' e' dör s'batserpa kötulur ie'pa tö Jesús ttë kuek<sub>i</sub>, e'pa pé. E' tö alaköl e' tteke blo'ie. Mik ye' tö ie' sué eta ye' tkinewä tajë. <sup>7</sup>Eta Skëköl biyöchökwak tö ye' a ichaké: “¿Ì kuek<sub>i</sub> be' tkinewä? Alaköl e' ena iyyak sulusi wökir doka kul, idula' doka dabop, e' k<sub>i</sub> alaköl tkërka, e' wä pakeke ye' tö be' a. <sup>8</sup>Iyyak sulusi sué be' tö, e' bak senuk ká iaiaë, e' kè ku'ia i'ne ta, erë ie' dörakã kauk tajë iskië, kè s'wö dë'mi ekkë, e' a. E' ukuök<sub>i</sub> ta Skëköl

tö ie' we'ikök patkeraë kekraë. Wëpa kië kè ku' kitule kuaë sene michoë yëkkuö k<sub>i</sub> kam Skëköl tö ká i' yuö e' yöki, esepa kos tkirdawarak mik ie'pa tö iyyak sulusi dë'kã dayë a e' sué eta. Iyyak sulusi e' bak senuk, e' kè ku'ia i'ne ta, erë ie' dörane.

<sup>9</sup>“Wëpa didir ena ká ane buaë, esepa éna ì cheke ye' tö a' a e' wä armi buaë. Iyyak sulusi e' wökir doka kul, e' wä kiane chë kabata doka kul, e' k<sub>i</sub> alaköl sulusi tkërka. Nies e' wä kiane chë blu'pa doka kul. <sup>10</sup>E' skel blërulunebak, e' eköl tso' blu'ie, blu' bata doia itöki erë e' kè kaneblöpa ká tajë blu'ie. <sup>11</sup>Iyyak sulusi bak senuk ká iaiaë, e' kè ku'ia i'ne ta, mik ie' dene blu'ie, eta ide paköl, ie' dör blu' bak kul e' eköl nies. Erë ie' dene blu'ie weinuk è.

<sup>12</sup>“Idula' doka dabop sué be' tö, e' wä kiane chë tö blu'pa doka dabop e'pa doia. Ie'pa a kawö merdaë s'wëttsioe iyyak sulusi e' ta ekuölö ème. <sup>13</sup>Blu'pa doka dabop, e'pa er mé ñikkë iwákpa bil ekkë, kawö ena diché tso' ie'pa wä s'wëttsioe, e' muk iyyak sulusi e' a. <sup>14</sup>Ie'pa ñippöraë Obeja Pupula ta, erë e' e' alörakã ie'pa k<sub>i</sub>. Ie' dör skëkölpa ulitane e' kéköl, nies ie' dör blu'pa ulitane e' blú, e' kuek<sub>i</sub> ie' e' alörakã ie'pa k<sub>i</sub>. Wëpa tso' ie' ta, e'pa klö'bak Skëköl tö, nies ie'pa shukitbakitö. Ie'pa dör Obeja Pupula ttökatapa e' tkökewä darërëe ie' a ese.”

<sup>15</sup>Nies Skëköl biyöchökwak tö ye' a iché: “D<sub>i</sub>' tso' tajë sué be' tö, e' bata k<sub>i</sub> alaköl trër tajë, e' tkërka, e' wä kiane chë, ká tso' tajë e' wakpa s'tso' tajë ttö kuã'k<sub>i</sub> kuã'k<sub>i</sub> e'. <sup>16</sup>Idula' doka dabop ena iyyak sulusi, e'pa tö alaköl trër tajë e' suëraë suluë. Ì kos tso' ie' wä, e' yerattsarak-itö iulã a, imeraarakitö sume. Ie'pa tö ie' chkã katerawä eta ikuö atë e' ña'werawa ie'pa tö. <sup>17</sup>Skëköl wák tö blu'pa dabop er méwä ñikkëe as ie'pa wä kawö tso' s'wëttsioe, e' müitörak iyyak sulusi e' a.



ñies harina bua'buā ena trigowö; ñies baka ena obeja ena kabaio ena carreta; ñies pë' klöulewā kanè mésoie ena pë' skà tso' watuè ese. Ýi ekkè kōs watuèke ie'pa tō. <sup>14</sup> Dalì wataukwakpa tō icheraè: “A Babilonia wakpa, ì kōs bua'buāè kiarke a' kī taiè, e' kè ku'ia a' wā. Ýi bua'buā kōs wër buaè wōnarke dalölöè, e' kōs kè dë'ia a' ulà a.”

<sup>15</sup> Dalì wataukwakpa e' blu'wé Babilonia wakpa wa, e'pa e' tsuraarak kamiè ikī sauk. Ie'pa suane dö' ì sulu tka Babilonia wakpa kī, e' dö' ie'pa kī ñies. Ie'pa eriar-daè siarè, iuraè taiè. <sup>16</sup> Ie'pa tō icheraè: “Ýi Wëstela ina Babilonia wakpa ta! A' e' paiëule datsi' bua'buā kiè lino ese wa ñies datsi' wöaule siësië ena batsè ese wa. A' e' kītkëule buaè oro wa ena ák bua'buā wa ena ákwöla bua'buā kiè perla ese wa. <sup>17</sup> Ýi ká etkè ta a' wā ýi tso' bua'buāè taiè, a' blune taiè, e' enewa!”

Es ñies kanò blubluè shkōke taiè dayè kī, e' wōkirpa kōs ena ikaneblōkerak kōs ena wépa shkōke kanò shuā, wépa kōs inuköl klö'wëke kaneblök kanò wa, es-epa kōs e' tséat kamiè Babilonia kīsauk. <sup>18</sup> Mik ie'pa tō ká e' ñanewa e' shkī sué, etā ie'pa ane taiè: “Ýi ká wé skà dör buaè taiè wës Babilonia es?” <sup>19</sup> Ie'pa tō ká po tkéka e' wōkir kī iwā kkachoie tō ie'pa erianerak taiè ta iuke taiè ta ichéakitō aneule:

“Ýi Wëstela ina ká e' buaè taiè, e' wakpa ta! Sa' kōs wā kanò tso', e'pa blune taiè ie'pa batamik.

Ýi ká etkè ta ká e' sulunewa!”

<sup>20</sup> Ýi a' tso' ká jai a, Skéköl tō Babilonia wakpa ewéwa, e' kuekī a' ttsë'nú buaè! A' dör batse'rpa,

ñies Jesús ttekölpa tsá, ñies Skéköl ttekölpa, ie'pa kōs ttsë'nú buaè!

Skéköl tō Babilonia wakpa we'iké, ì sulu wamblé ie'pa tō a' kī, e' nuí ské de ie'pa kī, e' kuekī a' ttsë'nú buaè.

<sup>21</sup> E' ukuökī ta Skéköl biyöchökwa skà de eköl diché ta' taiè. E' tō ák bërie kéka, ák e' dör kōs ák tso' wawè ekkè, e' uyémiitō dayè a ta ichéitō: “A Babilonia wakpa, a' chōrawa wës ák i' chowa dayè a es, kè yi tō a' suepaia.

<sup>22</sup> Ma'ma tso' bla'wé kiè arpa ena flauta ena duk, ese kè blarpaia a' ká a. A' kanè mésopa kōs kè ku'ia.

Ák tso' wawè ese kè blarpaia a' ká a.

<sup>23</sup> Bö'wö ñarke e' kè wōnarpaia a' ká a.

Kè yi ku'ia ulabatsök.

A' dalì wataukwakpa e'pa kkeauléka taiè, ie'pa dör pë' taiè ká i' kī.

Es a' tō ká ulitane wakpa kit'wé alibchò wa,

e' kuekī ýi ikkè sulu de a' kī.”

<sup>24</sup> Skéköl ttekölpa ena s'batse'r malepa kōs kōtulur Babilonia wakpa tō, e'pa pé tène ie'pa ká kī. Ñies pë' malepa taiè kōtulur ie'pa tō. E' kuekī e' nuí de ie'pa kī.

**19** E' ukuökī ta ye' tō ittsé tō ká jai a pë' daparke taiè, e'pa tté darèrè ta ichéakitō aneule:

“Skéköl tō s'shulè yësyësè tté mokī wa, e' kuekī jikikōkašö!

Ie' dör S'tsatkōkwak.

Ie' olo ta' taiè, ie' diché ta' taiè ýi ulitane tsatā. <sup>2</sup> Babilonia wakpa dör wës alaköl trër taiè es.

Ie'pa bak ká ulitane wakpa erkiöuk ì sulu wamblök wës ie'pa es.

Ie'pa tō Skéköl kanè mésopa kōtulur.

E' nuí kī Skéköl tō ie'pa ká sulu'wéwa ta iwakpa ewéwaitō.

E' kueḱi se' wā ijcher tō ie' s'shuleke yēsýēsē mokiē.”

<sup>3</sup> E' ukuōḱi tã ie'pa tō iskà chéne: “¡Skēkōl kīkōḱasō!

Babilonia shkḱe dià e' batrō michoē.”

<sup>4</sup> Kēkēpa dōḱa dabom böyōḱ kī tkēl (24) ena ì ttsē'ka dōḱa tkēl, e'pa e' tēlur isḱi wōwakkōt tã Skēkōl tkērḱa ikulē kī, e' dalōiérakitō. Ie'pa tō iché: “¡Es e' idir! ¡Skēkōl kīkōḱasō!” <sup>5</sup> Skēkōl tkēr e' ska' tḱō tsé ye' tō, e' iché:

“¡A' ulitane tō se' Kēkōl kīkōḱa, se' tsitsipa ñies se' blublupa.

A' dōr ie' kanè mēsopa tō ie' dalōieke, e'pa ḱos tō Skēkōl kīkōḱa!”

### Obeja Pupula ulabatsōke e' kēwō tkō'uk

<sup>6</sup> Etã ye' tō ittse tō ì blarke taiē wes s'tso' taiē tḱō es, wes di' blar taiē áktḱō mik es, wes alá blar taiē es, e' tō iché:

“¡Skēkōl kīkōḱasō!

Kēkē dōr se' Kēkōl, e' diché tã' taiē íyi ulitane tsatã.

Ie' detke s'blúie s'wēttsuk,

e' kueḱi ikīkōḱasō.

<sup>7</sup> Obeja Pupula ulabatsōketke, e' kēwō dewatke,

e' tayē e' kanè wētke ulabatsoie ie' tã.

E' kueḱi se' ttsē'nū buaē kanēē, ie' olo kīkōḱasō.

<sup>8</sup> Ie' tayē a' datsi' bua'buā kiè lino e' mène e' paioie,

Datsi' e' dōr saruruē, wōñarke dalalāē.

Datsi' e' wà kiane chē

s'batse'rupa ser yēsýēsē e'.”

<sup>9</sup> Skēkōl biyōchōkwak tō ye' a' iché: “Ishtō yēḱuō kī i' es: ‘Wēpa shkēñaule Obeja Pupula ulabatsōketke, e' kēwō tkō'uk, ayēcha buaē esepa.’” Ñies ie' tō iché ye' a': “Tḱē e' dōr Skēkōl tḱē mokiē.”

<sup>10</sup> Ye' e' tēwã isḱi wōwakkōt Skēkōl biyōchōkwak wōshãē idalōiōḱ, erē ie' tō ye' a' iché: “¡Se' kē war! Ye' dōr Skēkōl kanè méso wes be' ena be' malepa e'

tkēulewã darērē Jesús ttē a' e'pa es. ¡Skēkōl è dalōiō!”

Jesús ttē e' tō Skēkōl tteḱōlpa erk-iōwēke s'pattōḱ.

### Itkērḱa kabaio saruru kī

<sup>11</sup> E' ukuōḱi tã ye' tō isuē tō kã jai a' ukkō tso' áie, eē kabaio suéyō etō saruruē. E' kī itkērḱa, e' kiè dōr Tḱō Yēsýēsē Kēkraē. Ie' tō s'wēttsēke yēsýēsē. Mik ie' e' kēḱa ñippōḱ e' kē dōr é. <sup>12</sup> Ie' wōbla wēr wes bō'wō wōñar es. Ie' wōkir kī ì tkērḱa taiē wes itsō' tkēḱa blu' wōkir kī es. Ie' kī ikiē tso' kitule. Kiè e' kē jcher yi wã, e' jcher ie' wák è wã. <sup>13</sup> Ie' datsi' nuuleḱa pé wa. Ie' kiè dōr Skēkōl Tḱē. <sup>14</sup> Ñippōḱwakpa tso' taiē kã jai a, e'pa datse' ie' itōḱi kabaio saruru kī. Ie'pa paiēule datsi' bua'buā kiè lino ese wa, datsi' e' dōr saruruē wōñarke dalalāē. <sup>15</sup> Ie' kḱō a' tabē dōḱettsã kã yēule di'diē, tabē e' wa ie' e' alōrakã kã ulitane wakpa kī. Ie' tō ie'pa wēttseraē yēsýēsē idiché taiē wa. Skēkōl diché tã' taiē íyi ulitane tsatã, e' kēsik wa ie' tō ibolōḱpa ñatskerawã wes uvawō ñatskēwasō s'klō wa idiō yottsã es. <sup>16</sup> Itu' shã ie' paio kī itsō' kitule, e' tō iché: “Blu'pa ulitane e'pa Blú, skēkōlpa ulitane e'pa Kēkōl.”

### S'tsatḱōkwak e' aléḱa iyiwak sulusi kī

<sup>17</sup> E' ukuōḱi tã ye' isuē tō Skēkōl biyōchōkwak dur ekōl diwō kī. E' tō iché aneule dù ḱos urḱe ḱashuk a' e' a': “¡A' shkó, a' ñi dapa'úḱa chḱē tso' taiē Skēkōl wã a' a' e' katōḱ! <sup>18</sup> A' shkó blu'pa chḱa katōḱ, ñies ñippōḱwakpa wōkirpa ena wēpa kēsik suluē, esepa chḱa katōḱ a' shkó. Kabaio ena iwákpa e'pa chḱa katōḱ a' shkó. S'klōulewã kanè mésoie ena pé' kē dōr es, ñies s'dalōiēr tã' taiē ena se' esepa ena pé' ulitane chḱa katōḱ a' shkó.”

<sup>19</sup> Etã ye' tō iyiwak sulusi dē'ḱa dayē a' e' suē. Kã ulitane blúpa ena ñippōḱwakpa, e'pa tso' ie' tã. E'pa ñi dapa'úḱe ñippōḱ itkērḱa kabaio saruru kī ena ñiip-

pökwaqpa e'pa ta. <sup>20</sup>Iyiwak sulusi dë'ka dayë a ena itteköl e'pa klö'wëwarakitö. Itteköl e' tö i kè or yi a ese o' iyiwak sulusi wörki. Ese wa ie' tö wëpa e' me' wakyuë iyiwak sulusi e' kië wa ena idiököl dalöie', esepa kitö'ka. Eta iyiwak sulusi ena itteköl, e'pa batrélorimi ttsë'ka bö' me'r taië batsöriie e' a. Eë bö' wönarke taië azufre ta. <sup>21</sup>Imalepa ttélur itkërka kabaio ki e' tö, tabë dökettsa ikkö a e' wa. Eta dü tö ie'pa chkä katé taië dö che.

### Skëköl e' aléka Satanás ki

**20** E' ukuöki ta Skëköl biyöchökwak sué ye' tö eköl, e' datse ká jai a. Ie' wa kauk ter taië iskië e' kköyottsä tso'. Nies tabechka kichaie bérie e' a'tser iwa. <sup>2-3</sup>Eta ie' tö këtali kéköl klö'wëwa. Këtali kéköl e' dör Bé kië Satanás dë'ka tkabëie ká iaiaë e'. Skëköl biyöchökwak tö ie' muéwa tabechka kichaie wa batréemi kauk ter taië iskië e' a. Ta e' kkö wötëwaitö daloie ena iwakyuëitö as kè yi a ikköyerttsane. Eë ie' wötëne dö duas mil eyök as kè ie' a ká ulitane wakpa kitëria. Erë mik duas mil eyök deka, eta ie' wötsënardaë erë ekuölö è.

<sup>4</sup>E' ukuöki ta ye' tö s'blüpa kulé sué tullur ká jai a. Wëpa tullur kula' e' ki, e'pa a kawö mène s'wëttsuk. Nies wëpa kuli' tërdulune Skëköl tté ena Jesús tté mokí paké kueki, esepa wiköl sué ye' tö. Ie'pa kè wa iyiwak sulusi dë'ka dayë a ena idiököl dalöiëne'. Nies ie'pa kè e' mène wakyuë iyiwak sulusi kië wa iwötsa ki ö iulä kkue ki. Ie'pa shkenekane, eta ie'pa tö s'wëttsé Cristo ta döka duas mil eyök. <sup>5</sup>Ie'pa shkenekane e' dör s'duulewa e' tsá shkenekane. S'duulewa malepa e'pa kè shkerpakane dö mik duas mil eyök ene eta. <sup>6</sup>Wëpa shkerdakane kewe, ayëcha buaë esepa. Ie'pa dör wëpa batseo' Skëköl tö esepa ki. Ie'pa kè duö-pawa bö'tökicha. Ie'pa kanëblöraë Skëköl

a ena Cristo a sacerdotepaie. Nies ie'pa tö s'wëttseraë Cristo ta nita dö duas mil eyök ekkë.

<sup>7</sup>Mik duas mil eyök deka, eta Satanás yërdattsane wé itso' wötëulewa eë. <sup>8</sup>Ie' e' yörattsä Gog ena Magog kitö'uk. Gog ena Magog, e' wà kiane chè ká ulitane wakpa. Satanás tö ie'pa dapa'weraë nippök Skëköl ta. Ie'pa nippökwaqpa dör taië wes dayë tsëwö es.

<sup>9</sup>Ie'pa ulitane datse ká wa'ne demi Jerusalén. Eë s'batse'ra serke. Ká e' dalër taië Skëköl éna. Ie'pa tö ká e' kköiëwa shkit s'batse'ra ewowa, erë bö' biteshka ká jai a, e' tö Skëköl bolöpka ewëwa seraa. <sup>10</sup>Eta Bé tö ie'pa kitö', e' batréemi bö' wönarke azufre ta me'r taië batsöriie e' a. Eë iyiwak sulusi dë'ka dayë a ena itteköl e'pa uyanemibak. Eë ie'pa weir michoë nïë nañë.

### Skëköl tö sulitane shuleke bata ekkë ta

<sup>11</sup>E' ukuöki ta ye' tö isuë tö Skëköl tkër ikulé ki. Ikula' dör bérie saruruë. Ká jai ena ká i' e' tkashkar ie' yöki, kè iwëneia yës. <sup>12-13</sup>Eta ye' tö isuë tö s'duulewa kos iëter Skëköl kulé wörki as ishulirdak. Wëpa datse s'wimblu ké a esepa tso', nies wëpa durulune dayë a esepa tso'. S'dalöiërta' taië ena s'ësepa kos iëter Skëköl wörki as ie' tö ie'pa shulö wes ie'pa e' wamblë es. Yëkkuö tso' tsee eë, e' ki i' kos o'sö ena i' kos wamblë'sö e' tso' kitule. Yëkkuö skä tso' eë et, e' dör sene michoë yëkkuö. Yëkkuö e' ki wëpa ulä a sene michoë döraë, e'pa kië tso' kitule. Yëkkuö e' shuppëlor, eta s'duulewa kos shulë Skëköl tö wes ie'pa e' wamblë es, nies wes itso' kitule iyëkkuö ki es. <sup>14</sup>E' ukuöki ta s'duöwa ena s'wimblu ké e' kos batréemi bö' me'r taië batsöriie e' a, e' dör s'duöwa bö'tökicha e'. <sup>15</sup>Wëpa kos kië kè ku' kitule sene michoë yëkkuö ki, e'pa batréemi bö' nïe a.

### Ká jai pa'ali ena ká i' pa'ali

**21** E' ukuöki ta ye' tö isué tö ká jai tsá ena ká i' tsá, e' kè ku'ia, e' kos ské yönene pa'ali. Nies dayè kè ku'ia. <sup>2</sup> Eta ye' tö isué tö ká batse'r dör Jerusalén pa'ali e' datse ká jai a Skëköl ska'. Ká e' wër buaala wes tayè ulabatsketke e' paiò buaala iwëm wörki es. <sup>3</sup> Skëköl tkër, e' ska' ttò ttsé ye' tö, e' tö iché aneule: "Ittsó, ì'ne Skëköl de senuk s'ditsö shua. Ie' serdaè ie'pa ta kekraè. Ie'pa döraè ie' ichaie. <sup>4</sup> Ie'pa wöriö kos paikleraëitö. Kè yi duöpawaiä, kè yi eriarpaia, kè yi kköchöpaia, kè yi mik ì dalërpaia, iyi ekkè kos bakbak e' kuëki."

<sup>5</sup> Eta Skëköl tkër ikula' ki, e' tö iché: "Ye' tso' iyi kos yuökne pa'ali." Nies ie' tö ye' a iché: "Ttè i' dör mokië, e' mik be' erblömi, e' kuëki ishtó yëkkuö ki."

<sup>6</sup> E' ukuöki ta ie' tö iché ye' a: "Iwä yöne one. Ye' dör iyi wì ena iyi bata, ttè tsá ena ttè bata. Wépa ersine, esepa a kawö meraè ye' tö, sene michoë di' yök éme, kè tuè ta'. <sup>7</sup> Wépa e' aléka ì sulu ki, kè wa ye' tté olo'yaule, esepa a iyi ekkè kos ské meraè ye' tö. Ye' döraè ie'pa Këköl ena ie'pa döraè ye' ala'rie. <sup>8</sup> Erè wépa tö ye' tté olo'yé suane kuëki, wépa kè erblöta' ye' mik, wépa e' ia'u'ke ì sulu wamblekerakitö ese wa, wépa dör s'ttök'wakpa, wépa trërta', wépa wöbatsö alibchök, wépa tö iyi diököl dalöieke skëkölíe, nies wépa dör kachök'wakpa, esepa kos batreerami bö' wönarke azufre ta me'r taiè batsörie e' a. E' dör s'duöwa bötökicha e'."

### Jerusalén pa'ali kkeyëne Juan a

<sup>9</sup> Skëköl biyöchök'wakpa döka kul suéyo kewe tö tka' damirak iwa wà tkëttsa ká ulitane wakpa we'ikoie, e' eköl de ye' ska', e' tö iché ye' a: "Be' shkó ye' ta. Obeja Pupula ulabatsöketke, e' tayè kkacheke ye' tö be' a." <sup>10</sup> Eta Skëköl Wiköl de taiè ye' ki ta Skëköl biyöchök-

wak wa ye' mítser kabata bërie kakkeè e' ki. Ie' tö Jerusalén dör batse'r datse ká e' ki. Ie' a e' kkaché ye' a, e' dör Skëköl ké. <sup>11</sup> Ká e' wönarke dalölöè Skëköl olo taiè e' wa. Ká e' olo burke taiè dalölöè wes ák bua'buwa tuè darèrèè kiè jaspe es. Ák e' wöaule spaspa ena mat, e' wër sarèrèè. <sup>12</sup> Ká e' kköiëulewa shkit kakkeè buririè. E' ukkö döka dabom eyök ki böt (12). E' ukkö kos a Skëköl biyöchök'wakpa iëter eköl eköl. Nies Israel aleripa ditséwö döka dabom eyök ki böt, e'pa kiè tso' kitule eköl eköl ukkö kos e' mik. <sup>13</sup> Ukkö tso' mañat diwö tskirke, e' kke. Ukkö tso' mañat diwö mi'kewa, e' kke. Ukkö tso' mañat wì wa. Nies ukkö tso' mañat i' wa. <sup>14</sup> Ká e' kköiëulewa shkittke, e' yöule ák blubluè ki döka dabom eyök ki bök. Obeja Pupula ttekölpa tsá dabom eyök kí böt, e'pa kiè tso' kitule eköl eköl ák blubluè kos e' mik.

<sup>15</sup> Skëköl biyöchök'wak tso' ttök ye' ta, e' wa orochka yöule batsjë ká ma'woie, ese a'tser. E' wa ie' tö ká kos ñe' ma'weke, ikköiëulewa shkit ena iukkö kos e' ma'weke ie' tö. <sup>16</sup> Ká e' yöule ñikkèè, kos ibatsí dör, ekkè ishöló dör. Skëköl biyöchök'wak tö ká e' ma'wé ká ma'wo a'tser ie' wa e' wa. Ká e' batsí dör kilómetro döka mil böyök kí cien tkëyök (2.400); nies ishöló ena ikákke e' dör ekkè nies. <sup>17</sup> E' ukuöki ta Skëköl biyöchök'wak tö ká kköiëulewa shkit, e' burri ma'wé. E' dör metro döka dabom teryök kí teröl (66). Skëköl biyöchök'wak tö ima'wé wes s'ditsö tö ká ma'wé es.

<sup>18</sup> Ká kköiëulewa shkit, e' yöule ák bua'buwa kiè jaspe ese wa. Ká e' yöule orochka wák è wa; e' damiwa sarèrèè wes vidrio es. <sup>19</sup> Ák blubluè tuluulewa ká kköiëulewa e' chkiie, e' mik ák bua'buwa ku'ki ku'ki bastulur taiè. Ák blubluè e' tsá e' dör ák bua'buwa kiè jaspe; ák blubluè skà dör zafiro; iskà dör ágata; iskà dör esmeralda; <sup>20</sup> iskà dör ónice; iskà dör cornalina; iskà dör crisólito; iskà dör



berilo; iskà dör topacio; iskà dör criso-prasa; iskà dör jacinto; ibata dör amata-tista. <sup>21</sup>Ukkö dōkà dabom eyök kī böt, e' dör ak bua'buā saruru kiè perla dōkà dabom eyök kī böt. Ukkö bit e' dör perla et. Ká e' ñalé kibi e' yöule orochka wák è wa damiwā sarèrèè.

<sup>22</sup>Kè ye' wā Skèköl wé sune ká e' kī. Skèköl diché tã tajè íyi ulitane tsatã ena Obeja Pupula e'pa serke ee, e' kuekī Skèköl wé kè tã'. <sup>23</sup>Skèköl olo burke tajè ká e' a, ñies Obeja Pupula olo burke tajè ká e' kos a wes bö'wö tajè olo bur es. E' kuekī diwö kè tã', si'wö kè tã'. <sup>24</sup>Ká ulitane wakpa serdaè ká e' olo burke e' a. Ká ulitane blúpa wā íyí bua'buā tso' e' bitúraè ie'pa wā mè ká e' wakpa a. <sup>25</sup>Ká e' a nañewe kè tã', kekraè ká dör ñiwe. E' kuekī iukkö kè wötértã'wā yès. <sup>26</sup>Ká ulitane wakpa wā íyí bua'buā kos tso', e' bitúraè mè ká e' wakpa a. <sup>27</sup>Erè íyi ulitane kè dör batse'r, ñies wépa tō ì wër suluè Skèköl wa ese wamble-tã' ö s'kitö'weta', esepa kos kè döpawā ee. Wépa kiè tso' kitule Obeja Pupula yèkkuö kī, yèkkuö e' dör sene michoè yèkkuö, e'pa è dōwami ee.

**22** E' ukuökī tã Skèköl biyöchökwak tō ye' a di' kkaché etö. Di' e' dör maneneè, damiwā sarèrèè, e' dör sene michoè dí. E' tskirke wé Skèköl ena Obeja Pupula tulur ikulé kī e' ska'. <sup>2</sup>Di' e' dami ká e' ñalé kibi e' shushaè. Di' e' kkömik kal tso' wī'kè iö'kè. Kal e' dör sene michoè moie se' a. E' wörke si' bit ekkè. E' wā kiane chè tō duas ek tã iwöne dōkà dabom eyök kī bötökicha (12). Kal e' kò dör buaè kapölie ká ulitane wakpa bua'woie. <sup>3</sup>Ì kos kè dör buaè Skèköl wöa, e' kè kī' ká e' a. Ee ie' ena Obeja Pupula, e'pa tulur ikulé kī. Ee Skèköl kanè mé-sopa tō ie' dalöieraè. <sup>4</sup>Ie'pa tō ie' sueraè iwöbla wa. Ie' kiè tso' kitule ie'pa wöt-sã kī. <sup>5</sup>Ká e' ñi'weraè ie' olo tō, e' kuekī nañewe kè tã'ia ká e' a. Kè yi kī diwö ena

bö'wö kiarpaia ká suoie. Ká e' wakpa tō s'wëttsè michoè blu'paie.

### Jesucristo datskene e' kèwö dökewatke tsinet

<sup>6</sup>Etã Skèköl biyöchökwak tō ye' a iché: “Ttè kos ttsé be' tō e' dör mokie e' mik be' erblömi. Skèköl tō ittekölpa patkè ittè pakök, e' wák tō ibiyöchökwak patké ì tköraè bet, e' kkachök ikanè mé-sopa a.”

<sup>7</sup>Jesús tō ichè: “¡Ittsó! Ye' datskene bet. Ì tköke ñe tã ena ì tköraè aishkuö tã ese ttè tso' kitule yèkkuö i' kī. Wépa tō ttè e' wā iuteke, ayècha buaè esepa.”

<sup>8</sup>Ye' dör Juan. Ye' tō íyi ikké ttsé sué. Mik ye' tō ittsé ena isué, etã ye' e' tēwā wöwakköt Skèköl biyöchökwak wörkī idalöiök. <sup>9</sup>Erè ie' tō ye' a iché: “¡Se kè war! Ye' dör Skèköl kanè méso wes be' ena be' yamipa dör Skèköl ttekölpa ena wépa kos tō ttè tso' kitule yèkkuö i' kī e' wā iuteke, esepa es. ¡Skèköl è dalöiö!”

<sup>10</sup>Ñies ie' tō ye' a iché: “Ttè tso' kitule yèkkuö i' kī, e' wā tköketke bet, e' kuekī kè iblarwā be' wák è a. <sup>11</sup>Wépa e' wamblö sulu esepa múat as ikí e' wamblö sulu. Ñies wépa e' ia'uke sene sulusi wa esepa múat as ikí e' ia'ü sene sulusi wa. Erè wépa dör yësyësè as esepa kī ser yësyësè. Ñies wépa batseo' Skèköl tō as esepa kī ser batse'r.”

<sup>12</sup>Jesús tō ichè: “Ye' datskene bet. Ye' wā iskè datse mè sulitane a eköl eköl wes iser es. <sup>13</sup>Ye' dör íyi wì ena íyi bata, ttè tsá ena ttè bata. Ye' tso'tke íyi ulitane yökī kewe, ñies ye' ser michoè kekraè.”

<sup>14</sup>Wépa tō idatsi' skueke Obeja Pupula pé wa as idöttsã buaè maneneè Skèköl a, ayècha buaè esepa. Esepa è a kawö merdaè dökwa Skèköl ká a, sene michoè e' kéli wö katök. <sup>15</sup>Erè wépa dör ì sulu wamblökwakpa, wépa wöbatsö alibchök, wépa trërta', wépa dör s'ttökwakpa, wépa tō íyi diököl dalöieke, wépa wöbatsö kachök, esepa kos ate ur'kī, kè dè'wā Skèköl ká a.

<sup>16</sup> Jesús tò ichè: “Ye' dör Jesús, e' tò Skëköl biyöchökwak patké ttè i' kòs chök ye' icha eruleë e'pa a. Ye' dör s'blú bak ká iaiäë kiè David, e' aleri datse s'blúie ie' skéie e'. Ye' dör wës bëkwö olo burke dalölöë ká ñirketke etä es.”

<sup>17</sup> Wiköl Batse'r ena Obeja Pupula tayë, e'pa tò ichè: “¡A' shkó!” Ñies wépa tò ttè i' ttsé, e'pa tò ichó: “¡A' shkó!” Wépa kòs ersine éna sene michoë dí yák, esepa mú dò sene michoë dí yök éme kë tuë ta.

<sup>18</sup> Ì tköraë e' tso' kitule yëkkuö i' ki, wépa tò ittse, esepa a ye' tò ichè i' es: Yi

tò ttè i' kí kuötkéka, e' ta esepa we'ikeraë siarë Skëköl tò ì sulu kòs tso' kitule yëkkuö i' ki ese wa. <sup>19</sup> Ñies yi tò ttè tso' kitule yëkkuö i' ki e' wele yéttsa, e' ta esepa a Skëköl kë tò kawö mepa senuk Skëköl ká batse'r e' a, sene michoë kéli wö katök wës itso' kitule yëkkuö i' ki es.

<sup>20</sup> Jesús tò ttè i' kòs ché a' a, e' tò ichè: “Moki ye' datskene bet.”

Es e' idir. ¡A Skëkëpa Jesús, be' shkó!

<sup>21</sup> As Skëkëpa Jesús er buaë chò s'batse'rpa ulitane a.